

宋文鉴

吕祖谦

文硕阁

wenshuoge.com

目录

关于我们	7
提要	9
序	10
卷一	11
卷二	18
卷三	26
卷四	34
卷五	39
卷六	45
卷七	51
卷八	58
卷九	62
卷十	66
卷十一	71
卷十二	79
卷十三	87
卷十四	96
卷十五	104
卷十六	111
卷十七	119
卷十八	127
卷十九	139
卷二十	146
卷二十一	152
卷二十二	163
卷二十三	171
卷二十四	184
卷二十五	192
卷二十六	205
卷二十七	213
卷二十八	222
卷二十九	232
卷三十	239
卷三十一	249
卷三十二	258
卷三十三	267

卷三十四	275
卷三十五	281
卷三十六	288
卷三十七	296
卷三十八	303
卷三十九	311
卷四十	318
卷四十一	326
卷四十二	332
卷四十三	339
卷四十四	348
卷四十五	356
卷四十六	363
卷四十七	371
卷四十八	377
卷四十九	385
卷五十	391
卷五十一	397
卷五十二	403
卷五十三	411
卷五十四	416
卷五十五	422
卷五十六	427
卷五十七	433
卷五十八	439
卷五十九	447
卷六十	453
卷六十一	459
卷六十二	465
卷六十三	470
卷六十四	476
卷六十五	482
卷六十六	488
卷六十七	495
卷六十八	501
卷六十九	508
卷七十	513
卷七十一	518

卷七十二	523
卷七十三	528
卷七十四	536
卷七十五	543
卷七十六	549
卷七十七	555
卷七十八	561
卷七十九	568
卷八十	575
卷八十一	581
卷八十二	586
卷八十三	592
卷八十四	597
卷八十五	604
卷八十六	611
卷八十七	617
卷八十八	625
卷八十九	631
卷九十	637
卷九十一	642
卷九十二	648
卷九十三	654
卷九十四	659
卷九十五	666
卷九十六	671
卷九十七	677
卷九十八	681
卷九十九	686
卷一百	692
卷一百一	697
卷一百二	701
卷一百三	706
卷一百四	713
卷一百五	719
卷一百六	725
卷一百七	735
卷一百八	741
卷一百九	747

卷一百十	752
卷一百十一	759
卷一百十二	767
卷一百十三	778
卷一百十四	784
卷一百十五	790
卷一百十六	796
卷一百十七	803
卷一百十八	809
卷一百十九	814
卷一百二十	820
卷一百二十一	827
卷一百二十二	836
卷一百二十三	845
卷一百二十四	851
卷一百二十五	858
卷一百二十六	864
卷一百二十七	870
卷一百二十八	875
卷一百二十九	880
卷一百三十	886
卷一百三十一	893
卷一百三十二	901
卷一百三十三	914
卷一百三十四	919
卷一百三十五	928
卷一百三十六	934
卷一百三十七	939
卷一百三十八	947
卷一百三十九	952
卷一百四十	957
卷一百四十一	963
卷一百四十二	970
卷一百四十三	974
卷一百四十四	980
卷一百四十五	986
卷一百四十六	995
卷一百四十七	1.002

卷一百四十八	1.008
卷一百四十九	1.013
卷一百五十	1.022

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部八

宋文鉴 总集类

提要

【臣】等谨案宋文鉴一百五十卷宋吕祖谦编案李心传建炎以来朝野杂记称临安书坊有所谓圣宋文海者近岁江钊所编孝宗得之命本府校正刻板周必大言其去取差谬遂命祖谦校正于是尽取秘府及士大夫所藏诸家文集旁采传记他书悉行编类凡六十一门又称有近臣密启所载臣寮奏议有诋及祖宗政事者不可示后世乃命直院崔敦诗更定增损去留凡数十篇然迄不果刻也此本未知为祖谦原本为敦诗改本朱子语录称文鉴收蜀人吕陶论制师服一篇为敦诗所删此本六十一卷中仍有此篇则非敦诗改本确矣商辂序称当时临安府及书肆皆有板与心传所记亦不合盖官未刻而后来坊间私刻之故仍从原本耳同时张栻遗朱子书议祖谦此书无补于治道无补于后学并责其承当编此等文字非所以成君之德其论似高而实过朱子语录记其选录五例亦防论其去取有未当然陈振孙记朱子晚年语学者曰此书编次篇篇有意其所载奏议亦系当时政治大节祖宗二百年规模与后来中变之意尽在其间非选粹比也则朱子亦深许之矣乾隆四十六年五月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

序

宋文鉴序

宋淳熙中吕成公祖谦奉朝防裒辑建隆以后建炎以前诸贤文集精加校正取其辞理之醇有补治道者以类编次定为一百五十卷书成上之命名皇朝文鉴周益公必大为序当时临安府及书坊皆有剞版歳久散佚其书传于今者甚鲜近时提督浙学宪副张和节之偶得是书以示严郡太守张永邵龄邵龄欣然命工重钁诸梓以广其传其问题识仍旧欸目无改则以摹本翻刻弗别缮写愚谬误也邵龄以序见属欲以识歳月云窃观汴宋之时光岳气完贤才众多周程以理学显欧苏以古文倡韩范以相业着其他文人才士后先相望讽咏之间有规戒焉议论之下有褒贬焉上足以格君心而扶人纪下足以明善恶而别邪正所谓文之有补于治道者如是然则文以鉴名岂徒辞章云乎哉先是太平兴国中尝诏修太平御览防府元 文苑英华三书各千卷太宗日览二卷因事有缺则暇日追补曰开卷有益朕不为劳方孝宗锐志恢复之秋干戈未息而能留意文事若此岂非克守家法者欤虽功业未底于成而国势自是益振南渡以后称君贤者必曰孝宗是岂诘兵之力要亦右文之效洪惟我朝混一区宇于兹百年涵养既深大音斯振羽翼圣经铺张鸿猷著作之功于斯为盛必有彙次而传于世者是予不敏姑书此以俟天顺八年歳次甲申冬十二月之吉归田前通议大夫兵部左侍郎兼翰林院学士知制诰经筵官淳安商辂序

卷一

钦定四库全书

宋文鉴卷一

宋吕祖谦编

赋

五鳳楼赋 梁周翰

伊京师之权輿也遐哉邈乎验河图之象按輿地之书宅禹贡豫州之域距天文辰马之墟因四履建侯之地为六代兴王之居城浚而都派河而渠结坤之络振干之枢星躔栉堵我民之卢海漕山廩我田之租势雄跨胡气王吞吴茫茫万国鱼贯而趋惟圣皇之受命应期运而握符光潜跃于龙德践元亨于帝衢道德何师尊卢赫胥揖让何比陶唐有虞英略神武威懔八区封豕必诛长鲸尽剝虎皮包刃鹄板搜儒坠典皆索阙政咸铺成天下之大务若雷奋而风驱乃顾京室时行圣谟陋宸极之非制稽紫垣之旧图且曰不壮不丽岂传万世禹之卑宫蓋勿暇之计尧之茅茨非经久之制矧象魏之县法伊亿兆之所视况我力如天我费如地不渔尔民不牟尔利一毫之费差足为易乃诏共工度景之中因旧谋新庀徒 功台卑者丰棟易而隆橡斲而砉去地百丈在天半空五鳳翹翼若鹏运风双龙蟠首若鼇戴宫丹楯霞绕神光何融朱檻虹植晴文始烘绣楣焜燿雕栱玲珑椒壁涂赭綺窻晕红双阙偶立突然如峰平见千里深映九重奔星坠而交触灵景互而相逢门呀洞缺若天之裂纵举百武横驾六轍金铺烁人光景明灭舞阳之力莫得而排叔梁之力胡可以抉其下则冠蓋葳蕤剑佩陆离车如流水待漏而驰驾肩排踵兼蛮浑夷万众纷错鱼龙尊卑咸去来之由此竞奔凑于玉墀亶皇风之无外岂朝盈之有时三事庶尹乃拜表萧墙谒帝未央以落大壮登譟永昌曰

元圣明兮帝道昌威四海兮君万方峙高阙兮冠百常赫宋德兮垂无疆瞻天顔兮献壽觴愿君王兮长乐康帝曰俞哉尔觴且置当聴朕言庶晓朕意顷于戎马之暇详窥歴代之纪乃知乎夏德之衰琬室自庇商政之壞琼宫大侈楚王章华一身何寄秦皇阿房三世而弃汉武栢梁孽火随炽陈后三阁义师寻至岂非乎祸生于渐欲起于恣亦如崇饮不已必至昏醉嗜色不已必至乏瘁迁怒不已必絶人祀穷兵不已必暴人鬻甘防不已必杜忠义溺谗不已必斥贤智亡国之君未尝不尔朕皆知之得以趋避淫于土木雅不如是美其成功良以为愧不举君觴恐骄朕志其大者天地所重者神器尾虎足冰终日惴惴当共重之勿使颠坠谨谢公卿无忘纳海羣臣乃退咸呼万歳

籍田赋 王禹偁

臣谨按周制孟春之月天子亲载耒耜籍田所以事天地山川社稷先主醴酪粢盛于是乎取

之恭之至也自周德下衰礼文残缺故宣王之时有所公之諫秦皇定霸鲜克由礼汉祖龙兴日不暇给孝文孝景始复行焉昭帝防田亦其义也后汉永平中明帝东巡耕于怀县非古制焉魏氏亲耕阙百官之礼盖草创尔晋武太始之年略修坠典宋文元嘉之代亦举旧章齐用丁亥之辰梁以建卯之月后魏北齐沿革有异隋朝唐室文物可观太宗行之于前明皇继之于后自兹已降废而不行将焕先农必待真主皇家享国三十载陛下嗣统十四年武功已成文理已定乃下明诏耕于东郊百执悦随三农知劝礼官博士蹈舞而草仪甸师嗇夫譟咏而供职方拾遗直史馆王禹偁再拜而颺言曰耕籍之义大矣哉千畝之田三推之礼所以教诸侯而事上帝率人力而成歲功实邦国之彝章皇王之大典昔潘安仁赋之于晋岑文本颂之于唐今王道行矣王籍修矣神功帝业焕其有光宜畅颂声以播乐府谨上籍田赋一章虽不足形容盛德亦小臣勤拳之至也其词曰十四年兮帝业遐宣寰区晏然乃顺考于古道将躬耕乎籍田务本劝农稽前文而备矣事神教养举坠典以行焉万国欢心而恻恻百官供职以防防草仪注于有司议沿革于遗编筑坛墀之三陛开阡陌之百防文物声名合礼经而有度旌旗衣服应方色而不愆既而届孟春择元日太史先奏天子将出是月也適人徇路星鸟中律当东郊之迎春是东作之平秩皇帝于是即斋宫辞帝室戒锡鸾严警蹕乘青辂以有威俨朱紘而无逸佩乎玉也悬黎之色苍苍载其旂焉干吕之云郁郁属车负播殖之器后宫献穠穰之实红縻黛耜服葱蒨以陆离缥轭绀辕驾苍龙而飘飏太常之礼具举司农之属各率甸师掌舍警御陌以惟严封人野庐设壇宫而靡失于国之东千官景从风清尘而习习雨洒道以蒙蒙时也木德盛阳气充春芒甲坼青青兮防防春土脉起油油兮溶溶冠蓋蔽野佩环咽风状浮云兮随应龙旂帜张日车徒塞空若众星兮环紫官修农事以惕惕袭春服之重重尔乃配少皞祠先农尸祝无愧豆笾以供太牢之牲荐之而肥腍太簇之乐奏之而春容于是修帝籍劳圣躬抚御耦以无怠履游场而有踪将循乎千畝之制岂止乎数步之中耕钩盾之弄田但矜儿戏脩建康之春籍未焕农功有以见万乘之尊三推而舍或五或九降杀之义有伦尔公尔侯贵贱之班相亚嗇夫洒种以斯毕庶人终畝而告罢千耦其耕焕乎礼成播百谷兮率人力譟载芟兮扬颂声将见乎余粮栖亩腐粟如京神仓令纳乎黍稷以备粢盛廩牺氏收其藁秸用饒牺牲亲畎畝兮化被重民天而教行自得训农之实非贪慕古之名然后下青坛归絳阙百姓知劝羣后咸谒在镐之宴啓譟虞之音发献万壽兮懽呼奏九韶兮鏗越开三面以行惠宥五刑而审罚恩流于孝悌力田德被于雕题獬发兴五土之利固必躬而必亲同三代之风复不矜而不伐大矣哉籍田之礼岂三年而不为躬耕之义将百代而可知我所以举久废之礼定不刊之仪虑弗勤于四体将有害于三时务农桑兮为政本兴礼节兮崇教资民乃力穡歲无阻饥神农斲木之功我其申矣后稷播时之利我得兼之供秬鬯以斯在介丰年而有期丕显事天之礼诞歌祈社之诗祀山川兮神鉴明矣配祖考兮德馨遠而永锡纯嘏用光孝思乃作颂曰倬彼东郊公田是辟大君戾止言耕其籍帝籍既脩乃及公侯亲尔来报勤尔田畴言采黍稷祀于圜丘亿万斯年以承天休又曰倬彼东郊耕坛其崇大君戾止言训其农农功既督乃知荣辱尔家以给尔人以足言奉烝尝享于此屋亿万斯年以介景福

端居赋 种放

予尝阖扉而居不乐他游未尝以一词辄干公侯以借浮誉门外苔封草織非知己之深者无一造其居或罪予曰嗟乎明逸上有明天子贤执事子独贫且贱耻也又易称君子以贞凶子

其有是乎予退而作端居赋山鸟寂寂梧陰昼碧穷居退夫耿然不悵精神沮而徜徉冠履陋而蹢躅类沈酣而未醒岂执迷而莫析固貽讥于独善尚多言而自释鲸鹏虽大无风波而何益胡粤万里舍舟车而奚适在圣贤虽有志于下民孰能无位而立辟况予才不造于往哲名器敢期于苟得在得丧不忘于明圣颠沛必思于正直终皮弁以自守恶鵷冠以假饰进不妄而嘻嘻退不怨而戚戚故孟轲有言虽有磁基不如逢乎有年顏氏防圣乐在陋巷亦将育乎令德兹穷通之自信匪古今之可尤顾窃位而择肉兮予诚自羞宁守道而食芹兮中心日休予将息万竞消百忧養浩气于蓬茅之下饮清源于渊默之流侶鸞鹄兮云霓之表终焉泯众议之啾啾

大搜赋 丁 谓

司马相如扬雄以赋名汉朝后之学者多规范焉欲其克肖以至等句读袭征引言语陈熟无有已出观子虚长杨之作皆逖取傍索灵竒瑰怪之物以壮大其体势撮其辞彩笔力恢然飞动今古而出入天地者无防然皆人君败度之事又于典正颇逖今国家大搜行旷古之礼辞人文士不宜无歌咏故作大搜赋其事实本之于周官歷代沿革制度参用之以取其丽则竒言逸辞皆得之于心相如子云之语无一似近者彼以好乐而讽之此以勤礼而颂之宜乎与二子不类辞曰

仲冬天子严祀事答神祐仁农隙谨搜狩踵教本稽典旧礼容左右武事前后等尊第卑上长下幼人民丰浓物色繁富蓋亦阅军实于介冑非徒恣游畋于禽兽者哉前期命虞人以采莽苍芟拥遏草木伙够原隰砥阔视军众寡度地本末高表四立坦场中豁限田防而兰织志辕门而旌揭青龙白虎拥护乎行在之所左防右毕分张乎侍卫之列风萧萧而野鸣云陰陰而昼结防鹿狼狽以投林狐狸踉跄而迁穴由是司马举职羣吏咸秩各有司存皆给名物备小驾而六龙集开武库而五兵出轂车金玉旂章日月防牙刺举旄头云密画蚩尤于旆颠匣干将于剑室騊駼妥贴以负輶骠騊徘徊而转轆召饮飞以前导命 武而殿卒目恍罗列神惊比栢师勅战法帅董戎律始建旗以誓众亦斩牲而戒失所畋之野备物咸毕外事尚刚戊日惟吉上乃乘七驂拥六军白旄方下于北极黄纛已擎于应门服章天地车驾风云日随月侍岳走川奔列缺收声而聽蹕丰隆鼓力以扶轮队仗乎八百诸侯殿呼乎七十二君烟霞错杂以垂地河汉颠倒而失源灵祗慑栗怪物腾蹇顛帝苍黄而废职 冥倏闪以驰魂俨方离于大内盛已列于平原褫表云已銜枚而前虵阵翼张虎贲环匝鼓以三阕围不四合律戎索以济济饰军威而 铎再振而铙再鸣弓斯张而矢斯挟尔乃驱百兽当一人弓工操轩辕之弧奉御罗氏设商汤之网拥羣熊罴之爪距摧折虎豹之心肝裂分射必三兽发则五羆羆逆毛羽星颺角牙肉堕庖丁之刀血濺鲁阳之戈诸侯卒事以俨雅百姓突围而交加上方斂綏以惨怛众乃靡旗而誼哗围开一方憫尽杀也舍顺取逆彰怀来也出表不顾耻逐奔也等别三杀贵宗庙也得匪上以显孝思下以不 乎鸟兽之肉不登器者无取貔虎之士罔用命者有诛警进退于钲鼓习威仪于卒徒戎事同銓轂回军声振而万国耸立天仗指而九门洞开郊饁兽而礼之勤也庙献禽而神其享哉以劳饮至以能防勲刑必加于共弃爵乃及乎众尊如是则不曰暴天物不曰教民战于以辩名号而训仁义于以昭文章而明贵贱也下臣窃详三代之书颇究二王之典大阅之制昭然义见军旅之事阙教则失利祭荐之制非理则不献

施信赏率怠倦使夫民知方兵识变莫若示搜畋而敦大劝也后之王者反礼叛经荒乐诛杀放怀荡情借如汉武于古详明博搜圣书广召文英讲评谟训华饰声明凡曰大乐阙焉不行乃穷畋极猎夸国耀兵隔蜀罗设跨秦戈横靡卯夭死獠獠愁声以至欺猛狂而手格喜暴恶以力争岂残忍之足耻唯豪勇之所京下垂歷代不能变更魏晋而下离合寰瀛咸局促以仅守曷礼乐之能兴粤抵李唐时惟防昌彼文明二帝实驱驰百王大畋之义犹或废亡者若陛下自膺寶命临万方动必法度举皆故常缉羲轩之絕绪新姬孔之旧章郊焉而五帝肃肃享焉而百神洋洋九年三月升于绀坛十有三年躬耕籍田心以民本事由礼先谪王满嗜欲乎驰骋斥帝彻瞽瞍乎神仙故天地不能藏祥而秘瑞日月无以示谴而戒愆甘露降而区宇泽景星烛而氛祲蠲总治本操化源措虑寂尔存神泊然是以发狂之心无自入焉下臣以谓大搜之典周公制于往古陛下行于今兹中间数千余祀咸杳昧而不知彼唐汉之士修崇礼仪封禪之征诞明堂之說竒此数事不详于尧舜文武之书臣宁敢狂斐而陈诸所以赋大搜而歌盛礼也俾千古知至德之巍巍

洞庭赋 夏侯嘉正

楚之南有水曰洞庭环带五郡淼不知其防百里臣乙酉夏使岳阳抵湖上思作赋明目披襟而观之则翼然动足然跂栗然骇愕然眙恍若驾春雪而轼霓浩若浮汗漫而朝跻退若据太山之安进若履千仞之危懵若无识智若通微跛若不倚踰若将驰耳不及掩目不暇逃情悸心嬉二三日而后神始宅气始正若此不敢以赋为事者二年然眷眷不已一日登崇丘望大泽有云崕兮兴歔兮止兴止未霁忽若有遇由是渍阳辉沐芳泽覩一异人于岩之际霞为裾云为袂冰肤雪肌金玦玉佩浮丘美门斯实其对因言曰若非好辞者也臣曰然然则若智有所不通识有所不穷用不通不穷而循乎无端之纪若得无殆乎臣又曰然然至极则物应思精则道来嘉若之勤无晬无谈吾为若称云太极之生曰地曰天中含五精五精之用而水居一焉水之疏迹则为江兮远则为河积则为潞兮总则为湖若今所谓洞庭者杰立而孤廓然如无区其大无徒含阳字陰元神之都暧暧昧昧百川不敢逾有若神者有若宾者有若仆者有若子者有若附庸者有若娣姒者有若禹防涂山武巡牧野千出百防咸处麾下每六合澄静中流回睨莽莽苍苍纖霭不翳太阳望舒出没其间万顷咸沸彊而名之为巨泽为长川为水府为太渊纵之不逾局之不卑乍若贤人以重自持诱之不前犯之愈坚又若良将以谋乎邊澎澎潏潏浩尔一致又若太始未有仁义冲冲漠漠二气交错又若混沌凝然未凿此乃方輿之心胸溟海之郭郭也三代之前其气濩落浩浩滔天与物回薄灭木襄陵无霁无廓上帝降鉴巨人斯作乃命 夷授禹之机隧山堙谷淶源畅微然后若金在镕若木在工流精成器夫何不通是泽之设允执厥中既巽其性遂得其正有升有降有动有静臣应之曰升降动静可得闻乎神曰水之性非圆非方非柔非刚非直非曲非 非黄划象为坎本乎羲皇外婉而固内健而彰降以姤始升以复张其静处陰其动随阳六府之甲万化之纲式观是泽乃知天常若乃四序之变九夏收处烘然而炎沸然而煮羣物鸿洞烁为隆暑泽之作颀然其容若去若住若茹若吐灵趋怪覲沓不可覩蒸之为云散之为雨倏忽万象如还太古真可嘉也若乃秋之为神素气清泚肃肃脩脩羣籁四起泽之动黝然其姿若挺若倚若行若止巽宫离离为之腾风苍梧崇崇为之供云四顾一色黯黯氤氲其声瀾瀾若商非商若征非征东凑海门一浪五千里又足畏也言其状则石然而骨岸然而革气然而荣降【户江切】然而脉有山而

心有洞而腹有玉而体有珠而目穹鼻孤岛呀口万谷臂带三吴足跬荆巫或跂然而望或翼然如趺彭蠡震泽诘可云乎臣又问曰泽之态已闻命矣水之族将如何居神曰大道变易或文或质沈潜自遂其类非一或被甲而遭或曳裙而仟或秃而跋或角而蜿或吞而呀或呿而牙或心以之懈或脩以之暇或修臂而立或横鹜而疾或发于首或髯于肘或俨而庄或毅而黝彪彪玢玢若太虚之含万彙各备其生而合乎羣者也臣又问曰若神之资其品何如也神曰清矣静矣丽矣至矣邈难知矣肇于古古有所未达形于今今有所未察非希非夷合其心于自然然后上天入地把三根六况水居陆处夫何不烛彼鯢鲤之贤饕龙之仙乃吾之肩也其余海若天吴阳侯神胥龔龔而游曾不我俦臣又问曰易称王公设险是泽之险可以为固而歷代兴衰其义安取神曰天道以顺不以逆地道以谦不以盈故治理之世建仁为旌聚心为诚而弧不暇 矛不暇锋四海以之而大同何必持险阻何必据要冲若秦得百二而帝齐得十二而王而山为金其水为汤守之不义歟然而亡水不在大恃之者败水不在微怙之者危若汉疲于昆明桀困于酒池亦其类也故黄帝张乐而兴三苗弃义而倾则知洞庭之波以仁不以乱以道不以贱惟贤者观之而后得也于是盘旋徙倚凝精流视罄以辞对倏然而晦

矮松赋 王 曾

齐城西南隅矮松园自昔之间馆此邦之胜防二松对植卑枝四出高不倍寻周且百尺轮囷偃亚观者骇目蓋莫知其年祀亦靡记夫本源真造化奇诡之絕品也曾咸平中忝乡荐登甲科防被宠灵踐歷清显防三十载前歲秋始罢冢司出守青社下车之后省闾里访故旧则曩之耆耄悉沦逝童冠皆壮老邑居风物触目迁变惟彼珍树依然故态窃谓是松也匪独以后凋克固歲寒抑由拥肿支离不为世用故能宅兹臯壤免于斤斧向若负构厦之材竦凌云之榦将为梁栋戕伐无余又安得保其天年全其生理哉感物兴叹聊为赋云聊惟中齐之旧国乃东夏之奥区有囿游之胜致直防阨之坤隅伟茂松之駢植軼众木而特殊上轮囷以夭矫旁翳荟而纷敷广庭庑之可蔽高寻常之不逾枝拥阨兮横亘根蹙缩兮盘纒徒观其前瞻林岭却枕康衢宅寶势兮葱郁据右地兮膏腴类蟠蛰兮神蛰呀腾倚兮虎防将拏攫兮未奋忽伏窜兮争趋色鬬鲜兮欲滴形诡俗兮难图遠而望之蔚兮若搏鹏之出沧海迫而察之默兮若方輿之承寶蓋蠹洞口之归云堆嵒阿之宿靄谈挥尘兮何多被集翠兮增汰度朔吹兮飈飈含阳晖兮晦蕩吾不知其几千歲起毫末而硕大昔去里兮离邦攀綠条兮彷徨今剖符兮临郡识奇树兮青苍恍光景兮遡迈嘉歲寒兮益彰叶氤氲兮不改情眷眷兮难忘异古人之叹柳协予志之恭桑信矣夫卑以自牧终然允臧效先哲之俯倭法幽经之伏藏愿局影于涧底厌争荣于豫章鄙直木兮先伐惧秀林兮见伤幸高梧之垂防愧修竹之联芳鸾乍迷于枳棘鷄每悞于榆枋媿周雅之躋地符義易之巽牀既交让以屈节复善下而同方自储精于甘实不受命于繁霜客有系而称曰材之良兮梓匠之攸贵生之全兮防庄之所美苟入用于钩绳宁委迹于尘滓俾其天性而称珍曷若存身而受祉纷异趣兮谁与归当去彼而取此

声赋 张 咏

声赋之作岂拘模限韵春雷秋虫之为事也蓋取诸声成之文王化之本苟有所补不愧空言尔赋曰

罔象迷冥大人忽生混沌初窍呀然震惊二仪吐形万灵吐英天机动制轧而为声故形有美恶焉声有小大焉伊物类之动作俟人事而克全至于大雷隐空万窍吼风不为之隆品物磨臬羽足动发不为之末末若人声与天通功与物长雄口吻之啓出于厥躬道机之张腾凌鸿蒙其所闻者羲黄唐虞继踵而至宇宙隘其神造化侔其智在声之伟也得不得不回天而动地观其得一之发清清泠泠凉寰洗瀛万类聴之如懵而醒仁信之发溶溶奕奕呼道振德万类聴之如日破黒曰礼曰义相迭而起鸣孝响悌骇心清耳万类聴之如愁得喜广成五老闻而啓齿曰是何帝皇之声也如此九道交讹华夷和歌蠢动鼻息欢哈实多其在物也昭昭融融万縁和同万籁响空答天之功其在人也万心气平万口宣腾云门六英答君之声故知五音八声声之枝欵金石丝竹声之器欵若本不正而声不清何尝动天地泣鬼神而有诸三五迭生异业同声唱古寡应呼今得精仪事以之繁防时风为之劲清作礼者有周旋之矩制乐者有大武之名故圣人之音铿如鏘金圣人之治潺如流水加以商辛夏癸行无辙轨情欲沸空淫娃盈耳民不知告政声遂毁幽厉纵作心胡可度唱僻者轻脱和伪者交错鼓钲之响日驰礼义之风日薄王道民政溃然投壑攻乎亡国之音聚为终身之乐秦怪一声天摇地坑烘赫火烈荒茫海倾阿房辇材枿山回紫塞筑垒旬轰震雷钳圣愚儒四海睽孤刮剥亡命痛脑连胫于是民失其业怨口喋喋野薄其农荆榛飈风刑失其矩民哀无所兵革填委死为怨鬼故怨之为气也散为器尘积为屯云闭郁六合阳灵不曛怨之为声也烈风相倚怒涛兼起鬼哭于郊神号于市川谷为之鬬击山峦以之崩圯陈吴一呼而宗社瓦毁天穷地终丑声不已泊于汉唐惟高与光太宗纘尧开元嗣皇智冠絶古气凌昊苍倚天凭怒即动荡于八荒按剑大呼即交映于中方借力者黎猷助声者贤良亦不能广仁义于邇奏使道德之激扬掩商秦之余韵系唐虞之声芳者也未若我后凝神定思诚求理致与圣作为难于易惟礼是崇惟仁是嗜叩乎杳冥清静以聴闻古谬惑皇心不平于以忠良是旌息嗟吁之声不肖是黜息滥谬之声均物惻隐息哀怨之声厚施薄敛息流亡之声四人是别息浇竞之声狴犴是理息冤枉之声道德是守息兵革之声人劳是恤息雕斲之声小人是遠息邪佞之声正音是奏息慆懣之声奇哉壮矣尧嗟舜惊致章濩之调下觉唐尧之颂轻浩浩荡荡无得而名异声之袭也扬溢昭灼上贤下愚既欢且谑鸟兽跄跄防虺跃跃信千载之一时与有生而同乐余欲引声而作未知何若

春雪赋 钱惟演

癸亥歲二月晦讫季春旦霰雪杂下平地二尺寒威于是凌厉阳和为之潜伏问诸农曰田有伤矣问诸圃曰果不实矣考诸史曰陰阳戾矣予守土者岂不以民为心因怆然而赋

春阳以中百昌俱作彼陰冷而忽兴何飞霰之骤落始防蔽于阳鸟遂潜藏于天幕冰霰杂下温寒相搏才袞袞而纷揉更霏霏而交错因方就圆填溪满壑迷匹练于素鹇混高云于皓鹤七盘顿失乎巖嶮二室仅存乎 嶧我有爰田既鋤既耰我有条桑且楸且柔岂灭裂而是取顾沃若之待收罹此暴殄予心则忧亦有庶草羣木千芳万菲粉落絮起珠倾玉碎建森纚之高牙垂陆离之长佩掩藩匭之郁栖覆台塘之畏【于鬼切】垒【力轨切】病李僵于井干芳兰沈于林荟有卉萋萋有鸣嚶嚶移荐草以无所恋危巢之欲倾顾泽中而罢钓之垆上而辍耕手足痺痠吾道不行吾乃诗叹麻衣歌悲黄竹兔园靡召于游客弇山逐休于王属隔瑶

水之来使没骚人之行穀东郭叹不完之衣梁山作思归之曲岂由汉女之冤遂至卫民之哭已而违时令反天常气虽凄而不烈风虽暴而不扬忽曜灵之委照伫消释于辉光

君可思赋 杨 亿

夫生民在世兮事之攸同子之能仕兮父教之忠念委质而勿贰兮本陈力以首公虽代耕而俸禄兮曷期侈以图丰亦怀材而待试兮将乘时而奋庸夫何直谅不回孤坚寡偶贯歳寒而勿改兮濯江汉而无垢中履絜以好修兮外葆光而虚受筮仕逢亨奏技承平濯鳞禁沼拊翼丹楹尧文载郁禹律惟精荷紫囊而防笔兮从单于之勒兵霜飈刮骨流尘满缨自此研精藻翰局影天局毫残鸡管香消鹤绂鬓凋屋幘心悬閤铃矧乃郢坊酒醇武都泥紫版急鹄头书详马尾石屋防书鸿都约史攬撫闕遗发明统纪窃企迹于前修庶同风于古始虑罔越思身亦勤止宣汉德于无穷纳舜诏于美美志本勿矜言乎有凭非施劳而伐善岂扬已而害能每燥吻而踟躅屡抚心而屏营激谈泉而载漑鼓思风而弗兴感外邪而遭疢殆五日之沈冥怅官事之孰了汨劳府而靡宁岂望夫连城之报岂爱乎画饼之名羌民生之朴忠希在昔之遐踪思不出位罔贪天功慕台骀之业官肯有二事念犁弥之辞赏愈激厥衷庶克终于雅尚聊有埤于素风奈何虺心昌炽锦言萋斐蝇薨薨以交乱犬狺狺而迎吠贤登朝而共嫉女入门而各媚乍緝緝以翩翩竞翕翕而訛訛结合隐邪締造疑似俾朕师之震惊恣星箕之华哆幸大度之不校專巧言而纵毀胡能伤君德之巍巍徒以动贤心之惴惴然后饰卫鹤之华轩銜黔驴之短技窃名器以宴居絶上下之愧畏俟贯恶之既盈将幽神而共弃若夫睟穆东房奚望清光定心服物伟量包荒耿求贤兮不及慎乃宪而惟康延登体貌义问覃详伊蓬心之受惠怜橘性之有常寘之近署采其寸长遇忠见察浸润无伤犯四禁而多恕缓千编而不遑丁宁一札在宥三章践丹涂而乃春宴华林而醕觴动羣伦之耸羨曷丹心之弭忘盛宪多忧长卿沈疾退迹东冈之陂举首长安之日色变愁宾谗消病骨周田食粟聊彊饭于数升江径诛茅姑却扫于一室岂不念悲哀作主眴思君羈心蘂苦别绪丝棼防江一防幸天譴之接眄成周五世庶宰树以参云感骚人之遗韵聊抒意于斯文

宋文鉴卷一

卷二

钦定四库全书

宋文鉴卷二

宋吕祖谦编

赋

皇畿赋 杨侃

有赋家者流欲驰名于当世思着咏于神州忽念前古深怀景慕诵二京于张衡览两都于班固于是辍卷意慙阁笔心伏让而谓臣请书简牋臣辞不获已而谓之曰予读二子之赋而知两汉都邑之制宫殿之丽而未知大宋畿甸之美政化之始也予幸得职采风谣官参儒雅千里之郊圻是巡八使之轺车斯假若夫大邑名城神臯沃野画地可记濡毫可写至于宫禁之深严予未闻也都城之浩穰众所覩也是故彼述其内子言其外盖万分之举一难尽述而备载昔者唐纲不振国鼎将迁俄梁室之革命啓浚都而应天既观法于左崦右陇亦取则于西涧东瀍大矣雄图昭然圣谟谓陈留天下之冲要谓大梁海内之膏腴汉祖得之则齐楚之敌败亡相继咸就擒而即诛梁王守之则七国之师不敢西向尽为馘而为俘实王气之长在宜万世而作都也莫不广封沟设险固襄平割宋之美田戴邑裂曹之沃土滑分属邑之二城陈减太康之万户颍川之鄢陵扶沟荥阳之中牟阳武咸命落编民于州籍升地图于天府故得雄临九州陋视三辅经营歴于五代法则垂于万古皇宋之受命也太祖以神武独防太宗以圣文诞敷平江表破蜀都下南越来东吴北定并汾南取荆湖是故七国之雄军诸侯之陪臣随其王公与其士民小者十郡之众大者百州之人莫不去其乡党率彼宗亲尽徙家于上国何怀土之不闻甲第星罗比屋鳞次坊无广巷市不通骑于是有出居王畿挂户县籍兴产树业出赋供役者矣岂比夫秦选户口于咸阳汉徙豪杰于陵邑魏将实于河南驱冀民而是入也今圣上之在东宫也尊以皇储尹兹京邑视政之初民讼云集莫不察之以情伪辩之以曲直发伏禁奸亲剗繁剧既而桴鼓不鸣豪右敛迹吏不敢欺民用怀德若乃龙楼晓出奉法谨身教民以事父也亲拜师傅降礼国储教民以事师也公退则侍讲在前出入则四宾是翼尚老尊学与民为则是时王畿之内易俗移风以至正南面居域中由内及外化行令从是君上德惠素立而正教早崇也若乃鋭旅百营高城千雉孙武教阵吴起抚士其齐如林其猛如虎手击利剑足张彊弩跃马夺槊投石拔距入则训练出无征战身闲赏厚家有余美是故拥彊兵卫近甸如大郡雄藩为屏为翰者且有九县【尉氏咸平陈留雍丘襄邑大康考城东明阳武也】天设二渠曰蔡曰汴通江防海萦畿带甸千仓是兴万庾是建杜预主计刘晏司漕何贡何输吴粳楚稻月致百万犹责其少汉之太仓积粟红腐使彼粒而计之未及我斗量之数成王之庾万箱以供未若我千艘往来运江淮而无穷是故备九年之储充六军之给当津处要山积云入者复有五邑【陈留雍丘襄邑尉氏咸平也】若乃总戎者贵领専城宰邑者上

应列星簿既资高尉亦秩清率兵守戍者五镇【建雄义声园城马拦万胜镇皆置甲士防守有使臣掌领之】统骑分巡者两路【府界东西两路各置都同巡检二人】城皇之外游徼四布【京城四面巡检各一人】桓桓八臣是警是防【谓东西两路泊京城四面巡检使臣共八人也】郊原膴膴春草萋萋边烽不警牧马争嘶廋空万枿野散千蹄陂闲牧南【汴河已南县邑长陂广野多收放之地】沙平走西【中牟已西地广沙平尤宜收马】一饮空川一屹空原去如雾散来若云连地广马多古未有焉若乃任土出于民心献芹比于古俗园茄早实时果先熟瓜重南门笋宜修竹鬻于市兮利既兼倍进于君兮恩必霑流时或戴胜降桑蝼蝈未鸣野人登麦以先至蚕妇贡丝而已成别有襄陵之桃阳夏之柿朱樱宜于谷林丹杏出于尉池其或阳乡千树之梨扶乐千树之栗比封千户之侯亦何让于昔日咸壤宜北乡之羊野蓑美东邑之豕鱼鼈鳧鴈之盛西有陂兮万顷菱芡莲藕之美东沿堤兮百里其或仲冬之月礼尚进鲜介麋素出于逢泽狡兔复多于梁园乃命菜田于虞人选徒于司马四校毕陈六飞夙驾何千乘万骑之驰骋满四通五达之郊野西或过于圃田之藪东或出于平台之下乃有孟贲之徒鸟获之类襁褐而来叱咤而至搏虎兕击熊豕 豹逆曳白狐生致复有负羽从猎之人控 伏兽之士落孤鴈于马首贯双雕于云里然犹示之以三驱之仁宽之以一面之网不使兽殍于下禽尽于上何长杨之猎自谓于禽多云梦之畋敢夸其地广哉图书载详境土斯见开封则汉志之名邑今二赤之首冠祥符则天书之降年易新名于旧县防秸之入斯为近甸若乃百万众之分营十二市之环城噐然朝夕异彼郊坰其东则有汴水之阳宜春之苑向日而亭台最丽迎郊而气候先暖鸢噉何早花开不晚瞻太一之清宫壮先朝之命工构宇烟霞之外出俗噐尘之中效仙人之楼居慕老氏之 风青青道遶千畝何田端拱之初借于此焉黛耜一执青史千年登蓼隄以东望见高台之百尺居道之南在冈之北下有广场可驰可逐我皇帝初即寶位大阅军旅亲乘戎辂习战于此士马秋劲甲冑晨整止凭轼以将观众无哗而是聴列八阵之形申三令之语肃将帅严部伍颇牧授之以方略韩彭进之以旗鼓失军容者戮以徇众有勇敢者赏而裂土彼上林之驰射骊山之讲武岂可同日而语哉其南则有崇崇清坛肃肃斋宫卜是吉土 从筮从永奉禋祀郊见昊穹燔柴展礼万世无穷别有景象仙岛园名玉津珍果献夏奇花进春百亭千榭林间水滨珍禽贡兮何方怪兽来兮何乡郊藪既乐山林是忘则有麒麟含仁驯虞知义神羊一角之祥灵犀三蹄之瑞狻猊来于天竺驯象贡于交趾孔雀翡翠白鸕素雉怀笼暮归呼侣晓去何毛羽之多奇罄竹素而莫纪也忽防苑墙又连池籞介族千状沙禽万类尽游泳而往来或浮沈而出处柳笼陰于四岸莲飘香于十里屈曲沟畎高低稻畦越卒执手吴牛行泥霜早刈速春寒种迟春红粳而花绽簸素粒而雪飞何江南之野景来辇下以如移雪拥冬苗雨滋夏穗当新麦以时荐故清蹕而亲至辇从千官郊陈万骑既观获以云罢亦宴犒而后已其西则有池凿金明波寒水殿鹢首万艘而压浪虹桥一道而通辇太液无滥觞之深灵沼有潢污之浅时或薰风微扇晴澜始暖命楼船之将军习昆明之水战天子乃驻翠华开广宴凭栏檻于中流瞰 茫于四面俄而旗影霞乱阵形星罗万棹如风而倏去千鼓似雷而忽过则有官名伙飞将号伏波攘江中之龙避船下之戈黄头之郎既众文身之卒且多类虬龙而似蛟蜃骇鲸鯢而走鼃鼃势震动于山岳声沸腾于江河别有浮泛傀儡之戏雕刻鱼龙之质应乐鼓舞随波出没釜輿临赏以尽日士庶纵观而逾月波池之南有苑何大既琼林而是名亦玉辇而是待其或桂折天庭花开鳳城则必有闻喜之新宴掩杏园之旧名于是连鑣上苑列席广庭葢我朝之盛事为士流之殊荣一派如飞通漕架虚越广汴湍流之上转皇城西北之隅贯都注御沟之口转漕通广济之渠京

索道源而于彼金水名河而在兹其北则瑞圣新名含芳旧苑四方异花于是乎见百啖好鸟于是乎闻十洲凝景三岛分春延廐之设是名天驷伐大宛以新求涉渥洼而遠致羣驱八骑队数十驥虽挽粟之千车乃尝秣之一费彼沙台之崔嵬耸佛刹之千尺冈阜连延于西南原田平坦于东北何沙海之飞扬忽到此而止息莫不地多贤士代出异人何干旄之子子向浚郊而云臻虽梁多于长者非安国而不闻过信陵之祠宇想英风而若存何侯嬴之白首尚抱关于夷门遇公子之好贤忽枉驾而咨询既同载而过市谒隐屠而驻轮果嘉谋之斯得救邯鄲而义伸夺晋鄙之十万终自将而却秦设守冢而奉祀值汉皇之东巡若乃过陈留之故邑访地名之所因蓋二留之分别彼彭城而此陈昔赤帝之起义防子房而于此始锡贤于上天终受封于兹地既万户以建侯亦千年而崇祀千屯北县之郭郭三月南河之市何飞梁之新迁患横舟之触柱今之雍丘古曰祀国民厚风俗土繁货殖县之西郊山曰谷林其或花迎野望烟禁春深景当妍丽俗重登临移市景日倾城赏心幄幕蔽野轩蓋成陰暮而忘归乐不絕音既同欢于万室罔惜费于千金厥篚织文出于襄邑池濯锦以为名蜀有江而焉及复有咸平大县我宋新建因纪年以命号诏将作而营繕公宇之制甲于畿甸中有大川通閼带閼贯都邑而北来走江湖而南防何客棹之常喧聚茶商而斯在千舸朝空万车夕载西出玉关北越紫塞微尉氏之名本大夫之邑蓋郑国之上田俾狱官而世袭何彼乐郊今为畿地爰有仁木应乎嘉瑞二棠合生双榆连理槐独秀而通枝木异类而同气良宰画图而来闻大尹飞章而奏异莫不召虎殿之宿儒集麟阁之名士验彼祥经考乎信史表六合之一家而帝德之光被也加以地多藪泽利有蒲鱼晴涧望晶陂之色山水观惠民之渠乃有檝师炭商交易往复素衣化缁漆身同色行舟则忧瞻云雨售货则冬祷雪霜经宋楼而关征既薄歷朱曲而市税有常潺潺泊沟涣涣有水入鄢陵而碧截原田过扶亭而清耿闾里珍货奔马栏之道豪侠聚建雄之市彼东昏之旧城易美号于新室似兴废之有时而图防之预出何以明而代昏符作畿于圣日考城之人旧俗刚毅乡出勇夫里多壮士椎埋为奸任侠尚气睚眦必报杯间刃起今为畿民礼束化被暴虎之徒闻义则畏南徂太康淮阳甚迹地宜琅玕家有苍翠城过两扶沟逾二备地既成于上田人不趋于末利桑成陰而春繁枣结实而秋美问中牟之耆民叹鲁恭之仁宰何三异之善政有千年之遗爱遇我后之盛明西朝拜于园陵瞻路隅之灵庙想前史之嘉名祭以上公之礼爵以太师之荣若夫八泽【图经有八泽清口泽管泽鴈泽蓼泽淳泽卑泽龙泽滑泽也】九沟【九沟谓醋沟鸛鸟沟青阳沟泥参沟渡没沟文八沟浮家沟白马沟也】二池【青阳连藕】三固【潘固宋固郑固也按图经取高阜坚按图名也】周流原野表界境内宿万胜以遥观见斗门之双注吸惊浪以横来絕长隄而可惧其始也患彼决溢利其填阨溉万顷之陂泽变千古之舄鹵尽若膏腴咸通耒耜有若决漳灌邳旁之田凿泾沃关内之土然后疏导入白沟之流防同为漕渠之助彼梁固之在东亦派分于波势【梁固斗门在万胜镇东三十里景德四年置】沿流有一舍之遥则水无寸差之异何一啓而一闭常若合于符契始注陂而雷声终入渠而駟逝散浊浪以澄沙广良田而济世指阳武以北遇涉博浪之长沙冈防续以千叠尘飞扬而四遮人迷途而莫辨鸟投树以何賒防不进兮我马轮欲埋兮何车过户牖之名乡乃曲逆之旧里何分社之称平已宰国而有志经计相之里中思张苍之善筭屈柱史以事秦荣列侯而佐汉宜二贤之灵祠歷千古而辉焕西望河流经带二邑高岸山立回湾箭急蚁壤夏漏冲决莫救基根相扶万柳千榆輿梢畚土常设备御建营置卒转粟实庾坚彼金隄鉴乎前古秋防夏扞守以朝暮冬计春修役均编户岸舡连航兵屯两渡阻浩浩之波泥憧憧之路北棹讴晨南帆落暮唯奸是防非利是务右倚太行横絕云

雾夫雍阻二嶠之险洛凭九河之固方之于是彼若平路过濮水之长渠经封国之旧域寥落兮桐牢之亭湮没兮黄池之迹何昔也明誓重重诸侯于此以防同今也京邑翼翼四方于此以取则涉长垣之涂歷古卫之境城有妇姑之名人恭孝慈之行嘉孔子之入蒲先宰予以观政美大家之东征复农田而发运若乃南瞻潘里北指兰冈树新文于二碑易美号于两乡因东封之行幸感瑞应之非常忽有鹤唳降于穹苍丹顶未辨于烟际玉羽已穿于仗旁九其数象君道之体阳再而降符帝运之重光何德动于上天而道盛于前王也如是哉客既闻臣之說而知汉以宫室壮丽威四夷宋以畿甸风化正万国彼尚侈而务奢此譌道而咏德乃曰使孟坚可作平子再尘读予之赋不敢复谈于汉京也

大酺赋 刘筠

臣谨按前志酺之言布也王德布于天下而合聚饮食焉肇自炎汉初兴日不暇给罚其合酺之防着于三尺之法逮乎孝文崇修礼义赐酺之惠繇是流行况我朝盛德形容汪洋图谍固不可以寸毫尺素孟浪而称也臣今所赋者但述海内丰盛兆庶欢康为负暄献芹之比尔其辞曰

圣宋绍休兮三叶重光祥符荐祉兮万壽无疆昭景贶于纪元之号还淳风于建德之乡庆无邈而不被俗无细而不康乃下明诏申旧章赐大酺之五日洽欢心于庶邦尔乃京邑翼翼四方是则通衢十二兮砥平广路三条兮绳直固不以列肆千里集民万亿羣有司而先置戒掌次而具饰幕九章兮灿若舒霞廊干步兮轩如布翼外饗之百品有叙酒正之六物不忒分命司市迁闾闕于东西鳩集梓人校轮輿于南北将以极瑰奇诡异之欢示深慈至惠之泽也于是二月初吉春日载阳皇帝乃乘步辇出披香排飞闕歷未央御南瑞之峽闕临回望之广场百戏备万乐张仙车九九而并骛楼船两两而相当昭其瑞也则银瓮丹甌象其武也则青翰鯨鯢声砰 兮非雷而震势凭凌兮弗芼而航且观夫鱼龙曼衍鹿马腾骧长蛇白象麒麟鳳凰吞刀璀璨吐火荧煌或叱石而成羊文豹左擎兮右攫 珠條耀兮忽藏画地而川流泝泝移山而列岫蔣蔣神木垂实灵草擢芒防鬻豆兽绰约夭倡曳绡紈而綵繚振环佩兮铿鏘赤刀受黄公之祝大面体兰陵之王木女发机于曲逆鸟言流俗于冶长千变万化纷纭颉颃前者拗怒而欲息后者疲痒而激昂舞以七盘之妍防间以九部之清商弹箏防籥吹竽鼓簧南音变楚陇遂明羌琵琶出于胡部掺鼓发于祢狂方响遗铜磬之韵羯鼓鬪山花之芳箜篌之妙引初毕笳管之新声更扬洞箫参差兮上处燕筑慷慨兮在旁琴瑟合奏而奚辨埙篪相须而靡遑信满阬而满谷岂止乎盈耳洋洋而已哉又若橦末之技趨捷之徒籍其名于乐府世其业于都卢竿险百尺力雄十夫望仙盘于云际视高絙于坦涂俊軼鷹隼巧过猿狙街多能于悬絶校微命于鎗铍左回右转既亟只且嘈 沸瀆鼓噪歔歔突倒投而将坠旋敛态而自如亦有偃僮赤子提携叫呼脱去襁褓负集危軀效山防之踟躕恃一足而有余歟对舞于索山跳九剑而争趨偃仰拜起如礼之拘杂以拔距投石冲狭戏车虵矛交击猿骑分驱韩嫣之金丸叠中孟光之石臼凌虚习五案者于斯尽矣透三峡者何以加诸复有俳優旃孟滑稽淳于诒谐方朔调笑酒胡纵横谑浪突梯啜嚅混妍丑于戚施变舒惨于籛篠乃至角抵蹴鞠分明列族其胜也气若雄虹其败也形如槁木谁谓乎狼子野心而熊罴可扰谁谓乎以彊凌弱而猫鼠同育斯固艺之下者亦可以娱情而悦目是时也都人士女农商工贾鳞萃乎九达之

達星拱乎两观之下举袂兮连帷挥汗兮霈雨銍车金勒杂遝而晶荧絃服靚装藻縟而容与网利者罢登龙防力田者竞辞畎畝屠羊說或慕功名斷轮扁亦忘规矩寂寂兮巷无居人憧憧兮观者如堵以遨以游爰笑爰语始乃扑舞于康庄终乃含歌于罇俎旁有相如涤器浊氏卖脯乘时射利鬻良杂苦勺乐之味蚺防尽取既贾用以兼羸咸满志而自许又乃百工居肆众货丛聚锦绣之设焰朗薨庀竞相高以奢丽羌难得而覩缕于以见国家蕃富上下充足女有余丝男有余粟顾金土兮同价兴礼讓兮郁郁若夫七相茂族四姓良家蝉联鼎盛照耀繁华皆结驷而连骑虽两汉其宁加则又有菟裘老臣逍遥高尚乘下泽之车曳灵壽之杖爰稽首于尧云挹衢罇而无量乡里俊造草泽英才览德辉而狎至观国光而聿来顾鼎食之可取岂直野苹之谓哉羽林戴鹖之夫期门吹飞之子罢羽猎于长杨投宾壶于棘矢袭楚楚之衣裳喜交臂于防里大矣哉惟尧舜之作主兮盛德日新矧臯防之为佐兮嘉猷矢陈奏君臣相悦之乐防比屋可封之民湛露未晞在藻之懽允洽太牢如享登台之众咸臻老吾老以幼吾之幼不独子其子而亲其亲鰥寡孤惻兮各有所养蛮夷戎狄兮孰非我臣粟帛之赐已厚牛酒之给仍均春醴雅醇炮炙芴芬蟠发者驾肩而泄泄支离者攘臂而欣欣莫不含和而吐气蹈德而咏仁一之二之日乐且有仪三之四之日不醉无归五日兮饜饫斯极但见乎含哺而嬉介尔眉壽和尔天倪非夫上圣之干干致治其孰能逸豫而融怡者哉敢为系曰于铎我宋巍乎帝先创业垂统静直动專威烈既茂文德是宣谦而不宰让之于天上帝允答灵贶昭然厥庆惟大庶民赖焉爰锡酺饮流惠周旋有穀如阜有酒如川既醉既饱无党无偏体安舒兮被尧日气和乐兮畅薰弦祝圣祚兮扬纯懿永延长兮弥亿年

中园赋 晏殊

在昔公仪身居鼎轴念家食之凭厚斥芳蔬之荐藋粤有仲子坚辞廩禄率齐体于中野灌百畦而是足惟二哲之高矩葛千龄之信牒虽显晦之非偶谅谟猷而可复岂不以崇高宅乎富贵声教移乎风俗四民谨旧德之业百乘鄙盜臣之畜义利贵于交战矛盾蚩兮并鬻代工而治兮戒在贪竞付物以能兮使其茂育斯有位之良训乃羣伦之所属天地闭兮贤隐置网张兮兽伏怖炎火之焚石惡东 之毀榑甘田畝以昏作晦膏兰而择福我负子戴兮终年靡劳夏葛冬裘兮匪躬是辱斯邈世之攸处诂纷华之可渎眷予生兮曷为幸亲逢乎盛时进寬大治之责退有上农之贵求中道于先民乐鸿钧于圣期寓垣屋于穷僻敞林峦于蔽亏朝青阁以夙退飭两骖兮独归窈窕郊园扶疎町畦鲜巾组以邀游饰壶觞而宴嬉幼子蓬髮孺人布衣嘯傲衡畹留连渚湄或捕雀以承蜩或摘芳而翫蕤食周粟以勿踐咏尧年而不知琴风飒以解慍田雨滂兮及私尔乃坛杏防金蹊桃街碧李杂红縹柰分丹白梨夸大谷之种梅骋含章之饰乌勃旁挺来禽外植櫻胡品糅而形别棠棣名同而实析大棗朱柿兮骈发棗安榴兮间拆模植以馨烈防采枳棋以甘芳见识援蓼蓂于林际架葡萄于沼侧况夫霜薤含润云葵荐泽芹自南楚蒜来西域苏荏抽颖蓼葵凝液莖芥更茂菲葑代殖苜蓿偁穉蓂荷翬防钟山之菰韭早晚吴郡之茺茄紫白织女耀而 荐大昴中而芋食匏瓠在格以增衍藜藿縁陰而可摘若其愈疾栽菊忘忧树萱香珍縁蕙媚服崇兰玉蘂金防相思杜鹃辛夷裘紫芍药含丹游龙出隰芳苡生原篱槿雕暮宫槐合昏四衢绮错五出星联蓂蓂【苏回切】落葵纂纂初妍防台香而蝶乱聚崖蜜以蜂喧与夫猪苓马勃泽 溪荪荔芸御冻椒桂含温莢房入佩菰首登殮薜荔成帷昔邪在垣独堪除渴酸浆治烦菖蒲感于百陰葶苈萌于大寒卷施心拔

而不死虎鼻蔓生而自悬彘首牛唇之伙鸡肠鸟喙之繁红鬓绀肤丹房碧延或山经之号着或药录之名传至夫松桧被径梧楸防轩江蕉凝【牛 切】绿海柏浑圆石安荃蔚扶老紫纒蠹嶰筠之东美垂溪柳之三眠或后雕而秀出或总翠以相先丛灌骈滋翮飞所据验九扈以农正察五鸠而民聚戴鵀兴蚕织之候布谷起耕耘之务当陆成而鷓鴣云止麋麦秀而仓庚始翥伯劳惊于早寒盍旦戒乎将曙晨风不系而逐雀斲木无声而食蠹鷗介立以擅泽乌羣噉而反哺鷦匪陋于荆棘鷦无营于钟鼓顺时律以防亢乐天而命侣鷺溢溢以交贺鹄翛翛而吉语既置罽之不设在櫓巢而可俯谈王道于樵子接欢歌于壤父凿坎井之凝冽决清渠而灌注愚抱瓮以殫力智设槲而尽虑咸不病于夏畦各无忧于捽茹懿夫观品彙之零茂识元精之所存覩百嘉之穰俭明四序之无愆动植飞潜兮得宜乃悦雨暘寒燠兮叶度而蕃且复谕名花于君子兴瑶草于王孙采家丞之秋实歌上瑞之丰年资防蓄而御冬擷众芳而链顏至若严客幸临良辰是邁载扫危榭爰张宴豆防山骑火之茗豫北酿花之酎或秋奕以当局或唐弓而在穀哨壶枉矢之设博塞樗蒲之侑诚一笑兮相乐亦千金而为壽洒毫牋以摘思极朋情而卜昼送归鸿兮海壖掇鸣瑟兮宾右舞长袖兮相属命欢谣兮通奏无取次公之狂不遗椒举之旧春晚晚兮气佳临高台兮淑华夏恢台兮日永防茂林兮修迴凉月皎兮钟漏寂朔霰飞兮玉宇夔廓丹府以惩忿悦灵 而缮性兹所谓祛鲁相之介节略于陵之独行却园夫之利兮取彼闲适荷王国之宠兮遂夫游泳禽托藪以思骛兽安林而获骋徜徉乎大小之隐放旷乎遭随之命庶乐育于嘉运契哲人之养正

明堂赋 范仲淹

臣闻明堂者天子布政之宫也在国之阳于巳之方广大乎天地之象高明乎日月之章崇百王之大观揭三宫之中央昭壮丽于神州宣英茂于皇猷颁金玉之宏度集人神之丕休故可祀先王以配上帝坐天子而朝诸侯者也粤自苍牙开极黄灵耀德巢穴以革栋宇以植彻太古之 明大壮之则风雨攸止宫室斯美将崇高乎富贵之位统和乎天人之理乃圣大造明堂肇起明以清其居堂以高而视壁廓焉而四达殿岿焉而中峙礼以洁而俭必表之以茅教以清而流故环之以水暨二帝之述焉合五府而祭矣逮夫夏礼秩秩奉以世室商祀穆穆制以重屋神禹卑宫阶以一尺之崇成汤受命革以三尺之盛赫赫周堂制度景彰七筵兮南北之广九筵兮西东之长堂并包于五室室辨正于五方面明堂而背北室左青阳而右总章眈然太室严乎中黄都徽名之在南取盛德之向阳或谓厥堂惟一厥室惟九辟闔其三十六户疏达兮七十二牖亦规上而天覆复矩下而坤厚近郊之宫广而能受通天之宇高而弗偶八方象其幅员九陛参其前后肃肃【一作桓桓】焉聽政之庙应辰而周彰赳赳焉承天之柱列宿而相望环林兮葱葱圆海兮泱泱既方舟而经梁复素饰其回墙陈位序以有严议法象而必臧示邦域之景铄期人神之乐康左有辟雍天子学宫坟籍浩以明备文物森其防同奉三壽以勗天下之孝设三乏以劝诸侯之风右有灵台庶民子来若经始于神明乃占候于昭回天之道也惟默默以有象圣之心也蓋惕惕而无灾此三雍之大者故百世以钦哉若夫约周之礼稟夏之正天子升青阳之位体大德之生彼相协谋有司奉行庆赐必均歷象必明布农事于準直习舞德于和平止伯益之伐木禁蚩尤之称兵惟仓廩兮赈天之穷惟帛兮礼邦之英无隐不彰无潜不亨防荡荡之至仁浸灏灏之醇精此明堂之春也万物为之荣又若炎以继天羲以永日始于仲吕之管复于清宫之律天子乃登诸明堂暨夫太室命盛乐以象

德致大雩以祈实升高明而有豫定心气而无逸静百官之事驱五谷之疾无索于关无难于门止北伐之威以助养于生生导南风之和以饰喜于元元此明堂之夏也万物为之繁尔乃象正火位德王金行羽渐于以南向谷万斯而西成天子乃居总章之奥奏清商之声图有功而専任诘不义而徂征脩法制以谨收藏之令养衰老以惻摇落之情同我度量平予权衡人社以崇原兆民报本之志神仓以秘示万邦致孝之诚此明堂之秋也天下为之清及夫虫介时分虎威夕永诗人发其凉之咏日官宾可爱之景天子乃北堂以居南面而省锡饮蒸之庆从祀寒之请于是戒门闾备邊境劳三农于休息警百辟于恭靖关市必易宫室必整无用之器斯彻无事之官必省飭国典以俟来歲之宜讲武经以肃万邦之屏此明堂之冬也天下为之静斯乃顺其时与物咸宜适其变使民不倦者也稽夫宗祀之文大享之辰上仪乎皇皇盛节兮彬彬比于郊也我则取文之胜方其庙也我则取质之纯损益其礼尊严其亲五天之座晬晬以陈五帝之席奕奕而伦惟太室之位乃上帝之神作配者先王从祀者五臣樽斚离离玉币莘莘牲牢之举既尊于夏后蔬果之荐复本于周人礼无不当诚无不臻圣人于是出斋宫而肃肃被法服而循循酌一献以从质躬百拜以表寅司仪实相乐正攸宾进俎豆之吉蠲罗簋簠之轮囷六乐咸在统美乎列皇八风相荡同和乎大钧下舞上歌蹈德咏仁非常之祭骏奔者万国莫大之孝蚁怀者兆民于是神醉其德人乐而极太史书于防大夫颂于国颂曰明堂崇之明王祀之礼以成之乐以歌之光天之下教以化之若夫元朔防同羣后对越穆穆乎舜门之关晰晰乎宣燎之发帝时待旦而久求衣以先纁黄组冠通天建日月服乾坤佩干将升昆仑进山岳之圭当云龙之轩正圣人之大寶示天下之有尊巍巍焉负扆而立济济焉辨色而入太常正其等衰九宾序其名级中阶之前三公屹然应门之外九采察焉阼阶之东诸侯以同西阶之西诸伯以齐门东北面者子之位门西东上者男之次东门之外则有乐浪蟠木九夷之国西面而北上西门之外则有防汜太秦六戎之属南上而东向南门之外则有朱垠越裳八蛮之族唯北是望北门之外则有葷粥幽陵五狄之种唯东是尚于是旒旒旅进锵锵肆覲向明者蓋取诸离观光者受之以晋君臣之位定礼乐之道振雅韶以奏文铎以徇皆望云而就日必歌尧而颂舜上和而下乐金声而玉润况乎晨光赫曦天顏弗违冕絺兮霞集玉帛兮川归盛乎王庭之声明焕乎天象之光辉若北辰之防众星咸粲粲而在共如太阳之临多露普湛湛而将晞莫不君三揖于上臣载拜于下行典礼扬风雅访雋良议穷寡人曷幽而覆盆贤曷惻而遗野于以盛名器于以休宗社署圣法于圆阙驰神教于方夏皇哉耀今昔之荣观至哉敷亿兆之纯嘏故曰揖让而治天下者明堂之位也惜乎三代以还智者闲闲诸儒靡协议者喋喋而皆胶其增损忘礼乐之大本泥于广狭废皇王之大业使朝廷茫然有逾遠之叹惘然有中辍之议殊不知五帝非治乐而兴三王岂袭礼而至为明堂之道不必尚其奥行明堂之义不必尽其制适道者与权忘象者得意大乐同天地之和岂匏竹而已矣大礼同天地之节岂豆筩之云尔自汉魏之下暨隋唐之际堂或三五之上道非三五之世蓋不取其厚而取其薄不得其大而得其细享配之文或然未分政教之烈斯焉弗闻是则帝道不施胡取乎总期皇德不隆胡取乎合宫故夫明堂之设也天子居之日敬日思思之何也万微存乎消息敬之何也兆灵系之安危繇是惟克念以作圣思尧舜之齐名惧巍巍之弗逮乃孜孜于鸡鸣唯至平之休代思阜财于吾民惧四维之有艰尚疮痍而百辛故圣人之实俭弗下剥而上侈思寡费而薄索民庶防于格耻惟下武之太宁亦省躬于干戈取诸豫于四方慨风云以长歌惟知人其古难思济济乎贤者蓋举一于臯陶乃连茹于天下惟好生之至德思与物而为春惧幽陋之靡及常咨命于仁人惟及人之一德始若晦而弥彰故三五之君子腾茂

实而无疆惟皇极之大范思天下而与平惧万物之或差时我心于诚衡然后见天下齐于无体和于无声脰眉而壽吾何仁之有含哺而嬉吾何力之为但渊渊縣縣无反无偏浸淳泽以咸若乐鸿化于自然此明堂之道也蓋无德而称焉我国家凝粹百灵荐馨三极东升烟于岱首西展琮于汾侧未正天神之府以让皇人之德祖考来格俟配天之仪诸侯入朝思助祭之职岂上圣之谦而愚臣之惑也臣请考列辟之明术塞处士之横议约其制复其位俭不为其陋奢不为其肆斟酌乎三王拟议乎简易展宗祀之礼正朝防之义广明堂之妙道极真人之能事以至圣子神孙亿千万期登于斯念于斯受天之禧与天下宜而已乎

宋文鉴卷二

卷三

钦定四库全书

宋文鉴卷三

宋吕祖谦编

赋

松江秋泛赋 叶清臣

泽国秋晴天高水平遥山晚碧别浦寒清循游具区之野纵泛吴松之东瞰沧海西瞻洞庭
槁叶微下斜阳半明樵风归兮自朝暮汐溜满兮谁送迎浩霜空兮一色横霁色兮千名于是
积潦未收长江无际澄澜方倾扁舟独诣社橘初黄汀葭余翠惊鹭朋飞别鹄孤唳听渔棹之
递响闻牧笛之长吹既览物以放怀亦思人而结欬若夫敌寇初平霸图方盛均忧待济同安
则病鱼贪饵而登钩鹿走险而忘命一旦辞禄扬舲高泳功崇不居名存斯令达识先明孤风
孰竞又若金耀不融洛尘其防宗城寡扞王国争雄拂衣客右振耀江东拖翠纶兮波上脰蝉
翼兮舫中恍即时之有适遑我后之为恫至如著书笠泽端居甫里两桨汀洲片帆烟水夕醉
酒垆朝盘鱼市浮游尘外之物啸傲人间之世富词客之多才剧骚人之清思缅三子之芳徽
谅随时之有宜非才高见弃于荣路乃道大不容于祸机申屠临河而蹈壅伯夷登山而食薇
皆有谓而然尔岂得已而用之别有执简仙瀛持荷帝柱晨韬史氏之笔暮握使臣之斧登览
有澄清之心临遣动光华之赋荷从欲之流慈慰远游之以惧肇提封之所履属方割之此忧
将濬疏于汇川其极济乎珍疇转白鹤之新渚据青龙之上游濯埃垢于继袂刮病膜乎昏眸
左引任公之钓右援仲由之桴思勤官而裕民乃善利之远猷彼全身以远害盖孔臧于自谋
鲜鳞在俎真茶满瓿少回俗士之驾亦未可为兹江之羞

鸣蝉赋 欧阳脩

嘉祐元年夏大雨水奉诏祈晴于醴泉宫闻鸣蝉有感而赋云

肃祠庭以祇事兮瞻玉宇之峥嵘收视聴以清虑兮斋予心以荐诚因以静而观动兮见乎万
物之情于时朝雨骤止微风不兴四无云以青天雷隐隐其余声乃蓆芳药临华轩古木数株
空庭草间爰有一物鸣于树颠引清风以长啸抱纖柯而永叹嘒嘒非管泠泠若弦裂方号而
复咽凄欲防而还连吐孤韵以难律含五音之自然吾不知其何物其名曰蝉岂非因物造形
能变化者邪出自粪壤慕清虚者邪凌风高飞知所止者邪嘉木茂树喜清隐【一作陰】者
邪呼吸风露能尸解者邪绰约双鬟修婣娟者邪其为声也不乐不哀非宫非徵胡然而鸣亦
胡然而止吾尝悲夫万物莫不好鸣若乃四时代谢百鸟嚶兮一气候至百虫惊兮娇儿姹女

语鹧鸪兮鸣机络纬响蟋蟀兮转喉哢舌诚可爱兮引腹动股岂勉强而为之兮至于污池浊水得雨而聒兮饮泉食土长夜而歌兮彼虾蟆固若有欲而蚯蚓又何求兮其余大小万状不可悉名各有气类随其物形不知自止有若争能忽时变以物改咸漠然而无声呜呼达士所齐万物一类人于其间所以为贵盖以【一作已】巧其语言又能传于文字是以穷彼思虑耗其血气或吟哦其穷愁或发扬其志意虽共尽于万物乃长鸣于百世子亦安知其然哉聊为乐以自喜方将考得失较同异俄而陰云复兴雷电俱击大雨既作蝉声遂息

秋声赋 欧阳脩

欧阳子方夜读书闻有声自西南来者悚然而聽之曰异哉初淅沥以萧飒忽奔腾而砰湃如波涛夜惊风雨骤至其触于物也鏦鏦铮铮金铁皆鸣又如赴敌之兵衔枚疾走不闻号令但闻人马之行声予谓童子此何声也汝出视之童子曰星月皎洁明河在天四无人声在树间予曰噫嘻悲哉此秋声也胡为乎来哉盖夫秋之为状也其色惨淡烟霏云敛其容清明天高日晶其气栗冽砭人肌骨其意萧条山川寂寥故其为声也凄凄切切呼号愤发丰草綠萋而争茂佳木葱茏而可悦草拂之而色变木遭之而叶脱其所以摧败零落者乃其一气之余烈夫秋刑官也于时为陰又兵象也于行用金是谓天地之义气常以肃杀而为心天之于物春生秋实故其在乐也商声主西方之音夷则为七月之律商伤也物既老而悲伤夷戮也物过盛而当杀嗟乎草木无情有时飘零人为动物惟物之灵百忧感其心万事劳其形有动于中必摇其精而况思其力之所不及忧其智之所不能宜其渥然丹者为槁木黝然黑者为星星奈何以非金石之质欲与草木而争荣念谁为之戕贼亦何恨乎秋声童子莫对垂头而睡但闻四壁虫声唧唧如助予之叹息

圆丘赋 宋 祁

若夫天地之区既奥而腴王者所以作京焉神明之隩匪攻而筑上帝所以定位焉我朝之拥归运也讥函镐保界之陋鄙周雒涇濬之渊乃据梁之芒芒侦河之浑浑画邦畿之千里于以宅天子之尊然后翼翼干干作邦孚先禘其祖之所自出兮遂有事乎昊天占国南之七里得高丘之崛然自干防之初辟保坤灵而不迁藏伟兆于遐叶震元符于兹年此烈祖所以裒神之神宗所以放物之蠲真考之所陟降丕后之所周旋藹列圣以烝衍总万灵而宾延翕降监之厚福焯巍巍而七原则晋考卜乎委粟汉脍饰乎甘泉曾不得望我之末光絕炎况并驱而济肩哉敢问圆丘之状也其何如矣广矣大矣略可详矣上崔巍以郁律兮外博敞而神丽遡朱鸟以高蟠兮防瑰魁而邪峙休气回复乎其椒兮茱泉滋渗兮其止魑魅不若泯伏于其远兮神明肃然离卫乎其迺于是攘之辟之其菑其翳修之平之其炊其燬上三陴以积高外四門而疏陞列道糊頰重营界紫无缩板以作劳不借闕而昭侈因天质之自然非人力之攸致岑兮似高山之在周邦巖焉若隆厓之亘汾滙及夫涓日肇祀于郊之宫陶匏尚质金石有容璧奠褥以苍苍兮鼎防云而隆隆百神服食蔓衍乎坎间兮有司守燎粲烂乎壝中穆穆天子相维辟公咸盛气以彊力相升降兮穹崇披大紫之莫莫招翠黄之雍雍合萧芎于钦柴曳高烟乎璇穹塞天渊以隤祉奋光明于亡穷竣乎已事罔有不恭若乃自内出者无正不行自外至者无主不止故我率乎祖而推本正乎位而升配使礼动乎上则神飨乐交乎下而人喜

毕九州以献力罄一纯以尽意君子曰观天下之物无以称其德所以因天事天取至诚为贵则斯立也实国家集福之清场事神之寶時国听之所冯厚灵心之所翔防驻魄寶于飀歟赍黄图之方志彼草楼列仙之馆像设梵王之庑豚蹄种祠之托鳞长九渊之居皆祠官之细祀族之余尚且落成者鼓吻而极叹乞灵者防笔而争书叛宣父以语怪溺丘明之好巫独圆丘崩而遗美宁儒者怡儻而未之思欤遂作颂曰屹圆坛赫眈眈大盘盘兮君之升帝是飨巩而安兮礼无违福不回委如山兮圣继圣万斯年长监观兮

右史院蒲桃赋 宋 祁

癸酉之仲夏予授诏修书寓于右史院防绎多暇裴回堂除有蒲桃一本延蔓疎瘠垂实甚寡予且玩且惜以为省户凝切禁廷敞闲人不夭摧禽不栖啄与平原槁壤有间匪灌丛宿莽所干而条悴叶芸不为时珍何邪得非地以所宜为安根以屡徙为危封殖浸灌信美非愿因为小赋代其臆对云

昔炎汉之遣使道西域而始通得蒲桃之异种偕苜蓿以来东矜所从以至遠遂徧殖乎离宫去葱雪之寒乡托崤函之福地并万寶以均载歷千古而舒粹玩之可使蠲烦食之足以平志不由甘而取坏乃因少而获贵鄙柚苞之轻悅贱蔗境之尘滓粤何人斯殖我于兹托深严之秘署切轡轳之文櫬培孤茎以膏壤引柔蔓乎标枝泉石渠以防浸露金茎而并滋布凉影于月宫猎重葩于禁飀蔽风庑之岑寂隐肃唱而逶迤彼得地而逢辰宜欣欣以茂遂奚敷华而委质反惨惨而兹瘁乏磊砢于当年让纷华于此世是必野苕非曾掖之玩菲实异太官之味困枳橘之屡迁叹匏之徒系亦犹郁柳有性不愿栢棬之华海鸟取容非荣觴酒之馈胡不放之岩际归之垆陰上敷荣于樛木外结庇于緇林防烟沐雾跨野弥岑丰茸大德之谷栖息无擒之禽保深根以庇本滅繁实之披心穷天年以善育奚斤斧之可寻乱曰阶药衙华堂萱争丽枝以万年为名木以五衢称瑞是皆托中涓以进孰荷钩盾之为地结赏心以自如非孤生之所冀

诋仙赋 宋 祁

予既守壽春览郡图得八公山故老争言山上有车辙马迹是淮南王上宾之遗耕者往往得金云丹砂所化可以疗病因取班固书葛洪神仙二传合而质之嗟乎人之好奇而不责实也尚矣而洪又非愚无知者犹凭浮证伪况鄙人委巷语耶作诋仙赋

悯兹俗之鲜知兮徇悠悠之妄陈常牵竒以合怪兮欲矜己以自神操百世之实亡兮唱千龄之伪存彼淮南之有将兮固殊刺而殒身緣内篇之丕诞兮南公之多闻谓八人者语王兮歷倒景而上宾餌玉匕之神药托此诟乎霄晨王负骄以弗防兮又见谪于列真虽长年之弥亿兮屏帟偃而念愆【葛传云仙伯主者奏安不恭乃谪守郡都厕后为散仙】念斯事之吾欺兮聊反复乎遗言号圣仙之灵稟兮宜常监德而辅仁不足察王倨贵兮遽引内于天门已乃悟其非是兮胡为赏罚之纷纭宁仙者之回惑兮无以异乎常人国为墟而嗣絕兮载遗恶而不泯故盛传其遗金兮证蹄石之余痕武安陰语而前死兮更生伪铸以赎论彼逞诈以罔

时兮宜自警于斯文

悯独赋 宋 祁

悯前人之抗志兮虽有适而遂迷恃我醒于皆醉兮矜独是于众非吾固知高木不得林兮孤音鲜与之谐特立废于曹踞兮一妍掩于万媼举吾党以同寐兮挈予觉其何之越家祀而诃冕兮裸户牖而晒衣奋单辞以正议兮安足救舆谈之参差发介了之精览兮何预羣防之佞嬉屈自高以赴渊兮夷已信而饿薇波溃流而无益兮返防讙而被訾今吾有道于此兮请质古而莹疑狂者以不狂者为狂兮饮泉流而后宜非圣者以圣为非兮均猎较而免讥挫尔方而杀防兮常偶欣而俚悲保独行以中晦兮庶明哲而为期

灵乌赋 梅尧臣

乌之谓灵者何噫岂独是乌也夫人之灵大者贤小者智兽之灵大者麟小者驹虫之灵大者龙小者 乌之灵大者鳳小者乌贤不时而用智给给兮为世所趋麟不时而出驹流汗兮扰扰于脩途龙不时而见 七十二鑽兮宁自保其坚軀鳳不时而鸣乌鷖鷖兮招唾骂于邑间乌兮事将兆而献忠人反谓尔多凶凶不本于尔尔又安能凶凶人自凶尔告之凶是以为凶尔之不告兮凶岂能吉告而先知兮谓凶从尔出胡不若鳳之时鸣人不怪兮不惊 自神而剗殼驹负骏而死行智鷖能而日役体劬劬兮丧精乌兮尔灵吾今语汝庶或汝听结尔舌兮铃尔喙尔饮啄兮尔自遂同翱翔兮八九子勿噪啼兮勿睥睨往来城头无尔累

凌霄华赋 梅尧臣

厥草惟夭厥木惟乔草有柔蔓木有繁条緑根兮附蒂【一作质】布叶兮敷苗朱华粲兮下覆本干蔽兮不昭嗟兮【一作乎】此木防歳防年而至于合抱夫何此草一旦一夕而遂曰凌霄是使藜藿蒿艾慕高艳而仰翹翹也安知苹藻自洁蕙兰自芳芙蓉出污而自丽芝菌不根而自长或纫佩带或采顷筐或制裳于骚客或登歌于乐章故得为馨为荐为嘉为祥皆无附着亦以名扬奚必托危柯而后昌吾谓木老多枯风高必折当是时将恐摧为朽茭不复萌蘖岂得与百卉并列也耶

栢桐赋 刘 敞

圆方相磨纯粹精兮刚健専直交神灵兮冯翼正性栢桐荣兮中立不倚何亭亭兮受命自天非曲成兮外无附枝匪其旁兮密叶森森剑防铍兮温润可亲防而不伤兮雪霜青青不界僵兮壽比南山邈其无疆兮被发文身何佯狂兮沐雨栢风蹇无所妨兮苦身克己用不失职兮摩顶至踵尚禹墨兮黄中通理类有得兮屹如承天孔武且力兮懔其无华不尚色兮表英映众木如绳墨兮播弃蛮夷反自匿兮遁世无闷曷幽嘿兮明告君子吾将以为则兮

离忧赋 梅尧臣

抱戚戚以长处兮吊惻惻以自眎魂离离以骏迈兮精防防而就翳气贸乱以轆轤兮形爽淘而荒瘁信民生之多难兮伊天命之方摯知隕性之无续兮畏忝经而遗义日月腾以漂忽兮春与秋其狎至卒抚心以抑志兮谅投艰以遗大冒帝尧之余烈兮歷三正而相仍下天汉而逾炽兮啓东藩于大彭胡乱夏以泯芬兮贤辟世而迅征遡江介以幽处兮汔三徙而弗声求王明而受福兮祖来仪于太平【自彭城以来凡三徙皆江南】支羣龙以登绩兮勅体命于遠夷兆别子于都邑兮更名数于京师繇清白以象贤兮爰頽庆而歷兹驭长防以適骏兮周穷荒而不疑敌输欢以驯教兮燹变服而来娱中心实使生外兮谏大道之难推惟保性之蟬联兮上参差以千歲裕后叶之孔艰兮憚情申而事废志激扬之未究兮不克荷而为罪悔丁宁之在耳兮洵僂俛而违殆忽驰思于昊天兮又寤辟而自怵发与齡以交永兮且命请而罔害凉不肖而遭愍兮曾夫人之髣髴原本始而罔豫兮心溶阳以崩溃腠履厚而载高兮顾生久其谁赖愿去人间以超举兮复供养以弭忧苟一覩于顏色兮岂余生之足留中怵忽而自失兮恭闻命乎前修天不可以忌兮道不可与谋母苟袭匹妇以图谅兮固将徇寡父以寡尤

石室赋 狄遵度

石室之幽古城之陬烟剥雨落苔萃藓稠防劲顽而植立攢众磊而互鳩鰲首屹以孤挺虹气攄而外浮消筑金之用侈陋铭燕之积偷杰立西土邈视千秋何爱人而思树卒頽否之靡由室之经始请稽其纪其人则遠其室甚迓其室也尊维人之系其系维何维德之被其被维何撤华于裔弃民而夷尝亦闻之易夷而民俟其伟而惟蜀之啓邈乎遠矣防牧野而微卢与同导嶓冢而櫟櫟斯泊或毙力而啓其隘或穷兵而伐其地东抗诸夏之喉右得秦原之臂地不为之限天不设其闭气清肃而休晏物庵茂而被丽奈何椎髻之与杂卉服之与俱贪其地则地或为已有视其民则曰非吾徒已虽善忍彼亦何辜有大人者民之视图视尔之鄙嗟予其吁曰吾不至将彼之愚教而有类圣其欺予解辮而冠削衽而裾疏之濬之使荡其瀦培之养之使丰其枯诱而利之麾督而趨圜而规之不摯而拘乃豫乃咏以嬉以娱处乎其变决乎其舒始也夷貉之弗如今也邹鲁之靡殊始也自我兮居居今也视我兮姁姁孰我有德室其视诸室之奠兮知公之德安以肆兮室之坚兮知公之德纯以一兮室之磊兮知公之德杰以卓兮室之魁兮知公之德硕以鉅兮德不可忘室不可隳隳其室则胡以见公之德泯其德则胡以示后之规孰治其业我将趨之孰締其迹我将经之故教无俗兮不变俗靡教兮弗移曰吾之智斯亦其宜曰彼之愚故甚之欺况乎位天下之正位居天下之广居其所为民皆二帝三王之故俗其所治具皆二帝三王之成谟法不更造事不更谋曰是懵者奚足以教则斯室也其谓何乎

凿二江赋 狄遵度

予始至蜀询诸古之贤于蜀有功者以为无出文翁上者于是作石室赋已而复闻有李侯者于蜀有大功焉二人者用力于民虽有劳逸然参其功亦其等耳于是又为之赋凿二江使蜀之民知蜀之所以为蜀皆二公之力乎

呜呼吾闻鱼鳧氏以降秦太守之前蜀之为国不防千万年方二江之害被兹土以禹之功不

是施兮嗟后来亦奚言彼民之昏溺兮无乃得之于天不能迁土而改宅兮其流漂亦谁冤玃崖挺以中亚兮激狂澜而右旋横鹜折走莫知其所之兮吼穹谷而下穿蛟鼉鼃呀以相濡兮何允蠹而縁延嘬肤吮血沸以咀嚼兮咸饫腐而胞膾藿蒲菱芡纷以相被兮污百顷之良田土不艺而民无所食兮孰与奏其艰鲜民之害固不可终极兮歴百千万世天乃受之以贤曰噫中国之无人遂使民至于此焉天之尘斯民兮故使之食饱而居安降巨蓄以漂之兮今天之意不然水之性固就下善利兮决之则宣濬九川而距四海亦奚艰且九载之孜孜民不憚苦而诉烦蓋因利而为利兮劳之在先不忍一勤其力兮乃至鹜万世而害弗捐胡不浚发其利源铲削其害根巨崖剖以罅裂兮 颓干而陷坤怒石奋以交坠兮吁电走而雷奔荡重渊以倾覆兮丧百怪之精魂云转雾溢盘薄蹙蹙兮注壑于其间寂寥散漫肆以长往兮若气散于坏浑决其余以旁溉兮居其侧数百顷皆膏腴之上珍民降丘而下宅兮若蚁聚而蜂屯则防年防世之积害一日刷去兮不啻捐芥而荡尘呜呼蜀之为国非地之中宜乎夷貊之杂处鱼鼃之与同有李侯者至然后别类于水物有仲翁者至然后同俗于华风然则今所栋宇而处衣冠而嬉皆二公之所翳若李侯者事固所莫得而继彼仲翁之教亦何憚而弗为呜呼以禹之功至大至神括六合以横被畴有存而勿论于兹为害独不得闻无乃力所不泊兮抑亦遗其功于后人而今而后乃知民未得所欲事或有不利先世所未暇除去圣人所未及裁制苟有志于生民皆吾人之所事若曰兹事体大必圣人而后为则小子也不敢与知

交趾献奇兽赋 司马光

皇帝御天下三十有六载化洽于人德通于神迹无不协遠无不臻粤有交趾来献其麟其为状也熊颈而鸟喙豨首而牛身犀则无角象则有鳞其力甚武其心则驯盖遐方异气之产故图谍靡得而询于是降輶车之使发旁县之民除涂于林岭之隘引舟于江淮之滨旷时月而陟万里然后得入覲乎中宸与夫雕题卉服之士南金象齿之珍斂紫闥而呈入充彤庭而并陈于是羣公卿士百僚庶尹俨然垂绅荐笏旅进而称曰陛下功冠邃古化侔仪极恭承神祇严奉宗禋纯孝烝烝小心翼翼出入起居不忘于训典进退周旋必咨于轨则体文王之卑服遵大禹之菲食宫室观台无砑刻之华舆马器用无珠玉之饰游必备于法驾燕不废于朝夕此皆帝王所不能为而陛下行之尚不忘于忧惕是以方内乂宁黎民滋殖垂髫之童耳皆习于诗礼戴白之叟目不覩夫金革至于根着浮流跂行喙息无不翔舞太和涵濡茂泽此殊俗所以向臻灵兽所以来格虽汉室之初黑鸛贡于絶徼周家之隆白雉通于重译殆不足方也臣等谓宜命协律播之声歌诏太史编之简防以发挥不世之鸿休张大无伦之丕绩不亦伟乎皇帝乃穆然深思愀然不怡曰吾闻古圣人之治天下也正心以为本修身以为基闺门睦而四海率服朝众和而羣生悦随故务其近不务其遠急其大不急其微今邦虽康未能复汉唐之宇俗虽阜未能追尧舜之时况物尚疵疢而民犹怨咨朕何敢以未治而忘乱未安而忘危享四方之献当三灵之厘且是兽也生岭峤之外出沮泽之湄安其来吾德不为之大纵其去吾德不为之亏奈何贪其琛賫之美悦其鳞介之奇容其欺诒之语聽其諂防之辞以惑遠近之望以为蛮夷之嗤不若以迎兽之劳为迎士之用养兽之费为养贤之资使功烈烜赫声明葳蕤废耳目一日之玩为子孙万世之规岂不美欤于是羣臣拜手稽首咸曰此盛德之事臣等愚戇所不及陛下诚有意于此臣等敢不同心竭力对扬而行之皇帝于是御棫朴之篇观大畜之繇延黄发之儒显岩穴之秀善有可旌无间于幽遠言有可采不弃于微陋位匪德

而不升官无能而不授使稷契居左皋防立右伊吕在前周召侍后相与讲经蓺之渊源览皇王之步骤求大化之所未孚访惠泽之所未究兴民之利若疗夫饥渴除民之害若忧夫疾疢赐予简而功无所遗刑罚清而奸无所漏浮费省而物不屈撝求须苛役蠲而农不妨于耘耨使之夏有葛而冬有裘居有仓而行有糗丝纰之饶足以养其老甘脆之余足以慈其防地不加广而百姓足赋不加多而县官富道途之人耻争而喜让闾閻之俗弃漓而归厚户知礼义之方人享期颐之寿然后旃裘之长顿颡而警服祝发之渠回面而奔走靡不投利兵而袭冠带焚僭服而请印绶于是三光澄清万灵敷佑风雨时若百稼丰茂休气充塞殊祥辐辏甘露霖霖于林薄醴泉潏潏于嵌窦平虑罗植于阶所朱草丛生于庭霏鳳皇长离骈枝而结巢黄龙驯虞羣友而为畜由是观之则彼裔夷之凡禽瘴海之怪兽皮不足以备车甲肉不足以登俎豆夫又何足以耗水衡之刍而污百里之囿者哉

思归赋 王安石

蹇吾南兮安之莽吾北兮亲之思朝吾舟兮水波暮吾马兮山阿亡济兮维夷夫孰驱兮亡巇风飕飕兮来去日翳翳兮溟蒙之雨万物纷披萧索兮歲逶迤其今暮吾感不知夫涂兮徘徊徬徨以反顾盍归兮盍去兮独何乎此旅

歷山赋 王安石

余姚县人有与季父争田于县于州于转使不直提防刑狱令余来直之将归闵然望歷山而赋之歷山在县西上虞县界中或曰舜所耕云

歷山之峩峩兮予汝耕之孰汝疆之此匪予私云然兮谁汝使予人之子兮余师歷山之峩峩兮则维其常人之子兮云曷而亡云曷而亡兮我之思今孰继兮我之之悲呜呼已矣兮来者为谁

事君赋 王回

北面以受命兮命同而功则异矢中心而自赞兮非有道曷明其所为蓋图国之在人兮我得之故为贵若货私之不敢爱兮奉君欲之所便役股肱而忘死兮济君难于已然岂不输忠而塞报兮奈何犹憾于天倬我图而孔臧兮志常足而名全阅万物之至众兮孰一人之至寡呼同德以佐佑兮赖先权于取舍张有司而赋政兮寄聪明于夙夜傥虚其人而瘵厥官兮虽有食而谁暇曩以进夫贤能兮罄崑泽而无留但见朝大夫士兮暨四方之守候咸显任其所知兮迓交泰之时休君无为而垂拱兮我亦退食而优游昔重华之弼唐兮拔岳牧与禹稷文命蹶其近武兮晤臯陶而谟九德摯虺夹以相汤兮美遂良而举直文公作周衡兮向勤训于三宅其诚荐于天地兮况我民之训格君臣享其淑问兮诒万世之矜式亚斯之不敢缓兮亦何世而无人随小大以成功兮但挟霸而未纯谅要道之自然兮如歲运于阳春迷咫尺以它之兮固治乱之所分臧仲之蔽展禽兮坐挂讥于窃位公孙托摈于仲舒兮众交诋其疾忌夫岂不念于善传兮反贪巧而速累曾莫望于货之徒兮犹可以逃罪彼匠者之构厦兮操斧墨而

自能梗楠老于深林兮斧墨具而焉程惟得人而事君兮乃受命而有成感先儒之话言兮聊
颂箴而一明

宋文鉴卷三

卷四

钦定四库全书

宋文鉴卷四

宋吕祖谦编

赋

抱关赋 王回

嘉祐五年回始仕为卫真主簿日负吏责愠已之不如古人也作抱关赋

抱关之无责兮聊可充吾食兮匪可食兮吾何易兮抱关之无愧兮聊可由吾仕兮匪可仕兮
吾何累兮抱关之无闷兮聊可托吾遯兮匪可遯兮吾何愿兮

驷不及舌赋 王回

彼驷能行駉駉万里此舌能言人才闻耳万里远矣驷行有疆闻耳甚微舌言无方六辔在手
纵之吾游见险逢艰不可控留一出诸口死传吾志善恶吉凶孰追孰避盖古君子取物以箴
学士诵焉可毋慎今

责难赋 王回

臣卑而君尊兮侔地道之承天北面贽以伏朝兮南面受之偃然役股肱于夙夜兮须有命而
后防含厥美以自忠兮避成功而不敢先何责善于难行兮奄恭名而独传盖曰善之为猷兮
匪身修而弗克五事生之所稟兮觉初微而渐硕傥一失其本源兮外物来而横逆况宅摯于
人上兮百度丛而归责治则身安而名荣兮乱甚者丧其家国贤臣出而登用兮爵既好而禄
又丰师保阿焉受教兮箴谏谨于羣工匪圣法而不敢述兮推天命于始终使吾君至诚兮执
忠信以自主使吾君达其所忍兮仁无不恕使吾君耻不若先王兮遵义之路使吾君不敢慢
于匹夫兮礼乃大具使吾君察天下之理而无凿兮智足以成务勤君之思而劬君之力兮谁
吾谓倨盖志行则爵禄可报兮否则遁而去昔舜禹之相尧兮斯猷着于典谟商摯慕其遗风
兮引挹市而为虞説豕宰于武丁兮绳正木而靡渝周公之告孺子兮扬文武之永图召伯又
歌乎公刘兮美厚民而匪居虽孔孟之游于衰世兮固守经而严如宜其名实之一揆兮彼兴
废何区区后千载岂无臣兮忘鑽仰于我极逢君欲以就利兮凡枉寻而直尺量君才为不及
兮聊顺时而姑息诋高论曰迂阔兮喜近已而循迹呜呼君名贬于杂霸兮専颂美于在昔臣
不恭莫甚于此兮徒没齿而愧惕窃独嘉夫魏公兮沃唐文而迓衡知正已而民服兮破俗辨

之刑名既柔遠而能迓兮尚惜其學略而功速成作正位之儆戒兮虽刳莒者亦听匪吾言之能賦兮唯尚文之易明

爱人賦 王 回

俟天民之秉彝兮同懿德而自好纵百骸以循物兮义与利其殊报彼君子兮唯先觉是号故忠恕以爱人兮舍元元其焉肖窃诵夫曾氏之求志兮忘违礼而寝于大夫之簟感童子之关讽兮虽疾病犹扶而反席元与春务养吾欲兮何屑屑而姑息诒话言于一朝兮可推而措诸靡极蓋曰德之为物兮在已而不在他焉其形輶于鸿毛兮其力重于太山吾人所以相保而生死兮固赖此而能然俾各达其常心兮因厥类毆而复迁孝莫大于尊亲兮不格奸于防諫慈莫隆于燕子兮择明师而讲善忠莫美于致君兮專责难于可愿礼莫隆于任臣兮敕钦职而有间莫戚于夫妇之际兮风睢鳩而谁溷莫孺于兄弟之间兮泣关弓而弥怨莫乐于朋友之交兮竟切嗟而成信其余泛吾义之所及兮亦应乎求而敢倦异此则陷父于恶兮晋申生才諡为恭纳宠孽于骄奢兮卫庄侯卒覆其宗逢主欲以厚敛兮冉求服鸣鼓之攻王僚试于私人兮形变雅之大东恣同牀之干政兮嬉娯继以兴戎小不忍于拂母兮郑克叔而俱凶损友之三科兮匪孔门之所容况巧言与佞色兮实媚众以雷同呜呼是非之甚明兮成败亦不为効歷万古而犹惑兮宁醉昏而梦未觉惜劳心而日拙兮窃方循理而造要庶无忝于曾氏之言兮聊矢賦而弥邵

大报天賦 范 镇

大宋七十有二载符节合于圣神陶钧运于真宰化至而干用九令行而夙不再泰山四维兮固基图而静宁黄河一清兮抚期运而茂对元尊降休其如响富媪効珍而弗爱星气交见景炎青赤之光鱼马两至道出东西之海于时百灵防钧天之游万物极崇丘之大凿井者罔识帝力仰盆者不知天蓋以上方游神治古之表垂意防成之防道皇极以甚夷基太平而无外重兹盈成罔或遑怠若曰时靡愆伏物不疵疠协气洪鬯而融然无际者上穹之保艾邊鄙不耸干戈倒载生灵相与而謹然于内者三后之大賚按物理以顺考防朕躬之弗逮不有反本之报曷为含生之赖况夫事具往圣之行文备前世之载効庭有六宗之禋周家有始祖之配书以巡岳而用事礼以扫地而展采总条贯于先猷赫声文乎当代上一其唱下百其响伯夷秩宗之典叔孙奉尝之掌咸谨职以先次率参谋而来上僉曰用日之至吾道之长就国之南吾君之向可以为人而祈福示圣人之能飡也涓辰之良既如是讲仪之盛又如彼将命以方底飞文以疾置鼓先令于民聽俾咸知于上意西逾月毳之垠东走天池之纪北穷祝栗之野南极濮铅之地雷出而奋豫风兴而披靡穹居卉服华体本荐之酋髻首贯胸离身反踵之帅寻声望景知中国之有至仁梯虚航深示戎狄之无外事顺走我辙迹服驯率我鞭辔乃有双觥共觝之兽赤汗赭沫之驷浮琛没羽之珍文钺碧帑之异诸福之物倜傥奇伟众变之状灿烂譎诡按图谍而未书歷封禪而不至滔滔焉峩峩焉来助祭者波委而岳峙吾皇游岩廊操絕瑞嘉闻声教之遠乐观仪物之备乃飭四方近逮周行搜杰索俊提忠挈良相与齐于螭螭蠖蠖之中思所并而周流常羊者已在出警之先期也阙觚削其如倚铺首呀而欲骧行幄默而下垂乐宫帆其高张八校拱着五旗司方礼器之葳蕤军装之陆梁错文以章藻采兮四防

五达之庄既法从之肸饰倏呼鞭之对扬神扶绛宸干行东箱左黄钟兮五应以俱动前式道兮三侯而相望始乘輿也颺颺昂昂奋至德之光大明登兮重昏破而羣陰藏既遵途也秋秋踽踽走万人之望駭飏驰兮浮挨沈而瑞气翔参忠信于倚衡兮遠何适而不臧总德法而不防岳然其不动兮躬自厚而矜庄春然其太和兮躬不违而滋凉颺储思于逆厘之事也径息驾乎列仙之场俨陟降以肃洁兮查悟灵于忽恍【平】款謁之辞称毕孝思之容外溢苇然如伤沛然不悵念报天之罔极顾履霜而怀惕莫重乎礼经之五以观乎世庙之七内则乐穆羽舞旄狄苾芬仪赫奕迟奉乎明灵之来格外则熊司旗虎视防威振厉气防郁肃陈乎游徼之骈望俄而传呼旦之声严出庙之跽眄重闥以南直届夫礼神之室观夫涂大朱以洞辟坛八觚而翼騫飒绅綏之綽防颖貂蟬之防芊上摩星以旃云下藻野而縟川圣人凝旒以则数荐璧而象圆乐六变而导和爵三献而告防百神爱瑞以祖洽四方承宇而来旋啓睟膺之芬膏焜樵蒸于高烟沓馨明之升闻藹嘉休而肃延回五辂兮清道御两观于中天歌涂巷而沸涌观堵墙而駢填或陰而霞纷振衣而警袂方冬而暑盛叠迹而侧肩靚粧千车回轅冲輶岌若移山之行隐如奔雷之声磕砰 砢以拱乎神庭铁衣万骑奋蹏横逸晶如积雪之释迅如冲风之疾宛转络绎以环于帝室严办兮中外肅句兮上下绳鹤驭以飞书絙鸡竿而肆赦纵系縲以毕出普疵吝而一洒重离之曜大继明以照四方泰山之云不崇朝而徧天下飭饫赐沐纯嘏受厘而延膝席饮福而奏需雅太室之声曼延于壽厯覆盂之安盘固于宗社彼甘泉汾陰后土之祠交门竹宫神光之拜或孜孜于曲请或屑屑于未戒隘哉陋乎曾未知福含生怀万灵之为大也有一二眉壽顾谓臣曰子游都而盛其际吉其逢者所谓观国之光利用宾于王矣亦尝知盛际之所自出吉逢之所由来者乎子少留吾其语汝夫圣人之将有为也必本于仁义声而为乐文而为礼柄而刑赏统而祠祭崇让以树之怀遠以固之作德以茂之此古先之能事教化之肇基也故其始下诏则有司指图有经叩天进辞相与上乎荣号者当宁却而不名斯崇让之至诚也将僎仪则百蛮款塞移珍謁謹象译厥角于北阙者本朝羈而不絕斯怀遠之上烈也既已事县官去烦削密轻徭缓租驱跻于仁壽者庶黎愉然而在宥斯作德之洪覆也夫一举而关众目非由圣躬发愤其孰能大图而殫究子盍亦接胥庭之图披義农之策援结绳造契之具迹卷领垂衣之躅料【平】基绪之冯厚準元精之回复扬波以挹其腴润摘芳以搴其稠縟然后摠文心散辞气伏天庭而进牋臣蹶然而仰曰富哉言乎微文人后进生其不识王泽之渗漉也谨拜手而系曰赫赫钜宋体元垂统升中而奉兮恢恢大圆应圣何言隤社以蕃兮吾皇之隆彼苍之崇合符无穷兮

鸿庆宫三圣殿赋 刘 攽

臣伏见陛下追述祖考崇奉明祀新作三圣殿以昭孝明功于天下臣以文学中第太常试官秘书目覩盛事不敢以鄙薄自绌辄作古赋一篇以歌咏盛德昔灵光景福之作世称其美丽然其所谓壮大不出乎雕刻画绘文彩之煌煌而已又盛道工人之巧民力之众材木之多金玉之伟臣以谓圣王有作则必智者献其巧壮者输其力山林不敢爱其材府库之聚皆所供亿也是物理之常不足以夸大臣愚窃陋之若夫天命废兴之际圣王授受之符非敏智通达未有能究知其始终者固难为寡见浅闻者道也臣窃大之是以略所陋而张所大不敢仰希风人雅颂之列庶防有其志云尔蓋上帝之所选建明圣命以天位者乃所以享德而报功焉未有德盛于前功播于后而其子孙寂寥千载无声者也贤哲所谈六籍之云德莫着于有虞

功莫隆于五臣禹平水土夏姁以家司徒后稷是教是食肇商兴周歷載累百皐陶大理五刑以明于其苗裔乃兴于唐若夫董淳耀以攸司奏庶民之鲜食焚山烈泽害服妖息鸟兽咸若草木允殖固伯益之力焉天报以位俾秦周继于其子孙诬祖不绍去火即水叛礼尚刑法以惨急然犹兼六国一天下而不知变于初二世以毙非天不相朕虞之后乃其否德得罪于祖而防弃也惟伯益之功未报是以天命复集于赵氏焉五代丧德九土分裂海水横流民用垫溺鸟兽昌炽黔首失职滔滔惑惑蓋若洪流之未辟于是太祖乘火而帝继益之功天胙吉土曰惟商丘是为星火大辰之居亦曰明堂布政之由出潜离隐或跃在渊以有九有百度正焉削祸戡乱出民涂炭风指日舒天地正观荆燕吴蜀楚越并冀慑威怀仁奔走失气崛强者执服柔从者加赐太宗承之真宗成之登封降禅矢直砥平巍巍乎邈三五而俦俦彼汉魏之琐琐曾何比京夫伯益始掌火而底绩而宋以火帝兴于火墟天之报施岂不昭昭可推而类也哉且夫积功以凝命而创业因物以胙土由土以建号乐以反初礼不忘其本是故作于原庙建之别都三圣鼎列大厦以居以答景贶以昭成功俾子孙知厥所由亿兆仰德而不穷也厥后烈风云雨电雷震曜儆戒于下滥炎流烧天子忧于大异反已正德伏念七年乃其有得曰天以德训予而以威震予依类托谕予敢不信夫政不变不足以化新礼不修不足以化民天之示人若曰政礼之敝虽祖宗之为犹当勿憚乎改更于是诏三事饰九卿和布于旧載損載益以答天誠以舉聖職夫既天行而日白矣乃復闔宮獎夫神衷三后在天對越上穹經之營之不日成之閔偉奇麗所以使宮寢之勿逾也清閑窅密鬼神之所都也絜百圍而置楹兮度千仞以架棟擇一木于萬章兮顧余羨者猶眾般倕饕餮人之俦獻巧而林立兮莫不心競而賈用亘長廊其如城兮辟重門其似洞栾拱粲其如星兮侏儒屹其承重如翬斯飛如鳥斯革兮誠可栗其將動闔陰房之密靜兮雖六月其必寒辟陽榮之敞麗兮蓋中夜而已旦涉廣除而徑上兮每百尺而一級歷青珉之瑩滑兮曾不得而側立顧風雨之在下兮足以避夫燥濕良非人力之所為兮宜鬼神之攸集于是使夫設色之工后素之巧想像形容圖寫必効夫其龍顏日角天質之顒昂兮臣乃今知真人之異表于是駕銮輅登玉虬千乘萬騎云動而景附兮想平生之豫游旂常繽紛以艷翕兮鐘鼓軒輊簫管發而啁啾雜魚龍之奇技兮蜿蜒曼延于道周百神紛而并迎兮出閭闔而御夫龍舟爾乃川后靜波屏翳息風舳舻相銜若復道之延屬兮亘千里而相通百工備官而夙設兮棹夫謹呼而奏功惟吉行之五十兮余日力而靡窮既屆既止威儀若初以幸夫壽宮乃即前楹以脩祀事威神如在望之可畏殫金玉以備用罄飛潛以荐味帷帳筦簟之安肆几杖筆研之儲侍靡一物之蓋闕兮所以廣孝思而尽心志守臣侍祠罔不肅飾既事而旋闕而莫覲列仙之儒偃佺之倫迎神頌祇于其側若夫祝融重黎相土閼伯固已喜動乎魄情見乎色護清蹕而晞盛德也巍巍大哉不可得而記已且夫天命之不忘人生之大寶也祖宗之有繼子孫之勿替也茲聖王所以繼統垂業超商邁周防嗣錫羨貽厥孫謀使萬有千歲得以希風而承流也遂作頌曰崇崇商丘大火主兮曰宋之興道是配兮建邦設都以有九土兮有皇上帝明德輔兮伯益之功邈不可忘兮三聖承承有烈光兮奕奕寢廟神翱翔兮于胥萬年尚無疆兮

秋怀赋 刘 敞

世量力以为智兮孰不自师其成心不彊短以彼修兮亦各济其所任蓋周任之明清兮予尝服于德音性專直其似愚兮遂底滯而廢沈惟古人有不遇兮亦奚慨于斯今昔既冠而从仕

兮冀陈力而帅职何日月之不淹兮亹亹至乎不惑世与我其异衷兮增余怀之默默数废日而倍参兮愿自竭而安得将奔而及事兮愧初心而变色譬游者之无术兮念愈躁而逾没荷众贤之并容兮曾介善之不遗辱兴防之未举兮遂以造夫攸司君之门不可以径入兮既待诏而歷时唯褊心之狷狭兮乐绳墨其自持诚诡遇其有获兮虽得兽而耻之信天命之有在兮非智勇其孰勿疑时既秋而凉风兮草木落而变衰日月丽于西厢兮蟋蟀迅而鸣悲阅四序之代谢兮既逝者之如斯悼我心之弗获兮起惆怅而称诗

宋文鉴卷四

卷五

钦定四库全书

宋文鉴卷五

宋 吕祖谦 编

赋

不寐赋 刘 攽

饨郁邑其冯中兮何鉴寐其弗夷方永夜之未艾兮廓静处而长思悼既往之弗及兮慨来今之曷知绪将絶而复续兮精发越而滛移倏四海其再抚兮泯万碁乎须防武胜商而归周兮天保定其千亿叔旦兼乎三王兮仰勤思而有获孔潜精于好学兮致愤懣于无益乐好善而用鲁兮孟见喜乎顔色仁弗遇于卫顷兮愿奋飞而不得翟相气而见祥兮献肇谋乎虞虢彼遠虑之与近思兮智与愚皆从其职嗟民生之多艰兮嗟以心为形役君子有不安其命兮小民有度其力非蚊虻之嗜肤兮曾内怀于大棘惟昔梦之蘧蘧兮既怅然而独寐亮伐柯之不遠兮何内 而宋固希圣人之大觉兮绵万世而不遇幸曲肱而自怡兮庶无迷于初度

拙赋 周惇頤

或谓予曰人谓子拙予曰巧窃所耻也且患世多巧也喜而赋之

巧者言拙者默巧者劳拙者逸巧者贼拙者德巧者凶拙者吉呜呼天下拙刑政彻上安下顺
风清 絶

洛阳怀古赋 邵 雍

洛阳之为都地居天地之中有终天之王气在焉予家此治平歲防秋乘雨霁与殿院刘君玉登天宫寺三寶阁洛之风景因得周览惜其百代兴废以来天子虽都之而多不得其久居也故有怀古之感以通讽谕君玉好赋以赋言

秋雨霁日色清景方出秋益明何幽怀之能快唯高阁之可凭天之空廓风之轻冷览三川之形胜感千古之废兴乃眷西北物华之妍云情物态一气茫然拥楼阁以高下焕金碧之光鲜当地势之拱处有王居之在焉惜乎天子居东都此邦若诸夏不防要于方来不号令于天下声明文物不此而出道德仁义不此而化宫殿森列鞠而为茂草园囿基布荒而为平野銮輿曾不到者三十余年使人依然而叹曰虚有都之名也噫夏王之治水也四海之内列壤惟九

而居中者实曰豫州荆河之北此为上流周公之卜宅也率土之滨建国为万而居中者实曰洛阳瀍涧之侧此唯旧邦迄于今日二千年之有余因兴替之不定故靡常其厥居我所以作赋者阅古今变易之时述兴亡异同之迹追既失之君王存后来之国家也噫太昊始法二帝成之三王全法参用适宜伊六圣之经理实万世之宗师我乃谓治民之道于是乎大尽矣逮夫五霸抗轨七雄驾威汉之兴乘秦之 曹之擅幸汉之衰如鼎立而治终豆分而 晋中原之失守宋江左之画畿或走齐而驿魏或道陈而经隋自元魏廓河南之土植六朝之风物李唐蟠关中之腹孕五代之乱离其间或道胜而得民或兵彊而慴下或虎吞而龙噬或鸡狂而犬诈或创业于艰难或守成于逸暇或覆餗而终焉或苞桑而振者故得陈其六事虽善恶不同其成败一也其一曰大哉德之为大也能润天下必先行之于身然后化之于人化也者效之也自人而效我者也所以不严而治不为而成不言而信不令而行顺天下之性命育天下之生灵其帝者之所为乎其二曰至哉政之为大也能公天下必先行之于身然后教之于人教也者正之也自我而正之者也所以有严而治有为而成有言而信有令而行拔天下之疾苦遂天下之生灵其王者之所为乎其三曰壮哉力之为大也能教天下必先丰府库峙仓箱锐锋镝峻金汤严法令于烈火肃兵刑于秋霜竦民听于上下慴夷心于外荒其霸者之所为乎其四曰时若伤之于随失之于宽始则废事久则生奸既利不能胜害故狂得以疾贤是必薄其赋敛欲民不困而民愈困省其刑罚欲民不残而民愈残所致之之道失其本矣其五曰时若任之以明専之以察始则烈烈终焉缺缺既上下以交虚乃恩信之见夺是必峻其刑罚欲民不犯而民愈犯厚其赋敛欲国不竭而国愈竭盖致之之道失其末矣其六曰水旱为沴年岁丰虚此天地之常理虽圣人不能无盖有备而无患不得中者加以宽猛失政重轻逸权不有水旱而民已困而况有水旱兵革焉所谓本末交失不亡何待天下有成败六焉此之谓也君天下者得不用圣帝之典谟行明王之教化士可杀不可辱民可近不可下上能抚如子焉下必戴其后也仲尼所以陈革命则抑为人之匪君明逊国则杜为人之不臣定礼乐而一天下之政教修春秋而罪诸侯之乱伦删诗以扬文武之美序书以尊尧舜之仁赞大易以都括与六经而并存意者不可以地之重易民之教不可以民之教悖天之时必时教之各备则居地而得宜是故知地不可固有之也君上必欲上为帝事则请执天道焉中为王事则请执人道焉下为霸事则请执地道焉三道之间能举其一千古之上犹反掌焉则是洛之兴也又何计乎都与不都也如欲用我吾从其中

灊灊堆赋 苏轼

世以瞿唐峡口灊灊堆为天下之至险凡覆舟者皆归咎于此石以余观之盖有功于斯人者夫蜀江防百水而至于防弥漫浩汗横放于大野而峡之小大曾不及其十一苟先无以齟齬于其间则江之远来奔腾迅快尽锐于瞿唐之口则其峻悍可畏当不啻于今耳因为之赋以待好事者试观而思之

天下之至信者唯水而已江河之大与海之深而可以意揣唯其不自为形而因物以赋形是故千变万化而有必然之理掀腾悖怒万夫不敢前兮宛然听命惟圣人之所使予泊舟乎瞿唐之口而观乎灊灊之崔巍然后知其所以开峡而不去者固有以也蜀江远来兮浩漫漫之平沙行千里而未尝齟齬兮其意骄逞而不可摧忽峡口之逼穿兮纳万顷于一杯方其未知

有峽也而战乎灩澦之下喧豗震掉尽力以与石鬪勃乎若万骑之西来忽孤城之当道钩援临冲毕至于其下兮城坚而不可取矢尽剑折兮迢迢循城而东去于是滔滔汨汨相与入峽安行而不敢怒嗟夫物固有以安而生变兮亦有以用危而求安得吾説而推之兮亦足以知物理之固然

屈原庙赋 苏轼

浮扁舟以适楚兮过屈原之遗宫览江上之重山兮曰惟予之故乡伊昔放逐兮渡江涛而南迁去家千里兮生无所归而死无以为坟悲夫人固有一死兮处死之为难徘徊江上欲去而未决兮俯千仞之惊湍赋怀沙以自伤兮嗟予独何以为心忽终章之惨烈兮逝将去此而沈吟吾岂不能高举而远游兮又岂不能退默而深居独嗷嗷其怨慕兮恐君臣之愈疎生既不能力争而彊谏兮死犹冀其感发而改行苟宗国之颠覆兮吾亦独何爱于久生托江神以告冤兮冯夷教之以上诉歴九关而见帝兮帝亦悲伤而不能救怀瑾佩兰而无所归兮独惇惇乎中浦峽山高兮崔巍故居废兮行人哀子孙散兮安在况复见兮高台自子之逝今千载兮世愈狭而难存贤者畏讥而改度兮随俗变化斲方以为圆龟勉于乱世而不能去兮又或为之臣佐变丹青于玉莹兮彼乃谓子为非智为高节之不可以企及兮宜夫人之不吾与违国去俗死而不顾兮岂不足以免于后世呜呼君子之道岂不全兮全身遠害亦或然兮嗟子区区独为其难兮虽不适中要以为贤兮夫我何悲子所安兮

昆阳城赋 苏轼

淡平野之霭霭忽孤城之如块风吹沙以苍莽帐楼櫓之安在横门豁以四达故道宛其未改彼野人之何知方伛偻而畦菜嗟夫昆阳之战屠百万于斯须旷千古而一快想寻邑之来阵兀若驱云而拥海猛士扶轮以防茸虎豹杂沓而横溃罄天下于一战谓此举之不再方其乞降而未获固已变色而惊悔忽千骑之独出犯初锋于未艾始凭轼而大笑旋弃鼓而投械纷纷籍籍死于沟壑者不知其何人或金章而玉佩彼狂章之僭窃蓋已旋踵而将败岂豪杰之能得尽市井之无赖贡符献瑞一朝而成羣兮纷就死之何怪独悲伤于严生怀长才而自浼岂不知其必丧独徘徊其安得过故城而一吊增志士之永慨

赤壁赋 苏轼

壬戌之秋七月既望苏子与客泛舟游于赤壁之下清风徐来水波不兴举酒属客诵明月之诗歌窈窕之章少焉月出于东山之上徘徊于斗牛之间白露横江水光接天纵一苇之所如凌万顷之茫然浩浩乎如冯虚御风而不知其所止飘飘乎如遗世独立羽化而登仙于是饮酒乐甚扣舷而歌曰桂棹兮兰桨击空明兮泝流光 乎予怀望美人兮天一方客有吹洞箫者倚歌而和之其声呜呜然如怨如慕如泣如诉余音嫋嫋不絶如缕舞幽壑之潜蛟泣孤舟之嫠妇苏子愀然正襟危坐而问客曰何为其然也客曰月明星稀乌鹊南飞此非曹孟德之诗乎西望夏口东望武昌山川相缪郁乎苍苍此非孟德之困于周郎者乎方其破荆州下江陵顺流而东也舳舻千里旌旗蔽空酺酒临江横槊赋诗固一世之雄也而今安在哉况吾

与子渔樵于江渚之上侣鱼鰕而友麋鹿驾一叶之扁舟举匏樽以相属寄蜉蝣于天地 沧海之一粟哀吾生之须臾羡长江之无穷挟飞仙以遨游抱明月而长终知不可乎骤得托遗响于悲风苏子曰客亦知夫水与月乎逝者如斯而未尝往也盈虚者如彼而卒莫消长也盖将自其变者而观之则天地曾不能以一瞬自其不变者而观之则物与我皆无尽也而又何羡乎且夫天地之间物各有主苟非吾之所有虽一毫而莫取惟江上之清风与山间之明月耳得之而为声目遇之而成色取之无禁用之不竭是造物者之无尽藏也而吾与子之所共适客喜而笑洗盏更酌肴核既尽杯盘狼籍相与枕藉乎舟中不知东方之既白

后赤壁赋 苏轼

是岁十月之望步自雪堂将归于临臯二客从予过黄泥之坂霜露既降木叶尽脱人影在地仰见明月顾而乐之行歌相答已而叹曰有客无酒有酒无肴月白风清如此良夜何客曰今者薄暮举网得鱼巨口细鳞状似松江之鲈顾安所得酒乎归而谋诸妇妇曰我有斗酒藏之从矣以待子不时之需于是携酒与鱼复游于赤壁之下江流有声防岸千尺山高月小水落石出曾日月之防何而江山不可复识矣予乃摄衣而上履巉岩披防茸踞虎豹登虬龙攀栖鹘之危巢俯冯夷之幽宫盖二客不能从焉划然长啸草木震动山鸣谷应风起水涌予亦悄然而悲肃然而恐凜乎其不可留也反而登舟放乎中流听其所止而休焉时夜将半四顾寂寥适有孤鹤横江东来翅如车轮 裳缟衣戛然长鸣掠予舟而西也须防客去予亦就睡梦一道士羽衣翩跹过临臯之下揖予而言曰赤壁之游乐乎问其姓名俛而不答呜呼噫嘻我知之矣畴昔之夜飞鸣而过我者非子也耶道士顾笑予亦惊悟开户视之不见其处

秋阳赋 苏轼

越王之孙有贤公子宅于不土之里而咏无言之诗以告东坡居士曰吾心皎然如秋阳之明吾气肃然如秋阳之清吾好善而欲成之如秋阳之坚百谷吾恶恶而欲刑之如秋阳之隕羣木夫是以乐而赋之子以为何如居士笑曰公子何自知秋阳哉生于华屋之下而长游于朝廷之上出拥大盖入侍帟幄暑至于温寒至于凉而已矣何自知秋阳哉若予者乃真知之方夏潦之淫也云蒸雨泄雷电发越江湖为一后土冒没舟行城郭鱼龙入室菌衣生于用器蛙蚓行于几席夜违湿而五迁昼燥衣而三易是犹未足病也耕于三吴有田一防禾已实而生耳稻方秀而泥蟠沟塍交通墙壁頽穿面垢落墜之涂目 湿薪之烟釜甑其空四隣悄然鹤鹤鸣于户庭妇宵兴而永叹计无食其防何矧有衣于穷年忽釜星之杂出又灯花之双悬清风西来鼓钟其镗奴婢喜而告予此雨止之祥也蚤作而占之则长庚澹其不芒矣浴于暘谷升于扶桑曾未转盼而倒景飞于屋梁矣方是时也如醉而醒如瘖而鸣如痿而起行如还故乡初见父兄公子亦有此乐乎公子曰善哉吾虽不身履而可以意知也居士曰日行于天南北异宜赫然而炎非其虐穆然而温非其慈且今之温者昔之炎者也云何以夏为盾而以冬为衰乎吾侪小人轻愠易喜彼冬夏之畏爱乃羣狙之三四自今知之可以无惑居不障户出不御笠暑不言病以无忘秋阳之德公子拊掌一笑而作

中山松醪赋 苏轼

始予宵济于衡漳车徒涉而夜号燧松明以记浅散星宿于亭臯郁风中之香雾若诉予以不遭岂千歲之妙质而死斤斧于鸿毛効区区之寸明曾何异于束蒿烂文章之纠 惊节解而流膏嘻作厦其已遠尚药石之可曹收薄用于桑榆制中山之松醪救尔灰烬之中免尔萤爚之劳取通明于盘错出肪泽于烹熬与黍麦而皆熟沸春声之嘈嘈味甘余而小苦叹幽姿之独高知甘酸之易坏笑凉州之蒲萄似玉池之生肥非内府之烝羔酌以瘿藤之纹樽荐以石盘之霜螯曾日饮之防何觉天刑之可逃投拄杖而起行罢儿童之抑搔望西山之咫尺欲褰裳以游遨跨超峰之奔鹿接挂壁之飞猱遂从此而入海 翻天之云涛使夫嵇阮之伦与八仙之羣豪或骑麟而翳鳳争楫挈而瓢操颠倒白纶巾淋漓宫锦袍追东坡而不可及归舖歎其醜糟漱松风于齿牙犹足以赋远游而续离骚也

怀归赋 沈 括

归休乎嗟生亦劳兮歲常九行而一息四方已莫不异兮欲终往而安即披荆榛以孤鶩涉大涂之梗塞投孱顏以空入孰为眠而朝食警欬一山而百折兮况千里之绵邈高浪鳞卷而电划兮近不保乎咫尺嗟乎子乘此而安之兮托扶摇以寸翮吾一念子之往兮意允兀碑而屹栗彼夫人之圣哲宁有欲乎颠蹶摩冥冥之无穷抽万世之潜默虽皎中而自信亦终防坎而莫覩来之不可与谋兮果去亦庸何伤既振轡而大驱兮盍倡佯其所适期无美于古人兮苟亦善吾之令德终旷荡之可骧兮信幽履之不惑

黄楼赋 苏 辙

熙宁十年秋七月乙丑河决于澶渊东流入钜野北溢于济南溢于泗八月戊戌水及彭城下余兄子瞻适为彭城守水未至使民具畚鍤畜土石积刍茭窒隙穴以为水备故水至而民不恐自戊戌至九月戊申水及城下者二丈八尺塞东西北门水皆自城际山雨昼夜不止子瞻衣制履屨庐于城上调急夫发禁卒以从事令民无得窃出避水以身帅之与城存亡故水大至民不溃方水之淫也汗漫千余里漂庐舍败冢墓老弱蔽川而下壮者狂走无所得食槁死于丘陵林木之上子瞻使习水者浮舟楫载糗粮以济之得脱者无数水既涸朝廷方塞澶渊未暇及徐子瞻曰澶渊诚塞徐则无害塞不塞天也不可使徐人重被其患乃请增筑徐城相水之冲以木堤捍之水虽复至不能以病徐也故水既去而民益亲于是即城之东门为大楼焉垚以黄土曰土实胜水徐人相劝成之辙方从事于宋将登黄楼览观山川吊水之遗迹乃作黄楼之赋其词曰

子瞻与客游于黄楼之上客仰而望俯而叹曰噫嘻殆哉在汉元光河决瓠子腾蹙钜野衍溢淮泗梁楚受害二十余年下者为污泽上者为沮洳民为鱼鼈郡县无所天子封祀太山徜徉东方哀民之无辜流死不藏使公卿负薪以塞宣房瓠子之歌至今伤之嗟惟此邦俯仰千载河东倾而南泄蹈汉世之遗害包原隰而为一窥吾墉之摧败吕梁齟齬横絕乎其前四山连属合围乎其外水洄洑而不进环孤城以为海舞鱼龙于堙壑阅帆檣于睥睨方飘风之迅发震鞀鼓之惊骇诚蚁穴之不救分閭閻之横溃幸冬日之既迫水泉缩以自退栖流楫于乔木遗枯蚌于水裔听澶渊之奏功非天意吾谁赖今我与公冠冕裳衣设几布筵中酒相属饮酣

乐作开口而笑夫岂偶然也哉子瞻曰今夫安于乐者不知乐之为乐也必涉于害者而后知之吾尝与子冯兹楼而四顾览夫宇之宏大缭青山以为城引长河而为带平臯衍其如席桑麻蔚乎旆旆画阡陌之从横分园庐之向背放田渔于江浦散牛羊于烟际清风时起微云霏防山川开阖苍莽千里东望则连山参差与水皆驰羣石倾奔絶流而西百步涌波舟楫纷披鱼鼈颠沛没人所嬉声崩震雷城堞为危南望则戏马之台巨佛之峰岿乎特起下窥城中楼观翱翔鬼戕相重激水既平莽浮空骈洲接浦下与淮通西望则山防为袂伤心极目麦熟禾秀离离满隰飞鸿羣往白鸟孤没横烟澹澹俯见落日北望则泗水滂漫古汴合焉汇为涛渊蛟龙所蟠古木蔽空乌鸟号呼贾客连檣联络城隅送夕阳之西尽导明月之东出金钲薄于青嶂陰氛为之辟易窥人寰而直上委余彩于沙碛激飞楹而入户使人体寒而战栗息汹汹于羣动聽川流之荡潏可以起舞相命一饮千石遗弃忧患超然自得且子独不见夫昔之居此者乎前则项籍刘戊后则光弼建封战马成羣猛士成林振臂长啸风动云兴朱阁青楼舞女歌童势穷力竭化为虚空山高水深草生故墟蓋将问其遗老既已灰灭而无余矣故吾将与子吊古人之既逝阅河决于畴昔知变化之无在付杯酒以终日于是众客释然而笑頽然就醉河倾月堕携扶而出

宋文鉴卷五

卷六

钦定四库全书

宋文鉴卷六

宋吕祖谦编

赋

感山赋 崔伯易

客有为予言太行之富其山一名皇母一名女娲或于此炼石补天今其上有女娲祠因感其説为之赋其辞曰

曲辕先生从先大夫之南征省黑许于紫霄访武王于朱陵授罗浮之隐书撷三茅之神英息肩淮泗之滨闭关 歌与世无营一日梁国公子铜鞮处士闯然踵门悦然相亲曰先生倦游者矣祈有异闻先生不对寘请愈勤于是为论山中之物山中之民叙山中之遗懽咏山中之淳文二客相视而笑曰先生唐相之家族蕃西京京于吾乡驾财累程连聯高山见于羣经兹其不言疑未之行试为先生陈之何如公子赞之处士曰夫坤厚之势犹一人之体昆仑为之首自首而下峽防屹□无复平地陵轹百国有陰山焉横二千余里北为戎狄南为古圣之所治测中言之殆吾国之干位听天铜浑周髀保章参地之形兹为最详上正枢星下开冀方逢胃而毕自柳以张乱则冀安弱则冀强起为名丘妥为平冈岿乎甚尊其名太行挟大河于楚东瞰北岳其在旁其高也迢迢而上始莫知其高也登蹶千里昂目而前望骇实与夫天当其深也缭绕盘辟始莫知其深也驰朔东而左转垂三月而见脊盛连延乎碣石传曰东海之水不尽而此山也吾莫知其所极此其知言哉如彼大邦圻钩壤连如彼大川洲维浦聯殊乡异观习乎所传坳然若鞍者曰鞍山突然若灶者曰灶山色黑者黑山形方者方山如此之类名何可殫墨翟察而知驥之贵尸俊过而辨牛之难穆王升由雀道而出世宗行自大河而还孝明尝登幸上党郡章帝以防至天井關孟德北上纪摧轮之恐谢公西顾引忧生之端阮籍失路而咏懷刘峻懷交而发叹归晋阳子惠之便道对二坂祖濬之祥观开元锡问于逢车武德置县而当烦霍褰吾襟共附吾肘纏午壁之势探长城之口天门揭其部分乌岭支其 蹂姑射王屋隆虑雷首靡迤嶽岑参错订𩑦或拱其左或捧其右或 其前或赞其后让以奇巘贡以重岫曾夸娥之输力攤大帝之宝授上晡暖兮 击下砰磕兮鲸鬪又若王畿之外五等诸侯奉命守土率属千万悉面内而腾奏此山之形也汾潞丹洹滹池淀易涑沁淇潼清源济渚奄响将迎纵横漱激安阳巨马出其夸白防北涿度其液触遥阜以孤引防荣光而厯羣凝染渐渍哀青贮碧此山之容也奠荒有神开社有伯以风主威以云主泽翻手燭阳覆手霹雳近靡百城遠霈万域暴暑亟寒暗天一白烟不得为瘴气不得为疫岂其幽深也深其欲而难期其并合也合其力则无敌此山之气 也轩后以来至于成王自时建都迁徙不常遠近表里

其陰其阳春秋之前封国既多春秋之后唯晋为疆大抵以兵为阻以险为防守不敢防战不敢忘越至卑耳而齐相以霸一入孟门而平公防亡燕赵中山卫韩与魏或主山东或主河内或主山西或主河外或城其隈或据其防或保作咽喉或恃为腹心屯留有常阻山阳有常界跬步之侧万人死之复驱万人而地不少退如黑斯林如虬斯壑左顾右睨牙锋鏖乘间薄人肝脑涂地以拏旗虜将而为乐不然假息窃视扞以城郭从姬歌儿名珙重璞不敢不献虽欲藏之亦终归乎攫抐孩乎哉固尝一朝之中一舍之间烹四十余万之众筑头颅之山举长平为鼎镬旧壁荒城豆分碁错今千余年幽陰寂寞此山之势胜也当时雄豪迭指交质行野者非乐其野逐兽者非即其兽裴徊陵陆逾跼陂阜裁约六国睥睨九道孰为龙首孰为天灶向背孰徙草木孰遣器械孰便憑倚孰厚东西孰广南北孰袤为虵孰尾为鸛孰喙孰方孰圆孰牝孰牡冲轮孰敏沮鴈孰懋孰利裘掩孰利藏覆孰此出击孰此入寇孰可徒抐孰可骑骡孰可啗诱孰可斥孰可接战孰可挑鬪孰最恐夜孰不欲昼胜此孰逐败此孰救佯道孰止乘乱孰走孰要于迹孰闭其后记省在目陈說在口憑轼结鞬忿参去就所过之邑鸛视狼吼诘无不讲向无不偶入军则建旗鼓入朝则佩印绶以国试胆以民试手为纵横家随以此售關警迟速称画贫富矫尾厉角恐惕齟齬鬼神不能窥其密贤峻不能纠其繆中人主之利欲移将相之恩旧其后或主或臣建功立业尤显闻于后世则有决羊肠之险壅此山之道攻荣阳伐韩以威天下应侯为秦昭王之谋也据敖仓之粟杜此山之阨距飞狐之口守白马之津使天下知所归者酈食其为汉高祖之谋也逾此山入射犬破青犢之众杀谢躬于邺以收复天下为心者汉光武之谋也济河降射犬之众还军敖仓属魏种以河北事然后西向以争天下者魏武帝之谋也进据武牢扼其襟要俾窦建德不能逾山入上党收河东之地而卒以并天下者唐太宗之谋也徐思以观亦吾之近藩北压燕蓟西临顺檀笼里控外聯区接寰州开其隅邑疏其间衡而为垒缺而为關有朝歌内黄黎阳之支离有五原高平广民之依攀前规成臯逆嬰邯鄲收褰帷趣驾之威宰簪笏假轡之官大城望之如云小城夹而金安各负城势熊羆虺蟠宿貔貅之徜徉峙刍粟之巘岼此又其山古今因人以明效者也偏隅之祲蒸郁成象或为楼阙或类亭障下利悬辟其土白壤谷备五种穎粟丰穰以陶则不窳以牧则易长驂鸛駘駟騊駼馭繁鬣赤喙黄脊白頰奇毛异骨駟駘駘鸛或出凹揜或防广敞或随斲而乍散或就饮以羣往秦青觀之而目造父逢之而伎痒若乃边风夜号寒气朝荡木叶昼脱川原萧爽挺逸彩之疎瞬厉雄心之倜傥分騰而郊野暗聚鸣而阮谷响最下者羸粮载士日中而驰百里鳳臆兰筋探前扶后何止乎蹄间三丈马之所施险之所依有德者然后能之其或守之不以道用之失其宜则是二者在所为盜賊之资司马侯告晋侯以先王之不务者非弃之也而吴起言商紂之国志有激于当时何则宣帝处先零金城而终貽汉患武帝倚元海并州而俄倾晋基自后聰曜石勒姚萇季龙元魏高齐诸苻慕容呼侶嘯类提占戎或屯于定襄或保于居庸或建都邺下或渡军河中或改元离石之北或僭号沙河之东胡尘一逾三關遂空长沙之城洛阳之宫摇轡长驱传国都而扼踪暴衣冠于涂炭客宗庙于妖凶更帝迭王抑为盛衰其四方简册不可得而书者几防战而防攻由是观之为彼君者始之失于一朝遂使天下之人亲戚离散一百二十六载挂性命于兵锋此又当世贤人君子登高虑遠所宜追述为万世深誠者也当彼之时国中窄而山中寬天下危而山中安外儉人苟容以盜官兮内浩歌乎考槃外吁嗟愁涕之辛酸兮内游鹿豕其方欢外穷奢极侈以相残兮内交让乎瓢簞外伏櫜缩劒以衔冤兮内乐天其盘桓仁智所依仙圣其迹其动如龙非迅雷烈风不起其出如鳳非醴泉甘露不食服皇媧之妙道藏补天之神石或餌术而采芝或吞阳而液或自耦

于樵钓或偶懷于老易引公和之余韵振文举之归策壻王二老犹自轻之士壶关令狐殆多言之客至精元以友造化绪余尚足以治万国此其山之隐逸也即以仰之首名归山岭营纒余巉岩孱顏曳泉绅之飄飄束云衣之回还櫝众精于宝姥糝灵气于天丹蠹霏霞之朝覆豁光怪之宵环其金则钹铎鐃铎鏐鏐鏐鏐其玉则琼玖 琚璫琦璵璠石黄緑而青碧珠珉瑰而木难余粮石脂之饶防赭理长之烂煊陰映宛倚穹注蟠聯丝絺毡 铅盐铜矾备先赋之不名距三方而祖防复有紫沙黄雾神钢是取逗落液于庠涧萃坚英于弱土播蚩尤之遗勇回欧冶之灵顾下分擅乎百源上夹输于六务此其山之琛赂也其鸟五色豪鷹窟生峻嶒貌如秋胡皎月明星响拨利防足卷枯荆雕趋鸛随往还青 木栖则鵲鸛鸛鸛水止则□翠鳬防殊种诡类莫可殫名其状如麋有距回角马尾声若钟磬以出为瑞赤虎文豹黄熊封豕麋鹿獬防行转坐噬草则紫团之蓂勤母漏卢麋衔牡蒙苻蓉首乌牛膝豹足龙沙虎须赤节紫萐如雷此胡云英玉支解蠡庵防鹿肠鹤虱彭根屈据泽态夭糝芳臭粉敷或同葩异实或冬荣暑枯或珎传太一或用讲史区木则有榛有栗其桐其椅篁篠懷风桃李成蹊梗柎枫桧思仲茺莢梓漆枢栲青檀紫葳枌櫨槐枣棠榴檉黎阳栌檠桑粉榆桤槻交抵竝节稻唐防隄身縁中材实资疗饥松柏千歲蹇金石姿弥根万仞之峰落影千丈之溪孤干直出百寻而后有枝遠而望焉或如翔鸾或如蟠螭其大蔽牛其圆中规参差櫛櫛下隔百步犹繆戛而相羈公子矍然曰陆产之盛仆知焉不若是之详也且闻之汉甘泉肇于武帝唐含元建于高宗或决事于上或受计其中始用材之有余终兴利于无穷陛下临御以来四十余年未闻图苑囿之观土木之工户牖朱緑之饰诏五歲而一易服玩帷帳之具虽屡补而尚供四方黎元自视忼然咸愿献力京师进祺皇躬听钟鼓管籥之音瞻车马羽旄之容倪有司因亿兆之心率懷卫磁相泽潞之人披苍莽伐崆嶲贱新甫之得简徂徠之封激春淫之悍豪扶丹济其来东经营庶民作为新宫以壮闕乎中区以周严乎九重高閤秘庐待从兮蛺蝶翠旗黄屋往来其冲融追三雍养老之法申其孝慈复延英访问之迹考其邪正更取士之弊法着久官之新令明刺举劝沮之典絶苟简异同之政广庑长廊翼其两旁左选天下经术辯通之士以为议郎居讲朝廷疑难之义补百司之阙出委观民决狱之事以信其所详右选天下材勇温恭之人以为卫士居讲司马军机之要掌诸门之禁出委偏裨别屯之任以观其所莅兴利如此顾不为伟欤山日以开货日以通众庶习知勿为牢笼欲发者发欲攻者攻登者搢者剥者斲者烹者掇者繫者弋者四时憧憧皆民所同庶宝之沦幽万模之纷纭雕鰲彩制羽毛羣弓矢铠楯之材輿马骨革之伦被服織华鼓铸精珍三十取一归于县官宁有闻子富而父贫兴利如此顾不为伟欤公子再言处士再思之曰公子之惠亦云善矣且民可与乐成不可与虑始况乃三晋人号沉鸛孕鸛火之流烈感斗极之劲气瞻顾端巧手足便利蔑淫蛊狂厉之感无喘夜鞞瘞之累专思慮而喜任侠贵然诺而多愎恃重沦奸侈之化孤守而莫变由防唐虞之泽弥久而未坠平居之际以义气相视驰马射兽以为乐投石防距以为戏悲歌慷慨以攄其郁矜夸功名以见其志自古受命之主不先得其土则先得其土不得其地不足以控诸夏不得其兵不足以威万防粤天宝失御之后事虽近而不复言而五代不纲之时其迹甚明而可以数朱梁失守则晋人南下而急攻河阳师厚不死则魏博六州据山口之路庄宗之祸由邺郡而起清泰之败縁上党之助蕃戎陷相而石灭邺兵过河而刘去或羣盜乘隙而并出或前军自此而先渡河东之举昧李驤疾度控孟津之策世宗之征赖车驾倍程有南平之遇可畏也如人懷心腹之疾难去也如木受根柢之蠹故吾太祖皇帝之兴也践祚五月亲平泽潞念贼失仲卿之计不西下而直趋懷孟而我用向拱之言速济河而击其未聚离穴成擒吴祚之前料登

无难色李氏之深谕如洪波薄江借海以为力大霆击空与电而俱赴交广闽蜀之区淮海江汉之墟彊侯暴王袭顿踟躕纳土称臣冠佩隣聯虽天命之所在亦主威之使然其势如此犹藏太原谢将休戎十有九年太宗之吊伐也指师为林转粮如川断石岭之应划隆成之坚躬擐甲胄鬪锋易 昼夜围督六师争先压之以天下之重然后始能破焉迨我真宗抚养其人留蹕授關南之师促使益安阳之屯许北国之通和勅猛将之疏军以至陛下仁风德泽辅导长养逾八十春赋不闻竭其才力未尝疲其身憊辩者不知约从连衡之谋尚勇者不知收城夺邑之勤室家熙熙老于耕耘如养虎者不与之全物赏先至者不导于一津兹奈何合之深山触鸷猛而为勅敌之怒心鑿凿棘矜若南国之茶海濱之盐千百良民化为顽兵或防欲而拒捕或负恃而贪凌始追罪而羣亡终盛气而横行镇之常员则威有所不足列之大诛则民转相震惊陆机谓兴利不足以补害君焉孰惩公子曰不然古初生民禽兽杂居无机械以荐食无衣裳以被躯累圣哀之修其所无鑛燧取火铄金于鑪以锋刃俾持以趋逐其虫蛇创其室庐剡木成舟结防为罟剡木为矢 木为弧以饮以食以畋以渔服牛輶马纺绩防鋤后王因之迄今以娱安有至治之世导民以利复争乱之是虞太公封齐熊绎封楚鱼盐之义山林之阻公一发之民往如鶩不数十年齐楚以富彼诸侯之国民且守法岂天下之广人或敢侮调发存邑里之籍出入视保伍之名倚之守令之良防以使者之能蓋建隆初兴通餽之役奚今日之政姑息而艰行是有司不复举因民之利四方无时有可劳之氓弗防所治之法何如而已亟此禁山 海之图疑所思之未明处士曰君不闻天子之建宫乎厌江陵之瑰干空邓林之巨树山鬼见荣而儵烁坤后斥緼而容与青帝执规白帝司矩摄离朱之魄防其徽纒舍倕蚩之神明其斤斧裁鲁镇以为址判湘沱以为础趋步而 鸟正叱咤而虹蜺举星覆重櫟云缩万堵涂以齐赭璧以號土华荐金石之美梁修牙角之赋扬瑤琨与织贝荆簪丹而籥籥防羽之織縞澗 之泉纓优尊而百礼六乐华国则东房西序邦贿丰息宁主是耶公子曰嘻上方东被于琉球西薄乎羊同南畅于诃陵北憺乎空峒积摯鸿胪填货大农天人之交何求而不克徒念覃懷之城三河之冲濬断乎沧溟背栖乎犬戎齐楚瓿越鲁郑巴邛轅有所不适戢有所不通重兵之常处列城之所宗将帅之治守诏使之过从壤地所生衣食所庸不疲其赀即疲其力不出于官则去于农帑焉而乏府焉而空或骄阳淫雨之灾或戍发备河之逢流离其民易资梟雄或陰防于朋仇或椎埋以成风故先诸权俾怡其衷禹散厯山之金而赎卖子之虐汤铸庄山之币而救无 之凶非先君不足以說士非首众不足以就功如彼泉源我发其防如彼委藏我启其封设坐视天财而不知发犹有此民而不以为兵徒示二敌之涵容处士曰君知其一未覩其二琉璃之河华林之庄昔居臣民今游犬羊然黠虏奚民视此而莫敢乘焉吾非有以守之殆由天设于王公帝限乎豺狼若之何侵而夷之以纾其行餌之可欲以发其狂义未闻于灌 兵或兴于争桑投藟生心文子之至喻牛甘必鬪管坚之所量国家近边虽上腴之地久禁而不耕所弃甚轻为利甚明发丁以通驿隋政之已失治气而未尽魏室之旋倾彼乌足陈于治朝哉山东之兵三十五将之师君所闻也请置其說公子曰大农之家不患穿墉而废困仓善贾之行不念肱篋而捐金珠备得其术则害何能抗利果大入则小或可疎今防秋之兵不寄之土豪而歲起屯戍繕治之物不蓄于逐州而授于京都不募人访铜而私或自铸重给民旷土而争采于胡遗计若此庸为利欤由众人焉南牧之虑将智者兮北伐之涂推石传土决其成功束马悬车胙乎能事突收燕乐捐范阳涿郡三道之师直压懷柔拒虎北石门四兵之势引轻军发羗夏之东穴出奇道斩匈奴之右臂二客纷辨既久色相不平抗袂俱起质于先生先生輒然而笑适然而兴曰坐吾告汝夫有财而弗取无道者之

言也取而不以先王之制无法者之言也二者吾圣人之深恶不顺乎冬夏不相乎陰阳禽兽之殄暴货币之诛 不时而源枯不禁而山伤逆于天元降为灾祥则虽传道之人岂容无责哉古者大德大功之人天子尊之公侯之爵殊其奉养之方功厚者享亦厚德长者报亦长推之四海之内入为公卿出为牧伯盛不过数十土地所育人民所藏其货易供其财易当然报非天子之独私焉蓋天下皆乐其有以报也故其民贤者勉焉以修其业愚者虽甚欲焉而无敢望其志易平其劳易偿今高赀大姓之家列肆侔于府库邸第罗于康庄金绀采缀鍍劓焜煌被以黼綉裹以雕墙狗马弃齐民之食饮輿妾贱士夫之衣裳寘昏祠塋隳败纪纲通吏卖法陰淫陆梁其憑荒负险之民擅弥山络野之彊畜奴如兵占田论乡主逋豢寇者攸众宝藏甲者为常州县徒史私为之视察乡亭部夫公随之奋攘是天下山林之出除公上之赋守令吏寺略有常制每郡每邑宛转麇溃输防侯而防王彊桀相师极欲为威怒网而川贫笑斧而林飞孰察诸刊剥水火之遗制孰恤乎坚穰曲直之所宜积之徒多而器用殊寡举之或远而民资自疲富者售之益轻贫者劳而愈防誓穷原藪之饶而况膏腴之归乃方乃州或蝗或饥民以为灾而彼反为宜从是其氓匿税并田之不暇益令羣猾藏租隐地之无疑南方诸山非复昔时材不爱而木不蕃斲不时而兽不滋迨有千里不毛裹糒莫支是天地陰阳昼夜长养犹不能以克其欲则吾民何负独为狸而畜鸡蓋馭民无予夺之政厚生无发敛之期万物失由仪之道四海废崇邱之诗或者县官列胶干皮羽之须营栋宇舟车之材上苛之以敲笞下挠之以追催索之于迓则此既莫有求之于远则险孰能来方此之时時蓄之家驩相比朋固所以制百姓之命暮年而篡其业更歲而竭其才如是不已饥寒怨愁不委于沟壑则聚为盗贼非此二者吾不知其安所为哉始于伤财则终于害民察其蠹国必固乎乱俗故国家以皇祐之版书较景德之图錄虽增田三十四万余顷返減赋七十一万余斛由是言之土地财利名制约束不用先王之法其为 也民失其平若之何而可复高者愈贪而肆蚩豕下者抵禁而趋口腹刑罚日增裁害日续蓋兼并不去不足以语政制度不立不足与言治禁饬存省米之說贱肉有爱牛之意此言虽小可以类推事为之法物为之制数罟之得非不多也先王禁之以其伤生原蚕之利非不博也先王禁之以其害气果实未熟木不中伐用器不中度禽兽不中杀鬻于市者执而有罚不以其时不顺其教捕一禽折一草谓之不仁断一树伐一木谓之不孝公卿大夫羣士黎庶居室有器器械有度车马有等衣服有据饮食有常味人徒有常数戮民不敢服纁君子不履丝屨为农者不得为工为士者不得为贾天王之尊也合围犹恶其尽物诸侯之贵也杀牛尚戒于无故小既无越大岂容负草木鸟兽而舜以命益水火土谷而尧以任禹名山大川纵封国而不盼至其漆林独二十而征五着于后王修之愈明典之于天官图之于地卿任之九职之事辨其五物之征主山而有虞主林而有衡中土下土贊其政令府吏胥徒颁其所行豺祭而弓矢陈隼击而罽罗兴司险达其道路山师辨其物名鰲兽在前穴氏火物而诱之出阱獲既设 氏伐鼓而使之惊然后万民随之诏焉以程斩材者有期月窃木者有常刑至于金玉锡石什人之专取犀象麋鹿角人之所登率避其孳育以待其丰成必以其时素王称其大顺不可胜用孟軻陈其养生贵贱有差六器五辂之资民得而无所用兴造不妄五金六材之属民用而无所伤禁发之有期重轻之有常天生时而寒暑平地生财而品类昌硕以盆鼓蕃以谷量暴暴如山岳浑浑如河江山出银瓮丹甌聚麒麟鳳凰追前世之盛被于此时以吾君之圣方诸先王陶唐之二宫姚虞之总章商人之重屋周人之明堂虽彪眉耆耆爱惜朝夕期有以必覩也子之言曾何比今于汉唐陛下慈仁如天广厚如地任臣则勿疑闻諫而必喜赏罚不濫切爱乎民命祭祀罄防动交乎天祉遠民之 虽守臣

不知而知之甚详克己之誠在匹夫難行而行之甚易至若五帝寃老之禮三王觀風之制六
典建官之法三適進賢之例患有司不得其術不患朝廷之不行患臣下不舉其職不患信任
之不至今也輔相大臣左右良士重君子為臣去就之節思古人得君功烈之致施以善俗為
本學以力行為貴居朝廷不以先後持其嫌守藩鎮不以內外疑其勢同德一心齊力協議臯
陶謨而失契稷之業伯夷讓而中防龍之志以共察天下之善不使有蓋虛驕士之黨以共收
天下之杰不使有妬功蔽賢之吏以眾人之耳為耳聽眾耳之所不聽以眾人之目為目視眾
目之所不視授百司因革于吏而總其成績委二邊軍賦于將而責其必治法制素具東南既
饒天府宏壯訓練有時吳越皆霸王之兵朝令乎西西納十四州之地夕使乎北北歸十三州
之城渾然臨之以至健隕然載之以不傾伊洛之水画乎其前戎夷畏之逾黃河之湍邱垓之
山篋乎其旁戎夷阻之甚太行之橫與其邀近功于一山增眾糴之 牽危疑于往代汨因循
之名使王者之興百有餘年神聖在位而仁愛之澤獨未及于禽獸草木曷可同世而語哉二
客離席局踞媿謝不敏請為弟子既而少進曰問阜財得阜民之法問治山得治國之風且昔
者將大有為之君必有所不召之臣欲有謀焉則就之不得已而后起有學焉而后臣者有不
可得而臣者今山之隱逸亦如是而后至乎曰莫可得而知也神農之于悉諸黃帝之于崆峒
顓頊之于緣圖高辛之于柏招帝堯之于務成帝舜之于尹壽禹之于國先生湯之于伊尹文
王之于鬻熊武王之于尚父周公之于鬻叔齊桓之于管仲然尊德樂道說者如此也吾觀之
彼數子者之心將如是而已乎莫可得而知也二客悅若自失再拜而罷

宋文鑑卷六

卷七

钦定四库全书

宋文鉴卷七

宋 吕祖谦 编

赋

珠赋 崔伯易

高邮西北有湖名璧社近歲夜见大珠其光属天尝问诸渔皆言或遇于它湖中有窃谋之者则风辄引船而去终莫能至赋曰

万物之精上为列星其在下者因物而成形故天下之伟宝不妄其所托托物之主实内钟乎神灵吾尝临东海旅南溟泛淮江之汤汤济岳阳之洞庭观其溶液衍裕蓋天地之委藏秘怪惚恍蛟虬崢嶸岂世人敢指名哉若乃云梦震泽浮梁合浦兽潜宫亭神见牛渚直湘沅以南浮懷泾渭以北注顾导东而成沧浪激西而为灇灇延平诞奇汉臯殊遇率传載之杂出为异物之处或设限于藩服或效琛于王府铄高邮之经治裂扬川之故步有湖 旁将三千所大或万顷小亦千亩迤邐兮聯絡参错兮骈布由卑以自处兮倾数十州之羨沃穹山大野谿谷原藪昼夜走险越千里而来赴者莽不知其防千百处压东南之湓漫势防防而无涯鱼则鰕鲤鰼鰻鰱鲢鰭鰭鸟则鸕鵂鳬鹭防鷕鸿鴛翥若烟海防如泥沙虫螺蟹若虾蛤卉菱芡而荷华木不数舟陆无算车溉灌乎民田漕引乎国家夹埭长陂程水壤之固防飭官命属压功利之纷拏迨夫地脉泉源孰为要遮潜合陰附应淮海之 砥防风翻澜矧其甚耶其或骇怒决溢隄防之所不知泱泱千里农民播溺宛转流离而不相救又况其庐舍之与桑麻噫是亦涉者之彫观矣瑰祥恢恠庶防乎托焉间乃省贡书考图编所陈者特盘飧之微固不闻有把握之贵为当世之所传发咏乎川珍翱翔乎水边爰有芦人渔子相语而来前曰先生之念者货也若夫川泽之精理则不然不宝于人独宝于天今此有夜光之珠产于深渊我意其神先生辨旃其始也天和景晴湖波夜平烟冉冉以四收万籁息而无声则是珠也凜气将之若海月之升含彩吐耀周隅皆明呀紺石而为宫被綠苔以垂纓挹奔星之光芒吸沆瀣之精英木散景兮扶疎草露实兮红青林鸟惊而移枝羣犬愕兮争鸣于是邛人徐呼上流俱起抚鸿罍以先趋领罍筍之已试连徽挺擿洒纲持柅嗟虽鉴其眉睫疑未晓其机器方诡置之渐张果造形而已逝而况伏见靡时欸彼倏此与蛟龙之为朋曾风雨而作卫彼能三足而在簠鼈九脇而充饌汉蛟蚱之青骨郑鼃羹之异味勅牛悦水而黄夺泽马翫绳而足蹶犀狎 而解角翠因媒而折翅江使被执于行役巨鱼为腊于贪餌文贝璫瑁出祸其肠腹金华玉英坐穷于淘缁 蜃胎寒熠燿自喜怵絕意于遐引适足杀其軀而已矣是故号数选者我固谓之货也能不为珠之笑耶予曰呜呼噫嘻信子言也既明且哲则大雅君子者耶不常所居择利害而

去就者耶用以晦明知在已者耶色斯举矣学孔子之徒者耶薄泥涂而不辱不耻下贱者耶川不涸岸不枯有德乡里者耶久而不闻其邈世者耶既而复曰呜呼噫嘻照魏王之乘耶烛隋侯之室耶谓上币耶饰冠冕而佩耶客有闻者亦矍然而兴曰呜呼噫嘻吾闻诸石室之书曰王者得之长有天下四夷宾服然则得之者或非其心独王者之心耶

煎茶赋 黄庭坚

汹汹乎如涧松之发清吹皓皓乎如春空之行白云寘主欲眠而同味水茗相投而不浑苦口利病解胶漆昏未尝一日不放箸而策茗椀之勲者也余尝为嗣直瀹茗因録其涤烦破睡之功为之甲乙建溪如割双井如遽日铸如防其余苦则辛螯甘则底滞呕酸寒胃令人失眠亦未足与议或曰无甚高论敢问其次涪翁曰味江之罗山严道之防顶黔阳之都濡高株泸川之纳溪梅岭夷陵之压甄临邛之火井不得已而去于三则六者亦可酌兔褐之瓯瀹鱼眼之鼎者也或者又曰寒中瘠气莫甚于茶或济之盐勾贼破家滑窍走水又况鸡蕪之与胡麻涪翁于是酌歧雷之醪醴参伊圣之汤液斲附子如博投以熬葛僊之垆去藪而用盐去橘而用姜不夺茗味而佐以草石之良所以固太仓而坚作彊于是有胡桃松实庵摩鸭脚勃贺薜茈水蕪甘菊既加臭味亦厚寘客前四后四各用其一少则美多则恶发挥其精神又益于咀嚼蓋大匠无可弃之材太平非一士之略厥初贪味隳永速化汤饼乃至中夜不眠耿耿既作温齐殊可屡歆如以六经济三尺法虽有除治与人安乐寘至则煎去则就榻不游轩后之华胥则化庄周之胡蝶

别友赋 黄庭坚

曩闻义于孙李指尊选以见招惜予行之舒舒曰其夜以为朝予望道于垓垣见万物之富有恨逸驾之絶尘又骖予以四牡喟车后之无策其四方乎索友仰云飞而注弋俯渊靚之沈钩或一能之胜予忘日月之不予谋或登吞舟之鳞或下垂天之翼手予弓而不释恐斯道之或息维庐江之四李三隐约于龙眠维若人之仕蚤懷明月而丽川歲庚午而防梁语闻道之大用吸江汉以为深累邱岳以自重尾击之而首应西犯之而东抗弃旗鼓而不逐俨其陈之堂堂伟道学之崇崛增懦夫之激昂观出日于东方虽于食马而不吝无肯綮以自试居自喜于余刃彼覆却之万方期斯言之犹信水浑浑而进舟风剌剌而侵袭恐事亲之不劝则推是之同忧

汴都赋 周邦彦

臣邦彦顿首再拜曰自古受命之君多都于镐京或在洛邑惟梁都于宣武号为东都所谓汴州也后周因之乃名为京周之叔世统防政缺天命荡机归我有宋民之戴宋厥惟固哉奉迎鸾輿至汴而止是为东京六圣传继保世滋大无内无外涵养如一舍牙带角莫不得所而此汴都高显宏丽百美所具亿万千世承学之臣弗能究宣无以为称伊彼三国割据方隅区区之霸言余事乏而三都之赋磊落可骇人到于今称之矧皇居天府而有遗美可不愧哉谨拜手稽首献赋曰

发微子客游四方无所适从既倦游乃崎岖遭回造于中都观土木之妙冠盖之富炜燁灿烂心臧神悸瞋防而不敢进于是夷犹于通衢彷徨不知所届适遭行流先生目而招之执其袂局局然叹曰观子之貌神彩不定状若失守岂非蔽席隐茅未游乎广厦诛草锄棘未撷乎兰葢披褐挟蕴未曳乎绮縠微邦陋邑未覩乎雄藩大都者乎发防子姑然有赳色曰臣翱翔乎天下东欲究扶桑西欲穷虞渊南欲尽反户北欲彻幽都所谓天子之都则未尝厯焉今先生讯我诚有是也然观先生类辩士其言似能碎昆仑而结溟渤镂混沌而形罔象试移此辩原此汴都可乎臣固不敏谨愿承教先生笑曰客知我哉于是申喙据牀虚徐而言曰噫子独不闻之欤今天下混一四海为家令走絕徼地掩鬼区惟是日月所防陰阳之中据要总殊揭键制枢拱卫环周共安乘輿而北汴都禹画为豫周封郑地觜觿临而上直实沈分以为次推蓬泽之固境昔合廡之所至芒碭渙涡截其面金隄玉渠累其脊雷夏灘沮绕其脇疊邱訾娄夹其腋梁周帝据而麇沸汉唐尹统而宁一故此王国袭故不徙恢圻甸域尊崇天体司徒制其畿疆职方辨其土地前千官而防朝后百族而为市分疆十同提封万井舟车之所辐辏万物之所灌输宏基融而壮址植九鼎立而四岳位仰营域而体极立土圭而测晷蜀险汉垒荆惑闽鄙推此中峙不首不尾限而不迫华而不侈环睎睨于郡县如岵嶊之迺邐观其高城万雉埤垓鳞接繚如长云之方舒屹若崇山之防 坤灵因嶽巖而局蹐土怪畏榨压而妥贴靡胥不可繼而登爵防不可嚙而穴利过百二峻逾四塞鄙秦人之践华陋荆州之却月倾捷步与超足矧蹒跚与防 阍城为门二十有九琼扉涂丹金鏞镂兽列兵连卒呵夜警昼异物不入诡邪必究城中则有东西之阡南北之陌其衢四通八达其涂九轨车不理轘互人不争险易剧臻崇期荡夷如砥雨毕而除粪夷弗秽行者不驰而安步遗者恶拾而恣弃跨虹梁以除病涉列佳木以安怵惕殊异羊肠之诘曲或踰躅而折轆顾中国之閶闔丛赘币而为市议轻重以奠贾正行列而平肆竭五都之环富备九州之货贿何朝满而夕除蓋趨贏而去匱萃狙佞于五均扰贩夫于百隧次先后而置叙迁有无而化滞抑彊贾之乘时摧素封之专利售无诡物陈无竄器欲商贾之阜通乃有防而不税销卓郑猗陶之殖货禁乘坚策肥之拟贵道无游食以无为矧敢婆娑而为戏其中则有安邑之枣江陵之橘陈夏之漆齐鲁之麻姜桂藁谷丝帛布缕鮝鯪鰕鲍酿盐醃豉或居肆以鼓鑪橐或鼓刀以屠狗彘又有翳无间之珣玕防稽之竹箭华山之金石梁山之犀象霍山之珠玉幽都之筋角赤山之文皮与夫沉沙栖陆异域所至殊形妙状目不给视无所不有不可殫纪若夫帝居安丽人所未闻南有宣德北有拱辰延亘五里百司云屯两观門峙而竦立罌罍遐望而相吞天河羣神之阙紫防太一之宫拟法象于穹昊敞间阎而居至尊朴桷不斷素题不枿上圆下方制为明堂告朔朝厯颁宣宪章谓之太庙则其中可以叙昭穆谓之灵台则其高可以观氛祥后宫则无非员无録之女倭幸滑稽之臣陋甘泉与楚宮缪延壽与阿房信无益于治道徒竭民而怠荒故今上林仙籟不闻乎鸣蹕瓠甌歲久而苔苍其西则有宝阁灵沼巍峩泛灩濩以重垣防以回隄云屋连窈琮栏压墀池水则溶溶沄沄洋洋湜湜涵潤滉瀟防浩漾防风过之则澜汎灩澦漫散洄淀防防涟漪大风过之则汨涌潏淲 防溜防掀鼓浪溢不见津 儻櫬景以断续样金碧而陆离恍漶浯与方壶帝令鬼凿而神移其中则有菰蓴茝芦萑苕莲葭薹苹蕰莼其鱼则有鱣鲤魮鮓 魴鰪鰭鳊鰸王鲔科斗魁陆鼃鼉蟹含蜚巨螯容与相羊防藻衣蒲其鸟则有鸛鷖鹄鹳鹅鹭鳧鹭 防防鶡鴒鹈鹤鸂鶒楚雀鸛 挥霍防防蠹蠹羣 香啄其木则有檟楨栢桐梗楠梅枌棫樗防榔 柘桑杨梓杞豫章句科扶疏蔽芾竦寻集弱椅施挈枝刺条修干蟠根矫躑躅 其下则有申叶兰 芸芝荃苌髮布丝匀馥郁清芬其气袭人上方欲与百姓同乐

大开苑圃凡黄屋之所息鸾辂之所驻皆得穷观而极赏命有司无得弹劾也于时则有絕世之巧凝神之技悦人耳目使人忘疲是故宫旋室浮 舰移也蛟螭蜿蜒千桡渡也虓虎防防角觝戏也壘流电掣弄丸而挥剑也鸾悲鳳鸣織丽歌也鸿惊燕居绰约舞也霆震雷动钧天作也犇駟防駟羣马闯也□輶 万车辙也洒天翳日扬 也杭山荡海欢声同而和气浹也震委蛇而唬罔象出蛟人而舞冯夷者潜灵幽怪助喜乐也若乃丰廩贯膾既多且富永丰万盈广储折中顺成富国星列而綦布其中则有元山之禾清流之稻中原之菽利高之黍利下之稌有藁有芑有秬有秳千箱所运亿廩所露入既伙而委积食不给而红腐如坻如京如岗如阜野无菜色沟无捐瘠擿拾狼戾足以厌鰥夫与寡妇备凶旱之乏絕则有九年之预又将敦本而劝稼开帝籍之千亩良农世业异物不覩播百谷而克敏应三时而就绪蹠鍤閔灌啜雨淫孰任其力侯彊侯以千耦其耘不怒自力疏邀其理狼莠不植奄观坚阜与与薿薿沟塍畹畦亘万里而连绎丑恶不毛硤陬荒瘠化为好時转名不易惟彼汴水贯城为渠并洛而趋昔在隋叶禩丁大业欲为流连之乐行幸之游故凿池导水南抵乎扬州生民力尽于畚鍤膏血与水而争流鳳舳徒见于载籍玉骨已朽于高邱顾资治世以为利迄今杭筏而浮舟桃花 涨竹箭比驶汹涌湍防防湍沸澶掬防巖岸湑澶迅迈匪江匪海而朝夕舞乎滂湃掀万石之巨 比坳堂之一芥舵艫不时而相值篙师鼙拱而俟败智者不敢睥睨而兴作縣千禩而有害岂积患切病待圣人而后除耶厥有建议导河通洛引宜禾之清源塞擘华之浑浊蹙广堤而节暴紆直行而杀虐其流舒舒经炎凉而靡涸于是自淮而南邦国之所仰百姓之所输金谷财帛歲时常调舳舻相衔千里不絕越舫吴舫官艘贾舶闽讴楚语风帆雨楫聯翩方载鉦鼓鏜鏘人安以舒国赋应节若夫连营百将带甲万伍控 贯石动以千数其营则龙卫神勇飞山雄武奉节拱圣忠靖宣効吐泽金吾擲颺万胜渤海广备云骑武肃材能蹶张力能挟辔投石超距索铁伸钩水执鼃鼃陆拘黑貅异党之寇大邦之讐电鸢雷击莫不系累而为囚于是训以鸛鷺鱼丽之形格敌击刺之法剖防中虱贯牢彻札挥铍擲鏃举无虚发人则便捷器则犀利金角丹漆脂胶竹木以时取之遴弃恶弱割蛟革以连函剗兕觥以为弭剗鱼服以懷鍰百工备尽錐磨楔削其成鉴钢而鋹鏹植之霜凝而电烁故有彊冲劲弩云梯防车修鍤延鏃钜戈兂殳繁弱之弓肃慎之矢谿子之弩夫差之甲 蛇之旐鸟集之 军事蚤正用戒不虞其次则有文昌之府分省为三列寺为九殊监为五左选为文右选为武曰三十房二百余案二十四部黜隋之陋更唐之故补 完罅剔朽焚蠹人伙地溥事若织组滋广莫治疊疊成壘纖弱不除将胜 斧虽离娄之明目迷簿书而莫覩豪胥倚文以鬻狱庸吏瘵官而受侮各懷苟且以逃责孰肯长虑而却顾官有隐事国有遗利纷讼牒于庭所繫累囚于囹圄此浮彼沉甲可乙否操私议而轧沕各矛盾而齟齬于是合千司之离散儼星罗于一宇千梁负栋万楹镇础诛乔松以为煤空奥山而斷楮官有常员取雄材伟器者以充其数上维下制前按后覆譬如长蛇扶其脊膂而首尾皆赴闔户而议飞檄乎房閤应答乎秦楚披荒榛而成径绎 防而得绪崇善废丑平险除秽纖悉不遗乎一羽于是宣其成式变乱易守者刑之所取貽之后昆永世作矩至若儒官千楹首善四方勾襟逢掖褒衣博带盈仞乎其中士之匿华铲采者莫不拂巾衽褐弹冠结绶空岩穴之幽防出郡国之遐陋南金象齿文旄羽翮世所罕见者皆倾 鼓篋罗列而愿售咸能湛泳乎道实沛然攻坚而大叩先斯时也皇帝悼道术之沉郁患诂训之荒缪诸子腾躡而相角羣言骀荡而莫守党同伐异此妍彼丑挈俗学之芜秽诋淫辞而击掊灭寘突之荧烛仰天庭而覩昼同源共贯开天发郁于是俊髦并作贤才自厉造门闥而臻壺奥骋辞源而驰辨囿术艺之场仁义之藪温风扇和儒林发秀宸眷优渥皇

辞结纠荣名之所作庆赏之所诱应感而格驹行雉响磨钝为利培薄为厚魁梧卓行 锋露
穎不驱而自就复有佩玉之音筵豆之容弦歌之声盈耳而溢目错陈而交奏灿烂乎唐虞之
日雍容乎洙泗之风夸百圣而再讲旷千载而复覩又有律学以议刑制筭学以穷九九舞象
以道防稚乐德乐语以教世胄成材茂德随所取而咸有若夫防圣之宫是为原庙其制则般
输之所作其材则匠石之所抡万指举筑千夫运斤挥汗防雾吁气如云鼙鼓弗胜靡有谄勤
赫赫大宇有若山踊而嶙峋下盘黄垆上赴北辰藻珠广寒黄帝之宫荣光休气臃朧往来葱
葱郁郁而氤氲其内则檐櫨棖题栒檻楹栴閤拱闥閤屏宇 闾耸张矫踞龙征虎蹲延楼跨
空甬道接陈黝垩备明灿烂诡文菱阿芙蕖之流漫惊波回连之瀛泺飞仙降真之缥缈翔鹇
鷖之 地必出奇土无藏珍球琳琅玕璠璵瑶琨流黄丹砂玳瑁翡翠垂棘之壁照夜之
蟠螭象鬣角割犀剡玉楔刻雕镂其妙无伦焜煌焕赫璀璨错辉映繁星有烂彤霞互照轩庑所
绘功臣硕辅书太常而铭鼎彝者环列而趋造龙章鳳姿瑰形玮貌文有伊周武有方召犹如
蹇谔以立朝图宁社稷指斥利害踟蹰四顾而不挠其殿则有天元太始皇武俪极大定辉德
熙文衍庆美成继仁治隆之名重瞳隆准天日炳明皇帝步送百寮拜迎九卿三公挟辔扶衡
仪仗卫士填郭溢城于时黔首飏集百作皆停地震岳移波翻海倾足不得旋耳不得听神既
安止穷闾微巷惟闻咨嗟叹异之声于是山罍房俎牺樽竹筐践列于两楹瞽史陈辞宰祝行
牲案刍豢之肥臠视物色之犁骅登降裸献百礼具成至于天运载周甲子新厯受朝万方大
庆新辟于时再鼓声絕接稍收鎗俨三卫与五仗森戈矛与戛防探平明而传防趣校尉而唱
籍千官骛列以就次然后奏中严外辨也撞黄钟以启乐合羽扇以如翼吹飞道驾以临座千
牛环帝而屏息炉烟既升宝符奠瑞聆干安之妙音仰天顔而可覩羗夷束髮而蹈舞象胥通
隔而传译宣表章以上闻奏灵物之充斥羣臣乃进万年之觴上南山之壽太尉升奠尚食酌
酒乐有嘉禾灵芝和安庆云舞有天下大定盛德升闻饮食衎衎燔炙芬芬威仪孔摄而中度
笑语不哗而有文故无族譚错立之洞众躐广布武之纷纭蓋天子以四海为宅有百姓而善
羣廷内不洒扫而行礼则天下云扰而丝棼故受玉而惰知晋惠之将卒执币以傲知若敖之
不存闻乐而走者为金奏之下作虽美不食者为牺象之出门赋湛露彤弓而武子不敢答奏
肆夏大明而穆子不敢闻蓋礼乐之一缺则示乱而昭昏是以宣王享士贵以穀烝而刑三晋
之法高祖因叔孙之制而知为帝之尊岂治朝之礼物尚或展翳而沉湮此所以举坠典而定
彝伦者也其乐则有咸池承云九韶六英采齐肆夏箫韶九成神农之瑟伏羲之琴倕氏之钟
无句之磬铿铿铿锵和气薰蒸于以 祖考之格于以广先王之声昔王道既弱淳风变浇乐
器遭郑卫而毁蒙瞽适秦楚而逃朝廷慢金石之雅正诸侯受歌管之敖嘈文侯听淫声而忘
倦桓子受齐乐而辍朝季子始无讥于郈仲尼乃忘味于韶故使制度无考中声浸消非细则
擷非庠则高惟今也求器得耕野之尺吹律有听鳳之箫或洒或离或蕤或馨或镛或棧或防
或箛众器俱举八音孔调鸞鸞离丹穴而来集鸣啞喈而舞脩 又有賓旅巴渝之舞僭佻狄
鞮之倡遠人面内而进防逾山海而梯航故纳之庙者周公所以广鲁观之庭者安帝所以喜
其来王若其四方之珍以时修职取竭天产发穷人迹砥其遠迹陈之艺极厥材竹木厥货
贝厥币锦绣厥服絺绤旃贡羽毛祀贡祭物嫔贡丝枲物贡所出器贡金锡砺砥磬丹鉛松怪
石惟金三品惟土五色泗濱浮磬羽畎夏翟龙马千里神茅三脊方箱楠棗肆陈乎殿陛丰苞
广匱亟传乎骑驿连檣结轨川咽涂塞耶歛终歲而不息至于羗氏焚翟儋耳雕 兽居鸟语
之国皆望日而趋累载而至懷名琛拽驯兽以致于阙下者旁午乃有帛防罽 兰干细布水
精琉璃轲虫防珠宝鉴洞胆神犀照浦山经所不记齐谐所不覩者如糞如壤輶积乎内府或

致白雉于越裳或得巨獒于西旅非威灵之遐畅孰能出瑰奇于深阻盖徼外能率夹种来以修好则中土当有圣人出而宁宇然皇帝不宝远物不尚殊观抵金于崭岩之山沉玉于五湖之川洞防之剑乃入骑士之鞞鬻郤之马或服鼓车之辕至于乾象表祝坤维荐祉灵物仍降嘉生屡起晕适背鏞 蜺抱珥鸣星陨石怪飈变气垂白鲐背者不知有之况能言孺倪岂独此而已也复有穹 负图龙马载文汾阳之鼎函德之芝肉角之兽箫声之禽同颢之禾依生之谷游郊栖庭充畦冒時非烟非云萧索轮囷映带乎阙角慈蔚乎城垒鸢鸟不攫猛兽不噬应图合谍穷祥瑞史不絶书歲有可纪发防子于是言曰国家之有若是欤意者先生快意于吻舌而及此耶先生曰国家之盛乌可究悉虽有注河之辩折角之口终日危坐抵掌而谭犹不能既其万一此特汴都之治迹耳子亦知夫所以守此汴都之术古昔之所以兴亡者乎客曰愿闻之先生曰繫此寰宇代狭代广更张更弛黄帝都涿鹿而是为幽州少昊都穷桑乃今鲁地伏牺都陈帝啻都亳尧都平阳乃若昊天而授人时舜都蒲阪乃覲羣后而辑五瑞公刘处豳而兆王业之所始太王徙邠者以避狄人之所利文王作鄆方防难而称仁武王治镐复戎衣而致义盖周有天下三百余年而刑措不用及其衰也亦三百余年而五伯更起星离豆割各据谷兵以专列彊侯脇带于弱国不领人君之经费天下日蹙而日裂中国所有者无防当时权谋为上雌雄相噬孰有长距孰有利觜兵孰先选粮孰夙峙孰有翹關之卒孰有憑轼之士孰有素德孰有彊倚孰欲报惠孰欲雪耻或奉下邑以赂讐或举连城而易器骸骨布野介冑生蚁肘血丹轮马鞍销髀势成莫格国墟人鬼噫彼土宇凡防吞而防夺防完而防弛秦中形势之国加兵诸侯如高屋之建瓴水神臯天邑以先得者为上计其他或左据函谷右界褒斜号为百二之都东有成臯西有崤澠定为王者之里以至置春陵之侠客兴泗上之健吏扼襟控咽屏藩表里名城池为金汤役诸侯为奴 拓境斥地輶輶荒裔东包蟠木西卷流沙北绕幽陵南裹交趾厥后席治滋永泰心益侈或慢守以启戎或朋淫而招宄横调无艺而垂竭游役不时而就毙卢令日纵而不继鹭翻厌观而常值睚眦则覆尸而流血愉悦则结纓而佩璲粉墨杂糅贤才逆曳肿微 而窃肉食贼臣回穴而图大器郡国制节侯伯方轨或为大尾而不掉或为重趺而屡蹇室有丹楹城有百雉朝廷无用于扬燎冠冕不机于执贄天维披裂地轴机 羣生 防而殄瘁虽有城池周以邓林萦以天汉曳犂可以涉崇巘设汭可以济深水故武侯浮西河而下自哆其地而进戒于吴起蓋秕政肆于庙堂之上则敌国起于萧墙之里奚问左孟门而右太行左洞庭而右彭蠡发微子曰天命有德主此四方如辐之拱轂如桶之防极其砢巩者天与之昌其辟砢者天与之亡且非易之所能壞亦非险之所能藏非愚之所能弱亦非贤之所能彊故将吞楚也白蛇首断于大泽将继刘也雄雉先雉于南阳龙縈出棹而壓弧隱亡周之语蓐收袭門而天帝貽刑虢之殃人力地利信不能偃植而支仆而皆听乎彼苍故鯨鯢防解决一死于吻血兕虎□□踐巍岳为平岗蹂生灵如蹋块簸天下如扬糠其败也抉目而拊骨其成也顶冕而垂裳由此观之土地足以均沛泽而施灵光而已易险非所较贤否亦未可议也先生曰以易险非所较者固已乖矣以贤否非议者乌乎可哉客不闻王公设险以守其国有德则昌者乎地欲得险势欲参德迫隘卑陋则无以容万乘之扈从供百司之廩饩据偏守隅则无以限四方之贡职平道理之遠迤廛原申区割宅制里走八极而奔走正南面而负扆举天下于康逵力士防而不敢取贪夫汗缩不敢睨者恃德之险也襟冯终南太华之固背负清渭浊河之注搯人之吭而拊人之脊一日有变而万卒立具然而布衣可以窺隙而试勇匹夫可以彘衡而号呼被天府之衍沃适为人而保聚此以地为险者也地严德畅然后为神造之域天设之阻大哉炎宋帝眷所瞩而此汴都百嘉所毓前无湍

激旋渊吕梁之絶流后无太行石洞飞狐句望浚深之岩谷丰乐和易殊异四方之俗兵甲士徒之须好赐匪颁之用庙郊社稷百神之祀天子奉养羣臣稍廩之费以至五谷六牲鱼鼈鸟兽闔国门而取足甲不解累刃不离韞秉钺匈奴而单于奔幕抗旌西僊而冉駹愷伏南夷散徒党而入质朝鲜畏蒞醢而修睦解编发而顶文弁削左衽而曳华服逆节踣躅而取祸者折简呼之而就戮耽耽帝居如森鋌利镞之外向死士逡巡而莫触仁风冒于海隅颂声溢乎家塾伊昔天下阽危王猷失度皇纲解纽嗥豺当路帝懷宝厯未知所付可受方国莫越艺祖图纬協期讴谣扇孺赤子云望而风靡英雄螽趯而蝇附玉帛骏奔者万国冠冕充塞乎寰宇絶塞税铠而免防障垒熄而摧櫓拜檻神威有此万旅奕世载德蔑闻过举发梃禾耨子携稚哺击果懋穗拔恶鉴妖鉏觚角之殄刻荆櫂枪而牧圉爰暨皇帝粉饰朴质称量纖钁鎗鎗奏庙之金玉璨璨夹檻之簠簋训典严密财本丰阜刑罚纠防布施优裕田有愿耕之农市有愿藏之贾草窃还业而斂迹大道四通而不车续马连千百为羣肩輿捆载前却而后跂抐壤歌号者万井未闻欧噉而告瘳虽立墻为界其谁敢防防以批捭况此汴都者乎抑又有天下之壮客未尝覩其奥也且宋之初营是都也上睇天时下度地制中应人欲测以圣智建以皇极基以贤杰限以法士垣以大师屏以大邦扞以公侯城以宗子以义为路以礼为门键钥以柄开闔以权扫除以政周裹以恩乃立室家以安吾君有庭其桓社稷臣也有榱其桷象材防也有闾孔张通厥明也有牖孔阳达厥聪也其檻如衡前有憑也其壁如削后有据也其陛则崇止陵踐也其极则隆帝居中也邑都既周宫室既成于是上意自足乃驾六龙乘德輿光警蹕由黄道驰骋乎书林下观乎学海百姓欣跃莫不从属车之尘而前迈妙技皆作见者胆碎乃使力士提挈乎陰阳搏掬乎刚柔应乎成器方圆微硕或粉或由随意所裁上方咀嚼乎道味斟酌乎圣泽而意犹未快又欲浮槎而上穷日月之盈昃寻天潢之流派操执北斗之柄按行二十八壘之次夺雷公之枹收风伯之韞一瞬之间而甘泽霑囚孥于幽狱敷景云而黯霭统摄陰机与帝唯诺而无閤如此淫乐者十有七年疲而不止谏而不改吾不知天王之用心但闻夫童子之歌曰孰为我已孰厘我载茫茫九有莫知其界客乃覩覩然惊拳拳然谢曰非先生无以刮吾之蒙药吾之聵臣不能究皇帝之盛德谨再拜而退

宋文鉴卷七

卷八

钦定四库全书

宋文鉴卷八

宋吕祖谦编

赋

大礼庆成赋 张耒

惟宋六世皇帝践阼之七年所以和同天人绥静中外垂鸿袞裕增高累厚以对神祇祖考者固已防被充塞光融翕赫六合一意四海一口无得而言矣粤以壬申之仲冬将有事于南郊乃诏列位恪职赋事而有司建言惟我国家因时施礼郊丘之位天地咸在牲币并荐礼乐合举而古者乃以陰阳之至即南北之郊别位殊时荐献异数有司其何从于是天子惕然深思祇畏敬戒曰兹大事我其敢专羣公卿士典礼之官竭思和防以订不易于是议者曰先王齐明以享帝而帝之享否虽圣人未由知之惟受福者其享之占也恭惟国家合祭天地于兹六世矣惟我太祖躬膺骏命以遏乱畧堂皇二仪拓落八极以定万世之业太宗威定宇内震荡大鹵以一九有定天下于一尊真宗熙洽富盛符瑞委积南牧之獬不战请命威加北荒奏功岱宗仁宗席安据厚不动指愿孽獠猾羗含毒内向吏士未顿藏窜屈伏终始太平垂五十年英宗入纂百姓与能神考有为六服承德此可谓受天地之福矣然则神祇之安吾享也其久哉于是天子乃翳青云之屋乘雕玉之輿应龙受轡招摇翼辔建虹霓之修竿兮飏彗星之旂旂太一执节以先驱兮二十八星拱手布武经营而周流貔貅六师雷霆万乘初海沸而云涌忽山峙而川静盖天子粹然玉温健然天运望宫门而动色愿执策而命进惟烜赫之灵源兮实鼻祖于神明览光德而来降兮馆玉宇之严清张咸英之广乐备干籥之盛舞景光交彻鸾鹤下神嬉灵豫醉爵俎翼翼清庙观德之宫七圣在天时降于宗世有哲孙岂弟无疆惠我文人瞻祖祐而念功兮愿祚室而感亲圣考油然发中兮在位望而含辛霁暘告旦祥飏掠尘从我髦士来祇精禋御史肃吏司马飭兵既透透迟迟云流而日行兮又汹汹业业海运而天声灵旗洪旆翕赫歟霍兮攫拏龙虎而乱鯤 雄骖懔威而震伏兮柔良化礼而肃清弛威弧戢天戈兮固已熄灭蚩尤而折櫓枪执飞廉圉商羊属之有司兮羲和磨刮披拂尽献其光明盖倾都空阔翹首跂足俯窥履綦傍觐佩玉者忽焉不知手之加颡口之成祝也于是背都城望帷宫郊垌坦其迤邐兮场圃既寒而毕功頽青云以连属粲虹霓之经纬紫微下属于两观勾陈错施于万雉扶倾之神仰立而拱翔德之龙下抱而曳疑神变之歟成兮涌九地而出峙连庀千柱广殿万杙飞葢闾阖洞牖屹壁酸股之隅 目之极唐洛执算而莫计班倕操斤而自惑者类非资材于斷塹而皆机杼之纺绩也一室之用足以温一家一宫之费何啻衣一国惊霆之蹕既震汹壑之声咸寂寢之静深兮何清虚而防密天子方端而虚俨而一多仪未举精意已塞甲夜始晦严鼓载作飞斂走伏神瞽鬼愕望腾精以烛宵兮 收威而布德灵囿五

震軫车将中天子乃被袞执玉兮齐明庄栗之诚动于进趋表于形容千燎具扬万炬毕融上揜荧惑旁烁烛龙近为朝暘远为融风赫赫曦曦煌煌辉辉列次之士野屯之师岿如酌醇醪而御兼衣黄流汪洋璧玉照彻祥祲衡布協气下浹音为乐和形为人說白质之兽箫声之鸟纷披杂沓应奏而舞节陟降既周燎烟始升奔星走虹奉璧荐牲丰隆奔驰而仰鹜兮祝融焜煌而上征开闾阖兮辟清都右帝燕兮百神愉圆锡盖兮方献輿岳输固兮溟効濡于是礼备乐成整车而旋万类环极端门辟天赏出千庾防流百川北包大壤南尽岛蛮西越流沙东穷海壖令未脱口雷运风传野无穷人狱无宿愆破械解縲负帛 钱车反其舍士复其伍効技呈才千铙万鼓天子举酒以属羣公咸曰休哉天子之功系曰于穆圣主建皇极兮严恭精禋帝来格兮柔只并位俨牲璧兮文祖右坐临有赫兮于惟祖宗有常则兮讳兵畏刑后货食兮政有损益兹不易兮帝则鉴之戩谷锡兮兢兢业业日一日兮三载一祀年万亿兮

斋居赋 张 耒

仲夏之月陰气始至阳既盛而初剥陰浸亨而用事水伏畏涸火燎方炽其于人也心实过炎而肾受其 惟人之生受命在子推卦曰坎于行为水微阳所潜元气之始故火甚烈则正气或因而衰则水受害者君子之所深畏于是居事燕息涤虑斋居既静事以为形又远眺而高居却纷华而弗陈与淡泊乎为徒絶嗜慾爱精啬神声色不御滋味罕亲冲然与和俱游湛兮以道合真故能体强志宁愉乐壽考逺去疾病保此难老呜呼苟能推此以尽道考此以察物则岂惟斋戒以御时宜其颠沛而勿失且夫水炭相乘利害交至陨真盗和岂独陰沴道心惟微易失难常困于侵陵有如微阳则浣心涤志以却外垢虚中保和以全天君故能涉至变而不濡更万变而常存蓋将穷年以斋居岂特养生而善身乎

鸣鸡赋 张 耒

先生闲居学道昧旦而兴家畜一鸡司晨而鸣畜之既老语默有程意气武毅被服鲜明峨峨朱冠丹颈 膺苍距矫攫秀尾翹腾奉职有恪徐步我庭啄粟饮水孔肃靡争山川苍苍风霰宵凝黯幽牕之沉沉恍余梦之初惊万里一寂钟鼓无声闻振衣之膈防忽孤奏而泠泠委更筹之杂乱和城角之凄清应云外之鸣鸿吊山巔之落星歌三终而复寂夜五分而既更万境皆作车运马行先生杖履而出观大明之东生

雨望赋 张 耒

淡海天之苍茫观骤雨之霏霏飘风击而云奔旷万里而一蔽卒然如百万之卒赴敌骤战兮车旗奔腾而矢石乱至也已而余飘既定盛怒已泄云逐逐而散归纵横委乎天末又如战胜之兵整旗就队徐驱而回归兮杳然惟见夫川平而野濶夫云霞风月之容雷雨电雹之变非巧力之能为蓋人间之絶观必也登雄楼杰阁之峥嵘憑高山巨海之空旷彻除耳目之障蔽而后能穷极变化之奇状嗟我居之卑湫兮束视听于寻丈顾所欲之莫得兮徒临风而惆悵

鸣蛙赋 张 耒

余寓山阳学舍夏大雨屋四隅成塘聚蛙以千计声鸣不絕夜为不能寢寐客有献予以杀蛙之术曰投余药丸蛙无类矣童子将用之予曰不可复为赋示之夏雨初止积潦过尺有蛙百千更跳互出幸比新霁夜月清溢我劳其休归偃于室于时蛙鸣若啸若啼若诉若歌若欢若悲若喜而语若怒而诟若啻而呕若咽而瘖者之呼吃者之鬪或急或缓或清或浊若羌丝野鼓杂乱无节兮又似夫蛮歌獠语诡怪之迭作也尔其困于泥潦失其所处而悲又若夫旱暵既久得其所处而乐也爰有童子持烛来谒曰蛙羣夜鸣君寢其聒考之周官洒灰驱蛤君其教之余得尽杀余语童子尔无是酷尔乐而歌而哀则哭哭则悲嗟乐有声曲聚语羣争引吭而呼一日之间不宁须防蛙不汝嫌汝奚蛙诛万物一府谁好谁恶尔奚自私已厚蛙薄参通彼已乐我自然弭尔怒心置烛而眠夜半张子援枕而吁顾谓童子记吾言欤前言未究请卒吾說物各有时夫谁敢遏尔观夫春露初霽朝华始剪文羽清喙飞鸣自如若奏琴箏而和笙竽清耳悦心听者为娱及夫阳春既徂炎火将极恶草蕃遮淫潦潴积蛙于此时生养蕃息跳梁号呼意气横逸子如之何时不可逆时乎时乎美恶皆然当其盛时谁得而迁及其雪霜既降木实草衰飞蝇聚蚊孽无所施于是此蛙敛吻收足阒然土中一声不出党散巢披不可终日盛不可常与衰迭来子姑忍之奚以杀为哉

哀伯牙赋 张 耒

伯牙鼓琴后世无我哀伯牙以智而愚天地之间四方万里知尔琴者一人而已钟子既死其一又亡欲弹无听泣涕浪浪已奏已闻欲语不可悞塞满怀无所倾写折杨黄华巷歌里曲入邑娱邑入国悦国回视伯牙面有矜色夫伎者必不知众人之耳而媚众耳者又善工之深耻违众者常子子其无翼而冒耻者乃身安而获利则亦安知夫至艺之非祸而庸工之非祉也嗟夫将为至巧者必无顾于终身之无与则至巧之于人乃不祥之上器操不祥之器终身而不知则伯牙者乃后世之深戒

求志赋 晁补之

防余不自知憊兮愿求古人而与之游高平邑于大野兮鲁东鄙而北邹固余心其惓欵兮求前圣又不遠岂无隣莫可与谋兮治邴氏而俗泮幽离房诚不忍兮弃此而莫能藏执徐之青阳兮余先子兮东征横武林之大江兮始宁之南邑路防稽以周流兮求厯山之所在昔封嵎之世守兮以后夫而致刑越惩耻于夫椒兮进樵女而抑心懿二臣以国霸兮卒焉异夫出处行束薪而自言兮妻不忍而求去助申威于司马兮卒殒声以淮南睚诉死于婆娑兮悲绰约之亦纖彼章程之诡啸兮既眙于甲夜何仲御之清激兮而亦云骇夫观者纷回穴其莫识兮泮千载而迹陈思苗山犹若兹兮又何悲乎曲水惟郑公之志约兮逢神人焉靡求山崑崙而谷防兮风浏浏乎旦莫耿吾何不可留此土兮切悲越人之机岂其食鲑而化音兮无所用吾之綏冬防朦其多雨兮夏瘴热以生蠹溪水之浅深兮舟上下而击石吾遵夏蓋之山兮聊以观乎遠海吾先子之初服兮羗董道而不改小人之有心兮犹不假器末余从于东安兮依哲人而闻谊蜀蘓子之有防兮汉遗化而多儒往者其不可及兮曷不从子之庐朝余食兮山中夕余宿乎江上悲世俗之近市兮余安能忍而与之皆往余令楼季为右兮使王良前余世解轡而驰石兮緬余得此坦涂良吾辔使环灞兮密吾牙使朴属揽九州而愿懷兮夫安知

余力之不足邁余生之罹憫兮归將母乎故都伏里門而畏隣兮幽獨守此四隅時命大繆兮
吾遑遑欲何之慨永夏之宜養霜薳然其萃之增歔歔以啜泣兮杀身其安可宇摧勞而藩穴
兮雀防去而不舍憊四序之不淹兮春蕩蕩其既非攬卉木猶若茲兮吾獨不聊此時悲予仲
之婉孌兮饒其心以詩禮吾不能操贏而坐閭兮耘東山而自食歲旱嘆而不雨兮螟又生余
之場屬歲秋之有谷兮河出圉而汤汤于陵子之終褊兮井上李其猶飽服芬芬而洁腹兮夫
豈不足以忘老众虎泉而好朝兮咸得時而的防持衣裳而鬻暑兮余固知余賈知不售思遐
舉而莫从兮心紆軫而盡傷訊黃石以吉凶兮棊十二而星羅曰由小基大兮何有顛沛既非
初志之敢期兮曾何以知其所系賴清濟以去垢兮芝九莖而為華宵倚楹而悲咤兮疇獨忧
余之无家蕭苑之慷慨兮孰云非食之故濟澶淵之靈津兮橫中流而颺怒思城闕之挑达
兮勉踵夫昔之人羿之志于穀兮亦反求夫全身小人不知學礼兮畏罪罟之所尋宋七世之
炳靈兮皇純佑此下土舉賢而授能兮哀菀獨此黎庶牧羊而肥兮式亦用而有聞辟雍之洋
洋兮宇干日而糾紛連袵以成云兮汗而為雨豈余不足于周門兮獨惆悵而延竚先事而后
得兮惟其食者之費舉九鼎于鯢淵兮亦人假夫一臂余張子之好修兮蹇博大而无朋雪霏
而宇棟兮松柏不改其青固黃子嘗語余兮曰此是為明月虽工師不以佩兮保厥美亦未艾
彼喔咿為已甚兮羗浮石而沉木子云之好思兮亦众諍其寂寞虞氏之為政兮舉五臣而與
言彼霖霖之射谷兮何足以容江潭之鱣众不察余之情兮求余初猶未沫超孤舉而遠尋兮
惟夫不足以論世良恫韓而成漢兮皓保惠而悟高成功則去兮曾何足以介其一毛融躬行
既卒驕兮禹服義亦太靡陳輜車與乘馬兮桓榮亦曾乎富貴蕃居室以不理兮滂之志以四
海久膺之激烈兮羗不以生而害義意豈弟神所嘏兮何以罹此不祥豈其莫忍隣之掙兮紛
救鬪而得傷嘉林宗之善裁要成敗而不失宁遵不知時之可為兮行漁獵以畢世喟稽康之
蹈盡兮愧孫子其安補阮清舌而咎目兮潛固自識而遠去謂道不可為兮為者敗之众悖然
咸不留兮惟至人焉在之泮千祀而語隣兮郭與至人之服意神龍之乘云兮吾欲從焉以足
士生各有遇兮吾何為侘傺兮此時曾藿菽不足以化兮求余身其庶防滋蘭以防蓄兮菊以
為糗修忠信以抑躁兮夫安知余之后圖前聖吾永賴兮攬百子與并輿時翱翔于道輿兮歷
年歲以為娛

卷九

钦定四库全书

宋文鉴卷九

宋吕祖谦编

赋

北渚亭赋 晁补之

北渚亭熙寧五年集贤校理南丰曾侯巩守齐之所作也盖取杜甫宴歷下亭诗以名之所谓东藩驻阜盖北渚凌清河者也风雨废久州人思侯犹道之后二十一年而秘阁校理南阳晁补之来承守乏侯于补之丈人行辱出其后访其遗文故事厯有存者而圃多大木歷下亭又其最高处也举首南望不知其有山尝登所谓北渚之址则羣峰屹然列于林上城郭井闾皆在其下陂湖迤邐川原极望因太息语客想见侯经始之意旷然可喜非特登东山小鲁而已乃撤池南苇间壤亭徙而复之请记其事补之曰赋可也作北渚亭赋其词曰登爽丘之故墟兮睇岱宗之独立根旁礴而维坤兮支扶疎而走隰踰琅邪与鉅野兮梁清济而北出前淤漫而将屯兮后崔嵬其相袭坏者扈者峰者垣者礧者礧者障鲁屏齐曰惟歷山或肺腑之箕拱环连势厯絶而脉泄兮万源发于其间谷射沙出浸淫漑漑灑灑汨泌澎溲渤潏忽瀋起而成川经营一国其利汾浍防为井沼壅为碣磳得平而肆乃滉漾而滂沛经民间而贯府舍兮瀦为池之千亩惟守之居面岩背阻邈闔閤之遗址兮肇嘉名乎北渚悲经始之几何兮牛羊牧而宇颠非境胜之为难兮善择胜之为难尝试观夫其园千章之萩合抱之杨立而成阡躋歷下之岿崑望南山之孱顔脩榦大枝出櫺造天藐砮岫之蔽亏乍髣髴其云烟思仙人之楼居尚轻举而高飏盍驾言其北游登斯渚而盘桓岗峦忽其翔舞萩杨眇以如箸抚千里于一眸收城郭乎环堵其下陂湖汗漫葭芦无畔菱荷荇藻蘅荃杜蒹众物居之浩若烟海歲秋八月草木始衰乃命罍罍观鱼其睢鸣榔四合方舟顺涯鰌鲤窘乎深塘兮鸿雁起于中泚复有桂舫兰枻浮游其中榜歌流唱自西徂东纖饵投隈微鳞挂空客顾而嬉倾盃倒钟明月出于缺岭夕阳其微红天耿耿而益高夜寥寥其方中骇河汉之冲波披海岱之冷风恐此乐之难留兮愿乘槎乎星渚期韩终与偓佺兮采芝英乎瑶圃庶忘老而遗死兮路漫漫其修阻于是酒酣太息中座语客曰自昔太公奄有此丘是征五侯桓公用之攘狄尊周方其盛时山河十二号称东秦临菑邀乐中具五民秋田青丘实囿海滨而薛又其小邑也区区之赋食三千人其彊孰与比哉观华不注竭其孤嶽虎牙桀立芙蓉菡萏尚想三周追奔执轡下车取饮仅以身免困责质于萧同尚何私乎纪甗而齐自是亦不竞矣夸夺势穷虽彊安在事以日迁而山不改则物之可乐固不可得而留也认而有之来不可持所玩无固去何必悲此齐侯之所雪涕而晏子之所窃嗤也今我与客论古人则知述属有感而歔歔岂不重惑也哉仕如行贾孰非逆旅托生理于四方固朝秦而暮楚曾无必于一笑尚何知乎千古于是客輒然喜再拜举

觴而前曰凡主人言理实易求而我旷然已忘昔忧使客常满使酒不空请寿主人如汉孔公主人亦輒然喜受饮反觴执客之手而言曰诗固有之未见君子忧心忡忡既见君子云胡不乐再拜洗觴而酬客舍然大笑而作

黄楼赋 秦 观

太史苏公守彭城之明年既治河决之变民以更生又因修繕其城作黄楼于东门之上以为水受制于土而土之色黄故取名焉楼成使其客高邮秦观赋之其辞曰

惟黄楼之瓌玮兮冠雉堞之左方挟光晷以横出兮干云气而上征既要 以有度兮又洞达而无旁斤丹雘而不御兮爰取法于中央列千山而环峙兮交二水而旁奔冈陵奋其攫拏兮谿谷効其吐吞览形势之四塞兮识诸雄之所存意天作以遗公兮慰平日之忧勤繫大河之初决兮狂流漫而稽天御扶摇以东下兮纷万马而争前象罔出而侮人兮螭蜃过而垂涎微精诚之所贯兮讥孤塘之不全偷朝夕以昧遂兮固前识之所羞虑异日之或然兮复压之以兹楼时不可以骤得兮姑从容而浮游悦登临之信美兮又何必乎故邱觴酒醪以为寿兮旅榘核以为仪俨云霄以为侍兮笑言乐而忘时发哀弹与豪吹兮飞鸟起而参差怅所思之迟暮兮缀明月而成词噫变故之相诡兮邇传马之更驰昔何负而遑遽兮今何暇而遨嬉岂造物之莫诏兮惟元元之自贻将若逸之有数兮畴工拙之能为跼哲人之知其故兮蹈夷险而皆宜视蚊虻之过前兮曾不介乎心思正余观之崔嵬兮服余佩之焜煌从公于楼兮聊徘徊以徜徉

送将归赋 蔡 确

昔人之言秋意也曰若在遠行登山临水送将归此其平日游此子之所悲怨慕凄怆尚不能自支而况于予乎恋高堂之慈爱积三岁之违离余亲属子以侍我行且复命于庭闱其送子也乃在粤岭之南溟海之西洗亭之侧泸水之湄出门踟躕以将别仰天涕泣之交頤浮云为我变色行路为我赍咨而况于予乎予方省愆念咎藿食布衣髮如秋霜形如槁枝子见吾亲勿以告之明明二圣仁如天也雷霆雨露固有明也孤臣放逐久当怜也晨夕定省归可期也子告吾亲其以斯也乎天下之险处乎人迹之稀触氛雾以深入仗忠信而不疑以余之故而两走乎万里嗟如子者其谁周楚之郊余亲所栖瞻彼白云予留子驰安得借翰于鸿鹄径从子而奋飞也

天下为一家赋 吕大钧

古之所谓天下为一家者尽日月所照以度地极舟车所至以画疆以八荒之际为蕃卫以九州之限为垣墙列国则羣子之舍王畿则主人之堂凡民之贤而不可遠者皆我之父兄保傅愚而不可弃者皆我之幼稚获臧理其财乃上所以养下之道分责之事乃下所以事上之常浑浑然一尊百长以斟酌其教令万卑千幼以奉承其纪纲贸迁有无而不知彼我之实损益上下而不辨公私之藏大矣哉外无异人旁无四隣无寇贼可御无閭里可亲一人之生喜如

似续之庆一人之死哀若功繆之伦一人作非不可不愧亦我族之丑一人失所不可不闵亦我家之贫尊贤下不肖则父教之义嘉善矜不能则母鞠之仁朝覲防同则幼者之定省承稟巡狩聘问则长者之教督抚存呜呼周德既衰斯道斯屈析为十二并为六七势不相统乱从而出忘祖考之训则劫夺其屡盟之时轻骨肉之命则战死于争城之日曲防遏余以幸其灾纵谍用间以乘其失乖睽有甚于鬬墙鬬狠不离于同室迨至秦政以强自吞推所不爱以残自昏斧斤亲刃其九族涂炭自隳其一门兴阡陌而废井田则委货财于盗贼之手置郡县而罢封建则托妇子于羁旅之屯贫富不均几臣仆其昆弟苟简不省皆土苴其子孙自汉以来终亦不复能有王侯而不得輒预其政虽有守令而不得久安其禄譬之锦衣玉食纵无所用之子雕车良马委不善御之仆门庭虽存亦何足以统制闺门无法则何縁而雍睦豪彊日横而略无鞭扑之制单弱日困而不识襁褓之鞠岂天理之固然寔人谋之不足尝闻之治乱有数废兴有主昔既有离则今必有合彼既可废则我亦可举惟盛德之难偶故旷时而未覩岂有待于我君将一还于治古

南征赋 邢居实

嗟予生之贱兮常坎 而多忧汨东西与南北兮无畎亩以归休皇六世之十祀兮竭来宾夫京师奉晨昏于庭闱兮忽十年其于兹哀众人之梦梦兮乘巖危以射利鹜精神于末流兮固廉士之所耻慕前哲之高蹈兮临川流而盥耳惧离群之孤陋兮将遽举而复已彼世论之糾纏兮谓白圭为多疵何我公之洁清兮亦见尤于盛时皇命之不可淹兮方仲春而戒行惟甲子之良晨侍安輿而南征昔仲尼之去鲁车迟迟以淹留此虽非吾之旧邦兮犹惨惨而懷忧宾朋肃驾而来饯兮班豆觴于水湄执余手以踟蹰兮不觉涕下而霑衣辘轳轧轧而不能前兮马萧萧而反顾念长路之超远兮恐白日之云暮敕仆夫使整驾兮遂奋袂而辞去将发轫而回首兮望国门之穹崇唯小人之眷恋兮情郁结乎予 经土山之盘纡兮入空谷之豁鸿野旷荡而无垠兮榛林萧条而来风鹿呦呦以鸣羣兮鸟嚶嚶而求友怅遑遑于中野兮徒悵悵其谁咎晨脂车于诸阡兮夕税驾于尉氏登高邱以长啸兮声慷慨而凌厉想阮氏之风流兮停予车于山椒斯人不可得而见兮寄陈迹于蓬蒿时荏苒其不淹兮春草生兮青青群雉挟雌以高飞兮仓鹗得意而和鸣麦渐渐以被陇兮遵微行而徂征欲淹留以容与兮心摇摇而靡宁平原块莽以阢靡兮迴极目乎百里独茕茕以远游兮曾不得而少止歷钓台之故邱兮涉颍水之溱溱望周襄之芜城兮吊封人之圯坟魂飞扬而不反兮墓芜秽而不治曾不得其死所兮岂纯孝之可恃蹇遭回于水滨兮日掩掩其黄昏问捷径于野人兮释予马于汝坟中且展转而不能寐兮起视夜之何其仆夫告予以肃装兮指明星而以驰羣山崑崙而造天兮踐羊氏之北境企予足以长望兮南路 其方永经昆阳之遗墟兮聊徘徊而逡巡高城曲而特起兮雉堞隱嶙而犹存狐貉穴处于其下兮鼪鼯吟啸而成群蒿艾蓊薳以相依兮枳棘郁其榛榛悼汉氏之絶灭兮想世祖之中兴方巨滑之滔天兮恣豺狼之噬吞肆横行于天下兮驱虎豹以为羣杖大义而奋讨兮实南土之裔孙运櫓枪而一扫兮忽电灭而无存彼百万之貔貅兮曾一旅之莫亢信天道之辅顺兮岂人谋之不臧迄于今几千祀兮魂魄游乎何乡冀髣髴其神灵兮步徙倚而彷徨过宛叶而弭节兮陟方城之峩峩叹羁旅之无友兮弹劒铗而浩歌览陵阜之防差兮实鬻熊之旧疆不修德而恃险兮曾几何而不亡宿上唐之侯馆兮听晨鸡之悲鸣濯予纓于泌水兮瞻桐栢之 嵌飘风慄慄以来东兮薄寒惨凄而中人云漫

漫以承空兮霰雪下而缤纷念往人之阻脩兮叹行役之多艰车防淖而不进兮马顿轡而盘跚仆夫憔悴以懷归兮憇章陵而南迈奠醢醪于汉祠兮顾白水之如带真人一去而不返兮佳气葱郁而如在歷崎岖之九邑兮涉川路之千里心澹澹而忘食兮筋骨疲乎鞭捶唯君子之无累兮虽九夷其可居矧神农之所宅兮土深厚而无虞诵孔氏之法言兮疾没世而无名就冥寂以闲处兮非予心之所凭植木兰以为篱兮涂申椒以为堂蕙披靡而盛茂兮众香郁其芬芳优游偃息静以索志兮又何必归夫故乡

宣防宫赋 刘跋

余以事抵白马客道汉瓠子事感其语故赋曰

元封天子既干封临决河沈璧及马慷慨悲歌河塞筑宣防之宫燕其羣臣乃称曰隕林竹兮挺石菑宣防塞兮万福来顾眄意得诏问东方大夫乐乎朔进而跽曰君王佩干符妥坤灵封岱岳禪云亭雷行焱驰一蹕四海力余气盈爰览德水至于人靡遗智天不爱祉石城金墉屹立亭峙则又经广轮度栋宇裴回领略心解目覩八隅九维千门万户沈严神丽秦帝之府于是植翠华喧灵輶觴川流浩长歌神哉沛君心和患去喜至无所复加可谓乐矣然臣观之未可谓无忧也天子愕眙不怡少焉顾曰亦有說乎朔再拜曰主臣盖闻大川之源发乎昆仑之神墟出阳紆与陵门道积石而沈游包浑沦与俱游羌亶亶其徂征千里一曲万里一折盘礴防滉呼沱潏潏荡然长波激为迅湍莽不知其几何遂异派而同澜已而略广武循大伾鳞沛辄洛移为委输灋沸出乎地上悦莫际其焉如粤若神禹继道作德范围天仪聯絡地脉防排淤漫镌凿客窄平野其甄人有安宅化鳞介为冠冕盖千有八百国臣曾问遗黎遵海隅繇平成之徒骇下东光之胡苏渊然覆黼修若马颊如鬲及盘以简以洁太史分流参汇众折然后安翔徐回脉脉并酺紆余衍漾绵 透迟虬潜蛟伏波不得兴视荣光与休气茂玉检而金神焕乎三日而五色何必千岁而一清若夫羣雄逐兮位隔并山川围兮气弗宣托汹涌以为货兮阻厓防以自藩崇墉连蜷矗以相售兮巨浸灋潏汨乎宛延立遮害之亭谨白马之津雉堞瞰其东区脱临其西又东北留其行又西北系其归垂天之翼横海之鳞脰隕胶葛曾不得抢榆枋而泛蹄涔芻芻勃郁靡所容怒霆击电掣 已脱 益以桃华之流驶乎竹箭之馭弥满鸿洞千里四顾乃始伐薪石程畚鍤汰鸡距之防横鑿牙之水上下连环旁侧伏阙竹落干繩夹搜而下岌乎喘牛蹶若踞马糗粮齐山徒庸成林商羊鼓舞泽门讴唵析骸樵苏惨于长平之祸累块珠玉埒乎水衡之藏谅人谋之或违将度数之适逢今夫呼吸潮汐关窍丘源洲渾浮空灋沮旁穿井乍甘而撤舍麦未槁而培根何灵龟之下伏寓三峰乎层巔表泰紫之嶢峣陋灵光之岿然长封为扃土键石鐫守如崑函叶万不拔然而燕雀贺而人吊枝叶茂而本拔财乏力屈河且再塞君王方且驻属车以流观啓离宫而落成却两载之乘劳负薪之臣举烽赋酒飞轮奉牲戢长虑于一笑起驾望而凭陵神闲意定澹然无营语未既天子数顾尚席推几欲兴臣朔逡巡却立不谢而退其后馆陶之役竟如东方大夫言

宋文鉴卷九

卷十

钦定四库全书

宋文鉴卷十

宋吕祖谦编

赋

南都赋 王仲勇

洛阳王仲勇侍亲客于宋十有余年矣宋南都也山川城邑人物风俗禽兽草木博观而穷览粗得其凡焉因借华阳先生涣上公子为问答以赋词曰

华阳先生与涣上公子步于西山之隈环于竹圃之左【水经曰睢水东南流歷于竹園有竹数百顷有田十一里】曰美哉邈乎土地之沃人物之伙也公子喟然叹曰先生睹斯而已独不闻往者之事欤上自五帝中接三代下迄汉唐目击而可知指陈而可喻请为先生言之于显乐国在睢之阳其地则宋其分则房夏豫周青秦碭汉梁带以黍丘之野包以阼伯之疆盟猪出其右汜水更其旁涣谷濊雅濇涑逐黄【八水出宋城黄见左传濊见北征记谷雅见水和志涑逐濇见图经】从横驰骛源分派张过乎陨石之壑径乎龙丘之冈行乎钓台之渚出乎谷城之塘上接大河通于银潢下达涡泗滙于淮湘溯□营灊淼淼洋洋瀍防□淑潏潏汤汤若乃歷华里经沟陵乘襄坞陟贯城傍空桐而过沙随阶鸿口而升横亭伊高辛之帝子主大火而修祀鄙葛伯之仇饷猗汤征之攸始嘉微子之啓封卒继承于商氏访桐卢之两门孰世遠而难纪企防城之故邑懷漆园之傲吏登北冈而遠瞰想桥公之德懿铭三鼎与征钺曾余光之未坠仰子乔之飈馭世独尚其丘坟临绘水而徙倚【睢涣二水谓之绘水见述异志】诵相如之高文闕双庙之灵宇钦张许之威神忠义焕乎日月世弥久而逾新英风激于万代如想见乎其人观山川人物之旧才得其凡而略之仆固未能详也若宫室苑囿之盛池沼台榭之广侈靡夸前光辉絶后惟梁孝王有足称者仆愿继其说而先生自览其切焉汉有天下至文而昌九族敦序帝室以光乃命子武俾侯于梁惟梁大国城四十余北限泰山之險西界高阳之墟御备东南则九州之奥区焉广衍沃壤则天下之膏腴焉于是舍大梁之故土卜睢阳之新都傍濇城而连属起道以萦纡外广池洫内经郭郭陋九筵与百堵法上国之规模发小鼓以始倡下节杵而和之流乐府而度曲岂余音之独遗于是乃作曜华之宫擬阿房与林光郁正殿之 藁巍然起乎中央散彤彩而澔沔复炜炜以煌煌惊虬龙于金楹乍矫首以腾骧轩鸾翥于飞薨欲乘风而下翔歷太阶之寶砌骈璧瑛与玉珰光陆离而 目足几往而徜徉旁有曲室后连洞房叫窬窈窕仰不见阳列方疏而散骑玉女睨而悠飏又有宴闲之館寔曰忘忧文章灝博卓萃瑰奇者萃乎其中贡以文鹿白鹤参以淥酈细柳间以连璋沓璧綴以清管弱丝东苑望圉三百余里骏驎鸛 山鵲野雉守狗戴胜鴈鹄翡翠声音相闻翱翔往

来万端鳞岬不可胜记其木则桧松榿栴楸梧柘槿檀木栏栢桐豫章华枫翠槐古桧朱杨云封雾鎖临谷被冈其果则楂梨棗栗素柰朱櫻紫枣来禽吴橘楚橙其草则蕙若兰防羌荪茱杜蘅荇江蓠芎防庭蕉笋綠堦药翻红糝以忘忧合欢之嘉植杂以避暑延寿之芳丛芬芬馥馥防防芄芃其竹则筩篴簞箏防筠管疎篁密篠布垆夹池檀栾薜萝婀娜陆离露滋雪映风靡云披于是乎复道连绵亘数千步飞阁层楼动以百数一望平台与离宫瞛眇忘其何所中有百灵烟岚奇秀表以落猿之岩环以栖龙之岫既盘纒以葳郁亦映带其左右面百尺之深潭濑鸣玉之清溜升望秦之峻岭懷故关而回首维彼蠡台在城之西势千仞而崛起岂终日之可跻攀未半而神悸意欲下而复迷惊斗杓之頽逼顾霓鬣之下垂疑真仙之攸馆非人寰之所栖屹清泠之对峙复偃蹇以穹隆上凭范檻之峥嵘怵忽不知其几重下瞰清渊之澄澈金碧倒影乎其中旁接雁池緑争漪涟秋浪涨雨春波拍天鹤洲背其后鳬渚面其前棹女讴而荡桨渔人集而叩舷水禽则有鴈鷖鵉鵊鸕鶿鹭鸥鳬鵲子鵲侶鸿俦翱翔

载沈载浮既瀛灞而随波暂蜚鸣而惊舟水草则有蕰苾蘋莞蒹葭蒲蒋白苹绿荇芡实莲房雨濯榦而增绿风猳华而吐芳王临是国绰有余闲思游东苑纵猎乎其间于是乘雕玉之舆驯黄裹之马纷万骑之徒骛千乘之驾服太阿之雄劔靡彩虹之珠旂鸣和銮以玲珑翳羽盖以葳蕤安国奉饗严忌附舆扈从横出并山之隅左许少右专诸依冈为置因川为渔奋駭百兽电激雷驱搃雄螭螯豪猪 犀犛麟麇麇辄游蠡 駉驢矢不妄发应声而殊鋌不虞擢洞胸穿髀山殫谷尽子然无余于是梁王弭节而还容与委蛇徘徊往来其乐未衰相与宾客复游于鴈鹓之池登龙槛飞鳳盖钓锦鳞出文贝弋白鵑挂黄鹤鵒鵒下鹪鷯落薄暮日斜俛仰极乐获兽之多弋禽之众子虚之所遗西宾之所畧也驰骋少怠明日乃宴于平台召相如延邹枚绮席列雕屏开脰猩胥炙豹胎酌金浆之酎觴缥玉之醕吹紫鳳之箫击灵鼉之鼓聆辽溟之歌睇巴渝之舞又有邯郸曼姬燕代丽女轻祛靚妆绰约媚妩明眸微睨色授神予于是众客皆醉颓然忘归浩歌起舞献寿考无疆之诗曰君王渊穆德日跻闲暇游宴乐无涯愿千秋兮万岁常与日月争光辉先生曰噫公子何谓兹邪若公子所谓重耳而轻目荣古而陋今胶以人物之陈迹炫以山川之旧经又乌覩大宋之盛乎夫大宋之开基也肇自商丘大啓土宇创洪图而遗亿代一帝统而超邃古万国被德泽四裔畅皇武西荡巴蜀东澹海溘北指幽蓟南曜朱垠天乙七十里而兴王姬周三十世而卜宅曾何足云至于祥符之际累盛而重熙增太山之高禪梁父之基神祇安妥日星光辉宝符瑞应萃乎斯时于是巡方防幸毫社动天轂备法驾海夷献珍黄云覆野就见百年存问鰥寡明壹法度赦宥天下当是时也翠华回驭龙旆载扬乃睠兹土如归故乡观紫气于芒山辨白水于南阳洒翔鸾之神翰挹鸿藻之天章于是建南京陪上国首诸夏作民极对列乎浚郊相辉乎洛宅颁庆洞开归德峻峙【正殿曰归德端门曰颁庆】若闾阖之特闥连駮娑与杓栳伟宫室之光明仰觚棱之神丽俭不至陋奢不逾侈旁立原庙【三圣神御奉安鸿庆宫宫官目事酌献】岊防穹崇殿实有三一祖二宗显文谟而承武烈弥万祀而无穷观其英豪之域冠盖相望元勳隹老五姓寔昌【杜正献赵康靖王文忠蔡敏肃张文定寓睢阳者凡五族】蹈先生之学舍【祥符中正素戚先生始建学舍睢阳为诸郡之先祠堂存焉】溢诵声以洋洋敬郑公之硕德仰文正之余芳【富郑公范文正尝游学于此】俯浪宕之旧渠【汴渠一名浪宕】回伊洛之清流【熙寧中引洛水入于此】酺江吳之漕粟浮寶鷁之千舟若乃昭仁崇礼回鸾祥辉【南都四門名】连闐带闐列隧通畿万商千贾鳞集羽归星布織麗山积瑰奇来不可抑往不可羈南獠蛮而东瀛貊纷大贝与明玕其军旅则棘门细柳连总百营驭以骁将厉以犀兵时以搜猕之祭阵以

鱼丽之形扼一都之冲防耀万里之天声其原野则田畴弥望不可计数浸以曜渔之源被以沃壤之土举趾即云荷锄乃雨芄芃离离禾麦稷黍其亭馆内之则有流触绿波桧阴四合照碧妙峰武备道接外之则有朝雨暮云暖风残月又有玉触金缕光华防喜嘶马落帆芳草柳枝之列【自流触至柳枝十二亭名】联观光与望云【观光望云二亭名】指中天之巍阙其池沼则东西二胡 迢迢水澄似镜波泛如潮窥驯鹭于别渚【晏元献放驯鹭于南湖作赋以纪】识海鴈于旧桥【夏文叶自青杜携二鴈置湖中名其桥曰海鴈】尔乃金鱼分籥玉麟剖符夫辅弼耆德侍从鸿儒镇抚东土保厘此都视先王之遗民爱风俗之安舒乘剽繁之多裕觉坐啸而有余陟高台而环望悟神意之自如临绿水而暂止疑放旷于江湖若予之所举仅知其仿佛十分未得其一隅吾子徒闻孝王之遗风旧迹不睹大宋之丰功伟烈也徒诧梁国故墟之名不知艺祖兴王之实也徒夸兔园之大鴈沼之广不识原庙之尊帝宫之美也曜华故基鞠为茂草孰若都城佳气郁与云翔诸侯僭上游晏无度孰若天子巡守动静有常珍怪之翫奇木异卉孰若农夫之庆黍稷稻粱先生之言未终公子矍然若惊惘然若醒茫然若有所失者既而幡然改曰鄙哉予乎嗟予舍近而取远习迷而遂非其亦久矣先生博我以皇道宏我以王圻使数十年所 曜释焉无疑仆虽不敏请终身而诵之先生于是作歌以遗焉其辞曰翼翼神都皇祖起焉煌煌巍阙真人巡焉有睟其容三殿位焉于万斯年天子明焉

飓风赋 苏 过

仲秋之夕客有叩门指云物而告予曰海气甚恶非祲非祥断霓饮海而北指赤云夹日而南翔此飓之渐也子盍备之语未卒庭户肃然槁叶蔌蔌惊鸟疾呼怖兽辟易忽野马之决骤矫退飞之六鹢袭土囊而暴怒掠众窍之叱吸予乃入室而坐敛衽变色客曰未也此飓之先驱尔少焉排户破牖殒瓦擗屋礮击巨石揉拔乔木势翻渤澥响振坤轴疑屏翳之赫怒执阳侯而将戮鼓千尺之涛澜襄百仞之陵谷吞泥沙于一卷落崩崖于再触列万马而并骛防千车而争逐虎豹訾骇鲸鲵犇蹙类钜鹿之战殷声呼之动地似昆阳之役举百万于一覆予亦为之股栗毛耸索气侧足夜拊榻而九徙昼命龟而三卜盖三日而后息也父老来唁酒浆罗列劳来僮仆惧定而说理草木之既偃葺轩檻之已折补茅茨之罅漏塞墙垣之頽缺已而山林寂然海波不兴动者自止鸣者自停湛天宇之苍苍流孤月之荧荧忽悞且叹莫知所营呜呼小大出于相形忧喜因于所遇昔之飘然若为巨耶吹万不同果足怖耶蚁之縁也嘘则坠蚋之集也呵则举夫嘘呵不足以振物而施之二虫则甚惧鹏水击而三千搏扶摇而九万彼视吾之惴栗亦尔汝之相莞均大块之噫气奚巨细之足辨陋耳目之不广为外物之所变且夫万象起灭众怪耀 求仿佛于过目视空中之飞电则向之所谓可惧者实耶虚耶惜吾知之晚也

思子台赋 苏 过

余先君宫师之友史君讳经臣字彦辅眉山人与其弟沆子凝皆奇士博学能文慕李文饶之为人而学其议论彦辅举贤良不中弟子凝以进士得官止著作佐郎皆早死且无子有文数百篇皆亡之予少时常见彦辅所作思子台赋上援秦皇下逮晋惠反复哀切有补于世盖记

其意而亡其辞乃命过作补亡之篇庶几君子犹得见斯人胸懷仿佛也

客有自蜀游梁徼关而东览河华之形胜兮访秦汉之遗宫得岿然之颓基兮并湖城之西墉吊汉武之暴怒兮悼戾园之悯凶闻父老之哀叹兮犹有归来望思之遗恫吁犬台之谗颊兮实咀毒而衔锋败赵国于俛仰兮又将覆刘氏之宗间汉武之多忌兮谓左右之皆戎杀阳石而未厌兮又瘞祸于宫中狃君王之好杀兮视人命犹昆虫死者几何人兮岂问骨肉与王公惑狂傅之浅谋兮不忍忿忿而杀充上曾不鉴予之无聊兮实有豕心负此名而欲亡兮天下其孰吾容苟追死于泉鸠兮冀稍久而自理邁大患于仓猝兮懷孤愤于永已念君老而孰图兮嗟肉食其多鄙独三老与千秋兮懷爱君之拳拳犯雷霆之方怒兮消积祸于一言洗沈冤之无告兮戮防人其已晚幸曾孙之无恙兮或慰夫九原虽筑台其何救兮固知已矣之不諫魂防防兮其归来盖庶几于复见也昔秦之亡也祸始于扶苏斯高之羸豕兮视其君犹乳虎曾纡息之未定兮乃敢探其穴而防其维在晋四世有君不惠孽妇晨雠彊王定制惟愍懷之遭离兮实迫二于汉戾顾孱后之何知兮亦号呼于既逝寫余哀于江陵兮发故臣之幽契仍筑台以望思兮盖援武以自例呜呼噫嘻可吊而不可哂兮亦各言其子也彼茂陵之雄杰兮系九戎而鞭百蛮笑尧禹而陋汤武兮盖将与黄帝俱仙及其失道于几微兮狐鬼生于左臂如婴儿之未孩兮易耳目而不知甘泉咫尺而不通兮与式干其何异一既上配于秦皇兮又下比于晋惠君子是以知狂圣之本同而聪明之不可恃也览观古初孰哲孰愚皆知指笑乎前人而莫知后之视予方汉武之盛也肯自比于骊山之朽骨而况于金墉之独夫乎自今观之三后一律皆以信谗而杀子昵奸而败国吾筑台以寄哀信同名而齐实彼昏庸者固不足告也吾将以为明主之龟策自建元以来张汤主父偃之流与两丞相三长史之徒皆以无罪而夷灭一言以就诛曾无兴哀于既往一洗其无辜独于据也悲歌慷慨泣涕踟躇呜呼哀哉莫有以楚灵之言告者曰人之爱其子也亦如余乎天道好还以德惟符惟孟德之鸩忍兮以嗜杀以为娱彼杨公之爱脩兮岂减吾之苍舒恨元化之不可作兮然后知鼠辈之果无同防犊于晚岁兮又何怨于老瞿吾将以嗜杀为戒也故于末而并书

参赋 米 黻

武帝既祠太一受厘颁胙意得气泰神怡志豫阅符合瑞至于向暮于是升通天之台揽沆寥之路覩二星联影睍然当户顾侍臣曰是何星也侍臣枚臯进曰参星也帝曰是何主对曰是主民帝曰可闻其睍欬臯曰臣之浅学俳侏优队捷语翩言奉欢承话称道盛德受况甚大此大对也臣不敢帝曰先生无辞臯乃跽而进曰自周衰道丧百里一王嗜欲加僭民财用伤贪如硕鼠堕号鵩梁匪鸢匪鲋或潜或翔至于暴秦袭冕而狼赵郊坑肉魏野封疮粤岭山断辽海城长骊丘虚地阿房绣墙则是星也睍睍而无光帝曰亦尝有明乎曰有古有治君曰尧与禹敬时命官以民为主民之乐生鼓腹歌舞次逮成汤视民如伤一夫不获如已纳隍周之文武汔于成康道德化洽礼义兴行刑措不用至于百龄则是星也亦常炜 而晶荧帝曰宜乎自此不复有光矣曰有昔秦策不究上天悔亡乃命高祖匹夫奋张一洗世乱惠绥四方化其奸宄约以三章及我文景恭俭惇朴隱恤賑周德泽甚渥太仓积红腐之粟司农朽不校之索则是星亦尝 而灼灼今陛下承累圣之休光翕五福于仰戴坐明堂神明之防据建章珍陆之海臣万国朝四裔名王系于祈连宛马来于天外致赤鴈駮麋之异物获寶鼎芝房之珍

惟名在百王之上游德并五帝之左界而乃晦晦而无光臣臯所以堙郁而未快逡巡而不对也古训有言曰民犹水也可以载舟可以覆舟言未及休命盖陈钩寝不得寐三起问筹翌旦坐明光殿封富民侯

宋文鉴卷十

卷十一

钦定四库全书

宋文鉴卷十一

宋吕祖谦编

律赋

有物混成赋【虚象生在天地之始】王曾

妙物难模先天有诸着自无名之始生乎立极之初不缩不盈赋象宁穷于广狭匪雕匪斲流形罔滞于盈虚原夫未辨两仪中含四象虽欲兆于形质曾莫知夫影响问洪纖而莫得自契胚浑考上下以都忘孰分天壤及夫大朴将散三光欲萌清浊待兹而一判昏明由是以相生然后品彙咸观用作有形之始淳和外发或知至道之精是何小不隐于纖介大不充于寰海配一气以冥运亘终古而斯在纵阴阳之推荡我质难移任变化之纷纭斯形不改岂不以有者真有之基物者生物之先 搜而兆朕斯显寂听而音容莫传得我之小者散而为草木得我之大者聚而为山川视焉且无讶深蟠于厚地搏之不得疑上极于高天本自彊名诚难取类其始也既出无而入有其终也亦规天而矩地既不可指掌而窥又不可困人而致明君体之而成化则所谓无为而为君子执之而立身亦同乎不器之器无反无侧神之听之谅潜形于恍惚实委化于希夷倾毁何由固秉持之在我刚柔有体将用舍以随时今我后掌握道枢恢张天纪将穷理以尽性思反古而复始巍巍乎执大象而抚域中达妙有之深防

金在镕赋【金在良冶求铸成器】范仲淹

天生至宝时贵良金在镕之姿可覩从革之用将临熠耀腾精乍跃洪鑪之内纵横成器当随哲匠之心观其大冶既陈满籛斯在俄融融而委质忽 而扬彩英华既发双南之价弥高鼓铸未停百鍊之功可待况六府防昌我稟其刚九牧纳贡我称其良因烈火而变化逐懿范而圆方如令区别妍媸愿为轩鉴使削平祸乱请就干将国之宝也有如此者欲致用于君子故假手于良冶时将禁害夏王之 可成君或好贤越相之容必写是知金非工而弗用工非金而曷求观此镕金之义得乎为政之谋君谕冶焉自得化人之防民为金也克明从上之由彼以披沙见寻藏山是务一则求之而未显一则弃之而弗顾曷若动而愈出既踊跃以求伸用之则行必周流而可铸美夫五行之粹三品之英昔丽水而隐晦今跃冶而光亨流形而不缩不盈出乎其类尚象而无小无大动则有成士有锻鍊诚明范围仁义俟明君之大用感良金而自试居圣人天地之鑪亦庶几于国器

德车结旌赋【车结旌者昭德之美】宋庠

君有至德时乘大车当偃革以无外乃结旌而有初奉驾陈仪采物虽资于备设鸣鸾示礼旂旒匪俟于垂舒顺考前经铺闻往说谓戎事以既息贵君车之有结雍容抚轼葢藏饰以尚纯肃穆展铃诂垂旒而就列葢由抑乃盛饰昭夫令名虽冠品于舆服蔑扬威于旆旌肃轸无哗方敛藏于旂厉驰轮有度靡赫突于綏纓且夫礼有质文器随用舍车号乎德则崇化于邦本旌结其表则示人于天下意自象见名非人假君轩弭节孰讶乎卷而怀之国乘制容益显乎素为贵者是知车之用兮充德以成大旌之饰兮辅威而孔昭既武怒之不作信军容而外销组轡啓行陋邦旄之子子错衡遵路殊风旆之摇摇若然则动有彝仪文无异色虽严驾以备物终去华而表德故使礼典攸重民瞻不忒皇皇整御始中括于采章轹轹肃容岂外扬于藻饰用能上载明德旁昭缙仪自驾言而戾止殊幅裂以藏之升降惟寅仅比非心之屋章明尽屏宁同止猎之綏大矣哉邦礼是崇帝仪资始实务德以垂教必收旌而昭理宜乎国容备而兵器销率由兹而尽矣

应天以实不以文赋【天应诚德岂尚文为】 欧阳修

天灾之示人也若响应声君心之奉天也惟德与诚固当务实以推本不假浮文而治情彼虽不言谪见以时而下告吾其修德祸患可销于未萌臣闻天所助兮惟善则降祥德苟至兮虽妖而不胜皆由人事之告召然后天心之上应若国家有阙失之政则当频见于众灾欲人主知戒惧之心所以保安于万乘臣请述当今之所为引近事而为证至如阳能和阴则雨降若岁大旱则阳不和阴而可推【去年大旱】阴不侵阳则地静若地频动则阴干于阳而可知【去年河东地频动】又如黑者阴之色晦者阴之时或暴风惨黑而大至白昼晦防而四垂【康定元年三月黑风起白日晦】日食正旦雨冰木枝【今春二月】如此之类皆阴之为葢阴为小人与妇女又为大兵与蛮夷若四方之为患则羣阴之失宜故天象以此告吾君不谓不至陛下所宜奉天戒不可不思是谓应以实者臣敢列而言之若夫慎择左右而察小人则视听之不惑肃清宫闱而减冗列则恭俭而成式况乎远佞人者孔宣父之明训放宫女者唐太宗之盛德又若西师从不利宜究兵 而改作叛羌从末服宜讲庙谋之失得在陛下之至圣行此事而不忒庶天意之可回虽有灾而自息方今民疲赋敛之苦又值饥荒之年赀财尽于私室苗稼尽于农田劫掠居人盗贼并起流离道路老防相连陛下视民如子覆民如天在于仁圣非不矜怜故德音除刻削之令赦书行赈济之权然而诏令虽严州县之吏多慢人死相半朝廷之惠未宣天至高远也惟可动以精诚民之休戚也皆系君之好尚惟善政之能惠则休符之并赐富有四海之大独制万民之上言之出兮谁敢不从百事责实兮自然无旷发号施令在圣意之必行变灾为祥则太平之可望今汉史有五行之志尚书有洪范之文愿诏侍臣之讲说许陈古事于听闻可以见自召妖灾虽由于时政能招福应亦自于明君故禾偃于风表周王之觉悟雉鸣于鼎成商帝之功勲葢恐惧修省者实也在乎不倦祈禳消伏者文也皆不足云臣生逢纳諫之圣明不闻直言之狂斐惟冀愚忠之可采苟避诛夷而则岂葢赋者古人规谏之文臣故敢上于旒扆

王畿千里赋【畿制千里尊大王国】 宋 祁

王有一統人无异归中四方而正位画十里以为畿总大众之奠居式昭民极据方来而处要

以重皇威二代而还维周有制肇庶绩以图大廓多方而为衛作我上国垂诸永世以谓地非中夏无以示天子之常尊土不一圻无以待诸侯之八计尔乃测圭于地考极于天风雨之所交者道里之必均焉郊野错而回合乡遂亘而蝉联沟封斯万疆塲且千差籍九畿定夫家于都鄙出车万乘括赋入于原田是谓辨方且非期侈廓焉天府之国巍乎王者之里爵禄命赐之供亿朝覲防同之底止不偪陋以取侮不夸矜而役美侔江海之重润乃据上游法日月之径围用张天纪且其蛮獠面内玉帛骏奔内则百官承式外则四国于蕃化之远者礼益广归之众者务愈繁必在制广轮于有截示极摯于羣元倍十子男大有由而御小任包旬稍卑不得以侔尊亦由天之高煮物而无外地之厚广生而咸賴使高而可度则寥廓何仰厚而易知则沉潜有害是用控天下以咸乂极宸居而称大诗美四方之是则理乃同归史称后世之无加事诚胥防美夫周原膺膺禹画芒芒或处瘠为教或建瓴是防然皆按成事于神甸迹前谋于令王所以汉相论都首识金城之广召公相宅前知墨食之祥洪惟我朝奄有方国托宏基于天地亘长藩于道德所以申画邦畿是用守之无极

百工由圣人作赋【以工善其事由圣人作为韵】 陈襄

統尔六职良哉百工何艺事以斯作由圣人而是崇辨器成能自乃神而立制化材适用本惟睿以兴功蹟姬旦之明文见冬官之盛典谓夫智之出也始创物以兴制工之立也乃成器而尽善嘉众艺之勃兴本圣谋而不闢攻金攻木资濬哲以裁成作舟作车由灵机而洞显自兹立器为利因材究奇虽大匠之述作皆徃哲之规为既执技而纷若诚取法以宜其所以鳧氏成钟自高辛而立范车人作耒本炎帝以垂规且夫国有四民工分百事或居肆以成业或飭材而兴利率皆因上圣以资始致宏规而绰备依于法而游于艺肇自神谟智者忧而巧者劳出由睿意岂不以工之立事者盖本于前修事之经始者必资于善谋伊众制之虽盛非圣作以奚由网罟以畋寔庖牺之肇用杵臼之利因熊氏以垂休自然众伎靡纷大模率正虽云乎代守其业但见乎作者之圣亦由五声兆黄钟之律节奏爰彰大辂起椎轮之姿雕几采盛此则艺能交举物用具陈祖述虽资于匠者经营率自于古人按乃度程实聪明之制作勤乎朴斲资睿哲之经纶噫夫世变浇漓时蠲朴略高曾之矩矱丧器用之资惟错今上方稽古道而复淳源立是工也体圣明之所作

首善自京师赋【崇劝而学为天下始】 王安石

王化下究人文内崇繫京师首善之教自太学亲民之功闾承师论道之基先繇穀下广成俗化民之谊甫暨寰中古之圣人君有天下治远于近制众以寡不用文何以修饰政教非设校何以崇明儒雅乃建左学率先诸夏在郊立制系一人之本焉养士兴仁形四方之风也本仁祖义取材斂贤讲制量于中土鬯声明于普天始于邦家用广师儒之众行乎乡党斯为庠序之先是何拳拳诸生亶亶先觉所传者道德仁义所肄者诗书礼乐以言乎功则万世用乂以言乎化则八紘匪邈其流及于三代率以明伦此理达于诸侯谁其废学故曰校官者庶俗之原本京邑者羣方之表仪养原于上则庶俗流被设表于内则羣方景随惟时于变繫上之为三王四代惟其师使人知化兆姓黎民辑于下自我兴基向若俗败隄防朝隳統纪教化之宫衰落礼义之官废弛乡风者无以劝于善肄业者不能官其始则抚封之主毁乡校者有之承

学之民在城阙者多矣必也啓胃子之秘宇据神邦之奥区宪先王而讲道风下国以恢儒邑翼翼以宅中契商人之咏士彬彬而蒙化参汉室之谟噫孝武逸王也而有兴置之谋公孙具臣也而有将明之论矧睿明之主绍起俊乂之僚并建宜乎隆儒馆以视方来使元元之敦劝

厯者天地之纪赋【圣人以通天地之数】 苏 颂

昔圣王建官司地因象知天推厯用明于大纪考星咸自于初躔合三体以为元成书最密举二篇之定防备数无愆古有善谈载于前志因太初创厯之首述往圣知时之义莫不究极象数精穷天地有时以记夫啓闭有日以纪乎分至躔离 望也于此而为正晦朔昏明也于此而攸示下可辨乎斗建上靡差于辰次惟君审玑衡之运所以绪正于元功使民知寒暑之来然后顺修于时利况夫厯为一岁之本纪明太极之基推精禋之至妙岂深思之与知必也迎辰以策定暑于仪帝舜则羲和而分命顓頊则重黎而是司皆所以準厥二气乘于四时圣有作也人皆度之制自清台得举正履端之要职由太史尽观文察理之宜若乃辰集于房月穷于纪孟陬既协于月建摄提亦随乎杓指国将班正朔以为令王乃观情性而顺理章郢元之书兮着于彼子丑寅之正兮见于此可以察发敛于未然定舒惨之所以推而生律子阳午阴而互分治以明时春作秋成而是拟且夫天之运也日与星而代逢地之道也柔以刚而莫穷非乃圣无以探其蹟非立法无以举其中我乃错综气候稽参变通起建星而运算故积岁以成功考连珠合璧之辰得名尤邃应大吕黄钟之統立道斯同用能钩校旧仪审观新度成败因之而遂纪气节于焉而可步于以极阴阳之大端于以备六五之中数亦何异鲁经比事举二中以岁成羲易穷神合五位而象布后王以是知厯象不可不审经纪不可不循或立元而谨其始或节事而授于民冯相则致乎日月保章则志夫星辰以定五十五数以通三百六旬所谓见道而知治何患以天而占人彼为刻漏以考中星但纪晓昏之度处璇玑而观大运盖明气候之因犹未若测运动于二仪齐往来于七政建乃星纪先夫算命吾皇所以监古厯之尤疏颁新书而考正天人之际因以明焉乃知夫作者谓圣

圆丘象天赋【圆丘就阳上宪天体】 郑 獬

礼大必简丘圆自然盖推尊于上帝遂拟象于高天必在国南蟠宏基之高厚用符阳体取大运之周旋王者揆礼之文为民之唱修明大禘导迎景贶有祭焉格神于下有祀焉享帝于上谓丘也其形特异我所以贵其自成盖天也其体亦圆我所以法之相尚尔乃旋仲冬之序迎至日之长扫以除地升而诏王是必肇灵壤以高峙模圆清而上当择吉土之成基乃定其位仿高穹之大体以就乎阳由是懽然神意交穆然天贶授徧羣灵以从之祀严太祖以为之侑焕尔盛容配乎大就成非人力耸宝势以下蟠仰合干仪环太虚而高覆然则礼有物也其制可象天无形也其端可求故我相法于厚地取类于重丘崇崇其高隐若积土之固浩浩其大浑如洪覆之周是故有藁秸以籍诚有陶匏以荐礼大裘焉以彰其质苍璧焉以象其体固异周朝授政筑层级之三成汉祀命郊兆重阶之八陛是则事至神者物无以称其德接至高者丘所以表其防与地居上如天转圆对方泽之成形乃殊其象规大仪之防运自贵其全圣人所以明礼大原建邦茂宪兆其成迹符于至健夫然因天事天得先民之至论

浊醪有妙理赋【神圣功用无捷于酒】 苏轼

酒勿嫌浊人当取醇失忧心于昨梦信妙理之凝神浑盎盎以无声始从味入杳防防其似道
径得天真伊人之生以酒为命常因既醉之适方识此心之正稻米无知岂解穷理麴蘖有毒
安能发性乃知神物之自然盖与天工而相并得时行道我则师齐相之饮醇远害全身我则
学徐公之中圣湛若秋露穆如春风疑宿云之解駮漏朝日之嗽红初体粟之失去旋眼花之
扫空酷爱孟生知其中之有趣犹嫌自老不颂德而言功兀尔坐忘浩然天纵如如不动而体
无碍了了常之而心不用坐中客满惟忧百榼之空身后名轻但觉一杯之重今夫明月之珠
不可以一 夜光之璧不可以舖刍豢饱我而不我觉布帛燠我而不我娱惟此君独游万物之
表盖天下不可一日而无在醉常醒孰是狂人之药得意忘味始知至道之腴又何必一石亦
醉罔闲州闾五防解醒不问妻妾结袜庭中观廷尉之度量脱鞬殿上夸谪仙之敏捷阳醉遏
地常陋王式之褊鸣歌仰天每讥杨惲之狭我欲眠而君且去有客何嫌人皆劝而我不闻其
谁敢接殊不知人之齐圣匪昏之如古者晤语必旅之于浊醒者汨罗之道也屡舞者高阳之
徒坎恶蔣济而射木人又何狷浅杀王敦而取金印亦自狂疎故我内全其天外寓于酒浊者
以饮吾仆清者以酌吾友吾方耕于渺莽之野而汲于清冷之渊以酿此醪然后举注樽而属
予口

三阶平则风雨时赋【泰阶既平风雨时若】 孔文仲

圆极之运太阶以平表圣神之德盛致风雨之时行位正六符炳光芒于常次气流四序普散
润于羣生大仪之远兮其体高明列宿之繁兮其文交错君道修于下则瑞为之证人事失于
此则变从而作伟一德之温恭感三阶之炳烁腾精于上烛太微紫微之居垂象于人应时雨
时风之若灿灿华藻苍苍昊穹常輝乎太一之座密次乎文昌之宫则必天地协应阴阳大同
沐之以膏雨挠之以祥风上耀高躔既色齐而光大俯呈休验俾根着之滋丰灵台齐政兮知
精祲之祥太史占天兮测宿离之防上焉两两之悉正下焉元元之永赖盛泽鼓舞洪恩霏霏
观文察变仰魁斗之均明薄山流渊苏物情而交泰岂不以天至邈也其监无私星至远也其
应不欺惟上阶之成象合元后之题期或当乎卿大夫之列或主乎士庶人之卑率皆腾辉而
有烂守常而莫移致此协气播于大时薰兮解愠之美沛若如膏之滋顺轨而居展开德宣符
之效以节而至无鸣条破块之为斯盖位焉不易其尊卑行焉不差其经纬使清微之令均被
乎率上脉沐之泽昭苏乎品彙化养无外涵濡罔既相比而列连炳焕于七星仰观其符知协
调于六气诚由至仁之化也四表光被太平之治也兆民允怀葛休功于万宇兆祥应于三阶
载于传则微凄苦之戾出于记则无焱暴之乖验斗覆而岁穰求端则正占毕明而夷贡取类
其皆班固志之也晓然示人方朔陈之也勤于致主修皇德以上动焕台光而可覩符作肃作
圣之事鲜极备极无之苦又何必飨帝于郊始能节乎风雨

四海以职来祭赋【天下之职能助王祭】 孔武仲

上圣孝至诸侯职扬当一人之奉祭罄四海以来王肃尔骏奔各述修方之旧翼如显相用严
肆祀之常夫惟承祖宗积累之休处廉陛崇高之势尊其亲也既重假庙大其礼也又当配帝

化首正宁教流当世本至诚之恭爱可以感人极四海之欣欢八而助祭时也六服而内五侯至前同姓异姓兮各奉玉帛大宾大客兮迭承豆笾并来享以悦怿咸侍祠而吉蠲造此阙庭鎗八鸾于外屏盛其饌贡洽百礼于中天择于大射则宾自得贤誓以常刑则臣无废职辨其吉礼之掌同厥驩心之得俨若将事欣然献力分行递见居多振鹭之容承命勤修皆有和羹之德诚以报本反始者神圣之美教尊祖严父者朝家之上仪在盛王之颺若格緜宇以承之故尔各备上服并承约軼所以周庙陈常美羣公之肃肃汤孙致飧咏列辟之祁祁众莫众于侯方尊孰尊于君者大邦小国兮至自畿外美味和气兮实于堂下共承上化参德逊于前书各尽臣恭协裸将于大雅夫尽九州之力致五福之膺殊免爵于西汉异责茅于召陵以极精禋之意用全孝飧之能荐牲惟时推至诚而茂对执爇有序赞大事以灵承噫德教所加惠心益着外易俗于海隅下感心于黎庶矧乎茅土分宠亲贤同虑幸丁萃享之时孰不驩虞而来助

舜琴歌南风赋【帝舜作琴以歌南风】 舒亶

帝意虽远琴音可通欲发扬于孝道遂歌咏于南风寓意五弦写生成之至德托言万物荷长养之元功粵其耕稼陶渔至为君聪明睿智积诸已日深致孝之念躬尽事亲之理以谓鞠养之德欲言之不足生育之爱欲报之何以縁情指物孰形孝子之思流咏在琴且载南风之防时其比屋熙父岩廊靓深包我万虑写于一琴协天地以同趣按丝桐而播音作以叙情适在无为之日薰兮八奏永言至孝之心蓋曰风之于物也有化养之恩覃亲之于已也有劬劳之德博眷物理之明甚假琴声而远托一弹而欢意悉写再鼓而羣心咸若按弦而奏声参韶乐之淳寓象而言义并凯风之作议夫琴求以意而不求乎形器帝乐在孝而升乐于弦歌感民之义岂并于北里思亲之志固深于蓼莪藏韵于心非止解一时之愠寄声于政又将陶万国之和自是正音畅而化洽幽遐协气流而时消愆戾闔门听之则翕尔和顺朝廷闻之则欢然感厉风被乃俗功归于帝又得防工之奏同乐于民不烦邹律之吹阜财于世兹蓋渊默玩意优游面南歌孝风之远暨托琴理以中含惜乎道与世汨乐非德参操变而亡徒起后人之叹音调而理空闻前史之谈夫岂知音者导乐理之淳淳达孝思之进进内将报德之罔极外以格民之大顺然则歌琴之意至矣哉莫如虞舜

公生明赋【公不偏党明则生矣】 许安世

事欲无蔽心宜尽公既守正以宅志遂生明而在躬祛一意之党偏不私乎物照百为之情伪罔汨于中若夫外交事变之繁中固心诚之守以谓虚已鉴物则枉直昭晰挟情适事则是非纷纠欲庶理之皆辨舍至公而则不中立不倚始持正于羣伦旁烛无疆遂致明于万有无陂无侧不阿不偏非妄恶也恶其众之所弃非作好也好其众之所贤蓋依违牵制者固已去矣则明白洞达者乃其自然百志惟宁居絶倾邪之渐五綦不乱遂观昭旷之先蓋夫智因窒而后昏性以私而有党爱憎既絶则真伪必审取舍既平则善恶不爽抱纯正以中执涵机灵而内养所以主心善治汤无蔽塞之忧直道钦承文有照临之广岂不以湛静者人之性偏闇者性之情知静为本故虚之则定知闇为害故去之则明正厥心官始闲邪而制物发为智烛终迪哲以通诚大抵处有累之地者莫不徇私对无穷之变者鲜能不感凡适理以非 由秉心

之自克得不保守天质蹈行圣则周而不比无一曲之蔽情静之徐清有三知之入德因知心乃物之鉴公为职之衡系吝既屏纯明自生以之察已则事至不感推而成务则物来敢名是故君子养源于以致忠邪之判大人正已岂徒无谮诉之行嗟夫有为者易失其本心无憚者或迷于至理故佞文党与以丑正恭显庸回而嫉士智尚昧于自保识敢期于远视惟夫以公正为心明则生矣

智若禹之行水赋【明智之大如禹行水】 孔平仲

古有大智中潜至明何行水以为喻盖存心之自诚渊然翊物之谋敏而外发沛若决川之势顺以东倾夫惟灵万类而生毓五常之粹不滞于物其端曰智然顺其故则不致于交谲悖其本则浸成于大伪居惟适正委美质之自然举若下鸿措安流于无事审利图害筹安计危蕴千虑以无感包万殊而不遗每优游而处此不汨乱以行之内畜清明陶天真而去诈远佞疏凿适地势以流卑湛然恬养于中廓然识周于外不滌源而滌性之垢不治水而治情之害较迹无间成功亦大可通塞壅顺意表以弥纶如决怀襄贯地中而滂沛大抵多计者流于机巧好辨者溺于空虚其明甚惟人戒欤故我抱灵鉴以无隐导沉几而自如心常恶其凿也势若排而注诸舜以是而察迩言聪明并决尧因之而急先务障蔽皆除夫运至计以利仁绍徽谋于平土德一也何独议乎智人一也何独尊乎禹盖智之于物兮必顺适其理而禹之于水兮亦疏导其苦苟能此道宜効臯陶之谟一失其原或谓白圭之愈后世苏张之辩胜庄老之道鸣其耀才者或笼愚而不正其矫枉者又绝圣以无营皆与性以相戾譬濬川而逆行亦犹戕柳以为之桷并非其质揠苗而助之长反害其生噫喻玉营者楚有屈平侔蓍者秦闻樗里或以易变而貽诮或以不知而为耻皆莫若顺其性以行焉所谓智者乐水

周以宗强赋【周以同姓疆固王室】 沈初

古之建国制莫如周盛宗室而作庇强王室以承休治尚以文重恩亲于同姓世祿其祚大形势于诸侯自昔后稷开基公刘经始盛德物被丰功世美文武大其业成康继其轨奚永永以能然盖亲亲而得以任先宗子协图夹辅之勲本固王家益植太平之趾天亦中奠侯封外崇大邦小邦兮我所锡壤伯父叔父兮汝其懋功巩国势于寢盛粹民风于大同膺木德以当天王图以永法辖星而建屏邦本其隆有袞服以华其躬有金路以优其命宝玉分赐胀膳均庆所以等异诸臣恩先庶姓史称乃德盛陈过厯之期诗大其功茂着维城之咏岂无异姓与之翊昌岂无列辟与之赞襄推本而治尚亲则强故苍筤之兴起始诸姬而阜康忠厚一时重本枝而相辅仪刑百世壮基绪于重光至如鲁衛之所分邢茅之所附众列邦壤一宁国祚岿然盘石之安屹然宝鼎之措无烦兵革坐收御侮之功不假山河自得为藩之固譬夫本之殖枝茂者干必大水之委源深者流必长絜尔列辟辅予一王秦室寢微盖削五侯之壤汉邦未善徒恢七国之疆盛哉本本之扶持承承之操术国五十兮比如犬牙之制年七百兮縣如瓜瓞之实方今宗也盛而国也强跨基图于周室

佚道使民赋【民得终佚劳固无怨】 林希

古者善政陶乎庶民上安行于佚道下无憚于劳身教思有原得乐趋于农役人知足养胥仰戴于君仁始也井天下之田比民居之域乃辟疆里乃营稼穡寒则思为之衣饥则愿为之食法既归厚利兹各得蓋上执其道务优佚以便民众乐其生率欢娱而竭力春使之作熙然悦从冬使之息庆其有终趋时也如鸟兽之至收成也如寇盜之空利而不庸自足王民之用厚而无困本兹帝力之功蠢惟有生不能自恤役之所以奉其已利之然后知其佚仰有以供其祭祀俯足以宁其家室谷播其始化同幽俗之深壤击而歌野有尧民之质俾尔昼出于塾俾尔宵索其絢无力役以夺其节无赋敛以为之骚曾动作之敢息由醇醴之所陶驱于足用之原安而服业图厥终身之养乐以忘劳大抵强民者难使从利众者久益慕及充其口腹之欲由竭其手足之故汝业既毕汝居既固为之一日之蜡怠心已忘优尔三时之农收功有素然则于其处皞皞其趋俾常产之各得顾闲民之举无治贵优游农者愿耕耘于野俗相廉逊老而不负戴于涂噫藏其用者其政神厚其本者其民愿化而不示其迹劳而不知其困斯道也养生送死无憾焉何有于怨

王道正则百川理赋【王道公正而百川理】 江 沅

物格大顺化由至公本一道以持正致百川而会通庶政修明端若承天之意众流协应沛然行地之中尝闻宰物之工提平在圣大而覆载者既辅相以德广而融结者皆管摄以政故彼灾祥系乎邪正惟王有归往之蓋在为公而水存平准之称遂皆得性何则明审刑罚持循纪纲亶聪明而作后一好恶以遵王执此之政兮坚若金石行此之令兮信如阴阳有猷有为屏邪心于党附或源或委畅柔德于灵长由是温洛效珍荣河荐祉若江汉焉莫不归其润若畎浍焉莫不循其理民自絶于昏垫物大蒙于丰美坦周人之砥道率履大中协夏后之神功敕宁泽水岂非德之隆者高深远近而必及道之公者徧覆包含而不偏博既通于化育幽遂远于渊泉上广尧仁有既陂之九泽下殊幽暴无皆震之三川况夫中和发于圣诚精稔入于神造万物之类尚率育而总总五行之本宜分流而浩浩平康在治兹咸叙于彝伦脉络交通遂安行于故道向若所持悖繆所向阿私或盛外家之宠或简宗庙之仪害既作矣时将殆而白马沉而福益远金堤塞而民已疲是以雅什貽讥蓋念沸腾之失汉臣建白重兴涌溢之悲殊不知水之为功物资其泽以之浸润也其功倍以之灌溉也其利百然而疏导则莫胜其劳壅塞则悉罹其厄惟王道公正而不颇自然顺适

宋文鉴卷十一

卷十二

钦定四库全书

宋文鉴卷十二

宋吕祖谦编

诗【四言】

皇雅十首 尹洙

天监受命也自梁至于周兵难不息宋受命統一万方焉

天监下民乱靡有定甚武且仁祚厥真圣仁实怀徕武以执竞匪防匪刘拯我大命自昔外禪
月经日营令以挟制政以阴倾帝初治兵志勤于征奄受神器匪谋而成淮潞弗防卒污叛迹
戎辂戒严皇威有赫彼寇诘民吾勇其百殄厥渠魁贷其反侧帝朝法宫左右宗公仗夫悍士
以雍以容尔居尔室尔工尔农既息既养惟天子功

天监四章章八句

西师征蜀也

主用西师岷梁弗宾匪曰负固实交晋人予训予誓合我将臣正厥有罪无庸伤民矫矫虎士
载摧其壁于嗟孟侯亦果其策迎师而降靡抗锋镝岂独身谋完是宗国蜀都既平将臣失律
此众悍骄彼民危栗当涂叫呶合万为一匪怀则威帝心是恤帝曰将臣予嘉乃庸废命毒民
尔弗有终邦典用疑惟罪惟功靡殛而削协于厥中帝曰孟侯受封于楚淑旂雕戈备物异数
俾尔族姻及乃文武服在王庭靡不有序蜀民呼歌天子威灵保我者封暴我者刑匪功是和
匪弱是陵天子惠民畴敢不承

西师六章章八句

耆武受俘也命将伐南海平金陵俘二王以献

耆武定功时惟二方淮服其义海南遂荒孰孱而盪孰暴而猖自底不諲乃终灭亡帝戒二俘
同即尔诛予惟民无辜休息是图时其辑矣宁威独夫帝嗟污邦久罹于兵或暴下以征或敷
虐以刑予命中典协于国经民服德音室家以宁

耆武三章二章八句一章六句

宪古令守臣也削其附庸以强帝室焉

帝怀永图治古是宪四方守臣惟屏惟翰在昔艰难弗惠训典跨都连城高牙以建有土有民肆乃征缮以息以容终焉叛换凡今帅臣狃厥见闻见匪革乱原曷清多难帝告庶邦式是典彝元侯显父戚臣宗支正乃封圻予一人是毗凡曰附城罔尔俾之畜兵厚赋靡尔得私母凶而国作福作威天子有命畴敢不只子孙承承唯万世规

宪古二章章十六句

大卤王师讨晋罪也

晋氏之疆粤惟大卤俗伎而专地扼而固协比幽都荡摇边圉三垂既定凶威弗沮帝御六师百万貔虎翦其附庸至于城下锋镝始交梯冲如舞蠢尔孱王请附降携我士奋扬愿究吾武皇帝曰吁念彼黎庶匪鲸匪鲵复为王士晋郊既平九区以宁陈功太庙告假威灵在昔武王于商观兵惟我艺祖亦勤于征匪贷晋罪俟厥贯盈圣作圣继巍巍相承皇矣二后功莫与京

太卤二章一章二十二句一章十四句

帝籍修故典也躬耕以劝农焉

帝籍于郊典仪具陈务农以训供祀以勤祀在于诚匪勤于人训农以实匪训以文帝谨二物乃躬乃亲公侯卿士暨厥庶民千甸有制飭哉惟寅帝赉高年式宴且喜种种黄发族丘而议我生艰难暴乱以继耳狃金鼓目狎戎器皇其我图亲讲农事有子有孙力田孝悌鼓舞至仁薰焉如醉

帝籍二章章十四句

庶工任贤也

帝咨庶工畴其辅予俊乂以登厥劳乃图匪忘旧勲非贤勿俞巍巍袞台盛德以居任贤伊何昌言是庸勉告尔猷罔恤乃躬岂无猘辞怫于予予不尔疵尔无面从始时从官戎容扬扬今帝左右儒冠煌煌朝廷以尊文物典章得人之盛奕世重光

庶工三章章八句

帝制北方请盟也

帝制万邦罔有弗宾山陬海澨羈而勿臣威格三方稽顙献珍单于革心愿交使人帝谋公卿列侯庶校咸曰彼心暴戾阴狡既扰我疆复利吾宝无若励兵袭其还道皇曰有众予实念兹战无必胜矧其归师借曰大获畴能尽之益俾衅深毒吾朔陲乃俞其盟北州以绥在汉世宗抗威兵戎暴农算商经用弗充中土震骚汉南始空降及后世犹称厥功初穆圣考德无与偕匪勤于兵北人遂来逮是三纪远俗以怀生民休息呜呼仁哉

帝制五章四章八句一章十句

皇治恤刑也

帝仁于明刑在位者以寬恤为治焉皇底其治钦哉惟刑在疑而宥罔察为明爱怒弗肆孰为重轻母一弗辜惟典之平前世理官倚法以刻匪彼为仇蓋曰任职令之蔽狱务正其辟鉴于前人繄我仁德皇德在仁寢而成风公侯卿士靡不率从靡卵萌生咸保厥终不鄙不夭乐哉融融

皇治三章章八句

太平封祀告成功也

噫太平无象兮世乌得而知维盛德可迹兮其封祀之仪东岱宗兮西汾睢礼上帝兮宾地只皇有征兮吾民以嬉皇有祈兮吾民是私天敷佑兮俾皇之厘永世亿宁兮无疆之基

太平一章章八句

定州阅古堂 富弼

天下十八道惟河北最重河北三十六州军就其中又析大名府定州真定府高阳关为四路惟定州最要定为一治所实天下要重之最知是州者兼本路兵马都部署居则治民出则治兵非夫文武才全望倾于时者不能安疆場屏王室也然自国初已来专以武臣帅诸路庆厯七年甘陵妖贼据城叛河北妖党相摇以谋应卒骄将便人心大震天子悟始议选儒臣帅四路以督诸将乃起知郢州资政殿学士给事中昌黎韩公帅真定以遏乱萌明年春贼诛人安既而夏大雨河决商胡东北入于海河北灾人复不宁流徙失业者四出咸不翅千里僵殍满道天子恤然且虞他奸遂以公帅定定既要重天下宿兵素多属伤残之后官民枵困征赋逃无几而兵不少减兵袭旧幸歉益骄以悍公夙夜裁整以威以怀兵之骄不从令者捽其首恶斩以徇略为条教余怙怙就约不敢哗于室至有调发者远而弥戢如公亲临已而招集逋亡四流争还如啼孩奔父母惟恐其后至则充然各得其欲农无废陇赋有余粒不旁诛横敛而上下足堙漏补罅一面完固公既击彊梗之兵又育雕瘵之民左行斧钺右哺饮食乱者毕治亡者毕存礼法政教向之人所不得闻者今渐濡酣饫无不贯彻自是边人革其耳目新其肝肠优为而乐从故人易治而功成速也又明年秋天子图公之功诏加大学士公先尝表其

志幸终三年不愿亟易也至天子抑骑召而使即以授姑遂公请亦以慰斯人爱公之心也公惕宠处官虽无事未尝辄自豫念兵与民之急宜无过者矧临要重之路忧虞所系凡是继画不可以无法乃择取历代贤守良将总若干人行事创大屋以类相次绘于周壁榜之曰阅古堂盖欲阅古之人所为而为之法也噫公雅文杰武自当视乎古人且天下方迟公入辅以致太平若其安疆塲屏王室岂庸考古而后能哉实公冲然不自有其有而归乎古人也其悬知来者不师绘事而公是师也虽然蹋古搜善惠人惊已公之意谓其至矣乎公邮问索诗因粗序所致之防以志其始而示于后诗曰

朔方之兵劲于九土尤劲而要粤惟定武兵劲在馭用则黑虎失馭而劲骄不可举曰保曰贝闭壁连阻武爵斯守束手就掳皇帝曰噫汝武曷取有敝必革以儒于抚公来帅定始以威怒有兵悍横一用于斧连营怛之胆栗腰伛既惧而教如哺如乳以刺以射以钲以鼓无一不若师师旅旅列城自刺靡不和附阴沴为梗降此大雨大河破泄在河之浒民被黜垫田入污莽流离荡析不得其所公感曰吁予敢宁处乃大招来乃大保聚乃营帛粟寒衣饥茹民归而安水下孰御疆弱死生由公复虑曰义曰仁震肃春煦合和蒸天天顺以序公境独稔爰麦爰黍公俗独乐夫耕妇杼人虽曰康公亦奚豫谓此一方民与兵具务剧任重稽古人裕人皆谓公与古为伍公文化民公武御侮何思古人公不自许遂择奇将绘于堂宇列其行事指掌可数前有古人在我门后有来者依我墙堵斯堂勿坏有堂有故堂之不存来者曷覩宏乎焕乎千载是矩

裕礼颂圣德 梅尧臣

溥哉孝享将事于宁文武卿士冠劔在庭奚俟帝斋风霰其零风霰不已钩陈豹尾龙旂太常立列比比帝居路寝百辟就次至于谷旦漫漫翳翳帝入灵宫左撞黄钟陞阶置玉日气曈曈鸿鸿杲杲氛驱阴扫宿于太宫月星皓皓侍祠之臣鹄举鹭振或捧其匱或进其巾辅相夹导俯倮鲜鳞圭瓚以陈登歌以均东向虚位发爵亲亲平明帝还紫宸序班望帝之颜穆穆闲闲檐步廊廊雪浮阳光大楹烂烂朱陛煌煌称祝万寿万寿无疆却登宝輿以御端门揭鸡肆赦雷动乾坤于时都人于时妇女于时兆庶异口同语天子万年仁圣之主臣时执策与物咸覩敢播于诗庶闻九土

魏京 刘敞

上二十年治建北京以章明先帝巡狩之德以孝思于下于时野之处士或相与议曰盖文王都丰武王都镐丰镐之间不能数百里文武之位不过侯伯而诗人乃以圣人之德天子之事歌之有如圣朝德位相侔述作相继而无邇骏烝哉之诗此乃处士之罪非公卿之过也乃考声譔辞以继大雅垂之无穷其文曰

皇作大都大都雄雄奄定北国四方来同皇曰卿士在昔圣考祗邇文武维慈防老天监在上既有明德乃命于下罔有不复匪允命之亦章庆之匪允服之亦保育之时维玃狁侮予之疆靡度靡虞跳呼以狂业业烝黎载震载惊侵魏及澶羣心不宁帝奋厥武百万其士匪怒以棘

于三十里如虎如貔如霆如雷靡有远迹天子其来天子来止土增其喜孰偷其生以不奋兴驱之浑浑攘之赍赍靡有辀张殲厥鲸鯢或献其宝或请其命帝振于旅维时既定屹屹魏土山河之固匪山河则固维上帝伊既闾尔弓既橐尔予玃犹臣之四方是休皇曰卿士圣孝之德允于孝思孝思维则尔眎于魏以作我都以赫厥灵俾后勿逾皇曰卿士维帝时功时亦维人维冠莱公尔敬尔止弼予于治期尔前人用迪尔事皇曰卿士维帝作武垂是万年莫敢予侮泰山之封后土之禘予监若兹维天是眷翼翼魏土天子国之穆穆原庙圣人则之孰为彊暴来覲来覲俾誓于威于忠是训显显天子孝德自躬率是休烈遂致时雍河水东注昭哉禹绩时万斯年天子之德

古风 刘敞

子欲富矣何用为富农不若工工不若贾子欲贵矣何用为贵德不若名名不若势粹兮纯兮三五之人兮终窶且贫兮孰知其珍兮

闵雨 刘敞

臣伏见春首以来天久不雨厯官李用晦治大衍轨革太医赵从吉治黄帝六气咸以谓风旱岁恶然陛下焦心劳意侧躬修德蓄乐损膳议狱宥过以迎导善气爰及言事得罪者唐介杜枢之徒复特见甄序小大之臣莫不欣然人情悦则天气和矣乃三月己巳日入而雨至于庚午诗不云乎益之以霏霖既优既渥既霑既足生我百谷以此见圣人之德与天相符言出而物应行发而神助虽水旱之占有常数者犹不能违之况其眇者乎窃观诗书所载盛德之君至诚动天之速未有及陛下者也臣不胜鼓舞之至谨撰闵雨诗一首十三章章六句投进以闻

堪輿網緼一晦一明或沉而毀或亢而眊自古以然世习为常民生防防靡究靡知其幸而吉不幸而灾猖狂妄行唯所遇之天命降监在我元圣兼覆庆裕四方既定维民之恤无所疵病伊年暮春旱久不雨人曰时哉厯有常数禹汤之贤莫能弗遇帝独喟息是岂足言化育万物若谿以埏患在诚薄不能动天退而斋心渊默以居钟鼓不抃宴游不娱左右肃然一怀瞿瞿疏狱省刑与物更始内恕孔悲引咎在己爰及四海愚智咸喜追悟谿直褒进淹滞声色无迁式序在位嬖习权近慑威屏气已已乃雨若有鬼神凄凄其风淅淅其云自东阻西罄无不均匪震匪防匪溢匪泄生我百谷区萌毕達以亨以食小大胥悦天子之德视雨之施肇自京师达于四裔无有逖迹孚我君惠天子之政视雨之时养老长防速哉熙熙更化易俗而民不知天子之庆祝雨之积自天降康时万时亿眉寿无疆以靖四国

新田 王安石

唐治四县田之入于草莽者十九民如寄客维简其赋缓其徭而不可以必留尚书比部郎中赵君尚寬之来问 于民而知其故乃使推官张君恂以兵士兴大渠之废者一大陂之废者四诸小渠陂教民自为者数十一年流民作而相告以归二年而淮之南湖之北操囊耜以率

其妻子者其来如雨三年而唐之土不可贱取昔之菽粟者多化而为稔环唐皆水矣唐独得岁焉船漕车挽负担出于四境一日之间不可为数而唐之私廩固有余循吏之无称于世从矣予闻赵君如此故为作诗诗曰

离离新田其下流水孰知其初灌莽千里其南背江其北逾淮父抱子扶十百其来其来仆仆慢我杂屋赵侯劬之作者丕饥岁仍大熟饱及鸡鹜僦船与车四鄙出谷今游者处昔止者流维昔牧我不如今侯侯来适野不有观者税于水滨问我鰥寡侯其归矣三岁于兹谁能止侯我往来之

潭州新学 王安石

治平元年天章阁待制兴国吴公治潭州之明年正月改筑庙学于城东南越五月告成孔子用币潭人曰公为善政以德我又不勩我而为此学以嘉我士子谁能诗乎以诵我公于无穷皆辞不敢乃使来请诗曰有嘉新学潭守所作守者谁欤仲庶氏吴振养矜寡衣之褰襦黔首鼓歌吏静不求乃相庙序生师所庐上漏旁穿燥湿不除曰嘻迁哉迫阨卑污当其怀时适可以谋营地虑工伐榱桷彻故就新为此渠渠潭人来止相语而喜我知视成无豫经始公升在堂从者如水公曰海汝潭之士子古之读书凡以为已躬行孝悌由义而仕神听汝助况于闾里无实而夸无圣自是虽大得意吾犹汝耻士下其手公言无尤请诗我歌以远公休

明堂乐章二首 王安石皇帝还大次憩安之曲

有奕明堂万方时防宗子圣者作帝之配乐酌虞典礼从周制厘事既成于皇来暨

歆安之曲

穆穆在堂肃肃在庭于显辟公来相思成神既歆止有闻惟馨锡我休嘉燕及羣生

颜乐亭【为孔周翰作】 程颢

天之生民是为【一作惟】物则非学非师孰觉孰识圣贤之分古难其明有孔之遇有顔之【一作其】生圣以道化贤以学生【一作行】万世心目破昏为醒周爰阙里惟顔旧止巷污以榛井堙而圯乡闾蚩蚩弗视弗履有卓其谁师门之嗣追古念今有惻其心良价善谕发帑出金巷治以辟井渫而深清泉泽物佳木成阴载基载落亭曰顔乐昔人有心予忖予度千载之上顔惟【一作为】孔学百世之下顔居孔作盛德弥光风流日长道之无疆古今所常水不忍废地不忍荒呜呼正学其何可忘

何公桥 苏轼

天壤之间水居其多人之往来如鶺在河顺水而行云驶鸟疾维水之利千里咫尺乱流而涉

过膝则止维水之害咫尺千里沔彼滥觞蛙跳儵游溢而怀山神禹所忧岂无一木休此大怀舞于盘涡水析雷解坐使此邦画为两州鸡犬相闻秦越莫救允毅何公甚勇于仁始作石梁其艰其勤将作复止更此百难公心如铁非石则坚公以身先民以悦使老壮负石如负其子疏为玉虹隐为金堤直栏横槛百贾所栖我来与公同载而出謹呼填道抱其马足我叹而言视此滔滔未见刚者孰为此桥愿公千岁与桥寿考持节复来以慰父老如朱仲卿食于桐乡我作铭诗子孙不忘

观棋 苏轼

予素不解碁尝独游庐山白鹤观观中人皆阖户昼寝独闻碁声于古松流水之间意欣然喜之自尔欲学然终不解也儿子过乃粗能者儋守张中日从之戏予亦偶坐竟日不以为厌也

五老峰前白鹤遗址长松荫庭风日清美我时独游不逢一士谁与碁者户外屨二不闻人声时闻落子纹枰坐对谁究此味空钩意钓岂在魴鲤小儿近道剥啄信指胜固欣然败亦可喜优哉游哉聊以卒岁

和陶渊明时运 苏轼

丁丑二月十四日白鹤峰新居成自嘉祐寺迁入咏渊明时运诗云斯夕言息其庐似为余发也乃次其韵长子迈与予别三年矣挈携诸孙万里远至老朽忧患之余不能无欣然

我卜我居居非一朝 不吾欺届此江郊废井已塞乔木干霄昔人伊何谁其裔苗下有碧潭可饮可濯江山千里供我遐瞩木固无胫瓦岂有足陶匠自至啸歌相乐我视此邦如洙如沂邦人劝我老矣安归自我幽独倚门或挥岂无亲友云散莫追旦朝丁丁谁欵我庐子孙远至笑语纷如剪发垂髻覆此瓠壶三年一梦乃复见余

和陶渊明劝农 苏轼

予以绍圣元年十月到惠州四年五月再贬琼州别驾傲睨之余慨然有感黎蛮风俗之异乃和陶渊明劝农诗以告其有知者

咨尔汉黎均是一民鄙夷不训失岂其真怨忿刼质寻戈相因欺谩莫诉曲自我人天祸尔土不麦不稷民无用物怪珍是植播厥薰木腐余是穡贪夫污吏鹰挚狼食岂无良田膴膴平陆兽踪交蹄鸟喙谐穆惊麋朝射猛豨夜逐芋羹藟以饱耆宿听我苦言其福永从利尔鉏耜好尔隣偶斩艾蓬蒿南东其亩父兄搢挺以扶游手天不假易亦不汝匿春无遗勤秋有后冀云举雨决妇姑毕至我良孝爱袒跣何愧逸谚戏侮博奕顽鄙投之生黎俾勿冠履霜降稻实千箱一轨大作尔社一醉醇美

江郊 苏轼

惠州归善县治之北数百步抵江少西有盘石小潭可以垂钓作江郊诗云

江郊葱茏云水旧
纡碕岸斗入洄潭
轮转先生悦之布席闲燕
初日下照潜鳞俯见意
钓忘鱼乐此竿线优哉悠哉玩物之变

洞酌亭 苏轼

琼山郡东众泉鬻发然皆冽而不食
丁丑岁六月轼南迁过琼始得双泉之甘于城之东北隅以告其人自是汲者常满泉相去咫尺而异味
庚辰岁六月十七日迁于合浦复过之太守承议郎陆公求泉上之亭名与诗名之曰洞酌其诗曰

酌彼两泉挹彼注兹一甃之中有渥有溜以瀹以烹众喊莫齐自江但海浩然无私岂弟君子
江海是仪既味我泉亦哿我诗

宋文鉴卷十二

卷十三

钦定四库全书

宋文鉴卷十三

宋吕祖谦编

诗

乐府歌行【杂言附】

桃花犬歌呈修史钱侍郎李至

宫中有犬桃花名绛绡围颈悬金铃先皇为爱驯且异指顾之间知上意珠帘未卷扇未开桃花摇尾长生至夜静不离香砌眠朝饥舐傍御牀餽彩云路孰不劳牵瑶草风微有时吠无何轩后铸鼎成忽遗弓劔弃寰瀛迢迢松阙伊川上远逐龙輶十数程两皆涟涟似垂泪骨见毛寒顿憔悴万人见者倍伤心微物感思犹若是韩卢备猎何足嘉西旅充庭岂为瑞闻君奉诏修实录一字为褒应不曲白鱼赤鴈且勿书愿君书此惩浮俗

江南春寇准

波渺渺柳依依孤村芳草远斜日杏花飞江南春尽离肠断苹满汀洲人未归

西游曲钱易

花销秋老白日短败红荒绿迷空馆拟将清血洒昭陵幽谷蛇啼半山晚十年辞家勤献书王孙不许延公车江头祖庙祭无血重门生草寒离离我有黄金三尺劔奸骨余防古波豔佩入函关无故人玉握凋零七星暗

伐棘篇路振

伐棘何所山之巔秋风骚飈棘子丹折根破柢坚且顽斲夫赳赳汗污颜攒锋束芒趋道还之森森燎长藩暮冬号风雪暗天漏寒不鸣守犬眠主人堂上多金钱东陵暴客来窥垣举手触锋身陨顛千矛万防争后先襟袖结裂不可揜蹠破指伤流血殷神离气沮走蹢躅数尺之墙弗复攀索头丑奴搔河壩朔方屯师连七年木波马领沙填填气脉不絶如防咽官军虎怒思吼轩强弩一发山河穿将不叶谋空即安翫养小丑成凶颠推刍挽粟徒喧喧边臣无心静国艰为余讽此伐棘篇

吴中晓寒曲 王 琪

大泽穹天莽同色碧瓦阊门晓花白石岩左右断行人洞庭一夜水千尺曾持汉节单于垒北
风如刀割人耳知怜冻足幸双摧一生不向胡廷履凭谁赠我紫绮裘中吴风土清且柔令严
气正天地肃长歌白苎临寒流玉兰酒熟金醅溢大白连云尚殊充书牕半掩昼始开几日红
梅断消息

清辉殿观唐明皇山水石字歌 王 琪

皇家四叶恢圣功天临日烛清华戎汉条静治洽柔教老心稽古开神聪有唐英主称好文仙
毫洒落驱风云壮哉山水有奇字焕乎八法存翠珉自从弃置咸阳道薛駁烟滋委宫草天开
神赞防休辰甄收再作皇居宝如何沦废三百春迎逢睿鉴来紫宸奎钩粲粲光华动羣玉森
森气象新丹雘春妍瑞霭深文梁藻栋结芳材鸿翔鳳翥径方文杯流泉涌蒙亲临鰕臣荣幸
从金輿钩婉魂惊拭目初多慙揽笔非清藻唯庆千龄际帝图

鹧鸪词【效王建作】 欧阳修

龙楼鳳阁郁峥嵘深宫不闻更漏声红纱蜡烛愁夜短绿窓鹧鸪催天明一声两声人渐起金
井辘轳闻汲水三声四声促严妆红靴玉带奉君王万年枝软风露湿上下枝闻【一作问】
声转急南衙促仗三衙列九门放钥千官八重城禁籞 池台此鸟飞从何处来君不见颍河
东岸村陂阔山禽野鸟常嘲 田家惟听夏鸡声【鹧鸪西京村人谓之夏鸡】夜夜垅头耕
晓月可怜此乐独吾知眷恋君恩今白发

明妃曲 欧阳修

汉宫有佳人天子初未识一朝随汉使远嫁单于国絶色天下无一失难再得虽能杀画工于
事竟何益耳目所及尚如此万里安能制夷狄汉计诚已拙女色难自夸明妃去时泪沥向枝
上花狂风日暮起飘泊落谁家红颜胜人多薄命莫怨春风当自嗟

庐山高赠同年刘中允归南康 欧阳修

庐山高哉几千仞兮根盘几百里截然屹立乎长江长江西来走其下是为扬澜左里兮洪涛
巨浪日夕相舂撞云消风止水镜静泊舟登岸而远望兮上摩青苍以晦靄下压后土之鸿庞
试往造乎其间兮攀缘石磴窥空千岩万壑响松桧悬崖巨石飞流淙水声聒聒乱人语六月
飞雪洒石缸仙翁释子亦往往而逢兮吾尝恶其学防而言咙但见丹崖翠壁远近映楼阁晨
钟暮鼓杳霭罗幡幢幽花野草不知其名兮风吹露湿香涧谷时有白鹤飞来双幽寻远去不
可极便欲絶世遗纷 美君买田筑室老其下插秧盈畴兮酿酒盈缸欲令浮岚暖翠千万状
坐卧常对乎轩窓君怀磊砢有至宝世俗不辨珉与玕策名为吏二十载青衫白首困一邦宠
荣声利不可以苟屈兮自非青云白石有深趣其气兀硜何由降丈夫壮节似君少嗟我欲说

安得巨笔如长杠

紫石屏歌寄苏子美 欧阳修

月从海底来行上天东南正当天中时下照千尺潭潭心无风月不动倒影射入紫石岩月光水洁石莹净感此阴魄来中潜自从月入此石中天有两耀分为三清光万古不磨灭天地至宝难藏緘天公呼雷公夜持巨斧隳崭岩隳此一片落千仞皎然寒镜在玉奁虾蟆白兔走天上空留桂影犹杉杉景山得之惜不得赠我意与千金兼白云每到月满时石在暗室光出檐大哉天地间万怪难悉谈嗟予不度量每事思穷探欲将两耳目所及而与造化争毫纖煌煌三辰行日月尤尊严若令下与物为比【去声】扰扰万类将谁瞻不然此石竟何物有口欲说嗟如钳吾奇苏子胸罗列万象中包含不惟胸寬胆亦大屡出言语惊愚凡自吾得此石未见苏子心怀慙不经老匠先指汝有手谁敢施镌鑿呼工画石持寄似幸子留意其无谦

山鸟 梅尧臣

婆饼焦儿不食尔父向何之尔母山头化为石山头化石可祭何遂作微禽啼不息

送抚州通判袁世弼寺丞 梅尧臣

帆疏疏纖绿蒲二十四幅轻江湖高秋逆水上天去朝过 一步暮濡须长风沙头问鲤鱼大孤山侧鸣寒鸟鱼腹无书报家信凭乌为到西山区西山松栢应更好及取之官来拜扫

永叔月石砚屏歌 苏舜钦

日月行上天下照万物根向之生荣背则死故为万物生死门东西两交征昼夜不暂停胡为号山石留此皎月痕常存桂树散疎阴有若图昼成永叔得之不能晓作歌使我穷其源且疑月入此石中分此两曜三处明或云蟾【一作兔】蜍好溪山逃遁出月不可闕浮波穴石恣所乐常娥孤坐初不觉玉杵夜无声无物来捣药常娥惊推轮下天自寻捉绕地掀江踏山岳二物惊奔不复见留比玉轮之迹在青壁风雨不可剥此说亦诡异予知未精确物有无情自相感不间幽微与高邈老蚌吸月月降胎水犀望星星入角形霞烁石变灵砂白虹贯岩生美璞此乃西山石人为月照着岁久光不灭遂有团圆月寒辉笼笼出轻雾坐对不复嗟残缺虾蟆从汝恶觜吻可能食此清光没玉川子若在见必喜不彻此虽石中时有灵光发土怪山鬼不敢近照之僵仆肝脑裂有如君上明下烛万类无遁形光艳百世无亏盈

荒田行 刘敞

大农弃田避征役小农挈家就兵籍良田茫茫少耕者秋来雨止生荆棘县官募兵有着令募兵如率官有庆从今无复官劝农还逐鱼盐作亡命

桃源行 王安石

望夷宫中鹿为马秦人半死长城下避世不独商山翁亦有桃源种桃者此来种桃经几春采花食实枝为薪儿孙生长与世隔虽有父子无君臣渔郎漾舟迷远近花间相见惊相问世上那知古有秦山中岂料今为晋闻道长安吹战尘春风回首一霑巾重华一去宁复得天下纷纷经几秦

食黍行 王安石

周公兄弟相杀戮李斯父子夷三族富贵常多患祸婴贫贱亦复难为情自随衣食南与北至亲安能常在侧谓言黍熟同一炊歛见陇上黄离离游人中道勿不返从此食黍还心悲

杜甫画像 王安石

吾观少陵诗谓与元气侔力能排天斡九地壮颜毅色不可求浩荡八极中生物岂不稠丑妍巨细千万殊竟莫见何以雕镌惜哉命之穷颠倒不见收青衫老更斥饿走半九州瘦妻僵前子仆后攘攘盗贼森戈矛吟哦当此时不废朝廷忧尝愿天子圣大臣各伊周宁令吾庐独破受冻死不忍四海赤子寒飕飕伤屯悼屈止一身嗟时之人我所羞所以见公像再拜涕泗流推公之心古亦少愿起公死从之游

题灯 陈烈

富家一椀灯太仓一粒粟贫家一椀灯父子相聚哭风流太守知不知惟恨笙歌无妙曲

鞠歌行 张载

鞠歌明然兮邈余乐之不犹宵耿耿其尚寐日孜孜焉继予乎厥修并行恻兮王收曰曷贾不售兮阻德音其幽幽述空文以继志兮庶感通乎来古摩昔为之纯英兮又申申其以告鼓弗跃兮麾弗前千五百年寥哉寂焉谓天实为兮则吾岂敢惟审已兮干干

君子行 张载

君子防未然见几天地先开物象未形弭灾忧患前公旦立无方不恤流言喧将圣见乱人天厌惩孤偏窃攘岂予思 李安足论

上书行 刘敞

仕不至二千石贾不至五百万此事夸者忧而非志士叹君不见下邳少年受书起幄中运筹制千里功成不受二万户拂衣归从赤松子君不见计倪半策诛强吴鸱夷扁舟浮五湖三致

千金不自擅至今籍籍宗陶朱大贤富贵不为已心事邈与常人殊逢时致身如反乎云蒸龙变无时无君勿爱上书献赋称贤豪刺绣倚市相矜高丈夫昔曾笑徒劳商贾旦旦争锥刀

茂陵徐生歌 刘 攽

茂陵徐生老且迂一心区区长信书拜章北阙三待报意欲霍氏安无虞那知世主心不同积恶未极难为功徙薪曲突事不尔壮侯几人当受封高岸为谷丘渊移鲁酒之薄邯鄲围人生快已各以时旧意望君君不思

熙州行 刘 攽

自胡请盟供贡职關西二纪剽兵革胡人岁来受金帛地虽国本胡不惜帝家将军勇无敌谋如转圜心匪席精诚动天天不隔凿空借筹皆硕画贾生属国试五饵买臣朔方发十策偏师倏然尽西海一月三捷犹余力百蛮解辫慕冠带五郡扫地开城壁葱岭陂陁蒲类深回笑秦并与禹绩尚书论功易等差御史行封自明白武功勋爵十万金彻侯印组丈二尺奋行过望理自尔少从进熟来无极忆昔汉武开西域天下骚然苦征役哀痛轮台置肥美割弃造阳损斗僻岂知洮河宜种稻此去凉州皆白麦女桑被野水泉甘吴儿力耕秦妇织行子虽为万里程屋人坐盈九年食熙州欢娱军事息天王圣明丞相直

江南曲 沈 括

新秋拂水无行迹夜夜随潮过江北西风卷雨上半天渡口微凉含晚碧城头鼓响月脚垂天际笼烟鎖山色高楼索莫临长陌黄竹一声无北客时平田苦少人耕唯有芦花满江白

织妇怨 文 同

掷梭两肘倦踏籥双足趼三日不住织一疋才可剪织处畏风日剪时审刀尺皆言边幅好自爱经纬密昨朝持入库何事监官怒大字雕印文浓和油墨污父母抱归舍抛下中门下相看各无语泪迸若倾泻质钱解衣服买丝添上轴不敢辄下机连宵停火烛当须了租赋岂暇恤襦袴前知寒切骨甘心扇飧露里胥踞门限叫骂嗔纳晚安得织妇心变作监官眼

自君之出矣 文 同

自君之出矣吊影度晨夕中门一步地未省有行迹闺闼足仪检常恐犯绳尺欲寄锦字书知谁者云的

五原行 文 同

云萧萧草摇落风吹黄沙昏寂寞胡儿满窟卧寒日卓旗系马人一匹夜来烽火连篝起银鹖

呼兵捷如鬼齐集弓刀上陇行犬噪狐嗥绕空垒 人钞暴为常事见敌不争收若雨自高声
势叙边功岁岁年年皆一同将军玩寇五原上朝廷不知但推赏

法惠寺横翠阁 苏轼

朝见吴山横暮见吴山从吴山故多态转侧为君容幽人起朱阁空洞更无物惟有千步冈东
西作帘额春来故国归无期人言悲秋春更悲已泛平湖思淮锦更看横翠忆峩厓雕栏能得
几时好不独凭栏人易老百年兴衰更堪哀悬知草莽化池台游人寻我旧游处但覓吴山横
处来

于潜僧绿筠轩 苏轼

可使食无肉不可使居无竹无肉令人瘦无竹令人俗人瘦尚可肥俗士不可医傍人笑此言
似高还似痴若对此君仍大嚼世间那有扬州鹤

河复 苏轼

熙宁十年秋河决澶渊注钜野入淮泗自澶魏以北皆絶流而齐楚大被其害彭门城下水二
丈八尺七十余日不退吏民疲于守御十月十三日澶州大风终日既止而河流一枝已复故
道闻之喜甚庶几可塞乎乃作河复诗歌之道路以致民怨而迎神休葢守土者之志也

君不见西汉元光元封间河决瓠子二十年钜野东倾淮泗满楚人恣食黄河鱣万里沙回封
禅罢初遣越巫沈白马河公未许人力穷薪刍万计随流下吾君仁圣如帝尧百神受职河神
骄帝遣风师下约东北流夜起澶州桥东风吹冻收微绿神功不用淇园竹楚人种麦满河淤
仰看浮槎栖古木

禽言二首 苏轼

南山昨夜雨西溪不可渡溪边布谷儿劝我脱破袴不辞脱袴溪水寒水中照见催租瘢【土
人为布谷为脱却破袴】

姑恶姑恶姑不恶妾命薄君不见东海孝妇死作三年干不如广汉庞姑去却还【姑恶水鸟
也俗云妇以姑虐死故其声云】

书王定国所藏烟江疊嶂图 苏轼

江上愁心千疊山浮空积翠如云烟烟耶云耶远莫知烟空云散山依然但见两崖苍苍暗絶
谷中有百道飞来泉紫林络石隐复见下赴谷口为平川川平山开林麓断小桥野店依山前
行人稍度乔木外渔舟一叶江吞天使君何从得此本防缀毫末分清妍不知人间何处有此

景径欲往置二顷田君不看武昌樊石幽絕处东坡先生留五年春风摇江天漠漠暮云卷雨
山娟娟丹枫翻鵙伴水宿长松落雪惊昼眠桃花流水在入世武陵岂必皆神仙江山清空我
尘土虽有去路寻无缘还君此画三叹息山中故人应有招我归来篇

书晁说之考牧图后 苏轼

我昔在田间但知羊与牛川平牛背稳如驾百斛舟舟行无人岸自移我坐读书牛不知前有
百尾羊听我鞭声如鼓鼙我鞭不妄发视其后者而鞭之泽中草木长草长病牛羊寻山跨坑
谷腾趯筋骨强烟蓑雨笠长林下老去而今空见画世间马耳射东风悔不长作多牛翁

鹤叹 苏轼

园中有鹤驯可呼我欲呼之立坐隅鹤有顏色侧睨余岂欲臆对如鵬乎我生如寄良琦孤三
尺长颈阁瘦躯俛啄少许便有余何至以身为子娱驱之上堂立斯须投以饼餌视若无嚙然
长鸣乃下趋难进易退我不如

荔枝叹 苏轼

十里一置飞尘灰五里一候兵火催填坑赴谷相枕藉知是荔枝龙眼来飞车跨山鹄横海风
枝露叶如新采宫中美人一破顏惊尘溅血留千载永元荔枝来交州天宝岁贡取之涪至今
欲食林甫肉无人举觴酹伯游我愿天公怜赤子莫生尤物为癰疽君不见武夷溪边粟粒芽
前丁后蔡相笼加争先取宠称入贡今年鬪品充官茶吾君所乏岂在此致养口体何陋耶洛
阳相君忠孝家近时亦进姚黄花

东方书生行 苏辙

东方书生多愚鲁闭门读书口生土防中白首抱遗经自信此书传父祖辟雍新说从上公策
除仆射酬元功太常弟子不知数日夜吟讽如寒虫四方窥覩不能得一卷百金犹复惜康成
穎達弃尘灰老聃瞿昙更出入旧书句句传先师中途欲弃还自疑东隣小儿识机防半年外
舍无不知乘轻策肥正年少齿疎唇腐真堪笑是非得失付它年眼前且买先腾蹕

和谢定征南謡 黄庭坚

传闻交州初陆梁东连五溪西氏 军行不断蛮标盾谋主皆收汉叛亡合浦谿门腥血沸晋
兴城下白骨荒谋臣异时坐致寇守臣今日愧包桑已遣戈船下漓水更分楼船浮豫章颇闻
师出三鵙踏尽是中屯六郡良汉南食麦如食玉湖南驱人如驱羊营平请谷三百万祁连引
兵九千里少府私钱不敢知大农计岁今余几土兵蕃马貔虎同蝮蛇毒草篁竹中未论刳粟
捐金费直思瘴疠连营空我思荆州李太守欲募蛮夷今自攻至今民歌尹杀我州郡择人诚
见功张乔祝良不难得谁借前箸开天聪诏书哀痛言语切为民一洗横尸血摧锋防坚赏万

戸塹山堙谷穷三穴南平旧时颇臣顺欲献封疆请旄节庙谋犹计病中原岂知一朝更屠灭
天道从来不争胜功臣好为可喜说交州鸡肋安足贪汉开九郡劳臣监吕喜不肯佩银印征
侧持戈敌百男君不见往年濒海未郡县赵佗闭闕罢朝献老翁窃帝聊自娱白头抱孙思事
汉孝文亲遣劳苦书稽首请去黄屋车得一忘十终不忍太宗之仁千古无

以团茶洮州绿石研赠无咎文潜 黄庭坚

晁子智囊可以括四海张子笔端可以回万牛自我得二士意气倾九州道山延阁委竹帛清
都太微望冕旒贝宫胎寒防明月天网下罩一日收此地要须无不有紫皇放问富春秋晁无
咎赠君越侯所贡苍玉璧可烹玉麈试春色浇君胸中过秦论斟酌古今来活国张文潜赠君
洮州绿石含风漪能淬笔锋利如锥请书元祐开皇极第入思齐访落诗

赠送张叔和 黄庭坚

张侯温如邹子律能令隐谷黍生春有齐先君之孝女十年择对无可人箕箒扫公堂上尘家
风孝友故相亲庙中时荐南涧苹儿女衣袴得补纫两家俱为白头计察公与人意甚真吏能
束防老奸手要使鰥寡无颺呻但回此光还照已平生倦学皆日新我提养生之四印君家所
有更赠君百战百胜不如一忍万言万当不如一默无可简择眼界平不藏秋毫心地直我肱
三折得此医自觉两踵生光辉团蒲日静鸟吟时鑪薰一炷试观之

平南謡 杨蟠

海南山似刀溪恶如发弩溪山毒烟中人骨水有蛟唇陆豺虎蛮人傜贼行苦飞纵火劫民杀
官府溪中之水涨赤血山头积尸变成土经年鬪战兵已穷磔将屠城不可数官家发军救死
国万里欢喜得时雨诛擒凶党功德高海水一清奏歌舞山非无险水非无阻有地不城城亦
不武将民赤肉致戈防口不能言心自苦

打麦 张舜民

打麦打麦彭彭魄魄声在山南应山北五月太阳出东北才离海峤麦尚青转到天心麦已熟
鹄旦催人夜不眠竹鸡呼雨云如墨大妇腰鎌出小妇具筐逐上垅先捋青下垅已成束田家
以苦乃为乐敢惮头枯面焦黑贵人荐庙已尝新酒醴雍容防所亲曲终厌饫劳僮仆岂信田
家未入唇尽将精好输公赋次把斗升求市人麦秋正急又秧禾丰岁自少凶岁多田家辛苦
可奈何将此打麦词兼作插禾歌

勿去草 杨杰

勿去草草无恶若比世俗俗浮薄君不见长安公卿家公卿盛时客如麻公卿去后门无车唯
有芳草年年加又不见千里万里江湖濱触目凄凄无故人唯有芳草随车轮一日还旧居门

前草先除草于主人实无负主人于草宜何如勿去草草无恶若比世俗俗浮薄

妾薄命 陈师道

主家十二楼一身当三千古来妾薄命事主不尽年起舞为主寿相送南阳阡忍着主衣裳为人作春妍有声当彻天有泪当彻泉死者恐无知妾身长自怜

古墨行 陈师道

晁无斫有李墨半丸云裕陵故物也往于秦少游家见李墨不为文理质如金石亦裕陵所赐王平甫所藏者潘谷见之再拜云真廷珪所作也世惟王四学士有之与此为二矣嗟乎世不乏奇乏识者耳敬为长句率无斫同作

秦郎百好俱第一墨丸如漆姿如石巧作松身与镜面借美于外非良质潘翁拜跪摩老眼一生再见三叹息了知至鉴无遁形王家旧物秦家得君今所有亦其亚伯仲小低犹子侄黄金白璧孰不有古锦句囊聊可敌睿思殿里春夜半灯火防残歌舞散自书细字答边臣万里风尘入长算初闻桥山送弓劒宁知玉盃人间见夜光炎炎冲斗牛防有太史占星变人生尤物不必有时一过自惊老丑念子何忍遽磨研少待须防图不朽明窓净几风日暖有愁万斛才八斗径须脱帽管城公小试玉堂挥翰手

宋文鉴卷十三

卷十四

钦定四库全书

宋文鉴卷十四

宋吕祖谦编

诗

乐府歌行【杂言附】

劳歌 张耒

暑天三月元无雨云头不合惟飞土深堂无人午睡余欲动身先汗如雨忽怜长街负重民筋骸长轂十石弩半衲遮背是生涯以力受金饱儿女人家牛马系高木惜恐牛马驱犯炎酷天工作民良久难谁知不如牛马福

江南曲 张耒

江蒲芽白江水绿江头花开自幽淑人家晨炊欲熟时旋去网鱼惟所欲往来送租只用船未省沙泥曾污足有钱买酒醉邻畔终日数口常在目不学长安贵公卿每遣离心寄朱轂朝游岩廊暮海岛谴人未归身自逐

牧牛儿 张耒

牧牛儿远陂牧远陂牧牛芳草绿儿怒掉鞭牛不触涧边柳古南风清麦深蔽目田野平鸟犍砺角逐草行老防卧噍饥不鸣犊儿跳梁没草去隔林应母时一声老翁念儿自携饷出门先上岗头望日斜风雨湿蓑衣拍手唱歌寻伴归远村放牧风日薄近村牧牛泥水恶珠玑燕赵儿不知儿生但知牛背乐

孙彦古画风雨山水歌 张耒

山深岩高石壁青白日忽变天晦 黑风驱云走不停惊电疾雨来如倾山前雨防大如手山下水涌危槎横崩崖古树老有灵吼怒直与风云争枝披叶偃鬬不怯万窍却欲藏雷霆鞭疾驱者谁子石路崦涩驴凌兢目迷心慑愈走愈不及来憩树下如寒 苍茫直与鬼神接恍惚不保龙蛇惊平居此乐忽入眼孙家古图才可辨奈何一幅一尺余欲夺天地之奇变我心爱之良有以昔若山行亲遇此一生两足不下堂输尔朱门贵公子

于湖曲 张耒

芜湖令寄示温庭筠湖阴曲其序乃云晋王敦反屯于湖阴帝微行至其营敦梦日绕之觉而追不及故乐府有湖阴曲按晋地志有于湖而无湖阴本记云敦屯于湖又曰帝至于湖阴察营垒而去予顷游芜湖问父老湖阴所在皆莫知之也然则帝至于湖当为断句乃作于湖曲以遗之使正其是非云

武昌云旗蔽天赤夜筑于湖洗锋镝巴滇绿骏风作蹄去如灭没来不断日围万里纒孤壁虏气如霜已潜释虵矛贱士识天颜玉帐髯奴落妖魄君不见铜駝陌上尘沙起胡骑春来饮灩水浮江天马是龙儿蹙踏扬州开帝里王气高悬五百秋防兵老溲空白头石城战骨卧秋草更欲君王分上流

秋雨叹 许彦国

霖雨不出动隔旬门前秋草长于人江湖浩渺欲无岸锦石最小犹生云微阳片月何曾见只有莓苔昏笔砚田家黍穗未暇悲茅屋且为萤火飞

观易元吉獐猿图歌 秦观

参天老木相樛枝嵌空怪石御青漪两猿上下一旁挂两猿熟视苍蛙疑萧萧丛竹山风吹海棠杜宇相因依下有两獐从两儿花殄草嚼含春嬉艺老笔精湖海书推意忘形形更奇解衣一扫神扶持他日自见犹嗟咨金钱百万酒千鸕荆南将军欣得之老禅豪取橐为垂白昼掩门初许窥房栊炯炯明冬曦榛藂羽革分毫厘残编未终且归读岁暮有闲重借披

豆叶黄 晁补之

蒹葭苍豆叶黄南村不见冈北村十顷强车满箱西西家未上塲豆叶黄野离离防窟之兔入畦豕母从豚儿豕豚啼咿咿街角复街萁豆叶黄谷又熟翁媪衰铺糜粥豆叶黄叶黄不独豆白黍堪作酒瓠大枣红皱豆叶黄穰穰何膻膻腰鎌独健妇大男往何许官家散弓刀要汝杀贼去

渔家傲 晁补之

渔家人言傲城市未曾到生理自江湖那知城市道晴月七八船熙熙在清川但见笑相属不省歌何曲忽然四散归远处沧洲微或云后车载藏去无复在至老不曲躬羊裘行泽中

莲根有长丝 郭祥正

莲根有长丝不供贫女织柳梢有飞绵不暖寒者衣朝歌悠悠暮歌知下地沉沉上天远东生

白日还西流志士长怀万古愁

金山行 郭祥正

金山杳在沧溟中雪崖冰柱浮仙宫乾坤扶持自今古日月髣髴躔西东我泛灵槎出尘世搜索异境窥神工一朝登临重太息四时想像何其雄卷帘夜阁挂北斗大鲸驾浪吹长空舟摧岸断岂足数往往霹雳锤蛟龙寒蟾八月荡摇海秋光上下磨青铜鸟飞不尽暮天碧渔歌忽断芦花风蓬菜久闻未成往壮观絶致遥应同潮生潮落夜还晓物与数防谁能穷百年形影浪自苦便欲此地安微躬白云南来入我望又起归兴随征鸿

骊山歌 李 廌

君门如天深九重君王如帝坐法宫人生难处是安稳何为来此骊山中复道连云接金阙楼观隐烟横翠红林深谷暗迷八骏朝东暮西劳六龙西幸戢睂栈悲风便入华清院霓裳萧散羽衣空麋鹿来游墟市变我上朝元春半老满地落花人不扫羯鼓楼高挂夕阳长生殿古生青草可怜吴楚两醯鸡筑台未就已堪悲长杨五柞汉幸免江都楼成隋自迷由来流连多防德宴安鸩毒因奢惑三风十愆古所戒不必骊山可亡国

筑长堤 田 画

筑长堤白头荷杵随者妻背肋伛偻筋力微以手置胸路旁啼老夫七十奴与齐五尺应门生两儿夜来春雨深一犁破晓径去耕南陂南隣里正豪且强白纸大字来呼追科头跣足不得稽要与官长修长堤官长亦大贤能得使者意正堤驾轺轩不复问余事终当升诸朝自足富妻子何惜桑榆年一为官长死

丛台歌 贺 铸

累土三百尺流光二千年人生物数不得待摧颓故址秋风前武灵旧垆今安在秃树无阴困樵采玉箫金镜未消沉几见耕夫到城卖君不闻丛台全盛时绮罗成市游春辉一从雕辇闭荒草萧散行云无复归招魄想像风流在晴华露蔓犹依稀纤棘迢撩人衣禾黍晚成豺貉肥层檐壁瓦碎平地梦作鸳鸯相伴飞登临吊古将语谁城郭人民今是非指君看取故时物南有清流西翠微彷徨华表不忍去岂独辽东丁令威

五言古诗

诫儿侄八百字 范 质

昨得谢课书希于京秩之中更与迁转余以诸儿侄辈生长以来未谙外事艰难损益懵然莫因抒古诗一章晓之

去年初释褐一命列蓬丘【谓谢课】青袍春草色白纈弃如仇适防龙飞庆王泽天下流尔得六品阶无乃太为优凡登进士第四选升校讐厯官十五考叙阶与尔俦如何志未满意欲陵云游若言品位卑寄书来我求省之再三叹不觉泪盈眸吾家本寒素门地寡公侯先子有令德乐道尚优游生逢世多僻委顺信沉浮仕官不喜達吏隐同庄周积善有余庆清白为貽谋伊余秦家训孜孜务进修夙夜事勤肃言行思悔尤出门择交友防慎畏薰莸省躬常惧玷恐掇庭闱羞童年志于学不堕为箕裘二十中甲科頽尾化为虬【二十三进士及第今举全数】三十入翰苑【时三十三】步武向瀛州四十登宰辅【年四十一】貂冠侍冕旒备位行一纪将何助帝猷既非救旱雨岂是济川舟天子未遐弃日益素飡忧黄河润九里草木皆漫漶吾宗凡九人继踵升官次门内无白丁森森朱绿紫鵷行洎内职亚尹州从事府掾监省官高低皆清美悉由侥幸升不因资考至朝廷悬爵秩命之曰公器才者禄及身功者赏于世非才及非功安得专厚利寒衣内府帛饥食太仓米不蚕复不穡未尝勤四体虽然一家荣岂塞众人议颞颥十目窥龊龊千人指【曾参云十目所视古人云千人所指言可畏】借问 you 与吾如何不自媿戒尔学立身莫若先孝悌怡怡奉亲长不敢生骄易战战复兢兢造次必于是戒尔学干禄莫若勤道艺常闻诸格言学而优则仕不患人不知惟患学不至戒尔远耻辱恭则近乎礼自卑而尊人先彼而后已相防与茅鷃宜鉴诗人刺【毛诗相防刺无礼左传茅鷃刺不恭】戒尔勿放旷放旷非端士周孔垂名教齐梁尚清议南朝称八達千载秽青史戒尔勿嗜酒狂药非佳味能移谨厚性化为凶险类古今倾败者厯厯皆可记戒尔勿多言多言者众忌苟不慎枢机灾危从此始是非毁誉间适足为身累举世重交游拟结金兰契忿怨容易生风波当时起所以君子心汪汪淡如水举世好承奉昂昂增意气不知承奉者以尔为翫戏所以古人疾蘧除与威施举世重任侠【史记轻死重义曰侠】呼俗为气义为人赴急难往往防刑死所以马援书殷勤戒诸子【马援告儿孙书甚非此事】举世贱清素奉身好华侈肥马衣轻裘扬扬过闾里虽得市童怜还为识者鄙我本羁旅臣遭逢尧舜理位重才不充戚戚怀忧畏深渊与薄冰蹈之惟恐坠尔曹当悯我勿使增罪戾闭门敛踪迹缩首避名势名势不从居毕竟何足恃物盛必有衰有隆还有替速成不坚牢亟走多颠蹶灼灼园中花早发还先委迟迟涧畔松郁郁含晚翠赋命有疾徐青云难力致寄语谢诸郎躁进徒为耳

怀贤诗 王禹偁

仆直东观时阅五代史见近朝名贤立功立事者耸慕不已思欲形于謠咏而未遑今待罪上雒不与郡政专以吟讽为事业因赋怀贤诗三首仍以官氏列于篇首云

桑魏公【维翰】

魏公王佐才独力造晋室挥手廓氛霾放出扶桑日感慨防风云周旋居密勿下民得具瞻上帝賚良弼沉沉帷幄谋落落政事笔品疏遂甄别法令颇齐一防勅朝据案论兵夜造膝多士若鸳鸿官材咸有秩诸侯如狼虎请谒尽股栗秉钧多事朝绰绰有纪律远将留侯比近以赞皇正志在混车书誓将阐儒术皇天未厌乱运去何飈歟高祖猷寰区少帝无始卒老成既疏远羣小相亲昵读武兵渐骄倒悬人不恤和亲絶强虜谋帅用悍卒魏公在藩垣上疏论得失七事若丹青辞切痛人骨忠言殊不省直道果见屈铁马从北来烟尘昼蓬勃穹庐易市朝左

枉杂纓纓主辱臣不死囚縛自安逸唯公獨遇害身殒名不沒惜乎英偉才濟世功未必一讀
晉朝史遺恨空郁郁子孫亦不振天道難致詰

李兵部【濤】

有唐張曲江盛名何暉 請誅安祿山先覺不見納胡維有反相其事遠相接賢人何代無
史聊可獵兵部事晉朝文學中甲科強臣方防扈朝士多恆怯獨持尚方劒願斬犇鯨鬣堂
張彥澤反勢凌閭闔邦章請顯戮直氣不可壓三進叩玉墀植笏立莫英皇情彌慰撫清問
應答給焉念小恩曾不顧大業高吟歸去詩潺湲淚承睫旋踵即亂華有同虞不腊張公領鐵
馬朝市胡塵合利謁甚閑詳辭氣殊不懼虎狼不敢害加禮為下榻當年棄謫謫異代居調燮
相位席不暖帝澤安可治斯人既淪亡此風亦蕭防滑稽何足累大節世已乏安用學腐儒
屹守禮法

王樞密【朴】

西樞經緯才慷慨遇真主文學中甲科風雲參霸府直躬在密勿未始畏強御凭案讀古書箕
踞視太祖澤欲浸生民化將遠遂古拆寺遇武宗排佛如韓愈盡發郡苾蒭使之藝禾黍兵威
遂強盛人力不耗蠹世宗征淮甸委任當留務馬前拜侯伯堦下列榘斧叱咤氣生風將校汗
如雨手筑太平基胼胝不輟杵具瞻人有望衰運時不與修短天難忱殲奪民何怙恩深與小
斂抚綽甚悲沮云亡復殄瘁前哲非虛語世豈乏賢良材難具文武歷象過羲和文章敵燕許
可能推眾人 冀歸尘土子孫雖眾多必復事未覩誰銘遷客詩高揭王公墓

五哀詩 王禹偁

予讀杜工部八哀詩唯鄭廣文蘇司業名位僅不顯者余多將相大臣立功垂裕無所哀矣噫
子美之詩蓋取人之云亡邦國殄瘁而已非哀乎時也有未列于此者待同志而嗣之云

故尚書兵部侍郎琅邪王公【祐】

琅邪名父子少孤起徒步贊謁桑魏公藻鑑非易與撫頂以嘆惜王楊許為伍諸侯取為官佐
幕大名府主帥杜重威功大心防扈天驥被繫維神 罹網罟六師薄孤垒三面開生路主人
既釋放賓筵因詿誤逼脅本非辜貶謫尋不赴折腰紆墨綬榻翼以未舉梁竦听州縣長卿有
辭賦里行旌邑政柱史登朝序枹彈志不樂潤色身有素錦窠應列防星垣吟藥樹丹青生帝
典金玉鏗王度東觀秉直筆南宮司貢部時英萃門下藹藹騰嘉譽鵬掀六月風豹蔚七日霧
多才同列忌疾惡奸人怒排斥屢專城織羅仍典午名官頗流離衣食常貧窶文明起代邸振
防非不遇紫微雖正拜白髮已迟暮史魚直有遺軀也剛不吐非才占清列志欲投兕虎英俊
在草萊力能生翹羽毀譽兩无私華袞閑蕭斧掌選循故實尹京耻鉅名位僅三事疾疢嬰
二豎告滿拜貳卿君恩慰沉痾終見哲人萎蕭蕭空垆墓鯉庭有令嗣鳳閣登仙署兩制列門
生九原應自許蒼蒼猶足信吾道似有訴余庆在子孫明明深可据

故尚书虞部员外郎知制诰贬莱州司马渤海高公【锡】

文自咸通后流散不复雅因仍历五代秉笔多豔冶高公在紫微滥觞诱学者自此遂彬彬不荡亦不野惜哉伤躁进忤防出閣下吾君登大宝兑泽连 洒均阳又淮阳移徙曾不暇遂无牵复命虚偶文明化何路得自新賫志入长夜人谓责太深终于郡司马

故殿中侍御史荥阳郑公【起】

柱史有名迹清才自天纵运思庆云合落笔醴泉涌歌诗与文赋铮铮人口讽扬袂入泽宫鹄心一箭中恃才善戏謔负气好侮防大志有谁知细行乖自讼小諫事世宗惕惕佩光宠太祖方厯试握兵权已重上书范鲁公先见不能用厯数不在周讴谣卒归宋汗漫失屠龙接輿遂譌鳳行荷伯伦锺高卧毕卓瓮神德不为嫌优待台宪俸晚求万泉令吏隐官资冗一旦随朝露识者弥哀痛无子副家声身世若一梦文编多散失人口时传诵空持一器酒何处浇孤冢

故国子博士郭公【忠恕】

汾阳饱经术赋性甚坦率在昔举神童广阳推杰出尚书诵在口何论落日笔【公应举时口念尚书手寫谕语】总角取科名弱冠纓纓早佐襄阴幕汉鼎入周室矢志罢屠龙佯狂遂扞虱周行亦僂俛吏隐多放逸滑稽东方朔图画王摩诘古文识蝌蚪奥学辩萍实字穷苍颉本篆证阳冰失王绩醉为卿伯伦居无足俸钱乏一囊官路从三黜朱衣多不着白发仍慵栢渐老羈旅年方见升平日忽以伎术召此意殊郁郁放口忤无须何门求造膝遁逃终见捕遣逐道中卒遗孤落闾阎荒塚鸣蟋蟀手泽渐难求谁家耀箱帙投吊焚此诗九原应有物

故太子中允知洛阳县事颍公【贇】

洛阳富文彩峭防四子流提笔入广場辞气干斗牛擢第在芸阁言事触冕旒在降宰百里道胜心无忧才高耻吏役放荡不捡修起应贤良科下笔不见休青官尚淹恤寺县且优游轻才粪土贱高义云天浮悬磬任贫窶盈樽长献醕知己彼何人鳳阁与鰲头推挽终不起壮志将焉收晚年圯桥役關市良可羞忽焉为异物寒草封一丘孀 应冻饿交友谁寻求遗孙方稚齿爽秀已迢迢皇天若有凭必使光貽谋

橄榄 王禹偁

江东多果实橄榄称珍奇北人将就酒食之先顰睂皮核苦且澁厯口后弃遗良叟有回味始觉甘如飴我今何所喻喻彼忠臣辞直道逆君耳斥退投天涯世乱思其言噬脐焉能追寄语采诗者无轻橄榄词

劝学篇 张咏

大化不自言委之在英才 门非有闭苦学当自开世上百代名莫遣寒如灰晨鸡固自勉男子胡为哉胸中一片地无使容纖埃海鸥尚可狎人世何嫌猜勤慎君子职颜闵如琼瑰刻薄小人事斯辈直可哀放荡功不遂满盈身亦灾将心虽内疚祸福本无媒

悼蜀诗四十韵 张咏

至道纪号元祀春正月为审官院考绩引对天子曰天厌西蜀岁荐饥饉任失其人枉政残剥民兴恶作孽授命虎旅殄灭凶逆矧彼黔首不聊其生观人安民朕意罔怠寬则育奸猛则残俗得夫济者实难其人尔惟方直歷政有续叩夔幽遐往理其俗克畏克爱汝其钦哉祇奉命乘轂西征夏四月二十有八日供厥职噫谋术庸陋罔敢怠忽豪猾抑之赋斂乃息存恤穷困招绥流亡杜厥剥削宣扬皇风闲一岁而民弗克安非郡县之罪偏将之罪也有听者孰不知民心上畏王师之剽掠下畏草孽之强暴乎良家困 渐复从贼庶賒其死深可忿也天子远九重孤贱者憚权豪而不敢言呜呼虽采诗之官阙之从矣然謠咏讽刺亦不可寂然咏敢作悼蜀古诗四十韵书于视政之防有识君子幸勿以狂瞽为罪

蜀国富且庶风俗矜浮薄奢僭极珠具狂佚务娱乐虹桥吐飞泉烟柳闭朱阁烛影逐星沉歌声和月落鬪鸡破百万呼卢纵犬噉游女白玉珰骄马黄金络酒肆夜不扃花市春慙作禾稼暮云连纨绣淑气错熙熙三十年光景倏如昨天道本害盈侈极祸必作当时布政者罔思救民瘼不能宣淳化移风复俭约情性非方直多为声色着从欲窃虚誉随俗纵贪攫蚕食生灵饥作威恣暴虐佞罔天子听所利唯剥削一方忿恨兴千里攘臂跃火气烘寒空雪彩挥莲萼无人能却敌何假施击柝害物黷货辈皆为白刃烁瓦砾积台榭荆棘迷城郭里第锁苔芜庭轩喧燕雀斗粟金帛市束刍罗绮博悲夫骄奢民不能饱葵藿朝廷金元戎帅师荡凶恶虎旅一以至梟巢一何弱燎毛焰晶荧破作锋熠燿兵骄不可戢杀人如戏謔悼耄皆丽誅玉石何所度未能翦强暴争先谋剽掠良民生计空賒死心殒获四野起豺狼五亩孰耕凿出师不以律余孽何由却俾夫炽蜂蛰寡术能笼络边陲未肃清胡颜食天爵世方尚奔兢谁复振蹇蹇黄屋远万里九重高寥廓时称多英雄才岂无衛霍近闻命良臣拭目观奇略

赴郡之初寻属愆亢有司举旧典取湫水征巫覡以致祷而涉旬靡应农事方急遣罢去越翊日

渐获优洽 刘筠

优诏将州任视政才旬时田峻诉炎暎坐虞多稼萎云将掉头去波臣涸辙危行部殊未及随车杳难期往慙神父化【鲍德守南阳时多荒灾唯此郡丰穰吏民爱悦号为神父】今取旱母嗤【萧雅所信必赤地大旱人号为旱母】诸曹白事者雩典举旧规郡北岐棘山上有三湫池衙吏絜齐往汲水置缥瓷朝服领巫覡诘旦迓诸岐承以结防輿奉于五龙祠自是率宾介寅午欵于斯纷敷荐楮镪浸渍洒杨枝瓦鑪松香钝瓢樽黍酌醺四壁绘神变正筵塑灵仪悒若叶公牖怪甚葛仙陂老覡十数辈勃屑头如魃童巫及伶倡貌寝语喽囁但多嚙盎质曾乏婉娈姿交手操铃拂合噪屡傲傲喧尘着逢发秽汴落粉頤一闻且一呕掩鼻以撝睂隋蔚

朝待族败革震散之巽飘暮欲息穹竹呼复来慢黥固已甚诞妄相冯随如是者浹日仅得沾服滋嗟予政无状百拜胡敢辞矧夫民习俗姑用慰赍咨抑闻古人言天墓入无私神道贵得一何乃托邪师遽俾送湫勺撤役勤茧丝申明恤刑诏挺重舍轻疑从此四三日油霈洽封圻又闻尧汤世水旱軫君慈存救自有术敛散适所宜元元无菜色九载尚熙熙周礼地官职皇舞虽有祈道经涖天下伤民诚弗为惟神稟聪正远鬼务肃祗愿守有常德可戒兴妖思

寄岳阳刘从事 韩 丕

秋来忆故人寓目临大野远近闻清商依稀奏幽雅经霜树半红无风叶自下一片洞庭心聊凭塞鸿写

温泉诗 钱 易

悲哉天宝时帝毫不修宠幸尊妇人阴极阳已柔外戚盛本枝栻比封列侯丞相大将军备位甚悠悠天下安既从积渐力不周车服金玉焕黎庶饥寒愁骊山温泉宫画幸与夜游一游百司备万费一日体谁能心自快化作社稷忧国忠咨吞噬材甫怀奸偷胡雏据太原钟鼓无许收黄尘满长安惨黥九庙羞唐天未使絶返正知疾瘳自兹游赏地荆棘生荒秋旧物悉已废蜘蛛挂重楼览者咸寒心一过三迴头因知帝王业坚固宣鸿猷岂可信嗜欲侮防生疮疣雕墙峻宇诚简牘况有由翻思黍离章续之应可仇

夏日山居诗 种 放

阴阴林木静寂寂无人境红绽紫葳香岚沈玉膏冷看云时独生慎事常中省何客驭风来新篁动疎影

谕蒙诗 种 放

大盈卑百渎自成浮天浚崇丘下累块竟为蔽日深王者在谦小夙惟尧禹心拜言尊贤仁慎德弃珠金自满九族散匪骄百善寻炳兹夏商鉴灭国因夸淫

宋文鉴卷十四

卷十五

钦定四库全书

宋文鉴卷十五

宋 吕祖谦 编

五言古诗

新居感咏 杜 衍

无似老且病唯恐归田迟一旦得引年九天还聽卑尚霑二品禄俾尽百年期恩深沦骨髓感极横涕洟始营菟裘地来向濉水湄城隅最穷僻匠者寧求竒卜筑悉由已轩牖亦随宜外以庇风雨内以安妻儿鷺雀莫羣噪鷓鴣才一枝因念古圣贤名爲千古垂何尝广居室俭爲后人师亚圣乐簞食寢丘无立锥文终防势夺景栢耻家爲文园四壁立郑公小殿移伊余具员者适防承平时无术昆万务无才抚四夷爲郡亦齷齪劳心徒孜孜保身已天幸抚已宜自知开卷顔间厚复惧来者嗤勗哉知止足清白犹可追

幽居即事 杜 衍

寂寂复寂寂告老闲居日径草高于人林鸟熟如客黄卷不释手清风常满室内顾平生心无过此时适

和王校勘中夏东园 晏 殊

东园何所乐所乐非尘事野竹乱无行幽花晚多思闲窥鱼尾赤暗辨蜂腰细树影密遮林藤稍狂冒袂潘蔬足登膳陶秫经取醉幸获我汝交都忘今昔世欢言捧瑶佩愿以疎麻继

列子有力命王充论衡有命禄极言必定之数览

之有感 晏 殊

大钧播羣物零茂归自然默定既有初不爲智力迁御寇导其流仲任派其源智愚信自我通塞当由天 世曰臯伊迷邦有顔原吾道诚一防彼途钟百端卷之入織毫舒之盈入埏进退得其宜夸荣非所先朝闻夕可陨吾奉圣师言

赠刘潜归陶丘 石延年

丈夫未大用身与仁义闲可宜更聚防风尘摧其顔君今归柯泽路出梁宋间梁宋有吾庐亲老待我还矧复君先归因君头应斑春老有时回人老不再少草自有时荣发白不再好人生不如春发生不如草可堪送别春草前青春未老人先老

鄱阳酬泉州曹使君见寄 范仲淹

吾生岂不幸所禀多刚肠身甘一枝巢心苦千仞翔志意苟天命富贵非我望立谭万乘前肝竭防无浆意君成大舜千古闻羶香寸懷如春风思与天下芳片玉弃且在双足何辞伤王章死于汉韩愈逐诸唐狱中与岭外妻子不得将义士抚卷起眦血一霑裳胡弗学揭厉胡弗随低昂于时宴安人灭然已不扬匹夫虎敢鬪女子熊能当况彼二长者乌肯巧如簧我爱古人节皎皎明于霜今日贬江徼多慙韩与王罪大祸不称所损伤纖芒尽室来官下君恩大难忘酒圣无隐量诗豪有余章秋来魏公亭金菊何煌煌登高发秘思聊以摅吾狂卓有梅圣俞作邑郡之防矫首赋虚乌拟彼歌沧浪因成答爲戲移以赠名郎泉南曹使君诗源万里长复我百余言疑登孔子堂闻之金石音纯纯自宫商念此孤鸣鹤声应来遠方相期养心气弥天浩无疆铺之被万物照之谐三光此道固迂阔陶潜吾醉乡

四民诗 范仲淹

前王诏多士咸以德爲先道从仁义广名由忠孝全美禄报尔功好爵縻尔贤黜陟金鉴下昭昭 与妍此道日以疎善恶何茫然君子不斥怨归诸命与天术者乘其隙异端千万惑天道入指掌神心出胸臆德幽不聰明言命不言德学者忽其本仕者浮于职节义爲虚言功名思苟得天下无所劝赏罰几乎息陰阳有变化其神固不测祸福有倚伏循环亦无极前圣不敢言小人尔能忆裨灶方激扬孔子甘寂默六经无光辉反如日月蚀大道岂复兴此弊何时抑未路竞驰骋浇风扬羽翼昔多松栢心今皆桃李色愿言造物者廻此天地力圣人作耒耜苍苍民乃粒国俗俭且淳人足而家给九载襄陵祸比户独安辑何人变清风骄奢日相袭制度非唐虞赋斂由呼吸伤哉桑谷人常悲大 急一夫耕几垆游惰如云集一蚕吐几丝罗绮如山入太平不自存凶荒亦何及神农与后稷有灵应爲泣

先王教百工作爲天下器周旦意不朽刊之攷工记嗟嗟遠圣人制度日以纷窈窕阿房宫万态横青云荧煌甲乙帐一朝那肯焚秦汉骄心起陈隋益其侈鼓舞天下风滔滔弗能止可堪佛老徒不取慈俭书竭我百家产崇尔一室居四海竟如此金碧照万里茅茨帝者荣今爲庶人耻宜哉老成言欲擺般输指尝闻商者云转货頼斯民遠近日中含有无天下均上以利吾国下以藩吾身周官有常籍岂云逐末人天意亦何事狼虎生贪秦经界变阡陌吾商苦悲辛四民无常籍茫茫僞与眞游者窃吾利惰者乱吾伦淳源一以荡頽波浩无津可堪贵与富侈恣日日新万里奉绮罗九陌资埃尘穷山无遗寶竭海无遗珍鬼神爲之劳天地爲之贫此已千载千载犹因循桑柘不成林荆棘有余春吾商则何罪君子耻爲隣上有尧舜主下有周召臣琴瑟愿更张使我歌良辰何日用斯言皇天岂不仁

画锦堂 韩琦

古人之富贵归于本郡县譬若衣锦游白昼自光绚不则如夜行虽丽胡由见事累载方册今复着俚谚或纒太守章或拥使者传歌樵忘故穷涤器掩前贱所得快恩仇爱恶任矫狷其志止于此土固不足美兹予来旧邦意弗在矜衒以疾而量力惧莫称方面抗表纳金节假守冀乡便帝曰其汝俞建纛往临殿行路不云非观叹溢郊甸病躯谐少休先陇遂完缮岁时存父老伏腊洁亲荐恩荣孰与偕衰劣愧独擅公余新此堂夫岂事饮燕亦非张美名轻薄詫绅弁重禄许安闲顾已常兢战庶一视题榜则念报主眷汝报能何爲进道确无倦忠义耸大节匪石乌可转虽前有鼎镬死耳誓不变丹诚难悉陈感泣对笔砚

歲晏出沐感事内讼 宋 庠

山海有完士希世无良筹偶穿东郭履遂别野人舟不耻篆刻赋来肩英俊游私智甚鳧短尘客若鸱愁備员太史氏补属富人侯姑学了官事何尝分主忧日贪斗食利歲感星躔周中都富才彦方驾若龙虬茂先善史汉平津治春秋高文用司马格五宠吾丘间阔路逢葛缤纷人召邹桑羊兴贾豎安国出縲囚汲郑贵交盛徐陈英藻適况乃天下枢雄雌来九州衣冠径复道鼓吹出长楸席上万钱箸桥边八列驹雍容绂鲁袂意气拂吳钩咨余良不韙瓴甃厠琳璆吹竽昔已滥在梁今可尤台阁魏舒被风霜苏季裘有志谢轩鹤无机防海鸥恭埃杜陵课诛茅归故畴

秋日白鹭亭向夕风晦有作 王 琪

白鹭敞西轩栋宇穷爽垞千 若联环翠色不可解是时天雨旷六幕无纖霭金斗熨秋江素练横衣带乾坤清且敛气象朝昏改芦花作雪风飞舞来沧海九霄汀鹭起万里檣乌快月上三山头鸟没横塘外苍茫洲渚寒银错星斗大开樽屏丝竹披襟向箫籁余生本江湖偃蹇欣所防清兴虽自发苦嗜亦吾累鱼龙凭夜涛四面忽滂湃安得犀灯然煌煌发水怪

水谷夜行寄子美圣俞 欧阳修

寒鸡号荒林山壁月倒挂披衣起视夜揽辔念行迈我来夏云初素节今已届高河泻长空势落九州外防风动凉襟晓气清余暖緬懷京师友文酒邈高防其间苏与梅二子可畏爱篇章富纵横声价相磨蓋子美气尤雄万窍号一噫有时肆顛狂醉墨洒霏霏譬如千里马已发不可杀盈前尽珠玑一一难拣汰梅公事清切石齿漱寒瀨作诗三十年视我犹后輩文词愈清新心意难老大譬如妖韶女老自有余态近诗尤古硬咀嚼苦难嘍初如食橄防眞味从愈在苏豪以气轹举世徒惊骇梅穷独我知古货今难卖二子双鳳凰百鸟之嘉瑞云烟一翱翔羽翮一摧铄安得相从游终日鸣啾啾问胡苦思之对酒把新蟹

读徂徠集 欧阳修

徂徠鲁东山石子居山阿鲁人之所瞻子与山蹉跎今子其死矣东山复谁过精魄已埋没文章岂能磨寿命虽不长所得固已多旧藁偶自録沧溟之一蠹其余谁付与散失存几何存之

警后世若鉴照妖魔子生诚多难忧患靡不罹【音罗】宦学三十年六经老研摩问胡所专心仁义丘与轲扬雄韩愈氏此外岂知他尤勇攻佛老 笔如挥戈不量敌众寡胆大身么麽往年遭母防泣血走岷峨垢面跣双足鋤犁事田坡至今乡里化孝悌勤蚕禾昨者来太学青衫踏朝靴陈诗颂圣德厥声续猗那羔鴈聘黄晞晞惊走隣家施爲可怪骇世俗安委蛇谤口由此起中之若飞梭上頼天子明不挂网者罗忆在太学年大雪若翻波生徒日盈门饥坐列鴈鹅弦诵聒隣里唐虞赓咏譔常续最高第騫游各名科岂止学者师谓宜国之皤夭寿反仁鄙谁尸此偏颇不知諷諷者又忍加诋诃圣贤要六遠毀譽暫誼晬生为举世疾死也鲁人嗟作诗遗鲁社祠子以爲歌

重读徂徕集 欧阳修

我欲哭石子夜开徂徕编开编未及读涕泗已涟涟勉尽三四章收泪輒忻懽切切善恶戒丁寧仁义言如闻子谈论疑子立我前乃知长世在谁谓已沉泉昔也人事乖相从常苦难今而每思子开卷子在顔我欲贵子文刻以金玉联金可烁而销玉可碎非坚不若书以纸六经皆纸传但当书百本传百以爲千或落以四夷或藏于深山待彼谤焰熄放此光芒悬人生一世中长短无百年无穷在其后万世在其先得长多几何得短未足怜惟彼不可朽名声文行然谗诬不须辩亦止百年间百年后来者憎爱不相縁公议然后出自然见螭妍孔孟困一生毀逐遭百端后世苟不公至今无圣贤所以忠义士恃此死不难当子病方革谤辞正腾喧众人皆欲杀圣主独保全已埋犹不信仅免斲其棺此事古未有每思輒长叹我欲犯众怒爲子记此冤下紆防防忿仰叫昭昭天书于苍苔石立彼崔嵬巔询求子世家恨子儿女顽经歳不见报有辞未能铨忽开子遗文使我心已寛子道自能从吾言岂须镌

获麟赠姚辟先辈 欧阳修

世已无孔子获麟意谁知我尝爲之说闻者未免非而子独曰然有如埧应箴惟麟不爲瑞其意乃可推春秋二百年文约义甚夷一从圣人没学者自爲师峥嵘众家说平地生嶮巇相防益迂怪各闢出新竒尔来千余歳举世不知迷焯哉圣人经照耀万世疑自从防众说日日遭蔽亏常患无气力扫除浮云披还其自然光万物皆见之子昔已好古此经手常持超然出众见不爲俗牵卑近又脱赋格飞黄摆銜羈圣人关大道夷路肆腾嬉便可勦众说防通蹇多岐正途趋简易慎勿事岖崎著述须待老积勤宜少时苟思垂后世大禹尚胼胝顾我今老矣两瞳蚀昏眊大书难从视心在力已衰因思少自弃今纵悔可追戒我以勉子临文但吁嘻

喜雨 欧阳修

大雨虽霏霏隔彻分清陰小雨防浸淫爲润广且深浸淫苟不止利泽何穷已无言雨大小小雨农尤喜宿麦已登实新禾未抽 及时一日雨终歳饱丰穰夜响流霖霖晨晖霁苍凉川源净如洗草木自生光童稚喜瓜芋耕夫望陂塘谁云田家苦此乐殊未央

飞蓋桥翫月 欧阳修

天形积轻清水德本虚静云收风波止始见天水性澄光与粹容上下相涵映乃于其两间皎皎挂寒镜余晖所照耀万物皆鲜莹矧夫人之虚岂不醒视听而我于此时翛然发孤咏纷昏忻洗涤俯仰恣涵泳人心旷而闲月色高愈迥惟恐清夜防时时仰斗柄

奉答子莘学士安抚江南见寄之作

欧阳修

百姓病已从一言难遽陈良医将治之必究病所因天下从无事人情贵因循优游以爲高寬纵以爲仁今日费其小皆谓不足论明日壞其大又云力难振防窥各陰拱当职自逡巡歲月隳頽纲纪遂纷纭坦坦万里疆蚩蚩九州民昔而安且富今也迫以贫疾小不加理浸淫将徧身汤剂乃常药未能去深根鍼艾有奇功暂痛勿吟呻痛定支体胖乃知鍼艾神猛寬相济理古语六经存蠹革侥幸濫官絕贪昏牧羊而去狼未爲不仁人俊乂沈下位恶去善乃伸贤愚各得职不治未之闻此说乃其要易知行每艰迟疑与果决利害反掌间舍此欲有爲吾知力徒烦家至与户到饱饥而衣寒三王所不能岂特今所难我昔忝諫列日常趋紫宸圣君尧舜心闵闵极忧勤子莘当来时玉音耳常亲上副明主意下寬斯人屯江南彼一方巨细则可询谕以上恩德当冬反阳春吾言乃其防岂止一方云

感兴二首 欧阳修

懷禄不知慙人虽不吾责贫交重意气握手犹感激煌煌腰间金两鬢飒已白有生天地间寿考非金石古人报一饭君子不苟得忧来自悲歌涕泪下沾臆仕宦希寸禄庶无饥寒迫读书爲文章本以代耕织学成颇自喜禄厚愈多责挟山以超海事有非其力君子贵量能无轻食人食

读书 欧阳修

吾生本寒儒老尚把书卷眼力虽已疲心志殊未倦正经首唐虞僞说起秦汉篇章已句读解诂及笺传是非自相攻去取在勇断初如两军交乘胜方酣战当其旗鼓催不觉人马汗至哉天下乐终日在几案念昔始从师力学希仕宦岂敢取声名惟期脱贫贱忘食日已晡燃薪夜侵旦谓言得志后便可焚笔砚少偿辛苦时惟事寝与饭歲月不我留一生今过半中间尝忝窃内外职文翰宦荣日清近廩给亦丰美人情慎所习酖毒比安宴渐迫时俗流稍稍学营办杯盘穷水陆賓客罗俊彦自从中年来人事攻百箭非惟职有忧亦自老可叹形骸苦衰病心志亦退慙前时可喜事闭眼不欲见惟寻旧读书篇简多朽断古人重温故官事幸有间乃知读书勤其乐固无限少而干禄利老用忘忧患又知物贵从至寶见百链纷華暂时好俯仰浮云防淡泊味愈长始终殊不变何时及残骸万一免罪譴买书载舟归筑室颍水岸平生颇论述铨次加防窳庶几垂后世不默死乌豢信哉蠹书鱼韩子语非訕

感事 欧阳修

空山一道士辛苦学延龄一旦随物化反言仙已成开坟见空棺谓已超青防尸解如蛇蝉换骨蜕其形既云须变化何不任死生

董永 叶清臣

董生少失母老父鰥且贫无田事耕稼客作奉晨昏朝推鹿车去大树爲庭藩农家乏甘防糠粃苟自存父死不得藏粥身奉九原人道孝爲本畎畝知所尊伤嗟世教薄至行岂足论廩禄厚妻子樛栲遗其亲靳吝一抔土因循三尺坟空令丘壑间凛凛慙英魂

悯农 叶清臣

甲子孟冬予随牒之吳郡泛舟丹阳毗陵间徐步野次周视民田其苗甚丰而谷皆秕问诸获者则曰是春无雨中夏始布秋未及实霜降而秕奔诉诸县已更季旦吏曰农田之制不是过也子姑输之虽然予卒歲不粒矣闻之有感故作是诗

五月雨未沛吾民耕固迟中秋霜早至我稼飒其萎膏泽叹苦晚芄苗惜遽衰盈畴皆秕稗卒歲误京坻国谢三年蓄人悲一顷萁编齐陈牒诉奔走失程期县籍拘彛制官征有定规劳歌不可继爲作悯农诗

县斋对雪 梅尧臣

密雪夜来积起见万物春山川忽改色草木一以新古邑失荒秽王路复平均从兹庆丰年蹈咏慙小臣

秋思 梅尧臣

梧桐在井上蟋蟀在床下物情有与无节候不相假寥寥风动叶飒飒雨堕瓦耳听心自静谁是忘懷者郭之美忽过云往河北谒欧阳永叔沈子山

梅尧臣

春风无行迹似与草木期高低新萌芽闭户我未知忽闻人叩门手把蟠桃枝问我此蟠桃縁何结子迟但笑不复答问者当自推振衣向河朔河朔人伟竒以兹不答意迟子北归时

送王判官之江陰军幕 梅尧臣

往时初渡江颇爱江南美谁知坐卧间思极烟波里絮逐魮鱼繁鼓添莼线紫君行语风物到日应相似范饶州坐中客语食河豚鱼 梅尧臣

春洲生荻芽春岸飞杨花河豚当是时贵不数鱼虾其状已可怪其毒亦莫加忿腹若封豕怒目犹吳蛙庖煎苟失所入防爲镆鋂若此防躯体何须资齿牙持问南方人党防复矜夸皆言美无度谁谓死如麻我语不能屈自思空咄嗟退之来潮阳始憚殄龙蛇子厚居柳州而甘食虾蟆一物虽可憎性命无舛差斯味曾不比中藏祸无涯甚美恶亦称此言诚可嘉

送薛氏妇归绛州 梅尧臣

在家勗尔勤女功无不喜既嫁训尔恭恭已乃遠耻我家本素风百事无有侈随宜具奁箱不陋复不鄙当须记母言夜寐仍夙起慎勿窥防户慎勿輒笑毀妄非勿较竞丑语勿辨理每顺舅姑心况逆舅姑耳爲妇若能此乃是儒家子防尔十九年门闾未尝履一朝陟太行悲伤黄河水车徒望何处哭泣动隣里生女不如男天亲反由彼

川上田家 梅尧臣

斜光隔河明入照桑柘下臯垆生麦苗青青尚堪把遠见牛羊归相亲童稚野醉歌秋草间颇与世家寡

送王介甫知毗陵诗 梅尧臣

吳牛常畏热吳田常畏枯有树不防犊有水不溉稔孰知事春农但知急秋租太守迫县官堂上怒奋须县官促里长堂下鞭朴具不体天子仁不恤黔首逋借问彼爲政一一何所殊今君请郡去预喜民将苏每观二千石结束辞故都丝纆加锦緑银勒以金涂兵吏拥后队劒挝盛前驱君又不若此革辔障泥乌徐行问风俗低意抚疲弩下情靡不達略细举其麓曾肯爲众异亦罔爲世趨学诗闻已熟爱棠理岂无

宋文鉴卷十五

卷十六

钦定四库全书

宋文鉴卷十六

宋吕祖谦编

五言古诗

检书 苏舜钦

烦心思所持屏事入小阁踞扑下尘梁侈哆张败笈雨烂百数蕃虫食三四夹轩昂醉墨闇纖
悉新书杂鱼子或破碎蚕儿尚狎恰快心伯长文防尾清臣搨防辞反知进故句时自愜坠亡
多玩爱存聚必券帖疎密交及戚前后生与 海束俨父师寒暑布儿妾谑浪笑忽还私匿情
接怆事涕涔涔悯时叹 一饷诚寂寞千里遽防合游心到句涌开眼见苔雪京華歷歷
复节物忿忿涉恍尔惊异方遁去乃几腊回头厌襞积举体觉疲繭东閣聊欠伸梦断风一飒

感兴 苏舜钦

后寝藏衣冠前庙宅神主吾闻诸礼经此制出中古秦嬴食先法乃复祭于墓汉衣以月游于
道蓋无取宣帝尊祖庙失制徧九土孝元酌前文一旦悉除去魏帝乐铜室遗令置歌舞昏嗣
竟从之此事狂夫阻唐制益纷華诸陵鎖嫔御旷女日哀吟于先亦奚补吾朝三圣人乘云不
可覩威灵已霄汉嗣皇念宗祖绘事移天光刻象肖神武徧勅旧游地输材起宫宇阶城扣以
金墻壁衣之黼功既即奉迎法仗叠箫鼓玩好择珍奇目夺不可数三京佛老家已有十数处
朝家虽奉先越礼古不许君不祭臣仆父不祭支庶丹楹岂非孝圣贬甚萧斧大祀当以时寝
庙即其所惜哉恭俭德乃为侈所蛊痛乎神圣姿遂与夷为侣苍生何其愚瞻叹走防午贱子
私自叹伤时泪如雨

哭尹师鲁 苏舜钦

前年子渐死予哭大江头今年师鲁死予方旅长洲初闻尚疑惑涕泪已不收举杯欲向口荆
棘生咽防忆初定交时后前穆与欧君顔白如霜君语清如流予年又甚少学古众所羞君欲
举防萃声誉日搜搜不鄙吾学异推尊谓前修今逾二十年迹远心甚稠后防国南门夜谈雪
满楼青灯照素髮酒阑气益適昨君握兵柄节制关外侯予才入册府俄作中都囚飞章力辯
雪危言动前旒时虽不见省凜凜压众媮旋闻君下狱六月送渭州渭州旧治所昔拥万貔貅
堂中坐玉帐堂下森蛇矛令严山石裂恩煦春色浮衅生无根牙众言起愆尤返来入狴犴吏
对安可誚法冠巧权诈刺骨不肯抽削秩贬汉东驱迫日置邮穷途无一簪百口谁相赙诸子

死继亡清血渍两眸贸然几防明愤苦结不瘳君性本刚峭安可小屈柔暴罹此冤辱苟活何所求人间不见容不若地下游又疑天憎善专与恶报讐二竖潜膏肓众鬼来掷 弃局奔南阳后事得所投心胆尚卓犖精明已弥留生平经纬才萧瑟掩一丘青天自芒芒长夜何悠悠万物孰不死死常在严秋君齿方盛壮众期树风猷二边况横猾四海皆疮痍斯时忽云亡孰为朝廷忧予方编吳氓日自亲鋤耰无縁匍匐救兀兀空悲愁时思莊生言所乐唯髑髅物理不可诘此說诚最优

秋懷 江休复

西风万里至旷然天地秋暮雨生夕凉百虫鸣啾啾楚山晓苍苍楚水亦悠悠骚人试登临感物增离忧所思在遐方欲往路阻修香草有蕙茝嘉树有梧楸白露委芳馨雕零使我愁穷年倦羈窘江湖思旧游纫兰制芰荷飘泛一叶舟肆情云水间意适何所求

同持国宿太学官舍 江休复

翳翳云月薄冷冷雪风清学省夜岑寂天街断人行广庭层阁陰寻廊步余明松篠递遥响如闻弦调声悠悠子佩诗讲坐尘埃生迴就直舍休臺臺谈道精心防境物融泯然遗世营寒眠屡展转寤言寫素诚

牟駝冈阅马 江休复

牧马散近垆阅视乘高秋駝冈似涉苑惟阜帶川洲坡陁故梁城縈薄西南陬连棚映林樾星罗倚层丘回风吹阵云奔騰歛来游野性脱羈轡饮齧遂所求腹干颇肥张郁怒何彪休羣毆驟麋鹿逸势凌蛟虬军戎还轻防和銓御调柔毛物有千名众美归骅骝梁王愁思台佛刹居上头竭来一凭眺遺墟莽悠悠信陵骨已朽岩穴谁见收当时英豪輩事逐东波流置酒临风轩聊以紓烦忧

许希 顏太初

鍼工许希下蔡人住梁門西市三十年及天圣中皇躬违裕有内戚达其姓名上召见三进鍼而疾平面授尚药奉御其赐予不可胜纪谢恩毕西向而拜上询其故奏曰臣拜本师扁鵲也上惜其用心不忘本给钱五十万立祠封曰灵应侯或曰人生乎世慎乎习希失其习者也使希不习医而习儒其遇主之日不忘先师明矣若然则读书为儒乘时取富贵高冠长劔昂昂庙堂之上自负自得不知素王之力者许希之罪人也因为诗云

京城名利涂车马相奔驰其间取富贵往往输巫医前后十数輩身没名已隳独有许希者蕴蓄何瑰奇始自下蔡来所处尤喧卑西市三十年汨汨无人知一朝仗至艺驟登文石墀三鍼愈上疾神速不移时酬以六尚官着籍通端闈旌以三品服佩紫垂金 于时称谢毕西向复陈仪当防惊且问歷歷宣其辞臣传扁鵲术遇主今得施特此一展谢臣心不自私主上惜其

意击赏为嘘唏仍给水衡钱国西命立祠复加灵应号金额照華轅自此輦轂下求禱何祁祁
我过庆成坊见之心且悲秦医术虽妙五腑及四肢所习得其人千龄祀不亏鲁圣术至大帝
道与民彝所习非其人一朝反相持小吏师荀况窃为辩說资作相劝焚书诈云愚蚩蚩后之
为儒者其心皆李斯昔在布衣日动守先王规朝谈十二经夕诵三百诗依凭稽古力荣进无
他岐及居庙堂上劔长冠峨巍自谓正所赋焉知有宣尼宣尼断袞封十经寒暑移他姓为邑
官鄉老皆惊疑上章寝不报九重遭面欺諫官不举失御史不言非尽为许希笑得路忘先师

东州逸党 顏太初

天之有常度躔次絕乖离地之有常理沉潜无变亏人之有常道高下遵轨仪三才各定位万
古永不移二仪设有变修德可以祈人道或反常其乱何由支昔在典午朝国祚向陵夷日向
中夜出赫赫来东陲地向太极裂中有苍鹅飞高厚灾且异人妖亦繁滋始有竹林民怪诞名
不羈次有夷甫辈高谈慕无为沉湎多越礼阮籍兼辅之虚名能饰诈光逸与王尼何曾有先
见不能救其衰张華徒竭力无以扶其危至今西晋书读之堪涕洟尔来歷千年炎宋运重熙
东州有逸党尊大自相推号曰方外友荡然絕四维六籍被诋诃三皇遭毀訾坑儒愚黔首快
哉秦李斯与世立宪度迂哉鲁先师流宕终忘反恶闻有民彝或为童牧饮垂髫以相嬉或作
概量歌无非市井辞或作薤露喝发声令人悲或称重气义金帛不为货或曰外形骸顶踵了
无丝尘聚复优杂何者为尊卑遥闻风波民未见如调饥偶逢绅带士相对如拘縻不知二纪
来此风肇自谁都縁极 地多用寧馨儿斯人之一喝翕然天下随斯人之一趋靡然天下驰
乡老为品状不以逸为嗤宗伯主计偕不以逸为非私庭训弟子多以逸为宜公朝论人物翻
以逸为奇家国尽为逸礼法从何施我常病其中夜起思惟平地三尺限空车登无岐重载
歷百仞所来因陵迟万一染成俗虽悔何由追众人皆若梦焉能分其麤众人皆若醉不知啜
其醺天下皆病痿俾谁就鲁医天下皆病狂何暇灸其眉幸有名教党可与决雄雌所嗟九品
贱不得立文墀贾谊唯恸哭梁鸿空五噫终削南山竹冒死指其疵愿乘九庙灵感悟宸心知
赫尔奋独断去邪在勿疑分捕复大索儉人无子遗大者肆朝市其徒窜海湄杀一以戒万是
曰政之基千奴共一胆胆破众自隳无使永嘉风败乱升平时

赠张绩禹功 石介

李唐元和间文人如蠡起李翱与李观言雄破奸宄孟郊及张籍诗苦动天地持正不退讓子
厚称絕伟元白虽小道争名愈弗已卒能霸斯文昌黎韩夫子吾宋兴国来文人如栢比黄州
十专胜汉公气全粹晦之号絕羣平地走虎兕谓之然駁杂亦文中骐驎曰稹泊卢震江沱自
为水朱岩兼孙仅培塿对岳峙卒能霸斯文河东柳开氏嗟吁河东没斯文乃屯否汨汨三十
年滔滔满人耳粤从景祐后大儒复唱始文人如麻立枌枌攢战骑徂徕山磊砢生民实顽鄙
容貌不动人心胆无有比不度蹄涔防直欲触鲸鲤有慕韩愈节有肩柳开志令读禹功文矛
防寒相倚寶光千里高飞出破屋晨龙音万丈长防出重渊底雷霆皆藏身日星或失次我慙
年老人才力渐衰矣禹功气奔壮今方二十二前去吾之年犹有十四歲今读禹功文魂魄已
惊悸更加十四年世应絕俦类卒能霸斯文吾恐不在已禹功幸勉旃当仁勿让尔

小孤山 刘敞

惊波触南崖反怒射北壁苍山与相排所谓小孤石蟠根万仞渊耸角百丈碧祠堂豁精严行旅进粉泽或云妇女神盼蜚颇有逆吾知定名意似欲旌介特流俗失其真传闻莫开释居人私其利祸福妄损益竞为娼奴説以诬聪明德先王拱山川礼典有庙食奈何媚于灶屈己忘正直吾欲为小孤作书解行客复恐不见从嗟哉世多惑

杂诗效玉川体 刘敞

毁巢鳳不至竭泽龙不游贤者有所归得非龙凤俦周公下白屋圣德被九州赵禹谢賓客汉朝以为忧浇淳不相袭用舍何其缪苟循一身利不为万姓谋哀彼杖杜诗死生遗道周

杂诗二首 刘敞

凿井取泉饮上山采薇食岂不信憔悴所愿皆我力泉也非难致薇也不易得志士耻徒饱众人苟所获牺牲畏刍豢樊笼害羽翼晤理宜在早无为晚更惑

道薄德亦防功名为时须用力世所贤守正众云愚智者竞蒿目小人复迹图悠悠三季后此风益已渝安知治未病防痔而多车尧舜无能名越哉已矣夫

示张直温 刘敞

筑山必使高凿井必使深百工戒浅近盛德羞浮沉焉有尺寸枝能栖垂天禽焉有升斗泉能容横江鲟借兹论物理足以开君心嗑在容不足弱在力不任大道如路然固无古与今

朝乘 刘敞

朝乘日车出暮载星影还顛防朝暮中出入咫尺间已觉素志非更知人理艰小利专欲速大德不逾闲

哀张子厚先生 司马光

先生负材气弱冠游穷边麻衣揖钜公决策期万全谓言叛羌辈坐可执而鞭意趣小参差万金莫留连中年更折节六籍事精研羲农讫周孔上下皆贯穿造次循防墨儒行无少愆师道从废阒模范几无传先生力振起不絶尚联緜教人学虽博要以礼为先庶几百世后复覩三王前释老比尤炽羣伦将荡然先生论性命指示令知天声光动京师名卿争荐延寘之石渠阁岂徒修简编丞相正自用立有荣枯权先生不可屈去之归卧坚孤嫠聚满室糊口耕无田欣欣茹藜藿皆不思肥鲜近应诏书起寻取病告旋旧庐不能到丹旄风翩翩人生防归尽但问愚与贤借令阳虎寿讵足骄顔渊况于朱紫贵飘忽如云烟岂若有清名高出太白巔門人

俱经带云梯防松阡厚终信为美继志仍须专读经守【一作书】旧学勿为利禄迁好礼效古人勿为时所【一作俗】牵修内勿修外执中勿执偏当令洙泗风郁郁满秦川先生傥有知无憾归重泉

今古路 刘敞

出门道路多纵横不可测我今欲远行须问曾行客徐徐逢路人借问青松侧客曰今何往答之游京国客乃指要路而言行有益古路虽大道不如今路直但行今人路犹如假羽翼彼客别我去独自踟躇立为见今古路信乃无苦忒今路足轮蹄古路多荆棘欲行今人路恐背古人迹欲行古人路今人笑迂僻又拟不出门奈何饥寒逼哀哀此时路悠悠苍天色不避今人嫌路须行古陌古陌虽然远且保无蹶失勉哉自勉哉前去难之适不获见杨朱万古凝愁魄

汉文帝 王安石

轻刑死人众短丧生者偷仁孝自此薄哀哉不能谋露台惜百金防陵无高丘浅恩施一时长患被九州

戴不胜 王安石

昔在宋王所皆非薛居州区区一不胜辛苦亦何求懷禄讵有耻知命乃无忧此士自可怜能复识此不

司马迁 王安石

孔鸾负文章不忍留枳棘嗟子刀锯间悠然止而食成书与后世愤悱聊自释领略非一家高辞殆天得虽防樊父明不失孟子直彼欺以自私岂啻相十百

扬雄 王安石

孔孟如日月委蛇在苍旻光明所照耀万物成冬春扬子出其后仰攀忘贱贫衣冠 尘土文字烂星辰歲晚天禄阁强顏为剧秦趋舍迹少迂行藏意终隣壤壤外逐物纷纷轻用身往者或可返吾将与斯人

杨刘 王安石

人各有是非犯时为患害唯诗以譎諫言者得无悔汾王昔监谤变雅今尚载末俗忌讳繁此理寧复在南山咏种豆议法过四罪 都戏桃花母子受顛沛疑似已如此视欲谆谆海事变故不同杨刘可为戒

日出堂上饮 王安石

日出堂上饮日西未云休主人笑而歌客子叹以愀指此堂上柱始生在岩幽雨露饱所滋凌云亦千秋所托愿永从何言值君收乃令卑湿地百蚁上穷搜丹青空外好镇压已堪忧为君重去之不使一蚁留蚁力虽云小能生万蚍蜉又能高其础不尔继者稠语客且勿然百年等浮沤为客当酌酒何豫主人谋

我欲往沧海 王安石

我欲往沧海客来自河源手探囊中胶救此千载浑我语客徒尔当还治昆仑叹息谢不能相看涕翻盆客止我且往濯髮扶桑根春风吹我舟万里空自存

少狂喜文章 王安石

少狂喜文章颇复好功名稍知古人心始欲老蚕耕低徊但忘食邂逅亦专城仰慙冥冥士俯愧扰扰氓良夜未渠央青灯数寒更拨书置左右仰屋慨平生

今日非昨日 王安石

今日非昨日昨日已可思明日异今日如何能勿悲当门五六树上有蝉鸣枝朝听尚壮急暮闻已衰迟仰看青青叶亦复少蕪滋万物同一气固知当尔为我友南山居笑谈解人颐分我秋栢实问言归何时衣冠污穷尘苟得犹苦饥低徊岁已晚恐负平生期

田漏 王安石

占星昏晓中寒暑已不疑田家更置漏寸晷亦欲知汗与水俱滴身随陰屡移谁当哀此劳往往夺其时

送潮州吕使君 王安石

韩君揭阳居戚嗟与死隣吕使揭揭去笑谈面生春当复进赵子诗书相讨论不必移鳄鱼诡怪以疑民有若大顛者高材能动人亦勿与为礼听之汨彝伦同朝叙朋友异姓接昏姻恩义乃独厚怀哉余所陈

杂咏 王安石

懷王自堕马贾傅至死悲古人事一职岂敢苟然为哭死非为生吾心良不欺滔滔声利间絳灌亦何知

谢公 王安石

走马白下门投鞭谢公墩昔人不可见故物尚或存问樵樵不知问牧牧不言摩挲苍苔石防检履齿痕想此絳长檣想此倚短辕想此玩云月狼籍盘与罇井迳亦已没漫然禾黍村摧藏羊昙骨放浪李白魂亦已同山丘緬懷蒔兰荪小草戏陈迹甘棠咏遗恩万事付鬼録耻荣何足论天机自开闢人理孰畔援公色无惧喜悦知祸福根涕泪对桓伊暮年无乃昏

同昌叔赋鴈奴 王安石

鸿鴈无定栖随阳以南北嗟哉此为奴至性能悬惻人将伺其殆奴輒告之亟举羣寤而飞机巧无所得夜或以火取奴鸣火因匿频惊莫我捕顾谓奴不直嗷嗷身百忧泯泯举一息相随入繒缴岂不听者惑偷安与受给自古有亡国君看鴈奴篇祸福甚明白

寓言四首 王安石

不得君子居而与小人游疵瑕不相摩况乃祸衅稠高语不敢出鄙辞强颜酬始云避世患自觉日已偷如傳一齐人以万楚人咻云复学齐言定复不可求仁义多在野欲从苦淹留不悲道难行所悲累身修周公歌七月耕稼乃王术宣王追祖宗考牧与宫室甘棠能听讼召伯圣人匹后生论常高于世复何实蓍蓍俗所共察察与世违违世有百善一疵恶皆归就求无所得犹以好名讥彼哉负且乘能使正日防言失于须臾百世不可除行失儿席间恶名满八区百年養不足一日毀有余谅彼耻不仁戒哉惟厥初

游土山示蔡天啓 王安石

定林瞰土山近乃在眉睫谁谓秦淮广正可藏一牒朝予欲独往扶惫强登涉蔡侯闻之喜喜色见两颊呼鞍追我马亦以两黥挟敛书付衣囊裹饭随药笈脩脩阿兰若土木老山脇鼓钟卧空旷簔簔雕防业外堂廓无主考击谁敢輒坡陀谢公冢藏椁从穿刼百金买酒地野老今行馐緬懷起东山胜践比稠叠于时国累卵楚夏血常喋外实備艰梗中仍费调燮公能觉如梦自喻一蝴蝶桓温适自毙苻坚方天厌且可缓九锡宁当快一防彼哉斗筭人得丧易矜怯妄言履齿折吾欲刊史牒伤心新城隤归意终难愜漂摇五城舟尙想浮河楫千秋陇东月长照西州堞岂无華屋处亦捉蒲葵簔碎金谅可惜零落随秋叶好事所传玩空残法书帖清谈

不嗣陈迹悦如接东阳故侯孙少小同鼓篋一官初领海仰视飞鸢跼穷归放款段高卧停遠蹠牵襟肘即见着防耳才摩数椽危败屋为我炊陈湍虽无膏污鼎尚有羹濡防纵言及平生相视开笑靨邯鄲枕上事且饮且田猎或昏眠委翳或妄走超躡或叫号而寤或哭泣而魔幸哉同胜时田里老安帖易牛以寶剑击壤胜弹铗予虽天戮民有械无接折翁今贫而静内热非复叶予衰极今歲悦与鸡梦协委蛻亦何恨吾儿已长鬣翁虽歲长我未见白可镊祝翁尚难老生理归善摄从留畏年少讥我两喏喏束火扶路还霄明狐兔慑蔡侯雄俊士心僚形亦谍异时能飞鞚快若五陵侠胡为阡陌间踠足仅相蹶谅欲交轡语怯子不能嗜

夜梦与和甫别如赴北京时和甫作诗觉而有作

因简纯甫 王安石

水菽中歲乐鼎茵暮年悲同胞苦零落防合尚凄其况乃梦乖阔伤懷而赋诗诗言道路寒乃似北征时叔兮今安否季也来何迟中夜遂不眠辗转涕流离老我孤主恩结草以为期异叔善事国有知无不为千里永相望昧昧我思之幸唯季优游歲晚相攜持于焉可晤语水木有茅茨畹兰仁归憇绕屋正華滋

独卧有懷 王安石

午鳩鸣春陰独卧林壑静防云过一雨淅沥生晚听红綠纷在眼流芳与时竞有懷无与言伫立钟山暝

宋文鑑卷十六

卷十七

钦定四库全书

宋文鉴卷十七

宋 吕祖谦 编

五言古诗

分题得瘿木壶 吕公着

天地产众材任材谓之智栋桷与楹杙小大无有弃方者以矩度圆者中规制嗟尔木之瘿何异肉有赘生成拥肿姿赋象难取类櫟栝所不施钩防爲尔废大匠睨而往惻然乃有意孰非造化功而终朽不器剝剔虚其中朱漆爲之伪防浆挹酒醴施用惟其利牺象非不珍金罍岂不贵设之于楹阶十目肯注视幸因左右容反见谓竒异人之于才性夫岂遠于是性虽有不善在教之揉励才亡不可用由上所措置饰陋就其长皆得为良士执一以废百众功何由備是惟圣人心能通天下志

寄题径山怀郎简侍郎 张 环

天地一洲渚北平南欹危幽并深以厚江淞清且竒武林颇英秀川汇仍山卑应接殫天巧类非人力为径山最佳处有岩称玉芝居防俗士驾地乃贤人宜郎公留名德平时爲羽仪引年归故里不复衣朝衣留侯黄石心白傅香山期结宇名胜外日与尘事违泉石景物状尽任诸贤诗伊宇来东藩濫持使者麾平生爱山水弗惮命驾之当 秋风高遠造岩下扉澣濯纓上尘散步松间綦未能继高躅聊用慰所思

过介甫归偶成 曾 巩

结文谓无嫌忠告期有补直道詎非难尽言竟多迂知者尚复然悠悠谁可语

刘景升祠 曾 巩

景升得二蒯坐论胜凶残正当防乱时能使憔悴寬缤纷多士至肃穆万里安能收众材助图大信不难诸公龙凤姿有待久盘桓得一固足兴致之岂无端廼独采樗栎不知取椅檀蓋云器有极在理良足叹

看白云爱而成诗 狄遵度

秋风吹白云触处自何谷初犹半洞门歟出遍岩腹零落依水湄片段挂枯木余影透防白灭迹混空绿烟萝自翳荟岛淑徒萦曲安知苍梧野下覆猿鸟哭谁能久徘徊返顾视黄鹄

哀老妇 李防伯

里中一老妇行行啼路隅自悼未亡人暮年从二夫寡时十八九嫁时六十余昔日遗腹儿今兹垂白须子岂不欲养母岂不怀居繇役及下户财尽无所输异籍幸可免嫁母乃良图牵车送出门急若盗贼驱儿孙有妇小大攀且呼囬头与永诀欲死无刑诛我时闻此言爲之长叹呜天民固有穷鰥寡实其徒仁政先四者着在孟轲书吾君务复古旦旦师黄虞赦书求节妇许与旌门闾繄尔愚妇人岂曰礼所拘蓬茨四十年不知形影孤州县莫能察诏防成徒虚而况赋役间羣小所同趋奸欺至骨髓公利未锱铢良田岁岁卖存者惟菜污兄弟欲离散母子因变渝天地岂非大曾不容尔躯嗟嗟孝治主早晚能闻诸吾言又无位反袂空涟如

悠悠西江水送李殿丞 王 回

殿中丞李侯清叔筦潁之酒事三年入朝阙下将别其往还寮友皆索言焉长乐王回辱清叔之交最深而慕其才志魁特将有以成功名于世也以谓挟此才潜此志者第循其本而完之则物之应者自广然功名之成否岂足道哉故作悠悠西江水诗一章以兴其义塞清叔之索而聊写其意云

悠悠西江水浩浩拍两涯深防食渊潭澄澄露陂池介鳞育性命跳泳各适宜人谋济任途航楫又防洄飘风吼天地白浪相翻飏旁观骇非常水德自不亏风收浪还恬狎者终何疑贤豪应世务有本亦若兹刚明发其用恺悌以成之外物虽横来我心固如夷功名岂足道请监江水诗

鲁恭太师庙 韩 维

善教邈无迹其流在民心君看鲁太师庙食犹至今岂如文俗士朱墨坐浮沉趋营止目前不顾患害深去汉余千载此 竟相寻我行道祠下感激为悲吟不见田雉驯啼鶚空满林

服除送兄弟还都 韩 维

日月忽已远再见新穀升丧期有常数吉我衣与纓俯仰自悲咤泪下肝胆崩尚惟立身报未即泯余生肃肃忠宪公秉德辅休明报国有遗意训言独在听况兹世厚恩兄弟秩王庭一朝出门去事业各有营上当答君仁下以为亲荣独此抱疴瘵谢喧守柴荆扫冢奉时祭复田课春耕既无公家责聊徇狷者情出处虽云异要以道爲程

灵沟道中 韩 维

春风来无迹泱莽天地和羣生乐时阳众鸟舞且歌嗟尔道旁叟寒馁独见罗短席不自蔽皮骨撑枯柯呼童问所以口噤不得哦所见且如此况余生齿多吾闻古三代仁术固匪他老幼孤泊疾饥养平不颇斯道久寂寞吾悲其奈何

谒孔先生 韩 维

月出高树枝影动酒樽处树深月色薄稍以灯火助主从喜我过斟酌亦云屡于时幸无累所谈非近务凉风自远至清景淡吾虑方斯西山秋历览陪杖屨

下横岭望宁极舍 韩 维

驱车下峻坂西走龙阳道青烟人防家绿野山四抱鸟啼春意阑林变夏阴早应近先生庐民风亦淳好景仁示去歲所赋菊屏菊塔二诗輒以一篇答之

韩 维

斯民去古远日与巧伪迁粲粲黄金花揉屈同杯棬列屏耸浮图光彩生盘筵匪惟悦羣儿爱咏及华颠我欲叱园吏解结除其编万物有本性各使归自然

读书 傅尧俞

吾屋虽喧卑颇不甚芜秽置席屋中间坐卧羣书内横风吹急雨入屋洒我背展卷殊未知心与昔人防有客自外来笑我苦痴昧且问何爲尔我初尚不对强我不得已起荅客亦退聊复得此心沾湿安足悔

举举媚学子 王 令

举举媚学子居曰不吾知知而有不能无乃失于欺不知未为患不欺浩难期嗤哉天下怀何以天下为

呼鸡 王 令

鸡呼鸡来前犬噉犬至止夫岂必可召役以食乃尔今吾曷为悲人而鸡犬为自计无自存西山谢夷齐

秋懷 王 令

撼撼庭树叶朝零非昔稠呦呦草虫鸣暮急晓未休尔虫无不平岂亦有哀忧胡为劳呻吟与士感伤投壮士亦何者哀哦与虫酬所抱不列陈调苦难謡讴极目有远见直懷羞曲求蒿藜

衮从安功名忘前收日月忽未几天地今复秋少壮负所懷老大安能谋生无前人功死骨埋泉羞胡为不奋飞徒与寒饿讐

杂诗 王 令

古人重非道饥不苟豆羹有为非其心或不脱冕行如何后世人以官业其生鄙哉乐欺人犹以学爲名采选示王圣美葛子明诸友 王 令

酒樽厌运行众客喧已醉忽得簿上籍共出声名外孤昂忽防轩泯默亦驯致追争相后先得失自愚智随时有能称逐衅得诃訾虽非人力爲适与天幸值或竟以祸覆亦有终自遂卒无及物效徒有高人气回樽变新局忽若已异世嗟人久以迷高爵乐自嗜谁为衍衍饱竞逐孜孜利矜骄侈防奢摧折叹淹滞昏昏忘所大扰扰争其细安知茫昧间身非天所戏是非未暇辩欢戚先已至退之昔裁诗颇以豪横恃暮年意气得金玉多自慰买居纪厢荣顾影乐冠佩喜将闾巷好特与妻子议彼哉何足道进退兹焉系安知九列荣顾是德所累宁论圣人为适莫因以义有时曲肱乐不以易富贵吾曹颇勉修兹道从自诣何必问浮云斯理固可视

介亭 孙 觉

真人昔未起奔鹿骇四方连延天目山两乳百里长有地跨江海无种生侯王中霄燎穹旻列石表坛场朱旗大梁野英气吞八荒寥寥百年后故物亦已亡所余彼巉岩峰巖屹相望主人承明老星斗工文章筑亭紫霄上坐客苍株旁攀云防明月晓星生扶桑禹山隔波涛简书永埋藏愿逢希夷使水土还故常

读魏世家 王安国

亶亶谈先生古今谁有得施为虽绪余要在情不匿嗟彼三代后沦胥入战国翟璜闻一言僂俛慙李克论材称权衡轻重无物惑吾心能如此乃可任人责

夏日独居二首 王安国

竹笛敷夏陰萝蔓蔽朝亮感此节物佳百骸适无恙委蛇投广厦箫瑟絶遗响稍讐简编余俄得冠裾放身虽势利乖心遂 歌尚默然想圣贤游世无得丧抱关秉翟间未分弃冗长人生适意难聊各安所乡

皙皙池沼儵綠萍随下上鱉鱉堂庑燕白昼容俛仰顾我亦晏如环庐花乐长无材助太平地幸闲旷稍披千古书日觉神明王乘间盼物情自适忘外獎涵濡覆载仁谁废鱼丽唱黄尘洮陇戍黑雾荆衡饟奔波喝道边毕命营边障吾此独何为飞潜乐能飡何时闻解严慰彼西南望当使少陵翁得见廉耻将

堂上有遗糇 王安国

堂上有遗糇堂下无聚蚁但知嗜欲求不必风雨至客方笑营营贪得故无几安知万类中趋舍忘彼已天乎顾人寰等是一时戏受形巨细分陆患后先尔浸淫蚍蜉生穴柱从此始庄生亦知言信矣当弃智

忘言 王安国

宋国旌孝子东门毁以毙楚王好细腰后宫馁而殍物情信可怜徇外易生死身存宠可夸亡矣安所恃吾今思彼哉未足语释利扰扰智惊愚卑卑学阿世吹嘘出虹蜺顿挫入尘滓爱憎虽人爲荣辱乃天使恩无斯须懷怨已塞天地百年呼吸中毫髮谁豫已适者默然窥陰阳驱意气始终本何有一息累万世由来适人适宿昔多如此喟余聊自欲安得忘言士

异服 王陶

辛有叹被髮赵灵喜胡服遂成陆浑戎终有沙丘辱用夷反变夏亡礼以从俗先王仁义术诂用北求福齐桓九合功不以兵车穀仲尼叹防管几为左袵属尔来豪侠儿往往异装束耀武何必然御戎有前躅余敢告司关异服宜禁肃

采鳧茨 郑

朝攜一筐出暮攜一筐归十指欲流血且急眼前饥官仓岂无粟粒粒藏珠玑一粒不出仓仓中羣防肥

兵器 陶弼

五代乏真主奸防何僭伪横磨濶刀剑白日相篡弑我宋有神祖潜德动天意故天意若曰往为我之嗣神祖拜稽首乃即皇帝位不 兆民乐不怒诸侯畏颠倒执玉帛奔走恐后至大商国三分一朝有其二太宗以义抚真宗以仁治王道竹箭直诵声金鼎沸独有陰山戎时时寇边地天子赫斯怒大警巡澶卫射杀右贤王遂断匈奴臂狼心帖然服结好同昆弟自此两河间寂寂无戎备卒闲喜夜歌将老贪春睡自此为太平恍逾三十歳戎昊乘我间南驰贺兰骑阳关从夜开枢朽不可闭阵云起秦雍杀气横泾渭使臣股栗奏宰相瞠目议金日亟发兵竖子坑甚易仓惶筑边垒未战力先瘁逼迫开库兵土蚀锋铓脆防秋采旧屯推穀谋新寄旧屯老且死少者无实艺良由不训练手足迷击刺新寄将家子从小生富贵六韬未尝读口但知肉味师复从中御进退由閤寺权轻号令冗两战无遗类曹公弃七军晋人获三帅吾兵自此丧有诏新其制此器不预设一旦何从致朝廷急郡县郡县急官吏官吏无它术下责蚩蚩輩耕牛防筋角飞鸟秃翎翅簪截防稽空铁烹堇山碎供亿稍后期鞭扑异他罪愁氛壅太虚霁景昼 晦我闻郭汾阳料敌多奇异单榘谕突厥蕃长膝双坠又闻李西平临戎有英气身着红锦袍懷光肝胆碎是知用兵术在人不在器君耳舜高听君目尧明视愿采谋略长勿倚干

戈銳

送同年蒲叔范察判杭州监王畴

释之久未调王粲尝从军谓言塞垣事壮气横风云育材幸明代荐贤无令君如何汉酤冗沉此荆山珍萍氏本几酒周官有彝伦孝武事攘郤志清天地屯连兵无时已四海萧然贫官始操酿具一之饱师人利源一以泄頽波荡无垠糜穀费耒耜良藥争清淳酒禁着律令犯笞及其身狂药乃防井伤哉尧舜民炎灵属我后天资英且仁邦力早防富汉制仍相循歲赋二千万经入固已勤【夫农天下酒科歲复縉如此】弥年拥武节乘边清国氛防防百万师跨迈睽燕秦仰给倾府库赏赍图戎勲加斂犹不足返古当何云杭城东南剧地将湖海隣利冠天下旗亭压重闔彼虽斗筭职亦择才英臣风露气已肃溪潭寒弥新沙榜朝泛泛吴涛暮沅沅南州近牛斗气象防霜旻汀枫变老栢赤叶晴相纷尝茶泊幽寺观鱼下轻防行当收翹楚宁复混蒸薪无为狎吴叟坐恋秋江莼

四事邵雍

防有四不赴时有四不出【公防生防广防釀防大寒大暑大风大雨】无贵亦无贱无固亦无必里闲闲过从身安心自逸如此三十年幸逢太平日

高竹邵雍

高竹碧相倚自能发余清时时防风来万叶同一声道污得夷理物虚含遠情阶前闲步人意思何清平

巢乌张先

乌啼东南林危巢鷁五六心在安巢枝一日千徃复脱网得羣食入口不入腹穷生俾反哺岂能报成育

临水黄亢

人生朝复暮水波流不驻去年昨日水今日到何处惆怅雨残花嫣红随水去花落水东流识尽人生事

次韵和子仪问蝉黄庶

落日挂树间长我亭下陰园林动秋意高蝉忽微吟清风转余声杳若下逵岑微物感时节铿鍠吐商金古乐久破碎兹虫抱金音荒忽尚偃蹇激起壮士心愿为秋蝉操被之朱丝琴

自警 范纯仁

忆昔为小官位卑职易营朋知喜其勤民口亦见称中间忝台諫已觉言难行然赖识者恕尚谓无欷倾数年忽遭遇用大过其能名虚称不实任重力难胜具瞻不可欺举动招讥评士论因不与自知亦甚明禄厚难报答徒兹骄侈萌子孙忘艰难服用饶夸矜清白素风减冗长浮费增亲旧多责望厚薄貽怨憎贫贱胜富贵古语信可凭请病防罢免方幸忧责轻俄复统一道抚民帅边兵寇狂适偃蹇民疲未苏醒胜负系司命休戚及羣氓细务委将佐大事稟朝廷所禀有违从委择有不精差失虽豪厘致败或丘陵殒身何足道误国玷家声可不常惕惧临渊履春冰庶几免危溢书此为心铭检覆郟城旱田示同官及寄河南诸贤

刘 攽

昔歲歉无年今麦仍荐饥罢民去南畝贱价捐东菑籍籍道路间饿者何累累藜藿不充肠蕭然旌与 嗟我禄代耕每食为不怡徒懷仲由志身贱郛得施属城上民讼比牒皆苦词奉诏实有无百闻谢一窥星言說桑田行与父老期触热不敢休重趼宁告疲郊原赤如赭秉穗无子遗 艺不可分四旁生蒺防流行诚代有愚弱岂易欺附上亦有刑残下罪攸司鄙夫不忍此告吏咸赦之庶兹咻噢恩足以苏惛嫠大农急经费言利析毫厘二吾犹不足一切寧谓宜国侨敏争承郑邑用不危冯援焚券书田氏人若归区区二小邦两士能若斯当官在必行匪石安可移诸公悉吾友此志良弗非当令狗路人一听狂者诗

杂诗 刘攽

齐有梁丘据晋有乐王鲋据能爱晏婴鲋欲残叔誉二臣嬖两朝事君为悦豫景有尚贤志据逆以为助平失宥善心鲋乃速其去母以据为贤易地则同趣丈夫处世间必有遇不遇岂无觉者乎正色君亦悟区区嬖幸徒何忍就朋附

齐鲁 刘攽

齐鲁大儒师专门盛章句应物非己长何以责成务乃其忠孝心足以事君父不如商利徒反道趋诡遇剥床以及肤泉货山岳聚赐金再百斤封邑成千户若母天事变岂不厚且固商鞅既诛夷桑羊亦刀锯寄言逢衣人施施幸安步

拟古 刘攽

老莱隱穷楚因与时世隔春归怪车辙夜起辟山泽若人不可见况肯低顏色安知丛台下一旦三千客西迁竟不还嗟哉莫良画

漕舟 刘攽

漕舟上太仓一钟具千金太仓无陈积漕舟来无极畿兵已十万三垂戍更多庙堂万济帅将
奈河东何

题福唐津亭 陈烈

溪山龙虎蟠溪水鼓角喧中宵乡夢破六月夜衾寒风雨生残树蛟龙喜怒澜殷勤祝舟子移
棹过前滩

宋文鉴卷十七

卷十八

钦定四库全书

宋文鉴卷十八

宋吕祖谦编

五言古诗

怀贤阁 苏轼

南望斜谷口三山如犬牙西观五丈原郁屈如长蛇有怀诸葛公万骑出汉巴吏士寂如水萧萧闻马挝公才与曹丕岂止十倍加顾瞻三辅间势若风卷沙一朝长星坠竟使蜀妇髻山僧岂知此一室老烟霞往事逐云防故山依渭斜客来空吊古清泪落悲笳

和子由记园中草木二首 苏轼

种柏待其成柏成人亦老不如种丛篁春种秋可倒阴阳不择物美恶随意造柏生何苦艰似亦费天巧天工巧有几肯尽为汝耗君防藜与藿生意长草草

芦笋初似竹稍开叶如蒲方春节抱甲渐老根生须不爱当夏绿忧此及秋枯黄叶倒风雨白花摇江湖江湖不可到移植苦勤劬安得双野鸭飞来成画图

爱玉女洞中水既致两甌恐后复取而为使者见给因破竹为契使寺僧藏其一以为往来之信

戏谓之调水符 苏轼

欺漫久成俗关市有契襦谁知南山下取水亦置符古人辨淄澠皎若鹤与鳬吾今既谢此但视符有无常恐汲水人智出符之余多防竟无及弃置为长吁

赠刘莘老 苏轼

江陵昔相遇幕府称上宾再见明光宫峨冠揖搢绅如今三见子坎坷为逐臣朝游云霄间欲分丞相茵莫落江湖上遂与屈子隣了不见喜愠子岂真可人邂逅成一欢醉语出天真士方在田里自比渭与莘出试乃大谬刍狗难重陈岁晚多霜露归耕当及辰

甘露寺 苏轼

欲游甘露寺有二客相过遂与偕行寺有石如羊相传谓之很石云诸葛孔明坐其上与孙仲谋论曹公也大铁镬二案铭梁武帝所铸画师子一菩萨二陆探微笔李卫公所留祠在寺手植柏合抱矣近寺僧发古殿基得舍利七粒并石记乃卫公为穆宗皇帝追福所莖者也

江山岂不好独游情易防但有相携人何必素所欢我欲访甘露当涂无闲官二子旧不识欣然肯联鞍古郡山为城层梯转朱栏楼台防崖上地窄天水宽一览吞数州山长江漫漫却望大明寺惟见烟中竿很石卧庭下穹窿如伏獬缅怀卧龙公挟防事雕鑽十谈收獬子再说走老瞒名高有余想事往无留观萧公古铁镬相对空团团坡池受百斛积雨生防澜泗水逸周鼎渭城辞汉盘山川失故态怪此能独完僧繇六化人霓衣挂冰纨隐见十二叠观者疑夸谩破板陆生画青猊戏盘跚上有二天人挥手如翔鸾笔墨虽欲尽典刑垂不刊赫赫赞皇公英姿凜以寒古柏亲手种挺然谁敢干枝撑云峰裂根入石窟蟠薙草得防碑斩崖出金棺瘞藏岂不牢见伏理可叹四雄皆龙虎遗迹俨未刊方其盛壮时争夺肯少安废兴属造物迁逝谁控抟况彼妄庸子而欲事所难古今共一轨后世徒辛酸聊兴广武叹不待雍门弹

僧清顺新作垂云寺 苏轼

江山虽有余亭榭着难稳登临不得要万象各偃蹇惜哉垂云轩此地得何晚天功争向背诗眼巧增损路穷朱栏出山破石壁很海间浸坤轴湖尾抱云巘葱葱城郭丽淡淡烟村远纷纷鸟鹄去一一渔樵返雄观快新获防景收昔遁道人真古人啸咏慕嵇阮空斋卧蒲褐芒屨每日裊天怜诗人穷乞与供诗本我诗从不作荒澁旋锄垦从君覓佳句咀嚼废朝饭

西斋 苏轼

西斋深且明中有六尺牀病夫朝睡足危坐觉日长昏昏既非醉踽踽亦非狂褰衣竹风下穆然中防凉起行西园中草木含幽香榴花开一枝桑枣沃以光鸣鸠得美防困立忘飞翔黄鸟亦自喜新音变圆吭杖藜观物化亦以观我行万物各得时我生日皇皇

司马君实独乐园 苏轼

青山在屋上流水在屋下中有五亩园花竹秀而野花香袭杖屨竹色侵盞罇酒乐余春暮局消长夏洛阳古多士风俗犹尔雅先生卧不出冠蓋倾洛社虽云与众乐中有独乐者才全德不形所贵知我寡先生独何事四海望陶冶儿童颂君实走卒知司马持此欲安归造物不我舍名声逐吾輩此病天所赫抚掌笑先生年来效喑哑

除夜病中赠段屯田 苏轼

躑躑三十九劳生已强半歲暮日斜时还为昔人叹【乐天诗云行年三十九歲暮日斜时】

今年一线在那复堪把玩欲起强持酒故交云雨散惟有病相寻空斋为老伴萧条灯火冷寒夜何时旦倦仆触屏风饥飏嗅空案数朝闭阁卧霜髮秋蓬乱传闻使者来防杖就梳盥书来苦安慰不恠造请缓大夫忠烈后高义金石贯要当击权豪未肯覩衰懦此生何所似暗尽灰中炭归田计已决此邦聊假馆三径粗成费一枝有余暖愿君更信宿庶奉一笑粲

和顿教授见寄 苏轼

我笑陶渊明种秫二顷半妇言既不用还有责子叹无弦则无琴何必劳抚玩我笑刘伯伦醉发蓬茆散二豪苦不纳独以锺自伴既死何用埋此身同夜旦孰云二子贤自结两重案笑人还自笑出口谈治乱一生溷尘垢晚以道自盥无成空得懒坐此百事缓侧闻顿夫子讲道出新贯岂无一尺书恐不记庸懦陋邦贫且病数米珠称炭慙愧章先生十日坐空馆袖中出子诗贪读酒屡暖狂言各烦慎勿使输薪粲

京师哭任遵圣 苏轼

十年不还乡儿女日夜长岂惟催老大渐复成凋防每闻耆旧亡涕泣声辄放老任况寄逸先子推轂行文章少得誉诗语尤清壮吏能复所长谈笑万夫上自喜作剧县偏工破豪党奋髯走猾吏嚼齿对奸将哀哉命不偶每以才得谤竟使落穷山青衫就黄壤宦游久不乐江海永相望退耕本就君时节相劳饷此懷今不遂归见累累塋望哭国西门落日衔千嶂平生唯一子抱负珠在掌见之韶亂中已有食牛量他年如入洛生死一相访惟有王濬冲心知中散状

张寺丞益斋 苏轼

张子作斋舍而以益为名吾闻之夫子求益非速成譬如远游客日夜事征行今年适燕蓟明年走蛮荆东观尽沧海西涉渭与泾归来闭户坐八方在轩庭又如学医人识病由饱更风雨晦明淫跛躄瘖聋盲虚实在其脉静躁在其情荣枯在其色寿夭在其形苟能阅千人望见知死生爲学务日益此言当自程为道贵日损此理在既盈愿君书此诗以为益斋铭

送郑户曹 苏轼

水绕彭祖楼山围戏马台古来豪杰地千载有余哀隆準飞上天重瞳亦成灰白门下吕布大星陨临淮尚想刘玄德置酒此徘徊尔来苦寂寞废圃多苍苔河从百步响山到九里回山水自相激夜声转风雷荡荡清河壖黄楼我所开秋月堕城角春风摇酒杯迟君为坐客新诗出琼瑰楼成君已去人事固多乖他年君倦防白首赋归来登楼一长啸使君安在哉

送李公择 苏轼

嗟余寡兄弟四海一子由故人虽云多出处不我谋弓车无停侣逝去势莫留仅存今防人各在天一隅有如长庚月到晓烂不收宜我与夫子相与手足侔比年两见之賓主更献酬乐哉

十日饮衎衎和不流论事到深夜僵仆铃与驹颇尝见使君有客如此不欲别不忍言惨惨集
百忧念我野夫兄知名三十秋已得其为人不待风马牛他年林下见倾盖如白头

懷西湖晁美叔同 苏轼

西湖天下景游者无愚贤深浅随所得谁能识其全嗟我本狂直早为世所捐独专山水乐付
与寧非天三百六十寺幽寻遂穷年所至得其妙心知口难传至今清夜梦耳目余芳鲜君持
使者节风米烁云烟清流与碧巘安肯为君妍胡不屏骑从暂借僧榻眠读我壁间诗清流洗
烦煎防杖无道路直造意所便应逢古渔父苇间自寅缘间道若有得买鱼勿论钱

种松得徠字 苏轼

春风吹榆林乱荚飞作堆荒园一雨过戢戢千万栽青松种不生百株望一枚一枚已有余气
压百亩槐野人易斗粟云自鲁徂徠鲁人不知贵万灶飞青煤束缚同一车胡为乎来哉 然
解其缚清泉洗浮埃枝叶伤尚困生意未肯回山僧老无子养防如婴孩坐待老龙蛇清陰满
南台孤根裂山石直干排风雷我今百日客养此千歲材【时至黄不百日】茯苓无消息双
鬓日夜催古今一倏仰作诗寄余哀

以双刀遗子由子由有诗次其韵 苏轼

寶刀匣不见但见龙雀环何曾斩蛟虵亦未切琅玕胡为穿窬辈见之要领寒吾刀不汝问有
恨在其肝念此刀自藏包之虎皮斑湛然如古井终歲不复澜不忧无所用忧在用者难佩之
非其人匣中自长叹我老众所易屡遭非意干惟有王 通堦庭秀芝兰知子后必大故择刀
所便屠狗非不用一歲六七剗欲试百链刚要须更泥蟠作诗铭其背以待知者防

与王郎昆仲及儿迈绕城观荷花二首

苏轼

昨夜雨鸣渠晓来风袭月萧然欲秋意溪水清可啜环城三十里处处皆佳絕蒲莲浩如海时
见舟一叶此间真避世青莢低白髮相逢欲相问已逐惊波没

清风定何物可爱不可名所至如君子草木有嘉声我行本无事孤舟任斜横中流自偃仰适
与风相迎举杯属浩 乐此两无情归来两溪间云水夜自明

送俞节推【尚之子尚字退翁】 苏轼

吴兴有君子淡如朱丝琴一唱三叹息至今有遗音嗟余与夫子相避如参辰【退翁官于蜀
余在京郎余归而退翁去及余官于吴兴则退翁亡矣】犹喜见诸郎窈然清且深异时多良

士末路防初心我生不有命其肯枉尺寻

东坡七首 苏轼

余至黄二年日以困匮故人马正卿哀余乏食为于郡中请故营地数十亩使得躬耕其中地既从荒为茨棘瓦砾之场而岁又大旱垦辟之劳防力殆尽释耒而叹乃作是诗自愍其勤庶几来岁之入以忘其劳焉废垒无人顾颓垣满蓬蒿谁能损防力岁晚不偿劳独有孤旅人天穷无所逃端来拾瓦砾岁旱土不膏崎岖草棘中欲刮一寸毛喟然释耒叹我廩何时高

荒田虽浪莽高庳各自适下湿种秔稻东原蒔枣栗江南有蜀土桑果已许乞好竹不难栽但恐鞭横逸仍须卜佳处规以安我室家僮烧枯草走报暗井出一饱未敢期瓢饮已可必

自昔有防泉来从远岭背穿城过聚落流恶壮蓬艾去为柯氏陂十亩鱼虾防岁旱泉亦竭枯萍粘破块昨夜南山云雨到一犁外 然寻故渎知我理荒芸泥芹有宿根一寸嗟独在雪芽何时动春鸠行可脍【蜀人贵芹芽脍杂鸠肉作之】

种稻清明前乐事我能数毛雨暗春泽针水闻好语【蜀人以细雨为雨毛稻初生时农夫相语稻针水矣】分秧及初夏渐喜风叶举月明防露上一一垂珠缕秋来霜穗重颠倒相撑柱但闻畦陇间蚱蜢如风雨【蜀中稻熟时蚱蜢羣飞田间如小蝗步而不害稻】新春便入甑玉粒照筐筥我从食官仓红腐等泥土行当知此味口腹吾已许

良农惜地力幸此十年荒桑柘未及成一麦庶可望投种未逾月覆块已苍苍农夫告我言勿使苗叶昌君欲富饼饵要须纵牛羊再拜谢苦言得饱不敢防

种枣期可剥种松期可斲事在十年外吾计亦已愒十年何足道千载如风雷旧闻李衡奴此防拟可学我有同舍郎官居在灊岳【李公择也】遗我三寸柑照坐光卓犖百栽傥可致照坐春冰渥想见竹篱间青黄垂屋角潘子从不调沽酒江南村郭生本将种卖药西市垣古生亦好事恐是押衙孙家有十亩田无时容叩门我穷交旧绝三子独见存从我于东坡劳饷同一飧可怜杜拾遗事与朱阮论吾师卜子夏四海皆弟昆

冬至日赠安节 苏轼

我生几冬至少小如昨日当时事父兄上寿拜脱膝十年阅凋谢白髮催衰疾瞻前惟兄三顾后子由一近者隔涛江远者天一壁今朝复何幸见此万里侄忆汝总角时啼笑为梨栗今来能慷慨志气坚鐵石诸孙行复尔世事何时毕诗成却超然老泪不成滴

陈季常见过二首 苏轼

仕宦常畏人退居还喜客君来輒馆我未觉鸡黍窄东坡有奇事已种十亩麦但得君眼青不

辞奴饭白送君四十里只有一防风江边千树柳落我酒杯中此行非远别此乐固无穷但愿长如此往来一生同

初秋寄子由 苏轼

百川日夜游物我相随去惟有宿昔心依然守故处忆在懷远驿闭门秋暑中藜羹对书史挥汗与子同西风忽凄厉落叶穿户牖子起寻袂衣感叹执我手朱颜不可恃此语君勿疑别离恐不免功名定难期当时已凄防况此两衰老失涂既难追学道恨不早买田秋已议筑室春堂成雪堂风雨夜已作对床声

过建昌李野夫公择故居 苏轼

彭蠡东北源庐阜西南麓何人修水上种此一双玉思之不可见破宅余脩竹四隣戒莫犯十亩森如束我来仲夏初解箨呈新緑幽鸟向我鸣野人留我宿裴回不忍去防月挂乔木遥想他年归解组巾一幅对床老兄弟夜雨鸣竹屋卧听隣寺钟书窓有残烛

栖贤三峡桥 苏轼

吾闻太山石积日穿线溜况此百雷霆万世与石鬪深行九地底险出三峡右长输不尽溪欲满无底窞跳波翻潜鱼震响落飞狖清寒入山骨草木尽坚瘦空蒙烟霭间倾动金石奏弯弯曲飞桥出敛敛半月馥玉渊神龙近雨雹乱晴书垂瓶得清甘可咽不可

高邮陈直躬处士画鸂 苏轼

野鴈见人时未起意先改君从何处防得此无人态无乃槁木形人禽两自在北风振枯苇防雪落璀璨惨淡云水昏晶荧砂砾碎弋人怅何慕一举 江海

次韵玉覲正言喜雪 苏轼

圣人与天通有诏寛狱市好语夜传街湿云朝覆砌纷然退朝后色映宫槐媚欲夸翦刻工故上朱蓝袂我方执笔待未敢书上瑞君犹伏阁争高论亦少慰霏霏止还作盎盎风与气神龙从潜伏一怒势必倍行当见三白拜舞懽万歳归来饮君家酣咏追既醉

故李承之待制六丈挽词 苏轼

青青一寸松中有梁栋姿天骥堕地走万里端可期世无阿房宫可建五丈旗又无穆天子西征燕瑶池材大古难用老死亦其宜丈夫恐不免岂患莫已知公如松与骥少小称伟竒俯仰自廊庙笑谈无 夷清朝竟不用白首仍忧时愿斩横行将请烹干没儿言虽不见省坐折奸雄窺嗟我去公从江湖生白髭归来耆旧尽零落存者谁比公嵇中散龙性不可羈疑公李北

海慷慨多雄词凄凉五君咏沈痛八哀诗邪正从乃明人今属公思九原不可作千古有余悲

送范纯粹守庆州 苏轼

才大古难用论高常近迂君防赵魏老乃爲滕大夫浮云无根蒂潢潦能须防知经几成败得见真贤愚羽旄照城阙谈笑安边隅当年老使君赤手降于菟诸郎更何事折箠鞭其雏吾知邓平叔不鬪月支胡

送千乘千能两姓还乡 苏轼

治生不求富读书不求官譬如饮不醉陶然有余欢君防庞德公白首终泥蟠岂无子孙念顾独遗以安鹿门上冢回牀下拜龙鸾躬耕竟不起耆旧节独完念汝少多难冰雪落绮纨五子如一人奉养真色难烹鸡独餽母自飧苜蓿盘口腹正累人宁我食无肝西来四千里敝袍不言寒秀眉似我兄亦复心闲宽忽然舍我去歲晚留余酸我岂轩冕人青云意先防汝归蒔松菊环以青琅玕桤陰三年成可以挂我冠清江入城郭小圃生防澜相从结茅舍曝背谈金銮

故周茂叔先生濂溪 苏轼

世俗 名实至人疑有无怒移水中蟹爱及屋上乌坐令此溪水名与先生俱先生本全德廉退乃一隅因抛彭泽米偶似西山夫遂即世所知以为溪之呼先生岂我辈造物乃其徒应同柳州柳聊使愚溪愚

欧阳叔弼见访道陶渊明事因语及元载之死叹

其识有浅深退作此诗 苏轼

渊明求县令本缘食不足束带向督邮小屈未为辱翻然赋归去岂不念穷独重以五斗米折腰营口腹如何元相国万钟不满欲胡椒铢两多何用八百斛以此杀其身何啻抵鹄玉往者不可悔吾其返自烛

竹间亭小酌懷欧阳叔弼季弼呈赵景貺陈履常

一首 苏轼

歲暮自急景我闲方缓觴醉余西湖晚步转北渚长地坐略少长意行无涧冈从知荠麦青稍喜榆柳黄盎盎春欲动防防夜未央水天鸥鹭静月雾松桧香抚景方婉婉懷人重凄凉岂无一老兵坐念两欧阳我意正麋鹿君才亦圭璋此防恐难从此欢不可防

东府雨中别子由 苏轼

庭下梧桐树三年三见汝前年适汝陰见汝鸣秋雨去年秋雨时我自广陵归今年山中去白首归无期客去莫叹息主人亦是客对牀定悠悠夜雨空萧瑟起折梧桐枝赠汝千里行归来知健否莫忘此时情

过高邮寄孙君孚 苏轼

过淮风气清一洗尘埃容水木渐幽茂塘蒲杂游龙可怜夜合花青枝散红茸美人游不归一笑当谁供故园在何处已偃手种松我行忽失路归梦山千重闻君有负郭二顷收横纵卷野毕秋获殷牀闻夜春乐哉何所忧社酒粥面醲宦游岂不好毋令到千钟

次韵定慧钦老见寄 苏轼

闲居蓄百毒救彼跛与盲依山作陶穴掩此暴骨横区区效一溉岂能济含生力恶不已出时哉非汝争

江月五首 苏轼

岭南气候不常吾尝云菊花开时乃重阳凉天佳月即中秋不须以日月为断也今歲九月残暑方退既望之后月出愈迟然余尝夜起登合江楼或与客游丰湖入栖禅寺叩罗浮道院登逍遥堂逮晓乃归杜子美云四更山吐月残夜水明楼此殆古今絕唱也因其句作五首仍以残夜水明楼为韵

一更山吐月玉塔卧微澜正似西湖上涌金门外防冰轮横海濶香雾入楼寒停鞭且莫上照我一杯残二更山吐月幽人方独夜可怜人与月夜夜江楼下风枝从未停露草不可借归来掩关卧唧唧虫夜话三更山吐月栖鸟亦惊起起寻梦中游清絕正如此驱云扫众宿俯仰迷空水幸可饮我牛不须违洗耳四更山吐月皎皎为谁明幽人赴我约坐待玉绳横野桥多防板山寺有防行今夕定何夕梦中游化城五更山吐月窓迥室幽幽玉钩还挂户江练却明楼星河澹欲晓鼓角冷知秋不眠翻五咏清切变蛮讴

迁居之夕闻邻舍儿诵书欣然而作

苏轼

幽居乱蛙黾生理半人禽聒然已可喜况闻弦诵音儿声自圆美谁家两青衿且欣习齐咻未敢笑越吟九龄起韶石姜子家日南吾道无南北安知不生今海濶尚挂斗天高欲横参荆棘短墙缺灯火破屋深引书与相和置酒仍独斟可以侑我醉琅然如玉琴

次韵子由所居 苏轼

幽居有古意义井分西墙谁言三伏热止须一杯凉先生坐忍渴羣器自披猖众散徐酌饮逡巡味尤长

和陶渊明饮酒 苏轼

道防士失已出语辄不清江左风流人醉中亦求名渊明独清真谈笑得此生身如受风竹掩冉众叶惊俯仰各有态得酒诗自成

和陶渊明愁诗楚调示庞主簿及邓治中

苏轼

当欢有余乐在戚亦頽然渊明得此理安处故有年嗟我与先生安处良奇偏人间少宜适惟有归耘田我昔堕轩冕毫厘真市防归来卧重裯忧愧自不眠如今破茅屋一夕或三迁风雨睡不知黄叶满枕前宁当出怨句惨惨如孤烟但恨不早悟犹推渊明贤

和陶渊明杂诗 苏轼

真人有妙观俗子多妄量区区劝粒食此岂知子房我非徒跣相终老怀未央兔死缚淮陰狗功指平阳哀哉亦可羞世路皆羊肠

和陶渊明庚戌歲九月中于西田获早稻

苏轼

蓬头二獠奴谁谓愿且端晨兴洒扫罢饱食不自安愿治此圃畦少资主游观昼功不自觉夜气乃潜还早韭欲争春晚松先破寒人间无正味美好出艰难早知农圃乐岂有非意干尚恨不持鋤未免骅我顏此心苟未降何适不间关休去复歇去食菜何所叹

和渊明始作镇军参军经曲阿 苏轼

虞人非其招欲往畏简书穆生责醴酒先见我不如江左古弱国强臣擅天衢渊明堕诗酒遂与功名踈我生值良时朱金义当紆天命适如此幸收废弃余独有愧此翁大名难久居不思犧牛 兼取熊掌鱼北郊有大赆南冠解囚车眷言罗浮下白鹤返故庐

和渊明咏三良 苏轼

此生太山重忽作鸿毛遗三子死一言所死良已防贤哉晏平仲事君不以私我岂犬马哉从君求蓋帷杀身固有道大节要不亏君为社稷死我则同其归顾命有治乱臣子得从违魏颗

真孝爱三良安足希仕宦岂不荣有时纒忧悲所以靖节翁服此黔娄衣

和陶渊明贫士 苏轼

夷齐耻周粟高歌诵虞轩产禄彼何人能致绮与园古来避世士死灰或余烟末路亦可羞朱墨手自研渊明初亦仕弦歌本诚言不乐乃径归视世差独贤

夏昼 章望之

一日常百刻转若车轮忙千日十万刻百年能心长達者齐古今一生甚防茫夏日岂为永而足以较量人世不足惜行善乃自彰无及间暇时般乐为淫荒夷齐饿人者顏闵非公王其人品孰亚周氏与虞唐亦用仁义积岂今身未亡富贵无可恃莫与公道强夜思昼以力四序皆流光示君夏昼诵惕惕其自伤

宿简寂观 袁 陡

名山崇秘祠终夜得清赏真气溢空浮流泉随砌响林峦片月散殿阁高风行天际斗杓直庭中盘石横【即六修青朝斗之石】逸人今何之故岭不改秀白鹤唳松梢青灯见在寥恍追汗漫驾深悟逍遥言四顾羣动寂寘心归灝元再游云居【登山有三路去冬自防潭曰西庄而上取姚田庄路唯麦庄一路未行】

袁 陡

风吹岭头树似欲招行客缘云过絶顶复见紫霄宅平观三百里下视八千丈隼击九秋严鹏展万里合五老镇相望西岫天与敌可笑培塿羣亦自矜寸碧氛埃卷宇宙鴈防下川泽既谐惠智心若蹈圣贤域危亭据中峰回抱竦天壁沈沈古帝坐左右列防稷举头河汉通直欲攀南极合奏天地籟两耳清历历吁嗟万类防胡为竞朝夕安知太清上我方适所适尚思西巘路去冬蹶双屐高兴挹洪厓大句鼓天力到今岩壑间浩浩起金石安得少陵翁物外讲新格重来羈鞅在欲隐世累迫多谢受命松长存歲寒色

覆验余姚道中 王 存

一夫死非命淶验更两吏一囚坐法诛三覆与众弃去年交趾败杀戮无贱贵江淮屡歲眚积殍沟壑秽圣人于赤子爱重若彼至谨小以遗大谁其原帝意

杂兴三首 鲜于侁

幽居观物变天道固盈虚炎取日方炽防陰一已生凉风动野草桃李先飘零蝸蟠集高柳络纬响空庭愁心独耿耿宵梦竟难成

一气斡元造为功未尝烦羣生自委化天地亦何言鳧胫不可增楮叶不可镌欲益固为损劳心非自然不见平阳侯醇酒聊终年

三王贵养老取重在乞言酒醴副佳肴黄髮斯皤然朝廷本忠厚风俗亦变迁岂意汉道防侍中惟少年耆旧无脩问李公所以难

新堂夜坐月色皎然由连理亭信步庭中徘徊从

之因为五言一首 鲜于侁

秋风动防凉天雨新霁后闲斋独隐几明月在高柳振衣步庭下颢气入襟袖天空云汉明隐约辨列宿苍苍松桧上零露飞欲流【去声】脱叶满闲园繁华迨衰朽清宵望蟾彩宜付一杯酒多病谢樽罍城头转寒漏

海州观放鹞搏兔不中而飞去 沈存中

秋霜濯空林暮日在峰顶冥冥起长风稍稍絶遗影骁禽值猛搏俯取不待顷岂非求者乖矫翮成远骋未能谢榛芥那用遽悻悻此心竟可怜得失未宜病

观余姚海氛 谢景初

海上风与雨未朕先气升泽卤杂山云蓊郁相薰蒸交语面已障安辨丘与陵衣襦带革缓臭腥殊可憎自非昌其阳疾病得以乘君子却陰邪何必医师能

余姚董役海隄有作 谢景初

五行交相陵海水不润下处处壞堤防白浪大于马顾予爲其长恐惧敢暂舍董众完筑塞防履率旷野使人安于生兹不羞民社调和陰与阳自有任责者

法喜堂 谢景初

虚堂避风雨结【阙】不务壮外饰无髣髴置物况容长开篋药剂灵拈碁白黑抗阶花澹亦天庭石碧交向出门鸟雀喧燕处物我防吴俗夸有素佛徒侈相尚独能守质静坐以矫流宕栖之果自喜何须山海上

村居 文与可

日影满松窓云开雨初止晴林梨栗熟晓巷儿童喜牛羊深涧下鳧鴈寒塘里田父酒新成餠瓮馈隣里

新晴山月 文与可

高松漏疎月落影如画地徘徊爱其下夜久不能寐怯风池荷卷病雨山果坠谁伴予苦吟满林啼络纬

属疾梧轩 文与可

高梧覆新叶满院发华滋白日一何永清陰闲自移暖虫垂到地晴鸟语多时病肘倚枯几泊然忘所思

宋文鉴卷十八

卷十九

钦定四库全书

宋文鉴卷十九

宋吕祖谦编

五言古诗

买炭 苏辙

苦寒搜病骨丝纆莫能御折薪燎枯竹勃郁烟充宇西山古松栢材大招斤斧根槎委溪谷龙伏熊虎踞挑抉靡遗余陶穴付一炬积火变深薰牙角犹忿怒老翁睡破毡正昼出无屨百钱不满篮一坐幸至莫御炉歲增贡圜直中常度閭閻不敢售根节姑付汝升平百年后地力已难富知夸不知嗇俛首欲谁诉百物今尽然岂惟一炭故我老或不及预为子孙惧

早行 孔文仲

客兴谓已旦出视见落月瘦马入荒陂霜花重如雪海风吹万里两耳冻几脱歲晏已苦寒近北尤凜冽况当清晓行邇此原野濶笠飞带绕颈指强不得结农家烟火防炙手粗可热岂能迂我留而就苟且活仰头视四宇夜气亦渐豁苦心待正书白日想不缺

逍遥亭 潘兴嗣

作亭名逍遥此理诚不虚寬于一天下原宪惟桑枢况我卜清旷风雨庇有余方池容防灋小径足萦迳花木颇窈窕松筠亦扶疎鸣蛙送鼓吹好鸟来笙竽可琴亦可咏可饮亦可娛盘虽无下筯賔食亦有鱼恢论或申旦隐几忘移晷因来展足眠醉倒从人扶率尔但付暢因烦而领无邺侯三万轴方朔五车书弃置复弃置任自相贤愚无妨吾逍遥此乐诚何如

师道 潘兴嗣

师道从不振小儒咸自私破崖求圭角务出已新奇恻恻去圣远六经秦火隳不有传授学涉猎安所为汉儒守一经学者如云随承习虽未尽摸法有根基荐绅立朝廷开口应万机附对皆防经金石确不移熟烂见本末较然非可欺吾愿下学官各立一经师务尽道德业不取章句辞庶几昔人风炳然复在兹

过百里大夫冢 黄庭坚

行客抱忧端况复思古人何年一丘土不见石麒麟断碑略可读大夫事霸秦虞公纳垂棘将军西问津安知五羊皮自粥千金身末俗工媒孽浮言妬道真幸逢孟轲赏不愧防子魂

寄秉夷 黄庭坚

少时诵诗书贯穿数万字尔来窥陈编记一忘三二光阴如可玩老境翻手至良医曾折足說病迺真意

和子瞻粲字韵二首 黄庭坚

公材如洪河灌注天下半风日未尝撓昼夜圣所叹名世二十年穷无歌舞玩入宫又见妬徒友飞鸟散一饱事难谐五车书作伴风暗楼台鸡鸣自昏旦虽非锦绣赠欲报青玉案文似离骚经诗窥关雎乱贱生恨晚学曾未奉巾盥昨蒙双鲤鱼遠托郑人缓风义薄秋天神明还旧贯更磨荐祢墨推挽起疲儒忽忽未嗣音防阳归炭仁风从东来拭目望斋馆鸟声日日春柳色弄晴暖漫有酒盈樽何因见此粲

元龙湖海士毁誉各相半下牀卧许君上牀自永叹丈夫属有念人物非所玩坐令结欢客化为烟雾散武功有大略亦复寡朋伴咏歌思见之长夜鸣鸮旦东南望彭门官道平如按简书束缚人一水不能乱斯文媲拒鬯可用圭瓚盥诚求活国医何忍弃和缓开疆日百里都内钱朽贯铭功甚俊伟迺见儒生儒且当置是事勿求冰作炭上帝羣王府道家蓬莱馆曲股夏簟寒炙背冬日暖只令文字垂万世星斗粲

寄师载 黄庭坚

齐地谷翔贵排门无防饋二仲有防奉亲亦良勤原田水洗洗何时稼如云无民愿丰歲政防不防君

过家 黄庭坚

络纬声转急田车寒不运儿时手种柳上与云雨近舍傍旧佣保少换老欲尽木郁苍苍田园变畦畛昭延屈父党劳问走防亲归来翻作客顾影良自哂一生萍托水万事雪侵鬓夜阑风陨霜干叶落成阵灯花何故喜大是报书信亲年当喜惧儿齿欲毁亂系船三百里去梦无一寸

上冢 黄庭坚

自公返蓬荜税驾上丘陇霜露此日悲松楸十年拱養雏数羽毛初不及承奉康州断肠猿风枝割永痛少年不如人登仕无前勇髮踈牙齿摇鲸波怒号汹愿为保家子敢议世轻重称觴太夫人鱼菜贍庖供

题王黄州墨迹后 黄庭坚

掘地与防木智不如机舂圣人懷余巧故为万物宗世有斲泥手或不待郢工往时王黄州谋国极匪躬朝闻不及夕百壬避其锋九鼎安盘石一身转秋蓬浮云当日月白髮照秋空诸君发蒙耳汲直与臣同

和张文潜赠晁无咎二首 黄庭坚

以灵故焦雉以文故翳本心如日月利欲食之既后生玩华藻照影终没世安得八紘置以道猎众智谈经用燕説束弃诸儒传滥觞虽有罪末派弥九县张侯真理窟坚壁勿与战难以口舌争水清石自见

留王郎 黄庭坚

河外吹沙尘江南水无津骨肉常万里寄声何由频我随简书来顾影将一身留我左右手奉承白头亲小邦王事略虫鸟声无人王生解鞍马夜语鸡唤晨母慈家人肥女慧男垂绅有田为酒事豚韭及秋春生涯得如此旧学更光新索去何草草少留慰艱勤百年才一炊六籍经几秦要知胸中有不与迹同陈郢人懷妙质聊欲运吾斤

和孔常父雪 黄庭坚

春皇赋上瑞来宁黄屋忧下令走百神大云庇九丘风声将仁气艷艷生瓦沟寒花舞零乱表里照皇州千门委圭璧晓日不肯收元年冬无泽穴处长螟蠹两宫初盥食补袞献食筹有道四夷守无征万邦休耆年秉国论泾渭极分流辍耒入班品逸民尽归周股肱共一体间不容戈矛人材如金玉同美异刚柔政须众贤和乃可踈共毆改 张敞法病十九已瘳王指要不匿蚀非日月羞桑林请六事河水问九畴天意果然得 功与吾谋此物有嘉德占年在麦秋近臣知天喜玉色动冕旒儒馆无他事作诗配崇丘

次韵荅邢惇夫 黄庭坚

为山不能山过在一簣止渥洼骐驎儿堕地志千里岷江初滥觞入楚乃无底将升圣人堂道固有廉陛邢子好少年如世有源水方求无津涯不作蛙井喜儿中兀老苍趣造甚竒异过阅王公门袖中有漫刺别来阻河山望远每障袂斯文何千载有志常寡遂后生文楚楚照影若孔翠不应太 草晞价咸阳市雨作枕簟秋官闲省中睡梦不到汉东茗椀乃为崇闻君肺渴减颇复佳食寐读书得新功来鴈寄一字

题竹石牧牛 黄庭坚

野次小峥嵘幽篁相依緑阿童三尺捶御此老觳觫石吾甚爱之勿遣牛砺角牛砺角尚可牛

鬪残我竹

赠秦少仪 黄庭坚

汝南许文休马磨自衣食但闻郡功曹满世名籍籍渠命有显晦非人作通塞秦氏多英俊少游眉最白颇闻鸿鴈行笔皆万人敌吾蚤知有覲而不知有覲少仪袖诗来剖蚌珠的烁乃能持一镞与我箭锋直自吾得此诗三日卧向壁挽土不能寸推去輒数尺才难不其然有亦未易识

谢公定和二范秋懷 黄庭坚

西风一叶脱迹已不可扫巷有白马生朝回焚谏草谁云事君难是亦父子间所要功补衮不言能犯顏

宿旧彭泽懷陶令 黄庭坚

潜鱼愿深 渊明无由逃彭泽当此时沉冥一世豪司马寒如灰礼乐卯金刀歲晚以字行更始号元亮凄其望诸葛肮脏犹汉相时无益州牧指挥用诸将平生本朝心歲月阅江浪空余诗语工落笔九天上向来非无人此友独可尚属予刚制酒无用酌杯盎欲招千载魂斯文或宜当

题宛陵张待举曲肱亭 黄庭坚

仲蔚蓬蒿宅宣城诗句中人贤忘巷陋境胜失途穷寒殖书万卷零乱刚直胸偃蹇勲业外啸歌山水重晨鸡催不起拥被聽松风

和邢惇夫秋懷二首 黄庭坚

王度无畦畛包荒用憑河秦收郑渠成晋得楚材多用人当其物不但轴与轂六通而四辟玉烛四时和相如用全赵留侯开有汉名登泰山重功略天下半让颇封韩彭事成羣凝泮天道常曲全小智螫后患

次谢与迪所作竹 黄庭坚

吾宗墨修竹心手不自知天公造化鑪揽取如拾遗风雪烟雾雨荣悴各一时此物抱晓节君又润色之抽萌或发石悬絙有陆危林梢一片雨造次以笔追猛吹万籁作防凉大音稀霜兔束豪健松烟泛砚肥盘桓未落笔落笔必中宜今代捧心学取笑如东施或可遗巾幘选慙如辛毗生枝不应节乱叶无所归非君一起予衰病岂能诗忆君初解鞍新月挂弯眉夜月上金镜坐叹光景驰我有好练绢晴明要防期漪漪淇园姿此君有威仪愿作数百竿水石相因依

它年风动尘洗我别后思开图慰满眼何时遂臻兹

次韵杨明叔见钱十首 黄庭坚

平津喜牧豕炊飞能斩蛟终借一汲黯淮南解兵交杨子有直气未忍死草茅引之入汉朝谁为续弦胶杨君清渭水自流浊泾中今年贫到骨豪气似元龙男儿生世间笔端吐长虹何事与秋萤争光蒲苇从事随世滔滔心欲自得得杨君为已学度越辈流百坐扞故衣虱垢袜春汗黑睥睨纨袴貌可饮三斗墨清浄草 学西京有子云太尉死宗社大鸟泣其坟寂寥向千载风流被仍昆富贵何足道圣处要防勲桑舆金石交既别十日雨子舆裹饭来一笑相告语杨君困箠瓢诸公不能举傥可从我归沙头驻鸣舫山围少天日孤鬼能作妖睽闪载一车猎人用鸣梟小智窘流俗蹇浅不能超安得万里沙霜晴看射雕元之如砥柱大年若霜鹗王杨立本朝举世作郭郭观公有胆气似可继前作丈夫存远大胷次要落落虚心观万物险易极变态皮毛剥落尽唯有真实在侍中乃珥貂御史即冠豸顾影或可羞短蓑钓寒濑松柏生涧壑坐阅草木秋金石在波中仰看万物流肮脏自肮脏伊优自伊优但观百世后传者非公侯老作同安守蹇足信所便胸中无水镜敢当吏部铨恨此虚名在未脱世纠缠梦作白鸥去江南水如天

拜刘凝之画像 黄庭坚

弃官清颍尾买田落是湾身在菰蒲中名满天地间谁能四十年保此清浄退往来涧谷中神光射牛背

跋子瞻和陶诗 黄庭坚

子瞻谪岭南时宰欲杀之饱吃惠州饭细和渊明诗彭泽千载人东坡百世士出处虽不同风味乃相似次徐仲车因娄行父见寄之诗 黄庭坚

前朝老诸生太半正丘首投荒万里归烦公问健否往时望江宰今为夏津吏它日可教之玉音尚无弃

游蒋彦回玉芝园 黄庭坚

春生潇湘水风鸣涧谷泉过雨花漠漠防晴絮翩翩名园上朱阁观后复观前借问昔居人岑绝无炊烟人生须富贵河水清且涟百年共如此安用涕潺湲蒋侯真好事杖屨喜接连车载溪中骨堆排若差肩厌看孔壬面丑石反成妍感君劝我醉吾亦无间然乱我朱碧眼空花坠便翺行动须人扶那能金石坚爱君雷式琴汤汤发朱弦但恨赏音人太半随逝川平生有诗病如痼不可痊今当痛自改三衅复三湔

沐浴有感 彭汝砺

去垢如去邪不欲留毫分髮不止一沐身不止三熏如何迷本原浴德不自勤区区养槭棘俯仰愧前闻

就食 杨蟠

未知田上劳徒厌鼎中味及与农事接方惊食者贵余生寡营求念此岂易致况敢怀寸禄平居但羞愧

古兴 沈辽

我不叹白髮安得新少年往者不失势后来岂能贤世间亦多士倚伏良有緣寄语夸夺子古人已皆然

濉阳 徐积

尝闻唐李氏世号为贤妻以力营七丧或谓难庶防孰知蔡家妇其事乃同之岂特在中饋无往而无仪孝于其所尊慈于其所卑既知义所在能终义所为我生至此极我嫁逢百罹其属死略尽其骨俱无归身为未亡人心乃真男儿以已任其责无忘须防时但恐事不济安知恤寒饥乃捐奉生具而为送亡资面不御膏沐首不加冠笄金珠鬻于市文绣容何施更无囊中装唯有身上衣殆将截其髮幸苟完其肌所得蓋良苦所积從细防如此十年久犹以为支离日时卜诸良宅兆相厥宜一举十八丧一旦得所依手自植松楸身亦沾涂泥何暇裹两足但知勤四肢居者叹于室行者泣于岐鸟亦助叫号人思操蓂榘冥冥长夜魂所获喜可知郁郁佳城中不为中道尸卒办其家事少慰而心悲义深海可涸行坚山可摧孤诚贯白日幽光凌虹霓吾闻古烈女荦荦非无奇一死蓋易处一节亦易持至如张氏者使人尤歔歔谁为孝妇传谁为黄绢碑亦有淮上翁为述濉阳诗移书太史氏无令兹逸遗

别三子 陈师道

夫妇死同穴父子贫贱离天下寧有此昔闻今见之母前三子后熟视不得追嗟乎胡不仁使我至于斯有女初束髮已知生离悲枕我不肯起畏我從此辞大儿学语言拜揖未胜衣唤爷我欲去此语那可思小儿襁褓间抱负有母慈汝哭犹在耳我怀人得知

示三子 陈师道

去远即相忘归近不可忍儿女已在眼眉目略不省喜极不得语泪尽方一晒了知不是梦忽忽心未穩

田家 陈师道

鸡鸣人当行犬鸣人当归秋来公事急出处不待时昨夜三尺雨灶下已生泥人言田家乐尔苦人得知

送蘓公知杭州 陈师道

平生羊荆州追送不作远岂不畏简书放麋诚不忍一代不数人百年能防见昔如马口防今为禁门铉一雨五月凉中霄大江满风帆目力短江空歳年晚

送李奉议亳州判官 陈师道

祁氏号外府藏室多异书自公有余力一览意何如为学虽日益受益不受诬正须高着眼濠梁有游鱼观究文忠公家六一堂图书 陈师道

生世何用早我已后此翁颇识门下士略已闻其风中年见二子已复歳一终呼我过其庐所得非所蒙先朝羣玉殿冠佩环羣公神文焕王度喜色见天容御榻谁复登帝书元自工黄绢两大字一览涕无从似欲托其子天意人与同厯数况有归敢有贪天功集古一千卷明明并羣雄谁为第一手未有百世公庙器刻科斗寶樽播华虫缅怀弁服士酬献鸣璫琬琰插架一万轴遗子以固穷素琴久绝弦碁酒颇阙供向来一瓣香敬为曾南丰世虽嫡孙行名在恶子中斯人其已远千歳幸一逢吾老不可待草露湿寒蛩

咸平读书堂 陈师道

昔人三百篇善世已有余后生守章句不足供啜哺一登吏部选笔砚随扫除闲阁书眉妩隔屋闻歌呼奉公用汉律宁复要诗书俛首出跨下枉此七尺躯今代陶朱公不作大梁屠计然得未用意得轻全呉为邦得畿县政密自计疎宁书下下考不奉命急符用意簿领外筑室课典谟平生五千卷还舍不间途旧事更汉唐稍以诗自娱复作无事饮醉卧拥青奴桃李春事繁轩窗昼景舒鸣屋鸠唤雨窥檐燕哺鷁休吏散篇秩修篁献笙竽聴然一启齿斯民免为鱼

次韵答晁无斁 陈师道

女生愿有家名妾以不聘田里亦慕君又恶不由正欲行不问涂已破宁顾甑耕蚕无一防庖井要三径还家忧患余挽须儿女竞十年宁有此一寒可无命平生晁夫子得士公室庆稍无车马音复作賓客请论文到韩李念旧説蘓郑长年防消息独语谁和应此生恩未报他日目不瞑归卧无好怀扣门有佳聴谁来雪霜后更觉天宇净少好老未工持刃授予柄

宋文鉴卷十九

卷二十

钦定四库全书

宋文鉴卷二十

宋吕祖谦编

五言古诗

寄杨道孚 张耒

士师我自出爽迈凌清秋年少不饮酒昏灯夜问囚君冢外大父听狱代其忧备饥朝煮饭驱蚊夜张帟狱成上府时稽颡呼张侯怒心临縲继相盗以戈矛无令市死厉请帝号重幽

旦起 张耒

漫漫东牖白开帷纳晨光欠伸推夜枕扣齿被朝裳瓦盎汲石泉漱 齿颊凉维兹孟夏初宿雨清高堂栖鸟起且啁露鷖鸣更藏悠悠晚花殷落落古柳苍西舍初鸣春东隣出求粮客马已别枥商车欲逾冈羲和一扬辉羣动皆扰攘有生无不求谁得偃于牀人生但如此勤苦亦可伤况我病倦翩飘飘信风翔永懷中林士栖志烟霞乡愿言寄旅迹栖托以徜徉

夏日杂感 张耒

士而懷其居孔子亦云非贤臣事晋侯夜载使逃齐酖毒比燕居君子不可懷乐小必害大安近远之迷野豕养骐驎当念和銓驰一饱愿即止防何非大鸡高贤意有在汲汲不敢违安能守槽枥长伴儿曹嬉

春日杂书 张耒

昨日为雨脩今晨天乃风障风谨自保通夕雪迷空脩一常失计尽脩力不供因之置不为拱手受祸凶当为不可懷任彼万变攻筑室如金石何劳计春冬此道简且安古来家国同

感遇 张耒

穰侯擅关中颇畏诸侯客搜车计已迟终困范公策庸夫吝富贵百计私自惜势移祸败至智巧竟何益至公览英俊直补乃无隙请看桑林饿亦脱赵子厄

昭陵六马 张耒

天将划隋乱帝遣六龙来森然风云姿飒爽毛骨开止驰不及视山立俨莫回长鸣视八表扰
扰万里台秦王龙凤姿鱼鸟不足摧腰间大白羽中物如风雷区区数竖子缚取如提孩手持
扫天箒六合无尘埃艰难济大业一一非常才惟时六骥足绩与英卫陪功成锵八鸾玉辂行
天街荒凉昭陵阙古石埋苍苔

斑竹 张耒

重瞳陟方时二妃盖老人安肯泣路傍洒泪留丛筠颇疑葛陂化防防留斑鳞慎勿脱水去人
世多埃尘

寓陈诗 张耒

我不知暑退但觉衣汗干颇恹庭中树湛然清以宽有物叫草根啾啾自相喧问知已新秋大
火流金丸天工变寒暑正尔事亦繁静观付一笑吾事宁相关但抚筋力健悠然佳意还喧喧
憎邻里砧杵乱人眠

余官粟有感 张耒

持钱余官粟日夕拥公门官价虽不高官仓常苦贫兼并闭困廩一粒不肯分伫待官粟空腾
价邀吾民坐视既不可禁之亦纷纭扰扰田亩中果腹才几人我欲究其原宏濶未易陈哀哉
天地间生民常苦辛

贺雨拜表 张耒

羣云雨事毕振旅不复阵扫天无一尘千里还绿润晨朝大明贺沙路万蹄印朝光泛翠瓦佳
气去人近颇闻避斧辰侑膳彻龙笋愿君爱物心从此至尧舜

田居 秦观

鸡号四隣起结束赴中原戒妇预为黍呼儿随掩门犁锄带晨景道路更笑喧宿潦濯芒屨野
芳簪髻根霁色披宿露春空正鲜繁辛夷茂横阜锦雉娇空园少壮已云趋伶俜尚鹄蹲蟹黄
经雨润野马从风奔村落次第集隔塍致寒温眷言月占好努力竞晨昏

海康书事五首 秦观

白髮坐钩党南迁海濒州灌园以糊口身自离苍头篱落秋暑中碧花蔓牵牛谁知把锄人旧
日东陵侯荔子无防何黄柑遽如许迂臣不惜日恣意移寒暑层巢俯云木信美非吾土草芳

自有时鸛鵙何關汝卜居近流水小巢依嶽岑终日数椽间但闻鸟遗音鑪香入幽梦海月明
孤斟鷓鴣一枝足所恨非故林培塿无松柏驾言出焉游读书与意防却扫可忘忧尺蠖以时
拙其信亦非求得归良不恶未归且淹留海康腊已酉不论冬孟仲杀牛挝祭鼓城郭为沸动
虽非尧历颁自我先人用大笑荆楚人嘉平猎云梦

孤愤吟二首 张商英

平津防武帝尧舜未为聪归来东阁士称颂比周公势利变人心上下交相蒙低顏望眉睫一
喜生春风优游卒兹歲安知朝野空

青青一本桑下可百夫息泠泠一井泉上有千人汲千里以为郡百里以为邑生齿岂不繁教
化繁尔力何事北窻人叹此徒劳职

接花 陈瓘

色红可使紫叶单可使千花小可使大子少可使繁天赋有定质我力能使迁自矜接花手可
夺造化权众闻悉惊詫遣我屡叹吁用智固巧矣天时可易欤我欲春采菊我欲冬赏桃汝不
能栽接汝巧亦徒劳雨露草必生雪霜松不死不死有本性必生亦时尔汝之所变易是亦时
所为时乎不可违何物不随时

文选楼 李廌

申辕应楚聘邹枚适梁苑藩侯喜賓客贤贤易鷹犬黄绮游汉庭羽翼繒缴远秦府十八公攀
附名益显昭明众才子文囿俾搜选高斋切浮云雉堞俯晴巘尚应魏河间笔削非大典

寄陈履常 邢居实

十年客京洛衣袂多黄尘所交尽才彦惟子情相亲防合能防日欢乐何遽央春风东北来飘
我西南翔骊驹已在门白日行且晚停觴不能饮将去更复返把腕捋髭须悲啼类儿女人生
非鹿豕安得常羣聚朝别河上梁暮涉關山道匹马逐非蓬离恨如春草去去日已遠行行泪
横臆昨日同袍友今朝异乡客来时城南陌始见梅花白回首汉江头黄梅已堪摘杖防登高
城极目迺千里落日下青山但见白云起遠望岂当归长歌涕如雨归心如明月幽梦过颍汝
抱膝长相思故人安可见忽枉数行书彷彿如对面纷纭輶轂下冠蓋争驰逐吹嘘多贤豪肯
复念幽独空斋聽夜雨深竹闻子规此情不可道此心君詎知

雨后出城马上作 邢居实

既雨天气佳防云淡如扫欲寻烟际钟骑马河邊草紫榘饱黄鹂人家夏蚕老田妇踏縑车隔
篱语音好嗟我一何愚读书浪枯槁不及此中人终年客长道

述怀 任伯雨

元符庚辰歲孟冬十二日任子丞大宗碌碌奉朝籍圣主访落初聽言劳日昃諫路员有阙求人恐不及谁谓方遴选邂逅首疎逖诏防忽中授闻命旦夕惕不是忧不合爱君忧失职既忧亦复喜不是贪禄秩平生慕古人素愿或可毕精神倍疏淪激昂登文石青云开九天清光亲咫尺每见情益交肝胆尽剖析敬承丁宁训重许以忠直自喜千载遇奋身遑他恤志欲收主威力先排巨室切齿愤钦永刻意望防稷不数千羊皮岂让一狐腋勤勤履霜戒不复虑不密问夜欲自劳百疏忽何益哀哉爱君心不能当众嫉投湘为独醒得罪因怀璧尚赖天德广阅歲已再谪仇人意未厌穷荒必投斥转海仅万里艰危备经歷有时遭 风天地如抹漆雪浪山崩頽轰逐飞霹雳扁舟甚桔槔俯仰颠倒立双檣卷欲折绳防水蘸蓆鲸鳄口垂涎喷咤烟雨集万怪竞周腥臊助嘘吸平生仗忠信安敢保瞬息寅緣脱鱼腹岛屿稍登陟天气郁欲流土色焦成赤草木蒸氛雾亭午日未出荒径少人行窸窣走虺蜴居民傍溪浒横崖户百十矮屋尽棚栏臭秽如圈枵家家啖菜粥杂米无十一小鱼与细鰕相尚珍鼎食鸟言纷嘲哂卉服盆蒙 顏色尽黄肿太半抱瘴疾其风贪以淫其俗拙以僻殆非人间世宜尔太荒閭我生本匹夫赋性自真率雅有江海志仕宦特牵迫一日偶遭际用舍何敢必但思忠邪分于国系休戚周嫠不恤纬我意何穷极漆女倚门啸我情第堙郁呜呼谋身者所宜念阴隲

春风 洪朋

春风吹桃李欵然满中园羣动不遑息胡蝶纷飞翻我亦感兹时步履绕林间顏色岂不好持久良独难置酒休其下聊复罄余欢君看桃与李成蹊亦无言

初行山 晁咏之

霏霏初蒸云落落欲坠石山深多晚花照水自红碧渔艇入烟小松竹凌烟直西风漾碧波扁舟恣崎侧客從北方来苦遭世俗迫登临虽夙愿山川多未识浩荡涉寒流跻攀并苍壁扞萝窺鸟道踏迳穷人迹清泉洗尘心山鸟惯幽客逸兴良未已日下千崖赤十载孙承公好具登山屐

王立之大裘轩 谢逸

小人拙生事三冬卧无帐忍寒东窗低坐待朝防上徐徐晨光熙稍稍气血畅薰然四体和恍若醉春酿此法秘勿传不易车百两君胡得此法开轩亦东向蕪公名大裘意岂在万丈但观名轩心人人如挟纊

闺恨 谢逸

汲井澣我衣伐石固我墉尘埃不被体寂无人迹通洋洋西江水我车不敢渡夙驾岂不早早行畏多露行止既有义离合亦有时众人岂无心不如我所之

酴醾依栢引蔓上冒其颠 崔 鷟

春风亦已老自厌丹采媚独留白雪花洒此千尺翠嗟哉珠笼冠缥缈冒佛髻幽香勿袭人恐
为真色累但愿保明姿终日奉清对要之万物伙污洁自有类

江月图 崔 鷟

冥冥一叶轻不知水与天独于颢气中仰见素璧圆超然狂道士起视清夜阑自拈白玉笛吹
此江月寒想当万籁息逸响流空烟我从江海来形留意先还何当买鱼篷追此水墨仙

雨余 鲍钦止

础润雨欲作好风每相先萧萧清入帘令我心洒然闭门倦永夏枕书日昏眠快此风雨余端
如濯飞泉垒山有佳趣草木更幽妍井华养文石香篆横云烟俯仰方丈间胜事亦可怜永怀
触热子我劳良独贤

寄友人 张 绎

有客厌事事防身山之幽寒暑不相贷乃有卒岁忧有生此有事简之成赘疣澄江本无浪不
如信虚舟六经力道要无以利心求一朝与理防万境真天游伊水正清冷子行无滞留西风
昨夜至送子驰中流落月洒残梦已着古岸头我病强送君是行良难俦异时青门下谁识东
陵侯

秋日书怀 毛 滂

秋日吐防明寒叶堕半碧娟娟竹防影冉冉香引脉窻明棐几净水石涵虚白茶开睡足眼苔
上嬾行屐屋寒无燕雀岂独少賔客顾我警露友伫此辽天翮相对虽不言孤高比三益迺来
世外心渐觉眼界窄儿时喜功名今念真戏剧平生翻羹手欲烂谁能炙岂待二顷田初无一
防宅第当营糟丘努力期百尺頽然寄疎慵坐看驹过隙韩郎食不足苦心定谁惜那知落英
繁吾食岂无夕举手谢飞鸢一防何劳吓

次韵毛达可给事秋怀念归 倪 涛

结茅远人村破屋水半扉凉叶堕清响空山转斜晖防官卧江汉素心久依依十年天涯秋摇
落防芳菲马蹄岁月去蝶梦东南飞平生丘壑志有言輒乖违不如孤征鸿春风自知归

赠赵正之 林敏功

君为稻田官君非力田科我今耕田夫为君奏田歌南亩茨梁稼东郊烟雨蓑田家不作苦奈

此歲暮何惘惘望有年一失成蹉跎立苗非不疎稊稗常苦多小人剥良善蓬蒿贱嘉禾去恶借老农芟夷戒骈罗夫君邦之彦妙年加切磋治国与治身此道终靡他人心不相遠如以斧伐柯愿君日显荣吾言期不磨

奉同程致道著作次鲍溶冬成荅客韵送赵叔问

奉议归南都 方元修

清秋不相借白髮日更多尘埃困烦促原野怀经过聊当倚滂润资以生吾禾岂不念离羣惊鹄宁释窠王孙别都去澹若依松萝暂别亦复难赓诗饮无何我行那尔尔渺邈逾江河賸须作佳句相我沧浪歌

张牧之竹溪 林敏修

张牧之隱于竹溪不喜与世接客来蔽竹窥之或韵人佳士则呼船载之或自刺舟与语俗子十反不一见怒骂相踵弗顾也人或以少漫郎余独喜与古人意合乃作竹溪诗

幽闲古城阴结屋清溪曲溪流湛回映上有青青竹漫郎欣得之綠髮咏空谷高风及前修胜趣随远瞩恶客徒扰人立谈非我欲麾去宁汝嗔真意聊自足或言不当尔往往相谤讟答云岂吾私恐作林泉辱源流别泾渭臭味同草木肯当百事胜容此一物俗独余嵇阮輩荡桨戒臣仆浊醪浇古胸日没还秉烛仆黍瓜葛后意气颇相属平生防两屐共老三径菊行年事无定此计诺已宿径须买牛衣儿亦荷书簏従子竹间游溪鱼剥寒玉

山行 曹 纬

日出过山头日入宿山下我行山亦行隱隱似奔马朝昏山送迎山意自倾写借问征途间谁如此山者

烛蛾 贺 铸

鬼蛾来翩翩慕此堂上烛附炎竟何功自取焚如酷感彼万动防保生在无欲不见青林蝉饮风聊自足

宋文鉴卷二十

卷二十一

钦定四库全书

宋文鉴卷二十一

宋吕祖谦编

七言古诗

禁直杨亿

凤楼鸳瓦蟾波湿众籁声沈百虫蛰仙盘云表露成霜何人夜半牛衣泣芝泥香熟封诏书河汉西倾移斗车陰风撼撼起庭树寒淅淅鸣宫渠千庐迭唱传宵警海山鼇背蓬壶顶金釭珠网结绮钱玉井银牀垂素绶前席受厘询硕生观书百斤须中程投籤乍应严鼓节求衣误聽苍蝇声渴乌漏尽繁星曙鱼钥建章开万户初日曈眈艳屋梁鸣鞭一声下天路

沧浪亭 欧阳修

子美寄我沧浪吟邀我共作沧浪篇沧浪有景不可到使我东望心悠然荒湾野水气象古高林翠阜相回环新篁抽笋添夏影老桤乱发争春妍水禽闲暇事高格山鸟日夕相啾喧不知此地几兴废仰视乔木皆苍烟堪嗟人迹到不遠虽有来路曾无縁穷竒极怪谁似子搜索幽隐探神仙初寻一迳入防密豁见异境无穷边风高月白最宜夜一片莹净铺琼田清光不辨水与月但见空碧涵漪涟清风明月本无价可惜祇卖四万钱又疑此境天乞与壮士憔悴天应怜鸱夷古亦有独往江湖波涛渺翻天崎岖世路欲脱去反以身试蛟龙渊岂如扁舟任飘瓦红蕖綠浪摇醉眠丈夫身在岂长弃新诗美酒聊穷年虽然不许俗客到莫惜佳句人间传希真堂东手种菊花十月始开 欧阳修

当春种花惟恐迟我独种菊君勿谓春枝满园烂张锦风雨须臾落颠倒看多易厌情不专鬪紫夸红随俗好豁然高秋天地肃百物凋零谁暇吊君看金蕊正芬敷晓日浮霜相照耀煌煌正色秀可飡藹藹清香寒愈峭高人避喧守幽独淑女静容羞窈窕方当摇落看转佳慰我寂寥何以报时携一罇相就饮如得贫交论久要我多难壮心衰迹与世人殊静躁种花不种儿女花老大安能逐年少

哭梅圣俞 欧阳修

昔逢诗老伊水头青衫白马渡伊流滩声八节响石楼坐中辞气凌清秋一饮百盏不言休酒酣思逸语更遒河南丞相称贤侯后车日载枚与邹我年最少力方优明珠白璧相报投诗成

希深拥鼻讴师鲁卷舌藏戈矛三十年间如转眸屈指十九归山丘凋零所余身百忧晚登玉墀侍珠旒诗老藿盐太学愁乖离防合谓无由此防天幸非人谋颌须已白齿根浮子年加我貌则不欢犹可强闲屡偷不觉岁月成淹留文章落笔动九州釜甑过午无饘馐良时易失不早收篋椽瓦砾遗琳璆荐贤转石古所尤此事有职非吾羞命也难知理莫求名声赫赫掩诸幽翩然素旆归一舟送子有泪流如沟和贾相公览杜工部北征篇 宋 祁

唐家六叶太平罢宫艳醉骨恬无忧孽虜诟天翠华出模糊战血腥九州干疮坤痍四海破白日杀气寒飕飕少陵背贼走行在采椽拾橡填饥喉眼前乱离不忍见作诗感慨陈大猷北征之篇辞最切读者心陨如摇辘莫肯念乱小雅怨自然流涕袁安愁才高位下言不入愤气郁屈蟠长虬今日奔亡匪天作向来颠倒皆庙谋忠骸佞骨相撑拄一燎同烬悲昆丘相君览古慨前事追美子美真诗流前王不见后王见愿以此语诒千秋

白鹞图【得黄荃事于景仁】 梅尧臣

双睛射空眼角耸筋爪入节鞬绦垂翅排霜刀毛缀甲雪色愁突秋云披当时始得不知价朝发海东夕九嶷世为奇俊玩不足夺质移神归画师而今推向深堂上燕雀屏绝宁来窥画师黄荃出西蜀成都范君能具知范云荃笔不取次自养鹰鸇观所宜毳毛植立各有态剜奇剔怪乃肯为寻常饲鹰多捕防捕防往往驱其儿其儿长大好飞走其孙卖防迭又衰范君语此亦有味欲戒近习无他移

送葛都官南归 梅尧臣

不羨新为赤县尹惟羨暂向江南归江南冪冪梅雨时风帆差差并鸟飞簪竿夹岸长若桅水笼畜鱼鲜且肥家在千山古溪上先应喜鹊噪门扉

和吴冲卿元防 梅尧臣

千官车马阊阖来昼漏始上阊阖开戢戢左右升龙进昨夜雪飞云作堆殿前冠劔鱼鳞立东风入仗旗脚回黄钟一奏寶扇掩玳帘卷起香雾排鸣梢未尽霹雳响翠辇已退黄金阶圣人端冕御法座大乐旅作声和谐羣公扑蹈丹墀下尚书奏瑞四夷懷乘輿却入更衣閣通天绛袍陞玉榻百拜称觞万歲闻两廊赐食簪裾匝曲传大定舞綴踈波旋烟斂飭宫车卫官解严多士退日光亭午气象舒吴君才笔天下杰归来作诗传石渠石渠秘邃无凡愚石渠酬唱皆严徐我慙短学复在后收余掇弃聊以书

谕学 孙 复

防观天地何云为茫茫万物争蕃滋羽毛鳞介各异趣披攘攫搏纷相随人亦其间一物尔饿食渴饮无休时苟非道义充其腹何异鸟兽安须眉人生在学勤始至不勤求至无由期孟轲苟况扬雄氏当时未必皆生知因其钻仰久不已遂入圣域争先驰既学便当穷遠大勿事声

病淫哇辞斯文下衰吁已从勉思驾说扶颠危擊暗毆聒明大道身与姬孔为藩篱是非丰頼
若不学慎无空使精神疲

渔翁 刘 敞

白头老翁披败蓑求鱼终日罩淮波波深水阔望不絶网目虽繁能几何大鱼鱣鱠入渊底小
鱼鯢鯢登网里手皴足趼吁可怜何不为网大如天

朱云 刘 敞

志士不忘弃沟壑勇士不忘丧其元伏鸡搏狸狗袭虎感激只在精神存汉朝凌替外戚盛五
岳振荡三辰昏臣彊主弱上不悟廷中唯唯谁能言朱生节义迈金石面劾不避师傅尊愿求
尚方斩马劔诛一厉百清其源天威振怒不我受利刃接颈雷霆奔当前折檻色不变命在顷
刻谁攀援昔时仲尼鲁司寇七日行戮端乾坤嗟哉此生志不就防防后土理其冤汉家社稷
变王氏张禹虚防师保恩卓然先见在物表佞臣叛国谁复论我愿乘云欸天阍巫阳掌梦招
其魂立朝謇謇辨邪正无复奸谀开幸门

道傍田家 司马光

田家老妪俱垂白败屋萧条无壮息翁携鎌索妪携箕自向薄田收黍稷静夜偷舂避债家比
明门外已如麻筋疲力敝不入腹未议县官租税促

虎图 王安石

壮哉非罽亦非防目光夹镜当坐隅横行妥尾不畏逐顾盼欲去仍踌躇卒然一见心为动熟
视稍稍摩其须固知画者巧为此此物安肯来庭除想当槃礴欲画时睥睨众史如庸奴神闲
意定始一扫功与造化论锱铢悲风防防吹黄芦上有寒雀惊相呼槎牙死树鸣老乌向之俛
嚼如哺鷃山墙野壁黄昏后冯妇遥看亦下车

张良 王安石

留侯美好如妇人五世相韩韩入秦倾家为主合壮士博浪沙中擊秦帝脱身下邳世不知举
国大索何能为素书一卷天与之谷城黄石非吾师固陵解鞍聊出口捕取项羽如婴儿从来
四皓招不得为我立弃商山芝洛阳贾谊才能薄扰扰空令绛灌疑

寄赠胡先生 王安石

孔孟去世遠矣信其圣且贤者质诸书焉耳翼之先生与予并世非若孔孟之遠也闻荐绅先
生所称述又详于书不待见而后知其人也叹慕之不足故作是诗先生天下豪杰魁胸臆广

博天所开文章事业望孔孟不复睥睨蔡与崔十年留滞东南州饱足藜藿安蒿莱独鸣道德惊此民民之闻者源源来高冠大带满门下奋如百蛰乘春雷恶人沮伏善者起昔时蹢躅今蹇回先生不试乃能尔诚令得志如何哉吾愿圣帝营太平补葺廊庙扶倾颓披旒发纓广耳目照彻山谷多遗材先取先生作梁柱以次构架桷与榱羣臣南向帝深拱戴仰堂陛方崔嵬

丙申歲余在京师乡人陈景回自南来弃其官得太子中允景回旧有地在蔡今将治园圃于其间以自老余尝有意于嵩山之下洛水之上买地筑室以为休息之馆而未果今景回欲诗遂道此意景回志余言异日可以知余之非戏云

尔苏洵

岷山之阳土如腴江水清滑多鲤鱼古人居之富者众我独厌倦思移居平川如手山水蹙恐我后世鄙且愚经行天下爱嵩岳遂欲买地安妻孥晴原漫漫望不尽山色照野光如濡民生舒缓无天札衣冠堂堂伟丈夫我今隐居未有所更后十载不可无闻君厌蜀乐上蔡占地百顷无边隅草深野阔足狐兔水种陆收身不劬谁知李斯顾秦宠不获牵犬追黄狐今君南去已足老行看嵩少当吾庐

和涣之深秋月夜书事 狄遵度

洞庭叶下凉飕飕冻天顽白凝不流圆月拟缺不忍缺轻露欲浮终未浮忆吹朱簾凤辇上更采紫芝云峤陬玉楼天半几千尺珠树玲珑悬上头

雨 狄遵度

高林风怒雨声黑小阁灯背人语阑谁知云外月高照定是叶间莺最寒时觉急飘愁未已似闻徐滴喜初翻骊驹北首榆关路天晴烟树沙碛宽

有窦复者世居镇戎能道边事 王 陶

君不见镇戎德顺弓箭手耕种官田自防守相团置堡御蕃军下视贼庭殊不有杀羊取骨燃艾炙试卜贼兵知入寇都校招呼入堡居堡外重围百里余墙低城小不难破贼箭如棚城上过堡中不及数十人且鬪且骂且欣欣登陴斫门谓平取应 死伤已无数窻间走箭射酋豪一箭已闻哭声举争将锦囊裹贼尸鸣金收众惟恐迟不惟城堡依然固吾众不伤毫与厘自从干戈动四鄙覆军杀将曾无耻朝廷未省遗边功何事此勲不闻纪安得天兵百万众尽如此辈坚且勇

大孤山 黄 庶

彭蠡百年南国襟万顷苍烟插孤岑不知天星何时落春秋不书不可寻石怪木老鬼所附兹

乃与水司浮沈鸣鵙大藤树下庙祭血不干年世深舳舻千里不敢越割牲洒酒来献斟我行不忍随人后许国肝胆神所歆落帆夜宿白鸟岸睥睨百绕寒藤陰银山大浪独夫险比干一片崔嵬心宦游遂去父母国心病若有山水淫江南画工今谁在拂拭东绢倾千金

通判国博命赋假山 陈襄

去年水潦百谷死居民无食食糟粃州之饿者数千人黄岩之民犹倍徙携持老少出城郭尽彻墙屋无居止鬻妻弃子人不售价例不复论羊豕白日市井闻号叫夜堆廊庑如虫豸县官哀怜发赈救一饭才得一盂尔出门未暇充喉咽已有数十填沟水我时过之不忍顾徃徃悲咽胸填委岂无智虑裨万一遽地不得号君耳钱侯作倅忠且仁悲怜饿殍如亲子曰开官廩与之食又令豪右发储峙昨日驰书白转运披陈肝肾献金矢更乞兵储二万斛民之大命方有倚侯从新年作假山自闻民饥不得视非无泉石可盘乐人今方瘁何能喜愿侯勿遽爱此山念此腰腊存狐蚁天无疫疠五谷熟生者保聚归田里此山之石坚不坚将与侯德无穷已与子由别于郑州西门之外马上赋诗一篇寄之

苏轼

不饮胡为醉兀兀此心已逐归鞍发归人犹自念庭帟今我何以慰寂寞登高回首坡陇隔惟见乌防出复没苦寒念尔衣裳薄独骑瘦马踏残月路人行歌居人乐僮仆怪我苦凄惻亦知人生要有别但恐岁月去飘忽寒灯相对记畴昔夜雨何时听萧瑟君知此意不可防慎勿苦爱高官职【尝有夜雨对牀眠之言故云耳】

送安惇秀才失解西归 苏轼

旧书不厌百回读熟读深思子自知他年名宦恐不免今日栖迟那可追我昔家居断还往著书不复窥园葵竭来东游慕人爵弃去旧学从儿嬉狂谋谬筭百不遂惟有霜鬓来如期故山松栢皆手种行且拱矣归何时万事早知皆有命十年浪走宁非痴与君未可较得失临别惟有长叹咨

送刘道原归覲南康 苏轼

晏婴不满六尺长高节万仞凌首阳青衫白髮不自叹富贵在天那得忙十年闭户乐幽独百金购书收散亡竭来东观弄丹墨聊借旧史诛奸强孔融不肯下曹操汲黯本自轻张汤虽然尺捶与寸刃口吻排擊含风霜自言静中阅世俗有似不饮观酒狂衣巾狼藉又屡舞傍人大笑供千场交朋翩翩去畧尽惟我与子犹徬徨世人共弃君独厚岂敢自爱恐子伤朝来告别惊何速归意已逐征鸿翔匡庐先生古君子挂冠两纪鬓未苍定将文度置膝上喜动邻里烹猪羊君归为我道姓字幅巾他日容登堂

和钱安道寄惠建茶 苏轼

我官于南今几时尝尽溪茶与山茗胸中似记故人面口不能言心自省为君细说我未暇试评其畧差可聴建溪所产虽不同一天与君子性森然可爱不可慢骨清肉膩和且正雪花雨脚何足道啜过始知真味永纵复苦硬终可録汲黯少戇寬饶猛草茶无頼空有名高者妖邪次顽犷体轻虽复强浮泛性滯偏工呕酸冷其间絶品岂不佳张禹纵贤非骨鯁葵花玉不易致道路幽险隔云岭谁知使者来自西开緘磊落收百饼嗅香嚼味本非别透纸自觉光炯炯粃糠团凤友小龙奴 日注臣双井收藏爱惜待佳客不敢包裹鑽权幸此诗有味君勿传空使时人怒生癭

韩干马十四匹 苏轼

二马并驱攢八蹄二马宛颈骏尾齐一马任前双举后一马却避长鸣嘶老髯奚官骑且顾前身作马通马语后有八匹饮且行微流赴吻若有声前者既济出林鹤后者欲涉鹤俛啄最后一匹马中龙不嘶不动尾摇风韩生画马真是马苏子作诗如见画世无伯乐亦无韩此诗此画谁当看

赠写御容妙善师 苏轼

忆昔射策干先皇珠帘翠幄分两厢紫衣中使下传诏跪捧冉冉闻天香仰观 晃目生晕但见晓色开扶桑迎阳晚出步就坐绛纱玉斧光照廊野人不识日月角仿佛尚记重瞳光三年归来真一梦桥山松桧凄风霜天容玉色谁敢画老师古寺昼闭房梦中神授心有得觉来信手笔已防幅巾常服俨不动孤臣入门涕自滂元老侑坐须眉古虎臣侍立冠劔长平生惯写龙凤质肯顾草间猿与獐都人踏破铁门限黄金白璧空堆牀尔来摹写亦到我为是先帝白髮郎不须览镜坐自了明年乞身归故乡

定惠院寓居月夜偶出 苏轼

幽人无事不出门偶逐东风转良夜参差玉宇飞木末缭绕香烟来月下江云有态清自媚竹露无声浩如泻已惊弱柳万丝垂尚有残梅一枝亚清诗独吟还自和白酒已尽谁能借不辞青春忽忽过但恐欢意年年谢自知醉耳爱松风防拣霜林结茅舍浮浮大甑长炊玉溜溜小槽如压蔗饮中真味老更浓醉里狂言醒可怕但当谢客对妻子倒冠落佩从嘲骂

豆粥 苏轼

君不见滹沱流澌车折轴公孙仓皇奉豆粥湿薪破灶自燎衣饥寒顿解刘文叔又不见金谷敲冰草木春帐下烹煎皆美人萍虀豆粥不传法咄嗟而办石季伦干戈未解身如寄声色相纏心已醉身心颠倒自不知更识人间有真味岂如江头千顷雪色芦茆檐出没晨烟孤地碓舂粳光似玉沙瓶煮豆软如酥我老此身无着处卖书来问东家住卧聴鸡鸣粥熟时蓬头曳履君家去

答西掖诸公见和 苏轼

双猊蟠础龙纏栋金井辘轳鸣晓瓮小殿垂帘碧玉钩大宛立仗朱丝鞚风驭宾天云雨隔孤臣忍泪肝肠痛羨君意气风生坐落笔纵横盘走汞上樽日日写黄封赐茗时时开小凤闭门怜我老太 给札看君赋云梦金奏不知江海 木 屡费琼瑶重岂惟蹇步困追攀已觉侍史疲犇送春还宫柳腰支活雨入御沟鳞甲动借君妙语发春容顾我风琴不成弄

虢国夫人夜游图 苏轼

佳人自鞚玉花骢翩如惊燕踏飞龙金鞭争道寶钗落何人先入明光宫宫中羯鼓催花柳玉奴弦索花奴手坐中八姨真贵人走马来看不动尘明眸皓齿谁复见只有丹青余泪痕人间俯仰成今古吴公台下雷塘路当时亦笑张丽华不知门外韩擒虎

郭熙画秋山平遠【潞公为跋尾】 苏轼

玉堂昼掩春日闲中有郭熙画春山鸣鸠乳燕初睡起白波青嶂非人间离离短幅开平遠漠漠疎林寄秋晚却似江南送客时中流回头望云巘伊川佚老鬢如霜卧看秋山思洛阳为君纸尾作行草炯如嵩洛浮秋光我从公游如一日不觉青山映黄髮为画龙门八节滩待向伊川买泉石

任氏阅世堂前大桧 苏辙

君家大桧长百尺根如车轮身弦直丈夫连臂不能抱孤鹤高飞直上立狂风动地舞枝干大雪翻空洗顔色人言此桧三百年未知此是何人植君家大夫老不遇一生直气未尝屈没身不说归故里遗爱自知懷旧邑此翁此桧两相似相与阅世何终极汝南山浅无良材栎社栋橡聊障日便令杀身起大厦亦恐众材无匹敌且留枝叶挠云霓犹得世人长叹息

韩信二首 黄庭坚

韩信高才跨一世刘项存亡翻手耳终然不肯负沛公颇似雍容得天意成臯日夜望救兵取齐自重身已轻躡足封王能早悟岂恨淮陰食千户虽知天下有所归独怜身与吟等齐蒯通狂说不可撼陈豨孺子胡能为予尝貰酒淮陰市韩信庙前栢十围千年事与浮云去想见留侯决是非丈夫出身佐明主用舍行藏要自知功名邂逅轩天地万事当观失意时

韩生沈鸷非悍勇笑出跨下良自重滕公不斩世未知萧相自追王始用成安书生自圣贤左仁右义兵在咽万人背水亦书意独驱市井收万全功成广武坐东乡人言将军真汉将兔死狗烹姑置之此事已足千年垂君不见丞相商君用秦国平生赵良头雪白

杜子美浣花醉归图 黄庭坚

拾遗流落锦官城故人作尹眼为青碧鸡坊西结茅屋百花潭水濯冠缨故衣未补新衣绽空
蟠胸中书万卷探道欲度羲皇前论诗未觉国风远干戈峥嵘暗防县杜陵韦曲无鸡犬老妻
稚子且眼前弟妹漂零不相见此公乐易真可人园翁溪人肯卜邻邻家有酒邀皆去得意鱼
鸟来相亲浣花酒船散车骑野墙无主看桃李宗文守家宗武扶落日蹇驴防醉起愿闻解兵
脱兜鍪老儒不用千户侯中原未得平安报醉里眉攒万国愁生绡铺墙粉墨落平生忠义今
寂寞儿呼不苏驴失脚犹恐醒来有新作常使诗人拜画图煎胶续弦千古无

送范德孺知庆州 黄庭坚

乃翁知国如知兵塞垣草木识威名敌人开户玩处女掩耳不及惊雷霆平生端有活国计百
不一试薶九京阿兄两持庆州节十年麒麟地上行潭潭大度如卧虎边人耕桑长儿女折冲
千里虽有余论道经邦政要渠妙年出补父兄处公自才力应时须春风旂旗拥万夫幕下诸
将思草枯智名勇功不入眼可用折箠笞羌胡

送谢公定作竟陵主簿 黄庭坚

谢公文章如虎豹至今斑斑在儿孙竟陵主簿极多闻万事不理专讨论涧松无心古须鬣天
球不琢中粹温落笔尘沙百马奔剧谈风霆九河翻胸中恢疎无怨恩当官持防且不烦吏民
欺公亦可忍慎勿惊鱼使水浑汉滨耆旧今谁存驷马高盖徒纷纷安知四海习凿齿拄笏看
度南山云

出城送客过故人东平侯赵景珍墓

黄庭坚

朱颜苦留不肯住白发政尔欺得人婣娟去作谁家妾意气都成一聚尘今日牛羊上丘垄当
时近前左右嗔花开鸟啼荆棘里谁与平章作好春

武昌松风阁 黄庭坚

依山筑阁见平川夜阑箕斗插屋椽我来名之意适然老松魁梧数百年斧斤所赦今参天风
鸣娲皇五十弦洗耳不须菩萨泉嘉二三子甚好贤力贫买酒醉此筵夜雨鸣廊到晓悬相看
不归卧僧毡泉松石燥复潺湲山川光辉为我妍野僧早饥不能饆晓见寒谿有炊烟东坡道
人已沈泉张侯何时到眼前钓台惊涛可昼眠怡亭小篆蛟龙纒安得此身脱拘挛舟载诸友
长周旋

书磨崖碑后 黄庭坚

春风吹舫着浯溪扶藜上读中兴碑平生半世看墨本摩挲石刻鬓成丝明皇不作包桑计颠

倒四海由禄儿九庙不守乘舆西万官已作鸟择栖抚军监国太子事何乃趣取大物为事有至难天幸尔上皇局蹐还京师内间张后色可否外间李父颺指挥南内凄凉几苟活高将军去事尤危臣结春秋三二策臣甫杜鹃再拜诗安知忠臣痛至骨世上但赏琼琚词同行野僧六七辈亦有文字相追随断崖苍蘚对久立冻雨为洗前朝悲

沧洲亭懷古 沈 辽

潇水悠悠天际来夹江古木抱山回栅中人物不满把日晏市散多苍苔九疑嶮天古云埋遥想帝子龙车回心衰目极何可望九歌寂寂令人哀

纵步湘西 张舜民

今朝不易得天晴闲过江西取意行忽然林外见山色又向桥边闻水声绿竹长松间桃李天然翠幙围罗绮日暮归舟醉不知晚风吹过湘江水

寒夜 张 耒

暗空无星云抹漆邑犬叫野人履霜歲云莫矣风落木夜如何其斗插江屋头眠鸡正寂寂野县严鼓先逢逢摩挲老面起吹火春色牀头酒满缸

谒客 张 耒

入门投谒吏翩翩我非欲见礼则然异哉宾主两无语客起疾走如避燃我已不恭愧昔贤忍使涂炭朝衣冠人生暂聚鸿集川春风吹飞何后先

有感 张 耒

羣儿鞭笞学官府翁怜儿笞傍笑侮翁出坐曹鞭复呵贤于羣儿能几何儿曹相鞭以为戏翁怒鞭人血流地等为戏剧谁后先我笑谓翁儿更贤

比邻卖饼儿每五更未旦即绕街呼卖虽大寒烈风不废而时略不少差因为作诗且有所警示

秬秸 张 耒

城头月落霜如雪楼头五更声欲絕捧盘出户歌一声市楼东西人未行北风吹衣射我饼不忧衣单忧饼冷业无高卑志当坚男儿有求安得闲

奉先寺 张 耒

荒凉城南奉先寺后宫美人官塋此角楼相望高起坟草间栢下多石人秩卑焚骨不作冢青石浮屠当丘垅家家坟上作享亭朱门相向无人声树头土梟作人语月黑风悲鬼摇树宫中养女作子孙年年犒车来作主废后陵园官道侧家破无人扫陵域官家歲给半年钱街头买饼作寒食

美哉 张耒

美哉洋洋清潁尾西通天邑无千里舸舫大艚起危檣淮潁耕田倍收米芒芒陂泽带平原古时沟洫还相连昔人屯田戍兵处今人阡陌连丘墓今年雨足种麦多北风吹桑鸣空柯高城回望郁嵯峨丰年间井闻笙歌河边古堤多老柳去马来船一回首百年去住不由人歲暮天寒聊饮酒

紫骝马 许彦国

黄金络头玉为觥蜀锦障泥乱云叶花间顾影骄不行万里龙驹空汗血露牀秋粟饱不食青藜苜蓿无颜色君不见东郊瘦马百战场天寒日暮乌啄疮

墨染丝 郭祥正

缲丝自喜如霜白输入官家吏嫌黑手持退印竞传呼倏见长条染深墨墨丝归织家人衣别买输官吏嗔迟寄言夷狄与三军汝得丰农民苦辛

浯溪 潘大临

公泛浯溪春水船繫帆啼鸟青崖边次山作颂今几年当时治乱春风前明皇聪明真晚谬乾坤付与哥奴手骨肉何伤九庙焚蜀山骑驴不回首天下宁知再有唐皇帝紫袍迎上皇神器苍忙吾敢惜儿不终孝聰五郎父子几何不豺虎君臣宁能责胡虏南内凄凉谁得知人间称家作端午平生不识顔真卿去年不答高将军老来读碑泪横臆公诗与碑当共行不赏边功宁有许不杀奉皇犹敢语雨淋日炙字未讹千秋万歲所鉴多

豫章别李元中宣德 谢逸

旧闻诸李隐龙眠伯时已老元中少一行作吏各天涯故人落落疎星晓西山影里识君面碧照草江眸子了向来问道渺多岐只今领略归 妙老凤垂头噤不语古木查牙噪春鸟身在幕府心江湖左胥右律但坐啸第愁一叶钓渔舟不容七尺堂堂表我今归卧灵谷云君应紫禁莺花绕相思有梦到茅斋细雨青灯坐林杪

闻徐师川自京师还豫章 谢逸

九衢尘里无停舟君居陋巷不出游满城恶少弋鳬鴈对面故人风马牛别后坐寒灯火夜归来眠冷江湖秋冯驩老大食不饱起视八荒提蒯缞

早春偶题 崔 鷟

寒风淅沥鸣枯苇小鸭睡残犹未起更教细雨结轻寒坐听萧萧打窗纸石盆养蒲已抽翠雕斛栽花先弄紫拥炉闭阁赋幽香未怕春水生砚水

阻风雨封家市 李 彭

往时李成写骤雨万里古意毫端聚行人深藏鸟不度便觉非复鹅溪素龙眠老院作阳关北风低草云埋山行人客子两愁绝未信卜萄能解颜两郎了解人意似是画我封家市戏作新诗排昼睡忽有野鴈鸣烟际

梦访友生 李 彭

少年结客长安城妄喜纵酒一章程支离老去一茅屋枕书卧闻长短更友生相望止百里寒夜寥 无微声梦中乘兴辄见戴剡溪聊尔扁舟行觉来蘧蘧一榻上不用僮仆争驩迎吹灯弄笔欲书寄窗前白月方亭亭

宋文鉴卷二十一

卷二十二

钦定四库全书

宋文鉴卷二十二

宋 吕祖谦 编

五言律诗

中秋月 王禹偁

何处见清辉登楼正午时莫辞终夕防动是隔年期冷湿流萤草光凝睡鹤枝不禁鸡唱晓轻别下天涯

送枝江秦长官罢秩 郑文宝

众论才名外亲人似古人官嫌容易達家爱等闲贫解印诗权在移风泽国春政声交不得慙见数鄉民

送曹纬刘鼎二秀才 郑文宝

旦夕春风老离心共黯然小舟闻笛夜防雨養花天手笔人皆有曹刘世所贤郴侯重才子从此防莺迁

夜泊江上 寇準

歲暮峡中村维舟古树根羣 初落月后夜独闻猿流水自无尽客愁那可论平明离楚岸迢遞指吴门

春日登楼懷归 寇準

高楼聊引望杳杳一川平野水无人渡孤舟尽日横荒村生断靄古寺语流鶯旧业遥清渭沉思忽自惊

楚江夜懷 寇準

西风生远水萧防度吟台明月夜还满故人秋未来寒蛩啼暗壁败叶下苍苔谁念空江水年

年首重回

题太湖 罗处约

三万六千顷湖侵海内田逢山方得地见月始知天南国吞将尽东溟势欲连何当洒爲雨无处不丰年受诏修书述懷感事三十韵 杨 亿

太极垂裳日中原偃革初楼船秋发咏衡石夜程书好问虚前席徵贤走传车蓬萊侔汉制煨
烜访秦余防绎资金匱规模出玉除纷纶开四部秘邃接千庖饫赐防鸡膳亲廻六尺輿華芝
下閭闔白羽拥储胥望气成龙虎披文辨鲁鱼清光无咫尺 览亦踌躇羣彦挥鈇笔防生濫
石渠嵇康眞懶慢谢客本空疎讲学情田垌谈经腹笥虚月评依许劭文体慕相如雅饮欢娱
合清言鄙吝祛弥旬容出沐终日喜羣居抚已慙鸣玉归田忆荷锄池笼养鱼鸟章服畏猿狙
園府愁尸禄天閤愧敝裾虚名同郑璞散质类庄樗国士谁知我隣家或侮予放懷齐指马屏
息度羲舒寡妇宜忧纬三公亦灌蔬危心惟穀觫直道忍籛籛往圣容巢许先儒美甯蘧晨趨
叹劳止夕惕念归欤秦痔踈杯酒顏瓢頼斗储如谐曲肱卧犹可直钩鱼矫矫 銜印翩翩隼
画旟一麾终遂志阮籍去骑驴

至郡累旬恶风 杨 亿

邓禹功曹器马周令长才叨临万室郡骤致五风灾大木行将防繁云黯不开自知蒙闇极民
吏窃相哈

狱多重囚 杨 亿

铁鑕银铛众金科伏念频絶闻空狱奏深媿片言人清颖黄公接【黄霸爲颖川守八年狱无
重罪囚】甘棠邵伯隣懷贤不能继多辟岂由民

梁县界好蚘虫生 罗处约

方喜云油布俄闻叶膾生田神何纵虐稼政自非明颖鳳那充食吴牛已絶耕【牛多疫死】
黄堂厌梁肉对尔自心惊

禁中庭树 钱惟演

紫闥分陰地丹条擢秀时高枝接温树密叶覆辛夷夜影瑶光接晨英玉露滋乘春好封殖爲
赋角弓诗

寄杨埧 赵 湘

闭门苔自长春恨极天涯落日出横水空城雨过花断狂曾避蝶多病更无蛙江上无消息风吹渡柳斜

答徐本 赵 湘

天远草离离秋霖寄信迟相思逢叶尽独坐听蝉悲岳色寒前见松心雪后知频招犹未至时复检清辞

喜故人至 王 操

地僻无宾侣柴门昼始开谿山寒叶落江国故人来话旧惊霜鬓论诗滞酒杯相留喜同宿不寤曙光廻

送人南归 王 操

相送当摇落孤舟泛渺弥去防防已远临水立多时别浦寒鸿下空山夜鹤移它年重防面冷鬓共成丝

南兵 钱 易

曾见南兵苦征辽事亦如金疮寒长肉纸甲雨生蛆山小壑霜骨河枯牖腐鱼黎元无处哭丁戸日相踈

上知府寇相公 魏 野

文武稟全才何人更可陪有官居鼎鼐无宅起楼台圣主诗方和亲王状始廻鎮临求二陝调燮辍三台鳳阁须重去龙旌暂拥来下车三度雨上事数星雷未暇瞻珪璧先蒙话草莱防思趋相府恐惧复徘徊

书友人屋壁 魏 野

達人轻禄位居处傍林泉洗砚鱼吞 烹茶鹤避烟闲唯歌圣代老不恨流年静念相寻者还应我最偏

闲居书事 魏 野

无才动圣君养拙住山村临事知闲贵澄心觉道尊成家书满屋添口鹤生孙仍喜多时雨经春免灌园

述懷 魏野

东郊魏仲先生计只随缘任懒自扫地更贫谁怨天有名闲富贵无事小神仙不觉流光速身将半百年

夏日宿西禪 潘 阆

此地絕炎蒸深疑到不能夜凉如有雨院静若无僧枕润连云石牕明照佛灯浮生多骨贱时日恐难胜

叙吟 潘 阆

高吟见太平不耻老无成髮任茎茎白诗须字字清搜疑沧海竭得恐鬼神惊此外非闲念人间万事轻歲暮自桐庐归钱塘晚泊渔浦 潘 阆

从客见华髮孤櫂桐庐归新月无朗照落日有余辉渔浦风水急龙山烟火防时惊沙上鴈一一皆南飞

铭坐右 张齐贤

慎言浑不畏忍事又何妨国法须遵守人非莫举扬无私仍克已直道更和光此个如端的天应降吉祥

酬陈齐民见寄 种 放

竹扉常昼掩幽僻置身安自委渔樵分因思出处难周庭方设燎汉将尚封坛莫问渔樵意人寰事万端

勘书 孙 仅

儒家无外事招客勘青编笔 东西置朱黄次第研频忧伤防 细恐误流传改易文辞正增加字数全目因繁处倦心向注中专端坐穷今古披襟见圣贤疲劳时举白游息或谈 得兴忘昏旭题名记歲年栖毫思确论废卷恨亡篇鱼鲁皆刊定谁人敢间然

江南立春日 吕夷简

灰律何时应江春昨夜来细风光动柳残雪不藏梅余冷迷清管微和发冻醅闭门无客到樽俎爲谁开

秋日旅懷 江 爲

迢迢江汉路秋色又堪惊
半夜闻鸿鴈多年别弟兄
高风云影断防雨菊花明
欲寄东归信徘徊无限情

江行 江 爲

越信隔年稀孤舟防梦归
月寒花露重江晚水烟微
岸直防相望沙空鸟竝飞
何时洞庭上春雨满蓑衣

经战地 鲁 交

当年用兵地黯惨无人耕
战士报国死寒草迎春生
沙飞贼风起昼黑阵云横
未持天下箒何以扫欃枪

大雪 鲁 交

万象晓一色皓然天地中
楚山云母障汉殿水精宫
远近梅花信高低柳絮风
吟魂清不彻和月上晴空

野水 钱昭度

野水光如璧澄心不觉劳
与天无表里共月见分毫
緑好磨长剑清宜泛小舸
淡交今已矣惆怅越波涛

塞上作 唐 异

防秋人不到万里絶妖氛
马牧降来地雕闲战后云
月依孤垒没烧逐远荒分
未省爲边客宵笳懒欲闻

闲居书事 唐 异

幽居经宿雨屐齿徧林塘
一境无过客千山自夕阳
昼禽多独语夏木有余凉
招隐诗慵寄时清谁肯忘

瀑布 石延年

飞势挂岳顶无时向此倾
玉虹垂地色银汉落天声
万丈寒云湿千岩暑气清
沧浪不足美就此濯尘缨

曹太尉西师 石延年

仁者虽无敌王师尚有征独乘金廐马都领鐵林兵肃气關河暮屯烟部落晴旗光秋烧去甲
色夜江横士喜击中鼓虏疑闻后钲无私乃时雨不杀是天声濯濯前谁拒堂堂彼自倾寒逾
博望塞春燕隗器城外使戎心伏旁资帝道平公还如画像爲賛学班生

春 石延年

一气回元运恩含万物深陰阳造化首天地发生心有信来还去无私古到今和风激遗畅南
转入薰琴

赴桐庐郡至淮上遇风 范仲淹

圣宋非彊楚清淮异汨罗平生仗忠信尽室任风波舟楫顛危甚蛟龙出没多斜阳幸无事沽
酒听渔歌

瀑布 范仲淹

迴与众流异发源高更孤下山犹直在到海得清无势鬪蛟龙恶声吹雨雹麓晚来云一色诗
句自成图

尧庙 范仲淹

千古如天日巍巍与善功禹终平泽水舜亦致薰风江海生灵外乾坤揖让中鄉人不知此箫
鼓谢年丰

野色 范仲淹

非烟亦非雾冪冪映楼台白鸟忽防破夕阳还照开肯随芳草歇疑逐远防来谁防山公意登
高醉始迴

八月十四夜月 范仲淹

光华岂不盛赏宴尚迟迟天意将圆夜人心待满时已知千里共犹讶一分亏来夕如澄霁清
风不负期

题養眞亭 韩琦

新葺公居北虛亭号養眞所期清策虑不是爱精神满目林壑趣一心忠义身吏民还解否吾

岂苟安人有将独鹤行都市道上者左右奔迫野态憔悴因

成短韵 宋 庠

明心本霄汉此路极喧埃何意鸣臯罢翻同舞市来波臣忧辙涸海鸟避风灾寄语昂昂质非君羽独摧

春夕 宋 庠

暝色蔽孤斋空轩向夕开花低应雨下月暗觉云来烛牖轻蛾聚风枝倦鸟猜无言聊隐几万境一灵台

羣玉殿赐宴 欧阳修

至治臻无事丰年乐有成图书开秘府宴饫集羣英论道皇坟奥贻谟宝训明九重多暇豫八体极研精笔力千钧劲毫端万象生飞牋金洒落拜赐玉锵鸣盛际崇儒学愚臣滥宠荣惟能同舞兽闻乐识和声

下直呈同行三公 欧阳修

午漏声初转归鞍路偶同天清黄道日街阔绿槐风万国舟车防中天象魏雄戢戈清四海论道属三公自愧陪羣彦从来但朴忠时平容窃禄歳晚叹衰翁买地淮山北垂竿颍水东稻粱虽可恋吾志在防鸿

东阁雨中 欧阳修

直阁时偷暇幽懷坐独哦绿苔人迹少黄叶雨声多云结愁陰重风传禁漏过瑶图新嗣圣玉塞从包戈相府文书简丰年气和还将鳳池句聊杂野人歌

秋懷 欧阳修

节物岂不好秋懷何黯然西风酒旗市细雨菊花天感事悲霜鬓包羞食万钱鹿车终日驾归去颍东田

东晋 宋 祁

仓卒浮江日声明建号初羣臣让禁裔上宰制单練气锐开桁战心欢折屐书織儿竟撞坏不念好家居

咏史 宋 祁

古有容容福人讥龔龔贪生贪巧作奏死戒直如 欲重高门地非论媚灶天诗书大儒家丝竹后堂旃东阁翻乌马西园窃瘞钱道谋谁执咎尸选不因贤朱鼓成妖日羗雏入贺年须防反室诏终取阖门怜异日谗成锦先时默似蝉空贻后人叹流涕掩青编

遣吏视诸公莹树因有感三首

文正王丞相 宋 祁

两朝从巨德万务罄斯猷汉日左右手尧年忠孝侯名言天下满故事省中留宸篆旌碑首刊文又防秋【予作碑陰述其事】

文靖吕丞相

庆厯公三入人谋摇太平啖金眞闲敌浇【呼高反】酒不寒盟上印情离切【公被病求退不许】然髭疾遽轻【上剪髭赐公】惜哉天弗憖宸幄泪先横

宣献宋公

昔去欢明辟【明肃朝公劝还女】俄归参大钧公孙未及相诸葛已伤神名待天渊蔽文争日月新英魂同玉树不向土中春

僻居 燕 肃

茅茨城市远草径接鱼村白日偶无客青山长对门药鑪留火暖花坞带烟昏静坐搜新句心傍酒樽

宋文鉴卷二十二

卷二十三

钦定四库全书

宋文鉴卷二十三

宋 吕祖谦 编

五言律诗

泛溪 梅尧臣

中流清且平舍楫任舩行渐近鹭犹立已摇觉村横何妨绿樽满不畏晚风生屈贾江潭上愁多未适情

发匀陵 梅尧臣

秋雨密无迹蒙蒙在一川孤村望渐远去鸟飞已先向晚云漏日防光人倚船安知偶自适落岸逢沙泉

闻鴈 梅尧臣

湿云夜不散薄处微有星孤鴈去何急一声愁更听心应失旧侣翅已高青 防日江湖上鳬鸥共满汀

和谢仲弓廷评栽竹 梅尧臣

移得溪边翠来爲庭下陰惜根存旧土带笋助新林暗换萧萧叶知虚寸寸心东风莫摇撼培防未应深览含元殿基因想昔时朝防之盛且感其兴废

苏舜钦

在昔朝元日千门动地来方隅正无事辅相复多才仗下簪綬肃天中繖扇开皇威瞻斗极曙色辨崔嵬赤案波光卷鸣鞭电尾回熊罴驱禁卫雨露覆兰台横赐倾中帑穷奢役九垓只知营国用不畏屈民财翠辇还移幸旻天未悔灾羣心争困兽回首变寒灰曾以安无虑翻令世所哀行人防碧瓦独鸟下苍苔谁念陵为谷遥知祸有胎青编遗迹在此地亦悠哉

五哀诗【并序】 司马光

孔子恶利口之覆邦家者甚矣防之爲害不可一二数也聊观战国以来楚之屈原赵之李牧汉之晁错马援齐之斛律光皆负不世之才竭忠于上然卒困于防不能自脱流亡不得其所而死或者国随以丘 此其尤可大哀者也因即其事作五哀诗且以警后世云

屈平

白玉徒为洁幽兰未谓芳穷羞事令尹疎不忘懷王冤骨消寒渚忠魂失旧乡空余楚辞在犹与日争光

李牧

椎牛飧壮士防距养奇材虏帐方惊避秦金已闇来旌旗移幕府荆棘蔓丛台部曲依稀在犹能话郭开

晁大夫

人主恩犹盛谗夫防舌端旋闻就斧质不得解衣冠反虏齿才冷谋臣心尽寒晁宗噍类尽汉室泰山安

马伏波

汉令班南海蛮兵避郁林天涯柱分界徼外贡输金坐失奸臣意谁明报国心一棺忠勇骨漂泊瘴烟深

斛律丞相

君臣日荒宴歌舞讳言愁老相犹当国强邻不敢谋谣言虽未出奸谤已先流谁察忠臣意通宵抱膝忧

访徐冲晦 郎 简

湖上访高士径深行緑苔应闻山犬吠知是野人来岸帻出相接柴门自为开林间清话久薄暮榜舟回

即事 王安石

径暖草如积山晴花更繁纵横一川水高下数家村静憩鸡鸣午荒寻犬吠昏归来向人説疑是武陵源

招丁元珍 王安石

默默不自得纷纷何所为
画墁聊取食猎较久随时秋
入江湖暗风生草树悲黄花
一杯酒思与故人持

半山春晚即事 王安石

春风取花去酬我以清陰
翳翳陂路静交交园屋深
牀敷每小息杖屨或幽寻
惟有北山鸟经过遗好音

定林 王安石

漱甘凉病齿坐旷息烦襟
因脱水边屨就敷岩上衾
但留云对宿仍值月相寻
真乐非无寄悲虫亦好音

自白土村入北寺 王安石

雨过百泉出秋声连众山
独寻飞鸟外时度乱流间
坐石偶成歇看云相与还
会须营一畝长此听潺湲

和象之北轩书事 韩维

舍北多嘉树垂陰及四隣
清风常满竹好鸟不惊人
图史无它物讴吟佚此身
应容里中客一醉倒冠巾

平居

絺绤散南风平居触事慵
古今无适莫义命有违从
水鸟迎秋舫山花映夕舂
故乡图画见垂老愧尘容

送赵枢寺丞宰防化县 陶弼

路入南云下如何轻解携
人烟五岭北星斗大江西
暖雪梅花树晴雷赣石溪
青衫欲无泪不奈鹧鸪啼

出岭题石灰铺 陶弼

马度严關口生归喜复嗟
天文离卷舌人影背含沙
江势一两曲梅梢三四花
登高休问路云下是吾家

同宋复古游大林寺 周敦頤

三月山方暖林花互照明路盘层顶上人在半空行水色云含白禽声谷应清天风拂襟袂缥缈觉身轻

冬至 邵雍

何者谓之防天根理极防今年初尽处明日未来时此际易得意其间难下辞人能知此意何事不能知

晚凉闲步 邵雍

得处亦多矣风前任鬓斑年过半百外天与一生闲莹静云间月分明雨后山中心无愧事对此敢开颜

重九日登石阁 邵雍

事出一时间时过事莫闲当时深可爱过后不堪防夏去休言暑冬来始讲寒人能知此理忧患自难干

悟人一言 邵雍

百虑谋犹拙一言迷自开世间无大事天下有雄才唯恐人难得寧忧道未恢忌心都去尽何复病尘埃

陈公廩园修禊事席上赋 程顥

盛集兰亭旧风流洛社今坐中无俗客水曲有清音香篆来随去花枝泛复沉未须愁日暮天际是轻陰和王正仲熙寧郊祀二十韵 刘攽

骏命膺长发鸿图本慎徽八方星拱极四海日升晖旧典增咸秩弥文示表防圣时均玉烛天統正璿玑南极迎阳复陰泉 气归积高常眷顾昭孝每无违羽卫来防阍和銮并六飞风霆齐命令龙虎防旗旂帐殿层城暮金波列宿稀严更虚夜鑿雕輦下彤闈广乐千人唱升烟万目睇众神知受记象物竞来依陟降兼明察圆方比范围送音仍粥粥畀福想霏霏霈泽苏羣动春阳畅堦扉庆深周揭厉感极至 欵多士参鸣玉防生侧皁衣肃雍瞻帝武奉引近天威儒館鸛鸾旧长謡锦绣辉因知子云赋何足颂巍巍

和郑闳仲仙居 陈襄

我爱仙居好临民必以诚簿书无日暇狱讼积年生【予始至邑豪有以债负凭折细民田土者迹駮分明予治而归之或有年深而亡稽者亦妄词讼三年分户二千凡有产而无业积年空纳其租许其还主者不可胜数】百疾求箴补千钧待準平嗟予不如古斯道未能宏

我爱仙居好隆儒黜大方诸生今讲艺【予每讲书罢又令诸生转相教授】童子俾升堂【公暇每有童子十数人至堂上教授经书或试之书】买地兴民学【因孔子庙后修起学舍买三家之地以广其基】驱车下党庠【予每出行诸乡遇有小学则下以观童子】三年邑未化官满意彷徨

我爱仙居好公余日在房忧民极反覆责已未周详法律行随手诗书坐满箱老来须向学多病喜平康

和子由初到陈州 苏轼

旧隐三年别松杉好在不吾今尚眷眷此意恐悠悠闭户时寻梦无人可说愁还来送别处防泪寄南州

广爱寺朱瑶画 苏轼

朱瑶唐晚辈得法尚雄深满寺空遗迹何人识苦心长廊欹雨脚破壁撼钟音成败无穷事他年复吊今

过淮 苏轼

好在长淮水十年三往来功名真已矣归计亦悠哉今日风怜客平时浪作堆晚来洪泽口捍索响如雷

乘舟过贾收水阁二首 苏轼

嫋嫋风蒲乱猗猗水荇长小舟浮鸭绿大杓泻鹅黄得意诗酒社终身鱼稻乡乐哉无一事何处不清凉

又

曳杖青苔岸系船枯柳根德公方上冢季路独留言已占蒲鱼港更开松菊园从兹来往数儿女自膺门

郊祀庆成 苏轼

帝出乘昌运天心予太平文章三代继制作七年成大祀乾坤合刚辰日月明防坛朝扫地魄宝夜垂精仰御圆苍盖环观海岳城北流吞朔易西极落欃枪升燎灵光答廻鸾瑞雾迎需云徧枯槁解雨達勾萌可颂非天德因箴亦下情民言知可酌帝谓本无声富国由崇俭蕝年在好生无心斯格物克已自消兵化国安新政孤臣返旧耕还将清庙什留与野人耕

新年二首 苏轼

小雨暗人日春愁连上元水生挑菜渚烟湿落梅村晚市人归尽孤舟鹤踏翻犹堪慰寂寞渔火乱黄昏

又

北渚集羣鹭新年何所之尽归乔木寺分占结巢枝生物防有役谋身各及时何当禁毕弋防引雪衣儿

倦夜 苏轼

倦枕厌长夜小窗犹未明孤村一犬吠残月几人行衰鬓久已白旅懷空自清荒园有络纬虚织竟何成

次韵江晦叔 苏轼

钟鼓江南岸归来梦自惊浮云世事改孤月此心明雨已倾盆落诗仍翻水成二江争送客上杪防桥横次韵公定世弼登北都东楼二首 黄庭坚

眞皇多庙胜仁祖用功深卜宅迁九鼎安邊藏万金百年休战士当日纵前禽欲断匈奴臂不如留此心

又

汉皇勤远略晚节相千秋不足中原地犹思一战収圣朝方北顾斜日倚东楼庙筭知无敌寒儒浪自愁

歲寒知松柏 黄庭坚

羣陰雕品物松柏尚桓桓老至惟心在相依到歲寒霜严御史府雨立大夫官牺象沟中断徽弦防下残光陰一鸟过斩伐万牛难春日辉桃李苍顏亦预观

款塞来享 黄庭坚

前朝夏州守来款塞门西圣主敷文德降书付狄鞬羶裘瞻日月 面带金犀殿陛闲干羽边
庭息鼓鼙永输量谷马不作触藩羝声势常相倚今闻定五溪

神宗皇帝挽词二首 黄庭坚

文思昭日月神武用雷霆制作深垂统忧勤减梦龄孙谋开二圣永命对三灵今代谁班马能
书汗简青

又

钓筑收贤辅天人与圣能辉光唐六典度越汉中兴百世神宗庙千秋永裕陵帝乡无马迹空
望白云乘次韵崔伯易席上所赋因以赠行 黄庭坚

迎新与送故渠已不胜勤民卖腰间劒公宽柱后文诸郎投赐沐高防惜临分去国虽千里分
忧即近君

司马文正公挽词二首 黄庭坚

国在多艰日人如大雅诗忠清居没世孝友是生知加璧延诸老橐弓抚四夷公身与宗社同
作太平基

又

毁誉盖棺了于今名实尊哀荣有王命终始着民言蝉冕三公府深衣独乐园平生两无累忧
国爱元元

范忠文公挽词二首 黄庭坚

信道虽常尔知人乃独亨书林身老大谏纸字欹倾鳌去三山动人危五鼎烹保全天子圣几
杖送余生

又

公在昭陵日文章近赤墀空嗟伏生老不得还英帷去国几三虎闻韶得一防谁言盖棺了新
乐锁蛛丝

和答钱穆父咏猩猩毛笔 黄庭坚

爱酒醉魂在能言机事疎平生几量屐身后五车书物色防王防黜劳在石渠防毛能济世端

爲谢杨朱次韵秦少章晁适道赠荅诗 黄庭坚

二子论文地陰风雪塞庐寧穿东郭履不奉子公书士固难推挽时闻有诏除负暄真得计猷御恐成疎

和文潜舟中所作 黄庭坚

云横疑有路天远欲无门信矣江山美懷哉譴逐魂长波空永记住佳句洗眇昏谁奈离愁得村醪或可尊汉阳亲旧携酒追送聊爲短句 黄庭坚

接浙报官府敢违王事程宵征江夏县睡起汉阳城邻里烦追送杯盘防浊清祇应瘴鄉老难答故人情

次韵廖明略陪吴明府白云亭宴集

黄庭坚

江净明花竹山空响管弦风生学士塵云绕令君筵百越余生聚三吴远接连庖霜刀落鮓执玉酒明船叶县飞来舄壶公谪处天酌多时暴谑舞短更成妍唯我孤登覽观诗未究宣空余五字赏文似两京然鑿是肱三折官当歳九迁老夫防镜罢衰白敢争先

赠杨明叔 黄庭坚

穷奇投有比鸿鹄止丘隅我已魑魅御君方燕雀俱道应无芥蒂学要尽工夫莫斩獫狁杙明堂待栋桴

闲居有感 李宗易

进退荷君恩孤懷岂易论以门销日月何力报乾坤架上书千卷花前酒一樽相持成两癖此外尽忘言

江上逢晁适道 崔子方

渺渺连江雨防防到面风主人留一饷佳士得相逢防面嗟何晚论诗许有功君家好兄弟更觉此心同

荷花 丰稷

桃杏二三月此花泥滓中人心正畏暑水面独摇风净刹如金涌嘉賓照幕红谁歌采菱曲舟

在晓霞东

寄郑介夫 毕仲游

郑子安强否梅花万里春如何投虎穴直欲犯龙鳞北阙今无数南方信有人可怜妻子在年少不谋身

春日独游南园 杨蟠

天净鸟飞远路幽花自香春风吹草木野水满池塘事去青山在人闲白日长兴来搔短髮此意从难忘

闻赦有作 张舜民

击鼓填街道传声过水滨国严三歲礼恩洗万家春舟楫亲南斗衣冠拱北辰岭南并岭北多少望归人

曾子固挽词二首 陈师道

早弃人间事真从地下游丘原无起日江汉有东流身世从违里功名取次休不应须礼乐始作后程仇

又

精爽回长夜衣冠出广庭勲庸留琬琰形象付丹青道防余篇翰人亡更典刑侯芭才一足白首太 经

司马温公挽词二首 陈师道

恭默思良弼诗书正百工事多违谢傅天遽夺杨公一代风流尽三师礼教崇若无天下议恶美并成空

又

百姓归周老三年待鲁儒世方随日化身已要人扶玉几虽来晚明堂讫授图心知死诸葛终不羨曹蜍

登城楼 陈师道

城郭春容晚因行可当游飞来防蛺蝶目尽一浮鸥峡嶮山将合江平水却流同来端兴尽爲
且小迟留

和王子安至日 陈师道

物理有终极人情从往还陰阳消长际老疾去留间申白徒懷惠巢由不买山更歌吾和汝风
日稍侵顏

送吴先生谒惠州苏运使 陈师道

闻名欣识面异好有同功我亦慙吾子人谁恕此公百年防白鬓万里一秋风爲说任安在依
然一秃翁

懷远 陈师道

海外三年谪天南万里行生前只爲累身后更须名未得平安报空懷故旧情斯人有如此无
复涕纵横

张刍令余杭 孙 处

经年独穷处此去岂无营最近吾民病无嗟县令名官卑人易信政肃化方行更有论心处前
溪水正清

种圃 张 耒

僦舍亦爲圃从人笑我痴自求佳草木仍插小藩篱吾事正如此人生聊自怡霜松未及尺独
我见竒姿

近清明 张 耒

斜日去不驻好风来有情江城过风雨花木近清明水树闲照影山禽时引声吾年行老矣淹
泊蹇何城

晨兴 张 耒

端居歲已宴杖屨亦萧然云露窓前日秋明树外天大江寒欲落诸岭霁逾鲜白首无聊剧昏
昏只醉眠

都梁亭下 张 耒

金塔青 上孤城莽苍中浅山寒带水旱日白吹风人事剧翻手生涯真转蓬高眠待春涨鲑菜伴南公

舟中晓思 张耒

树色未啼鸟桨声初度航客灯青映壁城角冷吹霜飘泊年来甚羁愁情易伤年丰清潁尾吾计亦差良

南涧月夕 俞紫芝

华髮念秋晚青灯怜夜长香团菊花露寒着橘林霜月在北窗底人行南涧旁婆娑不知去身兴两俱忘

广武山懷古 刘季孙

定汉兵相接乾坤昼亦暝虎争千里震龙战四郊腥故垒从谁问严祠自昔灵北风吹败木落日任飘零

春日游金明池 李昭玘

日有江湖思坐无车马尘横桥自照水啼鸟不惊人輶路晴飞絮宫门暗锁春多情老园吏洒地喜相亲

独步懷元中 洪朋

净尽西山日深行城北村琅玕鸣佛屋薜荔上僧垣晴雨慰枵腹夕风清病魂所思渺江水谁与共忘言

宿范氏水阁 洪朋

枕水凿防櫺云扉夜不扃滩声连地籁林影乱天星人净鱼频跃秋高露欲零何妨呼我友乘月与扬舲

石牛庄闲居 崔鶊

不识春风面知从底处来红深桃靥破绿静水帘开物外心常挂人间事不谐从今江海去无复世推排

见黄太史 高荷

万里南溪郡黄香得赐环盛名喧海内摧翮返云间太史资诚峻郎官选亦慙朝廷才特起堂
奥援谁扳一梦追前事羣公厄后艰中伤皆死祸放逐罕生还别驾之戎僉侨居傍草菅想知
谙鸟道闻说异人寰杨子家元窘王维室从鰥鵬来心破碎猿叫泪潏潏逵观终难得羈愁必
易删众情相惻悯灵物自恬憫迴阁澄秋晚幽 笄夜跼蜀天何处尽巴月几回湾坠履魂空
断遗弓涕忽漣石门凄殿楯铜雀惨宫鬢帝統聯仁圣皇恩感 顽网罗防党禁诛蔓扫朋奸
防检金闺彦凋零玉笋班尚今宗庙器遥隔鬼门关拊髀咨询及含香诰命颁笑谈趋赤县吟
咏落乌蛮奏记懷东观移文领北山应将九迁待未补七年闲士愧千钧弩身谋五两纶退藏
欣望气延仰窃窥斑昌谷词深窄浯溪笔力孱断轮深类扁投斧欲随般鹄卵眞能伏龙鳞敢
冀攀不嗔无绍介试遣略承顔

题折氏下城南 吴则礼

系马后河川可人冬景妍要防花到地付与水浮天未觉随戎马端来唤酒船谁云是關塞胜
事总堪传

春日书懷 潘大临

舟楫凌漳水风涛接蠡湖龙媒成跬步骊领脱防躯乐土供防戯深文苦紮拘胸中虽磊磊墙
外或歌呼老去嵇康懒归来甯子愚千钟眞臭腐十畝借膏腴春雨何曾密园花竟自都小桥
藏细柳方沼出新蒲酒熟拈巾漉经传带雨锄行盘随所有坐客防时无日转槐陰暮门通鸟
径迳仰头防哺鷄引手亦将鷄抚事盆縑茧劳生戸转枢形骸浮大块毛发燎洪鑪世论几胶
柱人心尽好竿屠龙非至计射雉屈良图借箸方隆汉推枰已灭吴从渠画麟阁吾自着潜夫

江上晚步 潘大临

白鸟没飞烟防风逆上船江从樊口转山自武昌连日月悬终古乾坤别逝川罗浮南斗外黔
府若何边

题吕少冯听雨堂 李 彭

碧涧寒侵屋幽云夜度墙贪防山入坐怪听雨鸣廊苦乏陰铿句聊登孺子牀非君无汲引寄
傲学潜郎

春日有懷 林敏功

风高収雨急日薄过窓防梅萼初迎臈春溪欲染衣形容今日是游衍昔人非节物關愁者归
鸿正北飞

马伏波 司马光

汉令颁南海蛮兵避郁林天涯柱分界徼外贡输金坐失奸臣意谁明报国心一棺忠勇骨漂
泊瘴烟深

宋文鉴卷二十三

卷二十四

钦定四库全书

宋文鉴卷二十四

宋吕祖谦编

七言律诗

和御制夏日垂钓作 徐铉

物茂时平日正长翠辇停驭睠方塘
文竿乍拂圆荷动潏尾时翻素荇香
睿赏只应从暇豫圣恩宁肯间沉翔
吞舟自是贪芳饵犹笑成汤一面张

内宴应制 曹翰

三十年前学六韬英名尝得预时髦
曾因国难披金甲不爲家贫卖宝刀
臂健尚嫌弓力软眼明犹识阵云高
庭前昨夜秋风起羞见团花旧战袍

豫章胡氏萃林书堂 张齐贤

一百年来烟防同衣冠江左慕家风
儿孙歌舞诗书内乡党优游礼让中
孝悌筠编争纪录门间天语赐褒崇
莫将六阙方朱氏【朱敬则家门孝友三叶旌表门标六阙】叶叶蒸蒸奉始终

春日书懷 寇準

曾读前书笑古今耻随流俗信浮沉
终期直道扶元化敢爲虚名役片心
默坐野禽啼昼景闭门官柳长春陰
世间事了先须退不待霜毛渐满簪

春夕偶作 赵湘

一夕衡门独自开雨陰深巷小尘埃
醉醒风傍池边起坐从月从花上来
何处夜歌初欲断四邻春梦不知回
因思此兴无人共时复孤吟步绿苔

上李昉相公 王操

弱冠登龙入粉闱少年清贵古来稀袖中诏草朝天去头上宫花侍宴归卓笔玉堂寒漏防卷帘池馆水禽飞三台位近犹嫌逊闲听秋霖忆翠防

其二

朝苑优游数十春文章敌手更无人对馭旒冕如僚友下直门阑似隐沦倚檻白云供醉望搢笏黄叶落吟身年来得意知难絶大半门生作侍臣

温泉 郑文宝

潺湲如燎岭云陰玉石鱼龙换古今只见开元无事人不知贞观用功深笼无解语衣无雪堆有黄沙粟有金惆悵羣邪负恩泽始知夷甫少经心

读江总传 郑文宝

行人慵过景阳宫宫畔离离禾黍风庭玉有花空怨白井莲无步莫愁红吟诗功业才虽大亡国君臣道最同争忍暮年归故里纶竿迴避钓鱼翁

梅花 林逋

吟懷长恨负芳时爲见梅花輒入诗雪后园林才半树水边篱落忽横枝人怜红 多应俗天与清香似有私堪笑边笳亦风味解将别调角中吹

小园梅花 林逋

众芳摇落独暄妍占尽东风向小园疎影横斜水清浅暗香浮动月黄昏霜禽欲下先偷眼粉蝶如知合断魂幸有防吟可相狎不须檀板共金樽

晨兴 魏野

夜长乞待得晨兴耽睡僮犹唤不应烧药炉中无宿火读书窓下有残灯临堦短髮梳和月傍岸衰容洗带冰料得巢禽翻怪讶寻常日午起慵能

山居【留化已南山多凌零藿香芬芳袭人动或数里】 丁谓

峒口清香澈海濱四时芬馥四时春山多绿桂怜同气谷有幽兰讓后尘草解忘忧忧底事花能含笑笑何人【海南有含笑花】争如彼美欽天圻长荐芳香奉百神

民牛多疫死【水牛多自相广商人駟至民间贵市之以给用】

杨亿

南海逸风如失性东吴喘月不逢医一元祀典古所重九谷民天命在斯真相柅车寧致问族
庖更刃亦焉施炎神厉鬼争爲虐渡虎消蝗复是谁

汉武 杨亿

蓬莱宫阙浪漫漫弱水回风欲到难光照竹宫劳夜拜露溥金掌费朝餐力通青海求龙种死
讳文成食马肝待诏先生齿编贝那教索米向长安

莎衣 杨朴

软绿揉蓝着胜衣倚船吟钓最相宜蒹葭影里和烟卧菡萏香中带雨披狂脱酒家春醉后乱
堆渔舍晚晴时直饶紫绶金章贵未肯轻轻博换伊

假中示判官张寺丞王校勘 晏殊

元已清明假未开小园幽径独徘徊春寒不定斑斑雨宿醉难禁灑灑杯无可奈何花落去似
曾相识燕归来游梁赋客多风味莫惜青钱万选才

初秋宿直 晏殊

绛河星斗夜防干禁署沈沈闭九闕上帝册书羣玉府仙人宫阙巨鳌山凉蟾影度秋陰薄促
漏声来夜唱闲拥鼻吟多欲愁絕严钟凄断树乌还

安昌侯 晏殊

莲勺移家近七迁鲁儒章句世相传關中沃壤通泾渭堂上繁多逐管弦身服儒衣同蔡义日
将卮酒对彭宣高坟丈五阳陵外千古朱云气凜然

偶成 石延年

力振前文觉道孤耻同流辈论荣枯动非仁义何如静得见机關不似无孔孟也宜轻管晏臯
防未必失唐虞侯王重问吾何有且自低心混世儒

金鄉张氏园亭 石延年

亭館连城敌谢家四时园色鬪明霞窓迎西渭封侯竹地接东陵隐士 乐意相關禽对语生
香不断树交花纵游防约无留事醉待参横月落斜

首阳【夷齐在孟津谏伐纣而死于首阳其山在蒲蒲乃舜都也岂非二子之意何古之所不思

哉】石延年

逊国同来访圣谟适观争国誓师徒耻生汤武干戈日寧死唐虞揖让区大义克身安是饿清魂有所未应无始终天地亡前后名骨虽防此行孤

喜雨韩琦

何假嗔雷击怒桴默然嘉泽浹民区经时亢隔羣心骇数月焦熬一阵苏已发禾苗安在握再生庄鲋不虞枯须防慰满三农望却敛神功寂以无

寄子京宋庠

八年三郡驾朱轮更忝鸿枢对国均老去师丹多忘事少来之武不如人车中顾马空能数海上逢鸥想见亲唯有弟兄归隐志共将耕凿报尧仁

府斋歲宴节物感人輒成拙诗上寄昭文相公枢

密太尉宋庠

处世何常尽值才虚名高位自惊猜千重浪里随流出百尺竿头试险回衰鬓不徒欺晓雪孤心兼欲伴寒灰嵩阳颍曲风烟接已仗归云作隐媒

重展西湖宋庠

绿鸭东陂已可怜更因云窦注西田凿开鱼鸟忘情地展尽江湖极目天向夕旧滩都浸月过寒新树更留烟使君直欲称渔叟愿赐闲州不计年

书王元之画像侧欧阳修

偶然来继前贤迹信矣皆如昔日言诸县丰登少公事一家饱暖荷君恩想公风采常如在顾我文章不足论名姓已光青史上壁间容貌任尘昏【公贬滁州谢上表云诸县丰登苦无公事一家饱暖共荷君恩】

上致政太保杜相公欧阳修

俭节清名世絶伦坐令风俗可还淳貌先年老因忧国事与心违始乞身四海仪刑瞻旧德一

樽谈笑作闲人铃斋幸得亲师席东向时容问治民

内直对月 欧阳修

禁署沉沉玉漏传月华云表溢金盘纖埃不隔光初满万物无声夜向阑莲烛烧残愁梦断蕙
炉薰歇觉衣单水精宫鎖黄金阙故比人间分外寒

下直 欧阳修

宫柳街槐绿未齐春陰不解宿云低轻寒漠漠侵駝褐小雨斑斑作燕泥报国无功嗟已老归
田有约一何稽终当自驾柴车去独结茅庐颍水西

早朝感事 欧阳修

疎星牢落晓光防残月苍龙阙角西玉勒争门随仗入牙牌当殿报班齐羽仪虽接鸳兼鹭野
性终存鹿与麕笑杀汝陰常处士十年骑马听朝鸡

青州书事 欧阳修

年丰千里无夜警吏退一室焚清香青春固非老者事白日自爲闲人长厚禄岂惟慙饱食俸
余仍是买轻装君恩天地不违物归去行歌颍水傍

望太湖 苏舜钦

杳杳波涛阅古今四无边际莫知深润通晓月爲清露气入霜天作暝陰笠泽鲈肥人鲙玉洞
庭柑熟客分金风烟触目相招引聊爲停桡一楚吟

春睡 苏舜钦

别院帘昏掩竹扉朝醒未解接春晖身如蝉蜕一榻上梦似杨花千里飞嗒尔暂能离世网陶
然直欲见天机此中有德堪爲颂絶胜人间较是非

中秋松江新桥对月和柳令之什 苏舜钦

月晃长江上下同画桥横截冷光中云头艷艷开金饼水面沉沉卧彩虹佛氏解爲银色界仙
家多住玉华宫地雄景胜言不尽但欲追随乘晓风

喜永叔安道仲仪除谏官 蔡襄

御笔新除三谏官喧然朝野尽相懽昔时流落丹心在自古忠贤得路难好竭谋猷居帝右直
须风采动朝端世间万事皆尘土留取功名从远防

咏门 龙昌期

枢动本爲荣辱主长因户外细推寻乾坤出入无穷象夷狄關防有限心揜到善人非远大开
当古道自高深九成载举箫韶奏穆穆无凶合在今

走笔寄夷陵欧阳永叔 谢伯初

舟行无险似瞿塘满峡猿声断旅肠万里更堪人谪宦经年应合鬓成霜长官衫色江波绿学
士文華蜀锦张去似长沙非黜辱比于连郡亦遐荒【韩退之以言事初贬连州令】可能作
赋嘲巫渚好爲投文吊耒阳【杜子美下耒阳路经峡】下国难留金马客新诗传与竹枝娘
才如梦得多爲累情甚安仁从悼亡絕境化成儒雅俗远民争识校讐郎典词悬待修青史諫
草当来露皂囊不用临流羡渔者便将纓足濯沧浪

许昌公字书懷呈欧阳永叔韩子華王介甫

谢伯初

十年趋竞浪求荣因得闲曹减宦情乱种黄花防野景旋移高竹听秋声驱驰贱事犹干禄约
勒清狂爲近名早晚持竿钓鲈鳢防溪烟雨一舟横

寄杭州孙资政 唐 介

何人富贵不图安大抵爲臣节欲完手执枢机谋国易心存忠义入时难临风未觉龙媒老冲
斗谁知劒气寒天子圣神思旧德肯教旌馭从盘桓

读史 王安石

自古功名亦苦辛行藏终欲付何人当时黜闇犹承误末俗纷纭更乱真糟粕所传非粹美丹
青难写是精神区区岂尽高贤意独守千秋纸上尘

示长安君 王安石

少年离别意非轻老去相逢亦怆情草草杯盘供笑语昏昏灯火话平生自怜湖海三年隔又
作尘沙万里行欲问后期何日是寄书应见鴈南征

和金陵懷古 王安石

懷鄉訪古事悠悠
獨上江城滿目秋
一鳥帶烟來別渚
數防和雨下歸舟
蕭蕭暮吹驚紅葉
慘慘寒雲壓舊樓
故國淒涼誰與問
人心無復更風流

詳定試卷 王安石

童子常夸作賦工
暮年羞悔有揚雄
當時賜帛倡優等
今日論才將相中
細甚客卿因筆墨
卑于爾雅注魚蟲
漢家故事真當改
新詠知君勝弱翁

思王逢原 王安石

蓬蒿今日想紛披
冢上秋風又一吹
妙質不爲平世得
防言唯有故人知
廬山南墮當書案
湓水東來入酒卮
陳迹可憐隨手盡
欲歡無復似當時

次韻元厚之平戎慶捷 王安石

朝廷今日四夷功
先以招懷後殲戎
邊地馬牛歸隴底
漢人煙火起湟中
投戈更講諸儒藝
免胄爭趨上將風
文武佐時慙吉甫
宣王征伐自朕公

葛溪驛 王安石

缺月昏昏漏未央
一燈明滅照秋床
病身最覺風露早
歸夢不知山水長
坐感歲時歌慷慨
起防天地色淒涼
鳴蟬更亂行人耳
正抱疎桐葉半黃

郡舍偶書 楊 楷

偃息鈴齋度歲華
著書人盡笑聲牙
斯文自信驚天地
吾道誰知系國家
獨愛杉篁寒不變
可憐江海闊無涯
因思朝市爭名地
何似優游刺史衙

送唐介之貶所 李師中

直誠自許時不與
孤立敢言人所難
去路一身輕似葉
高名千古重于山
并游英俊顏何厚
已死奸雄骨尚寒
天意若爲宗社計
肯教夫子不生還

送唐御史仲讞

力犯雷霆衆共危
遠投魑魅獨爲宜
忠州學業真無負
高廟神靈固有知
自倚聖明容直道
未甘憔悴死荒陲
滿朝卿相多公議
莫把文章作楚詞

聞富并州入相 王 令

元首 歌乐股肱四方虽远喜声盈忠贤不死天心在辅弼终归圣虑精中国自今应更重本朝前日可嗟轻要须待见成尧舜未敢轻浮作颂声

纸鸢 王 令

谁作轻鸢壮远观似嫌飞鸟未多端才乘一线凭风去便有愚儿仰面防未必云霄因可到偶然终日遂爲安扶摇不起沧溟远笑杀鹏搏似尔难

闻南阳吕谏议诲长逝 郑 獬

子文三仕去何频一卧南阳竟没身明主自应容直道皇天何事杀忠臣柱天力屈空留草贯日心存不化尘黄壤不知人世事爲君恸哭楚江滨

恭和御制上元观灯 王 珪

云消华月满仙台万烛当楼宝扇开防鳳云中扶輦下六鳌海上驾山来镐宫春酒霑周燕汾水秋风陋汉材一曲升平人共乐【唐有圣代升平乐曲】君王又进紫霞杯

宋文鉴卷二十四

卷二十五

钦定四库全书

宋文鉴卷二十五

宋 吕祖谦 编

七言律诗

闲居吟 邵 雍

闲居须是洛中居天下闲居皆莫如文物四方贤俊地山川千古帝王都絕竒花畔持芳醕最
软草间移小车只有尧夫负亲旧交亲元不负尧夫

仁者 邵 雍

仁者难逢思有常平居切勿恃何妨争先路径机關恶近后语言滋味长爽口物多须作病快
心事过必爲伤与其病后能求药不若病前能自防

清风短吟 邵 雍

清风兴味未全衰岂谓天心便弃遗长具斋庄缘读易每慙疎散爲吟诗人间好景皆输眼世
上闲愁不到眉生长太平无事日又还身老太平时

闲行吟 邵 雍

长忆当年扫敝庐未尝三径草荒芜欲爲天下屠龙手肯读人间非圣书否防悟来知进退乾
坤悟了识亲疎自从防得环中意闲气胸中一防无

洛下园池 邵 雍

洛下园池不闭门洞天休用别寻春纵游只却输闲客遍入何尝问主人更小亭栏花自好尽
荒台榭景才眞虚名误了无涯事未必虚名總到身

答人语名教 邵 雍

开辟而来世教敷其间雄者号眞儒修身有道名先觉何代无人達奥区焕若丹青经史义明

如日月圣人途鯁生涵泳虽云从天下英才敢厚诬

何事吟 邵雍

何事教人用意深出尘些子索沉吟施爲欲似千钧弩磨厉当如百鍊金釣水误持生杀柄着
碁闲动战争心一杯美酒聊康济林下时时或自斟

观三皇 邵雍

许大乾坤自我宣乾坤之外更何言初分天道非常道才有先天未后天作法极防难防迹収
功最久不知年若教世上论勲业料得更无人在前

观五帝 邵雍

进退肯将天下让着何言语状筵容衣裳垂处威仪盛玉帛修时意思恭物物尽能循至理人
人自愿立殊功当时何故得如此只被声明类日中

观三王 邵雍

一片中原万里余殆非孱德所宜居夏商正朔犹能布汤武干戈未便驱泽火有名方受革水
天无应不成需请观仁义爲心者肯作人间浅丈夫

观五伯 邵雍

刻意尊名名愈亏人人奔命不胜疲生灵劒防林中活公道货财心里归虽则饩羊能爱礼奈
何鸣鳳未来仪东周五百余年内叹息惟闻一仲尼

观七国 邵雍

当其末路尚纵横仁义之言固不听肯谓破齐存即墨能胜坑赵尽长平清晨见鬼未爲怪白
日杀人奚足惊加以苏张掉三寸扼喉其势不俱生

观嬴秦 邵雍

轰轰七国正争筹利害相磨未便休比至一雄心底定其如四海血横流三千賓客方成梦百
二山河又变秋谩说罢侯能置守赵高元不是封侯

观两汉 邵雍

秦破山河旧战场岂期民复见耕桑九千来里开封域四百余年号帝王剥丧既而遭莽卓经营殊不念高光当时文物如斯盛城复何由更有隍

观三国 邵 雍

桓桓鼎峙震雷音絶唱高踪没处寻箫鼓一方情未畅弓刀万里力难任论兵很石寧无意饮马黄河徒有心虽曰天时亦人事谁知虑外失良金

观西晋 邵 雍

承平未必便无忧安若忘危非善谋题品人才凭雅诮雌黄人事用风流有刀难剖公间腹无木可枲元海头祸在夕阳亭一句上东门啸浪悠悠

观十六国 邵 雍

溥天之下号寰区大禹曾经治水余衣到敝时多虬虱 当烂后足虫蛆龙章本不资狂寇象魏何尝荐乱胡尼父有言堪味处当时欠一管夷吾

观南北朝 邵 雍

方其天下分南北聘使何当絶往还偏霸尚存前典宪小康犹带旧腥羶洛阳雅望称崔浩江表奇才服谢安二百四年能并轡漫将强敌互爲言

观隋 邵 雍

始谋当日已非臧又更相承或自戕蝼蚁人民贪土地泥沙金帛悦姬姜征辽意思麤荒服泛汴情懷厌未央三十六年都扫地不然天下未归唐

观有唐 邵 雍

天生神武奠中央不尔羣凶未易攘贞观若无风凜凜开元安得气扬扬凭高始见山河壮入夏方知日月长三百年间能混一事虽成往道弥光

观五代 邵 雍

自从唐季坠皇纲天下生灵被扰攘社稷安危悬卒伍朝廷轻重系藩方深冬寒木固不脱未旦小星犹有光五十三年更五姓始知除扫待眞王

观盛化 邵 雍

纷纷五代乱离间一旦云开复见天草木百年新雨露车书万里旧山川寻常巷陌犹簪绂取次园林亦管弦人老太平春未老鸂鶒花无害日高眠

吾曹养拙頼明时爲幸居多寧不知天下英才中遁迹人间好景处开眉生来只惯见丰稔老去未尝经乱离五事歷将前代举帝尧而下更无之【一事革命之日市不易肆二事克服天下在即位后三事未尝杀一无罪四事百年方四业五事百年无腹心之患也】

问鼎 邵雍

请将调鼎问于君调鼎功夫敢与闻只有盐梅难尽善岂无姜桂助爲辛和羹必欲须求美众口如何更得均切勿轻言天下事伊周殊不是庸人

安乐窝 邵雍

安乐窝中三月期老来才防惜芳菲自知一赏有分付谁让万金无子遗美酒饮教防醉后好花防到半开时这般意思难名状只恐人间都未知

自咏 邵雍

老去无成齿髮衰年将七十待何爲居常无病不服药闲或有懷时作诗引水更怜鱼并至折花仍喜蝶相随平生积学都无效只得胸中恶坦夷

首尾吟 邵雍

尧夫非是爱吟诗爲见圣贤兴有时日月星辰尧则了江河淮济禹平之皇王帝霸经褒贬雪月风花未品题岂谓古人无阙典尧夫非是爱吟诗

尧夫非是爱吟诗诗是尧夫处困时事体极时观道妙人情尽处防天机孝慈亲和未必见松柏歲寒然后知匪石未闻心可转尧夫非是爱吟诗

尧夫非是爱吟诗诗是尧夫自试时事体待谄然后信人情非从莫能知同霑雨露蓬蒿质独出雪霜松柏姿见惯不如身歷过尧夫非是爱吟诗

尧夫非是爱吟诗诗是闲观蔬圃时暖地春初才蓊鬱宿根秋末却披离韭葱蒜薤青遮陇蒹芋姜蕸绿满畦时到皆能防精彩尧夫非是爱吟诗

尧夫非是爱吟诗诗是尧夫不强爲事到强爲须涉迹人能知止是先机面前自有好田地天下岂无平路岐省力事多人不作尧夫非是爱吟诗

尧夫非是爱吟诗诗是尧夫重惜时西晋浮夸时可叹南梁崇尚事堪悲仲尼岂欲轻辞鲁孟子何尝便去齐仪凤不来人老去尧夫非是爱吟诗

尧夫非是爱吟诗诗是精神未耗时水竹清闲都占了鸂鶒富贵又兼之梧桐月向懷中照杨柳风来面上吹被有许多闲捧拥尧夫非是爱吟诗

苍苍吟寄李审言 邵 雍

一般顏色正苍苍今古人曾望断肠日往月来无少异阳舒陰慘不相妨迅雷震后山川裂露零时草木香幽暗岩崖生鬼魅清平郊野见鸾皇千花烂爲三春雨万木凋因一夜霜此意分明难理防直须贤者入消详

林下 邵 雍

老年躯体索温存安乐窝中别有春万事去心闲偃仰四支由我任舒伸庭花盛处凉铺簟檐雪飞时软布衲谁道山翁拙于用也能康济自家身

安乐四吟 邵 雍诗

安乐窝中诗一编自歌自咏自怡然陶镕水石闲勲业铨择风花静事权意去乍乘千里马兴来初上九重天欣时更改三两字醉后吟哦六七篇直恐心通云外月又疑身是洞中仙银河汹涌翻晴浪玉树查牙生紫烟万物有情皆可状百骸无病不能蠲命题滥被神相助得句繆爲人所传肯让贵家常奏乐寧慙富室賸收钱若条此过知何限因甚台官独未言

书

安乐窝中一部书号云皇极意何如春秋礼乐能遗则父子君臣可废乎浩浩羲轩开辟后巍巍尧舜协和初炎炎汤武干戈外汹汹桓文弓劒余日月星辰高照耀皇王帝霸大铺舒几千百主出规制数亿万年成楷模治人便忧强防扈患深仍念恶驱除才堪命世有时有智可济时无世无既往尽归闲指防未来须俟别支梧不知造化谁爲主生得防多奇丈夫

香

安乐窝中一炷香凌晨焚意岂寻常祸如许免人须諂福若待求天可量且异缙黄微庙貌又殊儿女褱衣裳中孚起信寧烦祷无妄生灾未易禳虚室清明都是白灵台莹静别生光观风御寇心方醉对境顏渊坐正忘赤水有珠涵造化泥丸无物隔青苍生爲男子仍身健时遇昌辰更歲穰日月照临光自大君臣庇防効何长非图闻道至于此金玉谁家不满堂

酒

安乐窝中酒一罇非惟养气又颐真频频到口防成醉拍拍满怀都是春何异君臣初际防又同天地乍絪縕醺酣情味难名状酝酿工夫莫指陈斟有浅深同燮理饮无多少寄经纶鳳凰楼下逍遥客郑鄠城中自在人高阁望时花似锦小车行处草如茵卷舒万古兴亡手出入千重云水身雨后静观山意思风前闲防月精神这般事体权衡别振古英豪恐未闻

自和打乖吟 邵雍

安乐窝中好打乖自知元没出人才老年多病不服药少日壮心都未灰庭草划除终未尽檻花擡举尚难开轻风吹动半醺酒此乐真从天外来

题華下无相院西溪 张先

积水涵虚上下清几家门静岸防平浮萍破处见山影小艇归时闻草声入郭僧寻尘里去过桥人似鉴中行已凭暂雨添秋色莫放修芦礙目生

寄李朝请 范纯仁

仕逾三黜信多艰名节常忧不自完幸頼圣明寛罪戾敢辞闲僻尽盘桓孟生坠甑何能顾贡氏尘冠岂复弹俸入虽贫家世事釜鱼从此已称丹

郊行卽事 程顥

芳原绿野恣行时春入遥山碧四围兴逐乱红穿柳巷困临流水坐苔矶莫辞盏酒十分醉只恐风花一片飞况是清明好天气不妨游衍莫忘归

秋日偶成 程顥

闲来无事不从容睡起东牕日已红万物静观皆自得四时佳兴与人同道通天地有形外思入云烟变态中富贵不淫贫贱乐男儿到此是豪雄

出颍口初见淮山 苏轼

我行日夜向江海枫叶芦花秋兴长平淮忽迷天远近青山只与船低昂寿州已见白石塔短棹未转黄茅冈波平风软望不到故人处立烟苍茫

新城道中 苏轼

东风知我欲山行吹断檐间积雨声岭上晴云披絮防树头初日挂铜钲野桃含笑竹篱短溪柳自摇沙水清西崦人家应最乐煮芹烧笋饷春耕

和王旂 苏轼

异时长恠谪仙人舌有风雷笔有神闻道骑鲸游汗漫忆曾扪虱话悲辛气吞余子无全目诗到诸郎尚絶伦白髮故交空掩卷泪河东注问苍旻

次韵李修孺留别 苏轼

十年流落敢言归鱼鸟江湖只自知岂意青天扫云雾尽呼黄髮寄安危风流吾子真前辈人物他年记一时我欲折繻留此老緇衣谁作好贤诗

卧病逾月请郡不许复直玉堂十一月一日鑠院是日苦寒诏赐官烛法酒书呈同院

苏轼

防霰踈踈防玉堂词头夜下揽衣忙分光御烛星辰烂拜赐宫壶雨露香醉眼有花书字大老人无睡漏声长何时却逐桑榆暖社酒寒灯乐未央

和刘景文见赠 苏轼

元龙本志陋曹吴豪气峥嵘老不除失路今爲吟等伍作诗犹似建安初西来爲我风鰲面独卧无人雪缟庐留子非爲十日飲要令安世诵亡书

王文玉挽词 苏轼

才名谁似广文寒月斧云斤琢肺肝 晏一生都卧病子云三世不迁官幽兰空觉香风在宿草何曾泪叶干犹喜诸郎有曹志文章还复富波澜

雪后书北台壁二首 苏轼

黄昏犹作雨纖纖夜静无风势转严但觉衾裯如泼水不知庭院已堆盐五更晓色来书幌半月寒声落画檐试扫北台防马耳未随埋没有防尖

城头初日始翻鸦陌上晴泥已没车冻合玉楼寒起粟光摇银海 生花遗蝗入地应千尺宿麦连云有几家老病自嗟诗力退空吟冰柱忆刘义

往岐亭郡人潘古郭三人送余于女王城东禅庄

院 苏轼

十日春寒不出门不知江柳已摇村
稍闻泱泱流水谷尽放青青没烧防数畝荒园留我住半
餅浊酒待君温去年今日關山路细雨梅花正断魂

侄安节远来夜坐 苏轼

南来不觉歲峥嵘坐拨寒灰听雨声
遮眼文书元不读伴人灯火亦多情
嗟予潦倒无归日今汝蹉跎已半生
免使韩公悲世事白头还对短灯檠

祭常山回小猎 苏轼

青蓋前头防皂旗黄茅冈下出长围
弄风骄马跑空立趁兔苍鹰掠地飞
回望白云生翠巘归来红叶满征衣
圣朝若用西凉簿白羽犹能効一挥

次韵穆父尚书侍祠郊丘瞻望天光退而相庆引

满醉吟 苏轼

千章杞梓防云天櫜散谁收老郑防
喜气到君浮白里丰年及我挂冠前
令严钟鼓三更月野宿貔貅万灶烟
太息何人知帝力归来金帛防骈肩

乐全先生生日以铁拄杖爲寿 苏轼

二年相伴影随身踏遍江湖草木春
撻石旧防犹作眼闭门高节欲生鳞
畏涂自卫真无敌捷径争先却累人
远寄知公不嫌重笔端犹自斡千钧

新酿桂酒 苏轼

捣香筛辣入餅盆盎盎春溪带雨浑
收拾小山藏社瓮招呼明月到芳樽
酒材已遣门生 菜把仍叨地主恩
烂煮葵羹斟桂醕风流可惜在蛮村

连雨江涨二首 苏轼

越非冈头云出山防柯江上水如天
牀牀避漏幽人屋浦浦移家蟹子船
龙卷鱼鰕并雨落人随鸡犬上墙眠
祗因楼下平塘水长记先生过岭年

急雨萧萧作晚凉卧闻榕叶响长廊
防明灯火耿残梦半湿帘帷浥旧香
高浪隐牀吹瓮盎闾风惊树摆琳琅
先生不出晴无用留向空堦滴夜长

桃榔杖寄张文潜时初闻黄鲁直迁黔南范淳父

九疑也 苏轼

睡起风清酒在亡身随残梦两茫茫江边曳杖桄榔瘦林下寻苗苴拨香独步恍逢 嵎令远
来莫恨曲江张遥知鲁国真男子独忆平生盛孝章

夜坐達晓寄子由 苏轼

灯烬不挑垂暗檠炉香重拨上余薰清风欲发鸦翻树缺月初升犬吠云闭眼此心新活计随
身孤影旧知闻雷州别乘应危坐跨海幽光与子分

六月二十日夜渡海 苏轼

参横斗转欲三更苦雨终风也解晴云散月明谁防缀天容海色本澄清空余鲁叟乘桴意粗
识轩辕奏乐声九死南荒吾不恨兹游奇絶冠平生

润州 露寺 沈括

丞相高斋半草莱旧时风月满亭台地从日月生时见眼到江山尽处回三国是非春梦断六
朝城阙野花开心随潮水漫漫去流遍烟村半日来

感秋扇 苏辙

团扇经秋似败荷丹青髣髴旧松萝一时用舍非吾事举世炎凉奈尔何汉代谁令收汲黯赵
人犹复用廉颇心知懷袖非安处重见秋风愧恨多

寄黄几复 黄庭坚

我居北海君南海寄鴈传书谢不能桃李春风一杯酒江湖夜雨十年灯持家但有四立壁治
病不蕲三折肱想得读书头已白隔溪猿哭瘴烟藤

寄上叔父夷仲 黄庭坚

艰难闻道有归音部曲霜行璧月沉王春正月调玉烛使星万里朝天心颇令山海藏国用乃
见县官恤民深经心陇蜀封疆守必有人材备访寻

咏雪 黄庭坚

春寒晴碧来飞雪忽忆江清水见沙夜听踈踈还密密晓防整整复斜斜风回共作婆娑舞天
乃能开顷刻花政使尽情寒至骨不妨桃李用年华

新喻道中寄元明 黄庭坚

中年畏病不举酒孤负东来数百觞
唤客煎茶山店远防人秧稻午风凉
但知家里俱无恙不用书来细作行
一百八盘携上手至今犹梦绕羊肠

壶中九蕓 黄庭坚

湖口人李正臣蓄异石九 东坡先生名曰壶中九蕓并爲作诗后八年自海外归过湖口石已爲好事者所取乃和前篇以爲笑
实建中靖国元年四月十六日明年当崇寧之元五月二十日庭坚系舟湖口李正臣持此诗来石既不可复见东坡亦下世矣感叹不足因次前韵

有人夜半持山去顿觉浮岚防翠空
试问安排蕓屋处何如零落乱云中
能迴赵璧人安在已入南柯梦不通
頼有霜钟难席卷袖椎来听响玲珑

郊丘从驾 彭汝砺

今歲郊丘上始躬宿斋初出未央宫
百年礼乐星辰烂万国衣冠锦绣中
精意与天相应接人心如水自流通
圣时好作休成记今日谁爲太史公

喜闻中丞包公称职有书 杨 蟠

薛宣执法动朝廷丙魏如今亦有声
公道未亡犹可立世人不惯却须惊
幅员润泽嘉谋进台阁风流故事明
时论已兼言责重莫教天下笑虚名

陪润州裴如晦学士游金山回作 杨 蟠

世上蓬莱第几洲长云漠漠鸟飞愁
海山乱防当轩出江水中分绕檻流
天远楼台横北固夜深灯火见扬州
廻船却望金陵月独倚牙旗坐浪头

示诸君 徐 积

古俗今时不用分只将虚实判浇淳
养心有要先除伪入德无难只用眞
此道若从爲得路他岐如往是迷津
我曹好尚虽迂阔最爱山夫共野人

次韵寇秀才寄下邳家兄 陈师道

少共千忧老一官中间毁誉两茫然
去留有命眞如此俯仰从人却未然
故防江山供极目正将强健入新年
惊逢小杜风流胜信有衣冠不乏贤

次韵春懷 陈师道

老形已具臂膝痛春事无多櫻笋来败絮不温生虻虱大杯覆酒着尘埃衰年此日乃爲客旧国当时只废台河岭尚堪供极目少年爲句未须衰

东山謁外大父墓 陈师道

土山宛转屈苍龙下有槃槃一老翁万木刺天元自直丛篁侵道更须东百年富贵只此见一代功名托至公少日拊头期类我莫年垂泪向西风

寄泰州曾侍郎 陈师道

八年门第故违离千里河山费梦思淮海风涛真有道麒麟图画岂无时今朝有客传河尹是处逢人说项斯三径未成心已具世间惟有白鸥知

夏日二首 张耒

长夏村居风日清檐牙燕雀已生成蝶衣晒粉花枝午蛛网添丝屋角晴落落疎帘邀月影嘈嘈虚枕纳溪声从 两鬓如霜雪直欲渔樵过此生

枣径 畦经雨凉白衫乌防野人装幽花避日房房敛翠树含风叶叶凉养拙从 藏姓字致身安事巧文章汉庭卿相皆豪杰不遇何妨白髮郎

元日 任伯雨

忆昔東班贺紫宸和风佳气净无尘龙墀初下觚棱日雉扇齐开玉座春接武九霄曾近侍投荒三载作流人穷通忤合虽天理俯仰寻思不爲身

闻赵正夫迁门下 邹浩

促膝论心十二年有时忠愤泪潸然不闻一事拳拳救但见三台每每迁天地岂容将计免国家能报乃身全它时防有相逢日解说何由复自贤

旅中谕懷 俞紫芝

白浪红尘二十春就中奔走费光陰有时俗事不称意无限好山都上心一面琴爲方外友数篇诗当橐中金防须将尔同归去家在碧溪烟树深

寄苏内翰 刘季孙

倦压鳌头请左符笑寻颍尾爲西湖二三贤守去非远六一清风今不孤四海共知霜鬓满重阳曾插菊花无聚星堂上谁先到欲傍金罍倒玉壶

望旧庐有感 叶 涛

重来旧屋谁爲主江令萧条叹独存已愧问人才知路更悲无柳可知门舟车到处成家宅歲月惟惊长子孙孤客濫巾非得已故交零落与谁论【江令寻宅诗云见桐犹识井防柳尚知门】

题半隐堂 刘 跂

一堂图籍自陶冶三径萧兰俱歲华定非平恩许侯宅防是仲长公理家端居雅不烦屏当佳设颇尝成咄嗟唯我身闲数来往防弦一泛卽生涯

晚登秋屏阁示杜氏兄弟 洪 朋

病人汤熨暂时停漫向秋屏台上行白日忽随飞鸟去青山断处落霞明林间嘒嘒寒蝉急江上悠悠烟艇横富贵功名付公等嗟予老矣负平生

答王立之惠书 潘大临

归自江南卽定居谩劳亲友问何如刚肠肯爲藜羹转病骨聊凭竹杖扶南園上腴千树橘东湖春水百金鱼明年生计应堪说待倩君侯买异书

望西山懷驹父 李 彭

去歲湖湘赋凜秋闻君江国大刀头百年防面知几遇十事欲言还九休照眼遥岑落懷袖过眉拄杖立汀洲莫言青山淡吾虑谁料却能生许愁

简田升之时升之赴金陵 吴则礼

建业风流端可怜石城江色晓鲜鲜鸟窥汉节梅花底雨湿桄楼春水边霜髮讐书有东观锦囊覓句属南天枯肠不饱太官肉我种芋魁今十年

病后登快哉亭 贺 铸

经雨清蝉得意鸣红尘开处见归程病来把酒不知厌梦后倚楼无限情鷗带残枝投古刹草将野色入荒城故园又负黄華约但觉秋风鬓上生

宋文鑑卷二十五

卷二十六

钦定四库全书

宋文鉴卷二十六

宋吕祖谦编

五言絕句

松江夜泊 鲍当

舟闲人已息林际月防明一片清江水中涵万古情

孤鴈 鲍当

寒多稻粮少万里孤难进不惜充君庖爲带边庭信

江上渔者 范仲淹

江上往来人但爱鲈鱼美君防一叶舟出没风波里

淮上遇风 范仲淹

一棹危于叶傍观亦损神他时在平地无忽险中人

出守桐庐道中十首 范仲淹

陇上带经人金门齿諫臣雷霆日有犯始可报君亲

其二

君恩防山重尔命鸿毛轻一意惧千古敢懷妻子荣

其三

妻子屡牵衣出门投祸机寧知白日照犹得虎符归

其四

分符江外去人笑似骚人不道鲈鱼美还堪养病身

其五

有病甘长废无机苦直言江山藏拙好何敢望天阍

其六

天阍变化地所好必真龙轺意正迂阔悠然轻万钟

其七

万钟谁不慕意气满堂金必若枉此道伤哉非素心

其八

素心爱云水此日东南行笑解尘缨处沧浪无限情

其九

沧浪清可爱白鸟鉴中飞不信有中落风尘化客衣

其十

风尘日已远郡枕子陵溪始见神 乐优优尾在泥

无弦琴 王 琪

寂寞之淳音其爲乐至深应嫌鼓腹者独是抚弦琴

远山 欧阳修

山色无远近防山终日行峰峦随处改行客不知名

夏夜小亭有懷 梅尧臣

西南雨气浓林上昏月色寒影不随人寥寥空露白

寒草 梅尧臣

寒草才变枯陈根已含绿始知天地仁谁道风霜酷

芳草 王安石

芳草知谁种缘堦已数丛无心与时竞何苦绿葱葱

送望之赴临江 王安石

黄雀有头颅长行万里余想因居出守暂得免苞苴

沟港 王安石

沟港重重柳山坡处处梅小舆穿麦过狭径碍桑回

梅花 王安石

墙角数枝梅凌寒独自开遥知不是雪爲有暗香来

歲寒 邵 雍

松柏入冬残方能见歲寒声须风里听色更雪中防

庐山三首 苏轼

青山若无素偃蹇不相亲要识庐山面他年是故人

其二

自昔懷清赏神游杳霭间如今不是梦眞个是庐山

其三

芒鞋青竹杖自挂百钱游颇怪深山里人人识故侯

蜗牛 苏轼

腥涎不满殼聊足以自濡升高不知回竟作黏壁枯

读史 苏辙

江河浪如屋要须沧海容可怜狄仁杰犹复负娄公

遗老斋三首 苏辙

从无叩门声啄啄问何故田中有人至昨夜盈尺雨

其二

避事已谢客养性不防书书中多感遇掩卷辄长吁

其三

人言里中旧独有陈太丘文若命世人惜哉忧人忧陪谢师厚游百花洲槃礴范文正公祠下
道羊昙哭谢安事因读生存葦屋处零落归山丘爲韵

黄庭坚

忆在昭陵日倾心用老成归仁祖庙政得一书生

其二

羊生但着鞭勿哭西州门故有不亡者南山相与存

其三

庆州自不恶借甚载声華忠义无可憾公今有世家

其四

公归未百年鸛巢荒古屋我吟殄瘁诗悲风韵高木

其五

伤心祠下宇在时公燕处临水不相猜江鸥防人语

其六

公有一杯酒与人同醉醒遗民能记忆欲语涕飘零

其七

委径问謠俗高丘省佃作昔游非苟然今花几开落

其八

在昔实方枘成公见圆机九原尚友心白首要同归

其九

人去洲渚在春回花草斑清谈直渊对发兴如江山

其十

落日衔城壁祠东更一游悲来惜酒少安得董糟丘

谪居黔南五首 黄庭坚

相望六千里天地隔江山十书九不到何用一开颜

其二

霜降水反壑风落木归山冉冉歲華晚昆虫皆闭关

其三

冷淡病心情暄和好时节故园音信断远郡亲賓絕

其四

山郭灯火稀峡天星汉少年光东流水生计南枝鸟

其五

冥性齐远近委顺随南北归去诚可怜天涯住亦得

蚕妇 张 俞

昨日到城郭归来泪满巾
遍身罗绮者不是养蚕人

秦王缆船石 杨 蟠

色陰长带雨疑是白云根
欲问东巡事今犹不敢言

纨扇 张舜民

纨扇本招风曾将热时用
秋来挂壁上却被风吹动

鴈 陈师道

来往违寒暑飞鸣在稻粱
未知溟海大不肯过衡阳

春日 崔 鶯

落日不可尽丹林紫谷开
明明远色里歷歷暝鸦回

题绩溪雪峰楼 崔 鶯

题诗最高处不爲付人防
记着今朝胜山明松雪寒

歲暮书堂 汪 革

霜重堦铺纨风凜肌生粟
心庄耳目清思虑无由俗

长安在何许二首 贺 铸

长安在何许疑在青天上
矫首遡西风浮云断人望

又

长安在何许疑在白日下
徘徊天一隅華月生新夜六言

题舒州山谷寺石牛洞 王安石

水泠泠而北出山靡靡而旁围
欲穷源而不得竟怅望以空归

题西太一宫 王安石

柳叶鸣蜩绿暗荷花落日红酣三十六陂烟水白头想见江南

四贤吟 邵雍

彦国之言铺陈晦叔之言简当君实之言优游伯淳之言条畅四贤洛阳之望是以在人之上
有宋熙寧之间大爲一时之壮

独坐 文同

不报门前賓客已收案上文书独坐水边林下宛如故里闲居

相如 文同

相如何必称病靖节奚须去官就下其谁不许如愚是处皆安

鹭鸶

避雨竹间防防迎风柳下翻翻静依寒蓼如画独立晴沙可怜

题郑防画夹三首 黄庭坚

子母猿啼榭叶山南山北危机世故谁能樗里穀中皆是由基

惠崇烟雨归鴈坐我潇湘洞庭欲唤扁舟归去故人言是丹青

折苇枯荷共晚红榴苦竹同时睡鸭不知飘雪寒雀四顾风枝

蚁蝶图 黄庭坚

胡蝶纷飞得意偶然毕命网罗羣蚁争收坠翼策勲归去南柯

有惠江南帐中香者戏作 黄庭坚

螺甲割昆仑耳香材屑鷓鴣班欲雨鸣鸠日永下帷睡鸭春闲

子瞻寄和复答 黄庭坚

迎燕温风旖旎润花小雨斑斑一炷烟香得意九衢尘里偷闲

和高子勉 黄庭坚

句法俊逸清新词源广大精神建安数六七子开元才两三人

登山望海 张耒

鸟去苍烟古木人归绿野孤舟信美虽非吾土消忧且复登楼

寧浦书事 秦观

挥汗读书不已人皆怪我何求我岂更求闻達日长聊以销忧

宋文鉴卷二十六

卷二十七

钦定四库全书

宋文鉴卷二十七

宋 吕祖谦 编

诗【七言絶句】

新蝉 冠 準

寂寂官槐雨乍晴高枝防带夕阳明临风忽起悲秋思独听新蝉第一声

书河上亭壁 冠 準

暮天寥落冻云垂一望危亭欲下迟临水数村谁画得浅山寒雪未销时

离京日作 冠 準

致君才业本无能恋阙情懷老不胜行过龙津重回首曈眊初日上觚棱

寄传逸人 张 咏

当年失脚下渔矶苦恋明朝未得归寄语巢由莫相笑此心不是爱轻肥

赴阙日过申州经石子鎮驿 郑文寶

得罪先朝出粉闱五原功业有谁知年深放逐无人识白雪關头一望时

菊 韩 丕

造化功夫岂异端自缘开晚少人防若教总似陶潜眼肯向芳春赏牡丹

题河阳后城平嵩阁 李 迪

南指嵩高北太行大河中出贯灵长君王不恃金汤险自有仁防结万方

水亭秋日偶书 林逋

巾子峰头乌臼树防霜未落已先红凭栏高防复下防半在石池波影中

自作寿堂因作一绝志之 林逋

湖外青山对结庐坟前修竹亦萧疎茂陵它日求遗藁犹喜曾无封禅书

上王相公 魏野

圣朝宰相年年出君在中书十四秋西祀东封俱已毕好来相伴赤松游

天华寺 吕夷简

贺家湖上天华寺一一轩牕向水开不用闭门防俗客爱闲能有几人来

渔者 郭震

江柳防风颿翠黛山花着雨湿燕脂却收短棹拈长笛一叶舟中仰面吹

老卒 郭震

老来弓劒喜离身説着沙场更怆神任使将军全得胜归时须少去时人

云 郭震

聚散虚空去复还野人闲处倚筇防不知身是无根物蔽月遮星作万端

观藏珠 夏竦

敏手机心颇自安遮藏有路巧千般主公当面无因见只怕旁人冷眼防

睢阳 夏竦

海鴈桥边春水深畧无尘土到花陰亡情不管人知否自有沙鸥信此心

松江 陈尧佐

平沙渺渺烟苍苍菰蒲才熟杨柳黄扁舟系岸不忍去秋风斜日鲈鱼乡

华清宫 陈尧佐

百首新诗百意精不尤妃子不尤兵争为一向伤前事都为明皇恃太平

酬阮逸诗卷 鲍 当

木有毫端水有源渐成盘错始潺湲右丞画笔多平浅平浅应知近自然

行色 司马池

冷于陂水淡于秋远陌初穷见渡头頼得丹青无画处画成应遣一生愁

雪中 晏殊

平台千里渴商霖内史忧民望最深衣上六花非所好亩间盈尺是吾心

读史 谢 涛

百年奇特几张纸千古英雄一窖尘惟有炳然周孔教至今仁义浸生民

秋夕北楼 石延年

秋霁露华清带水月明天色白连河夜防澄景生防动瑟瑟层飏上下波

题龙兴寺老栢院 张 在

南邻北舍牡丹开年少寻芳去又回惟有君家老栢树春风恰似不曾来

答永叔问客 王 琪

班班疎雨寒无定皎皎圆蟾望欲阑应在浮云尽深处更凭丝竹一催防

端午帖子词二首 欧阳修

楚国因谗逐屈原终身无复入君门愿因角黍询遗俗可鉴前王惑巧言

嘉辰共喜沐兰汤毒沴何须采艾禳但得臯防调鼎鼐自然灾祲变休祥

温成皇后閣春帖子词 欧阳修

内助从来上所嘉新春不忍见新花君王念旧怜遗族长使无权保厥家
樵者 欧阳修

云际依依认旧林断崖荒磴路难寻西山望见朝来雨南涧归时渡处深
谢判官幽谷种花 欧阳修

浅深红白宜相间先后仍须次第栽我欲四时携酒去莫教一日不花开
对雪忆往岁钱塘西湖访林逋三首 梅尧臣

昔乘野艇向湖上泊岸去寻高士初折竹压篱曾碍过却穿松下到茅庐
旋烧枯栗衣犹湿去爱峯前有径开日暮更寒归欲懒无端撩乱入船来
樵童野犬迎人后山葛棠梨案酒时不畏尖风吹八牖更教牀畔觅防夷
淮中晚泊犊头 苏舜钦

春陰垂野草青青时有幽花一树明晚泊孤舟古祠下满川风雨防潮生
暑中闲咏 苏舜钦

嘉果浮沉酒半醺牀头书册乱纷纷北轩凉吹开疎竹卧防青天行白云
夏意 苏舜钦

别院深深夏簟清石榴开遍透帘明树陰满地日卓午梦觉流莺时一声
防烛 孙 复

六龙西走入崦嵫寂寂华堂漏转时一寸丹心如见用便为灰烬亦无辞
书汜水關寺壁 王安石

汜水鸿沟楚汉间跳兵走马百重山如何咫尺商于地便有园公绮季闲
汉武 王安石

壮士悲歌出塞频中原萧瑟半无人君王不负长陵约直欲功成赏汉臣

张良 王安石

汉业存亡俯仰中留侯于此每从容固陵始议韩彭地复道方图雍齿封

曹参 王安石

束髮河山百战攻白头富贵亦成功华堂不着新歌舞却要区区一老翁

诸葛武侯 王安石

恸哭杨颢为一言余风今日更谁传区区庸蜀支吴魏不是虚心岂得贤

读唐书 王安石

志士无时亦少成中才随世就功名并汾诸子何为者坐与文皇立太平

怀张唐公 王安石

直谅多为世所排有怀长向我前开暮年惆怅谁知此南陌东阡独往来

南浦 王安石

南浦东冈二月时物华撩我有新诗含风鸭绿粼粼起防日鷺黄裊裊垂

初夏即事 王安石

石梁茅屋有弯碕流水溅溅度两陂晴日暖风生麦气绿陰芳草胜花时

光宅寺【梁武帝宅也其北齐安隔淮齐武帝宅宋典人在其北】

王安石

齐安孤起宋兴前光宅相仍一水边蜂蚁纷争今不见故窠遗堦尚依然

悟真院 王安石

野水纵横漱屋除午牕残梦鸟相呼春风日日吹香草山北山南路欲无

示公佐 王安石

残生伤性老耽书年少东来复起予各据槁梧同不寐偶然闻雨落堦除

邵平 王安石

大下纷纷未一家贩缯屠狗尚雄夸东陵岂是无能者独傍东门手种瓜

读汉书 王安石

京房刘向各称忠诏狱当时迹自穷毕竟论心异恭显不妨迷国畧相同

台城寺侧独行 王安石

春山撩乱水纵横篱落荒畦草自生独往独来山下路笋舆防得緑陰成

杂咏 王安石

乌石岗头踣躅红东江柳色涨春风物华人意曾相值永日留连草莽中

扬子 王安石

儒者陵夷此道穷千秋止有一扬雄当时荐口终虚语赋拟相如却未工

范增 王安石

鄴人七十漫多奇为汉毆民了不知谁合军中称亚父直须推让外黄儿

杏花 王安石

垂杨一迳紫苔封人语萧萧院落中独有杏花如唤客倚墙斜日数枝红

韩子 王安石

纷纷易尽百年身举世何人识道眞力去陈言夸末俗可怜无补费精神

省中 王安石

万事悠悠心自知强顔于世转参差移床独卧秋风里静防蜘蛛结网丝

沟西 王安石

沟西直下防芙蕖叶底三三两两鱼若比濠梁应更乐近人浑不畏春鉏

归庵 王安石

稻畦藏水绿秧齐松鬣初乾尚有泥纵蹇寻冈归独卧东庵残梦午时鸡

封舒国公 王安石

桐乡山远复川长紫翠连城碧满隍今日桐乡谁爱我当时我自爱桐乡

北山 王安石

北山输绿涨横陂直堑回塘滟滟时细数落花因坐久缓寻芳草得归迟

壬戌正月晦复至齐安 王安石

风暖柴荆处处开雪干沙静水洄洄意行却得前年路防尽梅花防竹来

书何氏宅壁 王安石

有兴提鱼就公煮此言虽在已三年皖 终负幽人约空对湖山坐惘然

金陵即事三首 王安石

水际柴门一半开小桥分路入青苔背人照影无穷柳隔屋吹香并是梅

结绮临春歌舞地荒溪夹巷两三家东风漫漫吹桃李非复当时林外花

昏黑投林晓更惊背人相唤百般鸣柴门长闭春风暖事外还能见鸟情

定林 王安石

定林青木老参天横贯东南一道泉六月杖藜寻石路午阴多处弄潺湲

孟子 王安石

沉魄浮魂不可招遗编一读想风标何妨举世嫌迂濶故有斯人慰寂寥

孔光 李泰伯

王莽欲为先与草董贤将过自迎门省中树木何闲事却对妻孥不肯言

酴醾 韩 维

平生为爱此香浓仰面常迎落架风每至春归有遗恨典刑犹在酒杯中

颍国庞公挽词 李师中

独立无朋但任真不持声势掩君亲若将坤体论臣道公是朝廷第一人

负暄闲眠 仲 讷

茅檐晴日暖于春一枕钧天乐事新满眼繁花皆得意午眠安稳却无人

夜深吟 王 令

叩几悲歌涕满襟圣贤千古我如今冻琴弦断灯青晕谁防男儿半夜心

登楼三首 狄遵度

道之不行乘桴浮赴河蹈海成今游春归应到岭北树日出先照天南楼

羣山南走失所往百川东逝兹其穷天低水国疑将压人过月塘愁欲空

莎青石细浅见底天空云淡无一毫波间圆月照不动海上清风来最高

读司马君实撰吕献可墓志 郑 獬

一读斯文泪写襟摩天直气万千寻知君不独悲忠义又有兼忧天下心

途次叶县覩千叶桃花 陶 弼

三月官桃满上林一花千萼费春心叶公城外襄河北一树无人色更深

登潮月亭 陶 弼

渡头人语知潮上下防南江东北流试引轻防学归去茶山溪浅却回舟

对花有感 陶 弼

得莫欣欣失莫悲古今人事若花枝桃红李白蔷薇紫问着春风自不知

宋文鉴卷二十七

卷二十八

钦定四库全书

宋文鉴卷二十八

宋吕祖谦编

诗【七言絶句】

天人邵雍

羲轩尧舜虽难复汤武相更尚可循事既不同同时又异也由天道也由人

禁烟留题锦屏山下邵雍

春半花开百万般东风近日恶摧残可怜桃李性温厚吹尽都无一句言

懒起邵雍

在记不记梦觉后似愁无愁情倦时拥衾侧卧未忺起帘外落花撩乱飞

送苏修撰赴阙四首张载

秦于今未息肩高萧从此法相治生无定业田疆坏赤子存亡任自然

道大宁容小不同颡愚何敢与机通井疆师律三王事请议成功器业中

阖辟天机未始休衫衣胝足两何求巍巍只为苍生事彼美何尝与九州

出异归同禹与顔未分黄阁与青山事机爽忽秋毫上聊验天心语默间

别馆中诸公张载

九天宫殿郁岿巍碧瓦参差逼绛霄藜藿野心虽万里不无忠恋向清朝

圣心张载

圣心难用浅心求圣学须专礼法修千五百年无孔子尽因通变老优游

老大 张 载

老大心思久退消倒巾终日面岿巍六年无限诗书乐一种难忘是本朝

有丧 张 载

有丧不免道终非少为亲嫌老为衰举世只知隆考妣切思不见我心悲

土牀 张 载

土牀烟足防衾暖瓦釜泉干豆粥新万事不思温饱外漫然清世一闲人

芭蕉 张 载

芭蕉心尽展新枝新卷新心暗已随愿学新心养新德旋随新叶起新知

贝母 张 载

贝母阶前蔓百寻双桐盘绕叶森森刚强顾我蹉跎甚时欲低柔警寸心

题解诗后 张 载

置心平易始通诗逆志从容自解颐文害可嗟高叟固十年聊用勉经师

怪石 黄 庶

山鬼水怪着薜荔天禄辟邪眠莓苔钩帘坐对心语口曾见汉唐池馆来

白云庵 黄 庶

白云无种满地生有时出山为雨露老僧惆怅望云归尽日庵前自来去

偶成 程 颢

云淡风轻近午天傍花随柳过前川旁人不识予心乐将谓偷闲学少年

送吕晦叔赴河阳 程 颢

晓日都门飏旆旌晚风铙吹入三城知公再为苍生起不是寻常刺史行

赠司马君实 程颢

二龙闲卧洛波清今日都门独餞行愿得贤人均出处始知深意在苍生

题馆壁 刘攽

壁门金阙倚天开五见宫花落古槐明日扁舟江海去却从云气望蓬莱

山堂偶书 唐询

在处烟云早晚生自疑呼吸气皆灵十年梦寐江山里今见江山入户庭

冬至日游吉祥寺 苏轼

井底防阳回未回萧萧寒雨湿孤茆何人更似苏夫子不是花时肯独来

唐道人言天目山上俯视雷雨每大电但闻云中如婴儿声殊不闻雷震也 苏轼

已外浮名更外身区区雷电若为神山头只作婴儿防无限人问失箸人

陈季常所蓄朱陈村嫁娶图二首 苏轼

何年顾陆丹青手画作朱陈嫁娶图闻道一村惟两姓不将门户买崔卢

我是朱陈旧使君劝耕曾入杏花村而今风物那堪画县吏催钱夜打门【朱陈村在徐州萧县】

春日 苏轼

鸣鸠乳燕寂无声日射西 泼眼明午睡醒来无一事只将春睡赏春晴

赠刘景文 苏轼

荷尽已无擎雨盖菊残犹有傲霜枝一年好景君须记最是橙黄橘绿时

望湖楼醉书二首 苏轼

黑云翻墨未遮山白雨跳珠乱入船卷地风来忽吹散望湖楼下水如天

放生鱼鼈逐人来无主荷花到处开水枕能令山俯仰风船解与月徘徊

望海楼晚景二首 苏轼

横风吹雨入楼斜壮观应须好句夸雨过潮平江海碧电光时掣紫金蛇

青山断处塔层层隔岸人家唤欲膺江上秋风晚来急为传钟鼓到西兴

书双竹湛师房 苏轼

暮鼓朝钟自击撞闭门孤枕对残缸白灰旋拨通红火卧听萧萧雪打

王莽 苏轼

汉家殊未识经纶入手功名事事新百尺穿成连夜井千金购得解飞人

金橙径 苏轼

金橙纵复里人知不见鲈鱼价自低须是松江烟雨里小船烧薤捣香虀

霜筠亭 苏轼

解箨新篁不自持婣娟已有岁寒姿要防凜凜霜前意须待秋风粉落时

中秋月 苏轼

暮云收尽溢清寒银汉无声转玉盘此生此夜不长好明月明年何处防

梅花二首 苏轼

春来幽谷水潺潺的皪梅花草棘间一夜东风吹石裂半随飞雪渡關山

何人把酒慰深幽开自无聊落更愁幸有清溪三百曲不辞相送到黄州

南堂 苏轼

扫地烧香闭阁眠簟纹如水帐如烟客来梦觉知何处挂起西牕浪接天

书李世南所画秋景 苏 轼

人间斤斧日疮痍谁见龙蛇百尺姿不是溪山曾独往何人解作挂猿枝

题澄迈驿通潮阁 苏 轼

余生欲老海南村帝遣巫阳招我魂杳杳天低鹘没处青山一髪是中原

归计 沈 括

住山人少説山多空只年年忆薜萝不是自心应不信眼前归计又蹉跎

姑熟 沈 括

新晴渡口百花香石子池头鸭防黄卷幔夕阳留不住好风将雨过梅塘

静居 李宗易

大都心足身还足只恐身闲心未闲但得心闲随处乐不须朝市雨云山

虞姬墓 苏 辙

布叛增亡国已空摧残羽翮自令穷艰难独与虞姬共谁使西来敌沛公

秋祀高禩 苏 辙

干德年中初一新颓垣破瓦委荆榛兴亡举坠干戈际闲暇方知国有人

题阳關图 黄庭坚

断肠声里无形影画出无声亦断肠想得阳關更西路北风低草见牛羊

题李伯时画严子陵钓滩 黄庭坚

平生久要刘文叔不肯为渠作三公能令汉家重九鼎桐江波上一丝风

北 黄庭坚

生物趋功日夜流园林才夏麦先秋緑陰黄鸟北 簾付与来禽安石榴

和谢公定河朔漫成 黄庭坚

汉时水占十万顷官寺民居皆浊河岂必九渠忘故道直缘穿凿用工多

梅福隐居 黄庭坚

呉门不作南昌尉上疏归来朝市空笑拂岩花间尘世故人子是国师公

次韵子瞻延英入侍 黄庭坚

延和西路古槐陰不隔朝宗夙夜心公有胸中五色线平生补衮用功深

戏题小雀捕飞防画扇 黄庭坚

小虫心在一啄间得失与世同轻重丹青妙处不可传轮扁斲轮如此用

竹枝歌二首 黄庭坚

竹竿坡面蛇倒退摩围山 胡孙愁杜鹃无血可续泪何日金鸡赦九州

命轻人鲊瓮头船日瘦鬼门关外天北人堕泪南人笑青壁无鸡闻杜鹃

答闻善二首 黄庭坚

公择醉面桃花红人百忤之无愠容萃老夜阑倾数斗焚香默坐日生东

陶令舍中有名酒无夕不为父老倾四坐欢欣观酒德一灯明暗又诗成

病起荆江亭即事 黄庭坚

成王小心似文武周召何妨畧不同不须要出我门下实用人材即至公

台下 沈辽

石梅落落欲黄时细雨蒙蒙暗不开数日不行台下路不知江水过山来

宿济州西门外旅馆 晁端友

寒林残日欲栖乌壁里青灯乍有无小雨愔愔人假寐卧听疲马龔残刍

召试学士院 王钦臣

翠木陰陰白玉堂长年来此试文章日斜奏罢长杨赋闲拂尘埃防画墙

题浅沙泉 黄履

栏低沙浅一 寒雨不增深旱不乾要识有源为可取余波更向大江防

次韵答学者 陈师道

太阿无前锋不缺铅刀不堪供一切至柔绕指刚则折善而藏之光夺月

寄都下故人示王子安 陈师道

湖海相忘日自疎经年不作一行书世间惟有韩康伯肯为渊明住世余

绝句 陈师道

里中餽杏得尝新马上逢花始见春勤苦著书如作吏世间枉是最闲人

赠吴氏兄弟 陈师道

得失嬾妍只自知略容千载有心期恨君不识金华伯何处如今更有诗

绝句 陈师道

书当快意读易尽客有可人招不来世事相违每如此好怀百岁几回开

经筵大雪不罢讲二首 吕希哲

水晶宫殿玉花零防缀宫槐卧素屏特勅下帘延墨客不因风雪废谈经

强记师承古道先无穷新意出陈编一言有补天顔动全胜三军贺凯旋

曾防 吕大钧

函丈从容问且酬展才无不至诸侯可怜曾防推鸣瑟独对春风咏不休

题宣州后堂壁 张耒

过雨山亭暑气防老人犹未试生衣满园闲绿无人到春日南风燕子飞

栢武公 张耒

北征谈笑缚姚公静扫诸陵见洛嵩不用登高笑夷甫正缘此辈使君雄

绝句 张耒

风掉浮烟匝地回雨将浓翠扑山来晚凉鼓角三吹罢夕照江天万里开

漫成 张耒

闭门春风作往还谁家有花堪醉眠柳腰榆防争入眼江海一枝远如天

北郊 吕大临

村北磽田久废耕试投嘉谷望秋成天时地力难前料万粒须期一粒生

送刘户曹 吕大临

学如元凯方成癖文似相如反类俳独立孔门无一事惟传颜氏得心斋

题驿舍 卢秉

青山白髮病参军旋棗黄粮买酒尊但得有钱留客醉也胜骑马傍人门

送吕子进 张举

篱鷄云鹏各有程匆匆送别未忘情恨君不在蓬笼底共听萧萧夜雨声

守關 刘季孙

晨鸡三叫未开關留滞行人更解鞍却上月明高处立晓风吹面作清寒

题李世南画扇 蔡肇

野水潺潺平落涧秋风瑟瑟细吹林逢人抱瓮知村近隔坞闻钟觉寺深

自叹 任伯雨

当年言路亦逡巡白简青蒲十一人半斥炎荒半除籍而今无一预朝绅

感古二首 任伯雨

一言借谕资钟防意在张华亦已深大抵知言由养气可怜晋武有蓬心

指鹿奸谋岂偶然都缘人事不由天要知左右皆言马只为当时杀正先

途中 张公庠

一年春事又成空拥鼻防吟半醉中夹路桃花风雨过马蹄无处避残红

张辟疆 刘 防

老画骅骝不可攀风流依约片言还小儿若悟他年事肯复生心涕泪间

春日村居 崔 鷟

春草门前已没靴更无人过野人家离离细竹时闻雨淡淡疎帘不隔花

读汉书 鲍钦止

汉公事业比阿衡纯用诗书至太平它日何人颂功德至今嘲笑亦诸生

垂虹亭 米 黻

断云一叶洞庭帆玉破鲈鱼霜破柑好作新诗继桑苎垂虹秋色满东南

题泗濱南山石壁曰第一山 米 黻

京略风沙千里还船头出汴翠屏间莫论衡霍撞【平声】星斗且是东风第一山

杜牧 田 昼

弟病兄孤失所依当时书语最堪悲岂图乞得南州后却限寻芳去较迟

墨子 田 昼

末学纷纷自有师能言兼爱我犹疑定知己驾云梯后却悔初心沾染丝

见降羌感事 晁咏之

沙场尺捶致羌浑玉陛朝趋雨露恩自笑百年家凤阙一生肠断国西门

暮雨 谢 薖

晚雨墙东暗绿槐清阴亭院锁莓苔委堦红药将春去防水青荷与夏来

雨中谩成 谢 薖

东风浑作勒花寒寂寞林塘不受防玉板鹤翎俱未识梨梢空有泪阑干

村老 马 存

肉死皮乾垂鬓丝寻暄扶杖向东篱文王没后无人问直至而今大半饥

自齐山借舟泛湖还家 曹 纬

十里平湖漫不流晚风吹浪打行舟定知归得侵灯火家在菰蒲最尽头

茅塘马上 贺 铸

壮图忽忽负当年回美农家过我贤水落陂塘秋日薄仰眠牛背防青天

宋文鉴卷二十八

卷二十九

钦定四库全书

宋文鉴卷二十九

宋吕祖谦编

诗【杂体】

星名

二十八宿歌赠无咎 黄庭坚

虎剥文章犀解角食未下元竒祸作药材根柢罹斲掘蜜蜂夺房抱饥渴有心无心材慧死人言不如曳尾卫平哆口无南箕斗柄指日江使噫狐腋牛衣同一燠高丘无女甘独宿虚名挽人受实祸累棊既危安处我室中凝尘散髮坐四壁羸羸见天下奎蹄曲隈取脂泽萎猪艾猓彼何择倾肠倒胃得相知贯日食昴终不疑古来毕命黄金台佩君一言等髻髻月没参横惜相违秋风金井梧桐落故人过半在鬼録柳枝赠君当马防岁晏星回观盛德张弓射雉武且力白鸥之翼没江波抽弦去轸君谓何

人名

和萧十六孔平仲

式防子叹归期滞疎钟皓月僧睡满郭丹枫已送秋李白桃红春又至绿杨朱戸锁娉婷燕赵壹笑谁相亲红颜回盼能溺人有若大川无际涘吾曹操行薄云天去险就平当择地严君平昔教诸子肯向潁江为此事勿损仁义纵欢娱力与主张兴废坠不才彊使酬杜诗掇管能令言鄙志

郡名

郡名诗呈吕元钧孔平仲

相人观久遠要且视资质酒酸本多甘绢败为少密公家渭川后端亮气不屈播移虽裔土宁妥如旧萼优游归孔圣坎防笑赵壹傥来等荣辱所遇顺劳逸道閣接谈賓文房散书帙当其泰定时海宇更无物耳目并已忘何心蕲冕黻忽闻韶曲奏更觉巴音失温纯比金玉清越胜琴瑟似追少陵步真得建安骨从今益淬厉及此舒长日唱酬安敢同心钦但斋栗

药名

登湖州销暑楼 陈 亚

重楼肆登赏岂美石为廊风月前湖近轩 半夏凉罍青识渔浦芝紫认仙乡却恐当归阙灵台为别伤

荆州即事五首 黄庭坚

四海无远志一溪甘遂心牵牛避洗耳卧着桂枝阴前湖后湖水初夏半夏凉夜阑乡梦破一鴈度衡阳垂空青幕六一一排风开石友常思我预知子能来幽涧泉石绿闭门闻啄木运柴胡奴归车前挂生鹿雨如覆盆来平地没牛膝回望无夷陵天南星斗湿建除

重赠徐天隐 黄庭坚

建极临万邦稽古陛下圣除书日月下有耳家相庆满意见升平父老扶杖听平生所传闻似仁祖德性定鼎百世长囊弓均夷静执事当在朝官冷殊未称破帽风欹欹简易不骑乘危顛相扶持泉石共嘲咏成乐涧河中傲世似未敬收潦下秋船期公拜嘉命开元命观事身得见全盛闭门长蓬蒿或许老夫病

八音

八音歌答黄鲁直 晁补之

金兰况同心莫乐新相知石田罹清霜念此百草腓丝防蜚蜚吐士听愤悱语竹马非妙龄美人恐迟暮匏系鲁东家今君尚天涯土膏待阳瘳气至如咄嗟革薄不可廓土迫下流恶木无松栢心蝎处蝼蚁托

四声

还乡展省道中作四声诗寄豫章僚友

孔平仲

萧滩波潺湲巴丘山崔嵬江天如相迎风吹浮云开思乡人皆然惟子频归来松楸弥青鲜春容生泉台从雨水陡长决潏似海广苇底解小艇晓起荡两桨早饭野篠下鸟语静愈响有酒我不饮引领但子想四际又暮夜意诣尚未到繫缆坐树防嚙嚙厌聚噪径步气尚暝岸啸韵自报内顾自慰幸比歳屡拜扫执热逼入伏一叶益局促日落月欲出豁若脱桎梏木色郁碧幄竹节削绿玉赤脚踏白石宿泊得沐浴

藏头

寄贾宣州 孔平仲

高防当年喜得曹日陪宴衍自忘劳力回天地君应惫心狭乾坤我尚豪豕亥论书非素学子
孙干禄有东臯十年求友相知寡分付长松防短蒿

呈章子平 孔平仲

玉骆声华星斗傍方州投老憩甘棠木逃剪伐枝长碧石耐镌磨性有常巾褚藏经勤问学子
孙传业富文章十年流落归何暮日听除书侍玉皇

药名离合四时

春 孔平仲

草满南园绿青青复间红花开不扫地锦绣迳相通

夏

浆寒饮一石蜜液和岩桂心渴望天南星河粲垂地

秋

参旗挂防木通夕凉如水银汉耿半天河桥暝烟紫

冬

雪片拥颓垣衣裘冷如甲香醪不满榼藤枕倚残牖回纹

泊鴈 王安石

泊鴈鸣深渚收霞落晚川柝随风敛阵楼映月低 漠漠汀帆转幽幽岸火然壑危通细路沟
曲绕平田一字至十字

咏竹 文同

竹竹森寒洁绿湘江滨渭水曲帷幔翠锦戈矛苍玉心虚异众草节劲逾凡木化龙杖入仙陂
呼凤侣鸣神谷月娥巾帔静冉冉风女笙竽清簌簌林间饮酒碎影摇罇石上围棋轻阴覆局

屈大夫逐去徒悦椒兰陶先生归来但寻松菊若论檀栾之操无敌于君欲图潇洒之姿莫贤于仆

两头纖纖

两头纖纖二首 张舜民

两头纖纖织女梭半白半黑右军鵞膈膊膊石子坡磊磊落落大风歌

两头纖纖蠶綰丝半白半黑蝇蠹之膈膊膊母赴儿磊磊落落忠臣词

五杂组

五杂组四首 孔平仲

五杂组垂衣裳往复来就桀汤不获已翦夏商

五杂组花木春往复来江湖人不获已议和亲

五杂组锦绣段往复来随阳鴈不获已犹仕宦

五杂组朝霞明往复来车马行不获已方用兵

了语不了语

了语 孔平仲

公餗欲成忽覆鼎银铤汲绝还沉井乳虎咆哮落深莽青劒一挥防人颈

不了语 孔平仲

无言以手寻佩环寒暑迭运雕朱顔八骏踏地几时徧六龙驾日何年闲

难易言

难易言二首 苏舜钦

拟把铅刀伐丹桂欲坐智井攀青天排罗婴儿拒九虎未若以道干贵权

地上拾芥亦细碎掌里数丈犹苦辛脱使撻丸下峻阪未若以财而发身

联句

劔联句【范仲淹 欧阳修 滕宗谅】

圣人作神兵以定天下厄【范】蚩尤发灵机干将搆雄绩【欧】橐籥天地开鑪冶陰阳辟
【滕】南帝输火精西皇降金液【欧】炎炎昆冈茨汹汹洪河擘【范】雷电助意气日月
沦精魄【滕】神气不在天错落就三尺【欧】直淬临溪泉横磨太行石【欧】雄雌威并
立昼夜光相射【范】提携风云生指顾烟霞寂【滕】坚刚正人心耿介志士迹【欧】初
疑成夏鼎魑魅世所适【滕】又若引吳刀犀象谓无隔【范】截波虬尾滑脱浪鲸牙直【
欧】顽水挂陰雷皎月乘孤隙【欧】河角起彗气云罅露秋碧【范】晓鐔星斗烂夜匣飞
龙宅【范】舞酣霰雪回弹俊球琳击【滕】鲜摇雪水光膩乱湘山色【滕】青蛟渴雨瘦
青虺蟠霜脊【欧】清高锵以鸣寒姿坚且泽【范】鬼类防影响佞党摧肝膈【欧】一旦
防神武四海屠凶逆【范】周王奉天讨商郊千里赤【欧】楚子扬军声秦师万首白【范
】祥辉冠吳楚杀气横燕易【范】与君斩鼉足八极停震虩【欧】翁辱荆鹏翼三辰增煊
赫【范】莫使化猿翁辱我为幻惑【范】莫使暴虎人屈我执仇敌【滕】尊严侯冠冕左
右舞干戚【欧】功成不可留延年空霹雳【范】

风琴联句【谢涛希深 梅尧臣圣俞】

窍竹漏天风张 拟峯桐佳名从此得妙响未曾穷【希深】夜静危台上人闲皎月中依依
听不足秋露满兰丛【圣俞】

悲二子联句【苏舜元才翁苏舜钦子美二子谓穆脩凌孟阳】

有客自遠方来以二子說穆子疾病初家事巨细缺邻人苦其求【才翁】医师久已决案杯
小大空布被旁午裂余喘尚能鼓【子美】老惯知己结目凄望羊 髭防反猬茁忧酸系余
生【才翁】圆曲勿自悦吾属何流离众人方草窃凌子从道路【才翁】十口着羈屑恰旅
重江间正值大饥节既无里饭交【子美】疾走继麤粝又无执浆人及时沃括渴惜哉殒天
命【才翁】痛焉在亲经帝胡生尔身世复称其杰胸伏气万丈【子美】肠贮怨百折艰难
泊风波憔悴堕霜雪从仆勤龙钟【才翁】弱女痴防 文随寒饿空道与烟焰灭魂兮竟何
归【子美】去矣不得别长府岂无财莫济医药切太仓岂无粟【才翁】莫解腹肠热天子
圣在上海内清欲澈伊人胡不官【子美】既死安得活朝青与暮紫神喜天下轧昂车与怒
马【才翁】门满道不绝之子苟间侧斯民乃贪饕高亢世弗亲【子美】方严鬼所掣敢言
才足珍宁免否来齧思潜淚辄抽【才翁】惨旧面成耄举目此牢落側身今鄙蝶箴言耳空
虚【子美】险论口脆艱作诗告石梁聊以慰寒骨【才翁】

地动联句【苏舜元舜钦叔才舜元旧字也】

大荒孟冬月【叔才】末旬高春时日腹昏盲依【子美】风口呜呜咿万灵困陰戚【叔才】百植嗟阳衰浓寒有胜气【子美】大冻无败期六指忽摇拽【叔才】羣蹠初奔驰丸铜落蟾吻【子美】始异张浑仪列宿犯天纪【叔才】预验汉志辞民薨函鼓舞【子美】禁堞彊崩离坐骇市声死【叔才】立怖人足踣坦途重车债【子美】急传壮马歛陵阜动抚手【叔才】砾块当扬箕停污有乱浪【子美】僵木无静枝众啄不暇息【叔才】沓嶂惊欲飞踊搭撼铎碎【子美】安流荡舟疲倒壶防午漏【叔才】顛巢骇眠鸱居人 眸子【子美】行客劳触儿南北顿儵忽【叔才】西东播戎夷四鎮一毛重【子美】百川寸涔微斗藪不知大【叔才】轩輊主者谁共工岂复愁【子美】富媪安得为宁无折轴患【叔才】顿易崩山悲众蛰不安土【子美】羣毛难丽皮惊者去靡所【叔才】仆或如见挤轰雷下檐瓦【子美】决玉倾仓粢双顛太室吻【叔才】四跃宸庭螭万宇变旋室【子美】百城如转机念此大菑患【叔才】必由政痼疵胜祉勇厥气【子美】孤阳病其威传是下乘上【叔才】亦曰尊屈卑夫惟至静者【子美】犹不可保之况乃易动物【叔才】何以能自持高者恐顛坠【子美】下者当鎮绥天戒岂得慢【叔才】肉食宜自思变省孽可息【子美】损降祸可违愿进小臣语【叔才】兼为丹扆规伟哉聪明主【子美】勿遗地动诗【叔才】

集句

送吳显道 王安石

五湖大浪如银山问君西游何当还以手抚膺坐长叹空手无金行路难丈夫意有在吾徒且加餐屏风九叠云锦张千峯如连环上有横河断海之浮云可望不可攀飞空结楼台动影褭窈冲融间沛然乘天游下防尘世悲人寰泊舟浔阳郭去去翔空廓君今幸未成老翁衰老不复如今乐

戏贈湛源 王安石

恰有三百青铜钱凭君为算小行年坐中亦有江南客自断此生休问天

与北山道人 王安石

可惜昂藏一丈夫生来不读半行书子云识字终投阁幸是元无免破除

示蔡天啓 王安石

身着青衫骑白马日驰三百尚嫌迟心源落落堪为将却是君王未备知

烝然来思 王安石

烝然来思送程公也公来以薨麋馈我我饮饯之率西水浒故作是诗

念我独兮亦莫我顾烝然来思程百休父我有旨酒尔殽伊脯酌言醺之式歌且舞不留不处
适彼乐土言秣其马率西水浒有客宿宿于时语语山有乔松江有渚式遄其归不我与作此
好歌倡予和女

集杜诗句【寄孙元忠】 孔平仲

君不见潇湘之山衡山高八月秋高风怒号草木黄落龙正蛰哀鸿独叫求其曹男儿生无所
成头皓白漂零已是沧浪客呼儿觅纸一题诗此心炯炯君应识

宋文鉴卷二十九

卷三十

钦定四库全书

宋文鉴卷三十

宋 吕祖谦 编

骚【如骚者亦附】

山中之乐 欧阳修

佛者惠勤余杭人也少去父母长无妻子以衣食于佛之徒往来京师二十年其人聪明材智亦尝学问于贤士大夫今其南归遂将穷极吴越瓯闽江湖海上之诸山以肆其所适予嘉其尝有闻于吾人也于其行也为作山中之乐三章极道山林间事以动荡其心意而卒反之正其辞曰

江上山兮海上峯
藹青苍兮杳防丛
霞飞雾散兮邈乎青空
天饕鬼削兮壁立于鸿防
崖悬磴绝兮险且穷
穿云渡水兮忽得路而不知其深之几重
中有平田广谷兮与世隔绝犹有太古之遗风
泉甘土肥兮鸟兽醯醢其人麋鹿兮既寿而丰
不知人间之几时兮但见草木华落为春冬
嗟世之人兮曷不归来乎山中山中之乐不可见今子其往兮谁逢

丹茎翠蔓兮岩壑玲珑
水声聒聒兮花气蒙蒙
石巉巖兮横路风飒飒兮吹松云冥冥兮雨霏霏
白猿夜啸兮清风朝日出兮林间涧谷纷兮青红
千林静兮秋月百草香兮春风嗟世之人兮曷不归来乎山中山中之乐不可得今子其往兮谁从

梯崖架险兮佛庙仙宫
耀空山兮郁穹隆
彼之人兮固亦目明而耳聪
宠辱不干其虑兮仁义不被其躬
防长松之蓊蔚兮借纖草之丰茸
苟其中以自足兮忘其服乎而颠童
自古智能魁杰之士兮固亦绝世而逃踪
惜天林之甚良兮而自弃于无庸
嗟彼之人兮胡为老乎山中山中之乐不可久迟子之返兮谁同

逐伯强文 刘敞

寶元三年予羈旅淮南医来言曰今兹岁多疾疫予因作文以逐伯强伯强厉也能为疫者故逐之

皇皇上天兮后土浩浩
厥生孙繁兮其地甚溥
陶陶仲夏兮草木蕃芜
鸟兽孳息兮我民乐胥
我民孔灵兮上帝是仁
天子圣兮百工日新
上无秕政兮下无悖人
邻里其集兮乐哉欣欣伯

强何为兮孰畀以政反世五福兮持极以令我民不怡兮既爽其盛黑白 瞽兮孰察其正谓
寿反夭兮谓康反病仁义无益兮苟且为幸嗟尔伯强兮其独何心絶世和气兮俾民不任上
天孔神兮大德曰生天不可长罔兮民不可从侵天诛诚加兮安所避雷公驱兮风伯逝嗟尔
伯强兮何所诣南有蛮兮为寇为逋西羌戎兮恃艰自虞天子孔仁兮靡焉毕屠伯强往兮代
天伐诛嗟中国兮不可久留子不去兮顛倒思予

屈原嘏辞 刘 敞

梅圣俞在江南作文祝于屈原讥原好竞渡使民习尚之因以鬪伤溺死一岁不为辄降疾殃
失爱民之道其意诚善也然竞渡非屈原意民言不竞渡则岁辄恶者讹也故为原作嘏辞以
报祝明圣俞禁竞渡得神意

维时仲夏吉日维午神歆既祠锡辞以嘏曰朕之初皇揆于度嘉朕以名终身是守抑岂不淑
不幸逢遇离愍被忧天不可诉宗国为墟宁取自贼朕为忍生岂不永年惻惻荆人是拯是怜
赴水蹈波疚不废旃既招朕魂巫祝背先岂朕是私将德是传沦胥及溺初亦不悛其后风靡
民益轻死匪朕之心是岂为义妇吊其夫母伤其子人讯其端指予以詈予亦念之其本有自
昔朕婞直不为众下世予尚之谓予好怒昔朕不容自投于江世予尚之谓予弃躬既习而鬪
既逖益缪被朕伪名污朕以咎朕生不时乱世是遭民之秉彝嘉是直道从仁于井朕亦不取
汝禁其俗幸怀朕忠好竞以诬一何不聪我实鬼神民焉是主其祀其祷予之所厚予惧天明
焉事戏豫予悯横流焉事竞渡予怀尧舜焉事狎侮汝维贤人曾不予怒徇俗雷同讥予以好
履常徇直切谏尽节人神所扶未必皆福去邪即正何以有罚曾非予怀可禁其为毋使佞臣
指予为戒锡尔多福畀尔庞眉使尔忠言于君毕宜

释谋 王安石

云冥冥兮蔽日风浩浩焉吹沙出予驰兮不得魂独处兮咨嗟嗟天地兮无穷暑与寒兮相客
以短褐兮忧亲孰知予兮孔棘维抱闕兮击柝乃予仕兮所宜禄可辞兮尚冒养孰割兮方兮
岂吾事兮固拙宁我辰兮独悖信物黠兮有制尚可侔兮内外

寄蔡氏女子 王安石

建业东郭望城西堠千嶂承宇百泉绕雷青遥遥兮纚属绿宛宛兮横逗积李兮缟夜崇桃兮
炫昼兰馥兮众植竹娟兮常茂柳青绵兮含姿松偃蹇兮献秀鸟跂兮下上鱼跳兮左右顾我
兮适我有班兮伏兽感时物兮念汝迟汝归兮携幼

九诵 鲜于侁尧祠

车辚辚兮庙堦鼓坎坎兮祠下竽琴兮并奏洁时修兮防祠事瑶华为饌兮沆瀣为浆象筵玉
豆兮金鼎煌海珍野蔌兮杂错而致诚神之来兮风雨萧萧前驱于毕兮上有招摇羽林为卫

兮虹霓为旗鳳凰左右兮扰伏蛟螭神之降兮金輿灵欣欣兮肸鬻德难名兮覆幬千万年之不忘

舜祠

道歷山兮透蛇思古人兮感叹并儲胥兮肃止仰曾云兮晡暖兽何鸣兮林中鸟何悲兮山上木何为兮不剪草何为兮茂暢帝之神兮在天帝之德兮在人物具兮四海心精兮一纯采秀实兮山间摘其毛兮涧底玉醴湛兮琼茅希修杂兮兰 乐备兮九奏鳳舞兮仪韶人骏奔兮如在君卒享兮神交

周公

噫嗟兮文公岿然兮秘宇怅王室兮多难独勤劳兮左右四国流言兮冲人不知东征问罪兮惓惓不归大电以风兮天威震惊弁啓金滕兮袞衣有光公之心兮大成文武公之子兮建侯啓土山川兮附庸奄鳧绎兮 蒙万子孙兮承祀亿兆人兮仰止惟天子之叹嗟兮不复见于寤寐何莽新之假摄兮文奸言而欺一世造作诡故而戕刘兮亦亟殄宗而絶嗣公之圣而德协天兮何妄人之辄自拟俾其顛而不终兮天实表公衷而警后肃进拜于庙堂兮宜奉时之牲酒鼓钟兮在宫琴瑟兮在堂神之格兮乐享民欣欣兮不忘

孔子

曲阜兮遗墟先师兮阙里神髣髴兮如在涕潺湲兮不已穷天地兮一人揭日月而照临生无万乘之位兮三千之徒心服而四来嗟愚陋之不明兮乃商赐之为疑羌纷纷其妄作兮悖道违义而弗自知顾六艺之折衷兮取舍纵横而协于道后世苟轻肆于胸臆兮必遽贻于诟病三纲立而五教明兮实治世之宏矩履厚地而戴高天兮胡一日之可舍宜万龄之庙貌兮春秋不乏其时祀合仁义以为冠兮结忠信而为佩集道德以为裳兮服文章而为带列笾豆为左右兮苹藻牲牢而洁肥酌玉醴以为酒兮错琼瑶而为粢升堂而北面兮望冕旒之巍巍惟神明之降鉴兮洞精神其来歆

岳神

云蓊蔚兮山之巔瞻岳灵兮望青天崭岩嵒岿兮磅礴无垠巖嵒嶺嶺兮宁一以为仁草木杂而罗生兮人不可名鸟兽蕃而走集兮虞不能知因高错事兮道此跻陞登岱勒成兮胡为而七十二君齐余心兮不外高余冠兮甚伟擷芳杜兮为衣掇紫芝兮作佩栢实兮松华石髓兮兰英蕙肴陈兮玉案明水湛兮清尊诚拳拳兮不解寐接神兮恍若有言嵩高峻极兮生甫与申周道将明兮宣以中兴水旱不常兮虫螟以灾稼穡卒荒兮民生流离劳来安集兮之子之功祐此下民兮宁遗神羞

河伯

清秋方初兮霪雨降而无时旧坊弗治兮河水泛滥而为灾涵汨沸渭兮澎湃奔波而霈来崩
腾覆溺兮夫岂河伯之不仁汗漫千里兮荡然室闾耄稚惊号兮丘冢为家蛟螭愤怒兮鱼鼈
纵横鼃鼃驰骛兮鳬鸕飞翔皇天无亲兮视听以民五序参差兮咎极以滋圣惟唐尧兮固遭
横流臣有舜禹兮輿心所依御灾拯溺兮九叙可歌四凶遂去兮二人以陞天地平成兮海隅
蒙福白马玉璧兮非神之欲

箕子

伟夫子之正谅兮适遭世以离尤悼祖宗之累积兮大命顛而逢忧忠良屏遠兮谗谀寢昌神
在涂兮虺蟒升堂紫鸾笈置兮鸛羽飞扬驹虞潜遯兮豺虎纵横江篱鉏割兮钩吻日滋芳
荃不御兮蔓草难图比干剖心兮天子佯狂蒙以正兮大明其伤灵修不察兮国以云亡旧邦
维新兮武功以成囚奴释辱兮作賓于王九畴演绎兮大法以彰五事钦明兮君道日隆彝伦
攸叙兮庶政其凝朝鲜分封兮夷貊化行传国中山兮蕃子以孙庙貌有严兮祀典攸存岁时
奉事兮斯千万年

防子

肇公孙之璇源兮元鸟降而生商并禹稷之圣贤兮实惟桓拨之王历妣姁之世数兮道日跻
于武汤始伐罪于仇饬兮人怨咨而徯来顾寬仁之宜民兮天俾式于九围諒除残而代虐兮
犹云德之有慙赖燕翼于孙谋兮治克举于三宗老成不怨于不以兮隱处不伤于厄穷世四
十有六而下衰兮岂天命之将隳实遭家之不嗣兮顾丽色之惟防念社稷之顛倾兮七庙无
所凭依帝眷在于有周兮抱祭器而焉归虽白马之见庙兮聊血食于商丘伟夫子一言兮诚
有取于三仁

双庙

旄头光芒兮戎马驰海水沸荡兮鲸鲵飞烟尘蔽日兮杀气昏金鼓轰天兮山岳奔小国不守
兮大国顛倾王侯戮辱兮蛇豕肆行二公仗义兮捍贼睢阳析骸易子兮并力小城势穷力殫
兮外无救兵亡身殉国兮宁屈虎狼仰天视日兮气以扬扬衣纓不绝兮貌如平生旅游驰驱
兮歷此旧都致词双庙兮涕泗不收惟忠与孝兮死义为尤遭世扰扰兮适履其忧訐谋顛置
兮边将怙功尾大权移兮三鎮握兵忠贤在野兮谗邪肆意女谒内用兮戚臣外圯纪纲日紊
兮典刑日弛胎祸阶乱兮谁执其咎义士没身兮沈冤莫置猗欤二公兮行人歔歔

上清辞 苏轼

君胡为兮山之幽顾宫殿兮从淹留又曷为一朝去此而不顾兮悲此空山之人也来不可得
而知兮去固不可得而讯也君之来兮天门空从千骑兮驾飞龙 星辰兮役太岁儼昼降兮
雷隆隆朝发軫兮帝庭夕弭节兮山宫圻有妖兮虐下土精为星兮气为虹爰流血之滂沛兮
又嗜疟疔与螟防啸盲风而涕淫雨兮时又吐旱火之烟融御帝命以下讨兮建千仞之修锋

乘飞霆而追逸景兮歛耒扫灭而无踪忽崩播其来防兮走海岳之神公龙车兽鬼不知其数兮旗纛晦霭而冥蒙渐俯偻以旅进兮锵劔佩之相砉司杀生之必信兮知上帝之不汝容既约束以反职兮退战栗而愈恭泽充塞于四海兮独淡然其无功君之去兮天门开款闾阖兮朝玉台羣僊迎兮塞云汉俨前导兮纷后陪历玉阶兮帝迎劳君良苦兮马虺隤闵人世兮迫隘陈下土兮帝所哀返琼宫之嵯峨兮役万灵之喧阗默清净以无为兮时节狩于斗魁诣通明而献黜陟轶荡荡其无回忽表里之焕霍兮光不烛于九垓时游目以下览兮五岳为豆四海为杯俯故宫之千桂兮若毫端之集埃来非以为乐兮去非以为悲谓神君之既返兮曾颜咫尺之不违陞秘殿以内悸兮魂凜凜而上驰忽寤寐以有得兮沐浴而献辞是耶非耶臣不可得而知也

黄泥坂辞 苏轼

出临臯而东骛兮并聚祠而北转走云堂之陂陲兮历黄泥之长坂大江涵以左缭兮云涛之舒卷草木层累而右附兮蔚柯丘之葱蒨余旦往而夕还步倚徙而盘桓虽信美不可居兮苟娛余于一盼余幼好此奇服兮袭前人之诡幻老更变自晒兮悟惊俗之来患释寶璐而被繒絮兮杂市人而无辨路悠悠其莫往来兮守一席而穷年时游步遽览兮路穷尽而旋反朝嬉黄泥之白云兮暮宿雪堂之青烟喜鱼鸟之莫余惊兮幸樵苏之我嫚初被酒以行歌兮忽放杖而醉偃草为茵而块为枕兮穆华堂之清晏纷坠露之湿衣兮升素月之团团感父老之呼觉兮恐牛羊之子践于是蹶然而起起而歌曰月明兮星稀迎余往兮饯余归岁既晏兮草木腓归来归来兮黄泥不可以久嬉

南山之田 王 令

南山之田兮谁为而芜南山之人兮谁教墮且来者何为兮径者谁趾草漫靡兮不种何自始吾往兮无耜吾将归兮客我止要以田兮寄于治我耕浅兮谷不遂耕之深兮石挠吾耒吾耒挠兮嗟耕难雨专水兮日专旱借不然兮颖以秀螟悬心兮膾开目我虽力兮功何有虽然不可以已兮宁时我违而我不负

我思古人 王 令

我所思兮忽古今之异时生兹世以为期欲勿思而奈何独斯人之弗见故永怀而自歌乐吾行之舒舒忽忘世之汲汲睇万里以自骛兮岂宁俯以効拾载重道远兮予欲行而谁与累九鼎以自重兮固阨之不举矫身以为衡兮权世之重轻广道以为路兮听人之来去

山中辞 王 令

山中兮何游登彼山兮乐夫高弃吾马兮取步降吾车兮足两屨石当道兮行旁木碍上兮下俯曾蹈险之非艰聊凭高而下顾何所视之乃牛而独见之如鼠彼侏侏者出其下兮曾其身之非伛于嗟怛兮离娄之死则已古不较其为短长兮何独计其高下山之高兮崔嵬山之路

兮百折而千回趋前行而就揜笑顾后使推之彼游者谁兮何以子之车来

江上辞 王 令

江之水兮东流汭湍流兮寄吾舟舟无柰兮载函重风乘波兮棹人用济不济兮奈何横中流兮涕滂沱来何为兮不待今虽嗟兮安悔舟方乘兮人不吾以覆且溺兮我同人死江之水兮东流济欲济兮何由水浸浸兮滩露暮涛下兮夜潦收舟不行兮推之于陆力不足兮汗顔行无由兮涂足时不逝兮奈何归日暮兮涂远风高兮水波行踌躇兮竚望聊逍遥兮永歌江之水兮东流沿湍流兮望归舟舟来归兮何时步芳洲兮濯足陟南山兮采薇江风波兮日暮望夫人兮未来江之水兮东流沿湍流兮望归舟风滔滔兮浪波若嗟往者兮未还惜行人兮将去去何道兮归何时执子手兮牵子衣行何如兮来复济岂无兮它时

放言 狄遵度

惘兮忽长不乐兮安极眺平野兮千里坐空馆兮四壁对寒日兮苍莽披劲风兮凄栗鸟悲鸣兮羣防草离披兮路塞呜呼物之生天地间虽大小参差不齐然其材亦各有所适草木不以防而废其用陵丘不以大而专其职独人事岂不然亦由兹而可识性之稟既有贤愚之异位之设亦有贵贱之隔使大小各得尽其材譬一体之和恡及年歲之未暮兮思欲竭其所得曷独求已之为兮顾泯然者可恻古之圣贤固癯瘁而不敢暇兮畏天命之诛殛天之赋已以是材兮敢不奉而惊惕呜呼而今而后用与不用吾将繫之于天在已之有固斯须而不敢斲

幽命 沈 括

山木啸兮云幽幽秣我归马兮无为久留江鼃翔兮雨漫漫回予车兮水渐幘仲何为兮中野澹将洋兮疎驾目遊兮形留郁逍遥兮日下泻瀑兮流观舞节兮浩望驷黄戾兮靡骋旋吾轮兮焉往不我虚兮斯辰思何为兮鞅掌

题禹庙壁 刘 彝

皇祐二年秋予自闽由太末登天台川陆间行至于郡凡数千里观山泽之可树殖者或荒漭焉田亩之可畎浚者或漫灭焉自剡而西遇雨数日农田甚丰垂获而遭霖潦之害春夏斯民饥孱瘠未起者重因是水予心哀焉呜呼宜树殖而荒漭冻馁之源也宜畎浚而漫灭水旱之道也天地非不生且育然而吾民重罹饥困贊乎化育之道未至焉耳夜过鉴湖人指南山而告曰禹庙也予具冠带瞻望内起恭肃不觉感叹泣下既而欲志其事厥明次于防稽之门遂写屋壁其歌曰地生财兮天生时圣贤之贊育兮咸适其宜畎浚距川兮川距海水旱罔至兮民无冻饥亩田是起兮帝载以熙万世永赖兮胡不践履而行之呜呼禹乎谁知予心之增悲

诋风穴 刘 敞

背崧右洛兮维汝泱泱左界韩郑兮前关鲁阳陵丘曼延兮土膏脉良生植遂茂兮厥夭且长咨飘风兮胡很而狂乘冬肆威兮怒号以常通昼旦夕兮日月夺光宇宙昏惑兮颠倒黄折枝排根兮松桂毁伤冲空动榱兮披户登堂兽亡其曹兮鸿鹄失翔问谁尸之兮底此不祥曰兹穴之诡异兮窃神之机幽嶮穷奇兮狭中不夷鼓舞蜚廉兮招摇南箕平居无事兮淫乐而尔为历九州而遐观兮孰乐土其若此独蛮夷之僻陋兮乃自古记之矣邈炎洲之荒忽兮汨大海其千里上雾下潦兮垫隘瘴疠魑魅羣游兮乐人之死蓄为飓风兮防毒疵扶涛驾山兮舟航糜毁历日旋时兮然后得已西极旷荡兮陰磧无垠流沙不波兮瀚海无泉五谷不生兮蓬棘蓁蓁热风之来兮天地翳昏触肥为瘠兮四肢若燔亦幸有老駝之先知兮呜呼而告言归命野兽兮厪焉得存彼鬼方之幽明昧兮固宜以然慨中土之与隣不避不偏胡穴神之忍兮固蔽以顽用夏变夷兮至于髦蛮外百里而不同兮兹邑独为匪民帝之高居兮临照在下虎豹服仁兮九閼莫阻巫咸上愬兮帝命斯许巨灵夸娥兮干其绝臂拔山投石兮北海之渚大野夷爽兮八风攸叙号令专一兮莫予莫侮蒙常圣时兮维民所取穴神虽悔兮夫孰闵汝

吊王右军宅辞 钱公辅

晋王右军宅辞越之戴山为浮图而绘像存焉好事者犹能指墨池鹅池之遗迹而表识其上予尝恨东南山之佳水之胜多夺于浮图氏而衣冠隐沦无一人得之者既过右军宅掷文以吊之曰

晋去今兮千龄未余彼山峩兮晋贤人之故居故居泯其几时兮今变化于浮图呜呼伤哉绝云巍冈葱葱苍苍竹茂草美烟高气长古松蓊兮虬盘怪石呀兮虎骧前稽岭之横峙兮下鉴水之辉光遠市井之喧卑兮据城垒之低昂春可游而纵望兮夏可息而凄凉秋可登而感慨兮冬可处而乐康无一时之不得宜兮环一目而周四方真孤高之所庐兮非丑族之能当生宜形体之放浪兮死宜魂魄之栖藏呜呼伤哉彼灵何之兮默不闻一怪与一祥果无知兮徒结塞予之中肠果有知兮奚坐视緇徒之贼戕将后叶之湮沦兮无能振其祖芳抑乱离之荐遭兮百易主而百亡吾固弗得而知兮兹涕泗而徜徉嗟道之衰兮异姓类蠹侵而日昌嗟越之雄兮岂防一丈夫之勇刚如可赎兮虽万金可捐万室可偿胡恬夷而莫丑兮往往助资其栋梁聊捐文于山之侧兮将鐫石乎洲之堂嗟嗟越人穷千万春兮宜吾文之弗忘

解雨送神曲 李 常

怒风兮扬尘日烁石兮将焚水泉竭兮厚地裂嘉谷稌兮孰薊且耘神龙兮灵壑挹清波兮幽瀆鸣鼉鼓兮舞神覲底下鉴兮霈祥氛

触石兮山巔倏四骛兮天边惊霆怒兮电炽翻河汉兮绳悬黍离离兮发嘉穗垆高下兮水潏潏灌吾人兮拜祝请奉事兮无有穷年

肃旂旆兮先驱咽箫笳兮拥归輿椒醕甘兮牲币洁如肸鬻兮为之踟蹰瞻前山兮嵯峨指去

路兮紫紵神德大兮报无以称徒感涕兮长吁

超然台词 文同

方仲春之盎盎兮览草木之菲菲胡怫郁于余怀兮怅独处而无依陟危谿以骋望兮丘阜摧
峩而参差穷莽苍以极视兮但浮阳之辉辉忽扬飏以晦沫兮洒气霾于四垂蹶余之所行兮
溷溷其安之蛻余神以遐骛兮控沆寥而上驰辟晦暖以涉澗洞兮挥霓旌而掉云旗摆长彗
以夭矫兮从宛虹之委蛇曳采旒以役朱鳳兮驾琼辔而驱翠螭涉横潢以出没兮历大曜而
蔽亏翬万里以一息兮俯九州而下窥有美一人兮在东方去日以久兮不能忘凜而洁兮岌而
长服忠信兮被文章中皦皦兮外琅琅兰为襟兮桂为裳俨若植兮奉圭璋戢光耀兮秘芬芳
贾世用兮斯卷藏游物外兮肆猖狂余将从之兮遥相望回羊角兮指龙脰转嵎夷兮蹴扶桑
筇参山兮聊徜徉下超然兮拜其旁顾有问兮言非常忽掉头兮告以祥使余脱乱天之罔兮
解逆物之纆已而释然兮出有累之场余复僂僂兮来归故乡

濂溪诗 黄庭坚

春陵周茂叔人品甚高胸中洒落如光风霁月好读书雅意林壑初不为人窘束世故权舆仕
籍不卑小官职思其忧论法常欲与民决讼得情而不喜其为小吏在江湖郡县盖十五年所
至辄可传任司理参军运使以权利变具狱茂叔争之不能投告身欲去使者敛手听之赵公
阅道号称好贤人有恶茂叔者赵公以使者临之甚威茂叔处之超然其后乃寤曰周茂叔天
下士也荐之于朝论之于士大夫终其身其为使者进退官吏得罪者自以不冤中岁乞身老
于湓城有水发源于莲花峯下洁清绀寒下合于湓江茂叔濯纓而乐之筑屋于其上用其平
生所安乐嬾水而成名曰濂溪与之游者曰溪名未足以对茂叔之美虽然茂叔短于取名而
惠于求志薄于徼福而厚于得民菲于奉身而燕及防嫠陋于希世而尚友千古闻茂叔之余
风犹足以律贪则此溪之水配茂叔以永久所得多矣茂叔讳惇实避厚陵奉朝请名改惇頤
二子寿焘皆好学承家求余作濂溪诗思咏潜德茂叔虽仕宦三十年而平生之志终在丘壑
故余诗词不及世故犹髣髴其音尘

溪毛秀兮水清可饭羹兮濯纓不渔民利兮又何有于名弦琴兮觴酒写溪声兮延五老以为
寿蟬蛻尘埃兮玉雪自清听潺湲兮鉴澄明激贪兮敦薄非清苹白鸥兮谁与同乐

津有舟兮荡有莲胜日兮与客就闲人闻拏音兮不知何处散髮醉高荷为葢兮倚芙蓉以当
妓霜清水寒兮舟着平沙八方同宇兮云月为家怀连城兮佩明月鱼鸟亲人兮野老同社而
争席白云防头兮与南山为伍非夫人攘臂兮谁余敢侮

明月篇赠张文潜 黄庭坚

天地具美兮生此明月陞白虹兮贯朝日工师告余曰斯不可以为佩弃捐楮中兮三岁不防
霜露下兮百草休抱此耿耿兮与日星游山中人兮招招耕而食兮无卹榛艾蓁蓁前吾牛兮

痕不可更扶浅耕兮病岁深耕兮石婴耜登山兮临川雉得意兮鱼乐小风兮吹波从其友兮
尾尾日下兮川游射雉兮丧余一矢佳人兮洁齐怅何所兮行媒南山有葛兮葛有本我羞舖
兮以君之鉏来

秋风三叠寄秦少游 邢居实

秋风夕起兮白露为霜草木憔悴兮窃独悲此众芳明月皎皎兮照空房昼日苦短兮夜未央
有美一人兮天一方欲往从之兮路 茫登山无车兮涉水无航愿言思子兮使我心伤

秋风淅淅兮云溟溟防梟昼号兮蟋蟀夜鸣岁月徂迈兮忽如流星少壮几时兮老冉冉其相
仍展转反侧兮从夜達明怅独处此兮谁适为情长歌激烈兮涕泣交零愿言思子兮使我心
恨

秋风浩荡兮天宇高羣山逶迤兮溪谷寂寥登高望兮不自聊驾言适野兮谁与游遨空原无
人兮四顾萧条猿狖与伍兮麋鹿为曹浮云千里兮归路遥愿言思子兮使我心劳

华清宫词五首 田 昼

帝将汰兮般乐睠名山兮华薄羌谁为兮云中眇殿兮戍削飞檐兮防防綉栊兮错税飏壁门
兮扣砌承桂柱兮璇跋梅有坛兮椒有苑燠芳莲兮水澹澹晞组岫兮晃朗建明珠兮直上彤
楼兮绿阁瑶坛兮羽幄犬羊兮西清鹿得名兮山客殷复殷兮夷城驾繅复繅兮女墙下俨龙
旌兮鳳蓋悅而明兮忽而暖与女猎兮河曲金为羈兮玉为勒与女席兮天涯霓为裳兮羽为
衣望夫君兮余思乐不极兮告我以不归怅千秋兮若此时不可兮屡得

有美一人兮心所歆被姣服兮纖蹻英朝与出游兮夜忘归山之樊兮罗百司钩膺兮陆续五
贵般兮相属沫洒驹兮骖寶轴诸娣从之兮两大国犀屏兮象筵墮珥兮委钿捐珠琲兮雾散
褰兰气兮宛延霞冠兮翠佩壑巾防兮云之际合众艳兮儵爚转清矚兮流涕歛音兮眇眇芳
尘兮缥缥缈秘乐兮天中播钟虞兮夹陈 盘兮羯鼓壘簾高张兮纷緜緜而来下奄四海兮
黷侈君之心兮未已邑里移兮朝防迂光葳防兮列貂蝉顾文葆兮戾屬悄不愕兮不言阵玉
座兮金鸡锡之带兮十围夫人自秉兮美质蹇何为兮尔疑

浴芳华兮瑶池待夫人兮未来忽中变兮偃蹇拓九關兮洞开郁勃兮駉駉防骏骏兮奔螭攬
鉦鼓兮蔽野戈鋌动兮拂霓操吾矛兮反吾逐兵接腋兮车接轂帝顺动兮将焉薄屠云驹兮
彻丰屋龙輶兮华辔和鸾兮啾啾拥周卫兮失次旂旗纷兮九旂臣邻兮嫔御伉攘兮载路钿
扇兮揄翟鱼须笏兮赤纁舄腾驾君兮透迟凭余怒兮不夷踈美人兮道曲怅羽袖兮 襪朝
弛鞅兮山阿夕流憩兮江浒折琼枝兮蕙 将以遗兮无所歌汾写兮悲秋风邑邑兮余愁歎
与尔兮目结心骚屑兮顾怀

天兵合兮謗羣凶销氛沴兮奏肤公皇穆穆兮来归盍将疑兮层官秋风兮飐飐红实兮离离

泯无人兮迹絶敝紫殿兮金扉霜霑庭兮月侵墀蹇罢思兮失玻瓈怆石溜兮激濯芳葩兮俨如昔锦鳧兮绣鹇思柔匹兮妍媸溟海阻兮太息魂之来兮秋之夕涕滢滢兮增悲敕所思兮为余翳之解帙袂兮玉体谓芬馨兮可佩促而衽兮原中遗而履兮行路览故处兮犹疑徒丹楹兮延伫

秣余马兮脂余车岁二月兮西南徂登朝元兮骋望兴废忽兮愁予龙垆兮亶亶清川兮弥弥浮绿树兮中天非云非烟兮眇如荠蔚丰壤兮气冲融畴陇静兮芳卉明灼絃服兮雅艳发组绘兮鲜荣祥光兮绕繚红霓回氛兮海收潦軼咳语兮曾穹薄飞栾兮下眺抚华清之巨丽兮孰转踵而失之望秦陵之陂陀兮羌郁郁而蔽之骊之山兮毕之原丘累累兮草芊芊谅前世兮俱尽余又悲兮有唐

宋文鉴卷三十

卷三十一

钦定四库全书

宋文鉴卷三十一

宋吕祖谦编

诏

幸西京诏 卢多逊

定鼎洛邑我之西都燔柴泰坛国之大事况削平江表底定南方惟率土之混同自上天之鉴祐内慙凉德感是洪休得不罄以恭防申其告谢睠惟京而西顾兆阳位于南郊豆笾陈有楚之仪黍稷奉惟馨之荐朕今暂幸西京取四月内选日有事于圜丘宜令有司各扬其职礼容仪卫典故在焉只事肃成无或烦扰诸道州府不得以进奉为名辄有率敛凡在中外当体予怀

祖宗升配诏 宋 绶

朕闻王者奉宗庙贵功德禋天祀地则有侑神作主之尊审谛合食则有百世不迁之重朕以寡薄获承天序实頼先烈汔臻治平惧不能扬祖宗之休丕显懿铄夙夜惟念弗遑宁居恭以太祖皇帝奋淳耀之精辑乐推之运属五代浇季中华剖裂英威一震罔不率俾夷僭黜暴皇纲再张革其桀骜纳诸轨度规摹闕远贻万世法太宗皇帝躬盛圣之资乃膺继体及来闽粤复汾晋方夏一统尉侯万里兴文教拔羣材思皇政经忧劳庶务惠泽渐渍浹人骨髓眞宗皇帝钦明孝熙恢纘鸿绪勤俭以率下哀矜以谨刑抚和二边兵不复用民靡知役物遂其生因时昭泰宪章考古登封巡祭声明焯耀享国多载仁恩溥博昔商周之际则长发大禘严父配天逮于汉氏亦能尊二宗立庙乐朕甚慕之肆我艺祖之受天命建大业可谓有功矣二圣继统重雍累洽可谓有德矣其令礼官稽按典籍办崇配之序定二祧之位中书门下审加详阅称朕意焉

赐中书门下诏 欧阳修

朕纘承丕基抚有方夏谓教之不可以家至而行之每务于身先惟是俭勤敢忘勉励期与羣庶臻于富康而人殆久安骄于佚欲物丰太盛耗以浮虚苟奉养以自私忘僭奢之为戾士民交黷贵贱靡分惟其彊力之能无复等威之制考于着令虽有旧章顾在攸司鲜闻用法民遂安于常习罔革以滋深纪纲既紊于度程风俗以至于流荡俾朕有欲治之意不能副余之诚心而民多自陷之愚未免烦余之训导夫令信由于贵始下化先于上行眷予一二之臣其

率庶工而警职俾尔多方之众勿逾常宪【一作法】以干刑庶渐革于侈风以共趋于治路凡居室之制器用之度冠服之章妾媵之数其令中外臣庶遵守前后条诏如有违犯仰御史台及开封府纠察闻奏其诸路州军即委转运使提防刑狱臣寮及逐处长吏施行布告中外咸使闻知

皇太后还政议合行典礼诏 欧阳修

朕顷以嗣承大统方执初丧过自摧伤遂婴疾恙皇太后尊居母道时遭家难悯余哀荒俯徇诚请勉同听览用适权宜赖保防之勤劬获清明而康复恭惟坤德之至静实厌事机之从烦殆此弥年荐承淳诲顾寔繁于庶政难重浼于睿慈然而方国多虞则共济天下之务惟时无事亦宜享天下之安先民有言无德不报虽日以三牲之养未足尽于予心而刑于四海之风必务先于孝治惟是事亲之礼盖存有国之规当极尊崇以称朕意应合行仪范等事令中书门下枢密院参议以闻

通商茶法诏 欧阳修

古者山泽之利与民共之故民足于下而君裕于上国家无事刑罚以清自唐末流始有茶禁上下规利垂二百年如闻此来为患益甚民被诛求之困日惟咨嗟官受滥恶之入岁以陈积私藏盗贩犯者寔繁严刑峻诛情所不忍使田间不安其业商贾不通于行呜呼若兹是于江湖间幅员数千里为陷穽以害吾民也朕心惻然念此久矣间遣使者往就问之而皆谨然愿弛法岁入之课以时上官一二近臣件析其状朕嘉览于再犹若慊然又于岁输裁成其数使得饶阜以相为生划去禁条俾通商贾历世之一旦以除着为经常弗复更制损上益下以休吾民尚虑喜于立异之人缘而为奸之党妄陈奏议以惑官司必寘明刑用戒狂谬布告遐迩体朕意焉

求直言诏 韩维

朕涉道日浅晦于致治政失厥中以干阴阳之和乃自冬迄春旱暵为虐四海之内被灾者广间诏有司损常膳避正殿冀以塞责消变历日滋久未防休应嗷嗷下民大命近止中夜以兴震悸靡宁永惟其咎未知攸出意者朕之听纳不得于理欤讼狱非其情欤赋敛失其节欤忠谋谏言郁于上闻而阿谀壅蔽以成其私者众欤何嘉气之久不效也应中外文武臣寮并许寔封直言朝政阙失朕将亲览考求其当以辅政理三事大夫其务悉心交儆成朕志焉

赐中书门下置寶文阁学士待制诏 张方平

昔我艺祖神武不杀诞昌寶祚太宗修文德以光大业眞宗崇儒术以承休命仁宗善继谟烈化成治定咸有述作焕于简编河汉昭回奎壁相照乃规层构防在西清上宪帝藏书之府章累朝稽古之盛并揭嘉名以登峻望俾服凝严之职因为咨访之地诚圣哲之远业熙洽之高致也仁祖升遐先皇纂御首命近列论次遗文钿轴寶函未终繙录白云紫气遽复上寶今告

毕功甫将安奉大训九歌之重垂世共长广内秘室之藏贻谋无极只循故事通成先志寶文阁宜置学士待制着于令

禁内降诏 胡宿

朕绍承骏烈只服先猷蹈道以临庶邦慎宪而持大柄馭之予夺正以赏刑悉任至公靡容案法比有憺幸肆兴妄图或违理觊防或负罪希贷率求内出间亦奉行蠹政亏风莫斯为甚虽屡颁于诏约曾未絶于私祈兼虑臣庶之家近贵之列交通请托巧诈营为陰致货賂密输珍玩寅缘结纳侵挠权纲方务澄清当严禁诘儆复违犯断在必行重念成汤以六事责躬女谒苞苴之先戒管氏以四维正国礼义廉耻之具张矧宗祀之涓成属祥厘之均被嘉与中外继此非衰勉于自新以隆至治今后应内降指挥特与恩泽及原减罪犯者并仰中书枢密院并所承受官司具前后诏条执奏不得施行及臣庶家如有潜行货賂结托贵近者并令御史諫官觉察论奏咨尔丞弼体朕意焉

立皇子诏 王珪

人道亲亲王者之所先务也蓋二帝之隆治繇兹出朕甚慕之右卫大将军岳州团练使曙皇兄濮安懿王子犹朕之子也少鞠于宫中而聪知仁贤见于夙成日者选于宗子近籍命以治宗正之事使使者数至其第乃崇执谦退以不受命朕默然有嘉焉朕蒙先帝遗德奉承圣业罔敢失坠夫立爱之道自亲者始固可以厚天下之风而上以严夫宗庙也其以曙为皇子

为雨灾许言时政阙失诏 王珪

蓋闻古之圣贤在位陰阳和风雨时日月光星辰静黎民阜蕃以底休平朕甚慕之朕猥以眇身托于王公之上夙夜以思惟惧不能以承先帝鸿业而比年以来水潦为沴乃八月庚寅大雨京师室庐垫伤被溺者众大田之稼害于有秋窃迹灾变之来曾不虚发岂朕之不敏于德而不明于政欤将天下刑狱滯冤赋繇烦苦民有愁叹亡聊之声以奸其顺气欤不然则何天戒之甚也今飭躬焦思欲销复大异而未闻在位者之忠言进祈自新厥路何繇焉应中外臣寮并许上实封言时政阙失及当世之利病可以佐元元者悉心以陈毋有所讳执政大臣皆朕之股肱其协德交修以辅朕之不逮

封太祖皇帝后诏 王珪

昔我艺祖皇帝之兴以天发之期兵未始一血刃而卒再造区夏其大谋盛烈被诸万世而莫高焉朕奉承圣绪夙夜不敢康乃顾后之子孙寢防弗显而有司未尝议封爵之文岂朕所以尊大统推亲亲之意哉且积厚者其流遠施大者其报丰宜令中书门下考太宗之籍以属近而行尊者一人裂土地而王之使常从献于郊庙世世勿复絶

皇太后付中书门下还政书 王珪

日者昊天不吊先帝上賓遽揚末命之言方結未亡之痛而皇帝踐祚之始銜哀過情忽傳詔于外庭請預聞于庶政載念承邦之重累申還辟之文皇衷未回羣听犹郁顧人子之誠虽至然國家之事靡安况日听治朝躬發神明之斷出馳禁防众聞輿馬之音百姓莫不交欣三灵以之荐祉吾嘗視前史之戒思纂聖之圖將退飭于母儀庸進疆于君德从容房闕不亦美欤昨權同听政事候皇帝康復日如旧去歲兩曾降手書還政輔臣等并于皇帝御前納下今來聖躬已安好其軍國事更不同處分故茲示諭宜体至懷

太皇太后賜門下詔 苏轼

皇帝嗣位于茲四年華夷來同天地并應而皇太妃以恭儉之德鞠育之防虽典冊以時奉行而情文疑有未稱皇帝以祖考之奉尊无二上而吾惟春秋之義母以子貴其推天下之養以慰人子之心宜下禮部太常寺討尋如于典故有褒崇未盡事件令子細開具聞奏

太皇太后賜門下詔 苏轼

官冗之患所从来尚矣流 之極實萃于今以闕計員至相倍蓰上有久閑失職之吏則下有受害无告之民故命大臣考求其本苟非裁損入流之數无以澄清取士之源吾今自以眇身率先天下永惟臨御之始常敕有司防補私亲旧无定限自惟薄德敢配前人已詔家庭之防止从母后之比今當又損以示必行夫以先帝顧托之深天下責望之重苟有利于社稷吾无愛于髮肤矧此防私實同毫末忠義之士當識此誠各忘内顧之心共成節約之制今后每遇聖節大禮生辰合得親屬恩澤并四分減一皇太后皇太妃准此

合祭天地詔 范祖禹

朕聞五帝不相沿樂三王不相襲禮世有損益因時制宜惟我祖宗嚴奉郊廟當遣官攝事皆考合于前文唯奠玉親祠自裁成于大禮每以三歲對越二儀咸秩百神大賚四海迄先帝元丰之末講方丘特祭之儀蓋將補一代之闕容振百王之墜典朕惟菲德嗣守丕基列聖已行謹當遵奉先朝未舉懼不克堪是以昔歲仲冬竭誠大祀神只飨答祖考燕寧前詔有司載加集議犹欲咨度諸儒之論稽參六藝之文然理既不疑則事无可議斷自朕志協于金言只率旧章永為成式今后南郊合祭天地依元祐七年例施行仍罷禮部集官詳議

元符日食求言詔 曾肇

朕以眇身始承天序任大責重罔知攸濟永惟四海之遠万几之煩豈予一人所能徧察必賴百辟卿士下及庶民敷奏以言輔予不逮矧太史前告天將動威日有食之期在正月变异甚鉅殆不虚生夙夜以思未燭厥理將以弥綸初政消弭天菑非藥石之規孰開朕听况今周行之内人有所懷刍蕘之中言亦可采凡朕躬之闕失若左右之忠邪政令之否臧風俗之媿惡朝廷之德澤有不下究閭閻之疾苦有不上聞咸听直言毋有忌諱朕方開說正之路消壅蔽之風其于鯁論嘉謀唯恐不聞聞而行之唯恐不及其言可用朕则有賞言而失中朕不加罪

朕言惟信非事空文尚悉乃心毋悼后害应中外臣寮以至民庶各许实封言事在京于合属处投进在外许于所在州军附递以闻布告遐迩咸知朕意

赐夏国主诏 韩琦

昨以夏国累年以来数兴兵甲侵犯疆陲惊扰人民诱迫熟户去岁乃复直叩大顺围迫城寨焚烧村落抗敌官军边奏屡闻人情共愤羣臣皆谓夏国已违誓诏请行拒绝先皇帝务存含恕且诘端由庶观逆顺之情以决众多之论逮此逊章之稟命已悲仙驭之上賓朕纂极云初包荒在念仰循先志俯谅乃诚既自省于前辜复顾坚于永好苟奏封所叙忠信无渝则防礼所加岁时如旧安民保福不亦休哉

赐观文殿学士礼部尚书王举正不允诏

欧阳修

夫朝廷之广大贤隲之众多必有皤然耆寿之臣以当上所优礼之异或事思所访则有老成俾时之式瞻以为人望故礼虽七十犹有不得谢者焉卿懿文高行有君子之风清节令闻为当世所重阅书秘殿日侍清闲进读经筵坐论道德固非有官司之责筋力之劳宜思少安副我眷待

赐夏国主诏 欧阳修

朕嗣守丕图日新庶政方推大信以协万邦思与藩屏之臣永遵带砺之约矧勤王而述职固奕世以推诚而近年以来将命之使或不体朝廷之意罔循规矩之常多于临时率尔改作既官司之有守致事体以难从且下修奉上之仪本期効顺而君有锡臣之宠所以隆恩岂宜一介于其间辄以多端而生事在国家之抚御固廓尔以无疑想忠孝之倾输亦岂欲其如此故特申于防谕谅深认于眷怀今后所遣使人定宜精择不令妄举以紊彝章所有押赐押伴使臣等亦已严行戒励苟有违越必寘典刑载惟信誓之文炳若丹青之着事皆可守言贵弗违毋开间隙之萌庶敦悠久之好

赐南平王李德政歷日诏 宋 祁

颁歷之义以初为常俾一天下之归用谨人时之授以卿列壤南裔率职本朝宣我恩化慰彼黎庶每属岁元之防必荣庙朔之藏朕亦推处襍祥裁辅舒惨申命太史分次左方宜案象以奉行表布和之胥洎特兹驰锡勿怠钦承

赐判永兴军韩琦再乞相州不允诏

王安石

卿当国家之多难任社稷之至忧实能忠勤以济勲绩方均逸豫适此外虞烦我元功良非得已亦惟体国义不辞劳今虽尚谋经武之时非有搜兵伐罪之事坐临诸帅固可优游何必旧邦乃能休养勉绥居息以副倚毗

赐守司徒检校太师兼侍中韩琦诏

王安石

便道之鎮朝廷故常来朝京师朕意所欲使事曲折既当闻知忠言嘉谟又所饥渴虽知勤勩可不勉哉

赐富弼乞判汝州允诏 王安石

比飭使人具宣至意就令赐告冀遂宁瘳卿严只朕命不敢遑息顾念吏卒闵其久留触热载驰用忘勤勩恭以事上卿实有之仁及贱防又能如此忠诚所恻岂独朕心从容小邦姑以养福勉绥吉祿毋恤后艰

赐知亳州欧阳修乞致仕不允诏二道

王安石

股肱名臣与国同体礼当得谢朕尚难之况年非告老之时而勲在受遗之籍不留屏辅人谓斯何姑体至怀少安厥位

卿勲德之旧简在帝心从容一州足以休养而抗奏至于四五必以田里为归岂朕视遇故老有不足于卿乎何其求去之果也欲喻至意莫知所言惟能勉留实副勤伫

赐答曾公亮诏 王安石

眚戕变异以戒人君推之股肱朕所不敢元勲旧德实赖交修譴告之来必缘象类明谕朕志使当天心庶几君臣并受遐福不务出此而果于辞权是惟保身岂曰谋国

赐特放知潭州燕度待罪诏 王安石

卿受命方隅助宣德化奸宄弗率乃触大诛引慝自归谓当譴黜万方有罪责在朕躬虽尔长民岂专任此赐宰臣韩琦不赴文德殿立班待罪不允诏

王珪

天子之御正朝从而未讲宰相之班百辟后亦从隳防台简之忽陈规邦彝之浸畧蓋延英賜对每逾中 之咨故宣政留班不及大昕之謁矧在职之匪懈奚引愆而靡宁宜斥细嫌用綏素瞩

賜河阳三城节度使兼侍中曾公亮乞免册礼允

詔王珪

天子临轩拜三公其礼旧矣今朕以上公之秩加于元臣方戒有司卜日而册授之乃援比固辞不能为朕引绂廷下吁其礼何时而可复耶虽用勉从则匪朕心之恻

賜判亳州富弼乞罢使相不允詔王珪

朕初临丕基首撰大吏方劳精而共务忽引疾以屡辞去虽逾于岁年念不舍于朝夕适览奏函之旤又将使袞之还且重禄所以赋上贤乐郡所以优旧德宜收曲虑终保高名

賜吴奎免恩命不允詔王珪

天子惟君万邦建时百辟以只迪于乃事矧曰左右之臣以朝夕承义乃辟予敢有弗钦尔克懋乃猷兹庸命尔图厥政尔乃陈所以固辞朕命者三朕思有虞之世羣臣皆让亦莫安厥位终敕之曰俞汝往哉尔弗逃闻于前人其率时训惟厥中呜呼慎尔止毋倚乃身乃罔弗孚于休

戒諭夏国主詔王珪

维乃祖考克有西土世为汉藩辅今尔弗蹈于前烈乃窃署重爵以奉币于朝方边吏拒还乃复稽留境上不及廷见之期泊朕亲防贡函而僭我王命实如所闻朕疑风俗荒遠未達朝廷之仪虽然弃信慢常谊不可长其务思先世之约以保綏于斯民毋忽是图以奸我有邦之罚今后所差使人即不得僭拟

賜宰臣韩琦请郡不允詔吕公着

夫忘身徇国者前志之所高送往事居者人臣之所勉顾惟寡昧矧在亮陰永言负荷之艰实頼股肱之助荐披来奏颇异予闻谓已事于山园必听辞于机柄虽末代或尔在本朝则无唯天圣之初冯拯去位非缘使领而获罢蓋以疾疚之匪任卿体力素强望实兼劭所宜遗履谦之近节懋经国之遠图深体至怀勉綏厥位

賜王广渊张洸獎諭詔元绛

洮岷之役师旅载兴维予信臣一乃忠力百尔调发并济厥须告凯奏功实繁伙助特加褒宠有腆分颁宜体眷怀益图来効

赐新除落致仕依前光禄大夫范鎮赴阙诏

苏轼

夫有德君子以精神折冲譬之麟鳳能服猛鸷朕虚怀前席以致诸老非敢必以事诿也苟得黄髮之叟皤然在位则朝廷尊严奸宄消伏卿虽笃老乃心王室母憚数舍之劳以副中外之望

赐尚书刑部侍郎范百禄乞外任不允诏

苏轼

成王命君陈商民在辟予曰辟尔惟勿辟予曰宥尔惟勿宥惟厥中古之有司与天子相可否蓋如此而况公卿之间议有异同而不尽其說哉例在中书与在有司固宜审处归于至当而卿遂欲以此去位非古之道也其益修厥官以称朕意

沿路赐奉安神宗皇帝御容礼仪使吕大防银合

茶药诏 苏轼

于赫神考如日在天虽光明无所不临而躔次必有所舍肆予命尔只奉此行礼既告成勤亦良至感慕之外嘉叹不忘

赐阿里骨诏 苏轼

惟尔祖先世笃忠孝本与夏贼日寻干戈亦惟恃我朝廷爵秩之隆用能保尔子孙黎民之众肆朕命尔嗣长乃师而承袭以来强酋外擅尔弗能禁恣其所为遂据洮城以犯王畧陰连夏贼约日盗边朕愍属羌之无辜出偏师而问罪元恶俘获余党散亡山后底平河南绥服朕惟率酋豪而捍疆場乃尔世功叛君父而从仇讐岂其本意庶能改过未忍加兵果因物以贡诚愿洗心而効顺尔既知悔朕复何求已指挥河路更不出兵及除已招纳到部族外住罢招纳依旧许班次往来买卖及上京进奉尔宜约束种类共保边陲期宠禄于有终知大恩之难再勿使来疑复为虚言

赐正议大夫知邓州蔡确乞量移弟硕允诏

苏轼

以义责备春秋有失教之讥以情内恕诗人有将母之念硕之得罪事在有司难以遗近之亲而废朝廷之典反观来请有防予心重违兄弟急难之词以伤人子奉养之意

赐端明殿学士银青光禄大夫致仕范鎮獎諭詔

苏轼

朕惟春秋之后礼乐先亡秦汉以来韶武仅在散乐工于河海之上往而不还聘先生于齐鲁之间有莫能致魏晋以下曹郤无讥岂徒郑卫之音已杂华戎之器间有作者犹存典刑然铢黍之一差或宫商之易位惟我四朝之老独知五降之非审声知音以律生尺览诗书之来上阅籒虞之在廷君臣同观父老太息方诏学士大夫论其法工师有司考其声上追先帝移风易俗之心下慰老臣爱君忧国之志究观所作嘉叹不忘赐观文殿大学士集禧观使苏颂乞致仕不允詔

范祖禹

祖宗以来贵德尚齿鼎槐之老莫不眷留班于大廷表仪百辟卿向繇省辖进洩宰司深执劳谦恳求去位置使祠馆勉徇雅怀已退处于丘园尚何殊于田里矧卿筋力克壮聪明不衰中外所瞻足以重国体兹至意无或费辞

赐新除观文殿大学士中太一宫使范纯仁令赴

阙供职詔 曾肇

卿三朝元老四海具瞻出处为邦国之重轻用舍繫仁贤之消长从置散地宜还本朝俾陟降于殿帷仍总司于琳馆岂惟尊德尚齿昭示宠优庶几鲉论嘉谟日闻忠告昔周公已老犹在京师留侯虽病不去汉室眷惟旧弼异世同心闻命疾驰副朕所望

宋文鉴卷三十一

卷三十二

钦定四库全书

宋文鉴卷三十二

宋吕祖谦编

勅

颁贡举条制勅 欧阳修

夫儒者通天地人之理而兼明古今治乱之源可谓博矣然学者不得骋其说而有司务先声病章句以牵拘之则吾豪雋奇伟之士何以奋焉有纯明朴茂之美而无敦学养成之法飭身励节者使与不肖之人杂而并进则夫懿德敏行之贤何以见焉此士人之甚 而学者自以为患议者屡以为言朕慎于改更比令详酌仍诏宰府加之参定皆以为本学校以教之然后可求其行实先防论则辨理者得尽其说简程式则闾博者可见其材至于经术之家稍增新制兼行旧式以勉中人其烦法细文一皆罢去明其赏罚俾各劝焉如此则待士之意周取人之道广夫遇人以薄者不可责其厚今朕建学兴善以尊子大夫之行而更制革 以尽学者之材予于教育之方勤亦至矣有司其务严训道精察举以称朕意学者其思进德修业以无失其时凡所科条可为永制

赐右屯卫大将军叔韶奖谕勅 欧阳修

朕固嘉汝向学励善蔚然而有文与夫习富贵之骄而乐狗马之翫者异矣然夫学者所以知君臣父子之礼出可以施于国入可以施于家汝其慎择厥师讲救其阙使言而无过以自逖于悔尤夫能异于众人诚为有立必至乎君子然后大成汝其勉之无或中止

赐陕西西路沿边经略招讨都部署司勅

宋 祁

朕防军旅之苦宠边陲之良事从优宽情无遴爱至于常愆细过并许功除烦文苛法罕由吏议昨滕宗谅张亢并缘事任合给公用库钱俾其宴享寔僚犒饫军伍而乃用度无艺簿领失防阳托贸易潜有牟入攸司言上遣使即推如闻逮系颇多鞠劾弥广本其冗费宁足深诛已罢案穷悉令原贷其滕宗谅等止免一官量降差遣虽屈吾法期慰士心且夫尽用市租美推赵将来从我取谊表汉臣每慕前风大体尚虑诸道帅守便以兹事为愆或损狭饩牵或裁量药餌苟存畏避谓免讥弹胡益至公亦非朕意但当循经费之式去自润之私取仰于官均惠

于众由兹底绩夫何间然安节坦怀毋或疑憚

罢诸路同提防刑狱使臣置转运判官勅

刘敞

国家兼覆防内疆理天下分州立邑十有八路惟吏之不平民之失职政之颇顚狱之糾紛未能独察也故设糾防之司使奉钦恤之寄专属朝案貳以武吏诚欲审疑察枉释冤决滯纳民于不冤流化于无讼而武吏或起世家或由军功文墨期会未必深究监司背项适增其繁夫非其习而望其效违其方而冀其功不亦难乎其罢诸路同提防刑狱使臣令枢密院勘防已及二年者即令赴阙未及二年者与就移合入差遣及于河北河东陝西缘边兵马多处相度添置路分都监以次补用庶几人尽所长官不虛受夫转运使之任所以寄耳目治财赋集事功也江南东西荆湖南北广南东西福建益梓利防等十一路此其去京师遠者万里近者数千里或跨带山海嶠岖蛮夷而皆一员主之处则无与参虑出则无与僇力设有缓急之警调輸之烦机防一失民受其 甚非豫虑先事之策其各增置转运判官一员以三年为一任选差第二任以上知州资序人候一任满日与提防刑狱差遣初入知州及第二任通判资序人候满两任日与提防刑狱差遣若居部无状隳职败事亦重行其罚蓋士常患任之不当其材无以见长用之不久其任无以就功今朕别异文武使得自试选擢贤能使得次进吾于士大夫可谓无负矣其各竭力悉心勉成功名布告中外咸諭朕意

复天下州县官职田勅 张方平

昔在先帝诏复公田合王制班祿之差得圣人养贤之义载原深防本自爱民比者搢绅之间屡陈利害之意以谓郡县受地有无不齐铨审除员权利为幸奔竞以之伤俗因缘至于害人故尝命官断以定数诚足厘于浮 然未安于予怀礼不云乎厚祿以劝羣臣则下之报礼重凡厥文武仕于朝廷虽廉素者惟士之常而富贵者人之所欲其全寬大之体自有公平之制所宜给其所未给均其所未均约为等差防令增足使事父母者得以致其养畜妻子者得以致其乐冠昏防祭有所奉庆恤饋问有所施不牵私室之忧必专公家之虑则六计可以 羣吏之治四方可以期众职之修儆自犯于有司亦何道于彝宪上广先朝之惠示不敢渝下俾诸臣之言审兹自定惟尔中外体予所存

条制资廩勅 张方平

周礼大司乐掌学政以六艺教郡国子汉制光祿勲典仕籍以四行察三署郎兹其官材本于世胄然当辨论必属俊良令廩法之所原古典刑之是宪惟因循之日久寢滋蔓而幸多 生作法之凉濫起推恩之过且赏延于世諒非及于疎宗官惟其人顾何取乎髻稚暨阶仕进之路复无海育之科室不茨墉田不疆畝处不裕立身之道出不闲从政之方略观贵途良鲜旧族此则上因朝廷法制之不立下自父兄训义之不孚故俾宰司详为定令使夫冢嗣先录以笃为后之体支子限年以明入官之重设考艺之格激之向学立保行之条勉令率履前史不

云爵禄者天下之砥石人君所以砺世磨钝兹实用焉庶乎位有称职之才朝多济世之美非惟为国造士是乃为臣立家咨尔具僚知朕此指

皇族出官勅 苏颂

自我祖宗慎叙邦族大则疏封于爵土次则通籍于闺台普集京师参奉朝请然而世绪浸远皇枝益蕃属有亲疎则恩有隆杀才有贤否则禄有重轻今而一贯穿于周行是亦奚分于流别虽睦婣之道诚广而德施之义未周昨近臣数言宰司继请谓宜定正限以等彝朕惟亲戚之间经史有训汉唐之世典故具存或以九族辨尊卑或以五宗纪远近或听推恩而分子弟或许自试而効才能或宗子之贤得从科举或诸王之女自主昏姻尽前世之所行顾当今之未备况我朝制作动法先王岂宗室等衰反无定着因俾羣公之合议将为一代之通规载揽奏封具陈条目以谓祖宗昭穆宜从世世之封王公子孙抑有亲亲之义若乃服属之既竭泊于才艺之并优在随器以甄扬使当官而勉懋至于任子之令通昏之仪凡曰有司之常一用外官之法金言既允朕意何疑告于将来遂颁明命噫自义率祖既殊升降之文因时制宜斯尽变通之利咨尔宗盟之众固多博识之伦奉承新书当体朕意

赦文

建隆登极赦文 阙名

五运推移上帝于焉睠命三灵改卜王者所以膺图朕起自侧微备尝艰苦当周邦草昧从二帝以徂征泊虞舜陟方翊嗣君而纂位但罄一心而事上敢期百姓之与能属以北兵侵疆边民罹苦朕长驱禁旅往殄渠魁鼓旗才出于国门将校共推于天命迫廻京阙欣戴 躬幼主以厯数有归寻行禅让兆民不可以无主万几不可以旷时勉徇羣心已登大宝昔汤武革命发大号以顺人唐汉开基因始封而建国宜国号大宋改周显德七年为建隆元年乘时抚运既叶于讴謡及物推恩宜周于华夏可大赦天下于戏革故鼎新景命初隆于王室眚灾肆赦鸿恩普洽于民心更赖将相王公协谋同力共裨寡昧以致升平凡尔万方咸知朕意

嘉祐明堂赦文 王珪

朕承三圣之基履四海之贵深惟持国之日久益念为君之道艱有临听之瘳庶以图天下之佚无奉养之靡庶以资天下之丰兢兢万务之维微勉勉前事之所戒倚以左右辅弼之正予敢有弗钦事于上下神祇之明予敢有弗肃属九谷登富三辰昭华象来梓海之祥尘絶玉关之警有邦之应于朕岂功恭念为天之子者必修报本之禮为人之子者必怀追养之慕重循菲德屡缉旷文顷按明堂之图古如路寝之制载经斯室载度斯筵直大火之驛芒乘季秋之肃气物无上帝之称非躬祠不足昭虔防圣维文考之尊非严配不足尽虔孝于时备法物之驾服大冕之章格灵贶于眞庭欵清德于太宇还祇宗祀之举具饬纯诚之将迺神光陆离烛于荐鬯之夕喜气休晏被于燎柴之时亶丕事之继成敢蕃厘之专飨宜孚廷涣以契天心可大赦天下于戏承神之胙既均辉耀之微荡俗之瑕复若风霆之布盖礼钜则择之博孝至则

劝以遐尚赖秉文之英经武之杰厉同寅于王室壮大治于邦图共荷无疆之休亦膺无穷之闻

治平立皇太子赦文 王 珪

王者承天立极莫不思长世之图为国建储所以正万邦之本故朕亲先父子而天下皆以为爱命发朝廷而天下不以为私粤予上嗣之良稟自日躋之圣出而就傅寢穷学肆之闻入则承颜勤至寝门之问比疏荣于王社益侈德于天枝顾荷丕基之艰犹虞正体之贰矧汉文命嫡着于即阼之初年且夏后立子期以传家于万世维羣元之所俟维大器之所承式符少海之祥宜践东朝之位肆显册之丕发嘉金言之大同爰契欢心用覃旷泽可大赦天下于戏文昭武穆夙谄燕后之谋震长离明本有承华之象葢义重虞先者礼必亟举庆施虞上则惠必遐流咨尔庶方当体朕意

熙宁七年南郊大赦 元 绛

王者钦崇神天严奉宗祏就郊以飨所以诏天下之恭假庙而烝所以教天下之孝洪惟五圣之烈诞辑百王人文肆予冲人昭事上帝载念物无以称维一诚可以展大报之仪祭不欲烦维三岁可以述躬行之典协会康年之顺道迎至日之长是用朝荐殊廷裸将太室乃进登于阳畴以裒对于皇穹合祛柔祗陟配文祖祝燧告洁赞牺尚纯六乐变音舞奏而诸物至二精扬燎烟升而万灵交方丕事之获成敢蕃禧之专飨宜勇大号以赉多邦可大赦天下于戏意尽精禋既秩宗祈之举政施惠衍亶昭庆宥之行维时黎元绥我德泽尚赖谟明四近忠莩羣材仪图新美之功勋相隆平之运同底于治永孚厥休

元丰立皇太子赦文 邓润甫

父子一体也惟立长可以图万世之安国家大器也惟建储可以系四海之望位序蚤定而人莫不以为悦典礼亟崇而众罔敢以为私永惟上嗣之贤寔有妙龄之誉入而视膳孝友见于夙成出则好书聪哲繇于自得粤绍休于正统犹虞位于东朝廼考蓍龟之占廼稽方册之实载涓吉日肇辟青宫周家先亲不敢忘庙社之重夏后与子葢以顺天人心宜覃旷恩徧暨群品可大赦天下于戏离明震长縣帝绪于亿年解吉涣亨洒天仁于万物葢礼之所行者大则泽之所流者深咨尔多方体朕至意

册

干德上尊号册文 范 质

维干德元年歲次癸亥十一月己酉朔十六日甲子摄太尉守司徒兼侍中萧国公臣质守司空平章事臣溥尚书右仆射平章事臣仁浦及内外文武臣寮马步诸军将校藩郡守臣四夷君长缙黄耆艾等七千五百人谨再拜稽首上言曰惟天为大惟尧则之又曰舜有天下无为

而理是以古之言道德者莫先于二帝一则曰聪明文思一则曰温恭濬哲英声茂实意无欲而自彰景福洪休心无求而自至巍巍荡荡无得而言伏惟皇帝陛下高明博厚宣慈惠和纯粹之德全孝友之行着惟精惟一知微知章向者龙尚处于潜渊日未离于暘谷厯试之际志在扶危阻艰难何往不济跃马蹈高平之阵麾戈佐淮甸之征喋血鏖兵一月三捷劳旋饮至论功莫二洎乎天监厥德用集大命人祇叶应风雨咸若鼎运初建国步犹梗始则李筠犯顺长防指阙并人连祸寇我北鄙于是有太行之行重进怙乱弃德崇奸幅员千里生民被毒于是有广陵之役千乘万骑如霆如雷询彼仇方震叠区宇翠华宵至坚城旦下连平二孽有同符契累朝已来出师诛暴未有若兹之竒速也顷者华风不竞中国政微五岭三江置诸度外殊文异轨六纪于兹肇启圣谋驱攘防乱荆湖底定南土晏然燕蓟之戎汾晋之孽燕巢幕上朝不谋夕边事少间理道无壅严恭寅畏一日万几勤于已而泰于人俭于躬而丰于物明四目而高视達四聪而遠听不侮鰥寡恤天穷也信及豚鱼遂物性也惜力念耕耘之苦推食闵介冑之劳法家之流既峻且密乃诏大理重正刑名俾尽哀矜务从寬简減盜窃之罪緩盐麴之禁好生之德通于神明若乃昧爽丕显坐而待旦商汤之戒慎也側身損已长轡遠馭汉文之化导也循名責实信赏必罚建武之法制也果敢决断从善如流贞观之风烈也帝王之道于兹备矣太平之业于兹成矣于是祇见清庙致其孝享圜丘展礼对越上 一献而天帝降祉再献而神人以和三献而万禄攸报祥风拂袂休气绕坛熙熙怡怡羣心胥悦国家大庆众庶共之肆赦覃恩俾民更始与天合道谓之应天天无不覆谓之广遠无不至谓之运博施济众谓之仁智周万物谓之圣化成天下谓之文保大定功谓之武其德无际谓之至德臣等不胜大愿谨奉玉册玉宝上尊号曰应天广运仁圣文武至德皇帝伏惟垂日月之明监亿兆之情凝旒端委昭受鸿名如山岳之固如松柏之贞干健不息品物咸亨承天之祐万寿千龄

封祀玉牒文 阙 名

维大中祥符元年岁次戊申十月戊子朔二十四日辛亥有宋嗣天子臣敢昭告于昊天上帝启运大同惟宋受命太祖开阶功成治定太宗膺图重熙累盛粤以冲人不丕承列圣寅恭奉天忧劳听政一纪于兹四隩来暨 颺殊尤禎符章示储庆发祥清静可致时和年丰群生咸遂爰荷顾懷敢忘继志金议大封聿伸昭事躬陟乔岳对越上 率礼祇肃备物吉蠲以仁守泣以孝奉先祈福逮下侑神昭德惠绥黎元懋建皇极天禄无疆灵休允廸万乘其昌永保纯锡

尊皇太后册文 欧阳修

维治平二年岁次乙巳十一月丁巳朔十有六日壬申嗣皇帝臣某谨稽首再拜而言曰臣闻昔者明王之以孝治天下者非家至而日见也蓋有要道焉推所以行于已者为天下率尽所以奉其亲者为天下先而四海靡然而承风矣洪惟有宋受命造邦百年四圣而小子获承之以继我仁考之遗休余烈方与羣公卿士夙夜以思勉其不逮庶防如我仁考付畀之意以申罔极欲报之心此固栗栗祇惧不敢遑宁者也顾惟眇末之质提攜鞠育慈仁咻煦至于有成自我圣母嗣位之始哀迷在疚而忧勤艰难一日万务协和绥靖保佑扶持功施邦家亦惟我圣母永惟至恩大德无物可称是以稽参典礼率吁羣心合志一辞恳恳惓惓不胜大愿谨遣摄太尉具官韩琦司徒具官胡宿奉玉册金宝上尊号曰皇太后恭惟皇太后圣善明哲柔闲

静专粤自正位中宫内助先帝陰礼修而教行俭德着而下化遂及万国先于正家逮夫玉几受遗遭时多难勉徇勤请权同听决而明识远虑动懷谦畏深鉴汉家母后之失讫不践于外朝及归政冲人合于易之进退不失其正之圣是惟全节鉅美固已超出前古而垂法后世宜乎盛烈播于声诗尊名光于典册惟末小子获奉温清呜呼殫九州之富以为养未足尽于孝心享万寿之福而无疆期永承于慈训臣诚惧诚扑稽首再拜谨言

皇后册文 王安石

维熙寧二年岁次己酉四月丁酉朔二十六日壬戌皇帝若曰自昔有天下必择建厥配以承宗庙以御家邦肆朕受命奉循前烈考慎典册以祈协于神民咨尔向氏懿柔淑恭旧有显闻肇功唯祖弼亮帝室流德之泽覃延后嗣是产硕媛比贤姜任越朕初载来嫔蕃邸盥饌在中率礼无违以至嗣服祗承内事斋明夙夜罔有旷失宣崇位号表正宫庭今遣摄太尉推忠协谋同德佐理功臣枢密使光禄大夫检校太傅行尚书刑部侍郎上柱国东平郡开国公食邑五千户食实封一千户吕公弼摄司徒朝散大夫右谏议大夫参知政事防军太原郡开国公侯食邑一千一百户赐紫金鱼袋王珪持节册命尔为皇后夫惟兴王厘厥士女咸自内始達于四海朕克勤人用弗怠朕克俭人用弗奢朕克正人用无反侧颇僻尔勤相朕乃济登兹于戏匪初惟艰惟慎厥终尔忧念兹朕以永享天禄尔亦豫有无疆之福岂不韪哉

仁宗皇帝加上徽号册文 王 珪

维元丰六年岁次癸亥十一月壬寅朔二日癸卯孝孙嗣皇帝臣谨再拜稽首言曰臣伏观古先格王莫不大名发于前而大惠昭于后其法皆本于至公而不可易至后世臣子又欲尽报上之道以谓君德甚盛其言不足以包众美于是有至郊加谥之文夫欲推事存之礼述追遠之志则奉素享之荣号益新纪之鸿烈谋羣公请太室洋洋虞际天接地而震显之不亦当灵心而傳古谊乎恭惟仁宗神文圣武明孝皇帝躬清明之资赋神睿之略于行施之不息仁性根于自然时乘六飞端御大器知穷八荒而不见其迹泽及万彙而不居其功尔乃简防峻贤放遠邪佞宥恕刑狱怀保鰥寡赏不徇所私罚必当于理兴农桑之本务缉礼乐之坠文有惨怛好生之心吏或误入重辟必终身见斥有寬裕从諫之度言者屡进狂直必曲意见容念兵革之伤夷则不杀而服念稼穡之勤劳则罔宁于勉矧履天下之尊而持之以抑畏飡天下之富而宝之以俭素輿马不闻于游盘钟鼓不涉于闲燕宫室亡奢靡之饰器服亡瓌奇之玩加以夙夜齐防事天之诚尽霜露忧惕念亲之感深方朝廷之久安迺大革因循而圣政又新为社稷之重计迺前定祸乱而皇嗣蚤立故四十二年仁恩川流涵濡薰蒸格于上下日月华风雨均四时籲百谷蕃北有契丹而不能骄西有黠 而不能軼虫鱼遂性自安川薺之游男女洁诚更趋耕织之乐固有幽遐荒昧之俗不约而子来奇伟倜傥之瑞不劫而特见者矣丕赫哉宪度鸿明声文沛施自载籍之传蓋未有休功盛业可加于兹也重循凉菲永念猷训今将歆清庙陟紫坛遂受厚福以浸黎元宜于此时临彤庭发玉版上不敢隳祖宗之典下不敢亏神民之情如尧如舜如禹如汤岂不高一世之闻而流万世之声哉爰飭上仪载扬景铄谨遣银青光禄大夫守尚书左仆射兼门下侍郎上柱国太原郡开国公食邑七千六百户食实封二千五百户王珪奉玉册玉宝加上徽号曰仁宗体天法道极功全德神文圣武潜哲明孝皇

帝恭惟明德在天临受徽称维亿万年永锡嘉祉谨言

立夏国主册文 王 珪

维熙宁二年岁次己酉三月戊辰朔十四日辛巳皇帝若曰于戏昔尧合万邦而民风和周建列土而王业赫若古申命盖国家之成法也咨尔秉常迪性纯一饬躬靖防生稟山川之灵旧传弓钺之赐抚有西夏尊于本朝知事君必尽其节知守国当保其众乃内发诚素外孚誓言质之天地而不欺要之日月而不昧朕用稽酌典故表显徽实锡尔以茅土之封不为不宠加尔以车服之数不为不荣涓辰既良备物既渥诞举丕册以华一方今遣朝奉郎守尚书司封郎中上轻车都尉赐紫金鱼袋刘航文思副使银青光禄大夫检校太子賓客兼御史大夫骑都尉彭城县开国伯食邑七百户刘慆持节册命尔为夏国主为宋藩辅夫履谦顺者靡不膺长福懷骄肆者靡不蹈后虞率身和民时乃之绩往钦哉祇予一人之彝训可不慎欤

皇后册文 李清臣

皇帝若曰天相予祖宗兹厯世宁康朕既敬绍丕绪罔作丽观底信内外惟式薪以正邦今左右弼臣礼仪正貳暨族老宗妇各防厥事咸铺绎旧闻明敷于位曰干施坤承日照月俪四时不忒万物用成盍稽则象询考 筮若时元吉正名锡服俾长首六宫以母天下予惟国有故常是何敢弗率咨尔王氏乃祖忠劳王家书于太史子孙公侯出入藩服惟功泽逮兹是硕媛淑 温恭备有嘉德聘归王邸入承事皇姑靡不若礼上天右序予家蚤育元于庆在宗庙惠赉于四方乃以某年某月某日遣摄太尉具官某摄司徒具官某赐尔皇后之宝方寸有半文螭纽授之玉册厥简五十命尔翟衣笄纁博髻黼领大带以朝暨岁时将祀于东西宫金輿朱盖虎贲禁卫步障行导是惟显哉尔其克后职思后道履中体顺兹日飨多福集大祐于厥躬其尚欽助予治昭闻于无穷于戏懋戒之哉

仁宗皇帝哀册文 韩 琦

维嘉祐八年岁次癸卯三月癸卯朔二十九日辛未仁宗神文圣武明孝皇帝崩于福宁殿旋殡于殿之西阶粤十月戊辰朔六日癸酉迁坐于永昭陵礼也龙驭賓天珠襦留殡万方之轨同臻七月之期兹近法仗已严灵輶未进风云惨鬱以生悲臣妾涕号而思殉孝子嗣皇帝臣某接统承尧念亲晞舜徘徊象物惊禁从以如存摧慕僊游致哀诚兮必尽絜临奠以长辞盖终天之永恨乃命弼臣以文传信其词曰惟宋受命与天无疆艺祖以武底宁四方神宗以文万邦一王眞庙绍隆赫然其光逮夫仁宗益炽而昌厥生之初上帝惟祐天日之表振古未覩色出圭璋步严龙虎其俾眞人来绥下土元良之建匕鬯是主寝门之问惕若文武嗣训之循纂承丕绪左右献言以防自处大运归干独化陶甄进良黜奸始章圣权其仁如天其度如渊其仁伊何得之自然草秀而茁虫飞而翾尚不忍伤况吾民焉惠泽之霈滂洋幅员物无不滋四十二年猗如天兮化功则全其度伊何汪然莫际巨细必容默分诚伪臣在言职不知讳忌时肆诋訐众嫉狂易圣心怡然曰此忠义是也吾从过焉何戾猗如渊兮是能致治明慎庶狱极于哀矜惟法所在未尝妄刑郡邑之吏责之详平一失入罪无阶显荣尊为天子以俭为贵

崇尚清虚屏斥纷丽向缘不悻辅臣入视殿幄萧然茵衾故敝率用缁素了无文绮众目惊嗟上曰何喟吾之受用素止如是此民膏血乌敢妄费恭事天地孝承祖宗九见圜丘再祇合宫大祫于庙亲借于东服器精备粢盛洁丰小次不御秉圭颙颙何必户晓民胥偃风取士之路务存至公十二临轩策之必躬隼髦尽得岩穴几空有将有相曰功曰庸眇视三代吾其比崇北人之强西夏之獬时欲侵陵恣其贪嗜吾以威怀折其凶锐两皆心降从我控制百蛮梯航琛賫日至礼乐具修干戈不试夫惟立嗣天下之基前世令王或牵以私事不前定瀕于乱危我出独断挺然不疑求贤于宗唯圣是知神器之重其传有归庙社以安生灵以嬉迹其大公尧舜之为昔在人上必有偏好或乐驰逐或喜征讨或务宴游或专营造或迹声色或泥丹灶棊奕之工击拂之妙有一于此下从而效噫吾仁宗澹无所乐曰吾好者在勤政道曰必旰食惟先之绍闲时弄翰或 或草圣帚之挥千奇万巧去冬之暮清燕之间再辟天阁诏呼从官亲作飞白侍臣纵观心合造化生成笔端书幅逾百大均宠颁退坐群玉行觞尽欢呜呼哀哉赐墨尚湿宸章未刊植璧斯防遽有金滕之祷缀衣遂彻俄承玉几之言呜呼哀哉大变之来天倾地裂四海之恟风号雨血兆民震骇其无生百辟冤呼而仅绝乘云之游兮汗漫而自高持防之慕兮僵仆而徒切因疑前防之非常似与羣臣之叙诀呜呼哀哉候律云凛淑辰协元严蜚路以方驾视羽幢兮始前池竹摇雉车旗饰鸾背朱雀之通逵指青龙之吉山关路长兮去复去宫车挽兮还不还痛彻六宫兮莫如逝泪洒重瞳兮胡可攀呜呼哀哉寒日昼昏愁阴夜积卷晴霓于丹旒荡霜波于素帟悲筋互咽六州之奏增凄骏岳前瞻万岁之声何闻大隧一局幽堂永寂人间之恨空长帝所之欢岂极呜呼哀哉秦汉而下御邦子民复越三纪才闻数君其间治乱以相駁否亨之不醇如仁宗享国之久而始终太平兮彼安敢望吾之清生而无穷者厚载健而不息者高旻惟至仁盛德与高厚之俱兮万世巍然而不泯呜呼哀哉

宣仁圣烈皇后哀册文【代宰相】 毕仲游

维大宋元祐八年岁次壬申九月三日癸酉大行皇太后崩于寿康殿旋殡于崇政殿之西阶粤明年正月迁祔座于永厚陵礼也丛殿帘空袒庭燎晦云似郤而复凝月虽辉而如惨孝孙嗣皇帝臣某临遣奠以兴哀瞻振容而永慕凤吟管以何悲龙挟輶而若驻羽卫罗阙神仪布露爰制近司纪陈圣度其词曰皇矣大宋宝命自天重明累圣跨成轶宣正后在中契于坤干较任比姒亦逾于前有系自姜源深积厚功熙我朝方虎是偶奄韩宅鲁益昌厥后月瑞日符是兴太母于铄太母躬义率仁居静犹地含和如春正素自稟聪明夙闻作合英祖齐升并曜受养神考陰功善教体道不违惟德是效元丰末命帝命惟辟听断勉同以补天隙拥祐神孙立民之极恭以励人俭惟化俗衣有大练衾无片玉房闼不出四海在目信义由中九夷思服如鉴不尘如璞不缁三事大夫正直是咨宗藩外戚渗漉惠慈人爵王官虽卑不私庙谒靡行外朝靡践池籞靡临惟正是勉服御靡更惟恶是善庸尔万方为则为典左右皇躬动有坛宇居由范防造次于是寢隆且昌如天清明霁日之光治化方成忧劳亦至外若平居中潜邁厉坤轴轧以夜摧月轮翩而晓坠守大化之靡怛尚斯民之为意呜呼哀哉珠箔低垂兮云雾犹隔蕙帐髣髴兮炉烟未销想仙驭以何适谢人寰而已遥万乘号恸哀纏九霄千官缟素雨泣东朝呜呼哀哉人与神兮变何速秋复春兮时以徂牺罇盈兮未忘于平昔池綈动兮难留于须防翼八翥以为卫陈六衣而汜涂呜呼哀哉野苍茫兮人渐逺仗徘徊兮天欲晚遡洛涧兮嗟备物之如在逾巩岸兮知神游之不返山川已兆于真宅松柏犹凝于故苑呜呼哀哉玉晦

龙蛰金藏鉴昏泉关掩夜宫闱泣晨车轨同兮虽来于万国宝座闭兮惟朝于百神鱼惟炬以非日鴈长飞而不春呜呼哀哉成内则于三朝貽素风于十祀致理之勤兮今已往大道之公兮古如此何遽其家以为国而忧其民之犹子宜大书而作册俾永光于宋史呜呼哀哉

钦圣宪肃皇后哀册文 李清臣

粤建中靖国元年辛巳岁正月壬戌朔十三日甲戌大行皇太后崩于慈德殿二月壬辰朔十一日壬寅殡于西阶以三月壬戌朔八日己巳戒百官请命于太庙謚曰钦圣宪肃皇后太史箴之将以五月辛酉朔六日丙寅迁座于永裕陵礼也哀子嗣皇帝臣某极永感之怀写无穷之慕躬荐洞酌奉宁輶馭痛三牲之养忽至于遣奠悲万寿之祝俄成于晞露罄咳如在声容不返毕铜史之余滴动金商之清挽暑令忽其成凄薰风飒其变惨像设既严物仪具有惟是册书用传不朽宫臣承诏式防事守纪渐寓哀貽之永久其词曰我宋隆康恩渐动植逮惟暨迹生成滋息趋走贤智修官懋职遐及四裔左衽重译维相向公梁栋宗祏逮女曾孙迨家瑞国蚤归王藩旋被榆翟至性温温令仪翼翼道意礼学生知自得庆寿宝慈问安昕夕执养寒暑端庄不易内辅神宗赞助陪益凡厥见闻舒徐启迪十有九年晏粲椒掖万邦托慈六宫仰式约省外氏汤沭脂泽斯世丕平陰与多绩比懿夏商涂山简狄姜嫄太姒睽祛并舄元符三祀岁执徐直正月己卯变同割耋巍巍哲宗武威文德夫何弗祐忽遭窳窳上嗣考庙将决大策于时弼臣或藏邪慝辄进异论欲倒白黑赖我圣母沉潜刚克折之陛前气殫语塞庭罗犀渠门屯闔防德见利人寰宇庆恠一指顾间长宁社稷譬如娲皇神工妙力链石补天断鼇立极冲融宇宙滉漾澡涤靡贤不登靡冤不释臣尝侍对与闻训敕曰我皇帝圣材天锡子道勤恣政事祇惕治本乱原讲磨防绎惠心溥博物理研覈帝堪多难子复明辟何俟耐飧始还禁闕幸济初艰后罔余责重下教告亟就安适帝扳以留恩款褻积数请弗回推玺却籍义尽今兹事高往昔在汉马邓固多惭色其于邦民忧不离臆动履仁俭示先壶则服无珠玑器无瑶碧惩戒雕绘弃捐组织言祖经坟智该儒墨诸书过眼疑微洞析兢兢瞿瞿殆忘寝食凉暄密移疹气侵蚀皇帝圣孝启处在侧药审刀圭术穷鍼石禴禴山川犹期千亿丹剂虽灵防箠终厄佛供昼昏防氛夜赤禋象告凶轩星示坼数圯坤元景沦望魄五十八载驰光度隙呜呼哀哉梓匠奏工嫔娥罢饰帐帟光途坛堂撤席缟士鼎鼎绛旌奕奕左背城阙右经阡陌馘骑

绋车咿噫箫笳悲吟鹵簿哆赫万类夺辉四民聚戚御服苴麻皇情柔棘呜呼哀哉雾雨故宫莓苔旧城凤幌萧森兽扉虚寂輶路鉴奭孰非陈迹引望山园涕濡竹柏惟有徽音长留宝册呜呼哀哉

卷三十三

钦定四库全书

宋文鉴卷三十三

宋吕祖谦编

御札

大庆殿恭谢御札 欧阳修

勅内外文武臣寮等执珪璧以事神严祖宗而配帝虽有国之常典亦因时而制宜朕承三圣之丕基抚万邦之有众俭于已使天下之民丰劳于心致天下之民佚罔敢怠忽庶几洽平而首春以来偶爽调适赖三灵敷祐百福来臻顺以节宣获兹康裕加以边隅不耸风雨以时虽庶物之咸和顾眇躬而增惕是用稽先朝之成宪询故实于有司即广殿之翼严择灵辰之良吉式伸昭谢以格纯休宜示先期俾兹诞告朕取今年九月内于大庆殿行恭谢之礼其今年冬至亲祀南郊即宜权罢所有合行诸般恩赏并特就恭谢礼毕一依南郊例施行至日朕亲御宣德门宣制仍令所司详定仪注以闻务遵典礼勿俾烦劳咨尔多方咸体予意故兹札示想宜知悉

熙宁元年南郊御札 王珪

有天下者莫重上神之报为人子者莫严宗庙之承率躬三岁之祠常一阳之应缅慕先圣光施冲人载循禋类之期适在谅阴之际大惧不能备飭仪物奉将粢盛于是刺六经之文传博士之议皆以谓防有以权而顺变祭无以卑而废尊矧稽参西汉之彝防用景德之制顾予凉菲赖帝况临遂天正之辰往修郊见之礼方且进祈茂祉以大芘黎元昭格至精以终图熙事庶几能养其敢惮勤朕以今年十一月十八日有事于南郊咨尔攸司各扬厥职诸道州府不得以进奉为名辄行科率其百司除事神之物并宜一切仍旧外余应于供奉所须务令纯约以称朕不忘孝思之义

熙宁四年大飨明堂御札 元绛

勅内外文武臣寮等朕荷二仪之休履四海之富经庶政之至治秩将礼之弥文钦惟五圣之谟常躬三载之祀自纘隆于大业已肆类于圜丘兴言总章未诏嘉飨维仁祖之武宜谨于遵修维文考之尊宜严于陟配况万宝时防三光仰澄官师协恭方夏底定是用稽仍路寝之制涓选肃霜之辰上以裒对天明展昭事之重下以勅厉民志示遣养之勤特戒先朝以孚大号朕取今年季秋择日有事于明堂其今年冬至更不行南郊之礼所有合行诸般恩赏并特就

祀明堂礼毕一依南郊例施行至日朕亲御宣德门宣制咨尔攸司各扬厥职诸道州府不得以进奉为名辄行科率务循典故无致烦劳

批答

赐除宰臣文彦博让恩命批答 欧阳修

省表具知朕躬俭约以先人而生民未足勤忧劳以励政而百职多隳岂布德之不明抑任人之弗至是以斋居正虑先志后占鉴屡易以为烦念难知之可慎永惟商周之所记至以梦而求贤孰若用缙绅之公言从中外之人望卿以旧哲比尝相予惟量能宽以服人惟纯诚故久而益信勲德兼着可以重朝廷忠信不回可以临大事夫谋于其始而既审则果于必用而不疑汝其钦哉朕命无易所让宜不允仍断来章

赐新除宰臣富弼让恩命不允批答

欧阳修

卿有忧国爱君之心而忠以忘其已有经邦济时之学而用未防其能夫畜久而积厚则施之不穷虑深而计熟则谋无不获兹朕所以虚心仄席有望于卿也矧卿正直不回庸邪素忌小人所异君子所同是以在外十年而左右之誉不及履躬一德而搢绅之望愈隆朕内决于心外询于众敢谓有得卿其何辞

赐宰臣富弼乞退不允批答 欧阳修

朕眷惟宰辅之司实系朝廷之重职或非称势因易摇比以连年厌于屡易或用人之不审致厥位之靡安故于图任之初尤极精求之意而议者谓卿有天下之誉庆朕得非常之才岂惟断不惑于予心固以慰久郁之人望则朕之用卿者至矣卿之自待者如何而方沃嘉猷遽形退让骇无因而及此曾莫谕于乃诚岂廊庙之崇责重者其忧难任而富贵之至位高则其虑易危邪朕尝厯考往昔之人其于进退之际过计而图全者未必无患忘身而徇国者固多令名惟尔之明必知所择宜少安于职业用深体于倚毗

再赐宰臣富弼乞退不允批答 欧阳修

夫知人之明可谓难矣而任贤之术兹岂易哉若乃听之不聪信之不笃施設之方未尽弗极其材迟速之效有时莫能少待则被其任者实亦艰欤卿以纯一忠亮之诚蕴宏深遠大之业朕虚已以聽推心仰成至于一二之臣是惟同德下逮众多之论曾靡间然方将甄叙贤愚修明法度务防本根而更治不逮岁月之近功期于有成兹乃予意奈何中道而将止夫亦奚托以为辞矧上下既交宁有不通之志而君臣相遇岂为易得之时当体余怀勉安厥位

赐宰臣富弼乞解机务不允批答 欧阳修

夫宰相之事非可以岁月考而一二数也其在朝廷选贤任能而各得其职下俾民俗迁善逖罪而不知其然至于法度修纪纲正然后相与慎守而安行之以臻于治此朕所以虚心一意日有望于卿者也今事有绪而卿辞焉岂朕德之不明将顾时之不可中道而止夫何谓哉俾予获用材不尽之讥而卿涉苟安自便之计予所不取卿其勉焉

赐宰臣文彦博乞解重任不允批答

欧阳修

夫知人之为贤任则勿贰事其君而有道去不可轻此古之臣主之明举措必慎所以收功于一时而垂法于后世也卿夙有时望为予柄臣自复秉于国钧仅三周于岁序若乃进退贤否诛赏罪功每于听纳之间敢忘虚已顾彼搢绅之论曾靡异辞方期有成以副予意而乃过形谦损思避台衡岂寡德弗明于用才而不尽将多言害正致厥位之难安苟异于斯夫何引让矧卿忠信之节足以叶予之一心材谋之优可以断予之大事兹所束注宁烦谕言

赐枢密使宋庠让恩命不允批答 欧阳修

朕以因时致享克展于孝思已祭受厘大均于庆泽乃眷耆明之哲实予体貌之臣肃临事之有容既交神而防觐宜推异数以示眷怀虽嘉好谦曷止成命

赐杜衍让恩命不允批答 宋 祁

比虚右弼以须峻望卿清约忠壮华皓一节出入讽议靡事不为挺然公实见于有政朕志先定成命惟行况万几处可百职修理朕所倚办卿宜知之遽阅让函猥徇谦防且诞告群方不容颛辞久旷台路便废防逊钦服宠章

赐贾昌朝让恩命不允批 宋 祁

卿曩侍经筵已知国器厯守京邑则风绩早树进领邦宪则威名流闻扬休山立自处中道朕以为履正识敏材任辅佐引与机政参贰台司曾是逾年休有成效观德则懿俾课则臧断自予志冠升枢省诞告百执初无异言猥露奏封深荐防逊况训谕已熟典命难淹速即钦膺以光朝举

再赐杜衍让恩命不允批答 宋 祁

向以戎丑尚桀师伍留屯公私之匱不可费省又官滥于外吏欺于中苛察过当孚竞成俗济水无益治丝愈棼图所振整未知厥序以卿久在枢禁习总事经年耆识茂尽悴事国是用选

自予志对秉台衡借敏材以康调发之难褒介节以惩进取之 朕既寡德方兹仰成尺奏荐闻能让犹固已尝批喻宜体眷永母烦费词早膺宠典

赐陈执中韩琦让恩命不允批答 宋 祁

朕比执珪币祗事神祗至诚所向鸿厘如答是以推衍天祚沛流茂恩徧录侍祠之劳悉从进律之典卿卓有成效协于金言而临荣引让稽恩未拜阅露章而既熟非公论之所期便可钦膺即废谦执

赐皇弟允迪让恩命不允批答 宋 祁

朕敦睦懿亲差次宠典年长者崇爵属近者尚恩眷尔忠贤用加节制公言期协朝涣既颁何执常谦欲遂素守道风虽亮允令难稽往哉惟谐母或烦请

赐皇长子淮阳郡王免恩命不允批答

王 珪

昔我祖宗诞受天命厥惟艰哉克正皇猷丕懋乃绩以遗我子孙无疆之休今朕纂厥服惟稽古建尔元子于有邦乃季秋辛亥群公庶尹罔不祗朕言于廷尔乃陈德弗及期畀于一二弟兄之贤我闻曰立爱惟亲立敬惟长其敢示天下以私虐汝惟往哉尚迪时命无违赐皇伯祖承亮改封秦国公免恩命不允批答

王 珪

夫戚藩之建王室是毗古者皆世袭其封近代或别予之邑既非祖烈之服又失庙祠之传故朕推近属之长贤修先王之旧履以大子孙不絶之序以均宗社无穷之休适览露章过形冲节宜体亲亲之意庸光继继之图

赐宰臣韩琦已下乞立寿圣节宜允批答

王 珪

赤制告图肇承题序青炜动陆俯协诞期卿等过稽旧章列上芳牒缘华封之素祝建寿圣之嘉名窃惟受天元符抚国休运百辟称觞而在席四夷奉币而在廷敢以菲懷仰于輿望

赐宰臣韩琦已下尊号不允批答 王 珪

朕获承大统三载于兹防天之休海内清静方将饬齐辂洁纯牺以祗见天地宗庙之灵乃敢

昭发丕册扬徽垂鸿以自施虔尊荣者哉不图执事之臣列上表功之号且临政之日浅未有盛烈之章况事神之意忝岂在弥文之饬适增于媿难徇所陈

赐宰臣韩琦免恩命不允批答 王 珪

夫王者壹天下之俗宰相遂万物之宜故君臣同德而教化成朝廷上贤则分职治肆朕承邦之久得卿共政之均且国用失浮规节财力之匪易吏涂过冗甄序名品之为艱厯勤劳之百为蹈夷险之一致向属冢卿之缺适登台席之元稽卜神谋孚言朝听维百辟之是式维兆民之是瞻奚兴曲让之辞殊匪大公之举慊然众志郁于予闻蓋德盛而位隆者望虽与归然任剧而责至则事当随决思体睠毗之异祈收防固之情往代天工毋留邦涣

赐宰臣曾公亮免恩命不允批答 王 珪

夫天文中阶之象色正则二气钧国柄三事之司体公则万化缉朕何尝不寤寐邦杰弥纶政机以敦美风俗之源以甄序官师之品所繫甚大维材之难卿行足以厉朝谋足以经国代言二禁而号令鼓虔群动赋政中畿而神明炤于宿奸顷陪议于宰臣旋冠谟于宥省邦之维度靡不举兵之纪律靡不张属上台之进贤宜右弼之膺宠忽起舜庭之让未施鄰国之规群情郁然予心劳止矧夫付安危之几则望岂云浅当名器之分则处之勿疑所期广猷虑以同寅会精神而辅力当抑谦风之固往调大化之元岂朕之独致太平亦卿之与有令闻

赐韩琦免明堂恩命不允批答 王 珪

予临路寝之上曾览八紘邈然有通神明之志迺季秋宗祈既右上帝亦右文考始予斋精临献而惧不胜及观夫簠樽在堂钟石在庭至陟降上下之数与夫九州四海美物之荐罔不具饬噫何其礼之盛欤非尔元宰之臣孰总裁剽之故已降之制为百辟先亦皇天降休命于我家非予之所敢专也今书固辞顾不废予惠术之施虔

赐郝质免恩命不允批答 王 珪

国家提万兵之劲萃之畿中谋元帅之良护于岩下矧卿尝从征伐之事加有宿卫之勤宜授钺于师坛总环宫之夜柝蓋旌劳者必异其宠御众者必予之权毋为过兢其服重委

赐宰臣富弼乞退不允批答 王 珪

朕肇履邦图每恭天戒属初炎之在序偶时泽之弗滋且正于近畿顾民灾之未逮然应不旋日知人事之已修卿还来相予居位未久奚抗章而引咎将援故而辞权虽蹈夫圣贤远览之思殆戾于君臣交儆之意勉规弗及终底于成

赐欧阳修乞退不允批答 王 珪

夫与政之途蓋天下之责至者丛矣顾虽智勇不能以御流訾之来前日御史加非于卿朕惟其辞甚悖于义理之文今防者放而疑者释卿犹欲以去位岂朕所望焉传不云乎礼义不愆何恤人之言其起眚事母重朕之不敏也

赐宰臣韩绛免恩命不允批答 元 绛

卿方重淳深清明端亮阅文武之二枋旷谋猷于百为属者西羌侵边王师淹戍往视方略以宣威灵嘉维尔忠蔽自朕志絶轶前代比登冢司扶世泽民将倚调于元化靖兵戡乱犹伫建于肤公况维涣号之孚已穆广朝之听胡为恳拂欲避隆名虽难进之风自高冲尚而仰成之属殊烦顾懷趣宜钦承母重防固

赐宰臣韩绛已下上尊号不允批答

元 绛

朕闻唐虞之世君臣吁咷相与敕戒以康庶事未闻其自耀功德大为名称以动天下之听朕以凉菲获承皇绪固已极崇高之位号矣向者奉郊宗之祀三事大夫亦屡以徽册来上而愧不敢从方且嘉与众贤夙寤晨兴以营极治之业要之万世建无穷之基亦有无穷之闻不犹愈于虚名欤臣之尊君义则勤至朕守弗夺母烦数陈

赐皇伯宗谥免恩命不允批答 元 绛

卿爵齿兼尊德名参劭佑予郊庙之事克有夙夜之勤畴劳策勲时乃旧典往承成命无用勤辞

赐陈升之免恩命不允批答 元 绛

卿久服枢筦协成王功屡陈诚辞愿解几政方建将旄之重寄且增台路之华流辅成万微尝宣左右之力兼赋二枋宜旌文武之谟即当钦承安用冲挹

赐宰臣王安石已下乞御正殿复常膳不允批答

元 绛

垂象之变咎在朕躬内惟菲凉敢不祇惧避朝损膳钦天之渝神休震动销去大异而三事庶尹咸造在庭愿复旧常至于再请且星隆晷德犹赖交修况天畏棐忱固当屡省弭灾向福其庶几焉

赐刘摯辞免恩命不允批答 苏 轼

政如农耕以既获为能事言如药石以愈疾为成功若耕不获疾不愈朕何望焉所以用卿者非以富贵卿也勉卒成业何以辞为

赐太师文彦博乞致仕不允批答 苏轼

卿出入四世师表万民无美于功名而有厌于富贵其所以忘身徇国舍逸就劳者岂有求而然哉凡以先帝之恩生民之欲也卿之在朝如玉在山如珠在渊光景不陈而草木自遂去就之际损益非轻昔西伯善养老而太公自致鲁穆公无人子思之侧而长者去之卿自为谋则善矣独不为朝廷惜乎药饵有间时游庙堂家居之乐何以异此

再赐太师文彦博乞致仕不允批答

苏轼

朕修身以承六圣虚己以听四辅而法度未定陰阳未和民未乐生吏未称职中夜以思方食而叹虽不敢以事诿元老实望其以身率百官卿犹未即于安孰敢不尽其力此圣母冲人之本意而天下有识之所望也昔唐太宗以干戈之事尚能起李靖于既老而穆宗文宗以燕安之际不能用裴度于未病治乱之效于斯可见朕意如此卿其少安

赐宰臣吕公着乞外任不允批答 苏轼

夫以才御物才有尽而物无穷以道应物道无穷而物有尽凡今之患所乏非才以卿笃于爱君必能建长久之策澹然无我可以寄枉直之权二年于兹百度惟正事既就绪民亦小康至于微疾之屡攻亦高年之常理卿其良食自辅为国少安譬如止水之在盘岂复劳心于鉴物心且不劳而况于力乎

赐宰臣吕公着乞致仕不允批答 苏轼

宰相不自用人主不自为予欲识人物之忠邪故以卿为水镜予欲知利害之轻重故以卿为权衡苟明此心虽老犹壮与其轻去轩冕独善其身孰若优游庙堂兼享其乐益敦此义勿复有云

赐司空吕公着免恩命不允批答 苏轼

夫国以得人为彊如猛兽之卫藜藿以积贤为宝如珠玉之茂山川湛然无为物自防利故崔公发议则淄青慙服知朝廷之有人蜀使抗词则孙权回顾叹张昭之不在得失之效岂可同日而语哉朕之用卿意实在此国计之重可无复辞

赐右仆射范纯仁免恩命不允批答

苏轼

自昔先帝之世屡叹材难及朕嗣位以来专用德选虽爵禄名器出于独断而长育成就实在羣公长短不遗辅相之责苟无为国养人之意必有临事乏使之忧朕用慨然当食不御思得英隽之老共收文武之用惟卿笃于忧国明于知人灼见朕心宜在此位往任天下之重母事匹夫之廉

赐门下侍郎侍固乞致仕不许批答

苏轼

吾不出帷幄临御家邦实赖股肱之良以持纲纪之要于其进退顾可轻听之哉卿顷自近藩擢贰东省本以年德之故非有筋力之求若夫正颜色出词气使人望之而忠诚可信鄙倍自逯斯可矣岂可一病未能造朝遂欲舍而去哉诚请虽勤于义未也

赐刘昌祚免恩命不允批答 苏轼

卿国之虎臣帅我爪士总章大祀宿卫有劳宜为六军之先以承大賚之庆辞而不有殊匪吾心

宋文鉴卷三十三

卷三十四

钦定四库全书

宋文鉴卷三十四

宋吕祖谦编

制

除赵普门下侍郎同中书门下平章事集贤殿大学士制

闳散同功归马遂隆于周道萧张叶力断蛇因肇于汉基必资佐命之臣以辅兴王之业推忠协谋佐理功臣枢密使光禄大夫检校太保兼御史大夫上柱国天水县开国伯赵普功参缔造业茂经纶禀象纬之淳精契风云之良防泊赞枢机之务屡陈帷幄之谋沃心方伫于嘉猷调鼎宜膺于大用俾践台衡之位仍兼书殿之荣尔其罄乃一心熙予庶绩君臣相正勿忘献纳之规夙夜在公勉致隆平之化往服休命无愧前修

除吕防正中书侍郎兼户部尚书平章事制

李沆

天道无私日月星辰助其照皇王不宰股肱辅弼代其工所以端拱守成垂衣制理永建不平之景运遐追三代之令猷其有业茂经纶才推谨厚参大政而已淹星岁秉至公而无舍寅昏宜颁出綍之殊恩俾正持衡之重柄爰择刚日特降命书推忠佐理功臣朝散大夫给事中参知政事柱国东平郡开国男吕防正四气均和五行钟秀有济时之略辅之以温恭挺命世之才守之以循默爰覩舜旌之进善遂指魏阙以来仪临轩覩敏贍之能射策见纵横之略暨兹登用益着謨明公忠推社稷之臣凝重见庙堂之器眷兹大体久郁具瞻屡宣作砺之功克懋秉钧之绩别锡褒功之美号仍陞馭贵之崇阶勲籍增荣井田加赋预列侯之峻爵同大利之计书顾优恩之在兹谅名器之无假于戏云从龙而凤从虎今也其时启乃心而沃朕心必求诸道尔宜周旋庶政佐佑眇躬缓兹宵旰之忧翊我隆平之运同底于道岂不美欤

除文彦博判大名府制 欧阳修

朕惟将相之崇资是为文武之极选隆其名器所以重朝廷列于蕃宣所以屏王室矧乃居留之任必属老成之人爰择刚辰敷告有位具官文彦博器闳而厚识粹而明学得其方通古今而知要才周于物适大小以惟宜自奋发于声猷早更扬于中外居则参裨乎国论出则宣畅乎皇威两践台司首当柄用贤愚式序举百职以咸修纲纪甚明赞万几而至悉自恳避钧衡

之任出司管钥之严逮此逾时蔚然休问眷言邦哲实简予衷是用更其拥节之荣委以别京之重劲兵所宿是资总制之权雅俗惟淳兼赖抚绥之政于戏与国同体是谓股肱之良惟民具瞻方隆师尹之望顾我旧德岂烦训辞往其钦哉祇服休命

除皇弟允初依前检校尚书右仆射充感德军节度使加食邑食实封余如故制 欧阳修

爵赏当功则为善之劝广名器不假则至公之道存然而隆恩睦亲所以厚乎风俗建侯作屏所以扞于王家非余敢私乃国旧典具官允初质性纯茂稟乎天姿学问发明由于师训维我叔父时为贤王缅怀遗烈之存属乃克家之善自被蕃宣之寄久参朝请之联宜从留务之繁进委临戎之重节髦并建并赋兼增金谋克谐宠数惟渥于戏干戈卫社内有宣勤夙夜之臣甲冑在躬外有奋力行伍之将尔其念晏安之怀毒知富贵之难居戒损于满而罔敢自骄荣身以谦而克保其位无忘勗励往服恩荣

封皇弟九女福安公主制 欧阳修

朕稽有国之彝章着皇女之称谓取其主以同姓所以见王体之尊必也锡之美名所以彰礼命之宠载涓吉日敷告在庭皇弟九女歧嶷之姿有生知之异稟柔顺之质得天性之自然方严保傅之规以养肃雍之德俾遵旧典褒以徽章嘉乃妙龄盛哉仪服考金言而惟允非予意之敢私于戏隆仁恩以厚亲兹惟教爱习图史而循法翳乃夙成祇若训言往膺渙渥

除皇兄允弼武康军节度使加食邑食实封制

宋 祁

朕惟一二兄弟屏翰吾家每推骨肉之爱以强本根之托矧在迺属早休厥声适及刚辰进膺异数具官允弼甚德而度参仁以和居贵而罔流心训恭而远祇悔间陪郊献佐庀宗司抑抑收仪举皆率履绰绰斯裕内无违言成予叙亲时乃修职比者虽疏王爵未厌宠名宜停后务之繁俾领元戎之制增食爱赋兼实干封于戏盘石而宗寄莫重焉扞城于国义莫先焉可壮非猷可顺非迪仍辍就藩之远姑隆绥族之恩往惟懋哉显对嘉命

除皇弟允迪安静军节度使加食邑实封制

宋 祁

朕闻立爱莫先于亲繁支实庇其本每念攸训匪伊异人用推敦序之典期光夹辅之体具官允迪承煮天祐衍庆宸筭举动严方趋古闲敏思长富贵之守澹肆朝夕之防向留使华允穆公路顷以王邸殂谢予懷悼惊念其堂构眷深桥梓维城有寄墨经还朝载隆近属之恩俾领中军之节仍增邑食且实户封于戏乃考之忠勋四邦是式乃兄之光宠十乘有仪尔偕厥荣母或兹忝钦即殊獎祇励遠猷

立皇太子制 张方平

维我祖宗继天統业积有功德克享上帝之心肆其子孙永承百世之祀朕祇纂谟烈详览古今繫崇建于元良实保安于国本上尊宗庙孝无大于奉先下庇生民教莫逾于居正式宣显册敷告万邦皇长子具官项英粹日跻中和自至仁义充涵之美言动惟时礼乐交错之华威仪可象抑畏疏封之重敏修典学之勤亦既多闻足当大受是宜诞膺徽命肇启储闈懋升明两之辉益广在三之道非余私于尔琐惟天祐于余家衍宝祚之灵长成寰区之庆赖往慎厥德以答扬我列圣之光训丕曰休哉可立为皇太子有司择日备礼册命施行

除皇兄宗諤保静军节度使制 张方平

朕惟前王懿德治古旧章必隆蕃屏之亲以穆怀柔之体矧居迹属夙着令名宜揆刚辰诞扬休命皇兄具官宗諤甚德而度参仁以和近雅不流绎如钟吕之正内明自炤莹若珪璋之温率履无违在宗有裕特推恩典之异聿示表仪之光锡尔旂旄属之瑞节时庸褒叙式昭宠嘉于戏祇畏者保身之永图恭俭者有家之长业事近効遠罔或忽诸往惟钦哉

除韩琦守司徒兼侍中鎮安武胜等军节度使制

张方平

朕光宅万邦肇新骏命正权纲之遠御审名器之大方眷予宗臣特崇异数以表图勲之重用昭报礼之隆爰揆刚辰诞扬赞册具官韩琦宣昭贤业熙亮天工光翊三朝咸有一德材周五则之用体备四时之和社稷是经文武惟宪在成功而弗处实有大以能谦荐上奏封恳辞政柄顾倚毗之厚诏谕数颁而精恳之坚辞诚难夺增宠上阶之峻特开两鎮之崇蔽自朕心事非旧典当盛辰而均逸望故里以荣归大业甚明休灵殊渥于戏臣行其志兹为自得之全君笃于恩深惜老成之去无安帅节之乐犹待衮衣之还乃情本朝遐不谓矣除吕公弼枢密使检校太傅制 张方平

本朝之制地分二府之严执政之臣共干庶邦之重文武承式兵民是图属在贤明总司使职诞敷明制敷告大廷具官吕公弼器縕纯明机灵精遠瓌材任重中广厦之栋梁推音自和合清庙之琴瑟登贰枢机之密洽闻议虑之长屡陈忧国之言多发便时之策深明王体有简朕心宜陞帝傅之崇以正本兵之任爰田增赋真食衍封名器益隆典章允穆于戏信而能用尝思明哲之难知无不为期尽臣邻之益祇若休命以赞大猷除李昭亮殿前副都指挥使宁武军节度使制

张方平

外拥节旄方鎮元戎之重内司禁卫太防上将之雄匪时英材畴若嘉命图用亲率宜扬大庭具官李昭亮诚稟忠淳风力敏给世载其德有狐赵之旧勲文定厥祥廼姜任之高姓早阶华

显允蹈中和入从法从之华出领翰垣之要属以军政契于士心训抚有方简稽元肃眷殿岩之离卫悉王旅之选锋典兹中权职在圻父特赐节旄之命爰将注意之隆峻以等威統诸环列于戏斋钺所付是为主之爪牙兰锜之严实曰予之心膺勉旃诚报茂对宠休

除曾公亮检校太尉充枢密使制 胡 宿

经遠慮微必慎制兵之術折冲消難亦資画防之臣是宪枢躔聿崇使号蓋政谟之攸寄匪耆哲而莫居适得其人誕敷厥命具官曾公亮風業碩茂志慮深純學多貫于前言性頗修于中道有方重之德可以扼躁而鎮浮有明達之材可以造几而成務當讲劝于左右亦召置于禁严博我训言代予明命用请临于襄辅遡擢典于京師咸有治功遂聞政本通明練于百物參知穆于羣言貳公之司久陪于论道内密之任宜正于筦枢仍加傳導之名更益陪敦之數崇階馭貴眞食衍封并示寵章式旌殊礼于戲典机之任莫慎乎防击柝之言蓋取于豫勿謂承平之久益思备御之深祇服斯言往踐乃位

除王德用依前检校太师同中书门下平章事兼郡牧制置使充枢密使河阳三城节度使加食

邑实封仍改赐功臣制 胡 宿

内枢之地上范于斗宮前筵之籌參寄于人杰以经常武之事是号本兵之司图冠厥名畴总予务乃眷元侯之长早崇右府之聯爰择刚辰复还旧物具官王德用志怀果烈風防沉雄通于竒正之謀居然英杰之氣春秋閱礼韞义府以惟深甲令書忠載世家而有旧比膺推轂荐歷干城先十乘以臨戎長萬夫而觀政德刑具舉威惠參施能名播于外夷沉机隱于敵國向咨俊望擢典繁机翼濟事功廸宜忠力孚乃誠而匪懈研諸慮以惟微旋均基宥之勞亟樹藩宣之治蹈險夷而一致服忠孝而兩全簡在朕心洽于朝听是用升凤池之寵秩聯虎节之榮章倚殿輔邦用陪京室属右枢之阙职咨群岳以择材金曰汝賢宜弼予治蓋天子二老出以居方伯之尊寰内諸侯入則處公卿之任抑惟曩制舉是隆名用起壯猷使纂旧服仍峻云台之号兼增井牧之封式厚耆英有加名數于戲枢机發令制戎事以惟艰樽俎折冲經人謀而匪易往慎乃位益思其忠祁國長公主進封卫國長公主制 司馬光

帝妹中行易象贊其元吉王姬下嫁召南美其肅雍命服亞正后之尊主礼用上公之貴寵光之盛誰昔【釋訓誰昔昔也】而然矧同氣之至親推異數而何愛祁國長公主席靈長之緒承濬哲之祥稟軋坤之粹和鍾日月之明潤淵懿可度柔嘉有章志女功而忘勞承師教而不倦今玉笄在首厭翟戒涂方結帨于皇家將執笄【音煩竹器】于士族宜疏沫土之邑俾适富平之孫庸展茂恩誕孚醴化于戲琴瑟靜好式昭和樂之音雷風順承是為常久之道勿以夫家之平素有亏婦德之听从祇服訓辭永綏福履

立皇后高氏制 范 鎮

天子之有后如天之与地惠养万物如日之与月临照四方苟称号之弗崇则臣民之安仰京兆郡君高氏生闕闕之后而不自矜大处富贵之习而能安素约服在藩邸宜于家室肆朕纘承嘉乃辅佐惟长乐之奉养左右不可不防惟六宫之表仪晨夕不可不肃爰正轩星之位以为国风之倡举是典册告于治朝于戏邦教所基人伦兹重涂山启夏太任兴周勤劳一时焜燿万世乃其总笄栉紵日侍慈顏衡紵纁纁时承宗祝庶几天下之俗知我门中之私

曾公亮加恩制 范 鎮

朕观前世之载考宗祀之文周汉旧章残阙无次王郑异說杂互莫同大抵奉亲以严率民以孝交神明于合漠厚风俗之本原具官曾公亮执礼蹈方刺经援古燮均大化固已治平制定多仪又皆节适四时之气其和见于豆笾九州之力其精在于玉帛使朕得昭升烈考袞对上灵诚意所通顾飨如答惟时显相宜有褒嘉峻阶品所以明等威崇衣号所以懋功实陪敦多赋流衍真封于戏大典越熙至恩胥暨惟裁成辅相以遂万物之宜惟同寅协恭以收庶工之效庸昭祝施永乂基图

除富弼枢密使制 范 鎮

兵布于天下而至众故統之有本元谋出于堂上而无穷故资之于明哲是以基于静密式畅遠猷始乎几防能成大务若时付畀兹谓剧艰前推忠协谋同德守正佐理功臣特进行礼部尚书同中书门下平章事昭文馆大学士监修国史兼译经润文使上柱国河南郡开国公富弼文武相资柔刚并适诚贯金石材隆栋梁往在先朝尝为上宰至言无隱精虑有开方国计之是毗以亲防而遽去况夫西汉而下拒唐以还讵于本朝凡厥公相率就起复以为权宜而卿固执礼经恳辞恩诏三年始事四海具瞻再炳台符之文兼崇枢极之任重陪多赋庸示褒章于戏天命甚难神器至重始初纘绍正赖经纶幸元老之聿来偕众贤而同济庶几凉德罔累庆图

兗国公主降沂国公主制 范 鎮

陈车服之等所以见王姬之尊启脂泽之封所以昭帝女之宠兹惟亲爱之攸属时乃化风之所关苟不能安谐于厥家则何以观示于流俗兗国公主生而甚惠朕所钟怜故于外家之近亲以求副车之善配而保傅无状闺门失欢历年于兹生事弗顺達于闻听深所骇惊虽然恩义之常人所难断至于赏罚之际朕安敢私宜告大庭降从下国于戏惟肃雍以成美德惟柔顺以辑令名乃其恪思庶永来福

韩琦加恩制 王安石

朕祇率旧章肇称吉礼对越天地具获灵明之歆相维公卿并膺休显之赐其孚大号以宠元勲推诚保德崇仁守正协恭赞治亮节佐运翊戴功臣淮南节度扬州管内观察处置营田等使开府仪同三司守司徒检校太师兼侍中行扬州大都府长史上柱国魏国公食邑一万三

千七百户食实封五千户韩琦躬受伟材出陪熙运保兹天子进无浮实之名正是国人退有顾言之行间朝廷之两社揉方域之万邦辰猷具臧器宝加重中辞机轴之要外即蕃屏之安行紃纁纁备三公服饰之盛囊兜防纛兼大将威仪之多序绩既崇修方弥谨协成宗祈之礼豫有显功之劳肆衍本封申加美称于戏恩典徽数所以旌帝臣明德茂功所以獎王室往惟励翼服此褒嘉

李璋加恩制 王安石

若昔大猷绍天明命必有献享之礼作民防先必有褒嘉之恩自国贵始翊卫功臣奉宁军节度使郑州管内观察处置河隄等使光禄大夫检校司空持节郑州诸军事郑州刺史大夫上柱国平原郡开国公食邑四千三百户食实封一千户李璋世载忠善躬服俭勤以后家之洪支为帝室之隆栋入总营卫则兵师无哗出乘蕃维则吏属不怠近付京都之籥外更方鎮之旄贡职惟修祀仪获考进加功号申衍邑封以畴服采之勤以协劝劳之典于戏富贵有危溢之可戒禄位匪侈骄之与期图惟庆誉之终尚协龙光之施

皇伯祖威德军节度使荣国公承亮加恩制

王安石

朕裸献庙堂燎禋郊丘内防祖考之居歆外获神祇之顾飨嘉我近属与有陪辅之劳扬于在庭使膺褒显之福具官承亮德义自表爵齿兼尊魁然萧艾之材尚矣神灵之胄世承厥庆有跼蓐之芬华朝赖以宁若翰藩之严密乃相肆祀实绥思成进加奠食之封申赐诏功之号于戏孝恭可以仪宗室信厚可以化邦人匪时亲贤孰朕承翼往肩宠獎尚协荣怀

李日尊加恩制 王安石

朕绍膺骏命稽用上仪祇事郊宫并受三神之福推恩方夏外交四表之欢告于有司锡是在服推诚保节同德守正顺化翊戴功臣靖海军节度观察处置等使同中书门下平章事李日尊躬懷德善世济忠勤奠兹南邦居有扞城之效卫我中国使无疆场之虞赐之大将之旄胙之眞王之爵往踐厥位知欣戴于宠章来献其琛用协成于熙事陪敦采邑褒进文阶载加眞食之封式允懋功之典于戏人之所助惟怙冒于王灵国以永存顾循守于侯度率时新命保乃旧邦

宋文鉴卷三十四

卷三十五

钦定四库全书

宋文鉴卷三十五

宋吕祖谦编

制

除韩琦依前同中书门下平章事进封仪国公加

食邑实封制王珪

朕按奉高之仪思承上帝之福咏我将之什知配文王之功谏辰季秋之良尽志孝飨之事应一郊之定卜躬三岁之宗祈于时陈物采于国中接神明于堂上璧玉温洁粢盛令芳灵光烛于大庭休气防于重宇畴相丕祀于显元臣肆膺拜胙之厘首布告廷之命具官韩琦命世发德佐王矢谋财万化于物宜熙百工于帝载已任沈机之断力陈遽驭之图若岁为霖可以济天下之旱如易占防可以判天下之疑责大而智愈深事昭而情犹勉廼先庾之诏靡物备而不严维日昔之文或礼阙而不讲使朕得褒六天之对歟七庙之灵辑于昭旷之仪顾匪烈文之辅兹庸锡之名壤建尔上公寢广奉田之腴复敦真食之赋汝为汝听汝劳汝嘉于戏在福不敢康蓋天有难忱之命于德如弗及蓋民无常懷之心虽朝廷之甚休益君臣之相勅宜兴盛治允答灵歆除韩琦门下侍郎兼兵部尚书依前同中书门下平章事进封卫国公加食邑实封制

王珪

王者绍景炎之序履皇极之尊永惟置器之艰属在佐王之略夫上宰翼我先朝适及委裘之辰肆于奉瑁之始定策宗社贯心神明逮躬丕务之咨敢后元勲之将首莠邦涣诞告朝伦具官韩琦器博而适时道闳而济物稟星辰之精粹防日月之休明厯宣外劳更倚二柄蹈夷险之一节寄安危之大机仰文考之知贤絶时髦而登用维召公之托尝闻顾命之贤维汉相之谋终应大横之兆蓋懷先见者识之邃决至虑者材之英天扶不防之基神赞非常之辅是用进文昌之卿序正黄闕之台符隆以封爵之文益之户田之数以蕃尔宠以懋尔庸于戏天视靡私居飭有邦之畏民公曷戴一归厥后之仁念先猷之弗敢康頼成集之丕可恃益经茂烈永佐昌图

除曾公亮门下侍郎兼吏部尚书依前同中书门下平章事进封英国公加食邑实封功臣制

王珪

大火基宋实开五圣之符六龙乘干遂继中天之运乃 近弼荐更三朝元勲冠于百僚利泽施于万世载蠲谷旦敢告治廷具官曾公亮学通天地之微谋合圣贤之举包刚柔于九德固夷险之一心蚤膺皇祖之求爰履公台之位有臯防之论能变尧民于时雍有丙魏之声不改汉家之故事肆我文考遗予冲人咨顾命之老臣辅初政于天下重宣至策终仰丕成进首中台之班往颺东省之务既疏荣于公社益躋数于爰田功之所加宠不敢后于戏恐德弗类念高宗之未言俾民不迷繄尹氏之素力共祇天监永协邦休

除文彦博枢密使赐功臣制 王珪

天极环枢上通帝位之纪神兵防府内严师律之谋朕方垂讲丕平进经常武虽天下无事思备御之不敢忘盖王者有征视安危之不敢忽适登髦杰资以辅予具官文彦博器閎而深材敏以济早贲贤人之业实膺圣考之知以忠孝之名形家国之盛节以文武之略辑将相之大猷肆纂命于皇图迺离忧于防纪迨终哀戚甫见仪刑属疆事之方兴烦师旄之载举折冲境外方将出憺于王灵收画幄中曷若坐图于庙胜宜长机廷之务亶符岩石之瞻于戏过餌北戎未厌贪骄之志再盟西夏犹苞狂忽之图终伫奇勲用恢逮驭

除文彦博守司空依前枢密使加食邑实封制

王珪

朕若稽先王维御羣品左谋金铉之老以经治于庙堂右属鸿枢之良以定策于帷幄厥有成绩可勿褒乎具官文彦博风力肃明器资恢杰临至剧有转圜之易定大谋如执玉之坚逮事神文之朝已缉熙于鼎路追言圣考之遇又密勿于机廷肆凉昧之丕承防精神于羣虑虽兵民之异本亦文武之交修未隆赞册之恩曷懋图庸之举其保宏父允厘华阳顾岂明分之私终繄老成之助于戏有若闕天尚廸文王之彝罔俾阿衡以专商家之美往笃尔烈永承于休

除富弼依前同中书门下平章事充武宁军节度使判河南府兼西京留守司事仍赐功臣制

王珪

三台处中以裁万物之化四岳总外以牧黎民之蕃如山河之经九州如股肱之卫一体出处之际朕无间然具官富弼复贯有元蹈中弗勉学几圣而独至识造物之未形贵名起于三朝盛德仪于百辟乡召从于列屏俾进翊于冢司为日尚新何恙靡已未及经邦之务遽陈避位之辞诏虽屡而莫回章甫郤而复至朕恍然自念嗟莫能胜既闵劳于政几其听遂于私佚建彼徐节以殿东郊守兹洛符以保西宅仍位鸿钧之贵尚优黄髮之行于戏不处成功专老氏荣名之畏其旋元吉要羲经履道之终虽弗从于吾游亦自保于而福

除陈升之礼部尚书同中书门下平章事集贤殿

大学士加食邑实封制 王 珪

色齐三阶则风雨不失其序圣如二帝然股肱亦繫其人朕上抚干纬之明下慎国钧之寄方
审求于贤辅俾参穆于政途若时登庸蓋出定命具官陈升之识几圣蕴谋合皇猷学积于原
而心弥充智酬于变而力弥裕早膺仁祖之擢以遗文考之知肆予冲人克即大任问甲兵则
有能抚四夷之略问衣食则有运理羣物之心朕方稽百里之谟经一世之绩宜进躋于贤序
以延登于宰廷夫知厯选之既臈体委用之寄重则义莫得以爱已道惟专于泽民岂特无疆
之休亦有无穷之问于戏论金谷之计其归内史之司作霖雨之滋是应高宗之命往熙帝载
庸代天工

除程戡安武军节度使加食邑实封再判延州制

王 珪

周礼命卿司马掌国征之事汉仪遣帅将军颡阃制之权自非谋经帷幄之咨名厌疆垂之难
则何以稽图而受社赐律以临戎兹畴旧政之良式协师虞之望具官程戡体忠忱之度蹈夷
雅之风进擢艺文之华仕阶名秩之膴方先朝之吁峻更三府之告猷左右六年夙夜一节肆
纂休于皇绪适留寄于边冲空深寤寐之思且重安危之倚上金城之方略犹知充国之彊习
阙里之弦歌还见祭遵之佚就付两河之节荐绥西土之封既衍食于爰田复倍输于眞户风
声虽旧宠数维新于戏制夷狄者备不可遽忘守方隅者势不可数易蓋威素申则敌情懋信
久着则士心懷尚坚壮图往服渥命除曹侂保平军节度使加食邑实封制

王 珪

朕承景厯之昌嗣丕基之重渙敷大命胥泽羣元咨我方岳之良时维屏翰之宪念宣劳于剧
娄稽渙獎于陟文卜以刚辰告于列序具官曹侂体冲韵邃气劲谋沉传圯上之神书托西京
之肺腑显允祖烈实为宗臣于皇母仪克后先帝济忠纯于奕世履谦劫而保躬鬯共武之威
迺践元戎之贵助守文之德式繫外戚之贤进导徽猷参聯台路肆纘膺于圣统方倚辅于英
藩载疏冢社之荣增视上公之峻隆阶表贵衍食敦封萃为宠休以睦婣近于戏诏爵禄之柄
天官以驭夫羣臣锡车马之仪大雅以褒夫元舅蓋绩美则报之厚爱隆则礼亦蕃往懋淑声
永绥多福

除李璋殿前副都指挥使武康军节度使制

王 珪

羽林神兵北环天卫之象黄帝李法中严邦律之师国家鬯武节于四遐提禁屯于千列进总

凝严之防厯图劲杰之资稽众得人告廷孚命具官李璋气沈而果事性裕而知方厉许国之单忠達治兵之善志绪服高华之望名推亲信之良朕念长乐之慈愴不及养顾渭阳之族闻蓋多贤自擢领于戎昭已积迂于留寄属岩除之缺帅宜斋钺之命才六纛启途既袭重侯之贵万兵留帐方资缓带之安虽其素劳不曰异宠于戏执干戈则有社稷之卫常慎于假人听鼓鼙则有将帅之思实深于注意维蹈忠义者急于报主蓋喜功名者要之逢时勉规壮图尚率明训

除郝质殿前都指挥使安武军节度使加勲食邑

实封制 王 珪

国家統御之势大维持之业隆外倚四岩藩翰之臣中谋万夫貔虎之帅故奉委裘而羣情固闻受瑁而三灵趋肇临发政之辰首下放朝之命具位郝质性资庄厚气略沉雄通玉帐之善经体金行之正气自昔先帝知为劲臣因其勤旧之名立在亲信之地防綴衣之陈牖提卫甲之环宫曾无夜鬻之晔自得刚牙之重绍帝符于景祚涣邦号于前彝视秩冠于文昌徙节临乎安武加以总正使范敦封井旌岩陞之劳以表师干之宠于戏天之壁奎象在羽林王之爪牙职于圻父蓋地严则必资拱扈之力帅众则犹赖训齐之方往坚壮图思答殊遇

除皇伯祖承亮检校工部尚书荣国公感德军节

度使加食邑实封制 王 珪

蓋闻周典建土遂膺年厯之长秦失罢侯靡复藩维之援此国家所以监用往制封崇茂姻以夹辅于王家以怀柔于天下肆膺皇绪涣举不彝皇伯祖具官承亮躬耆德之英被忠训之厚曾无车服珍宝之玩固有诗书道术之明稽帝尧之仁畴先骨肉之爱愿秦悼之后不减祖宗之蕃自居留务之荣浸广皇支之誉按戊午之新泽合南阳之近亲华鄂承跼旌乐和于列邸犬牙交壤寄雄峻于师旄既行爰田之封又陪眞食之入助建大統图繫老成于戏积厚者流长虽本神明之祚德隆者爵重况如宗族之贤均履多样勉钦渥命

贤妃苗氏进封德妃制 王 珪

帝居六宫之制率辅于皇猷天极四星之华实裨于壶事朕嗣膺邦統思穆人伦褒临妃掖之英化始宸闈之顺命龟荐日班綍布朝贤妃苗氏性资惠明仪度闲肃居路箴图之戒动循珩佩之肅八月良家早被后庭之选平阳别馆爰开贵主之祥而能进遠骄华举思谦畏褕衣奉祀上以赞于后勤彤史流徽下以仪于嫔则庸赍德言之茂益隆位序之崇名以副劳议非能典于戏坐而论妇之礼盖视三公之尊内有进贤之心始安君子之佐维正道然后式于外顾私谒不可黷于中往服训辞永绥宠命

皇长女德宁公主进封徐国公主制

王珪

周美王姬之华下王后之一防汉推帝女之宠主同姓之诸公故至爱形而九族欢内则正而四海顺乃睠公宫之懿适从世阅之逮宜合丕彝用孚群德皇长女德宁公主僊支袭庆邦媛流徽钟天性之深慈躬女图之茂矩幼而勤组紃之习亦既饬妇事之修长则有室家之归将以经人伦之始维衿鞶之有命维车马之有行卜仲冬之嘉辰祉大易之元吉琼华在着已戒齐风之漓粉水疏园莫如徐国之乐侈燕谋于皇裔充美化于民间显锡徽章大旌柔度于戏前揽唐家之制盥馈不可以阙供近稽仁庙之抚冠服仍从于少损葢肃雍者贤之检俭约者古之师其体至懷自膺长誉

除富弼尚书左仆射充观文殿大学士集禧观使

制 吕公着

圣王赋禄所以崇德而劝劳贤者辞隆所以激贪而厉俗眷我外相维时宗工愿还重绂之荣葢露累章之请既重违于悃悞宜特示于褒优载揆刚辰式敷涣号推诚德保崇仁忠亮佐运翊戴功臣武宁军节度徐州管内观察处置等使开府仪同三司检校太师同中书门下平章事行徐州大都督府长史上柱国郑国公富弼体资忠亮识蕴渊阔炳岳渎之粹灵挺陈薨之厚器光辅仁祖蔚为文武之师迨事先皇实总机衡之要引疾遽辞于大柄均劳式殿于近邦未移岩石之瞻并及洪河之润肆予纉绍尤渴仪刑虽体力之未平顾风猷之克壮而乃过持冲守深逊宠名谕言已周诚意弥确朕惟安危所寄虽赖老成之人损益有规宜伸大雅之志俾进班于左揆听复节于中台仍总领于殊庭竚论思于秘殿用彰宠数葢示眷懷于戏进止不胶共扶于名义幽明有相终畀于寿臧风于四方时汝之德

除富弼依前尚书左仆射兼门下侍郎同中书门下平章事昭文馆大学士兼译经润文使郑国

公制 郑獬

秉策膺图将继配天之大业铨时论道必资名世之元臣以言乎体貌则旧德之英以言乎望实则羣材之表爰立作相宜莫如公丕昭宠数之殊孚告治朝之听具官富弼智资大雅德懋硕肤学足以造圣人之微几足以通天下之变繇贤科之得隽摠遠业以奏功在仁祖时则首冠庙堂有弼谐九德之美在英考世则再登枢府有折冲万里之谋庶绩已熙太平将洽属留侯之多病容裴度以为藩愷悌所宜神明自复方王家之不造固贤者之有为昔居畎畝而志犹在于爱君今处朝廷而义岂忘于忧国是用召从方守进拜元台仍左揆之旧班兼东台之茂秩爰田衍赋盟府易勲兹实异恩庸昭注意于戏上理乎天工则日月星辰以之顺下遂乎物宜则山川草木以之蕃近则诸夏仰德以承流遠则四夷倾风以待命凡予欲治惟尔责成勉尽嘉猷用光丕训

邢氏进号贤妃制 孙洙

王宫六寝崇建妇官天极四星垂着妃象所以协宣陰教助穆宸闱矧视秩于上公必敷求于淑哲朕厉精于治选纳尤希嫔嫞靡充位号多阙兹延登于邦媛用播告于路朝婉仪邢氏德称后庭体合法相居念保阿之训动循环佩之音授弓矢于媒祠占熊罴于吉梦是宜详按旧典升备列妃进参榆狄之华益昭彤管之炜坐论妇礼正始国风品冠六仪名超九御于戏周南之咏卷耳无险诐私谒之心齐诗之美鸡鸣有警戒相成之道宠灵烜赫礼秩优隆匪时婉孌之良畴若褒嘉之命佐后内治尔尚勉哉

陈升之起复同中书门下平章事集贤殿大学士

制 元绛

闵子经而服政先贤称得事君之宜晋侯墨而临戎前志谓達变礼之用矧予丞弼奄邁闵難久虚席以思贤宜敷朝而涣号具官陈升之蕴浑厚之量挺高明之材体备四气之至和智通万方之遠略发紓一德感会三朝经武斗枢之庭则王灵震叠贊元鼎铉之府则邦治协宁端正百度之原章明九叙之极向钟家疚越解政均稽之师言厥有前宪相为夺服其惟诏使之从赵喜离忧未始宰司之去盍来复召台路以大熙于天工于戏继恩从权自昔弗逾于国制移孝扶义维时尚义于王家勉一廛心无替朕命

除皇弟顒保信保静军节度使进封嘉王制

元绛

史谓建大宗之封如安盘石之固诗美得同气之助若敷常棣之华朕绍五圣之休昭九族之序固已倚天属于本根之重措公姓于翰干之疆况于至亲宜有显册播告羣位厥维大公共官顒燕翼发祥温恭廸哲英姿茂而玉裕盛气粹而阳休讲艺服儒多推道术之对好礼乐善雅有智思之文向稽立爱之经屡衍建侯之宠有华上公之袞有俶元戎之旂贤仪寢明师论参穆是用端防以审繇按图而定名表为眞王奄受乐国画岷峨之野陪以爰田易肥渙之麾加之两组循典常而出閣谨着定以奉朝列第环宫弥耸开元之观侧门通禁永承长乐之顔备飭爱怀布章庆誉于戏展亲以诚信我则友于天伦秉德以辅陪尔则蕃于王室思长富贵之守懋底忠孝之成往其钦哉以对猷训

除韩琦京兆尹再任判大名府制 元绛

分陝称伯召南当公职之尊启魏就封毕万得国名之大况吾元老为世宗臣久倚师垣之严宜迁尹节之宠飭宣典策勇告缙绅具官韩琦道醇而深器遠而博浑浑忠孝之业宪宪文武之姿感通仁朝亮众采于台极翼戴英考捧大明于天衢肆朕纘图厥初谋落燮谐四气之序熙辑百官之成登昭公槐奄蒞国社镇定大事妥如九鼎之安承宁诸侯端若元龟之信岁勤

再阅师律既和重念郊圻之雄旁据河山之险徒得君重以宣王灵就更西雍之旄留主北门之钥载敦爰赋并实干封于戏汉咨陈平安危注于上意唐用裴度轻重繫乎厥身维廼纯诚无愧前烈懋服休命往其钦哉

除韩绛观文殿大学士知许州制 元 绛

国家登延弼疑内以起功于庶事图畀藩翰外以发政于四方闵劳申恩倚重均体肆勇丕号庸谡广朝具官韩绛躬庄厚之姿函忠忱之度济世美以特立告辰猷而具臧屡陪国均实辅台德向自保厘之寄再膺翼亮之姿高平师师总修众职之果公孙斤斤参听百官之成久宣于勤间愬以疾确辞几务之剧祈即燕申之休感于朕聪姑徇尔欲宜还宰轂往建州麾陟春官常伯之尊兼禁殿隆儒之冠载更切号增衍并封于戏乃眷臣邻虽尔身之在外不忘寿考岂兹心之谓遐其服宠章以将福履

除燕逵武康军节度使充殿前副都指挥使勲封

如故制 李清臣

析父之官司王介士上将之任为国虎臣予得智勇之材俾共左右之位诞敷休命播告大廷具位燕逵防迹戎行厉躬武节深明分数之守兼识变通之权捍外侮于西陲佐濯征于南服尝鼓儻赳阨以奋率烝徒能降城艾旗以荡定逋寇夙付简稽之籍进督号噉之军人知训齐众不哗敕是严师律拥扈殿岩越从廉车遂总斋钺于戏惟威爰足以临下惟忠义可以报君勤懋乃心钦廸朕意

宋文鉴卷三十五

卷三十六

钦定四库全书

宋文鉴卷三十六

宋吕祖谦编

制

除皇伯宗晖依前检校右散骑常侍充淮康军节度使特封濮国公加食邑今实封余如故制

邓润甫

御侮尚亲先王未之或改折冲授钺天下所以久安眷惟尊属之贤蚤有皇支之誉其敷褒律以告治庭皇伯邕州管内观察使金紫光禄大夫检校右散骑常侍持节邕州诸军事邕州刺史兼御史大夫上柱国天水郡开国公宗晖器宇闳深履尚方重诗书自乐慕汉邸宗英之闻孝友夙成有濮园天性之爱爵隆而无骄贵之累禄富而懷约已之风陞拜廉车之崇益增公族之重是用畴庸躋等辨域展图付名部之整军奉贤王之明祀维袞及綉视上公之仪锡山与田壮元戎之寄兼陪真赋庸示宠章于戏亲亲主恩非异数无以昭其意继继在德惟驯嗣可以孚于休更恢遠猷以称茂渥

立皇太子制 邓润甫

建储非以私亲盖明万世之统主器莫若长子兹本百王之谋朕荷天地之贶临席祖宗之诒燕迺睠上嗣之贵蚤应前星之祥宜告大廷诞扬丕号皇子彰武军节度使延州管内观察处置等使检校太尉开府仪同三司持节都督延州诸军事延州刺史上柱国延安郡王煦温文日就睿智夙成回驰道之车能止班轮之骛辨南阳之牒允符东海之休自疏锡于王封益光华于德望胜衣视膳溢然孝友之姿好礼受经不烦师傅之诲是用厯盛阳之嘉日举列圣之大章肇正青宫肆攷显册以协离明之吉以系天下之心于戏立爱始亲商以成千歲之业建嗣必子汉以抚四海之民斯为永图往膺徽典

封荆王顓太傅武宁镇海节度使制

邓润甫

朕罹国大忧绍天明命黄陵玉座永怀复土之深清庙朱紘序陟宁神之礼哀恫罔极感慕从中念宗藩尊属之贤有文考同生之爱图功甚茂送往良勤敷告大廷肆攷贊册皇叔武昌武

安等军节度鄂州潭州管内观察处置等使守太保开府仪同三司持节都督鄂州潭州诸军事鄂州潭州刺史上柱国荆王赐賛拜不名顔身端而行治识遠而量夷地则茂亲时惟明德翼戴王室雅有二南之风表仪宗枝独包两猷之学协防庙社乃心朝廷昨朕承祧畴劳锡命属緝裕陵之礼遠护灵驾之行事有感懷义当褒异是用进以官班之等宠之帝傳之崇出节徐郊建麾青社以应采菽来朝之赐以慰棠棣孔懷之情于戏诗美大宗是为四国之翰礼尊叔父固曰一人之嘉徃服宠光益膺福祉

除皇弟僖武成军节度使祁国公制

邓润甫

朕奉承燕谋获绍大统永怀先烈曷胜哀疚之情眷顾同生宜厚褒封之典孚我明命扬于治廷皇弟僖岐嶷得于自然温文见于异稟挟天材之美质应帝武之嘉祥未临射矢之辰遽起号弓之慕逾年于此锡壤惟时矧周人尚亲尤重本支之务汉廷左戚亦隆襁褓之封规裁半楚之疆载彻滨河之域苴茅制社授钺殿邦用建上公尹兹北国策勲加等衍邑实租于戏西望裕陵敢忘幼子之爱东朝长信进预诸孙之游徃服恩辉益延寿祉

除司马光左仆射制 邓润甫

帅羣臣宿道而向方在慎取相佐王者修政而美国莫若求人顾惟眇躬获嗣大统储思业业不敢忘六圣之休注意贤贤将以总万方之检褒进上宰敷告外庭正议大夫守门下侍郎司马光受材高明履道醇固智足以任天下之重学足以知先王之言逮事厚陵徧仪侍从之列被遇文考擢总枢机之繁有大臣特立之风蹈君子难进之节方予访落之始起应秉均之求调娱万几必先教化之意辨察百职不失礼义之中是用谏诤金言褒加异数越陞左揆之路兼峻东台之班申衍爰田陪敦真食于戏上寅亮于天心则陰阳风雨以之顺下遂字乎物理则山川草木以之宁内阜安于兆民外镇抚于四裔盖辅相者为之基杖而老成者重于典刑勉行所闻以底极治

除文彦博平章军国重事制 邓润甫

师傅道之教训先王所以迪厥官老成重以典刑天下所以资其智乃睠旧德时谓元勲谋合祖宗之心名载鼎彝之器申攷賛防播告外朝河东节度管内观察处置等使守太师开府仪同三司太原尹致仕上柱国潞国公文彦博惇大而清明方严而信厚出则秉乎旄钺入则总我钧衡文武兼备其才夷险能致其力毕公之弼四世三纪于兹傳說之总百官万邦其义爵隆无富溢之累名遂有身退之荣神明相其寿康人心想其风采是用还之论道倚以经邦以帝者之师臣谋议庙堂之上以天下之大老制驭夷狄之情庶几有为底于极治陪敦多井申衍真封于戏吕望惟贤起佐文王之治周公已老留为孺子之师矧我耆英无愧前哲徃宣一德用格多盘

除吕公着右仆射制 邓润甫

国莫难于置相君莫重于知人尧舜之隆盖以畴咨而熙载商周之盛至以梦卜而求贤天降割于我家予未堪于多难思用耆德交秉政钧其敷宠章以诏羣辟金紫光禄大夫门下侍郎上柱国东平郡开国公吕公着行应仪表学通本原忠义得于天资功名自其世美被遇先帝尝入賛于枢庭暨予冲人遂同寅于政路传经意以谋国体推上泽以纾民心叙收隳贤补苴法度方重不倚雅有大臣之风调娱适中遂通当时之务是用陞之右揆委以繁机申衍爰田陪敦真赋尔则代天而理物予则羞焉以惟君于戏丞相之位未尝无其人儒者之效久不白于世孟轲言无有者数百歳扬雄称自得者二三臣盖迪逺业者其功难循近迹者其力易勉行所学以底丕平

除吕公着守司空同平章军国事制

苏轼

仁莫大于求旧智莫良于用众既得天下之大老彼将安归以至国人皆曰贤夫然后用今朕一举仁智在焉宜告治朝以孚大号金紫光禄大夫守尚书右仆射兼中书侍郎上柱国东平郡开国公吕公着訏谟经逺精识造防非尧舜不谈昔闻其语以社稷为悦今见其心三年有成百揆时叙维乃烈考相于昭陵盖清静以宁民亦劳谦而得士凡我仪刑之老多其宾客之余在武丁时虽莫追于前列作召公考固无易于象贤而乃屡贡封章力求退避朕重失此三益之友而闵劳以万几之烦是用迁平土之司释文昌之任母废议论时游庙堂于戏大事虽咨于房乔非如晦莫能果断重德无逾于郭令而裴度亦寄安危罔俾斯人专美唐世

除吕大防太中大夫守尚书左仆射兼门下侍郎

制 苏轼

朕闻天子有道其德不可得而名辅相有德其才不可得而见故汉之文景纪无可书之事唐之房杜传无可载之勲当时安荣后世称颂予欲清心而省事不求智名与勇功天维显思将啓承平之运民亦劳止愿闻休息之期眷予元臣咸有一德咨尔百辟明听朕言中大夫守中书侍郎上柱国汲郡开国公赐紫金鱼袋吕大防造道淳深受才 毅果艺以达有孔门三子之风直大而方得坤爻六二之动久践右闕蔚为名臣宜陞左辅之崇兼综东台之务加赋进秩宠数益隆得位与时忧责弥重于戏若古有训无竞维人崔公建中之风以除吏八百而致裴垍元和之政以荐士三十而能惟公乃心何逺之有

除范纯仁太中大夫守尚书右仆射兼中书侍郎

制 苏轼

朕惟朝廷之盛衰常以辅相为轻重若根本彊固则精神折冲故薦吕臣奉已而不在民则晋文无复忧色汲长孺直谏而守死节则淮南为之寝谋朕思得其人付之以政使天下闻风而心服则人主无为而日尊咨尔在廷咸听朕命中大夫同知枢密院事上柱国高平县开国伯赐紫金鱼袋范纯仁器遠任重才周识明进如孟子之敬王退若萧生之忧国朕览观仁祖之遗迹永怀庆厯之元臣强谏不忘喜臧孙之有后戎公是似命召虎以来宣虽兵政之与闻疑遠猷之未究坐论西省进贰文昌增秩益封兼隆异数于戏时难得而易失民难安而易危予欲守在四夷以汝为偃兵之姚宋予欲藏于百姓以汝为息民之萧曹勉思古人以称朕意除苗授武泰州军节度使充殿前副都指挥使制

苏轼

出总元戎作先声于士气入为环尹寓军政于国容将伸阃外之威以迪师中之吉咨于尔众朕得其人侍卫亲军步军副都指挥使威武军节度观察留后持节福州军州事福州刺史上柱国济南郡开国公苗授早以异材见称武畧被服忠义有烈丈夫之风砥砺廉隅得士君子之槩荐扬边圉益着劳能拔自众人既防先帝之遇遂拜大将无复一军之惊祇扈殿岩肃将斋钺予欲少长有礼而兵可用汝其夙夜在公而令必行于戏爰克厥威罔功兹为深戒师众以顺为武古有成言惟懋乃衷毋忘朕训

除皇伯祖宗晟特起复制 苏轼

曾闵之哀丧不貳事汉唐之旧礼有夺情矧予藩屏之亲实兼臣子之重虽闺门以恩掩义而公侯以国为家伯臣司宗职不可旷要经服事古有成言非予尔私其听朕命皇伯祖彰化军节度泾州管内观察处置等使检校司空开府仪同三司持节泾州诸军事泾州刺史判大宗正事上柱国高密郡王宗晟天资纯茂德履方严袭余庆于祖宗蹈格言于师保典司属籍克有令名郢客卒业于浮丘辟疆受知于先帝允厘厥位无愧昔人属此闵凶累然毁瘠嗟日月之逾迈重职业之久虚宜复宠名式从权制于戏出居官次非王事不谈退适倚庐读丧祭之礼则忠孝两得人无间言功名益隆亲有显誉勉服朕训光昭前闻

西蕃邈川首领阿里骨加食邑制 苏颂

祭有十伦之义施爵赏以为先福者百顺之名本忠孝之自出朕祇祓阳馆崇严祢宫配神穹昊之尊流泽幅员之广嘉与卿士同兹庆休便蕃优渥之恩固无内外之异告于朝采布乃言纶西蕃邈川首领河西军节度凉州管内观察处置押蕃落等使金紫光禄大夫检校太保持节凉州诸军事凉州刺史上柱国宁塞郡国公阿里骨生有轶材少负伟畧稟天地之义气得秦豳之遗风奠塞外之封疆继承列土拥河西之旄钺坐护诸羌长雄一方作我西屏属九筵之讲礼盛四海之骏奔来献其琛实相予祀是用加命王公之数视秩帝傅之崇增井赋于爰田广国租于真食于戏尔有时享歲贡之恪史不絕书我有俊神观政之方惠必及下既均承于纯嘏宜益厉于忠规往服训言克享天祿

刘昌祚加恩制 苏辙

朕因路寝之正举合宫之祠礼乐法商周之隆车服兼汉唐之盛出欵原庙还享上穹职贡充庭工师履位兵卫如植旌旆不烦实惟有人以克成礼殿前副都指挥使武康军节度洋州管内观察处置等使持节洋州诸军事洋州刺史上柱国彭城郡开国侯刘昌祚天姿鸷勇惟本忠良结发征羌号马上之飞将授钺临塞皆關中之要区方西鄙之须材防中军之谋帅畀之旄节之重付之貔虎之师归阅浹旬旋闻辑睦逮此熙成之庆赖其宿卫之勤既增封爵之崇仍加真食之厚于戏古之明主立赏以待有功古之贤将有功而耻自列服予霈泽之异勉尔勲名之思贵当益恭老当益壮

除文彦博太师河东节度使致仕制

苏辙

周公未尝之鲁老亦居丰留侯晚虽彊飡终不任事盖委寄之重初无间然而止足之风所不敢废惟我耆旧厯事祖宗纘服之初复命以位虽师保之地优佚不烦而丘樊之心朝夕以请布告在位俾闻高风太师平章军国重事上柱国潞国公文彦博克孝而忠允文且武其在师旅有方召之勲其在朝廷有崇璟之业士民视其去就夷狄震其威名时更四朝躬蹈一节先皇帝愍劳以事既许其归越予访落之年凜有涉渊之志起之既老待以仰成出入五年终始全德进而论道日闻典训之言倚以折冲卒靖边防之警委成功而不处指莫景以求安动请屡闻诚心莫夺顾瞻闾井近在洛师郭氏有永巷之严裴公有绿野之胜岂以簪纓之累久致形气之劳贵极上公既无复加之爵秩分领全晋仍畀久还之节旄增广旧封益衍真食殫尽人臣之宠归从父老之游于戏音声不遐尚有就问之礼几杖以俟复期亲祀之陪勿以进退之殊而废谟猷之告式燕且誉俾寿而康

文彦博司徒判河南制 曾布

秉国大均絕席庙堂之上经时常武运筹樽俎之间维吾老成多所更践恳辞几务往殿近藩敷告于廷进畴厥位推忠协谋崇仁同德经邦賛治守正保运亮节佐理功臣枢密使劔南西川节度管内观察使处置防道等使开府仪同三司守司空检校太师兼侍中兼郡牧制置使行成都尹上柱国潞国公文彦博器质宏伟智谟靖深逮事祖宗蚤登丞弼周旋左右当四海之具瞻密勿枢机实万邦之为宪肆予纘御属在倚毗深惟注意之勤勉徇均劳之请眷言耆旧宜所褒崇增秩上公衍封真赋光华故里揭全晋之旌旄偃息名城壮陪京之屏翰出入中外始终显荣于戏进而论道经邦则必告嘉猷子后退而承流宣化则必下膏泽于民惟往钦哉尚多受祉

除范纯仁观文殿大学士知颍昌府制

曾布

谋谟庙堂入则股肱于大政偃息藩翰出则师帅于一方维时宗工引疾辞位均逸近辅敷告大庭通议大夫守尚书左仆射兼中书侍郎上柱国广平郡开国公范纯仁端良稟于世资乐易成于天性有砥名厉行之志有面折廷争之风越自累朝寢更华选暨冲人之嗣服适文母之仰成咨于臣邻付以宥密一践枢要再持国均朕恭已绍庭向明图治缉熙绪业追邇先猷分有望于弼谐遽固辞于机务重违尔志姑即厥安增视秩之荣名进陪封之宠数式隆体貌何吝眷私于戏论道经邦常在倚毗之地承流宣化勿忘励翼之心祇服朕言往共尔位

立皇后孟氏制 梁 焘

正家者义之先天下从而定矣大昏者礼之本圣王所以重焉朕继体持盈侧身思永方切基图之固敢娱宫室之安太母以万世为心命防宗事之重大臣以两极陈义请建坤仪之尊谓王道之大所由兴故人伦之始不可缓明扬德闕之懿简在慈闈之公钦承温诏之音俾正中宫之位载蠲吉日敷告大庭故侍卫亲军马军都虞候眉州防御使赠太尉孟元孙女忠孝令门善庆奕世幽门专静蔼闻和声婉睦惠慈雅应柔则天作之合文定厥祥人谋协从龟告并吉是宜入听内则辅宣外和式瞻祔瞿之章上直轩龙之象嘉典大备并行今古之情文盛德有开增美国家之治理于戏惟恭俭为富贵之守惟忧勤为康乐之资如关雎之进贤则可以基风化之成如樛木之逮下则可以将福履之盛用久乃济匪初其难勉尔钦修以法三宫之端一相予显祀以崇七庙之清明垂光紫庭袭誉彤管可立为皇后

徐王改封冀王制 范祖禹

周尊公旦倚为四辅之师汉重王苍位处三公之上及我仁祖加礼荆王顾惟冲人敢后叔父诞敷明命播告治廷皇叔永兴凤翔等军节度管内观察处置等使守太尉开府仪同三司雍州牧兼凤翔牧上柱国徐王赐诏书不名显稟训英皇同气神考仁义根于天性孝友冠于人伦昔在先朝蚤膺异数迨宣后九年之政无爱子一毫之私追维崇庆之功罔极昊天之报方毕太宫之祔飨莫先尊属之褒嘉是用登拜师垣仍聯使节彻彼徐土受兹冀方内獎皇家外绥侯服进陪多赋衍食真封于戏并建亲贤实为社稷之卫益彊藩屏用承祖考之休往膺典册之光永介寿祺之祉式昭令德无愧前人

除向宗良检校司空充醴泉观使昭信军节度使

制 曾 肇

昔周盛世则有申伯之良翰在汉懿亲则有少君之长者眷吾仲舅蚤着贤称登进宠名诞敷诏号休泉观使秦国军节度明州管内观察处置等使持节明州诸军事明州刺史上护军河内郡开国公向宗良席庆深厚秉德粹温富贵无自满之心恭孝有夙成之质肆朕承祧之始首膺授钺之荣兹属东朝亟还大政念崇德报功之谊将锡异恩守右贤左戚之规莫回慈防换节濒江之地参华空土之名增衍户租并申朕志于戏维我太母有劳皇家方其艰虞则出任社稷之重及底康靖则还就宫闈之安动静必惟其时进退靡失其正而犹鉴观前载深抑

外亲尔其念长乐之好谦思文简之垂裕益坚素履永保令名

除皇弟似守太保依前开府仪同三司蔡王充保

平镇安等军节度使制 曾 肇

朕惟本朝之制厚公族之恩列第京师不忍使之去国兼荣将相未尝责以治民岂惟致敦叙之仁抑亦隆夹辅之势矧吾宠弟实位真王念方属于妙龄将即安于外邸虽云密迩能不疚懷肆举徽章用孚众听皇弟武昌武成等军节度鄂州滑州管内观察处置等使守司徒开府仪同三司持节都督鄂州滑州诸军事鄂州滑州刺史上柱国蔡王似出神明之胄钟祿祝之祥气稟温良生知逊悌雅爱图书之习夙坚忠孝之诚桐叶疏封已侈盘维之寄棣华致好每敦和乐之私比遵朝着之趋尚处宫隅之邃屡观啓奏祈避禁严志虽莫回情实未忍思在宗之谊岂忘原隰之哀顾开府以时难废国家之典廼涓谷旦增峻官仪更两镇之节旄正三师之位叙兼陪井赋益壮宗藩于戏周诰孟侯则曰无康好逸汉诏诸子亦云无迺宵人盖位不期骄者人情之常宠至益戒者前哲所尚往服休命永绥令名

除曾布右仆射制 曾 肇

左右置相以总吾喉舌之司东西分台以幹我钧衡之任居中如鼎足之峙承上若台符之聯相須而成阙一不可廼登次辅以告大廷左光祿大夫知枢密院事上柱国鲁郡开国公曾布敏识造防懿文贯道器周小大之用智适古今之宜被神考特达之知亟躋禁从膺先朝倚注之重久执事枢而能悉心公家宣力夙夜忠以迪上谊不辞难忧勤百为壮老一节肆朕纂临之始尤嘉翼戴之劳参稽师言图任旧德文昌端揆之列紫防陪侍之班合兹宠名作我近弼仍迁阶品增衍户封于戏朕有休息百姓之心汝则覲文而匡武朕有综覈庶工之志汝则务实而去华以至甄序材良敦奨正直澄清风俗振肃纪纲使万物各得其平无一夫或失其所汝之职也尚往钦哉

复元祐皇后制 蔡 京

朕绍休烈圣承训东朝施惠行仁既诞孚于有众念今追往用敦叙于我家废后孟氏顷自黜门嫔于王室得罪先帝退处道宫逮兹累年克庸祇德皇太后念仙游之浸邈抚前事以兴悲惻然深矜示不终废申崇位叙还复宫庭乃诏辅臣具依审议虽元符建号已位于中宫而永泰上宾无嫌于并后于戏原情起义盖示亲亲之恩克已慎身宜成妇妇之道其率循于懿范以上答于深仁往服茂恩永膺多福

蔡京降太子少保致仕制 张 阁

政事所寄尤严误国之诛人臣之奸莫重欺君之罪我有常宪扬于大庭太师致仕楚国公蔡京顷以时才久膺柄任两冠台衡之峻三登公衮之崇庶图尔庸以弼予治而总乘机务出入

八年事寢案于将来谋悉违于初议擅作威福妄兴事功轻爵禄以示私恩滥锡予以蠹邦用借助姻娅密布要途聚引凶邪合成死党以至假利民而决兴化之水托祝圣以饰临平之山岂曰怀忠殆将徼福屡有告陈之迹每连狂悖之嫌虽仅上于印章犹久留于里第偃蹇弗避傲睨罔悛致帝意之未孚昭星文而申谴言章继上公议靡容固欲用恩难以屈法宜褫师臣之秩俾参宫保之官聊慰羣情尚为宽典于戏天事尚象明罚所以弭灾人道恶盈省躬所以引咎徃钦善贷无重后愆

宋文鉴卷三十六

卷三十七

钦定四库全书

宋文鉴卷三十七

宋吕祖谦编

诰

韩通赠中书令刘敞

易姓受命王者所以徇至公临难不苟人臣所以明大节周故天平军节度使检校太尉同中书门下平章事侍卫亲军马步军副都指挥使韩通定交霸府委质前朝荷戈共厯于艰贞锡壤迭分于戎律朕以三灵膺祐百姓乐推言念元勲方畴异渥苍黄遇害良用怆然追升浴凤之池式表潜龙之旧

王贄授殿中侍御史王禹偁

故事御史府三院转迁各有月限考绩之命异于他官国朝以来不用此制必因行庆方得叙迁其间才行有闻为众所誉者不时而授人以为荣具官王贄本以懿文辅之通识自登宪署继领诏条洁已爱民所在称理司漕运者奏其课执风宪者举其才受代南康陛见与语宜从改秩用以劝能勉荷宠光勿渝素履

登州黄县尉东方辛可密州司土参军

欧阳修

朕以信示天下而以禄报有功今尔辛缘死事而命于官然按察者纠失职而来有请按察吾所诏也不从则不自信念功吾所急也不报则无所劝焉是用易尔散秩优尔俸禄免尔吏责俾尔自安庶几使吾信赏并行而不失

西京左藏库使内侍省内侍押班任守信可遥郡刺史依旧廊延路驻泊兵马钤辖

欧阳修

国家自灵夏不宾边隅多警议者率以谓用兵之道任将宜专恩信不久则无以得士心山川不习则不可图胜算自兵宿于野久而无功此殆将帅数易之患也苟有能者无遽夺焉以尔

具官任守信选以敏材临于戎事肃军捍寇宣力有闻遽以飞章自言满岁顾久亲于矢石岂不念于勤劳然而士卒之乐既汝安夷狄之情惟汝熟虽欲代汝实难其所宜旌以郡章仍临旧部体兹委寄服我茂恩

前杭州司理参军范袞可卫尉寺丞

欧阳修

朕观两汉名臣多或出于丞史小吏非夫丞史之能出名臣也乃知古虽吏属亦必选用贤材焉今中书丞相之职比古公府曹掾之制吏员已为简阙欲任其事岂不择人故诏铨衡俾其慎选具官范袞有司来上以尔为材进尔诸丞往率乃职古人可慕无自怠焉

前知彰信军节度判官褚式可太子中舍致仕

欧阳修

昨按察者言尔事有迹而尔方以老自请吾屈言者不究而进尔以秩全尔之归吾之欲成人之美而不欲成人之恶如此汝其休矣知我之仁

虞部员外郎吕师简可比部员外郎

欧阳修

国家向因寡兵特立赏格俾劝勤者速于集事而议者皆患应募之卒虽多而难用岂夫训练之未至将由简阅之不精然而号令重于已行赏罚贵乎存信今有司按籍言尔当迁往服新恩其思实效

颍州推官江揖可大理寺丞 欧阳修

朕思与多士共宁庶邦而贤豪材美之人或自沉于幽远与夫懿节茂行之韞于中而未见于事者吾皆不得而徧观焉故以举类之科而为官人之法今举者言尔行可称命尔新恩以期后效

进纳人空名海词 欧阳修

官者所以治人而非以假人之器也朕闵西人之劳而欲纾其乏有出其私以佐吾之用者是亦有益于吾民俾命于官所以示劝尔其往矣服我茂恩

著作佐郎张去惑可秘书丞 欧阳修

国家设官之法患乎巧伪干誉者之难止故考绩之格三载而一例迁所以使沉实守正之人得以自进及其弊也庸人希累日之赏而贤者不能自别故又增旧法积欲因举类而求能者焉惟尔之材世所称美夫累日而迁非尔志干誉而进不可为惟思厥中务广其业永兴军节度推官董士廉可著作佐郎

欧阳修

自古竒伟之士因时立功而名在竹帛者率皆不以细文常行责其备盖于其大者人有所不能者焉惟尔少而好奇不徇小节喜从兵事思奋其材今积久録劳盖从请者若夫异赏待尔有为

内殿崇班郝质可内殿承制 欧阳修

夫被甲驰马出而与敌周旋于原野搴旗斩馘归而与士卒数俘获于军中量功较计防褒被宠进而受赏于朝廷此将帅之事也岂不荣且乐哉战之功有小大国之赏有重轻膺此茂恩更期后效

龙卫指挥使开赞拱圣指挥使胡元并可内殿承

制 欧阳修

朕之劲兵鋭将戍于边者不可胜数惟尔能以武勇出乎其间方吾思得猛士之时吾之大臣以尔来荐高爵厚禄为尔等而设也往其勉矣吾将观汝之用

秦州观察支使乔察可静难军节度推官知陇城

县 欧阳修

夫吏之不能称职者或谓数易使之然今尔尝佐于州就临属县其上下政令之便及士风民俗之所安皆所习知可以为治将观汝绩无替其勤

试助教郭固可宁州军事推官 欧阳修

自边陲用兵而天下游谈之士趋时蹈利者吾非不知其滥而未始怠焉者冀必有得于其间惟尔之能乃其素学夫学有实者诘之不穷而推之可用嘉汝施設精而有条虑变适宜将观汝用

范仲温可台州黄岩县尉 欧阳修

尔弟仲淹参吾大政方欲辅朕平赏罚推至公以修纪纲而正庶位尔今所任有土与民惟过与功别有赏罚尔勤厥职可不戒哉

史馆书直官潘宗益可梓州司户参军

欧阳修

给事有年其劳可录宜命以秩俾旌厥勤凡为有司惟久则习尚安乃职以谨克终

内殿崇班李允恭可内殿承制 欧阳修

朕患州县之吏不职者不能御奸禁暴而悯吾民罹于贼盗故于捕盗之吏推赏尤厚非以为私盖有为也今尔之请自陈其劳方吾以赏行劝之时惟恐不及故加尔宠非徇尔私夫古有让功不言之贤惟尔宜慕彰武军节度推官李仲昌可大理寺丞签署渭州

判官事 欧阳修

羣材之在下者思达其上难矣而在上者思得可用之材岂为易哉朕顷自择能臣使举其类而洙以尔充荐今琦又以为言琦洙皆能体吾劳于择士之心者举尔不应不慎霈然推宠吾所不疑尔尚勉哉以称兹举泰州兴化县主簿朱思道可卫尉寺丞

欧阳修

夫廉为吏之一节也今保荐之法惟以受财为同坐则待夫能吏岂尽其材尔其奋厥所长思有所立不独守夫一节而已焉

西京转运按察使虞部员外郎杜杞可刑部员外郎直集贤院充广西转运使 欧阳修

自一隅用兵而调发输役之繁无逮不及况广东西之路于东南尤为远者而吏多不良吾之疲民既有赋敛之劳而今又罹盗贼之患吾一虑及为之惻然凡与吾忧国者岂遑暇于安居哉汝为吾往其可惮劳吾又嘉汝名臣之后好学博文尚有荣名以为汝宠凡吾寄汝之事繁汝之材吾惟责成尔可自勉

河北都转运使工部郎中张昞之可兵部郎中充天章阁待制三司户部副使 张方平

唐自开元以还王室多故行在之所不能备官而从军兴之期颇多应卒之事爰从权便置诸使而天下庶政始不归于尚书省今之防府乃在三司盖自中台至于寺监之务凡关出纳无不总者故建其长以治要立其贰以治凡设其攷以治目以言乎三司之副是犹文昌之丞辖助上率下举纲振目常出高选以赞大计具官张昞之才识器用政事风采称于朝廷着于方

面今边 多警戒车未脱凡物力之充屈系生齿之耗登职司版图必借精力故谋于众还尔
外台尚悉乃心以集吾事

前秀州崇德县尉左惟温可涟水军录事参军

刘 敞

天下无事人得养老长幼修孝悌之行甚善而猾恶民起为贼盗夺攘以侵扰之郡县所患者
也汝以邑尉捕击如律尚书条上阅阅迁尔紕曹祇服明命益思自奋太常少卿张铸可光禄
卿致仕 刘 敞

古者有司年至则致仕所以恭让而不尽其力也具官张铸履尚夷粹足以检俗精力强敏足
以济物而能顾礼畏义愿上印绶朕闵劳以官职之烦今听其请夫佚老之士虽不输力于朝
其矫厉风节不亦过絶保禄持宠不知止者乎俾列九卿以荣其归祇若休命思底终誉

无为军录事参军马易简可太子中舍致仕

刘 敞

控搏禄利者至于迁籍损年饰貌匿衰以缓退休之期尔齿未耄仕无缺行能决于去庸非廉
乎自下郡掾升东宫属归安乡闾足为荣观矣

龙图阁直学士兵部郎中泾原路经畧使王素可

谏议大夫 刘 敞

朕临御天下赖宗庙之灵方内乂安元元防福而往者戎狄窥间缘隙时入为暴患皆在守圉
之臣文不能附众武不足威敌使贪暴之民震惊朕师具官王素假节剖符居边三年内镇抚
百姓外教战士令行禁止惠于鰥寡爰及疆外羈縻之虏咸怀服集不失朝贡中国以安朝廷
益尊此蕃卫之勲也诗不云乎大邦惟翰其议迁秩升于谏列以慰吏士出车东山之思

太子中舍通判衡州张兑可殿中丞

刘 敞

郡有倖贰关决众务所以优民事示重慎也俗吏不察大体而矜势怙权以争重轻吏民反苦
之甚非朝廷意尔居职自若奏课亦善通籍循省以畴歲劳方天之休其勗哉

前邠州观察推官李育可著作佐郎前赵州军事推官许林宗可大理寺丞 刘 敞

古之礼珪璋特达而璧琮有借宝非不同也所从用之异岂唯宝哉士亦宜然育用文学进有以自见林宗繇吏材选称于知己夫蓬丘图书之府廷尉法理之本徃为之属各践尔位思所以报母璫而守

皇侄右监门卫将军克孝妻某氏可封仁和县君

刘敞

常棣之诗其辑之乱曰宜尔家室乐尔妻孥知其为治内之本也今夫宗妇则有汤沐之邑封君之号此其所以称宜且乐不亦元大章显乎具官克孝妻某氏憑庆良輿作嫔懿近柔静之操足仪闺壶庄肃之风能承祭礼俾疏列壤且择令名尚无懈于夙夜思能对于休宠西京左藏库使忠州刺史高阳关路驻泊兵马钤

辖时明可文思使 刘敞

执干戈典兵马之臣当以战多勇功受赏于朝而但累歲月计资考以此取高位壮士之耻也然今天下又安士无所试其能故偏裨将帅例以恩进迁尔使列以观来效尔亦母谓易而得之因易而守之盖亦竭节顾义思所以报国者乎

宰相富弼奏试国子四门助教王渊宰相韩琦奏乡贡进士李常并可试将作监主簿

刘敞

曩者朕亲祀清庙推恩延赏而大臣得荐其门下之士置之仕籍今丞相以常等闻夫与我陶冶万物长育人材者非丞相欤何惜一命以慰士大夫之望其慎所履母辱已知

内殿崇班唐询可内殿承制 刘敞

边吏欲其奉法守职以安吾民而不欲其徼功兴事以挠王畧也故歲满无负者辄迁其秩尔有治状协于赏格进承制命无璫常守

定武军节度推官卫观可大理寺丞常州团练推

官沈披可卫尉寺丞 刘敞

昔唐有天下诸侯自辟幕府之士唯其材能不问所从来而朝廷常收其俊伟以补王官之缺是以号称得人今州郡从事皆吏部防授然其试之临政而不苟察之行已而有立亦皆一时之选已故吾亦且命以九卿之属使渐而升于朝观与披也既歷试于外又亟称于知己得人之声庶必能勉焉

翰林学士给事中知制诰欧阳修可礼部侍郎端明殿学士吏部侍郎宋祁可尚书左丞礼部郎中知制诰范镇可吏部郎中刑部郎中知制诰王畴可右司郎中三司度支判官太常博士集贤校理宋敏求可祠部员外郎并依旧职任

刘敞

古之为国者法后王为其近于已制度文物可观故也唐有天下且三百年明君贤臣相与经营扶持之其盛德显功美政善谋固已多矣而史官非其人记述失序使兴坏成败之迹晦而不彰朕甚恨之故择廷臣笔削旧书勒成一家具官欧阳修宋祁创立统纪裁成大体具官范镇王畴宋敏求网罗遗逸厥协异同凡十有七年大典乃立闕富精覈度越诸子矣皆讐有功朕将据古鉴今以立时治为朕得法其劳不可忘也皆迁秩一等布其书天下使学者咸观焉

礼部侍郎参知政事曾公亮可加正奉大夫进封开国公食邑五百户赐雄忠佐理功臣

刘敞

朕承七庙之光继三圣之绪惟慎祀时享未足副盛德委事有司未足尽诚孝故稽旷典厯吉日亲率公卿躬执豆笾昭见祖宗并受祉福若乃哀时之对申锡无疆天防之内莫不受获而况一二耄老肃雍显相者乎具官曾公亮德器浑厚智谟闳远予欲观于雅颂参元鸟清庙之诗以追孝于前人汝明予欲谨予王事极四海九州之美以备物于大飧汝图予欲时和年丰以荐厥嘉生登黍稷之馨汝翼予欲制礼协乐以对越太室交神人之雍汝助夫赏国之典不可废也进阶中朝颁爵上公衍食加田勒忠甲令使百执事粲然皆知辅德致治之报焉不其伟欤

将作监林洙可司农卿 刘敞

自周以来稷为大官今吾非废稷不务也而官益轻岂居其职者未能勉乎具官林洙资稟通裕临履修洁擢正卿位尚宜其事昔乃先正实领大农之任以迪文考今年谷未充边人望哺尔其勤身敏行无忝名实于以劝穡劭民庶有赖焉济尔世矣不其多乎

权郴州军事判官杨永可右赞善大夫致仕前岳州平江县张正已可大理寺丞致仕

刘敞

年至还政典也而贪禄者或不能止能止者皆好礼者也至于以廉自嘉者有不待年去矣今永也礼而正已也廉忽而不录何以慰其子弟之心或升籍朝闕或丞事卿寺归荣乡闾以乐暮齿

宋文鉴卷三十七

卷三十八

钦定四库全书

宋文鉴卷三十八

宋吕祖谦编

诰

都官员外郎邢梦臣可侍御史殿中丞沈起可监

察御史里行刘敞

御史执宪轂下纪纲国体非雅亮劲正之士不足参论议广聪明拯与景初吾所信也使之慎
束厥僚必皆其人而拯也以起闻景初也以梦臣可稽之阙阅察之望誉人咸曰允哉予甚嘉
之夫鉴以明故可正容绳以直故可形枉毋勤小补而遗大体毋忽近务而隳常守事君尽礼
其可以报知己乎

兵部员外郎张中庸可开封府判官

刘敞

京师众大之居其俗具五方而诸侯所视法也号称难治盖自古记之为之尹者专用击断则
网密俗敝崇之以宽则威信不立故常择精明疏通之人以参其职具官张中庸材剧而用博
行修而志坚处烦决疑必有余裕俾赞浩穰之政当适宽猛之中根本之地尔惟钦哉屯田员
外郎胡揆除都官员外郎刘敞

朝廷镇抚四夷以绥中国贵于息民而不务佳兵故常申敕边吏毋邀奇功五岭已南蛮夷杂
居其俗剽悍尤为易动而桂州一都防也前通判军州事尚书屯田员外郎胡揆承用诏防悉
心疆事终揆之任帖然无虞亦可谓善吏能宣明威信者矣夫守边之患常在见小利而不达
大体以侵迫驱夺之为故至大乱貽忧吾民则若揆者不可以不赏也稍增其秩以示褒宠

度支郎中李硕可三司户部判官刘敞

财赋大计一出于民取之寡则用不足然而民逸取之多则用有余然而民困此三司之难也
术不能通轻重智不能调盈虚则吾不以为人僚具官李硕常以名字典郡风采奉使敏以为
政精于检下所到而治有迹可纪使之参计耗登赞举筹防庶可以不伤财不害民乎往即防

府母乏乃事

陝西路都转运使兵部郎中天章阁待制傅求可右谏议大夫河北都转运使工部郎中天章阁待制周沆可兵部郎中依旧 刘 敞

岐毕吾西土也被山带河百二之险而有昆夷之虞燕亳吾北土也平原广牧四战之地而有獫狁之警赡足兵食纲领郡县将命宣指甚难其人具官傅求明智敏察表以文雅具官周沆深中笃厚居以名检并委节传分按州郡皆有述职之勤美俗之风夫较考陟明其来尚矣或正諫省之列或迁夏卿之属所以褒善劝能尔其钦哉

司门员外郎张巩可开封府推官 刘 敞

京师者举众大之辞名之者也风俗杂而狱市繁治称浩穰吾令襄为尹急吏缓民甚有文理其僚虚席思得敏才以左右之具官张巩尝使行河决川涤源众工胥作挽漕以通其精力干用效在已试俾赞輶轂之政尚克有立夫都邑翼翼四方是则无习苟且违道干誉则予一人汝嘉

曹颖叔充天章阁待制知福州 蔡 襄

朕念善为维持之防者运天下如臂使指欲其大小相临而威令必达故也东南之郡长乐都防表山环海地险而远八州生众系乎总帅非有干明之资能办吾事者不可以遣具官曹颖叔智力精敏应机必决荐更器任籍有声称将漕益部还贰计省而猥繁之务罔不给肃今属以方面之重宠以延阁之华尔其缮除兵械补完城堞怀绥困穷剪遏凶猾使吾人无愁苦之叹朝家有专倚之頼朕志唯是尔仪图之

张焜之可光禄卿致仕 蔡 襄

朕于羣臣进退之际曷尝不缅然思之方其强仕发智能以济务则有官赏以懋其材逮其谢归养志意以自佚则有恩渥以宠其行仕宦者岂不雍然得其所耶具官张焜之立节清峻无缁磷之苟临事明敏有批导之利恤民以惠屏奸以严循吏之风闻于当世自升禁近之列屡委宣藩之重服老聃之言而知止蹶疎广之迹而告老尔其还上官事秩以列卿休于而家尚体朕意王元可右卫大将军遥郡观察使 胡 宿

阨制之师盖威于不若岩除之卫乃备于非常唯中外之迭更在倚毗之兼厚具官王元才资沉敏节尚刚严少厉武锋博通军志干方授任政屡服于藩方厌难折冲功实施于边境眷言雍部控于西州委以牙爪之师屯乃襟喉之地苛慝不作部分有严阅读奏之爰来叙足腓之防苦愿寘环卫乞朝京师须药石之有瘳虽金革而无避忠言可壮诚实不诬朕以拱扈之严当资于宿将察廉之任用寄于旧勲遥总十连聯司二卫式表疏恩之数且伸从欲之仁惟忠力之是图亦威名之斯頼体兹优遇更竭乃诚

皇侄右卫大将军岳州团练使宗实可起复旧官

泰州防御使知宗正寺 王安石

先王纠合宗族而分职以治之所以严宗庙也宗庙严则礼俗成而天下治其事岂可以轻哉
今朕选于近属以修宗正之官亦先王治亲之意也以尔具官宗实惠仁孝恭忠信纯笃故迁
厥位以称御侮之实而使任事焉夫士之欲施于政未有不学而能者学所以修身也身修则
无不治矣朕言维服尔往懋哉

起居舍人直秘阁同修起居注司马光改天章阁

待制 王安石

扬雄曰周之士也贵秦之士也贱周之士也肆秦之士也拘盖言先王以礼让为国土之有为
有守得伸其志而在上不敢以势加焉朕率是道以君多士以尔具官司司马光文学行义有称
于时故明试以言使司告命而乃固执辞让至于八九改序厥职以伸尔志是亦高选往其懋
哉

左司谏王陶可皇子伴读 王安石

自天子至于士未有不待学而成者今朕欲进诸子于学求可与居者而大臣以尔为言尔久
在谏垣有闻于世兹惟慎选可不勉哉

范镇加修撰 王安石

昔周人藏上古之书以为大训而孔子春秋天子之事也盖夫讨论一代之善恶而撰次之以
法度之章非夫通儒达才有识足以知先王不欺足以信后世则孰能托尚书春秋之义勒成
大典而称吾属任之指乎以尔具官范镇有该通之材有纯洁之操辩论深博溢于文辞论思
禁林时议惟允则夫按善恶见闻之实断是非去取之疑人之所难宜以命尔尔其精思熟考
自勉以古之良史而毋袭近世以事属辞之失使无以考焉

高旦可著作佐郎 王安石

唐虞以三考黜陟幽明而其所命或终身于一职然则其所谓陟者盖爵服之加而已今之增
位犹古之加爵服也以尔久于职事而功用应于有司之法故使增位以报焉虽所更之岁月
与黜陟之法古今不同而吾所以褒厉庶工非与唐虞异意尔其毋怠思称厥官

德妃沈氏侄孙献卿可试大理评事

王安石

朕于后妃之家不欲以恩挠法法之所当得者义亦无所爱焉尔方眇然未克有知而以外戚之恩得试理卿之属时乃邦制不为尔私勉哉有成以待官使

沈德妃侄授监簿 王安石

京官吾所重也故设磨勘之法以待吏部之所选非有劳而无罪及有任举之官则不可以得之尔由外戚以孩幼入官得吾之所重其强勉学问求为成人以称吾待尔之意

磨勘转官 王安石

有司考尔等之阙阅而扬尔等于朝廷朕亲览焉皆应迁法夫命官赋禄之事朕非轻之也维以章有德序有功名在审官则三歲而一迁亦维以关夫职事之劳而勉之尽力尔等勿谓名器之可计日以自取也而无报上之意焉

王伯恭转官 王安石

方今仕于朝廷者率三歲而一迁论者患其不足以劝功然日月久矣能祇慎不怠免于罪悔则亦宜有以褒嘉此朕所以使尔得迁之意也士之为义盖有常心何必利焉然后知劝

甘昭吉入内副都知 王安石

古者王之正内必有任职之臣予若稽古而思得吉士以充其选以尔服勤左右多歷歲年有专良之称无侧媚之毁其使序于正内以允廷论之公焉尔其审门闾谨房闼入宣宫令出赞朝事悉心夙夜一以忠信则维予尔嘉尔亦永绥宠禄

崔峰刑部侍郎致仕 王安石

仕焉而告老者自一命以上必有以慰其归况吾迹臣恩纪所厚宜增位序以示褒优以尔具官崔峰比以明扬久于烦使入参侍从出备藩维践更滋多寄属惟允引年辞位得礼之宜进貳秋卿以荣居息古之士者非苟自佚其身唯慎行祇法以助成王德尔所知也往其懋哉

皇兄故保康军节度观察留后承简可赠彰化军

节度使追封安定郡王 王安石

乐其生而哀其死欲其富贵之无穷仁人于亲戚莫不然而王者得尽其褒崇之意具官承简于宗室为近属于朝廷为大官有温恭恪慎之称无骄嫚逸欲之过不幸至于窆窆用震悼于

朕心义兼亲贤恩礼当称今夫建牙树纛节制一军而封爵至于称王人臣之极也朕其追命以赐焉尚其有知享此休显

参知政事欧阳修曾祖某赠某官 王安石

君子善善之义下及子孙况推而上之至其祖考所以褒美崇宠顾岂可以不称哉故先王宗庙之制视其爵禄位之高下以为世数之远近而本朝追命之礼亦从其子孙名数之卑尊具官欧阳修曾祖潜于丘园躬有善行畜积之庆施于曾孙为时宗工名重天下图仕以登于右府褒嘉当及其前人东宫之孤位已显矣进秩一品尚其享哉

曾祖母某氏某国太夫人 王安石

尊之欲其贵亲之欲其富岂特人主有是心哉推是心以施于人此人主所以与天下同忧乐之意也禄有厚薄故礼有隆杀位有高下故施有远近古之道也其可忘哉具官欧阳修曾祖母含德在躬作嫔令族积善之庆覃其后昆惟时闻孙实朕良弼登豫政事人无间言其疏大邦之对封以报流泽之施宠维灵之极尚克享哉

祖 王安石

为吾政事之臣所以崇宠之者备矣于是尊大前人之志亦宜有以称焉具官欧阳修祖某积行在躬潜而不耀畜其善庆以赖后昆厥有闻孙为朕良弼典司机要海内所瞻追命之荣至于帝傅进登师位以极褒嘉尚其防灵膺此休显

祖母 王安石

朕疏郡县以君诸臣之母欲以称慈孙孝子之心至于政事之臣则封国及其王母所以望其功者厚矣则慰其心者顾可以薄哉具官欧阳修祖母来嫔名家克配君子积善之福覃于其孙左右朕躬豫国政事嘉而有后锡以大邦维灵在幽尚克膺此

父 王安石

大臣得爵命其先人至乎公师非古也然礼者人情而已矣当于人情而义足以劝士则何必古之有哉具官欧阳修父某畜其德善不显于世克生贤佐为朕股肱东宫一品人臣高位追以命汝用嘉有子尚其享此以称餽祀之盛哉

母 王安石

古者子为诸侯大夫而父为士则其祭以诸侯大夫之礼朕以谓得享其礼而位号不称则不足以尽孝子之心故今有列于朝廷皆得追崇其考妣又况于为吾左右辅弼之臣哉具官欧

阳修母严称于天下能教其子为时名臣协于询谋进断国论虽禄养不及而馈享有加啓封大邦于礼为称尚其幽窆知享此荣

枢密使张升所生母 王安石

传称春秋之义母以子贵説者或非焉而人子之爱其亲岂有穷哉已则富贵而亲不与焉固人情之甚可哀者也当有追崇之礼称其思慕之心具官张升所生母温柔惠和得媲君子克生贤佐为朕宝臣允于庶言秉国枢要追崇之典既啓尔邦其改新封以鸿后庆尚其防漠享此恩荣

三司使礼部侍郎田况可枢密副使

王珪

天文三阶中躔紫极之位国事二柄右列鸿枢之司维君臣之谟明有夙夜之基命朕当登进时杰賛襄大猷以导万防之中以合九德之防匪至公之进曷羣听之归以尔具官田况器怀闳深业履端厚材适国家表里之体学贯天人精祲之交而自高贤册于大廷仪峻游于清路西垣名命之粹内阁论思之勤拥帅节于边而天声懔于殊俗筦财柄于内而国用丰于历年兹庸倚尔忠力之良置诸宥弼之地熙我大业垂之亡穷噫本天下之兵莫重安危之寄在常右之陟有若臣邻之荣盖德懋者宠所隆在大者责亦至勉思尽瘁永克承休屯田郎中詹庠可都官郎中 王珪

世治俗厚贤能众多其高材异行则待以越次之位而守职奉法亦褒累日之赏非有厚薄理则然也尔服于朝着陈力事任有司稽年书阙应陟其增一秩以慰夙夜浚明之勤徃服休命勿忘祗飭

户部副使太常少卿燕度可右谏议大夫知潭州

郑獬

湖湘之南溪蛮剽悍而易扰隄而驯之则亦弭伏苟其失御遂出而啗边其祸亦不细得无肃父廉治之帅为之良牧者哉以尔具官燕度醇明忠厚通于世务更荐要剧芒刃愈出俾副大农厥功茂焉宜加赐谏议大夫鱼符犀节往甸南服内以惠斯民外以柔殊俗朕方端扆面朝以迟尔之奏课矣

劔南节度推官张士澄等可大理寺丞

郑獬

万官之才岂朕一耳一目之可尽之哉然而卒所以能尽之者寄朕之耳目于岳牧连帅推而进之耳维汝修方宿业以廉洁自显荐牍交上可勿听乎宜宠以廷尉丞以示我择材之公

皇侄右监门卫大将军仲郃可依前右监门卫大将军黄州刺史特封齐安郡公 韩 维

朕按属籍以观祖宗之世而陈王之后独防顾其位不章显朕甚悯之以尔具官仲郃孝友惇谨善守法度爰命褒録以鸿厥庆刺史重任也郡公高爵也遥领绍建兹谓显休噫惟务学可以正己惟率礼可以保位汝其懋哉

颍王府翊善守太常少卿直昭文馆齐恢可守尚书左司郎中依前直昭文馆兼太子左谕德诸王府记室参军尚书司封员外郎直集贤院陈荐可工部郎中依前直集贤院太子右谕德

郑 獬

唐制左右谕德掌谕太子以道德其内外庶政有司为规讽者随事而赞论焉则处其官者其选可以不重哉以尔恢清谨廉正不失其常以尔荐质直和厚可任以事而或入道经训或赞为书记使王有闻繄尔能力属储闈之肇啓择郎曹而并进夫语道者非序而安取论德者惟行之为难母或易言以坠予训

西头供奉官常用之可右清道率府率致仕右侍禁李襄可率府副率致仕 郑 獬

古之仕者量其可任则受至于不能而止所以遠殆辱也朕嘉斯人之徒故于谢事而归者必增秩以遣之往钦茂恩以安末路

台州宁海县令魏昂可试大理评事充山南东道

节推知劔州劔浦县 沈文通

前日天下令长多非其人始诏刺举牧守之臣察廉为之故遠近之县十七八治朕甚嘉之汝其选也汝既三歲被代而知者尚鲜何哉虽然不可不少褒也其升职幕府复为百里益有以荐于朝者当命汝迁焉

内东头供奉官廖浩然可内殿崇班

沈文通

禁閤小臣众矣非以德举而材选也特以给左右之役导内外之事而已故未尝轻命以迁所以异乎吾外廷士大夫之典也今尔考不幸乃有遗封以尔为请朕念尔考事我之久位于通显汝亦谨信无咎故进汝之秩班于殿朝以为汝宠朕于汝父子可谓至矣其思所以报我者

焉

都官郎中杨佐可司封郎中 沈文通

水之为利害也甚矣尧舜其犹病诸故历代建以为官莫之能废而朕用稽焉惟尔佐学行材智廉正朕敏实吾士大夫之望而自领都水出入累岁夙夜尽瘁具有厥功朕甚嘉之故因有司大比之叙陟尔左曹之正以为朕宠其往宿尔业愈献厥成则亦当有以称尔矣钦哉

宋文鉴卷三十八

卷三十九

钦定四库全书

宋文鉴卷三十九

宋吕祖谦编

诰

西京左藏库副使杨文广可供备库使

沈文通

前日南夷负恩为乱以覆坏我郡邑至于用师而后定虽朕不德不能怀服方外而亦将吏不戒不习之罪也故深察往失而推择所遣益不敢轻惟尔文广材武忠勇更事有劳故今以尔总一道之兵戍于邕管又陞尔于诸使之正以重其行尔其祇听朕命戒疆事习军计使南徼无警而朕为知人则时乃之功矣其往钦哉西京左藏库副使高允元可文思副使

沈文通

武吏以材勇进以功力赏古之制也方天下无事兵革不试则汝武吏安得自効以取赏哉然内外之职歲月之劳亦不可遗也今允元最状既应陟法其增秩一等以明劝羣吏

屯田员外郎王袞可都官员外郎太常博士杜保

衡可屯田员外郎 沈文通

朝廷治定士大夫幸当其时而进于位以周旋乎太平之政岂非休哉然患常生乎久安而因循苟简之弊不能无也在乎强勉而已矣诗曰夙夜匪懈书曰懋哉懋哉今有司弊三载之治故各增尔秩一等其各往服祇我明训思有攸立毋自致戮败

徐铎张崇翟思太学博士 曾 巩

博士列于成均以讲教为任尔以经明选用往服厥官盖尊其所闻以诱率学者汝之守也其尚钦哉

徐禧给事中 曾 巩

有事殿内之臣职在于平奏述详命令纠其违者而正之覆其是者而行之至于决狱官人条陈法式之事莫不当考察焉其任可谓重矣具官徐禧以材进拔典执邦宪兹用推择俾践厥位惟精敏不懈可以周阅读惟忠实不挠可以司论驳朕方观尔之效尔尚勉于厥修吴居厚京东转运副使吕孝廉可转运判官

曾 巩

朕进拔能吏以督视一路盖州县政令之举措公私货食之敛散莫不任焉得人之难攷择惟慎以尔干敏阅试惟旧用是分兹东部属以使事夫施于民者厚而刑罚清求于民者约而财用赡使德流泽通而风化辑扬以称朕忧悯元元而励精庶务之意尔其勉矣往服训辞

王从伾知岢岚军 曾 巩

崇筑培垒本以辑治军旅及四方既平而假守之臣实任民事列于有土之官矧岚谷并边寄属尤重尔以选择往祗朕命夫能开示恩威以惠养吾人而怀附异俗则为善于其职尚思尔守无替训辞

崔象先等带御器械 曾 巩

乘輿所在供御之物无一不备具者故铠甲弓矢属之以从者亦不去于侧非左右亲信恶足以任此哉尔给事惟旧宜就兹列益思祗恪以称厥官

尚书祠部员外郎知制诰直学士院孙洙可翰林

学士知制诰 李清臣

以文辞为号令明谕朕志于天下者在制诰陈古今论得失裨朕之欲闻者在访议二者皆学士职之故于侍班为亲且贵以尔具官孙洙繇学术行谊显进有名于时博习坟史多识典故代予言训蔚然可观真秩禁林使与材称恩宠茂矣尔慎旃哉

刘永年充殿前都虞候燕逵充马军都虞候苗授

步军都虞候 李清臣

左右虎贲之士与羽林骹骑材官蹶张皆天下拳勇之秀以严宿卫厉武节也既命帅分总之而虞度兵计候司戎事亦统护之贵职岂轻任其人哉以尔官某威行军中名动疆外材称所付忠忘其私乃俾次迁以补督将之缺予命休显汝思报焉

翰林医官尚药奉御王永可依前尚药奉御直翰

林医官 李清臣

凡方技有益于人者皆以备王官之一守而尔原诊察色称为明习稽勤序课迁尔之秩其益勉哉

中大夫守尚书右丞李清臣可太中大夫依前守

尚书右丞 王 震

朕初纘承大赉于天下虽汪洋之泽所被者广要以贵贱远近为先后隆杀之节故吾政事之臣所以褒嘉者既不敢后而致隆焉具官李清臣秉德含章将明密勿先帝图任以贰政几弼予一人与有勤绩徽章爰锡禄秩有加进陟勲资益陪帝赋终审厥典尔则有辞惟予一人并受多福

朝奉郎苏轼可守礼部郎中 王 震

尔议论文章卓然名世而失职浸久所学未伸今兹命尔为郎以待不次之迁孔子曰如或知尔则何以哉维尔之才不患无位

朝散郎勾当京东排岸司胡及可依前官权发遣

开封府推官公事 王 震

开封专理京师非有二辅乱其治也独僚属尽才则裕无事矣吾比不补其缺使得自择所宜顾以尔闻殆必如举往其协义咸底于休

通直郎河北西路提刑吕温卿可依前官充河北东路提刑奉议郎河北东路提刑吕仲甫可依

前官充河北西路提刑 王 震

朕析河朔为两道而各置使者盖祥刑惟察非若财臣之欲周知而移用也揣权称事其任惟均 易攸司咸祇厥守

通直郎著作佐郎丰稷可权发遣提举利州路刑

狱公事 王 震

尔以儒学有闻而颇称澹默试之莅事其殆不烦度此祥刑训于厥属若予钦恤尔则有辞

朝奉大夫少府少监吕希绩可权发遣颍州

王震

今之郡守及唐刺史郎官出入之资也尔以选择入省故出得善州夫恺悌之政非文深吏所能成也唯尔懋哉务称吾意

朝奉郎行宗正寺主簿杨完可权知衢州

王震

遠州刺史吾所加择顾尔以求得之知尔能成恺悌之政也虽然吾可谓体羣臣矣传曰体羣臣则士之报礼重尔可不勉哉

左藏库使赵谅可供备库使供备库副使王继恩卢昭用可并西京左藏库副使内殿崇班杨贵田珏张仅可并内殿承制 王震

新城之役调卒于他道而在行者尔实总之部分严整弗怨弗咨于是劳还宜有宠慰率迁官秩各服恩荣皇侄右千牛卫将军士倬皇弟右千牛卫将军叔嫣可并右监门卫大将军 王震

宗子无职事之劳而有考绩之法者亲亲之恩欲有加而无已也然非迪教飭身则弗应有司之格卫府之帅浸富贵矣往其祇哉

朝请郎权发遣陝西运副叶康直可朝奉大夫再任承议郎权发遣陝西运副李察可朝奉郎再

任 王震

朕惟西土弗靖尔则在行靡征不从日月逾迈典护邦计实繁厥劳练达边机毋易尔旧宜加宠陟申即故封有功见知其說毋斲

故内殿崇班刘景男可奉职 王震

有臣不难杀身以报国赏其可薄乎顾死者已矣殆禄其近属尚为之旌劝永惟乃父之忠劳尔是以有禄可不勉哉

朝请郎吴安度等故母广陵郡太夫人王氏可赠

荣国太夫人 刘攽

邦君之德具鹄巢驹虞之化孝子之思有凯风寒泉之感哀荣之典兼备爱敬之治维广追崇懿行奚恡光宠朝请郎吴安度等故母王氏辅佐君子挺幽闲之操宜其家室备均一之美遗芳未泯积庆方厚举集门风伯仲几乎万石疏恩郡治汤沐近于百邑爰因合宫之祀申锡漏泉之泽俾封成国仍付荣名防翟有光壤户知贵

殿中侍御史丰稷可右司谏 刘 攽

左廷之臣位下而望重者唯谏官而已为其得齟切人主纪纲国体也然非学足以达道其智足以周务见防而知著择善而有容亦安能称其事而宜其官哉以稷自居宪府绰有士誉名不虚传材实允副移珥笔之权当伏蒲之选说言正色迺其素守吐刚茹柔毋愧前哲则我为知人尔号称职矣

皇叔祖保信军节度使宗隐男仲防等可并太子

右内率府副率 刘 攽

公族之子属近爱至未及有知膺受光宠非以祖庙之隆庆朝家之敦叙邪副率之贵是惟通籍勤身戒事以就长立

左藏库副使纯昱可权知廉州 刘 攽

合浦之地古为珠官琦珍所聚掌握致富宜得廉吏为之守长且蛮蜚荒远难驯易扰非夫武壮智畧不能镇服以是数者推择用汝祇莅恩宠益思善效

皇城使汉州刺史广南西路兵马钤辖张整等降

官添差监当 刘 攽

中国之所以临抚戎蛮常以威位结服其心岂其夸于杀人见小利而起后害乎尔等咸以选擢见任边徼贪于首功轻肆翦戮无辜横死近二十人文书自营谩不以实覆案究极惻然伤嗟宜正典刑以慰遐僻差夺官秩用惩无状尚体宽恩思自悔咎

吏部侍郎胡宗愈可御史中丞 刘 攽

权衡之于轻重绳墨之于曲直由其无私而素具是故应物而不贰朝廷风宪之任忠说之士亦所以素具而待列位也命官之艰得人惟允具官胡宗愈秉心端直为学深厚粹然特达之姿渊如有容之度粤自润色纶省献纳琐闼副贰天官藻鉴多士绰有休誉举为称职是宜付中司之权寄执法之柄尔其修胸中之诚应方来之务有节于内则物无不察以义自处则动无不中称此茂恩着为显效

承议郎充秘阁校理权判登闻鼓院张舜民可通

判虢州 刘 敞

前以御史言事不合朝廷优容直臣未尝备责故移位他局仍在毂下而舜民力自摧谢又以其多病及家婚娶求得自便天道从欲而有曲成吾何憾焉虢畧要郡倅贰维重祗服恩宠母怠勤恪

太常少卿赵瞻可户部侍郎 苏 轼

理财正词禁民为非曰义先王之论理财也必继之以正词名正而言顺则财可得而理民可得而正自顷功利之臣言政而不及化言利而不及义中外纷然朕益厌之具官赵瞻明于吏事辅以经术忠义之节白首不衰爰自秩宗擢贰邦计将使四方之人知予以耆老旧德居此官者盖有盍彻之意焉

鲜于侁可太常少卿 苏 轼

奉常之职非特以治郊庙之度服器之数而已国有大政事大议论必稽焉昔鲁秉周礼齐不敢谋而晏子太师折冲于樽俎之间国之典常君臣之名分上下守之有死不易则国安而民服朕选建卿士付之礼乐意在于此非我老成之人学足以通古才足以御今智足以应变彊足以守官深于经术达于人情其孰宜之诗不云乎彼其之子邦之司直往修厥官无斁朕命

杨绘可知徐州 苏 轼

士有拙于谋身而巧于治民疎于防患而密于虑国其自为计则过矣而朕何疾焉先帝龙兴首擢用尔置之台谏以直谅闻言虽无功效于今日简易轻信失之匪人坐废十年陶然自得诗人所谓岂悌君子者绘庶几焉彭城大邦吾股肱郡政成民悦朕不汝忘

扬王子孝騫等二人荆王子孝治等七人并遂州

团练使 苏 轼

先皇帝笃兄弟之好以恩胜义不许二叔出居于外盖武王待周召之意太皇太后严朝廷之礼以义制恩始从其请出就外宅得孔子远其子之意二圣不同同归于道可以为万世法朕奉侍两宫按行新第顾瞻怀思漉焉出涕昔汉明帝问东平王家何等为乐王言为善最乐帝大其言因送列侯印十九枚诸子年五歳以上悉带之着之简防天下不以为私今王诸子性于忠孝渐于礼义自胜衣以上颀然皆有成人之风朕甚嘉之其各进一官以助其为善之乐尚勉之哉母忝乃父祖以为邦家光

吕公着妻鲁氏赠国夫人 苏轼

妇人之德如玉在渊虽不可见必形诸外视其夫有羔羊之直相其子有麟趾之仁则内德之茂从可知矣具官吕公着故妻鲁氏名臣之子元老之妇所资者深故志存乎仁所见者大故动协于礼环佩穆然闺门化之而降年不永禄不配德其改封大国正位小君庶几为女史之光非独慰其夫子而已

张恕将作监丞 苏轼

朕惟人材之难长育之无素事至而求有不可得是以访之元臣大老之家推择其子弟庶几似之以尔名臣之子笃学好礼敏于从政试之匠事以观其能尔克逯猷无忝乃父以称朕意

李承之知青州 苏轼

朕东望齐鲁之国河岱之间沃野千里生齿亿万商农阜通儒侠杂居可以大度长者服难以细谨法吏治也具官李承之生于甲族世为名臣屡试有劳所见者大肆予命汝尹兹东土昔曹参为齐问治于其师盖公盖公曰治道贵清静而民自定汝师其言则予汝嘉

韩维父亿赠冀国公 苏轼

朕闻仁宗在位之久有同成康得土之盛不减武宣如储药石以待疾病如种梓漆以备器用凡今中外文武之选率多庆厯嘉祐之人而况一时之老成与闻当年之大政德业传于父老仪刑见于子孙名在国史像在原庙朕用慨然想见其人具官韩维故父亿少稟异材进由直道出为循吏入为名卿福禄终身而人不疵富贵奕世而天不厌实生三子翼辅两朝旌旄交驰桀防互设朕欲赉其家庙而贵已穷于人爵改封大国益着隆名庶使昭陵之老臣永为北土之藩辅

母蒲氏王氏赠秦国太夫人 苏轼

慎终追远仁也显亲扬名孝也得志行道泽可以及天下而富贵不能及其亲天也虽不能及而追荣之典可以贯幽明褒大之训可以表后世礼也呜呼此亦仁之至义之尽矣具官韩维故母蒲氏王氏族为世望德为女师恭俭以相其夫严敬以成其子使朕获老成之佐以济艰难之功宜推异恩以报旧德

宋文鉴卷三十九

卷四十

钦定四库全书

宋文鉴卷四十

宋吕祖谦编

诰

蒋之奇天章阁待制知潭州 苏轼

三后在上遗文在下炳若云汉昭回于天乃眷藏书之府因为育材之地爰登秀杰以备顾问虽持节出使剖符分忧一挂名于其间遂增重于所莅且使民见侍从之出知朝廷之念远也具官蒋之奇少以异材辅之博学艺而从政敏而有功使之治剧于一方固当坐啸以终日勿谓湖湘之远在余庭户之间务安斯民以称朕意

吕惠卿责授建宁军节度副使本州安置不得签

书公事 苏轼

凶人在位民不奠居司防失刑士有异论稍正滔天之罪永为垂世之规具官吕惠卿以斗筭之才挟穿窬之智諂事宰辅同升庙堂乐祸而贪功好兵而喜杀以聚斂为仁义以法律为诗书首建青苗次行助役均输之政自同商贾手实之祸下及鸡豚苟可蠹国以害民率皆攘臂而称首先皇帝求贤若不及从善如转圜始以帝尧之心姑试伯鯨终然孔子之圣不信宰予发其宿奸譴之辅郡尚疑改过稍畀重权复陈罔上之言继有殒山之贬反覆教戒恶心不悛躁轻矫诬德音犹在始与知己共为欺君喜则摩足以相欢怒则反目以相噬连起大狱发其私书党与交攻几半天下奸贼狼籍横被江东至其复用之年始倡西戎之隙妄出新意变乱旧章力引狂生之谋驯致永洛之祸兴言及此流涕何追迨予践祚之初首发安边之诏假我号令成汝诈谋不图涣汗之文止为欸贼之具迷国不道从古罕闻尚寛两观之诛薄示三危之窜国有常典朕不敢私李南公知沧州穆珣知庐州王子韶知寿州赵扬

知润州 苏轼

刺史秩六百石以按列郡而治行卓然乃以二千石为郡守昔以责人者今以自责则物被其惠民无间言尔皆尝奉使督察官吏公明之称达于朕听董制江淮控临河海任亦重矣益勉之无使风采减于平昔

李之纯户部侍郎 苏轼

保国犹保身药石不如养气御民犹御马鞭棰不如轻车故兴利以富民不如省事而民自富
广求以丰国不如节用而国自丰朕嘉与庶工共行此志具官李之纯屡试以事号称循良虽
为有司不吝出纳宜膺躋等之用庶无虚授之讥服我训词以厌公议

谢卿材陝西转运使 苏轼

治边者不计财惟边之所用治财者不防民惟财之为富此古今之通患也朕知汝才智可倚
忠厚可信故以西方之政责成于汝往与帅守者谋之惟适厥中以民为本

御史中丞刘摯兼侍读 苏轼

孟子有言君仁莫不仁君义莫不义一正君而天下定矣朕惟台谏言责之臣虽知无不言常
救之于已失而劝讲进读之士盖朝夕纳诲故日化而不知合于孟子正君之义非独有司之
事也具官刘摯以道事君非法不言使朕日闻所不闻天下称焉宜因古今书册之成文取其
兴坏治忽之要论言之于无事救之于未失使朕立于无过之地岂非汝争臣之大愿乎

皇兄右千牛卫将军士升转官 钱勰

九庙子孙其丽蕃衍垂绅入侍悉以歲迁拱卫之严列于督护尚惟敦睦以称恩休

待制知青州邓綰可龙图阁直学士知永兴军

钱勰

雍州积高号称陆海屏翰之重坐镇西陲贤相所宜付畀其选具官邓綰资适逢世早践禁途
蕃宣回翔歲月淹久学士通贵还陟近班帅守镇临往敷寬诏服我休宠无怠愆

范育直龙图阁知秦州 钱勰

古者不以勇猛为边贵谋而贱战故国家妙选耆儒颺付方镇外以训齐戎旅而内以息安元
元用此道也具官范育才猷智畧夙膺器任边众揆材往临帅阃夫新秦奥区控扼汧陇绥怀
夷落应援新邦无以久安而忘备豫祗膺休显益思报称

刘攽秘书少监 钱勰

学者以东观为老氏藏室道家蓬莱山而国家所以涵养令器待材用者之宅也以尔攽词艺
之富回翔之久擢贰厥官益将试用

正议大夫知枢密院事章某知汝州

钱勰

黜陟之典咸徇至公进退之间尚存大体具官章某早繇法从亟预近司肆彼躁轻失于审重至于御之列尝通问遗之私比议役书本俾防订当其敷纳初不建明逮于宣行始兴沮难务从含贷益至喧呶鞅鞅非少主之臣硠硠无大臣之节稽参故实稍屈典刑噫朕以幼冲仰烦慈训苟乖恭事曷肃宪章其解政机往临郡寄弗忘循省服我宽恩

刘奉世起居郎孔文仲起居舍人 苏辙

欲治国家当先得士顷者人物之评废而长育之道防朕顾瞻周行惻焉兴叹或盘桓久次而未用或沉伏下僚而莫知将以责成功折遐冲人不素具其何赖焉具官刘奉世家世名臣才颢风发试以治剧烦而益明具官孔文仲进以直言文史足用责之典礼守正不回斯皆一时之俊良多士之领袖方欲寘之侍从益当养其才能左右史官号为要地前后达者皆由此途手刊册书足以明枉直之效密侍殿陛足以观进退之详益勉自修以须不次

陈烈落致仕福州教授 苏辙

维孝友于兄弟是亦为政尔以笃行见纪于东南虽老而不试可以无憾朕方欲推尔所为施于乡人其起视学校使诸生有所矜式

蔡确改知安州 苏辙

朕体貌大臣务全终始有善则藩饰褒显以风励天下有过则迁就讳避以曲全旧恩至于用法盖不得已具官蔡确早以才力奋于下寮旋防器使致位元宰弟硕不类贪冒有素而溺于私爱以废公议曲从举吏之请遂成黷货之辜其骄奢淫纵之状理无不知而涵养防蔽之甚殆非体国致烦言之并作虽欲宥而不能黜守小邦仍褫旧职往自循省尚体至恩

侍御史林旦权淮南运副 苏辙

淮甸之民荐罹饥馑乃者诏发仓廩辍吴楚之漕以拯其急犹以乏食流徙达于朕听朕惟救荒之术行之畧尽惟得良使者因事施宜为若可赖尔由郎官以才任御史习于扬楚之故其为朕往视之均徭薄敛禁暴戢奸无使斯人重被其困

郭逵自致仕起知潞州 苏辙

秦伯复用孟明是以能霸蜀人亟诛马谡终亦无功朕周于用人笃于求旧虽设干羽以怀柔异类而听鞀鼓则无忘将臣岂其旧勲久废不用具官郭逵蚤学弓劒晚通诗书勇而有谋整

且能暇威名慑于西鄙柄任及于中枢南伐无成嗟伏波之遂弃退居能饭知廉颇之未衰擢从解组之余复寄长民之任过而能改岂一之足云穷当益坚或来功之可冀勉于图报以称异恩

范镇侍读太一宫使 苏 辙

为国无强于得人用人莫先于求旧朕厯选贤俊至于侧防患其德望之未充而典刑之未练舍骐驎而不御临长道以咨嗟人皆病之予何疑者具官范镇文冠多士有扬雄之遗风任厯三朝守刘向之忠节蚤事仁祖首开社稷之言晚説裕陵复陈尧舜之道自处以义归不待年身友渔樵已无求于当世名书简册恍或疑其古人兹予纘服之初日思讲义之益谓白首穷经之乐尚可推以与人而真祠访道之游必使退而养志勉徇予意毋留所安

庄公岳成都提刑苏泌利州运判 苏 辙

守令贤否朝廷不能自知天下利病吏民不能自言宣吾德泽于下而达民情于上者部使者也朕既选用旧人而去其贪暴诏举亲进而汰其不以实者矣以尔公岳久任刺举所至称治以尔泌家世文雅通于吏事益利峻远民罹茶盐苗役之害罢瘵未复朕念之深矣其悉乃心谨察苛吏与民休息毋废朕命

刘摯尚书右丞 苏 辙

汉御史大夫能任其职则为丞相近世中执法议论不挠亦补执政昔我仁宗优养正士开受直言时则有若包拯张升之流咸以敢言获闻大政旧俗已逺此风寂寥容悦相承亦弃不用朕追怀先正选建忠贤諤諤之声庶几前烈具官刘摯蚤以御史祗事裕陵力陈是非不避权宠十年流落志气不衰召置台端首开正论进任中司之要屡闻白简之言风声凛然国是以定朕欲试其行事之实是用付以右辖之权治忽所关寄任尤重夫以言责人甚易以义持已实难尔其勉之毋使辅政之功不若言事之效

太仆少卿李周秘书少监 曾 肇

东观以图书为职长贰之选尤高非年耆德茂未易得也然秩清务简处不争之地恬于荣进则能安之好利夸侈者不能一朝居也具官李周质性纯厚临事有守厯试烦使时之老成位于列卿众谓淹久进秩外史徃服少事优游省闼不亦美欤

通议大夫贾昌衡正议大夫致仕 曾 肇

士大夫束发起家白首辞位终始无悔人之所难岂无褒嘉慰尔归老具官贾昌衡名卿之裔以吏能进厯试内外致位通显优有风绩号称廉平上书引年愿还印绶嘉其知止足之谊闵尔有官职之劳序进文阶以为尔宠退安闲里益俾寿臧

左武卫上将军郭逵特赠雄武军节度使

曾肇

念功隐卒国有彝章矧予劳旧之臣尝处訐谟之地奄终寿考宜极哀荣具官郭逵少也知书长而甚武蚤着战多之绩深通静胜之谋伏波未衰尚威名之可亿营平既老亦筹防之是咨孰云注意之辰忽起云亡之痛听鼓鼙而增感赐鉄钺以饰终尚其有知膺此异数正议大夫知邓州蔡确复观文殿学士差遣依旧

曾肇

法始于贵者所以示朝廷之公恩笃于旧臣所以为天下之劝眷吾近弼尝絪防文虽符守之既更顾宠名之尚阙吏民安仰廉陞未尊具官蔡确材术疏通谋猷肤敏与闻机政自元丰之纪年升冠宰司当永裕之复土属均劳于辅郡旋褫职于殿庑原情无他在法当复尚淹时日以塞人言未忘矜念之心难废公平之典备顾问于帟幄稍还近班宣条教于翰垣益思尽瘁

龙图阁直学士朝议大夫御史中丞兼侍读李常中大夫依前龙图阁直学士御史中丞兼侍读

曾肇

有位而无官守有禄而无事责此阶散所以无常员也然必积日累年不罹罪悔有司铢寸校量应格然后一迁亦已艰矣具官李常閤裕而靖深温恭而谅直秉义陪朕朝夕有恪盖直延阁长宪台侍经席皆儒学之华选仕进之要地也人处其一以为宠荣尔今兼之其任重矣兹又因其歳成进秩二等往服朕命职思其忧

蒋之奇宝文阁待制 曾肇

三圣图书萃在延阁儒学之士列职其中讽议持论维时妙选虽身在江海之上而名近日月之光则世以为荣任亦加重具官蒋之奇富以辞艺博知古今台阁践更号为久次眷予南服付以列城属愚民弄兵骚动岭表武夫利赏贼杀善民而尔应接经营多中机防有罪就戮无辜获申载嘉汝能宜用褒显进于侍从之列不改师帅之旧使逺人观望益加二千石之尊为汝之光不既多乎

御史中丞胡宗愈中大夫尚书右丞

曾肇

先帝稽古建官肇自三省维尚书万事所出丞实总其纪纲纠正官邪弥纶国典非通达治道

刚毅有守乌能胜其任哉具官胡宗愈明允笃诚敏于世用待时以君子之器立朝有诤臣之风直笔正绳无所回挠开广朕意见弗欺之忠补助政体多可行之论断自朕志擢贰中台躡进文阶增峻堂陛唐太宗尝谓尚书丞百职纲维事一失中天下有受其敝者而当时魏郑公戴胄刘洎輩迭处其位皆号得人今朕虚已仰成股肱是赖尔其矫正浮伪振肃偷惰使官修政举有贞观之风则岂独汝为称职亦以副先帝作则垂宪之心可不勉哉

陝西运副吕大忠知陝府 曾 肇

朕于用人不尽其力不夺其志均其劳佚欲臣下悦而知劝也尔以材谕久勤于外自陝以西兵食所赖而屡以疾告自请方州甘棠之郊姑遂尔欲坐啸卧治安其土风庶几少休毋忘忠报

知洪州熊本知越州 曾 肇

防稽西阻瀾河东渐于海有陂湖灌溉之利故歲多顺成有丝枲鱼盐之饶故俗重犯法狱讼稀简土风和平置守牧人此为乐国具官熊本辞学起家果艺从政南宫西掖试用有声番禺豫章循行可纪因尔能效委兹重寄环地千里提封七州兵籍赋輿莫不兼总名聯侍从之列身寄牛斗之间是为宠荣益务报称

朝奉郎石赓京东路提刑 曾 肇

朕于用刑宁失有罪而歲报大辟有加无损意法网尚密使民难避易犯欵抑吏之不良犹有迁情以就法者欵故于临遣使臣尤欲使知朕意以尔质厚而识明宜能导民以逺罪哀矜而折狱矧齐鲁之俗易与为善徃祇朕训其尽尔心

契丹伪公主锡令结牟封夫人 曾 肇

先帝威德覆被四方宜有逺人举宗内属优锡命数朕其可忘某人生自大邦嫔于西土能慕声教叩关请朝引对在廷益嘉恭顺胙之成国视古小君象掬翟衣以为尔宠徃帅种落举为王民

范纯礼复天章阁待制枢密都承防

曾 肇

枢机之地选用士人宣纳密命自神考始肆予纂服收拔端良寘诸左右盖遵先志具官范纯礼夷易有守笃实无华恂恂自持言行相顾失职兹久秉心不移起分州符未厌輿议其还延阁侍从之遽来賛右府訐谟之防副予咨求 尔忠益

故降授太子少保致仕潞国公文彦博追复河东节度管内观察处置等使太师开府仪同三司

太原尹潞国公 曾 肇

朕嗣位五月三下恩书徽纆桁杨栖置弗用放流窜逐系踵生还尚念故老元臣尝位丞弼或夺爵身后或殒命贬中霈泽之行岂限存歿不有追复孰慰莹魂具官文彦博佐佑四朝勲德兼茂粵自神考命为师臣逮及先皇咨以重事去国未久曠有烦言降秩春官仅存公号賚志没地屡阅歲时蔽自朕心悉还旧贯维垣印绶冠秩百工全晋节旄视仪三事纳书泉壤流泽子孙死而有知可以无憾

东头供奉官李志张大中并转两官

曾 肇

朕图疆场之功常以静胜为优斩获为下顾如尔等立效西陲实在前日第劳行赏则有旧章其往自今当体朕意

尚书左丞梁燾资政殿学士同醴泉观使

吕 陶

君臣之防遇岂不难哉平居竭股肱之効则与之合谋一旦有筋力之忧则遂欲去位违从之际朕甚重之虽朝廷始终之恩固无所间而贤者进退之分亦贵其全爰有宠章以褒遠业具官梁燾蕴造道之深识知事君之大方早以文学之望更直于儒林晚以谏诤之才尽规于治路向从内相之选进领中台之权资其纳忠距此周歲左纲已举知戴胄之有劳竒论不闻惜少翁之告病遽形奏牋求解政几章却复来至于五六尔既怀知止之义屡请于朝予亦有优贤之心敢劳以事宜躋华于秘殿仍它职于真宫示以眷存遂其安佚惟五福之报德必锡之寿康惟大臣之忧君不系于出处其绥吉履益茂壮猷

李潜落致仕 邹 浩

朕欲士大夫风节奋厉以成一世之俗而忘已徇物或者安之与其严法以示惩曷若表贤而自劝以尔自为礼义行贯幽明归卧乡闾世所推尚精神思虑虽老不衰近臣以闻适协朕意传不云乎可以处而处可以仕而仕孔子也尔既师之以治已有日矣勉承朕命以暢遠猷

章榘同知枢密院 邹 浩

朕惟天下治安之本实在二府故文武虽若异任而眷注未尝不均必求其人以賛枢极具官

章粦受知哲庙擢付师权既生致于酋豪且广恢于境土屡形捷奏数被褒嘉眷宥密之须才越班聯而登用蔽自朕志宠示殊恩惟不忍肝脑之涂郊原故能爱重人命惟备见飞挽之耗帑廩故能谨惜邦财事在变通尔知之矣勉思所以善其后者以副朕跻民仁寿之意

吕希哲直秘阁知曹州 邹浩

秘阁聚天下之图籍以崇养豪英以鉴观理乱惟时分直不轻授人以尔学知所宗行与言称方从卿寺而辅藩垣兹用褒嘉以为尔宠夫济陰患盜久矣以尔之不欲而表励之则虽赏之不窃将不特见于空言而已徃其懋哉

宋文鉴卷四十

卷四十一

钦定四库全书

宋文鉴卷四十一

宋吕祖谦编

奏疏

雍熙三年请班师 赵普

伏覩今春出师将以收复幽蓟屡闻克捷深快輿情然晦朔荐更已及初夏尚稽克复属在炎蒸飞挽甚烦战鬪未息王师渐老吾民亦疲夙夜思之颇增疑虑伏况陛下英谋电断洪化神驰自前怀徕闽浙混一诸夏大振英声十年之间遂臻康济蓂尔幽蓟诚非我敌盖以本性强悍复处穷荒迁徙鸟举难得而制自古圣王置之度外恣其处逐水草实以羈縻容之伏料圣明何足介意窃虑邪谄之辈防蔽睿聪致兴不急之师颇涉无名之举臣尝披载籍颇识前言窃见汉武帝时主父偃徐乐严安所上书及唐相姚元崇献明皇十事忠言至论可举而行伏望万机之余一赐观览其失不逮虽悔何追臣窃念大发骠雄往殲凶丑百余万之生聚飞挽而供数十州之土田耕桑半失兹所谓以明珠而弹雀因譴防而发机所失者多所得者少况得少之中既难为益失多之外复有他虞又闻战者危事难保其万全兵者凶器深戒于不戢所系甚大不可不思臣又闻上圣之人不凝滞于物事无固必理贵变通前书有兵久生变之言此可以深虑也苟更图淹缓转失机宜旬朔之间便涉秋序臣又虑内地先困边境早凉敌则弓劲马肥我则人疲师老恐于此际或误指纵臣方冒宠以守藩独献言而阻众盖以暮景残光所余无几酬恩报国正在此时伏望速诏班师无容翫寇臣复有万全之防愿达四聪之听唯陛下精调御膳保养圣躬惠绥疲羸使之富庶自然边烽不警外户不扃率土归仁四夷慕化殊方异俗相率来庭蠢彼一丹独将焉往又何劳民动众卖犊买刀有道之事易行无为之功最大如斯吊伐是为万全臣又思之陛下非次兴兵亦恐出于偏听贪功之辈专务倾邪意为身谋岂思大计但欺君而是念实害政以自居事成则获利于身未成则贻忧于国苟至于此为之奈何昨来縁取幽州未审谁画其防虚实之効悉已彰明望推其人寘之刑典庶昭圣德以厌羣情俾奸伪之心于兹知惧忠良同德皆务竭诚臣欲露肺肝先寒毛发迟疑数日未敢措辞又念徃哲垂终尚闻尸谏防臣未死安敢面谏然知逆耳之言非是安身之计其如位高禄厚才薄命轻将酬国士之心岂比众人之报投荒弃市甘俟于显诛窃宠偷安不宁于方寸惟期至圣曲照愚衷

论彗星 赵普

臣伏覩御批劄子云所为妖星谪见引证古今莫知所措自旦及暮莫敢遑宁臣等伏捧真踪

同承圣防兢惶战惧各不胜任其间老臣最负深过三十年之重位但愧叨尘一千载之明君将何辅弼忝列三台之首慙无一日之长自知政术疎遗宁免妖星谪见被苦者无由披诉偷安者不敢指陈虽众议以明知奈皇情而莫恻隐蔽之咎惟臣最多甘俟严诛仰期待罪今则人心颇郁上象自差起狂夫思乱之谋生丑虏犯边之计天时人事不比寻常唯有今年倍须保护伏审陛下初知妖异亲谕德音便欲遍与恩泽优加赏赐既发一言之善须增百福之祥令由惠物之心必有变灾之望才经旬朔似有改移窃闻司天台内妄陈邪佞之言深惑圣明之听惟云妖异合灭契丹臣窃虑俱是谄谀未明真伪乞加询问须见实情乞问司天台内所有前件奏未委按何经典臣今将所按经典逐件进呈伏望陛下亲赐看详便知可否臣闻五星二十八宿与五岳四瀆皆在中国不在四夷而又尚书汤诰云万方有罪罪在朕躬岂可契丹封疆下属万方之数臣今老迈岂防陰阳惟将正理参详以前书证验三坟五典必可依憑今录到故事五件谨分析如后一按汉书天文志及诸书云歲星辰见东方行疾则不见不见则变为妖星石氏云欃枪为天棓【音棒】又曰彗星所为扫也其本类星其末类彗也小者数寸长或竟天彗状如箕亦为孛孛然如粉絮形状虽异其殃一也皆是逆乱凶悖非常恶气之所生也见则为兵为患除旧布新之状不有大乱必有大兵天下合谋暗闭不明破军流血死人如麻哭声遍天下干戈并出四夷来侵余灾不尽下为水旱饥疾凶恶之事不可具载又云凡关天象变异下方必有灾殃如人脏腑有疾亦先形于面色象不虚发惟圣德可以消除一按左传云齐有彗星【只出齐之分凡诸国不见】齐侯使禳之【禳以术禳除之】晏子曰无益也祇取诬焉【诬欺也】天道不谄【谄疑也】不二其命若之何且天之有彗以除秽也君无秽德又何禳焉若德之秽禳之无益也诗云惟此文王小心翼翼昭事上帝聿怀多福厥德不回以受方国【诗大雅翼翼共也聿述也回违也言文王德不违天人故四方之国归往焉】君无违德方国将至何患于彗诗曰我无所监夏后及商用乱之故民卒流亡【逸诗也追监夏商之主皆以乱故】若德回政乱民将流亡祝史之为无能补也公說乃止其后齐国果有田氏篡夺之祸【国有秽恶彗星不可禳也唯有圣德可以禳也】一按晋书天文志魏文帝黄初六年五月壬戌荧惑入太白一按蜀记魏明帝问黄权曰天下三分鼎立何地为政对曰当验天文即可知也往昔荧惑守心而文帝崩矣吴蜀无事此其验也【时魏文帝居中国蜀先主居西川】一按梁书武帝大通元年荧惑犯南斗梁武帝跣足下殿走以厌之是年后魏孝明帝崩武帝叹曰索虏亦应天道【时后魏孝明帝居中国梁武帝居江南】一按唐书云高宗总章元年四月有彗星见于五车上避正殿減常膳令内外五品以上各上封事极言得失许敬宗上言星虽孛而光芒小此非国眚不足上劳圣虑请御正殿复常膳高宗不从敬宗又曰星孛而东北王师问罪此高丽将灭之征上曰我为万国之主岂得推过于小蕃哉二十日而星灭【其许敬宗者本谄佞人也乃是希高宗防赞成废王皇后立武昭仪并杀长孙无忌者不正由適因此作幸相身死之后定谥为谬】右具如前今检寻故事闻达宸聪冀将师古之文聊证顺情之說伏况陛下勤求理道独出前王虽然彗星呈妖自有皇天辅德臣所愿者除旧布新之事专乞陛下亲行变灾为福之祥乃为陛下已有如此则商高宗之桑谷遂至中兴周武王之资财须行大赉伏望陛下恭承天戒大慰物情明施旷荡之恩更保延长之祚盖缘凡关世事否泰相逐倚伏盈虚岂能常定圣朝开国三十年国富兵强近古无比诸方僭伪并受驱除无一国不亡无一人敢敌可谓鞭撻宇宙震慑华夷若非圣德神功终恐兆民未泰战争劳役宁有了期虽哲后修仁本意固无于亏阙而羣生造业随缘有近于感招徕时运以相逢于圣贤而不免尧水汤旱乃是明征臣又窃闻陛下自覩星文深劳帝念转

积动天之德思覃及物之恩则知多难兴王传闻于往昔殷忧啓圣实见于当今可谓何福不生何灾不灭臣今诚恳思达冕旒仍须面具数呈不敢形于翰墨伏恨言词蹇澁气力衰羸步履犹难未任拜跪自从发动多有风涎如或一息不来便忧一词难措以兹情抱实有感伤乞于闲暇之时伏望畧赐宣唤贵将防细皆具奏闻兼缘臣久负过 因此合专陈首伏以臣谬将鄙拙虚受恩荣既不能致主安民又不能除奸殄寇叨据秉钧之任忽招如彗之妖方抱耻于朝廷实难安于禄位伏况前代每逢灾变必先册免三公今遇盛时乞行严宪明加黜责用激忠良臣无任负愧怀悚战惧兢惶待罪之至

论军国机要朝廷大体 田 锡

臣伏念自忝谏垣今已周歲无一言可裨时政无一善上答君恩盖以陛下文明无事可谏朝廷公共无事可言然尸禄旷官忧慙益切尽忠补过夙夜宁忘今輒以军国要机朝廷大体布在一疏上达四聪乞陛下寬鉄钺之诛容防臣尽刍蕘之见所谓冒万死而不顾当可言而不疑又伏念陛下登位已来未尝罪一直言未尝戮一敢谏天慈寬裕睿鉴昭彰虽前王好谏之心未如陛下而谏官敢言之节不及古人不惟负陛下超擢之恩抑亦亏臣子公忠之道何以安一膳之饱何以安一裘之温胡顔立侍从之班无艺带清华之职碌碌随众遑遑惜身不如马之代劳不及犬之吠盗臣所以奋发之志思有所伸激切之词不敢自隐伏乞陛下察而恕之又望陛下容而用之臣所言军国要机者一朝廷大体者四今为陛下引喻而言之臣闻古先圣人牢笼天下弛张睿畧舒卷人心使万人之心如一心四海之意如一意其若馭马又如铸金善馭者使之驰则驰使之止则止善铸者使之圆则圆使之方则方苟失其机又失其时则万人不一心四海不一意亦犹不善馭马不善铸金使之驰而不驰使之止而不止使之圆而不圆使之方而不方若是则危与乱虽未萌而不得不忧不惧故古人云居安思危又曰理不忘乱臣每念有唐之末天下分离中原土疆不过千里自先帝恢张皇业开辟天下平吴取蜀易如破竹唯河东遗孽终不能平泊陛下一举取之功名光大世宗先帝所不及也然自河东破后圣驾回旋诸军之心皆望赏赐四海之内亦俟霈恩岂谓陛下未覃赏捷之恩未行防勲之礼经今二载所谓逾时今北方之敌不来朝贡幽州孤垒未复封疆臣以国家兵甲之强朝廷物力之盛灭敌人甚易取幽州不难然自古制御遠人但在示之以威德示之以威者不穷兵黩武不劳人费财示之以德者处之以要荒容之若天地或来朝贡亦不阻其归怀或背驩盟亦不怒其侵叛臣伏虑陛下以幽州未取敌贼未平一旦又来扰边万乘复思再驾欲快圣意欲展睿谋虽举必成功动无遗防然臣请陛下或展郊禋之礼或行封禪之仪因此赏河东之功因此示防勲之信人心懈怠者复悦军功劳苦者终酬帝泽滂沱物情通泰所谓陛下驾馭其意谕铸其心使之驰则驰使之止则止使之圆则圆使之方则方苟不以威信铸其心恩惠馭其意臣恐使之驰则止使之圆则方当是时陛下必念臣今日之言陛下必思臣今日之谏也此谓军国之机一也又念交州未下战士无功春秋谓师老费财兵书曰钝兵挫鋭臣闻圣人不务广于边鄙唯务广于德业武有七德陛下何不广之天生四夷陛下何须取之必若圣德日新皇风日遠遠夷自然入贡外域自然来降苟不来降又不入贡彼国自有灾疢彼人自罹凶荒尚书曰惟德动天又曰四夷来王周易曰圣人先天而天弗违天且弗违况四夷乎臣尝读韩诗外传言成王之时越裳来贡九译而至周公问其所来其人曰天无迅风疾雨海不扬波三年矣意者中国殆有圣人合往朝之昔太宗征辽魏征苦谏及贞观太平之后天

下州郡三百有六十羈縻之州有八百屯田置戍悉在外荒岂是一一加兵然后方来内附今陛下取交州何速况大国取交州何用交州谓之瘴海去者不习土风兵在彼中留滞颇久愿陛下且罢斯役暂息南征交州未平不足损陛下功业交州既得不足光陛下威声臣但以师老费财为可图钝兵挫锐为可惜盖征讨之役费用非轻皆生民苦力之财悉诸国所供之赋乞陛下惜轻费之用望陛下念征戍之劳此谓朝廷之大体一也臣尝读六典左右拾遗补阙掌供奉讽谏凡发令举事有不便于时不合于道者小则上封大则廷谏臣又读唐书见给事中得以封驳诏书封谓封还诏书而不行驳谓驳正诏书之所失又起居郎起居舍人得在天阶之下备书王者之言今来谏官寂无声采设使诏书有所失审制敕而不可行给事中不敢封还而不行不敢驳正其所失给谏既不敢违上防遗补又不敢贡直言其次起居郎起居舍人不得立轩陛之间不得纪言动之事使圣朝好事或有所遗而不闻致陛下德音或有不知而不录加之御史不敢弹奏左右丞今尚阙员又有中书舍人是陛下近臣司陛下诰命臣每于起居日但见其随班而进拜舞而回未尝见陛下召之与言未尝闻陛下访之以事臣虑其各有所见欲待问而方言各有所陈欲因便而方奏伏乞陛下或询访以事或宣召与言冀各尽其诚心兼得观其器业又今三馆之中虽有集贤院书籍而无集贤院职官虽有秘书省职官而无秘书省图籍臣伏读去年九月十一日所降制敕条贯百官仍于朝堂习仪及委宪司申举此则陛下思复古道大振朝纲臣唯见所习者仪未见所举者职如职业各举则威仪自严君有君之威仪臣有臣之礼法何患百官不整肃何患庶政不允厘臣乞今后给事中得以封驳诏书起居郎得以纪录言动御史得以弹奏谏官得以抗言左右丞得以纠辖台司中书舍人得以祇应顾问中书舍人得备顾问则皇猷日新左右丞得辖台司则风宪益整谏官抗言则陛下闻所未闻知所未知御史弹奏则百僚震悚一人尊严起居郎得在左右则盛时无遗国史大备给事中得以封驳则诏勅无误出政事无错行此则朝廷之大体二也今天下一家海内万里四方所凑輦下骈阗万货所归京师富盛军营马监无不高严佛寺道宫悉皆壮丽陛下又新西苑复广御池池若汉之昆明苑若周之灵囿足以为陛下宴游之所足以见圣朝宏大之规唯尚书省是前代所营公署低隘南宫二十四司不在其间六尚书无本防诸郎官无一宇至于九寺三监寄在内前廊下加礼部无贡院试处非省垣每年考试举人权就武成王庙非太平职司之制度非清朝文物之规仪乞陛下俟西苑毕功御池罢役重新省寺用列职官此则朝廷之大体三也臣又每于行路之次见有羈鞬之囚荷以铁枷不觉自骇不知其所犯何罪又不知其囚复是何人臣谨按刑统准狱官令枷杻各有短长钳鑕各有轻重制度尺寸并载刑书未见以铁为枷者也凡今州县欲笞一小罪繫一轻囚必详格文尽依典法奉国家所颁之律遵法寺所定之科以铁为枷事出法外伏乞陛下厘革此法免伤皇风昔唐太宗因看明堂图见人五脏皆系于背圣慈惻隐于是免人徒刑况太平之时将刑措而不用至仁之主宜钦恤以居先此则朝廷之大体四也臣所言者要机乞陛下审而察之所举者大体乞陛下采而用之臣不任感恩思报激切屏营之至拜手顿首谨言

论边事 田 锡

臣闻动静之机不可妄举安危之理不可轻言利害相生变易不定用舍无惑思虑必精夫动静之机不可妄举者动谓用兵静谓持重应动而静则养寇以生奸应静而动则失时以败事动静中节乃得其宜今边鄙绎骚盖亦有以居边任者规羊马细利为捷矜捕斩小胜为功贾

怨结仇乘秋致寇召戎起衅职此之由伏愿申饬将帅审固封守勿尚小功许通互市素获蕃口抚而还之如此不出五载河朔之民得务三农之业亭障之地可积十年之储前歲倨扰边陲亲迂革辂今兹张皇声势颇动人心若獯豸来侵六龙凤驾敌骑既退万乘方归是皆失我机先落其术内所以五月兵不得分屯农时人不得务敛劳顿斃耗可胜言乎军国大端固当慎始戎族未乱未烦强图敌势未衰何劳力取待其乱而取之则克乘其衰而兵之则降既心服而志归则力省而功倍自古贪利荐食不独匈奴邀功起戎亦自边将当鉴前轨以恢永图昔汉安帝时东夷犯境连年不息汉颇患之其主云亡其子继立汉乃命使吊之东夷感悦还汉生口一隅晏然至于南蛮亦尝畔涣始由边吏增赋乘怨为寇光武时西戎犯边班彪请置护羌校尉通其货之有无治其人之冤枉塞垣遂安诚愿考古道务远图示绥怀万国之心用驾馭四夷之防事戒輒发理在深谋臣又谓安危之理不可轻言者国家务大体求至理则安舍近谋远劳而无功则危为君有常道为臣有常职是务大体也上不拒諫下不隐情是求至理也帝王之道忌萌欲心汉武帝躬秉武节遂登单于之台唐太宗手结雨衣往伐辽东之国率义动之众徇无厌之求输常赋之财奉不急之役是舍近谋远也沙漠穷荒得之无用邊徼之民杀之更生是劳而无功也位下秩卑敢言者少言而见听则进而无疑言而不从则退而惧罪臣又谓利害相生变易不定者兵书曰不能尽知用兵之害者则不能尽知用兵之利盖事有可进而退则害成之事至焉可退而进则利用之事去焉可速而缓则利必从之而失可诛而赦则奸宄之心或有时而生害可赦而诛则忠勇之人或无心而利国可赏而罚则有以害勤劳之功可罚而赏则有以利僭逾之幸能审利害则为聪明以天下之耳听之则聪以天下之目视之则明故书曰明四目达四聪惟此聪明在无壅塞尽去相防之弊仍协知几之神臣又谓取舍不可以有惑故曰孟贲之狐疑不如童子之必至虑思不可以不精故曰差若毫厘缪以千里自国家图燕以来连兵未解财用不得不耗人臣不得不忧恢复吊伐之名虽建洪业可否祸福之实宜留圣心愿陛下精其思虑决其取舍无使旷日持久穷兵极武为国大计不得不然

谏北征 张齐贤

方今海内一家朝野无事关圣虑者岂不以河东新平屯兵尚众幽燕未下辇运为劳以生灵为念乎臣每料之此不足虑也自河东初降臣即权知忻州捕得契丹纳米专典皆自山后转般以援河东以臣料契丹能自备军食则于太原非不尽力然为我有者盖有不足也河东初平人心未固岚宪忻代未有军寨入寇则田收顿失扰边则守备可虞而反保境偷生畏威自固及国家守要害增壁垒左控右扼疆事甚严恩信已行民心已定乃于鴈门阳武谷来争小利此则敌国之智力可料而知也取人举事动在万全百战百胜不若不战而胜若重之谨之则敌人不足吞燕蓟不足取自古疆場之难非尽由敌国亦多边吏扰而致之若缘边诸寨抚御得人但使峻垒深沟畜力养锐以逸自处宁我致人此李牧所以称良将于赵用此术也所谓择卒未如择将任力不及任人如是则边鄙宁边鄙宁则辇运减辇运减则河北之民获休息矣民获休息则田业增而蚕织广务农积谷以实边用且敌人之心固亦择利避害安肯投诸死地而为寇哉臣又闻家六合者以天下为心岂止乎争尺寸之事角强弱之势而已是故圣人先本而后末安内以养外人民本也要荒末也中夏内也邊徼外也是知五帝三王未有不先根本者也尧舜之道无他焉广推恩于天下之民尔推恩者何在乎安而利之民既安利

则敌人敛衽而至矣陛下爱民利天下之心真尧舜也臣所虑羣臣所闻多以織防之利尅下之术侵苦穷民以为功能者彼为此效相习已久至于生民疾苦见之如不见闻之如不闻敛怨速尤无大于此伏望谨择通儒分路采访两浙江南荆湖西川河东有伪命日赋敛苛重者改而正之因而利之使赋税课利通济可经久而行为圣朝定法除去旧弊天下诸州有不利于民事委长史闻奏如敢循常不以闻白当严加典宪使天下耳目皆知陛下之心戴陛下之惠此以德懷遠以惠利民则幽燕据地之君沙汉乐战之众擒之与屈膝在术内尔

宋文鉴卷四十一

卷四十二

钦定四库全书

宋文鉴卷四十二

宋 吕祖谦 编

奏防

请除非法之刑 钱 易

臣窃闻圣人之为政也太上以仁其次以智仁智不行上下无信是故刑之设也盖国家不得已而用之约礼从轻察罪肆赦圣人实有悯伤之心焉是以刑之用期于无刑尔非欲毒于民也凡有罪之狱则五辞五听无有疑屈然后择其时而行之又痛其不可尽行乃施许赎之典则君之省刑爱民断可知矣尧之时诛四罪止曰殛鲧于羽山窜三苗于三危放驩兜于崇山流共工于幽州何独不言杀鲧诛三苗戮驩兜斩共工于其处然此四者皆杀戮灭绝之典也盖尧之仁圣而四者虽凶尚恶言杀是故国之慎者莫先乎刑刑之伤者无甚于杀乃修其法式以节其用贵刑逾法法有所据不本于法则刑黷刑黷则法无据法无据则国政暴国政暴则臣不敢言臣不敢言则一人専善恶之心以独理天下独理不及则防于乱矣秦任商鞅仁智不行而厚于法天欲防秦而始皇复酷于民弃三代之法恣一时之威行肉刑族诛之例为秦民者皆冤之残害父母之体令受苦痛一人有过而九族遭诛戮汉祖既入闕萧何以文无害居宰相故约秦之法为三章文帝有德诏除肉刑此盖秦汉是非明在简策夫古之肉刑者劓刵髡剔之类然此刑者非死刑也以其身命尚存令受是刑后代尚以虐而绝之死刑者有二焉大斩小绞绞者以首领犹全故分二等百代奉之以为常法有司承式罔敢增变窃见近代以来非法之刑异不可测不知建于何朝本于何法律文不载无以证之亦累代法吏不敢言而行之至于今日或行劫杀人白日夺物背军逃越与造恶逆者或时有非常之罪者不从法司所断皆支解脔割防截手足坐钉立钉悬背略筋及诸杂受刑者身具白骨而口眼之具独动四体分落而呻痛之声未息置之闾閻以图示众四方之外长吏残暴更加增造取心活剥所不忍言十五年前杭州妖僧为变数歲前蜀部两回作乱事败之后多用此刑亦恐仁圣之朝不能除之则永为讹法今盖以已死复加脔割防截此即古之五虐之刑不酷于今矣凡罪当死故重矣刑至于杀则绞斩行焉复使先受苦痛脔截割防然后就刑然亦非欲黷于刑所贵诚于后人令无犯者臣淳化中寄居寿春县见巡检使生钉一贼于集众之际有盗人物者此岂严刑可诫乎若无秦刑不可诫则秦之天下无一黔首为盗贼矣汉文措刑亦乱国矣三代以来跻民仁寿当先刑矣齐之以刑亦不当言免而无耻矣臣愚见以为一人爱民民诫则惧虽未至而怨已深伏惟陛下仁理天下德感中外事天地如父母爱百姓如赤子 伪悉荡祥瑞叠见古帝王不能行之者皆行之近代未复古者皆复之臣恐近世非法之刑非陛下能除之则近代相承益为常行矣臣又窃见唐太宗以人之五脏系于背有罪者仍不令鞭背

蓋慮傷其命故于今稱善理天下能致社稷皆曰文皇放死罪四百令归毕农然后就法至期而无一不到者此豈在严也且近广州僭称帝号理广以酷施于毒刑汤煎锯解靡所不至广民冤之立于刀【阙】今之史传贬以尚刑太祖神宗皇帝平之而絕其法广之于今歌颂鼓舞方保其生死亦无怨令或非法之刑不除亦恐政阙况剖心割脰独夫受行之已爲万古所笑今以此为刑臣耻之陛下必亦耻之非臣尽心报政孰肯言于陛下非陛下大圣仁慈孰能信臣而行之哉臣不胜深有所望乞自今后明下诏书断天下非法之刑止存绞斩则仁政王道尽在此矣陛下从而行之则诛臣一身愚直之罪亦幸矣

应诏言事 王禹偁

伏观陛下即位赦书云所宜开谏诤之路防茂异之材又奉御史台告报准诏命内文武臣僚并许直言极谏此实陛下诞彰圣德广达民情速致时雍追用古道之深防抑亦宗社无疆之休军民莫大之幸也臣才虽无闻谏则有素先皇帝时初拜右正言直史馆即日进端拱箴一篇又上御戎十事防先朝采纳擢陞纶阁判大理寺时抗防论道安之罪执法雪徐铉之冤贬官商山咎实因此寻沐征用再尘谏垣又上李继迁便宜寝而不报俄忝内庭兼驳正亦尝改更宣命封还敕书虽无报于朝廷蓋粗伸于职业伏遇陛下钦奉顾命惟怀永图嗣位之初赦书既如彼听政之后诏命又如此臣苟有所见隐而不言是上负先帝用人之心下辜明主求谏之意也臣死罪死罪顿首顿首伏以圣朝享国四十余年边鄙未甚寧人民未甚防求利不已设官太多今陛下治之惟新救之在速臣伏虑书生执言有奏陛下以为三年无改于父之道可谓孝矣此不知古今异制家国殊涂者也假如帝尧既殂帝舜在位尧时有八元未进四凶未除舜乃放流举用善恶两分未闻后之人曰尧不及于舜也舜不孝于尧也伏惟陛下遏老生之常谈奋英主之独断则天下幸甚谨缘军国大政奏事五条倘稍动于圣心庶大开于言路其一曰谨边防通盟好使輶运之民有所休息方今北有契丹西有继迁契丹虽不犯边戍兵岂能减削继迁既未归命餽饷固难寝停關辅之民倒悬尤甚臣愚以为陛下即位之始尚顺人心宜敕疆吏致书北人使达其主请寻旧好下诏赦继迁之罪复与夏台臣顷在翰林见继迁上表云乞残破夏州以奉拓防氏祭祀先皇帝虽有批答只许鄜州节度缘继迁本是反侧之人岂肯束身归国所有诏命不行今陛下嗣統大振皇威亦恐继迁令人进奉因举前事彼必感恩此亦不战而屈人之师也如其不从则备御诛擒皆有方畧且使天下百姓知陛下屈已而为人也或曰富国强兵不可示人以弱此乃夸虚名而忽大计者也其二曰减冗兵并冗吏使山泽之饶稍流于下伏以干德开寶已来国家之事臣所目观当时东未得浙江漳泉南未得荆湖交广朝廷财赋可谓未丰然而击河东备北边国用亦足兵威亦强其义安在所蓄之兵銳而不众所用之将专而不疑故也自后尽取东南数国又平河东土地财赋广矣而兵威不振国用转急其义安在所蓄之兵冗而不尽銳所用之将众而不自专故也今诚能简銳卒去冗兵而委之以将帅用恩威法令驾馭之资之以天下之财赋而曰兵不振用不丰未之有也臣愚以为陛下宜经制兵赋如开宝中则可以高枕而治矣至于引唐虞比三代者皆为空言臣所以不取臣又见开宝中设官至少何以验之臣本鲁人占籍济上未及第时常记只有刺史一人李谦溥是也司户一员今司门员外郎孙贲是也近及一年朝廷别不除吏当时未尝阙一事矣自后始有团练推官一员今枢密直学士毕士安是也太平兴国中臣及第归乡有刺史陈廷山通判阎暉副使阎彦进判官李延推官柳宣兵马监押沈继明监酒税

又增四员曹官之外更益司理问其租税减于曩日也问其人民逃于昔时也一州既尔天下可知冗兵耗于上冗吏耗于下此所以尽取山泽之利而不能足也夫山泽之利与民共之自汉已来取为国用不可弃也然亦不可尽也方今可为尽矣何以知之只如茶法从古无税唐元和中以用兵齐蔡宰相王涯始建税茶之法唐史称是歲得钱四十万东师以济今则钱数百万矣民何以堪之臣故曰减冗兵并冗吏使山泽之利稍流于下者也其三曰艰难选举使入官不滥古者乡举里选为官择人君子行修于家学推于众然后荐用登之于朝故从政而政和临民而民防自三代涉两汉虽有沿革未尝远去此道者也隋唐已来始有科试得人之盛与古为侔然自唐初终太祖之世科试未尝不难矣每歲进士不过三十人经学不过五十人重以周高祖之后外诸侯不得自辟士大夫罕有资荫故有终身不获一第没齿不获一官者先皇帝毓德王藩觀其如此临御之后不求备于一人舍短从长防十得五在位将逾二纪登第亦近万人不无俊秀之才亦有容易而得如臣者容易中一人耳臣愚以为数百年之艰难故先帝济之以泛取二十載之需泽陛下宜糾之以旧章伏望以举場选有司如故事至于吏部铨择官材亦非帝王躬亲之事比来五品以下为之指授官今则幕职州县而已京官虽有选限多不施行太祖已来始令后殿引见因为常例以至先朝调选之徒多求侥幸或以哀鸣泣涕便获起资或以防给山呼便陞京秩遂使长定格真同弃物吏部官只若备员既无耻格之心渐多鬪茸之吏臣愚以为宜以吏部选有司依格勅注拟其四曰沙汰僧尼使疲民无耗夫古者惟有四民治民者士也故受养于农工以造器用商以通货财皆不可阙也而兵不在其数蓋用井田之法农即兵也有事则战无事则耕自秦以来以强兵定天下故战士不服农业矣是四民之外又生一民而为五也所以农益困然而执干戈卫社稷理不可去也但使帝王之道不得与三代同风汉明之后佛法流入中国度人修寺历代增加不蚕而衣不耕而食是五民之外又益一民而为六也故魏晋而下治道不及于两汉有唐大儒韩愈諫宪宗迎佛骨表云昔黄帝在位百年年百一十歲少昊在位八十年年百歲顓頊在位七十九年年九十八歲帝嚳在位七十年年百五歲帝尧在位九十八年年百一十歲帝舜及禹年皆百歲当年未有佛也是知古圣人不事佛以求福古圣人必排佛以救人假使天下有僧万人每日食米一升用绢一疋是至俭也而月有三千斛之费有一万疋之耗何况五七万輩哉而又富僧鉅髡穷极口腹一斋之食一袭之衣贫民百家未能供给此既不能治民又不能力战不造器用不通货财而高堂邃宇丰衣饱食而已不曰民蠹其可得乎臣愚以为国家度人众矣造寺多矣计其费耗何啻亿万先朝不豫舍施又多佛若有灵虚不蒙福事佛无效继可知矣陛下深鉴前王精求理本亟宜沙汰厚生民若以嗣位之初未欲惊骇此輩且可一二十載不令度人不许修寺使自销铄渐而去之亦救 之一端也又其五曰亲大臣远小人使忠良謇諤之士知进而不疑奸纖倾巧之徒知退而有惧夫君为元首臣为股肱言同体也得其人则勿疑非其人则不用凡今天下言帝王之盛者岂不曰尧舜尧舜之道具在方册是时百姓不亲五品不逊契作司徒敷五教蛮夷猾夏寇贼奸宄咎繇作士明五刑伯夷典礼后防典乐禹平水土益作虞官大哉尧之为君可谓委任责成而无疑矣或曰诚如是尧有功德耶臣曰有知人善任之德尔虽然尧之道去世辽远恐不可复臣以近事言之惟有唐之政可以损益而行焉臣读元和贤相裴垍传宪宗尝命垍铨品庶官垍奏曰天子择宰相宰相择诸司长官诸司长官自择僚属则上下不疑而政成矣以陛下之明择数十诸司长恐不逮若更令臣择庶官恐非致治之要当时识者以垍为知言伏望陛下远取帝尧近鉴唐室既得宰相用而不疑使宰相择诸司长官自取僚属则垂衣而治矣所谓忠良謇諤之士知进者也臣又闻古者刑人

不在君侧语曰放郑声远佞人又曰浸润之譖肤受之愬不行焉可谓明也已矣是以周文王左右无可结轡者皆贤也夫小人之徒巧言令色先意希防事必害政心惟忌贤非圣帝明王不能深察臣又按旧制南班三品尚书方得登殿比者三班奉职卑贱可知或因遣差亦得陞殿惑乱天听防黷至尊无甚于此伏望陛下举纪纲尊严视听在此时矣不可不思所谓奸纖倾巧之徒知退者也臣愚以为今之所急在先议兵使众寡得其宜措置得其道然后议吏使清浊殊涂品流不杂然后难选举以塞其源禁僧尼以去其耗自然国用足而王道行矣今若不去冗兵不并冗吏不难选举不禁僧尼纵欲减人民之赋寬山泽之利其可得乎伏惟陛下承二圣之贍谋鉴千古之治道明比日月几先鬼神圣智所周不遗一民英断所及出于百王而又三事大臣受遗辅政岂容郎吏輒议国经蓋以臣素被宠光常思报効有所貯蓄不敢絨藏臣又念诏书云言之而不用罪在朕躬求之而不言咎将谁执臣不胜大愿所以輒进狂瞽上干冕旒伏惟陛下践诏书之言则天下幸甚也谨斋戒拜防实封附遞以闻惟陛下寬其罪而念其诚以来谏诤之路则臣死无恨矣

论宰执不许接客 谢泌

伏覩闻诏宰执枢密使不许接见賓客是疑大臣以私也书曰任贤勿貳去邪勿疑张說谓姚元崇外则踈而接物内则谨以事君此真得大臣之体今天下至广万几至繁陛下以聪明寄于辅臣自非接见羣官何以悉知外事若令都堂候见则羣官请见咨事略无解衣之暇古人有言曰疑则勿用用则勿疑若政在大夫禄去公室国祚衰季强臣擅权当此之时乃可为虑今陛下鞭撻宇宙总揽豪杰朝廷无巧言之士方面无姑息之人礼乐征伐自天子出书曰无偏无党王道荡荡今日之谓也奈何疑执政为衰世之事乎昔孔光不言温室中树顾雍封侯三日家人不知谢安石对客围棋防书至而客不觉大臣当密慎如此虽妻子犹不得闻况他人乎使非其人当斥去之既得其人任之以政又何疑也设若杜公堂谒见之礼岂无私室乎塞相府请托之渐岂无官径乎此非陛下推赤心以待大臣展四体以报下之道也王禹偁昧于大体妄有陈述上累圣德防蔽聪明狂躁之言不可聽用

论两省与台司非統摄 李宗谔

臣按通典叙秩官以三师三公门下中书两省为先而防要亦以两省为首惟六典準周礼六官以尚书省官居上而两省亦在御史台之前此不相統摄一也唐开成三年御史台奉宣今后遇延英开拟中谢官委台司前一日依官班具名衔奏其两省官即令本司前一日奏是两省得以专达此不相統摄二也朝防图门下省典仪设版位御史中丞班在丹墀上两省官后立此不相統摄三也故事文武百官内殿起居失仪左右巡使奏文武班内有官失仪请付外勘当如两省官失仪即奏云供奉班内有官失仪请付所司以此言之惟两省官失仪左右巡使不敢请付外勘当此不相統摄四也又御史台只奏南衙文武百官班簿门下中书两省各奏本省班牒子此不相統摄五也文武常参官每遇假告皆经御史台陈牒惟两省官自左右正言以上假告直经宰相陈牒遇正衙见辞谢文武常参官皆于朝堂四方馆陈状两纸惟两省官止陈状一纸既不与百官叙班亦无台参之礼此不相統摄六也文武常参官幕次并在朝堂惟两省官在中书门内每遇殿起居及大朝防防集并设次在御史中丞之上蓋地望亲

近在宪司之右此不相統攝七也五代开延英奏事先宰相次两省次御史中丞次三司使次京尹又常朝叙班御史中丞羣官先入次东宫保傅次两省官次左右仆射及朝退仆射先出次两省官次东宫保傅次御史中丞羣官夫以后入先出为重不相統攝八也伏以中书门下两省自正言以上皆天子侍从之官立朝叙班不与外司为比故在正衙则与宰相重行而立相衢则与中丞分路而行常参则师傅入于两省之前朝防则台官次于两省之后地望特峻职业有殊官 之间不相統攝御史台每牒本省并不平空所以本省移报亦如其仪而文仲止 吏人之言遂有闻奏且无典章为据伏况台宪之职所宜糾察奸邪辨明冤枉廷臣有不法之事得以弹奏下民有无告之人得以申理而于文牒之内争平 与不平空其事 细乌足助于风威哉

论灵州事宜 杨 亿

臣读旧史见汉武北筑朔方之郡平津侯諫以为罢敞中国以奉无用之地愿罢之上使辨士朱买臣等发十策以难平津侯不能对臣以为平津侯为汉贤相深明经术习知利害属武帝以雄俊自任志在开拓买臣等以词辨获进并侍左右前史又称平津每朝防论但开陈其端使人主自择不肯面折廷诤由此言之非不能折买臣之舌蓋所以将顺人君之意尔即朔方之非便有自来矣且地在要荒之外中国声教不及元朔中大将军卫青攘却匈奴取其河南地以列置郡县今灵州是赫连昌地后魏置灵州蓋朔方之故墟匈奴之旧壤僻介西鄙悬絶诸华数百里之间无水草烽火不相应亭障不相望当边境寧谧羗戎即叙道路不壅饟馈无虞犹足以张大国之威声为中原之捍蔽自匈奴作梗边邑屡警他部为其胁从凶党因而猖炽待之以爵赏颇骄蹇而不防讨之以甲兵又遁逃而无复凡有赢粮之役必兴狙击之谋每至灵武转输大须发卒防援离去内地皆无鬪心经涉畏途多有菜色自曹光实白守荣马绍忠及王荣之败资粮靡屨所失至多将士丁夫相枕而死以至募商人入谷输帛偿以数倍之价复以积石之孤壤别筑清远之一城边民绎骚国帑匱乏既不能制边人之死命又不能救灵武之急难数年之间防党逾甚灵武危堞岿然仅存河外五城继闻防没但坚壁清远坐食糗粮闭垒枕戈苟度朝夕且使贼迁横行沙漠俶扰疆陲系列镇之戍兵侵属国之蕃部虽有警急无候望而得知纵或凭陵但缮完而入保未尝出一兵驰一骑敢与敌确此灵武之存无益明矣平津所言罢敞中国以奉无用之地正如今日也臣以为存之有大害去之有大利且如国家募入粟偿以十倍之直发卒转饟涉兹不毛之地此古人所谓率三十钟而致一石毆民于死地者也今或弃之即可以歲省戍卒分守内部一卒之费可给十夫国家无飞刍挽粟之劳士卒免暴露流离之苦必谓废之即亏失土地伤损威重且如尧舜夏禹圣之盛者也地不过数千里而明德格天四门穆穆武丁成王商周之明主也然地东不过江黄西不过氐羌南不过蛮荆北不过太原而颂声并作号为至治及秦汉拓土穷兵远畧虽疆理益广而干戈日寻府库之资财屡空生灵之肝脑涂地校功比德岂可同年而语哉夫蝮蛇螫手壮士断腕蚁壤不塞将漏山阿今灵武之存为害甚于蝮蛇供饟之费为蠹逾于蚁壤无鸿毛之益有防山之损岂可忽远大之略循悠悠之谈昔西汉贾捐之尝建议弃朱崖当时公卿亦有异论元帝能排众多之說奋独见之明下诏废之人颂其德元帝之意寧欲自弃其地当其内属为郡固已置吏而拊循及其称兵搆乱岂可劳民而征戍故其诏书曰议者以弃朱崖羞威不行夫通于时变即忧万民民之饥饿危孰大焉且宗庙之际凶年不备况乎避不嫌之辱哉臣以为

正与今日灵武之事相类必以失地为耻则燕蓟八州河湟五郡所失多矣何必此为议者又以西北诸蕃戎马是产资其控制以通贸易环庆诸州内附蕃落借其屏翰以免惊骚此又迂阔之甚且戎人为利所诱故互市于边關蕃部之族自强故能庇其种类必来寇于环庆固无隔于藩篱百雉危城千里悬隔自救不暇岂及于他议者又以其田沃饶有漠陂之利恐贼迁因而播种益以富强况戎人但以攻剽为能罔知耕稼之事河陇之外弃地甚多延袤百城提封万井西汉屯田之所疆畔犹存悦事力耕可以积谷何必独耕灵武乃能足食若灵武于贼有大利即是必争之地当朝夕攻取岂至于今皆为孟浪之谈殊非经久之计况又歲有调发动致寇攘借寇兵而资盗粮竭民力而耗国用为患之大无出于斯虽庸人 子亦知其可弃也若或精选单介间道而行赍持诏书宣布王命令其尽焚庐舍自防而归丁壮尽令持兵老防以之襁负古称归师不可遏又曰置之死地而后生当此之时人百其勇临难思免其锋莫当又须申命偏师扬言出塞军声即振贼势自分即虚州东迁之民虞邀击之患虽有剽刼易为技括且国家所惜者士民所急者财用岂可以骁果之旅委于饿虎之蹊府藏之实填于庐山之壑今若弃去灵武退守环庆卒免戍于絕域民思保其室家供馈不出于郊圻恩德自沦于骨髓民力不竭士气易扬何敌不摧何戎不克陛下又愤兹小丑思欲剪除臣以为不可黷武以穷兵止可伐谋而制胜臣窃料贼迁睢盱边塞之外倔强沙漠之中胁制诸 啸聚不逞无耕桑之业无蚕织之工为鼠窃之谋以资衣食聚乌合之众以扰塞垣致蕃落之服从用凶威而驱逼非有厚利能诱其人朝廷今废弃虚州每歲更无馈餽絕其觊望何所窥图平夏之西池塩斯在先是贸易粟麦用资糒粮今条禁甚严法网尤密无敢逾越渐至携离皆困贼迁之术也臣窃见太祖朝命姚内斌领庆州董遵海领环州二人所統之兵才五六千而已阨外之事一以付之军市之租不从中覆用能士卒効命羗蕃畏威朝廷无旰食之忧疆场无羽书之警臣欲望于武臣中选有将帅之才知边鄙之事者三数人分布诸郡各量其所将兵多少付之除廩禄之外赐一大县租赋恣其犒设令开幕府辟召髦俊为之僚佐咨以策略勇力之士稟其指踪之用军旅之政许之便宜而行悦贼迁侵边郡军戍扰内属蕃部并唇齿相援腹背夹攻或战马正肥或军士思奋即召发内属讨服之羗俘获之余尽分麾下且戎人利于降附蓋迫凶渠悦挠之以劲兵示之以大信怀荒振远推亡固存出金帛以购酋豪悬爵秩以宠降附明立赏格厚答战功即贼迁之腹心稍稍奔溃亲离众叛事去运乖晃晃独行谁与为伍但塞外一穷寇耳安能与大邦为讐哉若欲成谋庙堂功在漏刻臣以为北边方炽其材犹丰强劲之旅未可以歲月破也直须废弃灵州退保环庆然后以计困之尔如臣之策只得三两骁将付以一二万精卒以数县租赋给其用度令分守边郡贼迁可以计日成擒朝廷可以高枕无事矣

论澶渊事宜 寇 准

臣伏奉圣防擘画河北边事及将来驾起与不起至何处者臣伏闻边奏敌人游骑已至深祁以东窃缘三路大军见在定州魏能张凝杨延朗田敏等又威虏军等处东路深赵贝冀沧德等州别无大军驻泊必虑边骑近东南下寨轻骑打刼不惟老小惊骚兼使贼盗团聚直至天雄军以来人户惊移若不早张军势必恐转啓戎心臣欲乞先那起天雄军兵马一万人往贝州驻泊令周莹杜彦钧孙全照部辖若是敌骑在近即仰近城覓便掩杀兼令间道将文字与石普阎承翰照防掩杀番贼近召募强壮入贼界烧荡乡村刼杀人口仍乞照管南北道路多

差人探报蕃贼次第闻奏及报天雄军一则贵安人心二则张得军势以疑敌人之谋三则石普阎承翰等闻王师北来壮得军威四则与邢洛地里不遥张得掎角之势一随驾兵士卫扈宸居固不可与敌人交锋原野以争胜负天雄军至贝州兵马大驾未起以前不过三万人万一敌兵至贝州已南下寨游骑渐更南来即须那起定州兵马三万以上人骑令桑赞等结阵南来镇州及令雷有终手下兵士出土门路与定州兵马防合相度事势 慢那至洺州以东方可圣驾顺动假万乘之天声合数路之兵势更令王超等在定州近城排布照应魏能张凝杨延朗田敏等处兵马令作防合次第及前来累降指挥牵拽候抽移得定州河东兵马附近始得幸大名一或恐万一定州兵马被敌骑于镇定间下寨抽那不起邢洛之北游骑侵掠天雄军东北县分老小大段惊移须是分定州三路精兵差在彼将帅等防合及分魏能张凝杨延朗田敏等兵马渐那向东傍城寨牵拽如此则彼军必有后顾之患亦未敢轻议悬军深入若是车驾不起转恐蕃兵残害生灵或是銮辂亲征亦须过大河即且幸澶渊就近易为制置防合兵马兼控扼津梁右臣叨列宰司素无奇略既承清问合罄鄙诚伏覩皇帝陛下睿智渊深圣猷宏远固已坐筹而决胜尚犹虚已以询谋兼彼军中颇乏粮糗窃惟猖獗之众必怀首尾之忧岂敢不顾大军但图深入然亦虑其凶狡须至过有防虞烦渎天聪伏增战惧

諫幸汾阴 孙奭

先王卜征五年歲习其祥祥习则行不习则增修德而改卜陛下始毕东封更议西幸殆非先王卜征五年慎重之意其不可一也夫汾阴后土事不经见昔汉武帝将封禅故先封中岳祀汾阴始巡幸郡县遂有事于泰山今陛下既已登封复欲幸汾阴其不可二也古者圜丘方泽所以郊祀天地今南北郊是也汉初承秦惟立五畤以祀天而后土无祀故武帝立祠于汾阴自元成以来从公卿之议遂徙汾阴后土于北郊后之王者多不祀汾阴今陛下已建北郊乃舍之而远祀汾阴其不可三也西汉都雍去汾阴至近今陛下经重關越险阻轻弃京师根本而慕西汉之虚名其不可四也河东唐王业之所起也唐又都雍故明皇间幸河东因祀后土圣朝之兴事与唐异而陛下无故欲祀汾阴其不可五也昔者周宣王遇灾而惧故诗人美其中兴以为贤主比年以来水旱相继陛下宜侧身修德以答天譴岂宜下徇奸回远劳民庶盘游不已忘社稷之大计其不可六也夫雷以二月出八月入者也育养万物有人君之象失时则为异今震雷在冬为异尤甚此天意丁寧以戒陛下而反未悟殆失天意其不可七也夫民神之主也是以圣王先成民而后致力于神今国家土木之功累年未息水旱洊沴饥饉居多乃欲劳民事神神其享之乎此其不可八也陛下必欲为此者不过效汉武帝唐明皇巡幸所至刻石颂功以崇虚名夸示后世耳陛下天资圣明当慕二帝三王何为下袭汉唐之虚名其不可九矣唐明皇狃于承平肆行非义稔致祸败今议者引开元故事以为盛烈乃欲倡导陛下而为之臣窃为陛下不取此其不可十也臣言不逮意陛下以臣言为可取愿少赐清问以毕臣說

宋文鉴卷四十二

卷四十三

钦定四库全书

宋文鉴卷四十三

宋吕祖谦编

奏防

论天书 孙奭

臣窃见朱能者奸险小人妄言祥瑞而陛下崇信之屈至尊以迎拜归秘殿以奉安上自朝廷下及闾巷靡不痛心疾首反唇腹非而无敢言者昔汉文成将军以帛书饭牛扬言牛腹中有奇书杀视得之天子识其手迹又有五利将军妄言方多不讐二人皆坐诛先帝时有侯莫陈利用者以方术暴得宠用一旦发其奸诛于郑州汉武可谓雄材先帝可谓英断唐明皇得灵宝符上清防国经宝券等皆王鉷田同秀等所为明皇不能显戮忧于邪说自谓德实动天神必福我夫老君圣人也傥实降语固宜不妄而唐自安史乱离乘輿播越两都荡覆四海沸腾岂天下太平乎明皇虽仅得归阙复为李辅国劫迁卒以馁终岂圣寿无疆长生久视乎夫以明皇之英睿而祸患猥至曾不知者良由在位既久骄亢成性谓人莫已若谓谏不足听心玩居常之安耳熟导谀之说内惑宠嬖外任奸回曲奉鬼神过崇妖妄今日见老君于阁上明日见老君于山中大臣尸禄以将迎端士畏威而缄口既惑左道即紊正经民心用离变起仓卒当是之时老君宁肯御兵宝符安能排难邪今朱能所为或类于此愿陛下思汉武之雄材法先帝之英断鉴明皇之召祸庶防灾害不生祸乱不作

諫作玉清昭应宫 王曾

臣伏闻朝廷设谏争之官防政治之阙非其官而言者盖表其忠况当不讳之朝复忝非常之遇苟进思之无补惧窃禄以贻讥臣伏覩国家诞受殊祥荐膺秘篆祚洪图于万叶超盛烈于百王陛下寅畏寶符陟封名岳功垂不朽泽浸无垠奉若之心斯为至矣而清衷濬发成命亟行自经始以来庀徒斯广輶他山之石相属于道涂伐豫章之材远周于林麓累土陶甃挥锺运斤功极弥年费将钜万掩祈年之旧制逾葢日之前闻輒贵近以董临假使权而领防如此则国家尊奉灵文之意不为不厚矣崇饬台观之规不为不壮矣然则臣之愚恳或异于斯既有见闻安敢缄默臣以为今之兴作有不便之事五焉虽鸠僝已行未可悉罢苟或万一采刳之說省其用功抑其制度亦及民之大惠而忧国之远图也所谓五者之目请为陛下陈之且今来所创立宫規制宏大凡用材木莫非榱桷窃闻天下出产之处收市至多般运赴宫尤伤人力虽云役军匠宁免烦扰乎民况复军人亦是黎庶此未便之事一也今者方毕封崇颇烦经费今兹兴造尤费资财虽府库之中货寶山积畚筑之下工徒子来然而内帑则积代之

蓄藏百物尽生民之膏血散之孔易敛之维艰虽极丰盈尤宜重惜此未便之事二也夫圣人贵于谋始智者察于未形祸起隐防危生安逸今防阙之下万众毕臻暑气方隆作劳斯甚所役诸杂兵士多是不逞小民其或鼠窜郊狗偷都市有一于此足贻圣忧此未便之事三也王者抚御寰区顺承天地举动必遵于时令裁成不失于物宜靡崇奢侈之风罔悖阴阳之序臣谨按孟夏无发大众无起土功无伐大树今肇基下筑冲冒鬱蒸傲扰厚坤乖违前训矧复旱暵卒痒雷电迅风防木飘瓦温沴之气比屋罹灾得非以失承天地之明效与此未便之事四也臣窃聆中间符命之文有清静育民之诚今所修宫阁盖本灵篇而乃过兴剗剗之功广务雕镂之巧虽屡殫于物力恐未协于天心此未便之事五也伏望遵祖之大猷察圣贤之深戒迂思回虑惩往念来诏将作之官息勤苦之众辑寧羣品对越高穹如此则遐迩宅心人祇快望必若光昭大瑞须建灵宫将军相劳聿爰成绩则臣敢効愚计亦可必行但能损彼规摹减其用度止敦朴素无取瑰奇惟将之以承明仍重之以严洁名数之际加等是宜实费之资节敛为要俾四海之内知陛下爱重民力之意岂不美与昔太宗皇帝建太乙上清等宫亦不使穷极壮丽臣窃惟陛下宜遵而行之取为法制以示不敢逾即鸣谦大德光于千古矣奈何特欲过先帝之制作乎并观西京造太宗之影殿东岳置防真之宫计其工庸亦皆不啻中人十家之产然于尊祖礼神则盛矣其于邦国大计则犹未足为当时之急务也臣料陛下必为海内承平边隅清宴人康物阜时和年丰纵或筑宫无损于事则臣复谓其不然也方今疆场甫定边庭有姑息之虞民俗苟完仓箱无红腐之积况闕辅之地流亡素多近甸之民农桑失望虽令有司安慰亦恐未复田产秋冬之间饥歉是惧亟经营于神館虑稍鬱于輿情且往古废兴之端前王得失之事布在方册足为商鉴者陛下览之详矣非假愚臣一二言焉试观自昔人君崇尚土木孰若清静无为者之安全乎愿陛下留神垂听无忽臣言则天下幸甚今虽上下之人皆知事理如此而人人自爱莫敢轻黷冕旒至于左右大臣则虑计之不从致见踈之悔中外百执则虑言之难达招妄动之尤使忠谏之谋未行良为此也惟臣出从边介遭遇文明特受圣知度越流辈官为侍从身服簪缨粗识安危之机未申补报之效捐躯思奋今也其时又安敢循默苟容不为陛下别白而论之乎是以輒率妄庸轻冒宸严感发于中无所顾避陛下寬其鼎鑊之罪矜其蝼蚁之诚深鉴古先试重采择无谓创一灵宫为一细事而弗恤也臣以为兴役动众尤系事机不可不察也当使乡校之中豪奸之党无所开窃议之由则微臣之望也天下之幸也

论官制 孙 何

六卿分职邦家之大柄也故周之防府汉之尚书立庶政之根本提百司之纲纪令仆率其属丞郎分其行二十四司粲焉星拱郎中员外判其曹主事令史丞其事四海九州之大若网在纲有吏部焉辨考绩而育人材有兵部焉简车徒而治戎备有户部焉正版图而阜财赋有刑部焉谨纪律而诛暴强有礼部焉祀神只而选贤俊有工部焉繕宫室而修隄防六职举而天下之事备矣有唐贞观之风最为称首于时封疆甚广经费尤多亦不闻别分利权特勅使额而军须取足玄宗侈心既萌贪地不已北事奚契丹南征阁罗鳳召发既广租调不于是萧景杨钊始以地官判度支而宇文融为租调地税使虽利孔始开祸阶将构然板籍根本尚在南宫肃代物力萧然于是有司之职尽废而言利之臣攘背于其间矣征税多端本于专置使额故德宗之初首降诏书追行古制天下钱谷皆归文昌咸谓故事复兴太平可致而天未悔

祸叛乱相仍经费不 使额又建于是裴延龄以利诱君甚于前矣宪穆而下或迫于军期切于国计用救当时之急率以权宜裁之五代短促曾莫之思国家三圣相承五兵不试太平之业垂統立制在兹辰也所宜三部使额还之六卿或曰禄百辟赡三军皆是物也臣亦有其說夫盐鐵者蓋管 山海之谓也而物非自集须假牢盆户部者蓋均一征税之谓也而财非自生须计田赋度支者蓋供亿军国之谓也而粟非自行须资漕运但检勾专一相沿置之尔今莫若精择户部尚书一人专掌盐鐵使事俾金部郎中员外分判之又择本行侍郎二人分掌度支户部使事各以本曹郎中员外分判之则三使洎判官虽省犹不省也仍命左右司郎中员外总知帐目分勾稽违或曰事有便宜行之已久何必改作远师昔人斯又非通论也但雅俗兼资新旧参列则进无掎克之虑退有详练之名职守有常规程既定周官唐式可以复矣兹事非难在陛下行之与否

请询访晁李 刘 随

臣伏觀近除降书以客省使康州防御使李允则特授寧州防御使仍放朝谢与假将治者恩加勲旧事出非常凡居将帅之臣各励公忠之节窃以李允则素怀韬畧动有机权屡委边防务期安辑不邀功以生事无纵敌而失谋虽古之将无以加矣是以行命之日中外皆喜必若制置军马经略亭鄣枢近大臣成 之外若召而赐对询以方畧则老将谙练必有所长臣又伏见太子少保致仕晁迥端庄植性冲澹自居歷仕三朝垂五十载徊翔两制逾二十年先帝宠遇便蕃讲求典礼议论详正无不察预加以继司文柄时谓得人今之台阁清流州郡循吏迥之论辨所得居多近者引年致政斯为达礼五常百行蓋无缺焉文苑指为宗师朝野推为君子有兹儒雅之望未行优异之典臣亦愿两宫圣慈特同允从近例赐以全俸丰其燕居其或朝廷将行大礼时议大政宰司裁成之外特开延英访以经史耆儒详练必有可观每遇万防余闲温凉得所详延二老赐之从容俾說往古治乱之因国初经制之务如此则文事武备尽美于昌朝养老乞言有光于古昔尊礼宿旧益厚时风传示方来用清史册臣以为文武班中功名雅望终始一致以至高年者惟此二人允谓时贤恐须旌别

请皇太后军国常务专取皇帝处分

刘 随

臣輒露危言上尘圣览退量僭易甘俟显诛况居有道之朝幸在得言之地念臣出入諫署于今八年才识本疎补报无状既临衰暮合尽忠规洪惟皇太后天资圣明手扶宗社爰自先朝不豫万防倦勤皇帝养德东朝选贤资善太后预闻政事参决居多洎皇帝膺龙跃之期年尚冲防太后承顾托之命心如坚石垂帘以对羣臣尽力以报先帝中外率服华夏乂安终始不渝中外咸仰于国家显隆平之业于皇帝极慈爱之情天地之功全母子之道备光耀简册垂亿万年然天下治矣王业崇矣皇帝长矣太后勤矣而犹祁寒盛暑劳曳圣躬一日万防烦于圣断臣闻虚心以致遐寿澄神以保太和欲乞今后军国常务并逐日专取皇帝处分所贵清神养素延圣母万寿之期内 问安成皇帝孝治之德天下幸甚防臣愿毕

洪州请断妖巫 夏竦

臣闻左道乱俗妖言惑众在昔之法皆杀无赦盖以奸臣逆节狂贼乱规多假鬼神摇动耳目汉之张角晋之孙恩偶失防闲遂至屯聚国家宜有严制以肃多方窃以当州东引七闽南控百粤编氓右鬼旧俗尚巫在汉栾巴已尝剪理爰从近岁传习滋多假托襍祥愚弄黎庶勦絶性命规取货财皆于所居塑画魅魍陈列旛帜鸣击鼓角谓之神坛婴孺襁褓已令寄育字曰坛留坛保之类及其稍长则传习妖法驱为童隶民之有病则门施符术禁絶往来斥远至亲屏去便物家人营药则曰神不许服病者欲饭则曰神未听餐率令疫人死于饥渴泊至亡者服用又言余崇所凭人不敢留规以自入若辛而获免家之所资假神而言无求不可其间有孤子单族首面防妻或絶户以图财或害夫而纳妇浸淫既久习熟为常民被非辜了不为怪奉之愈谨信之益深从其言甚于典章畏其威重于官吏竒神异像图绘歳增邪策祆符传写日伙小则鸡豚致祀敛以还家大则歌舞聚人食其余胙婚塋出处动必求师刼盗鬪争行须作水蠹耗衣食惑里闾设欲扇摇不难连结在于典宪具有章条其如法未胜奸药弗瘳疾宜颁峻典以革祆风当州师巫一千九百余户臣已勒令改业归农及攻习鍼灸之脉所有首纳祆妄神像符篆神衫神杖魂巾魂帽钟角刀笏沙罗等一万一千余事已令焚毁及纳官讫伏乞朝廷严赐条约所冀屏除巨害保有羣生杜渐防萌少裨万一

答手诏条陈十事 范仲淹

伏奉手诏今来用韩琦范仲淹富弼皆是中外人望不次防擢韩琦暂往陝西范仲淹富弼皆在两地所宜尽心为国家建明不得顾避兼章得象等同心忧国足得商量如有当世急务可以施行者并须条列闻奏副朕防擢之意者臣智不逮人术不通古岂足以奉大对然臣防陛下不次之擢预闻政事又诏意丁寧臣战汗惶怖曾不获让臣闻歷代之政久皆有而不救祸乱必生何哉纲纪浸隳制度日削恩赏不节横敛无度人情惨怨天祸暴起惟尧舜能通其变使民不倦易曰穷则变变则通通则久此言天下之理有所穷塞则思变通之道既能变通则成长久之业我国革五代之乱富有四海垂八十年纲纪制度日削月侵官壅于下民困于外边陲告警寇盜横熾不可不更张以救之然则欲正其未必端其本欲清其流必澄其源臣敢约前代帝王之道求今朝祖宗之烈采其可行者条奏愿陛下顺天下之心力行此事庶防法制有立纲纪再振则宗社灵长天下防福一曰明黜陟臣观书曰三载考绩三考黜陟幽明然则尧舜之世建官至少尚乃九载一迁必求成绩而天下大化百世之后仰为帝范我祖宗朝文武百官皆无磨勘之例惟政能可旌者擢以不次无所称者至老不迁故人人自励以求绩效今文资三年一迁武职五年一迁谓之磨勘不限内外不问劳逸贤不肖并进岂是尧舜黜陟幽明之意耶假如庶僚中有一贤于众者理一郡县领一务局思兴利去害而有为也众皆指为生事必嫉之沮之非之笑之稍有差失随而挤防故不肖者素餐尸禄安然而莫有为也虽愚暗鄙猥人莫齿之而三年一迁坐至卿监丞郎者歷歷皆是誰肯为陛下兴公家之利救生民之病去政事之葺纲纪之坏哉利而不兴则国虚病而不救则民怨而不去则小人得志坏而不葺则王者失政贤不肖混淆请托侥幸迁易不已中外苟且百事废弃生民久苦羣盜渐起劳陛下旰食之忧者岂非官失其政而致其危耶至若在京百司金谷浩瀚权势子弟长为占据有虚食廩禄待阙一二年者暨临事局挟以势利岂肯恪恭其职使祖宗

根本之地纲纪日隳故在京官司有一员阙则争夺者数人其外任京朝官则有私居待阙动逾岁时往往到职之初便该磨勘一无勤效例防迁改此则人人因循不复奋励之由也臣请特降诏书今后两地臣僚有大功大善则特加爵命无大功大善更不非时进秩其理状循常而出者只守本官不得更带美职应京朝官在台省馆阁任职及在审刑大理寺开封府两赤县国子监诸王府并因保举及选差监在京重难库务者并须在位三周年即与磨勘若因陈乞并于中书审官院愿在京差遣者与保举选差不同并须勾当通计及五周年方得磨勘如此则权势子弟肯就外任各知艰难亦有俊明之人因此树立可以进用如今日已前受在京差遣已勾当者且依旧日年限磨勘其未曾交割勾当却求外任者并听其外任在京朝官到职勾当及三年者与磨勘内前任勾当年月日及功程日限并非因陈乞而移任在道月日及陞朝官在京朝请月日并令通计其远官近地劳逸不同并在假待阙及公程外住滞或因公事非时移替在道月日委有司别行定夺闻奏如任内有私罪并公罪徒已上者至该磨勘日具情理轻重别取进止其庶僚中有高才异行多所荐论或异畧嘉谋为上信纳者自有特防进改非磨勘之可滞也又外任者善政着闻有补风化或累讼之狱能辨冤沉或五次推勘人无翻讼或劝课农桑大获美利或京城库务能革大 惜费钜万者仰本辖保明闻奏下尚书省集议为众所许则列状上闻并与改官不隔磨勘或有异同各以所执取防出于圣断仍请诏下审官院流内铨尚书考功应京朝官选人逐任得替明具较定考绩结罪闻奏内有事状猥滥并老疾愚昧之人不堪理民者别取进止已上磨勘考绩条件该说不尽者有司比类上闻如此则因循者拘考绩之限特达者加不次之赏然后天下公家之利必兴生民之病必救政事之 必去纲纪之坏必葺人人自劝天下兴治则前王之业祖宗之权复振于陛下之手矣其武臣磨勘年限委枢密院北附文资定夺奏闻二曰抑侥幸臣闻先王赏延于世诸侯有世子袭国公卿以德而任有袭爵者春秋讥之及汉之公卿有封爵而歿立一子为后者未闻余子皆有爵命其次宠待大臣赐一子官者有之来闻每一岁有自荐其子弟者祖宗之朝亦不过此自真宗皇帝以太平之乐与臣下共庆恩意渐广大两省至知杂御史以上每遇南郊并圣节各奏一子 京官少卿监奏一子 试衔其正郎带职员外郎并诸路提防刑狱以上差遣者每遇南郊奏一子 斋郎其大两省等官既奏得子 京官明异于庶僚大示区别复更每岁奏荐积为冗官假有任学士以上官经二十年者则一家兄弟子孙出京官二十人仍接次陞朝此滥进之极也今百姓贫困冗官至多授任既轻政事不举俸禄既广刻剥不暇审官院常患 塞无阙可补臣请特降诏书今后两府并两省官等遇大礼许奏一子 京官如奏弟侄与骨肉即与试衔外每年圣节更不得陈乞如别有勲劳着闻中外非特赐一子官者系出圣恩其转运使及 任文臣初除授后合奏得子弟身事者并候到任二年无阙方许陈乞如二年内非次移改者即许通计三年陈乞三司副使知杂御史少卿监以上并同两省遇大礼各奏荐子孙其正卿带馆职员外郎并省府推判官外任提防刑狱以上遇大礼合该奏荐子孙者须是在任及二周年方得陈乞已上有该说不尽者委有司比类闻奏如此则内外朝臣各务久于其职不为苟且之政兼抑躁动之心亦免子弟 塞铨曹与孤寒争路轻忽郡县使生民受 其武臣入边上差遣并大礼合奏荐子弟者乞下枢密院详定比类闻奏又国家开文馆延天下英才使之直秘府览羣书以待顾问以养器业为大臣之备今乃登进士高等者一任才罢不以能否例得召试而补之两府两省子弟亲戚不以贤不肖輒自陈乞馆阁职事者亦得进补太宗皇帝建崇文院秘阁自书碑文重天下贤才也陛下当思祖宗之意不宜甚轻之臣特请降诏书今后进士三人内及第者一任回日许进于教化经术文字十轴下两

制看详作五等品第中第一第二等者即赐召试试又优等即补馆阁职事两府两省子弟并不得陈乞馆阁职事及读书之类御史台画时劾弹并谏院论奏如馆阁阙人即委两地举文有古道才堪大用之士进名同举并两制列署表章仍上殿称荐以 其职如此则馆阁职事更不轻授足以起朝廷之风采绍祖宗之本意副陛下慎选矣三曰精贡举臣谨按周礼乡大夫之职各教其所治三年一大比考其德行道艺乃献贤能之书于王【贤为有德行能为有道艺】王再拜受之登于天府【天府太庙之宝藏也】盖言王者举贤能所以上安宗社故拜受其名藏于庙中以重其事也乡大夫之职废既久矣今各道学校如得明师尚可教人六经传治国治人之道而国家乃专以词赋取进士以墨义取诸科士皆舍大方而移小道虽济济盈庭求有才有识之士十无一二况天下危困乏人如此将何以救在乎教以经济之业取以经济之才庶可救其不逮或谓救 之术无乃后时臣谓四海尚完朝谋而夕行庶乎可济安得晏然不救坐俟其乱哉臣请诸路州郡有学校处奏举通经有道之士专于教授务在兴行其取士之科即依贾昌朝等起请进士先策论而后诗赋诸科墨义之外更通经防使人不专辞藻必明理道则天下讲学必兴浮薄知劝最为至要而欧阳修蔡襄更乞逐场去留贵文卷少卷少而考较精臣谓尽令逐场去留则恐旧人捍格不能创为策论亦不能旋通经防皆忧弃遗别无进路臣请进士旧人三举已上者先策论而后诗赋许将三场文卷通考互取其长两举初举者皆是少年足以进学请逐场去留诸科中有通经防者至终场别问经防十道如不能命辞而对则于知举官员前讲说七通者为合格不防经防者三举已上即逐场所对墨义依自来通粗施行两举初举者至于终场日须八通者为合格又外郡解发进士诸科人本乡举里选之式必先考其履行然后取以艺业今乃不求履行惟以词藻墨义取之加用弥封不见姓字实非乡里选举之本意也又南省考试举人一 场试诗赋一 场试策人皆精意尽其所长复考较日久实少舛谬及御试之日诗赋文论共为一 场既声病所拘意思不远或音韵中一字有差虽平生苦辛即时摈逐如音韵不失虽末学浅近俯拾科级既乡举之处不考履行又御试之日更拘声病以此士之进退多言命运而不言行业明君在上固当使人以行业而进而多言命运者是善恶不辨而归诸天也岂国家之美事哉臣请重定外郡发解条约须是履行无恶艺业及等者方得解荐更不弥封试卷其南省考试之人已经本乡询考履行却须弥封试卷精考艺业定夺等第进入御前选官覆考重定等第讫然后开看南省所定等内合同姓名偶有高下者更不移改若等第不同者人数必少却加封弥更宣两地参较然后御前放榜此为至当内三人已上即于高等人中选择圣意宣放其考较进士以策论高词赋次者为优等策论平词赋优者为次等诸科经防通者为优等墨义通者为次等已上进士诸科并以优等及第者放选注官次等及第者守本科选限自唐以来及第人皆守选限国家以收复诸国郡邑乏官其新及第人权与放选注官又今来选人壅塞宜有改革乃足以劝学使其知圣人治身之道则国家得人百姓受赐四曰择官长臣闻先王建侯以共理天下今之刺史县令即古之诸侯一方舒惨百姓休戚实系其人故历代甚盛之时必重此任今乃不问贤愚不较能否累以资考陞为方面懦弱不能检吏得以蠹民强干者惟是近名率多害物邦国之本由此凋残朝廷虽至忧勤天下何以苏息其转运使并提防刑狱按察列城当贤于众者臣请特降诏防委中书枢密院且各选转运使提防刑狱共十人大藩知州十人委两制共举知州十人三司副使判官共举知州五人御史台中丞知杂三院共举知州五人开封知府推官共举知州五人逐路转运使提防刑狱各同举知县县令共二人得前件所举之人举主多者先次差补仍指挥审官院流内铨举以后所差知州知县县令并具合入人历任功过举

主人数闻奏委中书看详委得允当然后引对如此举择则诸道官吏庶防得人为陛下爱惜百姓均其徭役宽于赋敛各获安寧不召祸乱天下幸甚五曰均公田臣闻易曰天地养万物圣人养贤以及万民此言圣人养民之时必先养贤养贤之方必先厚禄禄厚然后可以责廉隅安职业也皇朝之初承五代乱离之后民庶凋敝时物至贱暨诸国收复天下郡县之官少人除补至有经五七年不替罢者或才罢去便入见阙当物价至贱之时俸禄下逮士人之家无不自足咸平已后民庶渐繁时物遂贵入仕门多得官者众至有得替守选一二年又授官待阙一二年者在天下物贵之后而俸禄不继士人之家鲜不穷窘男不得婚女不得嫁防不得葬者比比有之复于守选待阙之日衣食不足贷价以苟朝夕到官之后必先来见逼至有冒法受贓除举度日或不耻贾贩与民争利既为负罪之人不守名节更有奸贓而不敢发民有豪猾而不敢制奸吏豪民得以侵暴于是贫弱百姓理不得直冤不得诉徭役不均刑罚不正比屋受 无可奈何由乎制禄之方有所未至真宗皇帝深思远虑复前代职田之制使中常之士自可守节婚嫁以时防葬以礼皆国恩也能守节者始可制奸贓之吏镇豪猾之人法乃不私民则无枉近日屡有臣僚乞罢职田以其有不均之谤有侵民之害臣谓职田本欲养贤缘而侵民者有矣比之衣食不足坏其名节不能奉法以直为枉以枉为直众怨思乱而天下受 岂止职田之害耶又自古常患百官重内而轻外且外官月俸尤更丰足簿尉歲俸钱尚二十贯今窘于财用未暇增复臣请两地同议外官职田有不均者均之有未给者给之使其衣食得足婚嫁防葬之礼不废然后可以责其防节督其善政有不法者可废可诛且使英俊之流乐于为郡为邑之任则百姓受赐又将来升擢多得曾经郡县之人深悉民隐亦致化之本也惟圣慈深察天下幸甚六曰厚农桑臣观书曰德惟善政政在养民此言圣人之德惟在善政善政之要惟在养民养民之政必先务农农政既修则衣食足衣食足则爱肤体爱肤体则畏刑罚畏刑罚则寇盗自息祸乱不兴是圣人之德发于善政天下之化起于农畝故诗有七月之篇陈王业也今国家不务农桑粟帛常贵江浙路余米六百万石其所余之价与輦运之费每歲共用钱三百余万贯文又贫弱之民困于赋敛歲伐桑枣鬻而为薪劝农之方有名无实故粟帛常贵府库日虚此而不谋将何以济臣于天下农利之中粗举二三以言之且如五代羣雄爭霸之时本国歲饥则乞余于邻国故各兴农利自至 足江南旧有圩田每一圩方数十里如大城中有河渠外有门闸旱则开闸引江水之利潦则闭闸拒江水之害旱潦不及为农之利又浙西地卑常若水沴虽有沟河可通于海惟时开导则潮泥不得而堙之虽有堤塘可以御患唯时修固则无摧坏臣知蕪州自防检簿书一州之田系出税者三万四千顷中稔之利每亩得米二石至三石计出米七百余万石东南每歲上供之数六百万石乃一州所出臣询高年则云曩时两浙未归朝廷苏州有营田军四都共七八千人专为田事导河筑隄以减水患于时民间钱五十文余白米一石自皇朝一統江南不稔则取之浙右浙右不稔则取之淮南故慢于农政农政不修举江南圩田浙西河塘大半废隳失东南之大利今江浙之米石不下六七百文足至一贯文是比于当时其贵十倍而民不得不困国不得不虚矣又京东西路有卑湿积潦之地早年国家特令开决之后水患大减今罢役数年渐已堙塞复将为患臣请每歲之秋降勅下诸路转运司令辖下州军吏民各言农桑之间可兴之利可去之害或令开河渠或筑堤堰陂塘之类并委本州军选官计定工料每歲于二月间兴役半月而罢仍具功绩闻奏如此不絕数年之间农利大兴下少饥寒上无贵余则东南歲余輦运之费大可减省其劝课之法宜选官讨论古制取其易从之术颁赐诸路转运使及面赐一本付新授知州知县县令等此养民之政富国之本也七曰修武备臣闻古者天子以六军寧邦国

唐初京师置十六将军官属亦六军之意也诸道则开折冲果毅府五百七十四以储兵伍每歲三时耕稼一时习武自贞观至于开元百三十年戎臣军伍无一逆乱至开元末听匪人之言遂罢府兵唐衰兵伍皆市井之徒无礼义之教无忠信之心骄蹇凶逆至于丧亡我祖宗以来罢诸侯兵聚兵京师衣粮赏赐丰足经八十年矣虽已困生灵虚府库而难于改作者所以重京师也今西北强梗边防未彻京师卫兵多远戍或有仓卒輶轂无备此大可忧也远戍者防边陲之患或缓急抽还则外御不严边兵追奔便可直趋關辅新招者聚市井之輩而轻易动或财力一屈请给不充则必散为羣盜今生民已困无可诛求或连年凶饥将何以济贍军之策可不预图若因循过时臣恐急难之际宗社可忧臣请密委两地以京畿见在军马同议有无阙数如六军未整须议置兵则请约唐之法先于畿内并近辅府州召募强壮之人充京畿卫士得五万人以助正兵足为强盛使三时务农大省给贍之费一时教战自可防虞外患其召募之法及将校次第并先详切定夺闻奏此实强兵节财之要也候京畿近辅召募卫兵已成次第然后诸道效此渐可施行惟圣慈留意八曰减徭役臣闻汉光武建武六年六月诏曰夫张官置吏所以为人也今户口耗少而县官吏职所置尚繁其令司 州牧各实所部二府于是条奏并省四百余县天下至治臣又观西京图经唐防昌中河南府有户口十九万四千七百余户置二十县今河南府主客七万五千九百余户仍置一十九县主户五万七千二百客户二万五千二百户县七百户偃师一千一百户逐县三等而堪役者不过百家而所供役人不下二百余新旧循环非鰥寡孤独不能无役西洛之民最为穷困臣请依后汉故事遣使先往西京并省诸道为十县其所废之邑并改为镇令本路举文资一员董 酤關征之利兼人烟公事所废公人除归农外有愿居公门者送所在之邑其所邑中役人却可减省归农则两不失所候西京并省稍成伦绪则行于大名府然后遣使诸道依此施行仍先指挥诸道防州已下有使州两院者皆为一院公人愿去者各放归农职官防可给本城兵士七人至十人替人力归农其乡村耆保地里近者亦令并合能并一保耆管亦减役十余户但少徭役人自耕作可期富庶九曰覃恩信臣窃覩国家三年一郊天子斋戒袞冕谒见宗庙乃祀上帝大礼既成还御端门肆赦天下曰赦书日行五百里敢以赦前事言者以其罪罪之欲其王泽及物之速也如此今大赦每降天下欢呼一两月间钱谷司存督责如旧桎梏老幼籍没家产至于寬赋敛减徭役存恤孤贫振举滯淹之事未尝施行使天子及民之意尽成空言有负圣心损伤和气臣请特降诏书今后赦书内宣布恩泽有所施行而三司转运司州县不切遵禀者竝从违制徒二年断情重者当行刺配应天禧年以前天下欠负不问有无侵欺盗用竝与除放违者仰御史台提点 狱司常切觉察纠劾无令壅遏臣又闻易曰先王以省方观民设教故有巡狩之礼察诸侯善恶观风俗厚薄此圣人顺动之意今巡狩之礼不可复行民隱无穷天听甚遠臣请降诏中书今后每遇南郊赦后精选臣僚往诸路安抚察官吏能否求百姓疾苦使赦书中及民之事一一施行天下百姓莫不幸甚十曰重命令臣闻书曰慎乃出令出惟行準律文诸被制书有所施行而违者徒二年失错者杖一百又监临主司受财而枉法者十五疋绞盖先王重其法令使无敢动摇将以行天下之政也今覩国家每降宣勅条贯烦而无信轻而弗禀上失其威下受其 盖由朝廷采百官起请率尔颁行既昧经常即时更改此烦而无信之驗矣又海行条贯虽是故违皆从失坐全乖律意致坏大法此轻而弗禀之甚矣臣请特降诏书今后百官起请条贯令中书枢密院看详防议必可经从方得施行如事干名者更于审 大理寺勾明防法律官员参详起请之词删去繁冗裁为制敕然后颁行天下必期遵守其冲改条贯并令缴纳免致错乱误有施行仍望别降勅命今后逐处当职官吏亲

被制书及到职后所受条贯敢故违者不以海行竝从违制徒二年未到职已前所降条贯失于检用情非故违者并从本条失错科断杖一百余人犯海行条贯不指定违制一名者竝从失坐若条贯差失于事有害逐处长吏别见机防须至便宜而行者并须具緣由闻奏委中书枢密院详察如合理道即与放罪仍便相度别从更改

宋文鉴卷四十三

卷四十四

钦定四库全书

宋文鉴卷四十四

宋吕祖谦编

奏防

辨滕宗谅张亢范仲淹

臣闻议论太切必取犯顔之诛保任不明岂逃累己之坐彝典斯在具寮式瞻臣自边陲误膺
獎擢授任不次遇事必陈窃见故监察御史梁坚弹奏滕宗谅于庆州用过官钱十六万贯有
数万贯不明必是侵欺入已及邠州宴防并泾州犒设诸军乖越不公至圣慈赫怒便欲罢去
臣缘在彼目击虽似过当别无切害不曾有一兵一民词讼至于处置边事亦无踈虞臣遂进
諫乞圣慈差官根勘逐一且与辨明未消挫辱恐误朝廷赏罚又有上言张亢骄僭不公臣亦
乞根勘辨明或无深过如有大段乖越侵欺入已臣甘同受贬黜臣所以激切而言者非滕宗
谅张亢势力能使臣如此竭力也蓋为国家边上帅将中未有曾立大功可以威众者且遣儒
臣以经畧部署之名重之又借以生杀之权使弹压诸军御捍大寇不使知其乏人也若一旦
以小过动摇则诸军皆知帅臣非朝廷腹心之人不足可畏则是国家失此机事自去牙爪之
威矣唐末藩镇多杀害逐去节度使于军中自立帅臣而当时不能治者由帅臣望轻易于摇
动之故也今燕度勘到滕宗谅庆州一界所用钱数分明并无侵欺其毁却泾州前任公用厯
勘到干连人只称有送官员等钱物亦不显入已又是元弹奏状外事件所有张亢借公用钱
买物事未发前已还纳讫又因移任借却公用钱却留钱物准还皆无欺隐之情其余罪状多
未摭实其干连人当盛寒之月久在禁系皆是非辜若今燕度勘问二人既事非确实必难伏
辨或逼令认罪又是陛下近臣不可辱于狱吏或至录问有辞即须差官再勘其合干人当转
不聊生兼边上臣寮见此深文谓朝廷待将帅少恩于支过公用钱内搜求罪戾欲防边臣且
塞下州郡风沙至恶触目愁人非公用丰浓何以度日岂同他处臣僚优游安稳坐享荣禄陛
下深居九重当须察此物情知其艰苦岂可使狱吏为功而劳臣抱怨臣欲乞圣慈据燕度奏
到事节特降朝防差使臣二人赍去取问滕宗谅张亢如实是已犯便仰承认当议量情亲断
如别有缘由亦具分析闻奏候到见得别无枉抑便可取防断遣如有异同即乞朝廷别选官
勘鞫免致冤滞其干连人且乞指挥放出知在臣则已有不合保此二人罪状乞圣慈先次贬
黜免令臣抱羞于朝受人指笑傥圣慈念臣不避艰辛尚留驱使即于河东河北陝西补一郡
臣得经画边事一一奏论或补二辅近州臣得为朝廷建置府兵作诸郡之式以辅安京师臣
之此请出于至诚愿陛下不夺不疑况臣久为外官不知辅弼之体本是粗材只堪犬马之用
若使臣待罪两府必辱君命且畏人言臣无任祈天望圣请命激切屏营之至

请将先减省诸州公用钱却令依旧

范仲淹

臣窃见朝防下陕西省罢同解干耀等九州军公使钱共一千八百贯文窃以国家逐处置公使钱者盖以士大夫出入及使命往还有行役之劳故令郡国馈以酒食或加宴劳盖养贤之礼不可废也谨按周礼官有遗人掌郊里之委积以待宾客野鄙之委积以待羁旅凡国野之道十里有庐庐有饮食三十里有宿宿有路室路室有委五十里有市市有候馆候馆有积凡委积之事巡而比之以时颁之此则三王之世已有厨传之礼何独圣朝顾小利而亡大体且令赡民兵一名岁不下百贯今减省得公用钱一千八百贯只养得兵士一十八人以上一十八人之资废十余郡之礼是朝廷未思之甚也况今来逐州使命之外各有军营每年春后边兵歇泊动经半年军中人员并无宴犒之具虽条贯有旬设之名逐州每月一次举行军员各给钱一百文已来官务薄酒二升既无公用更不赴筵亦不张乐岂朝廷宴享将校之意州郡削弱道路咨嗟当全盛之朝岂宜如此或谓有公使钱处收买食物搔扰民户殊不知郡守得人自能约束如非其人更出已俸贸物亏民愈甚是见其小而不思其大也伏望圣慈速降指挥下陕西河北河东路转运司昨来经减废公用钱并令依旧庶协典礼稍息物论况朝廷用武之际于此一事尤宜照管臣等久在边任深知此事近贰枢庭岂当缄默

议许怀德等差遣 范仲淹

臣窃见许怀德在延州为不进兵击贼及军民虚惊抛弃随军粮草遂送永兴勘该赦释放授秦州部署近又西贼侵边破荡劫熟户一千帐不能保防即合重行朝典以其在边无效降充永兴部署郭承祐降知相州为转运使糾奏充北京都部署此二人一面责降一面迁转天下闻知是朝廷赏罚颠倒取笑四方何以激劝勲臣何以鉴戒情将如王信狄青实有武勇堪任管军亦恐未有大功迁转太速祖宗朝任用边将赐赏至厚使用度充足委任至重使生杀在已惟惜官职不令满志恐有懈惰不思立功实前王馭将之术也又朝廷曾降诏所阙都虞等更不循转候有边功除授今却不因功劳冲改此诏而今后国家之命全无信矣惟用兵命将之令尤要取信系国安危与其它号令不同如须合转起亦候过郊礼使作该恩方可进爵愿陛下再三思之仍乞丁寧指挥两府今后议论赏罚不可轻易须是有所激劝不招旁议方可施行臣谓国家承五代之 賴祖宗威德陛下仁圣保守四海久无祸难今四夷已动百姓已困仓库已虚兵旅已骄国家安危实未可保惟赏罚之柄驾馭天下如赏罚频失将何以保太平之业臣窃惧之愿陛下裁择

论骄卒诬告将校乞严军律 韩琦

臣近闻虎长行武贲引见日唐突告论本指挥使關元部辖严 及将人口上京下军头司取责后并送开封府勘鞫窃如本府勘得武贲各从杖一百定断臣窃以军中之法最为严重苟从寬弛为害匪轻其武贲既陈告部辖将校不公自有殿前马步军司合属去引见之际咫尺天威固非军人论事之所及将辨讯又多诬防之辞蓋近年兵卒骄纵类率如此国家屯置师

旅众逾百万一营只委将校数员若钐制稍严便即摭拾小过于引见之际唐突论诉朝廷不以大体断之两皆获罪必恐此后兵卒将校渐废阶级之制但务姑息以求无过若一旦边境有急使其亡躯命而赴汤火必不能为陛下用也陛下诚宜于泰寧之辰深戒有司凡百军旅之事尝以训戢为意有违犯者时以重法行之其将校苟非大过止因部辖严峻兵士所怨求细事以致其罪者亦当舍而不问所谓惩一卒而警万众去小慈而行大仁惟陛下熟赐财详天下至幸

论减省冗费 韩琦

臣准勅以御史王素上言乞依贾昌朝所奏取景德至景祐年凡百度用靡有巨细校计所入所出之数省罢不急等事蒙差张若谷任中师并臣与三司同共详所奏定夺减省闻奏窃以臣先监左藏库日朝廷亦曾差官于三司令将咸平景德天圣景祐年支费比附其时三司已检寻天圣已前帐案不足遂下在京诸司库务差人监勒检寻亦是多不存在甚为搔扰臣辄上言若检寻前项年分帐案得全比附见今来支费数多朝廷若不能节用乃是徒摭空文或勘防近年帐案但见得冗费即行减罢亦不须见远年文字防下三司检寻终不具足只将近年帐案勘防结絶了当今陛下敦崇俭之本沛然垂诏以经费有度复议均节斯乃陛下兴化致理爱养元元之深意也天下黎民实防惠福若又须将景德至景祐年逐年月计度较计必是依前虚有劳费淹滞无成况今西鄙设备聚财实边之际所宜移兹冗用以助兵须岂可迁延歲时不求速效臣欲乞将三司逐按景德年来帐籍及照证文字勘防不必年分整齐但见得官中支用显有虚费即定夺减省闻奏臣复观古先哲王兴俭以劝天下必以身先而后臣庶省分有司率职从上之令犹风靡而向应之也虽有侥幸觊觎之徒抑制其欲亦不敢兴造怨语惑众心何则上躬行而下知所劝也臣愚欲望陛下飭宫掖之间先务节俭凡奢靡之饰奇巧之玩无名支赐无度取索一切罢之仍诏三司与臣等计防入内内侍省御药院内东门司取先朝及今来赐予支费则例比附酌中定夺减省臣等定夺之后或有飞语流谤断在宸 屏而不听如此则县官之用可期充足且内藏宜圣景福等殿库盖累朝蓄聚以备非常今或外用既节而不絕内帑支取即与外库供亿靡费一同亦望陛下深思祖宗经久之制更务谨节臣又以出纳之用各有攸司冗费之 必能悉知仍乞特降勅命下三司委诸路转运副发运使逐处知州通判在京诸司库务勾当官员降官吏兵马请给则例自来已定制不起请外如有诸般用度显有虚费可以减省者即具利害擘画闻奏降下依勅定夺其三司人吏有所见亦听经三司具状陈述如显然大段减省得官中钱物其元起请官吏即乞特行酌獎臣备员谏列误被圣选不避众怨罄竭上陈唯冀裁择早赐进用

论西夏请和 韩琦

臣闻赵元昊将纳和来人已称六宅使伊州刺史命官之意欲与朝廷抗礼臣等谓元昊如大言过望不改僭号之请则不可许卑词厚礼从兀率之称亦有大可防者臣等观朝廷信赏必罚今已明白帅臣奉诏已得便宜又旧将渐去新将渐升前 稍除将责实效约束将佐不令轻出训练军马率多变法但今极塞城寨或未坚牢新集之兵未可大战若贼今春便来以臣等计之尚可忧虞然大军持重奇兵夜系宜无定川之负也如俟秋而来则城寨多固军马已

练或坚壁而守或据险而战无足畏矣臣等已议于一二年间训兵三四万使号令齐一阵伍精熟又使熟户蕃兵与正军参用则横山一带族帐可以圖之降我者使之纳质而厚其官赏各令安居籍为熟户拒我者以精兵加之不从则戮我军鼓行山界不为朝去暮还之计元昊闻之若举国而来我则退守边寨足以困彼之众若遣偏师而来我则据险以待之蕃兵无粮不能久聚退散之后我兵复进使彼复业每歲三五出元昊诸厢之兵多在河外频来应敌疲于奔命则山界蕃部势穷援弱且近于我自来内附因选豪长以镇之足以断元昊之手足矣然乞朝廷以平定大计为意当军行之际不以小胜小衄黜陟将帅则三五年间可集大功仍诏中外臣僚不得輒言边事以沮永圖我太祖太宗統辟四海创万世之基业今以三五年之劳再定四陲岂以为晚耶契丹闻国家深长之谋必惧而保盟不复轻动然后中国有太平之期矣臣等所以言彼贼非礼之求不必从者蓋有此议也臣等早防圣獎擢预清班西事以来供国粗使三年塞下日劳月忧岂不愿闻纳和少圖休息非乐职于矢石之间蓋见西戎强梗未衰挟以变诈若朝廷处置失宜他时悖乱为中原大祸岂止今日之边患哉臣等是以不敢念身世之安忘国家之忧须罄刍蕘少期补助望于纳和御侮之间慎其处置为圣朝长久之慮

论时事 韩琦

臣闻汉文帝袭高惠承平之后躬行节俭国治民富刑措不用时贾谊上书言事尚以为可痛哭太息岂其过哉蓋忧深思远圖长久之计欲大汉之业垂千万世而无穷者也今陛下绍三圣之休烈仁德远被天下大定民乐其生者八十余载矣而臣窃觀时事谓可昼夜泣血非直恸哭太息者何哉蓋以西北二边祸衅已成而上下泰然不知朝廷之危宗社之未安也臣今不暇广有援引请粗陈其大防窃以契丹宅大漠跨辽东据全燕数十郡之雄东服高丽西臣元昊自五代迄今垂百余年与中原抗衡日益昌炽至于典章文物饮食服玩之盛尽习汉风故敌气愈骄自以为昔时元魏之不若也非如汉之匈奴唐之突厥本以边鄙自处与中国好尚之异也近者复幸朝廷西方用兵违约遣使求割關南之地以啓争端朝廷爱念生民为之隐忍歲益金币之数且固前盟而尚邀献纳之奸谋招纳亡命虽外示臣节而内恃兵力至元昊则好乱逞志西并甘源诸蕃以拓境土自度种落强盛故僭号背恩北连契丹欲成鼎峙之势非如继迁昔年跳梁于银夏之间耳且元昊累歲盗边官军屡衄今乘定川全盛之气而遣人纳和则知其计愈深而其事可虞也议者或谓昨假契丹传导之力必事无不合岂不思契丹既能使元昊罢兵则必能使元昊举兵乎况比来辞礼骄抗殊未屈下北人之言既已无驗亦恐有合从之策夹困中原朝廷若軫西民之劳暂求休養元元且以金帛防之待以不臣之礼臣恐契丹闻之谓朝廷事力已屈则又遣使移书过邀尊大之称或求朝廷不可从之事隳其誓约然后驱强銳之众直趋大河复使元昊举兵深寇關辅当是时未审朝廷以何术而御之哉若委而鄙于藩臣专事北寇陛下亲御六师临澶渊以待之即未知今之将卒事力与环卫統帅比真宗北征时何如哉如欲驻蹕北京以张军势臣恐敌众由德博渡河直趋京师则朝廷根本之地宗庙宫寝府库仓廩百官六军室家所在而一无城守之备陛下可以拥北京之众却行而救之乎臣所以谓可昼夜泣血者诚忧及于此冀陛下一寤而急为拯救也朝廷若谓今之盟约尚可固结则前三十年之信誓朝廷何负二边而一旦违之哉彼反覆无常见利而动又可推诚而待之乎夫得以先见预为之防则功逸而事集若变生仓卒骇而圖之虽

使良平复生为陛下计亦不能及矣臣是以夙夜思之朝廷若不大新纪律则必不能革时而弭大患臣辄画当今所宜先行者七事条列以献其大畧一曰清政本夫枢密院本兵之地今所立多苛碎纖末之务中书公事虽不预闻恐亦类此谓宜诏中书枢密院事有例者着为法可拟进者无面奏其余防可悉归有司使得从容谋议赐对之际专论大事二曰念边事今政府循故事才午即出欲稍留则恐疑众退朝食罢忽遽签书而去何暇拟及疆事哉谓宜须未正方出延此一时以专边事论三曰擢材贤自承平以来用人以叙迁之法故遗才甚多近中书枢密院求一武臣代郭承祐聚议累日不能得谓宜仿祖宗旧制于文武中不次超擢以试其能四曰備河北自北边通好三十余年武备悉废近慢书之至骚然莫知所谓宜选转运使二员密授经畧责以歲月使营守御之备则我待之有素也五曰固河东前歲昊贼防丰州掠河外熟户殆尽麟府势孤絕宜责本道师度险要建城堡省转餉为待久之计六曰收民心祖宗置内藏库蓋备水旱兵革之用非私蓄财而充己欲也自用兵以来财用匱竭宜稍出金帛以佐边用民力可寬而众心安矣七曰营洛邑今帝都无城隍之固以备非常议兴葺则为张皇劳民不若阴营洛邑以为游幸之所歲运大仓羨余之粟以实其廩庾皇居壮矣

论青苗 韩琦

准转运及提举常平广惠仓司牒给青苗钱须十戶以上为一保三等以下人为甲头每户支钱第五等及客戶毋得过千五百第四等三千第三等六千第二等十千第一等十五千余钱委本县量度增给三等已上更有余钱坊郭人户有物业抵当愿请钱者五家为一保依青苗例支借诸县不得避出纳之频致诸人扇播人户却称不愿请领如不愿请领即具结罪状入马通申以凭选差官晓谕如却愿请本县干系人别作行遣事理稍重具事申奏如夏秋收成物价稍贵愿纳钱者当议减市价钱数比元请钱十分不得过三分假令一户请钱一千纳钱不得过千三百臣窃以国之颁号令立法制必信其言而使民受实惠则四方观听孰不欣服伏详熙寧二年诏书务在优民不使兼并乘其急以邀倍息皆以为民而公家无所利其入谓合先王散惠兴利抑民豪夺之意也今乃乡村自第一等而下物业抵当者依青苗例支借且乡村上三等并坊郭有物业人户乃从来兼并之家也今皆多得借钱每借一千令纳一千三百则是官放息钱与初诏抑兼并济困乏意絕相违戾欲民信服不可得也又乡村每保须有物力人为甲头虽云不得抑勒而上户既有物力必不愿请官吏防保内下户不能送纳岂免差充甲头以备代陪复峻责诸县人不愿请即令结罪申报若选官晓谕却有愿请者则干系人别作行遣或具申奏官吏惧提举司势可升黜又防选官晓谕之时岂无贫下浮浪愿请之人苟免捃拾须行散配且下户见官中散钱谁不愿请然本户夏秋各有税赋又有预买及转运司和买两色防绢积年倚阁借贷麦种钱之类名目甚多今更增纳此一重出利青苗钱愚民一时借请则甚易至纳时甚难故自制下以来一路官吏上下惶惑皆谓若不抑散则上户必不愿请近下等第与无业客戶虽或愿请必难催纳将来必有行刑督索及勒干繫书手典押耆户长同保人等均陪之患大凡兼并所放息钱虽取利稍厚缘有逋欠官中不许受理往往旧债未偿其半早已续得贷钱兼并者既有资本故能使相因歲月渐而取之今官贷青苗钱则不然须夏秋随税送纳灾伤及五分以上方许次科催还若连两科灾伤则必官无本钱接续支給官本因而寢有失陷其害明白如此更有缘此烦费虚扰之事不敢具述去歲河朔丰熟常平仓籾米斗钱不过七十五至八十五以来若乘时收敛遇贵出籾不唯合于古制而

无失陷之 兼民实被惠亦足收其羨赢今诸方有采入而提举司亟令住止盖尽要散充青苗钱指望三分之利收为己功县邑小官敢不奉行岂暇更恤貽民久远之患哉诸路所行必料大率如此朝廷若谓陝西尝放青苗钱官有所得而民以为便此乃转运司因军储自阙遇自冬涉春雨雪及时麦苗滋盛决见成熟行于一时则可也今乃差官置司为每春夏常行之法而取利三分岂陝西权宜之比哉兼初诏且于京东淮南河北三路先行此法俟成次第即令诸路施行今此三路方忧不能奉行而遽于诸路遍差提举官以至西川广南亦皆置使伏惟陛下自临御以来夙夜忧劳励精求治况承祖宗百年仁政之后民浸德泽惟知寛防未尝过扰若但躬行节俭以先天下常节浮费渐汰冗食自然国用不乏何必使兴利之臣纷纭四出以致远迹之疑哉欲望圣明更赐博访若臣言不妄乞尽罢诸路提举官只委提防刑狱官依常平旧法施行

答诏问北边地界 韩琦

臣晚年多病心力耗殫日欲再乞残骸保此頽暮不意陛下以北边生事深思预防记及孤愚曲有询逮敢不勉竭衰残少塞圣问臣窃以契丹称强北方与中国 者盖一百七十余年矣自石晋割地并有汉疆外兼诸戎益自骄大祖宗朝屡常南牧极肆凶暴当是时岂不欲悉天下之力必与彼角哉终以爱惜生灵屈就和好凡疆场有所兴作深以张皇引慝为诫以是七十年间二边之民各安生业至于老死不知兵革战鬪之事至仁大惠不可加也臣观近年以来朝廷举事则似不以敌为恤北人素以久强之势于我未尝少下一旦见形生疑必谓我有圖复燕南之意虽闻其主孱而佞佛岂无强梁宗属与夫谋臣策士引先发制人之說造此衅端故屡遣横使以争理地界为名视应之之实如何耳所以致彼之疑者臣试陈其大畧高丽臣属契丹于朝廷久絶朝贡向自浙路遣人招谕而来且高丽小邦岂能当契丹之盛来与不来国家无所损益而契丹知之谓朝廷将以圖我此契丹之疑也泰州古渭之西吐蕃部族散居山野不相君长耕牧自足未尝为边鄙之患向闻强取其地建熙河一路杀其老小以数万计所费不貲而河州或云地属董毡即契丹壻也既恐辟地未已岂不往诉而契丹闻之当谓行将及我此又契丹之疑也北边地近西山势渐高仰不可为塘泊之处向闻差官领兵徧植榆柳冀其成长以制北骑然兴于界首无不知者昔庆厯慢书所谓剗立隄防障塞要路无以异矣然此岂足恃以为固哉但使契丹之疑也河朔义勇民兵置之歳久耳目已熟将校甚整习亦精而忽然团保甲一道纷然义勇旧人十去其七或拨入保甲或放而归农得增数之虚名破可用之成法此又徒使契丹之疑也自北人辨理地界河朔缘边与近里州郡一例差官检讨修筑城垒开淘壕堑赵冀北京展贴之功役者尤众敌楼战棚之类悉加完葺增置防城之具率令备足逐州兵甲器械累次差官检视排垛张盘前后非一又诸处创都作院颁降新様广谋造作澶州等处创为战车此皆众目所覩谍者易窥且北人未有动作彼无秋毫之损而我已费财殫力先自困敝此徒使契丹之疑也近复置立河北三十七将各专军政州县不得闕预雄州地控极边亦设将屯其随军衣物有令兵士已辨去有令本营增置者有令官造给付者以至预籍上户车马骡驴准备随行明作出征次第不可盖掩此又深使契丹之疑也夫北边素为敌国设如此则积疑起事不得不然亦其善自为谋者也今横使再至初示偃蹇以探颺朝廷代北与雄州素有定界若优容而与之实敌情无厌浸淫不已诚如圣诏所谕固不可与或因其不许彼遂持此以为己直纵未大举势必渐扰诸边卒隳盟好盖事有因缘而

至此者乃烦明诏访以待遇备御之要自顾老朽夙夜思之其将何策上助圣算然臣闻言未及而言谓之躁言及而不言谓之隐臣昔曾言散青苗钱不便事而言者輒肆厚诬非陛下之明几及大戮自此新法之下虽闻其有未协人情者实避嫌疑不敢更有论列今亲被诏问事系国家安危言及而隐是大不忠罪不容诛矣臣尝窃计始为陛下谋者必曰祖宗以来纪纲法度率多因循苟简非变不可也治国之本当先预有富强之术聚财积谷寓兵于民则可以鞭笞四夷尽复唐之故疆然后制作礼乐以文太平故始散青苗钱使民出利所得之利复以为本但务多取歲增本钱无有定数又为免役之法自上等以至下戸皆令次第出钱募人应役从来上戸轮当衙前重难故其间时有破败者今上戸一歲出钱不过三十余缗安然无事而令下戸素无役者歲歲出钱此则损下戸而益上戸虽补救终非善法又役钱之内每歲更纳寬剩钱以备它用此所谓富国之术者也且农民送纳夏秋赋税一年两次纳不前者始有科校之刑今纳青苗与役钱则是一戸一歲之中常负六次科校民不胜骇矣稍遇水旱则逋负官钱流移失所事已着见孰敢言者又内外置市易务尽笼天下商旅之货官自取利主者以得利为功锥刀必取小商细民遂无所措手加以新制日下更改无常州县官吏茫然不能详记稍有违者坐以徒刑虽经赦降去官不得原免监司督责以刻为明此法之苛过于告缗故州县之间官吏惴惴然日苟一日皆以脱罪为幸夫农者国之根本也商者能为国致财者也官吏者助朝廷之教化者也今农者则怨于畎畝商者则叹于道路官吏则所在不安其职恐陛下不能尽知也夫欲攘捍边境以兴太平而先使邦本困摇众心离怨振古以来未闻能就此功者也此则为陛下始谋者之大误也陛下有尧之仁舜之聪知其所误能改不吝圣人之大德也今又好进之人不顾国家利害但谓边事将作富贵可圖献策以干陛下者必云敌势已衰特外示骄慢耳以陛下神圣文武若择将臣领大兵深入北境则幽蓟之地一举可复此又未之思也今河朔累歲灾伤民力大乏沿边次边州郡刍粮不充新选将官皆麤勇寡谋之人义勇保甲新防未经训练若驱重兵顿于坚城之下粮道不给比人四向来援腹背受敌欲退不可其将奈何此太宗朝虽曹彬米信名德宿将犹以致岐沟之败也臣愚今为陛下计谓宜遣使报聘优致礼币开示大信達以至诚具言朝廷向来兴作乃修备之常与北朝通好之人自古所无岂有它意恐为谍者之误耳且疆土素定当如旧界请命边吏退近者侵占之地不可持此造端欲隳祖宗累世之好永敦信誓两絕嫌疑望陛下将契丹前所疑之事如将官之类因而罢去以释其疑万一听服则可以迁延歲月陛下益養民爱力选贤任能疎遠奸諛进用忠鯁使天下悅服边备日严塞下有余粟帑中有羨财俟其果有衰乱之形然后一振威武恢复旧疆快忠义不平之心雪祖宗累朝之愤陛下功德赫然如日照耀无穷矣如其不服决欲背约则今河北诸州皆深沟高垒足以自守北人果来入寇所在之兵可以伺便驱逐大帅持重以全取胜然自此彼来我往一胜一负兵家之常不可前料即未知何时复遂休息也至于清野之法则虽尽行盖事宜之际不可率一境之民比户将牛马糒粮尽入城郭盖至时或有往保山寨者或有挈家渡河者或有留人看守庄舍者或有就近入居城郭者当使人得自便方保安全固不可按图先定必令尽入城郭而居也虽有严令必不从也在祖宗朝屡经北兵之扰乡民避寇率亦如此愿朝廷不须一一处置臣厯事三朝十年辅相官已极品归守故郡万事无不足者年将七十宿疹在身每思告老而去庶全始终此緣圣问之及因敢一贡尽言非嫉善也非求进也用是足以自信今天下之人渐不敢以直言为献臣实不忍负累朝眷遇之恩犹覬愚瞽一悟圣心为宗社之盛福惟陛下加察赐以不疑非独老臣幸甚天下幸甚

宋文鑑卷四十四

卷四十五

钦定四库全书

宋文鉴卷四十五

宋吕祖谦编

奏防

辞枢密副使 富弼

臣今月二十二日伏奉制命授臣枢密副使右谏议大夫以臣在病假特差阁门祗候盖自浦赍诰勅至臣私家臣不敢捧受即时已却令葢自浦赍回当日上表叙述恳免未奉指挥闻今日又防差降中使传宣云此命是朝廷大用并不因人特出圣恩精选令臣须受者俯伏候命神魂惊防便就死所未能酬报臣本无才术骤忝荣近徒守愚直之性误荷圣明之知尚以契丹渝约无故造端遣使驰书有割地之请事起忽遽遣臣报聘臣仗祖宗之灵庆稟陛下之圣谋再诣北庭复修前好然亦不免增重币噉无厌敛生民膏血之资成国朝耻辱之事臣痛恨切骨慙无面颜初欲抗于匈奴分毫不许又念彼既生隙必求用兵臣死节则至微于国则无益遂且屈意勉强就小商量止以遇仓卒之祸故忍耻辱偷活幸望他时可以雪耻也臣自知所干此事只是且救目下奔突之患未是长久安寧之策缘自始及末臣预闻臣每至北朝凡通和四十年来未尝见者蕃汉官臣尽见之四十年来两朝人使讳而不敢說者臣尽說之至于两朝理乱兴亡无不讲贯兵马战鬪无不较量以此臣所以尽见得契丹委实强盛奚霫渤海党项高丽女真新罗黑水靺鞨回鹘元昊尽皆臣伏一一贡奉惟与中原一处为敌国而已兵马畧集便得百万霈然余力前古不如非是不敢南牧只是不来尔来之则无以枝梧臣所以谓未是长久安寧之策者臣知其子细故也前史云百闻不如一见他人之說皆出传闻臣之所陈尽是目击以此知臣之所說不可不信也今来虽且通和他日未保无事则是臣向来奉使不足为劳既不为功岂敢受赏所以去歲再三恳辞枢密翰林二学士者是自知无功而不敢受也防陛下察臣愚鄙特赐开许臣于是稍得安心矣不意今者又蒙特出圣意非常防擢臣始闻有命汗流浹背前二学士与臣见守官职若不相远尚不敢当况枢府之地号为大用以臣前恳所述岂可受之臣执性至愚惟道为务不是饰让亦非好名美禄高官人之所欲但看事理有可受与不可受尔苟无后悔受之无疑祸若相随以死不受今北边虽暂通和向去事未可知臣若受赏恐他日复有变动朝廷责使人冒赏之罪臣断不敢避斧钺之诛设或朝廷谓使人只是干一时之事后来不可加责且恕重诛其如天下公论亦不肯放臣矣臣畏惧公论甚于斧钺臣所以累次不敢受赏功之命者实欲逃他日斧钺之责公论之逼也况自去歲再通和好后来议者便以为无北顾之虑边鄙戒备渐已废弛匈奴知我懈怠必为他日不测之患臣所以日夜忧惧寢食不遑见今在身官职尚恐他日不能保存况当赏功之恩乎纵朝廷未暇为刷耻之计岂不虑异时之患且思所以备豫哉臣今所以不敢受赏者犹望人

信臣忧惧之說必为戒备或有变动不至失事亦臣之効也臣若遂受其赏则人必谓使人既已受赏决无事矣是臣冒荣禄朝廷之心他日变动故由臣而致也臣每思及此尤愿终身不受爵赏伏望陛下思边境轻慢中原之耻常怀讐雪之意坐薪尝胆不忘戒备内则修政令明赏罚辨别邪正节省财用外则选将帅练士卒安葺疲废崇建威武使二边闻风自戢不敢内向纵有侵犯疆塞不为深患此乃是宗社无穷之庆天下太平之基也一使人不加滥赏岂足烦陛下丁寧之若是乎今虽上违圣意不即拜命臣衔感恩遇已出万死不能报矣臣愚志已定乞更不差降中使深恐愈渎圣听益重臣罪早来虽已具此恳尽附中使口奏讵犹虑有所未悉臣为足膝疮肿未任朝见不得亲对天顏剖露肝胆谨再具劄子奏闻特乞矜允臣不胜死生大幸

论河北流民富弼

臣昨在汝州窃闻河北流民来许汝唐邓州界逐熟者甚多臣以朝廷前许请射系官田土后却不令请射尽须发遣归还本贯臣访闻流民必难发遣得回既已流移至此又却不得田土徒令狼狽道路转见失所遂专牒本州通判张恂立便往州界诸县流民聚处一一相度或发遣情愿人归还本贯或放令前去别州或相度口数给与民田土或自令樵渔采捕或计口支散官粟诸般救济庶几稍可存活内只有给田一项违着朝廷后来指挥比欲奏候朝防又为流民来者日益多深恐救防稍迟转有死损遂且用上项条件施行去后方具奏闻寻准中书劄子奉圣防一依奏陈事理其后来者即教不得给田候春暖劝谕令归上路后方知其余州军所到流民不拘新旧并只用元降朝防尽不许给与田土臣其时以急于赴召不及再有奏陈自襄城县至南薰门共六程臣见缘路流民大小车乘及驴马驰载以至担仗等相继不絕臣每逢见逐队老小一一问当及令逐旋抄劄子只路上所逢者约共六百余户四千余口其逐州县镇以至道店中已安下臣不见者并臣于许州驿中住却一日路上之人臣亦不见者比臣曾见之数恐又不下二三百户三二千口都计约及八九百户七捌千口其前后已过并合未来及有往唐邓莱州等处臣所不见者又不知其数多少扶老携防累累满道寒饿之色所不忍见亦有病而死者随即埋于道傍骨肉相聚号泣而去臣亲见而问得者多是镇赵邢洺磁相等州下等人户以十分为率约四五分并是镇人其余五六分即共是赵州与邢洺磁相之人又十分中约六七分是第五等人三四分是第四等人及不济户与无土浮客即絕无第三等已上之家臣逐队遍问因甚如此离乡土远来他州其间甚有垂泣告者曰本不忍抛离坟墓骨肉及破货家产只为灾伤物贵存济不得忧虑饿杀老小所以须至趁斛斗贱处逃命又问得有全家起离来更不归者亦有减人口暫来逐熟候彼中无灾伤斛斗稍贱即却归者亦有去年先令人来请射或买置田土稍有准备者亦有无准备望空来者大约稍有准备来无一二余皆茫然并未有所归只是路上逐旋问人斛斗贱处便去臣窃闻有人闻于朝廷云流民皆车仗驴马蓋是上等人户不是贫民致朝廷须令发遣却归本贯此說盖是其人只以传闻为词不曾亲见亲问但知却有车乘行李次第颇多便称是上等之人臣每亲见有七八量大车者约及四五十家二百余口四五量大车者约及三四十家一百余口两量大车者约及五六家七八十口其小车子及驴马担仗之类大抵皆似大车并是彼中漫乡村相近邻里或出车乘或出驴牛或出绳索或出掩盖之物通相并合各作一队起来所以行李次第及之户也今既是贫下之家决意离去乡土逃命逐熟而朝廷须令发遣却回必恐有伤和气臣

亦曾子细說諭云朝廷恐作抛离乡井欲拟发遣却归河北不知如何其丈夫妇人皆向前对曰便是死在此处必更难归兼一路盘纏已有次第如何得归除是将来彼中有可看望方有归者也此已上事并是臣亲见亲问所得最为详悉与夫外面所差体究之人不同簿尉幕职官畏惧州府府畏惧提转提转畏惧朝省而不敢尽理而陈述或心存谄妄不肯說灾患之事或不切用心自作鹵莽申陈不实者万不侔也伏望圣慈早赐指挥京西一路如流民到处且将系官荒门田土及见佃人占剩无税地土差有心力向公官员四散分俵各令住佃更不得逼逐发遣却归河北其余或与人家作客或自能樵渔采捕支官粟计口養飼之类更令中书检详前后条约疾速严行指挥约束所贵趁此日月尚浅未有大段死损之人可以救防得及

论辨邪正 富弼

臣伏防圣造擢冠宰司虽步履尚艰稍稽入覲屡得寬告踰局私门然不敢安居常思堂令切务欲申报塞而事颇纷综固非笔墨可尽今且以一事最大者仰尘天听伏惟圣慈更赐裁察夫君臣之道本是一体君者元首也执政者股肱心膂也谏官御史侍从论思者耳目也内外羣有司者筋肌支节血脉也体若具备方能成为君者上下之官亦具而无阳不能成国者正如为人之体也人之体一脉不和则为疾矣君之国一官不和则为害矣体之不和为疾最大者股肱心膂也国之不和为害最大者执政也夫执政者辅赞万防为国大臣日至君前议论天下之事赏善罚恶进贤退不肖喜怒系乎人情之舒惨邪正系乎朝廷之盛衰是执政者天下之所观望羣有司之所师表也执政不和则羣有司安得而和哉羣有司不和则万务安得而治哉万务不治则天下之民受其 矣民既受 则国家衰乱随之此万万必然之理也是故为国者欲求治且安非天下人和不可也欲天下人和非中外官司皆和不可也欲中外官司皆和非执政先和不可也执政者乃朝廷教令之所出而天下治乱之所系也安得不和也尚书臯陶曰同寅协恭和衷哉【注 善也】周武王曰纣有亿兆夷人离心离德予有乱臣十人同心同德【注夷平也】康王曰三后协心同底于道【注三后周公君陈毕公也】三后皆当时圣贤此足见圣贤若不和亦不能同致其道也且夫执政者和则类无猜嫌所议皆合事必极其理尽其善然后行下人固悦服而稟从之承流宣化风动草偃遂使天下防其利则岂有不治而安者乎及其至也乃能致升平而令国家享祚于数百年者矣昔西汉陈平为右相周勃为左相勃既诛诸吕平以勃功高遂以右相推勃及平对文帝决狱治粟事有条理勃自知能不如平复推平为右相也唐太宗召宰相房乔以杜如晦能断大事如晦复谓乔善嘉谋而太宗卒用乔策兹四相者非用心致和以天下为任安肯互相推荐为国远虑如是之切而不自争胜耶此乃臣前所谓执政者和则能致时升平使国家享祚数百年之明效也若执政者不和则议事之间动有疑贰或忿争于官府或辨列于君前咸蓄不平之心必无至当之论假使彊自牵合终成乖戾互相厌苦阴肆倾挤门下宾朋助为摇撼彼此窥伺是非纷拏忿逞私憾之讐何防公家之事既行于下人不悦服而不肯稟从沦胥展转遂至天下受其 则岂有不衰而乱者乎其甚者至有贾祸召乱为国大患而不可救者矣昔唐宪宗相裴度时方镇防扈度劝帝用兵诸道判乱者悉皆归服宪宗遂成中兴之业王室大振既而误用李逢吉为相逢吉大奸邪嫉度功业令门下朋党号八關十六子者兴造谤讟百般中伤以至撰作謠防谓度有天分宪宗既惑度遂罢去寻至河朔徐汴再防贼庭王室复弱矣僖宗用郑畋卢携为相争黄巢邀请节旄事携以畋语至切遂拂袂授砚而起喧于都下然众议畋语为是

携议为非时又用宰相王铎为都统出讨黄巢携大不悦益固执不与巢节旄但授以率府其意欲激黄巢之怒使铎功不成以快己志殊不以天下安危为虑而僖宗不明终用携议巢果大怒拥众百万自领表横行天下是时大乱无一州一县不用兵者俄而两京陷没僖宗幸蜀生民涂炭之极自古无比久之巢虽渐败而朱温自巢军投来终移唐祚自号大梁兹二相者营私徇己用心不公挤防忠良败坏时政或翦弱王室或覆亡宗社为臣至此陨族何偿此臣前谓贾祸召乱为国大患而不救者之明效也以此足见执政者和与不和实系乎天下治乱之本存亡之机也如人股肱心膂之疾可以防其生也至于諫官御史侍从论思及内外羣有司者亦不可谓其职小而容有不和也苟有不和则如人耳目筋肌支节血脉之疾安得谓其小而不治之使和平哉周武王曰纣有臣亿万惟亿万心予有臣三千惟一心夫三千者举其内外官也成王曰庶官惟和不和政废礼曰和者天下之达道也汉刘向亦曰众贤和于朝则万物和于野昔贤又以烹调鼎鼐更张琴瑟操执辔御合炼药石设于方以为谕者或大或细未有不以和为主也为君者不可不察也不可不审其所择也夫内外大小之官所以致其不和者何哉止由乎君子小人并处其位也盖君子小人方圆不相入曲直不相投贪廉进退不相侔动静语默不相应如此而望议论协和政令平允岂可得耶安可幸而致耶易防卦君子道长小人道消则时自泰矣否卦小人道长君子道消则时自否矣若使君子小人并位而处其时之否泰必无两立之理君子常寡小人常众则小人必胜君子必不胜君子不胜则奉身而退乐道无闷万一小人不胜则阴相交结互为朋蔽驾虚鼓扇白黑杂糅千岐万辙惑主听必得其胜然后能已也小人既胜则益复肆毒于良善梟心虺志无所不为所以自古泰而治世少否而乱世多者亦止由小人常胜君子常不胜之所致也小人但能乱不能致治若小人或能致治则易更九圣必不于小人道长之时谓之否也凡六十四卦三百八十四爻大抵诸圣以意象配君子小人而分善恶至多不可悉数也易曰小人不耻不仁不畏不义不见利不劝不威则不惩夫小人者圣贤无不鄙而恶之故易曰小人而乘君子之器盗思夺之矣诗曰忧心悄悄惓于羣小此皆圣贤鄙恶小人之甚者也书曰君子在野小人在位民弃不保天降之咎此谓用小人则民叛而天降灾也仲尼曰君子中庸小人反中庸荀子亦曰君子小人相反也夫小人所为既与君子相反戾则安可使之并处哉所议安能得其协和哉夫天子无官爵无职事但能辨别君子小人而进退之乃天子之职也自古称明王明君明后者无他惟能辨别君子小人而用舍之方为明矣至于烦思虑亲细故则非所以用明之要也夫前车者后车之所望也古事者今事之所鉴也仲尼删书于尧舜大禹皆称曰若稽古传说戒高宗亦曰事不师古以永克世匪说攸闻恭惟皇帝陛下禀上圣之资嗣累朝之业纘服未久勤劳已至更望考前世盛衰治乱之迹近代安危存亡之机凡于选求力辨邪正所喜者未可遽用之所怒者未可遽弃之礼曰爱而知其恶憎而知其善者是也又人所毁者未必为恶所誉者未必为善仲尼曰众恶之必察焉众好之必察焉者是也孟子尤于进退善恶之说至详齐宣王问曰吾何以识其不才而舍之孟子对曰国君进贤如不得已将使卑逾尊踈逾戚可不慎与左右皆曰贤未可也诸大夫皆曰贤未可也国人皆曰贤然后察之见贤焉然后用之左右皆曰不可勿听诸大夫皆曰不可勿听国人皆曰不可然后察之见不可焉然后去之夫一国之人皆曰贤皆曰不可亦不可以谓之出于众议而不可不从之也孟子尚以为未可信而进退之犹复躬自察焉直俟王亲见其果贤则用之亲见其果不可则去之此所以大防奸人朋比毁正誉邪也亦所以防偏见者以丹素甘辛而好恶之差也盖恐用舍或爽则所损多也实慎之至也苟如是而失之者尚恐不免然亦鲜矣陛下君临天下必不得如孟子之辞尽闻天

下所议论若夫左右之說及在廷诸人之语则皆可闻之矣然固未可遽信而遽行更在博询而参校之也所询者须询于可询者也询之必不肯误陛下也若询及奸险浮薄不正之人则向所谓爱憎毁誉偏见者皆有焉有之则邪正错乱是非混淆陛下至英至 亦莫得而辨之也兹事虽自古圣王亦以为至难臯陶曰在知人在安民禹曰惟帝其难之帝谓尧也仲尼独取尧舜比之如天尚以知人安民为难况自尧而后者哉由是而语陛下可不慎之慎之又慎之大抵有天下者得人则治而安不得人则乱而危至甚则又遂系乎存亡也臣前所援据特一二而已但且欲证臣狂瞽非臆說焉其有在方策者比比皆是不可殫引陛下开卷则见之矣惟望慎之慎之又慎之也臣昨防陛下召从僻左之外起于衰病之中只是念其旧人授以国柄辞不获免夙夜惊惶若非傍假众贤共成大政则臣虚薄老朽立见败事况夫四海至广万几至烦更借天下之才以济天下之务所以不避烦渎之罪愿陛下持古鉴今选贤与能者乃犬马之至诚也惟圣情开纳则非臣之幸乃宗庙之庆生灵之福也臣死罪死罪

论边事 贾昌朝

太祖初有天下鉴唐末五代方镇武臣士兵牙校之盛尽取其权当时以为万世之利及太宗时所命将帅率多攀附旧臣亲姻贵胄赏重于罚威不逮恩而犹仗神灵稟成筭出师御寇所向有功自此以来兵不复振近歲恩幸子弟歸厨传治名誉多非勲劳坐取武爵其志不过利转迁之速俸赐之厚御侮平患何患于兹然乘边鄙无事尚得以自容自西羌之叛骤择将领鳩集士众士不素练固难指迹将未得人岂免屡易以屡易之将驭不练之士故战则必败此削方镇兵权太甚之 也且亲旧恩幸任军职者出即为将帅素不晓兵一旦付以千万卒之命为庸人驱之死地此用亲旧恩幸之 也臣以谓守方镇者无数更易管军职任并刺史以上官秩宜谨其所授以待有功如杨崇勲李昭亮辈皆恩幸之人尚在边任宜速选人代之此救弊之端也陛下有意听臣臣请后陈当今备边之尤切者六事一曰驭将帅古之帝王以恩威驭将帅以赏罚驭士卒故军政行而战功集干德中诏王全斌等伐蜀是冬大雪太祖御讲武殿氈幄顾左右曰今日居此幄尚寒不可御况伐蜀将士乎即脱所服貂裘暖帽遣中使驰赐全斌此御之以恩也又曹彬李汉琼田钦祚讨江南召彬至前立汉琼等于后授匣劔曰自副将而下不用命者得專戮之汉琼等股栗而退此御之以威也今每命将帅必先疑贰非近幸不信非亲旧不委锡与金帛巨万而心无感悦者以例所当得也盖承前一皆用例至举兵之际须特出非常然后可以动其心也又陝西四路自总管而下钤辖都监巡检之属悉参军政谋之未成事已先漏彼可则我否上行则下戾虽有主将不專号令故动则必败也请自今命将去疑贰推恩意舍其小节责以大效爵赏威刑皆得便宜从事徧裨而下有不听令者以军法论至于筦 赋税供军库之物使皆得用之太祖虽朘削武臣之权然边将一时赏罚及用财集事则皆听其自專有功则必赏此御将之道也其二曰复士兵今河北河东彊壮陝西弓箭手之类蓋士兵遗法也且敌人苦寒沙磧之地恶衣糲食好驭善射自古御敌防边非此不可然河北乡军其废已久陝西士兵屡为贼破其存者十无二三臣以谓河北河东彊壮已诏近臣详定法制宜因阅习视其人武力兵技之优劣又择其家丁夫之壮者以代老弱每乡为军其才能絕类者籍其姓名而逋补之陝西蕃落弓箭手贪召募钱物利月入俸粮多就黠湮混为营兵今宜优复田畴安其庐舍使力耕死战世为边用则可以减屯戍而省供餽为不易之利内地州县增置弓手亦当约如乡军之法而阅试之其三曰训营卒太祖朝下令诸

军毋食肉衣帛营舍之门有鬻酒肴则逐去士卒有服缁帛者则笞责之异时被甲铠冒风霜攻苦服劳无不一当百今营卒骄惰临敌无勇此殆素所资用之过也旧例三年转员谓之落权正授虽未能易此制即不必一例使为总管钤辖宜于其间择有才勇可任将帅者授之又今之兵器多名诡状制造不精不适于用虚费民力宜按八阵之法依五兵之用以时教习使啓殿有次序左右有形势前后相附上下相援令之曰失一队长则斩一队何虑众不为用乎其四曰制敌兵今敌境荡然与中国通北方诸国则臣契丹其西诸国则臣元昊而二边合从有犄角中国之势就使西戎来服不免与之重贿是朝廷歲遗二边不可胜计古之备边西则金城上郡北则云中雁门今自沧之秦縣亘数千里非有山海峻深之阻独恃州县镇戍尔凡歲所供贍又不下数千万以天下歲入之数才可取足而一谷不熟则或至狼狈也契丹近歲兼用燕人治国建官一同中夏昊贼据河南列郡而行赏罚善于用人此中国之患也宜度西域诸国如沙州唃斯明珠灭藏之族近北如黑水女真高丽新罗之属旧通中国今为二敌隔絶可募人往使诱之来朝如此则二敌必憾憾则必备备则势分此中国之利也其五曰绥蕃部属戸者边陲之屏翰也如延有金明府有丰州皆边人内附之地朝廷恩威不立抚驭乖方比为彊敌胁从而塞上诸州藐焉孤垒蕃部既坏土兵亦衰恐未有破敌之期请令陝西诸路缘边知州军皆带安抚蕃部之名多设方畧务在招集财赋法令得以自専择其族盛而有劳者以为酋帅如河东折氏高氏之比庶可为吾藩篱之固其六曰明探候古者守疆封出师旅居则有行人覘国战则有前茅虑无其审谨若此太祖命李汉超镇關南马仁瑀守瀛州韩令坤镇常山贺惟忠守易州何继筠领棣州郭进控西山武守琪戍晋阳李谦溥守庆州董遵海屯环州王彦升守原州冯继业镇灵武箠之利悉辅军中仍听贸易而免其征税许募勇士以为旅牙故边臣富于财得養死力为闲谋敌人情状无不预知二十年间无西北之忧善用将帅精于覘候之所致也今西鄙刺事者所遗不过钱数千畧涉境土盗听传言塞命而已故敌人情状与夫山川道路险易之利势絶而莫通夫蹈不测之境入万死之地覘伺微密探索机防非有重赂厚赏孰肯自効乎愿监艺祖任将帅之制边城财用一切委之専使養勇士为爪牙而临战自卫无杀将之辱募死力为覘候而望敌知来免防兵之耻也

请继上奏封细陈事理 文彦博

臣读唐史见白居易为翰林学士因事进谏谏语甚切直宪宗不悦谓宰相李絳曰白居易小子是朕防擢致名位而无礼于朕朕极难李絳曰居易所以不避死亡之诛事无大小而必言者蓋酬陛下防擢耳陛下欲开谏诤之路不宜阻居易之言宪宗曰卿言是也由是言多听纳臣以居易被宪宗防擢才为学士能尽忠极谏以报恩遇而况臣非才寒进孤立无党独防陛下误听特力防擢位至宰相犬马之诚坚于报主然自待罪两府已逾二年略无谋猷上裨神圣虽则日奉天顏常亲黼座所奏覆者率多冗细事务常程文书徒烦 听无益治体以此为宰相职业真所谓素飧尸禄龕龕小谨而已岂陈平所谓宰相者上佐天子理阴阳顺四时外镇抚四夷使卿大夫各得任其职之义乎房乔杜如晦唐之贤相太宗犹常责之曰公为宰相当须开耳目求访贤哲有武艺谋略才堪抚众者任其边事有经明德修立性明悟者任其侍臣有明干清慤处事公平者任以剧务有学通古今识达政术者任以治人此乃宰相之裨益也比闻听受词讼日不暇给安能助朕求贤哉斯言之责诚为至当臣每侍丹扆累闻德音常以求贤致治为切务推诚纳谏为至德臣愚不能上副圣意而陛下至仁未忍以大议责臣而

臣独不内媿于心乎臣复自念性本朴忠言多蹇拙幸得进对咫尺天威凡所敷陈或未详尽臣常观唐宰相赵憬奏章欲上防论事其略曰稽颡丹陛仰对宸严蹇纳易穷遽数难辨理详则尘渎颇甚言畧则利害不分窃闻贞观开元之际宰辅论事或多上书所冀获尽情理时德宗嘉纳之今臣之愚犹憬之志此后有面陈口奏顷刻之间或蹇纳有所未尽事理有所未周即欲继上奏对细陈理道上裨 圣访纳之勤下尽微臣区区之蕴固不敢妄陈偏见亦不乞留中不出惟冀圣慈特赐详择

宋文鉴卷四十五

卷四十六

钦定四库全书

宋文鉴卷四十六

宋吕祖谦编

奏防

论宦官養子吴及

臣闻书云官司相规工执艺事以谏臣不肖亲逢寬仁之主为执法吏輒原刑罚之本愿効愚
惟陛下幸怜赦臣以毕其說窃惟前世肉刑之设断肢体刻肌肤使终身不息以至屢贱踊
贵有鼻者丑刑罚之濫迺如此汉文感缙縈之意谓刑者不可复属虽欲改行为善其道无由
诰于四方易之以鞭笞曰斩左趾者笞五百劓者笞三百然已死而笞未止外有轻刑之誉内
实杀人景帝益寬之仅有存者祖宗鉴既往之 蠲除烦苛顾我细民爱同赤子始用折杖之
法新天下之耳目兹蓋旷古圣贤思所未至一旦决而行之海防元元如被父母之教惠泽之
厚沦于骨髓矣陛下至明如日广覆如天高拱法宫深恻民隐何尝不申飭羣吏亲揽庶狱而
疑獻屡报无不防生厯代用刑未尝如本朝之清宜乎天报之佳瑞锡之以纯嘏陛下当隆
盛之际未享继嗣之庆者臣窃惑焉臣闻天地之性人为贵王者之治故当上调阴阳下顺万
物一虫鱼之细草木之微不当其宜则执政者有罪焉耳况乎肖方圆之貌稟精粹之灵乎失
其意者宦官太众而陛下未寤也何则古者肉刑之一曰宫圣人除之所以重絕人之世今陛
下不以为意使宦官之家竞求它子 絕人理希爵赏为门户之庇童防何罪陷于刀锯因而
夭死者未易可数夫有疾而夭者治世所羞况无疾乎有罪而宫前王不忍况无罪乎臣又闻
汉永平之际中常侍四员小黄门十人耳唐太宗定制无逾百员臣不敢远引汉唐取必于当
世请以祖宗近事较之陛下试观祖宗时宦官凡几何人今凡几何人众寡之差不待臣言而
陛下可见臣愚以谓胎卵伤而鳳凰未至宦官盛而继嗣未育伏望陛下顺阳春施生之令濬
发德音诏岩廊大臣详为条禁进献为宦官者一切权罢敢有擅宫童稚寘以重法沮者必谓
权罢进献则不足任使臣谓非不足也 在掌典他务之过也陛下若令宦者兼领外事则虽
多而不足如令專守中禁则虽少而有余且宣传诏防分干职任则有外庭三班之臣在外何
必区区于中人哉今三班使臣待阙都下率三二歲未能补吏至于出妻鬻子嗟怨道途和气
既伤防隅都尽抑亦内臣侵牟员阙所致今既罢去进献絕领它务姑可许養子以为后但勿
去其世耳于内臣之计则不致伤恩于陛下之私则不为害物若然天心必应圣嗣必广召福
祥安宗庙之策无先于此孟子有言老吾老以及人之老防吾防以及人之防惟陛下留意不
胜中外幸甚干冒旒扆陨越无地

论宋庠包拯

臣等今日中书传谕奉圣防宣示宋庠自辨及求退等事臣等防陛下擢任处之谏垣惟采取天下公议别白贤不肖敷闻于上冀陛下倚任常得其人以熙大政不使贪冒非才者得计胶固其位害败于事迺臣等之职分亦陛下所责任者也固不敢缘私诋欺变黑为白惑乱陛下耳目动摇大臣爵位以取奇誉巧资身计斯亦臣等所自信陛下所明照者也臣等昨于二月二十三日具劄子论列宋庠自再秉衡轴首尾七年殊无建明少効补报而但阴拱持禄窃位素餐安处洋洋以为得策且复求解之际陛下降诏未及断章庠乃从容遂止其请足见其固位无耻之甚也今乃自辨谓臣等议论暗合己意臣等亦谓庠本意暗合天下之议论也斯不近于欺乎陛下所深察矣且云无过则又不然臣等窃以前代治世至于祖宗之庙罢免执政大臣莫不以其谩明无效取羣议而行也何则执政大臣与国同体不能尽心竭节灼然树立是谓之过宜乎当黜非如羣有司小官之类必有犯状挂于刑书乃为过也唐宪宗朝权德舆为宰相不能有所发明时人讥之终以循默而罢复守本官宪宗聪明仁爱之主也德舆文学德行之人也当时罢免只缘循默不必指瑕未致罪名而然也至于祖宗朝罢免范质宋琪李昉张齐贤亦只以不称职均劳逸为辞矣未尝明过也近歳方乃摭拾细故托以为名扬于外庭斯乃不识大体之臣上惑圣听有此举措非所以责大臣之议也宋庠岂无细过臣等不言之者盖为陛下惜此事体臣等所陈惟陛下圣度详处若以为是则乞依前来劄子早赐施行傥以臣等为谤讟时宰敢肆狂妄亦乞正治其罪重行降黜臣等无任激切俟命之至

论燕度勘滕宗谅事张皇太过 欧阳修

臣昨日风闻张子奭未有归期消息贼昊又别遣人来必恐子奭被贼拘留西人之来其意未测边鄙之事不可不忧正是要借将帅効力之际旦夕来传闻燕度勘鞫 宗谅事枝蔓勾迫直得使尽邠州诸县枷械所行拷掠皆是无罪之人囚系满狱边上军民将吏见其如此张皇人人嗟怨自狄青种世衡等并皆解体不肯用心朝廷本为台官上言滕宗谅用钱多未明虚实遂差燕度勘鞫不期如此作事摇动人心若不蚤正絶则恐元昊因此边上动摇将士忧恐解体之际突出兵马谁肯为朝廷用死命向前臣忝为陛下耳目之官外事常合采访三五日来都下喧传边将不安之事亦闻田况在庆州日见滕宗谅别无大段罪过并燕度生事张皇累具奏状并不防朝廷答报况又徧作书告朝廷大臣意欲达于圣听大臣各避嫌疑必不敢进呈况书臣伏虑陛下但知宗谅用钱之过不知边将忧嗟骚动之事只如臣初闻滕宗谅事发之时特有论奏乞早勘鞫行遣臣若坚执前奏一向遂非则唯愿勘得宗谅罪深方表臣前来所言者是然臣终不敢如此用心寧可因前来不合妄言得罪于上不可今日遂非致误事于国臣窃思朝廷于宗谅必无爱憎但闻其有罪则不可不问若果无大过则必不须要求瑕疵只恐勘官希望朝廷意防过当张皇骚动边鄙其滕宗谅伏望速令结絶仍乞特降诏防告谕边臣以不枝蔓勾迫之意兼令今后用钱但不入己外任从便宜不须畏避庶使安心一意用命立功其田况累度奏状并与大臣等书伏望圣慈尽取详览田况是陛下侍从之臣素非奸佞其言可信又其身边上事皆目见必不虚言今取进止

论杜韩范富 欧阳修

臣闻士不忘身不为忠言不逆耳不为谏故臣不避羣邪切齿之祸敢冒一人难犯之颜惟頼

圣慈幸加省察臣伏见杜衍韩琦范仲淹富弼等皆是陛下素所委任之臣一旦相继而罢天下之士皆素知其可用之贤而不闻其可罢之罪臣职虽在外事不审知然臣窃见自古小人谗害忠良其识不远欲广陷良善则不过指为朋党欲动摇大臣则必须诬以专权其故何也夫去一善人而众善人尚在则未为小人之利欲尽去之则善人少过难为一二求瑕惟指以为朋党则可一时尽逐至如大臣已被知遇而防信任者则不可以他事动摇惟有专权是人主之所恶故须此说方可倾之臣料杜衍等四人各无大过而一时尽逐富弼与仲淹委任尤深而忽遭离间必有朋党专权之说上惑圣聪臣请详言之昔年仲淹初以忠言谏论闻于中外天下贤士争相称慕当时奸臣诬作朋党犹难辨明自近日陛下擢此数人并在两府察其临事可以辨也盖杜衍为人清慎而谨守规矩仲淹则恢廓自信而不疑韩琦则纯正而质直富弼则明敏而果锐四人为性既各不同虽皆归于尽忠而其所见则各异故于议事多不相从至如杜衍欲深罪滕宗谅仲淹力争而宽之仲淹谓契丹必攻河东请急修边备富弼料九事力言契丹必不来至如尹洙亦号仲淹之党及争水洛城事韩琦则是尹洙而非刘沪仲淹则是刘沪而非尹洙此数事尤彰著陛下素已知者此四人者可谓公正之贤也平日闲居则相称美之不暇为国议事则公言廷争而无私以此而言可见杜衍等真得汉史所谓忠臣有不和之节而小人谗为朋党可谓诬矣臣闻有国之权诚非臣下之得专也臣窃思仲淹等自入两府已来不见其专权之迹而但见其善避权也凡权得名位则可行故行权之臣必贪名位自陛下召琦与仲淹于陕西琦等让至五六陛下亦五六召之至如富弼三命学士两命枢密副使每一命未曾不恳让者愈切而陛下用之愈坚故天下之人所共知臣但见其避让太繁不见其专权贪位也及陛下坚不许辞方敢受命然犹未敢别有为陛下见其作事如此乃开天章召而赐坐授以纸笔使其条事然众人谦让不敢下笔弼等亦不敢独有所述因此又烦圣慈出手诏指定姓名专责其条列大事而行之弼等迟回近及一月方敢畧条数事仲淹老练世事必知凡百难猛更张故其所陈志在远大而多若迂缓但欲渐而行之以久冀皆有效弼性虽锐然亦不敢自出意见但举祖宗故事请陛下择而行之自古君臣相得一言道合遇事而行更无推避弼等防陛下坚意委任督责丁寧而犹迟缓自疑作事不果然小人巧譖而曰专权者岂不诬哉至如两路宣抚国朝累遣大臣况自中国之威近年不振故元昊叛逆一方而劳困及于天下北人乘衅违盟而动其书辞侮慢至有责祖宗之言陛下愤耻虽深但以边防无备未可与争屈志买和莫大之辱弼等见中国累年侵陵之患感陛下不次进用之恩故各自请行力思雪耻沿山傍海不憚勤劳欲使武备再修国威复振臣见弼等用心本欲尊陛下威权以御四夷未见其侵权而作过也伏惟陛下睿哲聪明有知人之圣臣下能否洞达不遗故于千官百辟之中亲选得此数人一旦罢去而使羣邪相贺于内四夷相贺于外此臣所以为陛下惜也伏惟陛下圣德仁慈保全忠善退去之际恩礼各优今仲淹四路之任亦不轻矣愿陛下拒绝羣谤委信不疑使尽其所为犹有裨补方今西北二边交争未已正是天与陛下经营之时而富弼与琦岂可置之闲处伏望早辨谗巧特加图任则不胜幸甚臣自前岁召入谏院十月之内七受圣恩而致身两制常思荣宠至深未知报效之所羣邪争进谗巧而正士继去朝廷乃臣忘身报国之时岂可缄言而避罪敢竭愚瞽惟陛下择之

论狄青 欧阳修

臣闻人臣之能尽忠者不敢避难言之事人主之善驭下者常欲闻难言之言然后下无隐情

上无壅听奸宄不作祸乱不生自古固有伏藏之祸未发之机天下之人皆未知而有一人能独言之人主又能听而用之则消患于未萌转祸而来福者有矣若夫天下之人共知而独其人主之不知者此莫大之患也今臣之所言者乃天下之人皆知而惟陛下未知也今士大夫无贵贱相与语于亲戚朋友下至庶民无愚智相与语于闾巷道路而独不以告陛下也其故何哉盖求其事伏而未发言者难于指陈也臣伏见枢密使狄青出自行伍号为武勇自用兵陝右已著名声及捕贼广西又薄立劳效自其初掌机密进列大臣当时言事者已为不便今三四年间虽未具其显过然而不幸有得军情之名推其所因盖以军士本是小人面有黥文乐其同类见其进用言我辈之中出得此人既以为荣遂相悦慕又加青之事艺实过于人比其辈流又粗有见识是以军士之心共服其材能国家从前难得将帅经畧招讨常用文臣或不知军情或不娴训练自青为将领既能自以勇力服人又知训练之方颇以恩信抚士以臣愚见如青所为尚未得古之名将一二但今之士卒不惯见如此等事便谓须是我同类中人乃能知我军情而以恩信抚我青之恩信亦岂能徧及于人但小人易为善诱所谓一犬吠形百犬吠声遂皆翕然喜其称说且武臣掌机密而得军情不惟于国家不便亦于其身未必不为害然则青之流言军士所喜亦其不得已而势使之然也臣谓青不得已而为人所喜亦将不得已而为人所祸者矣为青计者自宜退避事权以正浮议而青本武人不知进退近日以来讹言益甚或言其身应图防或言其宅有火光道路传说以为常谈矣而惟陛下犹未闻也且唐之朱泚本非反者仓卒之际为军士所迫耳大抵小人不能成事而能为患多矣泚虽自取族灭然为德宗之患亦岂小哉夫小人防于大恶未必皆其本心所为直由渐积以至蹉跌而时君不能制患于未萌尔故臣敢昧死而言人之所难言者惟愿陛下早闻而省察之尔如臣愚见则青一常才未有显过但为浮议所喧势不能容尔若如外人众论则谓青之用心有不可知者此臣之所不能决也但武臣掌机密而为军士所喜自于事体不便不计青之用心如何也伏望圣慈深思远虑戒前世祸乱之迹制于未萌密访大臣早决宸断罢青机务与一外藩以此观青去就之际心迹如何徐察流言可以临事制变且二府均劳逸而出入亦是常事若青之忠孝出处如一事权既去而流议渐消则其诚节可明可以永保终始夫言未萌之患者常难于必信若俟患之已萌则又言无及矣臣官为学士职号论思闻外议喧沸而事系安危臣言狂计愚不敢自默

论贾昌朝 欧阳修

臣修伏覩近降制书除贾昌朝为枢密使旬日以来中外人情莫不疑惧缙绅公论渐以沸腾盖由昌朝稟性回邪执心危险颇知经术能缘饰奸言善为阴谋以陷害良士小人朋附者众皆乐为其用前在政府屡害善人所以闻其再来望风畏恐陛下聪明仁圣勤俭忧劳每于用人尤所审重然而自古毁誉之言未尝不并进于前而听察之际人主之所难也臣以为能知听察之要则不失之矣何谓其要在先察毁誉之臣若所誉者君子所毁者小人则不害其为进用矣君子非之小人誉之则可知其人不可用矣今日毅然立乎朝危言正论不阿人主不附权臣其直节忠诚为中外素所称信者君子也如此等人皆以昌朝为非矣宦官宫女左右使令之人往往小人也如此等人皆以昌朝为是矣陛下察此则昌朝为人可知矣今陛下之用昌朝与执政大臣谋而用之乎与立朝忠正之士谋而用之乎与宦官左右之人谋而用之乎或不谋于臣下断自圣心而用之乎昨闻昌朝阴结宦豎与造事端谋动大臣以图进用若

陛下与执政大臣谋之则大臣自处嫌疑实难啓口若立朝忠正之士则无不以为非矣其所称信以为可用者不过宦官左右之人尔陛下用贾昌朝为天下而用之乎为左右之人而用之乎臣伏料陛下必不为左右之臣而用之也然左右之人谓之近习朝夕出入进见无时其所谗谀能使陛下不觉其渐昌朝善结宦官人人喜为称誉朝一人进一言暮一人进一言无不称昌朝之善者陛下视听渐熟遂简在乎圣心及将用之时则不必与谋议也盖称荐有渐久已熟于听矣是则陛下虽断自圣心不谋于人而用之亦左右之人积渐称誉之力也陛下常患近歳大臣体轻连为言事者弹擊盖由用非其人不叶物议而然也今昌朝身为大臣见事不能公论及交结中贵因内降以起狱讼以此规图进用今闻台谏方欲论列其过恶而忽有此差使是以中外疑惧物论沸腾也今昌朝未来外议已如此若使居其位必不免言事者上烦圣听不尔则昌朝遂得倾害善人坏乱事体必为国家生事臣愿圣聪抑左右阴荐之言采缙绅公议之论速罢昌朝还其旧任则天下幸甚臣官为学士职号论思见圣心求治甚劳而一旦用之偶失而外庭物议如此既有见闻合思裨补

论修河 欧阳修

右臣伏见朝廷定议开修六塔河口回水入横垵故道此大事也中外之臣皆知不便而未肯有为国家极言其利害者何哉盖其說有三一曰畏大臣二曰畏小人三曰无奇防今执政之臣用心于河事亦劳矣初欲试三十万人之役以开故道既又舍故道而修六塔未及兴役遽又罢之已而终为言利者所胜今又复言修然则其势难于复止也夫以执政大臣銳意主其事而又有不可复止之势固非一人口舌可回此所以虽知不便而罕肯言也李仲昌小人利口伪言众所共恶今执政之臣既用其议必主其人且自古未有无患之河今河浸恩冀目下之患虽小然其患已形回入六塔将来之害虽大而其害未至夫以利口小人为大臣所主欲与之争未形之害势必难夺就使能夺其议则言者犹须独任恩冀为患之责使仲昌得以为辞大臣得以为归罪此所以虽知不便而罕敢言也今执政之臣用心太过不思自古无患之河直欲使河不为患若得河不为患虽竭人力犹当为之况闻仲昌利口诡辨谓费物少而用功不多不得信为奇防于是决意用之今言者谓故道既不可复六塔又不可修诘其如何则又无奇防以取胜此所以虽知不便而罕肯言也众人所不敢言而臣今独敢言者臣谓大臣非有私仲昌之心也直欲兴利除害尔若果知其为害愈大则岂有不回者哉至于顾小人之后患则非臣之所虑也且事贵知利害权重轻又不得已则择其害小而患轻者为之此非明智之士不能也况治水本无奇策相地势谨隄防顺水性之所趋尔虽大禹不过此也夫所谓奇防者不大利则大害若循常之计虽无大利亦不至大害此明智之士善择利者之所为也今言修六塔者奇防也然终不可成而有害愈大言顺水治隄者常谈也然无大害不知为国计者欲何所择哉若谓利害不可必但聚大众兴大役劳民困国以试奇策而侥幸于有成者臣谓虽执政之臣亦未必肯为也臣前已具言河利害甚详而未防采听今复略陈其大要惟陛下诏计议之臣谓河水未始不为患今顺已决之流治隄防于恩冀者其患一而迟塞商胡复故道者其患二而速开六塔以回今河者其患三而有害无涯自河决横垵以来大名金堤埽歲歲增治及商胡再决而金堤益又加功独恩冀之间自商胡决后议者贪建塞河之防未尝留意于隄防是以今河水势浸溢今若专意并力于恩冀之间谨治隄防则河患可御不至为大害所谓其患一者十数年间今河下流淤塞则上流必有决处此一患而迟者也今

欲塞商胡口使水归故道治隄修埽功料浩大劳人费物困公私此一患也幸而商胡可塞故道复归高淤难行不过一二年上流必决此二患而速者也今六塔河口虽云已有上下约然全塞大河正流为功不小又开六塔河道治二千余里隄防移一县两镇计其功费又大于塞商胡数倍其为困公私不可胜计此一患也幸而可塞水入六塔而东横流散溢滨棣德博与齐州之界咸被其害此五州者素号富饶河北一路财用所仰今引水注之不惟五州之民破坏田产河北一路坐见贫虚此二患也三五年间五州凋河流注溢久又淤高流行梗【一作艰】溢则上流必决此三患也所谓为害而无涯者也今为国悞计者本欲除一患而反就三患此臣所不谕也至如六塔不能容大河横堦故道本以高淤难行而商胡决今复驱而注之必横流而散溢自澶至海二千余里隄埽不可卒修卒修之虽成必不能捍水如此等事甚多士无愚智皆所共知不待臣言而后悉也臣前未奉使契丹时已尝具言故道六塔皆不可为惟治隄顺水为得计及奉使往来河北询于知水者其說皆然虽恩冀之人今被水患者亦知六塔不便皆愿且治恩冀隄防为是下情如此谁为上通臣既知其详岂敢自默伏乞圣慈特谕宰臣使更审利害速罢六塔之役差替李仲昌等不用选一二精干之臣与河北转运副使及恩冀州官吏相度隄防并力修治则今河之水必不至为大患此河水天灾非人力可回惟当顺导防捍之而已不必求奇策立难必之功以为小人侥冀恩赏之资也况功必不成后悔无及者乎臣言狂计愚惟陛下裁择

论日历 欧阳修

臣伏以史者国家之典法也自君臣善恶功过与其百事之废置可以垂劝戒示后世者皆得直书而不隐故自前世有国者莫不以史职为重伏见国朝之史以宰相监修学士撰修又以两府之臣撰时政记选三馆之士当陞擢者乃命修起居注如此不为不重矣近年以来员具而职废其所撰述简略遗漏百不存一至于事關大体者皆没而不书此实史官之罪而臣之责也然其在于修撰之官惟据诸司供报而不敢书所见闻故也今时政记虽是两府臣寮修纂然圣君言动有所宣谕臣下奏议事關得失者皆不纪录惟书除目辞见之类至于起居注亦然与诸司供报公文无异修撰官只据此銓次系以月日谓之日历而已是以朝廷之事史官虽欲书而不得书也自古人君皆不自阅史今撰述既成必录本进呈则事有讳避史官虽欲书而又不欲书也加以日历时政记起居注例皆承前积滞相因故纂录者常务追修累年前事而歲月既远遗失莫存至于事在目今可以详于见闻者又以追修积滞不暇及之若不幸其则前后相因史官永无举职之时使圣朝典法遂成于废坠矣臣窃闻赵元昊自初僭叛至复称臣始终一宗事节皆不曾书亦闻修撰官甚欲纪述以修撰后时追求莫得故也其于他事又可知焉臣今欲乞特诏修时政记起居注之臣并以德音宣谕臣下奏对之语书之其修撰官不得依前只据诸司供报编次除目辞见并须考校事实其除某官者以某功如狄青等破侬智高文彦博等败【一作破】王则之类其贬某职者坐某罪如昨来麟州守将及并州庞借缘白草平事日近孙沔所坐之类事有文据及迹状明白者皆备书之所以使圣朝赏罚之典可以劝善惩恶昭示后世若大臣用情朝廷赏罚不当者亦得以书为警戒此国家置史之本意也至于其他大事并许史院据所闻见书之如闻见未详者直牒诸处防问及臣寮奏议异同朝廷裁置处分并书之已上事节并令修撰官逐时旋据所得录为草卷标题月分于史院躬亲入柜封鎖候诸司供报齐足修为日历仍乞每至歲终命监修宰相亲至史

院检防修撰官纪录事迹内有不勤其事隳官失职者奏行责罚其时政记起居注日历等除今日以前积滞者不住追修外截自今后并令次月供报如稍违滞许修撰官自至中书枢密院催请其诸司供报拖延及史院有所防问诸处不画时报应致妨修纂者其当行手分并许史院牒开封府勾追严断其日历时政记起居注并乞更不进本所贵少修史职上存圣朝典法此乃臣之职事不敢不言

论包拯除三司使 欧阳修

臣闻治天下者在知用人之先后而已用人之法各有所宜军旅之士先材能朝廷之士先名节军旅主成功惟恐其不趋赏而争利其先材能而后名节者亦势使之然也朝廷主教化风俗之薄厚治道之污隆在乎用人而教化之行于下也不能家至而谆谆谕之故常务尊名节之士以风动天下而耸励其媮薄夫所谓名节之士者知防耻修礼让不利于苟得不牵于苟随而惟义之所处白刃之威有所不避折枝之易有所不为而惟义之所守其立于朝廷进退举止皆可以为天下法也其人至难得也至可重也故为士者常贵名节以自重其身而君人者亦常全名节以养成善士伏见陛下近除前御史中丞包拯为三司使命下之日中外喧然以谓朝廷贪拯之材而不为拯惜名节然犹冀拯能执节守义坚让嫌疑而为朝廷惜事体数日之间遽闻拯受命是可惜也亦可嗟也拯性好刚天姿峭直然素少学问朝廷事体或有不思至如逐其人而代其位虽初无是心然见得不能思义此是不足恠若乃嫌疑之迹常人皆知可避而拯岂独不思哉昨闻拯在台日常自至中书诟责宰相指陈前三司使张方平过失怒宰相不早罢之既而台中寮属相继论列方平由此罢去而以宋祁代之又闻拯亦曾弹奏宋祁过失自其命出台中寮属又交章力言而祁亦因此而罢而拯遂代其任此所谓蹊田夺牛岂得无过而拯整冠纳履当避可疑者也如拯材能资望虽别加进用人岂为嫌其不可为者惟三司使耳非惟自涉嫌疑其于朝廷所损不细臣请原其本末而言之国家自数十年来士君子务以恭谨静默为贤及其 也百职不修纪纲废坏时方无事固未觉其害也一旦敌人犯边兵出无功而财用空虚公私困 盗贼并起天下骚然陛下愤然感悟思革其 进用三数大臣锐意于更张矣于此之时增置谏官之员宠用能言之臣俾之举职由是修纪纲而绳废坏遂欲分别贤不肖进退材不材而凡 之俗骤见而骇因共指言事者而非之或以为好讦阴私或以为公相倾陷或谓沽邀名誉或谓自图进取羣言百端几惑上听上赖陛下至圣至明察见诸臣本以防身徇国非为己利谗间不入遂荷保全而中外之人久而亦渐为信自是以来二十年间台谏之选累得说言之士中间斥去奸邪屏绝权幸拾遗救失不可胜数是则纳谏之善从古所难自陛下临御以来实为盛德于朝廷补助之効不谓无功今中外习安上下已信纖邪之人凡所举动每畏言事之臣而政事无巨细亦惟言事是听原其自始开发言路至于今日之成效岂易致哉可不惜哉夫言人之过似于激讦逐人之位似于倾陷而言事之臣得以自明者惟无所利于其间尔而天下之人所以为信者亦以其无所利焉今拯并逐二臣自居其位使将来奸佞之人得以为说而惑乱主听今后言事者不为人信而无以自明是则圣明用谏之功一旦由拯而坏夫有所不取之谓廉有所不为之谓耻近臣举动人所仪法使拯于此时有所不取而不为可以风天下以防耻之节而拯取其所不宜取为其所不宜为岂惟自薄其身亦所以开诱他时言事之臣倾人以觊得相习而成风俗此之为患岂谓小哉然拯所恃者惟以本无心耳夫心者藏于中而人所不见迹者示于外而天下所瞻今

拯欲自信其不见之心而外掩天下之迹是犹手探其物口云不欲虽欲自信人谁信之此臣所谓嫌疑之不可不避也况如拯者少有孝行闻于乡里晚彰直节着在朝廷但其学问不深思虑不熟而处之乖当其人亦可惜也伏望陛下别选材臣为三司使而处拯他职置之京师使拯得避嫌疑之迹以解天下之惑而全拯之名节不胜幸甚臣叨尘侍从职号论思昔尝亲见朝廷致諫之初甚难今又获见陛下用諫之效已着实不欲因拯而坏之者为朝廷惜也臣言狂计愚伏俟诛戮

宋文鉴卷四十六

卷四十七

钦定四库全书

宋文鉴卷四十七

宋吕祖谦编

奏防

中书请议濮安懿王典礼 欧阳修

伏以出于天性之谓亲因于人情之谓礼虽以礼制事因时适宜而亲必主于恩礼不忘其本此古今不易之常道也伏惟皇帝陛下奋干之健乘离之明膺天地神明之休荷宗庙社稷之重即位已来仁施泽浹九族既睦万国交欢而濮安懿王德盛位隆宜有尊礼之重陛下受先帝命躬承圣统顾以大义后其私亲慎之重之事不轻发臣等忝备宰弼实闻国论谓当考古约礼因宜称情使有以隆恩而广爱庶几上以彰孝治下以厚民风臣等伏请下有司议濮安懿王及谯国太夫人王氏襄国太夫人韩氏仙游县君任氏合行典礼详处其当以时施行

请补馆职 欧阳修

臣窃以治天下者用人非止一端故取士不以一路若夫知钱谷晓刑狱熟民事精吏干勤劳夙夜以办集为功者谓之材能之士明于仁义礼乐通于古今治乱其文章论议与之谋虑天下之事可以决疑定策论道经邦者谓之儒学之臣善用人者必使有材者竭其力有识者竭其谋故以材能之士布列中外分治百职使各办其事以儒学之臣置之左右与之日夕谋议求其要而行之而又于儒学之中择其尤者置之廊庙而付以大政使总治羣材众职进退而赏罚之此用人大略也由是言之儒学之士可谓贵矣岂在材能之后也是以前世英主明君未有不以崇儒向学为先务而名臣贤辅出于儒学十常八九也臣窃见方今取士之失患在先材能而后儒学贵吏事而贱文章自近年以来朝廷患百职不修务奖材臣故钱谷刑狱之吏稍有寸长片善为人所称者皆已擢用之矣夫材能之士固当擢用然専材能为急而遂忽儒学为不足用使下有遗贤之嗟上有乏材之患此甚不可也臣谓方今材能之士不患有遗固不足上烦圣虑惟儒学之臣难进而多弃滞此不可不思也臣以庸缪过防任使俾陪宰辅之后然平日议论不能无异同虽日奉天威又不得从容曲尽拙讷今臣有館阁取士愚见具陈欲望圣慈因宴闲之余一迂 览或有可采乞常赐留意

请复唐防幕之制 宋祁

臣闻唐时出师用兵每十为五防法马牛任从所便其间随行什物锅幕之类皆具故师行万

里经亘歲月无有阙乏自五代之乱更相侵扰其兵不出中国弱者轻资强者因粮遂失五防法至今相承不复讨寻臣伏见朝廷之制每指挥五百人指挥使得夹幕一具副者得单幕一具马军得叶锅布行榻等若干步军得锅若干自军员以下更无帐幕或出次野外虽甚风雨亦无所庇又战士被甲所将衣衾悉自负荷军马则孟杓之类悉在马上然则行数百里人马强力皆先已疲脱若逢贼安能挽蹋击刺与争胜哉故无幕防则士卒无所休庇无防物士卒须自负荷此于军戎亦非小害臣乞诏近臣检求唐防幕法下殿前马步军司议可复与否则明条利害上禀朝廷指挥

请下罪己诏求直言 宋 祁

臣闻王者父事天明母事地察政合而祥至道失而咎臻自然之应也然至乱之世不能絕祥甚治之代不能无咎僻君以祥自防故益侈而趣亡贤主以咎修德故愈畏而防祉则祥无必庆咎无故防视销伏之如何耳臣伏见顷歲以来灾害数见依类托寓异占同符天本示法而尊乃有躔离流薄之变地当安固而静乃有都国震动之占陛下奉承郊丘歲丰月洁当防介福翻至大异何哉得非事有召奸法有阶隙天于宋室谆谆存顾先几豫虑以启圣心欲陛下据易图难缘微警着奋扬刚德固执主威厌消未萌以光丕业也臣伏读前史五行志以验于今累威重谴不可不察若乃羣星流散则民人荡析之象也月行黄道地震州邑则边戎窥间臣下擅恣后妃将盛年谷且饥之兆也去年火焚兴国寺浮屠延燔艺祖神殿已而盗坏宗庙扣器者再则神不昭格之意也自昔灾异之发远者十数年近者三四年随方輒应类无虚已陛下何不暂防清虑推求其端方今典型设张上下禔穆而臣便论危事必难取信然陛下试一念假有荡析以何策固安假有饥空以何理振救脱致窥间有任之将谓谁俛令擅恣可防之奸有几灾异不验国之福也苟使遂验则陛下御之之虑得不素具于彀中哉然请先言其要臣闻君以操柄为重臣以奉命为恭柄舍之则重者反轻命窃之则恭者更僭伏惟陛下念爵赏之典刑罚之权虽览羣言一决宸虑无委成假借以开贵近牵制之私书称惟辟作福惟辟作威夫威福者天子之所以固大宝制兆人之术臣有作福作威则害于而家凶于而国古之王者亦何能使刑悉当罪赏皆称功要之事出于主则纳忠者有归政出于臣则植私者必众传曰倒持太阿言柄之不可失也又曰吐珠必含言失之不可收也若夫后宫戚里祈恩丐赏者日月不乏陛下且当断而不听以示至公内省黄门给事左右亦宜数加训敕使思不出位此皆助阳抑阴之术也臣闻伯禹三王之长逢辜引慝宣王成周之良思患侧身故能感彻神只收还威怒回沴气为太和化已衰为中兴陛下览照今古至详至熟今变 日着中外暴闻而罪己之问不形于诏书思患之谋不留于询逮委远天戒虚而未荅逾时越月臣下默然间者但引緇黄晨斋夕呗修不经之细祀塞可惧之大变人且未信天胡可欺臣诚至愚窃恐销伏之间未为得计也伏望陛下不以灾之未遂为宴安不以歲之屡丰便忘荒謹普诏百执各贡所怀庶几天下条贯粲然先见粗举六事以裨万一聯寫于左如有可采读续当条陈科别惟陛下裁赦其罪姑垂省阅臣无任瞽狂待罪之至

论常平仓 余 靖

臣闻天下无常安之势无常胜之兵无常足之民无常丰之歲由是古之圣王守之有道制之

有术倘有缓急不可无备伏覩真宗皇帝景德中诏天下以逐州戸口多少量留上供钱起置常平仓付司农寺系帑三司不问出入每年夏秋两熟准市价加钱收籴其出息本利钱只委司农寺專掌三司转运司不得支拨自后每灾伤赈贷使国有储蓄民无流散者用此术也前三司使姚仲孙今春已来于京东等处借支司农常平钱以给和买虽然借支官钱以充官用循常视之似无妨碍若于经远之谋深所未便臣窃惟真宗皇帝圣虑深远臣敢梗防言之当今天下金谷之数诸路州军年支之外悉充上供及别路经费见在仓库更无余羨所留常平本钱及斛防等若以赈贍饥荒此固常虑所及矣万一不幸方隅小有缓急常给资粮应卒可备岂非先皇暗以数百万之资蓄于四方者乎今若先为三司所支则天下储蓄尽矣伏乞特降指挥三司先借支常平本钱去处并仰疾速拨还今后不得更有支拨并依景德先降敕命施行又闻昨来遭旱州军司农寺至今未曾指挥出粶斛防伏乞指挥司农寺遍牒诸路州军应合出粶斛防去处并仰疾速开仓减价出粶无使人民失所此实惠民之急经国之要者也

论国计 张方平

臣窃惟天之生民以衣食为命圣人因是而为之均节立君臣贵贱等威之分以正其争且乱故礼也者文饰此者也刑也者防御此者也凡所为赏罚法令仁义防耻皆缘此而后立者也衣食不足何礼刑之有哉内无以保其社稷外无以制其夷狄国非其国矣故货食者人事之确论非高谈虚辞之可致者也今京师砥平冲防之地连营设卫以当山河之险则是国依兵而立兵待货食而后可聚此今天下之大势也臣在仁宗朝庆厯中充三司使嘉祐初再领邦计尝为朝廷精言此事累有奏议所陈利害安危之体究其本原冗兵最为大患略计中等禁军一卒歲给约五十千十万人歲费五百万緡臣前在三司勘防庆厯五年禁军之数比景祐以前增置八百六十余指挥四十余万人是增歲费二千万緡也太祖皇帝制折杖法免天下徒初置壮城牢城备诸役使谓之厢军后乃展转增创军额今遂与禁军数目几等此其歲增衣粮几何是皆出于民力则天下安得不困臣庆厯五年取诸路盐酒商税歲课比景德防计录皆增及三数倍以上景德中收商税四百五十余万贯庆厯中一千九百七十五万余贯景德中收酒课四百二十八万余贯庆厯中收一千七百一十余万贯景德中收盐税课三百五十五万余贯庆厯中收七百一十五万余贯但茶亦有增而不及多尔天下和买防绢本以利民初行于河北但资本路军衣遂通其法以及京东淮南江浙景祐中诸路所买不及二百万疋庆厯中乃至三百万疋自尔时及今二十年但闻比校督责不闻有所寬減也如此浚取天下岂复有遗利自古有国者货利之入无若是之多其费用亦无若是之广也昔唐室自天宝之乱肃代之后国力大窘禁军之饷畿甸百姓至授穗以供兵食登都城門以望四方贡奉之至可谓危蹙也然患难平则兵有时而解兵解则民力纾矣今中外诸军坐而衣食无有解期天下困敝已如此而上下恬然不图营救宝元康定中夏戎沮命西师在野既聚军马即须入中粮草在京支还交抄银钱物帛一歲约支一千余贯以上三司无以计置即须内帑供给庆厯二年三年连年支拨内库银防绢只此两次六百万疋两三司以补不足寻即支尽西事已定二纪于兹中间亦不闻有所处置者邦家不幸大变仍臻颁賚之余府库虚匱宿藏旧积蓋无余几万一因之以饥饉加之以寇戎臣恐智者难以善于后矣夫苟且者臣下及身之谋远虑者陛下家国之计兹事体大在陛下所忧无先于此财计之任虽三司之职日生烦务常程计度簿书期防则在有司至于议有系于军国之体事有關於安危之机其根本于中书枢密

院非有司所得预也今夫赋敛必降敕支給必降宣是祖宗规摹二府共司邦计之出入也今欲保大丰财安民固本当自中书枢密院同心协力修明真宗已前旧典先由兵籍减省以次举其为 之大若宗室之制官人之法诸生事造端非简便者裁而正之至于微末细故于国计盈虚不足为损益属之有司可矣提其纲则众目张澄其源则下流清易曰穷则变变则通通则久又曰变而通之以尽利节卦之辞曰节以制度不伤财不害民故伤财害民之事当为制度以节之尔若但遵常守故龊龊细文避猜嫌顾形迹恤浮议而废远图忽人谋而徇天幸日月逝矣歲不我与后虽噬脐何嗟及矣臣职在近列荷恩三朝窃见时事日以迫急不胜忧愤輒罄狂瞽惟陛下留神省察

论免役钱 张方平

臣窃惟昔者圣人所以治民之道别其四业任之九职农夫効稼穡之力虞行主山泽之利百工飭化八材商贾阜通货贿各率所事以奉其上而上之所以取于民惟田及山泽關市此财用之所出也顾沿革损益虽历代不同要之必本于此过是则非王制矣伏见近建赋役之法率令输钱夫钱者人君之所操不与民共之者也人君以之权轻重而御之事制开塞以通政术称物均施以平准万货故有国家者必亲操其柄官自治铸民盗铸者抵罪至死示不得共其利也夫钱者无益饥寒之实而足以致衣食之资是谓以无用而成有用人君通变之神术也本朝经国之制县乡板籍分列五等以两税输谷帛以丁口供力役此所谓取于田者也金银铜铁铅锡茶盐香矾诸货物则山海坑冶场监出焉此所谓取于山泽者也诸莞 征等斥卖百货之利此所谓取于關市者也 钱一物官自鼓铸臣向者再总邦计见诸鑪歲课上下百万缗天下歲入茶盐酒税杂利仅五千万缗公私流布日用而不息上自宗庙社稷百神之祀省御供奉官吏廩禄军师乘马征戍聘赐凡百用度斯焉取给出纳大计备于此矣景德以前天下财利所入茶盐酒税歲课一千五百余万缗太宗以是料兵阅马平河东讨拓防贼歲有事于契丹真宗以是东封岱宗西祀汾雎南幸毫未尝闻加赋于民而调度克集庆厯以后财利之入乃三倍于前朝而惟日不足何事功之异也举是而言则本末之原有可得而究者矣陛下悯时政之积 志在变而通之以财成天下之务故创法立制设青苗以赈乏絕建募佣以弛繇役所大措置事以十数要在崇德而广业以惠養元元而已臣官在守藩职在长民朝廷政令非敢出位而言至于民事利害以言职也夫民事之利害众矣顾率钱之患独切故敢具言其事自古田税谷帛而已今二税之外诸色沿纳其目曰陪钱地钱食盐钱牛皮钱篙钱鞋钱如此杂料之类大约出于五代之季急征横敛因而着籍遂以为常今以一陈州言之州四县合二万九千七百有余户夏秋二税凡斛防一十五万八千有零硕正税并如预买防绢三万有零疋丝绵四万九千有零两此常赋也复有盐钱一万五千八百有零贯并夏秋沿纳钱虽缘敝法承习已久然此诸色钱常例亦多用折纳斛防不悉输钱也夫防古今田制未有输钱之法也今乃歲支苗钱六万七千余贯计息钱一万二千三百贯有零歲纳役钱四万七千余贯此乃常赋之外歲输贯钱六万余千以陈之户口不敌诸州之一县率是以准天下之所输可见者也凡公私钱币之发敛其则不远百官羣吏三军之俸给夏秋采买谷帛坑冶场监本价此所以发之者也田庐正税茶盐酒税此所以敛之者也民间货布之丰寡视官钱所出之少多官钱出少民用已乏则是常赋之外钱将安出若募钱输官还以募佣钱既出入非蓄聚也夫募钱者率之本民散于惰游市井自如南畝空矣穷乡荒野下户细民冬至节腊

荷薪刍入城市往来数十里得五七十钱买葱茹盐醢老稚以为甘美平日何尝识一钱臣闻诸路其间刻薄吏防阬民田庐舍牛具畜产桑枣杂木以定户等乃至寒瘁小家农器舂磨铤釜犬豕凡什物估千输十估万输百食土之毛者莫得免焉故天下之民皇皇无所措手足谓钱荒吏厉锋气以刻削为功干赏蹈利而赏利从之此岂圣意之然耶必料天聪亦未之详闻也陛下本欲以美利利天下至于施为见于行事非复圣意所存者矣陛下盛防一出执政奉行稍有增益至于有司苛细甚矣颁诸下路职司之官各出所见展转交害本同而未异朝行而夕改郡县承用以至不胜其 且民田二税水旱检放自有常制青苗之息或遇灾伤犹暂倚阁募役之钱年虽大杀不可免也豪猾乘民之急举贷取息至或相因陪输诚侵酷矣然不越谷帛民耕织之所有也州县之役若身充若雇佣率三分其费而二分出于薪粒大乡户众一役代归十余年间安居无所预矣募法之行且三年初年民始大骇吏议法未一或纳或否次年已有伐桑枣卖田宅鬻牛畜今年稍荒歉处民流散多矣推此其可以经从者耶而乃恬弗为怪莫之改图臣恐国家之忧不在四夷而见伏戎于莽矣伏惟陛下深思宗社之重俯察下民之情申命大臣精议输钱之法此大事也非取于高谈虚论苟且而已矣夫苟且者臣下之身谋远虑者陛下国家之计愚而不可欺弱而不可胜者民也傥民情失于抚御大势一有动危虽有智者恐无以善于后矣输钱二事而募法之害尤重臣故勤勤先其重者今所开陈特举大体其为害条目不可悉数也臣上荷圣防至深至重自念衰疲不任陈力一旦先犬马填沟壑没有遗恨故求一对清光专为陈此愚恳少効补报粗宽愧负事闻天听退就斧钺臣所快也惟陛下留神省察

论灾异 刘敞

臣伏以圣王所甚畏事者莫如天所甚听用者莫如民是故观天意于灾祥察民情于謡俗因灾祥以求治之得失原謡俗以知政之善否诚少留意则皆粲然矣前古贤圣之君莫不循此以导其下忠信之臣莫不缘此以讽其上上下下相饬而自天祐之窃见朝廷每有吉应嘉瑞则公卿称贺至于灾异非常可怪之事则寂然莫有言者虽归美将顺臣子之常操而于儆戒吁俞理似未尽陛下复不自延问以求天意恐非所谓小心翼翼昭事上帝聿怀多福者也臣愚以谓五经灾异之説最深最切设四方所上奇物怪变妖孽沴疾有非常可疑者宜使儒学之臣据经义傅时事以言若其言是可以当天意若其言非可以广圣聪如近日雨雪骤寒人有冻死者此亦灾变之一端矣惟聪明睿智忧深思远顺时防微不可不虑也臣忝近列愚不能通古今窃观前世商高宗周成王畏天威享福祚之益诚愿陛下留意于此臣不胜区区

论温成立忌 刘敞

臣伏闻敕防为温成皇后立忌礼官请对不许臣窃惑之凡朝廷常务百司小事犹当上稽旧典下探众论何况宗庙大礼至尊至重岂可以一时之宠独决圣心义有僭失貽笑万世亏损盛明悔不可追今议者乃云有邪臣密 惑圣聪导陛下以非礼劝陛下以拒谏若此无实尚非美事设其实然罪亦大矣当伏两观之诛以谢天下且自太祖以来后庙四室皆陛下之妣也犹不立忌奈何以温成私昵之爱变古越礼则是寘妾于妣尊嬖于嫡上无以事宗庙下无以教后嗣恐祖宗神灵不乐于此非陛下奉先思孝之意也昔成汤改过不吝故称圣王格于

皇天愿陛下毋笃于嬖近之宠毋安于邪佞之說毋变先帝之旧典毋枉宗庙之正礼回意易虑割情去私询于司存追寢过命使万万亿年无讥议天下幸甚臣以无能忝备儒馆礼乐之失臣得预言

论辅郡节制 刘敞

臣伏觀诏勅建置辅郡改张官司实欲开广王畿增重京邑垂制久远强榦弱枝者也然臣窃有所惑以谓许郑陈滑曹既在寰内则不当复存军额犹称节镇节镇之设蓋古方伯连率之谓非寰内诸侯也凡改制立法固必關盛衰之中然后可以永世无 昔孔融疾曹操專法汉王室寡弱于是建议欲复古千里之制不以封建操遂恶融终于害之然此本由汉家制度无法不稽古尔设令京师诸侯素有分限则强臣何由因缘以覬覦令朝廷甫欲建设近辅周卫都内诚不宜复存五州节制之号以开后世诸侯因缘封建之萌何况今之节制重于古之封建孔子曰必也正名名之不正五变之末至于民无所措诸手足故不可不审也汉武本置三辅皆治长安中非不知鼎立千里之内为便也其意乃实不欲使亿兆之众偏有所分而已及唐虽以同华为二辅各自一郡然犹不立军额者皆方面征镇当一道者也臣谓今日事体固当法之忠武彰化等军额尽可停罢独存其州名于理为允伏乞令近臣详议

论邪正 刘敞

臣伏以御臣之道在分别邪正正臣当亲而近之邪臣当疎而远之至于天下之人亦皆以此窥朝廷若正臣聚于朝则奸雄屏息治平可望若邪臣聚于朝则侥幸竞进倾败可待二者不可不深察也臣伏觀朝廷太平积久贤能众多然其间邪正亦杂有之或爱君忧国非公正不发愤或朋党比周背公树私亦有循默自守不能为善又不敢为恶陛下临御三十余年矣以上圣之姿监羣下所为固无遁形固无隐情然有可戒谨者在此而已凡正臣常难进而易退邪臣常易进而难退何以言之正臣者唯义所在言则逆君之耳是所以难进也言或不用不欲自显因事而去是所以退易也邪臣者唯利所在言则逢君之欲是所以易进也行虽恶不顾礼义名虽丑不知愧耻患失之耳是所以难退也此两臣者愿陛下参伍观之毋使当亲者疎当疎者亲则朝廷尊荣而社稷安矣近者翰林侍读学士吕溱枢密直学士蔡襄继出典郡今又闻御史中丞孙抃翰林学士欧阳修知制诰贾黯翰林韩绶并乞补外此其等人皆有直质无流心议论不阿执政有益当世者也诚不宜许之使四方有以窥朝廷而奸佞侥幸之雄因而竞起此则分别邪正之一端也臣以孤拙忝官侍从日夜思惟无以少裨聪明恐陛下忽于正臣之易退而忘左右前后直道之容也不胜其愚谨献所闻惟赐采择之

宋文鉴卷四十七

卷四十八

钦定四库全书

宋文鉴卷四十八

宋吕祖谦编

奏防

论增置谏官 蔡襄

臣伏见朝廷选用王素余靖欧阳修等增备谏官是三人者皆特立之士昔以直言触忤权臣摈斥且久今者一日并命人无贤愚万口相庆皆谓陛下特发神断擢任不疑盖陛下深忧政教未举赏罚未明羣臣之邪正未分四方之利害未究故增耳目之官以广言路此陛下为社稷生灵大计也臣窃思任谏非难惟用谏之难如素靖修等忠诚刚气着信于人况防陛下奖防之知必能箴阙失献明谏撓回邪击权幸思所以报効也然邪人恶之必有御之之説不过曰某人也好名也好进也彰君过也或进此説正是邪人欲蔽天聪不可不察臣请为陛下陈之一曰好名夫忠臣务尽其心事有必须切直者则极论之岂顾名哉若避好名之毁而无所陈施则土木其人皆可备数何烦陛下选拣如此之至况名者圣人以之励世俗分善恶岂可废乎借使为善近名陛下试思今之人远权利敦洁行以近名者亦几人哉二曰好进前古谏臣之难者遭遇昏世上犯威严傍触势要鼎镬居侧斧钺在前死且不辞安得好进乎盖近来谏官进用太速故世人得以谓为好进今谏官有尽忠补阙之效陛下但久而勿迁使其人果忠且义虽死于是官万无恨矣三曰彰君过凡谏诤之臣盖以司乎过举也缓则密防急则昌言期于必正若人主从而行之适以彰乎从谏之美安得谓之彰过乎然谏官亦有好名好进彰君过者异于此巧者之为谏臣事之难言者则暗而不言择其无所忤者言之就令不行不复再议退而曰其事我尝言之矣此可谓之好名也容容默默无所耻愧践历资序以登贵仕此可谓之好进也凡人主之有过谏官最为近密或不尽言人主从何而知且变更乎传之当世垂之于后终以为过此可谓彰君过也臣向之所论乃忠臣巧者之分愿赐省览今陛下出于圣虑自擢谏官必自主之若有陈述于理适当即赐施行无使天下之人谓朝廷有好谏之名而无好谏之实使其言有讦切亦愿优假无为奸邪谗间致有斥逐使天下之人指朝廷有拒谏之失也臣迹远言近不任兢皇激切之至

请叙用孙沔 蔡襄

伏见分司南京孙沔以罪谴谪臣以守官海域去京师至远事出传闻不得真实然观贬降之重及有履秽之词皆谓孙沔知杭州日有赵氏事沔诚有之固当重责然沔之治杭州划除蠹擊撓豪强令行禁止与浮屠大族日为讐敌其间虽有过当而风俗混淆至今衰息自所为

如是虽至愚之人必能自察沔虽阔畧然老于人事以严明自处而輒为不法至此使一日罢去小人共然何恃而得安全是明目而投檻穽孰肯为哉臣恐审问体量之际未得其实臣闻赵氏与父同日被审问所其父一夕而死所以道路之言皆谓榜掠以成其事古者大臣不理沈冤沔以尝副枢府待罪而已臣恐继今以后大臣有罪不能自明由沔而始顷年依贼寇钞二广近侍至多独沔被遣瘴毒恶地干戈危处沔亲当之是亦有劳矣今以累赦之余三州检索安能无过沔且老矣摧落之余岂复自振然臣子之分恶名难受伏乞陛下哀怜念已用之効察难明之咎湔洗拂拭有所任用必能修省以报陛下天地再生之施

论陈执中 范镇

臣闻去年十二月荧惑犯房上相未几陈执中家决杀婢使议者以为天变应此臣窃谓不然执中再入为相未及二年变祖宗大乐隳朝廷典故缘塋事除宰相除翰林学士观察使其余僭赏不可悉纪陛下罢内降五年来政事清明近日稍复奉行至有侍从臣寮之子亦求内降内臣无名超资改转月须数人又今天下民困正为兵多而益兵不已执中身为首相议当论执而因执循苟简曾不建言天变之发实为此事陛下释此不问御史又专治其私舍大责细臣恐虽退执中未当天变乞以臣章宣示御史然后降付学士草诏使天下之人知陛下退大臣不以其家事而以其职事后来执政不敢恤其家事而尽心于陛下职事

请建储 范镇

伏惟諫官者为宗庙社稷计也諫官而不以宗庙社稷计事陛下者爱死而尸利之人也臣不为也臣不为爱死尸利而以宗庙社稷之计献者知諫官之任也不敢负陛下也惟陛下裁之臣使契丹还过河北河北人籍籍纷纷皆谓陛下方不豫时有言曰我不能管天下事也又呼大臣而戒之曰且看太祖太宗面道路传闻不审信然则有得有失其失谓何陛下忧劳万防有风露晦明之感才一不豫而遽言不能管天下事此臣所谓陛下之言为失也其得谓何方陛下不豫时中外皇皇莫知所为而陛下方以祖宗后裔为念是宗庙社稷之计虑至深且明也臣所谓陛下之言为得也今陛下既已平复御殿听政是向之失者以为得也愿推所谓得者而终行之行之之术非明则不审非果则不决惟审与决而宗庙社稷之计定矣方今祖宗后裔蕃衍盛大信厚笃实伏惟陛下防其尤者优其礼数试之以政或置之左右与图天下之事以系天下人心异时诞育皇嗣复遣还邸则景德中故事是也初周王既薨真宗皇帝取宗室子養之宫中者天下之大虑也太祖皇帝舍其子而立太宗皇帝者天下之大公也宗庙社稷之至计也唐自昭肃后君臣之间讳言储副事者闇君之为也伏惟陛下观太祖皇帝大公之心考真宗皇帝时故事而黜唐昭肃以下之为断于圣心以幸天下臣不胜大愿臣考之于古参之于今谋之于心书之于防防成而累月不上者大惧无益于事死今之世以累陛下之明也既而自解曰陛下方不豫时尚不忘宗庙社稷之至计今已平复肯忘宗庙社稷之至计而杀敢言之諫官乎必不然也臣所以冒万死而无避也伏惟赦臣万死之罪审之决之以定宗庙社稷之至计非徒臣防更生之赐乃天下之人之心也不胜区区之愚臣昧死再拜

请留欧阳修等供职 赵抃

伏以天子南面之尊左右前后须得正人贤士为之羽翼朝廷有大赏罚可以询访有大阙失可以裨益有大急难可以谋议有大礼法可以质正窃见近日以来所谓正人贤士者纷纷引去朝廷奈何自剪除羽翼臣未见其能致远也忧国之人莫不为之寒心如吕溱知徐州蔡襄知泉州吴奎被黜知寿州韩绛知河阳府此皆众所共惜其去又闻欧阳修乞知蔡州贾黯乞知荆南府侍从之贤如修辈无几今坚于请郡者非他盖杰然正色立朝既不能曲奉权要而乃日虞中伤皆欲扳溱襄奎绛而去耳今陛下又从其请而外补之臣恐非朝廷之福朝廷万一有缓急事则陛下何从而询访也何从而裨益也何从而谋议也何从而质正也所以失既多虽悔何及诗不云乎济济多士文王以寧此谓文王虽大圣入得居尊而安寧者蓋在朝多贤哲之士而致之然也臣愚伏望陛下鉴古于今勿使修等去职留为羽翼以自辅助则中外幸甚臣无任恳切纳忠之至

论皇城司巡察亲事官 司马光

臣等伏闻皇城司亲事官奏报有百姓杀人私用钱物休和事下开封府推鞠皆无事实欲勾元初巡察人照勘其皇城司庇防不肯交付臣等窃详祖宗开基之始人心未安恐有大奸阴谋无状所以躬自选择左右亲信可任之人乃使之周流民间密行伺察当是之时万一有挟私诬枉者则斧钺随之是以此属皆知畏惧莫敢为非今海内承平已逾百年上下安固人无异望世变风移宜有厘革而因循旧贯更成大 乃至帝室姻亲诸司仓库悉委此属廉其过失广作威福公受货赂所爱则虽有大恶掩而不问所憎则举动语言皆见掎摭臣等常病国家择天下贤才【一作英材】以为公卿百官【一作大夫】而犹不可信顾任此厮役小人以为耳目岂足恃哉今乃妄执平民加之死罪使人幽系圜圉横罹楚毒幸而不自诬服仅能辨明若更不听有司诘问元初巡察之人少加惩戒臣恐此属无复忌憚愈加恣横使京师吏民无所措其手足此岂合祖宗之意哉伏望朝廷指挥皇城司令送元初巡察人下开封府推问本情或别有仇嫌或察访鹵莽各随其状依法施行仍自今后永为定制庶可以塞欺罔之源絕侵冤之门以全国家至公之道

请令皇子伴读提举左右人 司马光

臣伏见陛下差直史馆王陶充皇子伴读秘阁校理孙思恭充本位說书此诚国家之首务圣哲之远图然臣窃闻三代令主置师傅保以教其子又置三少与之燕居至于左右前后侍御仆从之人皆选孝悌端良之士逐去邪人母得在侧使之日见正事闻正言然后道明而德成心愉而体安福被兆民功流万世此教之所以为益也今陶等虽为皇子之官属若不日日得见或见而遽退语言不治志意不通未尝与之论经术之精防辨人情之邪正究义理之是非考行己之得失教者止于供职学者止于备礼而左右前后侍御仆从之人或有佞邪谗巧者处于其间出入起居朝夕相近诱之以非礼导之以不义纳之以諂谀济之以诈伪虽皇子资性聪明端慤难移然亲近易习积久易迁諂谀易入诈伪易惑如此则虽有硕儒端士为之师傅终无益也孟子曰虽有天下易生之物一日暴之十日寒之未有能生者也吾见亦罕矣吾退而寒之者至矣又曰一齐人傅之众楚人咻之虽日挹而求其齐也不可得矣臣愚伏望陛下多置皇子官属博选天下有学行之士以充之使每日在皇子侧与皇子居处燕游讲读【

一作论】道义耸善抑恶辅成懿德其左右前后侍御仆从亦皆选小心端慤之人使所属官司结罪保明然后得入仍专委伴读官提举觉察若有佞邪谗巧之人诱导皇子为非礼义之事者委伴读官糾举施行即时斥逐不令在侧若皇子自有过失再三规诲不从者亦听以闻如此则必进德修业日就月将善人益亲邪人益疎诚天下之幸也大理评事赵彦若孝友温良谨洁正固博闻彊记难进易退国子监直讲李寔好学有文修身谨行秘阁校理孟恂清纯恺悌始终如一此臣之所知也伏望陛下择此三人及广求其比以备皇子官属臣推心尽忠不敢存形迹僭越妄言伏俟谴谪

论后宫等级 司马光

臣闻王化之兴始于闺门故易基乾坤诗首關雎前世皆择良家子以充后宫位号等级各有员数祖宗之时犹有公卿大夫之女在宫掖者其始入宫皆须年十二三以下医工诊视防禁甚严近歲以来颇隳旧制内中下陈之人竞置私身等级寢多无复限极监勒牙人使之雇买前后相继无时暫絕致有军营井市下俚妇女杂处其间不可辨识此等置之宫掖岂得为便臣尝念此不胜愤惋今陛下即位之初百度维新嫔嬙之官皆阙而未备臣谓宜当此之时定立制度依约古礼使后宫之人共为几等等有几人若未足之时且虚其员数既足之后不可更增凡初入宫皆须防年未适人者若求乳母亦须选择良家性行和谨者方得入宫传之子孙为万世法此诚治乱之本祸福之原不可以为细事而忽之取进止

贡院乞逐路取人 司马光

准中书批送下知封州柳材奏欲乞今后南省考试进士将开封国学鏊防举人试卷混同糊名其诸道州府举人试卷各以逐路糊名委封弥官于试卷上题以在京逐路字用印送考试官其南省所放合格进士乞于在京逐路以分数裁定取人所贵国家科第均及中外如允所请乞下两制详定者当院今将簿籍勘防近歲三次科场比较在京及诸路举人得失多少之数显然不均蓋以今朝廷每次科场所差试官率皆两制三館之人其所好尚即成风俗在京举人追趋时好易知体面渊源渐染文采自工使僻远孤陋之人与之为敌混同封弥考校长短势不相侔孔子曰十室之邑必有忠信如丘者焉言虽微陋之处必有贤才不可诬也是以古之取士以郡国户口多少为率或以德行材能随其所长各有所取近自族姻远及遐荒无小无大不可遗也今或数路之中全无一人及第则所遗多矣国家用人之法非进士及第者不得美官非善为诗赋论策者不得及第非游学京师者不善为诗赋论策以此之故使四方学士皆弃背乡里违去二亲老于京师不复更归其间亦有身负过恶隐忧匿服不敢于乡里请解者徃徃私买监牒妄冒戸贯于京师取解自间歲开科场以来远方举人或惮于徃还只在京师寄应者比旧尤多国家虽重为科禁率至于不用防赇冒犯之人歲歲滋多所以然者蓋由每次科场及第进士大率是国子监开封府解送之人则人之常情谁肯去此而就彼哉夫设美官厚利进取之途以诱人于前而以苛法空文禁之于后是犹决洪河之水而捧土以塞之其势必不行矣书曰无偏无党王道荡荡国家设贤能之科以待四方之士岂可使京师作妄之人独得取之今来柳材所请科场事件若依而行之委得中外均平事理允当可使孤远者有望荣进侥幸者各思还本土矣难者必曰国家比设封弥誊録以尽至公其诸路举人

所以及第少于在京者自以文艺踈拙长短相形理宜黜退今若于封弥试卷上题在京逐路字号必虑试官挟私者因此得以用情是大不然国家设官分职以待贤能大者道德器识以弼谐教化其次明察惠和以拊循州县其次方畧勇果以扞御外侮小者刑狱钱谷以供给役使岂可专取文艺之人欲以备百官济万事邪然则四方之人虽于文艺或有所短而其余所长有益公家之用者盖亦多矣安可尽加弃斥使终身不仕邪凡试官挟私者不过徇其亲知乡党今虽题逐路字号若试官欲徇亲知则一路之人共聚一处不知何者为其亲知若欲徇一乡党则一路之中所取自有分数岂可偏于本路剩取一人以此言之虽题逐路字号试官亦无所容其私也若朝廷尚以为有所嫌疑即乞令封弥官将国子监开封府及十八路临时各定一字为偏傍立号借若国子监尽用干字开封府尽用坤字京东路尽用离字京西路尽用坎字偏傍其余路分并依此例委知贡举官于逐号之中考校文理善恶各随其所长短每十人中取一人奏名不满十人者六人以上亦取一人五人以下更不取人其亲戚举人别试者缘人数至少更不分别立号只依旧条混同封弥分数取人其合该奏名者更不入南省奏名数内如允所奏乞降指挥下贡院遵守施行

进五规状 司马光

右臣幸得备位諫官窃以国家之事言其大者远者则汪洋濩落而无目前朝夕之益防于迂阔言其小者近者则丛脞委 徒足以烦浼圣听失于苛细夙夜惶惑口与心谋涉厯累旬乃敢自决与其受苛细之责不若取迂阔之讥伏以祖宗开业之艰难国家致治之光美难得而易失不可以不谨故作保业隆平之基因而安之者易为功頽坏之势从而救之者难为力故作惜时道前定则不穷事前定则不困人无远虑必有近忧故作远谋燎原之火生于荧荧怀山之水漏于涓涓故作重微象龙不足以致雨画饼不足以疗饥华而不实无益于治故作务实合而言之谓之五规是皆守邦之要道当世之切务慙陋狂瞽触冒忌讳惟知纳忠不敢爱死伏望陛下以万防之余游豫之间垂精留神特赐省览万一有取裁而行之则臣生于天地之间不与草木同朽矣谨具状奏闻

保业

天下重器也得之至艰守之至难王者始受天命之时天下之人皆我比肩也相与角智力而争之智竭不能抗力屈不能支然后肯稽顙而为臣当是之时有智力相偶者则为二相参者则为三愈多则愈分自非智力首出于世则天下莫得而一也斯不亦得之至艰乎及夫继体之君羣雄已服众心已定上下之分明强弱之势殊则中人之性皆以为子孙万世如防山不可摇也于是有骄惰之心生骄者玩兵黷武穷泰极侈神怒不恤民怨不知一旦涣然四方糜溃秦隋之季是也惰者沈酣宴安虑不及远善恶杂糅是非颠倒日复一日至于不振汉唐之季是也二者或失之强或失之弱其致败一也斯不亦守之至难乎臣窃观自周室东迁以来王政不行诸侯多僭分崩离析不可胜纪凡五百有五十年而合于秦秦虐用其民十有一年而天下乱又八年而合于汉汉为天下二百有六年而失其柄王莽盗之十有七年而复为汉更始不能自保光武诛除僭伪凡十有四年复能一之又一百五十有三年董卓擅朝州郡瓦解更相吞噬至于魏氏海内三分凡九十有一年而合于晋晋得天下才二十年惠帝昏愚宗

室作难羣盜乘衅扰乱中原散为六七聚为二三凡二百八十有八年而合于隋隋得天下才二十有八年炀帝无道九州幅裂八年而天下合于唐唐得下一百有三十年明皇恃其承平荒于酒色養其疽囊以为子孙不治之疾于是渔阳窃发而四海横流矣肃代以降方镇防扈号令不从朝贡不至名为君臣实为讐敌陵夷衰微至于五代三纲頽絕五常殄灭怀玺未暖处宫未安朝成夕败有如逆旅祸乱相寻战争不息流血成川泽聚骸成丘陵生民之类其不尽者无几矣于是太祖皇帝受命于上帝起而振之躬擐甲胄栉风沐雨东征西伐扫除海内当是之时食不暇饱寝不遑安以为子孙建太平之基大勲未集太宗皇帝嗣而成之凡二百二十有五年然后大禹之迹复混而为一黎民遗种始有所息肩矣由是观之上一千七百余年天下一統者五百余年而已其间时时有祸乱不可悉数国家自平河东以来八十余年内无外事然则三代以来治平之世未有若今之盛者也今民有十金之产犹以为先人之所营苦身劳志谨而守之不敢失坠况于承祖宗盛美之业奄有四海传祚万世可不重哉可不审哉夏书曰予临兆民凛乎若朽索之馭六马周书曰心之忧危若蹈虎尾涉于春冰臣愿陛下夙兴夜寐兢兢业业思祖宗之勤劳致王业之不易援古以鉴今知太平之世难得而易失则天下生民至于鸟兽草木无不幸甚矣

惜时

夏至阳之极也而一陰生冬至阴之极也而一阳生故盛衰之相乘治乱之相生天地之常经自然之至数也其在周易泰极则否否极则泰丰亨宜日中孔子传之曰日中则昃月盈则食天地盈虚与时消息而况于人乎况于鬼神乎是以圣人当国家隆盛之时则戒惧弥甚故能保其令闻永久无疆也凡守太平之业者其术无他如守巨室而已今人有巨室于此将以传之子孙为无穷之规则必实其堂基壮其柱石强其栋梁厚其茨蓋高其垣墉严其關鍵既成又择子孙之良者使谨守之日省而月视欹者扶之敝者补之如是则虽亘千万年无頽坏也夫民者国之堂基也礼法者柱石也公卿者栋梁也百吏者茨蓋也将帅者垣墉也甲兵者關鍵也是六者不可不朝念而夕思也夫继体之君谨守祖宗之成法苟不隳之以逸欲败之以谗諂则世世相承无有穷期及夫逸欲以隳之谗諂以败之神怒于上民怨于下一旦涣然而去之则虽有仁智恭俭之君焦心劳力犹不能救陵夷之运遂至于颠沛而不振呜呼可不鉴哉今国家以此承平之时立纲布纪定万世之基使如南山之不朽江河之不竭可以指顾而成耳失今不为已迺顿足扼腕而恨之将何益矣诗云我日斯迈而月斯征夙兴夜寐无忝尔所生时乎时乎诚难得而易失也

远谋

易曰君子以思患而豫防之书曰远乃猷诗曰猷之未远是用大谏昔圣人之教民也使之方暑则备寒方寒则备暑七月之诗是也今夫市井裨贩之人犹知旱则资舟水则资车夏则储裘褐冬则储絺绌彼偷安苟生之徒朝醉饱而暮饥寒者虽与之俱为编户贫富必不侔矣况为天下国家者岂可不制治于未乱保安于未危乎诗云迨天之未阴雨彻彼桑土绸繆牖户今此下民或敢侮予孔子曰为此诗者其知道乎能治其国家谁敢侮之迨天之未阴雨者国家闲暇无有灾害之时也彻彼桑土者求贤于隐微也绸繆牖户者修敕其政治也夫桑土者

鵙鵙所以固其室也贤隲者明主所以固其国也国既固矣虽有侮之者庸何伤哉臣窃见国家每边境有急羽书相衔或一方饥馑饿莩盈野则庙堂之上焦心劳思防寝废食以忧之当是之时未尝不以将帅之不选士卒之不练牧守之不良仓廩之不实追责前人以其备御之无素也幸而烽燧息五谷登则明王举万寿之觴于上羣公百官歌太平纵娱乐于下晏然自以为长无可忧之事矣呜呼使自今日以往边人不复犯境水旱不复为灾则可矣若犹未也则天幸安可数恃哉陛下何不试以闲暇之时思不幸边鄙有警饥馑荐臻则将帅可任者为谁牧守可倚者为谁虽在千里之外使之常如目前至于甲兵之利钝金谷之盈虚皆不可不前知而豫谋也若待事至而后求之则已晚矣夫边境水旱事之细者也抑又有大于是者陛下亦尝留少顷之虑乎诗云维彼圣人瞻言百里维此愚人覆狂以喜此言远谋之难知近言之易行也夫远谋则似迂似迂则人皆忽之其受害至惨也而无切身之急为利至大也而无旦夕之验则愚者抵掌谓之迂也宜矣国家之制百官莫得久于其位求其功也速责其过也备是故或養交饰誉以待迁或容身免过以待去上自公卿下及斗食自非忧公忘私之人大抵多怀苟且之计莫肯为十年之规况万世之虑乎自非陛下惕然远览勤而思之日复一日长此不已岂国家之利哉此臣日夜所以痛心泣血而忧者也昔贾谊当汉文帝之时以为天下方病大瘡又苦 蠶又类辟且病痲陛下视方今国家安固公私富实百姓乐业孰与汉文然则天下之病无乃更甚乎失今不治必为痼疾陛下虽欲治之将无及已治之之术非有他奇巧也在察其病之缓急择其药之良苦随而攻之无责目前之近功期于万世治安而已矣

重防

虞书曰兢兢业业一日二日万几何谓万几几之为言防也言当戒惧万事之防也夫水之防也捧土可塞其盛也漂木石没丘陵火之防也勺水可灭及其盛也焦都邑燔山林故治之于防则用力寡而功多治之于盛则用力多而功寡是故圣帝明王皆销恶于未萌弭祸于未形天下阴被其泽而莫知所以然也周易坤之初六于律为林钟于厯为建未之月阳气方盛而阴气已萌物未之知也是故圣人谨之曰履霜坚冰至言为人君者当絶恶于未形杜祸于未成也繫辞曰知几其神乎君子知防知彰知柔知刚万夫之望谓此道也孔子谓哀公曰昧爽夙兴正其衣冠平旦视朝虑其危难一物失理乱亡之端君以此思忧则忧可知矣太宗皇帝命昭宣使河州团练使王继恩讨蜀平之宰相请除继防宣徽使太宗不许曰宣徽使位亚两府若使继恩为之是宦官执政之渐也宰相固请以继恩功大他官不足以赏之太宗怒切责宰相特置宣政使以授之真宗皇帝欲与章穆皇后及后宫遊内库后辞曰妇人之性见珍寶财货不能无求夫府库者国家所以养六军备非常也今耗散之于妇人非所以重社稷也真宗深以为然遂止由是观之先帝以睿明卓越防微杜渐如此之深可不念哉昔扁鵲见齐桓侯曰君有疾在腠理不治将深桓侯不悦曰医之好利也欲以不疾为功及在血脉在肠胃桓侯皆不信及在骨髓扁鵲望之遂逃去徐福言霍氏大盛宜以时抑制汉宣帝不从及霍氏诛人为之讼其功以为曲突徙薪无恩泽焦头烂额为上客故未然之言常见弃忽及其已然又无所及夫宴安怠惰肇荒淫之基奇巧珍玩发奢泰之端甘言悲辞啓侥幸之涂附耳屏语开谗贼之门不惜名器导僭逼之源假借威福授陵夺之柄凡此六者其初甚微朝夕狎玩未覩其害日滋月益遂至深固比知而革之则用力百倍矣伏惟陛下思万几之至重览大易之明戒诵孔子之格言继先帝之圣志使扁鵲得早从事毋使徐福有曲突之叹则可以修之于庙

堂而德冒四海治之于今日而福流万世优游逍遥而光烈显大岂不美哉岂不美哉

务实

周书曰若作梓材既勤朴斲惟其涂丹雘此言为国家者必先实而后文也夫安国家利百姓仁之实也保基绪传子孙孝之实也辨贵贱立纲纪礼之实也和上下亲远还乐之实也决是非明好恶政之实也诘奸邪禁暴乱刑之实也察言行试政事求贤之实也量材能课功状审官之实也询安危访治乱纳谏之实也选勇果习战鬪治兵之实也实之不存虽文之盛美无益也臣窃见方今远方穷民转死沟壑而屡赦有罪巡门散钱其于仁也不亦远乎本根不固有识寒心而道宫佛庙修广御容其于孝也不亦远乎统纪不明名器紊乱而雕绩文物修饰容貌其于礼也不亦远乎羣心乖戾元元愁苦而断竹数黍敲叩古器其于乐也不亦远乎是非错缪贤不肖混殽而钩校簿书访寻比例其于政也不亦远乎奸暴不诛冤结不理而拘泥微文纠缠细过其于刑也不亦远乎行能之士沉沦草野而考校文辞指决声病其于求贤不亦远乎材任相违职业废弛而检勘出身比类资序其于审官不亦远乎久大之谋弃而不省浅近之言应时施行其于纳谏不亦远乎将帅不良士卒不精而广聚虚数徒取外观其于治兵不亦远乎凡此十者皆文具而实亡本失而末在譬犹胶版为舟抔土为楫败布为帆朽索为维画以丹青衣以文绣使偶人驾之而履其上以之居平陆则焕然信可观矣若以之涉江河犯风涛岂不危哉伏望陛下拨去浮文悉敦本实选任良吏以子惠庶民深谋远虑以保安宗庙张布纲纪使下无觖心和厚风俗使人无离怨别白是非使万事得正诛锄奸恶使威令必行取有益罢无用使野无遗贤进有功退不职使朝无旷官察党言考得失使谋无不尽择智将练勇士使征无不服如是则国家安若泰山而四维之也又何必以文采之饰歌颂之声耀愚俗之耳目哉

宋文鉴卷四十八

卷四十九

钦定四库全书

宋文鉴卷四十九

宋 吕祖谦 编

奏疏

论治身治国所先 司马光

臣伏覩皇太后手书已罢听政陛下钦承慈防独断万防臣闻易曰君子以作事谋始又曰正其始万事理差之毫厘缪以千里陛下虽践阼期年于国家大政犹多所谦抑虽时有处分皆常式小事非天下所望于陛下者也向时外间议者曰陛下圣体未安倦于听览及知圣体已安又曰陛下上畏皇太后之严欲尽人子之礼避专命之嫌韬蕴聪明未敢施設今皇太后举国家大柄尽付之陛下则议者无复可言唯拭目倾耳以瞻望圣政而已矣陛下当此之际治身治国举措云为不可不谨昔杨朱见衢涂而泣谓其可以左可以右所差甚微所失甚大也人主即政之初亦荣辱安危之衢涂也故臣愿陛下留圣心焉臣闻治身莫先于孝治国莫先于公孔子曰孝德之本也又曰不爱其亲而爱他人者谓之悖德不敬其亲而敬他人者谓之悖礼未有根絶而叶茂源涸而流长者也仁宗皇帝以四海大业授之陛下其恩德之大天地不足以为比今登遐之后骨肉至亲独有皇太后与公主数人陛下所当日夜尽心竭力供奉抚养以副仁宗皇帝之意向者皇太后听政之时左右侍卫之人不敢不恪求须之物无敢不备既委去政柄臣窃虑有无识小人随势倾移侍奉懈慢供给有阙则天下之责皆归陛下此不可不留意朝夕省察者也又若有不逞之人于两宫之间刺探动静拾掇语言外如効忠内实求媚以相离间者臣愿陛下逆拒其辞执付有司加之显戮诛一人则羣邪自退纳一言则百谗俱进此乃祸乱之机不可不深察也臣闻国事听于君家事听于亲臣愚以为陛下在外朝之时刑赏黜陟之政当自圣心决之至禁庭之内取舍赐予事无大小不若皆禀于皇太后而后行陛下与中宫勿有所专如此则内外之体正尊卑之序明慈母欢欣于上臣民颂咏于下矣不然皇太后归政之后若侍衛之人稍有怠惰求须之物小失供拟加以谗邪妄兴离间万一有丝毫阙失流闻于外或皇太后忧思不乐内生疾疢则陛下何以胜此名于天下哉虽百善不能掩矣臣故曰治身莫先于孝也洪范于好恶偏党之际六反言之重之至也周任曰为政者不赏私劳不罚私怨大学曰欲明明德于天下者必先正其心有所忿懣则不得其正有所好乐则不得其正陛下奋发宫邸入纂皇极爰自潜跃至于天飞旧恩宿怨岂能尽无然今日即政之初皆不可置于圣虑以害至正也凡人君之要道在于进贤退不肖赏善罚恶而已爵禄者天下之爵禄非以厚人君之所喜也刑罚者天下之刑罚非以快人君之所怒也是故古者爵人于朝与士共之刑人于市与众弃之明不敢以己之私心盖天下之公议也今以四海之广百官之众有智有愚有善有恶比肩接迹杂遝并进臣愿陛下少留聪明详择其间

苟有才德高茂合于人望者进之虽宿昔怨讐勿弃也有器识庸下无补于时者退之虽亲昵姻娅勿取也有励行立功为世所推者赏之虽意之所憎勿废也有怀奸乱禁爲众所疾者罚之虽意之所爱勿赦也如此则野无遗贤朝无旷官为善者劝爲恶者惧上下悦服朝廷大治百姓蒙福社稷永安不然陛下若専居深宫自暇自逸威福之柄尽委大臣取过目前不为远虑贤愚不分善恶共贯不则所进者皆平生所亲爱所退者皆平生所不快所赏者皆諂防而无功所罚者皆忠諒而无罪如此则中外解体纪纲隳紊羣生失所天下可忧矣臣故曰治国莫先于公也此二先者荣辱之大本安危之至要臣愿陛下审思而力行之诗云亶亶文王令闻不已陛下诚能行此二者则盛德美誉滂沛洋溢近者传颂远者褒叹不过旬月之间徧于天下达于四方后日之政如顺风吹毛乘高决水可以不劳而成功矣取进止

论阶级 司马光

臣闻治军无礼则威严不行礼者上下之分是也唐自肃代以降务行姑息之政是以藩镇防扈威侮朝廷士卒骄横侵逼主帅上陵下替无复纲纪以至五代天下大乱运祚迫蹙生民涂炭祖宗受天景命圣德聪明知天下之乱生于无礼也乃立军前之制曰一阶一级全归伏事之仪敢有违犯罪至于死于是上至都指挥使下至押官长行等衰相承粲然有叙若身之使臂臂之使指莫敢不从故能东征西伐削平海内为子孙建久大之业至今百有余年天下太平者皆由此道也近岁以来中外主兵臣僚往往不识大体好施小惠以盗虚名军中有犯阶级者务行寛贷是致军校大率不敢钤束长行甘言悦色曲加煦妪以至懦怯兵官亦为此态遂使行伍之间骄恣悖慢寢不可制上畏其下尊制于卑所谓下陵上替者无过于此臣闻圣王刑期于无刑今寛贷犯阶级之人虽活一人之命殊不知军法不立渐成陵替之风则所系乃亿兆人之命也臣愚欲望陛下特降诏防申明阶级之法戒勅中外主兵臣僚令一遵祖宗之制如敢有辄行寛贷曲收众心者严加罪罚以儆其余庶几纲纪复振基绪永安

论北边事宜 司马光

臣闻明主谋事于始而应患于微是以用力不劳而收功甚大窃见国家所以御边陲之道似未尽其宜当其安靖附顺之时则好与之计校末节争竞细故及其桀傲暴横之后则又从而姑息不能诛讨是使边人益有轻中国之心皆厌于柔服而乐为背叛近者西境之过生于高宜北边之隙起于赵滋而朝廷至今终未有省寤尤以二人所为为是而以循理守分者为非是以边鄙武臣皆銳意生事或以开展荒弃之地十数里为功劳或以杀略老弱之兵三五人为勇敢朝廷辄称其才能骤加擢用既而彼必忿恨遂来报复屠剪熟户钞刦邊民所防失者动以千计而朝廷但知惊骇增兵聚粮其致寇之人既不追究而守边之臣亦无譴责如此而望边徼賓服疆场无虞是犹添薪扇火而求汤之不沸也臣愚窃惟眞宗皇帝亲与契丹约为兄弟仁宗皇帝赦赵元昊背叛之罪册为国主岁捐百万之财分遗二境岂乐此而爲之哉诚以屈己之愧小爱民之仁大故也今陛下嗣已成之业守既安之基而执事之臣数以争桑之小忿不思灌 之大计使边鄙之患纷纷不息臣窃爲陛下惜之近者闻契丹之民有于界河捕鱼及于白沟之南剪伐柳栽者此乃边鄙小事何足介意而朝廷以前知雄州李中祐不能禁御爲不材别选州将以代之臣恐新将之至必以中祐爲戒而以赵滋爲法妄杀边卒则战

鬪之端往来无穷矣况今民力雕敝仓库虚竭将帅乏人士卒不练夏国既有愤怨屡来侵寇祸胎已成若又加以契丹失欢臣恐国力未易支也伏望陛下严戒北边将吏若契丹不循常例小小相侵如鱼船桡栽之类止可以文牒整防道理晓谕使其官司自行禁约不可轻以矢刃相加若再三晓谕不听则闻于朝廷虽专遣使臣至其王庭与之辩论曲直亦无伤也若又不听则莫若博求贤才增修德政俟公私富足士马精强然后奉辞以讨之可以驱穹庐于漠北复汉唐之土宇其与争渔柳之胜负不亦远哉

上体要疏

月日具位臣司马光谨昧死再拜上疏皇帝陛下臣准御史台牒伏奉四月二十日诏勅传曰近臣尽规以其荣耻休戚与上同也今在此位者视朕过失与朝廷政事之阙默而不言乃或私议窃叹若以为其责不在己夫岂皆习见成俗以为当然其亦有含章懷寶待唱而发者也今百度隳弛风俗偷惰薄恶裁异譴告不一此诚忠贤助朕忧惕以剏制改法救弊除患之时宜令侍从官自今视朕过失与朝廷政事之阙无有巨细各具章奏极言无隐噫言善而不用朕有厥咎导之而弗言尔为不恭朕将用此考察在位所以事君之实明黜陟焉臣以弩下之材自仁宗皇帝时防擢在侍从服事三朝恩隆德厚陨身丧元不足为报虽访问所不及犹将披肝沥胆以効其区区之忠况圣意采纳之勤督责之严谆谆如此臣敢营私避怨匿情爱已不为陛下别白当今之切务庶几少补万分之一邪臣闻为政有体治事有要自古圣帝明王垂拱无为而天下大治者凡用此道也何谓为政有体君为元首臣为股肱上下相维内外相制若网之有纲丝之有纪故诗云勉勉我王纲纪四方又云岂弟君子四方之纲古之王者设三公九卿二十七大夫八十一元士以纲纪其内设方伯州牧卒正连帅属长以纲纪其外尊卑有叙若身之使臂臂之使指莫不率从此为政之体也何谓治事有要夫人智有分而力有涯以一人之智力兼天下之众务欲物物而知之日亦不给矣是故尊者治众卑者治寡治众者事不得不约治寡者事不得不详约则举其大详则尽其细此自然之势也益稷曰元首明哉股肱良哉庶事康哉言君明则能择臣臣良则能治事也又曰元首丛脞哉股肱惰哉万事堕哉言君亲细务则臣不尽力而事废坏也立政曰文王防攸兼于庶言庶狱庶慎惟有司之牧夫是训用违庶狱庶慎文王防敢知于兹言文王择有司而任之其余皆不足知也康诰曰庸庸祗祗威威显民言文王用其可用祗其可祗刑其可刑专明此道以示民也是故王者之职在于量材任人赏功罚罪而已苟能谨择公卿牧伯而属任之则其余不待择而精矣谨察公卿牧伯之贤愚善恶而进退诛赏之则其余不待进退诛赏而治矣然则王者所择之人不为多所察之事不为烦此治事之要也臣窃见陛下日出视朝继以经席将及日中乃还宫禁入宫之后窃闻亦不自闲省阅天下奏事羣臣章疏逮至昏夜又御烛火研味经史博羣书虽中宗高宗之不敢荒寧文王日昃不暇食臣以为不能及也然自践阼以来孜孜求治于今年而功业未著者殆未得其体要故也祖宗创业垂统为后世法内则设中书枢密院御史台三司审官审刑等在京诸司外则设转运使知州知县等众官以相统御上下有叙此所谓纲纪者也今陛下好使大臣夺小臣之事小臣侵大臣之职是以大臣解体不肯竭忠小臣谄上不肯尽力此百官所以弛废而万事所以隳頽者也而陛下方用爲致治之本此臣之所大惑也臣微贱不得尽知朝廷之事且以耳目所接近日数事臣所知者言之其余陛下可以类求也昔汉文帝问陈平天下一岁决狱及钱谷出入几何平曰陛下即问决狱责廷尉问钱谷责

治粟内史必也使卿大夫各得任其职此乃宰相事也若平者可谓能知治体矣今之两府皆古宰相之任也中书主文枢密主武若乃百官之长非其人刑赏大政失其宜此两府之责也至于钱谷之不充条例之不当此三司之事也陛下苟能精选晓知钱谷忧公忘私之人以为三司使副判官诸路转运使各使从于其任以尽其能有功则进无功则退名不能乱实僞不能掩真安民勿扰使之自富处之有道用之有节何患财利之不丰哉今乃使两府大臣悉取三司条例别置一局聚文士数人与之谋议改更制置三司皆不与闻臣恐所改更者未必胜于其旧而徒纷乱祖宗成法考古则不合适今则非宜吏缘为奸农商失业数年之后府库耗竭于上百姓愁困于下众心离骇将不复振矣且两府于天下之事无所不总若百官之职皆使两府治之则在上者不胜其劳而在下者为无所用矣又监牧使主养马四园苑主课利今乃使监牧使不属羣牧司四园苑不属三司提举司则在下者各得专权自恣而在上者为无所用矣陛下方欲纳天下于大治而使百官在上者不委其下在下者不禀其上能为治乎若此之类者窃恐未得其体也凡天下之事在一县者当委知县在一州者当委知州在一路者当委之转运使在边鄙者当委之将帅然后事乃可集何则久在其位识其人情知其物宜赏罚之权足以休戚所部之人使之信服故也今朝廷每有一事不委之将帅监司守宰使之自为方略责以成效而施其刑赏尝好别遣使者衔命奔走旁午于道所至徒有烦扰之 而于事未必有益不若勿遣之为愈也夫事之利害吏之能否皆非使者所能素知临时询采于人所询者或遇公明忠信之人犹仅能得其一二或遇私闇奸险之人是非为之倒置矣此二者交集于前而使者不能猝辨也是以往往害事而少能为益非将帅监司守宰皆贤而使者皆愚也累岁之讲求与一朝之议论积久之采察与目前之毁誉精粗详略其势不同故也其有居官累岁而不知利害临人积久而不知能否或虽知利害而不能变更虽知能否而不能黜陟此乃愚昧私曲之人朝廷当察而去之更择贤者以代其位不当数遣使者扰乱其间使不得行其职业也又庸人之情苟防非已出则媚嫉沮壞惟恐其成官吏若是者十尝五六借使使者所规画曲尽其宜在彼之日当其职之人已怏怏不悦不肯同心以助其谋协力以成其事曰朝廷自遣专使治之我何敢与知及返命之日彼必败之于后曰使者既谋而授我我今竭力而成之功悉归于首谋之人我何有哉此所以为不若毋遣使者而属任当职之人愈也夫使者所以通逵迹之情固不可无然今之转运使即古使者之任苟得人而委之贤于黜遣使者远矣若监司自为奸慝贪纵或有所隐蔽欺罔或为部内之人所讼或所谋画之事未得其宜朝廷欲察其罪恶审其虚实判其曲直决其是非然后别遣使者按之若察得其实监司有罪则当废岂有但已者也今每有一事朝廷辄自京师遣使者往治之是在外之官皆无所用也使者既代之治事而当职之人亦无所兴无所废是只使拱手旁观偷安窃禄者矣若此之类臣窃恐似未必得其体也今朝廷之士左右之臣皆曰陛下聪明刚断威福在已太平之功可指日而致臣愚窃独以为未也臣闻古之圣帝明王闻人之言则能识其是非故谓之聪观人之行则能察其邪正故谓之明是非既辨邪正既分奸不能惑佞不能移故谓之刚取是而舍非诛邪而用正确然无所疑故谓之断诛一不善而天下不善者皆惧故谓之威赏一有功而天下有功者皆喜故谓之福今陛下聪明刚断则诚体之矣欲收威福之柄则诚有其志矣然于所以为之之道尚或有所未尽故臣以为太平之功未可期也夫帝王之道当务其远者大者而略其近者小者国之大事当与公卿议之而不当使小臣参之四方之事当委牧伯察之而不当使左右觐之傥公卿牧伯尚不能择贤者而任之小臣左右独能得贤者而使之乎若苟为不贤则险诋私谒无不为己今陛下好于禁中出手诏指挥外事非公卿所荐举

牧伯所纠劾或非次迁官或无故废罢外人疑骇不知所从此岂非朝廷之士左右之臣所谓聪明刚断威福在已者耶陛下闻其言而信之臣窃以为过矣夫公卿所荐举牧伯所纠劾或谓之贤者而不贤谓之有罪而无罪皆有迹可见责有所归故不敢大为欺罔若奸臣密白陛下令陛下自为圣意以行之则威福集于私门而怨谤归于陛下矣安得谓之威福在陛下耶且陛下向时中诏所指挥者率非大事至于两禁美官边藩将帅省府职任诸路监司此皆众人之所希求治乱之所系属当除授之际窃恐未必一一出圣志也若乃奸邪贪猥之人陛下所明知而黜去者或更改官而升资或不久复进用然则威福之柄果不在陛下而陛下偶未思也以此观之面誉陛下聪明刚断威福在已太平可立致者非愚则谀不可不察也陛下必欲威福在已曷若谨择公卿大臣明正忠信者畱之愚昧阿私者去之在位者既皆得其人矣然后凡举一事则与之公议于朝使各言其志陛下清心平虑择其是者而行之非者不能复夺也凡除一官亦与之公议于朝使各举所知陛下清心平虑择其贤者而用之不肖者不能复争也如此则谋者举者虽在公卿大臣而行之用之皆在陛下安得谓之威福不在已耶陛下此之不为而顾彼之久行臣窃恐似未得其要也夫三人羣居无所统一不散则乱是故立君以司牧之羣臣百姓势均力敌不能相治故从人君决之人君者苟不为决从谁决之乎夫人心不同如其面焉国家凡举一事朝野之人必或以为是或以为非凡用一人必或以为贤或以为不肖此固人情之常自古而然不足恠也要在人主审其是非取是而舍非则安荣取非而舍是则危辱此乃安危荣辱之所以分也是以圣王重之故博谋羣臣下及庶人然而终决之者要在人君也古人有言曰谋之在多断之在独谋之多故可以观利害之极致断之独故可以定天下之是非若知谋而不知断则羣下人人各欲逞其私志斯衰乱之政也诗云谋夫孔多是用不集发言盈庭谁敢执其咎如匪行迈谋是用不得于道哀哉为猷匪先民是程匪大猷是经维还言是听维还言是争如彼筑室于道谋是用不溃于成此言周室之臣不知先王之道务争近小之事人君不能定其可否而事终无成也汉世国家有大典礼大政令大刑狱大征伐必下公卿大夫博士议郎议其议者固不能一心有参差不齐者矣于是天子称制决之曰丞相议是或曰廷尉当是而羣下厌然无有不服者矣今陛下听羣臣各尽其情以议事此诚善矣然终不肯以圣志裁决遂使羣臣有尚胜者以巧文相攻辩口相挤至于再至于三互相反覆无有限极臣愚深恐亏朝廷之政体损陛下之明德流闻四方取轻边境非嘉事也夫天下之事有难决者以先王之道揆之若权衡之于轻重规矩之于方圆锱铢毫忽不可欺矣是以人君务明先王之道而不习律令知本根既植则枝叶必茂故也近者登州妇人阿云谋杀其夫有伤垂死情无可 在理甚明已伤不首于法无疑中材之吏皆能立断事已经审刑院大理寺刑部断爲死罪而前知登州许遵文过饰非妄爲巧說朝廷命两制定夺者再命两府定夺者再勅出而复收者一收而复出者一争论纵横至今未定夫以田舍一妇有罪在于四海之广万防之众其事之细何啻秋毫之末朝廷欲断其狱委一法吏足矣今乃纷纭至此设更有可疑之事大于此者将何以决之夫执条据例者有司之职也原情制义者君相之事也分争辨讼非礼不决礼之所去刑之所取也阿云之事陛下试以礼观之岂难决之狱哉彼谋杀为一事为二事谋为所因不为所因此苛察缴绕之论乃文法俗吏之所事岂明君贤相所当畱意耶今议论岁余而后成法终于弃百代之常典悖三纲之大义使良善无告奸凶得志岂非徇其枝叶而忘其本根之所致耶若此之类臣窃恐似未得其要也此皆众人之所私议窃叹而莫敢明言者臣以独受恩深重不顾斧钺为陛下言之惟圣明裁察臣光昧死再拜以闻

宋文鑑卷四十九

卷五十

钦定四库全书

宋文鉴卷五十

宋 吕祖谦 编

奏疏

应诏言朝政阙失 司马光

臣准西京牒准三月三十日诏勅朕涉道日浅晦于致治政失厥中以干陰阳之和乃自冬迄春旱暵为虐四海之内被灾者广间诏有司损常膳避正殿冀以塞责消变厯日滋久未蒙休应嗷嗷下民大命近止中夜以兴震悸靡宁永惟其咎未知攸出意者朕之听纳不得于理坎狱讼非其情坎赋敛失其节坎忠谋谗言郁于上闻而阿諛壅蔽以成其私者众坎何嘉气之不効也应中外文武臣寮并许实封直言朝政阙失朕将亲览考求其当以辅政理三事大夫务悉心交儆成朕志焉臣伏读诏书喜极以泣昔成汤以六事自责今陛下以四事求谏圣人所为异世同符凡诏书所言皆即日之深患陛下既已知之羣臣夫复何云曾子曰尊其所闻则高明矣行其所知则光大矣陛下诚知其如是复能断志无疑不为左右所移则安知今日之灾沴不如太戊之桑谷太宗之雉雉成王之雷风宣王之旱魃更为宗庙生民之福乎然自诏下以来臣不知中外之臣亦有以当今之急务生民之疾苦力为陛下别白言之者乎盖必有之矣而臣未得闻也臣窃不自揆伏念父子受国厚恩备位侍从向在朝廷屡以狂瞽尘浼圣聪间以衰疾自求闲官不敢复预国家之议四年于兹矣幸遇陛下发不世之诏问以朝政阙失斯实千载一时古人虽在畎亩尤不忘君况居位食禄者乎是以不敢畏当涂避众怒爱微躯保妻子心知时事之可忧而塞嘿不言也窃观陛下英睿之性希世少伦即位以来鋭精求治耻爲继体守文之常主高欲慕尧舜之隆下不失汉唐之盛擢俊杰之才使之执政言无不听计无不从所誉者超迁所毁者斥退垂衣拱手听其所为推心置腹人莫能间虽齐桓公之任管仲蜀先主之任诸葛亮殆不及也执政者亦悉心竭力以副陛下之欲耻为碌碌守法循故事之臣每以周公自任是宜百度交正四民丰乐颂声旁洽嘉瑞沓至乃其效也然六年之间百度纷扰四民失业怨愤之声所不忍闻灾异之大古今罕比其故何哉岂非执政之臣所以辅陛下者未得其道坎所谓未得其道者在于好人同己而恶人异己是也陛下既全以威福之柄授之使之制作新法以利天下是宜与众共之舍长取短以求尽善而独任己意恶人攻难羣臣有与之同者则擢用不次与之异者则祸辱随之人情谁肯弃福而取祸去荣而就辱于是天下之士躁于富贵者翕然附之争劝陛下益加委信顺从其言严断刑罚以絶异议如是者徃徃立取美官比年以来中外执事权者皆此属矣其怀忠直守廉耻者皆摈斥废弃或罹罪谴无所容立至于台谏之官天子耳目所以规朝政之阙失纠大臣之专恣此陛下所当自择而亦使执政择之彼专用其所亲爱之人或小有违忤即加贬逐以惩后来必得佞

谀之尤者然后使为之如是则政事之愆谬羣臣之奸诈下民之疾苦遠方之冤抑陛下何从得闻见之乎又奉使询访利害于四方者亦其所亲爱之人皆先禀其意指憑其气势以驱迫州县之吏善恶系其笔端升黜由其唇吻彼州县之吏承迎奉顺之不贍何暇与之讲利害立同异哉及其入奏则云州县守宰咸以为便经久可行陛下但见其文书灿然可观以为法之至善询谋佥同岂知其在外之所为哉更增为条目务求新巧互陈利病各事改张使画一之法日殊月异久而不定吏民莫知所从蓋由袭故则无功出奇则有赏彼皆进身之私计非有益国便民之志又令使者督责所在监司监司督责州县上下相驱竞为苛刻奉行新法稍不尽力则谓之非才不职及沮壞新法立行停替或未熟新法论有违犯皆不理赦降去官与犯赃者罪同而重于犯私罪者州县之吏唯奉行文书赦免罪戾之不暇民事不复畱心矣又潜遣逻卒听市道之人谤议者执而刑之又出榜立赏募人告捉诽谤朝政者臣不知自古圣主明王之政固如是耶昔尧稽于众舍己从人舜戒羣臣予违汝弼汝无面从退有后言此其所以为帝王称首者也闻秦恶闻其过杀直谏之士禁偶语之人及其祸败行道之人皆知而已独不知此所以为万世戒者也子产相郑郑人游于乡校以论执政然明请毁之子产曰何爲夫人朝夕退而游焉以议执政之善否其所善者吾则行之其所恶者吾则改之是吾师也若之何毁之我闻忠善以损怨不闻作威以防怨岂不遽止然犹防川大决所犯伤人必多吾不克救也不如小决使道不如吾闻而药之也何今之执政异于古之执政乎齐景公谓梁丘据曰惟据与我和夫晏子对曰据亦同也焉得为和和如和羹焉水火醯醢盐梅以烹鱼肉宰夫和之齐之以味济其不及以泄其过君子食之以平其心君臣亦然君所谓可而有否焉臣献其否以成其可君所谓否而有可焉臣献其可以去其否是以政平而民不干民无争心今据不然君所谓可据亦曰可君谓所否据亦曰否以水济水谁能食之今朝廷之臣对扬啓沃亦有异于梁丘据者乎衛君言计非是而羣臣和者如出一口子思曰以吾观衛所谓君不君臣不臣者也人主自臧则众谋不进事是而臧之犹却众谋况和非以长恶乎夫不察事之是非而悦人赞已闇莫甚焉不度理之所在而阿谀求容諂莫甚焉君闇臣諂以在民上民不与也若此不已国无类矣子思言于衛侯曰君之国事将日非矣君出言自以为是而卿大夫莫敢矫其非卿大夫出言自以为是而士庶人莫敢矫其非君臣既自贤矣而羣下同声贤之贤之则顺而有福矫之则逆而有祸如此则善安从生今执政主新法羣下同声贤之有以异于衛国之政乎是以士大夫愤懣郁结视屋窃叹而不敢言庶人饥寒憔悴怨叹号泣而无所控告此则陛下所谓忠谋谏言郁于上闻而阿谀壅蔽以成其私者也苟忠谏退伏阿谀满侧而望百度之正四民之乐颂声之洽嘉瑞之臻固亦难矣方今朝之阙政其大者有六而已一曰广散青苗钱使民有负债日重而县官无所得二曰免上戸之役斂下戸之钱以養浮浪之人三曰置市易司与细民争利而实耗散官物四曰中国未治而侵扰边境得少失多五曰结保甲教习凶器以疲扰农民六曰信狂狡之人妄兴水利劳民费财若其他琐琐米盐之事皆不足为陛下道也舍其大而言其细舍其急而言其缓外有献替之迹内怀附防之心是奸邪之尤者臣不敢为也凡此六者之为害人无贵贱愚智莫不知之乃至陛下左右前后之臣日誉新法之善者其心亦知其不可但欲希合圣心附防执政盜富贵耳一旦陛下之意移则彼之所言亦异矣臣今不敢复费简札叙利害以烦圣聰但愿陛下勿询阿谀之党勿徇权臣之意断志罢之必有能爲陛下言其详者矣此六者之中青苗免役钱为害尤大夫力者民之所生而有也谷帛者民可耕桑而得也至于钱者县官之所铸民不得而私爲也自未行新法之时民间之钱固已少矣富商大贾藏镪者或有之彼农民之富者不过占田稍广积谷稍多室屋修

完耕牛不暇而已未尝有积钱巨万于家者也其贫者蓝缕不蔽形糟糠不充腹春指夏熟夏望秋成或为人耕种资采拾以爲生亦有未尝识钱者矣是以古之用民者各因其所有而取之农民之役不过出力税不过谷帛及唐末兵兴始有税钱者故白居易讥之曰私家无钱鑪平地无铜山言责民以所无也今有司爲法则不然无问市井田野之民由中及外自朝至暮唯钱是求农民直丰岁贱谷糴其所收之谷以输官比常岁之价或三分减二于斛防之数或十分加二以求售于人若直凶年无谷可糴吏责其钱不已欲卖田则家家卖田欲卖屋则家家卖屋欲卖牛则家家卖牛无田可售不免伐桑枣撤屋材卖其薪或杀牛卖其肉得钱以输官一年如此明年将何以爲生乎故自行新法以来农民尤被其患农者天下之本农既失业余民安所取食哉今货益重物益一年虽饥谷不甚贵而民倍困爲国计者岂可不少思其故哉此皆敛钱之咎也北尽塞表东被海涯南逾江淮西及邛蜀自去歲秋冬絕少雨雪井泉溪涧往往涸竭二麦无收民已绝望孟夏过半秋种未入中戸以下大抵乏食采木实草根以延朝夕若又如是数月将如何哉当此之际而州县之吏督迫青苗助役钱不敢少缓鞭笞縲紲唯恐不迨妇子皇皇如在汤火之中号泣呼天无复生望臣恐鸟穷则啄兽穷则攫民穷困已极而无人救恤羸者不转死沟壑壮者不聚爲盗贼将何之矣若东西南北所在啸聚连羣结党日滋月蔓弥漫山泽蹈借城邑州县不能禁官军不能讨当是时方议除去新法将奚益哉缘林赤眉黄巾黑山之徒自何而有皆疲于赋敛复值饥饉穷困无聊之民耳此乃宗庙社稷之忧而庙堂之上方晏然自得以爲太平之业八九已成此臣所爲痛心疾首昼则忘食夜则忘寝不避死亡欲默而不能者也易复之初九曰不遠复无祇悔元吉言过而能改虽悔不大也其上六曰迷复凶有灾 用行师终有大败以其国君凶至于十年不克征言迷而不复凶且有灾于君道尤不利也昔秦穆公败于殽作秦誓曰唯古之谋人则曰未就予忌唯今之谋人姑将以爲亲虽则云然尚猷询兹黄发则罔所愆蓋悔弃老成之遠慮用利口之浅谋以取覆败而思补其过也故能终雪前耻彊霸西戎汉武帝征伐四夷中国虚耗贼盜羣起又防贰师之军乃下哀痛之诏曰乃者以防马书徧示丞相御史二千石诸大夫议郎为文学者皆以虜自缚其马不祥甚哉公车方士太史太卜皆以爲吉今计谋卦兆皆反谬蓋始寤公卿方士之諂諛对不以诚致误国事有悔于心也故禁苛暴止擅赋力本农天下复安自国家行新法以来天下之人心析口祷惟冀陛下之觉寤而拯救其失以苏疲民如望上天之膏泽日复一日以至于今及今改之犹可救也过是则民力屈竭一旦涣然离散乃始劳心安集岂不难哉窃观陛下诏书畏天灾深自咎责丁宁恳切或有所改为也若徒着之空文而于新法无所变更是犹临鼎烹鱼之烂而益薪不已将何补哉陛下诚能垂日月之明奋干刚之断放遠阿諛勿使壅蔽自择忠说为台諫官收还威福之柄悉从已出诏天下青苗钱勿复散其见在民间逋欠者计从初官本分作数年催纳更不収息其免役钱除放差役并依旧法罢市易务其所积货物依元买价出卖所欠官钱亦除利催本罢拓土辟境之兵先阜安中国然后征伐四夷罢保甲教阅使服田力穡所兴修水利委州县相度凡利少害多者悉罢之如此则中外謹呼上下感悦和气薰蒸雨必霑洽矣彼阿防之人附防执政者皆缘新法以得富贵若陛下以爲非而舍之彼如鱼失水必力争固执而不肯移愿陛下勿问之也臣切闻陛下以旱暵之故避殿撤膳其焦劳至矣而民终不预其泽不若罢此六者立有溥博之德及于四海也又闻京师近虽获雨而畿甸之外旱气如故王者以四海爲家无有遠近皆陛下之赤子愿陛下虽徇羣臣之请御正殿复常膳犹应兢兢业业忧劳四方不遽自寬以爲无复灾也又诸州县奏雨往往止欲解陛下之焦劳一寸云三寸三寸则云一尺多不以其其实不可不察也又闻青苗之法

灾伤及五分则倚阁其间官吏不仁者至有抑遏百姓止放四分以下税此尤可罪者也臣在冗散之地若朝政小小得失臣固不敢预闻今坐视百姓困于新法如此将爲朝廷深忧而陛下曾不知之又今年以来臣衰疾寢增恐万一溘先朝露赍懷忠不尽之情长抱恨于黄泉是以冒死一爲陛下言之傥陛下犹弃忽而不之信此则天也臣不敢复言矣干冒宸扆臣无任恳切惶惧之至

论钱谷宜归一 吕 海

臣窃以洪范八政食货为先故古者国用必使冢宰制之祖宗之制天下钱谷自非常平仓司农寺外其余皆总于三司一文一勾以上悉申帐籍非条例有定数者不敢擅支故能知其大数量入爲出详度利害变通法度分画移用取彼有余济彼不足指挥有司转运使诸州如臂使指朝廷常选健吏精于理财者爲三司官如陈恕林特李参之类皆稽职有名者也其余非通晓钱谷者亦罕得叨居其任理资序受厚俸而已故能仓库克溢用度有余民不匱乏邦家乂安自改官制以来备置尚书省六曹二十四司及九寺三监各令有职事将旧日三司所掌事务散在六曹及诸寺监戸部不得总天下财赋既不相統摄帐籍不尽申戸部不能尽知天下钱谷之数五曹各得支用钱物有司得符不敢不应副戸部不能制戸部既不能知天下钱谷出纳见在之数无由量入为出五曹及内百司各自建白理财之法申奏施行戸部不得一一关预无由尽公共利害今之戸部尚书旧三司使之任也左曹 尚书右曹不 尚书天下之财分而爲二视彼有余视此不足不得移用天下皆国家之财而分张如此无专主之者谁爲国家公共爱惜通融措置者乎譬人家有财必使一人专主其支用使数人主之各务已分所有多互相侵夺而人人得取用之财有增益者乎故利权不一虽使天下财如江海亦有时而竭况民力及山泽所出有限剂乎此臣所以日夜爲国家深忧者也今纵未能大有更张欲乞且令尚书兼领左右曹侍郎则分职而治其右曹所掌钱物尚书非奏请得防不得擅支诸州钱谷金帛 使提举常平仓司者每月亦须具文帐申戸部六曹及寺监欲支用钱物皆须先关戸部符下支拨不得一面奏乞直支应掌钱物诸司不见戸部符不得应副其旧日三司所管钱谷财用事有散在五曹及诸寺监者并乞收归戸部若以如此戸部事多官少难以办集即乞减戸部冗末事务付闲曹比司兼领而通 戸部如此则利权归一若更选用得人则天下之财庶防可理矣

请罢韩琦等转官 吕 海

臣伏觀宰臣韩琦等转官制辞皆赏先议建储之功于体似未爲便宜储贰者国家之根本根本未立大臣不言谁其言之蓋其职尔岂得爲功言之者是公于天下而赏之者私于己也且汉史载文帝豫建太子但云有司所请不显其人讫景帝世不闻赏建言者诚有防哉自至和而后先帝服药文武官请建储副者无虑百十人可尽录其功赏之耶去歲赏定防之功今日赏建储之议恩宠便蕃乃前世未闻之事也大庭宣扬是以爵禄诱人妄者因事以言必思后福其可得乎陛下自幼鞠育宫中乃先帝之意天命所属保护者皇太后之功也羣臣何力之有借使臣下不言厯数何所归乎贪天之功以爲己力古人羞之琦等岂无是思臣所以愿陛下不赏者为国家无穷之计唯圣智察焉

请诸路安抚举辟士人 吕 海

臣窃以本朝取士之路最广入流之人寔繁常患遗才似未得术非养之有素试之以事诚不可也如前朝藩鎮延辟士人既阅其实使之渐进庶几得其用也臣欲乞今后藩鎮带安抚使处许于本路举人内选有行实曾得文解者歲辟一人权本州司士参军且令差使观其能效可以遠用候满三考保荐闻上或赐以本科出身然后随其器使必能适用与夫科场较艺取其一日之长其效遠矣朝廷久而行之士皆修飭风俗才无遗矣

论选部 吕 海

臣闻汉世诸侯自得置吏四百石以下其傅相大官则汉置之郡吏督邮从事悉任之于牧守魏晋而降始归吏部蓋所以尊王朝而削郡国之权也甄陶流品因袭于今以天下之广民政之本委牧守自择贤良而佐之犹虑不得其人而况专于一司乎矧用刀笔以量才按簿书而责实限歲月以稽课待贤愚于一涂将使官无瘵旷民归治理其可得也而又更有定员入流之人无限官随岁积铨衡日紊不得救僊以澄源其郡吏督邮从事及县之司籍丞簿尉当令牧守举辟乃任命吏部谨其簿籍俟考秩当迁则稽之以课防尚之以廉节访之以时务较之以书判审此四实第爲五等三之上闻于朝当爲进任四之下俾其叙进降此则覆退及三载听叙前职如是州郡得人生民受赐虽权重于牧守而命出于朝廷亦不减吏部铨覈之要矣

论王安石 吕 海

臣窃以大奸似忠大诈似信惟其用舍系时之休否也至如少正卯之才言伪而辨行僞而坚顺非而泽强记而博非宣父圣明孰能去之唐卢杞天下谓之奸邪惟德宗不知终成大患所以言知人之难尧舜其尤病诸陛下即位之初起王安石就知江宁府未几召为学士缙绅皆庆陛下之明擢有文之得以适其用也及进二台席金论未允衡石之下果不能欺其重轻也古人曰庙堂之上非草茅所当言正谓是也臣伏覩参知政事王安石外示朴野中藏巧诈骄蹇慢上陰贼害物斯众所共知者臣略疏十事皆目覩之实迹冀上寤于宸鉴一言近诬万死无避安石向在嘉祐中判纠察刑狱司因开封府争鹁鹑公事举駁不当御史台累移文催促谢恩倨傲不恭相次仁宗皇帝上僊未几安石丁忧其事遂已安石服满托疾坚卧累诏不起终英宗朝不臣就如有疾陛下即位亦合赴阙一见稍存人臣之礼及就除江宁府于私安便然后从命慢上无礼其事一也安石任小官每一迁转逊避不已自知江宁府除翰林学士不闻固辞先帝临朝则有山林独往之思陛下即位乃有金銮侍从之乐何慢于前而恭于后见利忘义岂其心乎好名欲进其事二也人主延对经术之士讲解先王之道设侍讲侍读常员执经在前乃进說非传道也安石居是职遂请坐而讲說将屈万乘之重自取师氏之尊真不识上下之仪君臣之分况明道德以辅益聪明者乎但要君取名而已其事三也安石自居政府事无大小与同列异议或因奏对畱身进說多乞御批自中而下以塞同列沮论是则掠美于己非则敛怨于君用情罔公其事四也安石自纠察司举駁多不中理与法官争论刑名不一常懷忿隙昨许遵误断谋杀公事力爲主张妻谋杀夫用按问欲举减等科罪挟情坏法以报私怨两制定夺但闻朋附二府看详亦皆畏避徇私报怨其事五也安石初入翰林未闻进

一士之善首率同列称弟安国之才朝廷与状元恩例犹谓之薄主试者定文卷不优其人遂罹中伤小惠必报纖必复及居政府才及半年卖弄威福无所不至自是畏之者勉意俯从附之者自鬻希进奔走门下唯恐其后背公死党今已盛矣怙势招权其事六也宰相不视事旬日差除自专逐近臣补外皆不附己者妄言尽出圣 若然不应是安石报怨之人丞相不书勅本朝故事未之闻也意示作威耸动朝着然今政府同列依违宰臣避忌遂专恣而何施不可专威害政其事七也凡奏对御座之前唯肆强辩向与唐介争论谋杀刑名遂致誼哗众非安石而是介介忠劲之人务守大体不能以口舌胜不幸愤懣发疽而死自是同列尤甚畏惮虽丞相亦退缩不敢较其是非任性凌轹同列其事八也陛下方稽法唐尧敦睦九族奉亲爱弟以风天下而小人章辟光献言俾岐王迁居于外离间之罪固不容诛上寻有防送中书欲正其罪安石坚拒不从仍进危言以惑圣聪意在离间遂成其事朋奸之迹甚明其事九也今邦国经费要防在于三司安石居政府与知枢密者同制置三司条例兵与财兼领之其掌握重轻可知矣又举三人者勾当八人者巡行诸路虽名之曰商 财利其实动摇于天下也臣未见其利先见其害其事十也臣指陈猥琐烦黷高明诚恐陛下悦其才辩久而倚毗情僞不得知邪正无复辨大奸得路则贤者渐去乱絲是生臣防安石之迹固无遠略唯务改作立异于人徒文言而饰非将罔上而欺下臣窃忧之误天下苍生必斯人矣伏望陛下图治之宜当稽于众方天灾屡见人情未和唯在澄清不宜挠浊如安石久居庙堂必无安静之理臣所以沥恳而言不虞横祸期感动于聪明庶判别于真僞况陛下志在刚决察于隐伏当质于士论然后知臣言之中否然诋讦大臣之罪不敢苟追孤危若寄职分难安当复露章请避怨敌

卷五十一

钦定四库全书

宋文鉴卷五十一

宋吕祖谦编

奏疏

论治本 孙沔

臣闻虞舜治家而纳麓姬文刑寡而御邦周南歌闕睢之德仲尼删诗着为三百篇之首鲁史先经以纪元妃丘明直书为十二公之始易以风自火出为家人之象言号令之行于外由中正而明于内非严火风之威则难以正于家矣礼云身修而家齐家齐而国治国治而天下平王政之本基乎此矣是知先圣惧昵情之为患而立教于将来者也恭以皇帝陛下仁深溥博明达照临好善无厌从谏弗拂绍三朝之谟训躬万几之忧勤旰食在治将二十年虽古之圣帝明王致志行事无以过也今朝带无专权之臣上无失道之事然而陰阳未和灾变未息法令不行恩威不著者岂治内之道有所未至欤臣不欲迂阔引喻前古愿以闻见五事而陈之而以言获罪臣之职也伏以中宫正位德配至尊主陰治教为天下母三妃九嫔世妇御妾上下分统无有僭差百世不易之论也伏自景祐已来三黜宠姬闻两犯宸扆蓋所起幽微不胜恩遇身贵则性悍福极则患生退屏继迹逾僭如旧苟不逮于严制窃恐渐于厉阶昨见上元嘉节内庭出游美人才人无不随从飞蓋蔽景流车激双各崇华卫分道争行众目共观与后为并此非所以视外而垂范者也臣乞今后贵品嫔御等并令修备礼节戒约奢侈常随皇后出入不得各排仪位輒自矜越仍乞选择端严近上夫人一两员立为宫师以佐内职则所冀上下有别而中外不敢惑矣窃以宫政之设内职是先尚书侍御司记典言一百二十则为大备故先朝之数侍史不过五百人俸给止千五十贯皆有纪律不甚奢盈今闻十倍增人已逾三二千十倍添俸或至二十万私身养女数复过之百司供亿按簿可知一岁之中所用何极非所以示节俭也臣乞取索宫中诸院宫人及私身养女都大数目呈取进止若非游幸之所宜令检勘合用人量留外并放归本家任从其便而请给之数见在者宜节减其半此所以消幽旷之气而省财廩之费也窃以内侍之职最为亲近宣传国命出纳王言常敦抑制尚或腾凌今迁秩不逾年赏赐无虚日甲第连坊名园接畛玉帛盈于后房丝竹闻于别院官尊禄厚职重员多若不立之仪式必恐亢于宠荣臣欲乞御药依旧只用二员御带押班都知并乞选择重公严勤慎旧有心力者充三年一迁官不许非次改转未有嗣者令养一子则内无从贵之人下有进身之路亦一代之永制也切以勾陈九重华蓋万乘垣直太紫庭俨云龙非深严不为尊非禁戒不为备阑入则抵罪语至则伏诛使内言不出于阊外言不入于阊所以防未然而限中外也今上之起居言语众无不知帷箔宴游外无不传内降斜封垣夷若道免刑要赏响应如神皆由左右之人出入为地迯臣颇邪能伺动静迎合巧中率用期道若不早辨以

防微窃恐长奸而忽变臣欲乞应合入内及听唤中人并用五十已上五十已下者诸宫院子须限七十已下上分定番次上下不得参杂出入仍令内东门司专切防检其暗只候俳优人及公主院檐子官各放归本营所有内道场乞今后断絶此则肃静于宸庭足以光辉于史牒窃以王者所须岁终不防盖天下之财天子用之有司不得而吝也其或出纳不谨支费不节岂可容奸不诘其 今御宝凭由司东门劄子取诸库犀玉金银钱帛一歳仅三百余万贯但有入内之名不知所用之处此数既多不可悉记昨闻胥吏僞取库金三十两抵法况御宝是中禁所掌外何计而诈得之窃恐前后用此非一吏也乞差不干碍公干有心力臣寮置司将宝元后来系御宝凭由及内东门劄子取左藏库等金银犀玉钱帛大数对帐簿及谢恩表状造作文歷并内藏诸库亦自宝元后来内中支使金宝钱帛都数逐件磨勘即见无涯费用积久欺 仍乞今后诸宫阁凡有取索出到凭由劄子先下内侍省都知入内复奏然后置簿抄上番换通签正牒下诸库藏方得即官支物不得直行取索或更别设關防节减用度亦经从之利也此五事者实政教之本源升平之基构也中宫正则内宰之制行于六宫而宠嬖不犯于上矣宫禁严则中阍之事絶于众口而朋党不生于外矣宫人不减则用度不给怨旷以感陰阳之沴矣内侍不禁则威柄不一引进以来邪佞之类矣御宝不严财货不计则盗诈公取而无虑矣噫恩能削威昵可消正甘言令色逊于志先意希防防其事仁爱浸深忍情难决非至圣至明不可免也伏望皇帝陛下游神清净敏德太宁养冲和之性节嗜欲之情使气志如神威仪可畏廓日月之辉发雷霆之断柔媚不干于聪明爱幸尽决于道义则何患天下之不治哉书曰威克厥爱允济易曰扬于王庭刚决柔也传曰柝也欲焉得刚非用天下之刚健中正则于断也难矣今昊贼侵軼西鄙攻守臣未敢进一策者盖儒者不知兵不可预言也若大臣尽心诸将用命恐未为大患也夫手足之疾侵于皮肤积为疮痍发于指掌未有所损也心腹之疾迫于膏肓拥为痼疽溃于头目不可卒救也此五事措置得宜则无穷之福此五事因循弗举恐为不测之虑履霜至于坚冰燃火在于积薪非一朝一夕之故也惟断之在不疑行之恐不及动无失机间不容髮则百世之利万方之幸皆陛下家事非人臣所得及也至于政教之纲纪未举辅相之心德未同朋党之邪正未分着位之材愚未辨进贤难于起死去佞过于防山法令挠于亲恩赏及于滥岂不谓根蘖于内而斤斧不施者乎若圣人一虑及此则庶事自正其条例悉数之名俟聪明听然其說异日为陛下言之也臣素非博识惟尽愚诚不歷诋于羣公不專攻于上德但虑切直速怒贵权不能保身贻忧老母则于事君之心无所愧矣伏望夙夜之余再赐详览无使臣言为空言则死生幸甚干犯威顏甘俟诛窜无任激切待罪之至

请罪不管兵节使公用 孙 沔

臣切见正刺史已上至防团节度使使相皆有随使公用钱多或至一万贯盖先朝以诸道用兵之际恩假武臣俸之足用犒设军员招延宾客任其支费不问出入欲使将帅丰财聚人之术也自太平四十年因循成例给赐不追或罢权出镇或养疾闲地至于老死未闻退辞军员宾客不复延设虽称公钱并为已有与之既不知恩取之岂敢生怨若朝廷以为小事恐伤大体臣愿引即借三事以为之比乞陛下聪明详之则知罢无损矣今范仲淹孤寒出身忠诚报国统兵边鄙终歳勤苦未尝有臣寮乞赐与千百緡令助清贫之节一也刘涣仗义入夷狄去不顾妻子非慷慨感于君亲岂能身奋死地亦未尝有臣寮乞赐与千百緡令资其家二也田

况召自江外受命陝西委参使幕合得赐赉一二百贯此亦微事须合自陈况既耻言赐以弗及三也盖以国家阙用多方节则惟守旧例不求损益有例者虽枉费于万金不为惜无例者虽可赏亦不知防例之为弊一至于此岂宜执而不革者也伏望断自宸衷勿容横议所有刺史至使相非统兵及任陝西河北者并乞罢尽随使公用钱令支拨与管内臣寮此足使武夫悍卒知圣人忧边之深意也所有皇亲乞从特恩以表异礼

论诏狱 吳育

先王凝旒黜纆不欲闻见人之过失有犯典宪即属之有司按文处断情可矜者犹或特从宽宥如此则恩归主上而法在有司人被诛殛死亦何憾祖宗以来不许刑狱司状外求罪是以人人自安近传三司判官杨仪下狱自御史台移劾都亭驿械缚过市万目随之咸共惊骇不测为何等大狱及闻案具乃系请求常事非有枉法赃贿又传所断罪名法不至此而出朝廷特防恐非恩归主上法在有司之意也且仪身预朝行职居馆阁又任事省府使有罪虽加诛斩自有宪章苟不然也一旦至此使士大夫不胜其辱士民轻视其上非所以养廉耻示敦厚也自古刑狱滋彰之时诛家灭族冤枉大半大抵雷霆方震人莫敢言有司以深就深各图自免或因而为利以希进取君恩不得下达人情不得上通感伤至和灾变百出陛下为四海爱戴之主忽使道路之口纷纷窃议朝廷之上人人自危此臣所以深为陛下痛惜之也若仪罪未断臣不敢言今事已往且无救解之嫌止祈圣神此后详审庶事毋轻置诏狱具案之上自非情涉巨蠹且从有司论讞不必法外重行如此足以安人心静风俗养廉耻召和平天下之幸也

论本朝百年无事 王安石

臣前防陛下问及本朝所以享国百年天下无事故臣以浅陋误承圣问迫于日晷不敢从留语不及悉遂辞而退窃惟念圣问及此天下之福而臣遂无一言之献非近臣所以事君之义故敢昧冒而粗有所陈伏惟太祖躬上智独见之明而周知人物之情僞指挥付托必尽其材变置施設必当其务故能驾驭将帅训齐士卒外以扞边陲内以平中国于是除苛赋止虐刑废强横之藩镇诛贪残之官吏躬以简俭为天下先其于出政发令之间一以安利元元为事太宗承之以聪武真宗守之以谦仁以至仁宗英宗无有逸德此所以享国百年而天下无事也仁宗在位歷年最久臣于时实备从官施为本末臣所亲见尝试为陛下陈其一二而陛下详择其可亦足以申鉴于方今伏惟仁宗之为君也仰畏天俯畏人宽仁恭俭出于自然而忠恕诚慤终始如一未尝妄兴一役未尝妄杀一人断狱务在生之而特恶吏之残扰宁屈己弃财于敌人而终不忍加兵刑平而公赏重而信纳用谏官御史公听并观而不蔽于偏至之谗因任众人耳目拔举疎远而随之以相坐之法盖监司之吏以至州县无敢暴虐残酷擅有调发以伤百姓自夏人顺服蛮夷遂无大变边人父子夫妇得免于兵死而中国之人安逸蕃息以至今日者未尝妄兴一役未尝妄杀一人断狱务在生之而特恶吏之残扰宁屈己弃财于敌人而不忍加兵之効也大臣贵戚左右近习莫敢强横犯法其自重慎或甚于闾巷之人此刑平而公之効也募天下骁雄横猾以为兵几至百万非有良将以御之而谋变者辄败聚天下财物虽有文籍委之府史非有能吏以独钩考而断盗者辄发凶年饥歲流者填道死者相

枕而寇攘者輒得此赏重而信之効也大臣贵戚左右近习莫能大擅威福广私货贩一有奸慝随輒上闻贪邪横猾虽间或见用未尝得从此纳用諫官御史公听并观而不蔽于偏至之谗之効也自县令京官以至监司台阁陞擢之任虽不皆得人然一时之所谓才士罕蔽塞而不见收举者此因任众人之耳目拔举疎遠而随之以相坐之法之効也升遐之日天下号恸如防考妣此寬仁恭俭出于自然忠恕诚慤终始如一之効也然本朝累世因循末俗之弊而无亲友羣臣之义人君朝夕与处不过宦官女子出而视事又不过有司之细故未尝如古大有为之君与学士大夫讨论先王之法以措之天下也一切因任自然之理势而精神之运有所不加名实之间有所不察君子非不见贵然小人亦得厕其间正论非不见容然邪說亦有时而用以诗赋记诵求天下之士而无学校养成之法以科名资歷叙朝廷之位而无官司课试之方监司无防察之人守将非选择之吏转徙之亟既难于考绩而游谈之众因得以乱真交私养望者多得显官独立营职者或见排沮故上下偷惰取容而已虽有能者在职亦无以异于庸人农民坏于繇役而未尝特见救恤又不为之设官以修其水土之利兵士杂于疲老而未尝申敕训练又不为之择将而又其疆场之权宿卫则聚卒伍无赖之人而未有以变五代姑息羈縻之俗宗室则无教训选举之实而未有以合先王亲疎隆杀之宜其于理财大抵无法故虽俭约而民不富虽忧勤而国不强赖非夷狄昌炽之时又无尧汤水旱之变故天下无事过于百年虽曰人事亦天助也蓋累圣相继仰畏天俯畏人寬仁恭俭忠恕诚慤此其所以获天助也伏惟陛下躬上圣之质承无穷之绪知天助之不可常恃知人事之不可怠终则大有为之时正在今日臣不敢輒废将明之义而苟逃讳忌之诛伏惟陛下幸赦而留神则天下之福也取进止

论孙觉令吏人写章疏劄子 王安石

臣今日防宣谕召以孙觉令吏人写论列大臣章疏臣初亦怪其不能谨密但疑此朋友所当海责非人主所当谴怒既又反复思惟陛下以觉为可听信故擢在諫官进贤退不肖自其职分所当论列虽扬言于朝以迪上心于义未为失也但令吏人书写章疏诚不足以加谴怒凡人臣当谨密者以君子小人消长之势未分言有漏泄或能致祸如其不密则害于其身若遭值明主危言正论无所忌憚亦何谨密之有乎惟有奸邪小人以枉为直惧为公论之所不容则唯恐其言之不密若得此辈在位陛下何所利乎若陛下疑觉有交党之私招权之奸则恐盛德之世不宜如此魏郑公以为上下各存形迹则国之废兴或未可知若陛下不考察邪正是非而每事如此猜防则恐善人君子各顾形迹不敢尽其忠说之言而奸邪小人得伺人主之疑行谗慝也若陛下恐陈升之闻此或不自安臣亦以为不然汉高祖雄猜之主也然鄂秋明论相国萧何功次而高祖不疑乃更加赏亦不闻萧何以此为嫌陛下圣贤高遠自汉以来令德之主皆未有能企及陛下者每事当以尧舜三代为法奈何心存末世徧吝之事乎书曰任贤勿貳去邪勿疑不明知其贤而任之以为贤不明见其邪而疑之以为邪非尧舜三代之道也陛下以臣为可信故圣问及之臣敢不尽愚今日口对未能详悉故谨具劄子以闻

请令文武致仕官依外任官给俸钱

吕公着

臣窃以古之仕者七十而致仕虽有不得谢者然年至而去实礼之常制盖当其壮也既竭勤尽瘁以任其事故及其老也则使之优逸以终其身此君上之至恩而臣下之极荣也然自本朝以来凡致仕者虽例改官资或推恩子弟年及而愿退者常少议者以疲癯老疾之人其精神筋力不足以任职则或至于蠹政而害民故着令应年及而不退者自知州以下皆降为监当然比年以来致仕者亦不加多夫昔为守倅而今厘务虽至愚之人岂不以为辱然所以被辱而不去者亦由朝廷立法有以致之何则古之为士者终身食其地今之致政者即日夺其廩古之仕者不出乡里今则有奔走南北之劳古之仕者常处其职今则有罢官待次之费故自非贪吏非素有经产则其禄已常苦不足一日归老则妻子不免于冻馁是以虽洁廉之士犹或隐忍而不能去议者不惟其本则曰此皆无耻之人宜思所以重辱之此朝廷之恩所以愈薄而臣下之节所以益坏也臣愚欲乞应文武官致仕非因过犯及因体量者并依外任官例与给四分俸钱岁时州郡量致酒粟之问如此则自非无耻之甚者莫不感抱恩德争自引去矣朝廷优之如此而犹不能去则虽重辱之亦不为甚过也或曰今国用方患不足则吏禄岂宜有增臣窃以为今日所设正为年及而不退者彼若年及而不退则其禄故未尝绝如此自人多引去则今之去而受禄者乃向之不去而居官者也臣所论者其实国无所费而凡以全遇下之恩臣无重辱而足以去瘵官之弊伏惟陛下方以至仁厚德风化天下则于优养耆老固所先务伏乞酌详施行

论臧否人物宜谨密 吕公着

臣闻易曰君不密则失臣臣不密则失身凡事不密则害成夫人主延见羣臣与之讲天下之事而论及人物之臧否此所宜谨密者也苟人主谨密有所不至则人臣悼后害之及念失身之戒而不敢尽其所言此易之所谓不密则失臣者也况人君用人既用其长固欲知其短知而暴之则莫肯尽其心力将同舟而济共舆而驰苟不能使人人尽其心力则其势未可知也惟陛下留意幸甚

请广收人才 吕公着

臣伏覩近诏举才行堪任升擢官切观陛下自临御以来虚心屈已以待天下之士士之起草茅小官而超至显近者不可胜数然犹孜孜以求贤为急诚欲广收人才无所遗弃臣伏思自昔有为之君不借贤于异代然唐虞之际亦称才难则世固未尝乏贤而人才亦不可多得今陛下降发中之诏非徒为虚文也中外所举盖有百余人虽不能尽当诚参考名实而试用之宜有可以塞厚望应明指者臣又窃详今日诏意正欲达所未达然数年以来天下之士陛下素知其能尝试以事而中就闲外者尚多恐其间亦有才实忠厚欲为国家宣力者未必尽出于迂阔缪戾而难用也汉武帝时公孙 初举于朝以不称防罢后再以贤良举帝亲擢为第一不数年间遂至宰相由是观之人固未易知而士亦不可忽何则昔日所试或能究其详数年之间其才业亦容有进惟陛下更任之事以观其能或予之对以考其言兼收博纳使各得自尽则盛明之世无滞才之叹不胜幸甚

论李定言程颢顾临不当 吕公着

臣闻臯陶陈谟以知人为难孟子论道以知言为要所谓知人则哲能官人何忧乎驩兜何畏乎巧言令色孔壬者知人也诚辞知其所蔽淫辞知其所陷邪辞知其所离遁辞知其所穷者知言也故曰帝王之德莫大乎知人而成败之机在于察言是以尧舜在上明目达聪询四岳以难壬人命纳言以壅谗説使恶直丑正者不能乱天下之俗服谗搜慝者不能迁人主之意然后四门穆穆而朝廷清明权归于上而天下无事臣向防陛下擢在枢府中谢日不敢缕陈细务輒论及判别忠邪之道尝谓陛下励精为治十年不懈小大政事日欲增葺而朝廷之间邪説尚胜大抵小人之害君子必求要切之语以中之使之不能自解方朝廷修改法度之初凡在朝野孰无论议陛下圣度兼包岂尝记录而小人贼害指目未已苟昔有异同之论而今不为言者所容则必指以为沮坏法度之人不复可用非陛下加意省察则端人良士类遭排格当时粗陈此语陛下颇赐开纳近日顾临开封府推官程颢判武学缙绅闻之皆以为颢昔任御史尝有所言陛下不以为过而稍用之知朝廷用人不终遗弃必料传之四方士人无不欣仰然命下数日复因言者而罢去则知臣前所陈者其风犹未殄也臣实不佞尝为一二识者私道陛下圣德窃以为陛下春秋鼎盛履崇高之位操杀生之柄而记人之功忘人之过极天地山海之量此羣下所以爱戴而人人愿立于朝也小大之臣虽奸回颇僻如邓綰者犹降责不逾年遽复侍从授以方面则是盛明之世本无弃絶之人邪正贤不肖亦未易以一言而定也臣愚以谓今日公卿士夫尝于朝廷法令有所可否然其爱君许国之心愈久而益明者甚众其唱和雷同承迎附防而奸言汙行卒为陛下所照者盖亦不少然则人固未易知而士亦不可忽也况如颢者陛下早自知之其立身行己素有本末讲学论议从益疏通且其在言路日时有论列皆辞意忠厚不失臣子之体使得复见用于圣世其奋身报国未必在时辈之后兼所除武学差遣亦未为仕官之要津而小人断断必以为不可者直欲深梗正路广沮善人其所措意非特一二人而已臣区区所虑者谗説殄行之徒日以炽盛则守正向公之士愈难自立其于圣政不为无损臣受恩与常人不同苟有有所当言者不敢顾避緘默以负陛下优遇唯陛下幸察

卷五十二

钦定四库全书

宋文鉴卷五十二

宋吕祖谦编

奏疏

进十事吕公着

臣近准诏书令臣发来赴阙已于今月二十日朝见讫窃闻近日臣寮未有上殿班次臣虽忝先朝执政之臣亦未获一亲法座少奉德音然自忖累世防被厚恩惓惓报国之诚不能自己輒具奏封陈其一二冒瀆圣聪臣无任惶惧之至臣伏覩皇帝陛下绍履尊极方逾数月临朝穆穆有君人之度太皇太后陛下勤劳庶政保佑圣躬德泽流行已及天下臣远从外服召至左右窃思人君即位之初宜讲求脩德为治之要以正其始然后日就月将学以缉熙于光明新而又新以至于大治是用罄竭愚诚考论圣道槩举十事仰賛聪明一曰畏天二曰爱民三曰脩身四曰讲学五曰任贤六曰纳谏七曰薄敛八曰省刑九曰去奢十曰无逸皆随事解释粗成条贯不为繁辞以便观览伏望陛下留神幸察如言有可采即乞置之御座朝夕顾省庶于盛德少助万一谨列如右

畏天

书曰皇天无亲惟德是辅又曰惟上帝不常作善降之百祥作不善降之百殃盖天虽高遠日监在下人君动息天必应之若脩己以德待人以诚谦逊静懿慈孝忠厚则天必降福享国永年灾害不生祸乱不作若慢神虐民不畏天命则或迟或速殃咎必至自古禹汤文武以畏天而兴桀纣幽厉以慢神而亡如影随形罔有差忒然自两汉以来言天道者多为曲说以附防世事间有天地变异日月灾眚时君方恐惧脩省欲侧身脩道而左右之臣乃据经传或指外事为致灾之由或陈虚文为消变之术使主意怠于应天此不忠之甚者诗曰我其夙夜畏天之威于时保之然则有天下者固当饬已正事不敢戏豫使一言一行皆合天心然后社稷民人可得而保也天人之际焉可忽哉

爱民

书曰抚我则后虐我则讐人君既即尊位则为民之父母万方百姓皆为已子父固不可以不爱子君固不可以不爱民若布德施恩从民所欲则民必欣戴欣戴不已天降之福若取民之财不忧其困用民之力不恤其劳好战不休烦刑以逞则民必怨叛怨叛不已则国从而危故

曰民为邦本本固邦寧然自古人君临朝聽政皆以赤子为忧一旦用兵则不复以生灵为念此蓋献策之臣设奸言以导上意以开邊拓境为大功以暂劳永逸为至计此世主所以一心而不悟也夫用兵不息少壮从军旅老弱疲转饷伏尸流血而负负得失犹未可知也民劳则中国先敝夫何足以为功兵兴则朝廷多事亦不得而安逸也故凡献用兵之策者欲生事以希宠败公而营私耳岂国家之利哉

脩身

天下之本在国国之本在家家之本在身夫欲家齐国治而天下化莫若脩身脩身之道以正心诚意为本其心正则小大臣庶罔敢不正其意诚则天地神明皆可感动不诚则民不信不正则令不行况人君一言一动史臣必书若身有失德不唯民受其害载之史策将为万代讥笑或当夙兴夜寐以身脩为念以义制事以礼制心虽小善不可不行虽小恶不可不去然人君进德脩业实繫乎左右前后夫习与正人居不能无正犹生长于齐不能不齐言也习与不正人居不能无不正犹生长于楚不能不楚言也故曰仆臣正厥后克正仆臣谀厥后自圣

讲学

王者继祖宗之业君亿兆之上礼乐征伐之所自出四方万里之所视效智足以穷天下之理则谗邪不能惑德足以服天下之心则政令无不行自非隆儒亲学何以臻兹然天子之学与凡庶不同夫分文析字考治章句此世之儒者以希禄利取科级耳非人主之所当学也人主之所当学者观古圣人之心用心论历代帝王所以兴亡治乱之迹求立政立事之要讲爱民利物之术自然日就月将德及天下书曰王人求多闻时惟建事又曰念终始典于学厥德脩罔觉故傳說之告高宗者脩德立事而已至汉之晁错以为人主不可不学术数错之意欲人主用机权巧譎以参制羣下而景帝用之数年之间汉罹七国之祸而错受东市之诛蓋其所主者不出于诚信而已由是观之择术不可不审也

任贤

昔成王初蒞政召康公作卷阿之诗以戒之言求贤用吉士蓋为治之要在乎任贤使能能者不必贤故可使贤者必有德故可尊小贤可任以长民大贤可与之谋国若夫言必顾国家之利而行足以服众人之心夷险一节而终始可任者非大贤则不能也人君虽有好贤之心而贤犹或难进者蓋君子志在于道小人志在于利志在于道则不为苟合志在于利则求为苟得忠言正论多拂于上意而佞辞邪说专媚于君心故君子常难进而小人常易入不可不警也自古虽无道之君莫不欲治而恶乱然而治君少而乱国多者其所谓忠者不忠而所谓贤者不贤也书曰有言逆于汝心必求诸道有言逊于汝志必求诸非道人主诚存此心以观臣下之情则贤不肖可得而知矣

纳谏

昔书称成汤之德曰从谏弗咈改过不吝汤圣君也不曰无过而曰改过者言能舍己而从谏则不害其为圣也及纣为天子强足以拒谏智足以饰非纣非无才智也然身灭国亡而天下之恶皆归之者言愎谏自用则才智适足为害也前代帝王无不以纳谏而兴拒谏而亡着在史册一一可考盖贵为天子富有四海贵则骄心易生富则侈心易动一日万几则不能无失固当开道而求谏和颜色而受之其言可用则用其言而显其身言不可用则恕其罪以来谏者夫忠直好谏之臣初若逆耳可恶然其意在于爱君而忧国谄佞阿谀之士始若顺意可喜然其情在于媚上而徼宠人君诚能察此则事无过举身享美名故曰木从防则正君从谏则圣

薄敛

古人有言曰百姓足君孰与不足百姓不足君孰与足人君恭俭节用取于民者有制则民力宽裕衣食滋殖自然乐输租赋以给公上若暴征峻敛侵夺民利物力已屈而驱以刑辟势必流转沟壑散为盗贼为人上者将何利于此故善言治道者尤恶聚敛之臣曰与其有聚敛之臣宁有盗臣前代帝王或耽于声色盘于游畋或好治宫室或快心攻战于是小人乘间而肆其邪谋为之敛财以任其横费世主不悟以为有利于国而不知其终为害也赏其纳忠于君而不知其大不忠也嘉其以身当怨而不知其怨归于上也昔鹿台之财钜桥之粟商纣聚之以防国周武散之以得民由是观之人主之所当务者仁义而已何必曰利

省刑

夫临下以简御众以宽百王不易之道也昔汉高祖去秦苛暴约法三章以顺民心遂定王业孝文循之以清静而几至刑措然则为治之要果在于省刑而不在于烦刑也况人主之刑狱其势不能亲临则必委之于臣下故峻推鞠则权在于狱吏广使伺则权在于小人肆刑戮则权在于彊臣通请谒则权在于近习自古奸臣将欲诛锄善人自专威柄必数起大狱以摇人心何则狱犴之间其情难知锻链周至一系于狱吏及夫奏成狱具则虽有冤抑人主亦何从而察之哉然则欲奸雄不得肆其威善良有以安其性莫若省刑而已自三代以还有天下者数十姓惟宋受命逮今一百二十有六年中原无事不见兵革稽其德政所以特异前世者直以诛戮之刑内不施于骨肉外不及于士大夫至于下民之罪一决于廷尉之平而上自天子下至于有司不复措意轻重于其间故能以好生之德感召和气而致无穷之福祖宗所以消恶运遏乱原者呜呼远哉虽甚盛德无以加矣

去奢

昔夏禹克勤于邦克俭于家而为三王祖汉文帝即位宫室苑囿车骑服御无所增益而天下断狱四百几至刑措然则节俭者固帝王之高致也况以天下之尊富有天下凡有四方百物所以奉养于上者盖亦备矣然而飨国之日浸久耳目之所御者习以为常入无法家拂士出无敌国外患则不期于侈而侈心自生佞防之臣又从而导之于是穷奢极侈无不为已是以先王制法作奇伎淫巧以荡上心者杀无赦夫竭天下百姓所以相生相养之具而以供人主

无穷之欲致人主于丧德损壽之地而以邀已一时之荣虽诛戮而不赦固未足以当其罪也昔纣为象箸而箕子諫夫以天子而用象箸未为过侈也然箕子以为象箸不已必金为之金又不已必玉为之故箕子之言所以防微而杜渐也至汉公孙 相武帝以为人主病不广大人臣病不节俭当是时帝方外伐四夷内治宫室为千门万户由是天下户口减半盗贼蜂起而 犹病其不广大何其不忠之甚哉故人主诚能不以箕子之言为太过而察见公孙 之大佞则夏禹汉文之德不难及已

无逸

昔周公作无逸之篇以戒成王其畧曰昔商王中宗治民祇惧享国七十有五年其在高宗不敢荒寧享国五十有九年厥后立王生则逸不闻小人之劳惟耽乐之从自时厥后亦罔克壽或十年或七八年或五六年或四三年呜呼非爱君忧国之深其言何以至此又曰继自今嗣王无滛于观于逸于游于田无若商王受之迷乱酗于酒德哉小人怨汝詈汝则皇自钦德乱罚无罪杀无辜怨有同是丛于厥身蓋人君初务纵逸小人必怨而大臣必諫至乎滛刑乱罚以杜言者之口然后流连忘反不闻其过而终至于灭亡故曰无逸之书后王之元 也唐明王初即位宋璟为相手寫无逸图设于帝座明皇勤于政事遂致开元之治而后宋璟死所献图亦弊而彻去明皇遂怠于政亲见天寶之乱由是观之靡不有初鲜克有终人君诚能慎终如始不敢逸豫则德有尧舜之名体有乔松之壽岂不美哉

右臣闻孟子曰我非尧舜之道不敢以陈于王前今朝廷始初清明臣虽术学浅陋惟是前代圣帝明王所以致治之迹可以为法与夫暴君暗主所以召乱之道可以为戒者乃敢告于左右古人有言曰舜何人也予何人也夙夜以思去其不如舜者就其如舜者是亦舜而已矣惟陛下加意无忽则社稷幸甚天下幸甚

论韩维不当责降 吕公着

臣伏思陛下自临政以来慈仁寬大判別忠邪于辅弼之臣最加优礼故得上下安乐人情悦服今来韩维必是进封之间语亦乖谬上触龙鳞然维昨与范百禄争论刑名等事若以为性彊好胜则有之亦未见奸邪事迹若以奏劾臣寮当有章疏则自来大臣造膝密论亦未尝须有章疏比来批语所罪恐未足以宣示四方兼维素有人望久以直言废弃陛下始初清明方防收用忽然峻责罪状未明虑必有讐嫌之人飞语中伤以惑圣聰况五六十年执政大臣不曾有此降黜恐中外闻之无不惊骇自此人情不敢自安臣又窃思陛下陛下春秋方富正赖太皇太后陛下训以仁厚以道调平喜怒以复仁祖之政若大臣仓卒被罪则小臣何以自保臣受陛下恩与常人不同意欲致君于尧舜措国于不倾以报陛下故今来虽当雷霆之怒不敢爱身以防陛下于有过之地伏望少回圣虑其批降指挥见只在臣处收掌聽 圣防

请议恕私罪 韩 维

臣数见良吏善人以小过留滯而背公便已之徒不废迁擢窃寻其端蓋朝廷之制私罪虽得

轻法常为仕进之累公坐虽大一时被责则即升进矣伏以国家赋防命官本为治人而无状之吏废职以遂苟且之意壞法以行姑息之政计其用意岂复在公夫缘私致罪恶或止身废职壞法其害及国二者相校孰为轻重伏望圣慈特诏有司议私罪之可恕者稍蠲留碍以通滯材公坐有害者重加困抑以儆慢吏

论勅不由银台司 韩 维

臣近以黜吕诲等勅不可门下封駁司尝面具论奏及两上章乞正官法并未防圣慈施行臣伏以纪纲法度圣王所以维御邦国使不危而安者也其所措意皆关诸盛衰固不为一日设也譬之犹舟之有维楫马之有銜轡今有人于此将假二物以出万里之涂而自毁其维楫絕其銜轡则人人知其有奔僨沈溺之忧矣臣近对崇政殿亦尝以此理上陈陛下初不省察又以失职求赐罢黜而圣慈再三敦谕不令投进文字臣僂俛而退犹望陛下寤前之失特诏有司脩明旧法而防将来之患而章上輒不出使臣不得少申职业坐守空名以防贪禄旷官之谤进退实亦难处伏望圣慈以臣状并前两奏降付中书门下商量施行臣不敢枉道以阿人主之意爱身以壞祖宗之法惟陛下裁处

请不泛于诸家为颍王择妃 韩 维

臣累日以来传闻禁中泛至诸臣之家为颍王择妃审如此者臣窃以为非便臣闻夫妇者居室之大伦将以正家则承宗事以继万世之嗣故礼之用惟婚姻为兢兢兢兢者慎之至也坊记曰诸侯不下渔色故君子远色以为民纪此言诸侯不得自于其国网取容色若捕鱼然所以推远女德为民之纪法也伏以皇子颍王孝友聪明动履法度方向经学以观成德今卜族授室其系尤重臣愚以为宜厯选勲望之家慎择淑哲之媛考古纳采问名之义以礼之不宜苟取华已而已近世简弃礼教不以为务婚娶之法自朝廷以及民庶荡然无制故风俗流靡犯礼者众贤士大夫未尝不发愤叹息切幸国家有以振之今陛下始初清明为元子求妇而事出苟简殆非所以矫世厉俗反之雅正且无以示颍王使知室家之道在德而不在色也传称尤物足以移人诗咏淑女几以配上此诚智士仁人见微知终远览祸福之原为后世戒也陛下不可不加圣意焉臣获侍宸陛且官王府苟益万一不敢不言干冒天威臣无任惶惧激切之至

论初御殿三事 韩 维

臣窃闻陛下以来日御便坐聽政臣愚慮所及輒有三事以为慎始正本之助幸陛下省察一者陛下新罹大忧方当以思亲摧慕为意从权听政蓋是不得已者为大事急务特赐裁决其余且可阔畧故事始见羣臣及降坐入宫皆举音号恸此高宗亮陰不言之意也二者执政皆两朝顾命大臣人君所当与图天下之务者也陛下即位之初尤宜推诚加礼每事咨访以尽其心其至于博谋羣臣究极理道虽是美德止可密裨圣慮及至决议论发号令必须经由二府施行乃合政体周公戒伯禽曰不使大臣怨乎不以蓋谓此也三者百执事各有职分惟当责任使人尽其能若王者代有司行事最为失体孔子曰先有司是也三体既正矣若夫恭已

倡率随事裁处则一系圣断也天下大事不可猝为人君施設自有先后惟陛下加意慎重以副四海观望臣不胜苦切涕泗之至取进止

请举遗逸 郑獬

臣伏见日者尝诏诸郡敦遣遗逸之士致之阙下者蓋二十余人覆试秘阁皆命以官于时猥有谬举者士论哗沸于是不复再举今间年取进士擢第者二百人其所失者为不少矣而士大夫不以为怪一为敦遣而疵谤百出蓋进士习熟之久而敦遣起于一日此论者未足以轻重而亦有媚疾者间之也臣欲乞复置此科而稍为增损蓋孔子为政必先正名汉之聘士不应召者则令敦遣就道岂有朝入科場暮为敦遣者哉宜正其名谓之举遗逸间歲随科場发解后有不豫荐者开封国学及诸路举一人又至礼部奏名后有不豫荐者许主文共举五人并至御试时试策三两道中第者别为一榜命官入仕即与正进士同如以为歲增中第者差多即却乞于进士数内减不合格者二十人以均之庶几郡县豪俊不至遗于草莱矣

请置经畧副使判官参谋 吕大防

臣窃观自古设官之意必先置贰立副不以名位为限者所以纾艰危而适顺用聚聪明而济不及也总兵命将尤重其选以汉唐事言之大将军有长史司马从事节度使有副使判官参谋其自小官而登寄任立功効者不可胜数本朝祖宗以来实用此法故名臣不絕而夷狄畏服窃见今緣邊经畧使独任一人而无僚佐谋议之助虽有副总管钤辖之属皆奉节制備行阵非有折冲决胜之畧预于其间朝廷每除一帅幸而得能者则一路兵民实受其赐不幸而得不才者与焉则是以三军之众一听庸人之所为岂不可惧哉其 蓋由朝廷不素养其材而取人之路又常太狭方今戎人旅拒邊患渐生若不早为準備阅试其能诚虑临事用不暇精选因而败事所系不细以臣愚见经畧使各置副使或判官一人朝廷选差素有才畧职司以上人充参谋一人委经畧使奉辟知邊事有谋畧知县以上充如此则可用之士不以位下而见遗中材之帅又以人谋而获济兼得以博观以试之効以備緩急之用讲緝邊要莫先于此

论章惇 范纯仁

臣近见执政议论以章惇父将九十因明堂恩霈之后欲请除一乡郡使使其亲臣但见其可裨仁化不虑其他遂共以为当然继而闻三省奏下陛下即赐俞允臣以陛下天地之仁念其垂年之亲不录往咎臣实喜不自胜遂于帘前仰贊圣德以为自古臣子无如今日遭逢继闻諫官有言陛下遂寢前命亦是圣心从諫之美前日更防宣諭此事三省有失思虑戒其今后不得如此臣愚恐有言者以谓朝廷所怒之人不当遽有开陈又谓执政都徇人情必有主张之者致烦陛下戒勅宣諭丁寧微臣固佩服圣训然有未尽之恳亦当竭罄敷陈方陛下急于求治之时是臣子知无不为之际岂宜顾虑形迹畜缩周防兼今所用大臣多是老于患难陛下獎之使进尚恐心志不銳思虑太周若更戒使远嫌则恐顾避保身自防不暇在陛下爱惜诸臣则为恩德之厚若使辅翊圣政却虑事无所裨益人臣以匪躬自信为难依阿固宠为易

若今容其所易沮其所难则其间希意顾望之人翻为得计甚非朝廷之福臣昔见仁宗皇帝推委执政一无所疑凡所差除多便从允而使台谏察其不当随事论奏小则旋行改正大则罢免随之使君臣之恩意长存朝廷之纪纲自正是以四十余年不劳而治况陛下方稽仁皇之治圣度如天从谏不倦任贤不疑录人之功忘人之过皆是自古人君所难若更垂拱责成逸于委任台谏糾其误谬侍从罄其论思羣臣一德一心陛下无为无事自然不须防虑百职具脩坐致太平垂休万世天下幸甚

论黄河 范纯仁

臣昨日伏覩内降指挥黄河未复故道终为何北之患王孝先等所议已尝兴役不可中罢宜接续功料向去决要回复故道者臣闻圣人有三寶曰慈曰俭曰不敢为天下先言此三道人君当保而持之不失者也又曰惟天为大惟尧则之蓋天不言而四时成所以尧舜垂衣拱手而天下大治者由此道也且君心欲如盘水常使平正而无所趣向则免偏侧倾覆之患蓋天下大势惟人君所向羣下竞趋如山之摧小失其道则非一言之力可回故居上者不可不慎也臣今窃详所降指挥谓决要回复故道以圣意已有所向而为天下先矣臣闻先朝因人建议以谓夏国防弱若不早取必为北虏所兼偶先帝不出建议者之名但以御批令邊臣相度而希防生事之徒以为万全必胜尅日可得遂兴灵武之师后貽永乐之患致先帝独当其忧羣臣无一人受其责者至今疲耗未复此陛下所亲见不可不为深鉴也臣乞面谕执政前日降出文子卿等已是但一面商议却使进入若别有所见亦须各自开陈如此则免希合之臣妄测圣意轻举大役上误朝廷所有黄河利害乞付之羣臣有司子细商议以求必当如此则圣心不劳而尧舜之治可致矣

请寬蔡确貶责 范纯仁

臣伏见蔡确之罪天地不容而陛下不速严诛许其开析复令执政徐议其罪足见圣人存心正合周书无逸皇自敬德不复含恕之意但陛下特以社稷为念故发于睿断行之不疑臣之愚心虽知蔡确死有余罪复忧圣政或有所亏蓋陛下临御以来政化清明如青天白日无轻氛薄翳道德纯備如精金美玉无纖瑕小疵今以一奸臣之故烦朝廷行稀阔之刑天下久安人所防见必生疑惧复恐貽之将来垂之史策薄有拟议则于圣德圣功深为可惜在臣负恩窃位罪不容诛蓋如父母之有逆子雷霆鬼神所不能贷至若父母亲置于死之地则却恐伤恩臣之区区实在于此陛下保完社稷之心天地神明之所照鉴而防臣爱惜陛下圣政之心亦应陛下可察不避一身之万死而展补报之愚忠惟愿睿慈曲加详虑所有再行重责伏乞付与帅臣已下商量所贵责归臣佐不累圣明无任爱君激切之至

请放吕大防等逐便 范纯仁

臣遭逢虽久报答无闻衰病寢加叨逾为惧前年陛辞之日亲承德音许其凡有奏陈但入文字臣感噎受命緘默至今曾微片言上裨圣化愚 惓惓终觐一伸窃见吕大防等窜谪江湖已更年祀未防恩防久困拘囚其人等或年齿衰残或素萦疾病不谙水土气血向衰骨肉分

离举目无告将恐殡死朝露客死异乡不惟上轸圣懷亦恐有伤和气仰惟陛下圣心仁厚天纵慈明法大舜之用中建皇极而在宥每颁赦令不间罪辜至于斩绞重囚髡黥徒 咸蒙原宥亦许放移岂有股肱近臣簪履旧物肯忘轸恻常俾流离但虑一二执政之臣责其往事嫉之太甚以谓今日之愆皆其自取启廸之际不为详陈殊不思吕大防等得罪之由只因持心失恕好恶任情以异已之人为怨讐以疑似之言为谤讪违老氏好还之诚忽孟轲反尔之言误国害公覆车可鉴岂可尚遵前辙靡恤效尤在汉有党锢之冤在唐有牛李之祸后皆沦胥善类貽患朝廷数十年间未能消弭比来若非宸 独断圣虑详思灼见本根絕其萌渐尽屏猜嫌之迹特垂旷荡之恩因大礼赦文放令逐便使得自新改过免为羈旅之荧魂笼鸟鼎鱼咸获相忘于至道神功圣德万世歌謠臣无任防恳激切之至取进止

宋文鉴卷五十二

卷五十三

钦定四库全书

宋文鉴卷五十三

宋吕祖谦编

奏疏

上皇帝书 字文之邵

陛下初即大位念万世无疆之业诏求阙失开辟言路可谓谊主矣易家人之初九曰闲有家悔亡九处家人之初当端其本以保终吉民之所以望而则效者常在于人君继统之始此安危之机不可不慎也昔成汤既没伊尹奉太甲以见厥祖戒之曰今王嗣厥德罔不在初陛下新服厥命惟以祖宗为念以天人为畏则小大之事不懈矣宋之有宋百有余年陛下一日南面而享之固宜迹其所得之艰难夙夜栗栗以勤负荷承思太祖之武太宗之文真宗之畏天克己仁宗之宽大慈仁英宗之厉精庶政立则见五圣于前行则见于侧坐则见于堂食则见于杯杓之间诗曰天难谄斯言天不可不畏也书曰民可近不可下言民不可不畏也去岁以来千里不雨近者畿甸远者河北京东蝗螟蔽野谷价踊贵重以山陵之役京西民力尤为雕敝臣窃恐苇蒲之盗或貽宵旰之忧为今之计不过多鬻爵以浊入仕之流广度僧以夺可耕之民终非计也愿今被灾之郡许富者举息于下户官给以质验待丰岁偿其所贷逋者官为治之其息不过一倍此有余费者乐为而瀕死之众可救沟壑之命陛下又责躬引咎宽狱讼出宫女斥衰敛之吏蠲苛虐之政罢无名之费省勦民之役凡所以蠹政而召乖怨之气者举更革之如此则大异可塞王化可兴也京师者诸夏之本也今荐绅之士不励名节而以势利离合器皿衣服穷于侈丽车马宫室过于轨制奸声乱色盈溢耳目衢巷之中父子兄弟不敢肩随孰谓王者之都而风俗一至于此哉愿陛下思所以澄源之法以礼节廉耻磨切臣下崇奖敦厚而都下亦少为之厉禁涤去佻薄之 淫渎败教之具一加遏绝凡侍从辅弼宜慎简修洁方严之臣俾宅其任以允清议古之求贤者数路以取之宠以好爵厚其礼命惟恐其去也而犹有三聘而不顾者有闭门而不纳者有逾垣而避之者臣谏于其君而三不听则去之其至于郊也君必使人要之年七十而致其事君不听则必以几杖锡之犹有不税冕而行者有辞三公而为人灌园者今日仕进之门国家直患不能塞之尔科防日增格令日繁来者日甚拒之日峻犹有假名氏以窃官号匿苦块之哀以干宠禄少者增齿以希蚤仕老者匿年以幸晚禄譬之隄防之坏塞其一穴一穴又决荡然莫之能止也今限年致仕着于令矣又患其去之不速令于门阙以示百僚而犹不知止者其可痛也陛下盍稍补其 隆于待士之意示之以至廉之实使衣冠者人人自重庶几风教之美少近于古去岁谅祚猖獗七八万众突至大顺庙堂无奇 守边无良将臣窃为朝廷忧之庆厯间缘边之民不解带者七年国用大窘三将沦没而功不成者陛下知其然乎其患在于敌兵常合而我兵常分也六路兵亡虑二十

万而二十三州二百余寨分屯保戍则是我兵虽多而散在处处也贼之来也大则六监军衙头一时俱发小则随处防掠边城一面受敌则所与角战者无几而城寨之兵又各有所守不可防集众寡不敌则乞师告急救兵才至贼又已去今贼常以兵合击我防兵而我常以不敌之众当其锋此庆厯之失也今不改前辙则后车又将覆也观今之势其能深入贺兰收复十四州以为我有也乎臣知其不能也其能如先朝之举五路进军直捣其巢穴乎臣又知其不能也计今之利莫若诏诸道分勒所部将伍符尺籍而规画之若干以为守若干以为战若干以为救兵救兵必使与战兵相近而驻于喉吭之地则可以应猝而不失机防也唃氏尝为元昊所残南徙歷精亦宜厚其种族共为声援以蛮夷攻蛮夷计之上也吐谷浑者今之文扶羗是也其俗随水草迁徙食肉衣皮毛无坚甲利刃临阵击刺之技不及于他夷仰给我之泉茗繒帛我与之通者亦特以其马也今陰平之民歲苦重役者勾马户也凡羗马之来则使之资给费公私之财甚多而所入之马不足以备国乘不足以战也边吏養羗非不厚也而去歲反有安昌之变塞上之民切齿且安昌之羗与南路磨蓬罗多留罨林诸寨之羗一也今闭安昌之路禁其出入而诸寨之马贸易如故是何异一室而多门者杜其前而辟其后乎臣之县所管万户而居民萧然者其 实在于羗也至和讲解之后约不敢犯边而去歲火我三寨驱杀士卒国家以奉西北虏者势不得已也今又骄宠小羗而足其无厌之求乎臣愚以为不若杜塞众路使不得入而絶市无用之马益以一旅之兵列置诸堡则边民小安矣为政所重莫急于农且耕则得食不耕则不得食系其身之损益也长民者何与焉夫各治其田以厚其生者百姓之私节授民事往而立官以劝课之者人君之公也诗曰曾孙来止以其妇子饁彼南亩田峻至喜此天子之劝农也又曰嗟嗟保介维莫之春亦又何求如何新畲此诸侯之劝农也今监司郡守皆以劝农为目然而未尝省民臣愿立考课之法以农政为殿最言之似迂而富国之良术也郡县之政类多因循而不甚治者臣知其由也上下牵制不得尽其才故也千里之郡不能兴利除害受制于郡守也百里之邑不能兴利除害受制于郡守也郡县之吏寧违天子之诏条而不敢违按察之命蓋违天子之诏条未必获咎而违按察之命其祸可立而待也今一伍之长一卒之正以法治其所部上不问其所为也今为民守令而其势顾不若卒伍之长郡县之民习知其势之弱而不畏服其教令此狱讼所以益多也臣愿精选监司必以清望假守令之权责其实效庶循良之吏有闻焉凡臣之所陈明诏之所求也然臣尚有至忠不敢嘿嘿又为陛下极言之臣闻疾未兆而先治者善医也夫居忧而约居乐而泰人情之常也今陛下处则谅闇服则端衰行则苴杖无纷華之事交防于前诚能以此时远念将来之失慎防杜渐克已复礼使其志一定则他日虽有可欲之物亦无以胜其习成之性也伯益之戒舜曰罔游于逸罔淫于乐傅说之戒高宗曰无以逸豫惟以治民夫舜起于耕稼陶渔高宗遯于荒野极知小人之劳而二臣犹或以此戒之况陛下生长富贵临御方始则安可不豫为之防哉愿陛下听政之间则命通经之士讲明古训究观败亡之主以自创艾尽孝两宫咨谋故老则恐惧修省习而成性矣臣诚私忧过计三载变除之后永厚陵土渐干而陛下忧悼之心又已衰杀龙袞冕凭玉几目有靡曼之色耳有要妙之声凡所以娱意者毕奏于前自非信道之深孰得而御哉老子曰塞其兑闭其门终身不勤正在于今日也

论责任守忠乞一切不问余人 傅尧俞

臣伏见内侍任守忠以罪降黜中外闻者罔不快扑罚一劝百固可以破奸猾之胆臣职司风

宪失于弹劾圣度回怒幸赦而不诛犹敢有言者冀陛下重加矜察臣谓大奸之去其遗过余恶方日有上闻小人无知或伺隙修怨枝词蔓说往往浸及善良疑似之间不可不察陛下若更加推究谗间且将复起况守忠据权之人附离者多深虑左右之人有所疑思望陛下沛发德音自此一切不问则天德加厚而人心易安惟皇太后之慈仁布闻四海举神器大宝传付陛下而陛下挟尧舜之资以天下养将用诚孝以鼓舞万物奈何使解构之语得行其间今罪人投窜皇太后必涣然疑释陛下缘此当益加礼意务尽其懽心则天人交欣其为陛下之福陛下即位励精勤俭日月未久遽以金珠事闻臣切为陛下惜之过而能改可无深虑臣言甚忠恳惟陛下留神省览

论蔡确既贬请宽心和气 傅尧俞

臣近覩蔡确狂悖陛下神断不疑下合人情上明邦宪虽一以公议裁之固未尝临之以怒然岂陛下之所乐者哉况听断之际亦须少劳睿思愚臣亡度切恐陛下海岳之量不能无少忤而未能忘怀也中外侧聆日增惊惕臣闻之于易曰天下殊涂而同归一致而百虑天下何思何虑夫事至以无心应之既往若未尝经意此圣人所以养至诚而御遐福者也愿陛下宽圣心省浮念游精太清以固真粹陛下之气和则上下之气和上下之气和则天地之和应矣唐柳公绰奏太医箴以讽宪宗曰气行无间隙不在大宪宗谓曰卿爱朕深者臣无公绰之才而有其诚臣以为今天下事莫重于此故惓惓而不能自己惟陛下母易臣言留神省察取进止

论君道 程颢

臣伏谓君道之大在乎稽古正学明善恶之归辨忠邪之分晓然趋道之正故在乎君志先定君志定而天下之治成矣所谓定志者一心诚意择善而固执之也夫义理不先尽则多听而易惑志意不先定则守善而或移惟在以圣人之训为必当从先王之治为必可法不为后世駁杂之政所牵制【一作滞】不为流俗因循之论所迁惑自知极于明信道极于笃任贤勿贰去邪勿疑必期致世如三代之隆而后已也然天下之事患常生于忽防而志亦戒乎渐习是故古之人君虽出入从容闲燕必有诵训箴谏之臣左右前后无非正人所以成其德业伏愿陛下礼命老成贤儒不必劳以职事俾日亲便座讲论道义以辅养圣德又行天下贤俊使得陪侍法从朝夕廷见开陈善道讲磨治体以广闻听如是则圣智益明王猷允塞矣今四海靡靡日入偷薄末俗哓哓无复廉耻盖亦朝廷尊德乐道【一作义】之风未率而笃诚忠厚之教尚郁也惟陛下稽圣人之训法先王之治一【一作正】心诚意体干刚健而力行之则天下幸甚

论王霸 程颢

臣伏谓得天理之正极人伦之至者尧舜之道也用其私心依仁义之偏者霸者之事也王道如砥本乎人情出乎礼义若履大路而行无复回曲霸者崎岖反侧于由迳之中而卒不可与入尧舜之道故诚心而王则王矣假之而霸则霸矣二者其道不同在审其初而已易所谓差若毫厘缪以千里者其初不可不审也故治天下者必先立其志正志先立则邪说不能移异

端不能惑故力进于道而莫之御也苟以霸者之心而求王道之成是銜石以为玉也故仲尼之徒无道桓文之事而曾西耻比管仲者义所不由也况下于霸者哉陛下躬尧舜之资处尧舜之位必以尧舜之心自任然后为能充其道汉唐之君有可称者论其人则非先王之学考其时则皆駁杂之政乃以一曲之见幸致小康其创法垂统非可继于后世者皆不足为也然欲行仁政而不素讲其具使其道大明而后行则或出或入终莫有所至也夫事有大小有先后察其小忽其大先其所后后其所先皆不可以适治且志不可慢时不可失惟陛下稽先圣之言察人事之理知尧舜之道备于已反身而诚之推之以及四海择同心一德之臣与之共成天下之务书所谓尹躬暨汤咸有一德又曰一哉王心言致一而后可以为也古者三公不必备惟其人诚以谓不得其人而居之则不若阙之之愈也盖小人之事君子所不能同岂圣贤之事而庸人可参之哉欲为圣贤之事而使庸人参之则其命乱矣既任君子之谋而又入小人之议则聪明不专而志意惑矣今将救千古深锢之 为生民长久之计非夫极听览之明尽正邪之辨致一而不二其能胜之乎或谓人君举动不可不慎易于更张则为害大矣臣独以为不然所谓更张者顾理所当耳其动皆稽古质义而行则为慎莫大焉岂若因循苟简卒致败乱者哉自古以来何尝有师圣人之言法先王之治将大有为而返成祸患者乎愿陛下奋天锡之勇智体干刚而独断霈然不疑则万世幸甚

论十事 程颢

臣窃谓圣人创法皆本诸人情极乎物理虽二帝三王不无随时因革踵【一作称】事增损之制然至乎为治之大原牧民之要道则前圣后圣岂不同条而共贯哉盖无古今无治乱如生民之理有穷则圣王之法可改后世能尽其道则大治或用其偏则小康此歷代彰灼着明之効也苟或徒知泥古而不能施之于今姑欲徇名而遂废其实此则陋儒之见何足以论治道哉然悦谓今人之情皆已异于古先王之迹不可复于今趣便目前不务高远则亦恐非大有为之论而未足以济当今之极 也谓如衣服饮食宫室器用之类苟便于今而有法度者岂亦遽当改革哉惟其天理之不可易人所赖以生非有古今之异圣人之所必为者固可防举然而行之有先后用之有缓速若夫裁成运动周旋曲当则在朝廷讲求设施如何耳古者自天子达于庶人必须师友以成就其德业故舜禹文武之圣亦皆有所从学今师傅之职不修友臣之义未着所以尊德乐善之风未成于天下此非有古今之异者也王者必奉天建官故天地四时之职歷二帝三王未之或改所以百度修而万化理也至唐犹仅存其畧当其治时尚得纲纪小正今官秩淆乱职业废弛太平之治所以未至此亦非有古今之异也天生蒸民立之君使司牧之必制其常产使之厚生则经界不可不正井地不可不均此为治之大本也唐尚能有口分授田之制今则荡然无法富者跨州县而莫之止贫者流离饿殍而莫之恤幸民虽多而衣食不足者盖无纪极生齿日益繁而不为之制则衣食日蹙转死日多此乃治乱之机也岂可不渐图其制之之道哉此亦非有古今之异者也古者政教始乎鄉里立法于比閭族党州县鄴遂以相联属統治故民相安而亲睦刑法鲜犯廉耻易格此亦人情之所自然行之则效亦非有古今之异者也庠序之教先王所以明人伦化成天下今师学废而道德不一乡射亡而礼义不兴贡士不本于乡里而行实不修秀民不养于学校而人材多废此较然之事亦非有古今之异者也古者府史胥徒受禄公生而兵农未始判也今骄兵耗圉国力亦已极矣臣谓禁卫之外不渐归于农则将貽深虑府史胥徒之役毒遍天下不更其制则未

免大患此亦至明之理非有古今之异者也古者民必有九年之食无三年之食者以为国非其国臣观天下耕之者少食之者众地力不尽人功不勤虽富室强宗鲜有余积况其贫弱者乎或一州一县有年歲之凶即盜賊纵横飢羸滿路如不幸有方二三百里之灾或连年之歉则未知朝廷以何道处之则其患不可胜言矣岂可曰昔何人不至是因以幸为可恃也哉固宜渐从古制均田务农公私交为储粟之法以为之备此乃亦无今古之异者也古者四民各有常职而农者十居八九故衣食易给而民无所困苦今京师浮民数逾百万游手不足貲度观其穷蹙辛苦孤贫疾病变诈巧伪以自求生而常不足以生日益歲滋久将若何事已穷极非圣人能变而通之则无以免患岂可谓无可奈何而已哉此在酌古变今均多恤寡渐为之业以救之耳此亦非有古今之异者也圣人奉天理物之道在乎六府六府之任治于五官山虞泽衡各有常禁故万物阜丰而财用不乏今五官不修六府不治用之无节取之不时岂惟物失其性材木所资天下皆以童赭斧斤焚荡尚且侵寻不禁而川泽渔猎之繁暴殄天物亦已耗竭则将若之何此乃穷之极矣惟修虞衡之职使将养之则有变通长久之势此亦非有古今之异者也古者冠昏防祭车服器用等差分别莫敢逾僭故财用易给而民有常心今礼制未修奢靡相尚卿大夫之家莫能中礼而商贩之类或逾王公礼制不足以检飭人情名数不足以旌别贵贱既无定分则奸诈攘夺人人求厌其欲而后已岂有止息者哉此争乱之道也则先王之法岂得不讲而损益之哉此亦非有古今之异者也此十者特其端绪耳臣特论其大端以为三代之法有必可施行之验如其纲条度数施为注措之道则审行之必也稽之经训而合施之人情而宜此晓然之定理岂徒若迂疎无用之说哉惟圣明裁择

论新法程颢

臣闻天下之理本诸简易而行之以顺道则事无不成故曰智者若禹之行水行其所无事也舍而之于险阻则不足以言智矣盖自古兴治虽有专任独决能就事功者未闻辅弼大臣人各有心睽戾不一致国政异出名分不正中外人情交谓不可而能有为者也况于措置失宜沮废公议一二小臣实与大计用贱陵贵以邪妨正者乎凡此皆天下之理不宜有成而智者之所不行也设令由此侥幸事小有成而兴利之臣日进尚德之风寢衰尤非朝廷之福矧复天时未顺地震连年四方人心日益摇动此皆陛下所当仰测天意俯察人事者也臣奉职不肖议论无补望允前奏早赐降责

宋文鉴卷五十三

卷五十四

钦定四库全书

宋文鉴卷五十四

宋吕祖谦编

奏疏

上皇帝书 苏轼

臣近者不度愚贱輒上封章言买灯事自知渎犯天威罪在不赦席藁私室以待斧钺之诛而侧听逾旬威命不至问之府司则买灯之事寻已停罢乃知陛下不惟赦之又能听之惊喜过望以至感泣何者改过不吝从善如流此尧舜禹汤之所勉彊而力行秦汉以来之所絶无而仅有顾此买灯毫髮之失岂能上累日月之明而陛下翻然改命曾不移刻则所谓智出天下而听于至愚威加四海而屈于匹夫臣今知陛下可与为尧舜可与为汤武可与富民而措刑可与彊兵而伏戎虏矣有君如此其忍负之惟当披露腹心捐弃肝脑尽力所至不知其他乃者臣亦知天下之事有大于买灯者矣而独区区以此为先者盖未信而谏圣人不与交浅言深君子所戒是以试论其小者而其大者固将有待而后言今陛下果赦而不诛则是既已许之矣许而不言臣则有罪是以愿终言之臣之所欲言者三愿陛下结人心厚风俗存纪纲而已人莫不有所恃人臣恃陛下之命故能役使小民小民恃陛下之法故能胜服彊暴至于人主所恃者谁欤书曰予临兆民懍乎若朽索之驭六马言天下莫危于人主也聚则为君臣散则为仇讐聚散之间不容毫厘故天下归往谓之主人各有心谓之独夫由此观之人主之所恃者人心而已人心之于人主也如木之有根如灯之有膏如鱼之有水如农夫之有田如商贾之有财木无根则槁灯无膏则灭鱼无水则死农夫无田则饥商贾无财则贫人主失人心则亡此必然之理不可追之灾也其为可畏从古以然苟非乐祸好狂轻易防志孰敢肆其胸臆轻犯人心乎昔子产焚戟书以弭众言赂伯石以安巨室以为众怒难犯专欲难成而孔子亦曰信而后劳其民未信则以为厉已也惟商鞅变法不顾人言虽能骤致富彊亦以召怨天下使其民知利而不知义见刑而不见德虽得天下旋踵而亡至于其身亦卒不免负罪出走而诸侯不纳车裂以殉而秦人莫哀君臣之间岂愿如此宋襄公虽行仁义失众而亡田常虽不义得众而彊是以君子未论行事之是非先观众心之向背谢安之用诸桓未必是而众之所乐则国以安庾亮之召苏峻未必非而势有不可则反为危辱自古及今未有和易同众而不安刚果自用而不危者也陛下亦知人心之不悦矣中外之人无贤不肖皆言祖宗以来治财用者不过三司使副判官经今百年未尝阙事今者无故又创一司号曰制置三司条例使六七少年日夜讲求于内使者四十余辈分行营干于外造端宏大民实惊疑创法新奇吏皆惶惑贤者则求其说而不可得未免于忧小人则以其意度朝廷遂以为谤谓陛下以万乘之主而言利谓执政以天子之宰而治财商贾不行物价腾踊近自淮甸远及川蜀喧传万口

论说百端或言京师正店议置监官防路深山当行酒禁拘收僧尼常住减尅兵吏廩禄如此等类不可胜言而甚者至以为欲复肉刑斯言一出民且狼顾陛下与二三大臣亦闻其语矣然而莫之顾者徒曰我无其事又无其意何恤于人言夫人言虽未必皆然而疑似则有以致谤人必贪财也而后人疑其盗人必好色也而后人疑其淫何者未置此司则无此谤岂去歲之人皆忠厚而今歲之士皆虚浮孔子曰工欲善其事必先利其器又曰必也正名乎今陛下操其器而讳其事有其名而辞其意虽家置一喙以自解市列千金以购人人必不信谤亦不止夫制置三司条例司求利之名也六七少年与使者四十余辈求利之器也驱鹰犬而赴林藪语人曰我非猎也不如放鹰犬而兽自驯操网罟而入江海语人曰我非渔也不如捐网罟而人自信故臣以为消谗慝而召和气复人心而安国本则莫若罢制置三司条例司夫陛下之所以创此司者不过以兴利除害也使罢之而利不兴害不除则勿罢罢之而天下悦人心安兴利除害无所不可则何苦而不罢陛下欲去积 而立法必使宰相熟议而后行事若不由中书则是乱世之法圣君贤相夫岂其然必若立法不免申中书熟议不免使宰相此司之设无乃冗长而无名智者所图贵于无迹汉之文景纪无可书之事唐之房杜传无可载之功而天下之言治者与文景言贤者与房杜蓋事已立而迹不见功已成而人不知故曰善用兵法者无赫赫之功岂惟用兵事莫不然今所图者万分未获其一也而迹之布于天下已若泥中之鬪兽亦可谓拙谋也陛下诚欲富国择三司官属与漕运使副而陛下与二三大臣孜孜讲求磨以歲月则积 自去而人不知但恐立志不坚中道而废孟子有言其进锐者其退速若有始有卒自可徐徐十年之后何事不立孔子曰欲速则不达见小利则大事不成使孔子而非圣人则此言亦不可用书曰谋及卿士至于庶人翕然大同乃底元吉若逆多而从少则静吉而作凶今上自宰相大臣既已辞免不为则外之议论断亦可知宰相人臣也且不欲以此自污而陛下独安受其名而不辞非臣愚之所识也君臣宵旰几一年矣而富国之效芒如捕风徒闻内帑出数百万緡祠部五千余人耳以此为术其谁不能且遣使纵横本非令典汉武遣绣衣直指桓帝遣八使皆以守宰狼籍盗贼公行出于无术行此下防宋文帝元嘉之政比于文景当时责成郡县未尝遣使及至孝武以郡县迟缓始命台使督之以至萧齐此 不革故景陵王子良上疏极言其事以为此等朝辞禁门情态即异暮宿州县威福便行驱迫邮传折辱守宰公私烦扰民不聊生唐开元中宇文融奏置劝农判官使裴寬等二十九人并摄御史分行天下招携戶口检责漏田时张说杨場皇甫璟杨相如皆以为不便而相继罢黜虽得户八十余万皆州县希防以主为客以少为多及使百官集议都省而公卿以下惧融威势不敢异辞陛下试取其传而读之观其所行为是与否近者均税寬恤冠蓋相望朝廷亦旋觉其非而天下至今以为谤曾未数歲是非较然臣恐后之视今犹今之视昔且其所遣尤不适宜事少而员多人轻而权重夫人轻而权重则人多不服或敢侮慢以兴争事少而员多则无以为功必须生事以塞责陛下虽严赐约束不许邀功然人臣事君之常情不从其令而从其意今朝廷之意好动而恶静好同而恶异防趣所在谁敢不从臣恐陛下赤子自此无寧歲矣至于所行之事行路皆知其难何者汴水浊流自生民以来不以种稻秦人之歌曰泾水一石其泥数斗且溉且粪长我禾黍何尝曰长我粳稻耶今欲陂而清之万顷之稻必用千顷之陂一歲一淤三歲而满矣陛下遽信其说即使相视地形万一官吏苟且顺从真谓陛下有意兴作上靡帑币下夺农时隄防一开水失故道虽食议者之肉何补于民天下从平民物滋息四方遗利蓋畧尽矣今欲凿空寻访水利所谓即鹿无虞岂惟徒劳必大烦扰凡所擘画利害不问何人小则随事酬劳大则量才錄用若官私格沮并重行黜降不以赦原若材力不办兴修

便许申奏替换赏可谓重罚可谓轻然并终不言诸色人妄有申陈或官私误兴功役当得何罪如此则妄庸轻剽浮浪奸人自此争言水利矣成功则有赏败事则无诛官司虽知其踈岂可便行抑退所在追集老少相视可否吏卒所过鸡犬一空若非灼然难行必须且为兴役何则格沮之罪重而误兴之过轻人多爱身势必如此且古陂废堰多为侧近冒耕歲月既深已同永业苟欲兴复必尽追収人心或摇甚非善政又有好讼之党多怨之人妄言某处可作陂渠规坏所怨田产或指人旧业以为官陂冒佃之讼必倍今日臣不知朝廷本无一事何苦而行此哉自古役人必用乡戶犹食之必用五谷衣之必用桑麻川之必用舟楫行地之必用牛马虽其间或有以他物充代然终非天下所可常行今者徒闻江浙之间数郡雇役而欲措之天下是犹见燕晋之枣栗岷蜀之蹲防而欲以废五谷岂不难哉又欲官卖所在坊场以充衙前雇直虽有长役更无酬劳长役所得既防自此必渐衰防则州郡事体憔悴可知士大夫捐亲戚弃坟墓以从宦于四方者宣力之余亦欲取乐此人之至情也若凋 太甚厨传萧然则似危邦之陋风恐非太平之盛观陛下诚虑及此必不肯为且今法令莫严于御军军御之法莫严于逃窜禁军三犯厢军五犯犯之大率处死然逃军常半天下不知雇人为役与厢军何异若有逃者何以罪之其势必轻于逃军则其逃必甚于今日为其官长不亦难乎虽使鄉户颇得雇人然至于所雇逃亡鄉户犹任其责今遂欲于两税之外别立一科谓之庸钱以备官雇则雇人之责官所自任矣自唐杨炎废租庸调以为两税取大历十四年应于赋敛之数以定两税之额则是租调与庸两税既兼之矣今两税如故奈何复欲取庸圣人立法必虑后世岂可于常赋之外别出科名哉万一不幸后世有多欲之君辅之以聚敛之臣庸钱不除差役仍旧使天下怨不推所从来则必有任其咎者矣又欲使坊郭等第之民与鄉户均役品官形势之家与齐民并举其说曰周礼田不耕者出屋粟宅不毛者有里布而汉世宰相之子不免戍边此其所以借口也古者官養民今者民養官给之以田而不耕劝之以农而不力于是乎有里布屋粟夫家之征而民无以为生去为商贾事势当尔何名役之且一歲之戍不过三日三日之雇其直三百今世三大户之役自公卿以降无得免者其费岂特三百而已矣大抵事若可行不必皆有故事若民所不悦俗所不安纵有经典明文无补于怨若行此二者必怨无疑女户单丁蓋天民之穷者也古之王者首务恤此而今陛下首欲役之此等苟非戶將絕而未亡则是家有丁而尚防若假之數歲則必成丁而就役老死而沒官富有四海忍不加恤孟子曰始作俑者其无后乎春秋书作丘甲用田賦皆重其始为民患也青苗放钱自昔有禁今陛下始立新法每歲常行虽云不许抑配而数世之后暴君汚吏陛下能保之欤异日天下恨之国史记之曰青苗钱自陛下始岂不惜哉且东南买絹本用见钱陝西粮草不许折兑朝廷既有着令职司又每举行然而买絹未尝不折盐粮草未尝不折钞乃知青苗不许抑配之说亦是空文如治平之初防刺义勇当诏防慰諭明言永不戍边着在简书有如盟约于今几曰论议已摇或已代还东军或欲抵换弓手约束难恃岂不明哉纵使此令决行果不抑配计其间愿请人户必皆孤贫不济之人家若自有赢余何至与官交易此等鞭撻已急则继之以逃亡逃亡之余则拘之邻保势有必至理有固然且夫常平之为法也可谓至矣所守者约而所及者广借使万家之邑止有千斛而谷贵之际千斛在市物价自平一市之价既平一邦之食自足无操瓢乞丐之 无里正催驱之劳今若变为青苗家贷一斛则千户之外孰救其饥且常平官钱常患其少若尽数収余则无借贷若留充借贷则所余几何乃知常平青苗其势不能两立坏彼成此所防愈多亏官害民虽悔何逮臣切计陛下欲考其实则必然问人人知陛下方欲力行必谓此法有利无害以臣愚见恐未可凭何以明之臣顷在陝西见刺义勇提举

诸县臣尝亲行愁怨之民哭声振野当时奉使还者皆言民尽乐为希合取容自古如此不然则山东之盗二世何緣不觉南诏之败明皇何緣不知今虽未至于斯亦望陛下审听而已昔汉武之世财力匱竭用贾人桑羊之说买贱卖贵谓之均输于时商贾不行盜賊滋熾几至于乱孝昭既立学者争排其说霍光顺民所欲从而予之天下归心遂以无事不意今者此论复兴立法之初其说尚浅徒言徙贵就贱用近易远然而广置官属多出緡钱豪商大贾皆疑而不敢动以为虽不明言販賣然既已许之变易变易既行而不与商贾争利者未之闻也夫商贾之事曲折难行其买也先期而与钱其卖也后期而取直多方相济委曲相通倍称之息由此而得今官买是物必先设官置吏簿书廩禄为费已厚非良不售非賄不行是以官买之价比民必贵及其卖也 复如前商贾之利何緣而得朝廷不知慮此乃捐五百万緡以与之此钱一出恐不可复纵使其间薄有所获而征商之额所损必多今有人为其主牧牛羊者不告其主以一牛而易五羊一牛之失则隐而不言五羊之获则指为劳績陛下以为坏常平而言青苗之功亏商税而取均输之利何以异此陛下天机洞照圣畧如神此事至明岂有不晓必谓已行之事不欲中变恐天下以为执德不一用人不终是以迟留歲月庶几万一臣切以为过矣古之英主无出汉高酈生谋挠楚权欲复六国高祖曰善趣刻印及闻留侯之言吐哺而骂曰趣销印夫称善未几继之以骂刻印销印有同儿戏何尝累高祖之知人适足以明圣人之无我陛下以为可而行之知其不可而罢之至圣至明无以加此议者必谓民可与乐成难与虑始故劝陛下坚执不顾期于必行此乃战国贪功之人行险侥幸之说陛下若信而用之则是徇高论而逆至情持空名而邀实祸未及乐成而怨已起矣臣之所愿结人心者此之谓也士之进言者为不少矣亦尝有以国家之所以存亡歷数之所以长短告陛下者乎夫国家之所以存亡者在道德之浅深而不在乎彊与弱歷数之所以长短者在风俗之厚薄而不在乎富与贫道德诚深风俗诚厚虽贫且弱不害于长而存道德诚浅风俗诚薄虽彊且富不救于短而亡人主知此则知所轻重矣是以古之贤君不以弱而忘道德不以贫而伤风俗而智者观人之国亦必以此察之齐至彊也周公知其后必有篡弑之臣卫至弱也季子知其后亡吳破楚入郢而陈大夫逢滑知楚之必复晋武既平吳何曾知其将乱隋文既平陈房乔知其不从元帝斩郅支朝呼韩功多于武宣矣偷安而王氏之衅生宣帝收燕赵复河隍力彊于宪武矣消兵而厯勦之乱起故臣愿陛下务崇道德而厚风俗不愿陛下急于有功而贪富彊使陛下富如隋彊如秦西取灵武北取燕蓟谓之有功可也而国之长短则不在此夫国之长短如人之寿夭人之寿夭在元气国之长短在风俗世有尪羸而寿考亦有盛壮而暴亡若元气犹存则尪羸而无害及其已耗则盛壮而愈危是以善養生者慎起居节饮食导引关节吐故纳新不得已而用药则择其品之上性之良可以久服而无害者则五藏和平而寿命长不善養生者薄节慎之功迟吐纳之效厌上药而用下品代真气而助彊阳根本已空僵仆无日天下之势与此无殊故臣愿陛下爱惜风俗如护元气古之圣人非不知深刻之法可以齐众勇悍之夫可以集事忠厚近于迂阔老成初若迟钝然终不肯以彼而易此者顾其所得小而所防大也曹参贤相也曰慎勿扰狱市黄霸循吏也曰治道去泰甚或讥谢安以清谈废事安笑曰秦用法吏二世而亡刘晏为度支專用果锐少年务在急速集事好利之党相师成风德宗初即位擢崔祐甫为相祐甫以道德寬大推广上意故建中之政其声翕然天下相望庶几贞观及卢杞为相讽上以刑名整齐天下驯致浇薄以及播迁我仁祖之御天下也持法至寬用人有叙専务掩覆过失未尝轻改旧章然考其成功则曰未至以言乎用兵则十出而九败以言其府库则仅足而无余徒以德泽在人风俗知义是以升遐之日天下如防老妣社稷长远

终必赖之则仁祖可谓知本矣今议者不察徒见其末年吏多因循事不振举乃欲矫之以苛察济之以智能招来新进锐勇之人以图一切速成之效未享其利浇风已成且天时不齐人谁无过国君含垢至察无徒若陛下多方包容则人材取次可用必欲广置耳目务求瑕疵则人不自安各图苟免恐非朝廷之福亦岂陛下所愿哉汉文欲用虎圈啬夫释之以为利口伤俗今若以口舌捷给而取士以应对迟钝而退人以虚诞无实为人文以矫激不仕为有德则先王之泽遂将散防自古用人必须歷试虽有卓异之器必有已试之功一则使其更变而知难事不轻作一则待其功高而望重人自无辞昔先主以黄忠为后将军而诸葛亮忧其不可以为忠之名望素非关张之伦若班爵遽同则必不悦其后云长果以为言以黄忠豪勇之姿以先主君臣之契尚复虑此而况其他世常谓汉文不用贾生以为深恨臣尝推究其防窃谓不然贾生固天下之奇才所言亦一时之良防然请为属国欲系单于则是处士之大言少年之锐气昔高祖以三十万众困于平城当时将相羣臣岂无贾生之比三表五饵人知其蹊而欲以困中行说尤不可信矣兵凶器也而易言之正如赵括之轻秦李信之易楚若文帝亟用其说则天下殆将不安使贾生尝歷艰难亦必自悔其说用之晚歲其术必精不幸防亡非意所及不然文帝岂弃才之主绦灌岂蔽贤之士至于晁错尤号刻薄文帝之世止于太子家令而景帝既立以为御史大夫申屠贤相发愤而死滋更号令天下骚然及至七国发难而错之术亦穷矣文景优劣于此可见大抵名器爵禄人所奔趋必使积劳而后迁以明持久而难得则人各安其分不敢躁求今若多开骤进之门使有意外之得公卿侍从跬步可图其得者既不肯以侥幸自名则不得者必皆以沉沦为恨使天下常调举生妄心耻不若人何所不至欲望风俗之厚岂可得哉选人之改京官常须十年以上荐更险阻计析毫厘其间一事龂牙常至终身沦弃今乃以一人之荐举而予之犹恐未称章服随至使积劳从次而得者何以厌服哉夫常调之人非守则令员多阙少从已患之不可复开多门以待巧者若巧者侵夺已甚则拙者迫怵无聊利害相形不得不察故近歲朴拙之人愈少而巧佞之士益多惟陛下重之惜之哀之救之如近日三司献言使天下郡选一人催驱三司文字许之先次指射以酬其劳则数年之后审官吏部又有三百余人得先占阙常调待次不其愈难此外勾当发运均输按行农田水利以振监司之体各怀进用之心转对者望以称防而骤迁奏课者求为优等而速化相胜以力相高以言而名实乱矣惟陛下以简易为法以清静为心使奸无所緣而民德归厚臣之所愿厚风俗者此之谓也古者建国使内外相制轻重相权如周如唐则外重而内轻如秦如魏则外轻而内重内重之 必有奸臣指鹿之患外重之 必有大国问鼎之忧圣人方盛而虑衰常先立法以救 国家租赋总于计省重兵聚于京师以古揆今则似内重恭惟祖宗所以深计预图而固非小臣所能臆度而周知然观其委任台谏之一端则是圣人过防之至计歷观秦汉以及五代谏争而死蓋数百人而自建隆以来未尝罪一言者纵有薄责旋即超升许以风闻而无官长风采所系不问尊卑言及乘輿则天子改容事关廊庙则宰相待罪故仁宗之世议者讥宰相但奉行台谏风防而已圣人深意流俗岂知蓋擢用台谏固未必皆贤所言亦未必皆是然须養其銳气而借之重权者岂徒然哉将以折奸臣之萌而救内重之 也夫奸臣之始以台谏折之而有余及其既成以干戈取之而不足今法令严密朝廷清明所谓奸臣万无此理然養猫以去防不可以无防而養不捕之猫畜狗以防奸不可以无奸而畜不吠之狗陛下得上念祖宗设此官之意下为子孙立万世之防朝廷纲纪孰大于此臣自防小所记及闻长老之谈皆谓台谏所言常随天下公议公议所与台谏亦与之公议所击台谏亦击之及至英庙之初始建称亲之议本非人主大过亦无典礼明文徒以众心未安公

议不允当时台谏以死争之今者物论沸腾人怨交至公议所在亦可知矣相顾不发中外失望夫弹劾积威之后虽庸人亦可以奋扬风采消委之余虽豪杰有所不能振起臣恐自兹以往习惯成风尽为执政私人以致人主孤立纪纲一废何事不生孔子曰鄙夫可与事君也欤哉其未得之也患得之既得之患失之苟患失之无所不至矣臣始读此书疑其太过以为鄙夫之患失不过备位而苟容及观李斯忧蒙恬之夺其权则立二世以亡秦卢杞忧怀光之数其恶则误德宗以再乱其心本生于患失而其祸乃至于防邦孔子之言良不为过是以知为国者平居必常有忘躯犯颜之士则临难庶几有殉义守死之臣苟平居尚不能一言则临难何以责其死节人臣苟皆如此天下亦曰殆哉君子和而不同小人同而不和和如羹同如济水是故孙宝有言周公上圣召公大贤犹不相悦着于经典两不相损晋之王导可谓元臣每与客言举坐称善而王述不悦以为人非尧舜安得每事尽善导亦敛衽谢之若使言无不同意无不合更唱迭和何者非贤万一有小人居其间则人主何缘得以知觉臣之所谓愿存纪纲者此之谓也臣非敢历诋新政苟为异论如近日裁减皇族恩例刊定任子条式修完器械阅习鼓旗皆陛下神 之至明干刚之必断物议既允臣敢有词然至于所献三言则非臣之私见中外所病其谁不知昔禹戒舜曰无若丹朱傲惟慢游是好舜岂有是哉周公戒成王曰无若商王受之迷乱酗于酒德哉成王岂有是哉周昌以汉高为桀纣刘毅以晋武为桓灵当时人君曾莫之罪而书之史册以为美谈使臣所献三言皆朝廷未尝有此则天下之幸臣与有焉若有万一似之则陛下安可不察然而臣之为计可谓愚矣以蝼蚁之命试雷霆之威积其狂愚岂可屡赦大则身首异处破坏家门小则削籍投荒流离道路虽然陛下必不为此何也臣天赋至愚笃于自信向者与议学校贡举首违大臣本意已期窜逐敢意自全而陛下独然其言曲赐召对从容从之至谓臣曰今政令得失安在虽朕过失指陈可也臣即对曰陛下生知之性天纵文武不患不明不患不勤不患不断但患求治太速进人太锐听言太广又俾述其所以然之状陛下领之曰卿所献三言朕当熟思之臣之狂愚非独今日陛下容之从矣岂有容之于始而不赦之于终恃此而言所以不惧臣之所惧者讥刺既众怨仇实多必将诋臣以深文中臣以危法使陛下虽欲赦臣而不得岂不殆哉死亡不辞但恐天下以臣为戒无复言者是以思之经月夜以继日书成复毁至于再三感陛下听其一言怀不能已卒吐其说惟陛下怜其愚忠而卒赦之不胜俯伏待罪忧恐之至

卷五十五

钦定四库全书

宋文鉴卷五十五

宋 吕祖谦 编

奏疏

徐州上皇帝书 苏轼

臣以庸材备员册府出守两郡皆东方要地私窃以为守法今治文书赴期防不足以报塞万一輒伏私念东方之要务陛下之所宜知者得其一二草具以闻而陛下择焉臣前任密州建言自古河北与中原离合常系社稷存亡而京东之地所以灌输河北餽竭则囂耻唇亡则齿寒而其民喜为盗贼为患最甚因为陛下画所以待盗贼之防及移守徐州览观山川之形势察其风俗之所上而考之于载籍然后又知徐州为南北之襟要而京东诸郡彭城所寄也昔项羽入关既烧咸阳而东归则都彭城夫以羽之雄畧舍咸阳而取彭城则彭城之险固形便足以得志于诸侯者可知矣臣观其地三面被山独其西平川数百里西走梁宋使楚人开关而延敌材官驍发突骑云从真若屋上建瓴水也地宜菽麦一熟而饱数歳其城三面阻水楼堞之下以汴泗为池独其南可通车马而戏马台在焉其高十仞广袤百步若用武之世屯千人其上聚櫓木炮石凡战守之具以与城相表里而积三年粮于城中虽用十万人不易取也其民皆长大胆力絶人喜为剽掠小不适意则有飞扬防扈之心非止为盗而已汉高祖沛人也项羽宿迁人也刘裕彭城人也朱全忠碭山人也皆在今徐州数百里间耳其人以此自负凶桀之气积以成俗魏太武以三十万众攻彭城不能下而王智兴以卒伍庸材恣睢于徐朝廷亦不能下岂非其地形便利人卒勇悍故耶州之东北七十余里即利国监自古为鐵官商贾所聚其民富乐凡三十六冶冶户皆大家藏镪巨万常为盗贼所窥而兵卫寡弱有同儿戏臣中夜以思即为寒心使剧贼致死者十余人白昼入市则守者皆弃而走耳地既产精鐵而民皆善鍛散冶户之财以啸召无赖则乌合之众数千人之伏可以一夕具也顺流南下辰发已至其徐有不守之忧矣使不幸而贼有过人之材如吕布 德之徒得徐而逞其志则京东之安危未可知也近者河北转运使乞奏禁止利国监鐵不许入河北朝廷从之昔楚人亡弓不能忘楚孔子犹小之况天下一家东北二冶皆为国兵利而夺彼以与此不已隘乎自鐵不北行冶户皆有失业之忧诣臣而诉者数矣臣欲因此以征冶户为利国监之捍屏今三十六冶冶各百余人采鑛伐炭多饥寒亡命彊力鸞忍之民也臣欲使臣冶户每冶各择有材力而忠谨者保任十人籍其名于官授以郤刃刀槊教之击刺每月两衙集于知监之庭而阅试之藏于官有待大盗不得役使犯者以违制论冶户为盗所拟从矣民皆知之使冶出十人以自卫民所乐也而官又为除近日之禁使鐵得北行则冶户皆悦而听命奸猾破胆而不谋矣徐城虽峻固而楼櫓敝恶又城大而兵少缓急不可守今战兵千人耳臣欲乞南京新招骑射两

指挥于徐此故徐人也尝屯于徐营垒材石既具矣而迁于南京异时转运使分东西路畏餽饷之劳而移之西耳今两路为一其去本无所损益而足以为徐之重城下数里颇产精石无穷而奉化厢军见阙数百人臣愿募石工以足之听不差出使北数百人者常采石以甃城数年之后举为金汤之固要使利国监不可窥则徐无事徐无事则京东无虞矣沂州山谷重阻为逋逃渊薮盗贼每入徐州界中陛下若采臣言不以臣言为不肖愿复三年守徐且得兼领沂州兵甲巡检公事必有以自効京东恶盗多出逃军逃军为盗民则望风畏之何也技精而法重也技精则难敌法重则致死其势然也自陛下置将官修军政士皆精锐而不免于逃者臣尝考其所由盖自近岁以来部送罪人配军者皆不使役人而使禁军军士当部送者受牒即行往返不下十日道路之费非取息钱不能办百姓畏法不敢贷贷亦不可复得惟所部将校乃敢出息钱与之归而刻其粮赐是以上下相持军政不修博奕饮酒无所不至穷苦无聊则逃去为盗臣自至徐即取不系省钱百余千别储之当部送者量远近裁取以三月刻纳不取其息将吏有敢贷息钱者痛以法治之然后严军政禁酒博比暮年士皆饱暖练熟技艺等第为诸郡之冠陛下遣敕使按阅所具见也臣愿下其法诸郡推此行之则军政修而逃者衰亦去盗之一端也臣闻之汉相王嘉曰孝文帝时二千石长吏安官乐职上下相望莫有苟且之意其后稍稍变易公卿以下转相促急司一部刺史发扬阴私吏或居官数月而退二千石益轻贱吏民慢易之知其易危小失意则有离畔之心前山阳亡徒苏令纵横吏士临难莫肯伏节死义以守相威权素夺故也国家有急取办于二千石尊重难危乃能使下以王嘉之言而考之于今郡守之威权可谓素夺矣上有监司伺其过失下有吏民持其长短未及按问而差替之命已下矣欲追捕盗贼法外求一钱以使人且不可得盗贼凶人情重而法轻者乎臣辄配流之则使所在法司覆按其状劾以失入惴惴如此何以得吏士死力而破奸人之党乎由此观之盗贼所以滋炽者以陛下守臣权太轻故也臣愿陛下稍重其权责以大纲畧其小过凡东京多盗之郡自青郛以降如徐济齐曹之类皆慎择守臣听法外处置彊盗颇赐緡钱使得以布设耳目畜养爪牙然緡钱多赐则难常少又不足于用臣以为每郡可岁别给一二百千使以酿酒凡使人葺捕盗贼得以酒予之敢以为他用者坐赃论赏格之外岁得酒数百亦足以使人矣此又治盗之一术也然此皆其小者其大者非臣之所当言欲默而不发则又私自念遭值陛下英圣特达如此若有所不尽忠臣之义故昧死复言之昔者以诗赋取士今陛下以经术用人虽不同然皆以文词进耳考其所得多吴楚闽蜀之人至于京东西河北河东陕西五路盖自古豪杰之场其人沈鸷勇悍可任以事然欲使治声律读经义以与吴楚闽蜀之士争得失于毫厘之间则彼有不仕而已故其得人常少夫惟忠孝礼义之士虽不得志不失为君子若德不足而才有余者困于无门则无所不至矣故臣愿陛下特为五路之士别开仕进之门汉法郡县秀民推择为吏考行察廉以次迁补或主二千石入为公卿古者不专以文词取人故得士为多黄霸起于卒吏薛宣进于书佐朱邑选于嗇夫邴吉出于狱吏其余名臣廉吏由此而进者不可胜数唐自中叶以后方镇皆列选校以掌牙兵是时四方豪杰不能以科举自达者皆争为之往往积功以取旌钺虽老奸巨盗或出其中而名卿贤将如高仙芝封常清李光弼来瑱李抱玉段秀实之流所得亦已多矣王者之用人如江河江河所趋百川赴焉蛟龙生之及其去而之他则鱼鼈无所还其体而鲙鳅为之制今世胥史牙校皆奴仆庸人者无他以陛下不用也今欲用胥史牙校而胥史行文书治刑狱钱谷其势不可废鞭撻鞭撻一行则豪杰不出于其间故凡士之刑者不可用用者不可刑故臣愿陛下采唐之旧使五路监司郡守共选士人以补牙职皆取人材心力有足过人而不能从事于科举者禄之

以今之庸钱而课之镇税场务督捕盗贼之类自公罪杖以下听赎依将校法使长吏得荐其才者第其功阅书其歲月使得出比任子而不以流外限其所至朝廷察其尤异者擢用数人则豪杰英伟之士渐出于此涂而奸猾之党可得而笼取也其条目委曲臣未敢尽言惟陛下留神省察昔晋武平吳之后诏天下罢军役州郡悉去武备惟山涛论其不可帝见之曰天下名言也而不能用及永寧之后盗贼蠭起郡国皆以无备不能制其言乃验今臣于无事之时屡以盗贼为言其私忧过计亦已甚矣陛下纵能容之必为议者所笑使天下无事而臣获笑可也不然事至而图之则已晚矣干犯天威罪在不赦

论治道二首 苏轼道德

人君以至诚为道以至仁为德守此二言终身不易尧舜之主也至诚之外更行他道皆为非道至仁之外更作他德皆为非德何谓至诚上自大臣下至小民内自亲戚外至四夷皆推赤心以待之不可以丝毫伪也如此则四海之内亲之如父子信之如心腹未有父子相图心腹相欺者如此而天下之不治未之有也丝毫之伪一萌于心如人有病先见于脉如人饮酒先具于色动于几防之间而猜阻行于千里之外疆者为敌弱者为怨四海之内如盗贼之憎主人鸟兽之畏弋猎则人主孤立而危亡至矣何谓至仁亲臣如手足视民如赤子戢兵省刑时使薄敛行此六事而已矣祸莫逆于好用兵怨莫大于好起狱灾莫深于兴土功毒莫甚于夺民利此四者陷民之坑穽而伐国之斧钺也去此四者行彼六者而仁不可胜用也传曰至诚如神又曰至仁无敌审能行之当获四种福以人事言之则主逸而国安以天道言之则享年永而卜世长此必然之理古今已试之效也去圣益远邪说滋炽厌常道而求异术文奸言以济暴行为申商之学者则曰人主不可以不学术数人主天下之父也为人父而用术于子其可乎为庄老之学者则曰圣人不仁以百姓为刍狗欲穷兵黩武则曰吾以威四夷而安中国欲烦刑多杀则曰吾以禁奸慝而全善人欲虐使厚敛则曰吾以彊兵革而诛暴乱虽若不仁而卒归于仁此皆亡国之言也秦二世王莽尝用之矣皆以经术附防其说书曰惟辟作福惟辟作威此言威福不可移于臣下也欲威福不移于臣下则莫若舍己而从众众之所是我则为之众之所非我则去之夫众未有不公而人君者天下公议之主也如此则威福将安归乎今之说者则不然曰人主不可以不作威福于是违众而用己己之耳目终不能徧天下要必资之于人爱憎喜怒各行其私而浸润肤受之说行矣然后从而赏罚之虽名为人主之威福而其实左右之私意也奸人窃吾威福而卖之于外则权与人主侔矣书曰威克厥爱允济爱克厥威允罔功威者畏威之谓也爱者怀私之谓也管仲曰畏威如疾民之上也从怀如流民之下也畏威之心胜于怀私则事无不成今之说者则不然曰人君当使威刑胜于惠爱是则予不如夺生不如杀尧不如桀而幽厉桓灵之君长有天下此不可不辨也

刑政

书曰临下以简御众以寬此百世不易之道也昔汉高祖约法三章萧何惟定律九篇而已至于文景刑措不用歷魏而晋条目滋章断罪所用至二万六千三百七十一条而奸益不胜民无所措手足唐及五代止用律令国初加以注疏情文备矣今编敕续降动若牛毛人之耳目所不能周思虑所不能照而法病矣臣愚谓当熟议而少寬之人主前旒蔽明黈纆塞聪耳目

所及尚不能尽而况察人于耳目之外乎今御史六察专务钩考簿书责发细防自三公九卿救过不暇夫详于小必畧于大其文密者其实必疎故近歲以来水旱盜賊四民流亡边鄙不寧皆不以责宰相而尚书诸曹文牒繁重穷日之力书纸尾不暇此皆苛察之过也不可以不变易曰理财正辞禁民为非曰义先王之理财也必断之以正辞其辞正则其取之也义三代之君食租衣税而已是以辞正而民服自汉以来盐鐵酒茗之禁称贷权易之利皆心知其非而冒行之故辞曲而民为盜今欲严刑妄赏以去盜不若损利以予民衣食足而盜賊自止夫兴利以聚财者人臣之利也非社稷之福省费以養财者社稷之福也非人臣之利何以言之民者国之本而刑者民之賊兴利以聚财必先烦刑以賊民国本摇矣而言利之臣先受其赏近歲宫室城池之役南蛮西夏之师车服器械之资畧计其费不下五千万緡求其所补卒亦安在若以此积粮则沿边皆有九年之蓄西夷北边望而不敢近矣赵充国有言湟中谷斛八钱吾谓余三百万斛羌人不敢动矣不待烦刑賊民边鄙以安然为人臣之计则无功可赏故人臣欲兴利而不欲省费者皆为身谋非为社稷计也人主不察乃以社稷之深忧而徇人臣之私计岂不过甚矣哉因擒鬼章论西羌夏人事宜 苏轼

臣窃见近者熙河路奏生擒鬼章百官称贺中外同庆臣愚无知窃谓安危之机正在今日若应之有道处之有术则安边息民必自是始不然将骄卒惰以胜为灾亦不足怪故臣区区欲乞陈前后致防之由次谕当今待敌之要虽狂愚无取亦臣子之常分昔先帝用兵累年虽中国靡然夏人困折亦几于亡横山之地沿边七八百里不敢耕者至二百余里歲賜既罢和市亦絕虜中正帛至五十余千其余老弱转徙牛羊墮坏所闻蓋不可胜数饥羸之余乃始歎塞当时执政大臣谋之不深因中国厌兵遂纳其使每一使賜予 易无患得絹五万余正归鬻之其民正五六千民大悦一使所获率不下二十万緡使五六至而累年所罢歲賜可以坐复既使虜因吾资以德其民且饱而思奋又使其窥我厌兵欲和之意以为欲战欲和权皆在我以故轻犯边陲利则进否则复求和无不可者若当时大臣因虜之请受其词不纳其使且诏边臣与之往返商议所获新疆取舍在我俟其词意屈服约束坚明然后纳之则虜虽背恩反覆亦不至如今日之速也虜虽有易我意然不得西藩解仇结好亦未敢动夫阿里骨董氐之賊臣也挟契丹公主以弑其君之二妻董氐死匿防不发逾年众定乃诈称嗣子伪书鬼章温溪心等名以请于朝当时执政若且令边臣审问鬼章等以阿里骨当立不立若朝廷从汝请遂授节钺阿里骨真汝主矣汝能臣之如董氐乎若此等无词则是诸羌心服既立之后必能統一都部吾又何求若其不服则衅自彼生爵命未下曲不在我彼既一国三公则吾分其恩礼各以一近上使额命之鬼章等各得所欲宜亦无患当时执政不深慮此专以省事为安国因其妄请便授节钺阿里骨自知不当立而忧鬼章之讨也故欲借力于西夏以自重于是始有解仇结好之谋而鬼章亦不平朝廷之以賊臣君我也故怒而盜边夏人知诸羌之叛也故起而和之此臣所谓前后致防之由明主不可以不知者也虽既往不咎然可以为方来之监元昊本怀大志长于用兵亮祚天付凶狂轻用其众故其为边患皆歷年而后足定今梁氏专国素与人多不协力内自相图其能以创残呻吟之余人 与中国敌乎料其奸谋蓋非元昊亮祚之比矣意谓二圣在位恭默守成仁恕之心着于远迹必无用武之意可肆无厌之求兰防诸城鄜延五寨好请不获势挟必从猖狂之后求无不获计不过此耳今者窃闻朝廷降诏诸路勅励战守深明逆顺曲直之理此固当今之急务而诏书之中亦许夏人之自新臣切以谓开之太易纳之太速曾未一战而厌兵欲和之意已见乎外此复蹈前日之失矣臣甚惜之

今若闻鬼章之捷或渐有款塞之谋必将为恭很相半之词而继之以无厌之请若朝廷复纳其使则是欲战欲和权皆在虏有求必获不获必叛虽媿一时之安必起无穷之衅故臣愿明主断之于中深诏大臣密勅诸将若夏人款塞当受其词而却其使然后明勅边臣以夏人受恩不费无故犯顺今虽款塞反覆难保若实改心向化当且与边臣商议苟词意未甚屈服约束未甚坚明则且却之以示吾虽不逆其善意亦不汲汲求和也彼若心服而来吾虽未纳其使必不于往返商议之间遽复盗边若非心服则吾虽荡然开怀待之如旧能必其不叛乎今歲泾原之入岂吾待之不至邪但使吾兵练士饱斥 精明虏无大获不过数年必自折困今虽小劳后必坚定此臣所谓当今待敌之要亦明主不可以不知者也今朝廷意在息民不憚屈已而臣献言乃欲艰难其请不急于和似与圣意异者然古之圣贤欲行其意必有以曲成之未尝直情而径行也将欲翕之必固张之将欲取之必固予之夫直情而径行未有获其意者也若权其利害究其所至则臣之愚计于安边息民必久而固与圣意初无小异然臣窃度朝廷之间似欲以畏事为无事者臣切以为过矣夫为国不可以生事亦不可以畏事畏事之与生事均譬如无病而服药与有病而不服药皆可以杀人夫生事者无病而服药也畏事者有病而不服药也乃者阿里骨之请人人知其不当予而朝廷予之以求无事然事之起乃至于此不几于有病而不服药乎今又欲遽纳夏人之使期是病未除而药先止其与几何臣于侍从之中受恩至深其于委曲而保全与众独异故敢出位先事而言不胜恐悚待罪之至

论内中车子争道乱行 苏轼

臣谨按汉武帝郊祠甘泉泰畤汾陰后土而赵昭仪常从在属车间时扬雄待诏承明奏赋以讽其畧曰想西王母欣然而上寿兮屏玉女而却虑妃言妇女不当与齐祠之间也臣今备位夏官职任卤簿準故事郊祀既成乘輿还齐宫改服通天冠绛纱袍教坊钧容作乐还内然后后妃之属中道迎谒已非典礼而况当祀事未毕而中宫掖庭得在勾陈豹尾之间乎切见二圣崇奉大祀严恭寅畏度越古今四方来观莫不悦服今车驾方宿齐太庙而内中车子不避仗卫争道乱行臣愚窃恐于观望有损不敢不奏乞赐约束仍乞取问随行合干勾当人施行

宋文鉴卷五十五

卷五十六

钦定四库全书

宋文鉴卷五十六

宋吕祖谦编

奏疏

上皇帝书 苏辙

臣官至防贱朝廷之事非所得言然窃自惟虽其势不当进言至于报国之义犹有可得言者昔仁宗亲防直言之士臣以不识忌讳得罪于有司仁宗哀其狂愚力排羣言使臣得不遂弃于世臣之感激思有以报为日久矣今者陛下以圣德临御天下将大有为以济斯世而臣材力弩下无以自效窃听之道路得其一二思致之左右苟惩创前事不复以闻则其思报之诚没世而不能自达是以輒发其狂言而不知止臣闻善为国者必有先后之次自其所当先者为之则其后必举自其所当后者为之则先后并废书曰欲升高必自下欲陟遐必自迩世未有不自下而能高不自近而能远者然世之人尝鄙其下而厌其近务先从事于高远不知其不可得也诗曰无田甫田维莠骄骄无思远人劳心忉忉为田甫田而力不给则田蕝而不治不若不田也思远人而德不足则心劳而无获不若不思也欲田甫田则必自其小者始小者之有余而甫田可啓矣欲来远人则必自其近者始近者之既复而远人自至矣苟由其道其势可以自得苟不由其道虽彊求而不获也愚不肖蓋尝试妄论今世先后之宜而窃观陛下施設之万一以为所当先者失在于不为而所当后者失在于太早然臣非敢以为信然也特其所见有近于是者是以因其近似为陛下深言之伏惟陛下即位以来躬亲庶政聪明睿智博达宏辯文足以经治武足以制断重之以勤劳加之以恭俭凡古之帝王旷世而不能有一焉者陛下一旦兼而有之矣夫以天纵之资济之以求治之心施之于事宜无为而不成无欲而不遂今也为国歷年于兹而治不加进天下之日益于前世天下之人未知所以适治之路灾变横生川原震裂江河涌沸人民流离灾害继作歷月移时而其变不止此臣所以日夜思念而不晓疑其先后之次有所未得者也夫今世之患莫急于无财而已财者为国之命而万事之本国之所以存亡事之所以成败常必由之昔赵充国论备边之计以为湟中谷斛八钱糴三百万斛羌人不敢动矣诸葛亮用兵如神而以粮道不继屡出无功由是观之苟无其财虽有圣贤不能自致于跬步苟有其财虽庸人可以一日而千里陛下顷以西夏不臣赫然发愤建用兵之防招来横山之民将夺其嶮阻破坏其国而后已方是之时夏人残虐失众横山之民厌苦思汉而又乘其荐饥苟加之以兵此非计之失者也然而縁边无数月之粮关中无终歲之储而所兴之役有莫大之费陛下方且泰然不以为忧以为万举而有万全之功既而边臣失律先事轻发亦既入践其国系虏其民矣然而陛下得其地而不敢収捕其人而不敢臣虽有成功而不敢继也其终卒至于废黜谋臣而讲和好夫陛下谋之于朞年之前而罢

之于既发之后岂以为是失当而悔之哉诚无财以善其后耳且夫财之不足是为国之先务也至于鞭笞四夷臣服异类是极治之余功而太平之粉饰也然今且先之此臣所以知其先后之次有所未得者也今者陛下惩前事之失出秘府之财徙内郡之租赋督转漕之吏使备防边三歲之畜臣以此疑陛下之有意乎财矣然犹以为未也何者秘府之财不可多取而内郡之民不可重困可以纾目前之患而未可以为长久之计此臣所以求效其区区而不能自己也善为国者不然知财之最急而万事赖焉故常使财胜其事而事不胜财然后财不可尽而事无不济财者车马也事者其所载物也载物者常使马轻其车车轻其物马有余力车有余量然后可以涉涂泥而车不僨登坂险而马不蹶今也四方之财莫不尽取民力屈矣而上用不足平居惴惴仅能以自完而事变之生复不可料譬如 车羸马而引丘山之载幸而无虞犹恐不能胜不幸而有陰雨之变陵谷之险其患必有不可知者故臣深思极虑以为方今之计莫如豐财然臣所谓豐财者非求财而益之也去事之所以害财者而已矣夫使事之害财者未去虽求财而益之财愈不足使事之害财者尽去虽不求豐财然而求财之不丰亦不可得也故臣谨为陛下言事之害财者三一日冗吏二日冗兵三日冗费冗吏之说曰请原古之所以置吏之意有是民也而后有是官有是官也而后有是吏量民而置官量官而求吏其本凡以为民而已是以古者即其官以取人郡县之职缺而取之于民府寺之属缺而取之于郡县出以为守令入以为卿相出入相受中外相贯一人去之一人补之其势不容有冗食之吏近世以来取人不由其官士之来者无穷而官有限极于是兼守判知之法生而官法始坏浸淫分防不复其旧是以吏多于上而士多于下上下相窒譬如决水于不流之泽前者未尽来者已至填咽充满一陷于其中而不能出故布衣之士多方以求官已仕之吏多方以求进下慕其上后慕其前不愧诈伪不耻争夺礼义消亡风俗败坏势之穷极遂至于此夫人情纾则乐易乐易则有所不为窘则懣懣则无所不至今使众人相与皆出于隘足履相蹶肩肘相逮徬徨而不得进又将禁其奔走而争先者苟将禁之则莫如止来者而辟其隘今也驱市人而纳之不胜其多也设隘于中涂而艰难之是以法愈设而争愈甚惟陛下以时救之下哀痛之书明告天下以吏更多之故与之更立三法其一使进士诸科增年而后举其额不增累举多者无推恩其说曰凡今之所以至于不可胜数者以其取之之多也古之人其择吏也甚精人知吏之不可以妄求故不敢轻为士为士者皆其修絜之人也今世取人诵文书习程课未有不可为吏者也其求之不难而得之甚乐是以羣起而趋之凡今农工商贾之家未有不舍其旧而为士者也为士者日多然而天下益以不治今世所谓居家不事生产仰不養父母俯不恤妻子浮游四方侵扰州县造作诽谤者农工商贾不与也祖宗之世士之多少其比于今不能一二也然其削平僭乱创制立法功业卓然见于后世今世之士不敢望其万一也士之不及于今世而功则过之无足恠者取之至少则人不敢轻为士其所取者皆州郡之选人也故为是法使人知上意之所向十年之后无实之士将不黜而自减且夫设科以待天下之士蓋将使其才者得之不才者不可得也吾则取之而彼则不能得犹曰虽不能得而累举多者必取无弃则是以官徇人也且累举之士类非少年矣耳目昏塞筋力疲勑而后得数日而计之知其不能有所及也则其为政无所赖矣今有人畜牛羊而求牧既取其壮者又取其老者取其壮者曰吾取其力也取其老者曰吾怜其老也如怜其老而已则曷为以累牛羊哉苟诚以为有遗才焉则今所谓遗逸之书有以收之矣其二使官至于任子者任其子之为后者世世祿仕于朝袭簪绂而守祭祀可以无憾矣然而为是法也则必始于二府法行于贱而屈于贵天下将不服天下不服而求法之行不可得也蓋矫失以救患者必有所过而后济臣非不

知二府之不可以齿庶官也其三使百司各损其职掌而多其出职之歲月其说曰百司臣不得而尽详也请言其尤甚者莫如三司三司之吏世以为多而不可损何也国计重而簿书众也臣以为不然主大计者必执简以御繁以简自处而以繁寄人以简自处则心不可乱心不可乱则利至而必知害至而必察以繁寄人则事有所分事有所分则毫末不移而情伪必见今则不然举四海之大而一毫之用必防于三司故三司者案牒之委也案牒既积则吏不得不多案牒积而吏多则欺之者众虽有大利害不能察也夫天下之财下自郡县而至于转运转相钩较足以为不失矣然世常以转运使为不可独信故必至于三司而后已夫苟转运使之不可独信而必三司之可任则三司未有不责成于吏者岂三司之吏则重于转运使欤故臣以为天下之财其详可分于转运使而使三司歲揽其纲目既使之得优游以治财货之源又可颇损其吏以絕乱法之 苟三司犹可损也而百司可见矣然而此三法者皆世之所谓拂世戾俗召怨而速谤者也今且将行之臣非敢犯众人之怒而行此危事也以为有可行之道焉何者自台省六品诸司五品一郊而任一人自两制以上一歲而任一人此祖宗百年之法相承而不变者也而仁宗之世则损之三載而考绩无罪者迁其官自唐以来亦未有始变者也而英宗之世则增之此二者夫岂便于俗哉然而莫敢怨者以为吏多而欲损者天下之公议其不欲者天下之私计也以私计而怨公议其为怨也不直矣是以善为国者循理而不防怨非不防怨知其无能为也且今此三法者固未尝行也然而天下亦不免于怨何者士之出身为吏者捐其生业弃其田里以勤劳于王事而今也以吏多之故积劳者久而不得迁去职者久而不得调又多为条约以沮格之減罢其举官破坏其考第使之穷窘无聊求进而不遂此其为怨岂減于布衣之士哉钩之二怨皆将不免然使新进之士日益多国力匱竭而不能支十年之后其患必有不可胜言者故臣愿陛下亲断而力行之苟日增之吏渐于衰少则臣又将有以治其旧吏使诸道职司每歲终任其所部郡守监郡各任其属曰自今以前未有以私罪至某赃罪正入已至若干者二者皆自上钩其轻重而裁之已而以它事发则与之同罪虽去官与赦不降也夫以私罪至某赃罪正入已至若干其为恶也着矣而上不察则上之不明亦可知矣故虽与之同罪而不过今世之法任人者任其终身苟其有罪终身钩坐之夫任人之终身任其未然之不可知者也任人之歲终而无过任其已然之可知者也臣请得以较之任其未然之不可知虽圣人有所不能任其已然之可知虽众人能之今也任之以圣人之所不能既不敢辞矣而况任人之所能顾不可哉且按察之吏则亦不患其不知也患其知而未必皆按曰是无损于我而徒以为怨云尔今使其罪及之其势将无所不问陛下诚能择奉公疾恶之臣而使行之陛下厉精而察之去民之患如除腹心之疾则其以私罪至某赃罪正入已至若干者非复过误适防于深文者也苟遂放归终身不齿使奸吏有所惩则冗吏之

可去矣冗兵之说曰臣闻国朝创业之初四方割据中国地狭兵革至少其后荡防诸国拓地既广兵亦随众雍熙之间天下之兵仅三十万方此之时屯戍征讨百役并作而兵力不屈未尝有兵少之患也自咸平景德以来契丹内侵继迁叛逆每有警急将帅不问得失輒请益兵于是召募日增而兵额之多遂倍前世其后宝元庆厯之间元昊窃发复使诸道防民为兵而防边所屯至七八十万自是天下遂以百万为额虽复近歲无事而关中之兵至于二十八万举雍熙天下之众适以备方今关中一隅之用兵多之甚于此见矣然臣闻方今宿边之兵分 堡障战兵统于将帅者其实无几每一见贼贼兵常多我兵常少众寡不敌每战輒败往者将帅失利未有不以此自解者也夫祖宗之兵至少而常若有余今世之兵至多而常患于不足此二者不可不察也兵法有之曰兴师十万出征千里百姓之费公家之奉日费千金内

外骚动怠于道路者七十万家而爱爵禄百金不能知敌之情者不仁之至也故三军之事莫亲于间赏莫重于间间者三军之司命也臣窃惟祖宗用兵至于以少为多而今世用兵至于以多为少得失之原皆出于此何以言之臣闻太祖用李汉超马仁瑀韩令坤贺惟忠何继筠等五人使备契丹用郭进武宋琪李谦溥李继勲等四人备使河东用赵贊姚内斌董遵海王彦升冯继业等五人使备西 皆厚之以关市之征饶之以金帛之赐其家属之在京师者仰给于县官贸易之在道路者不问其商税故此十四人者皆富厚有余其视弃财如弃粪土矧人之急如恐不及是以死力之士贪其金钱捐躯命冒患难深入敌国刺其陰计而效之至于饮食动静无不毕见每有入寇輒先知之故其所备者寡而兵力不分敌之至者举皆无得而有防是以当此之时备边之兵多者不过万人少者五六千以天下之大而三十万兵足为之用今则不然一钱以上皆籍于三司有敢擅用谓之自盜而所谓公使钱多者不过数千緡百须在焉而监司又伺其出入而防之以法至于用间则曰官给茶防夫百余之茶数束之防其不足以易人之死也明矣是以今之为间者皆不足恃听传闻之言采疑似之事其行不过于出境而所问不过于熟户苟有借口以欺其将帅则止矣非有能知敌之至情者也敌之至情既不可得而知故常多屯兵以备不意之患以百万之众而常患于不足由此故也陛下何不权其轻重而计其利害夫关市之征比于茶防则多而三十万人之奉比于万人则约众人知目前之害而不知歲月之病平居不忍弃关市之征以与人至于百万则恬而不知怪昔太祖起于布衣百战以定天下军旅之事其思之也详其计之也熟矣故臣愿陛下复修其成法择任将帅而厚之以财使多间谍之士以为耳目耳目既明虽有强敌而不敢辄近则虽雍熙之兵可以足用于今世陛下诚艰难之臣请陈其可减之实何者今世之强兵莫如防边之土人而今世之惰兵莫如内郡之禁旅其名愈高其廩愈厚其材愈薄往者西边用兵禁军不堪其役死者不可胜计羌人每出闻多禁军輒举手相贺闻多土兵輒相戒不敢犯以实较之土兵一人其材力足以当禁军三人禁军一人其廩给足以贍土兵三人使禁军万人在边其用不能当三千人而常耗三万人之畜边郡之储比于内郡其价不啻数倍以此权之则土兵可益而禁军可损虽三尺童子知其无疑也陛下诚听臣之谋臣请使禁军之在内郡者勿复以戍边因其老死与亡而勿复补使足以为内郡之备而止去之以渐而行之以十年而冗兵之 可去矣冗费之说曰世之冗费不可胜计也请言其大与臣之所知者而陛下以类推之臣闻事有所必至恩有所必穷事至而后谋则害于事恩穷而后迁则伤于恩昔者太祖太宗敦睦九族以先天下方此之时宗室之众无几也是以合族于京邑久而不别世歷五圣而太平百年矣宗室之盛未有过于此时者也禄廩之费多于百官而子孙之众宫室不能受无亲疎之差无贵贱之等自不免于贵贵甚则东南之民倾而赴之赴之者众则将反于贱致贱必以贵致贵必以贱此亦必然之数也故臣愿为此二者与旧法皆立试其利害而较其可否必将有可用者然后举而从之此又去冗费之一端也臣闻富国有道无所不防者富之端也不足防者贫之源也从其可防而収之无所不収则其所存者广矣从其无足防而弃之无所不弃则其所亡者多矣然而世人之议者则不然以为天下之富而顾区区之用此有司之职而非帝王之事也此说之行于天下数百年于兹矣故天下之费其可已者常多于旧臣不敢远引前世请言近歲之事自嘉祐以来圣人迭兴而天下之吏京秩以上再迁其官天下郡守职司再补其亲戚自治平京师之大水与去歲河朔之大震百役并作国有至急之费而郊祀之赏不废于百官自橫山用兵供亿之未定与京师流民劳徠之未息官司困乏日不暇给宗室之防不俟歲月而葬臣以此观之知朝廷有无足防之义臣诚知事之既往无可为者然

苟自今从其可防而収之则无益之费犹可渐减此又去冗费之一端也臣不胜拳拳私忧过计为是三冗之说以献伏惟陛下思深谋远听断详尽于天下之事无所不瞩臣之所陈何足言者然臣愚以为苟三冗未去要之十年之后天下将益衰耗难以复治陛下何不讲求其原而定其方畧择任贤俊而授之以成法使皆从于其官而后责其成绩方今天下之官泛泛乎皆有欲去不从之心侍从之臣逾年而不得代则皇皇而不乐今虽不能使之尽从然至于诸道之职司三司之官吏防边之将生齿以上皆养于县官长而爵之嫁娶防葬无不仰给于上日引月长未有知其所止者此亦事之所必至而恩之所必穷者也然未闻所以谋而迁之古者天子七庙三昭三穆与太祖而七以人子之爱其亲推而上之至于其祖由祖而上至于百世宜无所不爱无所不爱则宜无所不庙苟推其无穷之心则百世之外无非庙而后为称也圣人知其不可故为之制七世之外非有功德则迭毁春秋之际不与莫贵于天子莫尊于天子之祖而庙不加于七何者恩之所不能及也何独至于宗室而不然臣闻三代之间公族有以亲未绝而列于庶人者两汉之法帝之子为王王之庶子犹有为侯者自侯以降则庶子无复爵土盖有去而为民者有自为民而复仕于朝者至唐亦然故臣以为凡今宗室宜以亲疏贵贱为差以次出之使得从仕比于异姓择其可用而试之以渐凡其秩禄之数迁叙之等黜陟之制任子之令与异姓均临之以按察持之以寮吏威之以刑禁以时察之使其不才者不至于害民其贤者有以自效而其不任为吏者则出之于近郡官为廩舍而廩给之使得占田治生与士庶比今聚而养之厚之以不訾之禄尊之以莫贵之爵使其贤者老死鬱鬱而无所施不贤者居诸隘陋戚戚而无以为乐甚非计之得也昔唐武德之初封从昆弟子自胜衣以上皆爵郡王太宗即位疑其不便以问大臣封德彝曰爵命崇则力【缺】多以天下为私奉非至公之法也于是疏属王者降为公夫自王以为公非人情之所乐也而犹且行之今使之爵禄如故而获治民虽有内外之异宜无有怨者然臣观朝廷之议未尝敢有及此何者以宗室之亲而布之于四方惧其啓奸人之心而生意外之变也臣切以为不然古之帝王好疑而多防虽父子兄弟不得尺寸之柄幽囚禁锢齿于匹夫者莫如秦魏然秦魏皆数世而亡其所以亡者刘氏项氏与司马氏而非其宗室也故为国者苟失其道虽胡越之人皆得谋之苟无其衅虽宗室谁敢觊者惟陛下荡然与之无疑使得以次居外如汉唐之故此亦去冗费之一端也臣闻汉唐以来重兵分于四方虽有未大之忧而馈运之劳不至于太甚祖宗受命惩其大患而畧其细故敛重兵而聚之京师根本既强天下承望而服然而转漕之费遂倍于古凡今东南之米每歲遡流而上以石计者至五六百万山林之木尽于舟楫州郡之卒于道路月廩歲给之奉不可胜计往返数千里饥寒困迫每每侵盗杂以它物米之至京师者率非完物矣由此观之今世之法直以其力致之而不计其患非法之良也臣愿更为之法举今每歲所运之数而四分之其二即用旧法官出船与兵而漕之凡皆如旧其一募六道之富人使以其船及人漕之而所过免其商税能以若干至京师而无所欺盗败失者以今三司军大將之赏与之方今濱江之民以其船为官运者不求官直蓋取官之所入而不覆较者得其贏以自润而富民之欲仕者往往求为军大將以此推之宜有应募者其一官自置场而买之京师京师之兵当得米而不愿者计其直以钱偿之夫物有常数取之于南则不足于北舍之于东则有余于西此数之必然而不可逃者也今官欲买之其治佐此皆与天子共成事者也天下之事将责成之而不从其任开其源者不见其流发其谋者不见其成功此事之所以不得成也陛下诚择人而用之使与二府皆从于其官知不得苟免而思长久之计君臣同心上下协力磨之以歲月如此而三冗之一乃可去也然而为此则犹有所患何者今世之士大夫恶同而

好异疾成而喜败事苟不出于已小有齟齬不合则羣起而噪之借如今使按察之官任其属吏歳终而无过此其势必将无所不按得罪者必将多于其旧然则天下之口纷然非之矣不幸而有一不当众将羣指以罪法一不当不能动不幸而至于再三虽上之人亦将不免于惑众人非之于下而朝廷疑之于上攻之者众而持之者不坚则法从此败矣蓋世有耕田而以其耜杀人者或者因以耕田为可废夫杀人之可诛与耕田之不可废此二事也安得以彼而害此哉故夫按人而不以其实者罪之可也而法之是非则不在此苟陛下诚以为可行必先能破天下之浮议使良法不废于中道如此而后三冗之可去也三冗既去天下之财得以日生而无害百姓充足府库盈溢陛下所为而无不成所欲而无不如意举天下之众惟所用之以攻则取以守则固虽有西戎北狄不臣之国宥之则为汉文帝不宥则为唐太宗伸缩进退无不在我今陛下不事其本而先举其末此臣所以大惑也臣不胜愤懣越次言事雷霆之譴无所逃避

宋文鉴卷五十六

卷五十七

钦定四库全书

宋文鉴卷五十七

宋吕祖谦编

奏疏

论吕惠卿 苏辙

臣闻汉武帝世御史大夫张汤挟持巧诈以迎合上意变乱货币崇长犴狱使天下重足而立几至于乱武帝觉悟诛汤而后天下安唐德宗世宰相卢杞妬贤嫉能戕害善类力劝征伐助成暴敛使天下相率叛上至于流播德宗觉悟逐杞而后社稷复存盖小人天赋倾邪安于不义性本陰贼尤喜害人若不死亡终必为患臣伏见前参知政事吕惠卿怀张汤之辨诈兼卢杞之奸凶诡变多端敢行非度见利忘义黷货无厌王安石初任执政用之为腹心安石山野之人彊狠傲诞其于吏事防无所知惠卿指撚教导以济其恶青苗助役议出其手韩琦始言青苗之害先帝知琦朴忠翻然感悟欲退安石而行琦言当时执政皆闻德音安石惶遽自失亦累表乞退天下欣然有息肩之望矣惠卿方为小官自知失势上章乞对力进邪说荧惑圣听巧回天意身为馆殿摄行内侍之职亲往传宣以起安石肆其伪辨以难琦说仍为安石画劫持上下之防大率多用刑狱以震动天下自是诤臣吞声有识防气而天下靡然矣至于排击忠良引用邪党惠卿之力十居八九其后又建手实簿法尺椽寸土检括无遗鸡豚狗彘抄割殆遍专用告讦推析毫毛鞭捶交下纸笔翔贵小民怨苦甚于苗役又因保甲正长给散青苗结甲赴官不遗一户上下骚动不安其生遂致河北人户流移虽上等富家有驱领车牛怀挟金银流入襄邓者旋又兴起大狱以恐胁士人如郑侠王安国之徒仅保首领而去原其害心本欲株连蔓引涂污公卿不止如此独赖先帝天姿仁圣每事裁抑故惠卿不得穷极其恶不然安常守道之士无噍类矣既而惠卿自以赃罪被黜于是力陈边事以中上心其在延安始变军制杂用蕃汉上与冯京异论下与蔡延庆等力争惟党人徐禧助之遂行其说违背物情坏乱边政至今为患西戎无变妄奏警急擅领大众涉入虏境竟不见敌迁延而归糜费资粮弃捐戈甲以巨万计恣行欺防坦若无人立石纪功使西戎晓然知朝廷有吞防灵夏之意自是戎人怨畔邊鄙骚动河陇困竭海内疲劳永乐之败大将徐禧本惠卿自布衣中保荐擢任始终协议遂付边政败声始闻震动宸极循致不豫初实由此边衅一生至今为梗及其移领河东大发人牛耕葭芦吳堡两寨生地扼以重兵方敢布种投种而归不敢复视及至秋成复以重兵防扼刈所得率皆秕稗雨中收获即时腐烂惠卿张皇其数牒转运司交割妄言可罢馈运其实所费不貲而无丝毫之利边臣畏惮皆不敢言此则惠卿立朝事迹一二虽复肆诸市朝不为过矣若其私行峻薄非人所为閭閻下贱有不食其余者安石之于惠卿有卵翼之恩有父师之义方其求进则胶固为一更相汲引以欺朝廷及其权位既均势力相轧反

眼相噬化为讐敌始安石罢相以执政荐惠卿既已得位恐安石复用遂起王安国李士宁之狱以梏其归安石觉之被召即起迭相攻击期致死地安石之党言惠卿使蕲亭知县张若济借豪民朱蕲等钱买田产使舅郑膺请夺民田使僧文捷请夺天竺僧舍朝廷遣蹇周辅推鞠其事犹将具而安石罢去故事不复究案在御史可覆视也惠卿言安石相与为奸发其私书其一日无使齐年知齐年者冯京也京安石皆生于辛酉故谓之齐年先帝犹薄其罪惠卿复发其一日无使上知安石由是得罪夫惠卿与安石出肝肺托妻子平居相结惟恐不深故虽欺君之言见于尺牋不复疑问惠卿方其无事已一一收录以备缓急之用一旦争利遂相挟搤不遗余力必致之死此犬彘之所不为而惠卿为之曾不愧耻天下之士见其在位侧目畏之夫人君用人欲其忠信于己必取仁于父兄信于师友然后付之以事故放麤违命也而推其仁则可以托国食子徇君也而推其忍则至于弑君桀布惟不废彭城之命故高祖知其贤李勣惟不利李密之地故太宗许其义二人终事二主俱为名臣者仁心所存无施不可虽公私有异而忠厚不殊至于吕布事丁原则杀丁原事董卓则杀董卓刘牢之事王恭则反王恭事司马元显则反元显背逆人理世所共疑故吕布见诛于曹公而牢之见杀于桓氏皆以其平生反覆势不可存夫曹桓古之奸雄驾御英豪何所不有然推究利害终畏此人今朝廷选用忠信惟恐不及而置惠卿于其间譬如薰莸杂处枭鸾并栖不惟势不两立兼亦恶者必胜况自去岁以来朝廷废吴居厚吕嘉问蹇周辅朱用臣李宪王中正等或以牟利或以黷兵一事害民皆不得逃谴今惠卿身兼众恶自知罪大而欲以闲地自免天下公议未肯赦之然近日言事之官论奏奸邪至于邓綰李定之徒防细必举而不及惠卿者盖其凶悍猜忍如蝮蝎万一复用睚眦必报是以言者未肯轻发臣愚忝寡虑以为备位言责与元恶同时而畏避隐忍辜负朝廷是以不憚死亡献此愚直伏乞陛下断自圣意畧正典刑纵未以污鉄钺犹当追削官职投畀四裔以御魑魅

请分别邪正 苏辙

臣窃观元祐以来朝廷改更 事屏逐羣枉上有忠厚之政下无聚斂之怨天下虽未大治而经今五年中外帖然莫以为非者惟奸邪失职居外日夜窥伺便利规求复进不免百端游说动摇贵近臣愚窃深忧之若陛下不察其实大臣惑其邪说遂使忠邪杂进于朝以示广大无所不容之意则冰炭同处必至交争薰莸共器从当遗臭朝廷之患自此始矣昔圣人作易内阳外阴内君子外小人则谓之泰内陰外阳内小人外君子则谓之否盖小人不可使在朝廷自古而然矣但当置之于外每加安存无失其所不至愤恨无聊谋害君子则泰卦之本意也昔东晋桓温之乱诸桓亲党布满中外及温死谢安代之为政以三桓分泄三州彼此无怨江左遂安故晋史称安有经远无竞之美然臣切谓谢安之于桓氏亦用之于外而已未尝引之于内与之共政也向使安引桓氏而真诸朝人怀异心各欲自行其志则谢安将不能保其身而况安朝廷乎顷者一二大臣专务含養小人为自便之计既小人内有所主故蔡确邢恕之流敢出妄言以欺愚惑众及确恕被罪有司惩前之失凡在外臣僚例蒙摧沮卢秉何正臣皆身为待制而明堂荐达止得选人蒲宗孟曾布所犯明有典法而降官褫职唯恐不甚明立痕迹以示异同为朝廷斂怨此二者皆过矣故臣以为小人虽决不可任以腹心至于牧守四方奔走庶事各随所长无所偏废宠禄恩赐常使彼此如一无迹可指此朝廷之至计也近者朝廷用邓温伯为翰林承防而台谏杂然进言指为邪党以谓小人必由此彙进臣常论温伯之

为人粗有文艺无他大恶但性本柔弱委曲从人方王珪蔡确用事颺指如意及司马光吕公着当国亦脂韦其间若以其左右附丽无所损益遇流便转缓急不可保信诚不为过也若谓其怀挟奸诈能首为乱阶则甚矣盖台谏之言温伯则过至为朝廷远虑则未为过也故臣愿陛下谨守元祐之初政久而弥坚慎用左右之近臣无杂邪正至于在外臣子以恩意待之使嫌隙无自而生爱戴以忘其死则垂拱无为安意为善愈从帝愈无患矣臣不胜区区博采公议而效之左右伏乞宣谕大臣共敦忠义勿谓不预改更之政輒怀异同之心如此而后朝廷安矣

论省曹寺监法令繁密 苏颂

臣闻在昔帝王之发号出令也必因时而施宜视俗而兴化时朴野则济之以文俗雕伪则示之以质随变所适使民宜之故能从于其道而天下化成质文损益百世可知也国家划五季之 续有唐之绪累圣创制或革或因其道粲然于是大备仁宗皇帝以承平日从事多因循旷然有改作之志故开广言路整缉治纲至于先皇帝遂大有为台阁之务无所不举然而事浸广大法令益繁陛下临御之初深知其故推原先言稍加裁损数年之间讲明备至而法令之繁尚未尽革何以言之先皇帝改定官制本欲宪章百王归于简要而奉行之际羣臣不能究宣上防各务便文字有未详更复立法积久不已遂致滋章故今日之 良由关防伤于太密而画一伤于太烦则难于通融盖省台寺监万务所萃置长立贰承之以僚属所以裁处事务助成至治也苟不任职每事立条事务日新欲以有司之文而尽天下之务虽使臯陶制法萧何造律势不能变况百司所职条目不同而一司之间又有细务或通于此而碍于彼故有求之人不能卒晓遂至纷争或经台省投牒披诉文移往复虚烦取防其可行者百无一二徒长奔竞无益风教夫关防密则有可执文重叠问难小或违戾遂格而不行使有求者抑塞而不舒妄诉者牵制而不断近者陛下特轸宸 将革其 故丁酉诏书分命近臣抽索文案看详防检内有拘文害事不近人情者许并元条删改诏意如此可谓察见事情大慰羣望然而行移弥月取索甚多比至定达上省竟以有碍他条不能尽如诏书之意诚由关防太密之所致耳拘碍如此亦可以谓之 矣诚能少损其文致而济之以忠厚则三代循环之政亦不过此臣愚欲望圣慈特诏近臣遍行取索应省曹寺监用见条制格式仍召集诸司官吏使之反复诘问看详定达可删者删之可改者改之择其要切者着为新令务从简易使便于施用其余令式所不能载者小事则从省曹长官专决大事则禀于朝廷簿书期防悉付众僚催督结絶若官司措置失当及徇私废公致有赴诉并委台察纠案如得实状其当职官吏次第书罚有涉欺妄亦行惩戒如此则台阁规模有宏远之致朝廷法度循简易之规矣

论人才 刘摯

臣窃以为治之道唯知人为难盖善恶者君子小人之分其实义利而已然君子为善非有心于善而惟义所在小人为恶颇能依真以售其伪而欲与善者淆故善与恶虽为君子小人之辨而常至于不明世之人徒见其须臾而不能覆其从也故君子常难进而小人常可以得志此不可不察也恭惟陛下承百年太平履大有为之防寤寐人物不次而用至于今日未见卓有功状可以补国利民仰称诏防而中外颇有疑焉者此何谓也岂所以用之者或未能尽得

其人欵臣且以将命出使者言之其规画法度始皆受之于朝廷也一至于外则大异矣兴利于无可兴革故于不可革州县承望奔命不暇官不得守其职业农不得安其田畝以掊削民财为功以兴起犴狱为材陛下振乏均役之意变而为聚敛之事陛下兴农除害之法变而为烦扰之令守令不敢主民生灵无所赴愬臣以谓此等非必皆其才之罪特其心之所向者不在乎义而已赏之志每在事先公之心每在私后故颠倒缪戾无所不在其能少知治体有爱君之心出忧国之言者皆无以容于其间是故今天下有二人之论有安常习故乐于无事之论有变古更法喜于敢为之论二论各立一彼一此时以此为进退则人以此为去就臣尝求二者之意盖皆有所非乐无事者以为守祖宗成法独可以因人所利据旧而补其偏以驯致于治此其所得也至昧者则苟简怠惰便私胶习而不知变通之权此其所失也喜有为者以谓法烂道穷不大变化则不足以通物而成务此其所是也至凿者则作聪明弃理任智轻肆独用强民以从事此其所非也彼以此为乱常此以彼为流俗畏义者以并进而为可耻嗜利者以守道为无能二势如此士无归趋臣谓此风不可浸长东汉党锢有唐朋党之事盖始于斯在易之象以君子道长小人道消为泰小人道长君子道消为否传曰惟君子为能通天下之志书曰皇建其有极又曰无有作好遵王之道无有作恶遵王之路记曰一道德以同俗又曰舜执其两端用其中于民今天下风俗可谓不同情志可谓未明矣臣愿陛下虚心平听默观万事之变而有以一之其要在乎慎好恶任用而已尔前日意以为是者今求诸非前日意以为短者今取其长稍抑虚哗轻伪志近忘远幸于苟合之人渐察忠厚慎重难进易退可与有为之士抑高举下品制齐量收合过与不及之俗使防通于大中之道然后风俗一险阻平民知所向而忠义之士识上之所好恶无有偏陂莫不奋迅而愿为之用则施設变化惟陛下号令而已臣谓方今之故无大于此惟陛下幸察

论分析助役 刘 摯

臣昨日准圣防批下司农曾布劄子为诘臣所言助役事寻已具分析奏闻去讫臣切以耳目之于人也事物过者必见必闻以赴其心而心必受之未有不信其耳目而反以其能视听为疑者先王以言置官代天子耳目内外相信无以异于一体之相为用也其言虽直必容虽多必受则国家安治不然则反此故谤木谏鼓不设危乱之国鼎鑊斧钺不在圣明之朝恭以陛下躬上圣之德好问乐善凡延见臣下虽贱官小吏必温恭和容以访逮之此尧舜之盛也然至于臣等以职事为言则使之分析者中外皆知非陛下意乃司农挟宠以护改作大臣设法以蔽聪明尔因事献忠敢一言之今天下之势陛下以谓安耶未安耶治耶未治耶苟以为未安未治也则以陛下之睿智言动起居躬蹈德礼夙夜厉精以亲庶政而天下未至于安治者将谁致之陛下即位以来注意责成倚以望太平而自以太平为己任得君专政安石是也三二年开辟动摇举天地之内无一民一物得安其所者盖自青苗之议起而天下始有聚敛之疑青苗之疑未允而均输之法行均输之法方扰而边鄙之谋动边鄙之谋未艾而漳河之役作漳河之害未平而助役之事兴其间又求水利也则民劳而无功又淤田也则费大而不效又省并州县也则诸路莫不彊民以应今又起东西府也则大困财力禁门之侧斧斤不絶者将一年而未已其财议也则商估市井屠贩之人皆召而登政事堂其征利也则下至于厯日而官自鬻之推此而往不可究言古之贤人事君行道必驯致之有渐持久而后成至于设施皆有次序今数十百事交举并作欲以歲月变化天下使者旁午牵合于州县小人挟附佐佑

于中外至于轻用名器混淆贤否忠厚老成者摈之为无能侠少猥辨者取之为可用守道忧国者谓之流俗败常凿民者谓之通变能附已者不次而进之曰吾方擢才不可招者为名而斥之曰吾方行法凡政府谋议所以措置经画除用进退独于一属椽曾布者论定然后落笔同列预闻乃在布后故奔走乞丐者布门如市虽然犹有系国家之体而大于此者祖宗累朝之旧臣则防刻鄙弃去者殆尽国家百年之成法则划除废乱存者无几陛下岂不怪天下所谓贤士大夫比歳相引而去者凡几人矣陛下亦当察此乎去旧臣则势位无有轧已者而权可保也去异已者则凡要路皆可以用门下之人也去旧法则曰今所以制驭天下者是已之所为而陛下必将从任以听其伸缩也嗟夫此事之实也其名则曰革敝而兴治是以陛下乐闲其名而难察其实也夫赏罚号令乃陛下所以砥砺天下又鼓动四方以为劝信者今有人焉能舞公事以倾勲旧构大狱以遂官吏其事是耶乃其职耳何至超任以为职司耶赵济是也又有人焉以渭源田欺罔始既以此得罪而终复以此增秩王韶是也程防事漳水以兴大役困一方而无成功赵子几挟情以违法禁按吏以防民言则皆置而不问乃是赏反施于圣人之所当罚罚不及于王法之所当诛也畿邑之民以助役为诉也陛下圣防令召情愿东明知县以不能禁民有诉而被劾也陛下圣防止令劾擅升户等之事二者皆独断之善政而中书皆格而不下此则陛下之号令不行也西师无功而曰非朝廷之本谋天下但见给军之费辇出于京师空名之诰驰下于西路又命一知制诰于将幕使专代天子之言报复号令络绎于道苟以为非耶何不止之迨其事败则曰非政府谋也损费緡钱以千万计秦晋人之肝脑涂地产军旅之怨结夷狄之衅而不自请咎乃致陛下发中诏以责躬抑徽号而不受忠义之士谁不痛心而疾首至如助役之法臣尝言之矣其条制纖悉臣虽未能究见然臣大意终以谓使天下百姓赋税贷责公私息利之外无故作法升进户等使之防出緡钱皆为人父母爱育養基本之所宜为者故臣谓之聚斂非妄言也陛下任遇辅臣如此其重而致主之术乃用此道是皆大臣之误陛下而大臣所用者误大臣也今既颠谬乖错败乱纲纪知天下之不容惧宸 之回悟以谓虽中外之士畏避无敢言者然其尚敢言者独御史有职尔故又使司农荧惑天听作为偏辞令臣等分析以摧沮风宪之体虽梗言路欲其忧憚苟容而緘默或欲撩其危言从而挤逐不知忠臣节士虽戮辱不惧所以尽事君子之义耳今羗夷之歟未入反侧之兵未安三边疮痍疲溃未瘳河北大旱诸路大水民困财力县官匱竭圣君恭勤思治万方之所知而在辅弼者方欲蔽天聰明使下情不得而上达其何心耶臣愿陛下思祖宗基业之艰难念天下生灵之愁苦少回圣虑收还威柄深恐异时专权肆志将有陛下所不能堪者则必至于亏失君臣之恩是今日養之适所以害之也若夫冯京王珪同列预政皆依违自固不扶颠危虽心悟其罪而无所裒正已之进退又媿媿而不决皆非所谓辅臣之体臣四海之内孤立独进陛下过听任以风宪尝切思之近歳台谏官叠以言事罢免岂其言皆无补于事欤岂皆愿为讦激险直之语以自为名而絜去欤尝以谓欲言政府之事者其譬如治湍瀑之水可以循理而渐道之不可以隄防激鬪而发其怒不惟难攻亦为患滋大故臣自就职以来切慕君子之中道欲其言直而不违于理辞顺而不屈其志庶几愚忠少悟天听而亦不敢倖然如浅丈夫以一言一事轻决去就致圣朝数数逐去言事者而无所裨补思以上全国体而下亦庶几能从其职业而成功名两月之间才十余疏其言及助法者止三疏耳当天下多事之时而臣言简缓又不足以感悟则其负陛下已多矣不意大臣之怒以至如此令臣等分析析之事前代无之祖宗无之近年以来乃为此法以摧言者之气方陛下孜孜听治喜于纳谏而大臣所为则不得正目而视此所以发臣之狂而不能默也伏愿陛下深察事物之变用靖

之治以休生民有所措置以大小缓急为先后之序以义利经权为本末之辨自兹凡有献替于陛下者乞有以诱掖奖励之罢分析之命以尊严朝廷而养多士敢言之气臣不胜惓惓愤懑爱君待罪之心

请重修太学条制 刘 摯

臣窃以学校之制生于教育人才非行法之地也羣贤众聚帅而齐之则诚不可以无法然而法之为学校设者宜有礼义存焉也往歲太学屡起大狱其事一出于诬枉于是有司緣此造为法禁烦苛凝密士之学其间者转身举足輒蹈宪网束湿愈于治狱条目多于防盗上下疑贰求于苟免先王之意礼义科防逝已尽矣法有大可怪者博士诸生禁不相见教谕无所施质问无所从但博士月巡所 之斋而已谓如此则请问者对众足以为证左以防私请以杜贿赂嗟夫学之政令岂不大缪先王意哉私请贿赂如是真可以絕之乎而又斋数不一不可以随经分 也故使之兼巡如周易博士或巡治礼之斋礼学博士复巡治诗之舍往往所至备礼请问相与揖诺至或不交一言而退昔之设学校教養之法师生问对愤悱开发相与曲折反复谆谆善诱蓋其意不如是疎也其道不如是之薄也先王之于天下遇人以长者君子之行而报乎上者斯有礼也遇人以小人犬豕之道则彼将以小人犬豕自为而报乎上者不能有义也况夫学校之间哉太学自置三舍之法寥寥至今未尝应令成就一人岂真无人也主司惩前日之祸畏罪避谤士虽有豪杰防萃之才谁敢题品以人物自任而置之上第哉则是先帝有兴贤造士之美意而有司以法害之也臣愚欲望圣慈详酌罢博士诸生不许相见之禁教诲请益听其在学往还即私有干求馈受自依律勅仍乞先次施行外应太学见行条制委本监长贰与其属看详省其烦密太甚取其可行便于今者有所增损着为科条上礼部再行详定上之三省以听圣断

宋文鉴卷五十七

卷五十八

钦定四库全书

宋文鉴卷五十八

宋 吕祖谦 编

奏疏

请修勅令 刘 摯

臣窃以法者天下之大命也先王制法其意使人易避而难犯故至简至直而足以尽天下之理后世制法唯恐有罪者之或失也故多张纲目而民于是无所措其手足矣世轻世重唯圣人为能变通之祖宗之初法令至约而行之可久其后大较不过十年一变法岂天下之大民物之众事日益滋则法不可以不密欤臣窃以谓非事多而后法密也殆法繁而后奸生也神宗皇帝达因革之妙慎重宪禁元丰中命有司编修勅令凡旧载于勅者多移之于令盖违勅之法重违令之罪轻此足以见神宗皇帝仁厚之德哀矜万方欲宽斯人之所犯恩施甚大也而所司不能究宣主德推广其间乃增多条目离析旧制用一言之偏而立一法因一事之变而生一条其意烦苛其文晦隐不足以该万物之理达天下之情行之几时盖已屡变今所谓续降者每半年一颁每次不减数帙矣夫法者天下之至公也造之而不能通故行之而不能久其理然也又续降多不显言其所冲改故官司州县承用从事参差抵牾本末不应非所谓讲若画一通天下之志者也臣愚以谓宜有所加损润泽之去其繁密合其离散要在简易明白使民有避而知所谓迁善远罪之意伏望圣慈酌时之宜完法之用选择儒臣一二有经术明于治体练达民政者将庆历嘉祐以来旧勅与新勅防照去取略行删正以成一代之典施之无穷

论监司 刘 摯

臣自待罪风宪屡曾以天下监司为言乞澄汰选择诚以朝廷政令使监司得其人则推行布宣可以谕上指而究惠泽苟非其人则所谓徒善而已终于民不得被其利夫上之所好下必有甚朝廷以名实为事行总覈之政而下乃为刻急浅迫之行朝廷以教化为意行宽厚之政而下乃为舒缓苟简之事皆习俗怀利迎意而作故所为近似而非上之意本然也今虽因革之政有殊而观望之俗故在但所迎之意有不同耳其为患一也昨差役之法初行监司已有迎合争先不量可否不校利害一概定差骚动一路者朝廷察其意固已黜之矣推此以观人情大约类此且天下之事散在诸路总制于监司其大者治财赋察官吏平狱讼考疾苦苟使者皆务为和缓宽纵苟于安静则事之委靡不振世之受 不胜言也向来黜责数人者皆以其非法掊敛意在市进虐民甚者亦非欲使之漫然不省其职废所宜治之事谓之宽厚也昧

者不达故矫枉或过其正臣谓此俗不可滋长须要大为之禁伏乞圣慈诏执事申立监司考绩之制以常赋之登耗郡县之勤惰刑狱之当否民俗之休戚为之殿最每岁终以诏诛赏仍自今岁始焉庶几有所隐括裁制之使循良者不入于弛肃给者不入于薄然后上副圣明制治用中之意夫察时之宽猛缓急观俗之过与不及而张弛其政正今日事也取进止

论王中正李宪宋用臣石得一 刘 摯

臣切以陛下临御以来运动政机以时弛张述成先帝制法立法之意使光昭于天下利兴害除四方鼓舞至于清明朝廷分别邪正斥远奸佞锄去彊梗皆妙虑神断优游闲暇不出于喜怒不见于言色而天下之善恶已辨是非已正矣何其盛欤然于此时臣切怪天地之和气尚或未应忠臣义士之论尚或未平此其故何也臣尝究之盖天下之元恶犹有稽诛天下之大奸犹有漏网而国法犹有未正此中外所以犹未厌也国之失政莫大于使奸恶幸而免今论其大者则前日之四三宦是也臣待罪风宪虽知触权幸言出而患入然臣有言责贪报恩遇则何防乎身之危哉谨为陛下言之王中正元丰四年将王师二十万由河东入界计其随军赍运役兵民夫通数十百万众矣中正徘徊于境上殆半月而后翱翔乎疆外顿沙漠而不进公违诏书不赴兴灵防师之约天寒大雪士卒饥冻坐使物故十之七八古之将帅固有无功而还者犹然当保完师旅归报于国今精兵劲骑一无所施自取狼狽死亡殆尽按之军法宜即显诛中正略不自劾请罪而先帝以天地之量无所谴何又遣使赐予问劳然后中正徐徐求闲局厚俸自佚而去此国法未正者一也李宪之于熙河贪功生事一出欺罔朝廷之威福柄令持于其手官吏之废置用舍出于其口监司帅守而下事宪也如父兄而宪之顾指气役之也如奴 县官财用听其取与内之府库金帛转输万里外之生灵膏血渔敛百端倾之于宪如委诸壑出没吞吐神鬼莫见而一切不防于有司兴灵之役宪首违戒约避防师之期乃顿兵以城兰州遗患今日及永乐之围宪又逗遛不急赴援使数十万众肝脑涂地罪盈恶贯不失于总兵一路此国法不正者二也宋用臣奋其私智以事诛求权夺小民衣食之路琐细毫末无所不为使盛朝之政几甚于 唐除陌间架搨地之事伤污国体不防怨讟其出入将命捷若风火务以巧中取悦事无不谐动画密防故擅作威福侵凌官司冒昧货财更无按籍都城为之憔悴商旅所以不行疮痍蠹害至今殫然而莫能理然亦不失享禄于善地此国法不正者三也石得一领皇城司夫皇城司之有探逻也本欲知军事之机密与夫人奸恶之隐匿者而得一以残刻之资为罗织之事纵遣伺察者所在綦布张弮而设网家至而户致以无为有以虚为实上之朝士大夫下之富家小人飞语朝上而暮入于狴犴矣有司无古人持平守正之心以谓是诏狱也成之则有功反之则有罪故凌辱捶讯惨毒备至无所求而不得无所问而不承被其阴害不可胜数于是上下之人其情惴惴朝夕不敢自保而相顾以目者殆十年皆得一发之今不失厚俸安坐此国法不正者四也是四人者权势锋焰震灼中外毒流于民怨归于国宰相执政知而不以告于上谏官御史惧而不敢论其非幸而出于圣人在上之时以先帝神武英气镇压其奸不然其为祸患岂不若汉唐之宦官哉以尧之圣不免四凶之在朝至舜起而后诛投之孔子为鲁司寇七日而诛少正卯然先帝未及肆其诛于市朝而以遗陛下陛下所宜以舜之事自任今阅岁时尚不闻以典刑诏有司臣未谕也伏乞圣慈以臣章付外议正四罪暴之天下而窜之以明国宪以服天下谨具弹劾以闻

论新法进流民图 郑侠

臣伏觀去年大蝗秋冬亢旱以至于今经春不雨麦苗焦枯黍粟麻豆粒不及种旬日来街市米价暴贵羣情忧惶十九惧死方春斩伐竭泽而渔大营官钱小求升米草木鱼鳖亦莫生遂蛮夷轻肆敢侮中国皆由中外之臣辅相陛下不以道以至于此臣切惟灾患有可召之道无可试之形其致之有渐而来如疾风暴雨不可复御流血籍尸方知防败此愚夫庸人之见而古今比比有之所贵于圣神者为其能图患未然而转祸为福者也方今之势犹有可救臣愿陛下开仓廩赈贫乏诸有司敛掠不道之政一切罢去庶防早召和气上应天心调陰阳降雨露以延天下万姓垂死之命而固宗社万万年无疆之祉君臣际遇贵乎知心以臣之愚深知陛下养爱黎庶甚于赤子故自即位以来一有利民便物之政靡不毅然主张而行陛下之心亦欲其人人寿富而跻之尧舜三代之盛耳夫岂区区充满府库盈溢仓廩终以富衍彊大胜天下哉而中外之臣略不推明陛下此心而乃肆其叨憤剗割生民侵肌及骨使之困苦而不聊生坐视天民之死而不防夫陛下所存如彼羣臣所为如此不知君臣际遇欲作何事徒只日超百资意指气使而已乎臣又惟何世而无忠义何代而无贤德亦在乎人君所以驾御之如何耳古之人在山林畎亩不忘其君其刍蕘负贩匹夫匹妇咸欲自尽以赞其上陛下之朝台諫默默具位而不敢言事至有规避百为不敢居是职者而左右辅弼之臣又皆贪猥近利使夫抱道怀识之士皆不欲与之言不知时然耶陛下以使之然耶以为时然则尧舜在位便有防契汤文在上便有伊吕以至汉唐之明君我祖宗之圣朝皆有大忠义大贤德之臣而在中外君臣之际共腹心手足然君唱于上臣和于下主发于内臣应于外而休嘉之德下浸于昆虫草木千百世之下莫不欣慕而效则之独陛下以仁圣当御抚养为心而羣臣所以应和之者如此夫非时然抑陛下所以驾馭之道未审尔陛下以爵禄驾馭天下忠贤而使之如此甚非宗庙社稷之福也夫得一饭于道傍则遑遑图报而终身餒饱于其父则不知德此庸人之常情也今之食禄往往如此若臣所闻则不然君臣之义父子之道也故食其禄则忧其事凡以移事父之孝而从事于此也若乃思虑不出其位尸祝不越樽俎治庖人之事牛羊茁壮会计当各以其职而不相侵也至于邦国若否知无不言岂有君忧国危羣臣乃饱食餒观若视路人之事而不救曰吾各有守天下之事非我忧哉故知朝廷设官位有高下臣子事上忠无两心与其得罪于有司孰与不忠于君父与其苟容于当世孰与得罪于皇天臣所以不避万死冒千万重之天阍以告诉于陛下者凡以上畏天命中忧君国而下忧生民耳若臣之身使其粉碎如一蝼蚁无足顾爱臣切闻南征西伐者皆以其胜捷之势山川之形为图而来献料无一人以天下之民质妻卖儿流离逃散斩桑伐枣拆坏庐舍而卖于城市输官输粟遑遑不给之状为图而献前者臣不敢以所闻谨以安上门逐日所见续成一图百不及一但经圣明眼目已可嗟咨涕泣而况数千里之外有甚于此者哉其图谨附状投进如陛下观图行臣之言十日不雨即乞斩臣宣德门外以正欺君慢天之罪如稍有所济亦乞正臣越分言事之刑甘俟诛戮

论李宪 邓润甫

伏见朝廷以熙河路鬼章为寇遣内侍省押班李宪往以秦鳳熙河路计议措置边事司为名中外之论皆为宪虽名计议措置边事而军前诸将皆受宪节制其实大帅然自诗书以降迄

于秦汉魏周隋上下数千载间不闻有以中人为帅将者此其故何也势有所不便也盖有功则负恃骄恣陵轹公卿何所忌憚无功则挫损国威博笑四夷非细事也唐自睿宗以来未尝以将帅属中人至明皇承平日久志大事奢稍委近习防南安蛮渠梅叔鸾叛而杨思勉请行遂许之然犹以光楚客为大都防及覃行章乱黔中始以思勉为招讨使虽有禽灭丑虏之功而唐之祸萌于此矣及代宗用鱼朝恩拒史思明讨仆固防而恃功【缺】命几危社稷倚元载除之寒心者数月以程元振判【缺】帅行军司马权震天下元勲故老皆见斥逐洎犬戎【缺】侵集天下兵无只轮入關者此皆已然之效也至害【缺】时王承宗叛以吐突承璀为行营招讨处置使谏官李鄲许孟容吕元膺段平仲白居易等众对延英谓苦【缺】中人位大帅恐为四方笑乃更为招讨宣慰使而承璀卒以无功轻谋币赋得罪及后世区区踵其故迹而唐之祸有不可胜言者其源盖起于开元也今陛下更易百度未尝以先王为法而忽降诏命以中人为帅缙绅士大夫皆莫知所谓夫以陛下之仁圣神武驾驭豪杰虽宪百輩臣等知其无能为也然陛下独不长念郤虑为万世之计乎使后世沿袭故迹徇以为常进用中人掌握兵柄则天下之患又将不可胜言者矣陛下其忍袭开元故迹而忘天下之患乎方今虽乏人然文武之士布满中外岂无一人可以任陛下边事宪出入近密荷国宠荣诏下之日大臣不敢言小臣不敢议臣等代匱宪府以言为职故敢尽其狂愚

代彭思永论濮王典礼 程頤

伏见近日以濮王称亲事言事之臣奏章交上中外论议沸腾此盖执政大臣违乱典礼左右之臣不能开陈理道而致陛下圣心疑惑大义未明臣待罪宪府不得不为陛下明辨其事窃以濮王之生陛下而仁宗皇帝以陛下为嗣承祖宗大统则仁庙陛下之皇考陛下仁庙之适子濮王陛下所生之父于属为伯陛下濮王出继之子于属为侄此天地大义生人大伦如乾坤定位不可得而变易者也固非人意所能推移苟乱大伦人理灭矣陛下仁庙之子则曰父曰考曰亲乃仁庙也若更称濮王为亲是有二亲则是非之理昭然自明不待辩论而后见也然而圣意必欲称之者岂非陛下大孝之心义虽出继情厚本宗以濮王是生圣躬曰伯则无以异于诸父称王则不殊于臣列思有以尊大德絕其等伦如此而已此岂陛下之私心哉盖大义所当典礼之正天下之公论而执政大臣不能将顺陛下大孝之心不知尊崇之道乃以非礼不正之号上累濮王致陛下于有过之地失天下之心貽乱伦之咎言事之臣又不能详据典礼开明大义虽知称亲之非而不知为陛下推所生之至恩明尊崇之正礼使濮王与诸父夷等无有殊别此陛下之心所以难安而重违也臣以为所生之父至尊至大虽当专意于正统岂得尽絕于私恩故所继主于大义所生存乎至情至诚一心尽父子之道大义也不忘本宗尽其恩义至情也先王制礼本緣人情既明大义以正统绪复存至情以尽人心是故在防服恩义别其所生盖明至重与伯叔不同也此乃人情之顺义理之正行于父母之前亦无嫌间至于名称统绪所系若其无别斯乱大伦今濮王陛下之所生义极尊重无以复加以亲为称有损无益何哉亲与父同而所以不称父者陛下以身继大统仁庙父也在于人伦不可有贰故避父而称亲则是陛下明知称父为决不可也既避父而称亲则是亲与父异此乃下人以邪說惑陛下言亲义非一不止谓父臣以谓取父义则与称父正同决然不可不取父义则其称甚轻今宗室疎远卑防悉称皇亲加于所生深恐非当孝者以诚为本乃以疑似无正定之名黷于所尊体属不恭义有大害称之于仁庙乃有向背之嫌去之于濮王不损所生之

重絕无小益徒乱大伦臣料陛下之意不必须要称亲止为不加殊名无以别于臣列臣以为不然推所生之义则不臣自明尽致恭之礼则其尊可见况当揆量事体别立殊称要在得尽尊崇不愆礼典言者皆欲以高官大国加于濮王此甚非知礼之言也先朝之封岂陛下之敢易爵秩之命岂陛下之敢加臣以为当以濮王之子袭爵奉祀尊称濮王为濮国太王如此则复然殊号絕异等伦凡百礼数必皆称情请举一以为率借如既置嗣袭必伸祭告当日侄嗣皇帝名敢昭告于皇伯父濮国太王自然在濮王极尊崇之道于仁皇无嫌贰之失天理人心诚为允合不独正今日之事可以为万世之法复恐议者以太字为疑此则不然盖系于濮国下自于大统无嫌今亲之称大义未安言事者论别不已前者既去后者复然虽使台臣不言百官在位亦非继进理不可夺势不可遏事体如此终难固持仁宗皇帝在位日久海防亿兆涵被仁恩陛下嗣位之初功德未及天下而天下倾心爱戴者以陛下仁庙之子也今复闻以濮王为亲含生之类发愤痛心盖天下不知陛下之孝事仁宗皇帝格于天地尊爱濮王之意非肯以不义加之但见误致名称所以深怀疑虑谓濮王既复称亲则仁庙不言自絕羣情汹惧异论喧嚣夫王者之孝在乎得四海之欢心胡为以不正无益之称使亿兆之口指斥谤讟致濮王之灵不安于上臣料陛下仁孝岂忍如斯皆由左右之臣不能为陛下开明此理在于神道不远人情故先圣谓事死如事生事亡如事存设如仁皇在位濮王居藩陛下既为冢嗣复以亲称濮王则仁皇岂不震怒濮王岂不侧惧是必君臣兄弟立致衅隙其视陛下当如何也神灵如在亦岂不然以此观之陛下虽加名称濮王安肯当受伏愿陛下深思此理去称亲之文以明示天下则祖宗濮王之灵交驩于上皆当垂祐陛下享福无穷率土之心翕然慰悦天下化德人伦自正大孝之名光于万世矣夫奸邪之人希恩固宠自为身谋害义伤孝以陷陛下今既公论如此不无徊徨百计搜求务为巧饰欺罔圣听枝梧言者徼冀得已尚图自安正言未省而巧辩已至使陛下之心无由而悟伏乞将臣此章省览数遍裁自宸 无使奸人与议其指心用意排拒人言隐迹藏形陰賛陛下者皆奸人也幸陛下察而辨之勿用其說则自然圣心开悟至理明白天下不胜大愿

论经筵事 程頤

臣伏觀自古人君守成而致盛治者莫如周成王成王之所以成德由周公之辅养昔者周公传一作辅成王防而习之所见必正事所闻必正言左右前后皆正人故习与智长化与心成今士大夫家善教子弟者亦必延名德端方之士与之居处使之薰染成性故曰少成若天性习惯如自然伏以皇帝陛下春秋之富【缺】圣之资得于天稟而辅养之道不可不至所谓辅养之道非谓告诏以言过而后谏也在涵养薰陶而已大凡一日之中接贤士大夫之时多亲寺人宫女之时少则自然气质变化德器成就臣欲乞朝廷慎选贤德之人以侍劝讲讲读既罢常留二人直日夜则一人直宿以备访问皇帝读习之暇游息之间时于内殿召见从容宴语不独渐磨道义至于人情物态稼穡艰难积久自然通达比之常在深宫之中为益岂不甚大窃闻间日一开经筵讲读数行羣官列侍俨然而退情意略不相接如此而责辅养之功不亦难乎今主上冲防太皇太后慈爱亦未敢便乞频出但时见讲官久则自然接熟大抵与近习处久熟则生防慢与贤士大夫处久熟则生爱敬此所以养成圣德为宗社生灵之福天下之事无急于此取进止

又论经筵事 程颢

臣闻三代之时人君必有师傅保之官师道之教训傅傅其德义保保其身体后世作事无本知求治而不知正君知规过而不知养德傅德义之道固已疎矣保身体之法无复闻焉伏惟太皇太后陛下聪明睿哲超越前古皇帝陛下春秋之富辅养之道当法先王臣以为傅德义者在乎防见闻之非节嗜好之过保身体者在乎适起居之宜存畏惧之心臣欲乞皇帝左右扶侍祇应宫人内臣并选年四十五已上厚重小心之人服用器玩皆须质朴应华巧奢丽之物不得至于上前要在侈丽之物不接于目浅俗之言不入于耳及乞择内臣十人充经筵祇应以俟候皇帝起居凡动息必使经筵官知之有翦桐之戏则随事箴规违持养之方则应时谏止调防圣躬莫过于此取进止

又论经筵事 程颢

臣窃以人主居崇高之位持威福之柄百官畏摄莫敢仰视万方承奉所欲随得苟非知道畏义所养如此其惑可知中常之君无不骄肆英明之主自然满假此自古同患治乱所系也故周公告成王称前王之德以寅畏祇惧为首从古已来未有不尊贤畏相而能成其圣者也皇帝陛下未亲庶政方专问学臣以为辅养圣德莫先寅恭动容周旋当主于此歲月积习自成圣性臣切闻经筵臣寮侍者皆坐而讲者独立于礼为悖欲乞今后特令坐讲乃与义理为顺所以养主上尊儒重道之心取进止

论开乐御宴 程颢

臣伏覩有司排备开乐御宴臣备员劝讲职在以经义辅道人主事有害义不敢不言夫居防用防礼除防用吉礼因事而行乃常道也今若为开乐张宴则是特为一喜庆之事失礼意害人情无大于此虽曰故事祖宗亦不尽行或以故而罢或因事而行臣愚窃恐祖宗之意亦未安故也自古太平日久则礼乐纯备盖讲求损益而渐至尔虽祖宗故事固有不可改者有当随事损益者若以为皆不可改则是昔所未遑今不得复作前所未安后不得复正朝廷之事更无损益之理得为是乎况先朝美事亦何尝必行臣前日所言殿上讲說是也故事未安则守而不敢臣前日所言冬至受表贺是也臣前后累进狂言未常得防采用而言之不已者盖职之所当不敢旷废伏望圣慈特赐听纳自中降防罢开乐宴直候因事而用于义为安

上太皇太后书 程颢

臣愚鄙之人自少不喜进取以读书求道为事于兹防三十年矣当英宗朝暨神宗之初屡为当涂者称荐臣于斯时自顾学之不足不愿仕也及皇帝陛下嗣位太皇太后陛下临朝求贤愿治大臣上体圣意搜扬岩穴首及微贱防恩除西京学官臣于斯时未有意于仕也辞避方再而遽有召命臣门下学者促臣行者半劝臣勿行者半促臣行者则曰君命召礼不俟驾劝臣勿行者则曰古之儒者召之则不往臣以为召而不往惟子思孟轲则可盖二人者处賓师之位不往所以规其君也已之微贱食土之毛而为王民召而不至邦有常宪是以奔走应命

到阙防恩授馆职方以义辞遂防召对臣于斯时尚未有意于仕也进至帘前咫尺天光未尝敢以一言及朝政陛下视臣岂求进者哉既而亲奉德音擢置经筵事出望外惘然惊惕臣切内思儒者得以道学辅人主盖非常之遇使臣自择所处亦无过于此矣臣于斯时虽以不才而辞然许国之心实已萌矣尚虑陛下贪贤乐善果于取人知之或未审也故又进其狂言以觐详察曰如小有可用则敢不就职或狂妄无取则乞听辞避草再上再命祇受是陛下不以为妄也臣于是受命供职而来夙夜毕精竭虑惟欲主上德如尧舜异日天下享尧舜之治庙社固无穷之基乃臣之心也臣本山野之人禀性朴直言辞鄙拙则有之矣至于爱君之心事君之礼告君之道敢有不尽上赖圣明可以照鉴臣自惟至愚防陛下特达之知遭遇如此愿效区区之诚庶防毫髮之补惟陛下留意省览不胜幸甚伏以太皇太后陛下心存至公躬行大道开纳忠信委用耆德不止维持大业且欲兴致太平前代英主所不及也但能日慎一日天下之事不足虑也臣以为今日至大至急为宗社生灵久长之计惟是辅养上德而已歷观前古辅养防主之道莫备于周公周公足为万世之法也臣愿陛下扩高世之见以圣人之言为可必信先王之道为可必行勿狃滞于近规勿迁惑于众口古人所谓周公岂欺我哉周公作立政之书举言常伯常任至于缀衣虎贲以为知恤者鲜一篇之中丁宁重复惟在此一事而已书又曰仆臣正厥后克正又曰后德惟臣不德惟臣又曰侍御仆从罔匪正人以旦夕承弼厥辟出入起居罔有不钦是古人之意人主跬步不可离正人也盖所以涵养气质薰陶德性故能习与智长化与心成后世不复知此以为人主就学所以涉书史览古今也不知涉书史览古今乃一端尔若止于如是则能文宫人可备劝讲知书内侍可充辅道何用置官设职精求贤德哉大抵人主受天之命禀赋自殊歷考前史帝王才质鲜不过人然而完德有道之君至少其故何哉皆辅养不得其道而位势使之然也伏惟皇帝陛下天资粹美德性仁厚必为有宋令主但恨辅养之道有未至尔臣供职已来六侍讲筵但见诸臣拱手默坐当讲者立案傍解释数行而退如此虽弥年积歲所益防何与周公辅成王之道殊不同矣或以为主上方防且当如此此不知本之论也古人生子能食能言而教之大学之法以豫为先人之防也知思未有所至便当以格言至论日陈于前虽未晓知且当薰聒使盈耳充腹久自安习若固有之虽以他言惑之不能入也若为之不豫及乎稍长私意一作思虑偏好生于内众口辩言铄于外欲其纯完不可得也故所急在先入岂有太早者乎或又以为主上天资至美自无违道不须过虑此尤非至论夫圣莫圣于舜而禹臯陶未尝忘规戒至曰无若丹朱好慢游作傲虐且舜之不为慢游傲虐虽至愚亦当知之岂禹而不知乎盖处崇高之位儆戒之道不得不如是也且人心岂有常哉以唐太宗之英睿躬歷艰难力平祸乱年亦长矣始恶隋炀侈丽毁其层观广殿不六七年复欲治干阳殿是人心果可常乎所以圣贤虽明盛之际不废规戒为虑岂不深远也哉况冲防之君闲邪拂违之道可少懈乎伏自四月末间以盛暑罢讲比至中秋盖逾三月古人欲旦夕承弼出入起居而今乃三月不一见儒臣何其与古人之意异也今士大夫家子弟亦不肯使经时累月不亲儒士初秋渐凉臣欲乞于内殿或后苑清凉处召见当日讲官俾陈說道义纵然未有深益亦使天下知太皇太后用意如此又一人独对与众见不同自然情意易通不三五次便当习熟若不如此渐致待其自然是辅道官都不为力将安用之将来伏假既开且乞依旧轮次直日所贵常得一员独对开发之道盖自有方朋习之益最为至切故周公辅成王使伯禽与之处圣人所为必无不当真庙使蔡伯希侍仁宗乃师古也臣欲乞择臣僚家子弟十歲以上十二已下端谨穎悟者三人侍上左右上所读之书亦使读之辨色则入昏而罢归当令二人侍一人更休每人择有年宫人内臣随逐看承不得暂离

常情笑语亦勿禁止唯须言语必正举动必庄仍使日至资善堂呈所习业讲官常加教勒使知严惮年才十三便令罢去歲月之间自觉其益自来宰臣十日一至经筵亦止于默坐而已又间日讲读则史官一人立侍史官之职言动必书施于视政时则可经筵讲肄之所乃燕处也主上方问学之初宜心泰体舒乃能悦悻今则前对大臣动虞有失旁立史官言出輒书使上欲游其志得乎欲发于言敢乎深妨问学不得不改欲乞特降指挥宰臣一月两次与文彦博同赴经筵遇宰臣赴日即乞就崇政殿讲說因令史官入侍崇政殿說书之职置来已久乃是讲說之所汉唐命儒士讲论亦多在殿上盖故事也迺英殿迫狭讲读官内臣近三十人在其中四月间尚未甚热而讲官已流汗况主上气体嫩弱岂得为便春夏之际人气蒸薄深可虑也祖宗之时偶然在彼执为典故殊无义理欲乞今后只于延和殿讲读后楹垂帘帘前置御座太皇太后每遇政事稀简圣体康和时至帘下观讲官进說不惟省察主上进业于陛下圣聪未必无补兼讲官辅道之间事意不少有当奏禀便得上闻亦不可烦劳圣躬限以日数但旬月之间意适则往可也今讲读官共五人四人皆兼要职独臣不领别官近复差修国子监太学条制是亦兼它职也乃无一人专职辅道者执政之意可见也盖惜人材不欲使之闲尔又以为虽兼它职不妨讲读此尤不思之甚也不敢言告君之道只以告众人言之夫告于人者非积其诚意不能感而入也圣人以蒲卢喻教谓以诚化之也今夫钟怒而击之则武悲而击之则哀诚意之感而入也告于人亦如是古人所以斋戒而告君者何谓也臣前后两得进讲未尝敢不宿斋豫戒潜思存诚觐感动于上心若使营营于职事纷纷其思虑待至上前然后善其辞說徒以颊舌感人不亦浅乎此理非知学者不能晓也道衰学废世俗何尝闻此虽闻之必以为诞陛下高识远见当防鉴知以朝廷之大人主之重置二三臣专职辅道极非过当今诸臣所兼皆要官若未能遽罢且乞免臣修国子监条制俾臣夙夜精思竭诚专在辅道不惟事理当然且使天下知朝廷以为重事不以为闲所也陛下擢臣于草野之中盖以其读圣人书闻圣人道臣敢不以所学上报圣明窃以圣人之学不传久矣臣幸得之于遗经不自度量以身任道天下骇笑者虽多而近年信从者亦众方将区区驾其說以示学者觐能传于后世不虞天幸之至得备讲說于人主之侧使臣得以圣人之学上沃圣聪则圣人之道有可行之望岂特臣之幸哉如陛下未以臣言为信何不一赐访问臣当陈圣学之端绪发至道之渊微陛下圣鉴高明必防照纳如其妄伪愿从诛殛臣愚不任恳悃惶惧待罪之至

卷五十九

钦定四库全书

宋文鉴卷五十九

宋吕祖谦编

奏疏

论农事 范祖禹

臣近防赐告暂至许昌窃见畿内已苦雨涝询之村民皆云乡村安静公私少事无呼召烦扰唯是年歲未得丰熟不旱则水民常艰食夏麦既薄或全不收秋苗虽茂唯忧涝损臣窃惟陛下哀矜百姓賑恤鰥寡德泽所及可谓至厚然犹和气未应陰阳隔并欲修政事以应之愿陛下推其心而已矣夫天道不远在君心所以感之人君爱民则天亦爱人君爱民者知其劳苦而恤其困穷天下之人至劳苦而常困穷者农民是也周公作无逸戒成王以先知稼穡之艰难又言商之逸王不知稼穡之艰难不闻小人之劳唯耽乐之从夫稼穡之艰难与小人之劳人君不可以不知天生时而地生财自一粒一缕以上皆出于民力然后人得而用人臣之禄受之于君故不可不报君人君之奉取之于民故不可不爱民天子者合天下之力而共尊之凡宫室车马服食器用无非取于天下皆百姓之膏血也其作之也甚劳其成之也甚难安而享之不可不思其所从来思其所从来则爱之而有不忍赍财之心忧之而有不忍劳民之心以此之心行此之政而天下不安者未之有也天下之大生民之众唯系于一人之心君心静则天下静君心不静则天下亦不静唯朝廷躬俭节用无所营为常恐烦百姓则天下安息先王岂能人人而食之人人而衣之哉推其仁心修其仁政以及天下则所被者广矣臣愿陛下当食则思天下有饥而不得食者当衣则思天下有寒而不得衣者凡于每事莫不皆然唯推至诚以召和气庶防皇天报应降丰年之祥使百姓皆家给人足则太平矣昔汉昭帝耕于钩盾防田其事至微史臣书之盖以昭帝欲知稼穡之艰难与周公戒成王之意同也周世宗留心农事常刻木为耕夫蚕妇置之殿庭欲见之而不忘国朝祖宗以来尤重农穡太宗尝谓近臣曰耕耘之夫最可矜悯春蚕既登并功纺绩而缁帛不及其身田禾大穗充其腹者不过防粃若风雨乖候稼穡不登将如之何真宗于内殿植稻麦临观种获欲知田亩之劳至今遵之惟陛下深留意于农政而常以保惠小民为先则天下幸甚

论明堂 范祖禹

臣伏见明堂大礼已在散斋恭惟仁宗皇帝若稽古典断以圣意自皇祐二年始制明堂之礼先诏有司乘輿服御务从简俭无枉劳费御撰乐曲舞名服靴袍崇政殿阅试雅乐如行礼之次又于禁中靴袍亲书明堂及明堂之门二榜将近祀日霖雨不止仁宗禁中斋祷极于恭防

应禱开霁天日清润风和气协祀前之夕即罢警严仁宗每詣神座行礼毕鞠躬却行须尽褥位方改步移向以示肃恭之至又令侍臣徧谕献官及进彻俎豆悉安徐谨严无怠遽失恭质明礼毕比之他时行礼加数刻之缓御楼宣赦毕降诏中书门下止絶请托应内降恩泽及原减罪犯者不得施行仁宗钦崇禋祀布诏明德传之万世大略如此英宗神宗圣孝遵承皆极严敬今陛下嗣位五载再举宗祀上帝顾飡神考配侑国之大事莫重于此惟陛下内尽诚敬法则祖宗则神天降祉羣生防福夫斋者所以致其精明之德孔子之所慎者斋斋必有专一精絜之诚乃可以交于神礼之言斋曰心不苟虑必依于道手足不苟动必依于礼古之君子其斋三日必见其所祭者诚之至也夫惟致斋肃恭然后动容周旋无不中礼曰皇天无亲克敬惟亲鬼神无常享享于克诚夫皇天惟亲至敬鬼神惟享至诚天人之交相去不远惟诚与敬可以感通陛下躬行于上则百官有司莫敢不祗肃于下经曰圣人之德无以加于孝惟陛下恭防祀事以教天下之孝使羣臣万国瞻望盛德休光臣不胜拳拳之愚

论立后上太皇太后 范祖禹

臣伏奉诏防皇帝纳后六礼令翰林学士御史中丞两省给舍与礼部太常寺官同共详议臣窃伏思此国家大事万世之始福祚所系风化所先自古圣王重之今陛下宜先知者有四不可不慎也臣谨稽之上古防之后世为陛下悉数而详言之一曰族姓二曰女德三曰隆礼四曰博议所谓族姓者臣闻古之帝王所与为婚姻者必大国诸侯先圣王之后勲贤之裔不然则甥舅之国也不以微贱上敌至尊故其福祚盛大子孙蕃昌昔者黄帝娶于西陵之女是为嫫祖为黄帝正妃其子孙皆有天下五帝三王皆黄帝之后也高辛娶陈锋氏之女是生帝尧虞舜娶帝尧之二女厘降于妫汭遂有天下大禹娶于涂山是生夏啓天下归之子孙享国四百七十余年成汤娶于有莘氏子孙有天下六百余年周之先祖后稷生于姜嫄世有贤妃太王娶太姜是生王季王季娶太任是生文王文王娶太姒其礼尤盛大雅歌之曰文王初载天作之合言文王之初有识天已生贤女为之配也又曰大邦有子侃天之妹文定厥祥亲迎于渭造舟为梁不显其光自古昏礼未有如文王之盛也太姜炎帝之后也太任太昊之后也太姒大禹之后也太姒生十子武王周公皆圣人也其余皆为显诸侯周之子孙徧于天下太姒之德也诗人美文王之圣本由太任其诗曰思齐太任文王之母思媚周姜京室之妇太姒嗣徽音则百斯男又曰刑于寡妻至于兄弟以御于家邦言文王之化自家及国以正天下也周南關雎后妃之德人伦之始风化天下皆美太任太姒也武王亦娶于姜是生成王周有天下三十余世八百余年其基本盖由此也故族姓不可不贵所谓女德者臣闻礼本夫妇诗始后妃治乱因之兴亡系焉三代之兴皆有贤妃其亡也有孽女夏之兴也以涂山其亡也以末喜商之兴也以有娥其亡也以妲己周之兴也以姜嫄其亡也以褒姒此皆圣贤所纪诗书所载垂之后世以为永鉴者也秦汉以后昏姻多不正无足取法惟后汉显宗明德马后唐太宗文德长孙后宪宗懿安郭后皆有后德出于勲贤之家其余败乱足以为戒而已恭惟本朝太祖皇帝以来家道正而人伦明歷世皆有圣后内德之助自三代以后未有如本朝家法也皇帝圣德明茂睿质纯粹天监在下必生圣女以佑皇家惟陛下远观上古近鉴后世上思天地宗庙之奉下为万世子孙之计选卜窈窕以母仪万国表正六宫非有德孰可以当之然闺门之德不可着见必视其世族观其祖考察其家风参以庶事亦可知也昔汉之初大臣议欲立高帝子齐王皆曰王母家驷钧恶戾虎而冠者也代王母家薄氏君子长者乃立代王是为文帝

为汉之贤主亦由其母家仁善也故女德不可不先所谓隆礼者臣闻天子之与后犹天之与地日之与月陰之与阳相须而后成者也礼曰天子听男教后听女顺天子理阳道后治陰德教顺成俗内外和顺国家理治此之谓盛德又曰天子修男教父道也后修女顺母道也孔子对鲁哀公曰古之为政爱人为大所以治爱人礼为大所以治礼敬为大敬之至矣大昏为大大昏至矣大昏既至冕而亲迎亲之也是故君子兴敬为亲舍敬是遗亲也弗爱不亲弗敬不正爱与敬其政之本欤哀公曰寡人愿有言然冕而亲迎不已重乎孔子愀然作色而对曰合二姓之好以继先圣之后以为天地宗庙社稷之主君何谓已重乎又曰天地不合万物不生大昏万世之嗣也君何谓已重焉盖深非之也孔子遂言曰昔三代明王之政必敬其妻子也有道妻也者亲之主也敢不敬欤礼又曰 冕斋戒鬼神陰阳也将以为社稷主为先祖后其可以不致敬乎又曰敬而亲之先王之所以得天下也今臣与众官讨论讲议皆约先王之礼参酌其宜不为过隆愿陛下勿以疑为进言者必曰天子至尊无敌于天下不当行夫妇之礼而荀卿有言天子无妻告人无匹也如此则是周公之典孔子之言皆不可信而荀卿之言可信也臣谨按礼冠昏唯有士礼而无天子诸侯之礼故三代以来唯以士礼推而上之为天子诸侯之礼盖以成人之与夫妇自天子至于士则一也臣窃闻亲王宗室之间娶妻殊无齐体之礼敬而亲之天下岂有独尊而无偶配者哉至于鄙愿之礼或杂戎狄之俗或习委巷之风下自士族上流宫禁有涉于此者愿陛下一切屏絕之以正基本以先天下故礼不可不隆所谓博议者臣闻古者天子聘后上公逆之诸侯主之故春秋书祭公来遂逆王后于纪夫国有大事大臣不容不预闻也昔慈圣光献之立也吕夷简定其议故其诏曰览上宰之敷言其策曰宗公鼎臣诵言于朝先是茶商陈氏女亦预选择王曾宋绶皆以为言大臣继有言者遂罢陈氏仁宗所以为圣者能从众也进言者必曰此陛下家事非外人所预自古误人主者多由此言也天子以四海为家中外之事孰非陛下家事大臣无不可预之事亦无不当预之人且陛下用一执政进一近臣必欲协天下人望况立皇后以母天下乎臣恐陛下一日降诏云立某氏为皇后则大臣虽有所见亦难乎论议矣今陛下之所选择莫若出其姓氏宣问大臣若圣志既定而众议佥同则卜筮协从鬼神其依天人之意无不同矣故议不可不博臣幸备劝讲其职在以帝王之事裨益圣德故敢献其所闻臣之愚诚惟中宫正位之后四海之内室家相庆则宗社之福也狂瞽之言惟陛下留听干冒宸严臣无任惶惧俟罪之至

论听政 范祖禹

臣等伏以天下不幸大行太皇太后登遐陛下号慕哀毁孝性天至在廷闻者无不摧陨今总揽庶政延见羣臣四方之民倾耳而听拭目而视此乃宋室隆替之本社稷安危之基天下治乱之端生民休戚之始君子小人消长进退之际天命人心去就离合之时也呜呼可不慎哉可不慎哉臣等久备讲读职在论思首当献言以助万一陛下宜先诚意正心推广圣孝发为德音行为仁政以慰答天下生民之望此在陛下加意而已非有所难也愿陛下循其本而行之则其末可以无难昔周公以成王防弱故位冢宰治天下七年制礼作乐以致太平其功德至隆周公没成王追念其勲劳赐鲁以天子礼乐使世世祀周公以为非此不足以称周公之德也成王所以报周公如此故天下莫不归心汉大将军霍光尊立宣帝霍光既没宣帝亦葬以天子之礼帝始亲政事又思报大将军功德夫周公霍光皆人臣也有非常之功故成王宣帝皆报以非常之礼而况太皇太后英宗之配神宗之母陛下之祖母有大功于宗庙社稷有

大德于亿兆人民于陛下之恩与天地无极岂人臣之比哉然则今陛下所宜先者莫如报太皇太后之德也自仁宗以来三后临朝皆有大功章献明肃之于仁宗慈圣光献之于英宗鞠育扶持勤劳艰难亦未得如太皇太后之于陛下也元丰之末神宗寝疾已不能出号令陛下年始十岁太皇太后内定大策拥立陛下储位遂定陛下之有天下乃得之于太皇太后也听政之初诏令所下百姓无不欢呼鼓舞自古母后多私外家惟太皇太后未尝有毫髮假借族人不惟族人而已徐王魏王皆亲子也以朝廷之故疎远隔绝魏王病既没然后一往太皇太后疾已革然后徐王得入进退羣臣必从天下人望不以己意为喜怒赏罚故至公无私之德虽匹夫匹妇之口亦能道之临朝九年未尝少自娱乐焦劳刻苦以念生民所以如此岂有他求哉凡皆为赵氏社稷宋室宗庙专心一意以保佑陛下也故身当其劳苦而使陛下享其安逸昔章献明肃而亲党多侥幸滥恩仁宗既亲防不免厘革故小人不能无怨今太皇太后自临朝以来左右请求一切拒绝内外肃然盖以朝廷不可无纪纲故身当其怨而使陛下坐收肃清之功陛下如欲报太皇太后之德莫若循其法度而谨守之祖宗以来唯以德泽结百姓之心欲四海安静无事仁宗行之四十二年天下至今思之恭惟太皇太后之政事乃仁宗之政事也然而仁宗圣性宽裕不忍拒人内降滥恩其后亦比比而有惟太皇太后严正至静不可干犯故能外斥逐奸邪以清朝廷内裁抑侥幸以肃宫禁九年之间终始如一故虽德泽深厚结于百姓而小人怨者亦不为少矣今必有小人进言曰太皇太后不当改先帝之政逐先帝之臣此乃离间之言陛下不可不察也当陛下嗣位之初太皇太后同听政中外臣民上书者以万数皆言政令有不便者太皇太后因天下人心欲改故与陛下同改之非以己之私意而改也既改其法则作法之人及主其法者有罪当逐陛下与太皇太后亦以众言而逐之其所逐者皆上负先帝下负万民天下之所讎疾众庶所欲同去者也太皇太后岂有憎爱于其间哉顾不如此则天下不安耳惟陛下清心照理辨察是非斥远佞人深拒邪说敢有以奸言惑圣听者宜明正其罪付之典刑痛惩一人以儆羣慝则帖然无事矣陛下若稍入其语不正其罪则恐奸言邪说继进不已万一追报之礼小有不至此于太皇太后圣德无损而于陛下孝道有亏必大失天下之心陛下岂不见司马光以公忠正直为天下所信服陛下与太皇太后用以为相海内之人无不欣悦光没之日无不悲哀乃至茶坊酒肆之中亦事其画像光所以得人心如此者为其能辅佐陛下与太皇太后功及天下也以光之功比之太皇太后止是万分之一而百姓思之如此而况太皇太后有天地之恩于陛下若听小人谗说或追报有所不至或轻改其政事岂不大失天下人心乎人心离于下则天变见于上陛下虽欲为善以救之改过以补之亦无及矣孝者万行之本本既不立则其余何足观焉夫小人之情非为朝廷之计亦非为先帝之事皆为其身之利也日夜伺候欲逞其憾者久矣太皇太后新弃天下陛下初揽政事乃小人乘间伺隙之时也不可不预防之此等既上悞先帝今又欲复悞陛下天下之事岂堪小人再破坏邪臣等恭闻陛下自太皇太后寝疾朝夕不离左右躬亲药膳衣不解带忧瘁泣涕形于颜色自遭变故以来哀慕毁瘠中外具闻丧服之礼务从至隆又下诏发扬太皇太后盛德推恩高氏此大孝之极也至亲之际无所间然然而臣等犹言及此者窃以小人众多恐置陛下于有过之地也如臣等所言虽万万无之然不敢不虑于未然或有纖芥流闻于外则臣等上负陛下不先言之罪大矣不胜忧国爱君之至惟陛下深留圣思

论宦官 范祖禹

臣闻书曰与治同道罔不兴与乱同事罔不亡汉有天下四百年唐有天下三百年及其亡也皆由宦官相去五百余年如循一轨盖与乱同事未有不亡者也汉自元帝任用石显委以政事杀萧望之周堪而废刘向等汉之基业坏于元帝东汉邓后临朝中官用事手握王爵口含天宪顺帝以后五侯专朝桓帝灵帝之时十常侍擅天下子弟亲党割剥百姓毒流四海附之者宠及三族违之者灭及五宗大考党狱夷戮天下名士于是黄巾贼起朝野崩离及袁绍诛宦官献帝奔播困饿而曹操因之以篡汉唐自明皇使高力士决省章奏宦官始盛李林甫杨国忠等皆因力士以进唐亡之祸基于开元肃宗任李辅国末年寢疾辅国以兵劫迁明皇于西内杀张皇后及二王明皇以幽崩肃宗以骇没贵为天子上不保其父中不保其身下不保其妻子由用辅国一人而已代宗用程元振功臣畏谗吐蕃寇防京师播迁于陝德宗用宦官分领神策禁兵其后天子由其所立唐室终以此亡宪宗服金丹躁忿为陈洪志所弑敬宗为刘克明所弑文宗欲言宪宗之贼谋泄仇士良杀四宰相及朝臣灭其族流血成渠朝廷半空文宗忧愤以至于没武宗以后皆由宦官所立僖宗呼田令孜为父天下大乱黄巢贼起播迁于蜀又幸兴元杨复恭自称定策国老呼昭宗为负心门生天子刘季述等废昭宗于东内韩全海等劫昭宗幸鳳翔于是崔裔诛中官而朱全忠劫迁昭宗遂弑之因以篡唐观汉唐亡国之祸其酷如此后之人主岂可不以为刻肌刻骨之戒哉太宗时王继恩有平蜀之功中书欲除宣徽使太宗曰朕读前代书史不欲宦官预政事宣徽使执政之渐也宰相恳言继恩有大功非此不足为赏太宗切责宰相等乃命学士别立宣政使之目以授继恩布衣韩拱辰诣检院上言继恩功大赏薄太宗大怒以拱辰妖言惑众杖脊黥面配流崖州太宗可谓深鉴前古而塞祸乱之源矣英宗服药任守忠往来间构两宫致慈圣太后与英宗不相悦言者刻奏其罪贬蕲州安置尽逐其党然后慈圣英宗母子如初宫省清肃熙宁元丰间内臣之中李宪王中正宋用臣三人者最为魁杰宪总兵熙河兼领三路中正总兵河东兼领四路其权势震动内外自陝以西人不敢斥言宪名中正口勅募兵州郡不敢违师徒冻饿奔溃死亡最甚宪陈再举之策以诱夏贼致永乐防没在熙河僭拟不法用臣兴土木之役无时休息舟船置堆垛网市井之微利夺细民之衣食专事刻剥为国敛怨此三人者虽加诛未足以谢万姓朝廷止从宽典量加废黜唯宪独死中正用臣犹存陛下近召内臣十人续又召数人而李宪王中正之子皆在其中又除押班二人带御器械一人中外无不骇愕既而闻二人以执政言其有过先罢三人以舍人缴词头且辍然前来指挥首违故事又李宪王中正之子既得入侍则中正用臣亦将进用人之心不得不忧故臣敢极言之陛下与太皇太后同听政之初外逐蔡确章惇吕惠卿等及羣小人故朝廷肃清内逐李宪王中正宋用臣等及羣小人故宫禁肃清内外皆无凶人故天下安静臣歷观近古内外肃清未有如今日也祖宗法度所以维持后世不可轻变陛下奈何先自坏之陛下所以享南面之尊防已成之业四方万里奔走而听命者以朝廷公正天下心服也陛下何不慎重法度规矩增修德政使过于垂帘之时然后不失天下之望今未及进一贤行一善先骤用中官如此之盛四方闻之必以为政出宫掖无复纲纪如衰季之世岂不大失人心哉夫人心一失复欲收之甚难陛下若作一二事使中外悦服四方竦动则他日所为有顺流之易人心先信故也若作一二事使中外忧疑四方解体他日虽有美意人已不信在前岂得便心服乎如此而望德业之光名誉之隆非臣之所知也今中官止是陛下左右给事使令臣虽至愚亦知其必有害政之事然欲治外者必先治内欲治远者必先治近是以明王慎选左右士人尧舜畏之佞人孔子远之恐其有损而不自觉也昔唐之时仇士良教其党曰天子不可令闲常宜以奢靡娱其耳目使日新月盛无暇更及他事则吾輩

可以得志慎勿使之读书亲近儒生彼见前代兴亡心知忧惧则吾輩踈斥矣士良以此固其权宠故能专恣二十余年夫汉唐之事当今必无然以先帝天资英睿圣学高明可谓不世出之主而内外为小人所悞外兴师旅内兴百役先帝未尝享太平之乐终以忧勤损寿凡不便民之事皆羣小所为而使先帝受天下之谤臣常痛之故不愿陛下复近小人盖以此也陛下诚能听臣之言悉追罢除用内臣指挥未到者别与差遣已入者复授外官则中外之人称诵圣德万口一辞以为至美乃可以解众庶之惑洗陛下之谤此如反掌之易何难而不为哉自闻近臣两次指挥以来外议汹汹皆云大臣不能争执防陛下于过举台諫之臣又皆畏避中人莫敢一言但恐陛下未之知耳若使知之必不为也臣侍经筵八年日望一日歲望一歲期陛下为令德之主唯恐有纖毫之失故不避违拂圣意数进苦切之言陛下每留睿听以臣愚直见知臣亦不量微力切以献纳自任今兹事体实繫朝政污隆人情去就臣义均休戚荣辱不忍默默坐视敢冒万死而献其忠唯陛下裁察宋文鉴卷五十九

卷六十

钦定四库全书

宋文鉴卷六十

宋吕祖谦编

奏疏

论吕大防乞以旱罢 梁 焘

臣伏见陛下眷遇大臣极其恩礼不忍闻其过恶轻夺其位使伤其进退之名所以委曲覆容真有天地之赐为大臣者何以副陛下之深仁乎祖宗之时宰相率二三年以礼去今之宰相率二三年以罪去礼去者顾义重虽有功而必去罪去者顾利重非有罪则不去以礼去者可以复用以罪去者不可以再盖祖宗之大臣皆以名节自重一举动必存大体必副人望不敢专宠禄以自爱不敢挟权势以自强日思以得罪为忧以妨贤为惧故率三二年自引避位朝廷褒答自有恩数其优者为使相其次犹须起进数官为大学士其去位也名益重望益高眷益厚一旦复用则中外之民莫不以为宜皆为朝廷喜之此所以朝廷重也其间亦时有贪鄙之人当去而不去以固位恋禄清议已不容矣以之招致人言暴着过恶从而罢遣之殆不过一諫官一御史论之则已不能安矣如台谏合攻连击有甚少一有之则终身不得复用故以礼去者多以罪去者少大臣既以法小臣从而廉士大夫化之皆磨砺振洁以节操相高风俗纯美由此道也比年以来大臣皆以窃禄偷安为计寢以成风虽有大过犹巧自掩盖恐其失位一二人言之不知去台谏官共言之又不肯去至于纷纷不已上不能止其言竟出其章疏然后请退圣恩因而听之公议为之鄙薄私友为之叹惜防其节守败其名誉冒其过咎终以疎絶朝廷虽以乏人而欲用之疑其奸心之不测畏其清议之不容卒不敢用必用其以次者安得人才众多而为用乎朝廷将无人而用矣此不可不思也祖宗之时辅相之材非不多也然而进者必以其贤退者必以其礼去而复来所以用之有得也今辅相之材亦不多也然而进之不必以其贤退之必以其罪去而不可来所以用之不足也臣近尝建言乞陛下许吕大防以自请罢去相位者正为其如此若蒙陛下许吕大防令以礼去不唯大防得其进退之道且掩覆其罪状不为言者之所指摘不为公议之所不容使之养望于外它日用之人必无敢议者设有议者其迹以无罪而去陛下主张之无累知人之明矣于是大防真有天地之赐足称陛下眷礼之本意也非独以安大防也又以示后来之人皆思以礼去职臣愚窃谓士不知朝廷之治体则不足以立朝不习国家之故事则不足以应务唐李德裕谓用寒士不如公卿之世议者以为偏论臣廼谓之知言盖公卿之世耳目习朝廷之治体练熟国家之故事远方寒士有不知其始末者裕之言未为过论太宗皇帝深达此意始置崇文院建秘阁集四库书选天下名能文学之士以为校讐官给以见俸食于太官优其资秩自选人京官入者始除馆阁校勘或崇文院校书及升朝籍乃为秘阁集贤校理或优之则为直馆直院直阁其始入而

官位卑者未得主判且令在馆供职改京官升朝籍方得主判登闻鼓检院同知礼院之类资任渐高则或为吏部南曹郡牧判官又高则为省府推判官或出知藩镇任转运提刑又择其久任者或迁知谏院预讲读或擢为左右史遂典词诰或待制内阁由此而为公卿执政以跻台辅远器大节方重深厚事业磊落载在史册者前后相望外至于守土奉使蔼然皆有风绩可观间有不才闾茸者叨预于其间则指目鄙笑不容于清议故累朝得人方古为盛此实太宗皇帝忧深虑远养育之功也熙宁执政务欲速援亲党假此以为进人之阶浮躁狂妄者争趋之故有朝除校理而夕拜词掖夕为直院而朝作辅臣馆阁涵养之风遂至委地士人廉耻之节靡有子遗既无素养之才悉苟合士临时选用或非其人左右史才间用俗吏以致朝廷厌薄馆阁遽行寝罢陛下即位以来招贤乐善追复太宗皇帝之政继承列圣之业俾复三馆职名又诏执政大臣各举所知召试以充其选独不许其供职臣愚莫知其意窃计议者必谓昔之崇文院已改为秘书省已有官属则带馆阁职名者不可供职臣愚以为崇文院之名虽改而秘阁集贤昭文馆四库之书犹存既选英才除职名而不令供职不法太宗皇帝养才育士之深意而徒以虚名为士大夫进取之阶不唯义理未安兼亦于事无补臣愚望朝廷稽考祖宗馆阁之制选人京官除者且授秘省正字校书以比昔日之校勘选人已有改官并供职四年除校理指挥外有自京官除者亦自校书郎二年方授校理已升朝者得兼寺监职事以比昔日之主判由此渐进以歷省府与旧带职之人并令入馆供职依旧食于太官磨以歲月使多士知陛下育才之意庶几优游议论渐知朝廷之治体羣居讲习以议国家之故事防耻清议去而复还馆阁素风坠而复振朝廷自后用人不乏实才将以成太平之业臣愚以为自此为始惓惓之意惟陛下采择臣愚不胜幸甚

请诏有司讲防商贾利病 王岩叟

伏以祖宗盛际四方之商贾交出于涂而万货无所滞公私共享其利优游乎丰乐而不自知其利专于公上商贾为之不行通都防邑至有寂寞之叹非独商贾之患也而上下均受其陛下即位之始首发德音废导洛罢市易还民衣食之源以惠养困穷人人防福如遂更生有司固无复争利之端矣然二年于今不为不久商贾犹病乎不通而国家未获其益何也必法有蔽于中而讲之未尽其术也伏望特诏有司深防利病以通天下之商贾下以裕百姓而上以资县官庶防人物熙然复及祖宗之盛臣愚不胜区区

请广言路参用四方之士 王岩叟

臣以谓天下之事度而知之不如耳闻其說耳闻其說不如目覩其真今四海之大万里之遠民情之利害不可以防言风俗之美恶不可以凡举人材之贤不肖不可以互知窃以陛下所赖以察四方之事达四方之情者言路数人而已而专用一方之人非所以广聪明于天下也臣愿陛下常于言路参用四方之士天下幸甚

请复内外官司举法官 王岩叟

臣窃以人得于表里不疑则可任事出于上下相应则易成其诸府之辟召羣司之表举所以

不可废也自辟举之法罢而用选格可以见功过而不可以见人材中外患之于是不得已而有踏逐奏差申差之格踏逐者陰用举官之实而明削同罪而非善法也选才荐能而曰踏逐非雅名也必当择人之地而不重用之之道非深计也委人以权而不容举其所知非通术也臣伏望圣慈特赐指挥复内外官司举官法以畅公议

请诏执政裁抑三省人吏侥幸 王岩叟

臣伏以朝廷之 莫甚于容侥幸以养蠹尚姑息以惠奸不治其源而立法于下流法愈烦而愈多非计之得也今天下皆曰侥幸之甚者莫如三省之胥史歲累优秩月享厚禄日给肉食春冬有衣寒暑有服出入乘官马使令得营卒郊礼霑赐賚又许有服亲入为吏如士大夫任子无以异而曾不限年得禄尤早其为恩幸可谓厚矣言其供职事则一月之间或仅逾两旬一日之间常不满半日其为勤劳可谓薄矣防检诸司文字差错乃是职分当然何至字字论功日日计赏或升名次或减磨勘或添料钱或支银绢以彼易此有如已物又每遇朝廷举动一事曾行过一纸文书则复妄叙劳能别希恩泽如近日二王出居外第省吏有何辛苦而亦要功以冒赏推此一端余皆可见臣不知平居禄赐优厚将焉用之其为侥幸可谓甚矣此盖前来宰执以姑息相承养之至此卖朝廷之恩以买誉结左右之爱以固权何尝以谨严纪纲为事澄清根本为心哉故议者以为庙堂之上为天下百姓理防 事则少与省中吏人行遣滥恩则多静而察之非虚语也伏望圣慈特赐勅厉执政大臣裁抑侥幸以除蠹杜絶姑息以戢奸弃近例禁换法复讲治平以前条格循用之庶可以肃百司而正四方

请依旧法賑济免河北贷粮出息 王岩叟

臣伏以救灾防患惟恐有所不至以伤其仁先王之用心也随施以有求乘危以论利盖不忍焉臣按祖宗賑济旧法灾伤无分数之限人戸无等第之差皆得借贷但令随税纳元数而已未尝有息也故四方之人霑惠者普衔恩者深郡县仓庾以陈易新者多其后刻薄之吏陰改旧法必待灾伤放税七分以上方许贷借而第四等以下方免出息殊非朝廷本意緣灾伤放税多是监司以聚敛为急威胁州县州县又承望风防不复体心朝廷以灾伤的实分数余放若放及七分者灾伤已是十分况少肯放及七分又六分之与七分相去几何毫厘之间何以辨别幸而得为七分别有借贷不幸而为六分则无借贷但系检灾官吏一言之高下而被灾百姓幸不幸相远如此不可不察也三等而上均为赤子均遇天灾岂容因灾偏令出息计其所得则甚少论其所损则实多乖陛下平一之心亏朝廷光大之施臣乞复如旧法不限灾伤之分数并容借贷不拘民戸之等第均令免息庶防圣泽无间感人心于至和天下幸甚如允臣所奏其河北京西淮南等路昨来水灾州县乞先次指挥施行

请罢三舍法 王岩叟

右臣伏以法有为名则美而行之则难事有用意则良而施之则戾者三舍是也故自三舍之法立虽有高材异行未见能取而得之而犇竞之患起犇竞之患起而贿赂之私行而狱讼之端作狱讼之端作而防猜之禁繁博士劳于簿书诸生困于文法非复浑然养士之体而庠序

之风或防乎息此识者之所共叹也臣窃谓庠序者所以萃羣材而乐育之以完其志业养其名誉优游舒徐以待科举者也不必科举之外别开进取之多歧以支离其心而激其争端使利害得失日交战于胸中损育德养道之淳意非所以敦教化成人材也臣愚乞鉴已然之罢三舍志开先生弟子不相见之禁示学士大夫以不疑讲肄之余止以公私试第高下如昔时自足以獎材气而厉风声使多士欣欣于从学则上庠宜复有雍容乐易之美为四方矜式矣乞下礼部及司业博士共议其当

请罢试中断案人入寺 王岩叟

臣闻维天下之势者存乎法持天下之法者存乎平权之而后行议之而后用使不失其平者存乎其人当张释之为廷尉人有盗高庙坐前玉环者奏当弃市文帝大怒曰吾属廷尉者致之族而以法奏之释之谢曰今盗高庙器而族之有如万分一假令愚民取长陵一抔土陛下且何以加其法乎文帝乃许廷尉臣以谓此不出于法之文而出于一时议论能推明轻重之意以释上心而使天下后世莫不称其当由是言之廷尉之选其当忽哉臣伏覩祖宗时审刑大理长官及其僚属皆择天下君子长者通物情知义理者以为之其用心平其持议不阿其知思足以讲明法之微意而必与情称故天下号无冤民以今望之其遗风余德犹释之之在汉也后专尚刑名法术之学而惨刻之吏多在此选议事不原于法意论刑不本于人情执文以致罪顺防以成狱不知先王明慎钦恤之心而复辅之以经术申之以道德故愈务而愈远愈严而愈戾试以断案巧则巧矣然不足以得正人而足以得狡吏委理卿独举专则专矣然不足以任至公而足以得偏见臣愚伏乞检会旧大理举官法及讲祖宗置审刑院大理相持并行之初意今后罢试断案人则释之之徒将自为陛下用稍复刑措之治天下幸甚

论堂除之 刘安世

臣闻非至简不足以待天下之繁非至静不足以制天下之动故荀卿有言曰论一相以兼率人主之职也又曰相者论列百官之长要百事之听歲终奉其成功以效于君推此言之则人主择辅臣辅臣择庶长庶长择僚佐以次选论不容虚受是以所受愈隆而所择愈简所择愈简而所得愈多此尧舜三代之君所以垂衣拱手不烦事诏而天下晏然以治者用此道也秦汉以来官失其守居宰相之位者或不知其任在庶长之列者或不守其职因循至今流日积臣请为陛下详言之昔魏晋已后采择庶官多由选部故晋之山涛为吏部尚书中外员品往往啓授宋以蔡廓为吏部尚书黄散已下皆得自用廓犹以为薄已遂不之官唐制五品以上宰相商议奏可以除拜者则以制勅命之六品以下则吏部铨材授职然后上言诏防画闻无所可否谓之防授开元中吏部置循资格限自起居遗补及御史等官犹并列于选曹其后幸臣专朝旧典失序故陆贄抗论以谓舍朝命而重已权废公举而行私惠是使周行庶品苟不出于时宰之意者则莫致焉此乃唐之风不可不革也臣伏见近来堂除差遣多取吏部之阙不问职事之轻重才品之优劣为人择官殊失大体如承议郎王续堂除管勾左厢公事承奉郎刘敦夫堂差权河南知録若此之类名品至卑吏部选差固不乏使何烦廊庙一一简求臣恐三省之事日益纷纭执政大臣汨于细务则朝廷安危之至计礼乐教化之大原使天下回心而向道者将何暇以及之矣然则岂所以称陛下图任老成委注辅弼之意哉伏望圣

慈明勅三省别议立法今后除两制台省寺监长贰以上并诸路监司濒河并边郡守之类所系稍重者令依旧堂除外其余一切归之吏部所贵执政事简得以留心于远业而选部不至失职渐复旧制取进止

请戒约传习异端 朱光庭

臣窃以天覆于上地载于下人位于中三才一贯纯粹不杂有圣人作因天叙而惇五典因天秩而庸五礼因天命而章五服因天讨而用五刑然后三纲五常立而万事咸治圣人为能以皇极之道弥纶辅相于其中故天下无一民一物不得其所此极盛之治后世无以复加也不幸三代既还王道不振黄老杂之于前释氏乱之于后黄老之术主于清静虚无世惑犹浅唯是释氏最为大惑人无贤愚皆被驱率高明之士则沉溺于性宗中下之材则纏缚于轮回患浅之俗则畏惧于祸福甚可怪也圣人曰天命之谓性儒者当尽而后知苟不务知此而求他可乎圣人曰未知生焉知死儒者当穷理而后知苟不务知此而求他可乎圣人曰惠迪吉从逆凶惟影响儒者当视履而后知苟不务知此而求他可乎圣人言行布在方册明如日星可师可法今士大夫被儒者服当法师圣人言行而乃自暴自弃区区奔走从事异端古者学非而博在四诛而不以听今之弃先圣之言从异端之学无乃学非而博者乎岂可以不禁之也学官教多士以礼义礼官正朝廷之典礼若习异端尤当深责古者道路男子由右妇人由左重其有别今之士大夫与民庶之家妇女恣入寺门败坏风俗莫此之甚此不可以不禁也臣访闻今月二十日相国寺惠林院长老开堂衣冠大集座下听法者曲拳致恭环拜致礼无所不尽在无知辈不足责其士大夫皆弃吾道不知自重如此不可以不责也臣昨日上章乞诏执政诘问今月二十日于相国寺长老座下听法臣寮乞行勅戒令后更不得造其门传习异端及学官礼官前日亦曾诣门听法者已上违经畔礼之罪仍乞今后应士大夫与民庶之家妇女并不得入寺门明立之禁臣所以为陛下力言者方圣明在御俊乂满朝当尊吾尧舜禹汤文武周孔之道以致太平而不当纵异端之术以惑天下伏望圣慈特赐睿断施行

请用经术取士 朱光庭

臣窃以圣朝用经术取士冠越前代止是不当专用王安石之学使后生习为一律不复穷究圣人之蕴此为失矣若谓学经术不能为文须学诗赋而后能文臣以为不然夫六经之文可谓纯粹浑厚经纬天地辉光日新者也今使学者不学纯粹浑厚辉光六经之文而反学雕虫篆刻童子之技岂不陋哉其非圣朝之美事臣近已上封事论列今再具以经术取士之法约归义理之文条列于左

一第一场试诸经大义六道乞令每人各治二经每经各试大义三道仍须先本注疏之說或注疏违圣人之意则先其注疏所以违之之說然后断以己见及诸家之說以义理通文采优者为上义理通文采粗者为次义理不通虽有虚文不合格

一第二场试论语孟子大义四道论孟各两道考试之法与经义同

一第三场试论一道乞于荀子扬子文中子韩吏部文中出题

一第四场试策三道内两道乞问歷代史一道时务省试五道三道乞问歷代史两道问时务

右臣之所陈欲令天下学者不失宗经知根本之学不专用王安石之凿說各以己见诸家之說穷圣人之蕴履之为事业发之为文章下之所以修身见于世上之所以斂材置之用皆不失道此臣所以区区为朝廷力言也伏望圣慈察臣管见如或可采特赐主张施行

宋文鉴卷六十

卷六十一

钦定四库全书

宋文鉴卷六十一

宋吕祖谦编

奏防

请留安焘王覲

臣窃闻同知枢密院安焘家居请郡臣愚不知圣意之所在将听其去邪不听其去邪臣伏见安焘与李清臣其才能皆无足以过人者当蔡确韩缜章惇张璪当国用事之际焘清臣惟务顺从不能有所建明方是时不惟确缜惇璪为可去而焘清臣亦可去也然谏官御史交章列疏具言确缜惇璪之恶而罕及焘清臣者盖知蠹政害物之根本惟在确缜惇璪而焘清臣本非为恶之人虽务顺从其情可恕故言虽或及而不力也昨者清臣自尚书右丞除左丞论者谓清臣虽序迁而常才不可以更有进擢臣之說亦如是也焘自同知枢密院除知枢密院论者以谓焘从执政不列而直出门下侍郎之上超躐太甚臣之說亦如是也盖其时确缜惇璪未尽去小人之党方炽得全才重德之人进为辅相以肃清邪党而焘清臣素乏骨鲠之誉无足頼者然言者犹止欲朝廷之不更升迁而已未尝欲陛下逐而去之也今确缜惇璪皆已罢黜邪党既清先帝之旧执政惟焘清臣在焉陛下若遂听其去则过甚矣盖焘若去即清臣迹亦不安而复须求去其势然也臣向论缜璪奸邪累防陛下宣諭欲存留旧人此圣度高远过于常情万万然缜璪奸邪显著势不可留以害政故终为众论之所不容陛下必欲留旧人焘清臣可留也焘清臣虽常才而留之无害于圣政去之有损于国体此公论也臣窃见言事臣僚惟务以弹劾为事今焘之求去彼虽或知其留之为便而不少肯为陛下言者避嫌疑也臣不敢以嫌疑之故不尽忠于陛下惟圣慈详酌

请禁絶登科进士论财娶妻 丁 黼

臣窃闻近年进士登科娶妻论财全乖礼义衣冠之家随所厚薄则遣媒妁往返甚于乞丐小不如意弃而之它市井狙防出捐千金则贸贸而来安以就之名挂仕版身被命服不顾廉耻自为得计玷辱恩命亏损名节莫甚于此陛下上法尧舜旁规汉唐开广庠序遴择师儒自京师以達天下教育之法远过前古而此等天资卑陋标置不高筮仕之初已为污行推而从政贪墨可知臣欲乞下御史台严行觉察如有似此之人以典法从事庶防惇厚风教以惩曲士

请下御史台体访小人造作谤议 丁 黼

臣窃闻近有小人多兴谤议密相传报惊动中外之听或虚称朝廷升黜臣僚或妄言台谏官非意弹斥百官或又致奸言以厚诬近臣或造为恶名以玷辱多士如五鬼十物之类是也其实出于被罪流落之人私挟喜怒陰遣子弟门人出入朋比互为声援上则欲惑乱君臣以成疑似之祸下则欲离间同心转相猜忌以隳久大之业此其用意岂浅哉不可不察也昔唐穆宗之时有八關十六子之說为后世讥笑今二圣居上区别善恶进贤退不肖元首股肱夙夜孜孜励精求治惟恐不及非有穆宗之时八關十六子之事而奸幸者犹能巧作飞语公然喧播自京师以達四方扇摇流俗为害不细不于此时痛行禁止则恐浸以成俗伤薄风化臣窃忧之伏愿陛下特降睿防下御史台体访其主名付之吏议置于典法以消谗邪横逆之党天下幸甚

请罢国子司业黄隐任职 吕 陶

臣窃以士之大患在于随时俯仰而好恶不公近则隳防廉耻远则败坏风俗此礼义之罪人治世之所不容也太学者教化之渊源所以风劝四方而示之表则一有不令何以诲人臣伏见国子司业黄隐素寡学问薄于操行久任言责殊无献告惟附防当时执政苟安其位及迁庠序则又无以训导诸生注措语言皆逐势利且经义之說盖无古今新旧惟贵其当先儒之传注既未全是王氏之解亦未必尽非善学者审择而已何必是古非今贱彼贵我务求合于世哉方安石之用事其旧立于学官布于天下则肤浅之士莫不推尊信向以为介于孟子及其去位而死则遂从而诋毁之以为无足可考盖未尝闻道而烛理不明故也隐亦能诵记安石新义推尊而信向之久矣一旦闻朝廷欲议科举以救学者浮薄不根之 则讽谕其太学诸生凡程试文字不可复从王氏新說或引用者类多出降何取舍之不一哉诸生有闻安石之死而欲设斋致奠以伸师资之报者隐輒形忿怒将绳以率斂之法此尤可鄙也夫所谓师弟子者于礼有心防古人或为其师解官行服与负土成坟者前史书以为美后世仰以为高此固不论其学之是非而特贵其风谊尔昔彭越以大恶夷三族诏捕收视者栾布一勇士敢祠而哭之汉祖犹恕而不杀班固亦以为能知所处盖气节之可尚也今安石之罪虽暴于天下惟其师弟子之分则亦不可輒废而诸生之设斋致奠又非彭越栾布之比隐何必忿怒而遽欲绳之以法乎抑可见其不知义也向者有司欲复声律朝廷方下其事集羣臣而议之隐乃不详本末奉为定律揭榜学舍谓朝廷已复诗赋使学者知委传播四方人皆疑惑此又见其躁妄趋时之甚也夫道德所出之地长育多士而庶防成材乃以斯人为之貳则何以养廉耻厚风俗哉伏请早行罢黜以示劝戒无使邪儼之士久累教化之职

谏立后 邹 浩

臣闻礼曰天子之与后犹日之与月陰之与阳相须而成者也天子理阳道后治陰德天子听外治后听内职然则立后以配天子安得不审今陛下为天下择母而所立乃贤妃刘氏一时公议莫不疑惑诚以国家自有仁祖故事不可不遵用之耳盖皇后郭氏与美人尚氏争宠致罪仁祖既废后不旋踵并斥美人所以示公也及至立后则不选于妃嫔必选于贵族而立慈圣光献所以远嫌也所以为天下万世法也陛下以罪废孟氏与废郭氏实无以异然孟氏之罪未尝付外杂治果与贤妃争宠而致罪乎世固不得而知也果不与贤妃争宠而致罪乎世

亦不得而知也若与贤妃争宠而致罪则并斥美人以示公固有仁祖故事存焉若不与贤妃争宠而致罪则不立妃嫔以远嫌亦有仁祖故事存焉二者必居一于此矣不可得而逃也况孟氏罪废之初天下孰不疑贤妃以为后及读诏书有别选贤族之语又闻陛下临朝慨叹以废后为国家不幸又见宗景有立妾之请陛下怒其轻乱名分而重赐谴责于是天下始释然不疑陛下立后之意在贤妃也今果立之则天下之所以期陛下者皆莫之信矣载在史册传示万世不免上累圣德可不惜哉可不惜哉且五伯三王之罪人也其葵丘之防载书犹首曰无以妾为妻况陛下之圣高出三王之上其可忽此乎万一自此以后士大夫有以妾为妻者臣寮糾劾以闻陛下何以处之不治则伤化败俗无以为国治之则上行下效难以责人孔子曰名不正则言不顺言不顺则事不成事不成则礼乐不兴礼乐不兴则刑罚不中刑罚不中则民无所措手足夫名之不正遂至民无所措手足其有害何可胜道尤不可不察也臣伏观陛下天性仁孝追奉谟烈惟恐一毫不当先帝之意然先帝在位动以二帝三王为法斥两汉而下不取今陛下乃引自汉以来有为五伯之所不为者以自比是岂先帝之意乎是岂继志述事所当然者乎此尤公议之所未谕也臣观白麻内再三言之者不过称贤妃有子及引永平祥符立后事以为所咨之故实臣请论其所以然者若曰有子可以为后则永平中贵人马氏未尝有子也所以立为后者以冠德后宫故也祥符中德妃刘氏亦未尝有子也所以立为后者以钟英甲族故也又况贵人之系实为马援之女德妃之时且无废后之嫌其与贤妃事体迥然异矣若曰贤妃冠德后宫亦如贵人钟英甲族亦如德妃则何不于孟氏罪废之初用立慈圣光献故事便立之乎必迁延四年以待今日果何意邪必欲以此示天下果信之邪兼臣闻顷年冬享景灵宫贤妃实随驾以往是日雷作其变甚异今又宣麻之后大雨继日已而飞雹又自告天地宗庙社稷以来陰 不止以动人心则上天之意益可见矣陛下事天甚谨畏天甚至尤宜思所以动天而致然者攷之人事既如彼求之天意又如此安可不留圣虑乎夫成汤圣君也仲虺不称其无过而称其改过不吝高宗贤君也傳說不告以拒谏而告以从谏则圣臣虽愚不足以方古谏者常念唐太宗犹有耻君不及尧舜之臣况直可以为尧舜如陛下之圣而于身亲见之乎是以不敢爱身冒犯天威图报陛下亲自识防大恩之万一而区区血诚尽于此矣惟陛下俯从而改之不以为吝则万世之下所以仰望陛下之圣者亦将在成汤高宗之上矣岂不美哉岂不美哉伏望圣慈深赐诏纳不以一时改令为甚难而以万世公议为足畏追停册礼别选贤族如初诏施行庶防上答天意下慰人心为宗庙社稷无疆之计不胜幸甚不胜幸甚论选忠良博古之士置诸左右 曾肇

臣闻玉虽美追琢然后成珪璋金虽坚砥砺然后成利器人主虽有自然之圣质必頼左右前后磨砢渐染所闻正言所见正行然后德性内充道化外行以之知人则无不明以之举事则无不当故周公之戒成王自常伯常任至虎贲缀衣趣马小尹左右携仆百司庶府必皆得人以为立政之本穆王之命伯冏亦曰命汝正于羣仆侍御之臣懋乃后德交修不逮慎简乃僚无以巧言令色便辞侧媚其惟吉士下至西汉犹诏郡国歲贡吏民之贤者以给宿卫则虎贲之任也出入起居执器物备顾问皆用士人如孔安国之掌唾壶严助朱买臣之专应对则左右携仆之任也虽用人有媿于古亦一时之盛矣其后唐太宗平定四方有志治道则引虞世南等聚于禁中号十八学士退朝之暇从容燕见或论古今成败或问民间事情每言及稼穡艰难则务遵勤俭言及闾阎疾苦则议息征徭以至讽诵诗书讲求典礼咨询忘倦或至夜分若夫军国防微事务得失则责之辅相悉不相干其上下相与之际如此是以后世言治独称

贞观惜其一时之士不以尧舜三代之道啓迪其君故其成就止此矣夫以贞观之治犹须招集贤能朝夕亲近然后成功又况有志于大者乎伏惟皇帝陛下聪明慈惠有君人之德沉静渊默有天下之度方且躬亲听断励精为治其志大矣臣谓宜于此时慎选忠信端良博古多闻之士置诸左右前后以参讽议以备顾问陛下听政之余引之便坐讲论经术谘询至道不必限其日时烦其礼貌接以诚意假以温顔庶使人得尽情理无不烛于以增益圣学裨补聪明渐染磨砢日累日积循习既久化与心成自然于道不勉而中于事不思而得匪僻之习异端之言无自而入矣如是而施之任人则邪佞者远忠直者伸以之立事则言而为天下则动而为天下法其于盛德岂曰小补之哉且夫深处法宫之中亲近防御之徒其损益相去如此唯陛下留意毋忽

论内批直付有司

臣伏见陛下即位以来更张政事除民疾苦开广言路收防淹滞每一令之出内外无不驩呼相庆以至未明求衣辨色临朝躬视听断夙夜不懈推今日欲治之心为之不已太平之功指日可待然臣窃有所见不敢缄默苟止臣待罪右省伏覩内中时有批降指挥除付三省枢密院外有直付有司者虽陛下睿明必有过举然付之事体终有未安盖帝王号令不可轻出必经中书参议门下审駁乃付尚书省施行不经三省施行者自昔谓之斜封墨勅非盛世之事神宗皇帝正三省官名其意在此臣愚伏愿陛下凡有指挥须付三省枢密院施行更不直付有司以正国体其三省枢密院若奉内中批降指挥亦须将前后勅令相参审度可否然后行下不可但务急速奉行以为称职盖三省枢密院皆执政大臣陛下委以平章朝政之人其任非轻不同胥吏但以奉行文书为事又帝王号令务要简大若夫立法轻重委曲關防皆有司之职非人主之务书曰文王罔攸兼于庶言庶狱庶慎惟有司之牧夫盖谓此也至于内外臣寮干求内降恩泽侵紊纪纲增长侥幸以陛下圣明必不容许臣亦不复以为言更愿陛下戒之严行杜絶无使小人乘间得入天下幸甚

辞免左谏议大夫 丰稷

臣伏准尚书省劄子已降告命除依前官试谏议大夫者臣闻孔子曰天子有争臣七人虽无道不失其天下人主守崇高富贵之极心易放逸选正人置诸左右虽有无道之心终不为桀纣恶德自取败亡故能谨守宗庙保社稷而比者台谏官员阙久矣下情壅于上闻陛下入承大统念创业之艰难思守成之不易诏求明于治体堪任言责之人天下晓然皆知圣心欲广聪明欲新盛德欲辅朝廷阙失人人莫不懽忻鼓舞有乐生之意臣遭遇圣慈惕然震畏莫知所措臣伏见元丰五年厘正官制谏官以谏诤为职不为容悦逢君之恶不怀观望险害忠良不以声色为常事以盍上心不以滛巧为末务以荡上意不以细故塞责不以沽激盗名俯仰之间无所愧怍方能称其责臣量分度力不能任重不宜虚受自貽失职之罪伏望圣慈矜察追寢成命

论士风游酢

天下之患莫大于士大夫至于无耻则见利而已不复知有他如入市而攫金不复见有人也始则众笑之少则人惑之久则天下相率而效之莫知以为非也士风之坏一至于此则锥刀之末将尽争之虽杀人而谋其身可为也迷国以成其私可为也草窃奸宄夺攘矫防何所不至而人君尚何所頼乎古人有言礼义廉耻谓之四维四维不张国非其有也今欲使士大夫人人自好而相高以名节则莫若朝廷之上唱清议于天下士有顽顿无耻一不容于清议者将不得齿于缙绅亲戚以为羞乡党以为辱夫然故士之有志于议者宁饥饿不能出门戸而不敢以防节寧阨穷终身不得闻达而不敢以败名廉耻之俗成而忠义之风起矣人主何求而不得哉惟陛下留意

论章惇蔡卞 任伯雨

臣先累有奏状言章惇蔡卞迷国罔上胁持哲宗以不孝之名迫惧哲宗以不利之实激哲宗使怒惑哲宗使疑谤毁宣仁圣烈保佑之功传致元祐皇后疑似之罪引功自处归过哲宗挾天子贼害忠良肆口説倾危神器自古奸臣为害无甚于此去年上封事数千人人乞斩惇卞天下之议只此可见盖卞谋之惇行之蔡卞之恶有过章惇臣前来奏状已言之今更详具大事六件如后一元祐六年哲宗皇帝始纳元祐皇后前此未纳后时禁中尝求乳婢諫官刘安世等连上章论列皇帝既未纳后不知宫中求乳婢何用宣仁圣烈令两府宣谕是外家高氏所覓安世乃止绍圣初蔡卞还朝论及此事以为宣仁有废立之意乞追废为庶人一自绍圣以来窜逐臣僚应哲宗皇帝批出行遣者并是蔡卞诬罔先于哲宗前密啓进入劄子哲宗依劄子上语言批出至今劄子见在一绍圣三年宫中厌胜事作哲宗方疑未知所处章惇欲召礼官法官共之蔡卞云既是犯法何用礼官乃建议乞掖庭置狱只差内臣推治更不差有司同勘若非蔡卞建议哲宗未必废元祐皇后一编排元祐中臣僚章防乃蔡卞建议卞与蹇序辰自编排惇不曾与及卞具姓名乞行遣惇即奉行一邹浩以言事忤防蔡卞即首先奏云吕公着曾荐浩浩以此诋讥故哲宗愈怒遂编管浩浩又执奏乞治浩亲故送别之罪哲宗不从三次坚请乃许置狱一蹇序辰乃卞死党首建看详理诉之议安惇助之章惇迟疑未许卞即以相公二心之言迫之以此惇即日差官置局凡此皆蔡卞谋之章惇行之也按卞陰狡险贼恶机滔天惇虽凶恨每为制伏执政七年门生故吏徧满天下令虽薄责如卞在朝人人喘恐不敢回心向善朝廷邪正是非不得分别驯致不已奸人复进天下安危殆未可保只如去年臣僚上言蔡卞之恶过于章惇乃自太平州移池州顺流三程一日可到愚弄朝廷仅同儿戏盖人人畏附惇卞至今未已故宁负陛下不负惇卞大奸元恶未正典刑人情愤叹天象示戒故自今年正月至今两月陰雨盖防气之证于此可见昔周饥克商而年丰卫旱伐邢而得雨今惇自以异议当受大戮所有卞恶伏乞陛下早赐宸断明正典刑以答上天防气之证候正惇卞典刑之日乞陛下差人于朝堂道路间采听若人人不相庆臣甘伏罔上之罪

论求言之诏未及旧弼

臣窃覩陛下近因日食诏许中外臣民实封言事天下之忠言必自此而进矣然而求言之诏普逮于臣而乞言之礼未加于黄耆窃虑耆德故老久去朝廷或在謫籍或已得谢忠于徇国意欲有言泛然应诏则非旧弼之体密贡封事则有强聒之嫌若非圣问俯及隆谦示敬则黄

耆之言或不乐告是以周家忠厚尊事黄耆秦穆改过复询黄髮诗书所载圣主之所宜行也愿因侧身直言之时明示养老乞言之礼必有嘉谟来助初政格王正事无先于此伏望陛下上稟慈闱议而行之天下幸甚

论国是 陈 瓘

臣窃惟是非之心人皆有之古之圣王以百姓心为心故朝廷之所谓是非者乃天下之是非也是以国是之說其文不载于二典其事不出于三代唯楚庄王之所以问孙叔敖者乃战国一时之事非尧舜之法也然其言曰夏桀商纣不定国是而以合其取舍者为是不合其取舍者为非则是孙叔敖之意亦不敢以取舍之利而害天下之公是非也若夫取舍简择一以私意合我者是异我者非此楚庄王之所不取也岂圣时之所宜哉所有国是故事一件谨録奏闻

论瑶华不当遽复何大正不当遽赏

陈 瓘

臣二十二日奏稟职事因论朝廷之言未及瑶华而先赏何大正等失于太遽盖以当时诏防以谓内稟两宫外咨宰辅之意人所共喻两宫之训外人不知但闻秘狱初兴推革實御狱词既具遂及中宫朝廷皆以为当行其事遂告于天地国威所力谁敢出言至于今日言路既开是以大正之徒敢陈既往之事意虽可取言亦无难况闻大正所陈其事不一请复瑶华者乃其所言之一事而已然而外议詢詢溢语相传皆以谓陛下之所以赏大正者将欲复瑶华故也当时预议执政即令皆在朝廷忧废者之复兴恐身祸之莫测虽知圣度之寬大亦虑言者之沸腾使其各有惧心盖由恩及大正臣故曰赏之遽也虽然前日之事以母子之动静而定是非于狱辞兹固非所以习天下而尊堂陛也又况当时推劾事由郝随案牒虽存岂足尽据设有冤抑理合辨明然而训果出于两宫则先帝当时不得不从事既干于泰陵则陛下今日安可轻改假使昔者两宫无坚确之命先帝有常悔之心大正踈远何由得知然则朝廷莫大之政国家难处之事未可以卒然而议也臣愿陛下先思昔者所以致此之因然后罪之赦之皆得其宜矣臣谓致此之因生于元祐之說也以继述神考为說以讐毀宣仁为心其于元祐之事譬如刈草欲除其根瑶华乃宣仁之所厚又于先帝本无间隙万一瑶华有预政之时则元祐之事未必不复是以任事之臣过于久远之虑若刈草而去其根则孟氏安得而不废乎知经术者独谋于心宰政柄者独行于手心手相应实同一体方其造谋之时自谓密矣而见微之士原始知终彼患失安位之人不能正救虽有可罪然而春秋之法专责造意之人而已臣愿陛下考往验今询谋于众或采刍蕘之论或乞黄耆之言议之既熟乃发成断大明诛意之法则首恶者惧曲示含垢之恩则获免者众如此则事体无伤谪罚不广耿育宣布所起之言可示于天下仁祖专责范讽之意可法于今日干不静扰系此一事愿陛下上稟慈闱详择施行天下幸甚

卷六十二

钦定四库全书

宋文鉴卷六十二

宋吕祖谦编

奏疏

论蔡京 陈瓘

臣闻尽言招祸古人所戒言语之臣岂能免此臣伏见翰林学士承防蔡京当绍圣之初与其弟卞俱在朝廷导賛章惇共作威福卞则陰为谋画惇则果断力行且谋且行者京也哲宗笃于继述专于委任事无大小信惇不疑卞于此时假继述之說以主私史惇于此时因委任之笃自明已功京则盛推安石之圣过于神考以合其弟又推定策之功毀蔑宣仁以合章惇惇之矜伐京为有助卞之乖惇京实賛之当此之时言官常安民屡攻其罪京与惇卞共怒安民协力排防斥为奸党而孙谔董敦逸陈次升亦因论京相继黜逐哲宗晚得邹浩不由进拟寘之言路浩能忘身徇节上副圣知京又因其得罪从而挤毀是以七年之间五害言者掩朝廷之耳目成私门之利势言路既絶人皆箝默凡所施行得以自恣遂使当时之所行皆为今日之所改臣请略指四事皆天下之所以议京者也蔡卞之薄神考陛下既明其罪矣兄弟同朝壘相应事无异议罪岂殊科一黜一留人所未谕此天下之所以议京者一也邢恕之累宣仁陛下既明其罪矣宣训之语究治之事陛下既察其诬造于是司马光刘摯梁燾等皆防叙复京尝奏疏请诛灭摯等家族审如京言则所以累宣仁者岂特邢恕一人而已哉在恕则逐之在京则留之其可以塞邢恕不平之口而慰宣仁在天之灵乎此天下之所以议京者二也章惇自明定策之功追贬王珪京亦自谓元丰末命京带开封府劔子携劒之内欲斩王珪京之门人皆谓京于此时禁制宣仁京亦有社稷之功今陛下雪珪之罪还其旧官则是以惇之贬珪为非也在惇则非之在京则留之如是惇有词矣珪有憾矣此天下之所以议京者三也章惇之初笃信京卞倾心竭意随此二人假继述之說以行其私三人议论如出一口自绍圣三年九月卞为执政于是京有觖望而与惇睽矣四年三月林希为执政于是京始大怨而与惇絶矣自今观之京之所以与惇睽絶者为国事乎为已事乎然京之所以语人者曰我助惇而惇不听也我故絶之我教卞而卞不从也我故怒之我与弟卞不相往来久矣我縁国事今与爱弟不相往来而况于惇乎臣切料京之所以欺陛下者亦必以此言也何以验之卞之赴江宁也京往饯之期亲远行法当赐告而京之所以牒阁门者初以妹行为请法不许也遂请朝假不敢以弟卞为言虽在朝假而日至国门之外京之动静如此即不知陛下皆得其实乎此明主之所宜察也且兄弟同朝共议国事自无不相往还之理假使不相往还岂人伦之美事乎此天下之所以议京者四也陛下即位之初以用贤去邪为先而京之防蔽欺罔曾无忌惮陛下必欲留京于朝者其故何哉臣知陛下圣意本无适莫而京之所以据位希进牢不可

防者盖以韩忠彦曾布不能为国远虑轻率自用激成其势故也京卞同恶天下所知若用天下之言以合公议则显正二人之罪何难之有忠彦等不务出此而果于自用于于是托于谋帅而出之太原虽加以两学士之职而实以诡计除之想当进拟之时必有不情之奏用奇设策不由诚心二圣安得而无疑公议亦以为未允及京之留布复争辨再三之渎无以取信相激之势因此而成唐明皇欲用牛仙客为尚书张九龄以为不可明皇曰但加实封可乎九龄又以为不可明皇变色曰事皆由卿耶李林甫曰仙客宰相才也何有于尚书九龄书生不達大体由是明皇悦林甫之言卒相仙客而九龄自此浸疎终见黜罢今忠彦及布无九龄之望而京之气焰过于仙客因势观望而为林甫之言者不知防何人也陛下进贤退邪法则尧舜明皇之事固不足道然而天下之心皆疑陛下有大用京之意者以京之复留故也京之所以复留者以忠彦等去之不以其道故也去之不以其道则留之者生于相激万一京果大用则天下治乱自此分矣崔羣谓唐之治乱在李林甫张九龄进退之时今京轻欺先帝与卞无异而又归过于先烈卖祸于惇卞曲为自安之计而陛下果留之也今既可复留后亦可以大用天下治乱之势系于一京崔羣之言可不念耶臣恐后之视今亦犹今之视昔祸乱之机不可以不早辨也陛下嗣位之初首开言路可谓知所先务矣臣愚首预兹选明知京在朝廷必为大患而不能以时建言万一有意外不虞之变陛下翻然悔悟诛责当时言事之臣则臣虽碎首防胸何补于事此臣所以愤闷而不敢默也臣尝为卞所荐与京无纖介之隙所以言者为国事耳非特为国亦为蔡氏也自古不忠之臣以私害公初因自利终必累国国有迍遭私家将安归乎卞之尊绍王氏知有安石岂知有神考知有金陵岂知有京师絶灭史学一似王衍重南轻北分裂有萌臣之痛心默忧非一日也真宗景德中北兵至澶渊王钦若请驾幸金陵当时若用此计则天下分为南北久矣頼真宗用寇準之言所以四方混同得至今日天锡陛下聪明仁勇融防南北去卞不疑然而京尚未去人实忧之兄弟一心皆为害国一去一留失政刑矣唐会昌中工部尚书薛元赏与其弟京兆少尹权知府事元 皆宰相李德裕之党及德裕既败贬元 为崖州司戸元赏为忠州刺史廼者苏轼及辙亦兄弟也古今故事非不明白何独一京获以计免枉朝廷之法令以徇一京不知祖宗基业何负于蔡氏乎且自京卞用事以来牢笼荐引天下之士处要路得美官者不下数百人其间才智艺能之士可用之人诚不为少彼皆明知京卞负国欲洗心自新舍去私门顾朝廷未有以招之耳臣谓京在朝廷则此数百千人者皆指为蔡氏之党若京去朝廷则此数百千人者皆朝廷之用所以消合朋党广收人才正在陛下果于去京而已此非臣之臆說乃神考已用之术也熙宁之末王安石吕惠卿纷争以后天下之士分为两党神考患之于是自安石既退惠卿既出之后不复用此两人而两门之士则皆兼取而并用之也当时天下之士初有王党吕党而朋党之祸终不及于朝廷者用此术耳今陛下留京于朝廷而欲收私门之士是犹不去李升钱鏐而欲收江浙之士也不亦难乎然则消党之术唯在去京而已今京關通交结其势益牢广布腹心共谋私计羽翼成就可以高飞愚弄朝廷有同儿戏陛下皆不早寤渐成孤立后虽悔之亦无及矣自古为人臣者官无高下干犯人主未必得祸一触权臣则破碎必矣或以为离间君臣或以为买直归怨或托以他事陰中伤之或于已黜之后责其怨望此古之人所不免也臣岂敢自爱其身乎若使臣自爱其身则陛下不得闻京之罪矣国家内外无事一百四十一年矣太平之久古所无有甚可畏也譬如年老之人康宁无疾日服温暖犹恐气衰至于保养陰邪必成心腹之患京在朝廷何以异此伏望陛下慎保祖宗之业独持威福之柄断自宸 果于去恶天下幸甚

请检寻文及甫究问狱案牒 龚 央

臣窃闻自古奸臣戕败善类以防后患必置之死地而善人修身无大过失欲求其罪恶之实而不可得故托以悖逆无验之罪又虑其异时子孙诉理于朝故必使灭族而后已此自古奸邪之常态也臣近观前日文及甫之书究问之狱不意兹事出于圣朝使愚臣痛心疾首感愤流涕臣窃惟宣仁圣烈皇后拥佑先帝慎择累朝重望之臣寘之左右辅道德弥论朝政九年之间中外安静此天下之所共闻也前日止縁一二奸邪尝被黜逐遂敢欺罔朝廷成此大狱以执私仇必欲族灭无辜以快其意当是之时天地变色日月无光积陰逾时中外詢惧以至彗出四方譴告甚着先帝为之肆赦求言以答天戒而奸臣之忿不已持之益坚由是逐臣死于瘴海家族不许生还至有一门二十余防者然则虽无刀锯其实族灭也朽骨衔冤沈魂为疴以及于斯痛不忍言今及甫等罪上頼圣断已行窜斥而当时秘狱必有案牒章疏可以见其锻链文致附防欺罔之人若不早行根究必虑藏臣焚灭无所归咎则天下何以知其非先帝之本意伏望圣慈特赐睿防须管检寻当时照证文书以正奸臣之罪以慰天下之望

论蔡王府狱 江公望

臣闻天下之理有隙则物皆可入故圣人涂隙于未开之前有迹则瑕皆可指故圣人泯迹于未形之际物可入则亲者离矣瑕可指则疑者实矣在物之理虽甚踈远者尚且如此矧闭门之内骨肉之间其可不察耶臣访闻蔡王府吏相告有不顺之语浸淫恐及蔡邸开封府已行根治臣闻之骇汗流浹惊悸不能自持岂有极治之世太平之时廼容小人衔私怨逞不轨谋离间陛下骨肉之亲者乎象之于舜焚廩浚井其逆心已明矣拥二女坐床鼓琴其逆谋已成矣舜未尝藏怒宿怨卒封之有庠而富贵之唯恐不得象之心也至魏文帝褊忿疑忌一陈思王且不能容故有羹豆燃萁相煎何太急之语为天下后世笑岂不思兄弟天之大伦也有手足相扞之亲有首尾相应之义有埶箴之和有友于之乐故孔子以不间于父母兄弟之言为孝盖亲隙不可开隙开则言可离貳疑迹不可显迹显则事难磨灭陛下之得天下天下归之也章惇尝帘前持异议已有隙迹矣蔡王出于无心年尚防少未達祸乱之萌故恬不以为恤陛下一切包容已开之隙复涂矣已显之迹复泯矣恩意渥縻欢然不失兄弟之情与夫区区未能忘天下操以自狭者不啻相十百矣伏望陛下勿以暧昧无根之言而加诸至亲骨肉之间俾陛下有魏文相煎太急之隙而忘大舜亲爱之道岂治世之美事也伏望陛下密诏所司凡无根之言勿形按牒捶楚之下何求弗得一有浸淫旁及蔡王之语不识陛下将如何处之莫若略治所告及被告之人粗见嫌怨情状并流之岭表以示天下神器非人心天命弗得非口舌强力可争也示天伦之爱虽天下莫之夺也虽善为间言莫之离也傥形按牒有瑕可指一入胸次终身不忘虽父子之间尚未能磨灭况兄弟乎迹不可泯隙不可涂则骨肉离矣陛下将何道以治天下也蔡王万一防犯雾露之疾神考在天之神灵岂不知之陛下将何面目见神考于太庙乎书曰克明俊德以亲九族九族既睦平章百姓诗曰刑于寡妻至于兄弟以御于家邦至德要道足以风动天下未有不自亲始者也惟陛下深留圣意

论逻察 江公望

臣闻人君明目達聰所以通下情也前有旒左右有紃所以防太察也太察则闻人之过下情不通则不闻已过闻人之过则奸生而刑滋不见已过则心塞而祸萌此周之厉王以防口而召亡汉之显宗以耳目隐发为明而速乱也邇者之兴推求其意不过以求瑕搜匿钩致盗诈出于不备擿发如神此一酷京兆之俗才尔使京兆为之犹可羞矧以天下为度海内为家而为良京兆之不为者乎陛下即政之三日一切罢去天下闻之翕然归心开口张胆人人自安告讐不长风俗向厚比闻稍稍复置旧额通为七十人一人量以十人为耳目十人之中一人又以十人为之散之通途永巷不啻数十百人矣夫妇丑诋之言仇隙怒传之语增情饰状撻隐挾伏何所不至人人局蹐各各疑虑亲戚不敢诫朋友不敢信目不敢注观手不敢直指若此定非清世之美事也昔吳主孙权用吕壹輩举罪糾奸纖介必闻深按丑诬排防无罪以作威福步隲力诋其非权寻诛壹觉悟尚早盖小人因緣銜命不务奉公利在憑借威势杜絕人口公然作过使上聰不達威柄潜移刑及无辜睽睽万目由闻人之过不闻已过之所致也老子曰察见渊鱼者不祥以察为明是诚不祥之兆也陛下岂不思畿甸之外非陛下之民乎人各有口能使之嘿嘿不议陛下政事乎既不可掩于天下何独察察于輦轂之下以为明哉语曰天下有道庶人不议信乎有道不可得而议也伏望陛下以道御天下使人蕩然不疑无得而议何为蹈吳之故轍而不知革彼犹能因言以诛壹輩孰谓陛下鉴此而不能之乎愿黜献议之人通旧额人数一切罢去除祸者必鋤其根植福者必封其本毋谓昔有额而不可去也其根尚存枝叶他日复生矣不可不察

论冯澥 崔鷟

伏觀六月一日诏书诏諫臣直论得失以求实是此见陛下求治之切也然数十年来王公卿相皆自蔡京出其余擢居要路以待相继而用者又充塞乎台省要使一门生死则一门生用一故吏逐则一故吏来更持政柄互秉钧轴歷千百年无一人立异虽万子孙无一人害已此蔡京之本谋也安得实是之言闻于陛下且如冯澥近日上章其言曰士无异论太学之盛也此奸言也昔王安石除异已之人当时名臣如韩琦富弼司马光吕公着吕海吕大防范纯仁等咸以异论斥逐布衣之士谁敢为异乎士携书负笈不远千里游于学校其意不过求仕宦尔安石着三经之說用其說者入官不用其說者黜落于是天下靡然雷同不敢可否陵夷以至于今天大乱此无异论之效也而尚敢为此說以荧惑人主乎又曰崇宁以来博士先生狃于党与各自为說附王氏之学则诋毀元祐之文服元祐之学则诋诮王氏之說尤为欺罔岂有博士先生敢为元祐之学而诋诮王氏之說乎自崇宁以来京贼用事以学校之法驭士人如军法之驭卒伍大小相制内外相辖一容异论者居其间则累及上下学官以黜免废锢之刑待之其意以为一有异论则已之罪必暴于天下闻于人主故尔博士先生者敢诋诮王氏乎欲乞下太学取博士讲解覆视则澥之诞信见矣至如苏轼黄庭坚之文集范镇沈括之杂說畏其或记祖宗之事或记名臣之說于已不便故一切禁之坐以严刑购以重赏不得收藏则禁士之异论其法亦已密矣澥言服元祐之学诋诮王氏之說其欺罔不亦甚乎欺罔之言公行则实是何从而见焉先王之求实是亦有道矣传曰皇帝清问下民周官询于众庶孟子以不左右卿大夫之言为然必询于国人则实是见矣臣乞以澥所上章并臣之章垂于象魏揭于通衢以验国人之论而赏罚之以戒小人欺罔君父者此陛下之福天下之幸也取进止

再论冯澥 崔鷗

臣鷗近上章论谏冯澥未防施行澥复迁吏部侍郎此士论之所共忧臣适当言责不得已也观澥之意不过欲拘以熙宁元丰之法为治緣澥乃熙宁元丰人材之一也已之說行则身安已之說废则身危非为国家忠计此天地否泰所系国家治乱之所自分不可忽也昔在仁宗英宗时选天下敦朴敢言之士以遗子孙而王安石用事皆目为流俗之人尽逐去之乃自为新說以造士号为新美之材充塞乎朝廷而人主不闻天下之安危矣元祐之初相司马光收仁宗英宗时人材用之故宣仁圣烈皇后拥少主不出帘帷而天下治问其边隅则率服矣问其盗贼则消弭矣问其军士则豫附矣问其百姓则富乐矣当是时天下之势安于泰山及章惇用事斥之于瘴海炎荒之外蔡京陰蓄异图凶谋益炽于是尽收熙宁元丰时人材用之诱以美官饵以厚禄于是海内小人波荡而从之万口一词迭相唱和为绍述之论以诳惑人主绍述一道德而天下一于諂佞矣绍述同风俗而天下同于欺罔矣绍述理财而公私竭矣绍述造士而人材乏矣绍述开边而强劲交侵边兵压境矣此用熙宁元丰人材之效也譬之治疾一医治病而病愈一医治病而病坏此固不待较而明也且元符末以连年四月朔日蚀四月者正阳之月古人所忌诏求直言应诏上书者数千人蔡京因此以除去异己者乃遣腹心之党考定之分邪正二等同已者为正异己者为邪澥与京同者也故列于正等擢以不次而异于京者京皆指以为邪防于罪戾凡数千人近者上皇下责躬之诏其言以求直言夺于权臣反归咎建议臣僚然则前日附防蔡京号为上书正等之人皆今日之罪人也陛下嗣服之初天下观陛下好恶是非以卜世之兴衰今用蔡京正等之人非上皇悔过之意天下之士闻之解体矣

宋文鉴卷六十二

卷六十三

钦定四库全书

宋文鉴卷六十三

宋吕祖谦编

表

进刑统表 竦仪

臣闻虞帝聪明始恤刑而御物汉高豁達先约法以临人盖此丹书辅于皇极礼之失则刑之得作于凉而于贪百王之损益相因四海之準绳斯在如銜勒之持逸驾犹郭郭之域羣居有国有家其来尚矣伏惟皇帝陛下宝图攸属骏命是膺象日之明流祥光于有截继天而王垂洪覆于无疆乃圣乃神克明克类河图八卦惟上德以潜符洛书九章谅至仁而默感哀矜在念钦恤为怀网欲自密而疎文务从微而显乃诏执事明啓刑书俾自我朝弥隆大典贵体时之寛简使率土以遵行国有常科吏无敢侮伏以刑统前朝创始羣彦规为贯彼旧章采缀已从于撮要属兹新造发挥愈合于执中臣与朝议大夫尚书屯田郎中权大理少卿柱国臣苏晓朝散大夫大理正臣奚屿朝议大夫大理寺柱国臣张希逊等恭承制防同罄考详刑部大理法直官陈光义冯叔向等俱效检寻庶无遗漏夙宵不怠缀补俄成旧二十一卷今并目錄增为三十一卷旧疏议节略今悉备文削出式令宣勅一百九条别编或归本卷又编入后来制勅一十五条各从门类又錄出一部律内余条准此四十四条附名例后字稍难识者音于本字之下义似难晓者并例具别条者悉注引于其处又虑混杂律文本注并加释曰二字以别之务令检讨之司晓然易達其有今昔浸异轻重难同或则禁约之科刑名未备臣等起请总三十二条其格令宣勅削出及后来至今续降要用者凡一百六条今别编分为四卷名曰新编勅凡厘革一司一务一州一县之类非干大例者不在此数草定之初寻送中书门下请加裁酌尽以平章今则可否之间上系宸鉴将来若许颁下请与式令及新编勅兼行其律并疏本书所在依旧收掌所有大周刑统二十一卷今后不行臣等幸遇文明谬防宪法金科奥妙比亏洞達之能丹笔重轻徒窃讨论之寄将尘睿览唯俟严诛

滁州谢上表 王禹偁

罢直禁中临民淮上虽离近侍犹忝正郎省已戴恩既荣且惧伏念臣早将贱迹误受圣知进身不自于他人立节惟遵于直道优游两制出处八年今春召自西垣入叩内署既在深严之地仍当繁剧之权虽积兢虞终无补报所宜远贬以肃具寮伏防尊号皇帝陛下曲直遭逢俯存终始止罢玉堂之职仍迁粉署之资委以专城置于近地沿流数日登陆三程诸县丰登若无公事一家饱暖共荷君恩处之一生实为万足然而翰林学士朝廷近臣陛下登位已来御

前放人之后从吕防正而下拜此职者止有八人臣最孤寒亦预其数言于圣选不为不遴数月之间忽然罢去众情尚或惊骇微臣岂不忧惶且臣在内庭一百日间五十夜次当宿直白日又在银台通进司审官院封駁司勾当公事与宋湜吕祐之阅视天下奏章审省国家诏命凡于利害知无不为三日一到私家归来已是薄暮先臣灵筵在寝骨肉衰经满身纵有交朋无暇接见不知谤议自何而兴臣拜命已来通宵自省恐是臣所赁官屋在高怀德宅中一昨开宝皇后权厝之时便欲移出未有去处尚不遑宁寻曾指约公人不令呵唱窃恐贵僧出入中使往还相逢之间难为顾揖自左右正言已上谓之供奉官街衢之间除宰相外无所回避此盖贾谊所谓人君如堂人臣如陛陛高则堂高者也况臣头有重戴身披朝章所守者国之礼容即不是臣之气势因兹谢表敢达危诚况臣粗有操修素非轻易心常知于止足性每疾于回邪谓非其人诱之以利而不往事匪合道逼之以死而不随唯有上天鉴臣此志伏望陛下思直木先伐之义考众恶必察之言曲与保全俾伸诚节则孤寒幸甚儒墨知归在于小臣有何不足今则随岸千里尧天九重微躯或遂于生还劲节尚期于死所

黄州谢上表 王禹偁

乍离近侍犹忝专城循省尤违弥深感泣伏以黄州地连云梦城倚大江唐时版籍二万家税钱三万贯今人户不满一万税钱止及六千虽久乐升平尚未臻富庶永言养活亦借循良如臣庸愚曷副忧寄谨当勤求人瘼遵奉诏条窒塞囂讼之民束缚憊猾之吏敢言课最庶免旷遗况当求理之朝必为无言之政伏念臣叨司帝诰又歷周星既不曾上殿求见天颜又不曾拜章论列时事入直闭阁待制退朝则杜门读书虽每日起居实经年抱疾不敢求假恐烦医官自后忝预史臣同修实录昼夜不舍寝食殆忘已尽建隆四年见成一十七卷虽然未经进御自谓小有可观忽坐流言不容絶笔夫谗谤之口圣贤难逃周公为鸛鹑之诗仲尼有桓魋之叹盖行高于人则人所忌名出于众则众所排自古及今鲜不如此伏望皇帝陛下雷霆霁怒日月回光鉴曾参之杀人稍宽投杼察顔回之盗飴或出如簣未令君子之道消惟頼圣人之在上况臣孤贫无援文雅修身不省附离权臣祇是遭逢先帝但以心无苟合性昧随时出一言不愧于神明议一事必归于正直愠于羣小诚有谤词谋及卿士岂无公论以至两朝掌诰四任词臣紫垣最忝于旧人白首不离于郎署以微臣之行已遇陛下之至公久当辩明未敢伸理今则上国千里长淮一隅虽云守土之荣未免谪居之叹霜摧风贬芝兰之性终香日远天高葵藿之心未死仰望旒扆不胜涕洟谢转礼部员外郎充天章阁待制表 韩琦

涣渥自天震惶无地改中台之华序进内阁之清班尽出高明殊登秘近窃念臣发自顔巷賔于舜门一第为荣四方无效爰自书林预选桂籍升华耻汨没以怀安或感激而论事惟慕古人之节诂希英主之知伏惟尊号皇帝陛下稟帝尧之聪明加汉高之豁達坦圣怀而虚受期鸿化以咸孚念三圣之艰难而成丕业求七人之蹇谔以补大猷臣犹愧非才首当清问危言多犯孤立自持斧钺居前雷霆在上敢避枢机之祸终乖药石之良陛下日月垂光江海敦量恕其万死假之一麾望已絶于青云咎未更于鸿霈俄易藩宣之寄宁分旰昃之忧忽降纶章荐加宠数而况辟图书之府叨处于深严践云龙之庭当备于顾问非名儒而不称岂曲士之能堪矧簪清曹仍居澹治辉荣大集志愿何求敢不内守朴忠外修景行进退惟道遵圣贤视履之方始终一心副君父育材之造

谢赐衣表 杨 亿

解衣之赐猥及于下臣挟纊之仁更均于列校光生郡邸喜动辕门伏以崇文广武圣明仁孝皇帝陛下诞膺元符恭临大寶惠务先于逮下志惟在于爱人鸟兽毳毛俯及严凝之候衣裳在笥爰推赐予之恩在涣汗之所沾虽容光而必照如臣者任叨符竹地僻瓠吴奉汉诏之六条方深祗畏分齐官之三服忽荷颁宣纂组极于纈华纯绵加于丽密玺书下降窃窥云汉之文驿骑来临更重皇华之命但曳娄而增惕实被服以难胜矧于戎行亦膺天宠干城虽久百无汗马之劳守土何功独惧濡鹑之刺仰瞻宸极唯誓靡捐

汝州谢上表 杨 亿

沉疴初释宠寄荐臻祇命惟寅饬装靡暇初临郡閤获见吏民揣已若惊戴恩罔措伏念臣本由单弱特禀方愚以童刻之微能际帝图之享防骤参纶掖获草芝函属以尧德弥文汉辞尔雅云章有烂諒黼黻以何施天律惟精亦哇咬之罔弃居常摩厉徒益空疎俄践内庭预司密命值皇闱之有庆扈清蹕以多欢窥云瑞于封中听棹歌于汾曲四巡第颂诚辩丽之絶闻二豎兴妖致冥烦之坐邁偶嬰沉痾遂剧支离因请急以归宁遽迷魂而不复率由蹇否自抵困穷矧以蕞尔之躯防然去职羈孤至甚毀嫉居多嘖有烦言实盈庭之可畏豁然大度终如地以见容比及痊平果防齿叙此盖尊号皇帝陛下仁深惨怛德茂钦明轸旧故以兴怀俾肖翘之遂性特加采録令获便安伏况临汝旧邦陪京近辅姬文之化所及首载声诗地官之籍攸分寔繁兵赋土多岩险民或惰游置使劬农抑惟令典分条察俗盖有新书臣亦夙侍凝严僭窥律度敢忘瘁尽以奉化成然念臣早以断断之薄材获齿振振之近列典司训诰就望威顔读铭字于汤盘时瞻景式载史言于董笔获次旧闻舛命邁屯荣阶絶迹酒泉素愿敢望于生归丽正残编几成于死恨今者星畿接畛竹使长人预方国之颁书禀天台之布宪水深土厚足养于槁骸昼访夕修冀无于秕政亲末光而弥阻感再造以难胜

贺册皇太子表 刘 筠

前耀开祥东闱播宪汉仪丕赫天下之本既丰周制协敷王者之基克固殊尤显会中外祇懽恭以十翼垂言黄离之象攸着四渎流润重海之歌载扬于以示元吉之有孚表善利之需广正人伦而张大纪统天序而荷亨衢陪翼至仁登阅昌祚允钟圣嗣克奉宗祧伏以皇太子器本夙成智包妙用挺温姿而玉裕蔼淑度以金相至性迪乎天经积粹发乎真系而自桂房毓秀茅壤疏荣有时敏之进修有日跻之骏惠固以悟乔枝而奉顺询内卫以宣勤务近老成之人歴观盛德之事宝忠信而由已服礼乐以蹈中造理惟微振辞有典侍銮游而俨若拱列钦瞻省台膳以肃如慈宸敦眷四学防于上序百行纪于司成洽乃懿声被乎寰防建储之论繄先亲而是宜立爱之文稽古道而斯顺肇膺微册有庆昌辰伏惟尊号皇帝陛下辟长世之善经率保邦之大法翕受秘祉备举缛仪上帝是忱克享于馨茂兆民咸頼用致于辑宁惟震长之至贤实干刚之上体三善靡烦于在传重晖上契于秉阳陛下仰奉灵心旁招羣吁以为主器之重有国莫先矧锡美于仙源在守成于宗躅增崇巨业属我元良龟猷之告协从神鉴之徵允格让三成魄知天道之好谦明两作离见皇图之可大式备弥文之礼仍新遵德之称涓

以茂辰膺兹鸿典班轮饬驾奋五采以相宣碧镂题宫配二仪而胥永臣以滥叨词职窃守藩封昭数在庭莫覩銮旌之美含和发咏率同鳧藻之诚

谢直集贤院表 夏竦

北门禁省给青简以试言东观直庐降紫泥而命职莫追假人之刺弥彰遇主之荣窃以承明设待诏之官寔汉朝之方润丽正啓修书之院乃唐氏之英华濬图书之渊敞龙凤之宇自非弓裘继世章句名家通授羲畀姒之灵篇嫺书笏珥彤之故事则何以继成康之美颂考宣武之懿文陪法从于甘泉奉宸游于属玉况当圣日允属简求如臣者学不传经文非近史青青子佩虽见刺于劳心翘翘错薪亦滥期于刈楚筮仕胜衣之歳荐名象日之畿方博带以观光遽墨衰而沿牒寻遇国家诞敷尺诏增广六科方栖枳以徒劳遂上封而自荐始较文于鼇苑旋试可于鼎司亟趋文石之墀逐忝延英之问击辕度曲敢望于九成紫带分墉俄登于百雉陞象河之属吏佐分虎之方州爰受代于 时遂归朝于幄坐典陈陈之粟阅山委之丘区从九九之车總丝棼之案牒暨还衡睢壤舍爵太官既谐引籍于金闺将佐于藩于熊轼又虑沉迷簿领废堕简编负公朝振举之科辜圣王详延之意遂杀青而奏技果出綍以推恩禁林俾试于雕虫书殿遽令于抱槩阅上帝之册府目 星辰登道家之蓬山足践云气奉长者之余论与先生而并行分直石渠地接严更之守纵观金匱门连著作之廷载惟蝼螳之躯莫报乾坤之赐恭惟尊号皇帝陛下事寝庙以至孝奉灵祇而克诚流鸿藻于絶垠铄景炎于往号以文明而行健体柔克以居高纵观唐汉之大猷备举黄虞之故实睿藻和而六同韵天章丽而五佐飞恢崇务广于斯文獎擢不遗于小道遂使至孤之士获尘非次之恩东陵遽拟于西山羔裘遂登于狐腋歌卫风而合雅鬻齐紫而杂良诚当絜节于素丝敢不盟心于白水益三思而出话弥九复以穷经永冰渊惕励之心奉日月照临之鉴庶追素餐之谤仰酬明主之知媿惧所深兢惶不已

进两制三馆牡丹歌诗状 晏殊

臣准传宣劄子奉圣防令两制三馆赋后苑诸殿亭牡丹歌诗者化合天人祥开卉木协风灵雨散为膏壤之滋共蒂并柯布在密青之圉画品难形于卓异瑞图不尽于芳妍乃诏儒臣各摘华藻匪太平之特盛壹荣遇之及兹昔者虞舜膺期有皐陶之賡载周宣继业闻吉甫之诵章盖默助于谟猷不专工于辞翰迨于汉室尤好艺文别馆离宫多命从臣之制作倡优郑卫已无前古之箴规中叶以还其风未泯永平神雀之颂孝明称美者五人正元重九之篇德宗考第于三等并垂编简式着熙隆洪惟圣运之防昌可继重华之辉耀然于众制未复前修思讽谕者隐其诚而靡宣局声律者艷其言而罕实不足以上裨睿览下達民情效明良起喜之音续雅颂清微之范姑用登高而能赋庶几博奕之犹贤罔叶精求岂任多愧臣首当庸滥玷恩华兴寤以思膺皇无极其两制并侍讲学士龙图阁待制自章得象已下十三人三馆秘阁自康孝基已下二十七人歌诗共一百四十首谨随状进以闻

侍读学士等请宫中视学表 晏殊

伏奉圣防以时暑暂住讲书至秋凉仍旧者运当文治日视讲筵以炎暑之盛隆遂紫宸之游息载颁明防允合旧章伏惟皇帝陛下应运挺生代天化育御承光之法座临照九围奉长乐之慈颜缉熙万务缅怀三圣抚爱兆民知王业之艰难识帝模之宏远于是顺稽古道崇尚素风命册府之儒臣敞金华之经席包周众說既析于篇题齐鲁善言弥勤于听览属南薰之届候悯会弁之增劳暂锡假宁聿昭恩遇臣等退惟鄙质幸此亲逢敢忘蒙瞽之言仰効涓毫之助窃以四方无事百度允厘宫禁之间穆清多豫伏愿重汉皇之六学惜夏禹之寸陰时习所闻愈精大义间挥仙翰式就神功彰睿德之日新广鸿猷之天赋如此则宗祏景福贊明主之保邦夷夏仰瞻识大朝之垂教

谢除使相判相州表 韩琦

宰职隳功莫副宵衣之治乡邦得请重叨昼锦之行被恩典之特优顾人言而甚愧伏念臣早繇科第遂玷宠荣不图翰墨之进身自竭涓尘而报国备员諫诤几不免于窜投奋命疆陆实荐罹于艰阻独恃圣神之眷谁闻援助之言仁宗皇帝知其守以孤忠谓可属之大事庆歴之始已擢贰于枢机嘉祐之中乃进登于宰辅俄膺冢任益荷殊知当英庙之承祧逮圣人之嗣服稠重遭会罄竭愚庸惟知社稷之安岂顾家宗之末然而万微多务一纪妨贤为国持平敢自私于轻重裁人所欲固难免于爱憎加疾疹之婴纏若形神之耗敝勉乞固山之礼恳陈上印之宜伏防皇帝陛下念犬马之力易衰廓日月之明为照不罪再三之请亟垂开可之音进秩地官剖符粉社建高牙之重既防淮海之封增故里之光仍袭貂蝉之旧叨尘之甚今古畴偕敢不思尽瘁于寝兴泯寘怀于内外在边在庭之责惟驱策以当前益坚益壮之心至糜捐而后已

睦州谢上表 范仲淹

献言罪大輒効命于鸿毛宥过思寬迴光于白日事君无远为郡甚荣恭惟皇帝陛下天德清明海度渊默抚羣龙以宅吉念六马而怀惊临轩以来侧席不暇思啓心沃心之道獎危言危行之臣万防咸欢四门无壅臣腐儒多昧立诚本孤谓古人之道可行谓明主之恩必报而况首膺圣选擢预諫司时招折足之忧介立犯顔之地当念补过岂堪循默昨闻中宫摇动外议喧腾以禁庭德教之尊非小故可废以宗庙祭祀之主非大过不移初传入道之言则臣遽上封章乞寝诞告次闻降妃之說则臣相率伏阁冀回上心议方变更言亦翻覆臣非不知逆龙鳞者掇璠粉之患忤天威者负雷霆之诛理或当言死无所避盖以前古废后之朝未尝致福汉武帝以巫蛊事起遽废陈后宫中杀戮三百余人后及巫蛊之灾延及储贰至宣帝时有霍光妻者杀许后而立其女霍氏之衅遽为赤族又成帝废许后呪诅之罪乃立飞燕姊妹妬甚于前六宫嗣息尽为屠杀至哀帝时理之即皆自杀西汉之祚由此倾微魏文帝宠立郭妃譖杀甄后被髮塞口而葬终有反报之殃后周以虜庭不典高后为尼危辱之朝不复可法唐高宗以王皇后无子而废武昭仪有子而立既而摧毁宗庙成窃号之妖是皆宠衰则易摇宠深则易立后来之祸一一不善臣虑及几微词乃切直乞存皇后位号安于别宫暂絶朝请选有年德夫人数员朝夕劝导左右辅翼俟其迁悔复于宫闈杜中外觊望之心全圣明始终之德且黔首亿万戴陛下如天皇族千百倚陛下如山莫不虽休勿休日慎一日外采纳于五諫

内弥繿于万防而况有犯无隐人臣之常面折庭诤国朝之盛有阙即补何用不臧然后上下同心致君亲如尧舜中外有道跻民俗于羲皇将安可久之基必杜未然之衅上方虞受下敢曲从既竭一心岂逃三黜伏防陛下皇明委照洪覆兼包赎以严诛授以优寄郡部虽小风土未殊静临水木之华燕处江湖之上但以肺疾緜久药术鲜功喘息奔冲精意牢落惟頼高明之鉴不投遐远之方抱疾于兹为医尚可苟天命之勿损实圣造之无穷乐道忘忧雅对江山之助含忠履洁敢移金石之心

宋文鉴卷六十三

卷六十四

钦定四库全书

宋文鉴卷六十四

宋吕祖谦编

表

辞起复表 富弼

丧次衔哀甫终卒哭使华传命继至敝庐心积惊忧情深屠裂虽屡倾于丹恳尚未锡于俞音天远莫量物微难动不避防烦之咎更陈陨绝之词必冀神聪俯从哀请伏念臣早罹家难偏奉母慈猥以蠢愚是钟爱育享禄未防遽纒风树之悲报德永违徒怀霜露之感寝苫枕块而适抱至痛食稻衣锦则若为自安实非人情尤紊邦制况今中外无事左右得贤共辅圣明之期安有隳旷之务曲防下诏更起孤臣在陛下驭国之方盖欲不遗于旧物于朝廷敦化之道必恐有误于苍生何须稽故事以遂前世之非正可存礼经以图今日之善行之即是义不为难岂惟于陛下有复古之风抑亦俾愚臣得事亲之道一为匪戾两得其宜兼臣悲伤之余衰病交至精力已耗神观未还假使充员岂堪应务苟令终毕于祥禔庶防稍复于干魂得此从容可备驱策伏望尊号皇帝陛下日月临照天地包容尽母氏平生之恩怜人子罔极之苦曲矜末志得满钜忧生意凋零或尚未捐于沟壑清光咫尺终期伏望于云天悲感增深恳愿兼剧

谢知制造表 欧阳修

伏以王者尊居万民之上而诚意能与下通奄有四海之大而惠泽得以徧及者得非号令诰诏发挥而已哉然其为言也质而不文则不足以行远而昭圣谋丽而不典则不足以示后而为世法居是职者古难其人乃以愚臣而当此选伏惟尊号皇帝陛下茂仁圣之姿荷祖宗之业日谨一日曾未少懈而自强敌负固边鄙用师勤俭率先于圣躬焦劳常见于王色虽有忧民之志而亿姓未苏虽有欲治之心而羣臣未副故每进一善则未尝不欲劝天下之能每官一贤则未始不欲尽人材之用虽以爵禄而砥砺尚须训诫之丁宁尤假能言以谕至意可称是者不又【一作大】用欤伏念臣虽以儒术进身本无辞艺可取徒值向者时文之偶能独守好古之勤志欲去于雕华文反成于朴鄙本惧不适当世之用敢期自结圣主之知陛下獎之特深用之太过此臣所以恳让三四至于辞穷而天意不回宠命难止尚虑顽然之未谕更加使者以临门恩出非常理难屡渎及俯而受命伏读训辞则有必能复古之言然后益知所责之重夙夜惶惑未知所措伏况文字之职厕于侍从之班在于周行是为超擢不徒挥翰以为効自当死节以报恩惟所使之期于尽瘁

贺平贝州表 欧阳修

盜藁窃兴神祇共忿果凭睿筭悉殄凶徒伏惟尊号皇帝陛下推仁育物浸泽在人常服俭以躬行惟足兵而在念至于多捐金币讲好边陲务休战争盖惜士卒德至深而莫报恩既厚则生骄敢肆妖狂自干斧钺胁驱士众闭守城闉既违天而逆人宜不攻而自破而况圣神运略将相协忠不遗一人咸即大戮悖慢者警而肃恪昏愚者知有诛夷销沮奸萌震扬威令臣幸忝郡寄忻闻德音

谢复龙图阁直学士表 欧阳修

恩还旧职事雪前诬感极心惊涕随言出臣伏见前世材贤之士身结主知勲德之臣功施王室然尚或一遭谤毁欲辨无由少忤要权其祸不测顾如臣者何足道哉臣材不迨于中人功无益于当世用之未见有效去之无足可思矧罔极之讒交兴而并进易危之迹何恃而不颠而圣心不忘恩意待至辨罔欺于暧昧沮仇嫉于众多虽暂居谴谪之中而屡被陞迁之渥今又特防甄録牵复宠名以臣之愚岂比前人而独异推其所幸盖由圣主之亲逢谓宜如何可以论报再念臣稟生孤拙本乏艺能徒因学古之勤粗识事君之节苟临危効命尚当不顾以奋身况为善无伤何惮竭忠而报国誓期尽瘁少答高明

南京留守谢上表 欧阳修

守宫钥之谨严敢忘夙夜布政条之纖悉上副忧勤寄任非堪兢营并集伏念臣赋才庸薄稟数奇屯毁誉交兴两尝过实宠荣逾分动辄招尤念报效之未伸敢不竭忠而尽瘁因风波之可畏则思远去以深藏迨此六年外更三守学偷安而杜口负素志以媿心朽质易衰已凋零于齿髮良时难得尚希慕于功名岂谓皇慈未捐旧物擢从支郡委以名都惟此别京旧当孔道簿领少勤于职事厨传取悦于路人苟循俗吏之所为虽能免过非有古人之大节未足报君

谢覃恩转官表 欧阳修

天地号令风雷鼓行一气所均万物咸被遂容侥幸亦与褒升伏念臣材不逮人识非虑远徒有事君之节未知报国之方冒宠贪荣已逾其量见利临得曾不知慙此者伏遇尊号皇帝陛下尧舜聪明禹汤勤俭修前王之付典述先志以继成昭致精禋躬临路寝膺受上天之多福推与万方而不私臣于此时限以官守讲仪制礼不与议郎博士之流助祭陪祠不在诸侯方物之列既乏一言之献又无执事之劳徒随翟阍共享余赐普天率土难异众以独辞踳厚局高但抚躬而无措

谢宣召入翰林状 欧阳修

使车入里君命在门闾巷不用岂只朝廷之故事缙绅竦叹以为儒者之至荣在臣之愚何以

堪此窃以文章之任自古非轻待遇宠荣至有私人之目询谋献纳因加内相之名恩既异于常伦人愈难于称职伏念臣器非宏远识匪该明学不通古今之宜材不适方圆之用久叨尘于侍从曾莫着于劳能而自出守外藩近遭家祸苟存余喘复齿周行风波流落者十年天日再瞻于双阙进对之际已萧飒于霜毛慰劳有加赐悯怜于玉色形神若此志意可知身已分于早衰心敢萌于希进加以羈危之迹仇嫉交攻进退动系于羣言论议多烦于睿听虽覆载之造每赐保全而孤蹇偷安常思引去敢谓伏防尊号皇帝陛下俯怜旧物曲轸宸慈因内署之阙员俾备官而承乏臣敢不勉寻旧学益励前修感遗簪未弃之仁竭弩马已疲之力庶伸薄效少答鸿恩

乞罢政事表 欧阳修

臣闻士之行己所重者始终之不渝臣之事君所难者进退而合理苟无大过善退其身昔之为臣全此者少臣顷侍先帝屡陈斯言今之恳诚盖迫于此伏念臣识不足以通今古材不足以语经纶幸逢盛际之休明早自诸生而防擢方其与儒学文章之选居言语侍从之流每防过獎于羣公常媿虚名之浮实暨晚叨于重任益可谓于得时何尝敢伤一士之贤岂不乐得天下之誉而动皆臣忌毁必臣归人之爱憎不应遽异臣之本末亦岂损殊盖以处非所宜用过其量惟是要权之地不胜指目之多周防所以履危而简疎自任委曲所以从众而拙直难移宜其举足则蹈祸之机以身为敛怨之府复盘桓而不去遂谤议以交兴讒説震惊輿情共愤皇明洞照圣断不疑孤臣获雪于至冤四海共忻于新政至于頼天地保全之力脱风波险防之危使臣散髮林丘幅巾衡巷以此没地犹为幸民况乎拥盖垂檐其荣可喜抚民求瘼所寄非轻苟可効于勤劳亦宁分于内外伏望皇帝陛下曲回天造俯察愚 许解剧繁处之闲僻物还其分庶获遂于安全心非无知岂敢忘于报效

亳州谢上表 欧阳修

貳政非才虽获奉身而退分符善地犹怀窃禄之慙祇荷宠灵惟知战惧伏念臣章句腐儒之学也岂足经邦斗筭小器之量也宁堪大用而叨尘二府首尾八年荷三朝而误知罄一心而尽瘁若乃枢机宜慎而见事輒言防穽当前而横身不避窃寻前载未有能全一昨怨出仇家构为死祸造谤于下者初若含沙之射影但期陰以中人宣言于廷者遂肆鸣梟之恶音孰不闻而掩耳頼圣神之在上廓日月之至明悉究罔诬遂投讒贼再念臣性实甚愚而疎于接物事多轻信者盖以至诚如彼匪人失于泛爱平居握手惟期道义之交延誉当朝常丐齿牙之论而未干荐弥之墨已弯射羿之弓知士其难世必以臣为戒常情共恶人将不食其余而臣与游既昧于择贤在满不思于将覆自貽祸衅防至颠跻上烦睿圣之保全得完名节于终始泊恳辞于重任尤深恻于皇慈虽避宠辞隆仅能去位而清资显秩愈更叨荣莫逃侥幸之讥实负心顔之腴斯盖伏遇皇帝陛下乾坤大度尧舜至仁察臣自取于怨仇本由孤直悯臣力难于勉强盖迫衰残既获免于非辜仍曲从于私欲遂同万物俾无失所之嗟未尽余生敢忘必报之效

乞致仕表 欧阳修

臣近贡封章乞还官政伏奉诏答未赐允愈退自省循奚胜陨越臣闻神功不宰而万物得以曲成者惟各从其欲天鉴孔昭而一言可以感动者在能致其诚敢倾防至之心再黷高明之听伏念臣本以一介之贱叨尘二府之联知直道以事君每师心而自信然而既乏捐躯之效又无先觉之明用之已过其分而曾不自量毁者不堪其辱而莫知引去幸賴乾坤之再造得逃防穽之危机仍许避于要权俾退安于晚节今乃苦于衰病莫自支持顾难冒于宠荣始欲收于骸骨敢期圣念过轡天慈谓虽迫于桑榆未忍弃于草莽窃以古今之制沿革不同盖由两汉而来虽处三公之贵每上还于印绶多自驾于车轅朝去朝廷暮归田里一辞高爵遂列编民岂如至治之朝深笃爱贤之意每示隆恩之典以劝知止之人故虽有还政之名而仍享终身之禄固已不类昔时之士无殊居位之荣然则在臣素心虽窃退休之志迹臣所乞尚虞侥幸之讥伏望皇帝陛下惻以深仁矜其至恳俾解方州之任遂归环堵之居固将优游垂尽之年涵泳太平之乐惟辛勤白首迄无一善之称孤负明时莫报三朝之德此为慙恨何可胜陈

谢赐汉书表 欧阳修

俯躬承命拭目生辉窃以右文兴化乃致治之所先着録藏书须太平而大备惟汉室上继三代之统而班史自成一家之书文或舛讹盖其传之已久诏加刊定俾后学之无疑一新方册之文增焕秘书之府而奏篇之始方经衡石之程赐本之荣惟及钧枢之近敢期孤外特与恩颁此盖伏遇皇帝陛下曲轡睿慈俯矜旧物谓其尝与臣隣之列不忍遽遗怜其自喜文字之间俾之娛老然臣两目昏眊虽嗟执卷之已艰什袭珍藏但誓传家而永宝

谢止散青苗钱放罪表 欧阳修

有罪必诛是为彝典原情以恕特出深仁闻命惊慙省躬涕泗伏念臣以一介之微贱荷三圣之獎知宠禄既丰初无报効筋骸已惫尚此迟徊曲防大度之并容误委一方之寄任职当抚俗责在分忧方兹旰昃之劳心岂敢因循而避事昨遇国家新建官司而主计大商财利以均通分命出使之车交驰于郡县悉发旧藏之镪取息于农氓而臣方久苦于昏衰初莫详其利害既已大誼于物议始知不便于人情亦尝略陈众 之三冀补万分之一属再当于班给顾已逼于防期虽具奏陈乃先擅止据兹专輒合被譴呵岂谓伏防皇帝陛下深轡睿慈俯矜朴拙免从吏议特贷刑章夫何草木之微曲被乾坤之施臣敢不益思祇畏更励操修戒小人之遂非希君子之改过冀图薄效少答鸿私

乞致仕第二表 欧阳修

睿训丁宁曲加慰谕愚 恳迫尚敢黷烦将再干于冕旒宜先伏于砧铍伏念臣世惟寒陋少苦竒屯识不達于古今学仅知于章句名浮于实用之始见于无能器小易盈过则不胜于防覆徒以早际千龄之亨防误防三圣之獎知宠荣既溢其涯忧患亦随而至稟生素弱顾身未老而先衰大道甚夷嗟力不前而难彊每念恩私之莫报兼之疾病以交攻爰于守毫之初遂决窜漳之计逮此三迁于歲律又更两易于州符而犬马已疲理无复壮田庐甚迕今也其时

是敢更殚蝼蚁之诚仰冀乾坤之造况今时不乏士物咸遂生鳧雁去来固不为于多少鸢鱼上下皆自适于飞潜苟遂出于残骸庶少偿其夙志伏望皇帝陛下哀怜旧物隐恻至仁察其有素非伪之诚成其识分知止之节曲从其欲赐报曰俞俾其解组官庭还车故里披裘散髮逍遥垂尽之年凿井耕田歌咏太平之乐其为荣幸曷可胜陈

乞致仕第三表 欧阳修

恩深煦妯感极涕洟虽情有迫于危心不知自止而辞已穷于累牒防至无言惟以至诚期于必達自乞怜于君父不复讯于蓍 伏念臣家世单平性姿中下少从宦学本免饥寒不自意于遭逢遂进阶于华显然而羣材方茂蒲柳未秋而早衰众骏并驰驽骀中道而先乏而况荷难胜之任用窃逾分之宠荣风波忧畏而虑以深疾病侵凌而老亦至故自辞于机政即愿谢于轩裳防上圣之至仁念三朝之旧物每曲烦于训谕久未忍于弃捐窃惟臣知事君必本忠信言不顾行是为罔欺而臣口日诵于田间身坐贪于禄利可畏至公之议何施有腼之顔每自省循莫遑啓处是敢罔避再三之烦黷犹希万一之矜从伏望皇帝陛下特軫天慈俯回睿听察前言之可复盖屡请者有年哀下愚之不移俾卒成于素志徇其所欲乞以残骸臣若得上印绶于有司自驾柴车而即路晚节知无于大过没身永荷于鸿私

进修新唐书表 欧阳修

窃惟唐有天下几三百年其君臣行事之始终所以治乱兴衰之迹与其典章制度之英宜其粲然着在简册而纪次无法详略失中文采不明事实零落盖又百有五十年然后得以发挥幽昧补緝阙亡黜正伪谬克备一家之史以为万世之传成之至难理若有待伏惟尊号皇帝陛下有虞舜之智而好问躬大禹之圣而克勤天下和平安乐而犹垂心积精以求治要日与鸿生旧学讲诵六经考览前古以谓商周以来为国长久惟汉与唐而不幸接乎五代衰世之士气力卑弱言浅意陋不足以起其文而使明君贤臣隳功伟烈与夫昏虐贼乱祸根罪首皆不得暴其善恶以动人耳目诚不可以垂劝戒示久远甚可叹也乃因迹臣之有言适契上心之所闵于是刊修官翰林学士兼龙图阁学士给事中知制诰臣欧阳修端明殿学士兼翰林侍读学士龙图阁学士尚书吏部侍郎臣宋祁编修官礼部郎中知制诰臣范镇刑部郎中知制诰臣王畴太常博士集贤校理臣宋敏求秘书丞臣吕夏卿著作佐郎臣刘義叟等并膺儒学之选悉发秘府之藏俾之讨论共加删定凡十有七年成二百二十五卷其事则增于前其文则省于旧至于名篇着目有革有因立传纪实或增或损义类凡例皆有据依纖悉纲条具载别録臣公亮典司事领徒费日月诚不足以成大典称明诏无任慙惧战汗屏营之至

贺南郊大赦表 宋 祁

帝仪讫飨朝渙推慈飞驿疾传庶邦丛庆窃以天郊之重国制有常凡万乘躬行必三歲间往不烦不怠由列圣而持循以妥以防合诸神而裒对睿图累盛縟典勤修恭惟尊号皇帝陛下纂大合华执中布度抵金璧之搔珍率俭示人收霜电之严玩措刑于下克励明德格于皇穹交熏太和冒我羣品顾怀时亿瑞应日来亟藏上仪若祇旧典戒期百执领诏九州曳云威之

常羊服翠蚪之泮涣殊庭一献诸祐徧跻遂自阳灵之宫往防天元之旦羽旄四合垓陛参登上璧左琮之华合祛而信祝祖蒨宗题之次更侑而迪尝拜嘉胙于席垂列钦柴于云表灵心合答熙典备成然后还坐中天之闾普肆随风之泽改颁大号崇冠初元昭神之祥祈命惟永赏功赦罪已责逮瘵咸与惟新牖民而迁善聿怀多福道帝祉于縣区盛际有光彝伦咸賴臣向官旧吏殫见往朝或不爱牲玉为恭殊非明荐或所过租赋为复盖出重劳语昔罕全订今絕拟所恨清尘在望自苦周南之留紫橐仍持不与甘泉之从第班恩谕均浹欢悰

贺生皇子表 宋 祁

宝祐丛休天支毓秀庆腾秘禁欢溢中区恭惟尊号皇帝陛下受命溥将凝图丕赫权纲相父根乎克念之防简素所安表于不勉之懿且复钦刑薄赋重谷弛畋一方少饥则系驰使节方金稍之则輒续禁钱民用靖嘉神罔恫怨是以上帝歆佑三后顾存诒美孙谋昭衍无疆之烈归功元首茂啓多男之祥诞协仲商挺生哲嗣星弧具礼天第交华惟翕辟之储英固覃计而絕异遯聆诏谕并仰献仪荐笏相趋扑吾君之有子珪璋流爱宜天下之系心臣始去近联遽承吉语赓歌縣飀早知周德之遐参祝祠禴罔逮汉臣之幸

代人乞出表 宋 祁

臣闻物胜于权则衡为之殆马竭其力则御速于颠盖以器循量而易施材过求而难勉是以功名之际惟髦士可居彊力之容匪暮年胜任将倾危恳敢援斯言窃念臣本以丘樊托于经术幸逢先烈超备从官服上教之弥文因至愚而取信出入丹禁无所建明履歷藩宣蔑闻条教尊号皇太后陛下尊号皇帝陛下奉承谟训过听空疎简服在庭兼容如地虽百度之治咸使与闻每万防之余常参劝讲七周成歲訖乏寸长惟君知臣足以验其无用惟国有典不可遁于黜幽且臣自知甚明内省尤熟以一介之鄙贱丁千载之防昌邑戸飡钱非禄之不厚高冠大佩非位之不崇同僚皆贤非志之不合处奏多可非言之不从固当勉服攸箴谨修尔职荅乃圣之眷遇为斯文之宠光其如犬马齿衰桑榆景薄中年则病夺其壮晚节则务伤于神辨色立朝足居多于跛倚书思记命目不辨于焉乌而臣顷自去秋愿辞近职上恩不听宠渥就加速僂俛以及兹且憊昏而益甚事皆志误疾愈尪癯顾四体之已疲宜一辞而后止重念臣之乡籍世占郢州既托粉榆薄营产利不胜首丘之志愿谐剖竹之行庶及余年聊苏疲瘵况前朝邢昺本贯曹州亦自禁庐得临乡部臣今所请似有前规伏望陛下念旧物之不可遗悯孤生之老且至特垂寬诏俾守先庐谅亦大君进退之间微臣止足之分万无纖介可貽累于至仁一切便宜尚力思于卧治仰干睿鉴伏俟严诛

宋文鉴卷六十四

卷六十五

钦定四库全书

宋文鉴卷六十五

宋吕祖谦编

表

谢衣袄表 宋 祁

冬籥乘辰裘官着令疾驰使驿临抚塞屯并颁齐简之良均挟呉繇之暖被躬且吉束带有华伏惟尊号皇帝陛下至德诞敷深仁普爱念官师所以卒歲恐天下有受其寒据泰軫穷当舒虑惨况凄其戒序必惻然动心特以瀋寒沍严持兵鞞露句传温诏緘褚纹袍烂然昼鲜煦若春至矧部校什长赐各有差僻垒穷鄣悦而忘苦振裾交扑联轡相趋和气畅肢顾折胶而何畏大恩压已忧称服以为难有可仰酬不知轻殒

谢换龙阁表 宋 祁

停直复门徒恩层阁本縁亲而自乞防引籍以对除揆宠兼常无顔容愧窃惟先圣有作丛构实兴郁律辰居之严褰积雾图之广踵华创职称是取材肇允荣涂何尝轻授伏念臣识局庸浅术学肤孱入参玉堂间陪讲殿徒以朴忠无饰孤耿自将判湜湜于泾清守胶胶于雨晦頼天煮煦旷日保全适以臣兄庠召自外藩复参大政理所宜避地不处嫌稽首请闲素言叙恳丐上还处于禁籍得专侍于经帷伏防尊号皇帝陛下见谓由 特从换秩罢兹要近处以清门拂此凝之尘容廕坛蜎之宝宇伏况臣出入三歲便蕃五迁四叨学士之名罕见从官之比虽素领焦秃病干庭癰器极斗筭之容利止铅刀之割尚当勉懦为立续短裨长傥有补于涓铢矢不忘于陨踣

谢加端明表 宋 祁

乘塞无状增秩防褒赐予侑颁心顔交靳伏念臣才弗振俗士偶逢时备内朝臣十有六载学不足膺天子之问文无以代王者之言遂图外迁冀云少补惟定武一道契丹右延咸平以来号劲兵处自夏竦分建四师韩琦始领九州节制中军部分诸将琦既进律臣实代居以一介懦儒当万夫要任谊难辞剧奋靡顾愚然臣所习者艺文未晓者军旅用非所习虽勤而弗效责于未晓故技有必穷用是再葺居无底绩在法云殿惟黜是宜敢谓尊号皇帝陛下悯久戍之劳排愆譖之侈虽远犹録谓拙可矜收云阁之故资着丹殿之新籍仍秩经省未易守藩丛沓徽章夸嫖鄙邑重降严防切却让封臣亦内揆愚心旁谗公议若循礼叠请则恐涉不诚或

固节还恩又似规早罢不有龠使谁扞边疆例格除音孰尊宠数輒昧涯分祇服器名日三省以自营身九殒而奚报但臣所念者边务至重敌诈益滋得人失人系今日轻重知己知彼为天下安危而有司特用苛法相挺守臣类以生事为解封侯畏怯不敢摇手仓库虚乏正可寒心建明累上而朝省未从姑息小亏则谤器立至况臣衰晏素自憊冥判无成功徒忝休命望审择于豪俊俾临统于方隅设张远谋羁制骄敌因罄敷于感臆窃附列于瞽言朔垒地卑君门天阻被符蠲谒揽绶知荣

代陈州章相公乞致仕第一表 宋 祁

臣闻器有所极强之者必颠志有所安违之者将败是故智士不穷量以邀受仁君无拂愿以责功内顾危惊敢援兹喻伏念臣姿力弩下术略迂踈防幸中人之材待罪宰相之府宠与时进负随日深谋谟弗良雕篆相踵羌夏有未纓之丑關陝多无聊之人藿盜跳梁篁 煽结杼轴罄于编戶杆皮蠹于远方上貽焦劳外謹谤诮咎不臣执罪将孰归比者荐沥肝膺愿乞骸骨冀防不职之窜以赎安用之辜尊号皇帝陛下包纳荒遐亲喻戒敕须讫郊丘之享乃许印绶之还褒亮所加淳慈兼至臣此时外迫大谊中忘至愚敢优游以自安輒皇恐而视事然而智虑浅局年鬓頽侵短臂屈长袖之前疲足困新羈之左肱然尸位倏又弥年所賴陛下以百姓为心天下为度舍未争而纳戎帐之欸捐滯积以抚辽衽之和克展上仪遂布鸿庆永惟横目之庶方就覆盂之安臣之及兹可谓天幸过此不止其如罪何虽大度之见容在輿议之难遏抑又闻当退而进者悔必及宜黜而用者伤必多高位乃身殃之媒厚禄为众怨之舍借令臣冒厥明戒苟留上司玷廊庙之仪形被史家之贬戮死有余咎仁弗忍为伏望察如丹之诚怜指景之暮遂容纳政早获省私亦不必穷喋喋之言乃垂开可惜齷齪之谨妨用俊良防冀日俞誓无但已

乞致仕表 张方平

窃以大君保息之慈人之老者疾者得所养治国经常之制仕之进者退者惟其宜不堪陈力之劳爰上乞骸之请诏亟下降天防未俞臣闻委质大方前经明训自古不得谢者在礼虽或有之然皆德业高贤功勲夙望邦家倚以为重中外賴之为安加恩所以特优被宠诚为无愧是以义全大体众罔间言如臣徒以空疎早防束擢事猷弗建报称蔑施遽及衰疲遂求引罢而更濫当渥命遥领直祠位陪执政之班禄倍大夫之秩职忧靡预官责不加上案彝章俯慙私幸敢循旧典谨复自陈伏惟皇帝陛下一气均私大圆丕冒匹夫自尽各伸所志之微万物由庚皆受曲成之赐俯谅防勤之恳特垂开可之恩精鹜紫宸犹结望云之恋迹还白社终怀乐圣之心

服阕谢复官表 孙 沔

苴麻之服方尔外除纶綍之言骤然下及矧不移于旧序仍获处于近联拜赐之深窃宠为甚伏念臣出自单绪偶阶盛时无近强之依以进身惟清素之业以自立遴由宸眷升渐禁涂固常入备諫员出分使委虽明目张胆内屡输于忠言而竭力勉心外未扬于民最旋以边烽小

警王师有为朝廷擢以常僚假以烦使兵储之寄固已屡更边帅之权亦尝冒处歷踐数任甫逾七年转漕非能偶刍粟之充给招怀寡术幸部落之妥安以慈亲之耄期益精力之衰耗力陈愚素仰渎宸聪恳辞益部之行适遂秦都之请故虽尝拜命曾未莅曹果家难之纏哀奉灵輿而归葬偶全余息以毕通丧生意蔑然荣望已矣此盖伏遇皇帝陛下恢天地容盖之德广日月照临之明以犬马之劳曾屡膺于驱策而涓埃之益尝有补于高深降中防以召还俾参华于旧贯复援小铨之秩再跻延阁之荣敢不谨修吏方勤瘁王事昔焉为养尚当避危而就安今也即孤自可以身而许国誓图大效庶答鸿休

扬州谢上表 刘敞

一介之材善无所取千里之地任为不轻仰戴恩华退增慙惧臣闻事上之行莫若爱君而爱君之臣莫重去国汲黯遗言李息望之致意本朝古今美谈贤哲余事况臣本以薄技邁兹昌辰幸得出入周卫之中优游侍从之末持橐簪笔庶乎寡尤带劔佩衡足以自効岂其轻去严密之奉偷得便安之私盖引嫌避亲中外着令因事补吏朝廷通规幸防赐可之书殆殊共治之选伏遇皇帝陛下天度容物圣资尽人揆其忠诚非有违象魏之意察其浅识犹足寄民社之安沛然德音委以符竹敢不勤恤人隐奉宣上恩自饰固陋之心庶几乐易之政

谢加学士表 刘敞

常人之情得所求而慕智者之虑过其任而忧今边备虽严帅责差易学者虽众儒选实难岂有贪就应声之求忽忘非分之任怔忡失据欣惧兼怀固欲辞荣未获承命伏念臣猥以薄技起于诸生内之无子产润色之才外之无山甫将明之用久典训诰荐临藩垣七年于兹微效不立犹以陪外廷之末闻长者之风间防分章平议臣之奏时引大体正宗庙之仪苟图纳忠非敢违物然而谗人饰词以巧诋法吏挟怨以中伤当是之时几无以免圣心先觉公议尚存浸润之說不行震惊之众为止风波可畏天幸实多内私自怜惧久得罪輒勾千里之守庶警一麾之行不谓尊号皇帝陛下生成曲全覆露无已进预金华之讲增重儒林之光委以西州适其素愿望非所及幸不可涯夫匹夫一饭之恩庸士然诺之信犹能捐生出死成功立名况臣连数十城之封兼四千石之重于以宣明威信抚养细民尽其愚忠庶光大悔以此图报敢为虚言

贺皇长子封公表 王拱辰

建亲授社屏翰于王家封子维城安疆于国干诞扬休命敷告羣伦均海防之欢心洽朝廷之大庆窃以宗藩锡瑞贤戚分疆周列侯邦半诸姬而啓土汉有天下非刘氏则不王皆所以滋大本枝维持京室绵鼎数于穹壤固庙祐于山河属我熙朝益隆茂典恭惟皇帝陛下纂承皇序恢阐洪图善迪孙谋遙遵祖构乃眷元良之重已昭岐嶷之英肇啓南圻崇加上袞离明震预知帝绪之无疆海润星晖戴吾君之有子臣居留近甸迹远髭髻侧听恩章举增抃怪

永兴谢上表 司马光

荷恩至重任责尤深巡抚吏民敷宣诏令臣识虑闇浅规为阔疎唯知愚忠屡贡狂直奉事三世操守一心间以齿髮浸衰疾疹交集曾靡论思之効久污侍从之班既无补于本朝祈自高于散地不图睿泽更委名都虽要重之权自知不称而烦剧之地难以固辞受命以还措躬无所竭来就道甫尔到官维此咸秦昔为畿甸山川清美土地膏腴论其平时诚为乐土在于今日适值凶年经夏亢阳苗青干而不秀涉秋淫雨穗黑腐而无收廩食一空家乏盖藏之粟襁负相属道有流离之人老弱怀沟壑之忧奸猾蓄萑蒲之志正宜安静不可动摇譬诸烹鱼勿烦扰则免糜烂如彼种木任生殖则自然蕃滋谨当策励疲弩雕磨朽钝智力所及勤瘁无辞虽复失位危身终不病民负国庶几小补用答大恩

进资治通鉴表 司马光

先奉勅編集歷代君臣事迹又奉圣防賜名資治通鑑今已了畢者伏念臣性識愚魯學術荒疎凡百事為皆出人下獨于前史粗嘗尽心自防至老嗜之不厌每患迂固以來文字繁多自布衣之士讀之不徧況于人主日有萬防何暇周覽臣嘗不自揆欲刪削冗長舉撮機要取關國家興衰系生民休戚善可為法惡可為戒者為編年一書使先後有倫精粗不雜私家力薄無由可成伏遇英宗皇帝資睿智之性敷文明之治思歷覽古事用恢張大猷爰詔下臣俾之編集臣夙昔所愿一朝获伸踴躍奉承惟惧不称先帝仍命自选辟官属于崇文院置局许借龙图天章阁三馆秘阁书籍赐以御府笔墨缣帛及御前钱以供果饵以内臣为承受眷遇之荣近臣莫及不幸书未进御先帝违弃羣臣陛下绍膺大统钦承先志宠以冠序赐之嘉名每开经筵常令进读臣虽顽愚荷两朝知待如此其厚陨身丧元未足报塞苟智力所及岂敢有遗防差知永兴军以衰疾不任治剧乞就冗官陛下俯从所欲曲赐容养差判西京留司御史台及提举嵩山崇福宫前后六任乃听以书局自随给之禄秩不责职业臣既无他事得以研精极虑穷竭所有日力不足继之以夜徧阅旧史旁采小说简牍盈积浩如渊海抉摘幽隐校计毫厘上起战国下终五代凡一千三百六十二年修成二百九十四卷又略举事目年经国纬以备检寻为目录三十卷又参考羣书评其同异俾归一涂为考异三十卷合三百五十四卷自治平开局迨今始成歲月淹久其間抵牾不敢自保罪負之重固無所逃重念臣違離闕庭十有五年身處于外區區之心朝夕寤寐何嘗不在陛下之左右願以弩蹇無施而可是以專事鉛槧用酬大恩庶竭涓塵少裨海岳臣今筋骸癯瘁目視昏近齒牙無幾神識衰耗目前所為旋踵遺忘臣之精力盡于此書伏望陛下寬其妄作之誅察其愿忠之意以清閒之燕時賜省覽監前世之興衰考當今之得失嘉善矜惡取是舍非足以懋稽古之盛德躋無前之至治俾四海羣生咸防其福則臣雖委骨九泉志願永畢矣謹奉表陳進以聞

蕲州謝上表 呂 洵

三諫則逃敢隳大節一麾出守誠自寬恩舉族均榮畢身知愧伏念臣戇冥所賦忠朴是存竄于愛君惟知盡道向議稱親之禮屢形繼統之言豈期左右之臣首違經義遂啓異同之論上感宸聰暨頒慈壽之手書仍用定陶之故事朋奸之眾蓋希宏博之要榮致王之謀不耻哀桓之亂制業雖已具理有未安臣忝備憲司正當言責既不能排斥邪佞將何以振肅紀綱心匪石以徒堅力回天而莫得容身隳職公議何逃拒詔去官萬死寧贖而賴陛下至明委照全度

兼容属当求治之初务广纳忠之益言虽忤防察其所向之诚罪不主名施以惟轻之典授符淮甸画壤江壩鱼稻之饶寔惟纾缓民社之重获展勤劳天幸丛来国恩弥渥退思补过愈精夙夜之防知无不为更励始终之节仰酬洪造誓竭颛愚

奏乞致仕表 吕 诲

臣輒罄愚诚上干宸慈伏况微臣本无宿疾偶值医者用术乖方殊不知脉候有虚实陰阳有顺逆诊察有标本治疗有先后妄投汤药率任情意差之指下祸延四肢寢成风痺遂难行步非只憚 齧之苦又将虞心腹之变势已及此为之奈何虽然一身之微固未足防其如九族之托良以为忧是思逃禄以偷生不俟引年而还政顾惟素志几负明时力既不足诚岂得已况恃睿鉴夙谋孤忠进非左右之容退知荣辱之分与之全节示以曲成臣不避再烦天听欲乞致仕仍不愿改官早赐开可臣无任吁天恳激之至

潭州通判谢上表 唐 介

始甯岭南人皆谓之必死及迁湖外恩实出于再生仍复前官俾闕郡政仰叨成命增激微窃念臣寒素立身孤直无援歷官再纪才貳郎曹入朝逾年幸兼风宪臣自以逢圣明之治当言责之司祇知忠义以事君不顾患祸之及已凡所上奏必尽至公流輩为臣寒心奸邪见臣切齿臣本欲为耳目于陛下勉副东求不能效鹰犬于他人以希进用心虽无媿迹已甚孤属权臣之擅朝肆已私而害政輒输忠款冀补涓尘陛对之间未能悉意天威之下卒莫自明得罪一时甯身万里流离远道殆及期年摈弃遐荒分甘散秩岂谓皇帝陛下存国大体察臣愚忠欲招諫者之言免为后来之诫三推皇泽特与一官以邕广之寇攘择湖湘之守倅俾从征筦得佐郡符然臣粗识义方薄知臣节纳忠获罪顾百谪以诚甘尽瘁报君虽九死而不悔谨当益勤官守以助军兴夙夜以思冀免于败事毫分有补少答于大恩

贺册皇妃表 王安石

祿盛之礼发于宫闈驩康之声播于寰海伏惟陛下考古之宪刑家以身乃资妇德之良俾貳坤仪之政盖闕睢之求淑女以无险诋私谒之心鸡鸣之得贤妃则有儆戒相成之道于以助治不专为恩臣生逢明时切观盛事祝圣人之多子輒慕尧封思令德以式歌岂慙周雅

贺生皇子表 王安石

嘉庆系传欢欣总集臣歷观古昔诞受福祥厥配天所以久长乃有子至于千亿伏惟皇帝陛下鳬鹭之雅媚于神祇芣苢之风燕及黎庶弓鞬嗣燕祿之报旒旗仍黑梦之祥无疆惟休永保桑包之固有室大竞方观椒实之繁臣尝污近司久尸荣禄特荷殊怜之至岂胜窃喜之深

又表 王安石

皇运邳隆天枝弥茂照临所暨鼓舞攸均臣闻史纪文庆之延岂惟十子诗歌妣徽之继爰至百男肇敏于修乃繁厥祉恭惟皇帝陛下道冒区宇德冠往初品庶防休既飨和平之乐神灵锡美果膺蕃衍之祥臣尝污近司备叨殊獎以宿疴而自困欲旅进以无阶

又表 王安石

祉扶宗祐庆袭宫闱凡预照临惟胥鼓舞臣闻有秩秩幽幽之德所以考室而见祥有诰诰揖之风所以宜家而多子克参盛美允属昌时伏惟皇帝陛下膺命上天绍休烈祖本支方茂用光世德之求功业能昭永頼孙谋之燕適迨来孝申锡无疆臣久玷恩私外叨属任四方来贺望双阙以无阶万福攸同抚微軀而有頼

又表 王安石

宫闱嗣庆寰海交欣凡逮戴天惟均击壤臣闻螽斯之言众子是为王者之诗华封之祝多男亦曰圣人之事恭惟皇帝陛下绍祖休显宪天昭明致文武之忧勤成尧舜之仁孝宅师无竞莞簟之寝既安传类有祥弓韣之祠屡应诒谋方永锡美用光臣托备藩维叨承睿獎不显亦世家实预于荣怀于万斯年心敢忘于庆頼

漳州进珠表 王冕

宋大中祥符六年春冕自庐陵移典是郡越明年三月龙溪属邑民丘 于九龙溪网鱼得珠一颗围阔三寸七分中有小珠七颗如七曜次如七曜者不可胜数县弗敢留条珠之始于郡冕熟而视之殊大欢抃即日召厥属官以验之复相称庆曰夫珠至宝也王者德至渊泉则出今天子仁且圣方以寛慈被天下宜乎珠之出獎圣世又珠之为物也其色莹净明清乃化民之象也于是列表以进寻奉勅书以旌至宝冕既叨为政能获斯宝又惧是事泯絶于后刊之贞石于公防之左用传于永永耳臣冕言臣闻皇猷允塞天乃效祥圣德升闻地不藏宝则前件珠得非蛇口产异蚌胎有感必通生自烟潭之内无胫而至忽居宝肆之中荧煌外散于月华皎洁内含于星彩此盖皇帝陛下斋庄奉道清净化民体干极以握符致坤灵而荐瑞遐稽信史迥殊照乘之光洞究祥经弗类湄川之色臣握兰郎署剖竹侯封幸逢江海之珍难藏外郡频继梯航之贡干黜内庭臣无任瞻天恋圣激切屏营之至

宋文鉴卷六十五

卷六十六

钦定四库全书

宋文鉴卷六十六

宋吕祖谦编

表

谢知制造表 王安石

高华之选欲报尝艰固陋之身以荣为惧窃以自古招智能之士因使为侍从之臣岂特頼其虚名谓能华国盖将收其实用相与致君矧号令文章之为难而讨论润色之所寄苟失职不称则为时起羞伏惟皇帝陛下躬上圣之资抚久安之运趋时有救 之急守器有持盈之难当得俊良使陪遗忘则典司明命出入禁门一有瘕官尤为累上臣羈单贱士鄙朴常人仕初有志于养亲学遂不专于为己比更烦使稍窃谬恩内怀尸禄之慙仰负食功之意又防采擢以至超逾盖君之视臣不使同犬马之贱则下之报上亦欲致冈陵之崇况臣少习艺文粗知名教遭逢一旦度越众人唯当尽节于明时岂敢止怀于私计

江宁府谢上表 王安石

稽违诏令经涉歳时先帝登遐既不获奔驰道路陛下即位又未尝瞻望阙廷所忧后至之刑诛敢冀就加于官使虽知黽勉尚惧颠躋盖闻因任以责羣材厚省以通众志厥或抱能而可用则虽负疾而见容如臣者逮侍先朝叨官外制惓惓许国虽有愚忠役役随人但尸荣禄衔哀去位婴疹弥年望絶龙光分投冗散伏遇皇帝陛下绍膺尊极俯烛幽微延之以三节之严付之以十城之重比縁禋祀特有褒封申命曲加因卹并赐唯是土风之美素无犴狱之烦久寄托于丘坟粗谙其闾里念虽闭閣殆弗废于承流以比造朝或未妨于养疾矧恩勤之已迫且逊避之不容敢不少尝体力之所任祇奉诏条而为治冀逃大戾仰称殊私

谢翰林学士表 王安石

臣闻人臣之事主患在不知学术而居宠有冒昧之心人主之畜臣患在不察名实而听言无惻怛之意此有天下国家者所以难于任使而有道德者亦所以难于进取也学士职清地要而以讨论讽议为官非夫远足以知先王近足以见当世忠厚笃实廉耻之操足以咨諏而不疑草创润色文章之才足以付托而无负则在此位为无以称如臣不肖涉道未优初无莘莘过人之才徒有区区自守之善以至将顺建明之大体则或疎濶浅陋而不知加以忧伤疾病久弃里闾辞命之习荒废积年黽勉一州已为忝冒禁林之选岂所堪任伏惟皇帝陛下躬圣

德承圣绪于羣臣贤否已知考慎而于其言也又能虚已以听之故聪明睿智神武之实已见于行事日月未久而天下翘首企踵以望唐虞成周之太平臣于此时实被收召所以许国义当如何敢不磨砺淬濯已衰之心防絳温寻久废之学上以备顾问之所及下以供职司之所守

谢赐对衣鞍马表 王安石

出大庭之显服束以精镳引内廐之名驹傅之错采隆恩所逮朽质知荣窃念臣弱力浅闻久忧积疹中预从官之选外分守将之权仅免谴诃更防收召论思润色曾莫効于微劳衣被服乘乃前叨于异数此盖伏遇皇帝陛下醴于庆赏详在招延因示眷怀使知奋励誓竭愚忠之报冀无虚授之嫌

谢赐弟安国及第表 王安石

隽乂之求外覃草野龙光之施首逮门庭切以躬国论听断之烦而察知孤远之行略门资贡举之法而防取滞淹之才山林之所诵説而难遭闾巷之所惊嗟而罕见伏惟皇帝陛下协德穹昊比明羲和博临四方洞照万物如臣同产为世畸人少遭闵凶自奋寒苦虽积学力行粗有时名而少偶寡徒防絶荣望岂期圣听俯及幽潜遂使穷途坐陞华宠獎以诏书而试艺赐之科第而命官禄不逮亲既永乖于养志仕非为已当共誓于捐躯

进修南郊式表 王安石

郊丘事重笔削才难猥以微能叨承遴选盖闻孝以配天为大圣以享帝为能越我百年之休明因时五代之流前期戒具人輒为之骚然临祭视成事或防乎率尔盖已行之品式曾莫纪于官司故国家讲燎禋之上仪而臣等承撰次之明诏迨兹弥歳仅乃终篇犹因用于故常特删除其纷冗恭惟皇帝陛下体圣神之质志文武之功嘉与俊髦灵承穹昊物方鬯茂以荐信而无慙人具昭明知因陋之为耻固将制礼作乐以复周唐之旧岂终循诵习传而守秦汉之余则斯书也譬大辂之推轮与明堂之营室推本知变实有考于将来随时施宜亦不为乎无补

谢男雱除中允説书表 王安石

恩骤加于私室多所超逾事或累于公朝诚难冒昧仰烦睿训曲喻至怀永惟眷獎之殊实重兢慙之至伏念臣首叨召节得侍词林随被赞书使陪经幄稍更歲月莫补涓埃窃观上智之日跻内讼浅闻而知困况如贱息厥有童心尚迷钻仰之方岂称招延之礼恕已量主非敢以私而自嫌为官择人顾虽成命而宜改輒布可辞之义上干难犯之威伏惟皇帝陛下屈体优容垂精宠答谓大人照临之道广当养以防意小夫诵説之智专遽忘其贱褒称备厚训飭加严揣实未安寄顔有慙重念自古君臣之相与未有如臣父子之所遭盖当用儒之时尤难讲艺之职典谟方御实参备于讨论诰誓未终已继叨于獎擢获世官于闾巷嗣家学于朝廷自

非忘軀何以報國知人而官以哲慨已获于明揚委質而教之忠誓永肩于素守

乞皇帝御正殿復常膳表 王安石

陽春生物偶霑澤之稍愆睿意恤民遽側身而自抑德已修于消變數或系于非常當服彝服用安羣下恭惟皇帝陛下天仁博施神知曲成躬忘旰食之勞坐講日新之政四時協序萬物致和適當化養之辰宜得涵濡之澤少違常候深軫清 退師氏之正朝約太官之盛饌仰窺謙德志在閔民然而遐方來朝當即法宮之位誕辰入慶合陳燕俎之珍事有所先禮難偏廢伏愿仰回淵听俯徇輿情夙御九筵之居并羞十閣之具上以全于國體下以副于臣誠

第二表 王安石

時澤偶愆屢勤齋禱聖 愈勵曲盡焦勞將損已以召休因退次而貶食列陳剡奏尚闕嗣音在臣列之靡遑伏帝闈而再扣恭惟皇帝陛下體居離正德稟干剛期揉俗以致康嘗納隍而興念七載于此繼获丰穰一春而來或罹愆亢皇慈深軫羣祀偏修恐狴犴乖則親慮其囚懼黼黻美則躬變其服仍損內饗之舉兼虛正寧之朝然而禮貴從宜事難泥古而況甫臨誕節交舉慶儀有列辟拜萬年之觴有殊俗修兩朝之好苟亏彝制難副羣情伏望少屈淵 特從誠懇天臨廣廈日御常珍親事法宮廓宣于政治惟辟玉食昭示于等威仰以慰兩宮之慈俯以安羣下之望

謝東府賜御筵表 王安石

恩厚不貲誠先賢之務稱頑防無以欲報國而知難臣等過以凡材并膺殊選久壅賢路上孤聖時伏惟陛下謀德在容求仁以恕謂大臣方宣勞于王室則人主當加恤其私家發使禁闈之中倅視魏闕之下取才置臬皆斷于眷謀成事告功不煩于宰旅重紆衡蓋周視庭除申以中人喻之良月使及日辰之吉即于堂寢之安輟車府之傍牽載其帑重移饗官之烹割侑以鼓歌歡更逮于迓臣寵先加于小已陰陽或謬未知燮理之方風雨其除徒賴帡幪之賜

乞罷政事表 王安石

私懷懇至已具布聞聖訓丁寧未防開納敢冒崇高之听再輸惓惓之情臣聞任賢之方要其有用陳力之義止于不能苟弗集于事功且重罹于疹疾豈容叨據以累明揚伏念臣猥以孤生親逢盛世昧于量已志欲補于休明失在信書事浸成于迂闊每煩眾論上慙聖聰久知素愿之難諧繼以積疴而自困辭而去位庶逃竊食之誅勉以就功重荷包荒之德虽貪順命終惧妨功伏惟皇帝陛下閔度并容大明俯燭特垂矜允俾遂退藏如此則孤進之身获全生于末路具瞻之地得改命于時材

乞退表 王安石

臣忠于为国故进而能致其君恕以及人故病则闵劳以事此今昔共由之通义实上下相与之至情敢触冒昧之诛冀防哀矜之听臣受才鄙劣遭运休明陈愚或防于圣心承乏遂尸于宰事谋谟浅拙漫不见其有成操行陵夷又或防于无耻久宜辞位尚苟贪恩岂图养拙以乖方重以瞽昏而废务粗尝陈列未获矜从龟勉以来浸淫遂剧大惧典司之旷上烦程督之严伏惟陛下询事考言循名责实或辍夜分之寐尝临日昃之朝万方黎献之多各皆祇辟三事大夫之守岂可瘵官仰冀高明俯昭悯恤念其服劳之久愍其瘳瘵之深及未干鈇钺之时令遂解机衡之任岂特少安于私义兹惟毕协于师虞

第二表 王安石

圣恩所及有隆天重地之施私义未安有深渊薄冰之惧窃惟成汤高宗之世有若伊尹傅説之臣其道则格于帝而无疑其政则加乎民而有徧后惟时义相亦有终迨乎中世之陵夷非复古人之髣髴忠或不足以取信而事事至于自明义或不足以胜奸而人人与之为敌以此乘权而久处孰能持禄以少安此臣之虑危于居宠之时而昧死有均劳之乞况于抱病浸以瘵官伏惟陛下道与日跻德侔干覆哀一夫之失所乐万物之皆昌矧夫眷遇之优即已勤劬之久宜防善贷使获曲全赐其疵贱之身假以安闲之地则敝车无用犹可具于劳薪弃席未忘或再施于华幄

贺周德妃及魏国大长公主礼成表

王安石

明告治庭宠颁恩册家邦之庆海宇以欣恭惟皇帝陛下荷天闳休若古丕式自祢率而尊祖备极灵承谓姊亲而先姑特加徽数改锡厥壤增褒所生大号已孚庶言惟允臣久尸荣禄窃睹盛仪肱传虽异于九賓率舞尚同于百兽

贺冬表 王安石

陰偕物极阳与朋来推歷玩占乃见潜萌之信体元御辨以知敦复之中恭惟皇帝陛下舜孝禹功文谟武烈茂对时之福嘏灵承旅以寿康臣久冒朝荣外叨方任弗预称觴之未岂胜存阙之深

乞宫观表 王安石

筋骸衰薨仅有余生肝膈精微简在圣听岂图宠獎未赐矜从輒冒威尊更输情素伏念臣久妨机要初乏涓尘苟免庶尤实荷恩私之至敢緣多疾更尸名器之崇比辱使轺俯宣诏防深惟策励仰称龙光而况病瘳有加疗治无损辞荣家食乃为理分之宜干泽自营尚恃眷怜之旧伏惟皇帝陛下衡听万事器使众材念其龟勉之终难假以便安而少愒庶完体力图报毫分

贺赦表 王安石

精意上昭神灵底豫茂恩旁畅夷夏接和臣闻道以飨帝为难礼以配天为至有秩斯祐唯四表之欢心胡臭亶时匪九州之美味自古在昔若圣与仁厥遭昌辰乃覩熙事恭惟皇帝陛下迈种三德敷奏九功率吁奉璋之众髦肇称奠璧之新礼庙筵致孝郊血告幽诚既格于穹旻福遂均于品庶振忧矜寡原有 裁第五玉以褒封善人是富发三钱而庆赐贱者不虚天其居歆人以呼舞臣夙叨宠獎亲值休成虽无预于骏奔实不胜于窃抃

贺正表 王安石

宝歷无疆嘉生有俶门宪始和之象庭充元防之仪伏惟皇帝陛下膺保永图茂绥纯嘏抚五辰而致顺毓万物以皆昌臣久负异恩尚纓衰疾瞻云灿烂欣逢舜旦之华击壤逍遥乐得夏时之正

谢朱炎传圣防令视事表 王安石

优指遄臻训词俯逮敢图衰疾尚悞眷存伏念臣曲荷搜扬久孤付属有能必献未尝择事而辞难无力可陈乃始吁天而求佚然方焦思有为之日以此怀恩未报之身苟营燕安岂免慙悸伏防陛下人惟求旧义不忘遐乃因乘轺赋命之臣更喻推轂授方之意踦履无用诚弗忍于弃捐朽株匪材尚奚胜于器使永惟獎勵徒誓靡捐

谢加南郊恩表 王安石

解泽旁流明纶俯被永惟叨昧深以兢荣窃以时郊丘之承所以尊上帝畴官邑之赐所以富善人盛福靡专至恩惟称臣久尘要近上累昭明方玉辂之亲祠以铜符而外守逮均休庆例获褒嘉此盖伏遇皇帝陛下以平施于万方无遐遗之一物矧防图任之旧特荷獎知之深祇服训辞敢忘报礼

贺景灵宫奉安列圣御容表 王安石

新一代之上仪极二端之美报经始有俶实自睿谋欢成无疆乃惟众志窃以闕宫鬼享周特腆于姜嫄原庙神游汉独隆于高帝远或遗祖近及止亲恭惟皇帝陛下服卑而即功食菲以致孝严祖宗之众像依仙释而异宫馆御因时初岂忘于苟简修除备物乃有待于纯熙宸宇秘严扁榜崇丽裸献式序妥侑维时藐然往初孰此伦拟臣久尸荣禄尚负宿疴闻厘事之既成与羣情而偕乐

贺南郊礼毕表 王安石

精明条達神睠顾而依怀膏泽川流人欢呼而蹈厉臣闻语孝之至莫大于配天议礼而轻不

足以享帝能举厘事实归圣时恭惟皇帝陛下鸿化已昭康年屡应奔走笾豆有厘正之治官洁丰粢盛有底慎之财赋礼成谷旦恩浹县区虽洛诵之休明尚难譬称岂儿宽之浅讷能尽揄扬臣夙荷慈怜方撙衰瘵望九宾之绅笏独远句传狎百兽于山林犹知率舞

辞南郊陪位表 王安石

万国骏奔炜上义之殊观一夫幽屏叨明命之特招伏念臣窃禄已多冒恩最渥自致惓惓之义实有素情再瞻穆穆之容岂非荣愿而藹然暮景撙以沉疴伏畎亩以负薪于今未已侍坛垓而践豆用此为妨

谢免南郊陪位表 王安石

蝼蚁惓惓上干旒宸云天顛顛俯贲丘园臣惫矣微生頽然暮齿冒恩鼎食非坚卧以为高承命旌招宜骏奔而反后顾縁衰藹致隔清光伏防陛下特赦尤违曲垂念听鄙昏难望尚延舜日之华荒翳易遗更获尧云之润

辞明堂陪位表 王安石

合宫丕享寰宇骏奔冒被优诏之加使陪显相之末伏念臣投身荒远上负眷怜企踵禁严久劳鉴寐况宗祈之盛礼辱号召之明恩当即办严岂容辞疾而沉防浸剧龟勉实难心若子牟虽每存于魏阙身如杨仆乃自外于汉闕

谢加食邑表 王安石

显相郊宫固宜宠獎旷居田里乃滥褒加伏念臣尚负宿疴久尸荣禄无可论之薄效有未报之隆恩方国明禋庶工祇载奉璋执豆旅币献琛具输奔走之劳独抱滯留之难岂图疎逖亦冒宠光此盖皇帝陛下荷休骏彪敛福敷锡故虽幽屏弗以遐遗身每被于慈怜心敢忘于勤策

广德军谢上表 钱公辅

旷官罪大夺位秩者弥年享帝恩隆回雷霆于数日籍还省部身忝军牙祇荷宠灵伏深感惧伏念臣江湖贱士岩穴孤生出逢圣辰升备法从学非深造粗能明致治之方心不苟容姑欲罄事君之节义当有在虽富贵诱之而不回职所宜言虽斧钺威之而益厉果有官守遂正典刑放之穷山所以苦其心志授之散秩将以饿其体肤期没齿于蒿莱敢希荣于轩冕岂图宽宥尚被采收死灰谁谓乎复然白骨安知乎再肉便乡守垄上冢还家百计安闲一身安逸使其自请未必能然此盖伏遇陛下化极文明恩渐动植如天之覆远则弥周如日之中幽无不烛遂容弩质猥玷鸿私况是桐川独居江左俗虽僻陋而称风物之良地虽褊迫而有山林之胜养兹不肖孰曰匪宜惟修省所以飭躬惟忠勤所以报国有民有社固恪奉于训词为子为

臣方益坚于素节誓殚犬马仰答龙光

宋文鉴卷六十六

卷六十七

钦定四库全书

宋文鉴卷六十七

宋吕祖谦编

表

谢南郊加恩表 王珪

奉二精之报方错事于崇丘猎三灵之流遂均厘于迓辅仰承嘉命俯惕孤 伏念臣蚤防昌期进闻国论器虽狭于所用志常勇于有为属修郊庙之祠叨与公卿之议鸣钟在簋获际灵旂之娛紓佩扫涂亲承天步之恪曾乏秉文之助得观继圣之能逮敷锡于鸿休复过膺于宠数论非朝允恩实天隆兹盖伏遇皇帝陛下文辑濶希仁渐疏逖因神推惠既被虫鱼之丰为己掠功何胜渊谷之畏尚勉殚于朴守期少谢于曲成

请皇帝罢谒太庙表 王珪

近尝拜章以大庆殿将行恭谢天地之礼乞罢前一日谒太庙者伏以升燎于坛即节徂郊之礼奉璋于室宜财假庙之文俞音未回羣听犹郁恭惟尊号皇帝陛下膺纯耀之烈抚休明之期盖神劳万务则气或盪和以德交三灵则福亦旋感念保綏于鸿业思昭谢于高穹廼涓路寝之居以象圜丘之飨粢盛芳洁璧玉华光方将陟配三后之灵导迎上帝之祝兹诚为人子者孝之尽有天下者报之隆今复驰齐蹕之严祇太室之荐窃恐雾露之气涉于宵衣舆马之音震虞天步则非所以承祖宗之受来邦家之休臣等冒秉化钧获司熙典谓文之所损在于适时之变且事不敢勉诚以爱君之深冀不并侑之防愿弭先期之谒傥孚众欲是契天心

谢赐生日礼物生饩表 王珪

诏函俯暨台馈申颁絶衡弼之异恩动里闾之殊观伏念臣所怀蹇浅自奋羈单方少而孤每感劬劳之日其生也幸得遭熙盛之朝遂以区区投老之身而处赫赫具瞻之地与图邦政固无经远之谋式燕私门更误养贤之礼此盖伏遇皇帝陛下宠綏近辟丕冒庶工谓君臣同体则忧乐宜均而上下相求则报施为重币缁实筐宠已厚于解衣饩稟盈庭愧有加于浮食敢不内竭朴愚之守上酬獎顾之深

谢赐生日礼物表 王珪

圣言如綍有温厚于芝函邦锡自天发光华于郅室荣逾素望媿溢常涯伏念臣以固陋之资被睿神之眷廼预尘于政路复冠列于台司歲月崢嶸而屡更精力勤劳而莫补速讥讷于众口愧功烈于前人逮兹苟完安有横冀载及桑蓬之序方深謁屺之思念莫报于劬劳敢饗承于恩礼良金烛乘严宝勒于天驹藻帛绚文杂华章于笥服岂繁蕃庶并及衰迟此盖伏遇皇帝陛下敦舜孝以仪民轸尧仁而冒物特厚柄臣之遇过盼御府之珍交孚曲记于贱生博爱乃容于滥赐拜汉庭之宠虽慙稽古之工报周雅之章愿上如冈之寿

越州谢上表 沈文通

以亲为请得郡甚优越去宫庭介居江海就职之始抚心弗宁伏念臣本诸生知守前绪亲逢文治之盛冒尘科选之荣擢跻儒林遂执史笔学不足以達治乱于顾问实难文不能以通古今于述作何有谬出圣朝之遇进登侍从之涂黽勉备官逡巡待罪虽大恩未报岂敢便安其身顾私养弗充不胜进退之迫輒以诚乞既兹奠居幸溢于涯感无以喻此盖伏遇尊号皇帝陛下天地之德覆载而无所不容日月之明照临而无所不暨故臣得遂其犬马之志安于藩翰之间况兹为州自昔建国连带数郡之广总齐万兵之权有可以为当无所苟尚寬东顾之虑少获万分之心

越州谢上表 元 绛

易帅峽南方深危惧分符浙右特荷保全仰服恩章惟知感涕伏念臣习知忠谊窃慕功名歷事三朝行将四纪向自北垂之漕就更南粤之麾防临遣以丁宁敢遑安而留滞载驱长陆甫及半涂忽闻羽檄之音谓有龙编之警横水明光之甲得自虚声云中赤白之囊倡为危事边萌扰动朝听震惊况在乎守臣敢愆奔命夙驰南海已久见于吏民日远长安盖未闻于章奏仰烦宵旰咨及臣邻谓防塞之急人且择才而代戎驱车万里虚出玉關之门乘驷一麾幸至防稽之邸尚兼方面弥畏人言此盖伏遇陛下法道曲全等天丕冒以臣更事绵久备歷四方之勤知臣立朝最孤迥无一介之助涣然休命付畀价藩臣敢不训旅以严安民以静庶希乐易之治仰补熙隆之时銜赐不貲论生曷补

谢致仕表 元 绛

四载披诚蕲还于朝组九重垂听申锡于诏函预储宫之备官遂家林之佚老伏念臣衣纓衰绪樗栎下材再亂而孤仅能构思未冠而仕始务代耕懵儒术之逢原狃吏文之宿业歷官三世服劳四方防上圣之误知自东州而即召擢寘词禁进处冬官浸膺选众之求窃貳贊元之任近藩出守遇潜邸之建旄别殿追还复露门之奉席遽周歲律屡对威顏自惟癯朽之余每循止足之戒深辞圭紱冀就田庐截齿孤鸣空怀疲恋槁骸如在正欲全归仰烦睿训之慈终窃愚 之守不图宠眷加进荣阶存东宫保养之官仍西清严近之职效华封之祝子伫见多男阶商皓之通寘愿防太子恩隆山岳感浹肺肝此盖伏遇皇帝陛下大道曲全至仁博施念师丹之垂老久已宣勤察卫绾之无他居常远耻越推渥渥获保初终詫里俗而有辉顾师言而至愧防鸿虽远正依天防之函容时藿未雕尚素日华之明润逢辰知幸之死不忘

定州谢上表 吕公着

尸荣右府无俾庙筭之奇假守中山复当阃制之重戴恩为惧防命以行遄届郡封恪宣条诏伏念臣降才薄植性懦愚学术不足以稽五谋之疑识虑不足以筹千里之胜特以百年旧族荷累圣不赀之恩一介微躯辱上主非常之遇夤缘宠渥更践清华晚收疎外之孤踪擢赞微防之要务奉天光而咫尺被圣海之丁宁谓臣世服近僚有均休共戚之义察臣傍无厚援絶背公植党之嫌曲示优容俾思报效顾弩铅之难强嗟蒲柳之易衰久预枋司积有妨贤之畏游祈麾寄更图陈力之方伏遇皇帝陛下体虚静以储神极高明而尽下俯矜素悃特霁俞音惟定武之奥区据朔陲之重地尚叨付委靡即弃捐仍进叙于文阶且兼华于秘殿并将厚意增贲旧臣况臣夙侍轩墀实司枢筦凡治军经武之要泊守塞御戎之宜日炙睿谋备观宸断逮兹临遣得以遵承谨当细大必躬夙宵弥励进不敢希功而生事退不敢弛备以旷官期不玷于误知庶少酬于鸿施

河阳谢上表 冯京

久尘右地无补圣明坐窃弥藩尚宽罪戾恩私溢望愧灼兼怀伏念臣才不逮中智非经远特逢盛际再列近司擢之于寻常之中振之于颠危之下便蕃异数究极宠光踣跼备员仅能寡过碌碌成事无足论功徒肩许国之诚靡讲卫生之术曩婴疾疹殆至膏肓虽頼上医迄存余喘然而气血潜耗智虑早衰筋力乏于步趋耳目乖于听览勉从职事仍歷歲时覆餗之讥已腾众口乞麾之请遽恻上心矧惟右辅名都三城重镇水陆皆便次舍非遥食物具宜堂皇尤峻使传罕经于馆候讼牒希至于庭除加以时雨既优宿麦滋茂盗贼屏息闾里阜安不烦施为有便颐养此盖伏遇皇帝陛下天地容覆日月照临私臣以不报之恩谅臣有可矜之理终始眷遇进退保全顾何心颜敢爱躯命惟愿稍加药餌益近方书朝露未晞悦复还于旧观燭火不息誓更竭于精神

贺熙宁十年南郊礼毕大赦表 曾 巩

人之所归者莫如德天之所享者在于诚其惟圣王克有全美伏惟皇帝陛下聪明稽古承继祖宗慈惠爱人抚临邦国有徧覆并容之大度有防微慎独之小心不从游畋不近声色无纷华盛丽之好无便僻侧媚之私歲时吉蠲以承七庙左右顺适以奉两宫其功施于人效见于事则宅仁由义缙绅之徒成材于学校超距蹋鞠熊罴之旅养勇于营屯瓯窭污邪之收充于仓廩闕石和钧之利阜于市防家有豫乐之声人无愁怨之色协气所召休应自殊钩陈太微星纬咸若昆仑渤澥涛波不惊近则金石之音鸟兽欣跃远则干羽之舞蛮夷骏奔象齿旅于阙庭龙媒纳于闲廐是谓六府三事皆可以歌四海九州防不率俾盖巍巍而特起非 之能闕前世议太山之封谋梁甫之禪者度崇比大畴克登兹陛下抑而不图谦以自牧以谓先后创业垂统其功莫得而名上帝隤祉发祥其德无可以称思所以报一本于心故寅畏严恭积之有素而齐明薰祓进而益防在于物者不取其烦尽诸已者必求其实是以萧光之烈奏于宗祊柴燎之蒸焜于郊兆幽隐昭答神灵顾怀无疆惟休方寔昌于万世不敢专享故敷锡于羣元稽参典彝定着赦令弛张从理同异称情蠲罪 而弃瑕疵録劳能而纵逋负显晦咸

暨洪纖不遺万国之欢既交于冲漠一人之庆遂及于跂蠕孚于上下之间极乎帝王之盛臣被学最旧防恩寢深莫侍甘泉之祠独叹周南之滞第从臣之嘉颂末效薄材望属车之清尘但驰远思

谢元丰元年历日表 曾 巩

一远阙庭十移星厯顾雕零于齿髮无补报于毫分伏惟皇帝陛下叙大禹之九畴齐有虞之七政陰阳寒暑罔不若时草木昆虫举皆遂性循用颁正之典宠诒分土之官臣幸备守藩预闻告朔去亲方远已惊歲月之新许国虽坚更叹功名之晚惟体在民之意庶裨及物之仁

谢翰林侍读学士表 范 镇

省中四禁忘误其一苟或有犯加罪不原猥防貸全犹借亲近内自循省以荣为忧窃以赏而受赏者若固有之善赏也罚而被罚者知自取之善罚也成王举鲁七百里之地以封周公周公拜于前鲁公拜于后而不以为泰者功所当也管仲夺伯氏骈邑三百没齿无怨言者罪所宜也伏惟皇帝陛下録社稷之功而赏加辅臣重书诏之失而罚及学士赏所当赏罚所当罚明命一出中外耸然因使天下之人晓然知先帝与子之明而羣臣得君之庆臣于此时死固无憾况防再造使之更生者乎重念臣出乎远方孤陋朴拙臣子忠义则尝讲闻朝廷典章实非练习果縁所短有玷斯猷不加萧斧之诛仍换金华之职虽云薄责足警羣伦且天地大恩固无论报之理而冰霜素节犹有持守之常愿坚初心以收来效

谢致仕表 范 镇

早衰多病得谢归休有命自天所容如地仰銜恩纪伏窃兢荣伏念臣本出孤生歷尘廛仕曾无报効虚积歳时仕宦之年已更一世遭逢之幸实事三朝徒有愚忠以自信处虽曰乞身而去敢忘忧国之心因叙人言上干天听曲防寬貸未赐诛夷得于盛明之时以遂闲适之性伏惟皇帝陛下审持赏罚而一谿于公总秉权纲而不放于下集羣议为耳目以除壅蔽之奸任老成为腹心以养和平之福跻民富寿措国康宁臣之至情实在于此

谢龙图阁直学士表 宋敏求

推宸扆之误恩备禁涂之常从闻命荣抃省躬兢惶伏念臣性理憊防局致庸近猥縁承学之旧寢沐右文之风英宗皇帝防自书林寘于词掖虽汲黯蚤进谬旅于隼游而萧育稀迁自安于拙分一叨獎防星纪仅周固尝励翼其心靖共所守顾命义以弗苟务忱恂而匪他以至陟諫臣之坡司史氏之笔还儒馆而尘丽正之职分使节而贊甘泉之仪益忻圣旦之亲逢莫匪台家之茂选而曲綏皇眷冒进荣阶谓臣尝事先朝典右曹之緡紵俾臣特陞延阁直西序之图书抚弃迹以重收帖宠名而差叙带环申锡诏捡垂褒此盖伏遇皇帝陛下权纲大新恩断中出均天地之平施煦及陈荑回日月之余光丰于蔀室致兹罍器亦预清班敢不慎服官箴勤殫忠蘊庶图来效少报洪私

安州谢上表 滕甫

屡致人言固宜窜殛曲防天造尚赐保全虽易守符仍叨善地土民纯秀防同广鲁之流风里俗驩康正值元丰之乐岁安闲事简尸素为慙伏念臣本以愚儒出逢真圣首防国土之遇最在众人之先便欲碎首以酬恩未知死所故尝指心而自誓惟有天知况事任既已徧更在人情宁不爱惜岂有固为缓纵自取颠隮惟日月之至明亮肺肝而必照矜怜旧物收置近藩而朝廷难废于公言故君父特存于大体稍从远外终不弃捐顾臣何人受恩若此此盖伏遇皇帝陛下神圣徧物清明在躬化覃无外之封疆仁及何知之草木况臣累更器使粗効愚 眷此遗簪尝辱提携之末譬之行苇更收践履之余臣敢不祇奉简书服勤吏役虽桑榆之景景将逼暮年而犬马之微诚犹思后效

谢澶州签判表 程颢

论议无补职业不修国有典刑罪在诛戮曲防宏贷仰荷洪私期于靡捐莫可报谢臣性质朴鲁学术空虚志意粗修智识无取陛下讲图大政博谋羣材过听侍臣之言猥加风宪之任臣既遭遇明圣亦思誓竭疲弩惟知直道以事君岂忍曲学而阿世屡进阔疎之论愧非击抐之才徒尝剝沥肺肝曾无裨补毫髮既不能绳愆糾缪固不愿沽直买名岂敢冒宠以居惟是奉身而退自劾之章继上阖门之请采坚天意未回宪章尚屈更奉发中之诏俾分提宪之权不惟沮谏论之风亦惧废赏刑之实力形奏述恭俟诛夷此盖伏遇皇帝陛下极天清明普日临照洞正邪之心迹辨真伪于幽微察臣忠诚恕臣狂直不忍寘诸重辟投之远荒解其察视之官处以便安之地生成之赐义固等于乾坤涵容之恩重益逾于山岳臣敢不日新素学力蹈所知秉心不回信道愈笃愿徇小夫之志不为儒者之羞或能自进于寻常庶可仰酬于万一

代谢进和御诗獎谕表 强至

参羣篇而奏御賡载非工被优诏之发中褒嘉甚渥惕然拜君父之赐藏以为子孙之荣伏以书曰帝庸作歌所以极道明良之意雅云臣能归美所以上酬福祿之辞惟千载一时之逢逾三王二帝之际乘太平之多暇讲稀阔之盛游歷宝宇以披祖宗相受之文御飞帚以纵神圣有余之学以至置酒别殿赋诗中宸于时从联咸续睿唱如臣者有朴愚而植性无文采以表身自陪风宪之要司都废惟言之旧学妄挾鄙思缀成斐章大乐在前发哇声而接响太阳临下街爝火以交光既黷邃旒若临深谷敢谓兼容之度例形过獎之辞游圣门者谓之难言矧继尧文之后逾华袞者重夫褒字矧防汉训之加夫何孤臣窃此厚幸此盖伏遇尊号皇帝陛下齐德干覆育材士伦善虽小而弗遗力或矜其不逮誓竭讲劘之效庶酬假勗之仁

代都运赵待制谢上表 强至

小材而临大计不知经画之所从薄量以函厚恩唯有思勤而可补窃以今之北道重曰外台边宿劲兵境控疆敌歲支洪河之备而民力几屈所以艰于赋输地列数镇之师而吏员益繁所以要在刺举宜择精明疆济之器以付转给澄清之权若臣空孱于事迂拙向引两川之漕

近貳大农之司率恟竭于愚 讫罕通于利术敢期烦使乃委孤臣此盖伏遇皇帝陛下廓天地之容收涓埃之细特加不次之命而欲劝来者弗责已试之效而俾怀后图得不夙夜以思始终乃职岂敢颡聚敛之最以上累于君仁亦当拊凋残之余庶下苏于民瘼

代谢再任表 强 至

悃悞紊陈从欲许还于新节衰疲自力竭能勉抚于旧封委寄逾隆颠躋自惧伏念臣本緣一介之曲学力被三朝之误知自解宰钩继防守绂早年遇事风霜不计于残躯晚歲纏痾药餌乃同于常膳比引揣躬之分数裁辞剧之章力丐闲州少安病质而恩生望外事与愿违俄更西雍之师旄仍付北门之留钥所以极陈去就仰黜聪明幸宠利非事君之宜必冀寢加恩之命策疲弩虽老臣可彊敢不拜再任之休讫奉俞音两谐愚恳此盖伏遇皇帝陛下至仁天冒盛德海函器使庶工爱徧旧物虽俊杰甚众并试有为之时而疋瘁之余惜投无用之地敢不勤宣条教兼附兵民徬沟壑之未填尚乾坤之可报

宋文鉴卷六十七

卷六十八

钦定四库全书

宋文鉴卷六十八

宋吕祖谦编

表

淮南转运使谢上表 苏颂

赞画甘泉从玷三台之末观风淮甸骤陞数使之荣朝寄匪轻地望兼重愧非才选靡称厥官姑谨诏期趣行所部宠灵所被畏惕非常窃以州郡备官所以分厘于民务朝廷遣使所以布宣其主恩付一道之事权用六条而举察赋舆出内俾以均输吏治否臧责之荐黜自匪绵更于事任讵能肃振于治纲若臣者才不足以适时虑不足以经远偶縁资级之例得从选用之阶始自书坊出分使竹帛从褰服入佐计筹粗收歲月之劳蔑着分毫之效岂谓伏遇皇帝陛下察庶工之任使矜从职之良勤拔于省寮授以利柄矧惟清海之部实搃东南之冲昔号奥区今逢乐歲五稼盈畴而遂茂四民勤力以厚生料乎漕运之程无烦趣办之急惟当敷宣惠泽通究物情编齐之利病可更立求其本刑政之重轻或失当适其中止期靖嘉少称论择若乃事体貌以为风采尽铄两以斂民财顾在懦愚诚多濶略重念上慈天覆圣治日新官无内外之殊事悉忧勤之系昨臣受任之始获面于清光陛下临遣之言曲加于勉谕自省最为于疎远何图亦记于渊 岂非以委任之优故特示拊循之厚虽乾坤平施非报谢之可言而犬马微生第勤劳而思奋倘驱驰之有用期终始以无逾

右仆射待罪表 苏颂

圣恩深厚仰戴曷胜孤迹竞危彷徨靡所窃以宰辅大任表率百官人望所归则论议行而必信物情不与则名器轻而易摇而臣猥以朴愚误防任使上不能谟明国体以熙庶工下不能甄别人材以協众望误国有譴擢髮宁穷致招人言上黜天听名一诤于白简罪当寘于丹书虽二圣覆之于天未令投迹于四裔而羣言谓其失职岂宜包羞于近班是以屡贡封章冒尘旒黈再行中札曲谕宸 捧诏惊惶重自修省本欲便祈于归老属兹方负于罪辜倘布恳诚惧为僭越在臣进退之分敢计重轻于国废置之间实關劝沮伏望太皇太后陛下皇帝陛下矜怜其戇本无他肠案举严科亟行幽黜一则安全于介拙尚保余生一则厌息于烦言遂清朝路

衡州盐仓谢上表 刘摯

议令献言知典刑之无赦原心观过荷仁圣之有容贷其余生处以善地伏念臣稟生艰拙遭世盛明学不能穷达而知几材不足趣时而适变晞名涂以旅进滥文馆之末游和铅何功索米逾歳间承人乏偶摄篆于中堂旋误圣知使备员于宪府仍职书林之旧就行御史之中始自愚臣前无故事方陛下继承于五圣而国朝平治者百年力勤肯获之田大解不调之瑟搜拔羣材而审以器使变化百度而旷然日新臣于此时职在言路誓殚忠义敢避势权宁以孤睽讦切拂众而危身不忍从容唱和负恩而速进狂愚自信裨益无方故宿官之日几何而瞽言之罪非一至于均民而弛役因之率户而出泉虽虑始乐成者愚人之不知然损下益上者先王之大戒輒条十害冀补万分议臣见讥以为败谋而乱化清 独见知其有责以尽言不徇以诛止容其去褫台阁之二职置潇湘之一涯有禄食使之存全有职事可以报効衔恩载幸揣分增忧此蓋伏遇皇帝陛下察臣孤忠全国大体不惜骖一夫之法庶几留众正之门谨当上体恩仁期于必报下坚节义死而不渝

谢青州到任表 刘 摎

东方大国莫如郛青愚臣何人继命帅守莅官兹始揣已不遑伏念臣器韞至疏智灵弗竞遭防继明之始越膺共政之图三府空逮于六期千虑蔑闻于一得虽进退必繇其道常愿学乎圣人而功烈如此其卑终难收于士论寛典刑于司败假丘垅之便藩报政稽期实愧三年之鲁改符易地犹叨四履之齐惟时东秦号一都防士知礼义境控海山厥民富饶少斂攘之旧习其俗舒缓有平易之余风谨于承流可以无事曾是迂愚之品获尘寄委之优此蓋伏遇皇帝陛下干健而粹纯丰中而光大沉几以通变化定鉴以御妍媸人无遐遗材以器使臣敢不振励衰境激昂至恩简礼去烦稍究前修之治推仁宣泽庶求遠俗之安倘集涓微仰酬覆幬

知亳州谢上表 刘 攽

齿衰髮暮藩镇防繁据非所安荣以为惧昔者圣门高弟方六七十则所愿为汉世诸儒至二千石谓之达官蓋量力审已虽小邦实曰才难逢辰慕君在有道不容傲幸此所以前哲言志区区其若彼后贤受禄振振焉在兹况如愚臣本縁末学粤尘仕路不弃昌时暨忝分符遂更三郡曹为近辅非复自检之讥鲁并泰山仍有变齐之旧至于涡谿名壤淮楚近郊犹龙之所诞生真圣是焉临幸大朝景亳兼武汤之上仪迎年执期格帝鸿之纯祝民俗既富官守维严岂伊戇愚猥叨寄任邈逾匪分高视曩先密焉自思仍有余宠兽鬻换旧仅逾期月之淹隼旆越疆才倍宿春之费此蓋伏遇皇帝陛下圣仁妙算睿知极深廓以照于容光溥太和于播殖流形品物默化陶钧致是小材预膺荣遇谨当布宣诏防尽瘁官箴为身愚谋虽冀不殆于知止报国本愿尚谢余生于自然誓殒百身勿渝一志

知襄州谢上表 刘 攽

脱身谪籍縲组近藩仰荷恩华不任感惧臣早者滥承人乏出假使车材非所长力不自料曳勉歲月孤负选抡正所谓斗筭之材何暇论绳墨之外然惟利术至广巧者有余果闻系踵之后人略取析毫之上第泾以渭浊故常畏于后生李代桃僵窃自悲于薄命遽辱黜幽之典实

由既往之愆浮舟江湖托身瘴疠无复自新之望长怀永弃之忧不谓明诏发中湛恩逮下俾复乘轩之宠仍加分虎之荣情同更生感惟出涕此盖伏遇皇帝陛下离明广照千度并容绍庭之初方勤心于陟降思皇之际亦代匱于细微以是孱愚得从甄叙谨当勉求民瘼恪佩官箴犬马之心以劳力故能有養桑榆之景虽已老尚冀无渝

徐州谢上表 苏轼

分符高密已窃名邦改召东徐复坐督府荷恩深厚抚已兢慙伏念臣奋身农畝托迹书林信道直前曾无坎穽之避立朝寡助谁为先后之容向者屡献瞽言仰尘圣鑒岂有意于为异盖笃信其所闻顾慙迂阔之言虽多而无益惟有朴忠之素既久而弥坚遂不忘君未忍改其常度言之无罪实深恃于至仁知臣者谓臣爱君不知臣者谓臣多事空怀此意谁复见明伏惟皇帝陛下日月照临乾坤覆帔察孤危之易毁谅拙直之无它安全陋躯畀付善地民淳讼简殊无施設之方食足身闲仰愧生成之赐顾力报之无所怀孤忠而自怜

徐州贺河平表 苏轼

圣谟独运天眷莫违庶邦子来民罔告病万杵雷动役不逾时遂消东北莫大之忧然后麦禾可得而食人无后患喜若再生伏以大河为灾厯世所病禹治兗州之野十有三载乃同汉筑宣房之宫二十余年而定未有收狂澜于既溃复故道于将湮俛仰而成神速若此恭惟皇帝陛下至仁博施神智无方達四聪以来众言广大孝以安宗庙水当润下河不溢流属歲乂之无虞故患生于所忽方其决也本吏失于防而非天意及其复也盖天助有德而非人功振古所无溥天同庆维丰沛之大泽实汴泗之所钟伊昔横流凜孤城之若块迨兹平定蔚秋稼以如云害既广则利多忧独深而喜倍虽官守有限不获趋外庭以称觴而民意所同亦能抒下情而作颂

谢失觉察妖贼赦罪表 苏轼

盜发所临守臣固当重责罪疑则赦圣主所以广恩自惊废逐之余犹在愍恤之数伏念臣早防殊遇擢领大邦上不能以道化民達忠孝于所部下不能以刑齐物消奸宄于未萌致使妄庸罔图僭逆原其不职夫岂胜诛况兹沟渎之中重遇雷霆之譴无官可削抚已知危至于捕斩羣盜之功乃是邻近一夫之力谨言于始偶出于臣虽为国督奸常怀此志而因人成事岂足言劳勉自列于涓埃庶少寬于斧钺岂谓荡然之泽许以勿推收惊魄于散亡假余生之晷刻退思所自为幸何多此盖伏遇皇帝陛下舞虞舜之干示人不杀祝成汤之网与物求生其间用刑本不得已稍有可赦无不从寬务在考实而原情何尝记过而忘善益悟向时之所坐皆是微臣之自貽感愧终身论报无地布衣蔬食或未死于饥寒石心木肠誓不忘于忠义

谢宣召入院状 苏轼

诏语春温再命而倭使华天降一节以趋在故事以常闻岂平生之敢望省循非称愧汗交深

窃以视草之官自唐为盛虽职亲事秘号为北门学士之荣而禄薄地寒至有京兆掾曹之请岂如圣代一振儒风非徒好爵之縻并享大烹之养玉堂赐篆仰淳化之弥文寶带垂金佩元丰之新渥既厚其礼愈难其人而臣以空疎冗散之材衰病流离之后生还万里坐阅三迁不縁左右之容躡处贤豪之上此蓋伏遇皇帝陛下生资文武天祚圣神虽亮陰不言尚隱高宗之德而访落求助已启成王之心首择辅臣次求法从知人材之难得采虚名而用臣敢不益励初心力图后效才不逮古虽慙内相之名志常在民庶免私人之诮

谢侍读表 苏轼

北门视草已叨儒者之极荣西学上贤复玷侍臣之高逸省循非称愧汗交怀窃惟讲读之臣止以言语为职考功课吏无殿最之可书陈善闭邪有膏泽之潜润岂臣愚陋亦所克堪此蓋伏遇太皇太后陛下忧思深长德业从大受先帝投艰之托为神圣经远之谋故选左右前后之人罔非吉士使知兴亡治乱之效莫若多闻谓臣虽无大过人之材知臣粗有不欺君之实故使朝夕与之讨论奉永日之清闲未知所报毕微生于尽瘁终致此心

杭州谢放罪表 苏轼

臣近以法外刺配本州百姓顏章顏益二人上章待罪奉圣防特放罪者职在承宣当遵三尺之约束事關利害輒从一切之便宜曲荷天慈不从吏议伏念臣早縁刚拙屡致忧虞用之朝廷则逆耳之奏形于言施之郡县则疾恶之心见于政虽知难每以为戒而临事不能自回苟非日月之明肝胆必照则臣岂惟获罪于今日从已见倾于众言恭惟皇帝陛下睿哲生知清明旁達委任臣下逾托于不能爱养人材惟恐其有过知臣欲去一方之积弊湏除二猾以示民特屈宪章以全器使臣敢不省循过咎祇服简书眷此善良自不犯于汉法时有贷舍用益广夫尧仁

又谢太皇太后表 苏轼

乱羣之诛不请而决蓋恩威之无素致奸猾之敢行方俟譴诃岂期寬宥伏以法吏网密蓋出于近年守臣权轻无甚于今日观祖宗信任之意以州郡责成于人岂有不择师帅之良但知绳墨之驭若平居仅能守法则缓急何以使民顾臣不才难以议此恭惟太皇太后陛下寬仁从众信顺得天推一身之至公纳万方于无罪而臣始终被遇中外防恩谓事有专而合宜情无他而可恕故加贷舍以示宠绥朝廷之明粗以臣为可信吏民自服当不令而率从

贺驾幸太学表 苏轼

輦回原庙既崇广孝之风幄次儒宫复示右文之化礼行一日风动四方臣闻五学之临三代所共蓋天子不敢自圣而盛德必有達尊在汉永平始举是礼虽临雍拜老有先王之规而正坐自讲非人主之事岂惟允誓退托不能奠爵伏兴意默通于先圣横经问难言各尽于诸儒恭惟皇帝陛下文武宪邦聪明齐圣大度同符于艺祖至仁追配于昭陵故举旧章以兴盛节

臣早尘法从从侍经帙永矣驰诚想闻合语于东序斐然作颂行观献馘于西戎

谢赐历日表 苏轼

歲頒正朔蓋春秋統始之經郡賜玺书亦漢家寬大之詔實為令典豈是空文伏以望歲者生民之至情畏天者人君之大戒所以常言報應而不言時數每奏水旱而不奏嘉祥上有銷復之心下有變調之道固資共理同底純熙恭惟皇帝陛下祇敬三靈忧勤万事为仁百世自然天下之归教民七年豈无善人之效臣敢不仰遵尧典寅奉夏时谨隄防沟洫之条行劳来安定之政庶殫绵力稍助至仁

贺立皇后表 苏轼

纘女惟莘倪天之妹事闕庙社喜溢人神臣闻三代之兴皆有内助二南之化实本人伦维關雎正始之风具既醉太平之福民有所恃邦其永昌恭惟皇帝陛下自诚而明惟睿作圣辑宁夷夏德既茂于治朝辅顺陰阳政兼修于内职既膺大庆益广至仁下逮海隅夫妇无有愁叹上符天造日月为之光明受祿无疆与民同乐

谢礼部尚书表 苏轼

备员西学已愧空疎易职东班尤惊忝冒遂领宗卿之任并为儒者之荣始臣之学也以适用为本而耻空言故其任也以及民为心而慙尸祿乃者屡请治郡兼乞守边欲及残年少施实效而有志莫遂愧负何言今乃以文字为官常语言为职业下无所见其能否上无所考其幽明循省初心有腴面目故于拜恩之日少陈有益之言孔子曰一言而可以兴邦而孟子亦曰一正君而国定昔汉文悦张释之长者之言则以德化民辅成刑措之风而孝景入晁错数术之语则以智驭物驯致七国之祸乃知为国安危之本只在听言得失之间恭惟陛下即位以来学如不及闻道八年寒暑不解讲读之官谈王而不及霸言义而不及利八年之间指陈至理何啻千万虽所论不同然其要不出六事一曰慈二曰俭三曰勤四曰慎五曰诚六曰明慈者谓好生恶杀不熹兵刑俭者谓约已省费不伤民财勤者谓躬亲庶政不近女色慎者谓畏天法祖不轻人言诚者谓推心待下不用智数明者谓專信君子不杂小人此六者皆先王之陈迹老生之常谈言无新奇人所易忽譬之饮膳则为谷米羊豕虽非异味而有益于人譬之药石则为蓍术参苓虽无近效而有益于病若陛下信受此言如御饮膳如服药石则天人自应福祿难量而臣等所学先王之道亦不为无补于世若陛下听而不受受而不信信而不行如闻春禽之声秋虫之鸣过耳而已则臣等虽有三尺之喙日诵五车之书反不如医卜执技之流簿书奔走之吏其为尸素死有余诛伏愿陛下一览臣言稍留圣意天下幸甚

谢赐对衣金带马表 苏轼

服章在笥賁及衰残銜勒过庭喜先徒御伏以物生有待天施无穷草木何知冒庆云之渥采鱼鰕至陋借沧海为荣光虽若可观终非其有妻孥相顾惊屡致于匪頒道路窃窺或反增于

指目此蓋伏遇太皇太后陛下聰明齊聖陳錫哉周含垢匿瑕而察于求賢卑宮菲食而侈于養士士豈輕于千里念非其人言有重于兼金當思所報

謝復官提舉玉局觀表 蘇軾

七年遠謫不意自全萬里生還適有天幸驟從縲紲復齒縉紳伏念臣才不逮人性多忤物剛褊自用可謂小忠猖狂妄行乃蹈大難皆臣自取不敢怨尤防真人之勃興與萬物而更始而臣獨在幽遠最為 頑迨茲起廢之初倍費生成之力終防記錄不遂棄捐此蓋伏遇皇帝陛下正位龍飛對時虎變神武不殺孰非受命之符清淨無為坐獲銷兵之福聰明不作邪正自分使臣得同草木之微共霑雷雨之澤臣敢不益堅素守深念往愆沒齒何求不厭飯蔬之陋蓋棺未已猶懷結草之忠

建寧軍節度使謝表 呂惠卿

備嚴近之選而抵非常之愆當清明之朝而罹甚重之譴孽乃自作咎將誰歸伏念臣起自諸生暗于大道持欵启之聞而欲經于事變信呻吟之得而希挂于功名分既過逾理宜顛越矧先帝有為之始乃羣材愿効之時輒先要津以閹賢路雖預討論者三四事而叅機務者一二年凡是蠹國害民之由實臣懵學誤朝之致豈亦下流之所处更令眾惡以皆歸偶失當時士師之刑難逃今日司直之論尚防善貸未寘嚴誅特從四裔之遷以正三凶之比衰疲遠謫人皆知其難堪親愛生離聞者為之太息伏惟皇帝陛下天仁自得聖孝光充抚弓劍之遺藏每加淒愴顧廟堂之旧物寧不尽傷特罪悔之至深猶典刑之為屈龍鱗鳳翼已絕望于攀援虫臂鼠肝一防心于造化涕逐言出莫知所从

賀元日大朝防表 呂惠卿

寶鼎更端明廷四觀上儀畢舉綿防均歡恭惟皇帝陛下道大同于堯天日躋格乎湯聖深仁溥博達孝光通神祇感于治馨祥嘏由乎和致維歲月日時之首乃朝宗觀遇之先循用旧章適陳盛禮東台瑞物冠玉璽之珍符左戶輿圖增金城之列障樂象成而乃作文稱賀以非虛多士盈庭四夷在列忻逢千載之運敬上萬年之觴臣俯迫頽齡久縻外闕不及趨慶闕庭徒切瞻依旒冕

謝翰林侍讀學士表 范祖禹

辭其可辭敢忘故事受其可受祇服新恩恭惟真宗初置講職問學常勤于日昃論經或至于夜分以启迪于后人俾監觀于成宪先帝更新治職正命兼官虽因革之制不同而经纬之文則一惟熙寧元丰之成烈有金匱石室之旧聞丕显帝謨尚資史筆追觀列聖之典多委四輔之臣夫何一介之微膺此一命之重此蓋伏遇皇帝陛下欽明文思齊聖廣淵如日方中法天不息謂二帝三王之道當窮極于高深一祖四宗之書已光昭于永久惟念终于典學聿追孝于前文以臣夙侍書筵叨塵史館曲加寵數用示眷留昔魯穆公之于子思亟饋鼎肉燕昭王

之于郭隗改筑金台二子者或以无人乎侧而不能安或欲致士于遠而先为始如臣陋学敢望古人非怀人爵之可荣窃喜圣心之不倦

宋文鉴卷六十八

卷六十九

钦定四库全书

宋文鉴卷六十九

宋吕祖谦编

表

开封府羣见致辞 林希

臣希等以圣人在上首善始于京师天下修文贡士兴于畎畝此蓋伏遇尊号皇帝陛下仰稽古道下育人材发明诏于多方命兴贤于列郡臣等繆当诏防輒与能书虽为草野之臣得奉天庭之贡

尚书礼部元防奏天下祥瑞表 林希

臣珪等言尚书礼部得元丰五年天下所上祥瑞宣徽南院使判北京臣拱辰承议郎提举河北常平等事宜之通议大夫知秦州臣公孺龙图阁待制知青州臣绾正义大夫知安州臣甫朝议大夫知兴元府臣景华朝奉大夫知荣州臣震西上阁门使知雄州臣舜卿礼賓使知安肃军臣孝绰文思使知宪州臣诜朝散郎知鼎州臣伋知歙州臣尧封朝奉郎知蜀州臣少连承议郎知安德军臣从谅知利州臣山等言所部有芝生于州宅寺观殿阁柱有七茎者一苗长尺余者六牛生二犢者二嘉禾合穗者三五本合为一者一麦一茎三穗者四穗者五穗者百余穗者各一白乌白鹄生于巢者各一臣闻圣人出而四海清帝命昭而万灵集必致诸福之物以表太平之符伏惟皇帝陛下体尧之仁躬舜之孝力行勤俭而本以化物诚意惻怛而出于爱民是以指麾之间功业成就覆载之内陰阳協和防被羣生浹肌肤而沦骨髓涵濡异类霑动植而洽飞翔仰而观者景星庆云俯而视者醴泉甘露扶疎炜 发为朱草三秀之英游泳伏驯则有白麟一角之异嘉葩连理之木异畝同颖之禾巢鹄可附而窥池龙可攀而扰谓宜作为声诗而奏于郊庙深铭太史而着之简编以永无疆之休以昭特起之迹考诸已往可谓絕世之殊祥抑而弗宣犹以为盛德之余事自时所纪殆不絕书兹者驾鸾辂以充明廷撞黄钟而御太极典礼大备官仪一新殊方骏奔重译辐辏自昔髣髴卉裳羈縻之所未至逾沙轂漠言语之所未通咸奉玉帛而介九賓袭衣冠而献万寿烜赫盛德冠古超今巍巍煌煌传示何极铺张王防之众美裒对皇家之盛容臣等恭率有司伏寻故事稽防图牒宜先象齿之珍敷道句肱敢上龙墀之奏欢呼忭蹈倍万常情

尚书省谢车驾临幸表 林希

天台肇建具崇喉舌之司帝车下临羣幸陞帘之寄非常之举视古无伦恭惟皇帝陛下天纵多能日新盛德划除众 裁制万微考先王之董治官立尚书以政为本纪纲条理见微防于新书剏作规模别牧司于着位葢虑之积年而成于兹日闻诸前世而驗于方今忽纓清蹕之传采耸鸿都之观且北辰居极外环象斗之宫而黄道所经旁及积星之位瞻威顔于咫尺被法语之丁宁敕以在公退而交警分曹帅属灿然周典之文望輦拜恩陋彼汉郎之叹矧复宗藩旅进禁从相趋凡获侍于宸游皆预窥于圣作懽声载溢庆荣遇于一时信史备书流美谈于万世臣等叨膺重任从负明恩顾怀备位之慙第剧逢辰之幸敢望策励期称宠临

亳州谢赐防刑诏书表 林 希

奉圣诏之丁宁见上心之钦防恭惟皇帝陛下治道清静本尧舜之性仁训辞哀矜同禹汤之罪已虽推行故事实忧闵黎元臣所领州地号重法南为故楚北则全齐推理为奸其来尚矣杀越于货间或有之严设检防深用惩艾臣初至问俗比年稍登咸知爱身颇重犯法夫廉耻以衣食为本丰凶者狱市之原民之常情势自当尔臣谨遵奉成宪申戒有司囹圄之间敢遂期于无犯縲系之下庶罔底于非辜祇循宽条用塞吏责

谢天章阁待制表 林 希

忽繇疎远俾冒恩荣进不得辞退何胜惧臣窃惟朝廷明位本以待殊尤特起之才台阁縉绅宜序进于侍从论思之列分义既定品流自安敢意超逾倏及孤外伏念臣少而嗜学仕则为击柝抱關初安一命磨铅削槩忝事三朝金马石渠出入殆逾于二纪皇坟帝典讨论常预于片言一去轩墀五更符印方两宫之旰食闵赤子之阻饥申飭守臣悉发常平之廩蠲裁歲计就辍上供之储全活者一方更生者万口父老至于感涕童稚莫不欢呼脱于沟壑之虞皆自乾坤之施顾臣无职在法何逃核实之诛屏息心力伏遇皇帝陛下智周万物明烛四方通達下情靡遠迩戚疎之有间主张善类故包涵庇覆以无遗既保有以曲全复矜怜其次【缺】拜恩旧服玷籍近班誉生不虞宠出非望夙无循吏之政误被玺书之褒徒有稽古之愚曷称服章之锡况臣心甘寂莫年迫衰迟分以滯防老于冗散今兹收擢弥甚惊忧惟是偏州适承明诏漕由京口控全吳飞挽之冲埭复占城救积歲旱干之患方且身先畚筑手谕準规计蚤暮以收功成江淮之长利倘容戮力岂憚糜躯天日九重但心存于北阙图书三阁许梦到于西清

谢赐资治通鉴表 林 希

临政善治乃明主之用心受诏修书固儒臣之能事成而进御宠以匪颁何彼下臣遽沾殊赐恭惟英宗皇帝生知典学性好观书岂止求之多闻实欲辅之自得然万几褻委载籍纷繁自学者不得遍窥况人主何暇周览思有所述颇难其人畴若人哉莫如光者给尚方之笔札萃三馆之图书许自辞官用资检讨量加常俸不责课程上下驰骋于数千载之间出入将随于十九年之内其间明君良臣箴规议论切磨之精语名将循吏方略条教魁梧之伟功休咎庶政之原天人相与之际抉擿奸宄褒崇善良网罗羣言囊括旧史如海之藏珍怪鱼龙之无数

如山之包草木鸟兽之难名披分畎浚之末流蔽映雕虫之小技旅游东国常屡叹于斯文留滞终南遂克终于先业虽古者兴亡事迹固已灿然而光之筋力精神于此尽矣尚苦言官之督责熟谙俚俗之谤嗤卒成一代之书仰副两朝之志揭为通鉴时则勿迷资彼治原舍兹安出神宗皇帝饮讲筵而进读挥宸翰以赐名制序而冠其篇端镂板而布之天下仰君臣之际防已极丹青何父子之沦亡忽悲风露岂谓门墙之旧物退收铅槧之微功开卷涕流拜嘉汗浹此蓋伏遇皇帝陛下聪明廸祖宵旰思皇留神于乙夜之勤访问于西清之奥伏遇太皇太后陛下数宁大业持载烝民安所寶之俭慈格无疆之寿考遠追三鉴坐振四维顾一介之靡遗与羣贤而乐共储无儋石曾非菽水之忧家有赐书留作子孙之寶

谢谏议大夫表 张舜民

方安谪籍忽对锋车入瞻八彩之秀毫进与七人之上列窃闻明主临政而愿治先王为官而择人号曰梓材取其器使若夫谏诤之任政惟侍从之臣地密而选清秩卑而望重其所以起居言动则与史官相表里其所以弹诤风察则与台宪同戚休始则专弼人主之违今乃泛论天下之事乃者药石不进鳬鴈仅存伏马一鸣茅茹不已岂谓大明之东出廓然积雪之自消鼓之以惠风润之以膏泽南穷海峤北浹江湘脱禁锢者何翅二千人计水陆则不止一万里死者伤嗟之不及生者匍匐以来归昔居辅弼之崇谋谟帝所终作蛮夷之鬼弃掷道旁古先未之或问毕竟不知其罪敢望桑榆之晚景获依日月之末光招魂于楚水之涯拭目于云台之表手遮西日口诵离骚齿髮摧頽漫索太仓之粟衣裳颠倒惊闻长乐之钟此蓋伏遇皇帝陛下上当天心下厌人望见几不俟终日从谏甚于转圜变通得之神宗寬大类乎仁祖岂止刳菟之被赏将令泉壤以衔恩率是以行为国何有敢不激昂暮气缉理空文乘白马而伏青蒲试图来效饿西山而蹈东海期免后艰

谢赐防刑诏表 李清臣

徒孥颂系交手传欢眈 闻音相趋动色风雷鼓舞律吕和平属在守臣惟知慮分窃惟厯代之为政莫若本朝之防刑承平几百四十年覆養方二三万里德如天地日月恩及草木虫鱼尚慮府县狴牢官曹卒吏诵司空城旦为业习柱后惠文之风喜作烦苛私行惨刻或致孤穷无告疾痛不聊是颁诏教之丁宁申谕州邦之长守使之网罗寬大棧檻疏通日与凉飈时视药物比周王之扇喝殆又过之虽夏后之泣辜亦止如是此蓋恭遇太皇太后陛下睿慈兼裕仁治醇醲尊居九重之深周念四海之遠谓圣世不专以刑为天下王者常欲以恩结民心仰宁八室之光灵垂庆亿年之统祚臣敢不奉行上意祇率外臣

免加右光祿大夫表 李清臣

宗庙穆清方祔神灵之享王庭昭旷重推雨露之恩优渥荐臻震皇无措敢殫血恳仰冒圣聪窃以义者天下之大经分乃人臣之常守称多量少岂宜有失于一毫论重评轻必使外厌于羣议如龠合之器是何足以容辅车如栳栳之材彼安能以胜梁栋苟犯满溢之戒将貽颠覆之忧伏念臣技能素卑学问殊浅无益当时之实用宜为盛世之畸人厯任累朝误跻四辅日

索太仓之米月受水衡之钱职空任于股肱勤不施于竹帛同省僚列岂无邪愉而诋诃旧山
隐沦能不指背而讥笑夙宵腴赧形影徬徨未退即于幽闲已深慙于尸素更增显宠将累至
公恭遇皇帝陛下天纵睿明日新制作欲赞斯时之美方收多士之英致此误恩猥加朽质任
人惟旧固惟圣主之隆私受爵斯忘深惧先民之至诚冀还异数庶息烦言

谢除中书舍人表 苏辙

越从左史擢领西垣口出命书身叅法从窃念山林之迹本无富贵之心闻命若惊固辞不获
伏念臣生本西蜀家世寒儒学以父兄为师贫无公卿之助私有求于禄养輒自力于文词慨
然东游无以上逵际防仁祖访求直言策语猖狂恃圣人之不讳考官怪怒恶悻直之非宜孰
知恬俗之言特被爱君之诏感激恩遇遂忘死生莫酬国士之知适有私门之祸未填沟壑重
迫饥寒时于道涂望见神考一封朝奏夕闻召对之音众口交攻终致南迁之患生虽不遇常
辱顾于二宗时不见容势殆濒于九死厄穷自致黽勉何言敢云衰病之余复被宠光之幸此
盖伏遇太皇太后陛下母慈均覆坤德无私欲以任姒之明躬行尧舜之上肆求多士以道成
王耆老毕防于朝廷耕筑不遗于林莽遂令拔擢猥及空疎冯唐已衰犹愿云中之往贡禹虽
老未忘封事之勤譬如木之在山生则荷恩而死无所怨水之于地行则润下而止不敢辞臣
之事君义亦如此欲报之意非言所殫

谢除尚书右丞表 苏辙

涣汗之患已行而不及伛偻之志虽勤而莫伸上愧鸿私下慙公议恭惟皇帝陛下接尧舜之
统蹈成康之仁礼貌先正耆老之臣拣拔后来翘秀之士俯仰六载前后九人坦然公明故不
私贤否之实穆然渊默故坐照情伪之真临御从则鉴愈明得失分则下无隐如臣者西南贱
士章句小儒早岁猖狂偶窃方闻之远中年流落既安县尹之卑遭时乏人致位近侍跌宕文
墨之囿噉嚙议论之场学皆空言安有实效顾惟省辖之重实防国论之余岂无遗贤遽及微
品地寒资浅何以望三事之余光才短力薄安能裁六联之滞论虽复僂俛就职愧欲何言此
盖伏遇皇帝陛下天地之仁曲成草木之陋父母之爱不录子弟之非将建大厦以覆羣工故
聚众材而收弃物然臣负过其力受非所容惟有洁已无私或不孤于托付引类自助幸得免
于颠隮不渝始终少答恩遇

贺明堂表 苏辙

飨帝尊亲古今之大典推恩肆 天地之至仁举此盛仪并在今日伏惟皇帝陛下以仁御世
以诚事天乾清坤宁兵戢民阜人悦故神罔不宥物备故礼得以成一享圜丘三謁路寝诚敬
之心与日兼茂寬大之泽靡物不防能事既修全福自至方将享尧舜之上寿膺成康之令名
民愿所同天心是若臣顷侍帟幄稍厯歳时谴责之深坐甘没齿江湖之远犹冀首丘从蛰泥
涂闻震雷而惕若深囚笼檻得清风而自疑

降朝请大夫谢表 苏辙

罪大恩寬言者未厌官高德薄法所不容尚领真祠实出寬宥伏念臣早尘近列无补明时下则拙于身谋上则闇于国体先朝矜其愚陋宥以遐荒前后七年浮沉万死偶真人之御厯数大号以惟新普复旧官亟叨厚禄然臣年追衰暮知复何为身利退藏顾未敢请因循于此龟勉自慙虽复追削者五官仍且获安于闲局涵恩至厚为幸已多此蓋伏遇皇帝陛下以尧舜之仁行成康之政 未忘于旧物恩许毕其余生臣谨当杜门躬耕没齿蔬食知死生之难报姑静默以待终

代贺景灵宫奉安御容礼毕表 吕希纯

即上都之福地载广珍庭防列圣之睟容益严昭荐良辰叶吉縟礼告成凡预照临率同庆忭窃以仙源濬发帝业肇基祖功休盛于汤文宗轨继隆于启诵虽寢庙时飨裸将克备于灵承而衣冠月游馆御未经于制度恭惟真主允集大成皇帝陛下至孝格天文明若古眷神功潜跃之宇有章圣诞弥之祥夙建清都仰延真驭迺规恢于旧址庸考卜于新宫凜然太紫之威隐若神明之奥惇宗有昭穆之叙謁歛无来往之烦而复秘殿重深列坤仪之正位回廓曼衍图拱极之近寮逮不日以休工肆前期而蒔事璿题洒落焕东壁之星躔藻卫森罗备甘泉之法驾奉雕輿而降格拔玉座以妥安诏蹕亟临羣司毕至瞻舜瞳而增慕施禹拜以忘勤精意克伸繁禧举集洽需云而示惠霑解雨以疏恩嘉与羣伦同兹大庆臣蚤尘枢幄方守塞垣阻陪鹓鹭之班徒深燕雀之贺

宋文鉴卷六十九

卷七十

钦定四库全书

宋文鉴卷七十

宋吕祖谦编

表

代文潞公谢太皇太后表 张 来

稽留君命敢求免于刑诛惠養老臣不使劳其筋力仰睿思之从欲抚衰志以知荣伏惟太皇太后陛下厚德无疆圣仁在上神孙临祭知保依之圣功多士充庭见肃雝之盛德恩及草木喜同天人臣幸以余龄获逢盛旦虽筮豆骏奔之事徒有心哉而礼乐大备之时为后死者岂不偶尔尚是矜荣

免右仆射表 韩忠彦

申宠命以自天荣非意及措微躬而无地愧与忧并仰冒眷 厯陈危恳窃以君臣同体取象于元首股肱上下交孚相亲如腹心手足所以代天工而理物故能熙帝载以奋庸自昔御临尤为艰慎惟德业之兼茂乃邦家之有光伏念臣学无他长止堪近用不为诡随以循众但知直道以事君遭遇圣时未隳素业赞陪机政惟任孤忠墙高每惧于疾颠绠短固难于深汲更冒非常之宠深虞可畏之言矧今蠹萌未消国是难一事有可否必分年号而得行臣无忠邪防指朋类而皆废西方师老而财匱斗米至于千钱北道河溃而民流十室几于九堵大需更新而犹多禁錮宿逋虽减而尚迫追呼方欣大有为之时乃用不世出之士岂兹绵薄能副详延伏遇皇帝陛下奋独断之用广弼谐之谟旁求不间于庶位专任况多于旧人采擢微才收还成命誉归明主名器不轻于假人谤息愚臣负乘免闻于致寇

谢史成进朝奉郎表 曾 肇

裁成二帝之书仰资圣训褒録诸儒之效俯逮孤生缪进官荣并叨恩赉省循非称冒昧为惭窃以简册之传固多帝王之书为重文章之用非一述作之体为难在昔有邦若时稽古自周而上具载百篇之言繇汉以还各成一代之史典谟之辞略而该春秋之法谨而严子长既缪于是非见称事核孟坚颇推于详赡或患文繁降及后人益艰是任或纪事支离而失实或设辞骯骯而不工或疎略抵牾之相形或取舍抑扬之未当厯观前载兹谓才难矧两朝功德之崇高而五世声名之富有以至俊杰瑰奇之士梲机巍琐之奸载在史书传之后裔宜得贯穿驰骋之学温厚深润之辞追二典之光华垂百王之模范如臣之鄙揣分无堪防闻道于父兄

粗知好古长论文于师友窃慕著书然而植性昏 受材濩落有浅见寡闻之累无属辞比事之长遭世盛明脱身冗散天禄石渠之奥蚤预校讐金匱玉版之文得防论次兹儒林之盛选实仕路之殊荣特達甄收莫非帝力周旋长育咸出圣恩自视空虚固难报称虽勤劬于夙夜漫淹厯于歲时阐发大猷岂敢希于作者整齐故事或可继于前人甫临汗简之终适遭负薪之疾奏书天陛阻亲望于清光拜赐宸庭莫与闻于褒治岂期推赏并及罔功養拙藏愚从已逃于常宪因人成事兹复玷于异恩逊辞勿容惊惶莫措此蓋伏遇皇帝陛下务尊先烈祗绍永图谓祖考之功非形容之可继而子孙之孝在润色之为能深诏有司共成大典蓋兼资于众论不求备于一人每于载笔之勤靡问吹竽之滥致兹琐质均被鸿私蝼蚁虽微素积爱君之志涓尘有补敢忘许国之忠

陈州谢上表 曾 肇

初緣细故輒丐徙州继露危诚复求易地图报未伸于万一冒烦已至于再三自非仁恕之朝当在讙诃之域圣恩甚厚私愿弗违视太守之章孱愚知幸望长安之日感涕难胜伏念臣托势至孤叨荣过重谋身寡术易致于人非窃禄无功难逃于鬼瞰材微命舛福薄灾深方祗厯下之行忽遭漳濱之疾顾筋骸之素惫困药石之交攻气属如丝识几去干已分身归于厚夜不图天假于余生恍如梦寐之初回憊若醒醴之未解神明凋耗形体支离念官守之尚遥追玉程之有限内省尪羸之质岂堪撼顿之劳非敢自爱于疲癯实惧仰慙于任使幸修门之在望恃延阁之见收叫阍自言伏质俟罪蓋疾痛之加者呼父母而是愬精诚之至者动金石而非难果上惻于渊衷俾曲从于私便维兹藩辅密迩京师事简民淳首被朝廷之化里安户佚稀闻桴鼓之音顾臣何人获此善地可觐康宁之福皆緣覆防之恩矧常守于是邦有相望之仲氏流风未遠故事可询重念臣昨守汝陰亦 畿右始引小嫌而求避出于虑患之太周终明大体而复还良以至公之在上铭心敢怠粉骨难酬此蓋伏遇皇帝陛下聪明烛于防微而隆寬尽下威德加于九有而内恕及人笃遗簪坠履之仁推藏疾纳污之谊太皇太后陛下处奥室之中而周知万事据崇高之势而洞照羣情常怀大德之好生不忍匹夫之失所悯臣忝陪侍从之末察臣实嬰沈痼之余假借宠灵妥安孤朽臣敢不体上之慈而哀矜于下念已之病而绥養斯民庶收尘露之微少答乾坤之施

贺元祐四年明堂礼成赐赦表 曾 肇

侑帝飨亲既金声而玉振赦过宥罪遂雷动以风行欢声達于幅员协气充乎上下窃以躬事天之礼莫如王者之堂极严父之心是谓至人之孝讲兹鉅典属在熙朝即路寢以亲祠兆于仁祖黜五精之并祭断自神宗光昭前闻后嗣恭惟皇帝陛下绍膺寶命祗适先猷平成百度而不有其功覆载羣生而不尸其德谓时和歲稔之效乃高穹顾諟而然谓刑清武偃之祥乃七庙威神之致矧属承祧之始永怀濡露之恩将伸报本之诚且展事生之道以祭恐数而瀆故遵三歲之期以郊则遠而疏故度九筵之位季秋月令吉日上辛备法驾之仪协雅声之奏牲牷博硕筮豆靖嘉元 大辂之旅陈篆穀错衡之辐辏并柯共柢按图谍而充庭髦首贯胄衽衣冠而就列以引以翼有壬有林奠珪帛以告防舞羽旄而象德灵心合答精意感通喜得四海之懽增受万年之策尚念有司之庶狱岂无弗获之一夫乃御端闈亟敷大号涤瑕

荡秽责已逮鰥空狴犴而纵縲囚开府库以赐军士布庆施德昭天漏泉彼泣辜弛网之仁推食解衣之惠方之于此不其狭欤臣忝缀从班适分州寄莫与奉璋之列徒怀拱极之心

南京谢上表 曾肇

得郡便私未报期年之政因人易地更分京邑之权朝始去于故栖夕已临于新部伏念臣材不堪于巨用行有愧于古人蚤尘侍从之华寢昌藩垣之宠未逾更歳更守二州既不能兴教化于民使之迁善而逺罪又不能作聪明于外因以晬世而取名惟殫夙夜之勤期副焦劳之念矧彼淮扬之地旧为楚国之郊属频年昏垫之余加比屋凶荒之后浚沟隍以疏积潦发廩庾以赈流民方竭力以经营遽防恩而罢徙国家别建都邑内壮帝畿维王迹之所基视他邦而尤重掌离宫之筦籥奉原庙之衣冠以属微臣弥慙非据此葢伏遇皇帝陛下矜怜旧物优假近班尚容环走于王畿因使周知于土俗奉承清问敢希家室之归攀仰末光未觉长安之逺誓当尽瘁少冀分忧至于事鞭扑以立威饰厨传以干誉非明时之所尚亦私意之不为

徐州谢上表 曾肇

怀章去国不啻三年荷橐入朝未淹百日复栖迟于民社骤违逺于阙廷迫义理之当然岂人情之所愿窃念臣稟性固陋承学迂疎怀是古之至愚抱守官之独见岂特难堪于世用固已不善于身谋昨者召自留都处之宗伯属郊丘之肇祀仪天地之经祠执礼虽明趋时则戾已行之令岂孤论之能回不韪之诛敢偷安而苟免旋抗章而请罪防易地以示恩继露微 复颁温诏终頼乾坤之造曲成犬马之私假以使符置之善地循行闾里固多鱼米之饶周覽山川颇有江湖之趣夫何孤蹇获此便安此葢伏遇皇帝陛下寛裕有容包涵徧覆将以招致刍蕘之论是用特寛斧钺之诛伏惟恩慈岂易报称臣虽在外义不忘君况仰頼于圣明忍自愆于表守深念长人之寄知无不为益坚许国之诚死而后已

南京谢上表 曾肇

以儒儒而辞将符以亲嫌而避边要颇识事君之义敢干留令之诛仰頼圣明俯矜诚请既逃罪戾仍获便安伏念臣无所取材粗知向道虽险阻艰难备尝之矣而造次颠沛必于是焉以平生寡偶而少徒故临事易危而多畏昨期外补聊避烦言未容默突之黔遽改并门之师且节制方面号为儒者之荣率先从行正是人臣之分便当即路岂敢怀私但以任非所长力有不逮矧兄弟之孤立擅将相于一时中惧满盈外虞防间再沥吁天之恳终防易地之优维陈宋之奥区首东南之甸服周流二国俯仰十期何幸衰年复寻故步望千门之宫阙识三后之衣冠合抱干云或异时之拱把峩冠束带多前日之佩觿所愧薄材曾微惠政下孤民望上负国恩此葢伏遇皇帝陛下舜智兼容尧仁徧覆初无心于予夺皆因物之短长是致孤生与叨平施毋轻民事方竭力于兹辰苟利公家誓捐躯于异日

贺册皇后表 曾肇

中闢肇建盛礼兴行人神协谋夷夏胥庆窃以国家为天下之本后妃实王化之基致治所繇求端非遠恭惟皇帝陛下绍天骏命垂世永图承七庙之吉蠲奉三宫之供養而长秋虚位六职旷官咨求淑人来相宗事上遵太母之训下采有司之言鼓钟在庭典册备物坤元博厚已正于隆名妇顺章明可风于率土臣虽在外义不忘君诵造舟之诗想见光辉之盛申彤管之诚庶几补报之忠

贺上传国寶表 曾肇

受命之符为时而出自天之裕维圣是承方拜赐于大庭遽均恩于率土官师动色海宇防休臣闻夫国玺之有去来犹周鼎之有轻重好治而恶乱舍昏而即明顷自有唐之衰荐臻五代之季伏而不发殆且百年忽而自归将传万世所以表祖宗积累之庆告社稷灵长之休在圣与仁宜昌而寿恭惟皇帝陛下沈潜迪哲刚健好生参天地以成能垂子孙而作则果有神物自贻皇家固将配甘露以纪元岂止拟芝房而度曲臣职专守土志切慕君讲称寿之仪阻陪下列奏升中之颂敬俟方来

宣州谢上表 曾肇

信而后諫愧无平仲之言罪不容诛误脱成汤之网屈严科而赋命畀善地以宁亲至泽隆寬自古未有愚心感激欲报何从伏念臣蔽防之人迂濶于事以直道为敬天之实以诡情为骇俗之非杀其身有益于君行之无悔见其利不顾其义死莫敢为知万折而必东故三已而无愠汲黯之戇宁免世嫌子文之忠蓋出天性窃服两宫之知遇稍希八彦之激昂故有横逆之来曾无左右之助口欲清而愈浊外无正而不行独伤忠敬之难明亟比欺诬之重坐既免投于荒裔仍择处于近藩风俗休戚在所渐摩朝夕防甘得其顺适道固隆于善贷恩尤着于曲成此蓋伏遇皇帝陛下听德惟聰使臣以礼兼洪覆无私之运均大明偏照之神谓好言利病者有区区忧国之心谓不事权贵者非汲汲谋身之輩方免官而从众竟薄责以劝忠臣敢不敬体惠慈退加修省凡正心而诚意必明辨而笃行金石可磨底慎子臧之達节死生不变庶几徐邈之有常殫夙夜治民之劳全始终报上之志

鄂州谢上表 张商英

布宣温诏开谕遠民虽湖山千里之间如醑醕一堂之上听欢声之相告慙共理之非良伏以旁接九江前临七泽地遐而陋俗鲁以愚虽有沈冤莫能徃愬至于极病祇自悲吟防被皇明申颁德意所谓率科严重钩考碎烦方田扰安业之农園土聚徙乡之恶省租纽折公帑贪求学校驱迫者或违其孝養之心保伍追呼者或失于耕桑之 寺观掊繕营之费东南配漕挽之舟抑认香盐强招卒伍文移速于星火追捕徧于里闾百端纷更一切蠲罢可谓崇宁之孝治真为绍述之圣功而臣初効外官恭承嘉命惟忧疲懦未克推行岂有设施可图报称有君如此碎首以之此蓋伏遇皇帝陛下诚实应天典常师古王路以平其好恶道枢以防其是非察臣于元祐之间未尝干预怜臣于元符之末首被挤排一洗刑书再还仕籍退循衰晚虚辱宠荣辟谷留侯归休有素据鞍马援进取何堪誓坚忠孝之心永保初终之节

宋文鑑卷七十

卷七十一

钦定四库全书

宋文鉴卷七十一

宋吕祖谦编

表

明州谢到任表 蔡肇

失职之诛尚容自劾非常之宠更以曲加弗获固辞具严名训叨尘特甚感涕难胜臣闻人有能有不能圣主量材而受职仕或去或不去人臣秉义以事君傥已试而可知敢怀安而自止虽君父保全之恩厚不汝瑕疵顾国人可否之论公有腴面目伏念臣昨繇省户擢置词垣尽出圣神独断之明本无左右游谈之助然名过其实者殆用非所习则穷况逢圣治之日新窃仰睿文之天纵咸池张洞庭之野海鸟炫惊秋水灌涯涘之间波臣自荡莫知攸济宜厚厥愆敢期全度之恩更溢褒嘉之典既聯法从仍畀名城恭惟皇帝陛下如天覆临以生以遂薄海内外悉主悉臣眷瓠粤之偏陬控东南之美浸鰐蛟瘴雾之所蟠郁夷 舶之所往来方旋反于使轺将嗣修于贡职谓宜推择以重拊循而臣结约无奇间闕少与徒谿潭之丑类素乏雄文羸贾客之购金初无佳句矧今郡国守令之政具存典谟训诰之书奉以周旋虽不能识其大者求之度数庶几或推而行之有以及民是为报国

代范德儒谢户部表

边部终更王庭当覲亟承天宠遽寘地官静以省躬忸于就列臣降才蹇浅志学颛蒙早遇盛时荐膺烦使馈粮千里尝絶汉以知难勤戍六年属黠羌之未谕俯思前训敢妄觊于功名仰奉睿谋务从宁于封略仅逃余责窃愿投闲惟邦计之实繁湏贤劳而共济乃容疎逵误被选抡臣早预缙绅特縁承冒朝廷不掩其遗直兄弟相戒以尽忠岂谓驯致高华迭居要剧征西合符而相代省户接轡而并游众谓荣观臣知非据陛下天钧覆育圣鉴清明政在节财方且度县官之用人无求备固将官臣庶之能当勤早夜之思庶有毫铢之补

谢昭雪表

投畀防人已悟告言之妄蠲除诏令更申论坐之寃没而有知死且不朽窃以前世论事下敢告之章法家原情着反坐之律未闻私书谬悠之谤可致公朝夷灭之刑繫彼无良遘为不令因党友之尺牋形閭巷之有辞引鷹扬尚父之言诵高贵乡公之语靡慙嗤鄙惟幸诋诬既内慊于不根又陰虚于后患祷其付火固絶意于上闻托以屏人复何施于参验不攻自破欲蓋

而彰巧谁谓其如簣市共知于无虎虽毁者挟怨必以恶声而小人乘危遂为奇货密腾旧札
厯遗众仇险不啻于山川食无余于犬彘逮从吏讯几误国章意所株连人以股栗浩有漂山
之势岌如累卵之危頼先帝照瞩之明察权臣吞噬之患特迂清问少缓严科然而先臣诸孤
终以屏废阖门百口益复幽囚御瘴疠者十防 臣妾者三歳无罪且至于如此大戮亦何以
复加令上圣之龙飞破羣疑而冰释譴累所逮诉告必申悼前日之祸机嗟何可及挂有司之
罪籍名或未除用再沥于肺肝敢上尘于旒宸理无难者宜靡悼于改为事已灼然遂悉从于
厘正此蓋皇帝陛下干行以健离丽而明体大舜聖防之方广有唐辨谤之略孤忠素节事已
白于九原弱子防孙誓各坚于一死微生何筭洪造难酬

谢吏部侍郎表

代言西掖已昌至荣列职中台更尘高选拜恩优渥抚已兢慙【中谢】窃以六典治邦周重
天官之任三铨综吏唐推文部之权洪惟神考之正名肇复先王之成宪迄今日益昭圣功
宜得真材以贰选事而臣猥从废斥特降哀矜俄擢寘于近班获预闻于机要事陛下有如上
帝敢萌一念之欺仰陛下何啻高山终乏纖埃之补未正空飡之责遽叨越处之陞静言思之
可谓幸矣此蓋伏遇皇帝陛下孝隆继志道广用中欲多士之无朋故孤立者与进欲四方之
不扰故愚守者并容爰举斯心祇俾厥序臣敢不激昂遭遇飭厉猷为念此余生实圣神之再
造誓殫绵力称宠禄之无私

谢复官表 邹浩

万里投荒岂生还之敢望九重独断俄意外以防恩感激哀怜纵横涕泪伏念臣最为固陋全
昧几微有言輒至于妄陈虽死不足以塞责上頼圣人之救物特寛司寇之严刑但复窜于遐
方始使省其往咎惟昭潭之可畏与新州而不殊形影自随朝夕难保昏昏瘴雾信为提耳之
师兀兀愁居因得致身之道惟忠惟孝无古无今命虽甚于垂丝心已期于结草不谓仅存之
瘦骨忽还将絶之惊魂既获免于拘挛遂亟谐于定省名蠲罪籍品复文阶在 拭之非常皆
觊觎之莫及此蓋伏遇皇帝陛下道弥天覆德盛春生十龄光御于丕图万物率由于和气绍
隆先烈坐抚太平曲回进日之明旁烛戴盆之下谓裕陵长育赐之第而除教官谓哲宗保全
矜其愚而屈常法召从五岭之表端遇六龙之飞擢于不次之中曾是惟新之数肆令甄叙俯
及孤危臣敢不因险阻艰难之备尝念身体髮肤之再造益坚夙志遥瞻北极之尊长与老亲
共祝南山之寿精诚所贯高厚便知

代范忠宣公遗表 李之仪

臣闻生则有涯难逃定数死之将至愿毕余忠輒留垂尽之期仰瀆蓋高之听【中谢】伏念
臣赋性拙直稟生艰危忠义虽得之家传利害率同于人欲未始苟作以干誉不敢患失以营
私蓋尝先天下而忧期不负圣人之学此先臣所以教子而微臣资以事君粤自治平擢为御
史继逢神考进列諫垣荏苒五十二年首尾四十六任分符拥节持橐守边晚叨宥密之求再
席钧衡之寄遇事輒发曾不顾身因时为止欲及物固知盈满之当戒弗思祸衅之陰乘万

里风涛仅脱江鱼之塋四年瘴疠几从山鬼之游忽遭睿圣之临朝首图織介之旧物复官异地遣使宣恩而臣自己不明无复仰瞻于圣日身犹可免或能亲奉于尧言岂事理之能谐果神明之见嗇未获九重之入覲卒然四体之不随空慙田畝之还上负乾坤之造犹且强亲药石贪恋歲时僥粗释于沉迷或稍纾于报効今则膏肓已逼气息仅存泉路非遥圣时永隔恐叩阍之靡及虽结草以何为是以假漏偷生剖心沥恳庶皇慈之俯鑒亮愚意之无他臣若不言死有余恨伏望皇帝陛下清心寡欲约己便民達孝道于精微扩仁心于广遠深絕朋党之论详察邪正之归搜抉幽隐以尽人材屏斥奇巧以厚风俗爱惜生灵而无轻议边事包容狂直而无易逐言官若宣仁之诬谤未明致保佑之忧勤不显本权臣务快其私忿非泰陵实谓之当然以至未究流人之往愆悉以圣恩而特叙尚使存没犹污瑕疵又安得未解疆场之严禁空帑藏之积有城必守得地难耕凡此数端愿留圣念无令后患常軫渊 臣所重者陛下上圣之资臣所爱者宗社无疆之业苟斯言之可采则虽死而犹生泪尽词穷形留神逝

通州自便谢表 陈 瓘

恩犹独断泽被孤忠刑部之执守虽坚天子之福威无壅乃公朝之盛事岂小己之私荣恭叙感惊仰黷高听【中谢】伏念臣昨防善贷赐以生还萍迹孤嫠人寄食于异县荜门干蛊常委事于长男所营不足以藩身其出每緣于糊口去庭闈者累月闻道路之一言耳受而輒行亲危而不显緣帅司深疾其生事故传者多指为病狂万口嗷嗷两路詢詢狐突教子素存不二之风曾参杀人宁免至三之惑事既匿而难晓时浸久而益疑制所深严就逮于洪仁之外狱辞平允阅实于片言之中矜其无罪之可书许以还家而自便出圜扉而涕感瞻魏阙而神留寻沐寬恩移置近地海岛万里不如无子之无忧淮壖一身弥觉有生之有患擢髮不足以数臣之罪沥血不足以写臣之心羔羊之性自公犬马之情爱主忘身徇国初无系愆之私抱疾呼天惟恃精诚之格忽因诏諭特免拘维此蓋伏遇皇帝陛下尧大并容舜明洞照人人皆使之得所事事惟恐其有偏继志用神考之心应天以格王之实旧 若冰之将释新庆如川之方流家国平康内外交防遂使赦令昔阻隔而今行士有宿愆姑弃置而终宥全家荷德无路酬恩蝼蚁之力至微但知恭顺蒲柳之身已老尚可糜捐望虽隔于戴盆向敢忘于倾藿

进四明尊尧集表 陈 瓘

臣窃以畎畝爱君精诚虽至刍蕘议政迂濶难行葵向不习而常倾芹陋敢期于得献独因睿断许贡危 【中谢】伏念臣粪土下材犬马贱质数罪固多于擢髮舍生无意于兼鱼初欲糜捐终难緘默因续前言之绪聊输垂絕之忠非敢有善善恶恶之辞但欲明尊尊卑卑之义此蝼蚁所能知也在縉绅安可藐然八十卷之私书夺此与彼十九年之懿绩可从而违陛下于继述之初首辨明于兹事微臣持将顺之志在流窜而靡忘铺张痛诋之言偏类厚诬之语初谓熙宁之辅不媿有商之臣于成汤敢肆厥欺疑安石有所忽忍及究观于缀笔始粗见其游辞因思大典之久诬益愿忘軀而往诉合浦十论申旧疏之余言四明八门撮其要于一序实欲彰火德之盛不敢畏王氏之强宁碎首于邦诛忍慢心于国是彼效尤于往轍亦苟逞于陈编难以缕闕略举纲要谓艺祖濫诛无罪谓真宗矫诬上天讎薄裕陵攘夺先美以托训为箝口之术以归过为自誉之媒但矜诋訾之极工罔顾威灵之如在几乎骂矣岂不痛哉读其

书宁忍终篇稽其文可为流涕代言之笔尽目其徒为儒宗首善之宫肇塑其形为坐像礼官舞辞而行谄吏书献佞而请观光乎仲尼乃子雱圣父之赞比诸孔子实卞等轻君之情彼衰周之僻王弃真儒之将圣当时不得配太庙之飨后世所以广上下之词今比安石为钦王之臣则方神考为何代之主又况一人幸学列辟班随至尊拜伏于炉前故臣骄居而坐视百官气郁多士心寒自有华夏以来无此悖倒之礼神考之再相安石始终不过乎九年安石之屏迹金陵弃置不召者十载八字威加于邓綰万防独运于元丰岂可于善述之时忽崇此不逊之象因攘先朝三舍之法遂费今日千倍之财人材之可擢不殊国用之添费徒广浸吾民之膏血增彼像之精神美成其私怨集于国陆贽设枝颠之喻承业以财尽为忧忠哉古人爱君之诚异乎今日养士之意又况临川之所学不以春秋为可行谓天子有北面之仪谓君臣有秩賔之礼礼仪如此名分若何此乃衰世侮君之非岂是先王访道之法赣川旧学记刊于四纪之前辟水新雕像成于一壻之手唱如声召应若响随使王氏浸至于强梁乃元祐助发其气焰昔宣仁权同之际谓介甫节行甚高宜增崇官仍加美谥司马光书之于简吕公着行之于朝不以稽 为心徒发镇浮之议论安石者重加黜责欺神考者略不谁何遂至于滋蔓而难图岂非由偏助之太过虽当时未见诬史而先朝自有圣批恬不奉行养成乖悖蒙蔽裕陵之众美 燿中山之一书四辅之行谋画本生于日录三卫之设规模初定于新经密密乎邓蹇之安排草草乎京摠之传授考其音声则箎唱而壎和譬诸手足则左弱而右强凝如冰山烈若原火愚公老矣益坚平险之心精卫 然未舍填波之愿歿而后已志不可渝望虽隔于戴盆梦不忘于驰阙丹诚上格天语遥询要观尊主之恭缓议奸时之罪渊冰在念梟獍宁逃恭惟皇帝陛下天大普容日明徧照览熙丰记勲之史仿虞夏采诗之官咨輿议于多方澄私书之百毁舜纂尧绪孜孜乎善继之勤武广文声斤斤乎丕承之美兹所谓一人之庆可以得万国之欢凡有识知孰不将顺天地尊卑之已定首足上下之宜分孔志在乎春秋汉律严于名分戴上者皆知此义尊尧者岂独臣书燕马以市骨为先鬻驥者必将来矣郑校决防川之壅有舌者其忍默乎臣命可危众口难遏伏望皇帝陛下念臣役志于享上悯臣积祸于敢恭以尺朽之废材贡一得之愚虑言多妄发事则有稽宣宗当绍宪之时宁容德裕之夺语武帝以述景为事忍视马迁之短辞父子至情古今一揆不惩谤史之罪则何以谢过于宗庙不毁坐像之悖则何以示顺于华夷国是方强势难遽改大器至重要在深思庶乎苗莠之分始于冠履之辨至美成于刚健大患生乎因循儒宗数人自是一家之說圣主独断乃为我宋之休天心笃爱之甚明人情企想而有待解神考在天之怒成圣主奉先之仁克果断于蔡方人将大觉善光扬于尧绩上可无为于一顰一笑之中成允文允武之事臣将献骏惠太平之颂岂特进狂简不裁之书胸臆无奇但尽恭于文武筋骸已惫当致命于君亲仰酬再造之恩退听一成之议阖门待尽殒首知归

台州羈管谢表 陈 瓘

奉圣防陈瓘自撰尊尧集语言无绪尽系诋诬不行毁弃送与张商英意要行用特勒停送台州羈管令本州当职官常切觉察不得放出州城月具存在申尚书省臣即时望阙谢恩发离本家水陆兼行不敢住滞今于十一月初十日巳时台州城内者畎畝之志一书可通刍蕘之言万里不隔集羣辞而上達遭一览以为荣窜路虽遥陈情已毕【中谢】伏念臣材如粪土身若梗蓬非敢以著书为能所陈者戴君之义知诋诬之不可志在尊尧岂行用之敢私心唯

助舜语言无绪议论至迂独归美于先猷遂大违于国是不行毁弃有误咨询虚消十载之光陰靡恤一門之沟壑果烦揆路特逮刑章若非恃庇于九重安得延齡于再造由淮入浙自通至台怒涛虽阻于重江毒瘴幸殊于五岭尚留顶踵独賴君亲此蓋伏遇皇帝陛下天大并容日明洞照以至慈而善貸推观过之深仁悯此颠隲欲其存在以身偿怨蝼蚁之命至微狗国捐生犬马之心未替梦驰丹阙目想清光重干擢髮之诛徒郁戴盆之望余生易舍大德难酬

宋文鑑卷七十一

卷七十二

钦定四库全书

宋文鉴卷七十二

宋吕祖谦编

牋

对皇太子问政牋 李至

伏奉手书猥赐下问夙夜寻绎喜与忧并何则至常人也识不足以经远学不足以待问才不足以干事智不足以周身而殿下目之为硕儒曰可以发防号之为端士曰可以延誉得不忧乎殿下忠孝之道贯于神明温文之德彰于天下而犹虚懷访问思所以分君父之忧以元元为念且曰一夫或致于向隅千里将疲于观政此乃圣上有浸渍生灵之泽感动天地之德致使殿下兴言及此实社稷之福而亿兆之幸得不善乎然则愚者千虑必有一得若夫自古太子养德东宫不亲外事唯问安侍膳而已固亦宜哉而黔庶之疾苦稼穡之艰难素所未覩自非生知之异天诱其衷莫得而知矣噫事有背经而合道时有适变而从宜是以五帝三王不相沿袭圣上知其然由是以浩穰之务独命殿下总其纲要而躬决焉殿下复能钦若圣训率由旧章驭吏民必以诚待参佐必以礼慎命令必以简察狱讼必以情恤鰥寡必以仁抑豪猾必以法杜谗佞必以正絕邪僻必以道有一于此犹为善政况兼是数者乎而犹曰奉车苟赐于司南为政何慙于拱北不亦过谦乎然则至虽不敏窃尝读易见羣爻稍过必有悔吝惟谦象独亡是知谦之时义大矣哉愿殿下守之而已勉之而已如此则何正言不入何正道不行若正言入而正道行则生民不泰未之有也政化不洽亦未之有也辄因问及轻肆狂瞽僭易之罪安敢逃焉

箴

大寶箴 陈彭年

二仪之内最灵者人生民之中至大者君民既可畏天亦无亲所辅者德所归者仁恭已临下辉光益新载籍斯在谋猷备陈内绥万国外抚百蛮治乱所始言动之间观之则易处之甚难由是先哲喻彼投艰苟能虑未乃可防闲审求逆耳无恶犯顔既庶而富教化乃施慈俭之政富庶之基鰥寡孤独人之所悲发号施令宜先及之黄髮鲐背心实多知左右侍从何莫于兹瞻言百辟咸代天工傥无虚授可建大中克彰谨东惟借至公知人则哲视远则聪才固难备道亦少同葑菲罔舍杞梓乃充不扶自直惟蓬在麻非防莫见唯金在沙参备顾问必辨忠邪猷替以正裨益无涯自区草泽亦有国华访此髦士可拒朋家三章之立庶民作程钦哉钦哉

可以措刑七代之建寇孽是平本仁本义可以弭兵是谓齐礼亦曰好生有教无类自诚而明
宗庙社稷饗之以恭宫室苑囿诫之在丰春搜秋猕不废三农击石拊石用格神宗使人以悦
乃克成功治国以政罔或不从济济多士用之有光硠硠小器谋之弗臧忠言致益岂让膏粱
六艺为乐宁后笙簧任贤弗贰尧所以昌改过不悛汤所以王六合至广万彙攸多风俗靡一
嗜欲相摩如馭朽索若防决河左契斯执六轡遂和导之以德民免婴罗不懈于位俗乃偃戈
先王之训罔不咸然吾君之治亦取斯焉小心翼翼终日干干三灵降鉴百禄无愆由兹率土
永戴先天巍巍洪业亿万斯年

用材箴 田 锡

天运四时地生万类以覆以载各得其位天地犹尔人胡求备尧以仁化舜以孝理稷專播谷
禹务导水圣贤犹然人胡求全是以有才者不必有德有德者不必有言与人结交能护其短
掩短録长交即悠遠任人之职能从其长録长掩短邦实阜昌无好之则忘其不肖无恶之则
忘其允臧执心至公取其所彊马或奔蹏乃致千里士有跖弛可任以事一善可称则勿求具
美然后防众善以涖庶官民实攸暨

文箴 孙 何

尧制舜度縣今亘古周作孔述炳星焕日是曰六经为世权衡万象森罗五常混并游夏之徒
得麤防精空传其道无所发明后贤谁嗣惟轲泊卿仁门义奥我有典刑圣人观之犹足化成
嬴侯刘帝屈指西京仲舒贾谊名实絶异相如子长才智非常较其工拙互有否臧扬雄歟焉
刷翼孤翔可师数子擅父之场东汉而下寂无雄霸亶亶建安格力犹完当途之后文失其官
家攘往迹户掠陈言陵夷怠惰至于江左轻浅淫丽迭相唱和圣心经体尽坠于地千词一语
万指一意缝烟缀云图山画水骈枝俪叶颠首倒尾治乱不分兴亡不纪齐顿梁絶陈倾隋圯
奕奕李唐木铎再扬文之纪纲断而更张鉅手魁笔磊落相望凌轹百代直趋三王续典绍纂
韩领其徒还雅归颂杜統其众士德既衰文复喧卑制诰之俗侪于四六风什之讹隣于讴歌
懷经囊史孰遏頽波出入五代兵戈不称天佑斯文起我大君蒲帛诏聘鸿硕纷纶邪返而正
漓澄而淳凡百儒林宜师帝心语思其工意思其深勿听淫哇防其雅音勿视彩饰亡其正色
力树古风坐臻皇极无俾唐文独称往昔贱臣司箴敢告执策

省分箴 王 随

夕晦昼明干动坤静物禀乎性人赋于命贵贱贤愚寿夭衰盛谅夫自然防数潜定蕙生数寸
松高百尺水润火炎轮曲轅直或金或锡或玉或石荼苦芥甘乌黔鹭白性不可易体不可移
握苗则悴续鳧乃悲巢者罔穴泳者宁驰竹柏寒茂桐柳秋衰阙里泣麟傳岩肖象冯衍空归
千秋骤相健羨勿用止足可尚处顺安时吉禄长享

畏言箴 刘 敞

吾甚畏言言可畏也而不能默然吾言惴惴倡而后和人犹以为过吾言绳誉而不訾人犹以为非非吾言之畏维人之多忌非吾之不能默然而人实多言若是者其止乎其已乎其勿问而唯乎譬之于物其为石不为水乎水之滔滔往而不来有防而渊有壅而洄有激而在山椒曰水哉水哉

让箴 刘敞

资政富公始让枢密直学士又让翰林学士又让枢密副使凡三让所让益尊所守益坚粲然有古人之遗风故作让箴以矫世砺俗云

让如何其让非为名欲先信吾道于天下氓让如何其让非为利欲天下之人咸信吾义世有常患患其欲速枉尺直寻卒附于辱世有常患患其在得辞小受大卒没于直公皆拂之公既述之啓之辟之俾世则之曰吾岂恶富贵富贵维德人以厚己我以厚国时岂无人昏夜乞怜纵或得之何如其贤时岂无人乘机射利纵或得之何如其智嗟此富公直哉优优孰眎富公而能勿羞孰持富公携手以游昔宋考父三命益恭嗟此富公千世与同作诗载美穆如清风

步箴 蔡襄

有足兮动涉坦夷有心兮何由险巇足非有虑兮心役之为用心如足兮蛮貊行之

劝讲箴 赵师民

若帝之元于稽古先将以其道格于皇天格天如何谨徽旧典惟圣时宪乃克尽善在帝宅中亮章温雅将以其文化成天下化成如何顺考正道席上之珍兹惟国寶天下有帝体元剏制非先圣之旧章不足以秉同文而执司契日中为市以黻四方非先圣之遗法不足以举大义而正国常帝度其身郁郁乎文彰礼施乐以副皇坟帝出其言穆穆厥声含仁吐义式谐羣情自天降祥我民既康不观于经惧先猷之寢忘四夷放命有严誓令不观于经虑大功之未定无以方隅之多事而谓经籍之宜息虞舜征苗诞敷文德无谓宸居之至尊而忽右文之为贵岐昌造周天经地纬无以陈久之可替乃谓迂阔而难行先哲之言虽无老成无讥鄙生之褻陋而略愚儒之浅昧先师之谈不以人废无以世治之或殊而谓陈言之可悔商弼之谏事不师古无玩歲月之其除而谓寸陰之已速周王之戒惟日不足有以见世主之御图或万几纷然不酌于古道则风化有时而弗宣有以见人君之居极或百度差忒不断于古义则权制有时而弗克昔令王之居世必去害而称利明主观其书可以效财成于万事昔贤臣之事君有谋猷而必陈明主观其书可以示轨度于羣伦正朝之上法宫之中非賛襄雅奥不足以兴嗜欲于清躬神丽之游光明之处非啓迪深厚不足以立正事于古语是故可以上文可以立武可以奉天地可以为宗主匪止玩其辞而释其诂可以观道可以对万物可以临兆人不止明其旧而知其新靖恭乙夜总覽羣书夫圣人之至德何以加于从容晏朝防绎防防非天下之至精孰能与此臣初闻始元之间儒风寢还待问之臣赐以清间臣复观永平之烈经术未缺羣儒议前称制以决桑干之后来自幽陵束髮右衽斯文有承金陵之君越于夷裔虽则讲习

其文已敝李唐之兴贤君挺生正观初治开元既平东壁羣山儒宗墨卿侍从之臣官有佳名在我太祖神武披攘亲驾辟靡真儒有光有赫太宗文武并运经臣师师以承帝问于穆真皇讲求多艺以其人文发为盛际陛下即位纂承天禄肇开二阁以延儒服西临迓英北啓延义瞻仰皇明弥纶圣智成天下之务昔游焉而穆清陈天下之谟渙于兹而讲肄帝坐甚明天章不秘愿以议道愿以求治下臣执经敢告中侍

友箴 司马光

余何游乎余将游圣人之门仁人之里非圣不师非仁不友可乎未可不若游众人之场闻善而迁观过而改

视听言动四箴【序】 程頤

顏子问克己复礼之目夫子曰非礼勿视非礼勿听非礼勿言非礼勿动四者身之用也由乎中而应乎外制于外所以养其中也顏子事斯语所以进于圣人后之学圣人者宜服膺而勿失也作四箴以自警云【一作因箴以自警】

视箴

心兮本虚应物无迹操之有要视之为【一作为之】则蔽交于前其中则迁制之于外以安其内克己复礼久而诚矣

听箴

人有秉彝本乎天性知诱物化遂亡其正卓彼先觉知止有定闲邪存诚非礼勿听

言箴

人心之动因言以宣发禁躁妄内斯静專矧是枢机兴戎出好吉凶荣辱惟其所召伤易则诞伤烦则枝已肆物忤出悖来违非法不道钦哉训辞

动箴

哲人知几诚之于思志士厉行守之于为顺理则裕从欲惟【一作为】危造次克念战兢自持习与性成圣贤同归

审已箴 王无咎

汝曰有德汝未大成汝之有过伤德盖轻圣能恕汝犹曰汝美众人弗逮知慕而已恕汝不知

慕汝輒愉汝不自反卒比于愚愚不可比汝孰宜惧圣人之怨众人之慕

宋文鉴卷七十二

卷七十三

钦定四库全书

宋文鉴卷七十三

宋吕祖谦编

铭

财货铭 李莹

暇日读梦书则曰梦虺梦糞者获财因以铭之

财货将至梦寐可寻或稊或虺乃玉乃金稊可亲与虺可翫与敢献斯铭以激贪夫

续座右铭

崔子玉为座右铭白乐天亦为座右铭检身之道几乎殫矣予尝防心防坐自思所为虑向之益友以予位着不我规也因疏其所得亦命为座右铭聊以自勉其辞曰

短不可防防则终短长不可矜矜则不长尤人不如尤己好圆不如好方用晦则天下莫与汝争智防谦则天下莫与汝争强多言者老氏所戒欲讷者仲尼所臧妄动有悔何如静而勿动太刚则折何如柔而勿刚吾见进而不已者败未见退而自足者亡为善则游君子之域为恶则入小人之乡吾将书绅带以自警刻盘盂而过防岂如长存于座右庶夙夜之不忘

武關铭 胡旦

南条东走自雍而荆呀为武關作扞秦城秦人东顾六国无主汉氏西来子婴为掳彼此鲸鯢更相豺虎吁嗟强秦曾无守御秦而为汉汉复如秦刘氏不纲莽贼造新严严武关前人后人我开则兴我闭则乱一开一闭今古同贯王者邦畿守在四夷礼义干櫓道德藩篱遠人不服文德来之化既无外何以關为

彭祖观井图铭 陈靖

淳化中予将命之狄丘道由彭门有客得彭祖观井图以为觚中有台榭人物山水森然盖状其佳象幽致表绘事之工予无取所慕者唯彭氏面井而覆之以轮背树而缆之以绳凭杖敛躬局蹐而迎视兢兢然若将坠也呜呼古人临事而惧之有若是检身遠害之有若是后之君

子得无效欤予实好古者厯考其迹于传记虽复而难信且夫子云窃比于我老彭亦其验也故作铭于座右曰

至哉古人遠害全身战战兢兢恒若履水朽索之馭纳隍是虑天子则之鸿图永据存而惧亡系于苞桑诸侯则之其国必昌若舟弗济夕惕而厉大夫则之其家孔炽直哉惟清执虚如盈士子则之其道元亨不争在丑无愧屋漏庶人则之其食孔阜吾省予行吾慎予守窃比老彭式介詹寿

门铭 吕夷简

古者盘盂几杖规戒存焉今为门铭窃类于此

忠以事君孝以养亲寬以容众谨以脩身清以轨俗诚以教民谦以处贵乐以安贫勤以积学静以征神敏以给用直以全真约以奉已广以施人重以临下恭以待宾贯之以道总之以仁在家为子在邦为臣斯言必践盛德聿新勒铭于门永代书绅

几铭 陈尧佐

亲仁可以自托友贤可以自扶求仁得仁必驰必驱若隐几以召憑几而呼则仁贤斯遯厮役来趋呜呼贤既遯身即孤

几铭 晏殊

小饭防饘跬行虞跌巾有角垫衣存衽缺惟忠与孝则罔摧折

击虵笏铭 石介

天地至大有邪气杂于其间为凶暴为残贼听其肆行如天地卵育之而莫御也人生最灵或异类出于其表为妖怪信其异端如人蔽覆之而莫露也祥符年宁州天庆观有虵妖极怪异郡刺史日两至于其庭朝焉人以为龙举州人内外遠近罔不骏奔于门以覲恭庄肃只无敢怠者今龙图侍御孔公时佐幕在是邦亦随郡刺史于其庭公曰明则有礼乐幽则有鬼神是虵不以诬乎惑吾民乱吾俗杀无赦以手板击其首遂毙于前则虵无异焉郡刺史暨州内外遠近庶民昭然若发防见青天覩白日故不能肆其凶残而成其妖惑易曰是故知鬼神之精状公之谓乎夫天地间有纯刚至正之气或钟于物或钟于人人有死物有尽此气不灭烈烈然弥亘亿万世而长在在尧时为指佞草在鲁为孔子诛少正卯刃在齐在晋为董史笔在汉武帝为东方朔防在成帝朝为朱云劒在东汉为张纲轮在唐为韩愈论佛骨表逐鳄鱼文为段太尉击朱泚笏今为公击蛇笏故佞人去尧德聪少正卯戮孔法举罪赵盾晋人惧辟崔子齐刑明距董偃折张禹劾梁冀汉室义佛老防圣德行鳄鱼徙潮风振怪蛇死妖气散噫天地钟纯刚至正之气在公之笏岂徒毙一蛇而已轩陛之下有罔上欺民先意顺防者公以此笏

指之庙堂之上有蔽贤防恶违法乱纪者公以此笏麾之朝廷之内有谀容佞色附邪背正者公以此笏击之夫如是则轩陛之下不仁者去庙堂之上无奸臣朝廷之内无佞人则笏之功也岂止在一蛇公以笏为任笏得公而用公方为朝廷正人笏方为公之良器敢称德于公作笏铭曰

至正之气天地则有笏惟灵物笏能乃受笏之为物纯刚正直公惟正人公乃能得笏之在公能破淫妖公之在朝防人乃消灵气未竭斯笏不折正道未亡斯笏不藏惟公宝之烈烈其光

槃水铭 司马光

槃水之盈止之则平平而后清清而后明勿使小欹小欹则倾倾不可收用毁其成呜呼奉之可不兢兢

医铭 吕诲

医人武泰通医术守臣献状补太医正还乡里创起应圣侯庙艺既成归善于师又将广来学其志有足称者予谪官于是迁守蒲中既行丐文以显于庙因作医铭嘉乃意勤遂成其志知予言有以滋其善也

六气五行人禀而生三部九 纳诸和平昔称絶技当肠涤胃辅以砭石因之决溃察脉之原当于未然不攻而胜庶几十全愈世之病如持国柄常使众邪不得干正能尽己意膏盲必起苟利于艺毫厘千里泰也有为心不忘师义利之重慎乎所治

明州新刻漏铭 王安石

戊子王公始治于明丁亥孟冬刻漏具成追谓属人嗟汝予铭自古在昔挈壶有职匪器则人亡政息其政谓何弗棘弗迟君子小人兴息维时东方未明自公召之彼宁不勤得罪于时厥荒懈废乃政之疵呜呼有州谨哉维兹维兹其中俾我后思

布衾铭 范纯仁

藜藿之甘绌布之温名教之乐德义之尊求之孔易享之常安锦绣之奢膏粱之珍权宠之盛利欲之繁若难其得危辱旋臻舍难取易去危就安至愚且知士宁不然顔乐簞瓢万世师模紆居琼台死为独夫君子以俭为德小人以侈丧躯然则斯衾之陋其可忽诸

西铭 张载

干称父坤称母予兹藐焉乃混然中处故天地之塞吾其体天地之帅吾其性民吾同胞物吾与也大君者吾父母宗子其大臣宗子之家相也尊高年所以长其长慈孤弱所以幼其防圣

其合德贤其秀也凡天下疲癯残疾惇独鰥寡吾兄弟顛连而无告者也于时保之子之翼也乐且不忧纯乎孝者也违曰悖德害仁曰贼济恶者不才其践形惟肖者也知化则善述其事穷神则善继其志不愧屋漏为无忝存心养性为匪懈恶防酒崇伯子之顾养育英才颖封人之锡类不弛劳而底豫舜其功也无所逃而待烹申生其恭也体其爱【一作受】而归全者参乎勇于从而顺令者伯奇也富贵福泽将厚吾之生也贫贱忧戚庸玉汝于成也存吾顺事没吾宁也

东铭 张载

戏言出于思也戏动作于谋也发于声见乎四肢谓非己心不明也欲人无已疑不能也过言非心也过动非诚也失于声缪迷其四体谓己当然自诬也欲他人已从诬人也或者谓出于心者归咎为已戏失于思者自诬为已诚不知戒其出汝者引【一作归】咎其不出汝者长傲且遂非不智孰甚焉

鼎砚铭 苏轼

鼎无耳槃有趾鉴幽无见几不倚眈虫隕羿丧厥喙羽渊之化帝祝尾不周僨裂东南圯黝然而深维水委谁乎为此昔未始戏铭其臀加幼诡

邓公砚铭 苏轼

王巩魏国文正公之孙也得其外祖张邓公之砚求铭于轼轼铭曰

邓公之砚魏公之孙允也其物展也其人思我魏公文而厚思我邓公德而壽三复吾铭以究令名

天砚铭 苏轼

吾年十二与羣儿凿池为戏得异石如鱼肤筠温莹作浅碧色表里皆细银星扣之铿然试以为砚甚发墨顾无贮水处先君曰是天砚也有研之德而不足于形耳因以赐吾曰是文字之祥也宝而用之且为铭曰一受其成而不可更或全于德或全于形均此二者顾吾安取仰唇俯足世固多有

文与可琴铭 苏轼

攫之幽然如水赴谷释之萧然如叶脱木按之噫然应指而长言者似君置之枵然遗形而不言者似仆

徐州莲华漏铭 苏轼

故龙图阁直学士礼部侍郎燕公肃以造物之智闻于天下作莲花漏世服其精凡公所临必为之今州郡往往而在虽有巧者莫敢损益而徐州独用瞽人卫朴所造废法而任意有壶而无箭自以无目而废天下之视使守者伺其漏则决之而更注人莫不笑之国子博士传君禔公之外曾孙得其法为详其通守是邦也实始改作而请铭于轼铭曰

人之所信者手足耳目也目识多寡手知重轻然人未有以手量而目计者必付之于度量与权衡岂不自信而物盖以为无意无我然后得万物之情故天地之寒暑日月之晦明昆仑旁薄于三十八万七千里之外而不能逃于三尺之箭五斗之甌虽疾雷霾风雨雪昼晦而迟速有度不加亏赢使凡为吏者如甌之受水不过其量如水之浮箭不失其平如箭之升降也视时之上下降不为辱升不为荣则民将靡然而心服而寄我以死生矣

三槐堂铭 苏轼

天可必乎贤者不必贵仁者不必寿天不可必乎仁者必有后二者将安取衷哉吾闻之申包胥曰人众者胜天天定亦能胜人世之论天者皆不待其定而求之故以天为茫茫善者以怠恶者以肆盗跖之寿孔颜之厄此皆天之未定者也松栢生于山林其始也困于蓬蒿阨于牛羊而其终也贯四时阅千岁而不改者其天定也善恶之报至于子孙而其定也久矣吾以所见所闻考之而其可必也审矣国之将兴必有世德之臣厚施而不念其报然后其子孙能与守文太平之主共天下之福故兵部侍郎晋国王公显于汉周之际历事太祖太宗文武忠孝天下望以为相而公卒以直道不容于时盖尝闻手植三槐于庭曰吾子孙必有为三公者已而其子魏国文正公相真宗皇帝于景德祥符之间朝廷清明天下无事之时享其福禄荣名者十有八年今夫寓物于人明日而取之有得有否而晋公修德于身责报于天取必于数十年之后如持左契交手相付吾是以知天之果可必也吾不及见魏公而见其子懿敏公以直谏【一作道】事仁宗皇帝出入侍从将帅三十余年位不满其德天将复兴王氏也欤何其子孙之多贤也世有以晋公比李栖筠者其雄才直气真不相上下而栖筠之子吉甫其孙德裕功名富贵略与王氏等而忠信仁厚不及魏公父子由此观之王氏之福盖未艾也懿敏公之子玠与吾游好德而文以世其家吾是以录之铭曰

呜呼休哉魏公之业与槐俱萌封植之勤必世乃成既相真宗四方砥平归视其家槐阴满庭吾侪小人朝不及夕相时射利皇防厥德庶几侥幸不种而获不有君子其何能国王城之东晋公所庐鬱鬱三槐惟德之符呜呼休哉

择胜亭铭 苏轼

维古颍城因颍为隍倚舟于门美哉洋洋如淮之甘如汉之苍如洛之温如浚之凉可侑我客可流我觞我欲即之为馆为堂近水而构夏潦所襄远水而筑邈焉相望乃作斯亭筵楹桹梁凿柄交设合散靡常赤油仰承青幄四张我所欲往十夫可将与水升降除地布牀可使杜蕢洗觶而扬可使庄周观鱼而忘可使太白泳月而狂既芥我茶亦醪我浆既灌我纓亦浣我裳岂独临水无适不臧春朝花郊秋夕月场无胫而趋无翼而翔敞以改为其费易偿榜曰择胜

名实允当维古圣人不留一方虚白为室无何为乡神马尻舆孰为输箱流行坎止虽独不伤居之无盗中靡所藏去之无恋如所宿桑岂如世人生短虑长尺宅不治寸田是荒锡瓦铜雀石门阿房俯变仰灭与生俱亡我铭斯亭以砭世盲

九成台铭 苏轼

韶阳太守狄咸新作九成台玉局散吏苏轼为之铭曰自秦并天下灭礼乐韶之不作盖千三百二十有三年其器存其人亡则韶既已隐矣而况于人器两亡而不传虽然韶则亡矣而有不亡者存盖尝与日月寒暑晦明风雨并行于天下之间世无南郭子綦则耳未尝闻地籁也而况得闻其天使耳闻天籁则凡有形有声者皆吾羽旄干戚管磬匏弦尝试与子登夫韶石之上舜峰之下望苍梧之莽九疑之联縣览观江山之吐吞草木之俯仰鸟兽之鸣号众窍之呼吸往来唱和法有度数而均节自成者非韶之大全乎上方立极以安天下人和而气应气应而乐作则夫所谓箫韶九成来鳳鸟而舞百兽者既已粲然毕陈于前矣

端石砚铭 苏轼

与墨为入玉灵之食与水为出陰鑑之液懿矣兹石君子之侧匪以玩物维以观德

迈砚铭 苏轼

以此进道当若渴以此求进常若惊以此治财常思予以此书犹当思生

洪州分宁县藏书阁铭 黄庭坚

凡治有条如机有综经经纬积寸成两管蒯之手简功于防可席可屨不能以寒昔此庙学终歲蓬艾圣师所居风雨无盖今诵圣言皆有夏屋爰及方册宇以革阁华阁渠渠言行之林聿求古今自观德心咨尔诸生永怀兹道勿嬉勿鹜以迪有造得意自己书不尽言如御琴瑟听于无弦莫阜凡凡吴味楚尾其下修水行六百里山川之灵或秀于民世得材用我培其根勒铭颂成式告尔后无或墮之永庇俎豆

游艺斋铭 黄庭坚

色荒者使人蹻蹻酒荒者使人漠漠游于六艺之林是谓名教之乐

研铭 黄庭坚

制作淳古可使巧者拙夸者节性质温润可使躁者静戾者听观棊几而见研忘其一室之悬磬

黄楼铭 陈师道

熙寧十年京东路安抚使臣某转运使臣某判官臣某稽首言河决澶州南倾淮泗彭城当其冲夹以连山扼以吕梁流泄不时盈溢千里平地水深丈余下顾城中井出脉发东薄两隅西入通洫南怀水垣土恶不支百有余日而后已守臣苏轼深惟流亡为天子忧夙夜不怠以劳其人兴发戍兵固应卒外为长橈乘高如虹以防其恶内为大堤附城如环以待其溃筑二防于南门之外以通南山以安危疑发仓庾明劝禁以惠困穷以督盗贼宣布恩泽巡行内外吏民向化兴于事功法施四邑诚格百神可谓有功矣宜有褒嘉以劝郡县十月二日甲子奏京师明年元丰正月甲子制诰谕意臣轼惟念只承谏训人神力同敢自为功以速大戾而明扬褒大无以报称乃作黄楼于东门具刻明诏以承天休而明德意使其客陈师道以为之铭臣师道伏惟吕尚南仲内抚百姓内平诸侯诗美文武尹甫召虎南伐淮夷北伐玁狁功歌宣王君能使人以尽其才臣能奉功以报其上古之义也臣师道又惟感而通之者道也行而化之者德也制法明教者政也治人成功者事也昔之诗人歌其政事则并其道德而传之后王有作可举而行顾臣之愚何与于此诚乐君臣之尽道云臣不量冒死上黄楼铭其词曰

皇治惟戒修明法度协和陰阳十有一年天灾时行河失其防齐鲁梁楚千里四遠潰乱散亡皇仁隐忧临遣信臣以惠东方羸老不穷安慰抚养发散积仓流人如归居人忘危完聚靡伤天叙地平明圣成能人神效祥灵平告成百谷丰盈万邦乐康郡县只畏允迪圣谟终事无荒皇功不居归休臣民遐昭遠扬守臣拜手夸大休嘉使民不忘改作黄楼以临泗上修故常庶民无佞原始念终铭之石章以告成功以扬德声永永无疆

克己铭 吕大临

凡厥有生均气同体胡为不仁我则有已立已与物私为町畦胜心横生扰扰不齐大人存诚心见帝则初无吝骄作我蠹贼志以为帅气为卒徒奉辞于天孰敢侮予且战且徠胜私窒欲昔焉寇讐今则臣仆方其未克窘我室庐妇姑勃蹊安取厥余亦既克之皇皇四达洞然八荒皆在我闕孰曰天下不归吾仁痒痾疾痛举切吾身一日至之莫非吾事顔何人哉晞之则是

蜀舍铭 刘跂

某郡王万寓郑榜其居曰蜀舍持余杭朱浚民所为记过须城刘跂而请铭为之铭曰

噫嘻此舍是蜀非邪吞若两川坤之维耶危乎高哉上青天邪赤甲曰盐峙峨眉邪檣笻医饭罇鴟邪一物不有而不无邪噫嘻此舍是真蜀国身如壶公靡索不获行以蜀驰卧以蜀息陰燕阳魏吴越璫错裴徊周流誓不以易谓不信者有如此石

大圆砚铭 晁补之

黑月模汗两奴利与黔突居难与揭篋趋尔圆其外亦不可转视吾尔砚

座右铭 邹浩

惟亲惟天惟亲惟地覆育我躬德莫我议汲汲以报亦岂佗求权行乃心则知厥由惟身康强亲喜而安惟身疾疾亲憫于顔矧惟此身其来有自自祖自考以至于此能钦爱身为钦爱亲祖考听之何福不臻亲寿而昌我戏于侧念兹在兹敢忘朝夕

家藏古砚铭 唐庚

砚与笔墨盖气类也出处相近任用宠遇相近也独寿夭不相近也笔之寿以日计墨之寿以月计砚之寿以世计其故何也其为体也笔最锐墨次之砚钝者也岂非钝者寿而锐者夭乎其为用也笔最动墨次之砚静者也岂非静者寿而动者夭乎吾于是得养生焉以钝为体以静为用或曰寿夭数也非钝锐动静所制借令笔不锐不动吾知其不能与砚久远也虽然宁为此勿为彼也铭曰

不能锐因以钝为体不能动因以静为用唯其然是以能永年

古砚铭 崔鷟

知其白守其黑似老学不厌教不倦似孔其实墨家者流摩顶放踵

宋文鉴卷七十三

卷七十四

钦定四库全书

宋文鉴卷七十四

宋吕祖谦编

颂

广农颂夏竦

景德三年春正月庚戌诏颁农田敕于天下二月癸未诏郡国领劝农事崇化源而广农业也臣闻圣人无土不王无民不君有土地则王业兴有人民则君道立故先王之建国也土欲广而不欲隙民欲众而不欲堕谓地之不辟非吾土也人之不农非吾民也乃为闾里室家以蕃其生为畎浍封畛以理其田为耒耜钱镈以庀其器为厯象气候以授其时立经制以御之设官司以教之均工商衡虞之税正车马甲兵之赋于是乎仁义礼乐有所加赏罚号令有所用三代通制建中经远民以里居地以井受暨秦开阡陌农战相乘汉制名田并兼不息旧章缺而仁政坠经界慢而讼竞起一革而下古之制度不可复矣其政何哉盖三季已还五代而上有天下者或不知天下以地为基础以农为本以食为源以教为器当其拨平祸乱经始四国则衽金革简车马计怀柔议聚斂赏勲旧治城邑暨边陲既宁防县既平功业既成府库既盈则思悉华夏以自奉驱亿兆以从欲有患边幅未阔威武未震则转刍粟事夷狄有患岁月易逝容发易朽则招方士求神仙有患登览未远行乐未极则增台榭丽宫室有患嫔御未广歌舞未工则渔声色选使艺有患校猎未快驰骋未捷则广苑囿具毕弋有患巡幸未徧游赏未普则修驰道飞清跸其间自非负天啓神授之资有圣文灵武之德者则不能训稼穡务储衍舍派而趋源去末而从本致天下太康家给人足者哉我国家荷二圣基业用三王礼乐足食训农克立治本吾皇龙飞春秋鼎盛励精百度旁求黎献谓守文艰如创业承平难如治乱深鉴前世専行王道羈縻四夷而重兵革渔猎贤隲而藏网罟观六艺虚台馆听道德放声乐功业之大则成康文景无或比隆河山之远则秦汉隋唐不能齐盛菽麦流行而红腐玉帛充牣而露积陛下尚宸居减丽御膳辍声霄衣紫庭清问多士举三王之故实修八世之坠典以为择循吏守郡国抚百姓善则善矣而未专也于是授之使领设为职司所以徇名而责实也颁宪令经田畴劝耕殖至则至矣而未一也于是编其制度勒为科条所以建中而示法也徇名责实则官不旷建中示法则民不疑诏下之日鬼神称庆太平之风旋踵可待不终日而争讼息未逾时而淳卤辟凡九围之内一歲之间衣食足而仓廩实仁义行而刑罚措大哉炎宋功德陛下教化垂亿万世与天无穷臣生逢圣明叨观盛事谨昧死上广农颂其辞曰

皇哉惟圣躬提天柄亿兆归心三灵洽庆广我田事肇修稼政乃置官名乃颁号令号令维何分条建规恩斯懋斯流冗攸归官名维何启职庀司训之导之播种惟时民曰勤止服田力穡

昼尔于耕宵尔无斁千耦偕飞百谷咸殖既蓺淳卤越经封洫官曰蒞止纠力劝能庠我钱漚流我沟塍乃能灌溉爰相丘陵污莱以辟游惰用惩赫赫圣谋有作咸覩畎浍四溟井疆九土沃野万里纵横其 拥耒成林洒流降雨阳春如膏原隰如鳞我稼既华六合生云稻粱黍稷万井龙文同我妇子或耨或耘八月其获乃登尔稼滞穗栖原余粮厌野盈溢京庾流衍方夏式歌且谣土金同价百姓足矣君孰不足三百之同九年之蓄八蜡既通五礼咸穆藏财于民所宝惟谷君哉君哉乐事训农炎帝之教后稷之功方我王度明而未融臣之颂之永矣无穷

大顺颂

礼记礼运云四体既正肤革充盈人之肥也父子笃兄弟睦夫妇和家之肥也大臣法小臣廉官职相守君臣相正国之肥也天子以德为车以乐为御诸侯以礼相与大夫以法相与士以信相考百姓以睦相守天下之肥也是谓大顺愚读书至此详味久之观乎古先垂教条畅明备义取饶裕充盛目之曰肥若能偃风蹊迹各当其分顺之至也无远弗届浸渍浹洽薰然大同斯乃纯被之化尽美尽美矣虽欲锐意推演复何措辞区区至诚愿陈万一今但举其全文而系以褒赞者只率道扬之志也颂曰

猗欤礼经孰窥优域愚尝究观沛然有得肇自人伦及于家国遂满天下具四表则是谓大顺允臻其极老生作颂奉扬景式

防圣宫颂 欧阳脩

臣伏见国家采汉书原庙之制作宫于永安以备园寝欲以盛陵邑之充奉昭祖宗之光灵以耀示于千万世甚盛德也臣永惟古先王者将有受命之符必先兴业造功警动觉悟于元元然后有其位而继体守文之君又从而显明丕大以纂修乎旧物故其兢兢勤勤不忘前人是以前根深而叶茂德厚而流光子子孙孙承之无疆伏惟皇帝陛下以神圣德传有大器干健而正离继而明即位以来于兹十年勤邦俭家以修太平日朝东宫示天下孝亲执笾豆三见于郊日星轨道光明清润河不怒溢东南而流四夷承命欢和以賔奔走万里顾非有干戈告让之命文移发召之期而犀珠象牙文马防玉旅于阙庭纳于廐府如司马令无一后先至德之及上格于天下极于地中浹于人而外冒于四表昆虫有命之物无不仰戴神威圣功效见如此太祖创造基始克成厥家当天受命之功太宗征服绥来遂一海内睿武英文之业真宗礼乐文物以隆天声升平告功之典陛下夙夜防共嗣固鸿业纂服守成之勤基构累积显显昌昌益大而光称于三后之意可谓至孝况春秋岁时以禘以祫则有庙祧之严配天昭孝以享以告则有郊庙明堂之位篆金刻石则有史氏之官歌功之诗流于乐府象德之舞见于羽毛惟是邦家之光祖宗之为有以示民而垂无穷者罔不宜着陛下承先烈昭孝思所以奉之以严罔不勤备圣人之德谓无以加而犹以为未也乃复因陵园起宫室以望神游土水之功严而不华地爽而洁宇敞而 神灵杳冥如来如宅合于礼经孝子警咳思亲之义愚以谓宫且成非天子自临享则不能以来三后之灵然郡国不见治道太仆不先整驾恬然未闻有司之诏岂难于动民而迟其来耶特以 筮所考湏吉而后行耶不然何独留意于屋墙构筑而至于荐见孝享未之思耶况是宫之制夷山为平外取客土鍛石伐木发兵胥靡调旁近郡如此

数年而道路之民徒见兴为之功恐愚无以识上意是宜不惜属车之费无讳数日之劳沛然幸临因展陵墓退而谕民以孝思之诚遂见守土之臣采风俗以问高年亦尧舜之事也古者天子之出必有来诗之官而道路童儿之言皆得以闻臣是以不胜惓惓之心谨采西人望幸意作为颂诗以献阙下辞曰

巍巍穹崇奠京之东有山而崧 沦道源汇流而渊有洛之川川灵山秀回环左右有高而阜其阜何名太祖太宗真宗之陵惟陵之制因山而起隐隐隆隆惟陵之气常王而喜郁鬱葱葱帝怀穹旻受命我宋造初于屯帝念先烈用欣余家宣力以动赫赫三后重基累构既丰而茂燕翼贻谋是惟永图其传在予曰祖曰宗有德有功予实嗣之克勤克绍以孝以报予敢不思惟此园陵先后之宅且宅且安后来游止弗宫弗室神何以驩乃相川原乃得善地地高惟丘乃以荆灼乃讯龟宝龟告曰猷帝命家臣而职我事而【阙】惟寅一毫一丝给以县官无取于民伐洛之【阙】

登我之山木好且坚

家臣之来役夫万名三年有成宫伐翼翼在陵之侧须后来格有门有宇有廊有庑有庭有序殿兮耿耿黼帷檐檐天威可瞻庭兮植植钩盾虎防容卫以飭太祖维祖太宗维弟真宗维子三圣巍巍有以奠位于此而防圣兮在天风马云车其来仙仙圣防于此灵威神驭其宫肃然圣既降矣其谁格之惟孝天子圣降当享其谁来荐亦孝天子孝既克只而来胡迟其下臣修作颂风之

借田颂 宋 祁

皇帝再纪元之明年春二月率羣臣耕于东郊恤愍祀祈丰年也前此诏书示有司曰自我太宗褒熙厥功亿神裕人宥命方国肖翹启行亦莫不宁永惟土著之本民夫之重乃躬借田以倡农先震地房之满 导改政之长懋柔嘉令芳于是乎孚盥蠶鹵莽灭裂于是乎复敦庞穗滞秉遗见粮如坻我真考因其累盛重以明德故能步师百万狩医闾见武节高世八九升突辽建元封奉符隤祉以 无极肆余承绪兹率厥兴则热萧布帛固有常所监农狎野厥存旧章惟一二执事率循而懋明之方春作时百谷革始姑使斯人悦羽旄之美重见汉官后嗣谗稼穡之艰不失夏物无赘聚储峙无烦劳供张趣合于礼劭吾农焉前期则修飭神壇按除膏壤夷道如砥呼蹕填街稍防獠以护野杂荆牟以守燎阡陌绣错原隰龙鳞蒸膏冒楸协风回春于是旄头先驰属车齐躅奔星舞于旗旂行月 于羽箠寿犀注铠肃给乎师营苍虬范馭秋游乎天辔琼钺流景金根照涂防幕周张紃綯繹 既而揉耒剡耜载保介之间先種后植庖播植之器官分无诿事具不教天子乃以丙午之旦升华轝由太庭顔行山则衔枚无声龙虎见象堪輿奔警辇闔阖切圉游乃彷徨乎曾城之外五精来同七圣景从銓声佩节次于帷宫上既淳濯圭洁储思渊然昧明乃顿大次歛嘉坛索先农以享之因太积以配之血毛幽全金石铿匏躬接妥侑加祠官之一等礼重防袭且祖宗之遗意尔乃降灵场俨朱紘物覩于圣天健其行星田弥望紺轅储驾洪縻序进王步有容三推成礼迺臣告备上曰朕志在敦本宠其强力可以劝何惮于勤遂推而进之有司以义固争几十拨而后释乃始弭节容与御夫观

耕之台三公羣后班趋次耨靡然从风迈五逾九大农洒种庶人终亩宫师扑舞行内天旋于时都人熙熙驻望皇轩或歌以壤或击于辕不图丛云之旦复见东户之年日华晏温天心冯豫奉斗极御应门翔鸡树竿坠鹄宣制大赉四海与之更始亏除威辟存问高年振淹修坠平徭阔赋中外百执告至而策勲践过三更以差而赐帛膏以解雨鼓之巽风不崇朝而周万国先是羣臣绎丕懿润鸿名将琢之玉版纳于金匱至是则回雕輿坐前殿震照仪矩翕受典册皇皇哉兹礼真帝世之希阔臣工之旦暮者欬儒臣学于旧史窃明载芟之诗甸师之职在籍之谊有三说焉一典籍之常礼二籍履以亲事三借民而治之所言虽殊要之毆天下之民弃末而归本耳且古者谨察天庙申赦阳官田之不辟辟在司寇作为御廩钟而藏之其故何哉以为奉荐粢盛非无良农不如亲之愈也谁督耘耔非无猛制不若劝之善也夫祭莫大于备物物备而百神据之兵莫大于足食食足而四夷怀之人莫急于丰财丰财而有生聚之是三物之济否在此举也且周宣缺之戎軋其衰汉文用焉民阜其宜唐后勤止以丰易饥洪惟太宗光迪于前陛下述宣于后皇矣同底于道烝哉不陨其声方且九扈勤民三事就绪凝凝其盛陈陈相因粮余可捷草殖弗奥民一于耜家万斯箱遂驾五帝轶三王奋甘实而摅馨香也敢作颂曰

倬彼鲜原帝籍于田匪籍其勤我为民先悠悠春旗脉土于畿阳膏泽泽迈乎三推有壬有林亦莫不只我疆我里载耘载耔实苞实阜芾厥丰草田峻至喜祈年伊早我谷用成我仓既盈我仓耽耽钟于东南其用伊何事神荐馨为酒为醴为粢为盛烝之浮浮释之叟叟上帝居歆降福孔休降福伊何我民既蕃室家溱溱三事不谖食足武奋震叠尔功蚩夷来同罔不率从帝猷昭升式于九围兢兢业业以毖万几在丰念匱在饫思饥子子孙孙勿替引之

明堂颂 宋 祁

臣言去三月戊子制诏季秋有事于明堂臣以太常与礼官博士诣垂拱殿议配享事即建言周有臣曰旦始严父配天仲尼是之唐并诸儒说并祀六天帝不敢损陛下幸访有司请如古便四月乙丑诏若曰夫礼称情适文今议者言周唐则善至牵制所闻徧而不优宋亦一家让不制作如来嗣何且事天不及地配父而遗祖朕甚陋之水旱不时羣神与焉今赖天之力方内以治朕能合飨天地以三圣侑报百神咸秩并修况祖宗郊雩不为无比有司无讳以劳务称朕意臣伏诵圣训久乃开晓以为前古所缺羣臣不逮陛下独得于心其所以事神训人使万世子孙无以加者至于作声歌瑑圭邸帐防无文夜饔弗严以竭恭至诚者尚数十物臣愚且不能徧知若令诗颂不传是陛下盛德神功不尽注天下耳目耸动四夷声隐乎无疆也谨撰成明堂颂一篇辞浅义直可使户晓壤翁辕童皆得涂讴臣昧死再拜以闻颂曰

天有明命以圣付圣太祖太宗燮伐大定谁僭而王孰擅而土左披右攘罔不就绪厥角在廷四夷无侮真考显承受报收成休休厥宁震震厥声七十而五号以大荣皇帝纂武有庇于下兵橐不铍箠委而羽一农之饥吾饲以哺一夫之寒吾暖以褚日寛租徭歲贷困庾协气四薄顺旻若雨原高隰下百谷膴膴二十九载惟秋九月乃即大庆度筵度室宝字署顔震照多物置使有五悉诏辅弼既款灵宫一享一祐天兵桓桓罗列卫营有闔有旂龙輶螭衡耳耳其驱雅雅于行旂旒连蜷风舞云縈土若衔枚驂牡不鸣吉日辛亥进祀于堂衣画袞然环瑀琅玕

六帝二只三后侑旁醴淳牲肥嘉樽钜房茱醢果粢静洁芬香防炽胖升以迪厥尝我钟钦钦我舞俟俟天妥于坐百灵来序奔精哆光芻霍曾寓山灵渎怪显幽驰骛或旅诸墀或席诸庑有羶斯饫相惟辟公既敏而度帝拜稽首柴烟上举祝有嘏言皇帝受之产百斯祥裒万斯禧其蠹如山其积如茨皇帝曰咨朕不专有旦御端门百执奔走其赦天下新邦之旧凋乏録劳刮濯痕垢官赏兵赉金爵是富驿欢四海间弗容昼天谓皇帝感实大德承先在孝宗祀惟极其还而功防嗣千亿而子而孙长有万国天谓皇帝安我羣元投蜚斥螟稼溢于防疴讫疾攘人乐蹻蹻皇帝詹壽永锡万年前祀三日区霜如闭皇帝既斋一夕而霁六幘扫除若逢彗天清地晏夜星腾晰皇帝小心恭与防并徧见神只拜跪送迎久立于次须乐之成器必全玉牢不爱牲制为诸安以正和清夜鼓彻严敷致厥诚明明皇帝惟先训是式惇咸懿亲其磐如石存问韶耄容受说直振淹登峻母或失职惟慈惟仁不厉声以色皇帝有言克已则兴丰守吾俭尊舍吾矜虽日之升瞿瞿兢兢无不此或承

皇帝神武颂 宋 祁

或称皇初之世不赏而劝不罚而惧岂简册之弥文哉议者云否彼固未识夫震耀之飭天威刚健之奋干体也粤若圣人制海内之命据天位之尊总秉权纲章叙典宪不有威辟不足以震元慙不有变容不足以开至圣用能消弭殄行嘉靖多方阐皇灵宪宗轨丕天之大律一民之至权者已巨宋在宥列圣继統际天丕冒亘地砥属仆威械以去煞袞道枢以训俭恩裕洪畅容典飭尽万寶取足合祛于皇极百灵隤祉震动于珍物然犹右贤左戚均权布宠百辟箴阙内平而外成五细在边蕃休而递上防检来患蠲涤多辟勤勤恳恳者非弭乱之谓欤然而善制未能无敝有忧所以固国迺者先帝违俗羣邪济凶寄朝家之威席钧宰之贵侔尚方以制器狎神巫而締绂乃至易守帅以渐丑图徙陵兆而投天隙拂戾蜚语恬有奸计遂欲包祸心以窃发执左道而干纪餌泉羹以未尽砺豺牙而密噬神灵震赫奸宄呈露辅臣建白丑党震壞赤车具狱而来上凶竖伏质而前死允恭事败先谓伏诛皇帝陛下深拱谅闇览照前典重当国之职慎退人之礼诏曰冢宰之任万枢所系今丞相谓自底不令其上大司徒印绶于是三事百执抗疏以请曰无将必诛列辟经制与众共弃常苦无赦谓今所犯恶不可闻愿龚天刑以塞羣议帝曰朕不致于理其放于朱崖然后起跣弛之臣明枉结之狱掊克之货附上于官附离之党肆赦一解漏鲸彗于网目摧虎吻于市道浴白日以升景投紫蜺而雰氛恶草絶而善苗兴清风翔而羣陰伏人灵纾愤道路相趋既而荐绅之徒相与喟然并称曰前日末命防梗孽臣乘间潜构不类陰倾时柄食榘靡化指莠待灭陛下探观时变先断宸虑倚文母之圣揽列辟之议廉考剗殄介不终日未減澄洗荡无余灾定寶业极南山之安殲渠魁易家人之召智不回虑恶未旋踵事已决矣昔滔天殛而虞功劭流言放而周德奋观阙诛而孔制列寶瑟僵而汉基永皆拨乱之盛準长世之懿册所由来旧矣是以烈祖二宗垦菑除害箫勺众慝若彼之艱也太后圣上建威销萌只遹先训如此之备也宜乎励无前之景铄畅不杀之神武正春秋谨始之制释洪范作威之害开赐无疆之詹壽摘着不朽之尊名此其时矣盖天子穆然初载贬成仰定未遑论制作之事也下臣儻擬末品不足次新颂辄敢述輿人之咏简康衢之侍亦击辕折杨之比尔其辞曰

真宗御天休息羣元委裘上仙茂功全兮皇帝纘务惟新百度尚文右武鸿基固兮孽竖柄臣

矜权取勲兴妖放命托机神兮上公列辟协忠宣力摧凶殄恶清君侧兮日恭日谓衔刀投裔
神武不杀退以礼兮或附或离横贷敷施胁从罔治董之威兮氛开侵收美泽云游荷天鸿休
德既优兮昭雪忠良輿颂风翔夤威旧章恤无疆兮

庆历圣德颂 石介

三月二十一日大昕皇帝御紫宸殿朝百官相得象殊拜竦枢密使夷简以司徒归第二十二
日制命昌朝参知政事弼枢密副使二十六日勅除修靖素并充谏官四月八日皇帝御紫宸
殿朝百官衍枢密使仲淹琦枢密副使乃用御史中丞拱辰御史邈御史平谏官修靖十一疏
追竦枢密使勅十三日勅又除襄为谏官天地人神昆虫草木无不懽喜皇帝退奸进贤发于
至聪动于至诚奋于睿断见于刚克陟黜之明赏罚之公也上视汉魏隋唐五代凡千五百年
其间非无圣神之主盛明之时未有如此选人之精得人之多进人之 用人之尽实为希阔
殊尤旷絶盛事在皇帝之德之功为卓萃瑰伟神明魁大古者一云气之祥一草木之异一蹄
角之怪一羽毛之瑞当时羣臣犹且浓墨大字金头钿轴以称述颂美时君功德以为无前之
休丕天之绩如仲淹弼实为不世出之贤求之于古尧则防龙舜则稷契周则闳散汉则萧曹
唐则房魏陛下有之诸臣亦幸今天下之人望为宰相谏官者陛下尽用之此比云气草木蹄
角羽毛之异万万不侔岂可翻无歌诗雅颂以播吾君之休声烈光神功圣德刻于琬琰流于
金石告于天地奏于宗庙存于万千年而无穷尽哉臣实羞之臣尝爱慕唐大儒韩愈为博士
日作元和圣德颂千二百言使宪宗功德赫奕炜煜照于千古至今观之如在当日陛下今日
功德无让宪宗臣文学虽不逮韩愈而亦官于太学领博士职歌诗赞颂乃其职业窃拟于愈
辄作庆历圣德颂一首四言凡九百六十字文辞鄙俚固不足以发扬臣子之心亦欲使陛下
功德赫奕炜 照于千古万千年后观之如在今日也臣不胜死罪臣贱无路以进姑藏诸家
以待乐府之采焉

于维庆历三年三月皇帝龙兴徐出闾闾晨坐太极昼开闾闾躬揽贤英手锄奸桀大声飒飒
震摇六合如干之动如雷之发昆虫 蠲妖怪藏灭同明道初天地嘉吉初闻皇帝感然言曰
予父予祖付予大业予恐失坠实赖辅弼汝得象殊重慎徽密君相予久予嘉君伐君仍相予
笙鏞斯协昌朝儒者学问该洽与予论政传以经术汝贰二相庶绩咸秩惟汝仲淹汝诚予察
太后乘势汤沸大热汝时小臣危言峩峩为予司谏正予门闾为予京兆望予防说贼叛于夏
往予式遏六月酷日大冬积雪汝暑汝寒同于士卒予闻心酸汝不告乏予晚得弼予心弼悦
弼每见予无有私谒以道辅予弼言深切予不尧舜弼自答罚谏官一年奏疏满篋侍从周歲
忠力尽竭契丹亡义棣机饕餮敢侮大国其辞慢悖弼将予命不畏不慑卒复旧好民得食褐
沙磧万里死生一节视弼之肤霜剥风裂观弼之心链金鍛铁宠名大官以酬劳渴弼辞不受
其志莫夺惟仲淹弼一防一契天实赉予予其敢忽并来弼予民无瘥札曰衍汝来汝实黄髮
事予二纪毛秃齿豁心如一兮率履弗越遂长枢府兵政毋蹶予早识琦琦有奇骨其器魁礧
岂视居楔其人浑朴不施剗剗可属大事敦厚如防琦汝副衍知人予哲惟修惟靖立朝谏谏
言论礧礧忠诚特达禄防身贱其志不怯尝诋大臣亟遭贬黜万里归来刚气不折屡进直言
以补予阙素相之后含忠履洁昔为御史几叩予榻至今谏疏在予箱匣襄虽小臣名闻予彻
亦尝献言箴予之失刚守粹慤与修俦匹并为谏官正色在列予过汝言无钳汝舌皇帝明圣

忠邪辨别举擢俊良扫除妖魅众贤之进如茅斯拔大奸之去如距斯脱上倚辅弼司予调燮下赖谏诤维予纪法左右正人无有邪孽予望太平日不逾浹皇帝嗣位二十二年神武不杀其默如渊圣人不测其动以天赏罚在予不失其权恭已南面退奸进贤知贤不易非明不得去邪惟难惟断乃克明则不贰断则不惑既明且断惟皇之德羣下蹶蹶重足屏息交相告语曰惟正直毋作侧僻皇帝汝殛诸侯危栗墮玉失舄交相告语皇帝神明四时朝覲谨修臣职四夷走马坠鐙遗策交相告语皇帝神武解兵修贡永为属国皇帝一举羣臣慑焉诸侯畏焉四夷服焉臣愿陛下寿万千年

钱邓州不烧楮镪颂 吕南公

呜虓士诚知修耶内不欺诸已外不欺诸人可与修己已呜虓士诚有立耶上不愧于天下不忤于地中不负于神明可谓士君子已凡唯知修至于可立而不欺不愧者其备如此虽天地神明我斯天地神明已岂又防防于诸余哉世衰道隐士心险惑稔匿自危则区区于祸福以壮其毒闻古之用币以礼神祇后之罪士为多则假之以请祷禳祈假之不已则翻楮代焉而弗支是故罪者满世而莫救其非肃肃邓州唯道之繇识起超于众谬行不徇于时流孰巫祝之足因而禳祥之苟求盖清修而不愧则万福之来酬是何楮镪之不然而名位之优优呜虓岂弟君子求福不回谁其嗣之宋有人猗

宋文鉴卷七十四

卷七十五

钦定四库全书

宋文鉴卷七十五

宋吕祖谦编

贊

拟富民侯传赞 张咏

汉武晚年以丞相为富民侯富民大本也侯爵劝功也推导之若此将复古王之功欤噫大朴未散民命在天风教既辟民命在贤贤不可黜黜之非贤先王仁孝以辩之民不可扰扰之生先王简俭以御之粤自桀作瑶台民始知劳秦易井田民始知所谓上阔其欲而下散其束四人桓桓去劳就安百途凿凿雕伪散朴衰周之民也真可哀哉一作之百取之斑白不得息雉齿而趋驱焦劳力竭而饥冻继之浮民奸我利非贤盗我食何尝少得佑助徒俾日攻之故谓令德日埋穷兵亦私末途喧喧而大本取弊者于斯也哉非有大圣正智其谁拯之欤汉洗秦七十年武威文经渐被四海以高祖之仁文帝之俭尚不能推民寿乡切磨三代加于武皇事威穷侈四十年间民力凋半亟下富民之诏尊为上公之号忧劳诚思亦至矣乎徒知民富而后国昌不知国正而后民治吁不能师三代育民之法以事末术良可悲矣亦由止奔流之舟虽万斯篙未若五尺之缆之要也疗已之民虽百斯术未若一正其本之仁也呜呼末涂未塞本不正欲民富国昌者未之有也汉杂霸道史或过矣余爱其君有富民之志臣荣富民之号又愤不能开通之因附史氏作赞以矫之赞曰五后之世事简而民静夏商周之世事正而民治故贫富之名稀所称焉三代之季四人乱伦百途竞新蚩蚩饿眈无阶休存之遂使抱仁义智能者易以要功于其间如武皇帝命富民侯又何如哉又何如哉

杜甫赞 狄遵度

先生甫名其字子美其祖审言当景龙际以诗自名高视一世殆子美生其作愈伟少而不羁跌宕徙倚大章短篇纯乎首尾诗派之别源远乎哉波流沄沄乃自我回蹲昆仑巔足乱四溟翮缕蛤蜊拘致鯢鲸蜿蜒委巨细杂并一啜则已不图其羸横放直出诡色互端排荡摧戛措齿不安鬼求于陰神索于阳钩搜错莫色沮气伤闪形撇影隐露藏蔽殫变极态惟厥所指吾方瞪踞初不用意沃粹醇源植根块土贯赫胥庭盘燧人圃经亘联属百亿万古芬酿杂袭纖细委坠哺啜蹈借羣稚走死呜呼子美之述吾能诵之子美之意吾能知之其所未闻其所未知盖未得其云为

西汉三名儒赞 刘敞

余读西汉爱董仲舒刘向扬雄之为人慕之然仲舒好言灾异几防大刑向铸伪黄金亦减死论雄仕王莽作剧秦美新复投阁求死皆背于圣人之道惑于性命之理者也以彼三子犹未能尽善才难不其然与然其善可师其过可警也为三赞以自览焉

仲舒先觉承秦絕学进退规矩金玉其璞发明春秋大义以修旁及五经博哉优优世莫能庸黜相诸侯仁义所渐易刚以柔茫茫大道在昔圣考盖有不闻奚究奚讨主父倚之步舒诡之嗟若先王有以啓之惩违告休不预世忧著作孔多后世是邇嗟尔君子克遵厥猷子政翼翼简易正直博览百家以充其德黄金之伪智由信惑艱邪世身居困阨不为俗儒苟取拘拘略其威仪忠质之符疾邪救危著论上书同姓之仁贤哉已夫虽不三事其文实章以迄于今日月之光嗟我后人庶几不忘

子云清虚自有大度非圣不观耻为章句拟放六经其文孔明隐隐欲欲实为雷霆世三不迁知命理神胡为投阁剧秦美新君子之缺众儒有言盖天纪之亦何必然末世之人以道邀利或徇耳目得之弗愧嗟尔君子能勿此畏

河间献王赞 司马光

周室衰道德坏五帝三王之文飘沦散失弃置不省重以暴秦害圣典疾格言燔诗书屠术士称礼乐者谓之狂惑术仁圣者谓之妖妄必薙灭先圣之道响絕迹尽然后慊其志虽有好古君子心诵腹藏壁局岩鐫济秦之险以通于汉者万无一二汉初挟书之律尚存久虽除之亦未尊録谓之余事而已则我先王之道焰焰其不息者无几矣河间献王生为帝子幼为人君是时列国诸侯苟不以宫室相高狗马相尚则衰奸聚猾僭逆妄图唯献王厉节治身爱古博雅專以圣人法度遗落为忧聚残补缺校实取正得周官左氏春秋毛氏诗而立之周礼者周公之大典毛氏言诗最密左氏与春秋为表里三者不出六艺不明噫防献王六艺其遂噫乎故其功烈至今赖之且夫观其人之所好足以知其心王侯贵人不好侈靡而喜书者固鲜矣不喜浮辩之书而乐正道知之明而信之笃守之纯而行之勤者百无一二焉武帝虽好儒好其名而不知其实慕其华而废其质是以好儒愈于文景而德业后之景帝之子十有四人栗太子废而献王最长向若尊大义属重器用其德施其志必无神仙祠祀之颂宫室观游之费穷兵黩武之劳赋役转输之敝宜其仁丰义洽风移俗变焕然帝王之治复还其必贤于文景遠矣嗟乎天实不欲礼乐复兴邪抑四海自不幸而已矣

无为赞 司马光

为黄老者以心如死灰形如槁木为无为迂叟以为不然作无为赞

治心以正保躬以静进退有义得失有命守道在已成功则天为者败之不如自然

晋蔡謨赞 王回

晋自武帝酒色无度王公贵人竞以酒色相侈而王恺石崇尤甚恺使美人行酒劝客饮不尽辄杀美人崇常夜饮诸少年酒裴绰乘醉窃卧崇妾中明旦裴家遣车迎绰绰上车驰去崇闻大怒立杀数妾将讼绰于朝绰兄楷书请绰曰吾弟酒狂海内足知足下饮以狂药而反责之礼邪崇方慕楷欲交之亦惮其辞直乃止其后渡江诸君家往往犹袭故态纪瞻为尚书置酒请王导等观妓瞻爱妾能歌新声左仆射防军周顗乘酒于众中挑之而不得有司劾顗荒酒失仪元帝特诏宥焉是时在位盖不以淫鬻为贬如此蔡谟独好礼自勅尝诣丞相导导方作伎设牀席谟不悦而去导亦不留客也谟曾孙廊廊子兴宗仍以好礼自勅达于朝虽时淫暴不敢稍侵媒之人称其家风云赞曰

古者牀策之言不逾阃而賓主燕享所以观礼乐讲仁义也乌有男女亡辨昼夜荒蛊羣于禽兽而反以为乐与此屠余所以知中山之亡夫永嘉之乱又验矣而渡江君臣犹不知以此相儆岂以风俗之败非召乱之著者邪呜呼迷哉而蔡氏出于其门独能世学好礼达而不污君子哉

嵇绍赞 王 回

世皆以嵇绍死得其所褒之子固爱其人行于乱世不污而能卒以忠为烈非其积累明于仁义孰能自信如此耶吾独怪康与晋实比为魏臣其诛也岂犯有司特晋方谋篡魏忌其贤而见图故康诛而魏亦自亡若绍可为兼父与君之仇者也力不能报犹且避之天下顾臣其子孙而为之死岂不谬哉

画赞 李泰伯

工有图贵人之像者予哀其贤而无所遂也为之辞云道之可行君子乃出行而无成君子之疾位以名得名以位失古人丘壑岂徒自逸呜呼

九马图赞 苏轼

长安薛君绍彭家藏曹将军九马图杜子美所为作诗者也拳毛师子二骏在焉作九马赞

牧者万歳绘者惟霸甫为作诵伟哉九马姚宋庙堂李郭治兵帝下毛龙以馭羣英我思开元今为几日筋骨应圖至三万匹云何寂寥跬步山川负盐挽磨泪湿九泉牝牡骊黄自以为至防其一毛弃我千里号齧是乘脂蜡其鞭道阻且长喟其永叹

二疎图赞 苏轼

惟天为健而干时沈潜刚克以燮和之于赫汉高以智力王凜然君臣师友道防孝宣中兴以法馭人杀盖韩杨盖三良臣先生怜之振袂脱屣使知区区不足骄士此意莫陈千载于今我观画图涕【一作泪】下沾襟

偃松屏赞 苏轼

予为中山守始食北岳松膏为天下冠其木理坚密瘠而不瘁信殖物之英烈也谪居罗浮山下地暖多松而不识霜雪如高才胜人生绮纨家与孤臣孽子有间矣士践忧患安知非福防子过从南来画寒松偃盖为护首小屏为之赞曰

燕南赵北大茂之麓天僵雪峰地裂冰谷凜然孤清不能无生生此伟奇北方之精苍皮玉骨
硠硠【阙】方春不知沍寒秀发孺子介刚从我炎荒霜中之英以洗我瘴

三马图赞 苏轼

元祐初上方闭玉门关谢遣诸将太师文彦博宰相吕大防范纯仁建遣诸生游师雄行边勅武备师雄至熙河蕃官包顺请以所部熟户除边患师雄许之遂擒猾大首领鬼章青宜结以献百官皆贺且遣使告永裕陵时西域贡马首高八尺龙颅而凤膺虎脊而豹章出东华门入天驷监振鬣长鸣万马皆瘖父老纵观以为未始见也上方恭默思道八骏在廷未尝一顾其后圉人起居不以时马有毙者上亦不问明年温溪心有良马不敢进请于边吏愿以餽太师潞国公诏许之蒋之奇为熙河帅西蕃有贡骏马汗血者有司以非入贡歲月留其使与马于边之奇为请乞不以时入事下礼部轼时为宗伯判其状云朝廷方却走马以粪正复汗血亦何所用事遂寝于时兵革不用海内小康马则不遇矣而人少安轼尝私请于承议郎李公麟画当时三骏马之状而使鬼章青宜结效之藏于家绍圣四年三月十四日轼在惠州谪居无事阅旧书画追思一时之事而叹三马之神骏乃为之赞曰

吁鬼章世悍骄奔貳师走嫫姚今在廷服虎貂效天骥立内朝八尺龙神超遥若将西燕西瑶帝念民乃下招尔归云逝房妖

王元之画像赞 苏轼

传曰不有君子其能国乎予尝三复斯言未尝不流涕太息也如汉汲黯萧望之李固吴张昭唐魏郑公狄仁杰皆以身殉义招之不来麾之不去正色而立于朝则豺狼狐狸自相吞噬故能消祸于未形救危于将亡使昏如公孙丞相张禹胡广虽累千百缓急岂可望哉故翰林王公元之以雄文直道独立当世足以追配此六君子者方是时朝廷清明无大奸慝然公犹不容于中耿然如秋霜夏日不可狎玩至于三黜以死有如不幸而处于众邪之间安危之际则公之所为必将惊世絶俗使斗筭穿窬之流心破胆裂岂特如此而已乎始予过苏州虎丘寺见公之画像想其遗风余烈愿为执鞭而不可得其后为徐州而公之曾孙汾为兖州以公墓碑示余乃追为之赞以附其家传云

维昔圣贤患莫已知公遇太宗允也其时帝欲用公公不少贬三黜穷山之死靡憾咸平以来独为名臣一时之屈万世之信纷纷鄙夫亦拜公像何以占之有泚其颡公能泚之不能已之茫茫九原爱莫起之

王仲仪真赞 苏轼

孟子曰所谓故国者非有乔木之谓也有世臣之谓也又曰为政不难不得罪于巨室巨室之所慕一国慕之一国之所慕天下慕之夫所谓世臣者岂特世禄之人而巨室者岂特侈富之家也哉盖功烈已着于时德望已信于人譬之乔木封殖爱养自拱把以至于合抱者非一日之故也平居无事商功利课殿最诚不如新进之士至于缓急之际决大策安大众呼之则来挥之则散者惟世臣巨室为能余嘉祐中始识懿敏王公于成都其后从事于岐而公自许州移镇平凉方是时虏大举犯边转运使摄帅事与副总管议不合军无纪律边人大恐声摇三辅及闻公来吏士踊跃传呼旗帜精明鼓角譟亮虏即日解去公至燕劳将佐而已余然后知老臣宿将其功用盖如此使新进之士当之虽有韩白之勇良平之奇岂能坐胜默成如此之捷乎熙宁四年秋余将往钱塘见公于私第佚老堂饮酒至莫论及当世事曰吾老矣恐不复见子厚自爱无忘吾言既去二年而公薨又六年乃作公之真赞以遗其子巩词曰堂堂魏公配命仁祖显允懿敏维周之虎魏公在朝百度维正懿敏在外有闻无声高明广大宜公宜相如木百围宜宫宜堂天既厚之又贵富之如山如河维安有之彼窳人子既陋且寒终劳永忧莫知其贤曷不观此佩玉剑履晋公之孙魏公之子

文与可飞白赞 苏轼

呜呼哀哉与可岂其多好好奇也欤抑其不试故艺也始予见其诗与文又得见其行草篆也以为止此矣既没一年而复见其飞白美哉多乎其尽万物之态也霏霏乎其若轻云之蔽月飏飏乎其若长风之卷旆也猗猗乎其若游丝之萦柳絮裊裊乎其若流水之舞荇带也离乎其远而相属缩缩乎其近而不隘也其工至于如此而余乃今知之则余之知与可者固无几【阙】而其所不知者盖不可胜计也呜呼哀哉

师子屏风赞 苏轼

润州甘露寺有唐李卫公所留陆探防画师子板余自钱塘移守胶西过而观焉使工人摹之置公堂中且赞之曰

圆其目仰其鼻奋髯吐舌威见齿舞其足前其耳左顾右踞喜见尾虽猛而和盖其戏严严高堂护燕几啼呼颠沛走百鬼嗟乎妙哉古陆子

管防安画赞 苏轼

余自龙川以归居颍已十有三年杜门幽居无以自适稍稍取旧书阅之将求古人而与之友盖于三国得一焉曰管防安盖防安少而遭乱渡海居辽东三十七年而归归于田庐不应朝命年八十有四而歿功业不加于人而余独何取焉取其明于知时而审于处已云尔盖东汉之衰士大夫以风节相尚其立志行义贤于西汉然时方大乱其出而应世鲜有能自全者颍川荀文若以智策辅曹公方其擒吕布毙袁绍皆笑谈而辨其才与张子房比然至九锡之议

卒不能免其身彭城张子布忠亮刚简事孙氏兄弟成江东之业然终以直不见容力争公孙渊事君臣之义几絶平原华子鱼以德量重于曹氏父子致位三公然曹公之杀伏后子鱼将命至破壁出后而害之汝南许文休以人物臧否闻于世晚入蜀依刘璋先主将克成都文休逾城出降虽卒以为司徒而蜀人鄙之此四人者皆一时贤人也然直已者终害其身而枉已者终防其德处乱而能全非防安而谁与哉旧史言幼安虽老不病着白防布襦袴布裙宅后数十步有流水夏暑能策杖临水盥手足行园囿歳时祀其先人絮帽布单衣荐馈跪拜成礼余欲使画工以意髣髴画之昔李公麟喜画有顾陆遗思今公麟死久矣恨莫能成吾意者姑为之赞曰

防安之贤无以过人余独何以谓贤贤其明于知时审于处已以能自全防安之老归自海东一亩之宫闭不求通白防布裙舞雩而风四时烝尝馈奠必躬八十有四蟬蛻而终少非汉人老非魏人何以命之天之逸民

王元之真赞 黄庭坚

天锡王公佐我太宗学问文章致于匪躬四方来庭上稍宴衍公含亢石责君尧舜采芝商洛以切直去惟是文章诗以独步白发还朝泣思轩轅鸡犬 鼎羣飞上天真宗好文且大用公太阿出匣公挺其锋龙怒鳞逆在廷岌岌万物并流砥柱中立古之遗直叔向以之呜呼王公其尚似之

孔北海赞 陈师道

世以曹操为英雄虽孙仲谋甘出其下而文举以犬豕视之岂知不免而遂不屈盖其高明下视之耳方操防时幸许绍之目以为重匈奴使来自谓不称而代捉刀其自处如此至其自比刘 德谓袁绍不足数特居势使然耳 德之死谓孔明曰如嗣子不肖君自取之其勤劳一世盖不为汉计岂为子孙计哉操非其比也操恶祢衡而畏杀士之名故以衡予刘表不以文举与人卒自杀之其不畏之亦至矣刘毅家四壁一掷百万世亦以为英雄小遇鵝炙丐乞如奴婢孰谓英雄而以一禽动其心哉此其操之类乎子曰枵也欲焉得刚刚者所以制公非胜人也是故自用之谓英自胜之为彊

宋文鉴卷七十五

卷七十六

钦定四库全书

宋文鉴卷七十六

宋吕祖谦编

碑文

唐狄梁公碑文 范仲淹

天地闭孰将辟焉日月蚀孰将廓焉大厦仆孰将起焉神器坠孰将举焉岩岩乎克当其任者惟梁公之伟欤公讳仁杰字怀英太原人也祖宗高烈本传在矣公为子极于孝为臣极于忠忠孝之外揭如日月者敢歌于庙中公尝赴并州掾过太行山反瞻河阳见白云孤飞曰吾亲在其下久而不能去左右为之感动诗有陟岵陟屺伤君子于役弗忘其亲之深于嗟乎孝之至也忠之所繇生乎公尝以同府掾当使绝域其母老疾公谓之曰奈何重太夫人万里之忧诣长史府请代行时长史司马方毗睚不协感公之义欢如平生于嗟乎与人交而先其忧况君臣之际乎公为大理寺丞决诸道滞狱万七千人天下服其平武卫将军权善才坐伐昭陵柏高宗命戮之公抗奏不却上怒曰彼致我不孝左右筑公令出公前曰陛下以一树而杀一将军张释之所谓假有盗长陵一抔土则将何法以加之臣岂敢奉诏陷陛下于不道帝意解善才得恕死于嗟乎执法之官患在少恩公独爱君以仁何所存之远乎高宗幸汾阳宫道出妬女祠下彼俗谓盛服过者必有风雷之灾并州发数万人别开御道公为知顿使曰天子之行风伯清尘雨师洒道彼何害哉遽命罢其役又公为江南巡检使奏毁淫祠千七百所所存惟夏禹太伯季子伍员四庙曰安使无功血食以乱明哲之祠乎于嗟乎神犹正之而况于人乎公为宁州刺史能抚戎夏郡人纪之碑及迁豫州防稽王乱后缘坐七百人籍没者五千口有司促行刑公缓之密表以闻曰臣言似理逆人不言则辜陛下好生之意美成复毁意不能定彼咸非本心唯陛下矜焉勅贷之流于九原郡道出宁州旧治父老迎而劳之曰我狄使君活汝辈也相防哭于碑下斋三日而去于嗟乎古谓民之父母如公则过焉斯人也死而生之岂父母之能乎时宰相张光辅率师平越王之乱将士贪暴公拒之不应光辅怒曰州将忽元帅耶对曰公以三十万众除一乱臣彼胁从辈闻王师来乘城而降者万计公纵暴兵杀降以为功使无辜之人肝胆涂地如得尚方斩马剑加于君颈虽死无恨光辅不能屈奏公不逊左迁复州刺史于嗟乎孟轲有言威武不能挫是为大丈夫其公之谓乎为地官侍郎同凤阁鸾台平章事为来俊臣诬搆下狱公曰大周革命万物惟新唐朝旧臣甘从诛戮因家人告变得免死贬彭泽令狱吏尝抑公诬引杨执柔公曰天乎吾何能为以首触柱流血被面彼惧而谢焉于嗟乎防穽之中不义不为况庙堂之上乎契丹防冀州起公为魏州刺史以御焉时河朔震动咸驱民保鄆郭公至下令曰百姓复尔业寇来吾自当之狄闻风而退魏人为之立碑未几入相请罢戍疏勒等四镇以肥中国又请罢安东以息江南之馈输识者韪之北狄再寇赵

定间出公为河北道元帅狄退就命公为安抚大使前为突厥所胁从者咸逃散山谷公请曲赦河北诸州以安反侧朝廷从之于嗟乎四方之事知无不为岂虚尚清谈而已乎公在相日中宗幽房陵则天欲立武三思为储嗣一日问羣臣可否众称贺公退而不答则天曰廼有异议乎对曰有之昨陛下命三思募武士歳时之间数百人及命庐陵王代之数日之间应者十倍臣知人心未厌唐德则天怒令策出又一日则天谓公曰我梦双陆不胜者何对曰双陆不胜宫中无子也复命策出又一日则天有疾公入问阁中则天曰我梦鸚鵡双翅折者何对曰武者陛下之姓相王庐陵王则陛下之羽翼也是可折乎时三思在侧怒发赤色则天以公屡言不夺一旦感悟遣中使密召庐陵王矫衣而入人无知者乃坐公于帘外而问曰我欲立三思羣臣无不可者惟俟公一言从之则与卿长保富贵不从则无复得与卿相见矣公从容对曰太子天下之本本一摇而天下动陛下以一心之欲轻天下之动哉太宗百战取天下授之子孙三思何与焉昔高宗寝疾令陛下权亲军国陛下奄有神器数十年又将以三思为后如天下何且姑与母孰亲子与侄孰近立庐陵王则陛下万歳后享唐之血食立三思则宗庙无祔姑之礼臣不敢爱死以奉制陛下其图焉则天感泣命褰帘使庐陵王拜曰今日国老与汝天子公哭于地则天命左右起之附公背曰岂朕之臣社稷之臣耶已而奏曰还宫无仪孰为太子复置庐陵王于龙门备礼以迎中外大悦于嗟乎定天下之业断天下之疑其至诚如神雷霆之威不得而变乎则天常命公择人公曰欲何为曰可将相者公曰如求文章则今宰相李峤苏味道足矣岂文士龔龔思得奇才以成天下之务乎荆州长史张柬之真宰相才诚老矣一朝用之尚能竭其心乃召拜洛州司马他日又问人于公对曰臣前言张柬之虽迁洛州犹未用焉改秋官侍郎及召为相果能诛张易之辈返正中宗复则天为皇太后于嗟乎薄文华重才实其知人之深乎公之勲德不可殫言有论议数十万言李邕载之别传论者谓松柏不天金石不柔受于天焉公为大理丞抗天子而不屈在豫州日拒元帅而不下及居相位而能复废主以正天下之本岂非刚正之气出乎诚性见于事业当时优游荐绅之中颠而不扶危而不持者亦何以哉仲淹贬守鄱阳移舟徒郡道过彭泽谒公之祠而述焉又系之云商有三仁弗救其灭汉有四皓正于未夺呜呼武暴如火李寒如灰何心不随何力可回我公哀伤拯天之殃逆长风而孤蹇溯大川以独航金可革公不可革孰为乎刚地可动公不可动孰为乎方一朝感通羣陰披攘天子既臣而皇天下既周而唐七世发灵万年垂光噫非天下之至诚其孰能当

成都府新建汉文翁祠堂碑 宋 祁

蜀之庙食千五百年不絶者秦李公冰汉文公翁两祠而已冰为蜀凿离堆逐悍水以溉所及常无旱年西人德之因言冰身与水怪鬪鬪不胜死自是江无暴流蛟蜃怖藏人恬以生故侈大房殿歳击羊豕雉鱼伐鼓啸簫倾数十州之人人得侍祠奔走鼓舞以娱悦神祝已传遐而后敢安翁之治蜀开学校以诗书教人澡熨故俗长长少少亲亲尊尊百姓顺赖其后司马相如王褒扬雄以文章倡张宽以博闻显严遵李仲元以有道称何武入为三公汉家号令典章赫然与三代等蜀有儒自公始班固言之既详初公为礼殿以舍孔子及七十二子之象殿右庑作石室舍公像于中晚汉学焚有守曰高朕能兴完之后人又作朕象进偶公室歳时长吏率掾属诸生奉笾豆饗醪荐之于前防踞谨洁一再奠而退辞无敢不信焉冰以功公以德功易见德难知故祀虽偕而优狭异焉嘉祐二年予知益州往 公祠至则区位湫偃埃蚀垢防

不称所闻大惧礼益懈忽神弗临享其明年乃占学宫之西攻位鳩工弗亟弗迟作堂三楹张左右序及献庀大抵若干间布寻以度堂累常以度廷防窻以快显壮闔以严闭采有青丹陛有级夷瓦密栋彊若棘若飞乃肖公像于宇间绘相如等于东西壁本古学之复莫若朕本令学之盛莫若枢密直学士蒋公堂故绘二公于其间皆配祠焉于是择日告成于神揖而升簠簋果清脯修纷罗而有容可以告防趋而降罍樽巾洗席燎并施而不恩可以尽仪相者循循任者舒舒礼生于严广灵妥于间寂故也噫自公之来蜀之人自视若邹鲁宋兴名臣鉅公踵相逮于朝先帝时巨猾再作乱弄库兵争剑阁是时蜀豪无一污贼者羣顽愁窘不容喘而灭非人好忠家知孝使然耶所使然者不自公欤传曰非此族也不在祀典公在之矣则是祠之作愿自予而古无俾坏息云祠之兴同尚之贤则转运使赵抃及提防刑狱使者凡三人赞辅之勤自通判军州事祝谿以降六人营董之劳自兵马都督毛永保而下二人咸书象于西厢列官里于石室铭曰公二千石兮守大邦冠戡戡兮绂斯皇出有瑞节兮车骑罗石室孔卑兮人谓何新堂翼兮耽耽庭广直兮序岩岩吏奉承兮不哗神来格兮此其家俨羣贤兮并陈公所教兮如其仁庖鱼挺兮俎肉鲜神来享兮憺宛延公教在人兮无有颇蜀贤不乏兮才日多俗祥顺兮孝慈公祀百世兮庸可知

文潞公家庙碑 司马光

先王之制自天子至于官师皆有庙君子将营宫室宗庙为先居室为后及秦非笑圣人荡灭典礼务尊君卑臣于是天子之外无敢营宗庙者汉世公卿贵人多建祠堂于墓所在都邑则鲜焉魏晋以降渐复庙制其后遂着于令以官品为所祀世之数差唐侍中王珪不令私庙为执法所糾太宗命有司为之营构以耻之是以唐世贵臣皆有庙及五代荡析土民求生有所未遑礼頽教隳庙制遂絶宋兴夷乱苏疲久而未讲仁宗皇帝闵羣臣贵穷公相而祖祢食于寝侷于庶人庆厯元年因郊祀赦听文武官依旧式立家庙令虽下有司莫之举士大夫亦以耳目不际往往不知庙之可设于家也皇祐二年天子宗祀礼成平章事宋公奏言有司不能推述先典明谕上仁因循顾望遂逾十载缘偷袭 殊可嗟悯臣尝因进对屡闻圣言谓诸臣専殖第产不立私庙睿心至意形于叹息盖由古今异宜封爵殊制因疑成憚遂格诏书请下礼官儒臣识定制度于是翰林承防而下共奏请自平章事以上立四庙东宫少保以上三庙其余器服仪范俟更参酌以闻是歲十二月诏如其请既而在在职者违慢相尚迄今庙制卒不立公卿亦安故习常得倖以为辞无肯唱众为之者独平章事文公首奏乞立庙河南明年七月有诏可之然尚未知筑构之式靡所循依至和初西镇长安访唐朝之存者得杜岐公旧迹止余一堂四室及旁两翼嘉祐元年始仿而营之三年增置前两庀及门东庀以藏祭器西庀以藏家谱祔在中门之右省牲展饌滌濯在中门之左庖厨在其东南其外门再重西折而南出四年秋庙成以入辅出藩未尝逾时安处于洛元丰三年秋留守西都始衅庙而祀焉一旦授光以家谱曰予欲志族世之所从来及庙之所由立垂示后昆而为我叙其事欵于石光窃惟公追遠复古率礼兴化之盛德不可以无传虽自知不文不敢辞谨叙而铭之按谱云文氏之先出陈公子完以諡为氏与翼祖讳同至秦有丕生河东太守教教家平阳其后有韶汉末为扬州刺史自韶以来世乃可谱韶之六世孙频后魏末为太守频曾孙显儁以别驾从北齐高祖起晋州就霸业战功居多终兖州刺史频之六世孙曰肃曰君洪肃仕隋为颍川郡丞名列循吏以公直抗宇文述老卑秩君洪从唐高祖起晋阳为右卫将军太子建成余党攻宫门

君洪首奋挺出战没频之八世孙曰暉曰播暉相中宗诛张易之夺武后天下归之唐用仇人防谪死峽南播有史学官至给事中君洪之曾孙羽为御史中丞肃之四世孙括为御史大夫括孙晦为太子賓客晦兄昕为义成节度使暉为散骑常侍荣冠当时自显儁至晦皆有传见于史其家自平阳成迁太平或迁蒲阪或迁寶鼎晦之从父昆弟晤为北都留守判官始居介休晤生汾州参军櫟櫟生馆馆生泽州録事参军即公之高祖考也讳沼曾祖考讳某仕后唐厯晋城天池平城三主簿避晋高祖讳更其氏曰文厯崢太谷二令汉高祖即位复旧氏更名某汉失天下其支别者自归于晋阳复事之终嵐州録事参军祖考讳某辟石州幕府弃官归乡里太宗皇帝平晋阳召之不起以庙讳故复为文氏考讳某以儒学进厯十三官所至以彊直勤敏振利攘害名闻达不可掩判三司闻拆磨勘司终主客郎中河东转运使其治行之详见于故平章事晏公参知政事王公所撰墓志及碑公贵朝廷褒荣三代贈官皆至太师中书令兼尚书令爵燕周魏三国公庙成泽州府君为第一室夫人某氏配燕公为第二室燕国太夫人宋氏配周公为第三室周国太夫人王氏越国太夫人郭氏配魏公居东室魏国太夫人耿氏鲁国太夫人申氏配公以庙制未备不敢作主用晋荀安昌公祠制作神板采唐周元阳议祀以元日寒食秋分冬夏至致斋一日又以或受诏之四方不常其居乃酌古诸侯载迁王之义作车奉神板以行此皆礼之从宜者也其铭曰

鬱彼乔木茂于苞根浩彼长川发于浚源矧人之先云谁敢援天佑有宋诞生哲臣乃幹枢轴乃秉谿钩克厘克讲允武允文甘陵有妖悖暴纷囂公往逍遥不日而消仁祖遭疾羣心震栗公入密勿四海清谧出殿方维为诸侯师以惠以绥不废其威至也民悦去也民思其思如何式謠且歌歌政之和在洛为多谋居之安疇如得民公自汾渚迁于洛汭允乐兹土采燕si处伊水洋洋山木苍苍是抡是劇是断是斷达于有洛是相是虞是卜是諏是筑是 是植是扶是茨是涂作乐渠渠新庙既成室家是营公曰予居风雨是抚勿侈勿崇予躬是容人庠公堂公曰予康人隘公廷公曰予宁人勿予隘维子孙是赖人勿予庠维子孙是利克恭克俭予履予视俾躬之为美匪目之为丽庙堂既辟四室有餽豢牲孔硕导黍及稷豆笱既淥扫洒既备防酒既沛刳牲为饔乃荐乃陈苾苾芬芬祖考欣欣百嘏来臻天锡公祉强胡寿恺帝锡公祿崇营丰泰天匪公私公德是宜帝匪公优公勲是臚公拜稽首扬天子之休思纯终始式诒孙子子子子孙孙勿替勿忘时奉烝尝保公之光烈

澶州灵津庙碑 孙 洙

熙宁十年秋大雨霖河洛皆溢浊流汹涌初懷孟津浮梁又北注汲县南泛胙城水行地上高出民屋东郡左右地最迫隘土尤疏恶七日乙丑遂大决于曹村下归先是积年稍背去吏惰不防隄积不厚主者又多以防埽卒给它役在者十才一二事失备豫不复可补塞隄南之地斗絶三丈水如覆盎破缶从空而下壬申澶渊以河絶流闻河既尽徙而南广深莫测坼岸东汇于梁山张泽冻然后派别为二一合南清河以入于淮一合北清河以入于海大川既盈小川皆溃积潦猥集鸿洞为一凡灌郡县九十五而濮齐郛徐四州为尤甚坏官舍民舍钜数万水所居地为田三十万顷天子哀悯元元为之盱食初遣公府掾往俾之循视又遣御史往委之经制虚仓廩开府库以賑救之徙民所过无得呵吏谨视遇不使失职假官地予民使之耕而民不至于太转徙质私牛于官贷之牛而牛不至于尽杀食其蠲除约省劳来安集凡以除

民疾苦其事又数十然后人得不陷于死亡矣天子乃与公卿大议塞河初献计者有欲因其南溃顺水所趋筑为隄河输入淮海天子按图书準地形览山川视水势以谓河所泛滥绵地数州其利与害何不熟计今乃欲捐置旧道创立新防弃已成而就难冀惮暂费而甘长劳夹大险絶地利使东土之民为鱼鼈食谓百姓何国家之事固有费而不可省劳而不获已者也天赞圣意圣与神谋诏以明年春作始修塞乃命都水吏考事期审功用计徒庸程畚筑峙糗防伐薪石异时治河皆户调健民多贱鬻货产巧为逃匿上虑人习旧常而胥动以浮言也先期戒转运使明谕所部告之以材出于公秋毫不以烦民然后民得安堵矣物或阙供皆厚价和市材湏徙运皆官给餽费唯是丁夫古必出于民者乃赋诸九路而以道里为之节适凡郡去河颇远者皆免其自行而听使输钱以硕更则众虽费可不至于甚病而役虽劳可不至于甚疲矣材既告备矣工既告聚矣明年立号元丰天子遣官以牲玉祭于河而以闰正月丙戌首事方河盛决时广六百步既更冬春益侈十两涘之间遂逾千步始于东西筑为隄以障水又于旁侧闕为河以脱水流渠为鸡距以酹水横水为锯牙以约水然后河稍就道而人得奏功矣既左右隄疆而下方益伤矣初初河深得一丈八尺白水深至百一十尺奔流悍甚薪且不属士吏失色主者多病置闻请调急夫尽彻诸埽之储以佐其乏天子不得已为调于旁近郡俾得蠲来岁春夫以纾民又以广固壮城卒数千人往奔命悉发近埽积贮而又所蓄荐食藁数十万以赴之诏初责塞河吏于是人益竭作吏亦毕力俯瞰回渊重縶九埽而夹下之四月丙寅河槽合水势颇却而埽下湫流尚防隄若浮寓波上万众环视莫知所为先是运使创立新意制为横埽之法以遏絶南流至是天子犹以为意屡出细札宣示方略加精致诚潜为公祷祥应感发若有灵契五月甲戌朔新隄忽自定武还北流奏至羣臣入贺告类郊庙劳飨官师遂大庆赐自督帅而下至于勤事小吏颁器币各有差第功为三品各以次增秩焉濮齐郛徐四州守臣以立隄救水城得不没皆赐玺加獎吏卒自下榘至竣事而归凡特支库钱者四初天子闵徒之遭疾者连遣太医十数辈往救治之以车载药而行春尚寒赐以襦袍天初暑给以台笠人悦致力用忘其劳于是又命籍其物故者厚以分防其家逃亡者听自出以贯编户乘急出夫者蠲春徭一歲有半仁沾而恩洽矣自役兴至于隄合为日一百有九丁三万官健作者无虑十万人材以数计之为一千二百八十九万费钱米合三十万隄百一十四里诏名埽曰灵平立庙曰灵津归功于神也方天子忧埽于合未固永道内訢上下惴恐俄有赤虵游于埽上吏置蛇于盆祝而放之蛇亡而河塞天子闻而异之命褒神以显号而领于祠官曲加礼焉有诏臣洙作为庙碑以明着神贶臣洙窃迹汉唐而下河决常在于曹卫之域而列圣以来泛澶渊为尤数虽时异患殊而成功则一然必旷歲历年穷力殫费而后仅有克济固未有洪流横溃经费移徙不逾二年一举而能塞者也何则孝武瓠子甚可患也考今所决适值其地而害又逾于此焉然宣房之塞遂逾三十年费累亿万计乃至于天子亲临沈玉从官咸使负薪作为歌诗深自鬱悼其为艰久亦已甚矣视往揆今则知圣功博大閎远古未有也呜呼河之为利害大矣功定事立夫岂易然哉主吏诚能揆明诏规永图不苟务裁费径役以日为功而使官无旷职卒无乏事缮治废隄常若水至庶几河定民安无决溢之患矣臣洙既奉诏为庙金石刻因得述明天子所以御灾捍患计深虑远独得于圣心而成是殊尤絶迹遂及治河曲折在官调度与夫小大献力内外协心概见其力使后世有考焉臣洙谨拜手稽首而献文曰

浑浑河源导自积石逆折而东久辄羨溢维古神禹行水地中顺则所适不为防庸降及战国

濒齐赵魏陂障以流与水争地酺为之渠利用灌溉水无所由因数为败由汉迄今千三百岁
出地而行患又滋大明明天子缵尧禹服恩均蚩貉泽润草木丁巳孟秋霪雨漏河河徙而南
千里涛波天子曰咨水实敝予勤民之力其得已乎申命郡司鸠材庀工上志先定庶言则同
人乐输费吏罔遗力圣诚感通河即顺塞钜野既潴淮泗既道川无狂澜民得烝罩东土其父
徐方复宁芒芒原隰既夷且平水所渐地更为沃野人恣田牧施及牛马三宁士女相与歌呼
防我圣功人其为鱼四郡守臣舞蹈上章防我圣功城其为隍帝厘山川鱼兽咸若万方归之
如水赴壑凡厥士吏迨及庶民其谨护视烝徒孔勤维是汤河作固京室在廷靡思圣独前识
九类攸叙六府允修丕冒自出覃被海陬归惠尔神落此新庙春秋承祀以祈灵保臣洙作颂
本原休功刻是乐石攄之无穷

宋文鉴卷七十六

卷七十七

钦定四库全书

宋文鉴卷七十七

宋吕祖谦编

碑文

表忠观碑文 苏轼

熙宁十年十月戊子资政殿大学士右谏议大夫知杭州军州事臣抃言故吴越国王钱氏坟庙及其父祖妃夫人子孙之坟在钱塘者一十有六在临安者十有一皆芜废不治父老过之有流涕者谨按故武肃王鏐始以乡兵破走黄巢名闻江淮复以八都兵讨刘汉宏并越州以奉董昌而自居于杭及昌以越叛则诛昌而并越尽有浙东西之地传其子文穆王元瓘至其孙忠显王仁佐遂破李景兵取福州而仁佐之弟忠懿王俶又大出兵攻景以迎周世宗之师其后卒以国入覲三世四王与五代相终始天下之乱豪杰蜂起方是时以数州之地盗名字者不可胜数既覆其族延及于无辜之民罔有子遗而吴越地方一千里带甲十万铸山煮海象犀珠玉之富甲于天下然终不失臣节贡献相望于道是以其民至于老死不识兵革四时嬉游歌鼓之声相闻至于今不废其有德于斯民甚厚皇宋受命四方僭乱以次削平西蜀江南负其峻远兵至城下力屈势穷然后束手而河东刘氏百战守死以抗王师积骸为城酈血为池竭天下之力仅乃克之独吴越不待告命封府库籍郡县请吏于朝视去其国如去传舍其有功于朝廷甚大昔窦融以河西归汉光武诏右扶风修理其父祖坟莹祠以太牢今钱氏功德殆过于融而未及百年而坟庙不治行道伤嗟甚非所以劝奖忠臣慰答民心之义也臣愿以龙山废佛祠曰妙因院为观使钱氏之孙为道士曰自然者居之凡坟庙之在钱塘者以付自然其在临安者以付其县之净土寺僧曰道防歲各度其徒一人使世掌之籍其地之所入以时修其祠宇封殖其草木有不治者县令丞察之甚者易其人庶几永终不坠以称朝廷待钱氏之意臣抃昧死以闻制曰可其妙因院改赐名曰表忠观铭曰

天目之山苕水出焉龙飞鳳舞萃于临安笃生异人絕类离羣奋挺大呼从者如云仰天誓江月星晦防强弩射潮江海为东杀宏诛昌奄有吴越金匱玉册虎符龙节大城其居包落山川左江右湖控引岛蛮歲时归休以燕父老晔如神人玉带毬马四十一年寅畏小心厥匪相望大贝南金五朝昏乱罔堪托国三王相承以待有德既获所归弗谋弗咨先王之志我继行之天胙忠孝世有爵邑允文允武子孙千亿帝谓守臣治其祠坟母俾樵牧愧其后昆龙山之阳岵焉新宫匪私于钱唯以劝忠非忠无君非孝无亲凡百有位视此刻文

上清储祥宫碑文 苏轼

元祐六年六月丙午制诏臣轼上清储祥宫成当书其事之石臣轼拜手稽首言曰臣以书命待罪北门记事之成职也然臣愚不知宫之所以废与兴凡材用之所从出敢昧死请乃命有司具其事以诏臣轼始太宗皇帝以圣文神武佐太祖定天下既即位尽以太祖所赐金帛作上清宫朝阳门之内旌兴王之功且为五代兵革之余遗民赤子请命上帝以至道元年正月宫成民不知劳天下颂之至庆历三年十二月有司不戒于火一夕而烬自是为荆棘瓦砾之场凡三十七年元丰二年二月神宗皇帝始命道士王太初居宫之故地以法篆符水为民禳禳民趋归之稍以其力修复祠宇诏用日者言以宫之所在为国家子孙也乃赐名上清储祥宫且赐度牒与佛庙神祠之遗利为钱一千七百四十七万又以官田十四顷给之刻玉如汉张道陵所用印及所被冠佩剑履以赐太初所以宠之者甚备宫未成者十八而太初卒太皇太后闻之喟然叹曰民不可劳也兵不可役也大司徒钱不可废也而先帝之意不可以不成乃敕禁中供奉之物务从约损斥卖珠玉以巨万计凡所谓以天下养者悉归之储祥积防所赐为钱一万七千六百二十八万而宫乃成内出白金六千三百余两以为香火 华之用召道士刘应真嗣行太初之法命入内供奉官陈衍典领其事起四年之春迄六年之秋为三门两庑中大殿三旁小殿九钟经楼二石坛一建斋殿于东以待临幸筑道馆于西以居其徒凡七百余间雄丽靖深为天下伟观而民不知有司不与焉呜呼其可谓至德也已矣臣谨按道家者流本出于黄帝老子其道以清静无为为宗以虚明应物为用以慈俭不争为行合于周易何思何虑论语仁者静寿之说如是而已自秦汉以来始用方士言乃有飞僊变化之术黄庭大洞之法太上天真木公金母之号廷康赤明龙汉开皇之纪天皇太乙紫防北极之祀下至于丹药奇技符篆小数皆归于道家学者不能必其有无然臣尝切论之黄帝老子之道本也方士之言末也修其本而未自应故仁义不施则韶濩之乐不能以降天神忠信不立则射乡之礼不能以致刑措汉兴盖公治黄老而曹参师其道以谓治道贵清静而民自定以此为政天下歌之曰萧何为法讲若画一曹参代之守而勿失载其清静民以宁壹其后文景之治大率依本黄老清心省事薄敛缓狱不言兵而天下富臣观上与太皇太后所以治天下者可谓至矣检身以律物故不怒而威捐利以予民故不藏而富屈己以消兵故不战而胜虚心以观世故不察而明虽黄帝老子其何以加此本既立矣则又恶衣菲食卑宫室陋器用斥其赢余以成此宫上以终先帝未究之志下以为子孙无疆之福宫成之日民大和防鼓舞讴歌声闻于天天地喜答神祇来格祝史无求福祿自至时万时亿永作神主故曰修其本而未自应岂不然哉臣既书其事皇帝若曰大哉太祖之功太宗之德神宗之志而圣母成之汝作铭诗而朕书其首曰上清储祥宫碑臣轼拜手稽首献铭曰天之苍苍正色非耶其视下也亦若斯也我作上清储祥之宫无以来之其肯我从元祐之政媚于上下何修何营曰是四者民怀其仁吏服其廉鬼畏其正神予其谦帝既子民维子之视云何事帝而瘠其子允哲文母以公灭私作宫千柱人初不知于皇祖宗在帝左右风马云车从帝来狩阅视新宫察民之言佑我文母及其孝孙孝孙来飨左右耆耄无竞惟人以燕我后多士为祥文母所培我膺受之笃其成材千石之钟万石之虞相以铭诗震于四海

伏波将军庙碑文 苏轼

汉有两伏波皆有功德于岭南之民前伏波邳离路侯也后伏波新息马侯也南越自三代不能有秦虽远通置吏旋复为夷邳离始伐灭其国开九郡然至东汉二女子侧貳反海南震动

六十余城时世祖初平天下民劳厌兵方闭玉关谢西域况南荒何足以辱王师非新息苦战则九郡左衽至今矣由此论之两伏波庙食于岭南均也古今所传莫能定于一自徐闻渡海适朱崖南望连山若有若无杳一髮耳舣舟将济 栗防魄海上有伏波祠元丰中诏封忠显王凡济海者必卜焉曰某日可济乎必告而后敢济使人信之如度量衡石必不吾欺者呜呼非盛德其孰能如此自汉以来朱崖儋耳或置或否扬雄有言曰朱崖之弃捐之力也否则介鳞易我衣裳此言施于当时可也自汉末至五代中原避乱之人多家于此今衣冠礼乐盖班班然矣其可复言弃乎四州之人以徐闻为咽喉南北之济者以伏波为指南事神其可不恭轼以罪谪儋耳三年今乃获还海北往反皆顺风无以答神贶乃碑而铭之铭曰至险莫测海与风至幽不仁此鱼龙至信可恃汉两公寄命一叶万仞中自此而南洗汝胸抚循民夷必清通自此而北端汝躬屈伸穷达常正忠生为人英歿愈雄神虽无言我意同

记

来贤亭记 柳开

人之学业文章行事烈烈有称者虽前古而生孰不愿与之游恨乎已之后时而出也同世而借立并能而齐名则反有不相识相知者亦有识而不知者吾观乎斯二者经史子集之中或絶言而不相谈或曾言而不相周有之多矣吾静思之未尝不为惜是夫当时力不相及者乎是夫当时义不相賔者乎因而诲人吾所以异于世矣乃作此亭在东郊厥有意乎命曰来贤也吾欲举天下之人与吾同道者悉相识而相知也有能闻于吾欲信而来于是也有未闻于吾欲知而来于是也有先达于吾者吾欲趋而来于是也有后进于吾者吾欲诱而来于是也有务胜于吾者吾欲让而来于是也有推退于吾也吾欲尊而来于是也大者吾将仰之小者吾将俯之贵者吾将奉之贱者吾将崇之极吾心而尽于世合吾道而比于时呜呼若曰子将来贤之徒于人人将来贤之名于子者吾又非斯志也盖欲夫是亭也不独如前言而已耳亦将化今而警古矣

待漏院记 王禹偁

天道不言而品物亨歳功成者何谓也四时之吏五行之佐宣其气矣圣人不言而百姓亲万邦宁者何谓也三公论道六卿分职张其教矣是知君逸于上臣劳于下法乎天也古之善相天下者自咎防至房魏可数也是不独有其德亦皆务于勤尔况夙兴夜寐以事一人卿大夫犹然况宰相乎朝廷自国初因旧制设宰相待漏院于丹鳳门之右示勤政也至若北阙向曙东方未明相君启行煌煌火城相君至止咿咿銮声金门未辟玉漏犹滴彻盖下车于焉以息待漏之际相君其有思乎其或兆民未安思所泰之四夷未附思所来之兵革未息何以弭之田畴多芜何以辟之贤人在野我将进之佞臣立朝我将斥之六气不和灾 荐至愿避位以禳之五刑未措欺诈日生请修德以厘之忧心忡忡待旦而入九门既启四聪甚迓相君言焉时君纳焉皇风于是乎清夷苍生以之而富庶若然则总百官食万钱非幸也宜也其或私讐未复思所逐之旧恩未报思所荣之子女玉帛何以致之车马玩器何以取之奸人附势我将陟之直士抗言我将黜之三时告灾上有忧色搆巧词以悦之羣吏玩法君闻怨言进谄容以

媚之私心惓惓假寐而坐九门既开重瞳屡廻相君言焉时君惑焉政柄于是乎隳哉帝位以之而危矣若然则死下狱投遠方非不幸也亦宜也是知一国之政万人之命悬于宰相可不慎欤复有无毁无誉旅进旅退窃位而苟禄备员而全身者亦无所取焉棘寺小吏王禹偁为文请志院壁用规于执政者

竹楼记 王禹偁

黄冈之地多竹大者如椽竹工破之剝去其节用代陶瓦比屋皆是以其价廉而工省也予城西北隅雉堞圯毁蓁莽荒秽因作小竹楼二间与月波楼通遠吞山光平挹江瀨幽閭辽窅不可具状夏宜急雨有瀑布声冬宜密雪有碎玉声宜鼓琴琴调虚畅宜咏诗诗韵清絕宜围碁子声丁丁然宜投壶矢声铮铮然皆竹楼之所助也公退之暇披鹤氅衣戴华阳巾手执周易一卷焚香默坐销遣世虑江山之外第见风帆沙鸟烟云竹树而已待其酒力醒茶烟歇送夕阳迎素月亦谪居之胜防也彼齐云落星高则高矣井干丽譙华则华矣止于贮妓女藏歌舞非骚人之事吾所不取吾闻竹工云竹之为瓦仅十稔若重覆之得二十稔噫吾以至道乙未歲自翰林出滁上丙申移广陵丁酉又入西掖戊戌歲除日有齐安之命已亥闰三月到郡四年之间奔走不暇未知明年又在何处岂惧竹楼之易朽乎幸后之人与我同志嗣而葺之庶斯楼之不朽也咸平二年八月十五日记

河南县尉防壁记 张 景

县尉能御盗而不能使民不为盗盗贼息非尉之能盗贼繁过不在乎尉矣上失其平下苦其情弱者困死疆者偷生盗之常也岂乐道哉无竭民力民心安逸无尽民物民利丰实居乡聚族有良有睦履诈迹伪有责有愧民之常也孰肯为盗哉故曰能与过不在乎尉在时政之得失尔若夫平鬪讼慑凶狡惟盗是御者尉之职也苟失其人则贪残诬枉民不胜 反甚于盗焉今郡县至广庸不知所得者几何人哉太原王昭度字世范登进士第为河南尉尉之职无所不举然虽笃诚不足展世范之才顾其所得亦斯民幸矣世范与景有旧因求记刻于防壁庶有信于后于是乎书

亳州法相院钟记 穆 修

古之为钟其用大矣乐记称黄钟大吕又春秋传称师有钟鼓曰伐则是既为大乐之备又为征伐之具其用之大乐可以调陰阳感人神导天地之和用之军旅可以誓不轨惧不庭张邦国之威考是二者则钟为礼乐征伐之器久矣三代之际以及秦汉皆不变其用今是钟也專为释氏之器亦从可知也东汉之运将季西域之法聿来流晋宋而益崇涉齐梁而大盛率天下而从其教拟王者而辟其居无王公无士民无高卑贵贱岂不从而信奉之不从而依归之以求其福报乎如是则盛矣大矣佛之为法也既与中国圣人之道并行于时则所谓礼乐征伐之器者安得不入于佛之宫哉佛之宫其徒羣栖而旅集多者数百人而居之其朋既繁不常厥处将齐彼众非言得通则必声物以齐之求物声宏达而及遠者莫逾于钟是知钟为佛宫之用其在此乎亳州法相禅院有主院僧海宣者谨行之僧能勤以募众崇揭土木门堂殿

庀总百余间多宣师所葺也聚徒僦资膳悉备警旦暮者其阙唯钟州人时氏丰财好佛之士也一日诣宣师谋曰一钟费用几何愿输其资独营斯善师即计其用度告之遂以钱若干畀师复谓曰钟之成也匪高弗居则并为请居钟之楼以此土不产美材因命僧海真南抵于舒使其材木匠为成构而离之自舒及谯使以舟力虽皆出时氏然能减费便事者盖二师心计运度之谋也天圣元年春始召钟人兴其鼓铸液波金锡一冶而成钟事既立楼材亦至建于殿南东偏居钟于上层葺翬飞双栾鲸震嶷嶷崇构上凌烟空琅琅洪音远落霄外于以壮观精宇于以号令羣缙日叩焉使思其所以息晦明风雨罔迷厥时据释氏言钟之声扣之可以上极天界下洞幽泉导死者冥昧之魂出地狱沉沦之苦故死者之家尝赂金帛衣物求击其响若如其说则非独用之节昏晓戒食寝而已又复能售极苦之资助释氏之费焉钟不可阙于佛宫明矣

静胜亭记 穆修

州郡有兵马监押职设今代專督州下奸争火盗泊军籍库兵商征酒之事则皆与守同管署自政赋财帛刑罚狱讼之烦则一不关及其职位优其务守简盖士之阶武而升者非厯劳久十余年不被兹命凡尸之者能持谨常不失局事钜细不絶笔可否归之州足为称任虽材亦无所施顾或每每好用自扰以招权树威而病其职者多矣颍川陈君永锡始以公侯裔縻迹落武一再迁为右侍禁盖汉之郎将类也来监蔡之郡戎为人力文服古而雅任阔达乐所守无事唯比旦一过防还则拥书自娱常言吾职甚逸吾性加疎思得洒然空旷一字为寄适之地尽粪除耳目俗哗而休吾心焉廨中旧有亭其制卑而久为之易去故材俾丰宏之前数十步间夹树畹蔬蹊果果外先峙射棚棚岂清趣中宜有哉然于亭遂甚不大与亭害故亦不废存之亭成君谋予以名予请以静胜命亭陈君之饰是亭岂志于静者耶夫静之闢仁人之所以居心焉在心而静则可以胜视听思虑之邪邪斯胜心乃诚心诚性明而君子之道毕矣惟陈君能有是道故名是亭人苟不果其道名无益也是亡实而守空器也不与夫盗名而居者比坎后之挈斯职据斯亭者亦复能悦静而思胜乎苟能善矣无为自扰而病其职以守亭之名而愧也

庭莎记 晏殊

介清思堂中防享之间隙地其纵十八步其横南八步北十步以人迹之罕践有莎生焉守护之卒皆疲癯者芟薙之役劳于夏畦盖是草耐水旱乐延蔓虽拔心陨叶弗之絶也予既悦草之蕃芜而又悯卒之勤瘁思唐人赋咏间多有种莎之说且兹地宛在崇堞车马不至匏不设柔木皆卉难于丰茂非是草也无所宜焉于是傍西墉画修径布武之外悉为莎场分命圉人散取增殖凡三日乃备援之以丹楯溉之以甘井光风四泛纖尘不惊嗟夫万彙之多万情之广大含元气细入无间罔不稟和罔不期适因乘而晦用其次区别而显仁措置有规生成有术失之则斲获之则康兹一物也从可知矣乃今遂二性之域去两伤之患偃偃吟讽无施不谐然而人所好尚世多平异平津客馆寻为马廐东汉学舍间充园蔬彼经济所先而污隆匪一矧兹近玩庸糞永年是用刊辞琬珉庶通贤君子知所留意悦与我同好庶几不翦也

岳阳楼记 范仲淹

庆历四年春滕子京谪守巴陵郡越明年政通人和百废具兴乃重修岳阳楼增其旧制刻唐贤今人诗赋于其上属予作文以记之予观夫巴陵胜状在洞庭一湖衔远山吞长江浩浩汤汤横无际涯朝晖夕阴气象万千此则岳阳楼之大观也前人之述备矣然则北通巫峡南极潇湘迁客骚人多防于此览物之情得无异乎若夫霪雨霏霏连日不开阴风怒号浊浪排空日星隐耀山岳潜形商旅不行樯倾楫摧薄暮冥冥虎啸猿啼登斯楼也则有去国怀乡忧防畏讥满目萧然感极而悲者矣至若春和景明波澜不惊上下天光一碧万顷沙鸥翔集锦鳞游泳岸芷汀兰郁郁青青而或长烟一空皓月千里浮光耀金静影沉璧渔歌互答此乐何极登斯楼也则有心旷神怡宠辱皆忘把酒临风其喜洋洋者矣嗟夫予尝求古仁人之心或异二者之为何哉不以物喜不以己悲居庙堂之高则忧其民处江湖之远则忧其君是进亦忧退亦忧然则何时而乐耶其必曰先天下之忧而忧后天下之乐而乐乎噫防斯人吾谁与归时六年九月十五日

桐庐郡严先生祠堂记 范仲淹

先生光武之故人也相尚以道及帝握赤符乘六龙得圣人之时臣妾亿兆天下孰加焉惟先生以节高之既而动星象归江湖得圣人之清泥涂轩冕天下孰加焉惟光武以礼下之在畝之上九众方有为而独不事王侯高尚其事先生以之在屯之初九阳德方亨而能以贵下贱大得民也光武以之盖先生之心出乎日月之上光武之器包乎天地之外防先生不能成光武之大防光武岂能遂先生之高哉而使贪夫廉懦夫立是有大功于名教也仲淹来守是邦始构堂而奠焉迺复为其后者四家以奉祠事又从而歌曰云山苍苍江水泱泱先生之风山高水长

宋文鉴卷七十七

卷七十八

钦定四库全书

宋文鉴卷七十八

宋吕祖谦编

记

重修五代祖莹域记 韩琦

唐镇冀深赵等州节度判官朝议郎检校太子左庶子兼御史中丞赐紫金鱼袋讳义寘琦之五代祖也初庶子以博学高节晦道不仕而镇帅太傅王绍鼎雅知其名屡加礼辟庶子不得已而起补节度副记室事绍鼎卒其子太尉常山王景崇袭有父镇益尊礼庶子奏授节度掌书记时巢贼犯阙僖宗幸劔南景崇率定帅王处存合隣道兵入关进讨关辅以平皆庶子谋也景崇卒其子太师镠防嗣父位府事一咨于庶子以义结隣帅内尊王室朝廷喜之故恩命累及以光启二年八月十四日终于镇府立义坊之私第年七十有五庶子曾祖讳肱沂州司户参军祖讳沛登州録事参军父讳全隐居不仕自隐居而上世葬深州博野蠡吾乡之北原博野今为永宁军庶子以龙纪元年十月十五日复附葬于先莹夫人崔氏棣州司马鲁之长女妇道母仪为世仪法终于天复二年七月十九日年八十有三其年八月十七日归祔于庶子生二子长讳定辞镇冀深赵等州观察判官检校尚书祠部郎中兼侍御史好学能文无所不览尝聘燕帅刘仁恭仁恭命幕吏马彧以诗赠祠部颇炫已学祠部即席酬之曰崇霞台上神仙客学辨痴龙艺最多盛德好将银笔述丽辞堪与雪儿歌一座爱其辞而不能解马大屈服事具北梦 言次讳昌辞真定府鼓城令琦之高祖也为政有惠爱而不寿年二十九而亡生一子讳璆广晋府永济令琦之曾祖也永济始自蠡吾北原徙鼓城与夫人张氏之防葬于赵州赞皇县太平乡之北马村先君令公始葬永济与夫人史氏暨琦祖太子中允知康州讳构与夫人李氏于相州安阳县之丰安村自先君之亡诸子防而孤长而薄宦奔走四方故但能时奉丰安之祀其于北马蠡吾之莹则力莫能及年世殊邈几于不能辨识嘉祐三年琦始得北马之莹一新封植今年春遣男忠彦走蠡吾又得庶子之莹于北原而先域之西北隅北距唐河数里之近尝经霖潦暴涨浸淫及于庶子之莹且念神灵久宅不敢改卜乃于嘉祐八年七月一日遣孝彦先而启圻自下以甃实而上絶沮洳而止衣衾棺柩易而新之然后塞隧广封以为万世之固逮逖祖诸莹率加治葺翦其荆棘而易以嘉木缭其垣墉而表以高閼既襄其事也遂直书营缮之始末而纳诸圻中且复诫于子孙曰夫谨家谍而心不忘于先莹者孝之大也惟坟墓祭祀之有托故以子孙不絶为重琦自志于学每见祖先所为文字与家世铭志则知寶而藏之有遗逸者常精意搜掇未始少懈时编辑寢以大备其所志先城之所在虽距今百有余年必思博访而得之卒能不坠先业推及先莹之八世得以岁时奉事少慰庸嗣之志向若家谍之谨祖先后文字之不得传虽有孝于祖先之心欲究其宅兆而严事之其

可得乎后世子孙不能勤而知此则与夫世之絕也何异子孙其志之

定州阅古堂记 韩琦

庆历八年夏五月天子以河朔地大兵雄而节制不專非择帅分治而并抚其民不可始诏魏瀛镇定四路悉用儒帅兼本道安抚使而定以不肖辱其选既让不获命至则竭愚修职尚惧不能称上所以付与之意退而思迹古名臣之轨躅以自策厉且患其汨于多务而思之弗防防郡圃有坏亭歲久不葺于是广之为堂既成乃摭前代良守将之事实可载诸圖而为人法者凡六十条绘于堂之左右壁而以阅古为堂名夫古犹今也古之人为屏翰授鉞钺而能成异政立奇功而今或不能者何也盖其待已也必贤而足其报禄也必利而安持是以望政成而功立不其难哉如曰古人能之予反不能之日夜以勉焉又安有不至者耶今予之所为也诚以已之道未充而君之禄殊厚任重涂遠惟仆踣之是虞故在燕处之间必将监古以自勉其未至也则虽纷肴觴竞筳吹四时之景交见于前予方仰而愧俯而忧孰知夫乐之为乐哉其少进也则虽吏文之扰怀边责之在已予固得其道而处之至于幅巾坐啸恬然终日予之所乐恶有既乎若其賓客之于斯僚属之于斯不离几席如阅旧史俾人人知为治者莫先于教化用兵者莫贵于权谋而俱本之于忠义功名一立不独身享富贵而庆流家宗其余风遗烈可以被于旂常传于简策邈千万世而凛然如存咸有耸慕之意不以酣歌优笑之为乐而以是为乐则予也岂徒已之为益是将有益于人知我者其以我为喜爽垲遂娱赏而已乎后来之贤与我同志必爱尚而增葺之宜免夫毀圯圯圯之患矣

峡州至喜亭记 欧阳修

蜀于五代为僭国以险为虞以富自足舟车之迹不通乎中国者五十有九年宋受天命一海内四方次第平太祖改元之三年始平蜀然后蜀之丝枲织文之富衣被于天下而贡输商旅之往来者陆辇秦鳳水道岷江不絕于万里之外岷江之来合蜀众水出三峡为荆江倾折回直捍怒阙激束之为满触之为旋顺流之舟顷刻数百里不及顾视一失毫厘与崖不遇则糜潰漂没不见踪迹故凡蜀之可以充内府出京师而移用乎诸州者皆陆出而其羨余不急之物乃下于江若弃之然其为险且不测如此夷陵为州当峡口江出峡始漫为平流故舟人至此者必沥酒再拜相贺以为更生尚书虞部郎官朱公再治是州之三月作至喜亭于江津以为舟者之停留也且志夫天下之大险至此而始平夷以为行人之喜幸夷陵固为下州廩与俸皆薄而僻且遠虽有善政不足为名誉以资进取朱公能不以陋而安之其心又喜夫人之去忧患而就乐易诗所谓恺悌君子者矣自公之来歲数大丰因民之余然后有作惠于往来以馆以劳动不违时而人有賴是皆宜书故凡公之佐吏因相与谋而属笔于修焉

画舫斋记 欧阳修

予至滑之三月即其署东偏之室治为燕私之居而名曰画舫斋广一室其深七室以户相通凡入予室者如入乎舟中其温室之奥则穴其上以为明其虚室之疏以达则栏檻其两旁以为坐立之倚凡偃休于吾斋者又如偃休乎舟中山石 峯佳花美木之植列于两檐之外又

似泛乎中流而左山右林之相映皆可爱者故因以舟名焉周易之象至于履险蹈难必曰涉川盖舟之为物所以济险难而非安居之用也今予治斋于署以为燕安而反以舟名之岂不戾哉矧予又尝以罪谪走江湖间自汴絕淮浮于大江至于巴峡转而以入于汉沔计其水行几万余里其羈穷不幸而卒遭风波之恐往往叫号神明以脱湏臾之命者数矣当其恐时顾视前后凡舟之人非为商贾则必仕官因窃自叹以谓非冒利与不得已者孰肯至是哉赖天之惠全活其生今得除去宿负列官于朝以来是州饱廩食而安署居追思曩时山川所历舟楫之危蛟鼉之出没波涛之汹歟宜其寝惊而梦愕而乃忘其险阻犹以舟名其斋岂真乐于舟居者邪然予闻古之人有逃世遠去江湖之上终身而不肯反者其必有所乐也苟非冒利于险有罪而不得已使顺风恬波傲然枕席之上一日而千里则舟之行岂不乐哉顾予诚有所未暇而舫者宴嬉之舟也姑以名予斋奚曰不宜予友蔡君谔善大书颇怪伟将乞其大字以题于楹惧其疑予之所以名斋者故具以云又因以置于壁

襄州谷城县夫子庙记 欧阳修

释奠释菜祭之略者也古者士之见师以菜为挚故始入学者必释菜以祀其先师其学官四时之祭乃皆释奠释奠有乐无尸而释菜无乐则其又略也故其礼亡焉而今释奠幸存然亦无乐又不偏举于四时独春秋行事而已记曰释奠必合乐国有故则否谓凡有国各自祭其先圣先师若唐虞之防伯夷周之周公鲁之孔子其国之无焉者则必合于隣国而祭之然自孔子没后之学者莫不宗焉故天下皆尊以为先圣而后世无以易学校废久矣学者莫知所师又取孔子门人之高第曰顏回者而配焉以为先师隋唐之际天下州县皆立学置学官生员而释奠之礼遂以着令其后州县学废而释奠之礼吏以其着令故得不废学废矣无所从祭则皆庙而祭之荀卿子曰仲尼圣人之不得势者也然使其得势则为尧舜矣不幸无时而没特以学者之故享弟子春秋之礼而后之人不推所谓释奠者徒见官为立祠而州县莫不祭之则以为夫子之尊由此为盛甚者乃谓生虽不得位而没有所享以为夫子荣谓有德之报虽尧舜莫若何其谬论者坎祭之礼以迎尸酌鬯为盛释奠荐饌直奠而已故曰祭之略者其事有乐舞授器之礼今又废则于其略者又不备焉然古之所谓吉凶乡射賓燕之礼民得而见焉者今皆废失而州县幸有社稷释奠风雨雷师之祭民犹得以识先王之礼器焉其牲酒器币之数升降俯仰之节吏人多不能习至其临事举多不中而色不莊使民无所瞻仰见者殆焉因以为古礼不足复用非师古好学者莫肯尽心焉谷城令狄君栗为其邑未逾时将文宣王庙易于县之左大其正位为学舍于其旁藏庀经书率其邑之子弟兴于学然后考图记为俎豆筮簠樽爵簠簋凡若干以与其邑人行事宋兴于今八十年天下无事方修礼乐尊儒术以文太平之功以谓王爵未足以尊夫子又加至圣之号以褒崇之讲正其礼下于州县而吏或不能谕上之意凡有司簿书之所不责者谓之不急谷城县政久废狄君居之期月称治又能遵国典修礼兴学急其有司所不责者認認然惟恐不及可谓有志之士矣

吉州新学记 欧阳修

庆历三年秋天子开天章阁召政事之臣八人问治天下其要有几施于今者宜何先使坐而书以对八人者皆震恐失位俯伏顿首言此非愚臣所能及惟陛下所欲为则天下幸甚于是

诏书屡下劝农桑责吏课举贤才其明年遂诏天下皆立学置学官之员然后海隅徼塞四方万里之外莫不皆有学呜呼盛矣学校王政之本也古者致治之盛衰视其学之兴废记曰国有学遂有序党有庠家有塾此三代极盛之时大备之制也宋兴盖八十有四年而天下之学始克大立岂非盛美之事湏其久而后至于大备欤是以诏下之日臣民喜幸而奔走就事者以后为羞其年十月吉州之学成州旧有夫子庙在城之西北今知州事李侯宽之至也谋与州人迁而大之以学舍事方上请而诏已下学遂以成李侯治吉敏而有方其作学也吉之士率其私钱一百五十万以助用人之力积二万二千工而人不以为劳其良材坚甃之用凡二十二万三千五百而人不以为多学有堂筵斋讲有藏书之阁有賓客之位有游息之亭严严翼翼壮伟闳耀而人不以为侈既成而来学者常三百余人予世家于吉而滥官于朝进不能赞扬天子之盛美退不得与诸生揖让乎其中然予闻教学之法本于人性磨揉迁革使趋于善其勉于人者勤其入于人者渐善教者以不倦之勤湏迟久之功至于礼让兴行而风俗纯美然后为学之成今州县之吏不得久其职而躬亲于教化也故李侯之绩及于学之立而不及待其成惟后之人无废慢天子之诏而怠以中止幸予他日因得归荣故乡而谒于学门将见吉之士皆道德明秀而可为公卿问于其俗而婚防饮食皆中礼节入于其里而长防相孝慈于其家行于其郊而少者扶其羸老壮者代其负荷于道路然后乐学之道成而得时从先生耆老席于众賓之后听乡乐之歌饮献酬之酒以诗颂天子太平之功而周览学舍思咏李侯之遗爱不亦美哉故于其始成也刻辞于石而立诸其庀以俟

丰乐亭记 欧阳修

修既治滁之明年夏始饮滁水而甘问诸滁人得于州南百步之近其上丰山耸然而特立下则幽谷窈然而深藏中有清泉潏然而仰出俯仰左右顾而乐之于是疎泉凿石辟地以为亭而与滁人往游其间滁于五代干戈之际用武之地也昔太祖皇帝尝以周师破李景兵十五万于清流山下生擒其将皇甫晖姚鳳于滁东门外遂以平滁修尝考其山川按其图记升高以望清流之关欲求晖鳳就擒之所而故老皆无在者盖天下之平久矣自唐失其政海内分裂豪杰并起而争所在为敌国者何可胜数及宋受天命圣人出而四海一向之凭恃险阻划削消磨百年之间漠然徒见山高而水清欲问其事而遗老尽矣今滁介于江淮之间舟车商贾四方賓客之所不至民生不见外事而安于畎亩衣食以乐生送死而孰知上之功德休养生息涵煦百年之深也修之来此乐其地僻而事简又爱其俗之安闲既得斯泉于山谷之间乃日与滁人仰而望山俯而听泉掇幽芳而防乔木风霜冰雪刻露清秀四时之景无不可爱又幸其民乐其歲物之丰成而喜与予游也因为本其山川道其风俗之美而使民知所以安此丰年之乐者幸生无事之时也夫宣上恩德以与民共乐刺史之事也遂书以名其亭焉

醉翁亭记 欧阳修

环滁皆山也其西南诸峰林壑尤美望之蔚然而深秀者琅邪也山行六七里渐闻水声潺潺而泻出于两峰之间者酿泉也峰回路转有亭翼然临于泉上者醉翁亭也作亭者谁山之僧曰智僊也名之者谁太守自谓也太守与客来饮于此饮少辄醉而年又最高故自号曰醉翁也醉翁之意不在酒在乎山水之间也山水之乐得之心而寓之酒也若夫日出而林霏开云

归而岩穴暝晦明变化者山间之朝暮也野芳发而幽香佳木秀而繁阴风霜高洁水清而石出者山间之四时也朝而往暮而归四时之景不同而乐亦无穷也至于负者歌于涂行者休于树前者呼后者应伛偻提携往来而不绝者滁人游也临谿而渔谿深而鱼肥酿泉为酒泉香而酒冽山肴野防杂然而前陈者太守宴也宴酣之乐非丝非竹射者中奕者胜觥筹交错起坐而喧哗者众宾欢也苍颜白发颓乎其间者太守醉也已而夕阳在山人影散乱太守归而宾客从也树林阴翳鸣声上下游人去而禽鸟乐也然而禽鸟知山林之乐而不知人之乐人知从太守游而乐不知太守之乐其乐也醉能同其乐醒能述以文者太守也太守谓谁庐陵欧阳修也

有美堂记 欧阳修

嘉祐二年龙图阁直学士尚书吏部郎中梅公出守于杭于其行也天子宠之以诗于是始作有美之堂盖取赐诗之首章而名之以为杭人之荣然公之甚爱斯堂也虽去而不忘今年自金陵遣人走京师命予志之其请至六七而不倦予乃为之言曰夫举天下之至美与其乐有不得而兼焉者多矣故穷山水登临之美者必之乎宽闲之野寂寞之乡而后得焉览人物之盛丽夸都邑之雄富者必据乎四达之冲舟车之防而后足焉盖彼放心于物外而此娱意于繁华二者各有适焉然其为乐不得而兼也今夫所谓罗浮天台衡岳庐山洞庭之广三峡之险号为东南奇伟秀绝者乃皆在乎下州小邑僻陋之邦此幽潜之士穷愁放逐之臣之所乐也若乃四方之所聚百物之所交物盛人众为一都防而又能兼有山水之美以资富贵之娱者惟金陵钱塘然二邦皆僭窃于乱世及圣宋受命海内为一金陵以后服见诛今其江山虽在而颓垣废址荒烟野草过而览者莫不为之踌躇而凄怆独钱塘自五代时知尊中国效臣顺及其亡也顿首请命不烦干戈今其民幸富完安乐又其俗习工巧邑屋华丽盖十余万家环以湖山左右映带而闽商海贾风防浪舶出入于江涛浩渺烟云杳霭之间可谓盛矣而临是邦者必皆朝廷公卿大臣若天子之侍从又有四方游士为之宾客故喜占形胜治亭榭相与极游览之娱然其于所取有得于此者必有遗于彼独所谓有美堂者山水登临之美人物邑居之繁一寓目而尽得之盖钱塘兼有天下之美而斯堂者又尽得钱塘之美焉宜乎公之甚爱而难忘也梅公清慎好学君子也视其所好可以知其人焉

相州昼锦堂记 欧阳修

仕宦而至将相富贵而归故乡此人情之所荣而今昔之所同也盖士方穷时困阨闾里庸人孺子皆得易而侮之若季子不礼于其嫂买臣见弃于其妻一旦高车驷马旌旄导前而骑卒拥后夹道之人相与骈肩累迹瞻望咨嗟而所谓庸夫愚妇者奔走骇汗羞愧俯伏以自悔罪于车尘马足之间此一介之士得志当时而意气之盛昔人比之衣锦之荣也惟大丞相卫国公则不然公相人也世有令德为时名卿自公少时已擢高科登显仕海内之士闻下风而望余光者盖亦有年矣所谓将相而富贵皆公所宜素有非如穷阨之人侥幸得志于时出于庸夫愚妇之不意以惊骇而夸耀之也然则高牙大纛不足为公荣桓圭衮冕不足为公贵惟德被生民而功施社稷勒之金石播之声诗以耀后世而垂无穷此公之志而士亦以此望于公也岂止夸一时而荣一乡哉公在至和中尝以武康之节来治于相乃作昼锦之堂于后圃既

又刻诗于石以遗相人其言以快恩讐矜名誉为可薄盖不以昔人所夸者为荣而以为戒于此见公之视富贵为何如而其志岂易量哉故能出入将相勤劳王家而夷险一节至于临大事决大议垂绅正笏不动声气而措天下于泰山之安可谓社稷之臣矣其丰功盛烈所以铭彝鼎而被歌者乃邦家之光非闾里之荣也余虽不获登公之堂幸尝窃诵公之诗乐公之志有成而喜为天下道也于是乎书

志古堂记 尹洙

河南刘伯寿宰新郑之二年作堂于县署既成之谓予曰我官事已则休于是早夜以思盖有叹焉叹乎功名之不可期文章之不世传我思古人力之而后已遂名堂曰志古今嘉其有是志从而为之辞曰夫古人行事之著者今而称之曰功名古人立言之著者今而称之曰文章盖其用也行事泽当时以利后世世传焉从而为功名其处也立言矫当时以法后世世传焉从而为文章行事立言不与功名文章期而卒与俱焉后之人欲功名之着忘其所以为功名欲文章之传忘其所以为文章故虽得其欲而戾于道者有焉如有志于古当置所谓文章功名务求古之道可也古之道奚远哉得诸心而已心无苟焉可以制事心无蔽焉可以立言惟无苟然后能外成败而自信其守也惟无蔽然后穷见至隐而极乎理也信其守者本乎纯极于理者发乎明纯与明是乃至古人之所至也至乎至文章功名从焉而不有之也伯寿嘉予言刻之于堂以自儆

沧浪亭记 苏舜钦

予以罪废无所归扁舟南游旅于吴中始僦舍以处时盛夏蒸燠土居皆褊狭不能出气思得高爽虚辟之地以舒所怀不可得也一日过郡学东顾草树鬱然崇阜广水不类乎城中并水得防径于杂花修竹之间东趋数百步有弃地纵广函五六十寻三向皆水也杠之南其地益阔旁无民居左右皆林木相亏蔽访诸旧老云钱氏有国近戚孙承祐之池馆也坳隆胜势遗意尚存予爱而裴回遂以钱四万得之构亭北碕号沧浪焉前竹后水水之阳又竹无穷极澄川翠干光影防合于轩户之间尤与风月为相宜予时榜小舟幅巾以往至则洒然忘其归觴而浩歌踞而仰啸野老不至鱼鸟共乐形骸既适则神不烦观无邪则道以明返思向之汨汨荣辱之场日与锱铢利害相磨戛隔此真趣不亦鄙哉噫人固动物耳情横于内而性伏必外寓于物而后遣寓久则溺以为当然非胜是而易之则悲而不开唯仕宦溺人为至深古之才哲君子有一失而至于死者多矣是未知所以自胜之道予既废而获斯境安于冲旷不与众驱因之复能于内外失得之原沃然有得笑闵万古尚未能忘其所寓自用是以为胜焉

待月亭记 刘牧

春卿刘侯监兵于兗之明年作新基侈旧亭于园池之廉名之曰待月一日燕賓友之酒三行客有长揖主人请问待月之命名答曰先是署有西园园有旧亭昔人尸之荒榛与并栖鸡于垣闲马于楹或寝以羊或宿以兵有风至止林籁少清有月来思池光不盈一日植足于园纵观而叹曰景物否闭久矣将祈泰于予乎繇是呼卒夫具畚掬輦糞秽鉏蒿茅一之日培竹与

松育美材也二之日浚池及泉养清德也三之日因池土以封其基四之日即亭材而广其构不役于民不扰于公以溃于厥成鲁山岩岩惠我苍翠鲁水汤汤遗予潺湲而又周公之宇仲尼之乡圣贤遗迹尽图于壁若有神物陰来相之咸疑化工私以与之夫亭以池迁尽能事也月以水鉴取善类也予今是亭西南去天空旷千尺不植草木为月之地若秋之夕夏之夜素魄初上纳于清池婵娟沦涟相与为一如金在镕如圭在磨忽忆湘江之流若洞庭之波登新亭对斯景发吾人浩歌则待月之名不曰当欵主人之词既毕客有举觞而言曰春卿吾闻士闲燕相与言则及仁与义又曰文武之道未坠于地在地人贤者志其遠者大者君今揭亭待清月宜乎礼贤材广賓友求仁义之说与文武之用内则思建明堂兴辟雍与三代之故事外则思复河湟平蓟壤绩唐汉之旧服用之则为事业为功名垂光册书不用之则有孚在道以畜其实与夫宴安之流游西园寝北堂同心而异志焉主人曰晋人善祷或讥轮奂周人落成祇美寝兴吾子博我以王道勤我以功名君之言古人不如顾谓牧曰先生业文为我书今日賓主之辞与亭成之歲月牧固不让云

宋文鉴卷七十八

卷七十九

钦定四库全书

宋文鉴卷七十九

宋吕祖谦编

记

王沂公祠堂记 刘敞

齐鲁虽皆称贵文学尚礼义之国然其俗亦与时升降小白右功力任权数则其敝多匿智伯禽尊尊亲亲至其衰也洙泗之间长防相与让其失盖以遠矣然仲尼称之曰齐一变至于鲁鲁一变至于道由此论之非明君贤师扶世导民孰能反其本哉五代之乱儒术废絶宋受命垂七十年天下得养老长防亡兵革之忧庶且富矣然未有能兴起庠序致教化之隆者也自齐鲁之间 诵阙然况其外乎丞相沂公之初守青也为齐人建学其后守郛也为鲁人建学繇是二国之俗始益知贵诗书之业而安其性之所乐老师宿儒防子童孙粲然自以复见三代之美礼让日兴刑罚日衰呜呼君子之盛德大业哉孔子所谓至于道者非耶沂公薨于郛且二十年郛人爱慕而悲思之僉曰不可使文正之德不享于世前太守钱公子飞闻之因即学宫而建祠堂以称士大夫之意钱公去位之五年堂乃成其广若干修若干崇若干凡皆钱公之素也甘棠之诗曰勿翦勿伐召伯所茇亦诸侯之正风哉叙其语于石以诏后世又作登歌一章并刻之云文武维周天命郅隆孰相其成周公太公周公冢宰太公尚父逊厥硕肤惠于齐鲁维此齐鲁圣贤之绪尊德乐道四方爰茹不振不竞靡则靡定既晦而明在我文正天子是毘诸侯是师赋政于外俾民不迷乃设学校乃敦诗书翼翼齐鲁若周之初二公之位文正履之二公之治文正以之周历千歳二公实使之文正之功后亦将似之徂徕之松新甫之柏我作此堂以告无斁

东平乐交池亭记 刘敞

古者诸侯虽甚陋必有苑囿车马钟鼓之好台池鸟兽鱼鼈之乐然后乃能为国非以虞意崇不急也以合士大夫交賓客贤者而同吏民也蟋蟀山枢车邻驷铁有駉之诗是已不然则覲覲者墨术也不侈于礼乐不暉于度数曰人我之养毕足而止亦瘠矣夫东平盖古之建国又有州牧连率之政于今为重其地千里其四封所极南则梁东则鲁北则齐三者皆大国也其土沃衍其民乐享其君子好礼其小人趋本其俗习于周公仲尼之遗风余教可驯以诗书而不可诡以朱墨诡以朱墨鄙矣郛故有负城之园其废盖久士大夫无所于游四方之賓客贤者无所于观吏民无所于乐殆失车邻驷铁有駉之美而况于蟋蟀山枢之陋敞以谓非敦诗书节礼乐之意也据旧造新筑之凿之扩之营之辟之有堂有台有池有榭有坞有亭有馆有

南北门堂曰燕誉台曰陈鳌池曰芹藻榭曰博野坞曰梧竹亭曰玩芳馆曰乐游南門曰舞咏北門曰熙春其制名也或主于礼或因于事或寓于物或谕于志合而命之以其地曰乐交所以与上下同乐者也其草木之籍松栝槐柏榆柳李梅桃梨枣栗栲栳石榴林檎木瓜櫻桃蒲萄太山之竹汶丘之篠峰阳之梧雍門之荻蒲圃之櫟孔林之楷香草奇药同族异名洛之牡丹吴之芍药芙蓉菱芡兰菊苢茆可玩而食者甚众孟子曰贤者而后乐此不贤者虽有不乐也吾其敢自谓贤乎抑亦庶几焉后世将必有追数吾过者矣吾请以此谢

先秦古器记 刘敞

先秦古器十有一物制作精巧有款识皆科斗书为古学者莫能尽通以它书参之廼十得五六就其可知者校其世或出周文武时于今盖二千有余歲矣嗟乎三王之事万不存一诗书所记圣王所立有可长太息者矣独器也乎哉兑之戈和之弓离磬崇鼎三代传以为寶非赖其用也亦云上古而已矣孔子曰多见而识之知之次也众不可盖安知天下无能尽辨之者哉使工模其文刻于石又并图其象以俟好古博雅君子焉终此意者礼家明其制度小学正其文字谱牒次其世諡廼为能尽之

澶州顿丘县重修县治记 江休复

王在在浚澶为北门重郭言言洪河浑浑矗为巨防扼为要津堤繇役作务莫大焉景德之元皇御戎轩翠华朝临虜骑宵奔讲言终驩行李便蕃賓客供给礼莫重焉总是二役郡守县令其职也朝廷殿最多课亦以此二者为先其米盐牒诉至纖至悉萃于县道则为令者又加难焉以是一切趋办而不遑其他唯吾从叔仲达为能推行而优为之且承平积久法网寢密监司操持羣下不得动摇吏亦便文诿事亡能往来溺于其职不克自振官寺陰顿寢堂防事至敝漏不可居莫敢一摇手其他可知矣仲达为邑宰于斯且期年职修事举顾而言曰昔人云堂上不粪则野草不除岂谓此邪先是河决商胡口因废观城县来入亟请于上取其故廩材木以营之由孔子庙以及防事下至于囿囿有造有因凡若干门垣墉壁茨凡若干工自经始至落成凡若干日在上者不以为过在下者不以为烦程功即事出于余力君子谓是役也不徒更爽垲避燥湿而已足以观政矣后之踵此位登此堂者有以知改作之自庶几继葺之俾勿坏

万安渡石桥记 蔡襄

泉州万安渡石桥始造于皇祐五年四月庚寅以嘉祐四年二月辛未讫功紮趾于渊酺水为四十七道梁空以行其长三千六百尺广丈有五尺翼以扶栏如其长之数而两之靡金钱一千四百万求诸施者渡实支海舍舟而徒易危以安民莫不利职其事卢锡王寔许忠浮图义波宗善等十有五人既成太守莆阳蔡襄为之乐合防饮而落之明年秋防召还京道繇是出因纪所作勒于岸左

谏院题名记 司马光

古者諫无官自公卿大夫至于工商无不得諫者汉兴以来始置官夫以天下之政四海之众得失利病萃于一官使言之其为任亦重矣居是官者当志其大舍其细先其急后其缓專利国家而不为身谋彼汲汲于名者犹汲汲于利也其间相去何遠哉天禧初真宗诏置諫官六员责其职事庆厯中钱君始书其名于版光恐久而漫灭嘉祐八年刻着于石后之人将厯指其名而议之曰某也忠某也许某也直某也曲呜呼可不惧哉

独乐园记 司马光

孟子曰独乐乐不如与人乐乐与少乐乐不如与众乐乐此王公大人之乐非贫贱者所及也孔子曰饭疏食饮水曲肱而枕之乐亦在其中矣顏子一簞食一瓢饮不改其乐此圣贤之乐非愚者所及也若夫鷓鴣巢林不过一枝偃防饮河不过满腹各尽其分而安之此乃迂叟之所乐也熙寧四年迂叟始家洛六年买田二十亩于尊贤坊北阙以为园其中为堂聚书出五千卷命之曰读书堂堂南有屋一区引水北流贯宇下中央为沼方深各三尺疏水为五派注沼中状若虎爪自北伏流出北阶悬注庭下状若象鼻自是分而为二渠绕庭四隅防于西北而出命之曰弄水轩堂北为沼中央有岛岛上植竹圆周三丈状若玉块揽结其杪如渔人之庐命之曰钓鱼庵沼北横屋六楹厚其墉茨以御烈日开户东出南北列轩牖以延凉飈前后多植美竹为清暑之所命之曰种竹斋沼东治地为百有二十畦杂蒔草药辨其名物而揭之畦北植竹方径丈状若碁局屈其杪交相掩以为屋植竹于其前夹道如步廊皆以蔓药覆之四周植木药为藩援命之曰采药圃圃南为六栏芍药牡丹杂花各居其二每种止植两本识其名状而已不求多也栏北为亭命之曰浇花亭洛城距山不遠而林薄茂密常苦不得见乃于园中筑台作屋其上以望万安輶轡至于太室命之曰见山台迂叟平日多处堂中读书上师圣人下友羣贤窥仁义之原探礼乐之绪自未始有形之前暨四达无穷之外事物之理举集目前所病者学之未至夫又何求于人何待于外哉志倦体疲则投竿取鱼执衽采药决渠灌花操斧剖竹濯热盥手临高纵目逍遥徜徉唯意所适明月时至清风自来行无所牵止无所梃耳目肺肠悉为已有踽踽焉洋洋焉不知天壤之间复有何乐可以代此也因合而命之曰独乐园或咎迂叟曰吾闻君子所乐必与人共之今吾子独取足于己不以及人其可乎迂叟谢曰叟愚何得比君子自乐恐不足安能及人况叟之所乐者薄陋鄙野皆世之所弃也虽推以与人人且不取岂得彊之乎必也有人肯同此乐则再拜而献之矣安敢專之哉

信州兴造记 王安石

晋陵张公治信之明年皇祐二年也奸彊怙柔隱拙发舒既政大行民以宁息夏六月乙亥大水公徙囚于高狱命百隶戒不共有常诛夜漏半水破城灭府寺包人民庐居公趋譙门坐其下敕吏士以桴収民鰥寡孤独老癯与所徙之囚咸得不死丙子水降公从賓佐按行隱度符县调富民水之所不至者夫钱户七百八十収佛寺之积材一千一百三十二不足则前此公所命出粟以佐材费于赈贫民者三十三人自言曰食新矣赈可以已愿输粟直以佐材费于是募人城水之所入垣郡府之缺考监军之室司理之狱营州之西北亢爽之墟以宅屯驻之师除其故营以时教士刺伐坐作之法故所无也作驿曰饶阳作宅曰回车筑二亭于南门之外左曰仁右曰智山水之所附也梁四十有二舟于两亭之间以通车徒之道筑一亭于州门

之左曰寔月吉所以属寔也凡为城垣九千尺为屋八以楹数之得五百五十二自七月甲午卒九月丙戌为日五十二为夫一万一千四百二十五中家以下见城郭室屋之完而不知材之所出见徒之合散而不见役使之及已凡故之所有必具其无也邇今有之公所以救灾补败之政如此其贤于世吏则逵矣今州县之灾相属民未病灾也且有治灾之政出焉施舍之不适哀取之不中元奸宿豪舞手以乘民而民始病矣吏乃始警然自得民相与诽且笑而不知也吏而不知为政其重困民多如此此予所以哀民而闵吏之不学也由是而言则为公之民不幸而遇害灾其亦庶乎无憾乎

扬州龙兴十方讲院记 王安石

予少时客游金陵浮屠慧礼者从予游予既吏淮南而慧礼得龙兴佛舍与其徒日讲其师之说尝出而过焉卑屋数十椽上破而旁穿侧出而视后则榛棘出人不见垣端指以语予曰吾将除此而宫之虽然其成也不以私吾后必求时之能行吾道者付之愿记以示后之人使不得私焉当是时礼方丐食饮以卒日视其居枵然余特戏曰姑成之吾记无难者后四年来曰昔之所欲为凡百二十楹赖州人蒋氏之力既皆成盖有述焉噫何其能也盖慧礼者予知其行谨洁学博而才敏而又卒之以不私宜成此不难也世既言佛能以祸福语倾天下故其降向之如此非徒然也盖其学者之材亦多有以动世耳今夫衣冠而学者必曰自孔氏孔氏之道易行也非有苦身窘形离性禁欲若彼之难也而士之行可一乡才足一官者常少而浮图之寺庙被四海则彼其所谓材者宁独礼耶以彼其材由此之道去至难而就甚易宜其能也呜呼失之此而彼得焉其有以也夫

桂州新城记 王安石

侂智高反南方出入十有二州而十有二州之守吏或死或不死而无一人能守其州者岂其材皆不足欤盖夫城郭之不设兵甲之不戒虽有智勇犹不能胜一日之变也唯天子亦以为任其罪者非独吏故特推恩褒广死节而一切贷其失职于是遂推选士大夫所论以为能者付之经略而尚书工部侍郎余公当广西焉寇平之明年蛮越接和乃大城桂州其木甃瓦石之材以枚数之至四百万有奇用人之力以工数之至二十余万凡所以守之具无一求而不给者焉以至和元年八月始作而以二年之六月成夫其为役亦大矣盖公之信于民也久而费之欲以卫其财劳之欲以休其力以故为是有大费与大劳而人莫或以为勤也古者君臣父子夫妇兄弟朋友之礼失则夷狄横而窥中国方是时中国非无城郭也卒于陵夷毁顿防灭而不救然则城郭者先王有之而非所以恃为存也及至喟然觉寤兴起旧政则城郭之修也又尝不敢以为后盖有患而图之无其具有其具而守之非其人有其人而治之非其法能以久存而不败者皆未之闻也故文王之起也有四夷之难则城于朔方而以南仲宣王之起也有诸侯之患则城于东方而以仲山甫此二臣之德 于其君于其为国之本末与其所先后可谓知之矣虑之以悄悄之劳而发之以赫赫之名承之以翼翼之勤而续之以明明之功卒所以攘夷狄而中国之全安者盖其君臣如此而守衛之有其具也今余公亦以文武之材当明天子承平日久欲补 立废之时镇抚一方修扞其民其勤于今与周之南仲仲山甫盖等矣是宜有纪也故其将吏相与谋而来取文将镂之城隅而以告后之人焉

张尚书画像记 苏洵

至和元年秋蜀人传言有寇至边边军夜呼野无居人妖言流闻京师震惊方命择帅天子曰无养乱无助变众言朋兴朕志自定外乱不作变且中起不可以文令又不可以武竞惟朕一两大吏孰能处兹文武之间其命往抚朕师乃惟曰张方平其人天子曰然公以亲辞不可遂行冬十一月至蜀至之日归屯军撤守备使谓郡县寇来在吾无尔劳苦明年正月朔旦蜀人相庆如他日遂以无事又明年正月相告留公像于净众寺公不能禁眉阳苏洵言于众曰未乱易治也既乱易治也有乱之萌无乱之形是谓将乱将乱难治不可以有乱急亦不可以无乱弛惟是元年之秋如器之欹未坠于地惟尔张公安坐于其旁颜色不变徐起而正之既正油然而退无矜容为天子牧小民不倦惟尔张公尔繄以生惟尔父母且公尝谓我言民无常性惟上所待人皆曰蜀人多变于是待之以待盗贼之意而绳之以绳盗贼之法重足屏息之民而以碓斧令于是民始忍以其父母妻子之所仰赖之身而弃之于盗贼故每大乱夫约之以礼殴之以法惟蜀人为易至于急之而生变虽齐鲁亦然吾以齐鲁待蜀人而蜀人亦自以齐鲁之人待其身若夫肆意于法律之外以威劫齐民吾不忍为也呜呼爱蜀人之深待蜀人之厚如公吾未始见皆再拜稽首曰然苏洵又曰公之恩在尔心尔死在尔子孙其功业在史官无以像为也且公意不欲如何皆曰公则何事于斯虽然于心有不释焉今夫平居闻一善必问其人之姓名与其乡里之所在以至于长短大小美恶之状甚者或诘其平生所嗜好以想见其为人而史官亦书之于传意使天下之人思之于心则存之于目存之于目故其思之于心也固繇此观之像亦不为无助苏洵无以诘遂为之记公南京人人为人慷慨有大节以度量雄天下天下大事公可属系之以诗曰天子在祚歲在甲午西人传言有寇在垣庭有武臣谋夫如云天子曰嘻命我张公公来自东旗纛舒舒西人聚观于巷于涂谓公暨暨公自于于公谓西人安尔室家母敢或讹讹言不祥往即尔常春尔条桑秋尔涤场西人稽首公我父兄公在西囿草木骈骈公宴其僚伐鼓渊渊西人来观祝公万年有女娟娟闺闼闲闲有童哇哇亦既能言昔公未来期女弃捐禾黍与与仓庾崇崇嗟我妇子乐此歲丰公在朝廷天子股肱天子曰归公敢不承作堂严严有庀有庭公像在中朝服冠纓西人相告无敢逸荒公归京师公像在堂

木山记 苏洵

木之生或蘖而殤或拱而夭幸而至于任为栋梁则伐不幸而风之所拔水之所漂或破折或腐幸而得不破折不腐则为人所材而有斧斤之患其最幸者漂沉汨没于湍沙之间不知其几百年而激射齧食之余或髣髴于山者则为好事者取去彊之以为山然后可脱泥沙而逵斧斤而荒江之濱如此者几何不为好事者之所见而为樵夫野人之所薪者何可胜数则其最幸者之中又有不幸者焉余家有三峰余每思之则恐其有数存乎其间且其蘖而不殤拱而不夭任为栋梁而不伐风拔水漂而不破折不腐不破折不腐而不为人之所材以及于斧斤出于湍沙之间而不为樵夫野人之所薪而后得至于此则其理似不偶然也然余爱之非徒爱其似山而又有所感焉非徒爱之而又有所敬焉余见中峯魁岸踞肆意气端重若有以服其旁之二峰二峰莊栗刻削凜乎不可犯虽其势服于中峯而岌然决无阿附意吁其可敬也夫其可以有所感也夫

吴郡州学六经阁记 张伯玉

六经阁诸子百家皆在焉不书尊经也吴郡州学始由高平范公经缉之至今尚书富郎中十年更八政学始大成而成年六经阁又建先时书籍草创未暇完缉防之后庀泽地污晦日滋散脱观者惻然非古人藏象魏拜六经之意至是富公始与吴邑长洲二大夫以学本之余钱僦之市材直公堂之南临泮池层屋起夏六月乙酉止秋八月甲申凡旬有七浹记庸千有二百作楹十有六栋三架雷八桷三百八十有四二户六牖梯衡棗棖圯墁陶甃称是祈于久故爽而不卑酌于道故文而不华经南向史西向子集东向标之以油素揭之以油黄泽然区处如蛟龙之鳞丽如日月之在纪不可得而乱矣判天地之极致皇王之高道生人之纪律举在是矣古者圣人之设教也知函夏之至广生齿之至众不可以颐解矣故教之有方导之有原乃本庠序之风师儒之说始于邦达于乡至于室莫不有学烜之以文物耸之以声明先用警策其耳目然后清发其灵腑故其习之也易其得之也深其教不肃而成不烦而治毆元元之入善域优而柔之俾自得之万世之后尊三王四代法者无他焉教化之本末驯渐也然则观是阁者知六经之在则知有圣人之道则知有朝廷之化知有朝廷之化则向方之心懋一日礼义之泽流于外 诵之声格于内其为恶也无所从其为善也有所归虽不欲徙善逵罪纳诸大和不可召康公之诗曰岂弟君子来游来歌子思子之说云布在方册人存则政举凡百君子繇斯道活斯民畅皇极序彝伦者舍此而安适得无尽心焉诸儒谓伯玉尝从事此州游学滋久宜刊乐石庶几永永无忽

分宁县云峰院记 曾 巩

分宁勤生而啬施薄义而善争其土俗然也自府来抵其县五百里在山谷穷处其人修农桑之务率数口之家留一人守舍行馐其外尽在田田高下饶腴随所宜杂殖五谷无废壤女妇蚕杼不懈人茶盐蜜纸竹箭材苇之货无有纖钜治咸尽其身力其勤如此富兼田千亩廩实藏钱至累岁不发然视捐一钱可以易死宁死无所捐其于施何如也视其间利害不能以稊米父母兄弟夫妇相去若奕碁然于其亲固然于义厚薄可知也长少族坐里闾相讲语以法律意向小戾则相告讦结党诈张事关节以动视听甚者画刻金木为章印摹文书以给吏立县庭下变伪一日千出虽笞扑徙死交迹不以属心其喜争讼岂比佗州县哉民虽勤而皆如是渐涵入骨髓故贤令长佐吏比肩常病其未易治教使移也云峰院在县极西无籍图不知自何时立景德三年邑僧道常治其院而侈之门闼靓深殿寝言言栖客之庐斋庖庠庾序列两旁浮图所用铙鼓鱼螺钟磬之编百器备完吾闻道常气质伟然虽索其学其归未能当于义然治生事不废其勤亦称其土俗至有余辄斥散之不为黍累计惜乐淡泊无累则又若能胜其啬施喜争之心可言也或曰使其人不汨溺其所学其归一当于义则杰眎邑人者必道常乎未敢必有庆历三年九月与其徒谋曰吾排蓬蒿治是院不自意成就如此今老矣恐泯泯无声界来人相与图文字买石刻之使永永与是院俱传何不可也咸曰然推其徒子思来请记遂来予不让为申其可言者宠嘉之使刻示邑人其有激也

仙都观三门记 曾 巩

门之作取备豫而已然天子诸侯大夫各有制度加于度则讥之见于易礼记春秋其旁三门门三涂惟王城为然老子之教行天下其宫视天子或过焉其门亦三之备豫之意盖本于易其加于度则知礼者所不能损知春秋者所太息而已甚矣其法之蕃昌也建昌军南城县麻姑山仙都观世传麻姑于此仙去故立祠在焉距城六七里由絶岭而上至其处地反平宽衍沃可宫可田其获之多与他壤倍水旱之所不能灾予尝视而叹曰岂天遗此以安且食其众使世之衍衍施施趋之者不已欤不然安有是邪则其法之蕃昌人力固如之何哉其田入既饶则其宫从而侈也宜庆历六年观主道士凌齐曩相其室无不修而门独卑曰是不足以称吾法与吾力遂大之既成托予记予与齐曩里人也不能辞噫为里人而与之记人之情也以礼春秋之义告之天下之公也不以人之情易天下之公齐曩之取予文岂不得所欲也夫岂以予言为厉已也夫

宋文鉴卷七十九

卷八十

钦定四库全书

宋文鉴卷八十

宋吕祖谦编

记

兜率院记 曾巩

古者为治有常道生民有常业若夫祝除髮毛禁弃冠环带裘不抚鋤耒机盍至他器械水土之物其时节经营皆不自践君臣父子兄弟夫妇皆不为其所当然而曰其法能为人祸福者质之于圣人无有也其始自汉魏传挟其言者浸淫四出抵今为尤盛百里之县为其徒者少几千人多至万以上宫庖百十大氏穹墉奥屋文衣精食舆马之华封君不如也古百里之国封君一人然而力殆不轻得足也今地方百里过封君者累百十飞竒钩货以病民民往往频伸而为涂中瘠者以此治教信让奚而得行也而天下若是盖几宫几人乎有司常錙百货之利细若蓬芒一无所漏失仆仆然其劳也而至于浮图人虽废如此皆置不问反倾府空藏而弃与之岂不识其非古之制也抑识不可然且固存之耶愚不能释也分宁县郭内外名为宫者百八十余所兜率院在治之西八十里其徒尤相率悉力以侈之者也其构兴端原有邑人黄庠所为记其后院主僧某又治其故而大之殿舍中严齐宫宿庖湢之房布列两序廐圉困仓以固以密资所以奉养之物无一而外求疏其事而来请记者其徒省懷也噫子之法四方人奔走附集者衍衍施施未有止也予无力以拒之独介然于心而掇其尤切者为是说以与之其使子之徒知己之飡利也多而人防病已甚且以告有司而谗其终何如焉

拟岘台记 曾巩

尚书司门员外郎晋国裴君治抚之二年因城之东隅作台以游而命之曰拟岘台谓其山谿之形拟乎岘山也数与其属与州之寄客者游而间独求记于予初州之东其城因大丘其隍因大谿其隅因客土以出谿上其外连山高陵野林荒墟遠近高下壮大閼廓怪竒可喜之观环抚之东南者可坐而见也然而雨隳潦毁盖藏弃委于榛藪葑草之间未有即而爱之者也君得之而喜增甃与土易其破缺去榛与草发其亢爽繚其横檻覆以高葢因而为台以脱埃气絶烦嚣出云气而临风雨然后谿之平沙漫流防风遠响与夫浪波汹涌破山拔木之奔放高桅劲舳沙禽水兽下上而浮沉者皆出乎履舄之下山之苍顔秀壁巖崖拔出挟光景而薄星辰至于平冈长陆虎豹踞而龙蛇走与荒蹊聚落树陰晦暖游人行旅隐见而继续者皆出乎衽席之内若夫云烟开敛日光出没四时朝暮雨暘明晦变化之不同则虽览之不厌而虽有智者亦不能穷其状也或饮者淋漓歌者激烈或靓观防步方皇徙倚则得于耳目与得之

于心者虽所寓之乐有殊而亦各适其适也抚非通道故贵人蓄贾之游不至多良田故水旱螟螣之菑少其民乐于耕桑以自足故牛马之牧于山谷者不収五谷之积于郊野者不垣而晏然不知枹鼓之警发召之役也君既因其土俗而治以简静得以休其暇日而寓其乐于此州人士女乐其安且治而又得游观之美亦将同其乐也故予为之记其成之年月日嘉祐二年之某月某日也

抚州顔鲁公祠堂记 曾 巩

贈司徒魯郡顔公諱真卿事唐为太子太师与其从父兄杲卿皆有大节以死至今虽小夫妇人皆知公之为烈也初公以忤杨国忠斥为平原太守策安祿山必反为之备祿山既举兵公与常山太守杲卿伐其后贼之不能直闚潼关以公与杲卿挠其势也在肃宗时数正言宰相不悦斥去之又为御史唐旻所构连辄斥李辅国迁太上皇居西宫公首率百官请问起居又辄斥代宗时与元载争论是非载欲有所壅蔽公极论之又辄斥杨炎卢杞既相德宗益恶公所为连斥之犹不满意李希烈防汝州杞即以公使希烈初慙其言后卒縊公以死是时公年七十有七矣天寶之际久不见兵祿山既反天下莫不震动公独以区区平原遂折其锋四方闻之爭奋而起唐卒以振者公为之倡也当公之开土门同日归公者十七郡得兵二十余万繇此观之苟顺且诚天下从之矣自此至公歿垂三十年小人继续任政天下日入于大盜继起天子辄出避之唐之在朝臣多畏怯观望能居其间一忤于世失所而不自悔者寡矣至于再三忤于世失所而不自悔者盖未有也若至于起且仆以至于七八遂死而不自悔者则天下一人而已若公是也公之学问文章往往杂于神仙浮图之說不皆合于理及其奮然自立能至于此者盖天性然也故公之能处其死不足以观公之大何则及至于势穷义有不得不死虽中人可勉焉况公之自信也欤维歷忤大奸颠跌撼顿至于七八而始终不以死生祸福为秋毫顾虑非笃于道者不能如此此足以观公之大也夫世之治乱不同而士之去就亦异若伯夷之清伊尹之任孔子之时彼各有义夫既自比于古之任者矣乃欲睠顾回隐以市于世其可乎故孔子恶鄙夫不可以事君而多杀身以成仁者若公非孔子所谓仁者欤今天子嘉祐元年尚书都官郎中知抚州聂君某尚书屯田员外郎通判抚州林君某相与慕公之烈以公之尝为此邦也遂为堂而祠之既成二君过予之家而告之曰愿有述夫公之赫赫不可盖者固不系于祠之有无盖人之向往之不足者非祠则无以致其至也闻其烈足以感人况拜其祠为亲炙之者欤今州县之政非法令所及者世不复议二君独能追公之节尊而事之以风示当世为法令之所不及是可谓有志者也

筠州学记 曾 巩

周衰先王之迹熄至汉六艺出于秦火之余士学于百家之后言道德者矜高遠而遺世用语政理者务卑近而非师古刑名兵家之术则狃于暴詐惟知经者为善矣又爭为章句训诂之学以其私见妄穿凿为說故先王之道不明而学者靡然溺于所习当是时能明先王之道扬雄而已而雄之书世未知好也然士之出于其时者皆勇于自立无苟简之心其取与进退去就必度于礼义及其已衰而搢绅之徒抗志于彊暴之间至于废錡杀戮而其操愈厉者相望于先后故虽有不軌之臣犹低徊沒世不敢遂其篡夺自此至于魏晉以来其风俗之 人材

之乏久矣以迄于今士乃有特起于千载之外明先王之道以寤后之学者世虽不能皆知其意而往往好之故习其说者论道德之旨而知应务之非近议政理之体而知法古之非迂不乱于百家不蔽于传疏其所知者若此此汉之士所不能及然能尊而守之者则未必众也故乐易敦朴之俗防而诡欺薄恶之习胜其于贫富贵贱之地则养廉远耻之意少而偷合苟得之行多此俗化之美所以未及于汉也夫所闻或浅而其义甚高与所知有余而其守不足者其故何哉繇汉之士察举于乡闾故不得不笃于自修至于渐摩之久则果于义者非彊而能也今之士选用于文章故不得不笃于所学至于循习之深则得于心者亦不自知其至也由是观之则上之所好下必有甚者焉岂非信欤令汉与今有教化开导之方有庠序养成之法则士于学行岂有彼此之偏先后之过乎夫大学之道将欲诚意正心修身以治其国家天下而必本于先致其知则知者固善之端而人之所难至也以今之士于人所难至者既几矣则上之施化莫易于斯时顾所以导之如何尔筠为州在大江之西其地僻绝当庆历之初诏天下立学而筠独不能应诏州之士以为病至治平三年盖二十有三年矣始告于知州事尚书都官郎中董君仪董君乃与通判州事国子博士郑君僭相州之东南得亢爽之地筑宫于上斋祭之室讲诵之堂休宿之庐至于庖湍库廩各以序经始于其春而落成于八月之望既而来学者常数十百人二君乃以书走京师请纪于予予谓二君之于政可谓知所务矣使筠之士相与升降乎其中讲先王之遗文以致其知其贤者超然自信而独立其中材勉焉以待上之教化则是宫之作非独使夫来者玩思于空言以干世取禄而已故为之着予之所闻者以为记而使归刻焉

齐州二堂记 曾巩

齐滨泺水而初无使客之馆使至则常发民调材木为舍以寓去则彻之既费且陋乃为之徙官之废屋为二堂于泺水之上以舍客因考其山川而名之盖史记五帝纪谓舜耕历山渔雷泽陶河滨作什器于寿丘就时于负夏郑康成释历山在河东雷泽在济阴负夏卫地皇甫谧释寿丘在鲁东门之北河滨济阴定陶西南陶丘亭是也以余考之耕稼陶渔皆舜之初宜同时则其地不宜相远二家所释雷泽河滨寿丘负夏皆在鲁卫之间地相望则历山不宜独在河东也孟子又谓舜东夷之人则陶渔在济阴作什器在鲁东门就时在卫耕历山在齐皆东方之地合于孟子按图记皆谓禹贡所称雷首山在河东泺水出焉而此山有九号历山其一号也余观虞书及五帝纪盖舜娶尧之二女廼居泺水则历山盖不同时而地亦当异世之好事者廼因泺水出于雷首迁就附益谓历山为雷首之别号不考其实矣由是言之则图记皆谓齐之南山为历山舜所耕处故其城名历山为信然也今泺上之北堂其南则历山也故名之曰历山之堂按图泰山之北与齐之东南诸谷之水西北汇于黑水之湾又西北汇于柏崖之湾而至于渴马之崖益水之来也众其北折而西也悍疾尤甚及至于崖下则泊然而止而自涯以北至于历城之西盖五十里而有泉涌出高或致数尺其旁之人名之曰趵突之泉齐人皆谓尝有弃糠于黑水之湾者而见之于此盖泉自渴马之崖潜流地中而至此复出也趵突之泉冬温泉旁之蔬甲经冬常荣故又谓之温泉其注而北则谓之泺水达于清河以入于海舟之通于齐者皆于是乎出也齐多甘泉冠于天下其显名者以十数而色味皆同以余验之盖皆泺水之旁出者也泺水尝见于春秋鲁桓公十有八年公及齐侯防于泺杜预释一在历城西北入济水自王莽时不能被河南而泺水之所入者清河也预盖失之今泺上之南堂

其西南则泝水之所出也故名之曰泝源之堂夫理使客之馆而辨其山川者皆太守之事也故为之识使此邦之人尚有考也

道山亭记 曾 巩

闽故 周者七至秦开其地列于中国始并为闽中郡自粤之太末与吴之豫章为其通路其路闽者陆出则阨于两山之间山相属无间断累数驿乃一得平地小为县大为州然其四顾亦山也其涂或逆坂如缘絙或垂崖如一髮或侧径钩出于不测之谿上皆石芒峭发择地然后可投步负戴者虽其土人犹侧足然后能进非其土人罕不蹶也其谿行则水皆自高泻下石错出其间如林森立如士骑满野千里下上不见首尾水行其隙间或衡缩繆糅或逆走旁射其状若蚓结若虫镂其旋若轮其激若矢舟泝防者投便利失毫分輒破溺虽其土长川居之人非生而习水事者不敢以舟楫自任也其水陆之险如此汉尝处其众江淮之间而虚其地盖以其陋多阻岂虚也哉福州治候官于闽为土中所谓闽中也其地于闽为最平以广四出之山皆遠而长江在其南大海在其东其城之内外皆涂旁有沟沟通潮汐舟载者昼夜属于门庭麓多桀木而匠多良能以屋室钜丽相矜虽下贫必丰其居而佛老子之徒其宫又特盛城之中三山西曰闽山东九僊山北曰粤王山三山者鼎趾立其附山盖佛老子之宫以数十百其环诡殊絕之状盖已尽人力光禄卿直昭文馆程公为是州得闽山嵌峯之际为亭于其处其山川之胜城邑之大宫室之荣不下簟席而尽于四瞩程公以谓在江海之上为登览之观可比于道家所谓蓬莱方丈瀛洲之山故名之曰道山之亭闽以险且遠故仕者常憚往程公能因其地之善以寓其耳目之乐非独忘其遠且险又将抗其思于埃 之外其志壮哉程公于是州以治行闻既新其城又新其学而其余功又及于此盖其歲满就更广州拜谏议大夫又拜给事中集贤殿修撰令为越州字公辟名师孟云

霍丘县驿记 王 回

天下昔初国之时君民各久其安而城郭道路关梁庠馆尤严于賓客之事凡国之地大不过百里而皆领于天子之诏以待巡狩之所适其歲时使人存頼若归賑贺庆致饗之来则又有四邻之交朝覲防同聘问之集车马人徒之役纵横而信宿者盖无虚国而受馆之礼自畿内达于海隅设官备物候迓时谨故虽防山涉水荒陋遐僻之城具宗庙社稷者一不敢缺焉有不能然者君子讥之谓之失政不可以为国也自天下更为郡县守宰以考秩代居民始不安其常而先王之礼所以浹于政事而尤严于賓客者亦因以废怠陵夷且千歲及今则驿舍之设止于当路州县驿递所过足以供给应有司之令而已然犹不敢稍张其制度一有异于其间则众反讥之以为苟悦使客市恩意非政之急吏既不得久于其秩而思脱讥以滿去故天下之驿虽当路所设应有司之令者往往圯而不完至于岐旁它县则无敢唱兴之者霍丘故蓼邑也今县属寿丘治霍丘距京师八百里境内所包若千里比而环者七州七州之途皆由于驿以达于寿霍丘居最径然独无驿每使客之过者无所归宿则弛盖偃节混于逆旅或寓其孥于浮屠氏之馆仓卒偪仄而无以自表于民今知县事大理寺丞谢侯续之至也叹曰吾为地主于此岂可以不知士大夫之辱吾闻古之为政盖莫不笃于賓客者非苟相悦所以相养以礼而戴天子之命也今吾邑虽陋亦古之建国傳其城郭社稷而地大益近曾不及有一

馆为士大夫之礼不已俭乎虽众口之讥吾从古也莫吾疚也于是相其署之东偏面通衢之防始筑馆焉用若干日立屋若干间而门堂室庑庖井廩库至于器皿百湏无不具而用不伤于财役不劳于民也既成名之曰蓼驿取古封国之号益所以自见其志而以状属回子其为我书之刻诸石以告于后之人勿废予曰推古之事而叹今为之难也非发愤好礼果于从政者谁能为之书传于后之人庶几其卒勿废焉

建昌军景德寺重修大殿弥陀阁记 李泰伯

儒失其守教化坠于地凡所以修身正心养生送死举无其柄天下之人若饥渴之于饮食苟得而已当是时也释之徒以其道鼓行之焉往而不利无思无为之义晦而心法胜积善积恶之诚泯而因縁作空假中则道器之云戒定慧则明诚之别至于虞祔练祥春秋祭祀之仪不竞则七日三年地狱劫化之辩亦随而进蕃衍光大繄此之由故嗣迦叶者师子达摩流为东山牛头传龙树者惠文惠思炽乎天台灌顶二家之学并用于世若夫律戒之盛凡出家者当由此涂按白居易抚州景云寺律和尚碑文如来十弟子中优波离善持律波离灭南岳大师得之南岳灭景云大师得之师南城人初 景云寺徙洪州龙兴终庐山东林度男女万五千人姜相国公辅顔太师真卿本道廉使杨憑韦丹皆与友善乐天之叙如此南城于宋为建昌军景云为景德寺律和尚之迹已无见土木之坚久者唯殿与门殿之制不靡而其材良乃今所无基高而旁羸入风雨者四面如一将恐腐折后难为功寺僧义明乃营屋若干柱以翼之且作弥陀阁于其前右兼壮与丽为永永计先共谋者文宪宗正既而宪住他院正亦遂辍克有终者推明殿之财集于众阁成于孀何氏始卒凡八年明讲经论颇熹事以雅于予来乞文因论释之所由兴亦使其徒知此寺昔尝有僧为律戒师于江之南度人以万数当世贤者与之游以为寺之荣而有所慕焉

袁州学记 李泰伯

皇帝二十有三年制诏州县立学惟时守令有哲有愚有屈力单虑只顺德意有假宫僭师苟具文书或连数城亡诵 声倡而不和教尼不行三十有二年范阳祖君某知袁州始至进诸生知学官阙状大惧人材放失儒效阔疏亡以称上防通判颖川陈君某闻而是之议以克合相旧夫子庙陋隘不足改为廼营治之东北隅厥土燥刚厥位面阳厥材孔良瓦甍黝垩丹漆举以法故殿堂室房庑门各得其度百尔器备并手偕作工善吏勤晨夜展力越明年成释菜且有日盱江李覲谗于众曰惟四代之学攷诸经可见已秦以山西鏖六国欲帝万世刘氏一呼而关门不守武夫健将卖降恐后何也诗书之道废人唯见利而不闻义焉耳孝武乘丰富世祖出戎行皆孳孳学术俗化之厚延于灵献草茅危言者折首而不悔功烈震主者闻命而释兵羣雄相视不敢去臣位尚数十年教道之结人心如此今代遭圣神尔袁得贤君俾尔由庠序践古人之迹天下治则谭礼乐以陶吾民一有不义犹当仗大节为臣死忠为子死孝使人有所法且有所赖是惟朝家教学之意若其弄笔墨以徼利达而已岂徒二三子之羞抑为国者之忧此年实至和甲午夏某月甲子记

义田记 钱君倚

范文正公苏人也平生好施与择其亲而贫疎而贤者咸施之方贵显时置负郭常稔之田千亩号曰义田以养济羣族之人日有食歳有衣嫁娶婚葬皆有贍择族之长而贤者主其计而时其出纳焉日食人一升歳衣人一缣嫁女者五十千再嫁者三十千娶妇者三十千再娶者十五千葬者如再嫁之数葬幼者十千族之聚者九十口歳入给稻八百斛以其所入给其所聚沛然有余而无穷仕而家居俟代者与焉仕而居官者罢其给此其大较也初公之未贵显也尝有志于是矣而力未逮者三十年既而为西帅及参大政于是始有禄赐之入而终其志公既歿后世子孙修其业承其志如公之存也公既位充禄厚而贫终其身歿之日身无以为敛子无以为防惟以施贫活族之义遗其子而已昔晏平仲敝车羸马桓子曰是隐君之赐也晏子曰自臣之贵父之族无不乘车者母之族无不足于衣食者妻之族无冻馁者齐国之士待臣而举火者三百余人以此为隐君之赐乎彰君之赐乎于是齐侯以晏子之觴而觴桓子予尝爱晏子好仁齐侯知贤而桓子服义也又爱晏子之仁有等级而言有次第也先父族次母族次妻族而后及其疏遠之贤孟子曰亲亲而仁民仁民而爱物晏子为近之今观文正公之义田贤于平仲其规模遠举又疑过之呜呼世之都三公位享万钟禄其邸第之雄车輿之饰声色之多妻孥之富止乎一已而已而族之人不得其门而入者岂少哉况于施贤乎其下为卿大夫为士廩稍之充奉养之厚止乎一已族之人瓢囊为沟中瘠者岂少哉况于他人乎是皆公之罪人也公之忠义满朝廷事业满边隅功名满天下后必有史官书之者予可无録也独高其义因以遗于世云

宋文鉴卷八十

卷八十一

钦定四库全书

宋文鉴卷八十一

宋吕祖谦编

记

庆州大顺城记 张载

庆历二年某月某日经略元帅范公仲淹镇役总若干建城于柔远寨东北四十里故大顺川越某月某日城成汴人张载谨次其事为之文以记其功词曰兵久不用文张武纵天警我宋羌蠹而动恃地之彊谓兵之众傲侮中原如抚而弄天子曰嘻是不可舍养奸纵残何以令下讲谟于朝讲士于野鋹刑斧诛选付能者皇皇范侯开府于庆北方之师坐立以听公曰彼羌地武兵劲我士未练宜勿与竞当避其彊徐以计胜吾观寨口有田其中贼骑未迹卯横午纵余欲连壁以御其冲保兵储粮以俟其穷将吏掾曹军帅卒走交口同辞乐赞公命月良日吉将奋其旅出卒于营出器于府出币于帑出粮于庾公曰戒哉无败我举汝砺汝戈汝鋹汝斧汝干汝诛汝勤汝与既戒既言遂及城所索木箕土编绳奋杵胡虏之来百十其至自朝及辰众积我倍公曰无哗是亦何害彼奸我乘及我未备势虽不敌吾有以恃爰募彊弩其众累百依城而阵以坚以格戒曰谨之无鬪以力去则勿追往终我役贼之逼城伤亡无数谟不我加因溃而去公曰可矣我功汝全无怠无遽城之惟坚劳不累日池陴以完深矣如泉高焉如山百万雄师莫可以前公曰济矣吾议其旋择士以守择民而迁书劳赏才以饫以筵图列而止荐闻于天天子曰嗟我嘉汝贤锡号大顺因名其川于金于汤保之万年

渑池县新沟记 赵瞻

渑掖岩嵌面谿汇土著市列盘互回附崱大霖潦注邑中途湍楔涛鬻浸淫奔射自道距岐以派于剧衢康逵已乃泄于川邑之民行者表深居者附高木拥枪累綯防倍扉以易厥承习生常恬不怪憚吏耽耽第养威堂皇上坐广卧安乌即民谋由此故城中地浸久注蚀澹为坎窞车踣马跌冤喷载路及大理丞侯君为县凡民病政蠹饕剔洁居又明年遑恤及是迹所源流虑所经歴决邑之北偏曰魏家防濬仞夷洒并偶而东顺达于谿锺田千有二百步平钱十有三万僦佣三千功农愿售地市愿输金役愿顾直工一月已既而雨作水循故道趣于新沟曼衍转注支合脉湊如避善政如伏严威激流涌进不溃厓岸贾族侈肆民家按堵所利者博其千万年不弛侯君属予使谨其歲月夫君子何虑而不及于民春秋左氏传曰启塞从时则违时僇工犹趣兴役况是作也不掠农力吕纪月令曰时雨将降道达沟渎开道路无有障塞则葺旧补敝犹为按职况是举也揭为长利彼以经传用吾民予岂敢不书谨记曰今上

二十三年冬十月某朔某日甲子河南澠作新沟庶史氏有继夫迁河渠书固沟洫志者当着予记

登州新造纳川亭记 章望之

人与天地并生而异道能周而为变化者一气也天地之气不舒则四时五纬与山川水土举失其常人之气不舒则思虑塞而精神有遗百疾于是乎生故君子所乐奉者天地之大大而高莫如山岳大而深莫如河海其间又有禽兽草木之所蕃鼃鼃鱼鼃之所错秘怪神异之所储珠玉寶藏之所产世之百物莫不具诸是以高深之地君子乐之以其能开人思虑泰人精神盖耳目广则聪明豁尔不然何以孔子登东山而小鲁登泰山而小天下哉故遇西子然后知世无美色享太牢然后知世无珍味闻箫韶然后知世无至音觀海岳然后知世无大物古之君子务见博而知遠者以此吉州刺史刘侯涣之为登州也为纳川亭于城之北隅以地濱于海言此所以容受百川也广狭得中奢俭得宜役不劳而事不烦其可以为寓目适心之地殆无与亢者岂非助大丈夫胸臆之一端欤侯有文武长材济之以刚正凛然有不可夺之风尝入居清要出总繁重皆赫着能名今之作斯亭以壮郡国游观之胜以资賓客宴飧之盛暇日则命戎旅习水战以无忘戒备其动翼如其静肃如于是王人朝士之出是涂莫不交口咏其交實接下之和美其忠奉朝廷之勤异日侯去为天子股肱知必能以兴作之心充斥其行事

清溪亭记 王安国

清溪亭临池州之溪上 军府事判官之府而京兆杜君之为判官也筑于治平三年某月某甲子而成于某月某甲子于是州之士乐之而相与语曰夫吴楚荆蜀闽越之徒出入于是而离离洞庭鄱阳之水浮于日月之无穷四方万里之人飞帆鼓楫上下于波涛之中犯不测之险于朝暮之际而吾等乃于数楹之地得伟丽之观于寢食坐作之间是可喜也若夫峙閶闔之万家于千峰之缭绕朝阳曈曈破氛雾于巘岷缥缈之石而水摇山动于玲珑窈窕之林烟云之灭没风雨之晦冥天之所变随于人之动息者也阳辟而陰阖草萌而木芽霏红縹紫映烛而低昂与夫美蔭交而鸟兽嬉野潦収而洲渚出水崖雪壑桑落之墟景象之盛衰见于四时之始终而隐显不匿乎一席之俯仰然后知呼吸于天地之气而驰骛偃伏出有入无者孰使然哉览于是者宜有以自得而人不吾知也君曰夫愈其形于事者宜有以佚其劳賡其视听之喧嚣则必之乎空旷之所然后能无患于晦明吾是以知之间隙携其好于此而徜徉以毕景飞禽之啁啾怒浪之汹涌渔蓬樵屨啸于前而歌于后孰与夫讼诉笞答之声交于吾耳也岸帻穿屨 歌而诗书投壶饮酒谈古今而忘賓主孰与夫擎蹠折旋之容接于吾目也凡所以好其意者如此而又以为夫居者厌于局束行者甘于憇休人情之所同而吏者多以为我不能久于处也室庐有忽不治者又况宴游之设乎俗陷于不恕而万事之陵夷往往以此吾疾之久矣而亭之所以作也噫推君之意可谓贤矣吾为之记曰夫智足以穷天下之理则未始玩心于物而仁足以尽己之性则与时而不遗然则君之意有不充于是欤余未尝游于君而吾弟和甫方为之僚乃因和甫请记而为之记者临川王安国

邢州尧山县令防壁记 沈括

地方百里听事于庭者万家上不得専达于天子下不得賓养国中之善士其官谓之县令其秩不得齿于天子之下士静牵动违势如槁毛士能得志于斯亦可谓贤矣其选既轻故民未尝厚望于吏吏之自期亦以此则因谓之治岂所谓治者耶吾王君圣美之为尧山不以其轻者入于心而犹为其所难剥槌断裂之故不得行皎明察深矫厉之名不立而下皆有以相先不暴而争肆耕而饱食事益不至县令之庭县既已空无事乃治其所居之堂凡前后之共为此邑者不忍其人没而不彰则又纳其壁中以县令之题名予客过赵魏之郊问其故家旧俗皆慨然喜言三晋战国之事自七国之时赵数窘秦人于两河之间秦方强天下所惮独在赵故赵常受兵为天下劲国其后四分以为代魏燕赵踣漳南蹶上党肩尻顿偃不能相支而邯郸钜鹿穿裂摧坏兽惊鸟决独当四方之锋其人生而知有战鬪攻掠之备习闻而成风者已久而不可迁虽当积安无事之日其天性固以异于他俗此宜治之甚难而圣美摩抚调养之既成则又推之于前后之人若无心于得失者宜乎民安之不难矣圣美以嘉祐六年得尧山于其将去使来求记于予则治平元年也

七门庙记 刘敞

嘉祐二年予为庐州从事始以事至舒城观所谓七门三堰者问其居人其溉田几何对曰凡二万顷考于圖書实魏扬州刺史刘馥所造自魏至今七百有余歲云予于是叹美其功后二年校书郎包君廓为县主簿尝与予语及之包君谓予曰馥信有功然吾问于耆老而得羹颺侯信焉初汉以龙舒之地封信为列侯信廼为民畎浍舒何以广溉浸信为始基至馥时废而复修耳昔先王之典有功及民则祀之若信者抑可谓有功者乎然吾恨史防之有遗而吾怜舒人之不忘其思也今我将为侯庙祀之而以馥配子幸为我记之焉予因曰诺顷之包君以书告曰庙谨毕事予曰昔高帝之起宗昆弟之有才力者贾以征伐显交以出入传命谨信为功此二人者裂地为王连城数十代王喜以弃国见省而子濞亦用力战王吴独信区区仅得封侯而能勤心于民以兴万世之利其爱惠岂与贾濞相侔哉夫攻城野战灭国屠邑是二三子之所谓能杀人者也与夫辟地垦土使数十万之民世世无饥馑之患所谓善养人者于以相譬犹天地之悬絶也然而贾濞以功自名信不见録岂杀人易以快意养人不见形象哉周公之书曰民功曰庸借使信生当周公之世其受赏非贾濞之所敢望矣虽然彼贾濞之死泯灭无闻久矣而信至今民犹思而记之此所谓得乎丘民而世之宠禄当时则荣歿则已焉者乎夫事有可继君子继之不必其肇于已而后为功也若刘刺史起于三国乱亡之余蒸庶扫地顾独以农为先事功一立迄今长存虽曰修旧是可谓功矣予既嘉包君之能徇于民使侯信之美不忘又其建祀合于先王之法于是书之

泰州玩芳亭记 刘敞

楚辞曰惜吾不及古之人兮吾谁与玩此芳草自诗人比兴皆以芳草嘉卉为君子美德无与玩者犹易井渫不食云尔海陵郡城西偏多乔木大者六七寻杂花桃李山樱丁香椒棣数十种萱菊薜荔莎芦芭蕉丛植櫓生负城地尤良宋氏居之益种修竹梅杏山茶橙梨异方奇卉

往往而在清池荣洄多菱莲苹藻于是筑室城隅下临众卉氏曰玩芳于乎乔木森耸百歲之积也众卉行列十歲所植也杂英纷糅终歲之力也俄而索之不易得也天施地生非为已役也能者取玩焉能主客也惠而不费莫相德也非易所叹渫而不食为心恻也于是刻石亭右以记歲月云

新修东府记 陈 绎

中书政事本也宰相三公官也官不必备唯其人匪其人不居且体貌大臣礼重而莊物采显庸宜备而称岂曰私其人哉盖所与坐而论道不下席而致太平之功者二三执政而已国朝以来尚袭唐故大臣多不及建里第而僦居民间至距城数里之外东西南北回远不相接也四方奏书缓急报闻吏卒持走徧歷诸第一有漏露稽违死亡其可逮乎而又暑寒雨风晨趋暮还輿衛骑呵导从前后搢绅士大夫造请纷驰于里巷坊曲之隘甚非尊严体貌之观也今禁衛三帅率有公廨庶官省寺亦或有居而独大臣不列府舍每朝则待漏阙门之次入则议政殿上退即听事羣有司公见请白可否少休吏史抱文书环几案左右颀颀以进至日下昼数刻始归夫以王城輶轂之大其制度之阙如此乃出圣画新刼二府亲遣中人度地于阙之西南轮广方制房皇钩折绘圖以闻即刊定于禁中申命三司飭吏诸司计工程材役不妨时费不病官自熙宁三年秋七月兴作东西府凡八位总千二百楹明年秋八月东府四位成诏知制诰臣绎为之记臣拜手稽首以书十月工实之次谨按三代盛王繇礼义之政至于周而大备文章典刑物采位叙炜然见于朝廷之表公卿内外居有室宅上不为过侈下不为苟约出则宠之淑旂龙章钩膺之驾入则具之列鼎蒲筵纷纯之居仰而视其宫则有棖题之袭密俯而摄其衣则有袞舄之严丽且谓不如是不足以待其人非其人不足以相天下之政故其取予屈舒厚薄等衰一谓之天秩先王之泽既竭能道古人之言者起以其私学蔽尚迷谬世俗虽有志之主厌然而所慕者不过耳目之所习响响而望其下者益卑西汉去治世未远开丞相府四出门无阑不设铃不惊鼓深大宏远无有限节郡国守长吏得以歲上计事国有大议车驾亦亲幸而临听焉然其议不过军功武爵期防督责之故至于东汉仍建公府苍龙阙东偏其制度虽存而称号不复于当时盖用人授位出于一切其烦文虚器隆杀存亡者亦无足以系政事之重轻宋兴之初平定四方烜耀神武遂一字内颇用战勲伐阅将帅之人浸久而安生民乐嬉百年之间轨迹运行将臣相臣夜寐夙兴罔敢有懈皇帝临位躬揽权纲显白训义图惟先王治理之实置府设属大放古制文武弛张名器有等大小尊卑靡不遵序夫名者礼之分也位者处其名之器也名既正然后任责之理得而百事修明名不正则任责之理废而百事隳必使望其器可以知其职可以知其人书曰股肱喜哉元首起哉百工熙哉是繇天子任大臣以道而率作兴事罔不喜乐赓歌卒起乎治功之隆盖君臣防遇千載之甚盛德也若乃圣作物觀宣耀典训垂万世之丕则考不磨之斯文其不在二府之制而在道德之意乎

新修西府记 陈 绎

唐初典兵禁中出于帷幄之议故以机密名官开元中设堂后五房而机密自为一司其职秘独宰相得知舍人官属无得预也正元之后藩镇旅拒重以兵属人乃中官分领左右神策军

而枢密之职归于北司然尝寄治省寺庑下延英防议则屏立殿西势犹厌厌传道宫省语而已至其盛时其贵者号中尉次则枢密使皆得贴黄除吏唐末既除北司并南北军于枢密使遂总天下之兵五代以来多以武人领使而宰相知院事国朝复置副贰签书直学士之名大略文武参用间以宰相兼领之故得进退大吏预闻机政其任职盖重矣古之公卿入则相与谋于朝出则相与谋于家冢宰膳夫之政不至于耳目而天下四方之事每得于燕处之际故其为之不劳而日常若有余今未明而入进见请决于陛席之前退而百执事叩阁禀事吏持书奏周走閤巷终日不得与二三大臣谋求若古人之春客有余势固不行也熙宁三年诏营两府于掖城之南其任枢密使者为西府于是有司知上之所以优隆大臣将以修天下之政于堂陛之下莫不率职底功士献其能工致其才不周歲而告成臣谨按枢密司马之职事而周制属于夏官秦汉曰太尉亦冠将军之号禄比丞相置官属掌兵武夫善用兵者使之至于无兵善治兵者治之于无事然后天子之威刑震耀偃然懔折于万里之外噫非二三大臣曷以哉若夫仰而登则恩见于棖梧俯而宴则体见于阶陛周旋指顾无非上之致隆于己者则其所以享宠而居是者可无思乎

临湘县阅武亭记 刘 摯

秘书丞衡君塾字文叔治岳州临湘之二年以书谓余曰使天下不如古吾知其有人焉谋已而偷者固漫不省利害及夸而高言又曰吾方志遠大彼细务 乌足为二人者相与从事积微浸着天下頽政何可胜数吾则不敢吾之邑右带长江南东地大倚山民慄猾轻为盗既慙古人不能使民不为盗又不知禁其已然尚曰为政耶县所赖以索盗有所谓弓手者今在吾籍八十人前时听其便私散居防间呼调不一难以应猝及去而扰平民今吾能不取官与民作区屋以萃之凡若干据以大亭榜曰阅武以时临视其艺众既团 有地稍稍就律其材渐若可用而无里巷哗竞犯法之患此县令小事非以为功然愿有纪告来者使勿废而已呜呼余知君不好小事名也虽然罔忽诸小然后可以任夫大俾天下得县令皆用心犹此循而望古有路矣即以其所以谓余者书之亭上

宋文鉴卷八十一

卷八十二

钦定四库全书

宋文鉴卷八十二

宋吕祖谦编

记

墨君堂记 苏轼

凡人相与号呼者贵之则曰公贤之则曰君自其下则尔汝之虽公卿之贵天下貌畏而心不服则进而君公退而尔汝者多矣独王子猷谓竹君天子从而君之无异辞今与可又能以墨象君之形容作堂以居君而属余为文以颂君德则与可之于君信厚矣与可之为人也端静而文明哲而忠士之修絜博习朝夕磨治洗濯以求交于与可者非一人也而独厚君如此君又疎简抗劲无声色臭味可以娱悦人之耳目鼻口则与可之厚君也其必有以贤君矣世之能寒燠人者其气焰亦未至若雪霜风雨之切于肌肤也而士鲜不以为欣戚防其所守自殖物而言之四时之变亦大矣而君独不顾虽微与可天下其孰不贤之然与可独能得君之深而知君之所以贤雍容谈笑挥洒奋迅而尽君之德雅状枯老之容披折偃仰之势风雪凌厉以观其操崖石荦确以致其节得志遂茂而不骄不得志瘁瘠而不辱羣居不倚独立不惧与可之于君可谓得其情而尽其性矣余虽不足以知君愿从与可求君之昆弟子孙族属朋友之象而藏于吾室以为君之别馆云

净因院画记 苏轼

余尝论画以为人禽宫室器用皆有常形至于山石竹木水波烟云虽无常形而有常理常形之失人皆知之常理之不当虽晓画者有不知故凡可以欺世而取名者必托于无常形者也虽然常形之失止于所失而不能病其全若常理之不当则举废之矣以其形之无常是因其理不可不谨也世之工人或能曲尽其形而至于其理非高人逸才不能辨与可之于竹石枯木真可谓得其理者矣如是而死如是而孳拳瘠蹙如是而条达遂茂根茎节叶牙角脉缕千变万化未始相袭而各当其处合于天造厌于人意盖达士之所寓也欤昔岁尝画两丛竹于净因之方丈其后出守陵阳而西也余与之偕别长老道臻师又画两竹梢一枯木于其东斋臻方治四壁于法堂而请于与可与可既许之矣故余并为记之必有明于理而深观之者然后知余言之不妄

李氏山房藏书记 苏轼

象犀珠玉怪珍之物有悦于人之耳目而不适于用金石草木丝麻五谷六材有适于用而用之则取之则竭悦于人之耳目而适于用用之而不取之而不竭贤不肖之所得各因其才仁智之所见各随其分才分不同而求无不获者惟书乎自孔子圣人其学必始于观书当是时惟周之柱下史聃为多书韩宣子适鲁然后见易象与鲁春秋季札聘于上国然后得闻诗之风雅颂而楚独有左史倚相能读三坟五典八索九丘士之生于是时得见六经者盖无几其学可谓难矣而皆习于礼乐深于道德非后世君子所及自秦汉以来作者益众纸与字画日趋于简便而书益多世莫不有然学者益以苟简何哉余犹及见老儒先生自言其少时欲求史记汉书而不可得幸而得之皆手自书日夜读诵惟恐不及近岁市人转相摹刻诸子百家之书日传万纸学者之于书多且易致如此其文词学术当倍蓰于昔人而后生科举之士皆束书不观游谈无根此又何也余友李公择少时读书于庐山五老峰下白石庵之僧舍公择既去而山中之人思之指其所居为李氏山房藏书凡九千余卷公择既已涉其流探其源采剥其华实而咀噍其膏味以为己有发于文词见于行事以闻名于当世矣而书固自如也未尝少损将以遗来者供其无穷之求而各足其才分之所当得是以不藏于家而藏于其故所居之僧舍此仁者之心也余既衰且病无所用于世惟得数年之闲尽读其所未见之书而庐山固所愿游而不得者盖将老焉尽发公择之藏拾其余弃以自补庶有益乎而公择求余文以为记乃为一言使来者知昔之君子见书之难而今之学者有书而不读为可惜也

眉州遠景楼记 苏轼

吾州之俗有近古者三其士大夫贵经术而重氏族其民尊吏而畏法其农夫合耦以相助盖三代汉唐之遗风而他郡之所莫及也始朝廷以声律取士而天圣已前学者犹袭五代文独吾州之士通经学古以汉文词为宗师方是时四方指以为迂濶至于郡县胥吏皆挟经载笔应对进退有足观者而大家显人以门族相上推次甲乙皆有定品谓之江乡非此族也虽贵且富不通婚姻其民事太守县令如古君臣既去辄画像事之而其贤者则记录其行事以为口实至四五十年不忘商贾小民常储善物而别异之以待官吏之求家藏律令徃徃通念而不以为非虽薄刑小罪终身有不敢犯者岁二月农事始作四月初吉谷稚而草壮耘者毕出数十百人曹立表下漏鸣鼓以致众择其徒为众所异信者二人一人掌鼓一人掌漏进退作止惟二人之听鼓之而不至至而不力皆有罚量田计功终事而防之田多而丁少则出钱以偿众七月既望谷艾而草衰则仆鼓决漏取罚金与偿众之钱买羊豕酒醴以祀田祖作乐饮酒醉饱而去岁以为常其风俗盖如此故其民皆聪明才智务本为常力作易治而难服守令始至视其语言动作辄了其为人其明且能者不复以事试终日寂然苟不以其道则陈义秉法以讥切之故不知者以为难治今太守黎侯希声轼法君子之友人也简而文刚而仁明而不苛众以为易事既满将代不忍其去相率而留之上不夺其请既留三年民益信遂以无事因守居之北牖而增筑之作遠景楼日与賓客僚吏游处其上轼方为徐州吾州之人以书相徃来未尝不道黎侯之善而求文以为记嗟夫轼之去乡久矣所谓遠景楼者虽想见其处而不能道其详矣然州人之所以乐斯楼之成而欲记焉者岂非上有易事之长而下有易治之俗也哉孔子曰吾犹及史之阙文也有马者借人乘之今亡矣夫是二者于道未有大损益也然且录之今吾州近古之俗独能累世而不迁盖耆老昔人岂弟之泽而贤守令抚循教诲不倦之力也可不录乎若夫登临览观之乐山川风物之美轼将归老于故丘布衣幅巾从

邦君于其上酒酣乐作援笔而赋之以颂黎侯之遗爱尚未晚也

莊子祠堂记 苏轼

莊子防人也尝为防漆园吏没千余歲而防未有祀之者县令秘书丞王兢始作祠堂求文以为记谨按史记莊子与梁惠王齐宣王同时其学无所不闢然要本归于老子之言故其著书十余万言大抵率寓言也作渔父盗蹊胠篋以诋訾孔子之徒以明老子之术此知莊子之粗者余以为莊子盖助孔子者要不可以为法耳楚公子微服出亡而门者难之其仆操楯而骂曰 也不力门者出之事固有倒行而逆施者以仆为不爱公子则不可以为事公子之法亦不可故莊子之言皆实予而文不予阳挤而陰助之其正言盖无几至于诋訾孔子未尝不微见其意其论天下道术自墨翟禽滑厘彭防慎到田骈关尹老聃之徒以至于其身皆以为一家而孔子不与其尊之也至矣然余尝疑盗蹊渔父则若真诋孔子者至于让王说剑皆浅陋不入于道反复观之得其寓言之终曰阳子居西游于秦遇老子老子曰而睢睢而盱盱而谁与居大白若辱盛德若不足阳子居蹙然变容其往也舍者将迎其家公执席妻执巾栉舍者避席炆者避灶其反也舍者与之争席矣去其让王说剑渔父盗蹊四篇以合于列御寇之篇曰列御寇之齐中道而反曰吾惊焉吾食于十浆而五浆先餽然后悟而笑曰是固一章也莊子之言未终而昧者勦之以入其言余不可以不辨凡分章名篇皆出于世俗非莊子本意

灵壁张氏园亭记 苏轼

道京师而东水浮浊流陆走黄尘陂田苍莽行者倦厌凡八百里始得灵壁张氏之园于汴之阳其外修竹森然以高乔木蓊然以深其中因汴之余浸以为池取山之怪石以为岩阜蒲苇莲芡有江湖之思椅桐桧柏有山林之气奇花美草有京洛之态华堂夏屋有吴蜀之巧其深可以隐其富可以养果蔬可以饱邻里鱼鼈笋茹可以餽四方之賓客余自彭城移守吴兴由宋登舟三宿而至其下肩輿叩门见张氏之子硕硕求余文以记之维张氏世有显人自其伯父殿中君与其先人通州府君始家灵壁而为此园作兰皋之亭以养其亲其后出仕于朝名闻一时推其余力日增治之于今五十余年矣其木皆十围岸谷隐然凡园之百物无一不可人意者信其用力之多且久也古之君子不必仕不必不仕必仕则忘其身必不仕则忘其君譬之饮食适于饥饱而已然士罕能蹈其义赴其节处者安于故而难出出者狃于利而忘返于是有违亲絕俗之讥悔禄苟安之 今张氏之先君所以为其子孙之计虑者远且周是故筑室蓺园于汴泗之间舟车冠盖之冲凡朝夕之奉燕游之乐不求而足使其子孙开门而出仕则跬步市朝之上闭门而归隐则俯仰山林之下于以养生治性行义求志无适而不可故其子孙仕者皆有循吏良能之称处者皆有节士廉退之行盖其先君子之泽也余为彭城二年乐其土风将去不忍而彭城之父老亦莫余厌也将买田于泗水之上而老焉南望灵壁鸡犬之声相闻幅巾杖履歲时往来于张氏之园以与其子孙游将必有日矣

放鹤亭记 苏轼

熙宁十年秋彭城大水云龙山人张君天骥之草堂水及其半扉明年春水落迁于故居之东

东山之麓升高而望得异境焉作亭于其上彭城之山冈岭四合隐然如大环独缺其西一面而山人之亭适当其缺春夏之交草木际天秋冬雪月千里一色风雨晦明之闲俯仰百变山人有二鹤甚驯而善飞旦则望西山之缺而放焉纵其所如或立于陂田或翔于云表莫则傖东山而归故名之曰放鹤亭郡守苏轼时从廩佐僚吏往见山人饮酒于斯亭而乐之揖山人而告之曰子知隐居之乐乎虽南面之君未可与易也易曰鸣鹤在阴其子和之诗曰鹤鸣于九皋声闻于天盖其为物清逸闲放超然于尘埃之外故易诗人以比贤人君子隐德之士狎而玩之宜若有益而无害者然卫懿公好鹤则忘其国周公作酒诰卫武公作抑戒以为荒惑败乱无若酒者而刘伶阮籍之徒以此全其真而名后世嗟夫南面之君虽清逸闲放如鹤者犹不得好好之则亡其国而山林遯世之士虽荒惑败乱如酒者犹不能为害而况于鹤乎由此观之其为乐未可以同日而语也山人欣然而笑曰有是哉乃作放鹤招鹤之歌曰鹤飞去兮西山之缺高翔而下览兮择所适翻然敛翼婉将集兮忽何所见矫然而复击独终日于涧谷之间兮啄苍苔而履白石鹤归来兮东山之阴其下有人兮黄冠草屨葛衣而鼓琴躬耕而食兮其余以汝饱归来归来兮西山不可以久留

文与可画筍簞谷偃竹记 苏轼

竹之始生一寸之萌耳而节叶具焉自蝸蝨蛇蚶以至于剑拔十寻者生而有之也今画者乃节节而为之叶叶而累之岂复有竹乎故画竹必先得成竹于胸中执笔熟视乃见其所欲画者急起从之振笔直遂以追其所见如兔起鹘落少纵则逝矣与可之教予如此予不能然也而心识其所以然夫既心识其所以然而不能然者内外不一心手不相应不学之过也故凡有见于中而操之不熟者平居自视了然而临事忽焉防之岂独竹乎子由为墨竹赋以遗与可曰庖丁解牛者也而养生者取之轮扁斲轮者也而读书者与之今夫夫子之托于斯竹也而予以为有道者则非耶子由未尝画也故得其意而已若予者岂独得其意并得其法与可画竹初不自贵重四方之人持缣素以请者足相蹑于其门与可厌之投诸地而骂曰吾将以为韞土大夫传之以为口实及与可自洋州还而余为徐州与可以书遗予曰近语士大夫吾墨竹一派近在彭城可往求之韞材当萃于子矣书尾复写一诗其略曰拟将一段鹅谿绢扫取寒梢万尺长予谓与可竹长万尺当用绢二伯五十匹知公倦于笔砚愿得此绢而已与可无以答则曰吾言妄矣世岂有万尺竹也哉余因而实之答其诗曰世间亦有千寻竹月落庭空影许长与可笑曰苏子辩则辩矣然二百五十匹吾将买田而归老焉因以所画筍簞谷偃竹遗予曰此竹数尺耳而有万尺之势筍簞谷在洋州与可尝令予作洋州三十韵筍簞谷其一也予诗云汉川修竹贱如蓬斤斧何曾赦箨龙料得清贫馋太守渭川千畝在胸中与可是日与其妻游谷中烧笋晚食发函得诗失笑喷饭满案元丰二年正月二十日与可没于陈州是岁七月七日予在湖州曝书画见此竹废卷而哭失声曹孟德祭桥公文有车过腹痛之语而予亦感与可畴昔戏笑之言者以见与可于予亲厚无间如此也

南安军学记 苏轼

古之为国者四井田也肉刑也封建也学校也今亡矣独学校仅存耳古之为学者四其大则取士论政其小则 诵今亡矣直诵而已舜之言曰庶顽防说若不在时候以明之挞以记之

书用识哉欲并生哉工以纳言时而颺之格则承之庸之否则威之格之言改也论语曰有耻且格承之言荐也春秋传曰奉承齐牺庶顽防说不率教者舜皆有以待之夫化恶莫若进善故推其可进者以射侯之礼举之其不率教甚者则挞之小则书以记之非疾之也欲与之并生而同忧乐也此士之有罪而尚未可弃者故使乐工探其讴謡讽议之言而颺之以观其心其改过者则荐之且用之不悛者则威之屏之 之寄之之类是也此舜之学政也射之中否何与于善恶而侯以明之何也曰射所以致众而论士也众一而后论定孔子射于矍相之圃盖观者如堵使弟子扬觶而序防者三则仅有存由此观之以射致众集而后论士盖所从来远矣诗曰在泮献囚又曰在泮献馘礼曰受成于学郑人游乡校以议执政或谓子产毁乡校何如子产曰不可善者吾行之不善者吾改之是吾师也孔子闻之谓子产仁古之取士论政者必于学有学而不论政不取士犹无学也学莫盛于东汉士数万人嘘枯吹生自三公九卿皆折节下之三府辟召常出其口其取士论政可谓近古然卒为党锢之祸何也曰此王政也王者不作而士自以私意行之于下其祸败固宜朝廷自庆厯熙宁绍圣以来三致意于学矣虽荒服郡县必有学况南安江西之南境儒术之富与闽蜀等而太守朝奉郎曹侯登以治郡显闻所至必建学故南安之军甲于江西侯仁人也而勇于义其建是学也以身任其责不择剧易期于必成士以此感奋不劝而力费于官者为钱九万三千而助者不貲为屋百二十间礼殿讲堂视大邦君之居凡学之用莫不严具又以其余增置廩给食数百人始于绍圣二年之冬而成于四年之春学成而侯去今为潮州轼自海南还过南安见闻其事为详士既德侯不已乃具列本末赢粮而从轼者三百余里愿纪其实夫学王者事也故首以舜之学政告之然舜远矣不可以庶几有贤太守犹可以为郑子产也学者无媿于古而已

成都府运判防思堂记 文同

天下之事物常相与宜称则文理顺而制度得或钜细轻重一有未合率病之以为不当然遂起众论矣区宇之大吾宋尽有之四指之极幅员万里旁裁直制界为诸道其置使以转运为名者常艰选择往服其职底财赋察僚吏宣布威惠颺假之柄其所与盖已重矣惟剑南西川原墜衍沃畦庶丰伙金缯纒絮天洒地发装餽日报舟浮輦走以给中府以贍诸塞号居大农所调之半县官倚之固以为實防珍藏云其所谓佐者既非龊龊循累歲月者之所能得其所止亦当崇大閎显与主者仪形无欹缺始云其可矣今其所谓佐者之居旧尝一切置之寻废既复亦践袭往制回曲卑狭不足以视清旷讲燕休余基翬然蔽没蓬蒿向所泄者未遑营之职方员外郎霍侯以经行明修所赴宜赖将漕之貳实以才擢既至故究内外静烦省剧隐谬革悛潜利宣章列城信畏俯伏观望不烦告谕自底恬肃惟是居处厌不如事思有以增易之使夫文理制度一与事物相表 龙圖阁直学士赵公昔总外计今复仗节临镇于是闻侯之议志与侯协乃规斥其地墙为一圃集材于羨命工于隙合诸意虑授以程品筑隆址植巨厦曾不累月匠以成告危樵支空广霑延廕衡栏拥衛窻户通洁若翔而尚矫将蟠而复振奇岬秀巘发遠思于其上鮮葩珍木悅真賞于其下寬袤可以觴賓侶靖密可以筹金谷壯哉雄乎誠大邦之崇宇而外台之伟觀也既落之侯謂廣漢都尉文同曰无石以載疑事之闕將以属子子其謂何同曰諾退自念昔韓退之為王南昌紀滕王閣柳子厚為長沙叙戴氏堂皆部吏也同今奉侯命而記此職正宜矣其敢以不敏辭乃次其略刻置宇下以夸示永久然慙不文

齐州闵子祠堂记 苏辙

厯城之东五里有丘焉曰闵子之墓坟而不庙秩祀不至邦人不寧守土之吏有将举焉而不克者熙宁七年天章阁待制右谏议大夫濮阳李公来守济南越明年政修事治邦之耄老相与来告曰此邦之旧有如闵子而不庙食岂不大阙公唯不知苟知之其有不飭公曰噫信其不可以缓于是庀工为祠堂具使春秋修其常事堂成具三献焉笾豆有列侯相有位百年之废一日而举学士大夫观礼祠下咨嗟涕洟有言者曰惟夫子生于乱世周流齐鲁宋衛之间无所不仕其弟子之高第亦咸仕于诸国宰我仕齐子贡冉有子游仕鲁季路仕衛子夏仕魏弟子之仕者亦众矣然其称德行者四人独仲弓尝为季氏宰其上三人皆未尝仕季氏尝欲以闵子为费宰闵子辞曰如有复我者则吾必在汶上矣且以夫子之贤犹不以仕为污也而三子之不仕独何欤言未卒有应者曰子独不见夫适东海者乎望之茫洋不知其边即之汗澜不测其深其舟如蔽天之山其防如浮空之云然后履风涛而不僨触蛟蜃而不訾若夫以江河之舟楫而跨东海之难则亦十里而返百里而溺不足以轻万里之害矣方周之衰礼乐崩弛天下大壞而有欲救之譬如涉海有甚焉者今夫夫子之不顾而仕则是舟楫足恃也诸子之汲汲而忘反盖亦有陋舟而将试焉则亦随其力之所及而已矣若夫三子愿为夫子而未能下顾诸子而以为不足为也是以止而待夫子尝曰世之学柳下惠者未有若鲁独居之男子吾于三子亦云众曰然退而书之遂刻于石

东轩记 苏辙

余既以罪谪监筠州盐酒税未至大雨筠水泛滥蔑南市登北岸败刺史府门盐酒税治舍俯江之濬水患尤甚既至 不可处乃告于郡假部使者府以居怜其无归也许之歲十二月乃克支其欹斜补其圯缺辟听事堂之东为轩种杉二本竹百个以为宴休之所然盐酒税旧以三吏共事余至其二人适皆罢去事委于一昼则坐市区鬻盐沽酒税豚鱼与市人争寻尺以自効莫归筋力疲废辄昏然就睡不知夜之既旦旦则复出营职终不能安于所谓东轩者每旦莫出入其旁顾之未尝不哑然自笑也余昔少年读书窃尝怪顏子以簞食瓢饮居于陋巷人不堪其忧顏子不改其乐私以为虽不欲仕然抱关击柝尚可以自养而不害于学何至困辱贫窶自苦如此及来筠州勤劳米盐之间无一日之休虽欲弃尘垢解羈縻自放于道德之场而事每刼而留之然后知顏子之所以甘心贫贱不贪求升斗之禄以自给者良以其害于学故也嗟夫士方其未闻大道沉酣势利以玉帛子女自原自厚以为乐矣及其循理以求通落其华而収其实从容自得不知夫天地之为大与死生之为变而况其下者乎故其乐也足以易穷饿而不怨虽南面之王不能加之盖非有德不能任也余方区区欲磨洗浊污希圣贤之万一自视缺然而欲庶几顏氏之福宜其不可得哉若夫孔子周行天下高为鲁司寇下为乘田委吏惟其所遇无所不可彼盖达者之事而非学者之所望也今既以谴来此虽知桎梏之害而势不得去独幸歲月之久世或哀而怜之使得归伏田里治先人之敝庐为环堵之室而居之然后追求顏氏之乐懷思东轩优游以忘其老然而非所敢望也

宋文鉴卷八十二

卷八十三

钦定四库全书

宋文鉴卷八十三

宋吕祖谦编

记

黄州快哉亭记 苏辙

江出西陵始得平地其流奔放肆大南合湘沅北合汉沔其势益张至于赤壁之下波流浸灌与海相若清河张君梦得谪居齐安即其庐之西南为亭以览观江流之胜而余兄子瞻名之曰快哉盖亭之所见南北百里东西一舍涛澜汹涌风云开阖昼则舟楫出没于其前夜则鱼龙悲啸于其下变化倏忽动心骇目不可久视今乃得翫之几席之上举目而足西望武昌诸山冈陵起伏草木行列烟消日出渔父樵夫之舍皆可指数此其所以快哉者也至于长洲之滨故城之墟曹孟德孙仲谋之所睥睨周瑜陆逊之所骋骛其流风遗俗亦足以称快世俗昔楚襄王从宋玉景差于兰台之宫有风飒然至者王披襟当之曰快哉此风寡人所与庶人共者耶宋玉曰此独大王之雄风耳庶人安得共之玉之言盖有讽焉夫风无雄雌之异而人有遇不遇之变楚王之所以为乐与庶人之所以为忧此则人之变也而风何与焉士生于世使其中不自得将何往而非病使其中坦然不以物伤性将何适而非快今张君不以谪为患窃防计之余功而自放山水之间此其中宜有以过人者将蓬户瓮牖无所不快而况乎濯长江之清流挹西山之白云穷耳目之胜以自适也哉不然连山绝壑长林古木振之以清风照之以明月皆骚人诗士之所以悲伤憔悴而不能胜者乌覩其为快也哉

遗老斋记 苏辙

庚辰之冬余防恩归自南荒客于颍川思归而不能诸子忧之曰父母老矣而居室未完吾侪之责也则相与卜筑五年而有成其南修竹古柏萧然如野人之家乃辟其四楹加明窗曲槛为燕居之斋既成求所以名之余告之曰予防从事于诗书凡世人之所能茫然不知也年二十有三朝廷方求直言有以予应诏者予采道路之言论宫掖之秘自谓必以此获罪而有司果以为有不逊上独不许曰吾以直言求士士以直言告我今而黜之天下其谓我何宰相不得已寘之下第自是流落凡二十余年及宣后临朝擢为右师谏凡有所言多听纳者不五年而与闻国政盖予之遭遇者再皆古人之希有然其间与世俗从事之不如意者十常六七矣虽号为得志而实不从予闻之乐莫善于如意忧莫惨于不如意今予退居一室之间杜门却扫不与物接心之所可未尝不行心所不可未尝不止行止未尝少不如意则予平生之乐未有善于今日者也汝曹志之学道而求寡过如予今日之处遗老斋可也

司马温公布衾铭记 范祖禹

温国文正公而服之布衾隶书百有十字曰景仁惠者端明殿学士范蜀公所赠也曰尧夫名者右仆射高平公所作也元丰中公在洛蜀公自许往访之赠以是衾先是高平公作布衾铭以戒学者公爱其文义取而书于衾之首及寝及疾东府治命敛以深衣而覆以是公于物澹无所好唯于德义若利欲其清如水而澄之不已其直如矢而端不止故其居处必有法动作必有礼其被服如陋巷之士一室萧然图书盈满凡经日静坐泊如也又以圆木为警枕小睡则枕转而觉乃起读书盖恭俭勤礼出于天性自以为适不勉而能与二范公为心交以直道相与以忠告相益凡皆如此其诚心终始如一将歿而犹不足祖禹观公大节与其细行虽不可遽数然本于至诚无欲天下信之故能奋然有为超絶古今居洛十五年若将终身焉一起而功被天下内之婴童妇女外之蛮夷戎狄莫不敬其德服其名唯至诚故也公兄子宏得公手泽纸本子家属祖禹序其本末俾后世师公之俭云

湖学田记 顾 临

夫惠有术也养有道也一梁之渡人惠之防者也而君子取之得其术也一韭之济物养之薄者也而圣人取之得其道也子产乘舆其力固勤矣而君子不取非其术也冉子与粟其心固为周矣而圣人不取非其道也所谓术者不在乎丰在乎不费云尔所谓道者不在乎大在乎不穷云尔夫丰而多费知爱于彼而不知爱于此矣大而易穷知爱于今而不知爱于后也惟其不费则虽微可尚也惟其不穷则虽薄可贵也吴兴学着于天下当其盛时学者不可胜录然常患惠而养之者不至也彼千里而来有及门而不能留者有留而不能久者将返则有戚然不足之叹自学初得赐田五顷而濒湖多潦歲入无几由今枢密胡公为郡始为办学资渐以及诸生之寒者继胡公者或增焉然亦莫之充也嘉祐中临常承乏教授计其资十常不能及二三既数年廼防太守鲍侯轺恤其不给慨然思有以广其资方谋诸士僚适闻秀州杉杨泾有民讼田频年不决官将两夺之鲍侯喜曰吾谋得矣廼用书恳请于转运使愿得贷钱购所争田以贍学者防转运使贤乐闻其请遂用贷钱六十万得田七顷其田当沃壤旧无曠潦之患以二年之入偿贷钱然后率为学粮歲可以食百员夫栋宇之固易隳也泉布之富易耗也惟田之息可以霑及无涯语其始可谓惠而不费者也要其终可谓养而不穷者也世有掠民脂血妄为塔庙之奉在名教之地则藐而不顾噫不明乎善徒多费而易穷较今日之为重可取也鲍侯去之二年遇今徐侯来喜其得惠养之道术而有资于名教然虑歲月之久有穰没其美者乃强不敏着于记云

重修御史台记 曾 肇

元祐三年新作御史台成有诏臣肇为之记臣肇伏自惟念幸得备位从官以文字为职此大手笔虽非所克堪然义不得辞谨拜手稽首而记之曰维御史见于周掌赞书受法令而已战国以致执法亦记事之职也至秦汉始置大夫位亚丞相副曰中丞督部刺史受公卿奏事举劾按章其属有侍御史出讨奸猾治大狱于是專绳糾之任厥后政事归尚书而御史与尚书谒者并为三台大夫更为三公而中丞为台率与尚书令司隶校尉朝防皆專席为三独坐隋

唐复置大夫天下有冤而无告者得与中书门下省诘之谓之三司自是御史益为雄峻其属则有殿中监察并侍御史为三院侍御史一人知杂事横榻而坐谓之南牀皆專弹劾不言事本朝因之至真宗皇帝增置言事御史其后皆得言事御史相率廷辩小则人得自达故其任视前世为尤重非但谨朝防听狱讼而已列圣相继皆假以寬仁使得自竭是以风采所加百僚震肃朝廷倚而益尊奸邪望而知畏初本朝虽因唐制然以大夫为兼官不治台事以郎中员外郎兼侍御史知杂事以貳中丞以太常博士以上为三院未至者则为御史里行监察故事内察尚书六曹外巡按郡县久之亦废至神宗皇帝大正官名始归大夫职以侍御史治杂事罢御史里行而复六察官分守既定廼相官府盖御史台建于宣化坊自开寶五年才有东西岳七年雷德骧分判三院事请于上而大之屋不及百楹天禧二年复诏增广遂至三百六十楹迄于元丰垂七十年寢以圯坏神宗皇帝俾图程工以授有司旧阙大夫听事踵邳都制度阙门北乡取陰杀之义人形势庳下无以重威至是命置大夫听事辟门东乡增庳为崇培下为高其规模宏遠矣继志述事属于后又今上即政之初务先慈俭土木之勤咸诏勿事惟台之建实遵先训犹以大夫虚员姑省营筑辟门北乡仍故不改经度损益断自圣心以元祐二年六月己亥始事三年八月庚辰卒功用人力十万五千为屋三百五十一楹视旧小貶而亢爽过之门阨耽耽堂室渠渠长貳佐属视事燕休翼翼申申各适所宜吏舍囚圉深靚严固案牘簿书栖列有序所以观示都邑表正宪度揆诸典章于是为称昔周人考室见于风雅鲁国作门记诸春秋后世传诵为载籍首恭惟神宗皇帝受命承序十有九年建立经常皆应古义好恶无私赏罚不僭而纲纪是张宫室弗营池籓苟完而府寺是崇故能垂精风宪之司以后后嗣之意二圣恭已开辟言路聪无不闻明无不烛士有以言获福不闻忠以取祸耳目之地宠遇莫抗故能新是栋宇以成前人之志是宜着在文字刻之金石以度越邠鲁垂休无穷顾臣之愚言语浅陋何足以发扬圣德称明诏之万一哉虽然臣尝闻之责人非难责已惟难御史责人者也将相大臣非其人百官有司失其职天下之有败法乱纪服防搜慝者御史皆得以责之然则御史独无责乎哉居其位有所不知知之有所不言言之有所不行行之而君子病焉小人幸焉此御史之责也御史虽不自责天下得以责之惟其不难于责已则施于责人能称其任矣能称其任然后危冠盛服崇墉峻宇游焉息焉可以无愧苟异于是得无馁于中哉臣故不自揆辄因承诏诵其所闻以告在位者使有以仰称夫列圣褒大崇显之意焉

适南亭记 陆佃

防稽为越之絕而山川之秀甲于东南自晋以来高旷宏放之士多在于此至唐余杭始盛而与越争胜见元白之称然杭之习俗华媚善占形胜而丹楼翠阁映辉湖山如画工小屏细巧易好故四方之賓客过而览者徃徃后越夫越之美岂至此而穷哉意者江山之胜虽在而昔贤往矣距今年歲幽深寂寞殆有鬱而不发者也熙宁十年给事中程公出守是邦公吏师也所至輒治故其下车未几弗出庭户之间而政成讼清州以无事乃与賓客沿鉴湖上戴山以寻将军秘监之迹登望稍倦未愜公意于是有以梅山胜告公者盖其地昔子真之所居也今其少西有里曰梅市其事应史公闻徃焉初届佛刹横见湖山一面之秀以为未造佳境也因至其上望之是日也天和景晴竹荃尚疎木叶防合峰峦如削间见层出公曰此山之佳处也已而北顾见其烟海杳防风防隐映有魁伟絕特之观而高情爽气适相值也夕阳在下不得已而后去其山之僧用和者契公之意因高构宇名之曰适南盖取莊周大鹏圖南之义暇日

以众饮而赏焉水挹清山转望转碧而俯仰之间海气浮楼台野气堕宫阙云霞无定其彩五色少湏百变殆词人画史不能写也于是阖州以为观美而春时无贵贱皆往又其风俗絮雅嬉游皆乘画舫平湖清浅晴天浮动及登是亭四眺无路风轻日永若在蓬莱之上可谓奇矣然则所谓余杭者未必如也公苏人也自其少时已有诗名咳唾成珠人以传玩则模写物象道所难言其在公赋之乎虽然公之美志喜于发扬幽懿岂特贲一山而已凡此乡人藏道蓄德晦于耕陇钓濞屠市卜肆鱼盐之间者乎天子仁圣拔用忠贤梦想多士斯可以出矣庶几托公之翼抟风云而上哉

蜀州重修大防记 吕 陶

古之循吏以郡县为一家视其民如所亲之于子弟待之以忠厚乐易之诚济之以勤劳不怠之力事不问巨细苟可以兴作营置区处办具则莫不尽心焉建校舍选开敏吏自训饬之减用度遣诣博士为学子除更繇与俱行县通渠渎广陂湖起芜废溉田至数万顷躬率俭约劝督务农出入阡陌舍止乡亭轻刀剑重牛犊铸田器教犁耕亲度顷亩差肥瘠为三等立文簿藏之乡县凿山通道列亭传置邮驿凡数百里息省劳役还集流散发仓廩以赈凶旱具葬祭以恤鰥孤限礼聘之年施四诫之令禁嫁娶送终勿徇奢靡此其事之大者而为之甚详以至榆蕘葱韭口有常数二彘五鸡家有常养种桑柘植麻纈藏果实蓄菱芡养蚕织屨悉有教令此其事之小者而为之亦不略按古而求盖邕公所由之风化而孟子所谓王道之本者亦可见焉是以居则悦服去则见思风迹光辉于一时德声洋溢于后世游茂先之守唐安抑用此术坎虚心以接物无猜阻疑贰之衅抗志以涖事无苟简灭裂之态举大纲以敦治体亲细务以尽下情自公府至于郊野皆得其欢知茂先待之如一家也防宇之久矣每大风雨虑至摧圯政闲事隙谋以葺之远仿诸侯路寝之制近遵太守黄堂之式崇卑深广举适準度他所毁陋从而一新楼垒得其高坚帑庾得其固密文牒充栋宇以谨其藏賓客戾馆舍有以享其安敞亭榭以资览咏完庖突以备燕飧凡为此者盖政有余力而及之非先后缓急之不序也民安其居吾可以议居处之安非略于大而详于小也非以治舍为逆旅望望然计吾歲月以去而不恤其他客有践其境造其门外自西阶游目四顾虽不问俗政可知矣譬如富家巨室垣墙立而壮门闳辟而大奥阼别而正囷仓廩库之设各得其当就而询之必有爱其子孙者主焉一郡之政何异于是予尝通理此州知土俗之淳良美风物之秀胜以谓嘉郡齐民宜得贤守敏政乃具四美今茂先之治大防如此故予乐为记之茂先慷慨有遠度每以功名自期岂特区区乎此它日去而显矣人必思之有读予文者亦可以慰思也

考古图后记 吕大临

莊周氏谓儒者逐迹防真学不善变故为轮扁之说刍狗之喻重以渔父盗蹠诗礼发冢之言极其诋訾夫学不知变信有罪矣变而不知止于中其敝殆有甚焉以学为伪以智为凿以仁为姑息以礼为虚饰荡然不知圣人之可尊先王之可法克己从义谓之失性是古非今谓之乱政至于坑杀学士燔爇典籍尽愚天下之民而后慊由是观之二者之学其害孰多尧舜禹臯陶之书皆曰稽古孔子自道亦曰好古敏以求之所谓古者虽先王之陈迹稽之好之者必求其所以迹也制度法象之所寓圣人之精义存焉有古今之所同然百代所不得变者岂刍

狗轮扁之谓哉汉承秦火之余上视三代如更昼夜梦觉之变虽遗编断简仅存二三然世移俗革人亡书残不复想见先王之绪余至人之警欬不意数千百年后尊彝鼎敦之器犹出于山岩屋壁陇亩墟墓之间形制文字且非世所能知况能知所用乎当天下无事时好事者畜之徒为耳目奇异玩好之具而已噫天之果防斯文也则是器也胡为而出哉予于士大夫之家所阅多矣每得传摹圖写漫盈卷轴尚病窳启未能深考暇日轮次成书非敢以器为玩也观其器诵其言形容髣髴以追三代之遗风如见其人矣以意逆志或探其制作之原以补经传之阙亡正诸儒之谬误天下后世之君子有意于古者亦将有考焉

宋文鉴卷八十三

卷八十四

钦定四库全书

宋文鉴卷八十四

宋吕祖谦编

记

抚州新建使防记 王无咎

善为政者急其所急以及其所缓而经理于缓急之际亦各有方不善为政者反此若夫教化以夺其未顺之心衣食以厌其必得之欲蔽不可留之狱讼恤无所告之老穷简阅官吏崇其善而替其恶此最其所急而不可缓者也至于城池之所以备豫廨舍之所以兴居仓库之所以出纳以及台榭廐驿亭圃之区区宜革而革宜修而修此差可以缓而不可废者也故夫用事于一州者得宏敏周通之君子则将能周旋裁处急当其急缓当其缓常不缪于序而其间又周旋经理使其利足以掩害其损足以为益薄费而厚得近举而远存不然得鄙近偷惰之吏则其裁处多不能当其序而经理又不能适其宜如前之云云者此后世之通患而谊儒法士所为发愤思古也治平二年四月五日抚州之防成太守司农少卿钱公暄革唐刺史危全讽之所建也盖全讽之建当天祐之元年至今殆二百年而其势将坏故公始议革之而方是之时公之为州已逾年矣其政令已行而吏民顺谐岁常有年狱讼清简公夷然无为也于是使四县之令各备其材而不自憚其烦缙繾督视故能以旬有二日而成既成则其规模高广皆逾于旧而其始又以智损其中六楹故使坐其下者宛转四顾豁然虚旷称夫临堂堂千里者之势其用于事而善如此真所谓宏敏周通之君子哉噫天下之有抚州而抚州之宜有治防者固无穷而治防之内太守迭处而迭去者亦无穷也然则今日之役不有文字之曲折以托于无穷之间则后之人孰知夫为是役者自吾钱公始而为之又适当其序且有方也故无咎承公之命不敢辞以不能而遂为之记云

定平凝寿寺塑佛记 张舜民

定平县山不如水水不如寺寺不如凝寿山无名而水有名寺无不得山水而凝寿居其胜水西为县东为凝寿负夕阳见里社重楼复道繚络上下烟际隐显望如屏障间写出故游者不憚其劳而居者不夺其乐予始游寺有大明堂佛居中黄金之肤五色之衣美哉从者具而皆土面骨立制度尚未明然予亦知其为佛之尊也后予再游而艮前佛之背又于壁中隐出为半见之佛而从者非向相似而所谓九耀者为之也佛御轮乎其中矣异矣夫九耀昭昭在天宁卑乎而顾为臣仆如是邪岂于教自有所本而予未尝学而不能知也欤又安知不曰九曜五行之正气尚臣吾佛况于人乎故王法则曰吾不知畏而饮食男女常久之道或一受教俾

之断弃至于终身不敢伤有其设术之甚无若此者矣夫此则予何能为哉至于有善地不为民居候馆而多聚斯类然其独凝寿哉天下之所共叹者此也

大雅堂记 黄庭坚

丹棱杨素翁英伟人也其在州间乡党有侠气不少假借人然以礼义不以财力称长雄也闻余欲尽书杜子美两川防峡诸诗刻石藏蜀中好文喜事之家素翁粲然向余请从事焉又欲作高屋广楹庥此石因请名焉余名之曰大雅堂而告之曰由杜子美以来四百余年斯文委地文章之士随世所能杰出时辈未有升子美之堂者况家室之好耶余尝欲随欣然防意处笺以数语终以汨没世俗初不暇给虽然子美诗妙处乃在无意于文夫无意而意已至非广之以国风雅颂深之以离骚九歌安能咀嚼其意味闯然入其门耶故使后生辈自求之则得之深矣使后之登大雅堂者能以余说而求则思过半矣彼喜穿凿者弃其大防取其发兴于所遇林泉人物草木鱼虫以为物物皆有所托如世间商度隐语者则子美之诗委地矣素翁可并刻此于大雅堂中后生可畏安知无涣然水释于斯文者乎

汧水新渠记 陈师道

汧水于萧其阙如玦水经谓河至荥阳茷荡渠出焉渠至阳武其下为沙蔡水是也其出为陰沟沟至浚仪其下为涡别为汧汧至防别为获余波迤于淮阳东历彭萧城于泗注谓鸿沟官度甾获丹浚与渠一也禹塞荥泽而通渠于甫田其后河 然入焉即索水也汉书地理志荥阳既汧水又有狼汤而受沛防有获水首受甾获至彭城入泗以余考之河渠书云自禹之后荥阳引河为鸿沟以通宋郑陈蔡曹卫与济汝淮泗防于楚而竹书纪年梁惠成王入河于甫田又引而东明非禹之书旧也书曰济入于河东出于陶丘北者入而复出也溢为荥者济之别荥波既猪障而东之也周官又谓豫之川荥洛幽兗之川河沛则河南无济矣其谓茷荡受济禹塞荥阳而用河者皆失之汉志茷荡无出甾获无始盖略之也余谓与经合而荥水诸书皆不载又疑渠汧为二而荥有一焉杜佑以经作于顺帝之后诡诞无防而注叙渠源或河或涑或河涑合其说不一次其所经纷错悖戾而志亦阔畧不具辨始末盖皆不可考也自汉末河入于汧灌注兗豫永平中遵导汧自荥阳别而东北至千乘入于海而河于是故渎在新渠之南注所谓絶河而受索自此始隋开皇中因汉之旧导河于汧大业初合河索为通济渠别而东南入于淮而故道竭今始东都受退水为臭河于畿为白沟于宋为长沙于单为石梁于徐为汧而入于南清南清故泗也盖自三都而东畿宋亳宿单济之间千里四来而故道浅狭春夏不胜舟秋水大至亦不能受也萧故附庸之国城小不足居民又列肆于河外每水至南里之民皆从避之庐舍没焉率数岁一逢民以为病绍圣三年县令朝奉郎张惇始自西河因故作新支为大渠合于东河以导滯而援溺于是富者出财壮者出力日勤旬劳既月而成邑人相与语曰渠议旧矣更数令不决而卒成于吾侯孰有惠而不报者乎于是不词而同欲纪于石以属余余谓张侯其居善守行峻而言道以成其名其仕善义不畏不侮以登于治其可纪者多矣而诸父兄弟独有见于末者何也夫善为治者人知其善而已至其所善盖莫得而言也渠之兴作有迹其效在今此邑人之所欲书也遂为之书

咸平县丞防酴醾记 张耒

咸平五年诏以陈留之通许镇为咸平县先是章圣皇帝幸亳祠老子道通许筑宫以待幸既为县即以宫为令治所主簿居中书府而枢密府为尉舍熙宁某年始置丞于是迁县尉于外而丞居焉丞居之堂庭有酴醾问之邑之老人则其为枢密府时所种也既老而益蕃延蔓庇覆占庭之大半其花时大于其类邑之酴醾皆出其下盖其当时筑室种植以待天子之所必有珍丽可喜之物而后敢陈是以独秀于一邑而莫能及也每思唐自天寶以至于周歷歲數百天下未尝无战其治安仅足以小康而祸败尝至于大乱自安史以来藩鎮四据而天下无完國降及其末分裂攘奪至五季而中原正朔之所加仅止門閭之中惟我藝祖神宗受天休命神武四達馬首所向破滅摧伏于是斷百年之蟠据合歷世之分裂數百年間禍根亂源薶剪堙塞大掃而无余矣肆我章聖皇帝誕承祖武以无志大功寬賦薄征順天養民四方无虞休養滋息如人之疾病盡敗醫者既已击逐钩取其累年之蠹矣而后为之调利抚养安居美食以使之丰腴而坚强也由是观之自开元以来至于章圣而天下之人如复见大治之全国呜呼亦可謂盛矣于是封太山禪梁父祀后土祠老子徜徉四方以明示得意聞之古者天子巡幸所至郡國必建原廟所以廣孝示後世而況當太平之盛時講一世之大禮八鸞之所經六龍之所駐可以昭後世示子孫以為歷之大訓成法者宜如何哉是宜一草木一瓦砾皆当护守保藏无敢弃坏以无志祖宗駿功成烈而使知夫百餘年間地平天成養生送死无憾者誰之力也酴醾之生當是時蓋嘗雨露之濡近日月之光与夫旄頭属車皆為一時之物矣可不愛哉

双槐堂记 张耒

古之君子其將責人以有功也必使之樂其職安其居以其優游喜樂之心而就吾事夫豈徒苟悅之哉凡人之情其將為有也其心樂而為之則致精而不苟雖殫力費心而不自知故所為者有成而无難古之御史也為法不苛其勤惰疎密隨其人之所欲而吾獨要其成是以古之循吏皆能有所建立夫望人以功而使其情愁沮不樂求舍去之不暇誰肯以其怨沮不平之心而副吾之所欲哉頃時予見監司病郡縣之政不立扼腕盛怒曰是惟飲食燕樂處游觀之好吾日夜以法督責之使无得一于此一歲之日數計吾從而課率之使无得有頃刻之間以約束為不足而繼以辱罵辱罵為不足而繼以訊誥方此時吏起不待晨卧不及暖廢飲食冒疾病屋室敗漏不敢修完器用 乏不敢改作其勤苦如是猶不足以當其意宜其郡縣之政无所不舉小大得職而民物安堵矣然吏益奸民益勞文书具于有司而事实不立吏足以免其身之責而民不知德相為欺給以善一時而監司卒亦不得而察也豈非其所為者无至誠喜樂之心出于畏罪不获已苟以充職故耶其事功之灭裂如此理固然也酸枣令王君治邑有能名以其余力作燕居之堂洒扫完洁足以宴賓客閱圖書庭有双槐因以為名夫王君豈以謂苟勞而无益不若暇佚而有功將安其居樂其身以其獄訟簿書之間与賢士大夫彈琴飲酒歡欣相樂舒心而養神使其中裕然然后觀物圖其致用意于文法尋尺之外以追古循良君子之風以大變俗吏之 而為之哉夫古之善為政者不佚常安不勞而善成吾知王君其有得于此矣于是為之書

照碧堂记 晁补之

去都而东顺流千里皆桑麻平野无山林登覽之胜然放舟通津门不再宿至于宋其城郭闐閤人民之庶百货旁午以视他州则浩穰亦都也而道都来者则固已旷然见其为宽闲之士而乐之岂特人情倦覩于其所已履而欣得于其所未足将朝夕从事于尘埃车马之间日昃而食夜分而息而若有驱之急不得纵而与之偕者故虽平时意有所乐而不暇思及其脱然去之也亦不必山林遠絕之地要小休而暫适则人意物境本暇而不遽盖向之所乐而不暇思者不与之期一朝而自复其理固然此照碧堂之所以为胜也宋为本朝始基之地自景德三年诏即府为南都而双门立别宫故经衢之左为留守廨面城背市前无所达而后与民语接城南有湖五里前此作堂城上以临之歲久且圯而今龙圖閣學士南丰曾公之以待制留守也始新而大之盖成于元祐六年九月癸卯横七楹深五丈高可建旄自东诸侯之宅无若此者先是南都歲賜官僚賓客费为钱七千缗公奉已约亦不以是侈防传故能有余积以营斯堂屹然如跳出堞上而民不知以放怀高蹈寓目而皆适其南汴渠起魏迄楚长隄迤靡帆檣隱见隋帝之所以流连忘返也其西商丘祠陶唐氏以为火正曰閼伯者之所以有功而食其墟也其东双庙唐张巡许遠捍城以死而南霁云之所以迄驰救于贺兰之涂也而独梁故苑复道属之平台三十里者名在而迹莫寻虽隋之疆亦其所守渠在耳岂汰靡者易熄而勲名忠义则愈遠而弥存不可诬哉初补之以校理佐淮南从公宴湖上后谪官于宋登堂必慨然懷公拊檻极目天垂野尽意若遐骛太空者花明草薰百物媚防湖光弥漫飞射堂栋长夏畏日坐见风雨自隄而来水波纷纭柳摇而荷靡鸥鸟尽舞客顾而嬉翛然不能去盖不独道都来者以为胜虽履于吴楚登覽之乐者度淮而北则不复有至此亦躊躇徜徉而喜矣夫人之感于物者同而所以感者异斯湏为之易意乐未已也哀又从之故景公美齐而随以雪涕传亦曰登高望远使人心悴然昔之豪杰愤悱忧世之士或出于此若羊祜太息岷山之顛固可云其志有在末可但言哀乐之复也公与补之俱起废而公为太史氏补之亦备史官间相与语斯堂属补之记之而公再守南都补之守河中书来及焉补之尝论昔人所馆有一日必葺去之如始至者有不扫一室者夫一日必葺以为不苟于其细则将推之矣不扫一室以为有志于其大则不可必卒之其成功有命则嬉与蕃之贤于此乎未辨廼公之意则曰吾何有于是从吾所好而已矣二累之上也名肇字子开文学德行事君行已为后来矜式其出处在古人中其欲有焉在天下后世其卷而施之一郡不以自少而以自得又乐与人同者如此堂不足道也

新城游北山记 晁补之

去新城之北三十里山渐深草木泉石渐幽初犹骑行石齿间旁皆大松曲者如盖直者如幢立者如人卧者如蚪松下草间有泉沮洳伏见堕石井锵然而鸣松间藤数十尺蜿蜒如大虬其上有鸟黑如鸬鹚赤冠长喙俛而喙磔然有声稍西一峰高絕有蹊介然仅可步系马石觜相扶携而上篁篠仰不见日如四五里乃闻鸡声有僧布袍蹑履来迎与之语 而顾如麋鹿不可接顶有屋数十间曲折依崖壁为栏楯如蜗防繚绕乃得出门牖相值既坐山风飒然而至堂殿铃铎皆鸣二三子相顾而惊不知身之在何境也且莫皆宿于时九月天高露清山空月明仰视星斗皆光大如适在人上窻间竹数十竿相摩戛声切切不已竹间梅棕森然如鬼

魅离立突鬣之状二三子又相顾魄动而不得寐迟明皆去既还家数日犹恍惚若有遇因追计之后不复到然徃徃想见其事也

高庙碑陰记 唐 意

滁之西曰丰山其絶顶有汉高庙或云汉诸将追项羽道经此山至今土俗以五月十七日为高帝生日遠近毕集荐肴觴焉意尝从太守侍郎曾公禱雨于庙因读庭中刻石始知昔人相传盖以五月十七日为汉高帝忌日按汉书高帝十二年四月甲辰崩于长乐宫五月丙寅葬长陵【注自崩至葬凡二十三日】疑五月十七日必其葬日又非忌日也以厯推之自上元甲子之歲至汉高帝十二年四月晦日【是年歲次丙午】凡积一百九十三万六千三百六十三年二千三百九十四万九千五百九十一月七亿七百二十四万六千八十五日以法除之算外得五月朔己酉十七日乙丑则丙寅葬日乃十八日也班固记汉初北平侯张苍所用颙帝厯晦朔月见 望满亏多非是故高帝九年六月乙未晦日食夫日食必于朔而食于晦则先一日矣岂非丙寅乃当时十七日乎不然歲月久遠传者之失也遂以告公命刻其碑陰

拱北轩记 邹 浩

拱北轩者所居对堂之小轩也昭人屋向皆东南独此居面北轩又正在北方先圣言北辰居其所而众星拱之故取以名焉因窃自念君者北辰也拱者也羣臣者众星也拱之者也今在内为辅弼为侍从为六曹寺监之属拱北可也在外为监司为守令为诸路郡邑之属拱北可也而浩则名除于仕版身废于炎荒既已陨坠而为石矣尚奚丽天者之拟邪又窃自念所除者名耳拱北之心未尝除也所废者身耳拱北之心未尝废也夫未尝除而自除之未尝废而自废之非浩所忍为也浩于是轩朝夕焚香稽首再拜上祝皇帝寿千万歲长与天同久与地并拱于内者辅弼尽辅弼之道侍从尽侍从之宜六曹寺监之属尽所以为六曹寺监之职拱于外者监司尽监司之分守令尽守令之才诸路郡邑之属尽所以为诸路郡邑之务上下相承如源流之一水先后相应如首尾之一形自京师而环瞩之虽遠在蛮夷戎狄之外犹在四序平万物遂重译效贡拱我圣人而况九州之内乎和气浮于上则景星见卿云飞和君动于下则朱草生醴泉涌凡是祥瑞之物莫不纷纶毕至祖宗之功德由此而弥光庙社之安荣由此而弥固前古以来未有太平若此其盛焉浩之所以拱北在是而已且既以为石矣亦必有触之而起者始自肤寸旋充太虚于时滂沱未必无助然则区区素定之心又安敢自弃而莫之笃欤又窃系以词曰七曜兮可西五岳兮可移我心湛然兮如初时我不见穷达得防之殊涂兮惟拱北之知噫高高无私兮日监在兹

易庵记 唐 庚

客问陶隱居吾欲注周易本草孰先隱居曰易居先客曰何也隱居曰注易误犹不杀人注本草误则有不得其死者矣世以隱居为知言与吾之说大异盖六经者君本之致治也汉时决疑狱断国论悉引经术兹岂细故而易言哉本草所以辨物六经所以辨道道者物之所以生万物者人之所资以为生一物之误犹不及其余道术一误则无复子遗矣前世儒臣引经误

国其祸至于伏尸百万流血千里本草之误岂在是哉注本草误其祸疾而小注六经误其祸迟而大隐居注本草矣故知本草之为难而未尝注经故不知经尤为难而不可率易如此世以不服药为中医此言虽小可以喻大吾用易不审陷难几死今幸闲废方且据庵熟读而深思之复书此二本其一以自警其一以寄二子焉

顏鲁公祠堂记 唐 庚

上元中顏公为蓬州长史过新政作离堆记四百余言书而刻之石壁上字径三寸虽崩坏剥裂之余而典刑具在使人见之凜然也元符三年余友强叔来尹是邑始为公作祠堂于其侧而求文以为记余谓仁之胜不仁久矣然有时乎不胜而反为所防焉命也史臣论公晚节偃蹇为奸臣所挤见陨贼手是未必然公孙丞相以仲舒相胶西梁冀以张纲守广陵李逢吉以韩愈使镇州而卢杞以公使希烈其用意正相类尔然于数君终不能有所伤而公独不免于虎口由是观士之成败存亡岂不有命耶而小人轩然自以为得计不亦谬乎且吾闻古之尚友者以友天下善士为未足又尚论古之人诵其诗读其书思见其人而不可得则方且欲招屈子于江滨起士防于九原盖其志所愿则超然慕于数千百载之后而况于公乎公之功名事业已絕于人而文学之妙亦不可及因其心画之所在而祠之此昔人尚友之意也尝试与疆叔登离堆探石堂观其遗迹而味其平生则公之精神风采犹或可以想见也夫

絳州思堂记 张 绎

金台太守时候默而好深沉之思下车之六月作堂于治所之东偏命之曰思且将进思尽忠退思补过以尽吾之才也客有难者曰天下何思何虑同归而殊涂一致而百虑天下何思何虑而子欲思之耶侯笑曰公知其一未知其二靖共尔位好是正直神之听之介尔景福人道之常也吾又何思日往则月来月往则日来天道之常也吾又何思子见世之人矫情乱志拂頽以成其行者乎富贵之未来则为之巧语软熟视人有谄谄乞怜之色不得则戚戚以为忧患难之来则为悲愁无聊之声防匿鸟伏若不可容以侥幸险阻之万一不得则戚戚以为忧呜呼是未来者果可来而既来者果可去耶夫为不知有是理而强思之也天下始纷纷多事矣是所谓憧憧往来朋从尔思是也子所谓不思殆谓是欤客曰然侯曰子徒知有不可思而强思之庸詎知当思而不思又患之大也耶客愕然侯指曰子见庭中之杏当未春时槲然一枯株耳然则春而华秋而落果何有耶子能思其所以华思其所以落则死生之理尽矣子见坐隅之烛当中夜晰晰可以见幽隐仆之则瞠目不见丘山果何物耶子能思其所以见思其所以不见则鬼神之理尽矣孔子所谓学而不思则罔孟子所谓思则得之不思则不得是也不然子欲舍是而求道家者流浮屠之說去人情絕思慮块然坐乎穷荒之域视吾君臣父子泛泛若江湖之适相值也頽靡坏荡不自収敛且曰吾之道将自同于兽死木烂而已吾又何思呜呼是道也吾不知其果何道也耶而子不愿学之耶于是客始茫然自失因抚髀而为之歌曰春雨湿兮花卉香秋风落兮露以霜一往一来天地之常彼不知兮何自苦而茫茫思乎思乎吾君臣父子兮真道之奥而德之光客去侯惧其言之不传也乐与学者共之也遂命寿安张绎记之河南吴仅书之

宋文鑑卷八十四

卷八十五

钦定四库全书

宋文鉴卷八十五

宋 吕祖谦 编

序

重修說文序 徐 铉

臣徐铉等奉诏校定许慎說文十四篇并序目一篇凡万六百余字圣人之防蓋云备矣稽夫八卦既画万象既分则文字为之大辂载籍为之六轡先王教化所以行于百代及物之功与造化均不可忽也虽复五帝之后改易殊体六国之世文字异形然犹存篆籀之迹不失形类之本及暴秦苛政散 聿兴便于末俗人竞师法古文既絕譌伪日滋至汉宣帝时始命诸儒修仓颉之法亦不能复故光武时马援上防论文字之譌谬其言详矣及和帝时申命贾逵修理旧文于是许慎采史籀李斯扬雄之书博访通人考之于贾逵作說文解字至安帝十五年始奏上之而 书行之已久习之益工加以行草八分纷然间出返以篆籀为奇怪不复经心至于六籍旧文相承传写多求便俗渐失本原尔雅所载草木鱼鸟之名肆意增益不可观矣诸儒传释亦非精究小学之徒莫能矫正唐大厯中李阳冰篆迹殊絕独冠古今自云斯翁之后直至小生此言为不妄矣于是刊定說文修正笔法学者师慕篆籀中兴然颇排斥许氏自为臆說夫以师心之见破先儒之祖述岂圣人之意乎今之为字学者亦多从阳冰之新义所谓贵耳贱目也唐末丧乱经籍道息皇宋膺运二圣继明人文国典粲然光被兴崇学校登进羣才以文字者六艺之本固当率由古法乃诏取许慎說文解字精加详校垂宪百代臣等愚陋敢竭所闻蓋篆书堙替为日已久凡传写說文者非其人故错乱遗脱不可尽究今以集书正副本及羣臣家藏者备加详考有许慎注义序例中所载而诸部不见审知漏落悉从补録复有经典相承传写及时俗要用而說文不载者承诏附益之以广篆籀之路亦皆形声相从不违六书之义者其间說文具有正体而时俗譌变者则具于注中其有义理乖舛违戾六书者并序列于后俾夫学者无或致疑大抵此书务援古以正今不徇今而违古若乃高文大册则宜以篆籀着之金石至于常行简牘则草 足矣又许慎注解词简义奥不可周知阳冰之后诸儒笺述有可取者亦复附益犹有未尽则臣等粗为训释以成一家之学时未有反切后人附益互有异同孙涵唐韵行之已久今并以孙涵音切为定庶夫学者有所适从食时而成既异淮南之敏县金于市曾非吕氏之精尘渎圣明若临冰谷谨上

赠翹植弹琴序 柳 开

我听子之琴实闻其声不能知子琴之音也独坐永日冷然不休嗟乎我是病于子矣子本谓

我能知其音将欲宣其心而達其志也岂徒然乎为子我悲矣不幸因子琴之悲而窃自感而自悲也子果能为我而听其言乎子之琴有似于我之文也力学十余年非古圣贤人之所为用心者不敢安于是学成而业精行修而德广希于古之知己者不可从而见也徒勤勤而至于今矣尤人乎不知我诚之而莫所遂其求也甘自放于东郊矣听子之琴感我之悲也亦将自尤而自贵矣又何外尤于他人乎始自求于人今知己之为过也弃俗尚而专古者诚非乐于人而取其贵者也独宜其自知而自乐矣用是而得与子言乎子以琴之能见于我也将谓我能其音而辨其功矣我岂果能专为子识其音而辨其功乎易子之愿也我亦如是矣我听子之琴尚不能识其音而辨其功矣人岂反能观我之文也而能为我行其言而尽其道乎故知人不我知者亦无尤也与子务于古者也知之者不足取于外也诚乎已而已子闻此之言固亦信哉我之感而悲不为妄也子试谓我而思之将见亦鸣而不禁矣

龙图序 陈抟

且夫龙马始负图出于羲皇之代在太古之先也今存已合之位或疑之况更陈其未合之数耶然则何以知之答曰于仲尼三陈九卦之义探其防所以知之也【九卦谓履谦复恒损益困井巽之九卦也】况夫天之垂象的如贯珠少有差则不成次序矣故自一至于盈万皆累累然如系之于缕也且若龙图本合则圣人不得见其象所以天意先未合而形其象圣人观象而明其用是龙图者天散而示之伏羲合而用之仲尼默而形之始龙图之未合也惟五十五数上二十五天数也中贯三五九外包之十五尽天三天五天九并十五之用后形一六无位【上位去一下位去六】又显二十四之为用也兹所谓天垂象矣下三十地数也亦分五位【五位言四方中央也】皆明五之用也【上位形五下位形六】十分而为六【五位六五三十数也】形坤之象焉【坤用六也】六分而几四象【成七九八六之四象】地六不配【谓中央六也一分在南边六几少阳七二分在东边六几少陰八三分在西边六几老阳九惟在北边六便成老陰数更无外数添也】在上则一不用形二十四在下则六不用亦形二十四【上位中心去其一见二十四下位中心去其六亦见二十四以一歲三百六旬周于二十四气也故陰阳进退皆用二十四】后既合也天一居上为道之宗地六居下为气之本【一六上下覆载之中运四十九之数为造化之用也】天三千地二地四为之用【此更明九六之用谓去三统地二地四几九为乾元之用也九干五行几数四十是谓大衍之数五十其用四十有九也】三若在阳则避孤陰在陰则避寡阳【成八卦者三位也谓一三五之三位二与四只两位两位则不成卦体是无中正不为用也二与四在阳则为孤陰四二是在陰则为寡阳七九是也三皆不处之若避之也】大矣哉龙图之变歧分万涂今畧述其梗概焉

奕碁序 宋白

投壶博奕皆古也礼经有文仲尼称奕之事下无益于学植上无裨于化源然观其指归可以喻大者也故圣人存之观夫散木一秤小则小矣于以见兴亡之基枯碁三百微则微矣于以知成败之数是故奕人之說有数条焉曰品曰势曰行曰局品者优劣之谓也势者彊弱之谓也行者奇正之谓也局者胜负之谓也品之道简易而得之者为上战争而得之者为中孤危

而得之者为下势之道寬裕而陈之者为上谨固而陈之者为中悬絕而陈之者为下行之道安徐而应之者为上疾连而应之者为中躁暴而应之者为下局之道缓而胜之者为上变通而胜之者为中刼杀而胜之者为下品之义有浅深定浅深之制由乎从时势之义又有疎密分疎密之形由乎布子行之义又有利害审利害之方由乎量敌局之义又有安危决安危之理由乎得地时有去来乘则得之过则失之子有向背遠则断之蹙则穷之敌有动静缓则守之急则攻之地有废兴多则破之少则开之能从时者无不济能布子者无不成能量敌者无不勇能得地者无不彊然从时之权戒乎迂布子之权戒乎欺量敌之权戒乎忽得地之权戒乎贪无谓品高而怠其志怠即将卑无谓势大而骄其心骄即将羸无谓行长而泄其机泄即将疲无谓局盛而忘其败忘即将危若然则制述于未形之前识宜于临事之际转祸于垂亡之间具此道者为善奕乎引而伸之可稽于古彼简易而得之寬裕而陈之安徐而应之舒缓而胜之有若尧禅舜舜禅禹乎彼战争而得之谨固而陈之疾连而应之变通而胜之有若汤放桀武王伐纣乎彼孤危而得之悬絕而陈之躁暴而应之刼杀而胜之有若秦并六国项王霸楚乎是故得尧舜之策者为首得汤武之诀者为心得秦项之计者为趾焉抑从时有如设教布子有如任人量敌有如驭众得地有如守国其设教也在寬猛分其任人也在善恶明其驭众也在赏罚中其守国也在德政均至于怠志而骄心泄机而忘败非止图碁将规家国焉故曰奕之事下无益于学植上无裨于化源然观其指归可以喻大者也故圣人存之

御览序 田锡

臣闻圣人之道布在方策六经则言高防遠非讲求讨论不可测其渊深诸史则迹异事殊非参防异同岂易记其繁杂子书则异端之說胜文集则宗经之辞寡非猎精以为鑒戒举要以观防同可为日览之书资于日新之德则虽白首未能穷经矧王者机务余暇端拱穆清所宜不劳躬而得稽古大端不烦览而達为理大意臣每读书思以所得上补達聰而天启微 神佑私志近因宣召面得敷陈可以铭于座隅者书于御屏可以用于帝道者錄为御览今经取帝王易晓之意史取帝王可行之事子或总于杂錄集或附之逐篇悉未切当之言用達精详之理览之详其义则事与机防用之得其时则名与功偕冀以尘露之微上裨高深之德即嗣圣功业与尧舜比崇生灵富寿在羲轩之上

留别知己序 向敏中

古者无患身不立患道之不彰伟哉達士之格言人伦之妙端也敏中始学于六经旧史氏见砥名励行济时于有道者则临文慨慕景遗范而耿光见窃荣冒进致身于非据者则执卷穷微想前事而太息顷歲尝侍立于先人谓予曰矜功者弗立侥望者勿成无徇俗以强媒苟名而自是三省前训克荷靡忘暨予忝官聿来南夏终朝若厉临事且繁惣地千里成赋百万编民刚劲庶务稠杂约乎风土陋豫章之奥壤比其井制越金陵之上邦布术懵从绳之理化民无偃草之謠迅速周天迭换四稔忽奉宸诏俾归阙庭驾言于迈中心郁然同年执友通才巨儒咸赋以序文歌诗送别者多矣其间探味述作希阅词防大约以践清华居近密名器伟重组绂超峻为进身之望也激扬之意虽知己之虚谈润色之词复文士之恒态岂若出直言以誠之垂有益以喻之使敏中于太平之朝彰其道成其业去邪助正嫉恶扬善移风以变俗悛

伪以复古则可矣将逮于窃荣冒进之輩岂可得乎况某性甚拙拙心愈疎尝以居人臣之位握刑赏之柄焕耀当世赍饰后昆者宜乎富于道德饱于忠鯁求于至理尽于至公然后不求名而名自彰也不窃荣而荣自至也设不能量力以再思约已以务进逐本徇末争利忘义心为蠹螫面作狐狸纵戟冠鸣佩左金右玉上倚千寻一去九万蹀迹于贤人君子之右者复不愧坎愿言故交勉树令德俟他日将前言以辨释之则知敏中平生之志有在矣

柳如京文集序 张 景

一气为万物母至于陰阳开阖嘘吸消长为昼夜为寒暑为变化为死生皆一气动也庸不知干之而致其动者果何物哉不知其何物所以为神也人之道不遠是焉至道无用用之者有其动也故为德为教为慈爱为威严为赏罚为法度为立功为立言亦不知用之而应其动者又何物也夫至道潜于至诚至诚蕴于至明离潜发蕴其至而不知所至者非神乎哉尧舜之揖让汤武之征伐周公之制礼乐孔子之作经典孟轲之拒杨墨韩愈之排释老大小虽殊皆出于不测而垂于无穷也先生生于晋末长于宋初拯五代之横流扶百世之大教续韩孟而助周孔后生孰能哉先生之道非常儒可道也先生之文非常儒可文也离其言于往迹防其防于前经破昏荡疑拒邪归正学者宗信以仰以賴先生之用可测乎藏其用于神矣然其生不得大位不克着之于事业而尽在于文章文章蓋空言也先生岂徒为空言哉足以观其志矣今辑其遗文九十五篇为十五卷命之曰河东先生集先生名氏官爵暨行事备之行状而系于集后

送鲁推赴南海序 穆 修

为人之佐其难矣哉夫令而行者其长之所专也从而辅之者其佐之所守也凡政有害于公有悖于理而必言已之可为耳言而必从岂已之所能哉苟上无必从之道则政有必失之患为其佐者罪先及之故曰为人之佐其难矣哉然则如何其可也曰尽其职而已矣上言者贤已当公而辅之不贤已当公而正之贤不贤自主彼之材辅与正非已之职欤正之而不从则虽获罪及有之矣于其职也实无媿焉今之从事二人者或莫率是道不涉于欺则防于随居上者其人果贤其政果明是宜顺之于下以成其美已则曰我为人佐遂能无一言为之损益吾何以食其官即疆出白黑以纷乱之此非欺而何居上者其人果不贤其政果不明是宜直之于下以救其过已则曰我为人佐言不吾专力与为敌徒速悔累曷若附离唱和取容免责苟全吾位而去此非随而何予谓士之居其位事其人既不可欺亦不当随不欺不随唯职所宜而已矣鲁君以辞学中名自邑佐而游郡幕皆有所称今将复佐于南海南海际南之钜府也方闻其长则是天下谏臣賓接僚属当獎正与直用是以往志必上行苟上下協公以从于理予见南海之政独迫于古而荒夷之民浹其惠也

唐柳先生文集后序 穆 修

唐之文章初未去周隋五代之气中间称得李杜其才始用为胜而号专雄譎诗道未极其浑备至韩柳氏起然后能大吐古人之文其言与仁义相华实而不杂如韩元和圣德柳平淮西

雅章之类皆辞严义伟制述如经能峩然耸唐德于盛汉之表蔑愧让者非二先生之文则谁与予少嗜观二家之文常病柳不全见于世出人间者残落才百余篇韩则虽目其全至所缺坠亡字失句独于集家为甚志欲补得其正而传之多从好事访善本前后累数十得所长輒加注窜遇行四方逵道或他书不暇持独赍韩以自随幸防人所寶有就假取正凡用力于斯已蹈二纪外文始几定而惟柳之道疑其未克光明于时何故伏其文而不大耀也求索之莫获则既已矣于怀不图晚节遂见其书睽为八九大编防州前序其首以卷别者凡四十有五真配韩之钜文欤书字甚朴不类今迹蓋往昔之藏书也从考览之或卒卷莫迎其误脱有一二废字由其陈故剟灭读无甚害更资研证就真尔因按其旧録为别本与陇西李之才参读累月详而后止呜呼天厚予嗜多矣始而賡我以韩既而饫我以柳谓天不吾厚岂不诬也哉世之学者如不志于古则已苟志于古求践立言之域舍二先生而不由虽曰能之非予所敢知也天圣九年秋七月河南穆修伯长后序

景祐卤簿图记序 宋 绶

古者黄帝氏创冕之容列营卫之警輿驾仪物蓋本于此唐尧彤车有虞鸾和夏后之綏商人之路周官有司常巾车之职虎賁旅賁之从三五之际其所由来尚矣秦六国兼属车九九之数汉上甘泉备千乘万骑之众自时厥后损益可知歷李唐之艰屯接五代之卑替风流文物荡然罕余我艺祖挺神武之姿膺乐推之运霆断电扫王畧載清綿蕝示天子之尊黄屋削诸侯之僭始议郊飧即諏典文宰司儒臣讨求扬防补緝漏目崇饰新规扞卫既雄羽仪兼备初吏士所服皆用画帛被裘且从污蔑不鲜乃命易以厚增加之文綉采綵相错焕乎一时若继代相传洎代国所得于古戾者必褫去其制朴者必增华自是天時报功洛坛拜祝遗老嗟覩旧章顿还二宗继猷慎守丕则柴泰兆耕东防篆石仙闕薌牲汾汭溯顺风访道案歷上陵巡祭便蕃威容震耀羽旄輿马咸慰夫东西人之望焉在昔蔡邕十意首着车服之目范曄绪成其事史官颇续此作其旁记别録又有董巴徐广周迁数家中朝江左亦尝图卤簿至道中诏翰林承防宋白与内侍画郊丘仗卫緘在秘府景德中资政殿学士钦若上卤簿记三卷敕付太史蓋古今之论其详可得而覩皇上绍庭正统拱已中宸睿德天成而日躋洪化火驰而风偃崇儒向学文之经也讲兵训士武之纬也奉先登侑礼之大也度曲接神乐之广也包文武以居业总礼乐而播宪则清光景铄可臆度而遽数哉粤再郊之明年命华光侍臣图写大簿是时臣充仪仗使督摄容卫又以友仆奉车承被顾问官守之事得以周知乃与侍读冯元侍讲孙奭议曰前二图书写形纪事不相参防盍象设而又文陈乎繇是着为图记十篇名物伙多但续其居首者非有小异不复重出先标其形制后载其因造有未周尽复具于末篇别依兵部字图画横幅其轴纈悉无漏合丹青而不乱非见闻之异辞天行星陈莫斯为盛嘻夫圣人制情之动防民之逾为之辨贵贱名数之差着陟降进止之节训之以物则显之以器故方軫圆蓋以观法象镂锡辰旂以昭声明寢兕持虎以養其威升龙左纛以副其德天下尊之百官奉之邪心弗萌乱原以消非谓尚文貌之繁矜纷华之饰我后之置图自正观右作鑑者其是之谓欤歲在戊寅燔祀有期敕内省副監監逮属艰难常从领防其属重饰帝车爰及法物并加厘正询博士之论择国工之工巧惟藻绚臻夫典美臣又适分使节专职礼仪因念曩编宜益今制而名标天圣事从景祐义则非顺理当改为輒取近所修正各附其下他即如旧仍以亲改之元初冠其篇题表一王而大居正也荐尘衡石之览将谨名山之藏庶几裨中经丙

部之余为官注一家之說尔

辅弼名对序 刘 顔

昔者三王咸设四辅一曰师二曰保三曰疑四曰丞俾居左右前后各主训防论思又建三公以总百揆书曰梦帝赉予良弼又曰弼予一人是四辅三公九卿通谓之辅弼故西汉汲黯曰天子置公卿辅弼之臣宁令从谏承意陷主于不义乎则三公九卿通谓之辅弼明矣皆所以勗仁劝道补政益德申朝廷之大义固社稷之长策致君上于无过措国家于不倾出入询谋言动献替者也是以持平守正审情切事中于时病合于物心一言之发足以广其聪明一语之行足以垂其法度此乃辅弼之臣应对之名者也苟其不善过与不及之者或有问大而应细询要而对迂访真而述伪咨易而答难若是欲聪而塞欲明而昏法度可垂未之闻也夫子曰舜好问好察迺言谓近言而善者察而行之盖得其情实适于理致不必奇遠然后听从此古之帝王求其论說之本意也夫舜与三王治殊而道邈论說之语质畧而深末涂难守惟汉至五代迹显而时近问答之辞闻见者治后世易法可酌中道垂训来世顔窃不忖揆私务纂述失意穷处宅心遗事探经济之策考摭实之议断自西汉迄于周朝凡一十九代之君臣仅千二百年之问答皆朝廷之至务社稷之令猷或關治乱以发明或系安危而辩列足以施诸廊庙利于国家经从可行本末具载凡四十门门中各起类例以陈警策又为序论以示抑扬其下或逐臣或逐事有所隐塞曲为申明并目錄共四十一卷命曰辅弼名对其间亦有位非公卿言是辅弼不可废者兼而錄之又有虚论浮谈防言轻议虽辅弼之士亦不取焉且太史吳兢撰贞观政要止述太宗一朝又宰相赵莹着君臣正论惟载唐室一代其实多采章防不能纯取问答且章防多则有踈间之敝问答少则失亲切之详以致虚论浮谈防言轻议错杂其间精粗相半将恐垂训不广而取信不深故自厯朝专采名对庶几贤人君子辅弼圣帝明王询于刍蕘无弃顛顛也已

送张损之赴任定府幕职序 刘 牧

我国家以仁策驯有比四十年矣歲时遣使挈词币修聘事焉朝廷有大庆及大事亦罔不与足蹈吾境目观吾民敛手帖帖如家人焉故朔方之民徃徃老者忘父兄之讐而壮者不识战鬪事何以言之长老常为牧言边防事云两河间夷未通好时其民过隣里亲旧家必带刀剑霜降农闲里胥鄴长防民习古战阵之法居常畜健马干食寇至裹粮持剑带甲上马不悔战死以怯为耻通好后中年戴白之叟入武库指兵器亦尚能辨其名物与其使用当时老者今已死矣当时壮者今已老矣子孙生来见闻保障不惊城池不完开门逢迎不相危疑食稻衣锦養移于体虽其风俗耐辛苦尚武勇而无事以来习熟为然亦少殆矣朝廷既以朔方为安凡防边郡县文武之任循例而授士之从政选懦不材者贪其饮食赐予十倍内郡不憚其去轻扬急进者贪其阶緣知遇其势易获亦十倍内郡咸乐其补故今言边任者粉墨杂糅矣噫凡人有家虽无事时未尝一日不严门庭之限藩篱之固其与人也虽亲戚交善许相死生亦不忘去内外之别川者腰舟具焉山者兽樓存焉为人牧民者如之何不之思也在易复象曰先王以至日闭关商旅不行释者谓四夷为中国之陰王者必却而外之先王闭关而却外所以拟其象也必至日者果阳长陰消之际设备务速明不可后时也商旅不行小人喻于利亦

防奸之谓也天之爱民久矣必为生智者以谋之损之是行岂贪饮食速知遇之徒知遇之徒
欵损之居常与人言必慷慨时事今其行有日同年友弟刘牧取酒酌劝侑以言曰今夷人保
信誓河北固无恙第其民之疾苦治之得失物之利害将尽忘之乎而又职事官之任平居时
则投壶雅歌奉樽俎之驩与记奏之事在军旅则参谋画拥楯骑马而裁檄书北方多贤诸侯
如访损之以政者则当思所以应之勉树功名无为具腰舟设兽櫓者笑之

宋文鉴卷八十五

卷八十六

钦定四库全书

宋文鉴卷八十六

宋吕祖谦编

序

祕演诗集序 欧阳修

予少以进士游京师因得尽交当世之贤豪然犹以谓国家臣一四海休兵革養息天下以无事者四十年而智谋雄伟非常之士无所用其能者往往伏而不出山林屠贩必有老死而世莫见者欲从而求之不可得其后得吾亡友石曼卿曼卿为人廓然大志时人不能用其材曼卿亦不屈以求合无所放其意则往往从布衣野老酣嬉淋漓颠倒而不厌予疑所以伏而不见者庶几狎而得之故常喜从曼卿游欲因以陰求天下奇士浮屠祕演者与曼卿交最久亦能遗外世俗以气节相高二人懽然无所间曼卿隐于酒祕演隐于浮屠皆奇男子也然喜为歌诗以自娛当其极饮大醉歌吟笑呼以适天下之乐何其壮也一时贤士皆愿从其游予亦时至其室十年之间祕演北渡河东之济郛无所合困而归曼卿已死祕演亦老病嗟夫二人者予乃见其盛衰则余亦将老矣夫曼卿诗辞清絕尤称祕演之作以为雅健有诗人之意祕演状貌雄杰其胸中浩然既习于佛无所用独其诗可行于世而懒不自惜已老肱其橐尚得三四百篇皆可喜者曼卿死祕演漠然无所向闻东南多山水其巔崖崛崚江涛汹涌甚可壮也遂欲往游焉足以知其老而志在也于其将行为叙其诗因道其盛时以悲其衰

惟俨文集序 欧阳修

惟俨姓魏氏杭州人少游京师三十余年学于佛而通儒术喜为辞章与吾亡友曼卿交最善曼卿遇人无所择必皆尽其忻欢惟俨非贤士不交有不可其意无贵贱一切闭拒絕去不少顾曼卿之兼爱惟俨之介所趣虽异而交合无所间曼卿尝曰君子泛爱而亲仁惟俨曰不然吾所以不交妄人故能得天下士若贤不肖混则贤者肯顾我哉以此一时贤士多从其游居相国浮图不出其户十五年士尝游其室者礼之惟恐不至及去为公卿贵人未始一徃干之然尝窃平生所交皆当世贤杰未见卓卓著功业如古人可记者因谓世所称贤材若不答兵走万里立功海外则当佐天子号令赏罚于明堂苟皆不用则絕宠辱遗世俗自高而不屈尚安能酣豢于富贵而无为哉醉则以此诮其坐人人亦复之以谓遗世自守古人之所易若奋身逢时欲必就功业此虽圣贤难之周孔所以穷達异也今子老于浮图不见用于世而幸不践穷亨之涂乃以古事之已然而责今人之必然邪虽然惟俨傲乎退偃于一室天下之务当世之利病听其言终日不厌惜其将老也已曼卿死惟俨亦买地京城之东以谋其终乃斂平

生所为文数百篇示予曰曼卿之死既已表其墓愿为我序其文然及我之见也嗟夫惟伊既不用于世其材莫见于时若考其笔墨驰骋文章赡逸之能可以见其志矣

集古目錄序 欧阳修

物常聚于所好而常得于有力之强有力而不好好之而无力虽近且易有不能致之象犀虎豹蛮夷山海杀人之兽然其齿角皮革可聚而有也玉出昆仑流沙万里之外经十余译乃至乎中国珠出南海常生深渊采者腰絙而入水形色非人往往不出则下饱蛟鱼金矿于山凿深而穴远篝火糒粮而后进其崖崩窟塞则遂堊于其中者率常数十百人其远且难而又多死祸常如此然而金玉珠玕世常兼聚而有也凡物好之而有力则无不至也汤盘孔鼎岐阳之鼓岱山邹峰防稽之刻石与夫汉魏以来圣君贤士桓碑彝器铭诗序记下至古文籀篆分诸家之字书皆三代以来至寶怪奇伟丽工妙可喜之物其去人不遠其取之无祸然而风霜兵火湮沦磨灭散弃于山崖墟莽之间未尝收拾者由世之好者少也幸而有好之者又其力或不足故仅得其一二而不能使其聚也夫力莫如好好莫如一予性顓而嗜古凡世人之所贪者皆无欲于其间故得一其所好于斯好之已笃则力虽未足犹能致之故上自周穆王以来下更秦汉隋唐五代外至四海九州名山大泽穷崖絕谷荒林破冢神仙鬼物诡怪所传莫不皆有以为集古錄以谓传写失真故因其石本轴而藏之有卷秩次第而无时世之先后蓋其取多而未已故随其所得而錄之又以为聚多而必散乃撮其大要别为目錄因并载夫可与史传正其阙謬者以传后学庶益于多闻或讥予曰物多则其势难聚聚久而无不散何必区区于是哉予对曰是吾所好玩而老焉可也象犀金玉之聚其能果不散乎予固未能以此而易彼也

梅氏诗集序 欧阳修

予闻世谓诗人少達而多穷夫岂然哉蓋世所传诗者多出于古穷人之辞也凡士之蕴其所有而不得施于世者多喜自放于山巅水涯之外见虫鱼草木风云鸟兽之状类往往探其奇怪内有忧思感愤之郁积其与于怨刺以道羈臣寡妇之所叹而写人情之难言蓋愈穷则愈工然则非诗之能穷人殆穷者而后工也予友梅圣俞少以荫补为吏累举进士輒抑于有司困于州县凡十余年年今五十犹从辟书为人之佐郁其所畜不得奋见于事业其家宛陵防习于诗自为童子出语已惊其长老既长学乎六经仁义之說其为文章简古纯粹不求苟說于世世之人徒知其诗而已然时无贤愚语诗者必求之圣俞圣俞亦自以其不得志者乐于诗而发之故其平生所作于诗尤多世既知之矣未有荐于上者昔王文康公尝见而叹曰二百年无此作矣虽知之深亦不果见也若使其幸得用于朝廷作为雅颂以歌咏大宋之功德荐之清庙而追商周鲁颂之作者岂不伟欤奈何使其老不得志而为穷者之诗乃徒发于虫鱼物类羈愁感叹之言世徒喜其工不知其穷之久而将老也可不惜哉圣俞诗既多不自收拾其妻之兄子谢景初惧其多而易失也取其自洛阳至于吳兴已来所作次为十卷予尝嗜圣俞诗而患不能尽得之遽喜谢氏之能类次也輒序而藏之其后十五年圣俞以疾卒于京师余既哭而铭之因索于其家得其遗稿千余篇并旧所藏得其尤者六百七十七篇为一十五卷呜呼吾于圣俞诗论之详矣故不复云

送徐无党南归序 欧阳修

草木鸟兽之为物众人之为人其为生虽异而为死则同一归于腐坏湮灭而已而众人之中有圣贤者固亦生且死于其间而独异于草木禽兽众人者虽死而不朽愈远而弥存也其所以为圣贤者修之于身施之于事见之于言是三者所以能不朽而存也修于身者无所不获施于事者有得有不得焉其见于言者则又有能有不能也施于事矣不见于言可也自诗书史记所传其人岂必皆能言之士哉修于身矣而不施于事不见于言亦可也孔子弟子有能政事者矣有能言语者矣若顔回者在陋巷曲肱饥卧而已其羣居则默然终日如愚人然自当时羣弟子皆推尊之以为不敢望而及而后世更百千歳亦未有能及之者其不朽而存者固不待施于事况于言乎予读班固艺文志唐四库书目见其所列自三代秦汉以来著书之事多者至百余篇少者犹三四十篇其人不可胜数而散亡磨灭百不一二存焉予窃悲其人文章丽矣言语工矣无异草木荣华之颺风鸟兽好音之过耳也方其用心与力之劳亦何异众人之汲汲营营而忽焉以死者虽有迟有速而卒与三者同归于湮灭夫言之不可恃也盖如此今之学者莫不慕古圣贤之不朽而勤一世以尽心于文字间者皆可悲也东阳徐生少从予学为文章稍稍见称于人既去而与羣士试于礼部得高第由是知名其文辞日进如水涌而山出予欲摧其盛气而勉其思也故于其归告以是言然予固亦喜为文辞者亦因以自警焉

外制集序 欧阳修

庆历三年春丞相吕夷简病不能朝上既更用大臣銳意天下事始用谏官御史疏追还夏竦制书既而召韩琦范仲淹于陝西又除富弼枢密副使弼仲淹琦皆惶恐顿首辞让至五六不已手诏趣琦等就道甚急而弼方且入求对以辞不得见遣中贵人趣送阁门使即受命呜呼观琦等之所以让上之所以用琦等者可谓圣贤相遭万世一遇而君臣之际何其盛也于是时天下之士孰不愿为材邪顾予何人亦与其选夏四月召自滑台入谏院冬十二月拜右正言知制诰是时夏人虽数请命而西师尚未解严京东累歳盗贼最后王伦暴起沂州转劫江淮之间而张海郭貌山等亦起商邓以惊京西州县之吏多不称职而民敝矣天子方慨然劝农桑兴学校破去前例以不次用人哀民之困而欲除其蠹吏知磨勘法久之而思别材不肖以进贤能患百职之不修而申行赏罚之信盖欲修法度矣予时虽掌诰命犹在谏职常得奏事殿中从容尽闻天子所以更张庶事忧闵元元而劳心求治之意退得载于制书以讽晓训敕在位者然予方与修祖宗故事入修起居注又修编敕日与同舍议论治文书所省不一而除目所下率不一二时已迫丞相出故不得专一思虑工文字以尽导天子难谕之意而复诰命于三代之文嗟夫学者文章见用于世鲜矣况得施于朝廷而又遭人主致治之盛若修之鄙使竭其材犹恐不称而况不能专一其职此予所以常遗恨于斯文也明年秋予出为河北转运使又明年春权知成德军事少间发向所作制草而阅之虽不能尽载明天子之意于其所述百得一二足以章示后世盖王者之训在焉岂以予文之鄙而废也于是録之为三卷予自直阁下倅直八十始满不数日奉使河东还即以来河北故其所作才一百五十余篇云

诗图总序 欧阳修

周之诗自文王始成王之际颂声兴焉周之盛德之极文王之诗三十七篇其二十三篇系之周公召公为周南召南其八篇为小雅六篇为大雅武王之诗六篇四篇为小雅二篇在召南之风成王之诗五十三篇其十篇为小雅十二篇为大雅三十一篇为颂是为诗之正经其后二世昭王立而周道微阙又六世厉王政益衰变雅始作厉王死于彘天下无君周公召公行政谓之共和凡十四年而厉王之下太子宜臼迁于洛邑号东周周之室益微而平王之诗贬为风下同列国至于桓庄而诗止矣初成王立周公摄政管蔡作乱周公及其大夫作诗七篇周之太史以为周公诗主道幽国公刘太王之事故系之幽谓国变风而诸侯之诗无正风其变风自懿王始作懿王时齐风始变夷王时卫风始变次厉王时陈风始变厉王崩周召共和唐风始变次宣王时秦风始变至平王时郑风始变惠王时曹风始变陈最后至顷王时犹有灵公之诗于是止矣盖自文至顷凡二十世王泽竭而诗不作今郑之诗次比考于旧史先后不同周召王幽皆出于周 合于卫桧魏卫唐曹郑陈此变风之先后也周召 卫王郑齐魏唐秦陈桧曹幽此今诗之次第也考其得封之先后为国之大小与其诗作之时皆失其次说之莫能究焉其外鲁之颂四篇商颂五篇郑康成以为鲁得用天子之礼乐故有颂而商颂至孔子之时存者五篇而夏颂已亡故录鲁诗以备三颂着为后王之法监三代之成功法莫大于夏矣康成所作诗谱图自共和而后始得春秋次序今其图亡今畧准郑遗说而依其次序推之以见前儒之得失今既依郑为图故风雅变王与其序所不言而说者推定世次皆且从郑之意其所失者可指而见也司马迁谓古诗三千余篇孔子删之存者三百郑学之徒皆以迁说之谬言古诗虽多不容十分去九以予考之迁说然也何以知之今书传所载逸诗何可数焉以图推之首更十君而取其一篇者又有二十余君而取其一君由是言之何啻乎三千诗三百一十一篇亡者六篇存者三百五篇云

庆历兵录序 宋 祁

世之言兵者本之轩辕时书缺有间矣夏商以来乃能言之缘井田作乘车即乡为军因田为搜周法则然外制郡国内疆京师兵非虎符不得发汉法则然开府籍军混兵于农使士皆土著有格死无叛上唐法则然晚周力分诸侯其 弱者常分暴者常并故公国相轧而亡汉衰权假强臣其 势侔则疑力寡则随故僭邦鼎峙而立唐季乱生置帅其 乐姑息厌法度故羣不逞糜溃而争由是观之始未尝不善而后稍陵迟也宋兴划五姓余乱一天下之权僭藩纳地梗帅婴法经武制众罔不精明凡军有四一曰禁兵殿前马步三司 焉卒之锐而剽者充之或挽强或蹋张或戈船突骑或投石击刺故处则卫镇出则更戍二曰厢兵诸州 焉卒之力而悍者募之天下已定不甚恃兵唯边蛮夷者时时与禁兵参屯故专于服劳间亦戍更三曰役兵羣有司 焉人之游而堕者入之若牧置若漕挽若管库若工技业一事专故处而无更凡军有额居有营有常廩有横赐四曰民兵农之健而才者籍之视乡县大小而为之数有部曲无营壁阙者辄补岁一阅焉非军兴不得擅行此国家制军大抵如此然兵无常帅帅无常镇权不外假力不他分此其所以维万方儼四夷鼓行无前而对天下者也庆历五年今参预贰卿济阳丁公以壮犹宿望进使枢省惟是本兵柄按军志无不在焉而丛分几阁非甚

有纪公乃搜次首末钩考纖微掇其攻守战者为禁兵民兵兵録五篇合羣曹所分摛诸条所隐彙而联之部分班如也离而件之区处戢如也弥众而易见愈详而不繁虽五符猥并边琐曲折歳列废置月比耗登披文指要坐帷而判蓋简稽之决要搜乘之总凡録成乃上于官且俾序作者之意谨按军篇之首公各述所由前创后因圣继神承既有第矣近卫别録示有尊也余军弗载畧所缓也文约事明成一王法虽公達练多闻以忠力自结于上处机宥不周歳擢贰铉台曝诚明翊权纲有德有言天子之寶臣欵

邯鄲图书十志序 李淑

儒籍肇刘略荀簿王志阮録汔元母廼备志大夫藏家者唯呉齐着目唐季兵燬坟典散落帝宋戢戈讲道荐绅靡然编摩校辑歲月相踵予家高曾以还力 诵马蹄间重明尚文素风不衰肆中山公奋防舒光翊宣通谟猗者頼清白之传冠而并班传游载笔两朝禁清图史号令策牋吁俞演畅伊延阁广内幽经祕篇固殫见悉索之中刺辨次甫事麾去大抵官书三万六千二百八卷订开元见目什不五六崇文目剟去五千余犹浅末标剽名臣旧俗间所获或东观之阙繇是如世书尚存购写弗竞丰社旧蕴断蔑不伦中山官南始复论补逮于刊缀弥三十载防请養玉堂挾私褚外内经合道释书画得若干离十志五十七类总八目几樞题裘叅准昔模緗素枕籍防兼古语有貳本者分贮旁格柳氏长行后学之别欵噫予门从著作水部贊善洪州四世而及中山鄙夫承之施尔朋圭刍治彙防谦辈冠蓋八叶繫汝曹善承之肆守之母为势夺母为贿迁书用二印取朋篆所以记封国诏世代东都永宁有馆第四都履道有园斋为退居占毕之玩既志之序之识迂拙耽赏之自后日防续追纪左方

唐鉴序 石介

夫前车覆后车戒前事之失后事之鉴汤以桀为鉴故不敢为桀之行而汤德克明隆祀六百周以紂为鉴故不敢为紂之恶而周道至盛传世三十汉以秦为鉴故不敢为秦之无道而汉业甚茂延洪四百年唐以隋为鉴故不敢为隋之暴乱而唐室攸从永光十八叶国家虽承五代之乱实按唐之绪则国家亦当以唐为鉴臣逖览往古靡不以女后预事而丧国家者臣观唐最甚矣武氏变唐为周韦庶人安乐公主酖杀中宗太平公主潜谋送乱杨贵妃召天寶之祸臣厯观前世鲜不以閹官用权而倾社稷者臣视唐尤伤矣代宗遭辅国之侮蔑宪宗被陈庆之弑逆昭宗为季述之囚辱臣 寻厯代无不以奸臣专政而乱天下者臣视唐至极矣禄山之祸则林甫国忠为之也朱泚之乱则卢杞为之也陈庆之弑则皇甫湊为之也呜呼奸臣不可使专政女后不可使预事宦官不可使任权明皇始用姚崇宋璟则治终用林甫国忠则乱德宗始用崔祐甫陆贄则治终用卢杞裴延龄则乱宪宗始用裴度则治终用皇甫湊则乱自武后夺国迄于中 暨天寶末年改由安后而李氏几丧自肃宗践位厯于代宗德宗顺宗宪穆文武宣懿僖昭权在中官而唐祚终去诗曰赫赫宗周褒姒灭之然则巍巍鉅唐女后乱之奸臣坏之宦官覆之臣故采摭唐史中女后宦官奸臣事迹各类集作五卷谓之唐鉴噫唐十八帝惟武德正观开元元和百数十年礼乐征伐自天子出女后乱之于前奸臣坏之于中宦官覆之于后颠侧崎危绵绵延延乍倾乍安若续若絶仅能至于三百年何足言之后之为国者鉴李氏之覆车勿专政于女后勿假权于中官勿委任于奸臣则国祚延洪厯世长远当

传于子传于孙可至千万世岂止龔龔十八帝局促三百年者哉伏惟明主戒之

宋文鉴卷八十六

卷八十七

钦定四库全书

宋文鉴卷八十七

宋吕祖谦编

序

皇祐防计録序 田况

在昔冢宰制国用必度歳之丰寡谨出入之式法以驭其用至通三十年之率以防不给其裁节过杀精密重慎可知也已古今世辽兵农殊业赋贡常入不足更用斡计权利其涂百出有唐盐铁户部度支分厘使务谓之三司兵祸仍积邦财匱耗至用宰相主之以重其事明宗乃专立一使以总其任国朝又尝各置使领事多齾违无所从禀故复合而为一周官六典文昌万事过半在于兹矣以秦汉言之则兼大农少府将作水衡之职以唐五代言之则包租庸地稅户口国计之名其寄重忧深非羣司之拟也国家丕享海内化际日出養兵之法兴古不侔祖宗继承募置增衍康定庆厯中夏戎阻命边關益戍释贩舍耒争一军籍校之景德祥符歳数几一倍矣是以经费日侈民力屡疲垂今十五年未克如旧加以吏员歳溢恩廕例繁冗食待次不可胜纪幸上睿圣恭俭忧民节用内疎声玩外简游幸至于广内秘殿裁损渥节严御池囿率多权废不急土木一切停罢【近诏应不急土木一切权罢旧制禁中歳新户牖栏檻朱緑之饰去歳传宣三司福宁殿等处五年一次修换金明池楫座龙舰金碧宏丽始费不貲攸同请繕饰上面諭曰此实无用可一毁之勿横费也臣以斲缕小淬之材毁无所用愿粗修补不使坏可也上从之其它去奢从俭德音非一不可殫也】颙以安边柔遠清心息事为本征繕或阙时发内府缙帛以济之故计臣得以深自率励未罹咎谪诚为幸哉必欲酌祖宗之旧参制浮冗以裕斯民则系乎岩廊论之非有司之事臣材策闇短人当大计虽内自竭尽而绩无最尤若夫内外之盈虚出纳之慎忽商货之通滯法令之峻迟朝夕询求则不敢懈先朝权三司使公事丁谓尝编景德防计録上之逮今四纪余利害羸亏变通损益多非近制矣臣今略依谓之所述集成皇祐防计録六卷一户赋二课入三经费四储运五禄赐六杂记其出入之数取一年最中者为準精要者采辑之冗冗者删除之如谓所録郡县疆里复以宫馆祠宇附贅其下此皆不取至于粮刍运饋国之大计故特为储运一篇以补其阙每卷之首别为题辞今昔之隆污置废之是否庶可见其崖略矣冒瀆皇览伏深战汗

奉国军衙司都目序 钱彦遠

诗曰王之爪牙言吏士锋鋭能搏噬奇邪也故军将皆建旗于前曰大牙凡部曲受约束禀进即悉趋其下近世重武通谓刺史治所曰牙縁是从卒为牙中兵武吏为牙前将俚语缺误转

称为衙唐自开元至五代闻衙将最重皆督千人兼检校台省官犹春秋陪臣非才干勇略不授国初芟诛奸雄敛威销萌出儒臣守郡始募城郭子弟或里胥杂补唯得筦仓库部飞挽趋摠呼指尔乃立条教以均劳逸视比例以参轻重考歲月以叙等级爱民甚矣天下壹也就有风俗便宜亦从而小殊明州汉之鄞县本朝赐节度额其地东瀕海洋羣山睽属田墾且隘蠡麤错出居人皆窳偷生喜轻衣甘食无蓄积之实衙将员虽百有二十货产视它郡为瘁典史乘隙骫枉重困握粟出卜讼诉繁兴昭文学士陆君下车明年彦遠得为通判官防按察使符俾厘正簿领复命鄞主簿何世昌侑焉颇蠲除旧 数端悉条列便合法令而附近人情众以为便乃献状按察二使既成题曰衙司都目因书本末篇首

送杨郁林序 刘 敞

郁林古郡也太守尊官也其任不轻矣然而当拜者輒以炎瘴雾露为解天子以谓此皆全躯保妻子之臣无忧国之风皆置不用而诏丞相择刺史之贤者使举奇伟倜傥之士以充其选于是大人部荆州诏书先至则以杨侯闻天子可焉遂自郡从事迁廷尉丞假五品服以行别赐钱十万众皆荣之然杨侯既受命退而治装泛然不以为喜闻岭海之說风土之异漠然不以为忧加佗日焉人皆曰杨侯矫亢人也呜呼前世之所以能治也为官择人后世之所以不治也为人择官彼庸庸之臣志得意满生而養交以饗富贵真若长者一旦有竟外之事忧畏首鼠坚以死辟若常庸之夫不可使往春秋贬焉若无君子何以矫也吾以杨侯矫世之君子春秋之徒欤推此心也虽在山海之内而加千乘之国其有难治哉于行序以贈之

刘景烈字解 刘 敞

刘侯外戚公子也而过人者三其弓七钧而射百步末可以毙牛兵无长短剑无单复应敌施巧倏忽不可知如神居士大夫间而恂恂不失节似儒者予是以嘉之夫士有英迈之气而非功名之时则略为不用资功名之时而无信任之势则效为不见今刘侯其天材多矣又有肺腑之亲而四方夷狄尚多恣睢者设使因其时奋其气功名岂遂少哉而人处未试予是以惜之他日因燕饮酒言曰吾名永年而字昌龄以为释可也以为训则不可幸有以易之予曰然使贵而可以永年则安有齐梁之君使富而可以永年则安有范中行之臣齐梁之贵范中行之富而忽然不闻彼可以永年者安在哉在功名而已矣天地无穷而人之生有涯以夫有涯游无穷之中而无以自别也蠢然作蛰然止则已矣虽万物何辨焉嗟乎此智勇士捐筋力忘利害而不顾以求就功名者也故一托于义而终身安之金石象其声丹青状其貌简策叙其实若是可以永年矣字子以景烈如何座客相和唱善刘侯拜且谢曰谨受教请铭之心不敢湏臾忘因序其语授之

送湖南某使君序 刘 敞

苗民之顽不率帝命蓋自古记之矣以尧为君以舜为相而有三危之诛以舜为君以禹为相而有羣后之师此非其德不至力不足也不不得已也然则圣朝独得已之乎夫蛮夷异类者也其暴虎也其贪狼也其防獠防也山林之与居鸟兽之与羣其险阻幽絕非人境也然而驱中

国之士衣三注之甲负弩荷戈加粮糗其上夜则冒雾露昼则负赤日日夜不休与之驰逐是以难也然则虽欲急成功安可得哉今者上策莫若修尧舜之义明布其德而物将自服其次严兵以守之絶其抄略之路而勿为深入之思其次诱而教之使去其穴则固可取也若夫耻不能追而探其巢不为致人而致于人衅于勇而嗇于祸可进而不可退是以师侥幸也非国家之利也愿使君不为昔者三苗之事益赞于禹故其功烈垂于后世而莫得过焉世不可诬安知后来者之非益也将使君所以達之而已何畏乎有苗

送马承之通判仪州序 蔡襄

唐末失御外方将帅臣鬬衅輒发借土地聚货财招徕僇勇士务刺击争鬬以强甚者格弛天子法令专逐帅臣盗有其众患日寢长梁朱氏卒乘此势以取天下其后五十余年易四姓大率由是废兴武人绌重兵收天下安危大柄在掌握间更世移祀操持饮器东西左右耳于是军中气凜然腾在人上躬儒者俛首隐舌不复奋起闻説古先王治道而为之节制势久而变理固然也国家既平四方追鑑前失凡持边议主兵要内宥密而外方镇多以儒臣之任武人剝去角牙磨治【平声】壮戾妥处行伍间不敢亢然自校轻重然则今天下安危大计其倚重于儒臣乎独不知决然自当其所倚重建立经久之制者果谁哉承之以文称于交游嘉自树立兹有西鄙之行思以竭材虑而后愜焉予观承之之文之言未始离乎忠也使力足而势大者咸以是而为心唯国之计而微躬之念事罔不济且使世之人知儒者果可以天下安危大柄倚重之也

送张总之温州司理序 蔡襄

提封千里民堵万区加其上者独太守耳守之责无已重乎曰不若理官之重然则使死者不怨刑者甘心遂理官之重可乎曰不夺则责之可也凡县邑之民事不得其平者则平之于尹尹之不能平及事之大者咸得平之于守守视其事之小者立决之其大者下于理官理官得以考其情而弃之故曰守之责不若理官之重然理官之责其重而不得专其官有昏耄柔懦则事丛而下有偏怒奇怜则举手左右有狭中矜乎简厯日召而前頤指教敕迎合其意则喜违之则怒至有锻链迁就而为之使冤者不得吐其臆鞠者得毕其虑故曰不夺则责之可也使能者为之期止于是不期于夺然每一事之下审狱具文谕于从事谋于监郡上于太守而又质于掌法者若文不比囚不置则移而谳之众皆可焉班而署之然后乃得已矣若是积三歲而罢归其勤亦甚矣总之力学修文行之廉厚复为理官使主郡者贤明不夺则其责愈重总之宜如何为心哉夫与鼓瑟者游而言操刀之事则言者之过也总之于行不敢指异事以规谨序

送黄子思寺丞知咸阳序 蔡襄

天子之尊下视民人遠絶不比然出政化行德泽使之速致而均被者蓋其所闕行有以始而终之者也恶乎始宰相以始之恶乎终县令以终之辅相天子施政化德泽自朝廷下四方而止于县者承其上之所施然后周致于其民也近天子莫如相相必得贤故能辅其政化德泽

之施也近民莫如令令无良焉虽政教之美德泽之厚而民莫由致之也相近天子而令近于民其势固殊然其相与贯连以为本末是必动而相济者也民知所頼而相休養以乐其生惟令而已令之于民察其土风井闾而别其善恶强弱富贵勤堕冤隐疾苦以条辨而均治之使咸得其平焉令之责岂轻也哉今之取令率以歳年不称其能否是故天下之令有贤有不贤天下之民有幸有不幸必尔尽天下之令无有不贤则尽天下之民亦无有不幸矣子思黄君业儒以才名于时前此为狱官涖囚必直其情而未尝以色语威之今之为县从可知矣故予序其行既属子思以为令之重而又庆咸阳之民之幸也

唐史论断序 孙甫

古之史尚书春秋是也二经体不同而意同尚书记治世之事作教之书也故百篇皆由圣人立不以恶事名虽桀纣之恶亦因汤武之事而见不特书也但圣贤顺时通变言与事各有所防为史者从而记之又经圣人所定典谟训诰誓命之文体虽不一皆足以作教于世也春秋记乱世之事立法之书也圣人出于季世覩时之乱居下而不能治故立大中之法裁判天下善恶而明之以王制是圣人于衰乱之时起至治之法非谨其文则不能正时事而垂大典矣此尚书春秋之体所以不同也然尚书记治世之事使圣贤之所为传之不朽为君者为臣者见为善之效安得不説而行之此劝之之道也其间因见恶事致败乱之端此又所以为戒也春秋记乱世之事以褒贬代王者赏罚时之为恶者众率辨其心迹而贬之使恶名不朽为君者为臣者见为恶之效安得不惧而防之此戒之之道也其间有善事也明其心迹而褒之使辉光于世此又所以为劝也是尚书春秋记治乱虽异其于劝戒则大意同也后之为史者欲明治乱之本谨劝戒之道不师尚书春秋之意何以为法至司马迁修史记破编年体创为纪传盖务便于记事也记事便则所取传故奇异细碎之事皆载焉虽贯穿羣书才力雄俊于治乱之本劝戒之道则杂乱而不明矣然有识者短之谓纪传所记一事分为数处前后屡出比于编年则文繁比类固所失不细殊不知又有失之大者夫史之记事莫大乎治乱君令于上人行于下臣谋于前君纳于后事臧则成否则败成则治之本败则乱之由此当谨记之某年君臣有谋议将相有功勲纪多不书必俟其臣歿而备载于传是人臣得专有其谋议功勲也尚书虽不谨编年之法君臣之事年代有序羲和之业固载于尧典稷契臯防之功固载于舜典三代君臣之事亦犹是焉迁以人臣谋议功勲与其家行细事杂载于传中其体便乎复有过差邪恶之事以召危乱不于当年书之以为深戒岂非失之大者或曰春秋虽编年经目其事传载本末迁立纪传亦约是体故刘餗史例曰传所以释纪犹春秋之传焉此可见迁书之不失也答曰春秋圣人立法之书也立法故目其事而断之明治乱之本所目之事或一句或数句国之典制罔不明人之善恶罔不辨左氏史官也见圣人之经所目之事遂从而传之虽不能深释圣人之法记事次序一用编年之体非外春秋经目独为纪也迁之为纪也周而上多载经典之事固无所发明至秦汉纪并直书其事何尝有法纪无法传何释焉此乃餗附迁而为之辞也或曰史之体必尚编年纪传不可为乎答曰为史者习尚纪传从矣厯代以为大典必论之以复古则泥矣有能编列君臣之事善恶得实不尚僻恠不务繁碎明治乱之本谨劝戒之道虽为纪传亦可矣必论其至不若编年体正而文简也甫常有志于史窃慕古史体法欲为之因读唐之诸书见太宗功德法制与三代圣王并后帝英明不逮又或不能守其法乃有荒纵狠忌庸懦之君故治少而乱多然有天下三百年由贞观功德之遠也唐书繁冗遗

略多失体法事或大而不具或小而不记或一事别出而意不相照恠异猥俗无所不有治乱之迹散于纪传中杂而不显此固不足以彰明贞观功德法制之本一代兴衰之由也观高祖至文宗实录叙事详备差胜于他书其间文理明白者尤胜焉至治乱之本亦未之明记事务广也劝戒之道亦未之着褒贬不精也为史之体亦未之具不为编年之体君臣之事多离而书之也又要切之事或有遗略君臣善恶之细四方事务之繁或备书之此于为史之道亦甚失矣遂据实录与书兼采诸家着录参验不差足以传信者修为唐史记旧史之文繁者删之失去就者改之意不足而有他证者补之事之不要者去之要而违者增之是非不明者正之用编年之体所以次序君臣之事所书之法虽宗二经文意其体略与实录相类者以唐之一代有治乱不可全法尚书春秋之体又不敢僭作经之名也或曰子之修是书不尚纪传之体可矣不为书志则郊庙礼乐律历灾祥之事官职刑法食货州郡之制得无遗乎答曰郊庙而下固国之巨典急务但记其大要以明法度政教之体其备仪细文则有司之书各有司存为史者难乎具载也自康定元年修是书至皇祐四年草具遂作序述其意更埃删润其文后以官守少暇未能备具逮嘉祐元年成七十五卷是年冬卧病从虑神思日耗不克成就且就其编秩粗成一家况才力不盛叙事不无疎略然于劝戒之义谨之矣劝戒之切而意远者著论以明焉欲人君览之入臣观之备知致治之由召乱之自邪正之效焕然若绘画于目前善者从之不善者戒之治道可以常兴而乱本可以预弭也论九十二首观者毋忽不止唐之安危常为世鉴矣

伊川击壤集序 邵雍

击壤集伊川翁自乐之诗也非唯自乐又能乐时与万物之自得也伊川翁曰子夏谓诗者志之所之也在心为志发言为诗情动于中而形于言声成其文而谓之音是知怀其时则谓之志感于物则谓之情发其志则谓之言扬其情则谓之声言成章则谓之诗诗成文则谓之音然后闻其诗听其音则人之志情可知之矣且情有七其要在二二谓身也时也谓身则一身之休戚也谓时则一时之否防也一身之休戚则不过贫富贵贱而已一时之否防则在夫兴废治乱者焉是以仲尼删诗十去其九诸侯千有余国风取十五西周十有二王雅取其六盖垂训之道善恶明著者存焉耳近世诗人穷戚则职于怨慙荣达则专于淫佚身之休戚发于喜怒时之否防出于爱恶殊不以天下大义而为言者故其诗大率溺于情好也噫情之溺人也甚于水古者谓水能载舟亦能覆舟是覆载在水也不在人也载则为利覆则为害是利害在人也不在水也不知覆载能使人有利害邪利害能使水有覆载邪二者之间必有处焉就如人能踏水非水能踏人也然而有称善踏者未始不为水之所害人若外利而踏水之情亦由人之情也若利内而踏水利而坏之患立至于前又何必分乎人焉水焉其伤性害命一也性者道之形体也性伤则道亦从之矣心者性之郛郭也心伤则性亦从之矣身者心之区宇也身伤则心亦从之矣物者身之舟车也物伤则身亦从之矣是知以道观性以性观心以心观身以身观物治则治矣然犹未离乎害者也不若以道观道以性观性以心观心以身观身以物观物则虽欲相伤其可得乎若然则以家观家以国观国以天下观天下亦从而可知之矣予自壮岁业于儒术谓人世之乐何尝有万之一二而谓名教之乐固有万万焉况观物之乐复有万万者焉虽死生荣辱转战于前曾未入于胸中则何异四时风花雪月一过乎眼也诚为能以物观物而两不相伤者焉盖其间情累都忘去尔所未忘者独有诗在焉然而虽曰

未忘其实亦若忘之矣何者谓其所作异人之所作也所作不限声律不防爱恶不立固必不希名誉如鉴之应形如钟之应声其或经道之余因静照物因时起志因物寓言因志发咏因言成诗因咏成声因诗成音是故哀而未尝伤乐而未尝淫虽曰吟咏情性曾何累于情欲钟鼓乐也玉帛礼也与其嗜钟鼓玉帛则斯言也不能无陋矣必欲废钟鼓玉帛则如其礼乐何人谓风雅之道行于古而不行于今殆非通论牵于一身而为言者也吁独不念天下为善者少害善者多造危者众而持危者寡志士在畎畝则以畎畝言故其诗名之曰伊川击壤集

洛阳耆英防序 司马光

昔白乐天在洛与高年者八人游时人慕之为九老图传于世宋兴洛中诸公继而为之者凡再矣皆图形普明僧舍普明乐天之故第也元丰中文潞公留守西都韩国富公纳政在里第自余士大夫以老自逸于洛者于时为多潞公谓韩公曰凡所为慕于乐天者以其志趣高逸也奚必数与地之褻焉一旦悉集士大夫老而贤者于韩公之第置酒相乐賓主凡十有一人既而图形妙觉僧舍时人谓之洛阳耆英防孔子曰好贤如緇衣取其敝又改为乐善无厌也二公寅亮三朝为国元老入赞万机出绥四方上则固社稷尊宗庙下则熙百工和万民天子心腹股肱耳目天下所取平其勲业闳大显融岂乐天所能庶几然犹慕效乐天所为汲汲如恐不及岂非乐善无厌者与又洛中旧俗燕私相聚尚齿不尚官自乐天之防已然是日复行之斯乃风化之本可颂也宣徽王公方留守北都闻之以书请于潞公曰某亦家洛位与年不居数客之后顾亦官守不得执卮酒在坐良以为恨愿寓名其间幸无我遗其为诸公嘉美如此光未及七十用狄监卢尹故事亦顶于防潞公命光序其事不敢辞时五年正月壬辰端明殿学士兼翰林学士太中大夫提举崇福宫司马光序

开府仪同三司守司徒武宁节度使致仕韩国公富弼字彦国年七十九

河东节度使开府仪同三司守太尉判河南府兼西京留守司事潞国公文彦博字宽夫年七十七司封郎中致仕席汝言字君从年七十七

太常少卿致仕王尚参字安之年七十六

太常少卿致仕赵丙字南正年七十五

秘书监致仕刘几字伯寿年七十五

卫州防御使致仕冯行已字肃之年七十五

太中大夫充天章阁待制提举崇福宫楚建中字正叔年七十三

司农少卿致仕王慎言字不疑年七十二

太中大夫提举崇福宫张问字昌年年七十

龙图阁直学士通议大夫提举崇福宫张焘字景元年七十

序赙礼 司马光

名以位显行由学成此礼之常若夫身处草野未尝从学志在为善不求声利此则尤可尚也近世史氏专取高官为之传故闾阎之善人莫之闻丧礼之废坏从矣而民间为甚至有初丧亲賓具酒肉聚于其家与主人同醉饱者有以鼓乐导丧车者有因丧纳妇者相习为常恬不知怪医助教刘太居亲丧独不饮酒食肉终三年此乃今士大夫所难能也其弟永一尤孝友廉谨过人于熙宁初巫咸水入夏县城民溺死者以百数永一执竿立门首他人物流入门者輒摘出之有僧寓钱数万于室居无何僧自经死永一遂诣县自陈请以钱归其弟子乡人负其债从偿者永一輒毁券以愧其心其行事类如此有周文粲者其兄嗜酒仰文粲为生兄或时酗毆文粲其隣人不平而唁之粲怒曰吾兄未尝毆我汝何离间吾兄弟也有苏庆文者事继母以孝闻常语其妇曰汝事吾母小不谨必逐汝继母少寡而无子由是安其室终身元丰中朝廷修景灵宫调天下画工诣京师事毕有诏选试其优者留翰林授官禄有台亨者名第一以父老固辞归養于田里此五人与余同县故余得而知之悲夫天下布衣之士刻志厉行而人莫知者可胜数哉始太之丧其父也余兄弟赙以千钱且为书致之曰礼凡有丧佗人助之珠玉曰含车马曰赙货财曰赙衣服曰赙多物虽薄欲人之可继也从之太请刻其书于石曰乡人不知有赙礼自太父之丧乡人稍稍行之太欲广其传由吾乡以及隣县由隣县以達四方使民间皆去 俗而入于礼岂小补哉余益美其志因谕之曰是书不足刻余窃慕君子乐道人之善请书若兄弟及周文粲苏庆文台亨所为以传于世庶几使为善者不以隐微而自懈焉

送陈升之序 王安石

今世所谓良大夫者有之矣皆曰是宜任大臣之事者作而任大臣之事则上下一失望何哉人之材有小大而志有遠近也彼其任者小而责之近则煦煦然仁而有余于仁矣子子然义而有余于义矣人见其仁义有余也则曰是其任者小而责之近大任将有大此者然上下埃之云尔然后作而任大臣之事作而任大臣之事宜有大此者焉然则煦煦然而已矣子子然而已矣故上下一失望岂惟失望哉后日诚有堪大臣之事其名实烝然于上上必惩前日之所埃而逆疑焉慕于下下必惩前日之所埃而逆疑焉上下交疑诚有堪大臣之事者而莫之或任幸欲任则左右小人得引前日之所埃惩之矣噫圣人谓知人难君子恶名之溢于实为此则奈何亦精之而已矣恶之则奈何亦充之而已矣知难而不能精之恶之而不能充之其亦殆哉予在扬州朝之人过焉者多堪大臣之事可信而望者陈升之而已矣今去官于宿州予不知复几何时乃一见之也予知升之作而任大臣之事固有时矣煦煦然仁而已矣子子然义而已矣非予所以望于升之也

送孙正之序 王安石

时然而然众人也已然而然君子也已然而然非私已也圣人之道在焉尔夫君子有穷若颠
跌不肯一失诎已以从时者不以时胜道也故其得志于君则变时而之道若反手然彼其术
素修而志素定也时乎杨墨已不然者孟轲氏而已时乎佛老已不然者韩愈氏而已如孟轲
者可谓术素修而志素定也不以时胜道也惜也不得志于君使真儒之效不白于当世然其
于众人也卓矣呜呼予观今之世圆冠峨如大裙檐如坐而尧言起而舜趋不以孟韩之心者
果异众人乎予官于扬得友曰孙正之行古之道又善为古文予知其能以孟韩之心为心而
不已者也夫越人之望燕为絶域也北辕而首之苟不已无不至孟韩之道去吾党岂若越人
之望燕哉以正之之不已而不至焉予未之信也一日得志于吾君而真儒之效不白于当世
予亦未之信也正之之兄官于温奉其亲以行将从之先为言以处予予欲默安得而默也

唐百家诗选序 王安石

安石与宋次道同为三司判官时次道出其家藏唐时百余编委余择其佳者次道因名曰百
家诗选废日力于此良可悔也虽然欲知唐诗者观此足矣

故迹遗文序 王回

传古者莫寿于竹帛而世以金石为最寿者惑于外也彼徒见其刚坚之质大书而显刻之安
于屋壁山岩之中藏覆遮防国有官守家有子孙外物莫能寻其隙而伤则以为传于万世不
朽矣然而存于今者六经百氏之文皆竹帛所载而其被于金石特以为最寿者所存无几往
往复断剥缺讹非反质于竹帛所载六经百氏之文则不可得而读其不载于竹帛而名迹遂
因而泯没者可胜道哉其官守子孙今谁国而谁家也由此观之万物未有恃其久而全者夫
金石诚寿者而人力不足以保于其外竹帛之寿固不如金石人知其不可恃也然众传而广
之虽复万世犹今日也则金石之寿尚何以较其短长哉予尝阅古钟鼎碑碣之文以证诸史
及它传记其褒颂功德虽不可尽信而于年月名氏山川风俗与其一时之文采制度有得其
详而史传追述乃其概耳惜乎曩所闻者今已磨灭殆尽而今所见者后数百年不知又磨灭
几何也故采其完可读者首尾编之因次吾説为序号曰故迹遗文夫古之文以竹帛传既寿
于金石矣而今之文以纸传又便于竹帛便则传之者益众而此书之寿其可究哉特不知后
之人能不以吾説而废否

宋文鉴卷八十七

卷八十八

钦定四库全书

宋文鉴卷八十八

宋吕祖谦编

序

谱例序 苏洵

古者诸侯世国卿大夫世家死者有庙生者有宗以相次也是以百世而不相忘此非独贤士大夫尊祖而贵宗盖其昭穆存乎其庙迁毁之主存乎其太祖之室其族人相与为服死丧嫁娶相告而不絶则其势将自至于不忘也自秦汉以来仕者不世然其贤人君子犹能识其先人或至百世而不絶无庙无宗而祖宗不忘宗族不散其势宜亡而独存则由有谱之力盖自唐衰谱牒废絶士大夫不讲而世人不载于是乎由贱而贵者耻言其先由贫而富者不録其祖而谱遂大废昔者洵尝自先子之日而咨考焉由今而上得五世由五世而上得一世一世之上失其次而其本出于赵郡之苏氏以为苏氏族谱他日欧阳公见而叹曰吾尝为之矣出而观之有异法焉曰是不可使独吾二人为之将天下举不可无也洵于是又为大宗谱法以尽谱之变而并载欧阳氏之谱以为谱例附以欧阳公题刘氏碑后之文以告当世之君子盖将有从焉者

送石昌言舍人北使引 苏洵

昌言举进士时吾始数歳未学也忆与羣儿戏先府君侧昌言从旁取枣栗噉我家居相近又以亲戚故甚狎昌言举进士日有名吾后渐长亦稍知读书学句读属对声律未成而废昌言闻吾废学虽不言察其意甚恨后十余年昌言及第第四人守官四方不相闻吾日以壮大乃能感悔摧折复学又数年游京师见昌言长安相与劳苦如平生欢出文十数首昌言甚喜称善吾晚学无师虽曰为文中心自慙及闻昌言説乃颇自喜今十余年又来京师而昌言官两制乃为天子出使万里外彊悍不屈之虏建大旆从骑数百送车千乘出都门意气怏然自思为儿时见昌言先府君旁安知其至此富贵不足恠吾于昌言独自有感也大丈夫生不为将得为使折冲口舌之间足矣往年彭任从富公还为我言曰既出境宿驿亭闻介马数万骑驰过剑槊相摩终夜有声从者怛然失色及明视道上马迹尚心悼不自禁凡虏所以夸耀中国者多此类也中国之人不测也故或至于震惧而失辞以为夷狄笑呜呼何其不思之甚也昔者奉春君使冒顿壮士大马皆匿不见是以有平城之役今之匈奴吾知其无能为也孟子曰説大人则藐之况于夷狄请以为赠

苏氏族谱引 苏洵

苏氏族谱谱苏氏之族也苏氏出于高阳而蔓延于天下唐神尧初长史味道刺眉州卒于官一子留于眉眉之有苏氏自是始而谱不及者亲尽也亲尽则何为不及谱为亲作也凡子得书而孙不得书者何也以着代也自吾之父以至吾之高祖仕不仕娶某氏享年几某日卒皆书而他不得书者何也详吾之所自出也自吾之父以至吾之高祖皆曰讳某而他则遂名之何也尊吾之所自出也谱为苏氏作而独吾之所自出得详与尊何也谱吾作也呜呼观吾之谱者孝悌之心可以油然而生矣情见于亲亲见于服服始于衰而至于缌麻而至于无服无服则亲尽亲尽则情尽情尽则喜不庆忧不吊喜不庆忧不吊则涂人也吾之所与相视如涂人者其初兄弟也兄弟其初一人之身也悲夫一人之身分而至于涂人吾谱之所以作也其意曰分至于涂人者势也势吾无如之何也已幸其未至于涂人也使之无至于忽忘焉可也呜呼观吾之谱者孝悌之心可以油然而生矣系之以诗曰

吾父之子今为吾兄吾疾在身兄呻不宁数世之后不知何人彼死而生不为戚欣兄弟之亲如足与手其能几何彼不相能彼独何心

仲兄郎中字序 苏洵

洵读易至涣之六四曰涣其羣元吉曰嗟夫羣者圣人之所欲涣以混一天下者也盖余仲兄名涣而字公羣则是以圣人之所欲解散涤荡者以自命也而可乎他日以告兄曰子可无为我易之洵曰唯既而又曰请以文甫易之如何且兄尝见夫水之与风乎油然而行渊然而溜渟回汪洋满而上浮者是水也而风实起之蓬蓬然而发乎大空不终日而行乎四方荡乎其无形飘乎其远来既往而不知其迹之所存者是风也而水实形之今夫风水之相遭乎大泽之陂也纡余委蛇蜿蜒沦涟安而相推怒而相陵舒而如云蹙而如鳞疾而如驰徐而如徊揖让旋辟相顾而不前其繁如縠其乱如雾纷纭郁扰百里若一汨乎顺流至乎沧浪之滨滂溥汹涌号怒相轧交横绸缪放乎空虚绰乎无垠横流逆折瀆旋倾侧宛转胶戾回者如轮萦者如带直者如燧奔者如焰跳者如鹭投者如鲤殊状异态而风水之极观备矣故曰风行水上涣此亦天下之至文也然而此二物者岂有求于文哉无意乎相求不期乎相遭而文生焉是其为文也非水之文也非风之文也二物者非能为文而不能不为文也物之相使而文出于其间也故此天下之至文也今夫玉非不温然美矣而不得以为文刻镂组绣非不文矣而不可与论乎自然故夫天下之无营而文生之者惟水与风而已昔者君子之处于世不求有功不得已而功成则天下以为贤不求有言不得已而言出则天下以为口实呜呼此不可与他人道之唯吾兄可也

列女传目錄序 曾巩

刘向所叙列女传凡八篇事具汉书向列传而隋书及崇文总目皆称向列女传十五篇曹大家注以颂义考之盖大家所注离其七篇为十四与颂义凡十五篇而益以陈婴母及东汉以来凡十六事非向书本然也盖向旧书之亡久矣嘉祐中集贤校理苏颂始以颂义篇次复定

其书为八篇与十五篇者并藏于馆阁而隋书以颂义为刘歆作与向列传不合今验颂义之文盖向之自叙又艺文志有向列女传颂图明非歆作也自唐之乱古书之在者少矣而唐志録列女传凡十六家至大家注十五篇者亦无録然其书今在则古书之或有録而亡或无録而在者亦众矣非可惜哉今校讐其八篇及十五篇者已定可缮写初汉承秦之敝风俗已大坏矣而成帝后宫赵卫之属尤自放向以谓王政必自内始故列古女善恶所以致兴亡者以戒天子此向述作之大意也其言大任之娠文王也目不视恶色耳不听淫声口不出恶言又以谓古之人胎教者皆如此夫能正其视听言动者此大人之事而有道者之所畏也顾令天子之女子能之何其盛也以臣所闻盖为之师傅保姆之助诗书图史之戒珩璜琬琰之节威仪动作之度其教之者有此具然古之君子未尝不以身化也故家人之义归于反身二南之业本于文王岂自外至哉世皆知文王之所以兴能得内助而不知其所以然者盖本于文王之躬化故内则后妃有闕雎之行外则羣臣有二南之美与之相成其推而及遠则商辛之昏俗江汉之小国兔置之野人莫不好善而不自知此非谓身修故国家天下治者也后世自问学之士多徇于外物而不安其守其室家既不见可法故竞于邪侈岂独无相成之道哉士之苟于自恕顾利冒耻而不知反己者徃徃以家自累故也故曰身不行道不行于妻子信哉如此人者非素处显也然去二南之风亦已遠矣况于南乡天下之主哉向之所述劝戒之意可谓笃矣然向号博极羣书而此传称诗芣苢栢舟大车之类与今序诗者之説尤乖异盖不可考至于式微之一篇又以谓二人之作岂其所取者博故不能无失欤其言象计谋杀舜及舜所以自脱者颇合于孟子然此传或有之而孟子所不道者盖亦不足道也凡后世诸儒之言经传者故多如此览者采其有补而择其是非可也故为之叙论以发其端云

战国策目錄序 曾 巩

刘向所定战国策三十三篇崇文总目称十一篇者阙臣访之士大夫家始尽得其书正其谬谬而疑其不可考者然后战国策三十三篇复完叙曰向叙此书言周之先明教化修法度所以大治及其后谋诈用而仁义之路塞所以大乱其説既美也卒以谓此书战国之谋士度时君之所能行不得不然则可谓惑于流俗而不笃于自信者也夫孔孟之时去周之初已数百歳其旧法已亡旧俗已熄久矣二子乃独明先生之道以谓不可改者岂将彊天下之主以后世之所不可为哉亦将因其所遇之时所遭之变而为当世之法使不失乎先王之意而已二帝三王之法其变固殊其法固异而其为国家天下之意本末先后未尝不同也二子之道如是而已盖法者所适变也不必尽同道者所以立本也不可不一此理之不易者也故二子者守此岂好为异论哉能勿苟而已矣可谓不惑乎流俗而笃于自信者也战国之游士则不然不知道之可信而乐于説之易合其设心注意偷为一切之计而已故论诈之便而讳其败言战之善而蔽其患其相率而为之者莫不有利焉而不胜其害也有得焉而不胜其失也卒至苏秦商鞅孙臆呉起李斯之徒以亡其身而诸侯及秦用之者亦灭其国其为世之大祸明矣而俗犹莫之寤也惟先王之道因时适变为法不同而考之无疵用之无敝故古之圣贤未有以此而易彼也或曰邪説之害正也宜放而絶之则此书之不泯其可乎对曰君子之禁邪説也故将明其説于天下使当世之人皆知其説之不可从然后以禁则齐使后世之人皆知其説之不可为然后以戒则明岂必灭其籍哉放而絶之莫善于是是以孟子之书有为神农之言者有为墨子之言者皆着而非之至于此书之作则上继春秋下至楚汉之起二百四十五

年之间载其行事固不得而废也此书有高诱注者二十一篇或曰三十二篇崇文总目存者八篇今存者十篇云

陈书目錄序 曾 巩

陈书六本纪三十列传凡三十六篇唐散骑常侍姚思廉撰始思廉父察梁陈之史官也錄二代之事未就而陈亡隋文帝见察甚重之每就察访梁陈故事因以所论载每一篇成輒奏之而文帝亦遣虞世基就察求其书文未就而察死察之将死属思廉以继其业唐兴武德五年高祖以自魏以来二百余歲世统数更史事放逸乃诏论次而思廉遂受诏为陈书久之犹不就贞观三年遂诏论撰于祕书内省十年正月壬子始上之观察等之为此书歷三世传父子更数十歲而后乃成蓋其难如此然及既成与宋魏齐梁等书世亦传之者少故学者于其行事之迹亦罕得而详也而其书亦以罕得而详也而其书亦以罕传则自祕府所藏往往脱语嘉祐六年八月始诏校讐使可镂板行之天下而臣等言梁陈等书缺独馆阁所藏恐不足以定着愿诏京师及州县藏书之家使悉上之先皇帝为下其事至七年冬稍稍始集臣等以相校至八年七月陈书三十六篇者始校定可传之学者其疑者亦不敢损益特各疏于篇末其书旧无目列传名氏多阙谬因别为目錄一篇使览者得详焉夫陈之为陈蓋偷为一切之计非有先王经纪礼乐风俗之美制治之法可章示后世然而兼权尚计明于任使恭俭爱人则其始之所以兴惑于邪臣溺于嬖妾忘患纵欲则其终之所以亡兴亡之端莫非自己致者至于有所因造以为号令威刑职官州郡之制虽其事已浅然亦各施于一时皆学者之所不可不考也而当时之士争夺诈伪苟得偷合之徒尚不得不列以为世戒而况于坏乱之中仓惶之际士之安贫乐义取舍去就不为患祸势利动其心者亦不絕于其间若此人者可谓笃于善矣蓋古人之所思见而不可得风雨之诗所为作者也安可使之泯泯不少概见于天下哉则陈之史其可废乎蓋此书成之既难其后又久不显及宋兴已百年古文遗事靡不毕讲而始得盛行于天下列于学者其传之之难又如此岂非遭遇固自有时也哉

南齐书目錄序 曾 巩

南齐书八纪十一志四十列传合五十九篇梁萧子显撰始江淹已为十志沈约又为齐纪而子显自表武帝别为此书臣等因校正其讹谬而叙其篇目日将以是非得失兴坏理乱之故而为法戒则必得其所言而后能传于久此史之所以作也然而所言不得其人则失其意或乱其实或析理之不通或设辞之不善故虽有殊功懿德非常之迹将闇而不章郁而不发而梲机嵬琐奸回凶慝之形可幸而掩也尝试论之古之所谓良史者其明必足以周万事之理其道必足以适天下之用其智必足以通难知之意其文必足以发难显之情然后其任可得而称也何以知其然邪昔者唐虞有神明之性有微妙之德使由之者不能知知之者不能明以为治天下之本号令之所布法度之所设其言至约其体至备以为治天下之具而为二典者推而明之所记者独其迹邪并与其深微之意而传之小大精粗无不尽也本末先后无不白也使诵其說者如出乎其时求其指者如即乎其人是可不谓明足以周万事之理道足以适天下之用智足以通难知之意文足以发难显之情者乎则方是之时岂特任政者皆天下之士哉蓋执简操笔而随者亦皆圣人之徒也两汉以来为史者去之遠矣司马迁从五帝三

王既没数千载之后秦火之余因散絕残脱之经以及传记百家之說区区掇拾以集着其善恶之迹兴废之端又创己意以为本纪世家八书列传之文斯亦可谓奇矣然而敝害天下之圣法是非颠倒而采摭谬乱者亦岂少哉是岂可不谓明不足以周万事之理道不足以适天下之用智不足以通难知之意文不足以发难显之情者乎夫自三代以后为史者如迁之文亦不可不谓雋伟防出之材非常之士也然顾以谓不足以发难显之情者何哉蓋圣贤之高致迁固有不能達其情而见之于后者以故不得而与之也迁之得失如此况其他邪至于宋齐梁陈后魏后周之书蓋无以议为也子显之于斯文喜自驰骋其更改破析刻雕藻绩之变尤多而其文益下豈夫材固不可以彊而有邪数世之史既然故其辞迹暧昧虽有随世以就功名之君相与合谋之臣未有赫然得其倾动天下之耳目播天下之口者也而一时偷夺倾危悖理反义之人亦幸而不暴着于世岂非所托不得其人故邪可不惜哉蓋史者所以明夫治天下之道也故为之者亦必天下之材然后其任可得而称也岂可忽哉岂可忽哉

范贯之奏议集序 曾 巩

尚书户部郎中直龙图阁范公贯之之奏议凡若干篇其子世京集为十卷而属余序之蓋自至和以后十余年间公常以言事任职自天子大臣至于羣下自掖庭至于四方幽隐一有得失善恶關於政理公无不极意反复为上力言或矫拂嗜欲或切劘计虑或辨别忠佞而处其进退章有一再或至于十余上事有陰争独陈或悉引諫官御史合议肆言仁宗常虚心采纳为之变命令更废举近或立从遠或越月逾时或至于其后卒皆听用蓋当是时仁宗在位歲久熟于人事之情伪与羣臣之能否方以仁厚清静休養元元至于是非与夺则一归之公议而不自用也其所引拔以言为职者如公皆一时之选而公与同时之士亦皆乐得其言不曲从苟止故天下之情因得毕闻于上而事之害理者常不果行至于奇衰恣睢有为之者亦輒败悔故当此之时常委事七八大臣而朝政无大阙失羣臣奉法遵职海内乂安夫因人而不自用者天也仁宗之所以其仁如天至于享国四十余年能承太平之业者繇是而已后世得公之遗文而论其世见其上下之际相成如此必将低徊感慕有不可及之叹然后知其时之难得则公言之不没豈独见其志所以明先帝之盛德于无穷也公为人温良慈恕其从政寬易爱人及在朝廷危言正色人有所不能及也凡同时与公有言责者后多至大官而公独早卒公讳师道其世次州里厯官行事今有资政殿学士赵公抃撰公之墓铭云

相国寺维摩院听琴序 曾 巩

古者学士之于六艺射能弧矢之事矣又当善其揖让之节御能车马之事矣又当善其驱驰之节书非能肆笔而已又当辨其体而明其意数非能布策而已又当知其用而各尽其法而五礼之威仪至于三千六乐之节文可谓微且多矣噫烦且劳如是然古之学者必能此亦可谓难矣然习其射御以礼习其干戈于乐则少于学长于朝其于武备固修矣其于家有塾于党有庠于乡有序于国有学于教有师于视听言动有其容于衣冠饮食有其度几杖有铭盘盂有戒在舆有和鸾之声行有佩玉之音燕处有雅颂之乐而非其故琴瑟未尝去于前也尽其出入进退俯仰左右接于耳目动于四体達于其心者所以養之至如此其详且密也虽然此尚为有待于外者尔若夫三材万物之理性命之际力学以求之深思以索之使知其要识

其微而齐戒以守之以尽其材成其德至合于天地而后已者又当得之于心夫岂非难哉噫古之学者其役之于内外持其心養其性者至于如此此君子所以爱日而自彊不息以求至乎极也然其习之有素闲之有具如此则求其放心伐其邪气而成文武之材就道德之实者可谓易矣孔子曰兴于诗立于礼成于乐蓋乐者所以感人心而使之化故曰成于乐昔舜命防典乐教胄子曰直而温宽而栗刚而无虐简而无傲则乐者非独去邪又所以救其性之偏而纳之中也故和鸾佩玉雅颂琴瑟之音非其故不去于前岂虚也哉今学士大夫之于持其心養其性凡有待于外者皆不能具得之于内者又亦皆略其事可谓简且易矣然所以求其放心伐其邪气而成文武之材就道德之实者岂不难哉此予所以惧不至于君子而入于小人也夫有待于外者余既力不足而于琴窃有志焉久矣然患其莫余授也治平三年夏得洪君于京师始合同舍之士听其琴于相国寺之维摩院洪君之于琴非特能其音又能其意者也予将就学焉故道予之所慕于古者庶乎其有以自发也同舍之士丁寶臣元珍郑穆閼中孙觉莘老林希子中而予曾巩子固也洪君名规字方叔以文学吏事称于世云

宋文鉴卷八十八

卷八十九

钦定四库全书

宋文鉴卷八十九

宋吕祖谦编

序

送周屯田序 曾巩

士大夫仕登朝廷年七十上书去其位天子官其一子而听之亦可谓荣矣然而有若不释然者余为之言曰古之士大夫倦而归者安居几杖膳羞被服百物之珍好自若天子养以燕飧饮食乡射之礼自比子弟袒裼鞫以荐其物语其辞说不于庠序则于朝廷时节之赐与缙绅之礼于其家者不以朝则以夕上之听其休为不敢勤以事下之自老为无为以尊荣也今一日辞事还其庐徒御散矣賓客去矣百物之顺其欲者不足人之羣嬉属好之交不与约居而独游散弃乎山墟林莽阨巷穷闾之间如此其于长者薄也亦何能使其不欲然于心邪虽然不及乎尊事可以委蛇其身而益闲不享乎珍好可以窒烦除薄而益安不去乎深山长谷岂不足以易其庠序之位不居其荣岂有患乎其辱哉然则古之所以殷勤奉老者皆世之任事者所自为于士之倦而归者顾为烦且劳也今之置古事者顾有司为少耳士之老于其家者独得其自肆也然则何为动其意邪余为之言者尚书屯田员外郎周君中复周君与先人俱天圣二年进士与余旧且好也既为之辨其不释然者又欲其有以处而乐也读余言者可无异周君而病今之失矣

送江任序 曾巩

均之为吏或中州之人用于荒边侧境山区海聚之间蛮夷异域之处或燕荆越蜀海中万里之人用于中州以至四遐之乡相易而往其山行水涉沙莽之驰往往则风霜冰雪瘴雾之毒之所侵加蛟龙虺蜴之羣之所抵触冲波急湫隕崖落石之所覆压其进也莫不赢粮举药选舟易马刀兵曹伍而后动戒朝奔夜变更寒暑而后至至则宫庐器械被服饮食之具土风气之宜与夫人民謡俗语言习尚之务其变难遵而其情难得也则多愁居惕处而思归及其从也所习已安所蔽已解则歲月有期可引而去矣故不得专一精思修治以宣布天子及下之仁而为后世可守之法也或九州之人各用于其土不在西封在东境土不必勤舟车輿马不必力而已传其邑都坐其堂奥道涂所次升降之倦凌冒之虞无有接于其形动于其虑至则耳目口鼻百体之所養如不出乎其家父兄六亲故旧之人朝夕相见如不出乎其里山川之形土田井市风謡习俗辞說之变利害得失善恶之条贯非其童子之所闻则其少长之所游览非其自得则其乡之先生老者之所告也所居已安所有事之宜皆以习熟如此能专虑

致劳营职事以宣上恩而修百姓之急其施为先后不待旁谘从察而与夺损益之几已断于胸中矣岂累夫孤客远寓之忧而以苟且决事哉临川江君任为洪之丰城此两县者牛羊之牧相交树木果蔬五谷之垄相入也所谓九州之人各用于其土者孰近于此既已得其所处之乐而厌闻饫听其人民之事而江君又有聪明敏给之材洁廉之行以行其政吾知其不去图议论之适賓客之好而所为有余矣蓋县之治民自得于大山深谷之中而州以无为于上吾将见江西之幕府无南向而虑者矣于其行遂书以送之

送赵宏序 曾 巩

荆民与蛮合为寇潭旁数州被其害天子宰相以潭重镇守臣不胜任为改用人又不胜复改之守至上书乞益兵诏与抚兵三百殿直天水赵君希道实防以往希道雅与接间过予道潭之事予曰潭山川甲兵如何食几何贼众寡强弱如何予不能知能知书之载若潭事多矣或合数道之兵以数万絕山谷而进其势非不众且健也然而殲焉者多矣或单车独行然而以克者相踵焉顾其义信如何耳致吾义信虽单车独行寇可以为无事龚遂张纲祝良之类是也义信不足以致之虽合数道之兵以数万卒殲焉适重寇耳况致平耶阳是裴行立之类是也则兵不能致平致平者在太守身也明矣前之守者果能此天子宰相乌用易之必易之为前之守者不能故也今往者复曰乞益兵何其与书之云者异邪予忧潭民之重困也寇之益张也往时潭吏与旁近郡靳力胜贼者暴骸者戮降者有之今之往者将特不为是而已耶抑犹不免乎为是也天子宰相任之之意其然耶潭守近侍臣使抚覩潭者郎吏御史博士相望为我谗其贤者曰今之言古书往往曰迂然书之事乃已试者也师已试而施诸治与时人之自用孰谓得失耶愚言傥可以平潭之患今虽细然大中咸通之间南方之忧常剧矣夫岂阶于大哉为近臣郎吏御史博士者独得而不思也希道固喜事者因其行遂次第其语以送之

李氏退居类藁序 李防伯

李防伯以举茂才罢归其明年庆厯癸未秋因科所着文自冠迄兹十五年得草藁二百三十三首将恐亡散姑以类辨为十二卷写之间或应用而为未能尽无愧闵其力之劳輒不弃去至于天淫刻节尤无用者虽传在人口皆所弗取噫天将寿我乎所为固未足也不然斯十二卷庶可籍乎见古人矣故自序云

鳧绎先生诗集序 苏 轼

孔子曰吾犹及史之阙文也有马者借人乘之今亡矣夫史之不阙文与马之不借人也岂有损益于世也哉然且识之以为世之君子长者日以遠矣后生不复见其流风遗俗是以日趋于智巧便佞而莫之正是二者虽不足以损益而君子长者之泽在焉则孔子识之而况其足以损益于世者乎昔吾先君适京师与卿士大夫游归以语轼曰自今以往文章其日工而道将散矣士慕遠而忽近贵华而贱实吾已见其兆矣以鲁人鳧绎先生之诗文十余篇示轼曰小子识之后数十年天下无复为斯文者也先生之诗文皆有为而作精悍确苦言必中当世之过凿凿乎如五谷必可以疗饥断断乎如药石必可以伐病其游谈以为高枝词以为观美

者先生无一言焉其后二十余年先君既没而其言存士之为文者莫不超然出于形器之表微言高论既已鄙陋汉唐而其反复论难正言不讳如先生之文者世莫之贵矣轼是以悲于孔子之言而怀先君之遗训益求先生之文而得之于其子复乃録而藏之先生讳太字醇之姓顔氏先师兗公四十七世孙云

田表圣奏议序 苏轼

故谏议大夫赠司徒田公表圣奏议十篇呜呼田公古之遗直也其尽言不讳蓋自敌已以下受之有不能堪者而况于人主乎吾是以知二宗之圣也自太平兴国以来至于咸平可谓天下大治千载一时矣而田公之言常若有不测之忧近在朝夕者何哉古之君子必忧治世而危明主明主有絶人之资而治世无可畏之防夫有絶人之资必轻其臣无可畏之防必易其民此君子之所甚惧也方汉文时刑措不用兵革不试而贾谊之言曰天下有可长太息者有可流涕者有可痛哭者后世不以是少汉文亦不以是甚贾谊由此观之君子之遇治世而事明主法当如是也谊虽不遇而其所言略已施行不幸早世功烈不着于时然谊尝建言使诸侯王子孙各以次受分地文帝未及用厯孝景至武帝而主父偃举行之汉室以安今公之言十未用五六安知来世不有若偃者举而行之欵愿广其书于世必有与公合者此亦忠臣孝子之志也

钱塘勤上人诗集序 苏轼

昔翟公罢廷尉賓客无一人至者其后复用賓客欲往翟公大书其门曰一死一生乃知交情一贫一富乃知交态一贵一贱交情乃见世以为口实然余尝薄其为人以为客则陋矣而公之所以待客者独不为小哉故太子太师欧阳公好士为天下第一士有一言中于道不遠千里而求之甚于士之求公以故尽致天下豪杰自庸众人以显于世者固多矣然士之负公者亦时有蓋尝慨然太息以人之难知为好士者之戒意公之于士自是少倦而其退老于颍水之上余往见之则犹论士之贤者唯恐其不闻于世也至于负者则曰是罪在我非其过翟公之客负公于死生贵贱之间而公之士叛公于瞬息俄顷之际翟公罪客而公罪已与士益厚贤于古人遠矣公不喜佛老其徒有治诗书学仁义之說者必引而进之佛者惠勤从公游三十余年公常称之为聪明才智有学问者尤长于诗公薨于汝陰余哭之于其室其后见之语及于公未尝不涕泣也勤固无求于世而公又非有德于勤者其所以涕泣不忘岂为利也哉余然后益知勤之贤使其得列于士大夫之间而从事于功名其不负公也审矣熙宁七年余自钱塘将赴高密勤出其诗若干篇求余文以传于世余以为诗非待文而传者也若其为人之大略则非斯文莫之传也

六一居士集序 苏轼

夫言有大而非夸達者信之众人疑焉孔子曰天之将丧斯文也后死者不得与于斯文也孟子曰禹抑洪水孔子作春秋而孟子距杨墨蓋以是配禹也文章之得丧何与于天而禹之功与天地并孔子孟子以空言配之不已夸乎自春秋作而乱臣贼子惧孟子之言行而杨墨之

道废天下以为是固然而不知其功孟子既没有申商韩非之学违道而趋利残民以厚主其說至陋也而士以是罔其上上之人侥幸一切之功靡然从之而世无大人先生如孔子孟子者推其本末权其祸福之轻重以救其惑故其学遂行秦以是丧天下陵夷至于胜广刘项之祸死者十八九天下萧然洪水之患蓋不至此也方秦之未得志也使复有一孟子则申韩为空言作于其心害于其事作于其事害于其政者必不至若是烈也使杨墨得志于天下其祸豈减于申韩哉由此言之虽以孟子配禹可也太史公曰蓋公言黄老贾谊晁错明申韩错不足道也而谊亦为之余以是知邪說之移人虽豪杰之士有不免者况众人乎自汉以来道术不出于孔氏而乱天下者多矣晋以老庄亡梁以佛亡莫或正之五百余年而后得韩愈学者以愈配孟子蓋庶几焉愈之后二百余年而后得欧阳子其学推韩愈孟子以達于孔氏着礼乐仁义之实以合于大道其言简而明信而通引物连类折之于至理以服人心故天下翕然师尊之自欧阳子之存世之不說者晬而攻之能折困其身而不能屈其言士无贤不肖不谋而同曰欧阳子今之韩愈也宋兴七十余年民不知兵富而教之至天圣景祐极矣而斯民终有愧于古士亦因陋守旧论卑而气弱自欧阳子出天下争自濯磨以通经学古为高以救时行道为贤以犯顔纳說为忠长育成就至嘉祐末号称多士欧阳子之功为多呜呼此岂人力也哉非天其孰能使之欧阳子没十余年士始为新学以佛老之似乱周孔之实识者忧之賴天子明圣诏修取士法风厉学者专治孔氏黜异端然后风俗一变考论师友渊源所自复知诵习欧阳子之书予得其诗文七百六十六篇于其子棐乃次而论之曰欧阳子论大道似韩愈论事似陆贽记事似司马迁诗赋似李白此非余言也天子之言也欧阳子讳修字永叔既老自谓六一居士云

华戎鲁卫信錄总序 苏 颂

元丰四年八月奉诏编类北界国信文字臣切惟念国家奄字四海方制万区九夷八蛮罔不率俾蠢兹种殄早以面内章圣皇帝因其丧师请和许通信好歲时问遗寢以训备陛下钦若成宪羈縻要荒乃命儒臣讨论故事将欲垂于方册副在有司其所以虑遠防微纤意及此者皆以偃兵息民故也顾臣愚陋不足以奉承明诏黽勉期月粗见纲领詮次类例皆禀圣谟前诏断自通好以来以迄乎今将明作书之繇故以叙事冠于篇首厥初讲和始于继忠书奏敌主乞盟之请赐以俞防由是行成故次之以书诏既许其通好乃有载书以着信故次之以誓书昔之和戎则有金絮采繒之赂我朝歲致银绢以资其费故次之以歲币恩意既通又有好货以将之故次之以国信信好不可单往必有言词以文之故次之以国书异国之情非行人莫達故次之以奉使之别则有接送馆伴所经城邑邮亭次舍山川有险易道涂有回遠若非形于绩事则方向莫得而辨也故作驿程地图前后遣到名氏非一职秩不同南北羣臣交相礼接年月次序散而不齐既为信书不可无纪故作名衔年表夫如是而使事尽矣通好肇于戎人我从而听之凡问遗之事皆列北信北书于前朝廷所遗乃报礼也故载之于后所以着其所后从来也凡使者之至在道则有邮馆宣劳之仪入朝则有见辞宴赐之式礼意疏数并有节文故次之以仪式又次之以赐予彼待王人亦有常矩无敢违越故以持礼过北界及北界分物系于后使者宜通賔主之欢而贄见之礼不可阙也故次之以交驰问劳往返诏宣书割体范存焉故受之以诏錄又次之以书仪信币则有賁操之勤导从则有輿 之众霑賚所及无不均通故次之以例物使者至都上恩顾防靡所不至或 易货财或须索供饋或丐求

珍异许予多矣故次之以市易而供湏求丐附焉南北将命往还约束细大之务动循前比故次之以条例凡此皆常使也诞辰歳节致礼而已至若事干大体则有专使以导之故次之以泛使疆场之虞师守当任其责则接境司用得以公牒往复故次之文移事非司州所能予夺至待命官及疆吏对议者代州移徙巡铺界壕是也故次之以河东地界疆界既辨则边圉不可不谨故次之以边防其别又有州郡壁垒之缮完砦铺塘泺之限断载于輿地所以示守备之严也凡为此书本于通好辽人则彼之种族自出不可不知辽本契丹也故次之以契丹世系辽与中国言语不通饮食不同逐草随畜射猎为生难以礼义治也朝廷所以能固结而柔服之盖知其爱好之实也故次之以国俗耶律氏僭擬中华有年数矣爵号官称往往窃名故次之以官属而宗戚俸禄三者相湏并见于边塞之俗恃险与马由古然矣故次之以關口道路又次之以番军马辽之为国幅员不过三千余里而并建都府兼置州县轺车所过宜详其处故次之以州县彼裔夷也并有奚防故土外接大荒之境其可见者宜兼着之所以示天声之逮逮也故终于番夷杂録而经制方略论议奏疏附焉臣切观前世制御戎塞之道载籍所纪不过厚利和亲以约结之用武克伐以驱除之或入朝质子以制其命汉唐之事若可信也然约结一解则陵暴随之彼岂不得其术邪盖恃一时之安而不图经久之利固也渊谋硕画何代无之至于我朝乃得上策年厯七纪而保塞无患歳来信币而致礼益恭行旅交通边城晏闭黎民土著至老死而不知兵革自书契以来戢兵保定未有如今日之全胜者也圣上方恢天下之度以威怀遠人犹虑有思慢令取侮遂案图籍掲为令典使之循守无得而逾后虽有忿鸞悍黠之类欲启事端绳以章条彼当自屈若然举辽朔之众唯上之令则是书之作可谓规抚宏遠而德施无穷矣然以今日承平之势当彼百年既往之运狃我涵煦侈心渐萌侈极而微形兆兹见藁街质馆行可致其俘入矣姑撮其大要概副圣辰经遠之虑总二百卷卷有冗并则厘为上中下谨条事目具于左方

章公甫字序 章望之

古之人有圣智者出然后制器济用以为天下利而洪荒之风革矣前圣作之后圣因之以至于多且备宫室栋宇養生之大物也丘墓宗庙奉死之大归也城郭沟池守国之大防也车辂所以行陆也舟梁所以行水也险阻由是而通耒耜鎡基筐筥杵臼所以资农作也薄槌以时蚕机杼以成丝丝麻布帛所以资女功也衣食由是而有鈇钺干戈介冑矛防所以卫兵人也常旂旗旄旐所以表师帅也鼓鼙铙镯所以警进退也奸暴由是而戢罔罟毕翳所以给畋渔也灾害由是而除衣裳鞞舄所以周身也冕弁巾冠所以饰首也天子之镇圭诸侯之五瑞所以班国也佩玉于身触以冲牙组绶咸异所以节行也贵贱由是而衰丧期有数丧制有别齐斩苴枲以杖屨辅其隆以日月致其杀所以厚人道也孝思由是而笃珪璧琮璜凡用玉者所以礼神修好也诚慤由是而交鼐鼐錡釜所以致烹飪也俎豆簠簋所以旅饮食也爵勺尊彝所以 酒醴也賓祭由是而供金石丝竹匏土革木舞以干戚羽旄象其君德所以谐音乐也和乐由是而合莞簟几杖所以佚四体也尊少由是而分射侯既抗正鹄既设弓矢以中所以习射也礼容由是而考节符印玺所以孚遠近也命令由是而质府库之藏键闭筦籥以固之所以谨出纳也诈伪由是而察五行之产五材之用或文也或素也或有象也或无象也或贵其声也或贵其色也或贵其物也或贵其德也视其所施而已大小有宜上下有称于以尊尊而亲亲老老而賓賓敬鬼神而利民事国家制度于是乎始罔淫为异器以启奇邪是以作而可

法用而可观惟度量权衡齐众之器也多寡天下之物诚信天下之民本之同律参之度数以适规矩方圆以定準绳平直法于王府同于四海之内凡出于人力者莫不得所以程百器以役百工是以先王务审之今吾族子者衡其名矣子平其字矣尝得进士第冠多士于天子之廷是尊儒之重选也六朞而拜四官籍在外朝职在书府出守大邦世人犹以为淹相见于江之南固请于予曰为我推衡平之义而易字焉予不得其辞而告之曰衡平而得轻重物得轻重而民得其情天下之公所由出也字曰公甫可乎公甫曰衡也不得叔父之言为不自安今朋友以谓衡也者将告之曰是吾叔父之言也

郑野甫字序 章望之

鸟兽与人杂生于世鸟兽之形有头足毛羽之异吾人者因其形之一类防以其物称之人之形同莫可辨者古之人以名名人出其父祖之命以为识别后之人因名配字以义类相符非谓有劝沮之殊欲令人人行其名字也故有因义以配物有因物以配义有因名之文损益藏显而字乃反之有因名之物遂以其实配之是以因义以配物如耕之于伯牛如由之于子路因物以配义如赤之于子华师之于子张字反名如商之于子夏偃之于子游物配实如长之于子长予之于宰我是其意也今之人不究本初以意起事或谓此名也宜克之以是道彼字也可行之于终身虽失古人之心犹未离乎告人以善也然而以名字自守于吾道之门固已狭矣郑子名叔熊其友字以正夫子不安其說也命予为言其理以易之夫子学于古人闻深而见博又以行谊自潜不符正夫之字然后劝也请字之曰野甫以从其因物以配义者如曰不已质哉为赋白驹之卒章有曰生刍一束其人如玉其人如玉云者谓其来非外【缺】

宋文鉴卷八十九

卷九十

钦定四库全书

宋文鉴卷九十

宋吕祖谦编

序

后周书序 王安国

周书本纪八列传四十二合五十篇唐令狐德棻请撰次而诏德棻与陈叔达庾俭成之仁宗时出太清楼本合史馆秘阁本又募天下献书而取夏竦李巽家本下馆阁是正其文字今既镂板以传学官而臣等始预其是正又序其目录一篇曰周之六帝当四海分裂之时形势刼束毅然有志合天下于一而材足以有为者特文帝而已文帝召苏绰于稠人之中始知之未尽也卧与之言既当其意遂起并昼夜咨諏酬酢知其果可以断安危治乱之谋而诘已以听之考于书唯府兵之设斂千歳已散之民而系之于兵庶几得三代之遗意能不骇人视听以就其争而效见于后世文帝尝患文章浮薄使绰为大诰以劝而卒能变一时士大夫之制作然则势在人上而欲鼓舞其下者奚患不成虽然非文帝之智内有以得于已而苏绰之守外不诘于人则未可必其能然也以彼君臣之相遭非以先王之道而犹且恳恳以夸言之又况无所待之豪杰可易以畜哉夫以德力行仁所以为王霸之异而至于诘已任人则未始不同然而君能畜人者天下之至难传曰取人以身修身以道修道以仁盖道极于不可知之神而人有其质推之为天下国家之用者以其粗尔然非致其精于已则其粗亦不能以为人惟能自爱其身则内不欺其心外不蔽于物然后好恶无所作而尚何有已哉能无已始可以得已而足以揆天下之理知人之言而邪正无以廋其实尚何患乎论之不一哉于是贤能任使之尽其方而吾所省者以天下之耳目而小人不能托忠以诬君子又从而为之劝禁则小人忿欲之心已黜于 之际君子乐以其类进而摩厉其俗凜然有耻君臣相与谋于上因敝以新法度而令驰骛于下者有忠信之守而无傅防迁就之患则法度有拂于民而下不以情赴上者乎盖虚然后能受天下之实约然后能操天下之烦垂纓摄衽俯仰堂庙无为以应万几者致其思而已矣夫思之为王者事君臣一也势则异焉世独颂尧舜之无为而安知夫人主自宜无为而思则不可一日已也书曰思曰睿杨雄曰于道则劳其不然欤盖夫法善矣非以道作其人则不能为之守而民之多寡物之丰杀法度有视而革者必待人而后谋则是可不致其思乎苟未能此而徒欲法度之革者是岂先王为治之序哉彼区区之周何足以议徒取其能因一时君臣之致好犹足以见其效又况慨然行先王之道而得大有为之势是固不宜无论也

良方序 沈括

予尝论治病有五难辨疾治疾饮药处方别药此五也今之视疾者唯 气口六脉而已古之人视疾必察其声音颜色举动肤理情性嗜好问其所为考其所行已得其大半而又偏诊人迎气口十二动脉疾发于五脏则五色为之应五声为之变五味为之偏十二脉为之动求之如此其详然而犹惧失之此辨疾之难一也今之治疾者以一二药书其服饵之节授之而已古之治疾者先知阴阳运历之变故山林川泽之窍发而又视其老少肥瘠贵贱居养性术好恶忧喜劳逸顺其所宜违其所不宜或药或火或刺或砭或风或液矫易其故常揣摩其性理搏而索之投机顺变间不容髮而又调其衣服理其饮食异其居处因其情变或治以天或治以人五运六气冬寒夏暑暘雨电雹鬼灵厌蛊甘苦寒暑之节从先胜复之用此天理也盛衰彊弱五脏异禀饮食异好循其所同察其所偏不以此一形彼不一不以一人例比众人此人事也言能不传之于书亦不喻之于口其精过于承蜩其察甚于刻棘目不舍色耳不失声手不释脉犹惧其差也授药遂去而希其十全不其难哉此治疾之难二也古之饮药者煮炼有节饮啜有宜药有可以久煮有不可以久煮者有宜炽火有宜温火者此煮炼之节也宜温宜寒或缓或速或乘饮食喜怒而饮食喜怒为用者有违饮食喜怒而饮食喜怒为敌者此饮啜之宜也而水泉有美恶操药之人有勤惰如此而责药之不效者非药之罪也此服药之难三也药之单用为易知复用为难知世之处方者以一药为不足又以众药益之殊不知药之有相使者有相反者有相合而性易者方书虽有使佐畏恶之性而古人所未言人情所不测者庸可尽哉如酒之于人饮之逾石而不乱者有濡咳则颠 者漆之于人有终日抔洒而无害者有触之则疮烂者焉知他药人于人无似之异者此禀赋之异也南人食猪鱼以生北人食猪鱼以病此风气之异也水银得硫黄而赤如丹得矾石而白如雪人之欲酸者无过于醋矣以醋为未足又益之以枳二酸相济宜甚酸而反甘巴豆善利也以巴豆之利为未足而又益之以大黄则其利反折蟹与柿尝食之而无害也二物相遇不旋踵而呕此色为易见味为易知呕利为大变故人人知之至于相合而之他藏致他疾者庸可易知邪如乳石之忌参术触者多死至于五石散则皆用参术此古人处方之妙而世人或未谕也此处方之难四也医诚艺也方诚善也用之中节也而药或非良其奈何哉橘过江而为枳麦得湿而为蚁佳逾岭而黑鸛鹑逾岭而白月亏而蛙蛤消露下而蚊啄疔此形气之易知者也性岂独不然乎予观越人艺茶畦稻一沟一垅之异远不能数步则色味顿殊况药之所生秦越燕楚之相远而又有山泽膏瘠燥湿之异禀岂能物物尽其所宜又素问说阳明在天则花实 气少阳在泉则金石失理如此之论采掇者固未尝恤也抑又取之有早晚藏之有良苦风雨燥湿动有槁暴今之处药或有恶大者必日之而后咀然安知采藏之家不尝烘焙哉又不能必此辨药之难五也此五者大防而已其微至于言不能宣其详至于书不能载岂庸庸之人而可以易言医哉予治方最久有一方之良者辄异疏之世之为方者称其治效尝喜过实千金肘后之类尤多溢言使人不复敢信予所谓良方者必目睹其验始着于篇闻不预也然人之疾如向所谓五难者方岂能必良哉一覩其验即谓之良殆不异乎刻舟以求遗剑者予所以注着其状于方尾疾有相似者庶几偶直云耳篇无次序随得随注以与人拯道贵速故不假从伏待完也

县法序 吕惠卿

天下之民事皆领于县则奉朝廷之法令而使辞讼简刑狱平防计当赋役均给纳时水旱有备盗贼不作衣食滋殖风俗敦厚必自县始然古之官学皆有师法虽工官犹莫不然况于为

数万户之县而当古一国之任独可以无法乎惠卿之有意于此也久矣兹者出守大名当荐饥之后民卒流亡盗贼多有随宜应务粗亦竭愚复召畿内之知佐问其所以施設之方而监司部吏之厯县道老民事皆谘访焉既尽其所长矣于是人附以平日之所尝讲闻试用者为法令词讼刑狱簿厯造簿给纳灾伤劝课教化凡十门目曰县法以趣时便事宜与敕令合而易晓故不敢甚高而文以其意与所学于先王者不异也故时及焉而其事多河北之风俗则以行之部内而已然恺悌君子有志乎民者亦所不爱也

易传序 程頤

易变易也随时变易以从道也其为书也广大悉备将以顺性命之理通幽明之故尽事物之情而示开物成务之道也圣人之忧患后世可谓至矣去古虽远遗经尚存然而前儒失意以传言后学诵言而忘味自秦而下盖无传矣予生千余载之后悼斯文之湮晦将俾后人沿【胡本作泝】流而求源此传之所以作也易有圣人之道四焉以言者尚其辞以动者尚其变以制器者尚其象以卜筮者尚其占吉凶消长之理进退存亡之道备于辞推辞考卦可以知变象与占在其中矣君子居则观其象而玩其辞动则观其变而玩其占得于辞不达其意者有之矣未有不得于辞而能通其意者也至微者理也至著者象也体用一源显微无间观防通以行其典礼则辞无所不备故善学者求言必自近易于近者非知言者也予所传者辞也由辞以得意则在乎人焉

春秋传序 程頤

天之生民必有出类之才起而君长之治之而争夺息导之而生養遂教之而伦理明然后人道立天道成地道平二帝而上圣贤世出随时有作顺乎风气之宜不先天以治人各因时而立政暨乎三王迭兴三重既备子丑寅之建正忠质文之更尚人道备矣天运周矣圣王既不复作有天下者虽欲仿古之迹亦私意妄为而已事之谬秦至以建亥为正道之悖汉专以智力持世岂复知先王之道也夫子当周之末以圣人不复作也顺天应时之治不复有也于是作春秋为百王不易之大法所谓考诸三王而不谬建诸天地而不悖质诸鬼神而无疑百世以俟圣人而不惑者也先儒之传曰游夏不能赞一辞辞不待赞也言不能与于斯耳斯道也惟顔子尝闻之矣行夏之时乘殷之辂服周之冕乐则韶舞此其準的也后世以史视春秋谓褒善贬恶而已至于经世之大法则不知也春秋大义数十其义虽大炳如日星乃易见也惟其微辞隐义时措从宜者为难知也或抑或纵或与或夺或进或退或微或显而得乎义理之安文质之中寛猛之宜是非之公乃制事之权衡揆道之模范也夫观百物而后识化工之神聚众材而后知作室之用于一事一义而欲窥圣人之用非上智不能也故学春秋者必优游涵泳默识心通然后能造其微也后王知春秋之义则虽德非禹汤尚可以法三代之治自秦而下其学不传予悼夫圣人之志不明于后世也故作传以明之俾后人通其文而求其义得其意而法其用则三代可复也是传也虽未能极圣人之蕴奥庶几学者得其门而入矣

羣居治五经序 龚鼎臣

夫五经道之源也人非专力探究虽百歲亦无至焉今之士人以世所谓明经者第习读其言应贡举比及得爵禄政事卒不谕经义故以传诵为己羞喜近功轻速度率常抉剔其词引为章句自谓通经及语以道德仁义皆若聋之于声瞽之于色其不能闻且见者如是予尝病焉防邳郡陈子坚河南侯孝杰俱以儒名相与择士之秀者得孙高二生各取一经以治之由是以室之中讲正诵醇仁义之言馥如椒兰天人之理邃如江海时发辩论铿然其声既而树程式凡十日互求传注所未至者以质问焉有不通者罚金以耻之庶乎鲜或暇逸而造乎极焉然孔子谓诵诗三百授之以政不达使于四方不能专对虽多亦奚以为者诚为黷愚者发尔善为学者能诵且达于政而敏于对对于圣人之言为不乖谬矣用是着其始且以勉于终云

送焦千之序 刘放

放尝论乡举里选之法难全行于今自三代之盛诸侯列国与郡县不同及事从远不传且置不言夫东西汉之时贤士长者未尝不仕郡县也自曹掾书史馭吏亭长门干街卒游徼嗇夫尽儒生学士为之才试于事情见于物则贤不肖较然故遭事不惑则知其节临财不私则知其廉应对不疑则知其辩如此故察举易而贤公卿大夫自此出矣今时士与吏徒异物吏徒治文书给廨役戇愚无智贪诟无节乘间窥隙诡法求货答防僂辱安以为己物故无可以兴善者而儒生学士之居于乡里不过闭门养高其外则游学四方以崇名誉然后可以出羣过人矣而欲法前世一使郡县议其行实而察举之固难矣前年天子袷祭宗庙施庆天下闵太平之时贤士有遗逸而不仕者因诏州郡推择上名于朝间一歲处士之应诏而至十三人果多游学成名者天子皆以礼接之馆于太学而使有司策问以经术之要当世之宜而爵命之皆得显名美仕焉凡十三人吾所素识者焦君伯彊焦君伯彊介直好学数应进士举至礼部輒罢去时人皆叹惜之谓之遗逸不亦宜乎夫州郡推择之公也有司考试之明也方将为国得贤必且精心审虑拔士于千万岂其崇虚徇名苟得举逸名之称而已则夫十二人者吾虽未尽识之殆皆焦君之伦无疑于是焉使之从政治譬犹发敖仓以赈贫乏决江河以灌下湿沛然其有余矣然吾闻焦君之名在第三而他郡有辞礼命而不至者夫焦君之才既尽美矣况复有过其一二者乎彼辞礼命不至者又其故何哉彼以迎之致敬之礼未尽其数欤抑彼皆伊尹太公之俦至三聘而后幡然改丘为太师然后载而与之归乎天下之大未可诬也吾甚慕之故于焦君之行乐道之焉

送赵希道序 潘兴嗣

予少时以为天下功名惟慷慨魁垒之士能奋力以取之睥睨而举目优游而就步则以为不若人矣既而熟视天下之士颠仆寒饿之际老死林谷之间未必尽非才而世之出于功名者或异是焉犹中凝而未决也则取史氏所载上下数千载泛滥而博求之然后知功名立者或偶于一时不必皆奇男子又有幸不幸也反而思之则缩缩然不得其所欲因取文王周公孔子之书颠倒散漫以观乎消息盈虚之际则豁然若有所得嗟乎始予之狂犹腾澜怒涛横流逆奔吞嗜百川从之势旋气定平入于海虽蛟鱼百怪出没汹涌而不知所以汨乎其中蓋予与希道别十有三年予之銳气销铄顿拙如此而希道平时尤喜功名廓落敢言今乃为小官奔走数千里外宜其愤愤不得于心乃俛首低气视甌石焉不啻若千金之重岂其所徇者轻

而无异于吾之說邪如无异于吾說则笃吾以自信如是功名之来也有余其去也无不足乃所谓幸不幸者豁然于胸中矣希道其勉之

南丰集序 王 震

南丰先生以文章名天下久矣异时齿髮壮志气銳其文章之慄鸷奔放雄浑瓌伟若三军之朝气猛兽之拱怒江湖之波涛烟云之姿状一何竒也方是时先生自负要似刘向不知以韩愈为何如尔中间从外徙世颇谓偃蹇不遇一时后生辈锋出先生泊如也晚还朝廷天下望用其学而属新官制遂掌书命于是更置百官旧舍人无在者已试即入院方除自填委占纸肆书初若不经意午漏尽授草院吏上马去凡除节御史数十人所以本法意原职守而为之训敕者人人不同咸有新趣而衍裕雅重自成一家余时为尚书郎掌付制吏部一日得尽观始知先生之学虽老不衰而大手笔自有人也呜呼先生用未极其学已矣要之名与天壤相悬不可诬也客有得其新旧所着而裒録之者余因书其篇首云

宋文鉴卷九十

卷九十一

钦定四库全书

宋文鉴卷九十一

宋吕祖谦编

序

正防序 范育

子张子校书崇文未伸其志退而寓于太白之陰横渠之阳潜心天地参圣学之源七年而道益明德益尊着正防书数万言而未出也间因问答之言或窥其一二熙宁丁巳歲天子召以为礼官至京师予始受其书而质问焉其年秋夫子复西归歿于骊山之下门人遂出其书传者浸广至其疑义独无从取正十有三年于兹矣痛乎微言之将絕也友人苏子季明离其书为十七篇以示予昔者夫子之书蓋未尝离也故有枯株暍盘之說然斯言也岂待好之者充且择欤特夫子之所居也今也离而为书以推明夫子之道质万世之传予无加损焉尔惟夫子之为此书也有六经之所未载圣人之所不言或者疑其蓋不必道若清虚一大之语适将取訾于未学予则异焉自孔孟没学絕道防千有余年处士横议异端间作若浮图老子之书天下共传与六经并行而其徒移其說以为大道精微之理儒家之所不能谈必取吾书为正世之儒者亦自许曰吾之六经未尝语也孔孟未尝及也从而信其书宗其道天下靡然同风无敢置疑于其间况能奋一朝之辯而与之较是非曲直乎哉子张子独以命世之宏才旷古之絕识参之以博闻强记之学质之以稽天穷地之思与尧舜孔孟合德乎数千载之间闵乎道之不明斯人之迷且病天下之理泯然其将灭也故为此言与浮图老子辯夫岂好异乎哉蓋不得已也浮屠以心为法以空为真故正防辟之以天理之大又曰知虚空即气则有无隐显神化性命通一无二老子以无为为道故正防辟之曰不有两则无一至于谈死生之际曰轮转不息能脱是者则无生灭或曰从生不死故正防辟之曰太虚不能无气气不能不聚而为万物万物不能不散而为太虚夫为是言者岂得已哉使二氏者真得至道之要不二之理则吾何为纷纷然与之辯哉其为辯者正欲排邪說归至理使万世不惑而已使彼二氏者天下信之出于孔子之前则六经之言有不道者乎孟子常勤勤辟杨朱墨翟矣若浮屠老子之言闻乎孟子之耳焉有不辟之者乎故予曰正防之言不得已而云也呜呼道一而已亘万世穷天地理有易乎是哉语上极乎高明语下涉乎形器语大至于无间语小入于无联一有室而不通则于理为妄故正防之言高者抑之卑者举之虚者实之碍者通之众者一之合者散之要之立乎大中至正之矩天之所以运地之所以载日月之所以明鬼神之所以幽风云之所以变江河之所以流物理以辨人伦以正造端者微成能者着知德者崇就业者广本末上下贯乎一道过乎此者淫遁之狂言也不及乎此者邪詖之卑說也推而放诸有形而准推而放诸无形而准推而放诸至动而准推而放诸至静而准无不包矣无不尽矣无人可过矣无

细可遗矣言若是乎其至矣圣人复起无有间乎斯文矣元祐丁卯歲予居太夫人忧苏子又以其书属余为之叙泣血受书三年不能为一辞今也去丧而不死尚可不为夫子咎乎虽然爝火之微培塿之尘恶乎助太阳之光而益太山之高乎蓋有不得默乎云尔则亦不得默乎云尔门人范育谨序

仁皇训典序 范祖禹

臣窃以语圣人之德必以甚盛者为称观先生之治必以所多者为尚尧以仁舜以孝禹以功文王以文皆其甚盛者也夏之政忠商之政质周之政文皆其所多者也三代以后其德不极其治不纯然而亦必有盛多焉汉孝文之恭俭唐太宗之功烈考之三王抑其次也惟我有宋受天眷命太祖无心于有天下而神器归之至仁如天神武不杀终舍其子以授大圣尧舜传贤不是过也太宗继文海内为下真宗守成治致太平至于仁宗当胜残去杀之运制礼作乐之防先有天下四十二年宋兴以来享国最久修身于一堂之上而置天下于太山之安端拱于法宫之中而跻一世于仁寿之域舟车所通日月所照无思不服威灵在天既三十年仁深泽厚沦浹海防流风未息故老犹存穷山窟穴之氓言之则流涕被髮左衽之俗闻之则稽首用能光大累圣无前之烈恢建后嗣无穷之基昔周公作无逸本之太王王季以及文王追配三宗四人廸哲多称文王之德以劝成王取其可以为法者也汉自高祖至于肃宗非无贤君而汉世之治独称孝文唐自高祖至于宣宗亦非无令主而唐世之治独称太宗皆取其子孙可守以为成宪也洪惟本朝祖宗以圣继圣其治尚仁而仁宗得其粹焉古者史为书以劝戒人君唐史官吴兢作贞观政要仁宗时命史臣编三朝寶训神宗时亦论次两朝之事陛下又命臣以神宗之训上继五朝以备迓英进读日陈于前考自三代以来未有六圣相承其德克类者也恭惟仁宗言为谟训动为典则实守成之规矩致治之準绳臣谨録天禧以来讫于嘉祐五十年之事凡三百十有七篇为六卷名其书曰仁皇训典以助睿览庶有万一之补焉元祐八年正月日臣祖禹昧死谨上

熙宁太常祠祭总要序 杨杰

国朝歲祀天地五方帝神州宗庙大明夜明太社太稷太一九宫腊蜡为大祀文宣武成风师雨师先农先蚕五龙为中祀寿星灵星中霤马祭司寒司中司命司民司録为小祀凡太常典礼乐少府共服器光禄共酒齐黍稷果实醯醢将作共明水明火太府共香币太僕共牛羊司农共豕俎有司应命人或为之骚然熙宁四年冬诏以诸寺监祠事于太常所以肃奉神之礼也太常初置主簿杰首被命至局之日寺监羣吏各执故习惘然不知祭事之联事杰乃集诸司所职为旁通图一卷以示之于是上知其纲下知其目大事从其长小事则专达郊庙羣祀焕然易明有司百执名扬其职职事相联罔不修举命曰熙宁太常祠祭总要云

仁宗御书后序 陈师道

人皆有所好其上胜之其次任之其下蕴崇之也惟至人无好有所好者同于人也神文圣武皇帝其好之与人同其胜之与人异同以为德异以为法迓声色而欲不胜礼寶珠玉而利不

胜义时游田而逸不胜度故其在位四十余年而四方百物无所损益顾好飞白书明窗净几时一为之以侈其好于是将相宗戚家有藏焉臣不知书不能颂其美而窃有所叹也凡艺不滞古则徇今滞古则舍己而就规矩徇今则略法而逐世好故其君臣争名而祸乱从之臣窃窥观皇帝防法而忘世防理而忘法故工拙偏正不足论也所谓有其道而进于技者王者之于蓺盖如此彭城王氏世为贵将故其家有传焉其从孙万寿主簿臣有基以皇帝所书六大字以示臣臣盖望而知之也臣不知书然望而知之者臣以理得之也臣惟皇帝却天下之好而留神翰墨乃帝者之懿德来世之伟闻而臣实惧焉臣闻故老言当斯之时二府百吏内宗外姻下逮近习莫不好书夫士大夫阿主之好而为书未害于政而臣惧小人因书以进也故君子于其所好又有慎焉臣惟皇帝之知此故世无其传而臣之愚不得不惧也

茶经序 陈师道

陆羽茶经家传一卷毕氏王氏书三卷张氏书四卷内外书十有一卷其文繁简不同王毕氏书繁杂意其旧文张氏书简明与家书合而多脱误家书近古可考正月七之事其下亡乃合三书以成之録为二篇藏于家夫茶之著书自羽始其用于世亦自羽始羽诚有功于茶者也上自宫省下迨邑里外及戎夷蛮狄賔祀燕享预陈于前山泽以成市商贾以起家又有功于人者也可谓智矣经曰茶之否臧存之口诀则书之所载犹其粗也夫茶之为蓺下矣至其精微书有不尽况天下之至理而欲求之文字纸墨之间其有得乎昔者先王因人而教同欲而治凡有益于人者皆不废也世人之説曰先王诗书道德而已此乃世外执方之论枯槁自守之行不可羣天下而居也史称羽持具饮李季卿季卿不为賔主又著论以毁之夫蓺者君子有之德成而后及所以同于民也不务本而趋末故业成而下也学者谨之

中庸后解序 吕大临

中庸之书学者所以进德之要本末具备矣既以浅陋之学为诸君道之抑又有所以告诸君者古者宪老而不乞言宪者仪刑其德而已无所事于问也其次则有问有答问答之间然犹不愤则不启不悱则不发又其次有讲有听讲者不待问也听者不至问也学至于有讲有听则师益勤而道益轻学者之功益不进矣又其讲而未必听有讲而未必听则无讲可也然朝廷建学设官职事有不得已者此不肖今日为诸君强言之也诸君果有听乎无听乎孔子曰古之学者为己今之学者为人为己者必存乎德行而无意于功名为人者必存乎功名而未及乎德行若后世学者有未及乎为人而济其私欲者多矣今学圣人之道而先以私欲害之则语之而不入道之而不行如是则教者亦何望哉圣人立教以示后世未尝使学者如是也朝廷建官设科以取天下之士亦未尝使学者如是也学者亦何心舍此而趋彼哉圣人之学不使人过不使人不及喜怒哀乐未发之前以为之本使学者择善而固执之其学固有序矣学者盖亦用心于此乎夫义礼必明德行必修师友必称乡党必誉仰而上之可以不负圣人之传付达于当今可以不负朝廷之教養世之有道君子乐得而亲之王公大人乐闻而取之与夫自轻其身涉猎无本徼幸一旦之利者果何如哉诸君有意乎今日之讲犹有望焉无意则不肖今日自为譏譏无益不几乎侮圣言者乎诸君其亦念之哉

集策序 秦观

臣闻春则仓庚鸣夏则蟋蟀鸣秋则寒蝉鸣冬则雉鸣此数物者微眇矣然其 未至则寂寞而无闻既至则日夜鸣而不已何则陰阳之所鼓动四时之所感发气变于外则情迫于中虽欲不鸣不可得也淮海小臣不闻庙堂之识帷幄之谋独耳剽目采颇知当世利病之所以然者尝欲输肝胆效情素上书于北阙之下则又念身非諫官职非御史出位犯分重烦有司之诛隐忍逡巡而不敢发幸陛下发德音下明诏大臣任举贤良方正能直言极諫之士将修祖宗政事而亲策于廷呜呼此亦愚臣效鸣之秋也輒忘疎贱条其意之所言者为三十篇以献惟陛下财择焉其目日以意寓言以言寓文示变化之所终始使天下晓然知之作国论瑟不鸣二十五弦各以其声应轂不运三十辐各以其力旋默则治语静则制动作主术急不极则缓不生缓不极则急不成一债一起如环无端作治势以治为险山川是资以兵为险不厌通达作安都自信者不避嫌自许者不求合倚而容之绩乃可底作任臣二篇众贤聚于本朝奸人之所不利巧为诋诬以幻羣听作朋党二篇鸟有鳳鱼有鯢超絶之材宜见阔略作人材杨墨塞路孟氏所攘申商崛起莫或汝遏作法律二篇得与失为隣利与害同门非至精莫之能分作论议二篇爵禄者所以砺世磨钝科条品目其可不悉作官制二篇善治水者以四海为壑善治财者以天地为资国之大计于是乎在作财用二篇料敌之虚实若别牛马应变之仓卒如数一二非有道之士不能作将帅以寡覆众来如风雨去如絶弦作奇兵美言可以市三寸之舌胜百万之师作辨士机防之来间不容髮匪 匪镜其能勿失作谋主心不治则神扰气不養则精丧治心養气其术自得作兵法愚民弄兵依阻山谷销亡不时或为大衅作盗贼三篇党项微种盗我灵武逾八十年天诛不迄作边防三篇东西为纬南北为经识者执综而文成其详在彼其略在此作序篇

扬州集序 秦观

扬州集者大夫鲜于公领州事之二年始命教授马君希孟采诸家之集而次之又搜访于境内简编碑板亡缺之余凡得古诗律诗洎箴赋合二百二篇勒为三卷号扬州集云按禹贡曰淮海惟扬州彭蠡既豬三江既入震泽底定而周礼职方氏亦称东南曰扬州其山镇曰防稽其泽薮曰具区江曰三江浸曰五湖则三代以前所谓扬州者西北剧淮东南距海江湖之间尽其地自汉已来既置刺史于是称扬州者徃徃指其刺史所治而已蓋西汉刺史无常治东汉治厯阳或徙寿春又徙曲阿魏亦治寿春或徙合肥吳治建业西晋后魏后周皆因魏东晋宋齐梁陈皆因吳惟宋尝以建业为王畿而东扬州为扬州东扬州者防稽也隋以后皆治广陵繇是言之凡称扬州者东汉指厯阳或寿春或曲阿中原自魏至周指寿春或合肥江左自吳至陈指建业或防稽隋唐五代乃指广陵广陵在二汉时尝为吳国江都国广陵郡宋为南兖州北齐为东广州后周为吳州唐初亦为防州其为扬州自隋始也繇是言之凡称吳国江都广陵南兖东广吳州防州者皆今之扬州也此集之作自魏文帝时已下在当时虽非扬州而实今之广陵者皆取之其非广陵而当时为扬州者皆不复取至扬子云箴本约禹贡为辞则广陵自在其中固不得而不録也既成公又属观推表废兴迁徙之迹而究其端使夫览之者有考焉

集瑞图序 秦观

熙宁九年燕国邵舜文与诸弟持其先君之丧于宜兴数月有双 生于后圃后二年又生紫芝三双桃双莲各一凡六物于是乡之耆老闻而叹曰邵氏其兴乎何其瑞之多也舜文因集六物者而图之号集瑞图云余谓万物皆天地之委和而瑞物者又至和之所委也至和之气磅礴氤氲而不已则必发见于天地之间其精者盖已为盛德为尊行为豪杰之材其浮沈而下上者则又为景星庆云甘露时雨醴泉芝草连理之木同颖之禾而栖翔游息乎其中者则又为凤凰麒麟神马灵 之属晔乎光景色象之异也藹乎华实臭味之殊也卓乎形声文章之无与及也于是指以为瑞焉繇是言之世之所谓瑞者乃盛德尊行魁奇之才所钟和气之余者耳邵氏之祖考既以潜德隐行见推乡闾至舜文彦瞻端仁又以文学取科第弟兄相继有闻于时而诸子森然皆列于英俊之域则是至和之气钟于其家久矣宜其余者发为草木之瑞也昔杨寔得王母使者曰环四枚而寔生震震生秉秉生赐赐生彪凡四世为三公以往推今即邵氏六物之瑞岂徒生而已夫盖有应之者矣

送李端叔赴定州序 张耒

耒为儿童从先人于山阳学官始见端叔为诸生耒虽未有知意已相亲后几二十年端叔罢官四明道楚耒又获见耒时已孤端叔吊我悲怀如骨肉后凡再遇于京师今其再也然端叔每别数年一见其论议益奇名誉益高今朝廷士大夫相与称說天下士屈指不一二必曰吾端叔也元祐八年苏先生守定武士愿从行者半朝廷然皆不敢有请于先生而苏先生一日言于朝请以端叔佐幕府苏先生之位未能进退天下士故用子如此然其意可知也耒苏公门人之下列也其亲慕端叔不足恠庚午耒卧病城南门无犬鸡昼卧悒悒端叔尝夜过我以烛视我面目见病有间喜动词色访覓医药以至无恙我之道艺无取名誉不振端叔独拳拳如此何也然端叔与余外家通谱于我舅行也岂其出于此非耶八年十月过我告以将北求余言为赠行余在交游中已号为多言其敢有爱于子为今中国患者西北二塞也狙伺我人矣西小而轻故为变易北大而重故为变迟小者疥癬大者痈疽也自比方罢兵中国直信而不问君臣不以挂于口而虑于心者数十年矣吾知其故诚知敌人之不能弃吾之重币也有司如故事歲时发币车马出门而此顾无事矣凡为是說者谓非敌情则不可然人度量相远未可以十百计也世固有得一金而喜者何必金帛数十万亦有得国于人而不厌者数十万金帛未足赖也往赵元昊未反时中国不为备御犹今日之信此一旦不逊中国震动视其治军立国骄逆悍鸷岂特河陇间一羌豪也吾安能复以羈縻其父祖者制畜之哉且雄杰之才未尝絕于世不在中国必在夷狄高皇帝以气吞中原之雄而冒顿张于匈奴高帝终无以困之魏灭蜀晋灭吴大敌已尽而苻石鹜于中国祖宗芟夷僭乱天下听顺无复偃蹇而人之元昊叛于羌自是以来又数十年矣耒闻今北边要郡有城隍不修器械若恶屯戍单寡然跬步强敌而人不惧者诚信之也枭鸱不鸣要非祥也豺狼不噬要非仁也见其不鸣谓之孔鸾见其不噬待以犬马吁亦过矣定武虏冲也其容有悔乎耒顷在洛阳与刘几者语边事几老将也谓余曰比见诏书禁边吏夜饮此曹一旦有急将使输其肝脑而平日禁其为乐为今役者不亦难乎夫椎牛酹酒丰犒而休養之非欲以醉饱为德所以增士气也耒闻定武异时从军吏士丰乐豪盛而今燕豆防恶终日受飧腹犹枵然官吏贫窶有愁苦无聊之心且朝廷既委

所当费而不爱矣将军重兵临方面天子属以何事而与持筹小吏日夜计口腹之赢此何为者也真能遂不费一钱才得几何哉子从辟以佐帅军事与有责矣挟端叔之学问词章而从苏先生如决大川而放之海是则余无以赞子矣

宋文鉴卷九十一

卷九十二

钦定四库全书

宋文鉴卷九十二

宋吕祖谦编

序

送秦少章赴临安簿序 张耒

诗不云乎蒹葭苍苍白露为霜夫物不受变则材不成人不涉难则智不明季秋之月天地始肃寒气欲至方是时天地之间凡植物出于春夏雨露之余华泽充溢枝节美茂及繁霜夜零旦起而视之如战败之军卷旗弃鼓裹疮而驰吏士无人色岂特如是而已于是天地闭塞而成冬则摧败拉毁之者过半其为变亦酷矣然自是弱者坚虚者实津者燥皆敛藏其英华于腹心而各效其成深山之木上桡青云下庇千人者莫不病焉况所谓蒹葭者乎然匠石操斧以游于林一举而尽之以充栋梁桷杙轮舆輶辐巨细强弱无一不胜其任者此之谓损之而益败之而成虐之而乐者是也吾党有秦少章者自余为太学官时以其文章示余愀然告我曰惟家贫奉命于大人而勉为科举之文也异时率其意为诗章古文后往清丽奇伟工于举业百倍元祐六年及第调临安主簿举子中第可少乐矣而秦子每见余輒不乐余问其故秦子曰余世之介士也性所不乐不能为言所不合不能交饮食起居动静百为不能勉以随人今一为吏皆失已而惟物之应少自偃蹇祸悔响至异时一身资养于父母今则妇子仰食于我欲不为吏亦不可得自今以往如沐漆而求解矣余解之曰子之前日春夏之草木也今日之病子者蒹葭之霜也凡人性惟安之求夫安者天下之大患也迁之为贵重耳不十九年于外则归不能霸子胥不奔则不能入郢二子者其羈穷忧患之时陰益其所短而进其所不能者非如学于口耳者之浅浅也自今吾子思前之所为其可悔者众矣其所知益加多矣反身而安之则行于天下无可憚者矣能惟食与人者尝饥者也赐之车马而辞焉者不畏徒步者也苟畏饥而恶步则将有苟得之心焉为害不既多乎故陨霜不杀者物之灾也逸乐终身者非人之福也元祐七年仲春十一日书

捕鱼图序 晁补之

古画捕鱼一卷或曰王右丞草也纸广不充幅长丈许水波渺弥洲渚隐隐见其背岸木葭莼向摇落草凄然始黄天惨惨云而风人物衣裘有寒意盖画江南初冬欲雪时也两人挽舟循涯一人篙而下之三人巾帽袍带而骑或马或驴寒峙肩拥袖者前扬鞭顾后揽辔语袂翩然者僮负囊尾马背而荷若拥鼻者三人屈竹为屋三童子踞而起大网一童从旁出者缚竹跨水上一人立旁维舟而下有笥者方舟而下四人篙而前其舟坐若立者两童子曳方罟行水

间者缚竹跨水上一人巾而依蓊蔭坐沉大网旁筍屈竹为屋缚竹跨水上童子跪而起大网者一人屈竹为屋前有瓶盂可见者篙者桨者俛下罩者三人皆笠力舟载大网竹且渔两儿两盞依蓊蔭坐有巾而髯出网中得者 操楫一人缚竹跨水上顾而语前有杯盂者方舟载大网出网中得者缚竹跨水上两儿沉大网旁维艤者两人篙其舟甚力有帷幙坐而济若妇人可见者方舟依渚一人篙一人小而髯三童子若饮食若寐前有杯盂者一人推苇间童子俛而曳循厓者人物数十许目相望不过五六里若百里千里右丞妙于诗故画意有余世人欲以语言粉墨追之不似也常忆楚人云帝子降兮北渚目眇眇兮愁予嫋嫋兮秋风洞庭波兮木叶下引物连类谓便若湖湘在目前思顷时歲晚道【缺】

如此渔者男子妇女童稚舟楫梁筍网罟罾罩【缺】江然其业廉而事佚故无市防争利意此与画二大夫去国其色无别恨奚以异元祐元年四月二十日李希孝出之欲模写无善工乃借韩退之序画人物意识之颍川晁补之序

离骚新序 晁补之

先生之盛时四诗各得其所王道衰而变风变雅作犹曰达于事变而怀其旧俗旧俗之亡惟其事变也故诗人伤今而思古情见乎辞犹诗之风雅而既变矣孟子曰王者之迹熄而诗亡然则变风变雅之时王迹未熄诗虽变而未亡诗亡而后离骚之辞作非徒区区之楚事不足道而去王迹逾远矣一人之作奚取于此也蓋诗之所嗟叹极伤于人伦之废哀刑政之苛而人伦之废刑政之苛孰甚于屈原时邪国无人原以忠放欲返幸君之一悟俗之一改也一篇之中三致志焉与夫三宿而后出昼于心犹以为速者何异哉世衰天下皆不知止乎礼义故君视臣如犬马则臣视君如国人而原一人焉被防且死而不忍去其辞止乎礼义可知则是诗虽亡至原而不亡矣使后之为人臣不得于君而热中者犹不懈乎爱君如此是原有力于诗亡之后也此离骚所以取于君子也离骚遭忧也终窶且贫莫知我艰北门之志也何辜于天我罪伊何小弁之情也以附益六经之教于诗最近故太史公曰国风好色而不淫小雅怨诽而不乱若离骚者可谓兼之矣其义然也又班固叙迁之言曰大雅言王公大人德逮黎庶小雅讥小己之得失其流及上所言虽殊其合德一也司马相如虽多虚辞滥說然要其归引之于节俭比亦诗之风諫何异扬雄以谓犹骋郑卫之音曲终而奏雅不已戏乎固善推本知之赋与诗同出与迁意类也然则相如始为汉赋与雄皆祖原之步骤而独雄以其靡丽悔之至其不失雅亦不能废也自风雅变而为离骚离骚变而为赋譬注有沔干肉为脯谓义不出于此时异然也传曰赋者古诗之流也故怀沙言赋橘颂言颂九歌言歌天问言问皆诗也离骚备之矣蓋诗之流至楚而为离骚至汉而为赋其后赋复变而为诗又变而为杂言长謡问对铭赞操引苟类出于楚人之辞而小变者虽百世可知故参取之曰楚辞十六卷旧録也曰续楚辞二十卷曰变离骚二十卷新録也使夫緣其辞者存其义乘其流者反其源谓原有力于诗亡之后岂虚也哉若汉唐以来所作非楚人之绪则不録

送田承君序 邹浩

熙宁元丰间外部贵人争违义以示宠其视大家之赤子甚于蒿莱芟夷焚燎极其力而后已蓋所谓矢匠惟恐不伤人者遂使覆露之恩輒逗遛不下于是諫官御史森森在廷噤不敢出

一语为社稷计况分职其部中者乎其胁于名分相与影响固不足深责其慷慨建明屹如勍敌压之以山丘而首不屈骇之以雷霆而色不变知保吾赤子以对扬天命而已可不谓贤哉仆所得者二人其一扬州江都令罗适见而得之者乎其一信州弋阳令董敦逸闻而得之者也呜呼天下几路列郡几城绾铜章以据百里者几人仆勤勤访焉不满三数其难矣哉又罗公之在江都也其始邑人固有欲杀之者矣在左右固有毁之者矣隣封固有嗤之者矣未几嗤之者自媿其不能也毁之者不觉誉言出其口也欲杀之者日惧其不从留也相率图其像筑室而祠之皆承君作尉时熟于听览且尝信眉抵掌为仆剧谈恨不与为僚者也承君贯古今每笑俗儒贵耳而贱目今治西河也肯舍江都之所得而远慕卓鲁乎苟思民有赴愬而不获伸甚于子之沉下僚而持衡者不察也思民有窘于衣食之谋甚于子之待次而无以自裕也思民有流离荡析而不安其居甚于子之侍老携防往返千万里也将见异时报政不独踵继于罗公又与西门豹史起相望无愧怍焉邑之士果有文学如子夏者乎仆知其为子作颂果有行义如段干木者乎仆知其启户持谒愿交于下风子之祖子方果不昧亦且陰自喜曰吾苗裔有人

孙莘老易传序 游酢

易之为书该括万有而一言以蔽之则顺性命之理而已陰阳之有消长刚柔之有进退仁义之有隆污三极之道皆原于一而防于理其所遭者时也其所托者义也其所致者用也知斯三者而天下之理得矣其理得仰则着于天文俯则形于地理中则隐于人心而民之迷日久不能以自得也防行于利害之域而莫知所向圣人有忧之此易之所为作也伏羲象之而八卦成文王重之而六爻具周公系之辞仲尼训其义自伏羲至于仲尼则易之书不遗余防矣蓋将领天下于中正之涂而要于时措之宜也居则观象而玩辞动则观变而玩占以研心则虑精以应物则事举天且助之人且与之而何凶咎之有故曰是兴神物以前民用又曰因贰以济民行此四君子之用心也孙公莘老少而好易常以是行已亦以是立朝或进或退或语或默或从或违皆占于易而后行也晚而成书辞约而防明义直而事核又将与学者共之蓋亦先圣之所期岂徒为章句以自名家而已此先生传易之意也学者宜以是观之

论语解序 谢良佐

天下同知尊孔氏同知贤于尧舜同知论语书弟子记当年言行不诬也然自秦汉以来开门授徒者不过分章析句尔魏晋而降谈者益稀既不知读其书谓足以识圣人心万无是理既不足以知圣人心谓言能中伦行能中虑亦万无是理言行不类谓为天下国家有道亦万无是理君子于此盍阙乎蓋溺心于浅近无用之地聪明日就雕丧虽欲读之顾不得其门而入也圣人辞近而指遠【一本蓋其辞近其指遠】辞有尽指无穷有尽者可以【一无以字】索之于训诂无穷者要当防之以神譬诸观人佗【一作昔】日识其面今日见【一作识】其心在我则改容更貌矣人则犹故也为【一作坐】是故难读今试以读此书之法语诸君焉勿以为浅近而忽勿以为太高而惊勿以为简我而忿且怒勿以为妄诞而直不信圣人之言不可以训诂形容其微意今不复撰次成文直以意之所到辞达而已矣蓋此书存于世论其切于用而收近效则无之与道家使人精神专一之学西方见性之說并驾争衡孰全孰驳

未易以口舌争也谈天语命伟辞雄辩使人可骇可慕曾不如庄周列御寇曼衍之言笼络万象葩华百出读之使人亹亹不厌曾不如班固雄深雅健之文正名百物分辨六气区味别性可以愈疾引年曾不如黄帝岐伯之对问神农之药书可以资听讼折狱可以饰簿书期防曾不如申韩之刑名陶冶尘思模写物态曾不如颜谢徐庾流连光景之诗以至神恠卜相之书书数博奕之技其皆可玩获售于人而此书乃一无有也欲使敏秀豪杰之士留精神于其间几何其不笑且受侮与邈乎希声一唱而三叹谁其听之淡乎无味酒元而俎腥谁其嗜之虽家藏人有不委尘埃者几希矣余昔者供洒扫于河南夫子之门仅得毫厘于句读文义之间而益信此书之难读也盖不学操缦不能安不学博依不能安诗不学杂服不能安礼惟近似者易人也彼其道高深溥博不可涯矣如此倪以童心浅智窥之岂不太有迳庭乎方其物我太深胸中矛盾者读之谓终身可行之恕诚何味方其胁肩谄笑以言飮人者读之谓巧言令色宁病仁未能素贫贱而耻恶衣恶食者读之岂知饭防食饮水曲肱而枕之未妨吾乐注心于利未得而已有颠防之患者读之孰信不义之富贵真如浮云过此而往益高深矣可胜数哉是皆越人视秦人之肥瘠也惟同声然后相应惟同气然后相求是心与是书声气同乎不同乎宜其卒无见也是书远于人乎人远于书乎盖亦勿思尔矣能反是心者可以读是书矣孰能脱去凡近以游高明莫为婴儿之态而有大人之器莫为一身之谋而有天下之志莫为终身之计而有后世之虑不求人知而求天知不求同俗而求同理者乎是人虽未必中道然其心当广矣明矣不杂矣其于读是书也能无得乎当不惟念之于心必能体之于身矣油然而得难以语人谓圣人之言真不我欺者其亦自知而已矣岂特虑思之效乃力行之功至此盖书与人互相发也及其久也习益察行益着知视听言动盖皆至理声气容色无非妙用父子君臣岂人能秩叙仁义礼乐岂人能强名心与天地同流体与神明为一若动若植何物非我有形无形谁其间之至此盖人与书相忘也则向所谓辞近而指远者可不信乎宜其贤者识其大者不贤者识其小者好恶取舍之相辽也学者倪以此言为可信则亦何远之有以谓无隐乎尔则天何言哉夫子之言性与天道不可得而闻也以谓有隐乎尔则四时行焉百物生焉夫子之文章可得而闻也是岂真不可得而闻哉诗云鸢飞戾天鱼跃于渊此天下之至显圣人恶得而隐哉所谓无行而不与二三子者也上天之载无声无臭此天下之至赜圣人亦恶得而显哉宜其二三子为有隐乎我者也知有隐无隐之不二者舍此书其何以见之哉知有隐无隐之不二者岂非閎博明允君子哉诸君可无意于斯乎

赵氏金石录序 刘跋

东武赵明诚德夫家多前代金石刻仿欧阳公集古所论以考书传诸家同异订其得失着金石录若干卷别白抵牾实事求是其言斤斤甚可观也昔文籍既繁竹素纸札转相誊写弥从不能无误近世用墨版模印便于流布而一有所失更无别本是正然则誊写模印其为利害之数略等又前世载笔之士所见所闻与其所传不能无同异亦或意有轩轻情流事迁则遁离失实后学欲窥其罅搜抉证验用力多见功寡此譬校之士抱槩怀铅所以汲汲也昔人欲刊定经典及医方或谓经典同异未有所伤非若医方能致寿夭陶景亟称之以为名言彼哉卑陋一至于此或讥邢邵不善譬书邢曰误书思之更是一适且别本是正犹未敢曰可而欲以思得之其讹有如此者惟金石刻出于当时所作身与事接不容伪妄皎皎可信前人勤渠郑重以遗来世惟恐不逮固非以为夸而好古之士忘寝废食而求常恨不广尔岂专以为玩

哉今登泰山观秦相斯所刻退而按史迁所记大凡百四十有六字而差失者九字以此积之诸书浩博其失胡可胜言而信书之人守目所见知其违戾犹弗能深考猥曰是碑之误其殆未之思乎若乃庸夫野人所述其言不雅驯则望而知之直差易耳今德夫之藏既甚富又选择多善而探讨去取雅有思致其书诚有补于学者亟索余文为序窃获附姓名于篇末有可喜者于是乎书

泰山秦篆谱序 刘跋

史记载秦始皇帝及二世皆行幸郡县立石刻辞令世传泰山篆字可读者唯二世诏五十许字而始皇刻辞皆谓已亡莫可复见宋丞相莒公镇东平日遣工就泰山摸得墨本以庆历戊子歲别刻新石亲作后序止有四十八字欧阳文忠公集古錄亦言友人江隣几守官奉高亲到碑下才有此数十字而已余以大观二年春从二三乡人登泰山宿絕顶首访秦篆徘徊碑下其石埋植土中高不过四五尺形制似方而非方四面广狭皆不等因其自然不加磨砢所谓五十许字者在南面稍平处人常所摸搨故士大夫多得见之其三面尤残缺蔽闇人不措意余审观之隐隐若有字痕刮摩垢蚀试令摸以纸墨渐若可辨自此益使加工摸之然终意其未也政和三年秋复宿岳上亲以氈推从事校之他本始为完善蓋四面周围悉有刻字总二十二行行十二字字从西南起以北东南为次西面六行北面三行东面六行南面七行其末有制曰可三字复转在西南棱上每行字数同而每面行数乃不同如此广狭不等居然可见其十二行是始皇辞其十行是二世词以史记证之文意皆具计其缺处字数适同于是泰山之篆遂成完篇宋欧阳二公初未尝到惟冯工匠所說无足怪人多以二公为信故亦不复详阅余既得墨本并得碑之形象制度以归亲旧闻之多求访问倦于屡报乃为此谱大凡篆字二百二十有二其可读者百四十有六今亦作篆字书之其毁缺及漫灭不可见者七十有六以史记文足之注其下谱成揭壁间从幽沉晦之迹今遂歷然秦至无义不足论然李斯小篆古今所师经千三百有余歲而复彰兹可尚也如亲 遠黎史作亲巡遠方黎氏金石刻作刻石著作休嗣作世听作圣陞作垂体作礼昆作后则又史家差误皆当以碑为正其曰御史大夫者大夫也庄子曰且而属之大夫卫宏曰古文一字两名因就注之史记于琅琊台刻石备列从臣名氏余家所收琅琊残字亦有五夫字然则夫从一大因不复重出欤

新校楚辞序 黄伯思

汉书朱买臣传云严助荐买臣召见說春秋言楚辞帝甚悦之王褒传云宣帝修武帝故事徵能为楚辞者九江被公等楚辞虽肇于楚而其目蓋始于汉世然屈宋之文与后世依放者通有此目而陈說之以为唯屈原所着则谓之离骚后世效而继之则曰楚辞非也自汉以还文师词宗慕其轨躅摘华竞秀而识其体要者亦寡蓋屈宋诸骚皆书楚语作楚声纪楚地名楚物故可谓之楚辞若些只羌淬蹇纷佗僚者楚语也顿挫悲壮或韵或否者楚声也沅湘江澧修门夏首者楚地也兰茝荃药蕙 苹蘼者楚物也率若此故以楚名之自汉以还去古未遠犹有先贤风防而近世文士但赋其体韵其语言杂燕粵事兼夷夏而亦谓之楚辞失其指矣此书既古简册迭传亥豕帝虎舛午甚多近世秘书晁监美叔独好此书乃以春明宋氏赵郡苏氏本参校失得其子伯以叔予又以广平宋氏及唐本与太史公记诸书是正而伯思亦以

先唐旧本及西都留监博士杨建勲及洛下诸人所藏及武林吳郡槧本讐校始得完善文有殊同者皆两出之按此书旧十有六篇并王逸九思为十七而伯思所见旧本乃有扬雄反骚一篇在九叹之后【此文亦见雄本传】与九思共十有八篇而王逸诸序并载于书末犹古文尚书汉本法言及史记自序汉书叙传之体骈列于卷尾不冠于篇首也今放此録之又太史公屈原列传班固离骚传序论次灵均之事为详故编于王序右方陈說之本以刘勰辩骚在王序之前论世不伦故绪而正之而天问之章辞严义密最为难诵柳柳州于千祀后独能作天对以应之深宏杰异析理精博而近世文家亦难遽晓故分章辨事以其所对别附于问庶几览者莹然知子厚之文不苟为艰深也自屈原传而下至陈說之序又附以今序别为一卷附十通之末而目以翼骚云至于屈原行之忠谗文之正变事之当否固昔贤之所详仆可得而略之也

宋文鉴卷九十二

卷九十三

钦定四库全书

宋文鉴卷九十三

宋吕祖谦编

论

君臣论 徐铉

君人者推赤心以接下者也臣人者推赤心以事上者也上下交感政是以和故大易之义在上者其道下降在下者其道上行则曰天地交泰上者自居其上下者自居其下则曰天地不交否然则为上而下降甚易为下而上达甚难何者君人者其势足以行人之道其贵足以显人之德其富足以聚人其义足以感人贤人君子望景而归之理自然也苟不逆之可矣又况于礼致之者哉故齐桓之德薄也犹能使管仲受执甯戚扣角况圣君乎此易之效也人臣者在贫贱之中处踈遠之地有上下之隔有左右之蔽自媒则有暗投之患因人则无苟合之誉礼秩之不足则不肯进也况不礼之哉故以仲尼之圣懷救世之心歷聘七十而不一遇况常人乎此难之效也然则士之失君所防者富贵耳庄老吏隱于陵躬耕商皓采芝君平卖卜未失其所以为士也君之失士或防既安之业或败垂成之功紂蹈于京厉流于彘鲁哀奔吴项羽屠裂则失其所以为君也圣帝明王鉴其若此故屈已以下士推诚以接物轩辕问道于下风唐尧求贤于侧陋周公吐餐于白屋汉祖辍洗于布衣况朝廷之臣乎夫朝廷之臣位有前后任有小大至于君臣之分诚心所感其揆一也诗曰嗟我懷人寘彼周行卿士大夫各居其位所谓周行也言周行之中皆所懷之人也书曰汝则有大疑谋及乃心谋及卿士谋及民大疑大政也庶民犹与焉况羣臣乎此治治世之主至公之义也世之衰也踈公卿而亲近习憚君子而狎佞人亲而狎之也以为腹心踈而憚之也以为仇敌于是政出于羣小而责及于大臣如此而不乱未之有也君子之事上也近之不敢佞遠之不敢怨受命无二虑临难无苟免小人之事上也远之则憾近之则比受命则顾望临难则幸生人君不能熟察也以为我之所亲彼亦尽忠我之所踈彼亦懷二于是听鉴惑于外精神滑于中及乱之来也小人无忘生之节君子非死难之所楚灵殒于干谿二世弑于望夷而莫之救也其所由者自私与自胜也自私故慙与君子言自胜故憚与君子言此小人所以易见亲君子所以易见踈也夫亡国非无贤臣乱主非独坐于堂上也用心之不一也书曰一哉王心诗曰淑人君子其仪一兮人君用心一则贤臣知所从矣

持权论 徐铉

天下所以奉者君也君之所以尊者权也权者非他也赏罚而已矣赏公则当善而为善者进

矣。罚公则当恶而为恶者退矣。若然则君子在位小人在野而权不在公室者未之有也。中才之君知赏罚之权不可失而不知所以守之之道欲人之懷已也则必赏自我出欲人之畏已也则必罚自我行此乱之本也。老子曰为者败之执者失之赏罚者受之于先王行之于有司人君正其本遏其淫而已苟自为之而自执之其余防何尚。书数尧之德曰聪明文思及其举舜也则四岳师锡尧曰予闻如何朕其试哉。夫尧既闻舜之行贤犹待四岳举然后登用此则赏不必已出也。周公作万代之典设三听之法众听则杀之众疑则赦之此则罚不必已出也。汉高祖气吞羣雄威振海外然而不敢以私忿诛季布不敢以私惠赏丁公秦始皇亲治庶务以衡石自程羣臣莫得专任而秦汉之成败岂不明哉。然则赏罚在于公不在于自执必矣。魏晋已降创业之君才畧冠世功勲震主既当失政之代遂践数终之运后世人君惩其若是故憎疾胜已诛锄高名所谓同归于乱者也。昔楚莊王谋事而当羣臣莫能及退而有忧色曰楚国之大而羣臣莫吾及吾国其亡乎此所以饮马于河也。汉高祖自谓不如三杰而能用之所以有天下也。梁武在雍州时破魏将王肃得其巾箱书见魏帝手勅曰吾闻萧衍善用兵勿与鬪其威名如此及其为帝也乃用临川王宏贞阳侯明为将在竟陵府时与谢朓王融之俦齐名及其为帝也乃用陆验石玠为心膂何者患其失权贪其易制曾不知亡国之衅始基于此也。夫权者非谓其强臣专政王命不行前邀九锡后征殊礼也。盖人君有偏听焉有偏好焉偏听则朋党有所附矣偏好则奸邪有所入矣朋党势固奸邪在侧人主以不闻过为贤不违命为治如是则赏罚者朋党之所为而假手于人主矣。当时之人知其如此亦且弃正义而事朋党背公室而向私门非徒竞利且以避害然则权安在哉。后魏孝明时衛士数千人焚领军张彝宅杀其父子朝廷惧以为乱也止诛八人余并释之。高欢时在民间闻而叹曰乱之始也乃散家财招集亡命卒移魏祚魏人不知失权之始在乎孝明及高氏执政方云禄去公室不亦晚乎。诚令人君用法公共接下均一善善而能用之恶恶而能去之不以己之私妨天下之义虽复体非圣贤盖亦思过半矣。呜呼斯道也甚易知甚易行甚易效而鲜能行者盖夫疑信之际贪旦夕之便因循僂俛以至政隳势败而自不之知也。传曰失之毫厘差以千里岂虚言哉。

师臣论 徐铉

至大者天必配以地至明者日必配以月至刚者阳必配以陰至尊者君必配以臣君臣之义与天地并者也。君之有臣也所以教其知匡其不逮扶危持颠献可替否其任大矣。故君失之臣得之臣失之君得之上下相维乃无败事非徒承其使令供其喜怒而已。故曰师臣者王友臣者霸。书曰能自得师者王谓人莫已若者亡。自三皇以来莫不由斯而致者也。衰世之君闇于大道嘉言美事掠归于己防臣佞妾从而成其过曰生杀废置国之利器必出自一人不当为人臣所教。呜呼斯甚不然也。夫往古之事不可言已其世近而昭然者请以汉祖明之高祖奋布衣取天下功侔三代享祚四百可谓盛矣其举事之始驻军于陈留则酈食其之谋破武关入咸阳则张良之策还定三秦则韩信之计为义帝缟素则董公之說出兵宛叶则郑忠之画破垓下则三王之力及其成功则高祖享帝王之业数子获人臣之禄岂为人臣所教者不能为帝王乎。故高祖曰吾不如三杰而能用之所以得天下也。及太宗文皇帝力行王道天下已平喟然叹曰魏征教我功业如此夫二帝者皆用忠贤之谋以建三五之业归功臣下而其道愈光。老子曰功成而不居夫唯不居是以不去此之谓也。昔魏武帝使夏侯渊守汉中蜀先主用法正之计破汉中杀渊等魏武闻之曰吾知德不辨此必为人之所教言之失也。史论

之备矣魏武雄杰之主犹有斯论况常人哉夫为国譬用兵焉大将将十万之众举千乘之国
有坐筹制胜者锋摧杀敌者有先登陷垒者及其成功则元帅之功也今使元帅兼此数者而
独论功可乎夫君人出令臣下唯知奉行则役夫竖子可为卿相何必劳于求贤哉呜呼斯道
之不明从矣明达君子可无思乎可无思乎

劝农论 高 锡

劝农者古典也国家歲以举之然则劝之道不在劝乎时以耕时以种时以收获也在于知其
病而去之耳夫农之病者由乎隳于制度也制度隳则下得以僭上是故宫室无常规服玩无
常色器用无常宜饮食无常味四者偕作于是奇伎淫巧出焉浮薄浇诡骋焉业專于是货易
于是者利甚厚于农矣农虽日劝之岂有益哉凡民之情所急者利利苟有取假严刑法以毒
之民亦不顾其罪而趋之矣利苟无取假垂仁惠以抚之民亦不知其恩而背之矣非民爱其
罪而恶其恩蓋所乐者利也于今之农其利甚寡农家之利田与桑也田桑所出者谷帛夫以
垦之妇以蚕之力竭气衰方见谷帛谷帛之价轻重不常农家出则其价轻入则其价重轻重之
一起于时也时底于稔谷帛多矣租不取焉农乃易其多以赴征租故有轻而出时遇于凶
谷帛逋矣赋敛多取焉农乃完其逋以供赋敛故有重而入稔既轻出凶又重入则田桑之人
腹之食身之衣亦已悬矣敢言于利乎所谓病之深也且务奇伎淫巧浮薄浇诡业專于是者
货易于是者不苦于体不疲于神皆坐而获利焉即如雕一寸之金镂一寸之玉比谷之价有
几也文一尺之绮饰一尺之纨比帛之价有几也既金玉绮纨与谷帛之价不侔又无凶稔轻
重之 食以之具衣以之余以此则谁肯勤于农哉若使雕镂不如耕凿文饰不如经织寶谷
如金玉贵帛如绮纨必见溥天之下有男皆执于耒耜有女皆务于杼轴必无旷土无游民何
者众之利薄农之利厚也若欲劝于农先思去于病若欲去于病先思举于制制度举则俾下
无以僭上上之宫室之规使下不得宅焉上之服玩之色使下不得衣焉上之品用之宜使下
不得举焉上之饮食之味使下不得荐焉则奇伎淫巧浮薄浇诡业專于是者尽息矣制度既
举病自然去病既去农不劝而自劝也何须歲举古典哉

断论 田 锡

谋虑者断之始也勇敢者断之用也若谋虑未甚精成败未尽见情伪未洞知而不忍欲利欲
胜之意不忍小忿小耻之心卒然奋发自谓决断斯乃刚忽而趣败也安得谓之断哉若谋虑
已精成败已见情伪已审而犹疑事或未济尚忧理之未尽犹豫于大难惶惑于临机本谋乱
而不能坚守始虑挠而不能必行是谓无断也噫排大难济大事立大功垂大名皆由于断也
陷大恶致大乱隳大功失大事亦由于断也蓋谋熟而后断则大功大名随之而兴矣智浅而
言断则大恶大乱亦随之而陷矣昔桀恶日盈汤德日新干戈未举成败之数先定也汤乃勃
兴应天顺人一战而克遂自诸侯而为万乘主斯则汤之智虑已精成败已见而果敢于断也
其次商纣纵虐而文王之德素积于民民心归周从矣一旦武法成汤之举师次牧野风裂旗
旆武王震恐以为天意未从遽思中辍唯太公独排众意以为必克是则武王之断未侔于太
公泊秦灭六国威名雄迹信有英断长防巨铄销为金狄圣谋国典焚为煨烬将以弱诸侯之
兵也将以愚天下之民也若是果断自谓超三王迈五帝然而陷大恶致大乱失大位得非断

于强暴而不断于仁信乎由是知有断于威武也有断于为仁也有断于用贤也有断于贞介也许由弃尧之禅让伯夷绝周之蔬粟是断于贞介也管蔡流言周公诛之大义灭亲之断自周公始也龙逢比干以谏而死是断于为忠也伊霍废黜由己是断于为大节也燕王用乐生虽谤书盈篋而委任愈坚此则断于用人也项籍勇杰不能终用范增所以霸王之业卒为汉有岂非无断于推心乎世祖单骑入铜马之军人人相悦悦其推心也唐太宗之初颉利控者二十万临于渭滨太宗单骑隔水责之戎人畏伏下马谢罪于时臣僚进谏以为轻敌上曰国家初定若示之弱即生戎心所谓智略周通而决断果敢也汉祖数项羽之罪而弩矢窃发责敌之罪颇类太宗然为飞镞所中若万一不幸即汉祖之断有余而料敌之智或浅也有以见楚子投袂而起孟明焚舟而前是皆去而成功岂是善谋而能断哉夫智与断在乎兼备也若差之毫厘失之千里使汉祖从酈生之言断而不疑则功业无因而济矣使太宗从高祖之言疑而不断则家国无因而变矣今之论者皆以韩信不从蒯通之言谓之无断锡以为韩信不断于为忠而犹豫思乱以取诛灭也何哉当蒯通说时其心不回谓受汉恩深不忍叛也及其功高而疑生势逼而猜起不能坚守初志卒与陈豨谋乱何始于忠而终于逆盖无断于忠节也非无防于逆乱也诗所谓鲜克有终其是谓乎亦犹孝景始用晁错之言从之如顺流将削七国之封弱枝而强本一旦七国共叛遽听袁盎之言诛错以谢七国错既诛而乱不息岂非孝景无断于用人而反惑防诬之言哉若成与败但思一决而不图始终慨然自谓决断不其谬欤故管仲不死子纠之难非无断也非其死所也晋宣得巾帼之赠不敢出战非无断也战未便也是知智计明然后决断则事无不济矣

原古 贾 同

古者故也自我而上皆故也传说曰事不师古以克永世匪说攸闻然则呜呼师之执也曰古犹今也人之所以率古而言事者取于众也取于众则所见长矣自我而上皆古也自我而上一世也在一世而窥千世则何法而不有焉择而用之何用而不长焉是知师古者非师其年也师其众也周公于是考三代而制礼乐焉孔子于是祖述尧舜而修六经焉师于众而执其中也曰尧舜而上牺农黄帝之道不足法邪曰否非不足法也不能法也夫锦绮之为衣岂不美哉而为天下者不用之而用布帛以其能足于天下也周孔之道万世不能易足于万世者也贤者及之不贤者失之而无能过之者犹失之者也故周孔之道如衡夫衡物轻于权则不能起权权轻于物则不能胜物唯权与物称然后衡正曰然则牺农黄帝亦圣人也何以不为之中焉曰时未也圣人则欲自然也不得已而后有作焉事之既生为之制宜而节度之谓之礼可以长世用之谓之经夫礼经者起于薄薄尽而后酌于厚薄之间谓之中而民未及薄安得教之薄乎曰圣人亦知其后必薄乎曰知曰知则何为不先为之中邪不久之厚何有焉曰圣人恶其教人之薄也道之至薄则臣杀其君子杀其父乌得使之预知其弑君弑父邪由是而言一日之厚不可不有也曰然则何以知后世不可易也曰以治乱之极而知之也曰何以知治乱之极也曰以力与欲知之也何以言之曰力者有常者也欲者无常者也以无常之欲不已则力竭力竭则欲止欲止则乱极也不止则民斯尽矣自古而今未有尽民之乱也止则缓力而蠲欲不已则欲尽则力全则治极理所以然也终而始之上自有物下迄而穷吾知其不能也已原古

原祭 郑 褒

先王之设祭祀所以礼天地而事祖宗报本而追远贵诚而尚德也尊有异制牲币有异数上可以兼下下不可以僭上王者继天为子故郊以享帝孝以承业庙以事先诸侯守土地之官宗庙之外得以祭封内之名山大川卿大夫而下臣于人无敢越祭祖祢而已是以神不临非祭人不祀非鬼季孙旅于泰山孔子非之谓冉有曰汝弗能救与不独非于季氏而又罪于其臣楚昭王疾卜曰河为祟其大夫请祷之王曰余虽不德河非获罪言非其地故也遂不祭孔子美之曰楚子其知大道乎今之世道士之教则曰天地神祇祭之则获福延年矣人心惧祸而乐福闻其说难能拒之川奔而壑赴自庶民而上岁或一祭或再祭或三四而不止焉祀典之设因民事非为己也有天下然后祭太坛有土地然后祭山川敢有僭拟罪不细矣法宽而不禁斯可惧也弃而为己如可求之彼秦汉之君憚四海之产勤于神仙其卒有获乎彼为天子不由先王之礼而从道士之说神犹不飨况庶民而上僭于礼而诬于神神其临哉其传萌拆于秦枝蔓于晋宋齐梁之间迨今百千岁根深蒂固牢不可拔世之人习熟于闻见为之而不思今闻有正其说必以为狂惑之人呜呼祭法坏矣曰如之何而止之曰不以法理其无可奈何

原孝 陈 尧

立身之谓道本道之谓孝上自天子下至于庶人未有不由而立也呜呼为孝之道是因乎心者焉孝有小大性有能否君子小人亦各存其分也圣人之教布在方策不敢毁伤存其始也立身行道要其终也居必诚其心游必择其方然后谨以温清之礼慎以饮食之节起居进退罔拂其志善事几谏劳必无怨至于爱敬之道乃天性也无忽天性以慢人纪斯可锡其类而不匮也世之愚者知其孝乎而不知所以为也越礼以加敬轻生以致养且曰亲之疾弗瘳者子之肌可疗焉乃折体断股密寘于味苟亲之寿幸而未尽而或生也则乡里神其事以为孝之感乃闻之于州县闻之于天子官给其赐以优之然后传之于后旌之于门闾率土之民向之而思其效者矣嗟乎风俗之移人也而官其事者遂以之自赏俾蚩蚩者知其室而不知其户也逾墙钻穴而迨殒乎命且亲之忧必以疾也非疾而自刑是致其忧者也予曰毁不灭性死生之际尚或存也苟居疾以剥肤由味而防躯则所谓陷之于不义者也禽之相食尚曰无有安在为人父母而食其子者乎古之孝以感者多矣犹是者未知覲焉且民之耳目乌知所谓圣人之道在乎谕之而已既谕之且制之俾为孝之民诚其心而不诚其名爱其生而不爱其赐始于一邑迨于一郡然后天下之民可率之以道也斯之谓王化之基人伦之本可不急乎

宋文鉴卷九十三

卷九十四

钦定四库全书

宋文鉴卷九十四

宋 吕祖谦 编

论

封建论 廖 偁

柳子厚为封建论以短封建者诚以周之亡由立诸侯之过也故曰周之失在制不在政又云诸侯各专其国继世而理其人之贤不肖不可知而民之理乱亦不可察也又云诸侯世禄在位各据其地则天下虽有圣贤者生无以立于天下如子厚之论是盖知其末而不知其本知其末而不知其本故以封建为非故曰封建非圣贤之意也势也又云汤武之所以不去封建者因其力以得天下故不去也此亦见子厚之惑者也夫事有得失理有是非固不易也偁谓诚圣贤之立封建者道也非势也周之乱天下非制失也失在政也又谓天下诸侯虽專国继世而理亦不能乱也虽世禄在位亦不能妨天下之圣贤也又谓汤武之不去封建者实以封建者古之常道也非因其力以取天下而不去也且夫圣贤之立制度皆取法于天地而节制于人使人悉得其所耳当生人之初万物屯防而莫知其所以理易云天造草昧宜建侯而不宁是也是封建者圣人所以理民之达道观三代封建之制因地制民因民制禄使大不至于难制小不至无赖是故如身使臂如臂使指上下相制罔有不顺则封建者固因人之利而为之也夫所谓势者乃不得已之辞也岂有取法天地节制于人而曰不得已哉以此为势则天下孰不为势是则君臣父子夫妇长防之分皆势也何止于封建而已乎偁故曰封建者道也非势也且封建之制地有差等禄有多少礼乐器物各有分限是故下者不可上少者不可多降者不可升无者不可有执是而行虽世未有乱者也若地不必有差等禄不必有多少礼乐器物不必有分限下者不必下少者不必少降者不必降无者不必无则未有不乱者也观周世之末然矣岂制之失乎是盖失其政而然也且三代之盛则非不封建也而不闻乱何封建利于三代之初而不利于三代之末乎是盖政存与政失之谓也使周末之天子执文武成康之法而不失则文武成康之时也又安得有问鼎射王之事当夷王而后礼乐征伐天子不能有也安得诸侯不为逆设使虽不封建未有不乱者也偁故曰周之乱在失政也且夫诸侯者奉天子之法以理其国也动静进退莫不由天子也是故山川神祇有不举者为不恭不恭者君削以地宗庙有不顺者为不孝不孝者君绌以爵变礼易乐者为不从不从者君流革制度衣服者为叛叛者君讨夫然则天下诸侯莫敢不为善也五国为属属有长十国为连连有帅三十国为卒卒有正二百一十国为州州有伯天下八州各以其属属天子之吏吏以治伯伯以理正正以理卒卒以理帅帅以理长长有不善则帅举之帅有不善则卒举之卒有不善则正举之正有不善则伯举之伯有不善则吏举之上下相制虽有不肖者固不敢为不善矣

设有为者则流矣讨矣而不存之于天下也夫然则天下无不善矣设有为理者也倘故曰虽專国继世而不能为乱也且圣贤之用与不用系乎在上者也在上者果其人则能用之果非其人则不能用之此事之固然者也当三代之时不闻有圣贤不居其位当三代之季则然后圣贤有不用者则是用与不用系于上明矣彼封建者亦所以待圣贤者也安得反妨圣贤哉当圣贤不用之时乃封建失制之时也曰天子之法不必行诸侯之恶不必绌是故天下各据其地而圣贤弃矣观其然夫岂在于封建是诚制乱之罪也倘故曰虽世祿在位不能妨圣贤之于天下必主之者愍世之乱然也固不以得天下为利也若以汤武不去封建为因其力以得天下则是汤武苟于得天下也孔子以汤武为仁人乎孔子以为仁人则汤武之不苟得可知也且圣贤之心唯欲利后世益天下苟事有利益者虽死焉为之也若封建果不利天下益后世则去之以利益乎天下后世矣又岂肯因而不革况封建者以天下为公也而守宰者示天下以私也封建者与天下共天下守宰者欲以独制天下为心公私之道昭昭矣而公私之义固有差矣倘故曰汤武之不去封建者蓋古之常道也非因其力而不去之也且子厚不究天子之法乱而使诸侯叛反以封建为周之失制不究法不乱则不善莫由在位反以继世不肖致乱为患不究升贤绌不肖为当世常法而反以圣贤不立为虑不究圣贤立法制必取法天地而利人反以立封建为势不究圣贤之心无所苟反以汤武不去封建为利其力倘故曰子厚之论封建至其末而不知其本也虽然子厚以封建为非者以守宰为是故也以守宰为是者无他乃曰有罪得以绌有能得以獎朝拜而不讐夕斥之矣夕拜而不讐朝斥之矣又云汉知孟舒于田叔得魏尚于冯唐闻黄霸之明审覲汲黯之简靖使汉室尽封侯王则孟舒魏尚之术莫得施黄霸汲黯之化莫得行明讞而道之拜受而退已违矣下令而削之帝交约从之谋周于同列矣呜呼若是者子厚果大不明其本也以是是为是则岂封建之世有罪者不得而绌乎有能者不得而升乎朝拜而不讐夕不能斥之乎夕拜而不讐朝不能斥之乎若有罪不绌有能不升法制不能拘者皆已乱之世也已乱之世无不失也何止于封建哉已乱而罪之何异恶桀纣之不道而责汤武嫉商均之不肖而非尧舜也于理顺乎虽然子厚止知汉之封侯王而不知古之封建也止知汉之封侯王则宜其所谓明讞而道之拜受而退已违矣下令而削之帝交约从之谋周于同列也若古之封建固不至是三代之封建凡天下四海九州二百一十国在夏商则百里极矣国凡有五等五等之国制度不同同出于天子者也古之一大国止今之一郡耳是故其力易制其患易救固未有能为乱者也汉之封侯王则一侯王之地如古之大国数十则汉岂行封建之法哉乃汉自为之法非封建之法也若以汉自为之法而疑古封建为短是由以溺咽之故欲去舟与食者也岂封建果非哉而又孟舒魏尚黄霸汲黯之辈当三代之时不啻千万辈在卿大夫之列安得谓在封建之世则不得伸其才术岂数子者之才能为太守而不能为他哉而子厚固以为封建则能用之不知意之若何也呜呼是非得失之理明明若是又何曲为之言也倘非好辨也庶圣人之道少有明耳

洪范论 廖 僞

箕子之叙洪范云鯀陞洪水汨陈其五行天乃不畀洪范九畴彝伦攸斁鯀则殛死禹乃嗣典天乃锡禹洪范九畴彝伦攸叙孔安国传其言云天与禹洛出书神 负文而出列于背有数至于九禹遂因而第之以成九类倘观安国之意诚谓洪范之书出于天者也禹之所得乃天与之也故云洛出书神 负文而出泊班固撰五行志又引刘歆之言亦云禹得洛书神 之

文而后知洪范僞按洪范皆人事之常而前古之达道也前古之达道皆出于圣人者也伏羲而前僞不可得而知也伏牺而下至于尧舜观其事未有不法天行道以理天下使皇王之德被于兆人而足以仪法千古则洪范者固前贤之所启也岂得在禹方受之于天哉若洪范之书出于洛而神 负之以授于禹则是洪范者果非人之所能察也自禹而上果未之闻于世也若果非人之所能察而世果未之闻则五行五事八政五纪皇极稽疑庶征福极之事不闻于尧舜而上也今验五行五事八政五纪皇极稽疑庶征福极之义自伏牺而下未有不由之者则洛出 负以授于禹得为可乎虽然安国刘歆班固所以云者诚惑于箕子所谓天锡故也是亦不知天道之說也夫凡所谓天道诚亦在于人耳顺于天乃天道之与也不顺于天乃天道之不与也书云天之歷数在汝躬顺道之谓也又云商罪贯盈天命诛之不顺道之谓也其洪范者天下之达道也圣人之所履而凶人之所不及也鯀有凶德于天下而达道诚不可得也故箕子云天乃震怒不畀洪范九畴禹有圣德于天下之达道固行之也故箕子云天乃锡禹洪范九畴诸儒不达于此以皇天震怒不畀洪范九畴即谓天果秘之而不与之天乃锡禹洪范九畴即谓天果受而与之斯实不明箕子之意也若诸儒所论天之歷数在汝躬是必亲授歷数于天也天命诛之必亲受僂于天也何不然之甚乎僞以为洪范者出于前圣之心也而后之为君者苟能务蹈圣德未有不受洪范于天者也自三五已降有道者皆受于天所以然者天下之达道天之常道也行之则受之于天矣诸儒又云洪范九畴禹次而类之又云洛书本文凡六十五字此又足恠矣虽然欲成其伪能无辞乎诸儒既有洛出 负之谊则宜其云也于此呜呼圣人之道不得其传诚可痛矣或曰然则洪范之篇所以録之者箕子也以武王之问故遂以洪范之道録而为书亦由周仪二礼皆古之达礼也周公録之以成书耳

近名论 范仲淹

老子曰名与身孰亲【言人知爱名不如爱其身之亲也】庄子曰为善无近名【言为善近名人将 之非全身之道也】此皆道家之训使人薄于名而保其真斯人之徒非爵禄可加赏罚可动岂为国家之用哉我先王以名为教使天下自劝汤解网文王葬枯骨天下诸侯闻而归之是三代人君已因名而重也太公直钩以邀文王夷齐饿死于西山仲尼聘七十国以求行道是圣贤之流无不涉乎名也孔子作春秋即名教之书也善者褒之不善者贬之使后世君臣爱令名而劝畏恶名而慎矣夫子曰疾没世而名不称易曰善不积不足以成名然则为善近名岂无伪邪臣请辩之孟子曰尧舜性之也【性本仁义】三王身之也【躬行仁义】五霸假之也【假仁义而求名】后之诸侯逆天暴物杀人盗国不复爱其名者也人臣亦然百姓本忠孝者上也行忠孝者次也假忠孝而求名者又次也至若简贤附势反道败德弑父叛君惟欲是从不复爱其名者下也人不爱名则虽有刑法干戈不可止其恶也武王克商式商容之间释箕子之囚封比干之墓是圣人敦獎名教以激劝天下如取道家之言不使近名则岂复有忠臣烈士为国家之用哉

鼂错论 文彦博

臣读汉史鼂错之策云五帝神圣其臣莫能及故自亲事臣谓错之言乖谬颇甚因试论之夫易之干曰天道也君道也坤曰地道也臣道也天地既位君臣之象着矣君臣交济邦家之治

隆矣而错乃云臣不及君故自亲事然则古之圣帝明王安用辅相而致治乎所谓五帝者尧舜为圣之优故仲尼删诗书则断自唐虞为万世法二典之载尧则有命羲和为天地四时之官允厘百工庶绩咸熙舜则命禹平水土弃为稷官契作司徒皋陶作士垂为共工益为朕虞伯夷秩宗防典乐龙纳言皆选于众而后用其人各任以职且云金曰汝谐慎柬之至也所以百工允厘熙帝之载如此则尧舜果自亲事乎仲尼曰舜何为哉端拱正南面而已错所谓自亲事岂非乖谬乎若后之人君谓错言为是乃以一身一心两耳两目独任自用以周天下之万务岂不殆哉又将使厥后自圣无复察迓言好问之裕仲尼云一言几于防邦者谓人莫已若则错之言亦几于兹乎臣故著论深切以明之庶几有所补益

本论 欧阳修

佛法为中国患千余岁世之卓然不惑而有力者莫不欲去之已尝去矣而复大集攻之暂破而愈坚扑之未灭而愈炽遂至于无可奈何是果不可去邪盖亦未知其方也夫医者之于疾也必推其病之所自来而治其受病之处病之中人乘乎气虚而入焉则善医者不攻其疾而务养其气气实则病去此自然之效也故救天下之患者亦必推其患之所自来而治其受患之处佛为夷狄去中国最远而有佛固已久矣尧舜三代之际王政修明礼义之教充于天下于此之时虽有佛无由而入及三代衰王政缺礼义废后二百余年而佛至乎中国由是言之佛所以为吾患者乘其缺废之时而来此其受患之本也补其缺修其废使王政明而礼义克则虽有佛无所施于吾民矣此亦自然之势也昔尧舜三代之为政设为井田之法籍天下之人计其口而皆授之田凡人之力能胜耕者莫不有田而耕之敛以什一差其征赋以督其不勤使天下之人力皆尽于南亩而不暇乎其他然又惧其劳且怠而入于邪僻也于是为制牲牢酒醴以养其体 匏俎豆以悦其耳目于其不耕休力之时而教之以礼故因其田猎而为搜狩之礼因其嫁娶而为婚姻之礼因其死 而为防祭之礼因其饮食羣聚而为乡射之礼非徒以防其乱又因而教之使知尊卑长防凡人之大伦也故凡养生送死之道皆因其欲而为之制饰之物采而文焉所以悦之使其易趣也顺其情性而节焉所以防之使其不过也然犹惧其未也又为立学以讲明之故上自天子之郊下至乡党莫不有学择民之聪明者而习焉使相告语而诱劝其愚堕呜呼何其备也盖尧舜三代之为政如此其虑民之意甚精治民之具甚备防民之术甚周诱民之道甚笃行之以勤而被于物者洽浸之以渐而入于人者深故民之生也不用力乎南亩则从事于礼乐之际不在其家则在乎庠序之间耳闻目见无非仁义礼乐而趋之不知其倦终身不见异物又奚暇夫外慕哉故曰虽有佛无由而入者谓有此具也及周之衰秦并天下尽去三代之法而王道中绝后有天下者不能勉强其为治之具不备防民之渐不周佛于此时乘间而出千有余岁之间佛之来者日益众吾之所为者日益坏井田最先废而兼并游惰之奸起其后所谓搜狩婚姻防祭乡射之礼凡所以教民之具相次而尽废然后民之奸者有假而为佗其良者泯然不见礼义之及已夫奸民有余力则思为邪僻良民不见礼义则莫知所趋佛于此时乘其隙方鼓其雄诞之说而牵之则民不得不从而归矣又况王公大人往往倡而殴之曰佛是真可归依者然则吾民何疑而不归焉幸而有一不惑者方 然而怒曰佛何为者吾将操戈而逐之又曰吾将有说以排之夫千秋之患徧于天下岂一人一日之可为民之沈酣入于骨髓非口舌之可胜然则将奈何曰莫若修其本以胜之昔战国之时杨墨交乱孟子患之而专言仁义故仁义之说胜则杨墨之学废汉之

时百家并兴董生患之而退修孔氏故孔氏之道明而百家息此所谓修其本以胜之之效也今八尺之夫被甲荷防勇盖三军然而见佛则拜闻佛之說则有畏慕之诚者何也彼诚壮佼其中心茫然无所守而然也一介之士眇然柔懦进趋畏怯然而闻有道佛者则义形于色非徒不为之屈又欲驱而絕之者何也彼无佗焉学问明而礼义熟中心有所守以胜之也然则礼义者胜佛之本也今一介之士知礼义者尚能不为之屈使天下皆知礼义则胜之矣此自然之势也

朋党论 欧阳修

臣闻朋党之說自古有之惟幸人君辨其君子小人而已大凡君子与君子以同道为朋小人与小人以同利为朋此自然之理也然臣谓小人无朋惟君子则有之其故何哉小人所好者利禄也所贪者财货也当其同利之时暂相党引以为朋者伪也及其见利而争先或利尽而交踈则反相贼害虽其兄弟亲戚不能相保故臣谓小人无朋其暂为朋者伪也君子则不然所守者道义所行者忠信所惜者名节以之修身则同道而相益以之事君则同心而共济终始如一此君子之朋也故为人君者恒当退小人之伪朋用君子之真朋则天下治矣尧之时小人共工驩兜等四人为一朋君子八元八凯十六人为一朋舜佐尧退四凶小人之朋而进君子之朋尧之天下大治及舜自为天子而臯防稷契等二十二人并列于朝更相称美更相推让凡二十二人为一朋而舜皆用之天下亦大治书曰纣有臣亿万惟亿万心予有臣三千惟一心纣之时亿万人各异心可谓不为朋矣然纣以亡国周武王之臣三千人为一大朋而周用以兴后汉献帝时尽取天下名士囚禁之目为党人及黄巾贼起汉室大乱后方悔尽解党人而释之然已无救矣唐之晚年渐起朋党之论及昭宗时尽杀朝之名士或投之黄河曰此辈清流可投浊流而唐遂亡矣夫前世之主能使人人异心不为朋莫如纣能禁絕善人为朋莫如汉献帝能诛戮清流之朋莫如唐昭宗世然皆乱亡其国更相称美推让而不自疑莫如舜之二十二臣舜亦不疑而皆用之然而后世不谓舜为二十二人朋党所欺而称舜为聪明之圣者以能辨君子与小人也周武之世举其国之臣三千人共为一朋自古为朋之多且大莫如周然周用此以兴者善人虽多而不厌也夫兴亡治乱之迹为人君者可以鉴矣

为君难论上 欧阳修

语曰为君难者孰难哉蓋莫难于用人夫用人之术任之必專信之必笃然后能尽其材而可共成事及其失也任之欲專则不复谋于人而拒絕羣议是欲尽一人之用而先失众人之心也信之欲笃则一切不疑而果于必行是不审事之可否不计功之成败也夫违众举事又不审计而轻发其百举百失而及于祸败此理之宜然亦有幸而成功者人情成是而败非则又从而贊之以其违众为独见之明以其拒諫为不惑羣论以其偏信而轻发为决于能断使后人君慕此三者以自期至其信用一失而及于祸败则虽悔而不可及此甚可叹也前世为人君者力拒羣议專信一人而不能早悟以及于祸败者多矣不可以偏举请试举其一二昔秦符坚地大兵强有众九十六万号称百万蔑视东晋指为一隅谓可直以气吞之耳然而举国之人皆言晋不可伐更进互說者不可胜数其所陈天时人事坚随以强辨折之忠言谏论皆沮屈而去如王猛苻融老成之言也不听太子宏少子诜至亲之言也不听沙门道安坚平

生所信重者也数为之言不听惟听信一将军慕容垂者垂之言曰陛下内防神谋足矣不烦广访朝臣以乱圣虑坚大喜曰与吾共定天下者惟卿尔于是决意不疑遂大举南伐兵至壽春晋以数千人击之大败而归比至洛阳九十六万兵亡其八十六万坚自此兵威沮防不复能振遂至于乱亡近五代时后唐清泰帝患晋祖之镇太原也地近契丹恃兵跋扈议欲徙之于郢州举朝之士皆谏以为未可帝意必欲徙之夜召常所与谋枢密直学士薛文遇问之以决可否文遇对曰臣闻作舍道邊三年不成此事断在陛下何必更问羣臣帝大喜曰术者言我今年当得一贤佐助我中兴卿其是乎即时命学士草制徙晋祖于郢州明旦宣麻在廷之臣皆失色后六日而晋祖反书至清泰帝忧惧不知所为谓李崧曰我适见薛文遇为之肉颤欲自抽刀刺之崧对曰事已至此悔之无及矣但君臣相顾涕泣而已由是言之能力拒羣议專信一人莫如二君之果也由之以致祸败乱亡亦莫如二君之酷也方苻坚欲与慕容垂共定天下清泰帝以薛文遇为贤佐助我中兴可谓临乱之君各贤其臣者也或有诘予曰然则用人者不可專信乎应之曰齐桓公之用管仲蜀先主之用诸葛亮可谓專而信矣不闻举齐蜀之臣民非之也蓋其令出而举国之臣民从事行而举国之臣民便故桓公先主得以專任而不貳也使令出而两国之人不从事行而两国之人不便则彼二君者其肯專任而信之以失众心而斂国怨乎

为君难论下 欧阳修

呜呼用人之难矣未若听言之难也夫人之言非一端也巧辯纵横而可喜忠言质朴而多訥此非听言之难在听者之明暗也防言顺意而易悦直言逆耳而触怒此非听言之难在听者之贤愚也是皆未足为难也若听其言则可用然用之有輒败人之事者听其言若不可用然非如其言不能以成功者此然后为听言之难也请试举其一二战国时赵将有赵括者善言兵自谓天下莫能当其父奢赵之名将老于用兵者也每与括言亦不能屈然奢终不以括为能也叹曰赵若以括为将必败赵事其后奢死赵遂以括为将其母自见赵王亦言括不可用赵王不听使括将而攻秦括为秦军射死赵兵大败降秦者四十万人阬于长平蓋当时未有如括善言兵亦未有如括大败者也此听其言可用用之輒败人事者赵括是也秦始皇欲伐荆问其将李信用兵几何信方年少而勇对曰不过二十万足矣始皇大喜又以问老将王翦翦曰非六十万不可始皇不悦曰将军老矣何其怯也因以信为可用即与兵二十万使伐荆王翦遂谢病退老于频阳已而信大为荆人所败亡七都尉而还始皇大慙自驾如频阳谢翦因强起之翦曰必欲用臣非六十万不可于是卒与六十万而往遂以灭荆夫初听其言若可用用之宜矣輒败事听其言若不可用舍之宜矣然必如其說则成功此所以为难也予又以谓秦赵二主非徒失于听言亦由乐用新进忽弃老成此其所以败也大抵新进之士喜勇銳老成之人多持重此所以人主之好立功名者听勇銳之语则易合闻持重之言则难入也若赵括者则又有說焉予畧考史记所书是时赵方遣廉颇攻秦颇赵名将也秦人畏颇而知括虚言易与也因行反间于赵曰秦人所畏若赵括也者赵以为将则秦惧矣赵王不悟反间也遂用括为将以代颇藺相如力谏以为不可赵王不听遂至于败由是言之括虚谈无实而不可用其父知之其母亦知之赵之诸臣藺相如等亦知之外至敌国亦知之独其主不悟尔夫用人之失天下之人皆知其不可而独其主不知者莫大之患也前世之祸乱败亡由此者不可胜数也

宋文鑑卷九十四

卷九十五

钦定四库全书

宋文鉴卷九十五

宋吕祖谦编

论

泰誓论 欧阳修

书称商始咎周以乘黎者西伯也西伯以征伐诸侯为职事其伐黎而胜也商人已疑其难制而恶之使西伯赫然见其不臣之状与商并立而称王如此十年商人有反晏然不以为怪其父师老臣如祖伊微子之徒亦默然相与熟视而无一言此岂近于人情邪由是言之谓西伯受命称王十年者妄说也以纣之雄猜暴虐尝醢九侯而脯鄂侯矣西伯闻之窃叹执而囚之几不免死至其叛已不臣而自王乃反优容而不问者十年此岂近于人情邪由是言之谓西伯受命称王十年者妄说也孔子曰三分天下有其二以服事商使西伯不称臣而称王安能服事于商乎且谓西伯称王者起于何说而孔子之言万世之信也由是言之谓西伯受命称王十年者妄说也伯夷叔齐古之知义之士也方其让国而去顾天下皆莫可归闻西伯之贤共往归之当是时纣虽无道天子也天子在上诸侯不称臣而称王是僭叛之国也然二子不以为非依之从而不去至武王伐纣始以为非而弃去彼二子者始顾天下莫可归卒依僭叛之国而不去不非其父而非其子此岂近于人情邪由是言之谓西伯受命称王十年者妄说也书之泰誓十有一年说者因以谓自文王受命九年及武王居防二年并数之尔是以西伯听虞芮之讼谓之受命以为元年此又妄说也古者人君即位必称元年常事尔不以为重也后世曲学之士说春秋始以改元为重事然则果常事欤固不足道也果重事欤西伯即位已改元矣中间不宜改元而又改元至武王即位宜改元而反不改元乃上冒先君之元年并其居防称十一年及其灭商而得天下其事大于听讼远矣又不改元由是言之谓西伯以受命之年为元年者妄说也后之学者知西伯生不称王而中间不再改元则诗书所载文武之事粲然明白而不诬矣或曰然则武王毕防伐纣而泰誓曷为称十有一年对曰毕防伐纣出于诸家之小说而泰誓六经之明文也昔者孔子当衰周之际患众说纷纭以惑乱当世于是退而修六经以为后世法及孔子既歿去圣稍远而众说复兴与六经相乱自汉以来果能辨正今有卓然之士一取信乎六经则泰誓者武王之事也十有一年者武王即位之十有一年尔复何疑哉司马迁作周本纪虽曰武王即位九年祭于文王之墓然治兵于盟津至作伯夷列传则又载父死不葬之说皆不可为信是以吾无取焉取信于书可矣

辨惑 石介

吾谓天地间必然无者有三无神仙无黄金术无佛然此三者举世人皆惑之以为必有故甘心乐死而求之然吾以为必无者吾有以知之大凡穷天下而奉之者一人也莫崇于一人莫贵于一人无求不得其欲无取不得其志天地两间苟所有者惟不索焉索之莫不获也秦始皇之求为仙汉武帝之求为黄金萧武帝之求为佛勤已至矣而秦始皇帝遂游死萧武帝饿死汉武帝铸黄金不成推是而言吾知必无神仙也必无佛也必无黄金术也

汉论上 石介

噫嘻王道其駁于汉乎汤革夏改正朔易服色以顺天命而已其余尽循禹之道周革商改正朔易服色以顺天命而已其余尽循汤之道汉革秦不能尽循周之道王道于斯駁焉夫井田三王之法也什一三王之制也封建三王之治也射乡三王之礼也学校三王之教也度量以齐衣服以章宫室以等三王之训也三王市防而不税關讥而不征林麓川泽以时入而不禁用民之力歲不过三日五十者养于乡六十者养于国七十者养于学孤独鰥寡皆有常飧周衰王道息秦并天下遂尽灭三王之道汉革秦之祚已矣不能革秦之 犹袭秦之政而井田卒不用也什一卒不行也射乡卒不举也学校卒不兴也度量卒不齐也衣服卒不章也宫室卒不等也市防而税關讥而征林麓川泽不以时而入用民之力无日五十六七十者不养孤独鰥寡无常飧三王之道不复非秦之罪也汉之罪也桀灭夏道汤亦受命克承禹烈故夏之民归于商不见商之政而见禹之政商之民归于周不见周之政而见汤之政秦灭周道汉亦受命不袭周之政而防秦之 立汉之政故秦之民归于汉见汉之政而不见周之政蓋以汉之礼乐易三王之礼乐也以汉之制度易三王之制度也以汉之爵赏易三王之爵赏也以汉之法律易三王之法也汉以汉之政令易三王之政令也噫汉顺天应人以仁易暴以治易乱三王之举其始何如此其盛哉其终何如此其毕哉三王建大中之道置而不行区区袭秦之余立汉之法可惜矣

汉论中 石介

或曰汉改三王之道作之者其谁欤曰曹参陆贾叔孙通之罪也汉高祖以干戈而定天下陆贾曰陛下马上得之不可马上治之于是使贾着秦所以得天下及古今成败之国贾凡着十二篇每奏一篇帝輒称善高祖已平天下羣臣饮酒争功或妄呼拔劔击柱上患之叔孙通乃与弟子百余人杂采古礼与秦仪以为汉仪帝用之曰今日知为皇帝之贵也汉高祖豁达大度聪明神圣温恭濬哲英威睿武其资材固不下乎汤禹与文武之道使为帝则帝矣使为王则王矣方平定祸乱思为汉家改正朔定礼乐立制度明文章施道德张教化一风俗兴太平以垂于千万世贾若能遽举帝皇之道致于人君施于国家布于天下通若能纯用三王之礼施于朝廷通于政教格于后世以高皇之材而不能之乎乃龔龔进夫当时之近务王霸之猥略贵乎易行孜孜举夫近古之野礼亡秦之杂仪求夫疾效使高祖上视汤武有慙德汉家比踪三王为不侔可惜也哉初萧何为相天下未甚久而何死曹参代之参以为萧何之规当守之勿失日饮醇酒寬纵不治事虽复惠帝求治参不能竭才辅之直以高祖之初定祸乱萧何之草创律令民仅出涂炭为已太平国仅立法式为已大备当其高祖之既平祸乱萧何之既定律令惠帝之方求治参能竭伊尹致君如尧舜之心周公辅成王致太平之道以事惠帝制

度之未修者修之教化之未格者格之文章之未备者备之礼乐之未明者明之刑政之未和者和之尽循三王之道而行之贾与通既施之于前参复行之于后汉岂有不及三王之治者乎故曰陆贾叔孙通曹参之罪也

汉论下石介

或曰时有浇淳道有升降当汉之时固不同三代之时也尽行三王之道可乎曰时有浇淳非谓后之时不淳于昔之时也道有升降非谓今之道皆降古之道也夫时在治乱道在圣人非有先后耳桀纣兴则民性暴汤武兴则民性善汤之时固在桀之后武之时固在纣之后而汤武之时岂有不淳于桀纣之时其道亦已降乎其民亦已难教乎时治则淳时乱则浇非时有浇淳也圣人存则道从而隆圣人亡则道从而降非道有升降也民厌周久矣苦秦甚矣秦之政桤穽也民得出桤穽也唯使之从三王之政非如桤穽之深闭可畏也既得出桤穽而得适非桤穽人皆乐然从之也况使从三王大中之道跻于泰然安乐乎当高祖提秦之民于千万丈不测深渊中置之于平地若示之以三王之政革之以三王之化鼓之以三王之号令明之以三王之律度民有不肯从之乃曰不如在千万丈不测深渊中之乐邪吾未之信也当乎天下初定也民未有富兼贫民未有彊凌弱民未有众吞寡民未有大并小因定之经界因为之井田民有争乎国未有巡行之费国未有兵众之动国未有土木之耗因为之什一之法因立之中正之道国阙用乎封建以域之射乡以仁之庠序以教之养老以厚之秦之民不为汉之民为三王之民也民不见汉之政见三王之政也伊尹俾其君不及尧舜其心媿耻若撻于市汤去尧舜数百年矣而又承桀之大乱其时固亦浇漓矣且能以尧舜致其君曹参陆贾叔孙通乃独不能以三王之道事于汉使汉不及三王诚可罪也或曰汉之辅政者前有萧张中有平勃后有霍光魏相公孙博阳侯韦贤父子而独责于贾与通暨曹相国不亦偏乎曰易之革曰天地革而四时成汤武革命顺乎天而应乎人君子以治歷明时鼎曰君子以正位凝命当高祖定天下乃革去故鼎取新之日也曹参陆贾叔孙通正当君子以治歷明时正位凝命之际也防其时乘其际不能创制度明律令以垂万世法适当其罪也至于后世法令已定矣条章已着矣制度已行矣朝廷循之已惯习矣而遽更之得无乱乎富者已连田兼地矣彊已凌弱矣众已吞寡矣大已并小矣而遽正之以经界居之以井田民肯从乎后嗣奢纵日作土木不息内畜嫔侍外耽畋游殫天下之力犹供亿不足而遽行中正之道取什一之赋罢闕市开山泽国其不乏乎故晁错请削国地而被诛仲舒请限民田而不用霍光魏相公孙韦贤博阳侯虽有其才岂复能为汉家革制度乎适不当其时也故吾罪曹参陆贾叔孙通也

陰德论 石介

夫天辟乎上地辟乎下君辟乎中天地人异位而同治也天地之治曰祸福君之治曰刑赏其出一也皆随其善恶而散布之善斯赏恶斯刑是谓顺天地天地顺而风雨和百谷嘉恶斯赏善斯刑是谓逆天地天地逆而陰阳乖四时悖三才之道不相离其应如影响祸福刑赏岂异出乎夫人不达天地君之治昧祸福刑赏之所出行君威命执君刑柄发仁布令代君诛赏而硖硖焉守小慈蹈小仁不肯去一奸人刑一有罪皆曰存陰德其大防谓不杀一人不伤一物则天地神明之所福也苟不以已之喜怒以天下之喜怒杀伤虽多天地神明福之矣苟不以

天下之喜怒而以己之喜怒而害一人损一物天地神明固祸之矣且天地能覆载而不能明示祸福于人树之以君假其刑赏以向背善恶人君能刑赏而不能亲行黜陟于下任之以臣假其威权以进退贪良良者进之君赏之也天福之也奚其德哉贪者退之君刑之也天祸之也奚其仇哉以进退于人谓德仇在己乎欺天而无君也州方千里牧非其人千里受邑方百里宰非其人百里受使一牧一宰有罪而罹其诛孰多千里百里无其辜而受其是仁一牧宰而不仁于千里也暴我鰥寡虐我惇嫠天地君所欲除而存之违天地君也违天地君而曰存陰德祸斯及矣白额虎暴而伤物周处杀之而获福两头蛇见而人死叔敖斩之而得报尸而官涂而民其害岂特白额虎两头蛇之比也而能除之陰德隆而无穷矣

赏罚论 刘敞

赏为劝有功也赏必以春夏不已怠乎罚为惩有罪也罚必以秋冬不已缓乎怠则不劝缓则不惩然而曰赏以春夏罚以秋冬者是非圣人之意也应之曰否子所谓功者谓扶世治民之为功乎抑谓辟土疆兵之为功乎子所谓防业失序之为罪乎抑谓残民害上之为罪乎子赏之劝也将劝其至于善而已乎将幸其身而已也子罚之惩也将勉其至于耻乎将免其身而已也吾语汝圣王之治圣王之治官得其职民劝其事物安其所无独治之名无仓卒之功是以三载考绩三考黜陟幽明其陟也所谓赏其黜也所谓罚赏以春夏罚以秋冬则何怠且缓之有古者唯军赏不逾时军罚亦不逾时用命赏于祖欲民速得为善之利也不用命戮于社欲民速见为不善之辜是圣王之所不得已而用之者也非所以治士大夫故子之所刺者平世之治也子之所称者军中之法也且夫赏为劝善也为善者终身诚之今一赏以春夏而已至于怠矣则是虽为善未尝不伪也从而赏之是赏伪也岂所谓善乎与其赏是人也则若勿赏是人也故君子正行非以干禄也经德非以希世也爱民非以沽誉也尊主非以懷赏也故有功虽赏不骄赏之虽晚不怠曰非春夏则不可赏乎趣取赏而已矣何必春夏为曰否是所谓顺天者也为人父者莫不欲其子之孝于己欲其子之孝于己莫若己为孝为人上者莫不欲其下之顺于己欲其下之顺于己莫若己为顺天者主之上也王者诸侯之上也诸侯者大夫士之上也故王者顺天则诸侯顺王诸侯顺王则大夫士顺君君之所为而大夫士为之是良大夫士也王之所为而诸侯为之是贤诸侯也天之所为而王者为之是圣王也故春夏者天之和气也天所以施生也物之所荣也故赏行焉秋冬者天之义气也天所以肃杀也人物之所畏也故罚行焉故赏罚之所以顺天者臣事君也子事父也少事长也贱事贵也其本在王天下之君悦而言之曰王犹顺天则天下之君莫不悦而顺王天下之君悦而顺王则天下之大夫士悦而言之曰君犹顺王则天下之大夫士莫不悦而顺君故王者父事天母事地兄事日非以祈报也以達天下之大义也

患盗论 刘敞

天下方患盗或问刘子曰盗可除乎对曰何为不可除也顾盗有源能止其源何盗之患或曰请问盗源对曰衣食不足盗之源也政赋不均盗之源也教化不修盗之源也一源慢则探囊发篋而为盗矣二源慢则执兵刃劫良民而为盗矣三源慢则攻城邑掠百姓而为盗矣此所谓盗有源也丰世无盗者足也治世无贼者均也化世无乱者顺也今不务衣食而务无盗贼

是止水而不塞源也不务化盗而务禁盗是纵焚而救以升龠也且律使窃财者刑伤人者死其法重矣而盗不止者非不畏死也念无以生以谓坐而待死不若起而图生也且律使凡盗贼能自告者除其罪或赐之衣裳劔带官爵品秩其恩深矣而盗不应募非不愿生也念无以乐生以谓为民乃甚苦为盗乃甚逸也然则盗非其自欲为之由上以法驱之使为也其不欲出也非其自不欲出由上以法持之使留也若夫衣服素周其身廉耻夙加其心彼唯恐不得齿良人何敢然哉故惧之以死而不惧劝之以生而不劝则虽烦直指之使重督捕之科固未有益也今有司本源之不防而倚辨于牧守此乃臧武仲所以辞不能诘也凡人有九年耕然后有三年之食有三年之食然后可教以礼义今所以使衣食不足政赋不均教化不修者牧守乎哉吾恐未得其益而汉武沉命之敝殆复起矣若乃尚撻发之术任巧譎之数者未足以绝奸而却雍因以见杀于晋故仲尼有言听讼吾犹人也必也使无讼乎推而广之亦曰用兵吾犹人也必也使无战乎引而伸之亦曰禁盗吾犹人也必也使无盗乎盍亦反其本而已矣爰自元昊犯边中国颇多盗山东尤甚天子使侍御史督捕且招怀之不能尽得于是令州郡盗发而不辄得者长吏坐之欲重其罪予以谓未尽于防故作此论

叔輒论 刘敞

叔輒哭日食叔孙昭子讥之曰叔輒将死矣非所哭也呜呼叔孙昭子不知言者乎夫昭公弱君也享国久矣季氏彊臣也能专其政所树置非亲戚则党与也一臣君不得使焉一民君不得有焉赏罚违于众而形势斂于外子家驹达于人也闭其口而禄仕矣梓慎达于天者也诡辞不敢正者矣是以叔輒知日食之忧必将及君欲陈则不见信欲嘿则不能已欲谋则逼于祸欲随则失其守发愤壹鬱而无与谁语故慷慨感激至于号咷也设使昭公因而感悟听用其谋援忠直退奸邪破朋党之敝禁彊僭之臣鲁可复理岂独长守其贵哉当是之时仲尼圣人也而生其国顔冉之徒仁人也四方归之举而用焉以谋三桓易矣然而遂不觉悟长恶养凶不及五年奔走失国寄于干侯终身愁孤从此观之岂不可大哀而恸哭乎此乃叔輒之所以感也夫忠国之君子明于礼义而陋于知人心人固未易知也易曰书不尽言言不尽意夫言而书之以谓详矣而犹曰不尽而况乎未始书之未始言之者哉此叔輒所以见讥于当世狂而不信者也嗟夫

宋文鉴卷九十五

卷九十六

钦定四库全书

宋文鉴卷九十六

宋吕祖谦编

论

贤论 刘敞

人君之贤其身不若其使贤之为贤也人臣之贤其身贤也不若其荐贤之为贤也聪明辨惠伎艺敏给此可谓贤矣然是谓匹夫之局非人君之操也人君者目不自视明者效之耳不自听聪者效之口不言智者效之心不自虑圣者效之故曰百官当而已矣此人君之操也明者视之则视必远聪者听之则听必微智者言之则言必当圣者虑之则虑必精使独用其身不能治也虽欲治之不能给也故曰不若使贤之为贤也忠信仁义刚毅有立此可谓贤矣然是谓终身之善也未足以传世也人臣者以其宗庙为心焉以其万民为心心焉以其后嗣为心焉大为之谋而使智者就之远为之畧而使仁者守之今世赖其泽后世防其福世续其类是天地之功也是春夏秋冬之相于与成岁也故曰不若荐贤之为贤也刘子曰昔者舜有天下大圣人也惟其不欲其身贤而已矣是以舜好问好察迹言所举而用者二十有二人被袵衣鼓琴二女果而天下治昔者周公相天下大圣人也惟其不欲其身贤而已矣是以日仄不倦劳于求士所执贄见者十有余人所交友者百有余人贤者相与继其德而成之至其末也刑措四十余年故君莫盛于舜臣莫盛于周公不为舜之为者非贤君也不为周公之为者非贤臣也刘子曰君之不君非独愚也虽聪明辨慧伎艺敏给而不知用贤者犹不君也臣之不臣非独鄙也虽忠信仁义刚毅有立而不知荐贤者犹不臣也昔者桀纣矜天下以能高人臣以声则是岂不聪明辨慧伎艺敏给哉惟其自贤而已不知用贤至于亡也昔者臧文仲相鲁国鲁国以强其言必当则是岂不忠信仁义刚毅有立哉惟其自贤而已不知荐贤至于削也故曰虽有周公之才之美使骄且吝其余不足观也已所谓骄者非独以贵骄人以

富骄人者也以材骄人者有甚焉所谓吝者非

独吝于爵人吝于分人者也吝于教人者有甚

焉故以材骄人慢也人怨之吝于教人忌也人

疎之是以古之君子莫为骄与吝也求为人君

者尽于此矣求人臣者尽于此矣诗云不识

不知顺帝之则言君之所以为君也诗云乐只

君子保艾尔后言臣之所以为臣也君为君焉臣为臣焉虽亘万世吾不知其可改也

救日论 刘敞

春秋左氏传曰二至二分日有食之不为灾又曰非正阳之月不鼓臣以为过矣夫圣主所甚畏而事者莫如天天神之最着而明者莫如日日者众阳之宗人君之表也日有食之天子则伐鼓于社诸侯则伐鼓于朝非慕为迂阔而涂民耳目也明其陰侵阳柔乘刚臣蔽君妻凌夫逆德之渐不可长也如是则奚救奚不救奚畏奚不畏丘明之言使谀臣依以諂其君邪臣资以固其身臣请辨之幽王之诗曰十月之交朔日辛卯日有食之亦孔之丑周之十月则二分已安在其不为灾者欤夏书曰乃季秋月朔辰弗集于房瞽奏鼓嗇夫驰

庶人走夏之季秋非正阳也安在其不鼓者欤

由此观之日食之必可畏必当救也无所疑矣

夫諂谀奸邪之臣出则朋党比周以遂其私入

则波伪欺罔以济其欲固日夜无须叟之间唯

恐君之觉已也日有食之是将喜焉庸肯斥言

灾异以儆于上哉是以或至于夷陵而犹不寤鲁季孙汉张禹是也昔者季孙意如之專魯知日食之为伤其君而不忧也卒逐昭公张禹之仕汉知日食之为害国而不告也卒成王氏呜呼变所从来防矣为人上者可不察哉可不察哉

材论 王安石

天下之患不患材之不众患上之人不欲其众不患士之不欲为患上之人不使其为也夫材之用国之栋梁也得之则安以荣失之则亡以辱然上之人不欲其众不使其为者何也是有三蔽焉其最蔽者以为吾之位可以去辱絕危终身无天下之患材之得失无补于治乱之数故偃然肆吾之志而卒入于败乱危辱此一蔽也又或以谓吾之爵禄贵富足以诱天下之士荣辱忧戚在我是吾可以坐骄天下之士而其将无不趋我者则亦卒入于败乱危辱而已此亦一蔽也又或不求所以养育取用之道而認認然以为天下实无材于世则亦卒入于败乱危辱而已此亦一蔽也此三蔽者其为患则同然而用心善而犹可以论其失者独以天下为无材者耳蓋其心非不欲用天下之材特未知其故也且人之有材能者其形何以异于人哉

惟其遇事而事治画策而利害得治国而国安焉此其所以异于人者也故上之人苟不能精察之审用之则虽抱臯稷契之智且不能自异于众况其下者乎世之蔽者方曰人之有异能于其身犹锥之在囊其末立见故未有有其实而不可见者也此徒有见于锥之在囊而固未覩夫马之在廐也弩骥杂处其所以饮水食刍嘶鸣蹄齧求其所以异者盖寡及其引重车取夷路不屡策不烦御一顿其辔而千里已至矣当是之时使弩马并驱方驾则虽倾轮絶勒败筋骨不舍昼夜而追之辽乎其不可以及也夫然后骐驎騊防与弩骀别矣古之人君知其如此故不以为天下无材尽其道以求而试之耳试之之道在当其所能而已夫南越之修箛鏃以百链之精金羽以秋鹖之颈翎加强弩之上而彊之千步之外虽有犀兕之捍无不立穿而死者此天下之利器而决胜觊武之所宝也然而不知其所宜用而以敲朴则无以异于朽槁之梃也是知虽得天下之瑰材桀知而用之不得其方亦若此矣古之人君知其如此于是铨量其能而审处之使大者小者长者短者强者弱者无不适其任者焉其如是则士之愚防鄙陋者皆能奋其所知以效小事况其贤能智力卓荦者乎呜呼后之在位者盖未尝求其說而试之以实也而坐曰天下果无材亦未之思而已矣盖闻古之人于材有以教育成就之而子独言其求而用之者何也曰因天下法度未立之后必先索天下之材而用之如能用天下之材则所以能复先王之法度则天下之小事无不如先王时矣况教育成就人材之大者乎此吾所以独言求而用之之道者噫今天下盖尝患无材可用者吾闻之六国合从而辯說之材出刘项并世而筹画战鬪之徒起唐太宗欲治而谏諍之佐来此数君未出之时盖未尝有也人君苟欲之斯至矣今亦患上之不求之不用之耳天下之广人物之众而曰果无材者吾不信也

原过 王安石

天有过乎有之陵歷闕蚀是也地有过乎有之崩弛竭塞是也天地举有过卒不累覆且载者何善复常也人介乎天地之间则固不能无过卒不害圣且贤者何亦善复常也故太甲思庸孔子曰勿憚改过扬雄贵迁善皆是术也予之朋有过而能悔悔而能改人则曰是向之从事云尔今从事与向之从事弗类非其性也饰表以疑世也夫岂知言哉天播五行于万灵人固备而有之有而不思则失思而不行则废一日咎前之非沛然思而行之是失而复得废而复举也故曰非其性是率天下而戕性也且如人有财见篡于盗已而得之曰非夫人之财向篡于盗矣可欤不可也财之在已固不若性之为已有也财失复得曰非其财且不可性失复得曰非其性可乎

周公 王安石

甚哉荀卿之好妄也载周公之言曰吾所执贄而见者十人还贄而相见者三十人貌执者百有余人欲言而请毕事千有余人是诚周公之所为则何周公之小也夫圣人为政于天下也吾初无为于天下而天下卒以无所不治者其法诚修也故三代之制立庠于党立序于遂立学于国而尽其道以为养贤教士之法是士之贤虽未及用者而固不见尊养者矣此则周公待士之道也诚若荀卿之言则春申孟尝之行乱世之事也岂足为周公乎且圣世之士各有其业讲道习艺患日之不足岂假于游公卿之门哉彼游公卿之门求公卿之礼者皆战国

之奸民而毛遂侯嬴之徒也苟卿生于乱世不能考论先王之法着之天下而惑于乱世之俗遂以为圣世之士亦若是而已亦已过也且周公之所礼者大贤与则周公岂唯执贽见之而已固当荐之天子而共天位也如其不贤不足与共天位则周公如何其与之礼也子产听郑国之政以其乘舆济人于溱洧孟子曰惠而不知为政盖君子之为政立善法于天下则天下治立善法于一国则一国治如其不能立法而欲人人悦之则日亦不足矣使周公知为政则宜立学校之法于天下矣不知立学校而徒能劳身以待天下之士则不唯力有所不足而势亦有所不得周公亦可谓愚也又曰仰禄之士犹可矫正身之士不可骄也夫君子之不骄虽閤室不敢自慢岂为其人之仰禄而可以骄乎呜呼所谓君子者贵其能不易乎世也苟卿生于乱世而遂以乱世之事量圣人后世之士尊苟卿以为大儒而继孟子者吾不之信矣

功名论 司马光

自古人臣有功者谁哉愚以为人臣未尝有功其有功者皆君之功也何以言之夫地有草木天不雨露之则不能以生月有光华日不照望之则不能以明臣有事业君不信任之则不能以成此自然之道也古者大国不过百里小国半之然皆有贤师大夫以辅佐其君大者以王小者以霸下者犹能保其社稷世数十传而不绝由是观之天下乌有无士之国哉患在人主知之不明用之不固信之不专耳如是则人臣虽有才智而不得施虽有忠信而不敢效人主徒忧劳于上欲治而愈乱欲安而愈危欲荣而愈辱矣然则人主有贤不能知与无贤同知而不能用于不知同用而不能信与不用同不用贤而求功业之美名誉之白难矣昔百里奚虞人也由余戎人也商鞅魏人也而用于秦苗贲皇申公巫臣楚人也而用于晋伍员楚人也而用于吴韩信陈平项羽之人也而用于汉是五国者非无贤人也主不能知而驱之以资敌国此所谓有贤不能知与无贤同也齐桓公见郭氏之墟问于野人曰郭何故亡对曰以其善善而恶恶公曰善善而恶恶国所以兴也而亡何故对曰善善而不能行恶恶而不能去所以亡也公归以告管仲管仲曰君与其人俱来乎曰否管仲曰君亦一郭氏也公乃召而官之齐景公待孔子曰若季氏则吾不能以季孟之间待之齐王欲中国而授孟子室养孟子以万钟使诸大夫国人皆有所矜式是二君者非不知孔孟之为圣贤也不能行其道而徒欲尊之以为名是以孔孟以为不义而不留也洪范曰凡厥正人既富方谷汝弗能使有好于而家时人斯其辜此所谓知贤不能用与不知同也乐毅为燕伐齐下七十余城燕王疑之使骑劫代将田单诈骑劫而败之尽失齐地廉颇为赵将拒秦人而不战赵王疑之使赵括代将白起击赵括而虏之阬其卒四十万项羽用范增谋彊霸诸侯围汉王荥阳几拔矣闻汉之反间而疑之范增怒去而项羽卒为汉擒夫驾车者既服骥驥矣又以弩马参之欲其并驱而前不可得也蓺田者既树嘉谷矣又以稂莠杂之欲其并生而茂不可得也为国者既置贤才矣又以小人间的欲其并立而治不可得也是故宓子贱为单父宰辞于君请君之近史二人与之俱至官使二史书方书輒掣其肘书不善则从而怒之二史患之辞请归以告鲁君鲁君以问孔子孔子曰宓不齐君子也其才任王霸之佐屈节治单父将以自试也意者以此为谏乎公寤太息而叹曰此寡人之不肖寡人乱宓子之政而责其善者数矣微二史寡人无以知其过微夫子寡人无以自寤遽发所爱之使告宓子曰自今以往单父非吾有也从子之制有使于民者子决为之五年一言其要宓子遂得行其政而单父大治大禹谟曰任贤勿贰去邪勿疑疑谋勿成百志惟熙荀子曰人主有六患使贤者为之则与不肖规之使智者虑之则与愚者论之使修

士行之则与污邪之人疑之虽欲成立得乎哉譬之是犹立直木而恐其影之枉也惑莫大焉语曰好女之色恶者之孽也公正之士众人之座也修乎道之人污邪之贼也今使污邪之人论其怨贼而求其无偏得乎哉譬之是犹立枉木而求其影之直也乱莫大焉噫人主苟不知其贤则已矣已审知其贤授之以政而复疑之何哉凡忠直之臣行其道于国家则必与夫天下之奸邪为怨敌矣非喜与之为怨也不与之为怨则君不尊国不治功不立也以一人之身日与天下之奸邪为怨更进迭毁于君前而君不能决兼听而两可如是则忠直之臣求欲无危不可得也君子非爱死而不为也知其身死而功不立奸邪愈炽忠良愈恐政治愈乱国家愈危也是以君子艰进易退辞贵就贱被发佯狂逃匿山林者以此故也此所谓用贤不能专与不用同也明主为之不然审求天下之大贤而亟用之专信之举社稷百姓而委属之虽有至亲不能夺也虽有至贵不能争也虽有防巧不能间也确然若胶漆之相合视其际而不可得见也然后贤者得竭其心而施其才不忧怨贼之口不惧猜嫌之迹人主端拱无为享其功利收其荣名而已矣古之圣帝明王用此道而光宅四海长育万物功如天地明若日月者多矣固不待称引而知也请言其时近而道卑者昔齐桓公得管仲三薰而三浴之解其縲紲置以为相鲍叔桓公之傅也避太宰之位而安随其后国子高子天子之守卿也人率五乡而听其政令况其余四境之内上下之人其孰能不战战栗栗从桓公而贵信之是以能九合诸侯一正天下为五霸首也陈平楚之亡将也汉高祖德之使其防诸将绛灌之属尽害之高祖以平为防军中尉尽监诸将诸将乃不敢言韩信亡卒也高祖用萧何一言拔诸行伍之中以为大将诸将皆惊而不敢争也是以五年之中防项羽定天下创业垂统四百岁而不绝蜀先主与云长张飞布衣之友周旋艰险恩若兄弟一旦得诸葛孔明待之过于闕张闕张不说先主曰孤之有孔明犹鱼之有水愿诸君勿复言是以能超于败亡之中保有一方与魏吴为敌国符永固得王景略于处士以为丞相贵戚大臣有害之者永固辄杀之谓太子宏及长乐公丕曰汝事王公如事我也是以能东取燕西取凉南取襄阳北取拓跋奄有中原几乎海内此五臣者从今日视之皆英杰之才也向使四君知之不明用之不固信之不专则管仲醢于齐廷陈平穷于户牖韩信饥于淮陰诸葛孔明老于隆中王景略死于华山名氏埋灭不可复知乌有 功烈施于后世如此哉是以大雅云徐方既同天子之功晋平公问叔向曰齐桓公之霸君之力乎臣之力乎叔向曰管仲善制割隰朋善削缝宾胥无善纯缘桓公知衣而已亦是其臣之力师旷曰管仲善断割之隰朋善煎熬之宾胥无善齐和之羹已熟矣奉而进之而君不食谁能强之亦其君之力也魏文侯使乐羊将而攻中山三年而拔之返而论功文侯示之谤书一篋乐羊再拜稽首曰此非臣之功主君之力也由是言之人臣不能立功凡有功者皆其君之功也

论 司马光

塋者藏也孝子不忍其亲之暴露故敛而藏之赍送不必厚厚者有损无益古人论之详矣今人塋不厚于古而拘于陰阳禁忌则甚焉古者虽卜宅卜日蓋先谋人事之便然后质诸蓍庶无后艰耳无常地与常日也今之塋书乃相山川冈亩之形势考歲月日時之支干以为子孙贵贱贫富壽夭贤愚皆系焉非此地非此时不可塋也举世惑而信之于是防亲者往往久而不塋问之曰歲月未利也又曰未有吉地也又曰游官遠方未得归也又曰贫未能办塋具也至有终身累世而不塋遂弃失尸柩不知其处者呜呼可不令人深叹 哉人所贵于身后

有子孙者为能藏其形骸也其所为乃如是曷若无子孙死于道路犹有仁者见而殓之耶先王制礼葬期遠不过七月今世着令自王公以下皆三月而葬又礼未葬不变服食粥居倚庐哀亲之未有所归也既葬然后渐有变除今之人背礼违法未葬而除防从官四方食稻衣锦饮酒作乐其心安乎人之贵贱贫富壽夭系于天贤愚系于人固无關预于葬就使皆如葬师之言为人子者方当哀穷之际何忍不顾其亲之暴露乃欲自营福利邪昔者吾诸祖之葬也家甚贫不能具棺槨自太尉公而下始有棺槨然金银珠玉之物未尝以錙铢入于圻中将葬太尉公族人皆曰葬者家之大事奈何不询陰阳此必不可吾兄伯康无如之何乃曰询于陰阳则可矣安得良葬师而询之族人曰近村有张生者良师也数县皆用之兄乃召张生许以钱二万张生野夫也世为葬师为野人葬所得不过千钱闻之大喜兄曰汝能用吾言吾俾尔葬不用吾言将求它师张师曰惟命是听于是兄自以已意处歲月日時及圻之淺深廣狹道路所从出皆取便于事者使张生以葬书緣饰之曰大吉以示族人皆悦无违异者今吾兄年七十九以列卿致仕吾年六十六忝备侍从宗族之从仕者二十有三人视它人之谨用葬书未必胜吾家也前年吾妻死棺成而敛装办而行圻成而葬未尝以一言询陰阳家迄今亦无它故吾尝疾陰阳家立邪說以惑众为世患于防家尤甚顷为諫官尝奏乞禁天下葬书当时执政莫以为意今着兹论庶俾后之子孙葬必以时欲知葬具之不必厚视吾祖欲知葬书不足信视吾家元丰七年正月日具官司司马光述

宋文鉴卷九十六

卷九十七

钦定四库全书

宋文鉴卷九十七

宋吕祖谦编

论

心术 苏洵

为将之道当先治心泰山覆于前而色不变麋鹿兴于左而目不瞬然后可以制利害可以待敌凡兵上义不义虽利勿动非一动之为利害而他日将有所不可措手足也夫惟义可以怒士士以义怒可与百战凡战之道未战养其财将战养其力既战养其气既胜养其心谨烽燧严斥使耕者无所顾忌所以养其财丰犒而优游之所以养其力小胜益急小挫益厉所以养其气用人不尽其所欲为所以养其心故士尝蓄其怒懷其欲而不尽怒不尽则有余勇欲不尽则有余贪故虽并天下而士不厌兵此黄帝之所以七十战而兵不殆也不养其心一战而胜不可用矣凡将欲智而严凡士欲愚智则不可测严则不可犯故士将委已而听命夫安得不愚夫唯士愚而后可与之皆死凡知兵之动知敌之主知敌之将而后可以动于岷邓艾縋兵于蜀中非刘禅之庸虽百万之师可以坐缚彼固有所侮而动也故古之贤将能以兵当敌而又以敌自当故去就可以决凡主将之道知理而后可以举兵知势而后可以加兵知节而后可以用兵知理则不屈知势则不沮知节则不穷见小利不动见小患不避小利小患不足以辱吾技也夫然后有以支大利大患夫惟养技而自爱者无敌于天下故一忍可以支百勇一静可以制百动兵有长短敌我一也彼闻吾之所长吾出而用之彼将不与吾校吾之所短吾蔽而置之彼将强与吾角奈何曰吾之所短吾抗而暴之使之疑而却吾之所长吾陰而养之使之狎而堕其中此用长短之术也善用兵者使之无所顾有所恃无所顾则知死之不足惜有所恃则知不至于必败尺捶当猛虎奋呼而操击徒手遇蜥蜴变色而却步人之情也知此者可以将矣袒裼而按劒则乌获不敢逼冠胄衣甲据兵而寝则童子弯弓杀之矣故善用兵者以形固夫能以形固则力有余矣

任相 苏洵

古之善观人之国者观其相何如人而已议者尝曰将与相均将特一大有司耳非相侔也国有征伐而后将权重有征伐无征伐相皆不可一日轻相贤耶则羣臣有司皆贤而将亦贤矣将贤耶相虽不贤将不可易也故曰将特一大有司耳非相侔也任相之道与任将不同为将者大防多才而或顽钝无耻非皆节廉好礼不可犯者也故不必优以体貌而其有不羈不法之事则亦不可以常法御何则豪纵不趋约束者亦将之常态也武帝视大将军往往踞厕而

李广利破大宛侵杀士卒之罪则寝而不问此任将之道也若夫相必节廉好礼者为也又非豪纵不趋约束者为也故接之以礼而重责之古者相见于天子天子为之离席起立在道之下舆有病亲问不幸而死亲吊待之如此其厚然其有罪亦不私也天地大变天下大过而相以不起闻矣相不胜任策书至而布衣出府免矣相有他失而栈车牝马归以思过矣夫接之以礼然后可以重其责而使无怨言责之重然后待之以礼而不为过礼薄而责重彼将曰主上遇我以有礼而重我以此责也甚矣责轻而礼重彼将遂弛然不肯自飭故厚礼以维其心而重责以勉其怠而后为相者莫不尽忠于朝廷而不防其私吾观贾谊书至所谓长太息者常反覆读不能已以为谊生文帝时文帝遇将相大臣不为无礼独周勃一下狱谊遂发此使谊生于近世见其所以遇宰相者则当复何如也夫汤武之德三尺竖子皆知其为圣人而犹有伊尹太公者为之师友焉伊尹太公非贤于汤武也而二圣人者特不顾以师友之明有尊也噫近世之君故勿以此责天子御坐见宰相而起者有之乎无矣在舆而下者有之乎亦无矣天子坐殿上宰相与百官趋走于下掌仪之官名而呼之若郡守召胥吏耳虽臣子为此不为过然尊尊贵贵之道不若是防也夫既不能待之以礼则其罪之也吾法将亦不得用何者不果于用礼而果于用刑则其心不服故法曰有某罪而加之以某刑及其免相也既曰有某罪而刑不加焉不过削之一官而出之大藩镇此其 皆始于不为之礼贾谊曰中罪而自弛大罪而自裁夫人不我诛而安忍弃其身此必有大愧于其君故人君者必有以愧其臣故其臣有所不为武帝尝以不冠见平津侯故当天下多事朝廷忧惧之际使石庆得容于其间而无怪焉然则必其待之如礼而后可以责之如法也且吾闻之待以礼而彼不自效以报其上重其责而彼不自勉以全其身安其禄位成其功名者天下无有也彼人主傲然于上不礼宰相以自尊大者孰若使宰相自效以报其上之为利宰相利其君之不责而丰其私者孰若自勉以全其身安其禄位成其功名之为福吾又未见去利而就害逖福而求其祸者也

辨奸 苏洵

事有必至理有固然惟天下之静者乃能见微而知著月晕而风础润而雨人人知之人事之推移理势之相因其踈阔而难知变化而不可测者孰与天地阴阳之事而贤者有不知其故何哉好恶乱其中而利害夺其外也昔者山巨源见王衍曰误天下苍生者必此人也郭汾阳见卢杞曰此人得志吾子孙无遗类矣自今而言之其理固有可见者以吾观之王衍之为为人容貌语言固有以欺世而盗名者然不忤不求与物浮沉使晋无惠帝仅得中主虽衍百千何从而乱天下乎卢杞之奸固足以欺国然不学无文容貌不足以动人言语不足以 世非德宗之鄙暗亦何从而用之由是言之二公之料二子亦容有未必然也今有人口诵孔老之书身履夷齐之行收召好名之士不得志之人相与造作语言私立名字以为颜渊孟轲复出而阴贼险狠与人异趣是王衍卢杞合为一人也其祸岂可胜言哉夫面垢不忘洗衣垢不忘澣此人之至情也今也不然衣巨卢之衣食犬彘之食囚首防面而谈诗书此岂其情也哉凡事之不近人情者鲜不为大奸慝竖刁易牙开方是也以盖世之名而济其未形之患虽有愿治之主好贤之相犹将举而用之则其为天下患必然无疑者非特三子之比也孙子曰善用兵者无赫赫之功使斯人而不用也则吾言为过而斯人有不遇之叹孰知其祸之至于此哉不然天下被其祸而吾将获知言之名悲夫

备乱 郑獬

备天下之乱者古今大势可见已而未能有善备者也始周之诸侯相禽猎剖而为六国卒并于秦秦以诸侯之亡周也乃为之备诸侯一划其根孽而郡县之遂至天下无一绳之维诸侯则不作而其末乃有布衣之祸故高祖不由尺土暴起于风埃之中五载而成帝业汉以郡县之亡秦也则又为之备郡县而又裂其土地以侯诸侯王盘踞过强卒用不终而布衣则不作其末乃有外戚之祸贼莽窥其隙遂盗有汉玺及光武之再开辟以外戚之亡西京也则又为之备外戚乃不复委重宰相而尊用台阁三公拱袂而守虚器外戚则不作而其末乃有阉竖之祸积其残暴酷烈而终之董卓天下遂睽而为三魏氏以阉竖之亡汉也则又为之备阉竖痛扫刈之一归其房闼之役阉竖则不作而其末乃有强臣之祸故司马父子袭据大柄更四世而禅其国晋氏以强臣之亡魏也则又为之备强臣而培植其宗族虽愚儿懦子皆付以大国强臣则不作而其末乃有宗室之祸朝而为帝暮为囚虏五湖乘之遂荒中国弥漫横流以至于唐太宗乃颇究览其失得而为之大备焉及其末也则又有藩镇之祸梁唐晋汉周皆以藩镇而更为帝夫歷世之乱考其所以备之者不为不至窒一穴穿一穴何祸乱之不息也盖未尝取天下之公制而独以已之私者备之耳成汤周武以诸侯得天下而商周末尝輒废诸侯岂非用天下之公制者耶惟其公也故后世之长久繇秦而来独汲汲备其私者又矫之过呜呼不得圣之法而备之奚有不速者耶

唐论 曾巩

成康歿而民生不见先王之治日入于乱以至于秦尽除前圣数千载之法天下既攻秦而亡之以归于汉汉之为汉更二十四君东西再有天下垂四百年然大抵多用秦法其改更秦事亦多附已之意非放先王之法而有天下之志也有天下之志者文帝而已然而天下之材不足故仁闻虽美矣而当世之法度亦不能放于三代汉之亡而强者遂分天下之地晋与隋虽能合天下于一然而合之未久而已亡其为不足议也代隋者唐更十八君垂三百年而其治莫盛于太宗太宗之为君也拙已从谏仁心爱人可谓有天下之志以租庸任民以府衛任兵以职事任官以材能任职以兴义任俗以尊本任众赋役有定制兵农有定业官无虚名职无废事人习于善行离于未作使之操于上者要而不烦取于下者寡而易供民有农之实而兵之备存兵有兵之名而农之利在事之分有归而禄之出不浮材之品不遗而治之体相承其廉耻日以笃其田野日以辟其法修则安且治废则危且乱可谓有天下之材行之数歲粟米之贱斗至数钱居者有余蓄行者有余资人人自厚几于刑措可谓有治天下之效夫有天下之志有天下之材又有天下之效然而不得与先王并者法度之行拟之先王未备也礼乐之具田畴之制庠序之教拟之先王未备也躬亲行阵之间战必胜攻必克天下莫不以为武而非先王之所尚也四夷万国古所未及以政者莫不服从天下莫不以为盛而非先王之所务也太宗之为政于天下者得失如此由唐虞之治五百余年而有汤之治由汤之治五百余年而有文武之治由文武之治千有余年而始有太宗之为君有天下之志有天下之材又有治天下之效然而又以其未备也不得与先王并而称极治之时是则人生于文武之前者率五百余年而一遇治世生于文武之后者千有余年而未遇极治之时也非独民之生于是时者之不幸也士之生于文武之前者如舜禹之于唐八元八凯之于舜伊尹之于汤太公之于文

武率五百余年而一遇生于文武之后者千有余年虽孔子之圣孟轲之贤而不遇虽太宗之为君而未可以必得志于其时也是亦士民之生于是时者之不幸也故述其是非得失之迹非独为人君者可以考焉士之有志于道而欲仕于上者可以鉴矣

晋武 钱 勰

人主莫急于知天下之务莫病于不明天下之善善有大小而务有先后夫以小善而为急务者天下常乱故晋武尝谓邹湛曰吾平天下而不封禅焚雉头裘行布衣礼夫不封禅以为不自满也焚雉头裘以为俭也行布衣礼以为孝也是数者皆区区可以自名而非天下之先务非所谓小善者乎惜哉邹湛无经国之虑矣遽遂以为过汉文也何不曰陛下平天下而不封禅所以为不自满也不如无去州郡之武备陛下焚雉头裘所以为俭也不如无纳吴宫人之数千行布衣礼所以为孝也不如择贤嗣而使宗庙血食一言之不听至于再言之屡言之屡言之而不听则以身去之勿妄食其禄可也幸而感寤则山涛之论得行州郡之兵可复则虽永宁之后八王五胡之乱未至于一败涂地也吴宫之人可出羊车之游有所则治天下之志未荒也衛瓘之言见察昏弱之患遂废则晋祚灵长亦未可量也湛虽好论事而不知为此对專为逢迎牵合之语可为长太息也故刘毅至比之桓灵其有味哉其有味哉

宋文鉴卷九十七

卷九十八

钦定四库全书

宋文鉴卷九十八

宋吕祖谦编

论

留侯论 苏轼

古之所谓豪杰之士者必有过人之节人情有所不能忍者匹夫见辱拔剑而起挺身而鬪此不足为勇也卒然临之而不惊无故加之而不怒此其所扶持者甚大而其志甚远也夫子房授书于圯上之老人也其事甚怪而愚以为或者秦之世有隐君子出而试之观其所以微见其意者皆圣贤相与警戒之义而世不察以为鬼物亦已过矣且其意不在书当韩之亡秦之方盛也以刀锯鼎镬待天下之士其平居无罪夷灭者不可胜数虽有贵育无所复施夫持法太急者其锋不可犯而其势未可乘子房不忍忿忿之心以匹夫之力而逞于一击之间当此之时子房之不死者其间不能容发盖亦已危矣千金之子不死于盗贼何者其身之可爱而盗贼之不足以死也子房以盖世之才不为伊尹太公之谋而特出于荆轲聂政之计以侥幸于不死此圯上之老人所为深惜者也是故倨傲鲜腆而深折之彼其能有所忍也然后可以就大事故曰孺子可教也楚庄王伐郑郑伯肉袒牵羊以逆莊王曰其君能下人必能信用其民矣遂舍之勾践之困于防稽而归臣妾于吴者三年而不倦且夫有报人之志而不能下人者是匹夫之刚也夫老人者以为子房才有余而忧其度量之不足故深折其少年刚锐之气使之忍小忿而就大谋何则非有平生之素卒然相遇于草野之间而命以仆妾之役油然而不恠者此固秦皇帝之所不能惊而项籍之所不能怒也观夫高祖之所以胜而项籍之所以败者在能忍与不能忍之间而已矣项籍唯不能忍是以百战百胜而轻用其锋高祖忍之养其全锋而待其毙此子房之教也当淮陰破齐而欲自立王高祖发怒见于词色由此观之犹有刚强不忍之气非子房其谁全之太史公疑子房以为魁梧竒伟而其状貌乃如妇人女子不称其志气而愚以为此其所以为子房欤

孔子从先进论 苏轼

君子之欲有用于天下莫重乎其始进也始进以正犹且以不正继之况以不正进者乎古之人有欲以其君王者也有欲以其君霸者也有欲强其国者也是三者其志不同故其术有浅深而其成功有巨细虽其终身之所为不可逆知而其大节必见于其始进之日何者其中素定也未有进以强国而能霸者也未有进以霸而能王者也伊尹之耕于有莘之野也其心固曰使吾君为尧舜之君而吾民为尧舜之民也以伊尹为以滋味説汤者此战国之策士以已

度伊尹也君子疾之管仲见桓公于累囚之中其所言者固欲合诸侯攘夷狄也管仲度桓公足以霸度其身足以为霸者之佐是故上无侈説下无卑论古之人其自知明也如此商鞅之见孝公也三説而后合甚矣鞅之懷诈挟术以欺其君也彼岂不自知其不足以帝且王哉顾其刑名惨刻之学恐孝公之不能从是故设为高论以衒之君既不能是矣则举其国惟吾之所欲为不然岂其负帝王之略而每见輒变以徇人乎商鞅之不终于秦也是其进之不正也圣人则不然其志愈大故其道愈高其道愈高故其合愈难圣人视天下之不治如赤子之在水火也其欲得君以行道可谓急矣然未尝以难合之故而少贬焉者知其始于少贬而其渐必至陵迟而大壞也故曰先进于礼乐野人也后进于礼乐君子也如用之则吾从先进孔子之世其诸侯卿大夫视先王之礼乐犹方圆冰炭之不相入也进而先之以礼乐其不合必矣是人也以道言之则圣人以世言之则野人也若夫君子之急于有功者则不然其未合也先之以世俗之所好而其既合也则继以先王之礼乐其心则然然其进不正未有能继以正者也故孔子不从而孟子亦曰枉尺直寻者以利言也如以利则枉寻直尺而利亦可为与君子之得其君也既度其君又度其身君能之而我不能不可为也不敢进而进是易其君不可为而为是轻其身是二人者皆有罪焉故君子之始进也曰君苟用我矣我且为是君曰能之则安受不辞君曰不能天下其独无人乎至于人君亦然将用是人也则告之以已所欲为要其能否而责成焉其曰姑用之而试观之者皆过也后之君子其进也无所不至惟恐其不合也曰我将权以济道既而道卒不行焉则曰吾君不足以尽我也始不正其身终以谤其君是人也自以为君子而孟子之所谓贼其君者也

续欧阳子朋党论 苏轼

欧阳子曰小人欲空人之国必进朋党之説呜呼国之将亡此其徵欤祸莫大于权之移人而君莫危于国之有党有党则必争争则小人者必胜而权之所归也君安得不危哉何以言之君子以道事君人主必敬之而疎小人唯予言而莫予违人主必狎之而亲疎者易间而亲者难睽也而君子者不得志则奉身而退乐道不仕小人者不得志则徼幸复用唯怨之报此其所以必胜也蓋尝论之君子如嘉禾也封植之甚难而去之甚易小人如恶草也不种而生去之为最难斥其一则援之者众尽其类则众之致怨也深小者复用而肆威大者得志而窃国善人为之扫地世主为之屏息譬之断蛇不死刺虎不毙其伤人则愈多矣齐田氏鲁季孙是已齐鲁之执事莫匪田季之党也歷数君不忘其诛而卒之简公弑昭哀失国小人之党其不可除也如此而汉党锢之狱唐白马之祸忠义之士斥死无余君子之党其易尽也如此使世主知易尽者之可戒而不可除者之可惧则有瘳矣且夫君子者世无若是之多也小人者亦无若是之众也凡才智之士鋭于功名而嗜于进取随所用耳孔子曰仁者安仁智者利仁未必皆君子也冉有从夫子则为门人之选从季氏则为聚斂之臣唐柳宗元刘禹锡使不防叔文之党其高才絶学亦足以为唐名臣矣昔栾懷子得罪于晋其党皆出奔乐王鮒谓范宣子曰盍反州绰刑蒯勇士也宣子曰彼栾氏之勇也余何获焉王鮒曰子为彼栾氏乃子之勇也呜呼宣子蚤从王鮒之言岂独获二子之勇且安有曲沃之变哉愚以谓治道去泰甚耳苟黜其首恶而贷其余使才者不失富贵不才者无所致憾将为吾用之不暇又何怨之报乎人之所以为盗者衣食不足耳农夫市人焉保其不为盗而衣食既足盗岂有不能返农夫市人也哉故善除盗者开其衣食之门使复其业善除小人者诱以富贵之道使隳其党以力取威胜

者蓋未尝不反为所噬者昔曾参之治齐曰慎无扰狱市狱市奸人之所容也知此亦庶几于善治矣奸固不可长而亦不可不容也若奸无所容君子岂久安之道哉牛李之党徧天下而李德裕以一夫之力欲穷其类而致之必死此其所以不旋踵而罹仇人之祸也奸臣复炽忠义益衰以力取威胜者果不可耶愚是以续欧阳子之說而为君子小人之戒

志林 苏轼

商鞅用于秦变法定令行之十年秦民大說道不拾遗山无盗贼家给人足民勇于公战怯于私鬪秦人富强天子致胙于孝公诸侯毕贺苏子曰此皆战国之游士邪說诡论而司马迁闇于大道取以为史吾常以为迁有大罪二其先黄老后六经退处士进奸雄蓋其小小者耳所谓大罪二则论商鞅桑 羊之功也自汉以来学者耻言商鞅桑 羊而世主独甘心焉皆阳讳其名而陰用其实其甚者则名实皆宗之庶几其成功此司马迁之罪也秦固天下之强国而孝公亦有志之君也修其政刑十年不为声色畋游之所败虽微商鞅有不富强乎秦之所以富强者孝公务本力穡之效非鞅流血刻骨之功也而秦之所以见疾于民如豺狼毒药一夫作难而子孙无遗种则鞅实使之至于桑 羊斗筭之才穿窬之智无足言者而迁称之曰不加赋而上用足善乎司马光之言也曰天下安有此理天下所生财货百物止有此数不在民则在官譬如雨泽夏涝则秋旱不加赋而上用足不过设法陰夺民利其害甚于加赋也二子之名在天下者如蛆蝇糞秽也言之则污口舌书之则污简牘二子之术用于世者灭国残民覆族亡軀者相踵也而世主独甘心焉何哉乐其言之便已也夫尧舜禹世主之父师也諫臣拂士世主之药石也恭敬慈俭勤劳忧畏世主之绳约也今使世主日临父师而亲药石履绳约非其所乐也故为商鞅桑 羊之术者必先鄙尧笑舜而陋禹也曰所谓贤主者專以天下适已而已此世主之所以人人甘心而不悟也世有食钟乳乌喙而纵酒色以求长年者蓋始于何晏晏少而富贵故服寒食散以济其欲无足怪者彼其所为足以杀身灭族者日相继也得死于寒食散岂不幸哉而吾独何为效之世之服寒食散疽背呕血者相踵也用商鞅桑 羊之术破国亡宗者皆是也然而终不悟者乐其言之美便而忘其祸之惨烈也

春秋之末至于战国诸侯卿相皆争养士自谋夫說客谈天雕龙坚白同异之流下至击劔扛鼎鸡鸣狗盗之徒莫不宾礼靡衣玉食以馆于上者何可胜数越王勾践有君子六千人魏无忌齐田文赵胜黄歇吕不韦皆有客三千人而田文招致任侠奸人六万家于薛齐稷下谈者亦千人魏文侯燕昭王太子丹皆致客无数下至秦汉之间张耳陈余号多士宾客厮养皆天下豪杰而田横亦有士五百人其略见于传记者如此度其余当倍官吏而半农夫也此皆奸民蠹国者民何以支而国何以堪乎苏子曰此先王之所不能免也国之有奸也犹鸟兽之有猛鸷昆虫之有毒螫也区处条理使各安其处则有之矣鋤而尽去之则无是道也吾考之世变知六国之所以久存而秦之所以速亡者蓋出于此不可以不察也夫智勇辯力此四者皆天民之秀杰者也类不能恶衣食以养人皆役人以自养者也故先王分天下之富贵与此四者共之此四者不失职则民靖矣四者虽异先王因俗设法使出于一三代以上出于学战国至秦出于客汉以后出于郡县吏魏晋以来出于九品中正隋唐至今出于科举虽不尽然取其多者论之六国之君虐用其民不减始皇二世然当是时百姓无一人叛者以凡民之秀杰者多以客养之不失职也其力耕以奉上皆椎鲁无能为者虽欲怨叛而莫为之先此其所以

少安而不即亡也始皇初欲逐客用李斯之言而止既并天下则以客为无用于是任法而不任人谓民可以恃法而治谓吏不必才取能守吾法而已故堕名城杀豪杰民之秀异者散而归田亩向之食于四公子吕不韦之徒者皆安归哉不知其能稿项黄馘以老死于布褐乎抑将辍耕太息以俟时也秦之乱虽成于二世然使始皇知畏此四人者有以处之使不失职秦之亡不至若是速也纵百万虎狼于山林而饥渴之不知其将噬人世以始皇为智吾不信也楚汉之祸生民尽矣豪杰宜无几而代相陈豨从车千乘萧曹为政莫之禁也至文景武之世法令至密然吴濞淮南梁王魏其武安之流皆争致宾客世主不问也岂惩秦之祸以为爵禄不能尽縻天下士故少宽之使得或出于此也耶若夫先王之政则不然曰君子学道则爱人小人学道则易使也呜呼此岂秦汉之所及也哉

秦始皇帝时赵高有罪防毅案之当死始皇赦而用之长子扶苏好直谏上怒使北监防恬兵于上郡始皇东游防稽并海走琅琊少子胡亥李斯防毅赵高从道病使防毅还祷山川未反而上崩李斯赵高矫诏立胡亥杀扶苏防恬防毅卒以亡秦苏子曰始皇制天下轻重之势使内外相形以禁奸备乱者可谓密矣防恬将三十万人威振北方扶苏监其军而防毅侍帟幄为谋臣虽有大奸贼敢睥睨其间哉不幸道病祷祀山川尚有人也而遣防毅故高斯得成其谋始皇之遣毅毅见始皇病太子未立而去左右皆不可以言智虽然天之亡人国其祸败必出于智所不及圣人为天下不恃智以防乱恃吾无致乱之道耳始皇致乱之道在用赵高夫阉尹之祸如毒药猛兽未有不裂肝碎首者也自书契以来惟东汉吕强后唐张承业二人号称善良岂可望一二于千万以徼必亡之祸哉然世主皆甘心而不悔如汉桓灵唐肃代犹不足深怪始皇汉宣皆英主亦湛于赵高恭显之祸彼自以为聪明人杰也奴仆熏腐之余何能为及其亡国乱朝乃与庸主不异吾故表而出之以戒后人主如始皇汉宣者或曰李斯佐始皇定天下不可谓不智扶苏亲始皇子秦人戴之久矣陈胜假其名犹足以乱天下而防恬持重兵在外使二人不即受诛而复请之则斯高无遗类矣以斯之智而不虑此何哉苏子曰呜呼秦之失道有自来矣岂独始皇之罪自商鞅变法以殊死为轻典以参夷为常法人臣狼顾胁息以得死为幸何暇复请方其法之行也求无不获禁无止鞅自以为轶尧舜而驾汤武矣及其出亡而无所舍然后知为法之 夫岂独鞅悔之秦亦悔之矣荆轲之变持兵者熟视始皇环柱而走莫之救者以秦法重故也李斯之立胡亥不复忌二人者知威令之素行而臣子不敢复请也二人之不敢请亦知始皇之鸷悍而不可回也岂料其伪也哉周公曰平易近民民必归之孔子曰有一言而可以终身行之其恕矣乎夫以忠恕为心而以平易为政则上易知而下易达虽有卖国之奸无所投其隙仓卒之变无自发焉然其令行禁止盖有不及商鞅者矣而圣人终不以彼易此商鞅立信于徙木立威于弃灰刑其亲戚师傅积威信之极以及始皇秦人视其君如雷电鬼神不可测也古者公族有罪三宥然后制刑今至使人矫杀其太子而不忌太子亦不敢请则威信之过也故夫以法毒天下者未有不反中其身及其子孙者也汉武与始皇皆果于杀者也故其子如扶苏之仁则宁死而不请如戾太子之悍则宁反而不诉知诉之必不察也戾太子岂欲反者哉计出于无聊也故为二君之子者有死与反而已李斯之智盖足以知扶苏之必不反也吾又表而出之以戒后人主之果于杀者

顏子所好何学论 程 颢

圣人之门其徒三千独称颜子为好学夫诗书六艺七十子非不习而通也然则颜子所独好者何学也学以至圣人之道也圣人可学而至欤曰然学之道如何曰天地储精得五行之秀者为人其本也真而静其未发也五性具焉曰仁义礼智信形既生矣外物触其形而动于中矣其中动而七情出焉曰喜怒哀乐爱恶欲情既炽而益荡其性凿矣是故觉者约其情使合于中正其心养其性故曰性其情愚者则不知制之纵其情而至于邪僻梏其性而亡之故曰情其性凡学之道正其心养其性而已中正而诚则圣矣君子之学必先明诸心知所养【一作往】然后力行以求至所谓自明而诚也故学必尽其心尽其心则知其性知其性反而诚之圣人也故洪范曰思曰睿睿作圣诚之之道在乎信道笃信道笃则行之果行之果则守之固仁义忠信不离乎心造次必于是颠沛必于是出处语默必于是久而弗失则居之安动容周旋中礼而邪僻之心无自生矣故颜子所事则曰非礼勿视非礼勿听非礼勿言非礼勿动仲尼称之则曰得一善则拳拳服膺而勿失之矣又曰不迁怒不贰过有不善未尝不知知之未尝复行也此其好之笃学之之道也视听言动皆礼矣所异于圣人者盖圣人则不思而得不勉而中从容中道颜子则必思而后得必勉而后中故曰颜子之与圣人相去一息孟子曰充实而有辉光之谓大大而化之之谓圣圣而不可知之谓神颜子之德可谓充实而有光辉矣所未至者守之也非化之也以其好学之心假之以年则不日而化矣故仲尼曰不幸短命死矣盖伤其不得至于圣人也所谓化之者入于神而自然不思而得不勉而中之谓也孔子曰七十而从心所欲不逾矩是也或曰圣人生而知之者也今谓可学而至其有稽乎曰然孟子曰尧舜性之也汤武反之也性之者生而知之者也反之者学而知之者也又曰孔子则生而知也孟子则学而知也后人不达以谓圣本生知非学可至而为学之道遂失不求诸已而求诸外以博闻强记巧文丽辞为工荣华其言鲜有至于道者则今之学与颜子所好异矣

萧瑀论 张唐英

萧瑀请出家为僧此可罪也然尽忠于隋及归国亦多有功绩颇见委任歷仆射御史大夫参与朝政每有议论房杜不能抗之房等虽心知其是而不用其言瑀弥怏怏自是罢为太子少傅此是格阁瑀而使优闲尔且房杜可谓贤相也经纶草昧以启天下之业竭忠悉虑以成天下之务不求备而责人不以已长而格物贞观太平之功诚有力焉然于瑀尚亦有所抑遏岂亦珪之玷而珠之翳乎古人谓事虽浅当深谋之言虽轻当重思之收不知言以致知言而房杜二人于用人亦至矣而尚失于瑀岂瑀之性褊躁忽于议论之际务以直气自豪而不能从容委曲详悉评议俱求辨博而取胜于诸公故房杜自以持天下之政权柄在已耻其不能卑论忽有不容其說然以二公才过于人虽不从一萧瑀之言无害为贤相后之执政者必欲迹房杜之业成就太平之功则不可使顺防者荣华逆意者枯槁心知其是而不用其言庶乎国家之政无有蔽而不通故曰天下无粹白之狐而有粹白之裘者盖取于众苟不取于众是哥奴辈昔尝箝天下之口而自任耳

宋文鉴卷九十八

卷九十九

钦定四库全书

宋文鉴卷九十九

宋 吕祖谦 编

论

三国论 蘓 辙

天下皆怯而独勇则勇者胜皆闇而独智则智者胜勇而遇勇则勇者不足恃也智而遇智则智者不足用也夫唯智勇之不足以定天下是以天下之难锋起而难平盖尝闻之古者英雄之君其遇智勇也以不智不勇而后真智大勇乃可得而见也悲夫世之英雄其处于世亦有幸不幸耶汉高祖唐太宗是以智勇独过天下而得之者也曹公孙刘是以智勇相遇而失之者也以智攻智以勇击勇此譬如两虎相掙齿牙气力无以相胜其势足以相扰而不足以相毙当此之时惜乎无有以汉高祖之术制之者也昔者项籍有百战百胜之威而执诸侯之柄咄嗟叱咤奋其暴怒西向以逆高祖其势飘忽震荡如风雨之至天下之人以为遂无汉矣然高帝以其不智不勇之身横塞其冲徘徊而不得进其顽钝椎鲁足以为笑于天下而卒能摧折项氏而待其死其故何也夫人之勇力用而不已则必有所耗散而其智虑久而无成则亦必有所倦怠而不举彼欲用其所长以制我于一时而我闭门而拒之使之失其所求逡巡求去而不能而项籍固已惫矣今夫曹公孙权昭烈此三人者皆知以其才相取而未知以不才取之也世之言者曰孙不如曹而刘不如孙刘唯其智短而勇不足故有所不若于二人者而不知因其所不足以求胜则亦已惑矣盖昭烈之才近似于高祖而不知所以用之之术昔高祖之所以自用其才者其道有三焉耳先据势胜之地以示天下之形广收信越出奇之将以自辅其所不逮有果锐刚猛之气而不用以深折项籍猖狂之势此三事者三国之君其才皆无有能行之者独有一昭烈近之而未至其中犹有翹然自喜之心欲为椎鲁而不能钝欲为果锐而不能达二者交战于中而未有所定是故所为而不成所欲而不遂弃天下而入巴蜀则非地也用诸葛孔明治国之才而当纷纭征伐之冲则非将也不忍忿忿之心犯其所短而自将以攻人则是其气不足尚也嗟夫方其奔走于二袁之间困于吕布而狼狈于荆州百败而其志不折不可谓无高祖之风矣而终不知所以自用之方夫古之英雄唯汉高帝为不可及也夫

晋论 苏 辙

御天下有道休之以安动之以劳使之安居而能勤逸处而能忧其君子周旋揖让不失其节而能耕田射驭以自致其力平居习为勉强而去其惰傲厉精而日坚劳苦而日强冠冕佩玉

之人而不憚执天下之大劳夫是以天下之事举皆无足为者而天下之匹夫亦无以求胜其上何者天下之乱盖常起于上之所憚而不敢为天下之小人知其上之有所憚而不敢为则有以乘其间而致其上之所难夫上之所难者岂非死伤战鬪之患匹夫之所轻而士大夫之所不忍以其身试之者耶彼以死伤战鬪之患邀我而我不能应则无恠乎天下之志于乱也故夫君子之于天下不见其所畏求使其所畏之不见是故事有所不辞而劳苦有所不憚昔者晋室之败非天下之无君子也其君子皆有好善之心高谈揖让泊然冲虚而无慷慨感激之操大言无当不适于用而畏兵革之事天下之英雄知其所忌而窃乘之是以颠沛陨越而不能以自存且夫刘聰石勒王敦祖约此其奸诈雄武亦一世之豪也譬如山林之人生于草木之间大风烈日之所咻而雪霜饥饉之所劳苦其筋力骨节之所尝试者亦已至矣而使王衍王 之伦谈笑而当其冲此譬如千金之家居于高堂之上食肉饮酒不习寒暑之劳而欲以之捍御山林之勇夫而求其成功此固奸雄之所乐攻而无难者也是以虽有贤人君子之才而无益于世虽有尽忠致力之意而不救于患难此其病起于自处太高而不习天下之辱事故富而不能劳贵而不能治盖古之君子其治天下为其甚劳而不失其高食其甚美而不弃其粝使匹夫小人不知所以用其勇而其上不失为君子至于后世为其甚劳而不知以自复而为秦之强食甚美而无以自实而为晋之败夫甚劳者固非所以为安而甚美者亦非所以自固此其所以防天下之故也哉

防边论 苏 辙

羌塞之民其性譬如禽兽便于射猎而习于驰骋生于斥卤之地长于霜雪之野饮水食肉风雨饥渴之所不能困上下山坡筋力百倍轻死而乐战故常以勇胜中国至于其所以拥护亲戚休养生息畜牛马长子孙安居佚乐而欲保其首领者盖无以异于华人也而中国之士常憚其勇畏避而不敢犯犷裘之民亦以此恐惕中国而夺之利此当今之所谓大患也昔者汉武之世匈奴絶和亲攻当路塞天下震恐其后二十年之间汉兵深入不憚死亡捐命絶漠之野以决胜负而匈奴孕重堕坏人畜疲 不敢言战何者勇士壮马非中国之所无有而穷追远逐虽匈奴之众亦终有所不安也故夫敌国之盛非隣国之所深忧也要在休兵养士而集其勇气使之不憊而已今天下之势中国之民优游缓带不识兵革之劳骄奢怠惰勇气消耗而每歲之赂又以百万计转轮天下甘言厚礼以满其不足之意使天下之士耳熟所闻目习所见以为生民之命寄于其手故俯首柔服莫敢抗拒凡中国勇健豪壮之气索然无复存者矣夫战胜之民勇气百倍败兵之卒没世不复随盖所以战者气也所以不战者气之畜也战而后守者气之余也古之不战者养其气而不伤今之士不战而气已尽矣此天下之所大忧也昔者六国之际秦人出兵于山东小战则杀将大战则割地兵之所至天下震栗然诸侯犹帅其罢散之兵合从以击秦砥砺战士激发其气长平之败赵卒坑死者四十万人廉颇收合余烬北摧栗腹西抗秦兵振刷磨淬不自屈服故其民观其上之所为日进而不挫皆自奋怒以争死敌其后秦人图邯鄲梁王使将军新垣衍如赵欲遂帝秦而鲁仲连慷慨发愤深以为不可盖夫天下之士所为奋不顾身以抗强虎狼之秦者为非其君也而使诸侯而帝之天下尚虽能出身以事非其君哉故鲁仲连非徒惜夫帝秦之虚名而惜夫天下之势有所不可也今尊奉敌国无厌之人交欢纳币以为兄弟之国奉之如至尊莫敢一触其意此适足以坏天下义士之气而长敌人豪横之势耳愚以养兵而自重卓然独立不聽敌人之妄求以为民望

而生吾中国之气如此数十年之间天下摧折之志复壮矣夫敌人之勇非吾之所当畏也

三宗论 苏辙

黄帝尧舜寿皆百年享国皆数十年周公作无逸言商中宗享国七十五年高宗五十九年祖甲三十三年文王受命中身享国五十年自汉以来贤君在位之久皆不及此西汉文帝二十三年景帝十六年昭帝十三年东汉明帝十八年章帝十三年和帝十二年唐太宗二十三年此皆近世之明主然与无逸所谓不知稼穡之艰难不闻小人之劳惟耽乐之从或十年或七八年或五六年或四三年无以大相过也至其享国长从如秦始皇汉武帝梁武帝隋文帝唐宗皆以临御从速循致大乱或以失国或仅能免其身其故何也人君之富其倍于人者千万也膳服之厚声色之靡所以贼其躬者多矣朝夕于其间而无以御之至于夭死者势也幸而寿考用物多而害民从矜己自圣轻蔑臣下至于失国宜矣古之贤君必致于学达性命之本而知道德之贵其视子女玉帛与粪土无异其所以自养乃与山林学道者比是以从于其位而无害也传说之告高宗曰王人求多闻时惟建事学于古训乃有获事不师古以克永世匪说攸闻惟学逊志务时敏厥修乃来允怀于兹道积于厥躬惟敦学半念终始典于学厥德修罔觉监于先王成宪其永无愆呜呼传说其知此矣

汉武帝论 苏辙

天下利害不难知也士大夫心平而气定高不为名所下不为利所怵者类能知之人主生于深宫其闻天下事至鲜矣知其一不達其二见其利不睹其害而好名贪利之臣探其情而逢其恶则利害之实乱矣汉武帝即位三年年未二十闽越举兵围东瓯东瓯告急帝问大尉田蚡蚡曰越人相攻其常事耳又数反覆不足烦中国往救帝使严助难蚡曰时患力不能救德不能覆诚能何故弃之小国以穷困来告急天子不救尚何所愬帝诘蚡议而使助持节发防稽兵救之自是征南越伐朝鲜讨西南夷兵革之祸加于四夷矣后二年匈奴请和亲大行王恢请击之御史大夫韩安国请许其和帝从安国议矣明年马邑豪聂壹因恢言匈奴初亲亲信边可诱以利致之伏兵袭击必破之道也帝使公卿议之安国恢往反议甚苦帝从恢议使聂壹买马邑城以诱单于单于觉之而去兵出无功自是匈奴犯边终武帝无宁岁天下几至大乱此二者田蚡韩安国皆知其非而迫于利口不能自伸武帝志求功名不究利害之实而遽从之及其晚岁祸灾并起外则黔首耗散内则骨肉相残杀虽悔过自咎而事已不救矣然严助交通淮南张汤论杀之王恢以不击匈奴亦坐弃市二人皆罪不至死而不免大戮岂非首祸致罪天之所不赦故耶

汉昭帝论 苏辙

周成王以管蔡之言疑周公及遭风雷之变发金縢之书而后释然知其非也汉昭帝闻燕王之譖霍光惧不敢入帝召光见谓之曰燕王言将军都郎道上称跸又擅调益幕府校尉二事属尔燕王何自知之且将军欲为非不待校尉左右闻者皆伏其明光由是防安而燕王与上官皆败故议者以为昭帝之贤过于成王然成王享国四十余年治致刑措及其将崩命召公

毕公相康王临死生之变其言琅然不乱昭帝享国十三年年甫及冠功未见于天下其不及成王者亦远矣夭寿虽出于天然人事尝参焉故吾以为成王之寿考周公之功也昭帝之短折霍光之过也昔晋平公有蛊疾医和视之曰是谓近女非鬼非食惑以防志良臣将死天命不宥国之大臣受其宠禄而任其大节有菑祸兴而无改焉必受其咎以此讥赵孟受之不辞而霍光何逃焉成王之幼也周公为师召公为保左右前后皆贤也虽以中人之资而起居饮食日与之接逮其壮且老也志气定矣其能安富贵易生死盖无足恠者今昭帝所亲信惟一霍光光虽忠信笃实而不学无术其所与共国事者惟一张安世所与断凡事惟一田延年士之通经术识义理者光不识也其后虽闻从陰不雨之言而贵夏侯胜感蒯瞶之事而贤隲不疑然终亦不任也使昭帝居深宫近嬖幸虽天资明断而无以养之朝夕害之者众矣而安能及远乎人主不幸未尝更事而履大位当得笃学深识之士日与之居示之以邪正晓之以是非观之以治乱使之久而安之知类通達强立而不反然后听其自用而无害此大臣之职也不然小人先之悦之以声色犬马纵之以驰骋田猎侈之以宫室器服志气已乱然后入之以防説变乱是非移易白黑纷然无所不至小足以害其身而大足以乱天下大臣虽欲有言不可及矣语曰君子学道则爱人小人学道则易使也故人必知道而后知爱身知爱身而后知爱人知爱人而后知保天下故吾论三宗享国长久皆学道之力至汉昭帝惜其有过人之明而莫能导之以学故重论之以为此霍光之过也

汉光武论上 苏轍

人主之德在于知人其病在于多才知人而善用之若已有焉虽至于尧舜可也多才而自用虽有贤者无所复施则亦仅自立耳汉高帝谋事不如张良用兵不如韩信治国不如萧何知此三人而用之不疑西破强秦东服项羽曾莫与抗者及天下既平政事一出于何法令讲若画一民安其生天下遂以无事又继之以曹参终之以平勃至文景之际中外晏然凡此皆高帝知人之余功也东汉光武才备文武破梅邑取赵魏鞭笞羣盗筭无遗策计其武功若优于高帝然使当高帝之世与项羽为敌必有不能辨者及既履大位惩王莽篡夺之祸虽置三公而不付以事专任尚书以督文书绳奸诈为贤政事察察下不能欺一时称治然而异已者斥非防者弃专以一身任天下其智之所不见力之所不举者多矣至于明帝任察愈甚故东汉之治寛厚乐易之风远不及西汉贤士大夫立于其朝志不获伸虽号称治安皆其父子才智之所止君子不尚者也

汉光武论下 苏轍

高帝举天下后世之重属之大臣大臣亦尽其心力以报之故吕氏之乱平勃得實力焉诛产禄立文帝若反覆手之易当是时大臣权任之甚盛风流相接至申屠嘉犹召辱邓通议斩晁错而文景不以为悞则高帝之用人其重如此孝武之后此风衰矣大臣用舍仅如仆 武帝之老也将立少主知非大臣不可乃委任霍光霍光之权在诸臣右故能翊昭建宣天下莫敢异议至于宣帝虽明察有余而性本忌克非张安世之谨畏陈万年之顺从鲜有能容者恶杨恽盖寛饶害赵广汉韩延寿悍然无恻怛之意高才之士侧足而履其朝陵迟至于元成朝无重臣养成王氏之祸故莽以斗筭之才济之以欺罔而士无一人敢指其非者光武之兴虽文

武之略足以鼓舞一世而不知用人之长以济其所不足幸而子孙皆贤权在人主故其害不见及和帝幼少窦后擅朝窦宪兄弟姿横杀都乡侯畅于朝事发请击匈奴以自赎及其成功又欲立北单于以树恩固位袁安任隗皆以三公守义力争而不能胜幸而宪以逆谋败盖光武不任大臣之积其乃见于此其后汉日以衰及其诛阎显立顺帝功出于宦官黜清河王杀李固事成于外戚大臣皆无所与及其末流梁冀之害重天下不能容复假宦官以去之宦官之害极天下不能堪至召外兵以除之外兵既入而东汉之祚尽矣盖光武不任大臣之祸势极于此夫人君不能皆贤君有不能而属之大臣朝廷之正也事出于正则其成多其败少歷观古今大臣任事而祸至于不测者必有故也今畏忌大臣而使它人得乘其隙不在外戚必在宦官外戚宦官更相屠防至以外兵继之呜呼殆哉

争论 潘兴嗣

匹夫之贱犹立子以争其恶立友以议其过况万乘之贵呼吸而霜露变指顾而荣辱移朝不争则暮有被其害暮不争则朝亦然至有顷刻而不及者孔子曰天子有争臣七人虽无道不失其天下又曰商有三仁焉比干谏而死其防远或岂无谏与讽坎譬之疾耳有缓补逸养而后定有攻治而后胜有针砭而后起者盖时有缓急势有盈虚先后之理不可以一途御也讽者依违而不切诗所谓主文而谏此缓补逸养之道也谏者直指其事争者婴其鳞矣此攻治之不效而至于针砭也若尧咨而舜俞禹拜而益賛可以无事于谏争犹曰予违汝弼汝无面从君臣相与戒飭兢业如此后世之君奚恤而不用哉昔者汉高帝谓周昌曰我何如主昌曰陛下桀纣之主也高帝容之决非桀纣明矣如使桀纣之君虽无道犹用争臣亦不失天下矣

原谏 潘兴嗣

舜命龙曰朕望防説殄行震惊朕师汝作纳言夙夜出纳朕命惟允于臯陶谟则曰能哲而惠何忧乎驩兜何畏乎巧言令色孔壬顔渊问为邦孔子曰远佞人舜固聪明睿智君臣之间吁谟戒飭忧此而已顔渊亚圣亦云远佞然则圣哲之虑远矣谏之不行也其原起于近习始于纖防成于浸润终至于不可御人君者喜则有赏怒则有诛不可不察也盖未尝滥诛矣诛一小臣则大臣及之未尝滥赏矣赏一佞人则大佞及之不窒其源虽欲救之将若之何予故曰谏之不行其源盖起于近习不可不虑也

通论 潘兴嗣

昔者井法大坏而天下之民病矣然而智者一出则藏兵于民藏食于兵以全制胜坐而收功则谓之屯田者是也汉尝以数万之众临氐 氐 固小矣而议者谓费而胜之不若以全制也于是以万人留田果无一矢一镞之费而虏平矣曹操出于扰攘之际忧不先于天下而忧食不出于兵也于是大兴屯田以示天下之形势莫防于 事莫急于操时顾必先此者盖不苟一切之便而以深久之利为虑也昔者兵赋之法大坏而天下之武备虚矣然而智者一出则兵有府府有帅帅有统唐尝以六十万之众田于近辅之郊当四方有事时长戈利防奋

然而直往及其无事则偃兵以就农故天下之言武备者必先府兵今以数十万之众宿于燕秦晋魏之地半天下之赋长毂巨轴逆险诉波而上不足以给奉养重商贾之利出内帑之金不足以佐费用无事之时顾且如此一有事则重以四方之兵倍数而益之岂推费广而坐饲之骄不足以临敌也亦尝以二十万之众弃于好水之上只轮奇马无还者此养之无制备之不素故也夫燕秦晋魏之郊地非不广民非不悍勇田非尽辟也一旦索悍勇之民辟地而殖之胡为而不可耶择天下之精兵置之近辅之郊拟府而为之制亦胡为而不可耶不及十年粟必盈于塞下而黥墨之徒可坐而铄也晁错削七国而七国反主父偃建分封之法而诸侯不自知其弱然则屯田府兵之制行而天下之骄兵亦不自知其削矣何惮而不为也边粟已实屯兵已强中州之赋益宽则北敌不敢爱其赆 人不敢慢其礼此以全制胜也昔之骄今也悍勇昔之不足今也有余不幸而有警内府出节外府出兵拥钺而下临燕而燕动临秦而秦窘此所谓庙胜也荆楚蜀越四分五裂之地天下用武之处也亦不可以不思及其有事而欲以巧胜之不亦拙且缓乎

宋文鉴卷九十九

卷一百

钦定四库全书

宋文鉴卷一百

宋吕祖谦编

论

隋论 李清臣

治天下者以王道不可为之以吏治吏治可以苟天下之安而不可久也纯以王道而治者三代是也吏治与王道杂然而用者汉唐是也纯用吏治者隋文是也自禹至于桀自汤至于纣自武王至于赧三代之长各数十世安而不变者几二千年自高祖至于平帝自光武至于献帝自高祖太宗至于僖昭兹二姓者或四百年或三百年不及于三代之长而有过于歷世之祚若隋文帝之有天下于时亦可谓之治平而寡事矣然才三世二十九年而亡其故何也吏治与王道之效不同也故三代用王道而长汉唐杂之以吏治而不及于三代隋文专以吏治而不及于汉唐是非王道与吏治薄厚之效邪隋文之九年灭陈而天下始一奋励于为政每一坐朝或至日昃五品以上引之论事宿卫之人传飧而食至于兵革不用天下无游食之人戸口歲增过于两汉其富庶而康乐如此常人之谓太平而识者皆知其不能久也何者无礼义以维持其政无忠信以固结其臣教化不足以 其民纪纲不足以防其后一切以辩数勤察为能处三王之位而卑卑为任智数覈文法此特吏才之尤者耳非王者为也故王隆谓其终以不学为累而房乔于清平之时而独知其将亡彼或用王道而常为百世虑国祚之永人可得而近测之哉尝观于三代其为治之防皆本于仁义礼乐先教化而后刑名厚道德而薄功赏其始虽若迂阔而其成以至于兵寝刑措暴炎百姓之耳目浸渍涵揉百姓之骨体其势播大固如置方于平土之上天下之形可以渐乱而不可以亟坏也末世中主德既不及于古才亦不至于道所用者皆俗人而所尚者皆细法争于功用勇于系断谓簿书刀笔之间可以为治语之以王道则倾背而切笑强者为之及其盛犹可以自守一有势罅则怨心纷然内外皆为之扰动奸豪乘其敝而起其挠天下如驱羣羊而荡王业如振欹器耳是故民众而益乱地大而益危呜呼彼安知三代有长久难动之法乎后之王者鉴于三代两汉隋唐之事不恃吏治之安而留意于王道其可以长有天下之民矣

石庆论 秦观

臣闻汉武帝既招英俊程其器能用之如不及内修法度外攘胡粤封防山寨决河朝廷多事丞相李蔡严翟赵周公孙贺刘屈氂之属皆以罪伏诛其免者平津侯公孙 牧立侯石庆而已平津以贤良为举首用经术取汉桓下论有余习文法吏事其免故宜牧立鄙人耳为相已

非其分又以全终何也盖庆之终于相位非其才智之足以自免也事势之流相激使然而已矣何则夫君之与臣犹陰之与阳也陰胜而僭阳则发生之道缺阳胜而偏陰则刻制之功亏僭实生偏偏亦生僭两者无有是谓大和万物以生变化以成方武帝即位之始富于春秋武安侯田蚡以肺腑为丞相权移人主上滋不平特以太后之故隐忍而不发当此之时臣彊君弱陰胜而僭阳武安侯既死上惩其事尽威柄于掌握之中大臣取充位而已稍不如意则痛法以绳之自丞相以下皆惶恐救过而不暇当此之时君彊臣弱阳胜而偏陰夫豪杰之士类多自重莫肯少杀其锋鄙人则惟恐失之无所不至也当君彊臣弱阳胜偏陰之时虽有豪杰安得而用虽用之安得而终然则用之而终者惟鄙人而后可也庆为相时九卿更进用事不关决于庆庆醇谨而已在位九岁无能有所正言尝欲治上近臣反受其过上书乞骸骨诏报反室自以为得计既而不知所为复起视事呜呼此其所以见容于武帝者欤夫庆终于相位是田蚡之所致也故曰事势之流相激使然而已矣然则平津之免也之才术虽不与庆同日而语至于朝奏暮议开其端使人主自择不肯面折廷争公卿约议至上前皆背其约以顺上防如此之类则与庆相去为几何耶与庆为人不同其所以获免者一也盖是时非特丞相也如东方朔枚臯司马相如严助吾丘寿王朱买臣主父偃之属号为左右亲幸之臣而亦多以罪诛唯相如称疾避事朔臯不根持论以此获免由是观之武帝之廷臣鄙人者多矣岂特庆也哉故淮南王谋反惟憚汲黯好直諫守节死义至說公孙等如发防耳呜呼如黯者可謂豪杰之士也

汉文帝 曾肇

予尝谓治天下本于躬化而观汉文帝躬行节俭以德化民宜其有以振起衰俗而贾谊以谓残贼公行莫之禁止其說以背本趋末者为天下大残淫侈之俗为天下之大贼则当时风俗可谓敝矣岂所谓躬化者果无益于治哉盖文帝虽有仁心仁闻而不修先王之政故也先王有不忍人之心则有不忍人之政而其政必本于理财理财之法其定民之大方有四而任民之职有九士农工商以辨其名九谷草木山泽鸟兽材贿丝泉聚斂转移以辨其职又为之屋粟里布夫家之征以待其不勤是故天下无迁徙之业无游惰之民其于生财可谓众矣至于爱养万物必以其道故罟罗网罟斧斤弓矢皆以时入而覆巢麝卵杀胎伐夭皆为之禁取之又有其时也于是制礼以节其用天子都千里之几诸侯各专百里之国卿士大夫至于庶人莫不有田而视其位之贵贱称其入之厚薄而为之法制度数以待其冠婚賓客死防祭祀之用者隆杀多寡各适其宜为上者谨名分以示天下而人人安于力分之内无觊觎于其外是以淫僻放侈之心不生而贫富均一海内充实无不足之患然后示之以廉耻兴之以德义故民从之也轻方此之时游惰者无所容而虽有僭侈之心亦安所施于外哉教化之所以成残贼之所以熄盖出于是也自秦灭先王之籍而汉因之务为一切之制由天子至于庶人无复有度量分界之限而人人去本趋末争于僭侈高祖尝禁贾人不得曳丝乘车其令卒于不行至文帝之时商贾富厚力过吏势而末技游食害农者蕃庶人墙屋之饰仆妾之衣皆宗庙之奉天子之服则其俗之不善可知矣而文帝不知修先王之政以救其敝方其开籍田以劝耕者衣弋绋而斥文绣以示敦朴为天下先其意美矣然法度之具不行而欲以区区之一身率四海之众岂非难哉孟子曰徒善不足以为政非虚言也虽然以彼之德成之以先王之政则庶几三代之贤主哉

讳言 张耒

高宗自诛长孙无忌放褚遂良等后天下以言为讳者二十余年其后一御史尝抗论一不急事时谓凤鸣朝阳方其以言为讳也武氏不出房闼而取其国天子自殿陛之下门关之外颠倒错乱无由知之而其左右忠臣良士岂无良策善计亦不敢告故以牝夺雄坐房奥夺庙社犯天下之至不顺为天下之难成而有功此譬如盗入主人之家执其主涂其耳目而唯其所为何求而不得哉张子曰天将乱人之国则必使讳人之言人之爱其身其寝食起居有少异焉而人告之则必信之又从而治之夫如是则可以终身而无疾令其寝食起居类非平人之状而其亲戚朋友旁视而不敢告一日疾作而死矣太宗以兰陵公主园赏言者其直百万非好名也事当然也

敢言 张耒

汉王鳳以外戚辅政杀王章以杜天下能言之口而梅福以南昌尉上书显攻之而不忌唐文宗时宦人握禁兵制天子枢密使权过宰相谁敢少忤其意而刘蕡对策肆言其恶斥其篡弑废立之罪而明皇时李林甫为相几二十年固宠市权愚瞽其君内助杨氏之势外成禄山之乱补阙杜璡尝再上书论事斥为下邳令林甫以语动其余曰立伏马终日无声饫三品刍豆一鸣则黜之矣后虽欲不鸣得乎由是谏争路绝矣夫林甫之戚未惨于汉庭之外戚唐文宗之官官也而梅福刘蕡敢犯之而林甫徒以区区贬斥而天下之士震怖如畏虎狼此其故何也王鳳得政之初帝失德未深犹可与论道理商成败而汉之公卿犹有贤智忠义之士也文宗大和二年名臣在朝者如裴度李绛韦处厚之徒犹数人公卿侍从之间差可告语其势足以持典刑也故此二子者非妄发恣行而心实有所持也若林甫之时人主淫昏于上视天下之治乱如越人视秦人之肥瘠不可与言矣而朝廷之士有一介之善略能别白黑者则林甫斥逐之而无余矣国中空无人上下内外皆从君于昏者也而天下之士虽欲有言何恃以救其祸乎此人之所甚畏也呜呼国无善人国非其国也可不惧哉明皇尝论林甫曰此子妬贤嫉能无与为此则其时人物可知也

李郭论 张耒

雄杰好乱之士可伏以天下之大义不可掩以匹夫之小数何也彼其心甘为理屈不肯负人以其智幸而掩之得志其后必大乱凶悖放恣而复其志乃已此不可不慎也汉高祖苟一时之便伪游云梦而执韩信虽能执信而信之反心自此生矣当此时高才智士亦有轻其君之心故英布贯高之乱继踵而起者此非伏英雄之道也李光弼提孤军与安史健虏百鬪百胜其治军行兵风采出郭子仪之右而当时诸将皆望风伏子仪如敬君父而光弼之在彭城诸将已不为使子仪能使吐蕃谓父而史思明乃上书请诛光弼大抵光弼之实不及子仪之名子仪安坐而有余光弼驰骋而不足余尝思其故读史思明传见光弼使乌承恩潜杀史思明事而后知李郭之优劣盖子仪之为人至诚不欺主于忠信其胸中洞然大人也故静则人安其德动则人伏其义光弼用乌承恩使袭杀史思明此虽狡夫猾虏之常态意其人虽雄悍驍勇而中有所不可保信者市井之智盗贼之谋有时而用也不然何以召史思明之侮而田承

嗣之膝独为尚父屈欤此于伏人之道小矣呜呼成事以材不若以德服人以智不若以理惟德与理始钝终利以之治大以之行远未之有侮也

邴吉 张耒

邴丞相为人至深厚也余独有恨焉虜入云中诏问丞相御史以虜所入郡吏御史不能对得谴责而丞相能具知见谓忧边思职夫吉之能知馭吏之力也夫平日不知从事于其所当急而一时际防于他人之力亦可以为徼幸谓之真忧边思职也可乎因徼幸以得誉遂从而冒之坐视人之得谴责而不分谤则亦少欺矣袭遂因王生一言天子以为长者遂不敢以为出已曰此乃臣议曹教臣夫遂之能归功于君其善徼而不冒人之善其德厚矣方天子让御史吉如曰臣与御史等耳臣之仆有先白臣者臣是以知之此其为能岂独忧边思职而已哉世人有未尝射挟弓注矢一发而中不知者曰天下之善射者也其人不让则知之者笑之矣邴吉脱宣帝于死能絶口不道独贪一馭吏之功殆必不然传曰思则得之不思则不得也吉未之思欤夫冒徼幸之福而安处之此庸人之所常行独为邴丞相恨也

秦论 何去非

兵有攻有守善为兵者必知夫攻守之所宜故以攻则克以守则固当攻而守当守而攻均败之道也方天下交臂相与而事秦之彊也秦人出甲以攻诸侯盖将取之也图攻以取人之国者所谓兼敌之师也及天下攘袂相率而叛秦之乱也秦人合卒以拒诸侯盖将却之也图拒以却人之兵者所谓救败之师也兼敌之师利于转战救败之师利于固守兵之常势也秦人据崤函之阻以临山东自繆公以来常雄诸侯卒至于并天下而王之岂其君世贤耶亦以得乎形便之居故也二世之乱天下相与起而亡秦不三歲而为墟以二世之不道顾秦亦何足以亡然而使其知捐背叛之山东严兵拒关为自救之计虽以无道行之而山西千里之区犹可歲月保也不知虑此乃空国之师以属章邯李由之徒越关千里以搏防而为乡日堂堂兼敌之师亦已悖矣方陈胜之首事而天下豪杰争西向而诛秦也盖振臂一呼而带甲者百万举麾一号而下城者数十又类皆山林崛起之匹夫其存亡胜负之机取决于一战其锋至锐也而章邯之徒不知固守其所以老其师乃提孤军弃天险渡潭逾洛左驰右骛以婴四合之锋卒至于败而沛公之众扬防而入空关虽二世之乱足以覆宗天下之势足以夷秦而其亡遂至于如此之亟者用兵之罪也夫秦役其民以从事于天下之日久矣而其民被二世之毒未深其勇于公闢乐于卫上之风声气俗犹在也而章邯之为兵也以攻则不足以守则有余周文常率百万之师传于戏下矣章邯三击而三走之卒杀周文使其不遂纵以搏敌而坐关固守为救败之师关东之土虽已分裂而全秦未溃也或曰七国之反汉也议者归罪于呉楚以为不知杜成臯之口而汉将一日过成臯者数十辈遂至于败亡今豪杰之叛秦而罪二世之越关搏战何也嗟夫务论兵者不论其逆顺之情与夫利害之势则为兵亦踈矣夫秦有可亡之形而天下之众亦锐于亡秦是以豪杰之起者因民志也关东非为秦役矣汉无可叛之衅而天下之民无至于负汉则七国之起非民志矣天下皆为汉役者也以不为秦役之关东则二世安得即其地而疾战其民以方为汉役之天下则汉安得不趋其所而疾诛其君此战守之所以异术也昔者贾谊司马迁皆谓使子婴有庸主之才仅得中佐则山西之地可全而

有卒取失言之讥于后世彼二子者固非愚于事机者也亦惜夫秦有可全之势耳虽然彼徒知秦有可全之势而不知至于子婴而秦之事去矣虽有太公之佐其如秦何哉

西晋论 何去非

天下之祸不患其有可观之迹而发于近而患其无可窥之形而发于迟有迹之可覩虽甚愚怯必加所警备而发于近者其毒尝浅无形之可窥虽甚智勇亦忽于防闲而发于迟者其毒常深昔者五胡之祸晋室其起者非一朝一夕也探其基而积之乃在于数百岁之淹缓国更三姓而歷君数十平居常日不见其有可窥之形是以一发而莫之能支夫非无形也盖为祸之形常隐于福为福之形常隐于祸人见其为今日之祸福而而已不就其所隐而逆窥之是以于其未发皆莫覩其昭然之形此其为祸至于不可胜救也先王之制夷狄于要荒也甚恶其猾夏而乱华未尝不欲驱攘而摈之周公朝诸侯于明堂夷蛮戎狄之君立于四门之外使无与乎备物盛礼之观后世之君幸其衰敝而悦其向服也因内徙而亲之其事肇于汉之孝宣渐于世祖而盛于魏武或空其国而罢徼塞之警或借其兵而为防敌之扞夫既去其侮而又役其力可谓世主之大欲国家之盛福矣不知积之既久而大祸之所伏一旦汹然而发若决坊水莫之能遏晋为不幸而适当之以其平居常日不观其昭然之形故也昔者孝宣承武帝攘击匈奴之威防五单于内争始纳呼韩邪使之依阻塞下稍通五原而来其朝至于孝元而呼韩邪乃愿保塞而请罢边备頼侯应之策以为自孝武攘之漠北夺其陰山匈奴失所蔽隐每过陰山未尝不哭其防亡也今罢备塞则示之大利元帝虽报谢焉自是胡人亦浸而南顾汉亦甚悦其来而不之却也世祖因匈奴日逐之至遂建南廷以安纳之稍内居之西河美稷而其诸部因遂屯守北地朔方五原代郡云中定襄鴈门之七郡而河西之地鞠为虏区加徙叛羌错置二辅魏武复大徙武都之氐以实关畿用御蜀防而匈奴五郡皆居汾晋而近在肘腋矣于晋之兴大率中原半为夷居元海匈奴也而居晋阳石勒羯人也而居上党姚氏羌也而居扶风苻氏氐也而居临渭慕容鲜卑也而居昌黎种族日蕃其居处饮食皆趋华矣而其桀暴贪悍乐鬪喜乱之志态则亦无时而变也是以元海一倡而并雍之胡乘时四起自长淮之北无复晋土而为战国者几二百年所谓发于迟而为毒深也虽然彼之内徙而聽役也亦迫于制服之威而其情未尝不怀土而思返固甚怨夫中国羈拘而贱侮之也是以刘猛发愤而反于晋事虽不济而刘氏诸部未尝一日而忘之也自魏而上非无明智之主足以察究防渐为子孙万世之虑然皆安其内附或乐用其力唯恐不能鳩令而牧役之虽有失为祸之形皆不为之深思遠虑就其所伏而消灭之由晋而下自武帝之平一呉防徧抚天下固无借乎夷狄之助矣苟于此时有能探其所伏之祸而逆制焉因其怀返之情加之恩意以 其行为之假建名号而廩资之使各以种族而还之旧土彼乐引轻去而惟恐其后也然后严斥障塞使有华夷内外之辨后有警则无至发于肘腋之间而被不可胜言之祸矣虽然自非明智果断之主为子孙后世之虑则不能决于有为以救其未发之深祸也彼晋武自平一呉防方以侈欲形于天下其能及此乎虽郭钦抗防江统著论其言反复切至皆恬然不为省方抱虎而熟寐尔嗟乎为天下者无恃其为平日之福而忽其所隐之祸也

卷一百一

钦定四库全书

宋文鉴卷一百一

宋吕祖谦编

论

明皇论 崔鷟

穆王戒太仆曰仆臣正厥后克正仆臣谀厥后自圣仲虺告成汤曰自得师者王谓人莫已若者亡夫实凡也而自以为圣则偃然以天下为莫已若以天下为莫已若则有罪不闻有过不改祸乱之形成而卒以不悟是亡之道也以唐考之克有天下者十有八王而不以谀臣之故别加称号者高祖太宗睿宗文宗四君而已其余皆立虚名而开元天宝之间羣臣至六上尊号嗟乎谀亦甚矣而明皇受而不辞盖将自以为圣者欤其播越流离至于亡国非不幸也夫加以天地道德圣神文武之号兼覆载之大美极今古之徽称彼其臣遂以为诚尔耶直以为吾君好谀喜佞故逢之也以为诚尔则天不以号然后推其高地不以名然后推其厚三皇无有也五帝无有也自古贤君懿主皆无有而吾祖宗亦无有也彼其后世中君幽主独有之是直以好谀喜佞待吾君而以谀佞逢之人君之贼也圣矣夫光武之为君也诏天下上书不得言圣明矣哉显宗之为君也曰先帝诏书禁人言圣自令有过称虚誉尚书宜抑而不省示不为諂子嗤也呜乎奸人之情得矣其成建武永平之盛有以矣夫

杨嗣复论 崔鷟

气类所合物莫能间君臣相与必有所谓合者君子不之察欲彊以口舌折奸人之锋势必不振此小人所以常胜君子所以常不胜一也人情逆之则怒顺之则喜毁之则怒誉之则喜小人性便谀佞志在诡随而君子任道直前有犯无隐此小人所以常胜君子所以常不胜二也君子正直是与不妄說人而小人窃爵禄以植朋党竭智力以市内援此小人所以常胜君子所以常不胜三也君子难进而易退小人易进而难退易进则常在上以制人难进则常在下而为人所制此小人所以常胜君子所以常不胜四也君子柔亦不茹刚亦不吐不虐幼贱不畏高明而小人之于人失势则防伏以事之得势则虎步以凌之此小人所以常胜君子所以常不胜五也君子穷则以命自安而不尤人達则以怨存心而不害物小人在下则不安而怀毒以伺上居上则快意而肆虐以害人此小人所以常胜而君子所以常不胜六也君子一有不安于其心则畏君畏亲畏天畏人而小人欲济其奸则欺君欺亲欺天欺人无不可者此小人所以常胜君子所以常不胜七也君子励廉节崇名誉小人苟获其欲则天下贱之而不羞万世非之而不辱此小人所以常胜君子所以常不胜八也君子所言欲讷于行欲敏有过则

改见义则服而小人矜利口以服人喜奸言而文过此小人所以常胜君子所以常不胜九也天下善人少不善人多故君子为国求人难于选拔而凶邪一啸则千百为羣此小人之所以常胜君子所以常不胜十也君子不念旧恶以德报怨而小人忘恩背义至以怨报德此小人所以常胜君子所以常不胜十一也君子有若无实若虚有功不矜有善不伐而小人无而为有虚而为盈露巧而扬能矜功而卖善以惑时君以冀徼幸此小人所以常胜君子所以常不胜十二也君子小人之不敌亦明矣此郑覃陈夷行所以罢黜李德裕所以谪死穷荒逢吉宗闵杨嗣复辈所以卒乎翔祥而得计岂足怪哉

察言论 唐 庚

古之人臣抵掌缓颊説人主以用兵者其言未尝不引义慷慨豪健俊伟使聴者踊跃激发奋然而从之至考论其心则有为国计者有为身谋者是不可以不察也今夫战则除害于时不战则遗患于后此有必胜之势彼有必败之道思虑深熟利害之形了然于胸中知其决不误国而后为之若此者为国计非身谋也张华裴度是已天下既平谋臣宿将以侯就第杜门却扫无所用其奇则瞠目扼腕争为用兵之説庶几有以骋其智勇而舒其意气若此者为身谋非国计也臧宫马武是已国家无事贪财嗜利之臣无所侥幸则必鼓倡兵端以求其所欲兵革一动则金钱货币玉帛子女何求而不得若此者为身谋非国计也陈汤甘延寿是已官崇禄厚无所羡慕惴惴然唯恐一日失势而不得保其所有则必建开边之议以中人主之欲以从其权若此者为身谋非国计也杨国忠是已前侯故将失职之臣负罪忧畏思有以撼动其君则争议边功以希复进若此者为身谋非国计也窦宪是已古之人臣逆节已萌而功效未着人心未服则未尝不因战伐之功以收天下之望若此者为身谋非国计也桓温刘裕是已嗟乎秦汉以来説人主以用兵者多矣或胜或不胜要之为国计者至少为身谋者如此其多途也可不鉴哉可不戒哉

悯俗论 唐 庚

自古诸侯风俗小大曷尝不与其国相称齐地负海膏壤二千里则其俗阔達寬缓而多智全晋未分时在春秋世最为彊国则其俗用意深遠有古帝王之遗风邹鲁居洙泗之间迫于齐楚国小而地狭则其俗亦复齷齪而谨畏今天下大矣尧舜三代之地盖不至于此民生其问耳之所闻目之所睹体之所安者壮矣而风俗之大不足以称之有是理否风俗非一事要以人材为本今士大夫達时变识事情警敏有余矣至于学治道通大体气力度量足以支久而任重者未可多得是岂无有也有则不容于时今之建言也类皆薄物细故非天下所以治乱安危而士之所言亦不过趣一切办治而已非能有益于宗庙社稷也学术小故无大论议力量狭故无大功名以为上世悉然则前此风俗尝广矣当是之时唯恐其防尔形势非有不同年表日歴非甚相遠而更病其隘是必有説矣吾闻江海之水必有吞舟之鱼通邑大都必有千金之家以四方万里之国而非得恢廓宏遠之风以充之是犹衣九尺之衣束十围之带高视阔步而血气不逾中人也可乎建武永平之治未必优于西京而风俗不及者正其小也传曰不知其形视其影也今百工之所造商贾之所鬻士女之所服者日益狭陋而一时人物大率悍而短小此非其影耶古之化俗恶者可使为善邪者可使为正今俗非有他也独患小尔

顾不可使知大乎

义

公食大夫义 刘敞

食礼公养宾国养贤一也亲之故爱之爱之故养之养之故食之食而弗爱犹豢之也爱而弗敬犹畜之也飧礼敬之至也食礼爱之至也飧为爱弗胜其敬食为敬弗胜其爱文质之辨也公使大夫戒必以其爵恭也已轻则卑之已重则是以其贵临之也賓三辞聽命言是礼之贵弗敢当也弗敢当故难进也公迎賓于大门内非不能至于外也所以待人君之礼也臣之意欲尊其君子之意欲尊其父故迎賓于大门内所以顺其为尊君之意也三揖至于阶三让而升堂充其意谕其诚也于庙用祭器诚之尽也君子于所尊敬不敢狎不敢狎故神明之故忠臣嘉賓乐尽其心也大夫立于东夹南西面北上士立于门东北面西上小臣东堂下南面西上宰东夹北西面北上内官之士在宰东北面南上百官有司備以乐养贤也设筵加席几致安厚之仪也公设酱然后宰夫荐豆俎醢士设俎公设大羹然后宰夫设鉶启簋言以身亲之也賓徧祭公设梁宰夫膳稻士膳庶羞为殷勤也賓三饭饭梁以涪酱比君之厚已也賓必亲彻有报之道也庭賓乘皮侑以束帛虽备物犹欲其加厚焉也公拜送终之以敬也有司卷三牲之俎归于賓館不敢防其余也上大夫八豆八簋六鉶九俎庶羞二十其余衰是见德之杀也君子之言曰爱人者使人爱之者也敬人者使人敬之者也亲人者使人亲之者也自卑者使人尊之者也是故公养賓国养贤其义一也未有爱之敬之亲之尊之而其位不安者也未有不爱不敬不亲不尊而能长有国者也将由乎好德之君则将怡焉唯恐其不足于礼将由乎骄慢之君则将曰是食于我而已矣故礼君子所不足小人所防也孔子食于少施氏将祭主人辞曰不足祭也将殯主人辞曰不足殯也孔子退曰吾食而饱少施氏有礼哉故君子难亲也将亲之舍礼何以哉

士相见义 刘敞

自天子至于庶人皆有摯摯者致也所以致其志也天子之摯鬯诸侯玉卿羔大夫鴈士雉鬯也者言德之遠闻也玉也者言一度不易也羔也者言柔而有礼也鴈也者言进退之时也雉也者言死其节也故天子以遠德为志诸侯以一度为志卿以有礼为志大夫以进退为志士以死节为志明乎志之义而天下治矣故执斯摯也者执斯志者也君之摯以事神臣之摯以養人惟君受养也非其君则辞摯不敢当养也古者非其君不仕非其师不学非其人不友非其大夫不见士相见之礼必依于介绍以言其不苟合者也必依于摯以言其以道亲也苟而合唯小人而不耻者能之君子可见也不可屈也可亲也不可狎也可遠也不可踈也賓至门主人三辞见賓称摯主人三辞摯所以致尊严也大夫以礼相接士以礼相谕庶人以礼相同然而争夺兴于末者未之有也人苟为悦而相亲若者未必争苟为简而相亲若者未必怨是故士相见之礼者人道之大也所以使人重其身而毋迹于辱也所以使人审其交而无迹于祸也唯仕于君者召而往未仕而见于君者冠而奠摯在邦曰市井之臣在野曰草茅之臣君虽召不往也是故虽有南面之贵千乘之富士之所以结者礼义而已矣利不足称焉刑罚行

于国所诛者好利之人也未有好利而其俗不乱者也无介而相见君子以为諛故诸侯大国九介次国七介小国五介

致仕义 刘敞

自顷有司屡言士大夫过七十而不致仕请引籍校年而却之天子弗忍也以诏戒告之而已予谓致仕之义君非使之臣自行也宜乎天子弗忍督迫之而以诏书戒告也然而天下之老臣犹自若也甚矣夫其非天子之意也故作致仕义致仕之义古者大夫七十而致仕君非使之也臣自行也臣虽行之君曰是犹足以佐国家社稷也留之不可失也于是乎有几杖之赐安车之锡所以致留之也君留之臣曰吾不可贪于人之荣不可囿于人之朝不可塞于人之路再拜稽首反其室君不彊焉义也毋夺其爵毋除其禄毋去其菜邑终其身而已矣此古者致仕之义也此之谓上下有礼故古者大臣让小臣廉庶人法百姓不竞由此道也是以古之为臣者不四十不禄不五十不爵不七十不致仕四十而禄为不惑也五十而爵为知命也七十而致仕则以养衰老也不惑故可与谋大计矣知命故可以受大宠矣养衰老故可以全节俭教百姓矣故古之仕者为道也非为食也为君也非为己也为国也非为家也是以时进则进时止则止也是以进不贪其位止不慕其权也凡致仕之义君曰畜犬马不可尽其力而况士大夫乎是虽诚贤也虽诚智也吾不可尽其力也此恩之至也臣曰为人臣者不顾力虽然吾力不足矣不可以当社稷之役而防干戈之任矣不可以劳夙夜之虑而苟旦暮之利矣全而归焉亦可已矣此义之至也故君以恩御臣臣以义事君贪以是息而让以是作今之人则不然仕非为道也而为食也非为君也而为已也非为国也而为家也是以进不知止而困不知耻也是以当老者上虽屡督教之而犹莫从也有司虽痛诋发之犹莫顾也此无他廉让之节不素厉而赏罚之政混也然则奈何曰必引籍校年而命之退则薄于恩而轂于义必毋引籍校年而待其退疾贪位而害民蠹国均之二者莫若察有功者而必赏之无问其齿焉察无功者而必废之无问其齿焉彼知赏不出于有功废不遗于无功也则震而自谋矣震而自谋则贤不肖去与就决矣如是亦焉用引籍校年而命之退以损吾义哉今夫无功与有功者皆杂然莫辨也彼所得偷容于其间也故夫偷容之人而欲其畏义由礼以自洁于防墨之外是难能也圣王之治也非礼义所诱则毆之以法毆之以法亦不废其礼义之指故此法之毆也呜呼为致仕而卒以法毆也不已薄乎其亦出于不得已为之者乎然则又何憚而不为哉

卷一百二

钦定四库全书

宋文鉴卷一百二

宋吕祖谦编

策

内帑田况

王者官天下家六合风化普暨孰非王土经产杂出悉为邦赋故守之以至德推之以大公调度所共皆有蓺极国计之外不闻私积周礼内府受九贡以待邦之大用外府供百物以待邦之小用以此故有内外之异非天子之私藏也若或任聚敛之臣规蕴蓄之厚虽恭俭之主嗇用而致然于德音无所益也况继統之君席有其富或肆侈靡以遗患乎唐明皇践祚之初锐意于理躬履俭德述宣醴化后之言治者比开元如贞观逮乎末年乃恃泰宁内纵奢乐权臣怙宠巧说媚上以谓赋税所取则归之有司以济用度进献所入当纳于天子以奉宴私明皇悦之遂为琼林大盈之库王鉷每歲进钱百亿皆云不出租庸侵牟黎元厚饵寇盗厥后韦臯李兼杜亚刘贇之徒竞为贡奉曲祈恩宠至于裴肃穷贾鬻之利以迁廉察严绶倾军府之资以拜刑曹末俗流风遂而莫御陆贄尝为德宗备陈其失可谓切至端严之论也国家开疆穷朔南建号侔周汉舟车所达上给中都而计利之司稽求繁广研及圭撮歲求倍蓰加以鸣社庆辰升禋大祀册礼昭縟容典交修九州之人无不咸献其力四海之内各以其职来祭裒于公赋输之内帑虽异乎唐室方贡之物然亦非邦计之美余也往歲军湏不充计臣致请出内钱币谓之假贷职掌之者旋复追索经远之士咸以为非且王者之于货财岂有内外国家之有天下岂有公私使外足而内不足君孰与不足私足而公不足君孰与足昔汉文之享御也施利泽省繇费民有余力国有滯财孝武得以因其资而骋嗜奔欲翫兵黷武用既殫费势不可已于是桑羊孔仅之徒專务功而 酤筭缙坐市贩物盐铁 趾株送补郎之法流 于千古矣向非高祖文帝之德洽着于前昭帝霍光之勤休息于后则生民虚耗未易集也 帝之世多蓄私藏中上方敛诸郡之敛诸郡之寶中御府积天下之繒民困调繁目为 行之费汉家业衰于此矣汉室尚然矧陈隋之末世乎是府库之积不为私也章矣今纵未能尽出所积以付道司亦当眎丰凶之年防疲羸之俗去出纳之吝通内外之财俟乎下民寬饶大计盈给然后内于别藏敛其余訾亦不为过也抑又圣人大寶曰位见于易系天子不私求财存乎书法盖寶乎位则他物非足寶私乎财则何不为私以是而言所本尤大若天心独舍近谋远则无穷之庆及于万嗣矣

叙燕尹洙

战国世燕最弱二汉叛臣持燕控塞蔑能自固以公孙伯珪之彊卒制于袁氏独慕容乘石虎乱乃并赵虽胜败异术大防论其彊弱燕不能加赵赵魏一则燕固不敌唐三盗连衡百余年敌未尝越燕侵赵魏是燕独能支敌也自燕覆于敌敌日炽大显德世虽复三关尚未尽燕南地国初敌众并合势益张然止命偏师备御师伐蜀伐吴泰然不以两河为顾是赵魏足以制敌明矣并寇既平悉天下锐専力于燕不能攘尺寸地顷尝以百万众驻赵魏讫敌退莫敢抗世多咎其不战然我众负城有内顾心战不必胜不胜则事亟矣故不战未尝咎也原其 在兵不分设兵为三壁于争地掎角以疑其兵顿坚城之下乘间夹击无不胜矣盖兵不分有六使敌畜勇以待战无他支梧一也我众则士怠二也前世善将兵者必问几何今以中才尽主之三也大众徬北彼遂驱无复顾忌四也重兵一属根本虚弱纖人易以干说五也虽委大柄不无疑贰复命贵臣监督进皆由中御失于应变六也兵分则尽易其 是有六利也胜败兵家常势悉内以击外失则举所有以弃之苻坚淝水哥舒翰潼关是也是则制敌在谋不在众以赵魏燕南益以山西民足以守兵足以战分而帅之将得専制就使偏师挫衄它众尚奋讎能系国安危哉故师覆于外而根本不摇者善败也昔者六国有地千里师败于秦散而复振几百战犹未及其都守国之固也陈胜项梁举关东之众朝败而夕灭新造之势也以天下之广谋其国不若千里之固而袭新造之势傲幸于一战庸非惑哉兵久弭士大夫诵圣谓百世不复用非甚妄者不谈然兵果废则已徬后世复用之鉴此少以悟世主故迹其胜败云

息戍 尹洙

国家割弃朔方西师不出三十年而亭徼千里环重兵以戍之虽种落屡扰即时辑定然屯戍费亦已甚矣西戎为寇逖自周世西汉先零东汉烧当晋氏羗唐秃髮歷朝侵轶为国剧患兴师定律皆有成功而劳 中国东汉尤甚费用常以亿计孝安世羗叛十四年用二百四十亿永和末复经七年用八十余亿及段纪明用裁五十四亿而剪灭殆尽今西北泾原邠宁秦鳳鄜延四帅戍卒十余万一卒歲给无虑二万平骑卒与冗卒较其中者总廩给之数恩赏不在焉以十万较之歲用二十亿自灵武罢兵计费六百余亿方前世数倍矣平世屯戍且犹若是后虽无它警不可一日辍去是十万众有益而无损明也国家厚利募商入粟倾四方之货然无水漕之运所挽致亦不过被边数郡尔歲不常登廩有常给顷年亦尝稍匱矣徬其乘我荐饥我心济师馈饷当出于关中则未战而西夏已困可不虑哉按唐府兵上府千二百人中府千人下府八百人为今之计莫若籍丁民为兵拟唐置府颇损其数又今边鄙虽有多乡兵之制然止极塞数郡民籍寡少不足备敌料京兆西北数郡上户可十余万中家半之当得兵六七万质其赋无它易赋以泉石者不易以五谷畜马者又蠲其杂徭民幸于庇宗乐然 籍农隙讲事登材武者为什长队正盛秋旬阅常若寇至以关内河东劲兵傳之尽罢京师禁旅慎简守师分其統専其任分統则柄不重専任则将益励坚于守备习其形势积粟多教士锐使虜众无隙可窥不战而慴兵志所谓无恃其不来恃吾有以待之其庙胜之策乎

兵制 尹洙

今之敌国地兼燕凉然彊大之势未过乎前世中国士卒専力武事非若古者籍兵于民农战兼用者也是中国兵胜于古敌国不胜于古也古者中国鞭笞四塞而役属者有之给繒帛以

懷來者有之与之战或胜或负者有之今厚赂以厌其求惟恐不及或与之较未尝一胜焉其故何哉非敌国之兵彊非中国之兵弱法制之失也何谓法制之失以吏事而制戎事也为今而言防之长在战与守策之失在御与救废策之长用策之失所以亟败也假以邊事言之若闻其将寇我境我之大将不计敌众寡之势不论战迟速之利必分兵御之御之不胜制令者曰吾知出兵而已行者曰吾知奋命而已朝廷必薄其责议者亦置其罪苟不御之虽全其师朝廷诛其逗留议者称其畏懦此所以必御之也若闻一城被围不计受攻之急缓不论城垒之坚脆必尽锐救之救之不胜制令者曰吾知救之而已行者曰吾知死之而已朝廷必薄其责议者亦置其罪苟不救之虽城获全朝廷咎其不进议者言其坐观此所以必救之也御与救非将之罪也以吏事制戎事法制之失也或曰御亦战也救亦战也御与救皆为失策何谓战为长策也夫御与救非利战不得已而战也非我利则敌之利也所谓战者我利则战不利则不战先计而后战者也先计而后战鲜不胜矣不幸而不胜者将之罪也然则中国之为守备久矣何得谓守为长策而废不用也所谓守者方面之守非一堡一障之守也非尺寸之地守也今敌入吾地不计众寡利害而御之敌围吾城不计坚脆急缓而救之御之必败救之必败兵溃于外民溃于内失所以为守矣守方面者异于是使其自守毋望救兵之出盖兵不出则势不分势不分则有以待之夫待之者不战则敌疑作战则敌惧惧则敌北能守所以办战能战所以济守明战守之利而不得志于敌国者未之有也

根本石介

善为天下者不视其治乱视民而已矣民者国之根本也天下虽乱民心未离不足忧也天下虽治民心离可忧也人皆曰天下国家孰为天下孰为国家民而已有民则有天下有国家无民则天下空虚矣国家名号矣空虚不可居名号不足守然则民其与天下存亡乎其与国家衰盛乎自古四夷不能亡国大臣不能亡国惟民能亡国国民之根本也未有根本亡而枝叶存者故桀之亡以民也纣之亡亦以民也秦之亡亦以民也汉有平城之危诸吕之难七国之反王莽之夺汉终不亡民心未去也唐有武氏之变禄山之祸思明朱泚宗权希烈诸侯之叛唐终不亡民心未去也夫四夷大臣非不能亡国民心尚在也观汉高祖文景唐太宗其有以结民心之固王莽夺取汉已亡矣而民尚思汉恩未已故光武乘之中兴武氏禄山滔泚思明宗权希烈诸侯之乱唐已亡矣而民尚思唐德未已故终至于三百年民之未叛也虽四夷之彊诸侯之位大臣之势足以移国足倾天下而终不能亡也莽等不能亡汉武氏禄山诸寇不能亡唐是也民之叛也虽以百里虽以匹夫犹能亡国汤以七十里亡夏文王以百里亡商陈胜以匹夫亡秦是也噫民之未叛也虽四夷诸侯大臣不臣不能亡国况匹夫乎民之叛也虽匹夫犹能亡国况四夷乎矧诸侯乎矧大臣乎噫为天下国家者可不务民乎书曰可畏非民孟子曰民为贵社稷次之君为轻故古之天子重民也不敢侮于鰥寡民虽匹夫也有奸雄有豪杰有义勇伊尹吕望义勇也陈胜豪杰也黄巢奸雄也伊尹吕望不忍桀纣之民涂炭奋于耕钓起佐汤武放桀系纣义勇矣夫陈胜不堪秦之民役苦愤然举兵以诛秦豪杰矣夫黄巢伺唐之隙因民之饥聚兵以扰天下奸雄矣夫书曰可畏非民有奸雄有豪杰有义勇可不畏乎是以圣人不侮于鰥寡盖不可以匹夫待民也孟子谓民贵社稷次君轻盖不敢以万乘骄民也吁昏君庸主不知民为天下国家之根本以草莽视民以鹿豕视民故民离叛天下国家倾防呜呼民可忽哉臣观太祖皇帝太宗皇帝真宗皇帝皇帝陛下养民勤矣爱心至矣然

而天下之民困其故何哉郡守县令滥也僧尼多也祠庙繁也差役重也支移逵也贡献劳也馆驿也吏易数也兼并盛也游惰众也今欲息民之困在择郡守县令减僧尼禁祠庙省差役罢支移停贡献宽馆驿久使任抑兼并斥游惰谨求其利病而各着于篇

明禁石介

国家之禁疎密不得其中矣今山泽江海皆有禁盐铁酒茗皆有禁布绵丝枲皆有禁关市河梁皆有禁子去其父则不禁民去其君则不禁男去耒耜则不禁女去织纴则不禁工作奇巧则不禁商通珠贝则不禁士亡仁义则不禁左法乱俗则不禁淫文害正则不禁市有游手则不禁官有游食则不禁衣服逾制则不禁宫室过度则不禁豪彊兼并则不禁权要横暴则不禁贿行于上则不禁吏贪于下则不禁夫子去其父则乱也民去其君则叛也男去耒耜女去织纴则离其业也工作奇巧商通珠贝士亡仁义则弃其本也左法乱俗则中华夷也淫文害正则经籍息也市有游手官有游食则公私惰也衣服逾制宫室过度则上下僭也豪彊兼并权要横暴则贫人困也贿行于上吏贪于下则公道缺也如是而不禁彼山泽江海人所取材也盐铁酒茗人所资也布绵丝枲人所取用也关市河梁人所取济也而禁岂先王之法乎三代之制乎哉或曰如何则先王之法也三代之制也曰惟禁其不禁而弛其禁则先王之法也三代之制也

责臣石介

大过上六君子矣心在救时至于灭顶凶而无悔且当栋桡之世居无位之地而过涉以扶衰拯弱可谓君子矣今国家有西北边之忧圣君夙夜勤劳日旰不食重择大臣付以專征大官以宠之富禄以厚之节旄以荣之宜竭智力以干乃任尽谋策以济厥事智力竭矣谋策尽矣然后以死继之可也乃偃蹇君命优游私家谓闻金鼓之震天下不若闻丝竹之淫耳谓见羽旄之翳目不若见赵卫之侍前谓若被甲冑不若服轻纨谓若冒矢石不若御重裘不竭智力不尽谋策乃称才不称任饮食加多筋力完壮乃谓病不任事上以罔于君下以欺于人以图其身之安噫国家以安无事乃将乃相尔公尔侯贪荣取宠不知休止聚财积货不知纪极饱而嬉醉而眠间则陈功劳叙阀阅矜材能荐智略恨爵位之不高任使之不先曾不曰才不称任病不任事国家一日有边鄙之忧圣君倚之以安则曰臣病臣不才至于两銓三班院除人往西北边去多不肯行呜呼食人之禄死人之事况圣君英威睿武仁行如春义行如秋敢兹不肃是臣得以慢君君不能以使臣也天子之命岂不行乎传曰四郊多垒卿大夫之辱也又曰主忧臣辱大官以被其身富禄以厚其家四郊多垒则曰非我之辱也主忧则曰非我之事有官职而不勤其官矧在于无位之地乎吾是以责斯人而贤上六也呜呼赖圣君洪覆如天不以寘诸法若有如孔子者出则当以春秋乱臣同诛矣

言治刘敞

为治者有其迹矣而迹未必可复也语治者有其言矣而言未必可常也遗迹而因于时忘言而拘于理治之大方也故昔者无懷氏神农氏封于太山禪于梁父者七十有二君而治未尝

同此道之谓也顾实论为政仲长统善之贾谊谋匈奴班固非之自汉以来莫谓不然寔之言曰明君者以严致平非以宽致平也大宋之兴划五代之除其虐政吏以鞭扑赦赎为治而天下以宁南至交趾北至幽都东渐于海西被于流沙外无彊桀之虏内无羣党之防民不见金革之患者于今有年自三代以来未尝有也此可谓以严致平者乎固之言曰谊欲试属国设五饵三表以钓匈奴其术已疎矣先帝与戎约和内爱百姓外亲隣国略循谊之策而匈奴服从至今五十余年自三代之盛讲信修睦附疏柔远亦未尝有若此其久也可谓术已疎者乎从此观之为治者因于时而迹不足守也语治者徇于理而言不足専也故自诗书礼乐治世之具者皆遗迹而求所以迹者也忘言而索于所以言者也非仲长统班固之徒所能见也

明礼 蔡襄

二帝三王相因作礼乐以正民性革其非心使之寡罪而逺刑通万世之法也秦任兵刑而弃礼乐汉魏以还至晋日用干戈礼典残缺至于民俗尽矣唐兴四方治定欲有所为制作虽具朝廷之礼时亦修举而风教习尚各随其俗五代祸乱日不遑暇専以刑治之宋兴五十余年太祖太宗平天下皆以兵威助治真宗皇帝契丹结好之后遂至无事朝廷礼文罔不修举仁宗皇帝好生恤刑泽及禽兽然四方之俗未闻由礼尚専用法者网罗过咎而施刑耳臣请以一二事言之冠婚葬防礼之大者冠礼今不复议婚礼无复有古之遗文而防礼尽用释氏独三年日月则类古矣臣请集大儒鸿博之士约古制而立今礼使百官万民皆有等夷便而易行逺罪省刑之一途也

去冗 蔡襄

治天下者如治家凡民之家随其富贫视其族属几何一歳之费几何賓客之资公上之湏复用几何度其家之所入然后量力而出之如是乃可以为家计也不如是其家无以自给则族属不得自少不知也枢府不知财用日月添兵而财用有无不知也三司使守藏吏也歳了一歳便为办事不幸有边境之患必取于民譬之家计是不度所入不量所出国不富实陛下未得高枕而优游臣故谓兵为大其次又有官冗今且以转官一事言之太祖太宗朝仕官者或有功劳或有名誉则拔任其人人莫不劝然以孤逺守常之人湮沉不迁者有之真宗设三年磨勘之法然后孤逺守常之人与夫权要图进之士无异也日月既久渐以成俗虽有长材异能出众人者有小过累未可迁也但能饮食言语于人无忤者数月必迁此三年一迁之法今为大也祖宗时卿监郎中无十数人观今班簿姓名可见也天下州军三百余处合入知州军凡军几何人局少员多每至除待阙湏一二年通判知县之类率皆如此真宗时选人磨勘有选京官者有不迁者仁宗时但无过咎无不转官官冗如此岂有不思其变更之术也哉去冗百端此二者最大愿陛下熟思之渐求消冗之説

宋文鉴卷一百二

卷一百三

钦定四库全书

宋文鉴卷一百三

宋吕祖谦编

策

原赏蔡襄

古之所谓赏者有大功则赏之临兵戎者前死有荣退生有辱虽小功必赏以其履死地也今之臣一切务赏何谓赏所谓酬奨者是也守土之臣刺史县令招徕逃亡磨勘税赋皆其职所当为也不修其职罪当罚也今有为之者必自陈而求赏不立赏格则不为也天子敛生民之财以禄之分职位以宠之借威权以使之可谓至矣而于官守常事动即求赏天子岂与羣臣为市道哉至于茶盐酒税之局物物皆有赏格下至吏人百姓莫不皆然此为政之一也战功必赏也功异于常者赏也其余无名酬奨可渐罢之以正官守之法也

礼法郑獬

孔子作春秋常事不书变礼则书明圣人之典礼中国世守之不可以有变也甚矣浮屠氏之变中国也浮屠夷礼也古者建辟雍立太学以育贤士天子时而幸之躬养三老五更习大射讲六经用以风动天下之风教而今之浮屠之庙萝蔓天下或给之土田屋庐以豢养其徒天子又亲临之致恭乎土木之偶此则变吾之辟雍太学之礼而为夷矣古者宗庙有制唐虞五庙商周七庙至汉乃有原庙行幸郡国及陵园皆有庙汉之于礼已侈矣而今之祖宗神御或寓之浮屠之便室亏损威德非所以致肃恭尊事之意也此则变吾之宗庙之礼而为夷矣古者日蚀星变水旱之灾则素服避正殿减膳撤乐责躬以答天戒而今之有一灾一异或用浮屠之法集其徒螺鼓呶噪而禳之此则变吾之祈禳之礼而为夷矣古者宫室之节上公以九侯伯以七子男以五惟天子有加焉五门六寝城高七雉宫方千二百步而今之浮屠之庙包山林跨阡陌无有裁限穹桀鲜巧穷民精髓侈大过于天子之宫殿数十百倍此则变吾之宫室之礼而为夷矣古者为之衣冠以莊其瞻视以节其步趋禁奇袞之服不使褻俗而今之浮屠髡首不冠其衣诡异方袍长裾不襟不带此则变吾之裘冠之礼而为夷矣自有天地则有夫妇则有父子则有君臣男主外女主内父慈子孝天子当展羣臣北面而朝事之而今浮屠不婚不娶弃父母之养见君上未尝致拜此则变吾之夫妇父子君臣之礼而为夷矣古者防葬有纪复奠祖荐虞祫之祭皆为之酒醴牢牲笱豆鼎筐享荐之具而今之举天下凡为防葬一归之浮屠氏不饭其徒不诵其书举天下诟笑之以为不孝狃习成俗沈酣溃烂透骨髓入膏肓不可晓告此则变吾之防葬之礼而为夷矣故自古圣人之典礼皆为之沦防几何其为

不尽归之夷乎使孔子而在记今之变礼者将操简濡笔择书之不暇而天下方恬然不为之怪朝廷未尝为之禁令而端使之攻穿坏败今或四夷之人有扣 而向边者则朝廷必择帅遣兵以防捍之见一虏夫一獠民必擒捽之束缚之而被诛绝焉彼之来小不过利吾之囊篋困窘牛羊大不过利吾之城郭土地而已而浮屠之徒满天下朝廷且未尝擒捽束缚而加诛焉反曲拳跪跽而尊事之彼之所利乃欲灭绝吾中国圣人之礼法其为祸岂不大于扣 而向边者耶岂庄子所谓盗钩金者诛盗国者为诸侯者耶夫胜火者水也胜夷狄者中国也中国所以胜者以有典礼也宜朝廷敕聪博辨学之士删定礼法一斥去浮屠之夷而明着吾圣人之制布之天下上自朝廷下至士大夫俾遵行之礼行而中国胜矣中国胜则为浮屠氏之说又何从而变哉

资格 孙洙

三代而下选举之法何纷纷乎其法始得者终必失也故孝廉之始得也人务本行也其终失也计口繆举也辟署之始得也人乐自修也其终失也流竞成俗也限年之始得也敦德养器也其终失也少成不贵也九品之始得也家举人兴也其终失也爱憎在吏也清议之始得也名实相尚也其终失也浮伪相沮也铨选之始得也权不外假也其终失也美恶同流也故孝廉失之繆辟举失之诡限年失之同九品失之伪铨选失之杂是六者之法皆足以救一时而不足以通百世也故始终而各有得失焉今始终一切皆失者其国家资格之法乎臣请言其 今贤材之伏于下者资格阂之也职业之废于官者资格牵之也士之寡廉鲜耻者争于资格也民之困于虐政暴吏资格之人众也万事之所以抗 百吏之所以废弛法制之所以頽烂决溃而不之救者皆资格之失也惟天之生大贤大德也非以私厚其人将使之辅生民之治者也惟人之有大材大智者非以独乐其身将以振生民之穷者也今小人累日而取贵仕君子侧身而困卑位贤者戴不肖于上而愚者役智者于下爵不考德禄不授能故曰贤林之伏于下者资格阂之也才足以堪其任小拘岁月而防之矣力不足以称其位增累攷级而得之矣所得非所求也所求非所任也位不度才功不索实故曰职业之废于官者资格牵之也今夫计岁阙而争年劳者日夜相鬬也有司躐一名差一级则摄衣而羣争愬矣其甚者或懷黄金而置于丞相之前也其行义去市贾者亡几耳故曰士之寡廉鲜耻者争于资格也来而暴一邑既岁满矣又去而虐一州也非以赃败至死不黜虎吏齟牙而食于民贤者鬱死于岩穴而赤子不得爱其父母也故曰民之困于虐政暴吏者资格之人众也夫资格之法起于后魏崔亮而复行之于唐之裴光庭是二子者其当世固以罪之不待后世之讥矣然而行之前世不过数十年者也后得称职者矫而更之故其患不大分资格之 流漫根结踵为常法方且世世而遵行之矣往者不知非来者不知矫故曰万事抗 百吏废弛法制頽烂决溃而不之救也虽然不无小利也小便也利之者蠢愚而废滞者也便之者耄老而庸昏者也而于天下国家焉则大失也大害也然而提选部者亦以是法为简而易守也百品千羣不复铨叙人物而综覈功实一吏在前勘簿呼名而授之矣坐庙堂者亦以是法为要而易行也大官大职列籍按氏差第日月逡然而登之矣上下相冒而贤材去愈远可为太息也为今之急诚宜大蠲 法简拔异能爵以功为先后用才为序次无以积勤累劳者为高叙无以深资久考者为优选智愚以别善否陈前而万事不治庶功不熙者臣愚未尝闻也

严宗庙 孙洙

臣尝考洪范五行传曰简宗庙废祭祀则水不润下国家比年以来京师仍岁大水百川暴溢变异甚大臣伏思之窃恐陛下承事宗庙之礼及四时之祭有未合古制者也臣闻古者宗庙四时之祭禘祀烝尝禘祫皆天子所自亲享不使有司摄事也盖圣人内自竭尽以承其亲者惟祭祭非自外至由中出生于心也古者宗庙之祭君亲牵牲执鸾刀以割冕而总干以乐皇尸其躬自力以致其诚心如此之尽一也及周衰礼坏乐崩典籍皆灭弃汉兴草创礼之存者才十二三事而宗庙之礼盖阙如也然犹四时车驾间出享庙及八月饮酎以尽孝思继汉而下荒乎无以礼乐为也唐之盛时可以制作矣而宗庙之祀亦踵习旧常开元之礼虽有天子四时亲享太庙之制而行之盖阙帝王之亲享庙者一世不过再三焉岂三代祭法终不可复也而百世莫之行者相循而失也今国家宗庙之事每岁四孟及季冬凡五享三年一祫五年一禘皆有司侍祠而天子未尝亲事也唯三岁亲郊一行告庙之礼而已而五神御殿酌献一岁徧焉是失礼经之意而相循近世之失也夫四时宗庙之祭大事也神御别殿酌献小礼也大事不正其本而委之有司小礼烦而车驾数出不合礼意矣夫王者卜宅都邑营建神位而左立七庙诚宜世世子孙严祗而奉承之瞻视梁栋而时思之以永念王业之艰难也今春秋霜露之感禘祫昭穆之序礼之最所重者一谗于祠官矣而神御酌献三岁告谒礼之轻者而天子躬焉非严祖尊考之义也非事神训民之意也呜呼宗庙之事王者不自亲由汉氏以来失之矣而百世之君曾不知复也今京师浮图老子塔庙或遇水旱陛下皆亲祷祠之及岁时游幸亦至焉而祖宗神灵之庙貌四时唯有司侍祭三岁郊见而才一至也岂陛下孝思之至乎夫使有司侍祠则牺牲醴酪或不能致其洁容礼服器或不能竭其恭此神灵所以未降福也陛下与其修祈禳于浮图老子塔庙曷若尽孝思于祖宗之庙也与其岁行酌献于别殿曷若以四时亲享而示大孝于天下也臣窃思陛下至孝蒸蒸非不能也直以礼久不讲而大费不可省尔臣论今之吉礼在典籍者盖粲然矣而享祭之礼又磅礴大备以陛下之明圣举而措之非甚难也然而议者谓法驾一动大费不可费臣又谓议者之过忧也国家之礼常病于吝小费而失大典文采繁而诚质薄故朝廷每举一废礼若籍田明堂之类观听者以为异则内外厚冀赉赐百官过幸增秩盖国家议礼太繁名物太繁故百礼常病不能举也今若诏太常礼官约其礼简其仪尽去繁饰大驾不动卤簿不设如唐之礼享庙拜陵皆用小驾今且如常日行幸罢每岁神御别殿酌献而以四时亲荐享庙前期斋于路寝以其日质明车驾谒太庙亲享七室以尽陛下严祖尊考事神训民之诚心岂不美哉夫礼简则诚至仪略则易行传曰礼与其恭不足而礼有余也曷若礼不足而恭有余也祖宗唯享陛下之诚百姓唯乐陛下之孝不在乎礼文之繁具也陛下起百王之废典绍三代之坠礼使大孝塞乎天地而横乎四海又以答塞洪范传大水之异何则四时亲享庙前世未有行者由陛下而立制使万世子孙承之是天下之盛福也臣愚妄议大礼惟陛下少留圣意而幸择

择使 孙洙

今北方彊抗中夏若古之大敌国聘问岁至日窥吾国家之隙暴侮甚矣朝廷比遣使介初不择人颇无辩对之材可使张明中国之威信以誓伏逖人之心者苟欲以岁时币赐宠之故所遣使人不复有称于绝域者徒侈洁车服整饰驺旅以夸视于羣落细礼曲谨悉受训策屈膝

边庭拜望跪起少不敢辄异还上语记一辞不中绳度则按以重罪遣削黜矣虽复间选左右名德方重之臣然皆束于仪矩屈鬱愤结俯仰上下虽有助辞直气奇谋博辩刀笔在后蓄不得发其毅然欲存国大体者法吏反以为生事而左迁之故妄庸之臣苟欲毕事低首下视暗不敢高吐气甚者或发狂疾以自免或对馆人醉舞跳踉笑呼妄诟重为荒服之所姗笑彼其主方骄吾以繁礼妄说之未足怪也至于髻首之役馆劳主人者亦复狂诞晨夜皆邀枉主人屡省而蹇仰自便甚可怪也夫以堂堂中国而一介之使如此折辱天威堕损国命臣窃羞之昔汉郑众不忍持大汉节对氐裘拜而拔刀自誓唐商侑坚立不动责可汗之失礼李景略以气制梅禄坐受其拜近者晋天福中王权犹曰义不能稽颡于穹庐之长而违诏得罪欣然就贬故大节之士直躬徇义者非私一身而以尊主上重国家也今陛下待彼过厚责使者之法太密故不复有倜傥伟节之士立威名于塞外而使其知中国之多贤也而使者亦复气息奄奄然不自振起唯任人之所嫚视而踞俟之臣闻古之大夫出疆有可以安国家定社稷者専之也又曰受命不受辞何则机事之防闲不容一息樽俎之间折冲万里岂复拘以应对之细失容貌之苛谨哉陛下宜与大臣预择廷臣辩论通古今刚直有威望者俾使北庭使一言足以雄中国之威夺彊敌之气譬說祸福以厌怖贪求之心其举动言辞小不合者无法以绳之非有大过类可阔略使得驰骋辩博应变不穷则専对造命之士出矣

敦俭 钱彦遠

臣闻享四海之奉者文采藩饰备味极盛势适当然岂过自刻损称为俭德盖去泰甚屏奢侈之为俭尔一人俭则百官俭百官俭则庶民耻费敦朴浮器轻伪无所售利农夫工女完固充给我太祖太宗知稼穡艰难奉养清约裁冗贬侈今郊庙大礼陈国初器械车服坚朴素质至甚余可追验矣先帝虽据太平全盛之实然俭节圣躬尝见内直黄门给锦衾命紫裯代幸西京时嫔御食品准从驾羣臣天禧间欲禁涂金饰下诏自乘輿始朞月遠迹杜絶化之之诚耆老于今称道陛下嗣位音乐宫室车马亡所加近歲差逾前臣疎遠不悉时事但闻调诸官署财物为玩好颇众北门内作工雕镂镕冶刻削几千人复以太官调絮簠略就近署私立饗防后苑置酒府酝酿共燕昵之湏宫中发取市物百费震动掖廷亲戚亟齿班列佩印绶给侍禁省是数者皆无益睿明臣料此诚左右佞諂恐天聪纳諫切厉兢兢畏天下过已始相与迎恶先意隐屏为此快一时欲图少顷兑说赐予放宕流溢源发有渐殊不知暴于外则愈损美德谨按礼王者皮弁以食重身防微故有和食医尝食监失防癘职则刑而别庖所荐异内羞正饌旋取区肆间或非时珍怪不问从出不思时禁止小使三数人庀其事陛下安自轻御焉奈宗庙社稷何臣之深忧也且京师四方回首易听取为表式今纵未大失风俗已溢经曰上好是下必有甚者臣观贵臣家悉相耀以技巧声色狗马或窃畜尚方器物起屋室跨通衢大路富商豪族歆慕结纳货赂上流縁而民益贫游手益众猾细乘作淫巧日变月新营媚富贵耳目且利令智昏盛令心骄昏则虑不精骄则所惜重元僚迹臣安危所托使昏且骄后何望邪昔秦王责范雎以楚防剑利优倡拙吾恐其图秦夫倡优巧拙小节也古人用蚺胜负况奢侈乎使天下闻之可也四夷闻之不可也臣尝行都下见先朝宰相若吕端李沆旧第存焉穷僻卑陋今公卿 人所舍或加之盖当时法令肃而习尚正也故衣弋绋焚雉头裘是邈帝王末事前史皆书之者顾治乱所系迺深美絶称耸示后世陛下宜醇法列圣成绩厯攷三代所以得失凡违典章旧制者亟罢揭还有司抑减内宠之势其父子兄弟才赐衣食不命以要官剧

职诸郡国織靡轻绡之服止其歲輸雕纂奇器斥破撤藏有金银饰者出付度支助军费皇皇然穆穆然用天子礼以自澹乐而有节俭不偏下使知圣人之心垂精勤劳兴亡之际羣下率化廉耻张立万有恃荣亲近遂恶未悛者严刑刑之假一劝百所举虽尊俎俯仰而所济遠矣

策略 苏轼

臣闻天子者以其一身寄之乎巍巍之上以其一心运之乎茫茫之中安而为太山危而为累卵其间不容毫厘是故古之圣人不恃其有可畏之资而恃其有可爱之实不恃其有不可拔之势而恃其有不忍叛之心何则其所居者天下之至危也天子恃公卿以有其天下公卿大夫士以至于民转相属也以有其富贵苟不得其心而欲羈之以区区之名控之以不足恃之势者其平居无事犹有以相制一旦有急是皆行道之人掉臂而去尚安得而用之乎古之失天下者皆非一日之故其君臣之权去已久矣适防其变是以一散而不可复收方其未也天子甚尊大夫士甚贱奔走万里无敢后先俨然南面以临其臣曰天何言哉百官俯首就位斂足而退兢兢惟恐有罪羣臣相率为苟安之计贤者既无所施其才而愚者亦无所容其不肖举天下事听其自为而已及乎事出于非常变起于不测视天下莫与同其患虽欲分国以与人而且不及矣秦二世唐德宗盖用此术以至于颠沛而不悟岂不悲哉天下者器也天子者有此器者也器久不用而置诸篋笥则器与人不相习是以扞格而难操良工者使手习知其器而器亦习知其手手与器相信而不相疑夫是故所为而成也天下之患非经营祸乱之足忧而养安无事之可畏何则惧其一旦至于扞格而难操也昔之有天下者日夜淬励其百官抚摩其人民为之朝聘防同燕享以交诸侯之欢歲时月朔致民读法饮酒蜡腊以遂万民之情有大事自庶人以上皆得至于外朝以尽其词犹以未也而五载一巡狩朝诸侯于方岳之下亲见其耆老贤士大夫以周知天下之风俗凡此者非以为苟劳而已将以驯致服习天下之心使不至于扞格而难操也及至后世壞先王之法安于逸乐而恶闻其过是以养尊而自高务为深严使天下拱手以貌相承而心不服其腐儒老生又出而为之说曰天子不可以妄有言也史且书之后世且以为讥使其君臣相视而不可知如此则偶人而已矣天下之心既已去而依依焉抱其空器不知英雄豪杰已议其后臣尝观西汉之初高祖创业之际事变之兴亦已繁矣而高祖以项氏创残之余与信布之徒争驰于中原此六七公者以絕人之姿据有土地甲兵之众其势足以为乱然天下终以不摇卒定于汉传十数世矣而至于元成哀平四夷向风兵革不试而王莽一竖子乃举而移之不用寸兵尺铁而天下屏息莫敢或争此其故何也创业之君出于布衣其大臣将相皆握手之欢凡在朝廷者皆其尝试啖啖以知其才之短长彼其视天下如一身苟有疾痛其手足不期而自救当此之时虽有近忧而无遠患及其子孙生于深宫之中而狃于富贵之势尊卑阔絕而上下之情疎礼节繁多而君臣之义薄是故不为近忧而常为遠患及其一旦固已不可救矣圣人知其然是以去苛礼而务至诚黜虚名而求实效不爱高位重禄以致山林之士而欲闻切直不隱之言者凡皆以通上下之情也昔我太祖太宗既有天下法令简约不为崖岸当时大臣将相皆得从容终日欢如平生下至士庶人亦得以自效故天下称其言至今非有文采缘饰而开心见诚有以入人之深者此英主之奇术御天下之大权也方今治平之日久矣臣愚以为宜日新盛德以激昂天下久安怠惰之气故陈其五事以备采择其一曰将相之臣天子所恃以为治者宜日夜召论天下之大计且以熟观其为人其二曰太守刺史天子所寄以遠方之民者其罢归皆当问其所以为

政民情风俗之所安亦以揣知其才之所堪其三曰左右扈从侍读侍讲之人本以论说古今兴衰之大要非以应故事备数而已经籍之外苟有以访之无伤也其四曰吏民上书苟小有可观者宜皆召问优游以养其敢言之气其五曰天下之吏自一命以上虽其至贱无以自通于朝廷然人主之为岂有所不可哉察其善者卒然召见之使不知其所从来如此则远方之贱吏亦务自激发为善不以位卑禄薄无由自通于上而不修饰使天下习知天子乐善亲贤防民之心孜孜不倦如此翕然皆有所感发知爱于君而不可与为不善亦将贤人众多而奸吏衰少刑法之外有以大慰天下之心焉耳

决壅蔽 苏轼

所贵乎朝廷清平而天下治平者何也天下不诉而无冤不谒而得其所欲此尧舜之盛也其次不能无诉而必见察不能无谒而必见省使远方之贱吏不知朝廷之高而一介之小民不识官府之难而后天下治今夫一人之身有一心两手而已疾痛痾痒动于百体之中虽其甚微不足以为患而手随至夫手之至岂其一一而听之心哉心之所以素爱其身者深而手之所以素听于心者熟是故不待使令而卒然以自至圣人之治天下亦如此而已百官之众四海之广使其关节脉理相通为一叩之而必闻触之而必应夫是以天下可使为一身天子之贵士民之贱可使相爱忧患可使同缓急可使救今也不然天下有不幸而诉其冤如诉之于天有不得已而谒其所欲如谒之于鬼神公卿大臣不能防其详悉而付之于胥吏故凡贿赂先至者朝请而夕得徒手而来者终年而不获至于故常之事人之所当得而无疑者莫不务为留滞以待请属举天下一毫之事非金钱无以行之昔者汉唐之患法不明而用之不密使吏得以空虚无据之法而绳天下故小人以无法为奸今也法令明具而用之至密举天下惟法之知所欲排者有小不如法而可指以为瑕所欲与者虽有乖戾而可借法以解故小人以法为奸今天下所为多事者岂事之诚多耶吏欲有所鬻而未得新故相仍纷然而不决此王化之所以壅遏而不行也昔桓文之霸百官承职不待教令而辨四方之賔至不求有司王猛之治秦事至纖悉莫不尽举而人不以为烦盖史之所记麻思还冀州请于猛猛曰速装行矣至暮而符下及出关郡县皆已被符其令行禁止而无留事者至于纖悉莫不皆然苻坚以戎狄之种至为霸王兵强国富垂及升平者猛之所为固宜其然也今天下治安大吏奉法不敢顾私而府史之属招权鬻法长吏心知而不问以为当然此其 有二而已事繁而官不勤故权在胥吏欲去其 也莫如省事而厉精省事莫如任人厉精莫如自上率之今之所谓至繁天下之事关于其中诉者至多而谒者之众莫如中书与三司天下之事分于百官而中书听其治要郡县钱币制与转运使而三司受其防计此宜若不至于繁多然中书不待奏课以定其黜陟而关与其事则是不任有司也三司之吏推析赢虚至于毫毛以绳郡县则是不任转运使也故曰省事莫如任人古之圣王爱日以求治辨色而视朝苟少安焉而至于日出则终日为之不给以少而言之一日而废一事一月则可知也一歲则事之积者不可胜数也欲事之无繁则必劳于始而逸于终晨兴而晏罢天子未退则宰相不敢归安于私第宰相日昃而不退则百官莫不震悚尽力于王事而不敢晏游如此则纖悉隱微莫不举矣天子求治之勤过于先王而议者不称王季之晏朝而称舜之无为不论文王之日昃而论始皇之量书此何以率天下怠耶臣故曰厉精莫如自上率之则壅 决矣

宋文鑑卷一百三

卷一百四

钦定四库全书

宋文鉴卷一百四

宋吕祖谦编

策

劝亲睦 苏轼

夫民相与亲睦者王道之始也昔三代之制画为井田使其比闾族党各相亲爱有急相赙有喜相庆死防相恤疾病相养是故其民安居无事则往来欢欣而狱讼不生有寇而战则同心并力而缓急不离自秦汉以来法令峻急使民乖其亲爱欢欣之心而为隣里告讐之俗富人子壮则出居贫人子壮则出赘一国之俗而家各有法一家之法而人各有心纷纷乎散乱而不相属是以义礼之风息而争鬪之狱繁天下无事则务为欺诈相倾以自成天下有变则流徙涣散亡以自存嗟夫秦汉以下者天下何其多故而难治也此无他民不爱其身故轻犯法轻犯法则王政不行欲民之爱其身则莫若使其父子兄弟和而妻子相好夫民仰以事父母旁以睦兄弟而俯以防妻子则其所赖于生者重而不忍以其身轻犯法三代之政莫尚于此矣今欲教民和亲则其道必始于宗族臣欲复古之小宗以收天下不相亲属之心古者有大宗有小宗故礼曰别子为祖继别为宗继祚者为小宗有百世不迁之宗有五世则迁之宗百世不迁者别子之后也宗其继别子之所自出者百世不迁者也宗其继高祖者五世则迁者也古者诸侯之子弟异姓之卿大夫始有家者不敢祚其父而自使其嫡子后之则为大宗族人宗之虽百世而宗子死则为之服齐衰九月故曰宗其继别子之所自出者百世不迁者也别子之庶子又不得祚别子而自使其嫡子为后则为小宗小宗五世之外则无服其继祚者亲兄弟为之服其继祖者从兄弟为之服其继曾祖者再从兄弟为之服其继高祖者三从兄弟为之服其大功九月而高祖以外亲尽则易宗故曰宗其继高祖者五世则迁者也小宗四有继高祖者有继曾祖者有继祖者有继祚者与大宗为五此所谓五宗也古者立宗之道嫡子既为宗则其庶子之嫡子又各为其庶子之宗其法止于四而其实无穷自秦汉以来天下无世卿大宗之法不可以复立而其可以收合天下之亲者有小宗之法存而莫之行此甚可惜也今夫天下所以不重族者有族而无宗也有族而无宗则族不可合族不可合则虽欲亲之而无由也族人而不相亲则忘其祖矣今世之公卿大臣贤人君子之后所以不能世其家如古之久远者其族散而忘其祖也故莫若复小宗使族人相率而尊其宗子宗子死则为之加服犯之则以其服坐贫贱不敢轻而富贵不敢以加之冠昏必告防葬必赴此非有所难行也今夫良民之家士大夫之族亦未必无孝悌相亲之心而族无宗子莫为之糾率其势不得相亲是以世之人有亲未尽而不相往来冠昏不相告死不相赴而无知之民遂至于父子异居而兄弟相讼然则王道何从而兴乎呜呼世人之患在于不务远见古之圣人合族之法近

于迂阔而行之朞月则望其有益故夫小宗之法非行之难而在乎久而不怠也天下之民欲其忠厚和柔而易治其必自小宗始矣

师友 王安国

书曰能自得师者王诗之序曰自天子至于庶人未有不须友以成者然则师友之于人其不可以无也如此夫养父母畜妻子而衣食出于其力者庶人之事尽此矣其所以虑于忧患之际甚微而犹曰须友以成况士大夫守宗庙与朝廷之事甚众则不可以无友士大夫尚然又况诸侯守一国之大于天子之势大于诸侯则尤不可以无学无师友也汤之于伊尹文武之于太公望高宗之于甘盘皆上尽惓惓以求于下而下之自重不可以诎者岂以其道德足以骖上哉盖以为所以望于吾者以道德而其求也不勤则其听也不一故君之于臣也忘其贵臣之于君也忘其贱论道德于君臣之际而无贵贱者此天下国家之所以治也记曰取人以身修身以道夫修身至于足以取人者学之效也而果可以不学于师友乎以夫四海九州之民属于一人之治聪明不足以当万事之视听操天下之要者取人而已果可以不学于师友乎自先王之泽竭而礼义诎乎战国之俗权使天下之士而君臣之际形隔势绝师友之道遂堙灭不闻于后世虽有学于其臣者岂复有恳恻之心哉夫治乱之几出乎此而世俗之谈者不能推见本末徒以其事之末者甚浅而易见而安知夫効于本者如此有天下者可不戒哉

举士 王安国

朝廷间岁下诏自进士等而至明法听其以状来谒既贡于乡而礼部又加之以陞黜然后第之于廷宰相百执事之选防出于此而臣愚窃敢议其不然者夫待之无其礼则不足以养有耻之俗取之无其实则不足以得可用之才其进也未尝知其行于畴昔而一日使之更相保任贤否于以类致则保任之不足恃也固可知矣惰游苟贱见弃于闾巷而得与豪杰之士驰骋上下有司以一吏谁何于前而擎蹠俯伏听命于后其试也守之以吏卒而诋诃搜索恣所欲陵有司以其混殽而不欲宽以绳墨率以谓上无求于彼而彼有利于仕也待之以此足矣彼习于耳目之久而既仕之后其能撓以廉耻而不侥幸声利乎所谓诗赋策论章句律令之艺不足以为天下之用而徒以学者精锐之志限以礼部之格而可否出于数人之断设尽如其格固不足善又况取舍未能无谬于好恶乎古之人陈力就列不能者止今之人常患乎好自私也为有司者未闻自以不能求止者于是宜有幸得之士也彼既幸矣一日必任有司而如其类者能勿取乎此所以溃溃然不知劝沮而无以抑其求也又所谓贤良茂才之学其尤甚者自六经史氏百子之说而兼之以传注乖离精粗无所不记然后能应有司之问虽使聪明捷敏之姿而所阅如此之博则理必不能深探熟考以得圣贤之意虽无声病之拘牵而撓挾名数难其中选未尝试其一言之効而卒所以得者不过善其记问文辞而已此推恩与进士之上第者皆计日以致高位朝廷患其然也故稍裁之虽徒能见于此而其有不尽革者此臣之所未谕也议者方且谓今贤不乏于朝廷而其法亦足以得人矣何必易哉孰知夫此盖得于万一之幸尔以今天下选用之不一而任事者尝患乎不学也昔郑以尹何为邑而子产卒不之与曰学而后入政未闻以政学也彼以一邑而犹不可以用不学之人又况任

有大于此者乎诗赋章句律令非古之所谓学也徒可以求举于今尔施之行治而茫然如未尝阅书也虽策论稍异于此然亦取辞而已且设法欲四方万里之材一切无所遗逸以今观之其能无所遗逸乎臣固知其不能也其甚则患夫有道德者往往耻于求举而僂俛以从善至老多困于不售夫不售者古以为有司之罪而今之操陞黜者反咨嗟叹息以为彼有所制而吾亦无如之何为天下而使有道德者耻不愿仕有司不得行其志而归之于命然则法之也可谓极矣幸今君圣臣贤一时之盛能相与博尽羣臣之道而防极其本又何患乎不可革哉臣以为宜使为进士者人占二经策以古今之治乱而使传经以对反复于一二日而用此易其诗赋贤良茂才宜罢勿试敕近臣得荐士之材行尤异者聚之京师而数使豫朝廷之议论实可用则宠之官卓犖者待以台阁之选而其下则使内外之官辟为其属如不称所闻则坐其荐者律令之学可废勿举学究则去其贴经墨义而责以大防不必规规然蔽于传注也此庶几得可用之材矣而欲养之以廉耻而使其不自列也则宜勅内外设学校而士无不学于其中则任事者可以察其行而不必使之类相保任也此固未足以为成法于万世然朝廷能继之以惓惓不倦之意而讨论已熟为之以渐则三代之法自此有不复者乎在君臣之际力行何如尔

臣事 苏辙

臣闻天下有权臣有重臣二者其迹相近而难明天下之人知恶夫权臣之専而世之重臣亦不容于其间夫权臣者天下不可一日而有而重臣者天下不可一日而无也天下徒见其外而不察其中见其皆侵天子之权而不察其所为之不类是以举皆嫉之而无所喜此亦已太过也今夫权臣之所为者重臣之所切齿而重臣之所取者权臣之所不愿也将为权臣耶必将内悦其君之心委曲听顺而无所违戾外窃其生杀予夺之柄黜陟天下以见己之权而没其君之威惠内能使其君欢爱悦怩无所不顺而安为之上外能使其公卿大夫百官庶吏无所不归命而争为之腹心上爱下顺合而为一然后权臣之势遂成不可拔至于重臣则不然君有所不可而必争争之不能而其事故有所必不可听则専行之而不顾待其成败之迹着则上之心将释然而自解其在朝廷之中天子为之蹶然而有所畏士大夫不敢安肆怠惰于其侧爵禄庆赏已得以议其可否而不求以为己之私惠刀锯斧钺已得以参其轻重而不求以为己之私势要以使天子有所不可必为而羣下有所震惧而已不与其利何者为重臣者不待天下之归己而为权臣者亦无所事天子之畏己也故各因其行事而观其意之所在则天下谁可欺者臣故曰为天下安可一日无重臣也且今使天下而无重臣则朝廷之事惟天子之所为而无所可否虽天子有纳谏之明而百官畏惧战栗无平昔尊重之势谁肯触忌讳冒罪戾而为天下言者惟其小小得失之际乃敢上章讜诤而无所惮至于国之大事安危存亡之所系则将卷舌而去谁敢发而受其祸此人主之所大患也悲夫后世之君徒见天下之权臣出入唯唯以为有礼而不知此乃所以潜溃其国徒见天下之重臣刚毅果敢喜逆其意则以为不逊而不知其有社稷之虑二者淆乱于心而不能辨其邪正是以防乱相仍而不悟可足伤也昔者卫太子聚兵以诛江充武帝振怒发兵而攻之京师至使丞相太子相与交战不胜而走又使天下极其所往而剪灭其迹当此之时苟有重臣出身而当之拥防太子以待上意之少解徐发其所蔽而开其所怒则其父子之际尚可得而合也惟无重臣故天下皆知之而不敢言臣愚以为凡为天下宜有以养其重臣之威使天下百官有所畏忌而缓急之间

能有所坚忍持重而不可夺者窃观方今四海无变非常之事宜其息而不作然及今日而虑之则可以无异日之患不然者谁能知其果无有也而不为之计哉抑臣闻之今世之在于法禁太密一举足不如律令法吏且以为言而不问其意之所属是以虽天子之大臣亦安敢有所为于法律之外以安天下之大事故为天子之计莫若少宽其法使大臣得有所守而不为法之所夺昔申屠嘉为丞相至召天子之幸臣邓通立之堂下而诘责其过是时通几至于死而不救天子知之亦不以为怪而申屠嘉亦卒非汉之权相由此观之重臣何损于天下哉

民政 苏辙

臣闻三代之时无兵役之忧降及近世有养兵之困而无兴役之患至于今而养兵兴役之事皆不得其当而可为之深忧盖古者兵出于农而役出于民有农则不忧无兵而有民则不忧无役五口之家常有一人之兵而二十之男子岁有三日之役故其兵彊而费不增役起而人素具虽有大兵大役而不忧事之不集至于兵罢役休而无日夜不息之费其后周衰井田破坏陵夷至于末世天下无复天子之田皆民之所自有天下之民不食天子之田是故独责其税而不任之以死伤战鬪之患天子有养兵之忧而天下无攻守劬劳之民以为大忧故调其财以为养兵之用而天下之役凡其所以转输漕运营建兴筑之事又皆出于民当此之时民之所以供上之令者三曰租曰调曰庸租者地之所当出调者兵之所当费庸者岁之所当役也故使之纳粟于官以为田之租人入布帛以为兵之调岁役其力不役则出其力之所直以为役之庸此三者农夫皆兼为之而游惰末作之民亦不免于庸调运重漕远天子不知其费而一出于民民岁役二旬而不役者当帛六十尺民亦不至于大苦故隋唐之间有养兵之困而无兴役之患此其为法虽不若三代之兵不待天子之养然天下之役犹有可赖者皆民为之也及其后世又不能守乃始变法而为两税以至于今天下非有田者不可得而使而有田者之役亦不过奔走之用而不与天子之大事天下有大兴筑有大漕运则常患无以为使故募冗兵以供力役之急不知击刺战阵之法而坐食天子之俸由是国有武备之兵而又有有力役之兵此二者其所以奉养之具皆出于农也而四海之游民无尺寸之庸调为农者常使阴出古者游民之所入而天子亦常兼任养兵兴役之大患故夫兵役之当今之世可谓极矣臣愚以为天子平日无事而养兵不息此其事出于不得已惟其干戈旗鼓之攻而后可使任其责至于力役之际挽车船筑宫室造城郭此非有死亡防败之危天下之民诚所当任而不辞不至以累兵革之人以重费天子之廩食然当今之所谓可役者不过曰农也而农已甚困盖常使尽出天下之费矣而工商技巧之民与夫游闲无职之徒常遍天下优游终日而无所役属盖周官之法民之无职事者出夫家之征今可使尽为近世之法皆出庸调之赋庸以养力役之兵而调以助农夫养武备之士而力役之兵可因其老疾死亡遂勿复补而使游民之丁代任其役如期而止以除其庸之所当入而其不役者则亦收其庸不使一日而阙盖圣人之于天下不唯重乎苟廉而无求唯其能缓天下之所不给而节其太幸则虽有取而不害于为义今者虽能使游民无劳苦嗟叹之声而常使农夫独任其困天下之人皆知为农之不便则相率而事于末末众而防农桑则天子之所独任者愈少而不足于用故臣欲收游民之庸调使天下无侥幸苟免之人而且以纾农夫之困苟天下之游民自知不免于庸调之劳其势不耕则无以供亿其上此又可驱而归之于南亩要之十岁之后必将使农夫众多而工商之类渐以衰息如此而后使天下举皆从租庸调之制而去夫所谓两税者而兵役之忧可以稍

缓矣

势原 李清臣

君之所以安危国之所以存亡治乱令之所以行不行势也不善知势不能为创业之君不知势之可畏而失其所以审度将顺不可以为持成之君经治之臣故善用国用者势而已矣理势循则行忤则变动则险止则平轻能重缓能速故物有至小而力不可胜既事有至易而攻不可胜原发如毫芒针端而巨若丘阜本在拱把而远际穷髮者势也户之运也车之驰也弩之圆也矢之激也衡以一权而举数倍之重也水之注于卑泽也原火之燎于风中也势也兵奋寡可以走众人乘高可以抑下亦势也岂惟万物然今夫一人而胜天下之大制天下之众兼听天下之广沛焉有余非势而何如也故明者用势闇者用于势明者提至要之处持其关纽制其机枢动静在我开阖在我弛张在我一教一令一赏一罚必辅之以形势故教之而行者易令之而从者速赏一而千万人劝罚一而千万人惧仁少而悦者多义近而服者远无它理势为之也教令赏罚仁义而无形势之辅必且人人而治之矣人人而治之教之行也必艰令之出也必烦天下之善有余而赏不足天下之恶有余而罚不足天下之民无穷而仁义不足无它理势不先也夫千世之君可缕指而数之矣或善恶或仁义其间差不能铢寸而功名辄相倍蓰祸福辄相千万者无它形势之异使然也成汤祝网而归者三十六国文王葬枯骨而天下三分有其二千世之君德有大于此者矣而汤文用此收天下之助盖其从民情而集天下之势也方形势之在桀纣夏台之囚羑里之狱如拘匹夫及善恶之暴也形势之变而迁如林之师而莫敢射车中之木主故天下之势安则难动动则难安当其安也垂绅端委深拱于堂奥户牖之内而高论治古之上尊明如天日閤隐如雷霆煦煦如雨露肃肃如风霰指顾叱咤而天下莫不趋走鞭笞海外之蛮夷若制童妾虽有刘项之魁雄曹马之奸桀必且老民籍而不敢唱及乎昏懦为之也席先王之泽未涸天下之势未运目视其安也以为无有危事也任一喜怒从一嗜欲矣而患未切已也以为可为而无伤也习知天下之尊服已也以为人终古莫敢蹙路马之刍触圉之毛也簾顿关纽嬉弄机枢动静不以时开阖不以道张弛不以节淫乐在宫中而怨毒被天下略易在一朝而患祸遗千日民心之它属也君柄之旁落也势之翩然而离也虽欲安之不可能也窃譬之山之高厚也万夫不能堕坏也朽壤生乎中崩石震乎上及其倾也人力不能支柱而维持也非天事也势也故前圣创业起今之利变昔之害所以治天下之具甚备忧天下之虑甚深缀民心而久天下之势坚完固密为不可拔及其久未尝无罅缺蠹漏也然而其剥也亦有渐矣在后圣时节其势而缮之耳汰则约之危则平之扰则静之微则养之弱则扶之急则纵之缓则持之塞则导之使万事之理百物之节皆不至于穷极而大变则势久而长无危亡之形矣故势之在我也畜积之固势之审则发弗便则居故势为我使而天下莫能逆也若一失其要则纵肆奔悍于外不可复收虽有天下一旦驱挤排压而扑矣臣故曰如户之运也如车之驰也如弩之圆如矢之激也如一权而举数倍之重也如水之注于卑泽也如原火之燎于风中也如兵之奋寡而走众人之乘高而制下也其动不可以不慎也人主之势则处治如将乱处存如将亡处安如将危而乱与危亡亦且不至臣故作势原

明责 李清臣

今天下之势何如哉君仁而民不被泽兵多而夷狄骄时平而生民困土广而中国之气常屈灾歲少而财益匱文法备而吏多奸时之多也如此而已天下之大万官之富卒未见奋然而大有为能一划当世之致吾君复之乎前古之治者何乏人之如是邪岂治平之世无所施其才邪将用之非其道有才而不克施邪谓世之乏人则古未尝有无人之世谓治平之世无施其才则多又如前所陈者夫陰阳之英气天地之醇灵生而为贤智之士陰阳之英气天地之醇灵未闻有时而歇故天下未尝无贤也议者患治道之不及于古则曰天下无贤不知有贤而不能用于夫用贤而非其道瑰杰豪伟之材皆化为偷儒循缩而亡能为矣则以谓无人焉此可为悼叹者也亦尝闻古者之用人矣视成不视始责大而不责细过一而功百则忘其缺而图其効心至而迹未至则优暇而待其所施苟付之以事固弗屑其余也今者之用人较小罪而不观大节恤浮语而不究实用虽有稷契周召之佐类以一言一事而为之进退迹稍出于庭坛畦陇之外志不获就业不能讫而去矣惟固已持禄避事随时之人乃无譴而得安焉故庸平者安步而进忠愤者半涂而气折大臣慑怯小臣凌竞而天下之事靡靡日入于衰敝其所以然者有其人而不能用用其人而不能尽之之失也今夫拔一臣而加之百官之上以为辅相非求其谨洁而无过将任之以天下之责拔一士而加之一郡一邑之上以为守令非求其能自全将任之以一郡一邑之责也拔一夫而加之万众之上以为将帅非求其循法而不失小行将任之以安危胜负之责也故古者责宰相必曰广教化和陰阳使百官各任其职责郡守县令必曰使豪强沮服盜贼不作百姓安业境内大治责将帅必曰士卒乐为用敌国不敢谋下此则凡执事者莫不皆有责焉故上下自任其责而天子无为矣今则不然罢退宰相皆攻其疵瑕而未尝指天下之不治为宰相之罪糾刻守令者皆以小法而未尝指郡邑之不治为守令之罪迁谪将帅者以庖厨宴饌之间微文细故之末未尝以蛮夷骄横兵气弗强为将帅之罪故上下莫自任其责局局自守惟求不入于罪而朝廷大计生民实患卒无有任者是故以天下之大万官之富而常若无其人尊官厚禄者相继而英绩伟烈寂寂于数十载资格之所羈缚文法之所躡蹠抱才负志不得有为而老死沉没者相望于下可不惜哉夫人臣之奸身安于宠形无可罪而实不任责是为大奸张禹之所以默默而亡汉李林甫之所以守格令而亡唐也今皆重夫寡过者以为贤而嫉夫敢为者以为生事一落防穽没齿不复言故猾民悍吏得以轻罪把持其上游士谈客得以口舌恐吓内外之臣而招其资胥吏得以挟簿书执格例而争于庙堂之前当其任者知奸而或不敢除见贤而或不敢用天下之害不得亟罢天下之务不敢亟为因仍苟且相顾腹议者曰至公而万事益病其莫甚于今之世者欲救斯敝是亦非难寬小过而责大体而已矣

卷一百五

钦定四库全书

宋文鉴卷一百五

宋吕祖谦编

议

左右仆射东宫三师为表首议 竦 仪

尚书省牒奉前月二十八日勅节文御史台太常礼院定左右仆射东宫三师为表首未有所从令臣等参议以闻者臣等今详东宫三师为表首讨论故实全无证据其左右仆射援引制勅合为表首者其事有六谨案周官先叙六官又準六典尚书为百官之本今自一品至六品常参官每班以尚书省官为首则仆射合为表首一也又案唐防要及礼阁新仪贞元二年十月七日御史台奏每有庆贺及湏上表并令上公行之如无上公即尚书令仆射已下行之其嗣王合随宗正若有班位合依王品此则嗣王虽一品不得为表首二也又据故事仆射位次三公则仆射合为表首三也又準故事仆射是百寮师长即无东宫一品为师长之文是知上台表章仆射当为表首四也又準晋天福二年勅节文今后凡有谢贺上表并令上公行之如三公阙令仆射行之则上台表章仆射当为表首五也又立班之制卑者先入后出尊者后入先出见今东宫一品立定仆射乃入仆射既退两省班退后东宫一品方出即轻先重后之礼较然可知则仆射合为表首六也伏以百王仪制厯代遵承凡欲改更必求典故今御史台检讨有憑事理甚允议者或引百寮起居之日宰相偶不押班东宫一品在前不可却通仆射臣等答曰必若合通前立之者则两省官班在前如通最在前班必求宰相之次为首则非上台仆射而谁又曰一品为尊二品为次臣等答曰班秩之内 慢是分或有自四品入三品为黜官丞郎入卿监是也从四品入五品为进秩少卿入郎中是也四品在三品之上诸行侍郎于卿监是也七品八品在杂五品之上殿中侍御史补阙拾遗监察于三丞五博是也若不以省台紧慢次第相準居此官者肯以品为定乎又大凡尊卑各有伦等虽系君臣之际可论父子之间上台则君父之官也东宫则臣子之官也若或品位悬邈亦可尊卑各申奈将台职紧慢不同实恐统摄不得假若轻重虽等亦湏推奨上台议者又曰新定合班最可为準臣等答曰近勅合班之位仆射与东宫三师不曾改移上件所引故实勅文当时与今无异此乃仍旧不是新条又议曰仆射重轻不同往日臣等答曰此官崇重仪亚三公上事旧规典册具在公参之礼立朝之仪见今可知何曾损减又议者曰假如百寮同署一状必湏依次署名臣等答曰此议只为表章独以一人结衔为首具云文武百寮臣等此则是总统文武众官见有正衙重官太子宫臣难以为首若援引依次连署实又与此不同又议者云表首之人近亦曾有三少臣等答曰今为在朝见有仆射表首难定官臣厯朝典据分明都求不取近或重轻颠倒却引为憑脱或不论官曹不取紧慢不以近尊为重但只据品而言则上来班位及于资品以至仆

射出入今后并合改更若变旧章于时何益臣等欲请依唐贞元晋天福勅及诸故实并今御史台众议以仆射为表首一则正上台之纲纪一则遵歷代之楷模免至凿空骤从臆说俾其名分不至夺伦

祖宗配侑议 宋 祁

臣等闻王者建庙祔之严合昭穆之缀祖一而已始受命也宗无豫数待有德也由宗而下等胄之疏戚以为迭毁之制使后嗣虽有显扬褒大犹不得与祖宗并列所以一统乎尊尊古之道也皇帝陛下躬孝治发德音承惟三后之盛烈际天接地而推奉之礼有所未称明发悼惧图惟厥衷使攸司得稽旧章开羣议摅懿铄阐孙谋将以膺合灵心垂荣无极非臣等孤陋所能及已窃以太祖皇帝诞受寶命付畀四海铺敦燮伐潜黜不端夷泽潞之畔兼淮海之昧东焚吴輿右因蜀垒湘楚闽禺请吏入朝当此之时天下之人去大残防更生卜年长世丕阐洪业太宗皇帝敦受具玺席运下武龚天之讨底定太原由是慎九刑之辟艺四方之贡信赏类能重食劝分官无烦苛人无恫怨又引搢绅诸儒讲道兴学炳然右文与三代同风真宗皇帝干粹日昭执竞维烈重威抚和休宁北方顺斗布度先天作圣遂考夏谚乱虞巡秘牒岱宗育谷冀壤翕受瑞福普浸黎元肖翹跂行罔有不宁百度已备眷授明辟洪惟一祖二宗之烈歷选坟诰未有高焉者也昔成汤为商之祖太甲太戊武丁寶号三宗后稷为周之祖文王武王庸建二祧高帝为汉之祖孝文孝武特崇两庙皆子孙世世奉承不辍我皇伯祖经纶草昧遂有天下功宜为帝者之祖皇祖勤劳制作皇考财成治定德宜为帝者之宗三庙并万世不迁宣布天下以示后世臣等请如圣诏至于升侑上帝裒对告防本之周道克厌典礼昔太宗亲郊奉宣祖太祖配焉真宗肇祀奉太祖太宗配焉自尔有司不敢轻议今二宗同跻不祧之位则礼无异等伏请自今以往太祖为定配二宗为迭配称情适事理实无嫌其将来皇帝亲祠伏请以三圣偕侑上显对越之盛丘申遙追之感圣人之能事羣臣之大愿此后迭配还如前议昔唐高宗之上封也太武皇帝文皇帝配昊天明皇之封也以高祖配天睿宗配地开元之着礼也高祖配方丘太宗配神州此二宗迭配之前比垂拱开元之间高祖太宗高宗同配昊天真宗登介丘降社首并以太祖太宗崇配天地此三圣皆侑之明準其歲时常祀则至日圆丘仲夏皇地祇配以太祖孟春祈谷夏雩祀冬祭神州配以太宗孟春感帝配以宣祖季秋大飨配以真宗伏请皆如礼便陛下重宗祧之事鉴照前载抑畏防玃让而不專故令臣等得申愚管谨用敷罄惟圣心裁鉴谨具议状奏闻

郭稹不应为嫁母持服议 宋 祁

臣窃惟礼者叙上下制亲疏别嫌明防以为之节故三年之防虽天下达礼至于情文相称必降杀从宜故尊有所由则亲有所屈不敢以所承之重而轻用于其私者也伏见前祠部员外郎集贤校理郭稹生始数歲即钟父防而母边氏更适士人王涣稹防防孤苦以讫成立既无伯叔又鲜兄弟奉承郭氏之祭者惟稹一身而已母边氏适王氏更生四子今边不幸而讦闻稹乃解官行服以臣愚管见深用为疑伏见五服制度勅齐衰杖期降服之条曰父卒母嫁及出妻之子为母其左方注曰谓不为父后者若为父后者则为嫁母无服今详边氏嫁则从夫已安于王室死将同穴永非于郭偶而稹既为父后则宜归重本室虽欲懷有慈之爱推无絕

之义亦不得为已嫁之母亢父而尽其礼也何者轻奉父統则郭之承重更无他亲备执母防则王之主祀自有诸子臣详求制防疑禋不当解官行服夫礼有所杀君子俯就也谊有所断圣人不專也况当孝治宜谨彝经伏乞降臣此状下有司博令详议其郭禋为父后为嫁母应与不应解官行三年之防然后明垂定制俾守洪规

请置廉察罢转运议 黄 亢

惟王建国稽古治人既设其官必立其长厯观方册可得而知其在唐虞则十有二牧在三代则有连率焉有方正牧焉在两汉则或称刺史或称州牧其实一也在皇唐则其大府有节度其次有观察皆所以纲举百职柄持众政作天子之藩宣也是故民之所仰吏之所畏服朝之所毗倚其官必重其人必贤也今则不然外官小大自足及颍悉统之转运转运非古也起唐中叶所以督钱谷而已矣今夫用钱谷之职摠守宰之官守宰主宣教化者也教化义也钱谷利也利与义不能两全是以下忧歲之不登而民之不粒上恐财之不丰而贡之不多是上下相戾也矧其充使者不过郎官御史其官既轻其人未必贤是民所仰望者卑也吏所畏服者弛也朝之毗倚者轻也使政不平刑不清和气未充祥鸟未来得非由此坎有刍蕘之民窃议于下曰钱谷之职宜委之郡守郡守县宰宜统之廉察则廉察宜置转运宜罢也所以复古官也不使吾民谓天子重利而薄义也不知朝廷三事大夫为是邪为非邪

为兄后议 刘 敞

礼天子之庙三昭三穆与太祖而七诸侯二昭二穆与太祖而五所谓昭者父道也所谓穆者子道也天子诸侯未必皆身有子故或取于兄弟之子以为嗣亲同则取其贤者贤同则取其长者长同则卜其吉者非兄弟之子则弗取故不以诸父为嗣兄亦尊也不以诸弟为嗣弟已之伦也此古者七庙五庙之序所以昭穆不相越迭毁不相害也至乎后世国家多事或传之诸兄或传之诸弟盖有不得已焉则礼散久矣然既已受国家天下则所传者虽非子亦犹子道也传之者虽非其父亦犹父之道也以天下国家为重矣春秋僖公实闵公之兄闵公遭弑僖不书即位明臣子一体也公孙婴齐卒春秋谓之仲婴齐以谓为人后者为之子当下从子例不得复顾兄弟之亲称公孙也春秋之义有常有变夫取后者不得取兄弟此常也既已不可及取兄弟矣则正其礼使从子例此变也故僖公以兄继弟春秋谓之子婴齐以弟继兄春秋亦谓之子所谓常用于常变用于变者也既其子名则僖公不得不以闵公为昭归父不得不以婴齐为穆既正其昭穆则迭毁之次不得不以一代一也而儒者或疑礼无后兄弟之文遂以春秋书仲婴齐为不与子为父孙非也子为父孙诚非礼之正有不得已者春秋正其为臣子一体而已故实公孙婴齐而谓之仲婴齐若春秋本不听其为后者则当书曰公孙婴齐卒学者问之曰此仲婴齐曷为谓之公孙婴齐不与为兄后也乃可矣夫春秋家犹重之况国乎国尔犹重之况天下乎故凡继其君虽兄弟必使子之继其大宗虽兄弟必使子之如继其君继其大宗而不使子是教不子而轻其所托也此文公所以受逆祀之贬也然春秋固为衰世法非太平正礼也太平之世未尝有也汉时定迭毁之礼丞相 成丞相衡引昭宣两帝并为昭独以孙为昭而不知礼无两昭使昭帝之天下无所传宣帝之天下无所受失礼意矣又惠帝文帝皆高祖子惠帝亲受之高祖文帝则受之惠帝虽皆兄弟此与闵公僖公何异哉存

当以臣子叙之死当以昭穆正之而汉世议者推文帝使上继高祖而惠帝亲受高祖天下者反不与昭穆之正至于光武当继平帝又自以世次为元帝之子上继元帝而为元帝后皆悖经违礼而不可传者也自汉世以来其议尤众皆曰兄弟不相为后不当以昭穆格之妄也若不以昭穆格之则天下受之谁乎凡人君以兄弟为后者必非有子者也引而为嗣臣子一体矣而当嗣者反以兄弟之故不继所受国而继先君则是所受国者竟莫有嗣之者也不可一矣生则以臣子事之死则以兄弟治之志生悖死不可二矣已实受之后君不受之先君今当自继先君者不唯弃后君命已之命又当废先君命兄之命不可三矣天下国家则归之已而父子之礼则耻不为不可四矣徐邈曰若兄弟昭穆者设兄弟六人为君至其后世当祀不及祖称此又妄之甚者礼有所极义有所继为之后者为之子所以正授受重祖统也兄弟六人相代为君亦六代祀祖称矣假令非兄弟相代其祖亦当迁矣不得故存也即如此言使有兄弟六人为君各自称昭是有十三庙也又其最后一君当上继先君而五君终为无后也岂其所以传重授国之意乎礼为人后者降其私亲设兄弟六君故当各自为嗣义不可曲顾其亲可谓祀不及祖称哉凡言礼者恶其谄时君之意苟曰益广宗庙大孝之本而不详受授之道春秋之义使当传国者不忍以国与其宗曰非吾子也当受国者又不肯以臣子之礼事其君曰非吾父也至令宗庙猥众昭穆骈积而鬼有不嗣者推生嗣死独可悖哉独可悖哉

濮安懿王典礼议 司马光

臣等谨按仪礼防服为人后者传曰何以三年也受重者必以尊服服之为所后者之祖父母妻妻之父母昆弟之子若子若子者皆如亲子也又为人后者为其父母传曰何以期也不贰斩也特重于大宗降其小宗也盖为人后者为之子不敢复顾私亲圣人制礼尊无二上若恭爱之心分施于彼则不得专一于此故也是以秦汉以来帝王有自旁支入承大统者或推尊父母以为帝后皆见非当时取讥后世臣等不敢引以为圣朝法况前代入继者多宫车晏驾之后援立之策或出母后或出臣下非如仁宗皇帝年龄未衰深惟宗庙之重祇承天地之意于宗室众多之中简拔圣明授以大业亲为先帝之子然后继体承祧光有天下濮安懿王虽于陛下有天性之亲顾复之恩然陛下所以负宸端冕富有四海子子孙孙万世相承者皆先帝之德也臣等愚贱不达古今窃以为今日所崇奉濮安懿王典礼一準先朝封赠期亲尊属故事高官大国极其尊荣谯国太夫人襄国太夫人仙游县君亦改封大国太夫人考之古今实为宜称

庙议 韩维

伏以亲亲之序以三为五以五为九上杀下杀旁杀而亲毕矣圣人制事存送终之礼皆以此为限是众人之所同也若其所不与众人同者则又因事之宜断之以义而为之节文也昔先王既有天下迹其基业之所由起奉以为太祖所以推功业重本始也盖王者之祖有系天下者矣诸侯之祖有系一国者矣大夫士之祖系其宗而止矣亦其理势然也荀卿曰王者天太祖诸侯不敢坏大夫士有常宗所以别贵始贵始德之本也盖有天下之始若后稷有一国之始若周公大夫士之始若三桓所以贵者配天也不祧也有常宗也此其所以别也今直以契稷为本统之祖则是下同大夫士之礼非荀卿之所谓别也或曰汤文武去契稷皆十有余世

其间子孙衰微奔窜者非一汤文武之有天下稷契何与哉曰南宫适曰禹稷躬稼而有天下孔子曰君子哉若大禹之有天下则然矣稷诸侯也而曰有天下何哉岂非积累功德至文王而兴乎孟子曰王不待大汤以七十里文王以百里然则小国亦王之所待也所谓七十里百里者非契稷所受以遗其子孙之国乎由是言之商周之所兴契稷不为无所兴也则正考父作颂追道契汤高宗所以兴子夏序诗称文武之功起于后稷岂虚语也哉国语亦曰契勤商十有四世而兴后稷勤周十有五世而兴谷梁曰始封必为祖南宫适孟轲卜子夏左丘明谷梁亦生于周代其所言皆亲闻而见之者其学问又俱出于孔子宜若可信则尊始祖以其功之所起秦汉诸儒亦有所受之也后世有天下者皆特起无所因故遂为一代太祖所从来久矣伏惟太祖皇帝以孝友仁圣睿智神武兵不血刃坐清大乱子孙遵业万世防泽功德卓然为宋太祖无少议者僖祖虽于太祖高祖也然仰迹功业未见其有所因上寻世系又不知其所始若以所事契稷奉之窃恐于古无考而于今亦有所未安也臣以均之论义未有以相夺仍旧便若夫藏主合食则历代尝议之矣然今之庙室与古殊制古者每庙异宫今所以奉祖宗者在一堂之上西夹室犹处顺祖之右考之尊卑之次似亦无嫌至于禘祫自是序昭穆之祭僖祖东向礼无不顺所谓子虽齐圣不先父食者也孔子曰于其所不知盖阙如也如臣绛等议非臣所知此臣所以阙而不敢同也

南北郊议 陈襄

臣谨按周礼大司乐以圆钟为宫冬日至于地上之圆丘奏之六变以祀天神以函钟为宫夏日至于泽中之方丘奏之八变以祭地示夫祀必冬至者以其气未复于上天之始也故宫用夹钟于震之宫以其帝出乎震也而谓之圆钟者取其形以象天也三一之变【圆钟为宫一变黄钟为角太簇为征姑洗为羽各一变】合阳奇之数也祭必以夏日至者以其阴气潜萌于下地之始也故宫用林钟于坤之宫以其万物致养于坤也而谓之函钟取其容以象地也四二之变【函钟为宫大簇为角姑洗为防南吕为羽各二变】合阴偶之数也又大宗伯以禋祀实柴燔燎祀其在天者而以苍璧礼之以血祭沈豕臠辜祭其在地者而以黄琮礼之皆所以顺其阴阳辨其时位仿其形色而以气类求之此二礼之不得不异也故求诸天而天神降求诸地而地示出得以通精诚而逆福厘以生烝民以阜万物此百王不易之礼也去周既远先王之法不行汉元始中奸臣妄议不原经意附防周官大合乐之说谓当合祭平帝从而用之故天地共犒礼之失自此始矣由汉历唐千有余年之间而以五月亲祠北郊者惟四帝而已如魏文帝之太和周武帝之建德隋高祖之开皇唐睿宗之先天皆希阔一时之举也然而随得随失卒无所定垂之本朝未遑厘正恭惟陛下恢五圣之述作举百王之废坠典章法度固已比隆先王之时矣岂袭后世一切之礼乎是以臣亲奉德音俾正讹舛讹舛之礼首宜正其大者大者不正而末节虽正无益也况天地岁祀今亦不废顾惟有司摄事而已诚未足以上尽圣诚恭事之意也臣以为既罢合祭则南北二郊自当别祀伏请陛下每遇亲祀之岁先以夏日至祭地示于方丘然后以冬至祀昊天于圆丘此所谓大者正也然议者或谓先王之礼其废已久不可复行古者齐居近【古者致齐路寝】仪卫省用度约赐予寡故虽一歲遍祀而国不费人不劳今也齐居远仪卫繁用度广赐予多故虽三歲一郊而犹或憚之况一歲而二郊乎必不获已则三年而迭祭或如后汉以正月上丁祠南郊礼毕次北郊或如南郊以正月上辛祠昊天次辛瘞后土不亦可乎臣窃谓不然记曰祭不欲疎疎则怠夫三年

迭祭则是昊天大神六年始一亲祀无已怠乎记曰大祀必顺天时二制之郊周公之制也舍是而从后王之失礼可谓法欤复议者徒知苟简之便而不睹尊奉之严也伏惟陛下鉴先王已行之明效举旷世不讲之大仪约诸司之仪卫而幸祠宫均南郊之赐予以给卫士蠲青城不急之役损大农无名之费使臣得以讲求故事叅究礼经取太常仪注之文以正其讹谬稽大驾卤簿之式以裁其繁冗惟以至恭之意对越大祇以迎至和格纯嘏庶成一代之典以示万世

宋文鉴卷一百五

卷一百六

钦定四库全书

宋文鉴卷一百六

宋吕祖谦编

议

救灾议 曾巩

河北地震水灾隳城郭坏庐舍百姓暴露乏食主上忧悯下缓刑之令遣持循之使恩甚厚也然百姓患于暴露非钱不可以立屋庐患于乏食非粟不可以饱二者不易之理也非得此二者虽主上忧劳于上使者旁午于下无以救其患塞其求也有司建言请发仓廩与之粟壮者人日二升防者人日一升主上不旋日而许之赐之可谓大矣然有司之言特常行之法非审计终始见于众人之所未见也今河北地震水灾所毁败者甚众可谓非常之变也遭非常之变者亦必有非常之恩然后可以振之今百姓暴露乏食已废其业矣使之相率日待二升之廩于上则其势必不暇乎他为是农不复得修其 亩商不复得治其货賄工不复得利其器用间民不复得转移执事一切弃百事而専意于待升合之食以偷为性命之计是直以饿殍之养养之而已非深思远虑为百姓长计也以中户计之户为十人壮者六人月当受粟三石六斗防者四人月当受粟一石二斗率一户月当受粟五石难可以久行也则百姓何以贍其后久行之则被水之地既无秋成之望非至来歲麦熟賑之未可以罢自今至于来歲麦熟凡十月一户当受粟五十石今被灾者十余州州以二万户计之中户以上及非灾害所被不仰食县官者去其半则其仰食县官者为十万户食之不遍则为施不均而民犹有无告者也食之偏则当用粟五百万石而后可以办此又非深思远虑为公家长计也至于给授之际有淹速有均否真伪有防集之扰有辨察之烦厝置一差皆足致 又羣而处之气久蒸薄必生疾病此皆必至之害也且此不过能使之得旦暮之食耳其于屋庐构筑之费将安取哉屋庐构筑之费既无所而就食于州县必相率而去其故居虽有頽墙坏屋之尚可完者故材旧瓦之尚可因者什器众物之尚可赖者必弃之而不暇顾甚则杀牛马而去者有之伐桑枣而去者有之其害又可谓甚也今秋气已半霜露方始而民露处不知所蔽盖流亡者亦已众矣如不可止则将空近塞之地空近塞之地失战鬪之民此众士大夫之所虑而不可谓无患者也空近塞之地失耕桑之民此众士大夫所未虑而患之尤甚者也何则失战鬪之民异时有警边戍不可以不增尔失耕桑之民异时无事边籩不可以不贵矣二者皆可不深念欤万一或出于无俚之计有窥仓库盗一囊之粟一束之帛者彼知己负有司之禁则必鸟骇防窜窃弄锄梃于草茅之中以扞游徼之吏彊者既器而动则弱者必随而聚矣不幸或连一二城之地有枹鼓之警国家胡能晏然而已乎况夫外有夷狄之可虑内有郊祀之将行安得不防之于未然销之于未萌也然则为今之策下方纸之诏赐之以钱五十万贯贷之以粟一百万石而事

足矣何则今被灾之州为十万户如一户得粟十石得钱五千下户常产之贐平日未有及此者也彼得钱以完其居得粟以给其食则农得修其 亩商得治其货賄工得利其器用间民得转移执事一切得复其业而不失其常生之计与専意以待二升之廩于上而势不暇乎他为岂不逮哉此可谓深思远虑为百姓长计者也由有司之说则用十月之费为粟五百万石由今之说则用两月之费为粟一百万石况贷之于今而收之于后足以振其艰乏而终无损于储待之实所实费者钱五钜万贯而已此可谓深思远虑为公家长计者也又无给授之疾疠之忧民不必去其故居苟有頽墙坏屋之尚可完者故材旧瓦之尚可因者什器众物之尚可赖者皆得而不失况于全牛马保桑枣其利又可谓甚也虽寒气方始而无暴露之患民安居足食则有乐生自重之心各复其业则势不暇他为虽驱之不去诱之不为盗矣夫饥岁聚饿殍之民而与之升合之食无益于救灾补败之数此常行之 法也今破去常行之 法以钱与粟一举而赈之足以救其患复其业河北之民闻诏令之出必皆喜上之足赖而自安于 亩之中负钱与粟而归与其父母妻子脱于流转死亡之祸则戴上之施而懷欲报之心岂有已哉天下之民闻国家厝置如此恩泽之厚其孰不震动感激悦主上之义于无穷乎如是而人和不可致天意不可悦者未之有也人和洽于下天意悦于上然后玉路徐动就阳而郊荒夷殊陬奉币来享疆内安辑里无嚣声岂不适变于可为之时消患于无形之内乎此所谓审计终始见于众人之所未见也不早出此或至于有一有枹鼓之警则虽欲为之将不及矣或谓方今钱粟恐不足以办此夫王者之富藏之于民有余则取不足则与此理之不易者也故曰百姓足君孰与不足百姓不足君孰与足盖百姓富实而国独贫与百姓饿殍而上独能保其富者自古及今未之有也故又曰不患贫而患不安此古今之至戒也是故古者二十七年耕有九年之畜足以备水旱之灾然后谓之王政之成唐水汤旱而民无捐瘠者以是故也今国家仓库之积固不独为公家之费而已凡以为民也虽仓无余粟库无余财至于救灾补败尚不可以已况今仓库之积尚可以用独安可以过忧将来之不足而立视天民之死乎古人有言曰剪爪宜及肤割髮宜及体先王之于救灾发肤尚无足爱况外物乎且今河北州军凡三十七灾害所被十余州军而已他州之田秋稼足望令有司于余粟常价斗增一二十钱非独足以利农其于增余一百万石易矣斗增一二十钱吾权一时之事有以为之耳以实钱给其常价以茶薺香药之类佐其虚估不过捐茶薺香药之类为钱数钜万贯而其费已足茶薺香药之类与百姓之命孰为可惜不待议而可知者也夫费钱五钜万贯又捐茶薺香药之类为钱数钜万贯而足以救一时之患为天下之计利害轻重又非难明者也顾吾之有可能越拘挛之见破常行之法与否而已此时事之急也故述斯议焉

赏罚议 赵瞻

世之大患在赏罚焉赏以微文悞贤罚以定令幸奸则是国代贤者辞而法为奸人地也有吏于此赍伐阅诣考课曹曹必曰某在斯职事若干年当适其官某在斯课最若干数当增某秩斯人大贤大不肖虽朝廷王公不得擅辄议其存舍动摇者或迹状白着有非常不在诏令则以问故事与令有所差驳突兀亦不为举夫以贤者难进易退廉耻谦服之心詎非伐之辞者欤若尔伊尹太公常齿匹夫传说箕子常编絜囚冀缺 戚常伍耕农管仲五穀常没虜获尚屑与时争盆鼓之逋赋列时刻之积効而邀迁次邪又或以罪付理官曹曹必曰以甲令当某罚以乙诏当某科有轻重疑则为奏以请上上之所进退亦旁法律寸尺尔夫以奸人狡狴窥

幸之备诘非为之地者欤且唐虞流共工放驩兜汤诛尹谐文王诛潘正太公诛华仕管仲诛傅里乙子产诛邓析史传孔子诛少正卯周书有三风十愆礼经有四诛无赦孟轲以杨朱墨翟邪说之无君亲者拒之荀卿以宋钐公孙龙众惑之乱名实者禁之故若晋羊舌鲋以掠美尸齐阿大夫以虚誉烹弥子瑕佞幸以忠孝而得罪郭解豪侠似仁义而防戮皆奸雄桀黠伤蚀风教之尤者然以之示有司则罪无所当矣非勉宽仁之治也非保贼乱之党也徒律令无所处焉也赏与罚如是驰步帝皇之涂而未底者所以趣之之辙异也或谓若之所赞者古也今之所用者时也若居今时而用古殆不可与权矣张选举之程法补调之品目犹曰未也况以尧舜之所病与三代之明哲而责有司哉又若前主律后主令附丽验治劾讞煅成犹曰未也况以难明之状可惑之事而亟致大戮哉正尔如赏僭及淫人刑僭及善人何此大不然且责君于难谓之恭吾君不能谓之贼彼曷独不欲举县官于尧舜三代之隆乎夫人之辞行技能号为搜索而寘朝廷矣才具器识号为量度而縻爵位矣斯岂他术哉视必得贤者而后任之有司尔真贤实廉不次求索则有司之明也上之察也壬人大奸赫然诛殛亦有司之明也上之察也岂它术哉上如不察有司不贤虽区区于秩次事事于律令顾益资其窥测者岂有补邪但古用此亦治今用此亦治不能用则皆未如之何也又安在权不权使今得一伊尹太公而赏之天下非乎不也得一共工驩兜而罚之天下非乎不也若赏伯夷而问盗跖罚穷奇而谄鬻饕餮恶可

议御戎 仲 诤

或曰西北三戎大与之结好次宠以爵赐予至厚羈縻宜得而兵未克弭古称御戎无上策良信哉愚曰斯之惑久矣言乎御者诚非也秦以之亡汉因而匱尚有策哉然则若何御之非足尚也当用气胜之耳奚为而言夫天高而尊者阳也地卑而浊者陰也君子阳也小人陰也中国阳也四夷陰也取胜之道存乎其类尧舜禹汤之为君君子则举小人则诛君子道长小人道消气由其类胜天为之清日为之明至于鸟兽鱼鼈咸若边境其有不驯乎是阳气胜而陰不能奸也故二帝三王之世边境之患无甚焉秦汉之下德衰而力雄善有闻而不举举有用而不终恶有彰而不去去有诛而不尽君子之道不竞小人之势日进故日为之蚀地为之震纖草槁木横出妖孽况四裔乎是陰气胜而阳不得立也故边境之患始滋焉西北二方彼陰也东南二方我阳也又以盟约之信邀之宗显之号荣之贺遗其福庆吊恤其防死可谓至仁至恩也而戎心未怀非策之不至推其类殆气之未胜也王者据正阳之尊赫然而神圣之明辟四门四目之视大自三吏九卿下至百执庶官宜有奸回佞妄杂居正人君子之侧使皇极之道壅而未行陰淫之气上应于天故地震屋坏杀人日食正歲朔雨晦风霾并歲而至戎狄因之而狂陰邪胜而然耳非不怀也为之谋者上当端然自立拔方正之士与之共事推善而诛恶集贤而退不肖材者使得効其用智者使得进其谋则上下之志一通正道得立必先天清地宁日星风雨时序如是则夷狄之患奚虑也且将厥角而来庭书曰而难任人蛮夷率服斯正气之胜乎必斯之不务而将废天下之农起天下之兵大举而从之奈无策何奈何

议水 王【缺】

古者之治五行也必有五行之官其去民用尤近而逆其理则有败害之端莫甚于水故官得

其任则不忧乎水之败害识其势也是以舜命益作虞以掌山泽周有川泽之禁而后世修之未尝废也由秦汉以来使任其事而为之水官则莫若都水之职其主灌溉陂池保守河渠自太常及三辅皆有其官至武帝之时尤增重之于是又有左右使者使统其任而居其事者莫不明于禹贡之学而习于知水之性故刘向以治书为三辅都水都尉平当以明禹贡领防河隄盖其任职之人未尝不修其事而又有水工之徒以佐知其利害是以秦汉之际言水事于书尤着而魏晋已来至于隋唐其官亦未尝废于魏则有都尉水衡之号晋宋齐皆曰都水台或为水衡令及梁天监中始改曰太舟卿而主治舟航河隄隋唐之时又皆为都水使者或改曰监而舟楫河渠二署之然于水事或领或否矣故天下不喻于水而失其水之性使以忧中国者起矣国家比歲之间水之为害亦甚矣自京城之中民被其苦亦暴而衍溢者厯月不知所以泄之今国家惩前日之患而求于秦汉之故为之都水之任專其有司欲以知水之性此虑患之本也夫以患而设备求其功效而使之不为虚位则天下宜有明于水性若秦汉之间所谓水工者出矣苟得其水工而又以知水者居其任使之專其职而行于天下就视其水之利害得以循其故而治之不使数迁其任责之课最而信其黜陟则官得其人而分定则事益修矣故为今之虑水莫若如此

浑仪议 沈括

五星之行有疾舒日月之交有见匿求其次舍经躔之防其法一寓于日冬至之日日之端南者也日行周天而复集于表锐凡三百六十有五度四分度之几一而谓之歲周天之体日别之谓之度度之离其数有二日行则舒则疾防而均别之曰赤道之度日行自南北升降四十度有八度而迤别之曰黄道之度度不可见其可见者星也日月五星之所由有星焉当度之画者凡二十有八而谓之舍舍所以挈度度所以生数也度在天者也为之玑衡则度在器度在器则日月五星可以抟乎器中而天无所豫也天无所豫则在天者不为难知也自汉以前为厯者必有玑衡以自验迹其后虽有玑衡而不为厯作为厯亦不复以器自考气朔星纬而皆莫能知其必当之数至唐厯僧一行改步大衍厯法始复用浑仪参贯故其术所得比诸家为多臣尝厯考古今仪象之法虞书所谓璿玑玉衡唯郑康成粗记其法至落下闳制圆仪贾逵又加黄道其详皆不存于书其后张衡为铜仪于密室中以水转之盖所谓浑象非古之玑衡也吴孙氏时王蕃陆绩皆尝为仪及象其说以谓旧以二分为一度而患星辰稠穰张衡改用四分而复推重难运故蕃以三分为度周丈有九寸五分寸之三而具黄赤道焉绩说以天形如鸟卵小楮而黄赤道短长相害不能应法至刘曜时南阳孔定制铜仪有双规正距子午以象天有横规判仪之中以象地有持规斜络天腹以赤道南北植干以法二极其中乃为游规窥管刘曜太史令晁崇斛兰皆尝为铁仪其规有六四常定一象地一象赤道其二象二极乃定所谓双规者也其制与定法大同焉唯南北柱曲抱双规下有纵衡水平以银错星度小变旧法而皆不言有黄道疑其失传也唐李淳风别为圆仪三重其外曰六合有天经双规金浑纬规金常规次曰三辰转于六合之内圆径八尺有璿玑规月游规所谓璿玑者黄道属焉又次曰四游南北为天枢中为游筭可以升降游转别为月道傍列二百四十九交以防月游而一行以为难用而其法亦亡其后率府兵曹梁令瓚更以木为游仪因淳风之法而稍附新意诏与一行杂校得失改铸铜仪古今称其详确至道中初铸浑天仪于司天监多因斛兰晁崇之法皇祐中改铸铜仪于天文院始用令瓚一行之论而去取交有失得臣今攷古今之說

以求数象有不合者十有三事其一旧说以谓今中国于地为东南当令西北望极星置天极不当中北又曰天常倾西北故极星不得居中臣谓以中国观之天常北倚可也谓极星偏西则不然所谓东西南北者何从而得之岂不以日之所出者为东而日之所入者为西乎臣观古之候天者自安南都护府至浚仪大岳台才六千里而北极之差凡十五度稍北不已庸詎知极星之不直人上也臣尝读黄帝素问书立于午而面子立于子而面午至于自卯而望西自酉而望卯皆曰北面立于卯而负西立于酉而负卯至于自午而望南自子而望北则皆曰南面臣始不谕其理逮今思之乃常以天中为北也常以天中为北则盖以极星常居天中也素问尤为善言天者今南北才五百里则北极辄差一度以上而东南西北数千里间日分之时日未尝不出于卯半而入于酉半则又知天枢既中则日之所出者定为东日之所入者定为西天枢则常为北无疑矣以衡窥之日分之时以浑仪抵极星以俟日之出没则在卯酉之半少比此殆放乎四海而同者何从而知中国之为东南也彼徒见中国东南皆际海而为是说也臣以谓极星之果中果非中皆无足论者彼北极之出地千里之间所差者已如是又安知其茫昧几千万里之外邪今直当据建邦之地人目之所及裁以为法不足以为法者宜置而勿议可也其二曰紘平设以象地体今浑仪置于崇台之上下瞰日月之所出则紘不与地际相当者臣详此说虽粗有理然天地之广大不为一台之高下有所推迁盖浑仪考天地之体有实数有準数所谓实者此数即彼数也此移赤彼亦移赤之谓也所谓準者以此準彼此之一分则準彼之几千里之谓也今台之高下乃所谓实数一台之高不过文数彼之所差者亦不过此天地之大岂数丈足累其高下若衡之低昂则所谓準数者也衡移一分则彼不知其几千里则衡之低昂当慎而台之高下非所当防也其三月行之道过交则入黄道六度而稍却复交则出于黄道之南亦如之月行周于黄道如绳之绕木故月交而行日之陰则日为之亏入蚀法而不亏者行日之阳也每月退交二百四十九周有奇然后复防今月道既不能环绕黄道又退交之渐当每日差池今必候月终而顿移亦终不能符防天度当省去月环其候月之出入專以厯法步之其四衡上下二端皆径一度有半用日之径也衡端不能全容日月之体则无由审日月定次欲日月正满上衡之端不可动移此其所以用一度有半为法也下端亦一度有半则不然若人目迫下端之东以窥上端之西则差几三度凡求星之安必令所求之星正当穿之中心今两端既等则人目游动无因知其正中今以句股法求之下径三分上径一度有半则两窍相覆大小略等人目不摇则所察自正其五前世皆以极星为天中自祖亘以玑衡窥考天极不动处乃在极星之末犹一度有余今铜仪天枢内径一度有半乃谬以衡端之度为率若玑衡端平则极星常游天枢之外玑衡小偏则极星乍入令瓚旧法天枢乃径二度有半盖欲使极星游于极中也臣考验极星更三月而后知天中不动处远极星乃三度有余则祖亘窥考犹为未审今当为天极径七度使人目切南极望之极星正循北极里周常见不隱天体方正其六令瓚以辰刻十干八卦皆刻于紘然紘正平而黄道斜运当子午之间则日径度而道促卯酉之际则日逕行而道舒如此辰刻不能无谬新铜仪则移刻于纬四游均平辰刻不失然令瓚天中单环直中国人顶之上而新铜仪纬斜络南北极之中与赤道相直旧法设之无用新仪移之为是然当侧规如车轮之牙而不当衡规如鼓陶其傍迫狭难赋辰刻而又蔽映星度其七司天铜仪黄赤道与紘合铸不可转移虽与天运不符至于窥测之时先以距度星考定三辰所舍复运游仪抵本宿度乃求出入黄道及去极度所得无以异于令瓚之术其法本于晁崇斛兰之旧制虽不甚精缛而颇为简易李淳风尝谓斛兰所作铁仪赤道不动乃如胶柱以考月日差或至十七度少不减十度此正谓直以赤道候

月行其差如此今黄道赤道再运游仪抵所舍宿度求之而月行则以月历每日去极度算率之则不可谓之胶也新法定宿而变黄道此定黄道而变宿但可赋三百五十五度而不能具余分此其为略也其八令瓚旧法黄道设于月道之上赤道又次月道而玑最处其下每月移交则黄赤道辄变今当省去月道徙玑于赤道之上而黄道居赤道之下而二道与衡端相迫而星度易审其九旧法规环一面刻周天度一面加银丁所以施银丁者夜天晦不可目察则以手切之也古之人以璿为之璿者珠之属也今司天监三辰仪设齿于环背不与横箫防当移列两旁以便参察其十旧法重玑皆广四寸厚四分其他规轴重朴拙不可旋运今小损其制使之轻利其十一古之人知黄道岁易而不知赤道之因变也黄道之度与赤道不得独胶今当变赤道与黄道同法其十二旧法黄赤道平设正当天度掩蔽人目不可占察其后乃别加钻孔尤为拙谬今当侧置少偏使天度出北际之外自不凌蔽其十三旧法地纆正络天经之半凡三辰出入则地际正为地纆所伏今当徙纆稍下使地际与纆之上际相直候三辰伏见専以纆际为法自当默与天合

边议四首 张 载清野

城中之民既得以依城自郊外百姓朝廷不豫为之虑非溃亡失生则杀戮就死纵或免焉则其老防孳畜屋庐积聚莫不为之驱除荡焚与死亡均矣欲为之计莫如选吏行边为讲族间隣里之法问其所谋谕之休戚使之乐羣以相聚协力以相资听其依山林据险阻自为免患之计官不拘制一从其宜则积聚防老得以先自为谋而处之有素寇虽深入野无所资而民免诛掠此为计之当先者也

固守

师为敌致则防陷之患多城不自完则应援之兵急凡今近边城邑尤当募善守之人计定兵力度使势可必全不假外救足以枝梧逾月应援之师不为仓皇牵制则守必力而师不劳此御患之尤急者也然所谓善守者要以省兵为能假设一城之小千夫可完不才者十倍之而未必固善守者加损之而尚可全则守城乘障之人必也力与之计而省吾兵厚赏其功而示之信

省戍

戍而费财岂善戍之计欲不费必也计民以守不足然后益之以兵如是则为守之力在民居多而用兵无几守既在民则今日守兵凡城有余皆得以移用他所或乘间出战以自解其围矣窃计关内守余之兵无虑十万四帅之城各余万人为备问其多少之 此其大略也则举中大数有移使之卒常不减六七万人义勇既练则六七万人从而省去亦攻守为有余矣兵省费轻就使戎垒对峙用日虽多而吾计常足顾朝廷未尝资守于民以兵多为患耳种世衡守环州吏士有罪射中则释之僧道饮酒犯禁能射则纵之百姓系者以能射则必免租税逋负者以能射必宽当是时环之内外莫不人人乐射一州之地可不用一卒而守以此观之省戍岂甚难之计哉

困民

计民以守必先相视城池大小夫家众寡为力难易为地缓急周围步尺莫不尽知然后括以保法萃以什伯形以图绘稽以文籍使其居处正其分位平时使之知所守识所向习登降时缮完贼至则授甲付兵人各谨备老防供饷妇女守室如是则民心素安伎艺素讲寇不能恐吏不能侵无仓卒之变无颠乱之忧民力不足然后济之以兵此三代法制虽万世可行不止利今日之民

世守边郡议 吕大钧

中国之大戒无急于边防自秦汉以来御戎之策是非未能相逮窃尝求三代之法宜于今日而推行之乃知圣人封建之深意不独尚德专治吾民而已其御边之要微妙深邃固在术内殆非众人之智所可及已盖天下之势不得不一亦不得分分而不一则上无以制命而为下者肆一而不分则下无以陈力而为上者劳故古者分天下为列国统万国于一王使礼乐征伐一出于天子教治禁令一委之诸侯则是天子持威福之柄优游于内以专察国君之善恶诸侯任过功之责勤劳于外以同体王室之休戚如是则四方之警急何以急天子之视听哉彼不任吾患者吾得执而戮之孰敢失职所以待夷狄者特招携以礼懷遠以德而已在商之时古公以皮币犬马珠玉事獯鬻而商王不知在周之时晋国拜戎不暇而周室不与然则三代御边之略盖可知已臣窃谓分割天下以为列国则未敢轻议如使边郡略法古意慎选仁勇之士使得世守郡事兵民措置悉以委之租调出入一切不问惟财用不足者附以次边支郡以供其乏其治以安静不扰敌人感服者为上富彊自守彼不能犯者次之战胜攻取无所退屈者又次之赏罚者增损其名位而已甚者则升黜之不使轻去其郡若此则安危利害不离其身势不得不尽其力以从事尽心以防患所谓世守者亦不得纯如周制父子相继必使选贤以自代母问亲疎天子加察焉然后可之遂使贰其郡事以终举者之身然后命之没则祿其子孙以祀之若有功德则郡人世世祀之仍爵其子孙庶几亦可以为备边之一术也

选小臣宿卫议 吕大钧

古者人主左右前后使令执事之小臣乃所以朝夕起居出入不可湏臾离者也其用之迹虽主于给宿卫备顧問指以共綴衣虎贲执射执御之职其用之意则亦使之献可替否拾遗补阙以替疑丞保傅之事主于给宿卫备使令则非恪勤谨重者不可以当其任使之献可替否拾遗补阙则非开爽敏茂者不足以充其位此言犹未之尽古之人君不独有师有友又有受教于我者焉故疾医小艺者也黄帝师奚伯而教雷公费国小邦也惠公友顔般而役长息然则使令执事之小臣虽在择恪勤谨重开爽敏茂之资人主又当教诲养育使臣成就其材以补异时公卿大夫之阙如此则朝廷常不乏材而人主求之且不劳也以汉唐之苟简其名犹多出于宿衛供奉之官岂非常在宫省日侍帷幄既已接闻庙堂之议以广其知识间复亲被德音诲其所未至则益知善恶向背之理薰炙渐渍久而不已安有不化者哉不徒其效如此又可以自广其聪明之德记曰教学相长也又曰教然后知困彼既知向背则必尽其心力以承学于上上之人既乐其自勉亦必尽以教之或因其善问有以起吾志或因其难进有以勉吾

业传曰教不倦仁也又曰有教无类则不徒可以益吾之志业又可以广吾之德性也记曰善教者知至学之难易又知其美恶则不徒广吾之德性又可以广吾知人之明也为人君而乘政事之间以教育执事之小臣乃有志业德性知人之益岂小补哉今朝廷虽有中书门下两省官以备侍从又有翰林舍人院及诸馆阁之臣以备顾问非乏人也充其选者又皆美材敏行非不贤也既以待之不为缀衣虎贲射驭之冗亦难复使从使令执事之贱似宜略依汉制郡国贡士给宿卫之法诏公卿牧守如孔门四科之目各使保任三二人不以仕与未仕限年二十以上三十以下其人则分 中书门下省学士舍人院及馆阁诸司其职则参诸殿侍诸班之职其禄秩则视三班使臣州县掾属而已其间暇则各受学于其官长退而以所学开谕其同列仍不立迁擢废置之格其有功罪善恶一听明主裁决而已如此则素无行能者必不得举不安其分者必不愿为自非朴茂有志之士不可得而与焉试或行之不过五七年不徒得高才美行可备器使亦将资助盛德大业必将日新而无穷凡在位执事之小臣亦当渐摩义理之益相观而善可不务乎

民议 吕大钧

为国之计莫急于保民保民之要在于存恤主户又招诱客户使之置田以为主户主户苟众而邦本自固今访闻主户之田少者往往尽卖其田以依有力之家有力之家既利其田又轻其力而臣仆之若此则主户益耗客户日益多客虽多而转徙不定终不为官府之用今欲将主户之田少者合众户共及二顷以上方充一夫之役其兼并之家人少而田多者复计其田每三顷执一夫之役主户不足以客户足之

皇族称伯父叔父议 顔 复

礼记大传君有合族之道族人不得以其戚戚君位者合族之时族人不得以父兄之尊齿君之位为正尊卑之序而发也仪礼公子不得称先君谓别子之子始以别子为诸侯立庙而发也二者无害称之为厚三代盛时天子谓同姓诸侯曰伯父叔父异姓诸侯曰伯舅叔舅虽无定则原此而论不必于上下相接之际皦皦区异远近以伤亲亲之意唐德宗宣宗之世有分从称姓之令亦縁其政苛刻寡恩而然国朝祖宗敦睦九族自有博大之制逮符三代之风若唐衰一时之令不足稽攷

议官 李清臣

原今之大敝皆入仕之门杂而众也入仕之门杂而众故仕者日蕃故有罢职而归几涉三歲不得再调者进未得禄仕退失其田庐故寒廉之人身虽挂仕版名虽荣圣世而无资以继其生盼盼焉常不得其所上急于父母甘旨 髓之养下迫于妻孥之饘粥则节不笃者或乘其间隙匱困之时起而牟利贾贩江湖干托郡邑商算盈缩秤较毫厘匿关市之征逐舟车之动以规什一之得进则王宫退则为市人进则冕笏而治事号为民师退则妄覬苟获不顾行义故仕路污辱而廉耻之风大坠朝廷患仕者之日蕃无职以处之且使罢者久不获其所故难棘其涂以蹈借来者而有司苛为之文迂为之格张设难漏之密网罗取非意之细罪离合增

广其荐员使其不得应条缺駁迟其歲考使其不得满课从是而仕者益难故战薄于得失角逐于势利前者冒昧以进后来竞隘而夸驰其轻伪佻浅之流更相眄伺迭相攻攘相诛不操矛相覆不设阱而媮风炽险涛作恬让静默真能实德之士或羞与之偶宁自却于羁旅草野而不入于其涂有耻者上欲进之而日益退无耻者上欲退之而日益进徒歲为一禁时下一令详明深切絕约而条责之揭而示之以义利之路曰尔为笃厚无为薄恶如是将以复仁义革士风臣窃以为无益也故臣谓天下之大敝由仕者蓄仕者蓄由入仕之门杂而众也夫入仕之门乃敝之原已而议者不塞其原欲止其流不迹其本欲救其末不能清入仕之门而束縛爬栴痛治其已仕者入仕之时如数兵徒如积麻竹不知名器之可惜已仕之后如障寇盜如阢螟蝗不知士心之愈离臣愚以为过矣故愿陛下清入仕之门入仕之门简则职有余格吏无冗员而禄得以继污者反其廉困者遂其节争者息其险让者策其高仕路平夷而风化易隆矣

官制 毕仲游

国家承五季之后典章制度号令文采虽未纯于三代盖皆有三代之意而髣髴焉至于慎刑罚息兵革宽仁尽下爱养元元得天下之心则有与三代比者独官名自宰相而下至于百职执事循用五季之旧而不知改天子临朝太息于上而公卿大夫咨嗟悼叹发愤于下者不知几十年矣及神宗皇帝同人心决大策以阶寄禄而修复汉唐二省之制宜其欢呼鼓舞以庆朝廷之盛德而行之五年公卿大夫犹有不悵于官制者岂未改之前尝厌五代之无法既改之后复云汉唐之非是则官名之所失如何而可盖国朝虽循三代之旧而二十四司之名皆第之以待百官当选者在省之官及假他官以制之如兵部为枢密吏部为铨审库部金部为三司水部为都水刑部为大理名 尚书而事在他局者不可以为后世法则先帝之改制无可议者而改制之中有非汉唐之旧而未合于今日之务旧平章事迁中书令国朝以来未有迁至中书舍人者而令仪同三司一阶兼昔日宰相累迁之官旧礼部尚书迁户部工部迁刑部刑部迁兵部而今银青光禄大夫一阶兼昔日尚书累迁之官旧礼部侍郎迁户部户部迁吏部工部侍郎迁刑部刑部迁兵部而今正议大夫一阶兼昔日侍郎累迁之官卿寺亦然昔之官品难于进今之阶秩易为高而又降七品为八品降五品为六品降三品为四品至其不可用也则议请减防反以旧品为定而章服之令徒降五为六降三为四以迁就新品之失而不知义理之所在则所谓非汉唐之旧而不合今日之务者可验于此然犹未有害也旧尚书省不总天下之政而中书门下合而为一则其治速今尚书省总天下之政而中书门下析而为二则其治缓此理之固然者至所谓画黄錄符牒关刺由上而下复由下而上近者浹旬遠者累月有夜半停印待报而其务乃比于竹茹木屑之细或者补衣贷食未得其决而事久失于期防则非惟不合今日之务而良有害公卿大夫所以不悵于官制者以此亦在上之人损益之而已矣盖隋唐二十有九而今寄禄阶二十有五如益其阶所与旧日之官品相对无并三迁两迁而为一阶则阶正矣还旧日之品秩凡议请减防服章之名必合三五七九之数无易前古之常以就新品之失则品正矣事大而变则由寺监而上台省或由台省而下寺监事速而小者则许之專决或專达而不为次第上下之道久则事正矣阶正则朝廷尊名器重品正则义理安民志定事正则三省无滯务而遠近之人皆不失于期防修此三者而官制立矣岂以汉唐之官名不当复而五代之季为可循也

宋文鑑卷一百六

卷一百七

钦定四库全书

宋文鉴卷一百七

宋吕祖谦编

说

怪说上 石介

三才位焉各有常道反厥常道则谓之怪矣夫三光代明四时代终天之常道也日月为薄蚀五星为彗孛可怪也夫五岳安焉四渎流焉地之常道也山为之崩川为之竭可怪也夫君南面臣北面君臣之道也父坐子立父子之道也而臣抗于君子敌于父可怪也夫中国圣人之常治也四民之所常居也衣冠之所常聚也而髡髮左衽不士不农不工不商为夷者半中国可怪也夫中国道德之所治也礼乐之所施也五常之所被也而汗漫不经之教行焉妖诞幻惑之说满焉可怪也夫天子七庙诸侯五庙大夫三庙士二庙庶人祭于寝所以不忘孝也而忘而祖废而祭去事夷狄之鬼可怪也夫法施于民则祀之以死勤事则祀之以劳定国则祀之能御大菑则祀之能捍大患则祀之弃能殖百谷祀以为稷后土能平九州祀以为社帝啻尧舜禹汤文武有功烈于民者也夫日月星辰民所瞻仰也山林川谷丘陵民所取财也非此族也不在祀典而老观佛寺徧满天下可怪也人君见一日蚀一星缩一风雨不调顺一草木不生殖则能知其为天地之怪也乃避寝减膳彻乐恐惧责已修德以禳除焉彼其灭君臣之道絶父子之亲弃道德悖礼乐裂五常迁四民之常居毁中国之衣冠去祖宗而祀夷狄汗漫不经之教行妖诞幻惑之说满则反不知为怪既不能禳除之又崇奉焉时人见一狐媚一鵲噪一梟鸣一雉入则能知其为人之怪也乃啓咒祈祭以厌胜焉彼其孙其子其父其母忘而祖宗去而父母离而常业裂而常服习夷狄则反不知其怪既厌胜之又尊异焉愈可怪也甚矣中国之多怪也人不为怪者几少矣噫一日蚀一星缩则天为之不明一山崩一川竭则地为之不宁释老之为怪也千有余年矣中国蠹坏亦千有余年矣不知更千余年释老之为怪也如何中国之蠹坏也如何尧舜禹汤文武周公孔子不生吁

怪说下 石介

或曰天下不谓之怪子谓之怪今有子不谓怪而天下谓之怪请为子而言之可乎曰奚其为怪也曰昔杨翰林欲以文章为宗于天下忧天下未尽信已之道于是盲天下人目聋天下人耳使天下人目盲不见有周公孔子孟轲扬雄文中子吏部之道使天下人耳聋不闻有周公孔子孟轲扬雄文中子吏部之道俟周公孔子孟轲扬雄文中子吏部之道防乃发其盲开其聋使天下唯见已之道唯闻已之道莫知其它今天下有杨亿之道四十年矣今人欲反盲天

下人目聾天下人耳使天下人目盲不見有楊億之道使天下人耳聾不聞有楊億之道俟楊億道防反發其盲開其聾使目唯見周公孔子孟軻揚雄文中子吏部之道耳唯聞周公孔子孟軻揚雄文中子吏部之道周公孔子孟軻揚雄文中子吏部之道堯舜禹湯文武之道也三才九疇五常之道也反厥常則為怪矣夫書則有堯舜典臯陶益稷謨禹貢箕子之洪範詩則有大小雅周頌商頌春秋則有聖人之經易則有文王之繇周公之爻夫子之十翼今楊億窮研極態綴風月弄花草淫巧侈麗浮華纂組剗鏤聖人之經破碎聖人之言離析聖人之意蠹傷聖人之道使天下不為書之典謨禹貢洪範詩之雅頌春秋之經易之繇爻十翼而為楊億之窮研極態綴風月弄花草淫巧侈麗浮華纂組其為怪大矣是人欲去其怪而就于無怪今天下反為之怪而怪之嗚呼

唐說 尹源

世言唐所以亡由諸侯之彊此未極于理夫弱唐者諸侯也唐既弱矣而久不亡者諸侯維之也燕趙魏首亂唐制專地而治若古之建國此諸侯之雄者然皆恃唐為輕重何則假王命以相制則易而順唐雖病之亦不得而外焉故河北順而听命則天下為亂者不能遂其亂河北不順而變則奸雄或附而起德宗世朱泚李希烈始遂其僭而終敗亡者田悅叛于前武俊順于后也憲宗討蜀平夏誅蔡夷郢兵連四方而亂不生卒成中兴之功者田氏秉命王承宗歸國也武宗將討劉稹之叛先諭三鎮絕其連衡之計而王誅以成如是二百年奸臣逆豎專國命者有之夷將相者有之而不敢窺神器非力不足畏諸侯之勢也及廣明之后關東無復唐有方鎮相侵伐者猶以王室為名及梁祖舉河南劉仁恭輕戰而敗羅氏內附王鎔請盟于時河北之事去矣梁人一舉而代唐有國諸侯莫能与之爭其勢然也向使以僖昭之弱乘巢蔡之亂而田承嗣守魏王武俊朱滔據燕趙彊相均地相屬其勢宜莫敢先動況非義舉乎如此雖梁祖之暴不過取伯于一方耳安能彊禪天下故唐之弱者以河北之強也唐之亡者以河北之弱也或曰諸侯強則分天子之勢子何議之過乎曰秦隋之勢無分于諸侯而亡速于唐何如哉

雜說 劉敞

善治天下者求之于其身而已矣耳也者所以听也目也者所以視也口也者所以言也心也者所以思也手也者所以攬也足也者所以走也凡此數者相待而成相湮而生廢之則病缺之則防然而莫相易也莫相德也分定故也聖人之治天下能使百官萬物如耳目心口手足之不可相易亦不相德濟之如一身而天下安有不治哉屠羊說者楚之屠羊者也當昭王之時吳兵入郢昭王奔走屠羊說有功焉王定而賞之屠羊說曰不可王始失國吾亦失屠羊今王復國吾亦復屠羊吾職已足矣又何賞乎此其不相德也甚矣所謂分定者非名位有所極人不敢間之者也清濁中理賢不肖中倫人莫能間之者也譬若足之不可為手耳之不可為目也故天子憂天下諸侯憂其國公卿大夫憂其家所任大者憂亦大所任小者憂亦小非上獨逸而下獨苦也古者以進為役以退為休勞力者安勞心者憂也其不以利私也已故上下一體也憂大者慮遠憂小者慮短故有天下者其昧百歲猶旦暮也有一國者其昧一世猶旦暮也有一家者其昧一歲猶旦暮也旦逸樂而暮憂患人情所不為故天子有百世之憂諸侯

有十世之忧士庶人有终身之忧

进说 王安石

古之时士之在下者无求于上上之人日汲汲惟恐一士之失也古者士之进有以德有以才有以言有以曲艺今徒不然自茂才等而下之至于明法其进退之皆有法度古之所谓德者才者无以为也古之所谓言者又未必应今之法度也诚有豪杰不世出之士不自进乎此上之人弗举也诚进乎此而不应今之法度有司弗取也夫自进乎此皆所谓枉己者也孟子曰未有枉己能正人者也然而今之士不自进乎此者未见也岂皆不如古之士自重以有耻乎古者井天下之地而授之氓士之未命也则授一防而为氓其父母妻子裕如也自家达国有塾有序有学观游止处师师友友弦歌尧舜之道自乐也磨砢镌切沉浸灌养行完而才备则曰上之人其舍我哉上之人其亦莫之能舍也今也地不井国不学党不庠遂不序家不塾士之未命也则或无以裕父母妻子无以外行完而才备上之人亦莫之举也士安得而不自进呜呼使今之士不若古非人则然势也势之异圣贤之所以不得同也孟子不见三公而孔子为季氏吏夫不以势乎哉士之进退不惟其德与才而惟今之法度而有司之好恶未必今之法度也是士之进不惟今之法度而凡在有司之好恶耳今之有司非昔之有司也后之有司又非今日之有司也有司之好恶岂常哉是士之进退果卒无所必而已矣噫以言取人本之失也取焉而又不得其所谓言是失之失也况又重以有司好恶之不可常哉古之道其卒不可见乎士也有得己之势其得不已乎得已而不已未见其为有道也杨叔明之兄弟以父任皆京官其势非吾所谓无以外无以裕父母妻子而有不得已焉者也自枉而为进士而又枉于有司而又若不释然二君固常自任以道而且朋友我矣惧其犹未寤也为进说与之

太极图说 周敦颐

无极而太极太极动而生阳动极而静静而生阴静极复动一动一静互为其根分阴分阳两仪立焉阳变阴合而生水火木金土五气顺布四时行焉五行一阴阳也阴阳一太极也太极本无极也五行之生也各一其性无极之真二五之精妙合而凝乾道成男坤道成女二气交感化生万物万物生生而变化无穷焉唯人也得其秀而最灵形既生矣神发知矣五性感动而善恶分万事出矣圣人定之以中正仁义【圣人之道仁义中正而已矣】而主静【无欲故静】立人极焉故圣人与天地合其德日月合其明四时合其序鬼神合其吉凶君子修之吉小人悖之凶故曰立天之道曰阴与阳立地之道曰柔与刚立人之道曰仁与义又曰原始反终故知死生之说大哉易也斯其至矣

稼说送张琥 苏轼

曷常观于富人之稼乎其田美而多其食足而有余其田美而多则可以更休而地力得完其食足而有余则种之常不后时而敛之常及其熟故富人之稼常美少秕而多实久藏而不腐今五十口之家而共百亩之田寸寸而取之日夜以望之锄耰铎艾相寻于其上者如鱼鳞而地力竭矣种之常不及时而敛之常不待其熟此岂能复有美稼哉古之人其才非有以大过

今之人也其平居所以自养而不敢轻用以待其成者闵闵焉如婴儿之望长也弱者养之以至于刚虚者养之以至于充三十而后仕五十而后爵信于久屈之中而用于至足之后流于既溢之余而发于持满之末此古之人所以大过人而今之君子所以不及也吾少也有志于学不幸而早得与吾子同年吾子之得亦不可谓不早也吾今虽欲自以为不足而众且妄推之矣呜呼吾子其去此而务学也哉博观而约取厚积而薄发吾告子止于此矣子归过京师而问焉有曰辙子由者吾弟也其亦以是语之

刚說 苏轼

孔子曰刚毅木讷近仁又曰巧言令色鲜矣仁所好夫刚者非好其刚也好其仁也所恶夫佞者非恶其佞也恶其不仁也吾平生多难常以身试之凡免我于厄者皆平日可畏人也挤我于嶮者皆异时可喜人也吾是以知刚者之必仁佞者之必不仁也建中靖国之初吾归自海南见故人文存没追论平生所见刚者或不幸死矣若孙君介夫讳立节者真可谓刚者也始吾弟子由为条例司属官以议不合引去王荆公谓君曰吾条例司当得开敏如子者君笑曰公过矣当求胜我者若我辈人则亦不肯为条例司矣公不答径起入户君亦趋出君为镇江军书记吾时适守钱塘往来常润间见君京口方新法之初监司皆新进少年馭吏如束湿不复以礼遇士大夫而独敬惮君曰是抗丞相不肯为条例司者谢麟经制溪洞事宜州守王奇与蛮战死君为桂州节度判官被防鞫吏士有罪者麟因收大小使臣十二人付君并按且尽斩之君持不可麟以语侵君君曰狱当论情吏当守法逗挠不进诸将罪也既伏其辜矣余人可尽戮乎若必欲以非法斩人则经制司自为之我何与焉麟奏君抗拒君亦奏麟侵狱事刑部定如君言十二人皆不死或以迁官吾以是益知刚者之必仁也不仁而能以一言活十二人于必死乎方孔子时可谓多君子而曰未见刚者以明其难得如此而世乃曰太刚则折士患不刚耳长养成就犹恐不足当忧其太刚而惧之以折耶折不折天也非刚之罪为此论者鄙夫患失者也君平生可纪者甚多独书此二事遗其子颺勸明刚者之必仁以信孔子之说

杂说 苏轼

吾文如万斛泉源不择地皆可出在平地滔滔汨汨虽一日千里无难及其与石山曲折随物赋形而不可知也所可知者常行于所当行常止于不可不止如是而已矣其他虽吾亦不能知也

郗超虽为桓温腹心以其父愔忠于王室不令知之将死出一箱付门生曰本欲焚之恐公年尊必欲相伤为毙我死后公若大损眠食可呈此箱不尔便烧之愔后果哀悼成疾门生依指呈之则悉与温往反密计愔大怒曰小子死晚矣更不复哭若方回者可谓忠臣矣当与石碣比然超谓之不孝可乎使超知君子之孝则不从温矣东坡先生曰超小人之孝也

梁史刘凝之为人认所着履即予之此人后得所失履送还不肯复取又沈麟士亦为隣人认所着履麟士笑曰是卿履邪即予之隣人得所失履送还麟士曰非卿履邪笑而受之此虽小事然处世当如麟士不当如凝之也

宋君夺民时以为台而民非之无忠臣以掩其过也子罕释相而为司空民非子罕而善其君齐桓公宫中七市女闾七百国人非之管仲所为三归之家以掩桓公此战国策之言苏子曰管仲仁人也战国策之言庶几是乎然世未有以为然者也虽然管仲之爱君亦陋矣不谏其过勿务分谤焉或曰管仲不可谏也苏子曰用之则行舍之则藏谏而不听则不用而已矣故孔子曰管仲之器小哉

桓温之所成殆过于刘越石而区区慕之者英雄必自有以相伏初不以成败言耶以此论之光武之度本不如 德唐文惠之英气未必过刘寄奴也

人君不得与臣下争善同列争善犹以为妬可以君父而妬臣子乎晋宋间人主至与臣下争作诗写字故鲍昭多累句王僧防用拙笔以避祸悲夫一至于此哉汉文言久不见贾生自以为过之今乃不及非独无损于文帝乃所以为文帝之盛德也而魏明乃不能堪遂作汉文胜贾生之论此非独求胜其臣乃与异代之臣争善惟无人君之度正如妬妇不独禁忌其夫乃妬他人之妾也

汉仍秦法至重高惠固非虐主然习所见以为常不知其重也至孝文始罢肉刑与参夷之诛景帝复孥戮晁错武帝罪戾有增无损宣帝治尚严因武之旧至王嘉为相始轻减法律遂至东京因而不改班固不记其事见梁统传固可谓疎略矣嘉贤相也轻刑又其盛德之事可不记乎统乃言高惠文帝以重法兴哀平以轻法衰因上书乞增重法律赖当时不从其议此如人年少时不节酒色而安老后虽节而病见上便谓酒可以延年可乎统亦东京名臣一出此言遂获罪于天其子松疎皆以非命而死冀卒灭族呜呼悲夫戒哉疎而不漏可不惧乎

晋士浮虚无实用然其间亦有不然者如孟嘉平生无一事然桓温谓嘉曰人不可无势我乃能驾馭卿温平生轻殷浩岂妄许人者哉乃知孟嘉若遇当作谢安安不遇不过如孟嘉

真宗时或荐梅询可用者上曰李沆尝言其非君子时沆之没盖二十余年矣欧阳文忠公尝问苏子容曰宰相没二十年能使人主追信其言以何道子容言独以无心故尔轼因赞其语且言陈执中俗吏尔特至公犹能取信主上况如李公之才识而济之以无心耶脉之难明古今所病也至虚有盛候太实有羸状差之毫厘疑似之间便有死生祸福之异此古今所病也疾不可不谒医之明脉者盖天下一二骐驎不时有天下未尝徒行和扁不世出病者终不徒死亦因其长而护其短耳士大夫多秘所患求脉验之灵否使索病于冥漠之中辨虚实冷热于疑似之间医不幸而失不肯自谓失也则巧饰遂非以全其名至于不救是固难治也间有驯愿者或用主人之言亦湏参以所见两存而杂治以故药不效此世之通患而莫之悟也吾平生求医必于平时默验其工拙至于有疾必先尽告以所患而后求诊使医了然知患之所在然后求之脉虚实冷热先定于胸中则脉之疑似不能乱也故虽中医治吾疾常愈而已岂以困医为事哉

韩退之喜大颠如喜澄观文畅意耳非信佛法也而妄撰退之与大颠书其词凡鄙退之家奴仆亦无此语今一士人又于其末妄题云欧阳永叔谓此文非退之莫能作此又诬永叔者

永叔作醉翁亭记其词玩易盖戏云耳不自谓奇特也而妄庸者亦撰作永叔语云平生为文此最得意又云吾不能作退之画记退之亦不能为醉翁亭记

宋文鉴卷一百七

卷一百八

钦定四库全书

宋文鉴卷一百八

宋吕祖谦编

説

迂说王令

非礼之举非义之动皆是也以其非礼义而止者盖未之见以其非礼义而止之者又未之见也今有学圣人之道而行圣人之义者皆曰迂以其迂而止之者皆是也以其迂而止者又皆是也何勇于为彼而恶乎适此也止之者爱人耶岂乐人之为非礼义而惧人之为圣人也耶

师说王令

上古之书既已汨没其它治具不可稽见而五帝之学求之传说间或见之夏商之书虽号残缺然学之名具存周则大备故其设施炳然彰白若然帝王之于治其它虽世有取舍于学则未闻或废也岂非君师云者两立不可一缺耶夫惟至治之世其措民各有本而次第之以及其它故地有井而自养其业虽有士农工商之云未尝不力而食因其资给然后绳其游惰澄其淫邪锄其彊梗其治略已定矣然犹乡遂有庠序之教家国有塾学之设自世子以及卿大夫之子皆入学为之师以谕其道为之保以诏其业示之智仁圣义中和使相充扩孝友睦婣任恤使相修饰礼乐射御书数使相开晓故其左右之闻前后之观不仁义则礼乐迨其淬磨渐浸之成则入孝而出弟尊尊而长长然后取而置之民上则君尽其所以为君臣尽其所以为臣卒无一背戾者其出于学而存于师也道之衰微迄于余周如担石之将坠其引缀未絶者犹有一线发继之暴秦不扶而抑遂至堕坏汉兴宜大更制而裁补缝之故其俗无所防范听民所为卒于无所不至然能郡县创孔子祠立五经博士置弟子员策贤良求经术以对当时得失于古虽未为善而其风俗遂号为平岂前世遗风余化渐渍深而未斩耶抑民苦秦而效易见也当此之时士犹能相遵师故终汉世传诗书礼易春秋而名家者以百十计晋魏而下浸以沉涵更数十氏唯唐为近古大抵才追齐汉治而未能逺过呜呼何为而止此也夫天下之所以不治患在不用儒而唐汉以来例尝任儒矣卒不甚治者何也有儒名有儒位而不用儒术而然尔其 在于学师不立而立贤无方圣人之道不讲不明士无根源而竞放流故不识所以治乱之本而不知所以为儒之任又上取之不以实而以言故也夫人所以能自明而诚者已非生知则出于教 之明而修习之至也如其无师则天下之士虽有强力向进之心且何自明而诚也夫天下之材力训导而懋勉之且犹患其糝窳故七十子亲逢圣人而薰炙之其闻与见不为不至犹且柴愚参鲁师辟由喭赐不受命而货殖冉求为宰而赋粟倍又

况后圣人数千歲其书残缺讹蠹又资才下于数子而欲其自为而不立学与师犹甚愿获而顾不耕也如必待其自贤而取之多见其希阔不可俟也自周至唐绵数千歲其卓然取贤而自名可以治寄者孟轲抵韩愈才三四人是其力能提扶其道而竟不知用者所以历年已遠而人出甚少也如其多则或用之矣苟患其少无如广师而立学续其所不长擢其所未高使知其所以救乱然后名闻而实取之则庶矣天下之师絕久矣今之名师者徒使组刺章句希望科第而已昔者子路使子羔为费宰子曰贼夫人之子今贼人者皆是是皆取戾于孔子者也恶得为人师

葬说 程頤

卜其宅兆卜其地之美恶也非陰阳家所谓祸福者也地之美者则其神灵安其子孙盛若培植其根而枝叶茂理固然矣地之恶者则反是然则曷谓地之美者土色之光润【一作泽】草木【一作生物】之茂盛乃其验也父祖子孙同气彼安则此安彼危则此危亦其理也而拘忌者惑以择地之方位决日之吉凶不亦泥乎甚者不以奉先为计而專以利后为虑尤非孝子安厝之用心也惟五患者不得不慎湏使异日不为道路不为城郭不为沟池不为贵势所夺不为耕犁所及【一本所谓五患者沟渠道路避村落遠井窖】五患既慎则又凿地必四五丈遇石必更穿之防水润也既葬则以松脂涂棺椁石灰封墓门此其大略也若夫精画则又在审思虑矣其各葬【一作火焚】者出不得已后不可迁就同葬【一作焚】矣至于年祀寢遠曾高不辨亦在尽诚各具棺椁葬之不湏假梦寐蓍 而决也葬之穴尊者居中左昭右穆而次后则或东或西亦左右相对而启穴也出母不合葬亦不合祭弃女还家以殤穴葬之

史说 张舜民

马文渊有言人贫当益坚老当益壮贫而坚者虽市里小民尚有之老而壮虽士人未之见也韩退之潮阳之行齿髮衰矣不若少时之志壮也故以封禪之说迎宪宗又曰自今请改事陛下观此言伤哉丈夫之操始非不坚誓于金石凌于雪霜既而怵于死生顾于妻孥罕不回心低首求免一时之难者退之是也退之非求富贵者也畏死尔故善为国者如农圃然初则养育其材勿使之夭折终则将就其美勿使之摧残君臣相成同底于道顾必使之至于尽欢竭力之地亦何有哉唯乐天则不然知其不可为而一舍之危行而放其言怀卷而同其尘可谓晦而明柔而立者也故终其身而不辱如刘梦得柳子厚辈舍文字语言之外复何有哉刘蕡赞史臣以蕡为疏直蕡于策中引襄公杀阳处父春秋罪漏言而蕡既戒帝漏言而身诵语于庭又蕡不先以忠结上知后为谋之若是殆非史家才识也且蕡布衣也出应诏以何计先结主之知而后言之哉虽谏官御史以在近列悦先视人主之意而方出言是何人也蕡辈造廷待问有所及不列之于廷对何阶而上达哉唯其疏直乃得敢言之士悦使来者皆三思后言之朝廷何望哉度斯人也殆是恶直丑正之人使恶直丑正之人执史笔以去取前人之事则一代之人若為準的蕡虽不第同试如李邵辈公言于朝以为已之不若一时藩侯争相辟置如牛僧孺令狐楚不敢待以賓幙皆以师礼资之是何同时之人其见重顾如此数百年之后独不信于史臣之笔亦可叹矣

吊说 吕大钧

诗曰凡民有防匍匐救之不谓死者可救而复生谓生者或不救而死也夫孝子之防亲不能食者三日其哭不絶声既病矣杖而后起问而后言其惻怛之心痛疾之意不欲生则思虑所及虽其大事有不能周之者而况于他哉故亲戚僚友乡党闻之而往者不徒吊哭而已莫不为之致力焉始则致含襚以周其急【朋友襚亲以进见士防礼族人相为又有含见文王世子】三日则共麤粥以扶其羸【亲始死三日不举火隣里为之麤粥以饮食之见问防】每奠则执其礼【士之防朋友奠见曾子问】将葬则助其事【孔子之防公西赤为志子张之防公明仪为志原壤母死孔子助流防见檀弓】其从柩也少者执紼长者惠进止【吊非从主人也四十者执紼见杂记孔子从老 助葬于乡党反坦曰食老聃曰丘止柩就道右止哭以听变此则惠进止者也见曾子问】其掩圻也壮者盈坎老者从反哭【乡人五十者从反哭四十者待盈坎见杂记】袒而赙焉【赙用车马所知则赙而不奠兄弟乃奠奠止用羊并见士防礼】不足则赠焉【知死者赠赠以币其礼在赙赙之后又公之赠赠于邦问故曰行而赠见士防礼】不足则赙焉【知生者赙赙用布币以助其费故曰不足则赙见士防礼】凡有事则相焉【司徒敬子之防孔子有若之防子游蒯国昭子之母死问位于子张并见檀弓】斯可谓能救之矣故适有防者之词不曰愿见而曰比虽国君之临亦曰寡君承事他国之使者曰寡君使某母敢视賓客【见少仪檀弓杂记】主人见賓不以尊卑贵贱莫不拜之明所以谢之且自别于常主也【平日相见或主人先拜客或客先拜主人】賓见主人无有答某拜者明所以助之且自别于常賓也【见曲礼记】自先王之礼坏后世虽传其名数而行之者多失其义防主之待賓也如常主防賓之见主人也如常賓如常賓故止于吊哭而莫敢与其事如常主故舍其哀而为衣服饮食以奉之其甚者至于损奉终之礼以谢賓之勤废吊哀之仪以宽主之费由是则先王之礼意其可以下而已乎今欲行之者虽未能尽得如礼至于始防则哭之有事则奠之【奠不必更自致礼惟代主人之献爵是也】又能以力之所及为营防具之未具者以应其求辍子弟仆 之能干者以助其役易纸币壶酒之奠以为馐除供帐馈食之祭以为 与赙凡防家之待已者悉以他辞受焉【必以他辞者色异众嫌】庶几其可也

刍说

武帝征伐之意虽汲黯之言在所不采而主父偃以疎逖防贱进言九事乃以伐匈奴为谏引尉佗章邯明秦之所以亡严安亦曰靡敝国家结怨匈奴非所以子民而安边也夫偃安之所陈与上异意以秦法论之是谓非上之建立必诛无赦武帝乃见而谓曰公等皆安在何相见之晚也夫言虽不用而其人见收则非特足以进天下之材亦可以来天下之言一语不当从而废之则非特塞贤材之路亦将钳天下之口武帝之异于始皇其在斯乎

晁错为国远虑身防家覆世哀其忠然其学以申商刑名为师峭直刻深不纯乎道论人主之所急以临制臣下为先又曰人主所以尊显功名扬于万世之后者以知术数也然则圣主之务所以尊显而垂后者果在于术数而已乎唯其质不厚而学非其师故其论如此其荒唐也

访问于善宜虚心而待之主先入之言怀决定之意掠能问之美无肯听之实如是而问者君子之所不对也季孙欲以田赋使冉有访于仲尼仲尼曰丘不识也既而私于冉有曰子季孙若欲行而法则周公之典在若欲苟而行又何访焉于是乎三发而不对孔子曰言及之而不言谓之隐孔子岂固隐哉为其有决定之意而无肯听之实则遂事不可以复谏而空言适足以取咎语默动静岂不谨哉

人主于听纳之际尤当宽详尽下不当使进言之士怀未毕之语楚子革与王言如响析父讥之及其摩厉以须之得间而讽焉能使其馈不食寝不寐以思其言使灵王有自克之仁改过之勇则子革之言岂小补哉然方其言之如响而其意有未尽则谓之譊谀可也吕防正对太宗曰君子小人之盛衰系之时运读其言者为之惊骇然至于论小人之害政戒人主之不察则言之发端固有为也

君臣议论之际言脱于口而四方传之以警以劝所以作天下之术尝在于此尧舜三代君臣相与之际语言宣尽何其坦然而无蔽隐也盖君欲举事兴为必谋乎下而臣有嘉谋嘉猷必告乎上上有所未达下有所未谕亦必反覆论难无失其和以趣于正是而后已夫岂有不尽之情未毕之语而使利口谰言之士可得而间之也哉至唐之德宗则不然谋议之际所询乎下者情有不尽所告乎上者语有未毕疑贰之意作而刻核之心应固未尝以本然之意告其大臣岂不曰所以密机事而固主权也然而言脱于口而卢杞无不知焉恶君子之尽忠而显绝其言甘小人之譊邪而阴授其柄然则德宗之术亦已踈矣

戒

治戒 宋 祁

吾歿称家之有亡以治防敛用濯浣之衣鹤氅裘纱防线履三日棺三月葬谨无为流俗阴阳拘忌也棺用杂木漆其四防三涂即止使数十年足以腊吾骸朽衣巾而已吾之焄然蒿然皜皜有识者还于造物放之太虚可腐败者合于黄垆下付无穷吾尚何患掘冢深三丈小为冢室劣取容棺及明器左置明水二盎酒二缸右置米麴二奩朝服一称私服一称鞞履自副左刻吾志右刻吾铭即掩圹惟简俭无以金铜杂物置冢中吾学不名家文章仅及中人不足垂后为吏在良二千石下犹可容数人无功于国无惠于人不可以请諡于有司不可受赠典又不宜求巨公作志及碑冢上植五株柏坟高三尺石翁仲它兽不得用盖自标置者非千载永安计尔母作道佛二家斋醮此吾生平所志若等不可违命作之违命作之是死吾也是以吾为遂无知也葬之日以缁布纆棺四鬋引母作方相俑人陈列衣服器用累吾之俭吾平生语言无过人者谨无妄编缀作集使后世嗤诋吾也吾侍上讲劝凡十七年上颇记吾面目姓名然身后不得丐恩泽为无厌事若等兄弟十四人惟二孺儿未仕此以诱莒公莒公在若等为不孤矣若等兄弟虽有异母者古人谓四海之内皆为兄弟况同父均气乎诗称死防之威兄弟孔怀不可不念也兄弟之不怀求合它人人渠肯信哉纵阳合之彼应笑且憎也若等视吾事莒公云何莒公友吾云何可以为法矣人不可以无学至于奏议牋记随宜为之天分自有所禀不可强也要得数百卷书在胸中则不为人所轻诮矣

福州五戒 蔡襄

观今之俗为父母者视己之子犹有厚薄迨至娶妇多令异食贫者困于日给其势不得不然富者亦何为之盖父母之心不能均于诸子以至此不可不戒

人之子孝本于养亲以顺其志死生不违于礼是孝诚之至也观今之俗贫富之家多于父母异则兄弟分养乃至纖悉无有不校及其亡也破产卖宅以为酒肴设劳亲知施与浮圖以求防福原其为心不在于亲将以夸胜于人是不知为孝之本也生则尽养死不妄费如此岂不善乎

兄弟之爱出于天性少小相从其心欢欣岂有间哉迨因娶妇或至临财憎恶一开即成怨隙至有兴诉讼冒刑狱至死而不息者殊可哀也盖由听妇言贪财利絶同胞之恩友爱之情遂及于此

娶妇何谓欲以传嗣岂为财也观今之俗娶其妻不顾门户直求资财随其贫富未有婚姻之家不为怨怒原其由盖婚礼之夕广靡费已而校奁橐朝索其一暮索其二姑辱其妇夫虐其妻求之不已若不满意至有割男女之爱辄相弃背习俗日久不以为怪此生民之大 人行最恶者也

凡人情莫不欲富至于农人商贾百工之家莫不昼夜营度以求其利然农人兼并商贾欺漫大率刻剥贫民罔昧神理譬如百虫聚居强者食弱者不暂息求而得之广为施与冀灭罪恶其愚甚矣今欲为福孰若减刻剥之心以宽贫民去欺漫之行以畏神理为子孙之计则亦久遠居乡党之间则为良善其义至明不可不志

行舟戒 江休复

景祐丁丑歲六月浮汴而东将至驿名青阳者风甚不可行舟横竹箭之中屡矣拖者不能制其后防者无以奋其傍遽泊于上风多其絙纆以维之固其椽杙以系之荡动顿掣惴惴然虑飘于东岸责其人置舟危地对曰若据便地则乘流而止顺风而过者动有冲击排蹙之患姑处此以避其锐焉于是断者续之挺者防之恐惧警戒卒以无患彼扬帆乘势向我延颈而美之者败溺不救擢撞相倚退而念曰今日之风我之患卒以全彼之利遂以倾利害不同而吉凶相诡时邪理邪或曰止者易为工进者难为巧彼知顺风之可乘不知疾风之不可乘得势者不戒临危者能惧是以祸福殊焉因志之以为行舟戒

毁戒 王回

传毁者不可不戒也毁之来亦多原矣或以其迹疑或侮而为疑或恶而加诬焉由小人者更身质之以薪信一传焉则百千人斯传之矣传既广而文致之益密其可信益牢此讯一人焉曰有之彼讯一人焉曰有之同异交执则何说而不若固有之也虽其所知者力不能救矣若

是则防垢陷污则终身无以自明焉夫所谓传毁者恶恶而欲贩之云尔毁在君子则不可反而思耶察其所由辨其所以无使其渐而播也尚庶已乎传曰流言止于智者谓其能御其来也矧肯易而传之耶

嫌戒 王回

礼谨于别嫌疑夫嫌疑者岂有其实然我以为嫌疑之谓也我以为嫌疑则人必有嫌疑之者然而世多忽焉而不戒者何也恃其情不至于是也情不至于是有人为伺间蹊其迹而议之则奚说而可辞与其亦受之而已矣夫人亦好多言矣完然者尚欲指其缺也况自投于嫌疑之地欲免得乎此君子所以贵由礼也

戒子孙 邵雍

上品之人不教而善中品之人教而后善下品之人教亦不善不教而善非圣而何教而后善非贤而何教亦不善非愚而何是知善也者吉之谓也不善也者凶之谓也吉也者目不观非礼之色耳不听非礼之声口不道非礼之言足不践非礼之地人非善不交物非义不取亲贤如就芝兰避恶如畏蛇蝎或曰不谓之吉人则吾不信也凶也者语言诡譎动止陰险好利饰非贪淫乐祸疾良善如讐隙犯刑宪如饮食小则殒身灭性大则覆宗絕嗣或曰不谓之凶人则吾不信也传有之曰吉人为善惟日不足凶人为不善亦惟日不足汝等欲为吉人乎欲为凶人乎

女戒

妇道之常顺惟厥正【妇止柔顺】是曰天明【天之显道】是其帝命【命女使顺】嘉尔婉婉克安尔家往之尔家【吕氏汝家】克施克勤【能行孝顺能勤】尔顺惟何无违夫子【夫子婿也】无然臯臯【臯臯难与言也】无然訛訛【訛訛难共事也】彼是而违尔焉作非【违是则非】彼旧而革尔焉作仪【改旧乃汝妄正制度】惟非惟仪女生则戒【在毛诗斯千篇】王姬肃雍酒食是议【周王之女亦然】貽尔五物以铭尔心锡尔佩巾墨予诲言铜尔提匡谨尔賓荐【賓客祭祀】玉尔衮具素尔藻绚【藻绚妆饰不可太华】枕尔文竹席尔吴箴念尔书训【因枕文思训】思尔退安【安尔退居之席】彼实有室【男当有室】尔勿从室【不得从而有其室也】逊尔提提【逊谨退也提提谛也】尔生引逸【引长也逸乐也】

宋文鉴卷一百八

卷一百九

钦定四库全书

宋文鉴卷一百九

宋吕祖谦编

制策

制科策 苏轼

皇帝若曰朕承祖宗之大统先帝之休烈深惟寡昧未烛于理志勤道远治不加进夙兴夜寐于兹三纪朕德有所未至教有所未孚阙政尚多和气或罄田野虽辟民多亡聊邊境虽安兵不得彻利入已浚浮费弥广军冗而未练官冗而未澄庠序比兴礼乐未具戸罕可封之俗士忽皆让之节此所以讼未息于虞芮刑未措于成康意在位者不以教化为心治民者多以文法为拘禁防繁多民不知避叙法宽滥吏不知惧累繫者众愁叹者多仍歲以来灾异数见六月壬子日食于朔淫雨过节燠气不效江河溃决百川腾溢永思厥咎深切在予变不虚生緣政而起五事之失六沴之作刘向所传吕氏所纪五行何修而得其性四时何行而顺其令非正阳之月伐鼓揅变其合于经乎方盛夏之时论因报重其考于古乎京师诸夏之根本则王教之渊源百工淫巧无禁豪右僭差不度治当先内或曰何以为京师政在撓奸或曰不可挠狱市推寻前世探观治迹孝文尚老子而天下富殖孝武用儒术而海内虚耗道非有弊治奚不同王政所由形于诗道周公豳诗王业也而系之国风宣王北伐大事也而载之小雅周以冢宰制国用唐以宰相兼度支钱谷大计也兵师大众也何陈平之对谓当责之内史韦贤之言不宜兼于宰相钱货之制轻重之相权命秩之差虚实之相養水旱蓄积之备邊陲守御之方圖法有九府之名乐语有五均之义富人彊国尊君重朝弭灾致祥改薄从厚此皆前世之急政而当今之要务子大夫其悉意以陈母悼后害

臣谨对曰臣闻天下无事则公卿之言轻于鸿毛天下有事则匹夫之言重于泰山非智有所不能而明有所不察缓急之势异也方其无事也虽齐桓之深信其臣管仲之深得其君以握手丁宁之问将死深悲之言而不能去其区区之三豎及其有事且急也虽唐代宗之庸程元振之用事柳伉之贱且疎而一言以入之不终朝而去其腹心之疾夫言之于无事之世者足以有所改为而常患于不信言之于有事之世者易以见信而常患于不及改为此忠臣志士之所以深悲天下之所以乱亡相寻而世主之所以不悟也今陛下处积安之时乘不防之势拱手垂裳而天下向风动容变色而海内震恐虽有一事之失常一物之不获固未足以忧陛下也所谓亲防贤良之士者以应故事而已岂以臣言为真足以有感于陛下耶虽然君以名求之臣以实应之陛下为是名也臣敢不为是实也伏惟制防有念祖宗先帝大业之重而自处寡昧以为志勤道远治不加进臣窃以为陛下即位以来歲歷三纪更于事变审于情伪不

为不熟矣而治不加进虽臣亦疑之然以为志勤道遠则虽臣至愚亦未敢以明诏为疑也夫志有不勤而道无遠陛下苟知勤矣则天下之事粲然无不毕举又安以访臣为哉今也犹以道遠为叹则是陛下未知勤也臣请言勤之说夫天以日运故健日月以日行故明水以日流故不竭人之四肢以日动故无疾器以日用故不蠹天下者大物也久置而不用则委靡废放日趋于弊而已矣陛下深居法宫之中其忧勤而不息耶臣不得而知也其宴安而无为耶臣不得而知也然所以知道遠之叹由陛下之不勤者臣窃见陛下以天下之大欲轻赋税则财不足欲威四夷则兵不彊欲兴利除害则无其人欲敦世厉俗则无其具大臣不过遵用故事小臣不过谨守簿书上下相安以苟歲月此臣所以妄论陛下之不勤也臣又窃闻之自顷歲以来大臣奏事陛下无所诘问直可之而已臣始闻而大惧以为不信及退而观其效见则臣亦不敢谓不信也何则人君之言与士庶不同言脱于口而四方传之防于风雨故太祖太宗之世天下皆讽诵其言语以为耸劝之具今陛下所震怒而赐譴者何人也合于圣意诱而进之者何人也所谓朝夕深议深言者何人也越次躡等召而问讯之者何人也四者臣皆未之闻焉此臣所以妄论陛下之不勤也臣愿陛下条天下之事其大者有几可用之人有几某事未治某人未用鸡鸣而起曰吾今日为某事用某人他日又曰吾所为某事其事果济矣乎所用某人其人果才矣乎如是孜孜焉不违于心屏去声色放遠善柔亲近贤达遠览古今凡此者勤之实也而道何遠乎伏惟制防有夙兴夜寐于今三纪德有所未至教有所未孚阙政尚多和气或罄田野虽辟民多亡聊边境虽安兵不得彻利入已浚浮费弥广军冗而未练官冗而未澄庠序比兴礼乐未具戸罕可封之俗士忽皆让之节此所以讼未息于虞芮刑未措于成康意在位者不以教化为中心治民者多以文法为拘禁防繁多民不知避叙法寬濫吏不知惧累系者众愁叹者多凡此陛下之所忧数十条者臣皆能为陛下歷数而备言之然而未敢为陛下道也何者陛下诚得御臣之术而固执之则向之所忧数十条者皆可以捐之大臣而已不与今陛下区区以向之数十条为已忧者则是陛下未得御臣之术也天下所谓贤者陛下既得而用之矣方其未用也常若有余而其既用也则常若是岂其才之有变乎古之用人者日夜深提防之武王用太公其相与问答百余万言今之六韜是也桓公用管仲其相与问答亦百余万言今之管子是也古之人君其所以反覆穷究其臣者若此今陛下默然而听其所为则夫向之所忧数十条者无时而举矣古之忠臣其受任也必先自度曰吾能办是矣乎度能办是也则又曰吾君能忘已而任我乎能无以小人间我乎度其能忘已而任我也能无以小人间我也然后受之既已受之矣则以身任天下之责而不辞飡天下之利而不愧今也内不度已外不度君而轻受之受之而众不与也则引身而求去陛下又为美辞而遣之加之重禄而慰之夫引身而求退者非果廉节而有让也是邀君以自固也是自明其非我之欲留以逃谤也是不能办其事而以其患遗后人也陛下奈何听之臣故曰陛下未得御臣之术也若夫德有所未至教有所未孚者此实不至也德之必有以着其德之之形教之必有以显其教之之状德之之形莫着于轻赋教之之状莫显于去杀此二者今皆未能焉故曰实不至也夫以选举之重而不取才行官吏之众而不行考课农末之相倾而平糴之法不立贫富之相役而占田之数无限天下之阙政则莫大乎此而和气安得不罄乎田野辟者民之所以富足之道也其所以无聊则吏政之过也然臣闻天下之民常偏聚而不均吴蜀有可耕之人而无其地荆襄有可耕之地而无其人由此观之则田野亦未可谓尽辟也夫以吴蜀荆襄之相形而饥寒之民终不能去狭而就寬者世以为懷土而重迁非也行者无以相羣则不能行居者无以相友则不能居若辈徙饥寒之民则无有不听矣边境已安而兵不得彻者有安之名而

无安之实也臣欲小言之则自以为愧大言之则世俗以为笑臣请略言之古之制北狄者未始不通西域今之所以不能通者是夏人为之障也朝廷置灵武于度外几百年矣议者以为绝域异方义不敢近而况于取之乎然臣以为事势有不可不取者不取灵武则无以通西域西域不通则契丹之疆未有艾也然灵武之所以不可取者非以数郡之能抗吾中国吾中国自困而不能举也其所以自困而不能举者以不生不息之财养不耕不战之兵块然如巨人之病腿非不枵然大矣而手足不能以自举欲去是疾也则莫若捐秦以委之使秦人断然如战国之世不待中国之援而中国亦未始有秦者有战国之全利而无战国之患则夏人举矣其便莫如稍徙缘边之民不能战守者于空闲之地而以其地益募民为屯田屯田之兵稍益则向之戍卒可以稍减使数岁之后缘边之民尽为耕战之夫然后数出兵以苦之要以使之厌战而不能支则折而归吾矣如此而北狄始有可制之渐中国始有息肩之所不然将济师之不暇而又何彻乎所谓利入已浚而浮费弥广者臣窃以为外有不得已之二虏内有不得已而后宫后宫之费不减一敌国金玉锦绣之工日作而不息朝成夕毁务以相新主帑之吏日夜储其精金良帛而别异之以待仓卒之命其为费岂可胜计哉今不去此等而欲广求利之门臣知所得之不如所防也军冗而未练者臣尝论之曰此将不足恃之过也然以其不足恃之故而拥之以多兵不搜去其无用则多兵适所以为败也官冗而未澄者臣尝论之曰此审官吏部与职司无法之过也夫审官吏部是古者考绩黜陟之所也而特以日月为断今纵未能复古可略分其郡县不以远近为差而以难易为等第其人之所堪而别异之才者常为其难而不才者常为其易及其当迁也难者常速而易者常从然而为此者固有待也使审官吏部与外之职司常相关通而为职司者不惟举有罪察有功而已必使尽第其属吏之所堪以诏审官吏部审官吏部常从内等其任使之难易职司常从外第其人之优秀才者常用其不才者常闲则冗官可澄矣庠序兴而礼乐未具者臣盖以为庠序者礼乐既兴之所用非所以兴礼乐也今礼乐鄙野而未完则庠序不知所以为教又何以兴礼乐乎如此而求其可封责其皆让将以息讼而措刑者是却行而求前也夫上之所向者下之所趋也而况从而赏之乎上之所背者下之所去也而况从而罚之乎今陛下责在位者不务教化而治民者多拘文法臣不知朝廷所以为赏罚者何也无乃或以教化得罪而多以文法受赏欤夫禁防未至于烦多而民不知避者吏以为市也叙法不为宽滥而吏不知惧者不论其能否而论其从近也累繫者众愁叹者多凡以此也伏惟制防有仍岁以来灾异数见乃六月壬子日食于朔淫雨过节燠气不效江河溃决百川腾溢永思厥咎深切在予变不虚生缘政而起此岂非陛下厌闻诸儒牵合之论而欲闻其自然之说乎臣不敢复取洪范传五行志以为对直以意推之夫日食必是阳气不能履险也何谓阳气不能履险臣闻五月二十三日月之二十是为一交交当朔则食交者是行道之险者也然而或食或不食则阳气有彊弱也今有二人并行而犯雾露其疾者必其弱者其不疾者必其彊者也道之险一也而阳气之彊弱异故夫日之食非食之日而后为食其亏也从矣特遇险而见焉陛下勿以其未食也为无灾而其既食而复也为免咎臣以为未也特出于险耳夫淫雨大水者是阳气融液汗漫而不能收也诸儒或以为阴盛臣请得以理折之夫阳动而外其于人也为嘘嘘之气温然而为湿阴动而内其于人也为噤噤之气冷然而为燥以一人推天地天地可见故春夏者其一嘘也秋冬者其一噤也夏则川泽洋溢冬则水泉收缩此燥湿之效也是故阳气汗漫融液而不能收则常为淫雨大水犹人之嘘而不能吸也今陛下以至仁柔天下兵骄而益厚其赐戎狄桀傲而益加其礼荡然与天下为咻煦温暖之政万事惰坏而终无威刑以坚凝之亦如人之嘘而不能噤此淫

雨大水之所由作也天地告戒之意陰阳消伏之理殆无以易此矣而制防又有五事之失六沴之作刘向所传吕氏所纪五行何修而得其性四时何行而顺其令非正阳之月伐鼓揅变其合于经乎方盛夏之时论囚报重其考于古乎此陛下畏天恐惧求端之过而流入于迂儒之說此皆愚臣之所学于师而不取者也夫五行之相沴本不至于六六沴者起于诸儒欲以六极分配五行于是始以皇极附益而为六夫皇极者五事皆得不极者五事皆失非所以与五事并列而别为一者也是故有眊而又有防有极而无福曰五福皆应此亦自知其疎也吕氏之时令则柳宗元之论备矣以为有可行者有不可行者其可行者皆天事也其不可行者皆人事也若夫祭社伐鼓本非有益于救灾特致其尊阳之意而已书曰乃季秋月朔辰弗集于房瞽奏鼓嗇夫驰庶人走由此言之则亦何必正阳之月而后伐鼓揅变如左氏之說乎盛夏报囚先儒固以论之以为仲尼诛齐优之月固君子之所无疑也伏惟制防有京师诸夏之根本则王教之渊源百工淫巧无禁豪右僭差不度此在陛下身率之耳后宫有大练之饰则天下以罗纨为羞大臣有脱粟之节则四方以膏粱为污虽无禁令又何忧乎伏惟制防有治当先内或曰何以为京师政在撓奸或曰不可撓狱市此皆一偏之說不可以不察也夫见其一偏而辄举以为說则天下之說不可以胜举矣自通人而言之则曰治内所以为京师也不撓狱市所以为撓奸也如使不撓狱市而害其为撓奸则夫曹参者是為逋逃主也伏惟制防有推寻前世探观治迹孝文尚老子而天下富殖孝武用儒术而海内虚耗道非有一治奚不同臣窃以为不然孝文之所以为得者是儒术略用也其所以得而未尽者是儒术略用而用儒之未纯也而其所以为失者则用老也何以言之孝文得贾谊之說然后待大臣有礼御诸侯有术而至于兴礼乐系单于则曰未暇故曰儒术略用而未纯也若夫用老之失则有之矣始以区区之仁壤三代之肉刑而易之以髡笞髡笞不足以惩其罪则又从而杀之用老之失岂不过甚矣哉且夫孝武亦不可谓用儒之主也博延方士而多兴妖祠大兴宫室而甘心遠略此岂儒者教之今夫有国者徒知徇其名而不考其实见孝文之富殖而以为老子之功见孝文之虚耗而以为儒者之罪则过矣此唐明皇之所以溺于晏安彻去禁防而为天寶之乱也伏惟制防有王政所由形于诗道周公豳诗王业也而系之国风宣王北伐大事也而载之小雅臣闻豳诗言后稷公刘所以致王业之艰难者也其后累世而至文王文王之时则王业既已大成矣而其诗为二南二南之诗犹列于国风而至于豳独何怪乎昔季札观周乐以为大雅曲而有直体小雅思而不貳怨而不言夫曲而有直体者寬而不流也思而不貳怨而不言者狭而不迫也由此观之则大雅小雅之所以异者取其辞之广狭非取其事之大小也伏惟制防有周以冢宰制国用唐以宰相兼度支钱谷大计也兵师大众也何陈平之对谓当责之内史韦贤之言不宜兼于宰相臣以为宰相虽不亲细务至于钱谷兵师固当制其虚赢利害陈平所谓责之内史者特以宰相不当治其簿书多少之数耳昔唐之初以郎官领度支而职事以治及兵兴之后始立使额参佐既众簿书益繁百 之源自此而始其后裴延龄皇甫湜皆以剥下媚上至于希世用事以宰相兼之诚得防奸之要而韦贤之议特以其权过重欤故李德裕以为贱臣不当议今臣常以为有宰相之风矣伏惟制防有钱货之制轻重之相权命秩之差虚实之相养水旱蓄积之备边陲守御之方圖法有九府之名乐语有五均之义此六者亦方今之所当论也昔召穆公曰民患轻则多作重以行之若不堪重则多作轻以行之亦不废重轻可改而重不可废不幸而过寧失于重此制钱货之本意也命者人君之所擅出于口而无穷秩者民力之所供取于府而有限以无穷养有限此虚实之相养也水旱蓄积之备则莫若复隋唐之义仓边陲守御之方则莫若依秦汉之更卒周官有太府天府泉府玉府

内府外府职内职金职币是谓九府太公之所行以致富古者天子取诸侯之士以为国均则市不二价四民常均是谓五均献王之所制以为法皆所以均民而富国也凡陛下之所以防臣者大略如此而于其末复防之曰富人彊国尊君重朝弭灾致祥改薄从厚此皆前世之急政而当今之要务此臣有以知陛下之圣意以为向之所以防臣者各指其事恐臣不得尽其辞是以复举其大体而防问焉又恐其不能切至也故又诏之曰悉意以陈无悼后害臣是以敢复进其猖狂之說夫天下者非君有也天下使君主之耳陛下念祖宗之重思百姓之可畏欲进一人当同天下之所欲进欲退一人当同天下之所欲退今者每进一人则人相与诽曰是出于某也是某之所欲也每退一人则又相与诽曰是出于某也是某之所恶也臣非敢以此为举信也然而致此言者则必有由矣今无知之人相与谤于道曰圣人在上而天下之所以不尽被其泽者便嬖小人附于左右而女谒盛于内也为此言者固妄矣然而天下或以为信者何也徒见谏官御史之言屹屹乎难入以为必有间之者也徒见蜀之美锦越之奇器不由方贡而入于宫也如此而向之所谓急政要务者陛下何暇行之臣不胜愤懣谨复列之未惟陛下寬其万死幸甚幸甚谨对

宋文鉴卷一百九

卷一百十

钦定四库全书

宋文鉴卷一百十

宋吕祖谦编

制策

制科防孔文仲

皇帝若曰在昔明王之治天下仁风翔洽德泽汪濊四序调于上万物和于下兵革不试刑辟弗用内则俊贤归位以熙于王职外则夷狄向风以修于岁贡建皇极以承天心敛时福以锡民庶然后日星雨露鸟兽草木効祥荐祉书之不絶朕甚慕之其何术以臻此欤朕承祖宗之业托士民之上明有所未烛化有所未孚而任大守重难于负荷故详延魁垒之士思闻谏直之言以辅不逮庶几乎治盖人君即位必求端于天而正诸己惟五事得其常则庶证协其应朕飨国以来靡敢自肆而和气犹郁大异数见迺元年日食三朝泊仲秋地震数路而冀方之广为灾最甚岂朕弗德之致欤夙寤晨兴思其所以是故图讲政务则日中至昃而犹多苟简之习烝进人才则官无虚假而颇乏绩用之美种羌非不懷徕也而边 或时绎骚以至临遣辅臣憺明神武烝民非不爱养也而生业或未完富以至外驰使者宣布惠教国用虽节而尚烦于调度兵籍虽众而未精于简稽寬闕梁之禁而商靡通捐器玩之巧而工弗戒夫风俗浮薄根于取士之无本道教之不明而博询台阁之论所执者不一岂无救 之道焉刑罚烦重出于设法之多门沿袭之不革而将加恩仁之政使死者少缓必有可行之术焉予欲兴乎七教兼乎三至以底圣人之道则宜条其先后之次予欲明乎六亲尽乎五法以极天下之治则宜叙其本末之要乃至仲舒之言班固谓切于当世其可施于今者何防崔寔之论范 谓切于政体其有益于时者何事毋以谓古人陈迹既久而不可举毋以谓本朝成法已定而不可改惟其改之而适中举之而得宜不迫不迂归于至当书曰言之非艰行之惟艰子大夫其悉心以陈朕亦不憚于有为焉对臣伏惟陛下下明诏降清问讲求万事之統皆非愚臣之所能及也然臣窃有深忧者陛下求言好善之隆名遠出百王之上至于用言纳諫之道有未克尽其极尔何者陛下莅阼之初首开转对以延踈遠切直之言召羣臣以询安危利害之防者此陛下天资谦恕思得深谋至计以补所未照也而言之既多听之既久卒未闻采一事用一画见之天下至于近日四方之人与夫朝廷之上贤卿谊老交章累防论列时政得失臣考之公议以为虽臯防周召之谋所以致君福民宁九庙而安万世者公说不能过此矣而陛下闻之若不闻见之若不见岂其急近论而略遠虑安小补而捐大患乎此臣所大惧也臣愿陛下首思听言用諫之义不听则已听则博同天下之心不用则已用则兼取遠近之防然后动无遗事举无失计而善政可行太平可议矣臣将论天下事先述此以献臣诚愚闇不知大体惟陛下省纳焉圣防曰在昔明王之治天下仁风翔洽德泽汪濊四序调于上万物和于下兵革不

试刑辟不用内则俊贤居位以熙于王职外则戎夷向风以修于岁贡建皇极以承天心敛时福以锡民庶然后日星雨露鸟兽草木効祥荐祉书之不絶甚尊慕之其何术而臻此与臣闻天下之术有大小而人君用之有先后先其大而后其小则用力不劳而天下治宜先而后可大而小则用力愈劳而天下乱天下之术其大者能正其始是也其小者不能正其始是也在昔明王之治天下仁翔而德洽四序调而万物和以是兵偃刑措雋贤修职夷狄纳贡建皇极而天下应敛五福而民气洽吉祥见于上珍符出于下者正始之术行也后世之治天下万事失其序而灾害荐至者正始之术废也陛下追慕古昔治功之美而谄求致之之术臣请遂言正始之說夫天下之道三曰王曰霸曰强国天下之本一曰即位即位者王所以自正也始不以正及其末也虽欲变而正之亦无及矣是故始为强国未有能终之以霸政者也始为霸政未有能终之以王术者也孔子作春秋书元年春王正月公即位夫元年正月者一年一月也而变之曰元与正者欲人君当即位之初体元以居正也元者善之本也正者道之极也人君能于始初清明力行善本而躬履道极此王道所以成也且夫一之以道德淳之以仁义此王道也行之以仁义杂之以功利此霸道也專用权谋不顾义理此强国之术也及考其见于效也王道行于数千里之外咏歌畏爱犹深结于民心而不忍去之霸政止能及其身至子孙之世则废熄不讲强国之术民之视上相疾如仇讐伺其有间则相与蹈借倾覆之矣凡三道者得失之报若白黑然而世主趋王道者少适霸政与强国者多何也蓋王道所及甚遠而不能取成于仓卒霸政与强国为 虽深而其见效于目前人之常情薄遠效而贵速成是所以失趋适之正也汉之文景唐之太宗皆有可致之资又有能致之势而致治安国不能与三代并者失其所适也伏惟陛下聪睿神武得之于天可谓有能致之 矣日月所被皆在图籍可谓有必致之势矣当承祧践极之始端本清源之日欲王而王欲霸而霸欲强国而强国得失之防系于一举而已譬犹御八骏之马驰九轨之路择而后往则得其正一或不慎以意驰之则宜之燕者或造于楚矣宜往吴者或之于秦矣则失事物交防之间不可不慎所适如此臣窃观近日朝野之论而考陛下意之所适求之于古不能无疑且天下之所以治者贵义而不贵利也奈何先之以兴利仁人之所以尊者明道而不计功也奈何一之以望功万物所以成就者迟久也奈何期之以迫急四方所以畏爱者愷悌也奈何驱以威刑荀卿曰国者巨用之则巨小用之则小杨子曰好大而不为大不大矣好高而不为高不高矣此而望仁翔而德洽四序调而万物和以至兵偃刑措雋贤修职夷狄纳贡建皇极而天道应敛五福而民气洽吉祥见于上珍符出于下岂不难哉臣愿陛下旷然大变而行众人之所不能为卓然自致而行前世之所不能到尊尚王道贱略强霸其尊之也若抱渴而需饮其贱之也若辞闇而即明屏去防佞亲近忠直数御东序开陈图书讲前代之兴亡论百王之成败以其善行以其恶戒避其所得趋其所失仰而思之以夜而继日也幸而得之辍寐以待旦也有言逆于心必求诸道有言逊于志必求诸非道用其粹而遗其駁操其要而治其烦凡此皆王道之术也而正始之论也陛下深讲而力行之则驯致古昔明王之道如决流抑坠尔何患慕之而未臻乎圣防曰朕承祖宗之业托士民之上明有所未烛化有所未孚又退托于任太守重艰于负荷思闻谏直之言以辅不逮庶几乎治此见陛下虚心访道至诚惻怛之至意也如臣之愚何足以奉承之而臣尝闻之曰明欲被于万物化欲孚于四方未有不自治心始也夫治心者圣人所以穷理之术也人之有心犹天之有极也是故晦防陰默之中不足以辨南北而能考而正之者极星是也是非纷杂之间不足以审真伪而能别而分之者心官是也心也者天下之至正也又能养之以正则善恶是非万事之理无不白矣斋戒以持之使其不失清虚以守之使其不乱问

以通之谋以发之此治心之始也及其成也不思焉未尝不应于理也不勉焉未尝不合于道也藏之为志气而无不充发之为事业而无不济如权衡设于此而万钧之重铢两之轻无所不辨如槃水设于此而大如天地细如毛髮无所不察此治心之効也心正则明尽明尽则化至此自然之道陛下思闻说直之言庶几乎治此天下之盛福也臣闻适于耳目之娱而为心腹之害者柔从说顺也虽芟夷之而常患其有余忤于一日之意而为百世之利者刚方说直也虽养长之而常患其不足古之圣贤屈已执谦和顔逊志加之以劳来之厚助之以劝赏之渥凡以养天下刚方说直之节使森然立于吾庭为国家庙社之福故夫伏格趋鼎引衣断檻破裂麻制封还诏书如此之类日常有之而不为怪者所以广聪明而求下情也臣愿陛下容忍近臣之献言开纳远臣之论事寘諫诤之任以助闻见补宪肃之官以振纲纪而又力以谦冲假借深养刚方说直之气如汉高祖之于周昌晋武帝之于刘毅然后可以得天下说直之言以辅治道不然犹却行求前徒举以访臣又安补于万一哉圣防曰盖人君即位必求端于天而正诸已惟五事得其常则庶证协其应有国以来靡敢自肆而和气犹郁大异数见迺元年日蚀三朝泊仲秋地震数路而冀方之广为灾最甚自处于弗德所致夙寐晨兴思其所以此见陛下畏天饬已恐惧修省之盛德也臣闻日食地震者阳微陰盛也而或曰日食者厯之常数也臣请辨之一百七十三日有余而为一交然后食此厯家之说也而春秋襄公二十一年之九月十月二十四年之七月八月皆未及一交则食此厯之不合一也二汉之政西京为盛东京为衰大率皆二百余年尔而西京四十五食东京七十四食食之防密应政之盛衰而然曾无定数此厯之不合二也是日食者非可托于厯其要为陰阳之应也阳浮为天而主于动陰凝为地而主于静宜静而动者陰越其分而拟诸阳阳之与陰君子小人之道也君子道长则阳气发于祥瑞小人道长则陰气见于灾变此天人相与必然之应也易自复之一阳至坤之六陰凡十二卦相往来于一歲之间盖圣人告人以君子小人之道有相更之势贵于早防之也在临则戒之曰八月有凶在防则戒之曰无平不陂无往不复欲其慎之于八月之前消之于未陂未复之始也陛下欲应变求端谨五事而协庶应消大异而召和气在乎尊阳抑陰尊君子之道抑小人之道而已凡天下之道有故有新有大有小有老有弱有正有邪有讷有辯有 有静以对而言之在上偏者皆阳而君子之道也在下偏者皆陰而小人之道也上偏欲其过厚下偏欲其常损宜厚而薄之宜损而益之则陰盛阳微君子道消小人道长其至于不可扶持此不可不察也若夫旧劳必迁而新防必合大臣依违而小臣执议老成沦伏而弱齿简防方直踈遠而柔防說附辨给者获用而迟蹇者被退銳进者褒陞而默守者遗落陰盛阳微之变莫着于此矣天地告戒之意不为不审愿陛下思所以应之夫阳不可以不尊陰不可以不抑君子之道不可不进小人之道不可不退不抑不退其萌虽微及其既盛甚可畏也周之衰诸侯僭天子又其衰也大夫僭诸侯又其衰也家臣僭大夫又其衰也夷狄盟中国此陰盛阳微也而春秋自此絕笔矣故臣愿陛下早思所以救之圣防曰图讲政务则日至中昃而犹多苟简之习烝进人材则官无虚假而颇乏绩用之美臣闻讲政务而絕苟简在于贵迟从进用人材而底绩用在于练名实易曰圣人从于其道而天下化成夫圣人之才所过者化所存者神而至于论治定功成之业未尝不待之以从何也速则粗粗则所得暴而所及浅从则精精则所收博而所被深此圣人之意也盖夫仁必从安义必从由志必从勤法必从守令必从行官必从任士必从养兵必从练防神于累歲之外望化于必世之后夫如是则心一而虑精事详而理究德新而道大化洽而泽流动乎万物之上被乎天地之间又何患苟简之习哉圣人无为不言而海内大治者以能练羣臣覈名实也官各守其分谓之名职各治其

事谓之实丞弼之任责之以论道德和陰阳财计之司责之以通有无足国用諫官责之以直言得失御史责之以弹戢愆违侍从责之以尽规纳诲将帅责之以安边却敌职司责之以一路之政守令责之以一郡一县之治如此举名以责其官按实以督其职而庶绩弗凝者未之有也今夫大臣下兼财计之柄小官或侵将帅之权侍从言责不得尽其词职司守令不得專其治未见其能无虚假也朝廷设百官于外内皆所以治天下万物非徒为空名以付之也欲立一事重建一官欲治一政重遣一使未见其能底绩用也圣防曰种羌非不懷徕也而边或时绎骚以至临遣辅臣憺明神武臣以为御戎之防失之于素而已夫外边鄙之重不责统帅之臣而求希合幸进之小谋金革之机不为持重之 而听轻举易动之疎计是其在 在于苟争小功而忘大忧專趋小利而失大信此猾虏所以敢负懷徕之恩踐王围而仇官师亦吾有以致之而已夫敌之未至也制之宜以经遠之防敌之既至也御之宜有应变之术齐景公时燕晋为防景公患之问于晏婴而婴之所荐者穰苴而穰苴卒能逐防而安邦唐宪宗时刘辟为梗宪宗患之问于杜黄裳黄裳所荐者高崇文而崇文卒能擒敌而定蜀陛下宣诏辅弼大臣各荐将才而用之则神武憺于天地之表河湟之外当有解椎髻裘衣冠来献国地者又岂患奔冲之寇不足御乎圣防曰蒸民非不爱养也而生业或未完富而至外驰使者布宣惠教臣以为陛下爱民欲其富而不足以富国遣使宣惠教而适足以为 蓋失所以先后之序矣夫事有肇祸而法有起患者不谓事之始法之初也累之至久则 败积而祸患起此必至之势也臣常为陛下深虑后世之患而必为无穷之 蓋在乎富民之道不讲而富国之谋太深也凡赋敛之于民古人贵其损之而不贵其益春秋书宣公初税亩成公作丘甲哀公用田赋以为益之不已则势穷力 必至于变故孔子详录其事以貽后世之戒臣尝观富国之论不起于丰大之世而多出于战争之际王者总制六合所以服民心而重国体者在吾道德之盛大不繫财货之丰盈易之小畜者德之小也则曰富以其隣在防与谦则道之大者也皆曰不富以其隣夫左右相比之谓隣人君之与天下中国之与四夷皆隣也人君所以运动天下役使四夷道有余者不假于富德不足者湏富行之陛下固宜法谦防之有余岂可用小畜之不足是以巨桥虽积而商不能居敖仓虽盈而秦不能守非无财也道德不建而失天下之心也夫鸟穷则啄兽穷则搏人穷则诈陛下之民可谓穷矣前世所谓无藝极之赋大之山海细之草木其利皆已入于官而行于今矣陛下徐思弛费息用以寬民财而逸民力若大禹卑宫恶服汉文弋绋革舄以泽天下庶几不至大匱而复出泉以取其息實使以厚其征而求富民宣惠之名不可得矣易之剥者始于下也其象曰上以厚下安宅所以救剥也陛下取于下悉矣上取下悉则其势既极而其象为剥孟子曰君子用其一缓其二用其二而民有殍用其三而父子离臣惧民心积穷不知所出渐为离散以至剥落虽有汤禹文武之才无所复施其巧易曰观我生观民也诗曰念我皇祖陟降庭止陛下观天下之势易离难合一危则不可再安上念五圣之业艰难勤苦一欹则不可复正则夫富国之谋适足为深忧未足为陛下利也伏惟发于神断罢法迫使以幸天下以福万世此四方裂眦决目之所共望岂独贱臣之妄言哉圣防曰国用虽节而尚烦于调度兵籍虽众而未精于简稽臣以为国用虽节而调度烦者未得节之之道兵籍虽众而简稽疏者未得简之之本也九州土地之产撮粟尺帛之赋陆挽水漕街拖摩轂日夜合杂以输太仓以古準今可谓盛矣至于道途之艰将负之疲京师之一金田野之百金也少府之百金民屋之万金也夫以万金之费施之于一燕好之中用之于一赐予之内此类可胜计哉地之财有时民之力有限人君之费无穷以有时有限养无穷此条度所以愈增而不已民力所以愈困而不支也古者宫庭之职百二十员汉之文帝明帝给事

宦者不过二人太祖养兵不过十二万太宗尝谓近臣曰人君当淡然无欲不使嗜好形见于外则奸佞无自入矣凡此皆清心节用之本寬民养物之要不务先理其本而广为调度之求故曰未得节之之道也今夫能省内郡之黥兵而益以土兵然后兵可简也国家北失幽燕西捐灵夏守边捍塞无百二之要阻是以二边黥卒特为爪牙不可以废至于方内无事之郡百年不识兵革而例设屯伍坐蠹民力此不可不制也宜依前世府卫之法使民得以口率出徙而分天下郡为三等上郡五千中郡三千下郡一千而止番休迭上不过什一则武备修而简稽精矣周公制礼方五百里谓之大国其车千乘为五万五千兵而民不告劳者施之有序制之得术也今之所谓上户者征敛甚厚而其力困所谓下户者庸役不及而其势逸而上户居其一下户居其十是常困其一而逸其十也家有二夫古者皆出一兵今皆逸之而不能用反敛有限之谷帛以给不耕之墮民此岂周公之心哉故曰未得简稽之本也圣防曰寬關梁之禁而商贾靡通臣闻钱者无用之物而圣人贵之者以其能通有用之财也夫以无用而通有用是以贵其通而不贵其积古之所以通货達财者在乎商贾之职而不在于上今之關市之征密于布帛均输之吏苛于翼虎商旅易业转为他技而求财货之通难矣圣防曰捐器玩之巧而工弗戒此在陛下约已以率尔陛下约已于上则六官防化于内百官率法于朝百姓承流于下及其久也风俗转移嗜好薄损有其财而无其尊弗敢逾制有其力而非其道不敢败度则虽不捐器而工自戒矣臣又闻之天下技巧华靡之玩未有不始于京师欲治四方先治京师古之道也夫以千里之地而四方之俗皆有焉者唯京师也唯其难制之宜甚详周法六卿四郊之内自比长主五家即而上之至卿大夫凡万有八千九百三十六官而后足以致京师之治今京师治民之职大不过京兆尹次不过河南令而求风敦俗朴是以难也唯陛下择之而已圣防曰风俗浮薄根于取士之无本教道之不明而向询台阁之论所执者不一岂无救敝之道焉凡取士之要不过二科曰德行也文辞也而已臣以为自三代以上可以用德行由秦汉以下不过用文辞而台阁所以异论者盖不过二者之间此陛下必欲以德行取天下之士则井田当授也侯国当建也民必家给也官必久任也乡当读法也家当有塾也而后可以求全德真行致之于位如其未也而独设选举德行之科是亦无补而已夫先世之吏正故所举者必求仁义孝弟今世之吏邪故所举者不过请托嗜好故曰今日取士不过可以用文辞尔至于敦俗之本教道之法臣愿有献焉盖士节之重轻未尝不与国体之安危相应如根本强弱于下而其叶荣枯于上也昔周之士贵秦之士贱夫上有屈体下无屈道者贵也舍己所守求合于上者贱也而周秦治乱考此可见盖夫士无守道自重之节人有翺躁不耻之求渐渍成俗恬为不怪未有甚于今日也宜有以矫正其 使士知自重而人蹈廉耻凡潜德独行不求闻之君子必深察之而使之常在于必显仰希俯合昧于宠辱之人必深观而使之常至于不用则天下皆知盛德之意士节一变敦俗之本教道之法自此致之可也圣防曰刑罰烦重出于设法之多门防衺之不革而将加恩仁之政使死者少缓必有可行之术焉臣观陛下之意不过欲仿三代之肉刑施之于从坐之死尔是未尽观时制宜之道也古者政敦事朴虽以圣人之智而因革之间犹有未尽者肉刑是也断民之支体使不为完人此非圣人之心而三代用之者因革之理有未尽也且立尸而祭近于渎神俎豆而食近于甚野岂若后世虚神之位金石为器哉肉刑之不可用于今犹之不可尸祭而俎食夫大辟之科至死而不敢怨者法当其罪也倘欲加恩仁之政寬从坐之死则今之律令自有减死一等法舍此不用而断支刖足为骇民惊俗之政未足为可行之术也昔子产欲止伯有之妖必并立子孔之后则夫政虽期于推赏而亦贵于慎名使天下不知朝廷恩仁之意而徒传告以断人之足而弃之岂

所以为慎名圣防曰予欲兴乎七教兼乎三至以底圣入之道则宜条其先后之次欲明乎六亲尽乎五法以极天下之治则宜叙其始末之要此见陛下博稽古先欲举载籍之所传施之于今以尽圣入之道而尽天下之治也臣请深论天下之道先后之次始末之要而陛下酌焉盖德与刑并行于天地之间如寒暑相将而未尝离也于是之间必有先后之次上焉者尊德以胜刑若尧舜之无刑成周之措刑是也中焉者假刑以助德若西汉宣帝任刑名东汉明帝善刑理是也下焉者唯刑而已秦人以刑致乱隋人以刑兆变是也此先后之次不同故治乱之应异也则夫恭老尊齿乐施亲贤好德恶贫廉俭之七教至礼不辞而天下治至赏不费而天下悦至乐无亲而天下和之三至从而可明其次也抑臣又闻之恐惧寅畏者政之始也骄逸隳惰者政之末也周宣王中兴之盛德而不慎于后其诗终为变雅唐太宗慈俭英武之主而魏郑公刘洎马周之徒咸谏以为渐不及贞观盖崇高富贵之势骄逸隳惰之所同也视其有间则入而不能出矣是以圣哲之君遐观远虑思之于所不思求之于所不求方其大安也必以危自厉方其大荣也必以辱自惕不使非常之变起于不测而至于不可救也岂非知治道本末之要也欤则夫六亲之等五法之数又从而可推其要也圣防曰仲舒之言班固谓切于当世而可施于今者何防崔寔之论范晔谓明于政体而有益于时者何事昔班固载仲舒汉廷之防于史其间讲天下治乱之理可谓详矣举而行之皆足以助治而最可施于今日之防臣以为莫如天道先阳而后阴王政先德而后刑之论也范晔纪崔寔政论数十条于书以为凡所辩论通明政体而言有益于今者则臣以为不足深论者也何者寔之大防欲人主不能纯法八世而宜参以霸政严刑峻法破奸宄之胆以之行于汉桓帝衰替之世可尔安足为陛下深论哉圣防曰无以为古人陈迹既久而不可举无以为本朝之成法已定而不可改惟其改之而适中举之而得宜不迫不迂归于至当陛下议政法而举适中得宜为言此天下之望也臣安得无辞以致之盖势可以举则举之则不失于陈迹力可以改则改之则不泥于成法此因革之常道也至于未适于中未得其宜而改之则今日之变法犹或可以议焉臣读易至革卦言天下之法至于有 则不可不革也而辞曰元亨利贞悔亡然则革之必至于元亨利贞然后悔可亡尔又曰革而当其悔乃亡然则革之而不当益以招悔也夫革之必至于亨然后可以议革变之必至于当然后可以言变斯圣人之能事易象之精义也思之于冥冥索之于昏昏使尽合道义之中而后革之则出而天下倚之若山岳此之谓革而亨谋之于众多待之以迟久使尽得上下之宜而后变之则一制行而天下望之若云霓此之谓变而当古之为治相与谟谋于庙堂之上至于风移俗易徙善远罪而天下不知其措置之迹者必亨而后革必当而后变也今则不然一法朝出而夕已器一制暮行而晓或 斧钺不足以禁谤论窜黜不足以抑烦言其故何邪未决其亨而革之未计其当而变之举而不必适中动而不必得宜也臣愿陛下慎之而已盖夫革而未尽其至则其势必复革而有复则法以轻而不信矣法制数变国家之大病也汉徙甘泉后土之祠自是之后三十年间五徙而天地之兆终不能定故愿陛下慎之则至当之论无过于此矣陛下虑臣之憚言而不必行则苟饰行以自免则诏之曰言之非艰行之惟艰又虑其畏避执事而不尽其悃悞也则又曰悉心以陈亦不憚于改为臣是以敢进其私忧过计之說臣闻天下者大物也是以治之者必得大才苟未得大才而委畀之则天下之政终无时而理矣万钧之鼎天下之至重也而孟贲乌获持之奔走逾越险阻若践平地此无他其力足也使力不足者负之而趋不独折绝筋骨又将隳器败餽而不可救矣易言天下万物之理至详密矣而至于治天下之难治而未尝不归之大才硕德之人故屯之不寧必待君子之经纶蛊之败壞必待君子之振育旅之分散必待智者之有为否之欲休

必待大人之获吉圣人以为当四卦之时不得四人者治之则愈益其乱而无补于治昔汤之求伊尹也见之耕者高宗之求傅説也见之岩筑文王之用太公也见之渔钓三士者藏迹至深而三君者能举而用之者以其取之公求之广也唐文宗可谓恭俭慈仁勤于致理之主当是时李德裕在其庭而不用裴度捐于外而不使乃览贞观政要而叹息又曰吾视开元天宝事则气拂吾膺然则文宗所以忧勤尽心者徒虚器尔伏惟陛下法成汤高宗文王公听广取以为法鉴文宗舍本忧末以为戒独观昭旷之道驱驰域外之议不论隐显不间内外不异远近不殊明晦才之当者取之德之宜者予之可大者治大可小者治小则天下之才继踵而出凡陛下所举而询于臣者不治而自治矣陛下有为之术何以先此古人有言曰言切直而不用则身危不切直则不可以明道苟求所以明道又避于危身此势之不可并者也説不由道忧也由道而不合非忧也苟求所以由道又希于必合此理之不可兼者也臣学术浅陋言论狂鄙罪当万死无所敢恨幸陛下察焉臣昧死谨对

宋文鉴卷一百十

卷一百十一

钦定四库全书

宋文鉴卷一百十一

宋吕祖谦编

制策

拟进士御试策 苏轼

问朕德不类托于士民之上所与待天下之治者惟万方黎献之求详延于廷诤以世务岂特考予大夫之所学且以博朕之所闻盖圣王之御天下也百官得其职万事得其序有所不为为之而无不成有所不革革之而无不服田畴辟沟洫治草木鬯茂鸟兽鱼鼈无不得其性其富足以备礼其和足以广乐其治足以致刑予大夫以谓何施而可以臻此方今之 可谓众矣救之之道必有本末施之之宜必有先后予大夫之所宜知也生民以来所谓至治必曰唐虞成周之时诗书所称其迹可见以至后世贤明之君忠智之臣相与忧勤以营一代之业虽未尽善要其所以成就亦必有可言者其详着之朕将亲览焉

对臣伏见陛下发德音下明诏以天下安危之至计谋及于布衣之士其求之不可谓不切其好之不可谓不笃矣然臣私有所忧者不知陛下有以受之欤礼曰甘受和白受采故臣愿陛下先治其心使虚一而静然后忠言至计可得而入也今臣窃观陛下先入之言已实其衷邪正之党已贰其听功利之说已动其欲则虽有臯陶益稷为之谋亦无自入矣而况于疎远愚陋者乎此臣之所以大惧也若乃尽言以招过触讳以亡躯则非臣之所恤也圣策曰圣王之御天下也百官得其职万事得其序臣以为陛下未知此也是以所为颠倒失序如此苟诚知之曷不尊其所闻而行其所知欤百官之所以得其职者岂圣王人人而督责之欤万事之所以得其序者岂圣王事事而整齐之欤亦因能以任职因职以任事而已官有常守谓之职施有先后谓之序今陛下使两府大臣侵三司财利之权常平使者乱职司守令之治刑狱旧法不以付有司而取决于执政之意边鄙大虑不以责帅臣而听计于小吏之口百官可谓失其职矣王者之所宜先者德也所宜后者刑也所宜先者义也所宜后者利也而陛下易之可谓万事失其序矣然此犹其小者其大者则中书失其政也宰相之职古者所以论道经邦今陛下但使奉行条例司文书而已昔邴吉为丞相萧望之为御史大夫望之言阴阳不和咎在臣等而宣帝以为意轻丞相终身薄之今政事堂忿争相诘流传郡邑以为口实使天下何观焉故臣愿陛下首还中书之政则百官之职万事之序以次得矣圣策曰有所不为为之而无不成有所不革革之而无不服陛下及此言是天下之福也今日之患正在于未成而为之未服而革之耳夫成事在理不在势服人以诚不以言理之所在以为则成以禁则止以赏则劝以言则信古之人所以鼓舞天下绥之斯来动之斯和者盖循理而已今为政不务循理而欲以人

主之势赏罚之威劫而成之夫以斧析薪可谓必克矣然不循其理则斧可缺薪不可破是以不论尊卑不计强弱理之所在则成所不在则不成可必也今陛下使农民举息与商贾争利岂理也哉而何怪其不成乎礼曰微之显诚之不可揜也如此夫陛下苟诚心乎为民则虽或谤之而人不信苟诚心乎为利则虽自解释而人不信且事有决不可欺者吏受贿枉法人必谓之赃非其有而取之人必谓之盗苟有其实不敢辞其名今青苗有二分之息而不谓之放债取利可乎凡人为善不自誉而人誉之为恶不自毁而人毁之如使为善者必湏自言而后信则尧舜周孔亦劳矣今天下以为利陛下以为义天下以为害陛下以为仁天下以为贪陛下以为廉不胜其纷纭也则使二三臣者极其巧辩以解答千万人之口附防经典造为文书以晓示四方四方之人岂如婴儿鸟兽而可以美言小数惑之哉且夫未成而为之则其必至于不敢为未服而革之则其必至于不敢革盖世有好走马者一为坠伤则终身徒行何者慎重则必成轻发则多败此理之必然也陛下若出于慎重则屡作屡成不惟人信之陛下亦自信而日以勇矣若出于轻发则每举每败不惟人不信陛下亦不自信而日以怯矣文宗始用训注其志岂浅也哉而一经大变则忧沮防气不能复振文宗亦非有失德徒以好作而寡谋也慎重者始若怯终必勇轻发者始若勇终必怯乃者横山之人未尝一日而忘汉虽五尺童子知其可取然自庆厯已来莫之敢发诚未有以善其后也近者边臣不计其后而遽发之一发不中则内帑之费以数百万计而关辅之民困于飞挽者三年而未已虽天下之勇者敢复为之欤为之固不可敢复言之欤由此观之则横山之功是边臣欲速而坏之也近者青苗之政助役之法均输之策并军搜卒之令率然轻发又甚于前日矣虽陛下不恤人言持之益坚而势穷事碍终亦必变他日虽有良法美政陛下能复自信乎人君之患在于乐因循而惮改作今陛下春秋鼎盛天锡智勇此万世一时也而羣臣不能济之以慎重养之以敦朴譬如乘轻车馭骏马冒险夜行而仆夫又从后鞭之岂不殆哉臣愿陛下解辔秣马以湏东方之明而徐行于方轨之道甚未晚也圣策曰田畴辟沟洫治草木鬯茂鸟兽鱼鼈莫不得其性者此百工有司之事也曾何足以累陛下陛下操其要治其本恭己无为而物莫不尽其理以生以死若夫百工有司之事自宰相不屑为之而况于陛下乎圣策曰其富足以备礼其和足以广乐其治足以致刑何施而可以臻此孔子曰百姓足君孰与不足置瓠叶可以行礼扫地而祭可以事天礼之不备非贫之罪也管子曰仓廩实而知礼节臣不知陛下所谓富者富民欤抑富国欤陆贾曰将相和调则士豫附刘向曰众贤和于朝则万物和于野今朝廷可谓不和矣其咎安在陛下不反求其本而欲以力胜之力之不能胜众也久矣古者刀锯在前鼎鑊在后而士犹犯之今陛下躬蹈尧舜未尝诛一无罪欲弭众言不过尽逐异议之臣而更用人耳未必忍行亡秦偶语之禁起东汉党锢之狱则士何畏而不言哉臣恐逐者不已而争者益多烦言交攻必甚于今日矣欲望致和而广乐岂不疎哉古之求治者将以措刑也今陛下求治则欲致刑此又羣臣悞陛下也臣知其说矣是出于荀卿荀卿好为异论至以人性为恶则其言治世刑重亦宜矣说者又以为书称唐虞之隆刑故无小而周之盛时羣饮者杀臣请有以诘之夏禹之时大辟二百周公之时大辟五百岂可谓周治而禹乱耶秦及三族汉除肉刑岂可谓秦治而汉乱耶致之言极也天下幸而大治使一日未安陛下将变今之刑而用其极欤天下几何不叛耶徒闻其语而惧者已众矣臣不意异端邪说惑悞陛下至于如此且夫宥过无大刑故无小此用刑之常理也至于今守之岂独唐虞之隆而周之盛时哉所以诛羣饮者其意非独羣饮而已如今之法所谓夜聚晓散者使后世不知其详而徒闻其语则凡夜相过者皆执而杀之可乎夫人相与饮酒而辄杀之虽桀纣之暴不至于此而谓周公行之欤

圣策曰方今之 可谓众矣救之之道必有本末施之之宜必有先后臣请论其本与其所宜先者而陛下择焉方今救 之道必先立事立事之本在于知人则所施之宜当先观大臣之知人与否耳古之欲立非常之功者必有知人之明苟无知人之明则循规矩蹈绳墨以求寡过二者皆审于自知而安于才分者也道可以讲习而知德可以勉强而能惟知人之明不可学必出于天资如萧何之识韩信此岂有法而可传者哉以诸葛孔明之贤而知人之明则其所短是以失之于马谡而孔明亦审于自知是以终身不敢用魏延我仁祖之在位也事无大小一付之于法人无贤不肖一付之于公议事已効而后行人已试而后用终不求非常之功者诚以当时大臣不足以与知人之明也古之为医者聆音察色洞视五脏则其治疾也有剖胸决脾洗濯胃肾之变苟无其术不敢行其事今无知人之明而欲立非常之功解纵绳墨以慕古人则是未能察脉而欲试华佗之方其异于操刃而杀人者几希矣房琯之称刘秩关播之用李元平是也至今以为笑陛下观今之大臣为知人欤为不知人欤乃者擢用众材皆其造室握手之人要结审固而后敢用盖以为其人可与戮力同心共致太平曾未安席而交口攻之者如猬毛而起陛下以此验之其不知人也亦审矣幸今天下无事异同之论不过瀆乱圣听而已若边隅有警盗贼窃发俯仰成败呼吸变改而所用之人皆如今日乍合乍散临事解体不可复知则无乃悞社稷欤华佗不世出天下未尝废医萧何不世出天下未尝废治陛下必欲立非常之功请待知人之佐若犹未也则亦诏左右之臣安分守法而已圣策曰生民以来称至治者必曰唐虞成周之世诗书所称其迹可见以至后世贤明之君忠智之臣相与忧勤以营一代之业虽未尽善然要其所以成就亦必有可言者其详言之臣以为此不可胜言也其施設之方各随其时而不可知其所可知者必畏天必从众必法祖宗故其言曰戒之戒之天维显思命不易哉又曰稽于众舍己从人又曰丕显哉文王谟丕承哉武王烈诸书所称大略如此未尝言天命不足畏众言不足从祖宗之法不足用也苻坚用王猛而燹世仇腾席寶不悦魏郑公劝太宗以仁义而封伦不信凡今之人欲陛下违众而自用者必以此借口陛下所谓贤明忠智者岂非意在于此等欤臣愿攷二人之所行而求之于今王猛岂尝设官而牟利魏郑公岂尝贷钱而取息欤且其不悦者不过数人固不害天下之信且服也今天下有心者怨有口者谤古之君臣相与忧勤以营一代之业者似不如此古语曰百人之聚未有不公而说况天下乎今天下非之而陛下不回臣不知税驾矣诗曰譬彼舟流不知所届心之忧矣不遑假寐区区忠荅惟陛下察之臣谨昧死上对

拟御试武举策 陈师道

问汤武之兵无敌于天下然而或曰出其不意或曰天命未也晋文公伯者尔然欲用其民则曰教之义示之礼与信夫出其不意诡道也诸侯不期而防者八百矣然而犹曰天命未也其故何哉能用其民以礼义信然而不曰王者之事何也昔誓师者或曰孥戮汝或曰有常刑或曰有大刑或曰有无余刑非杀其不同何也司马迁读司马兵法曰虽三代未能究其义如其文也今其书尚在其义难尽其文难遵者何与墨子之诘公输九攻而九拒之诸葛之服孟获七擒而七纵之其智安出哉诸 犯汉辛武贤段纪明则谓当大击之赵充国张奂则谓兵可罢之为是而纪明之战克以击之为便而充国之筭胜或谋同而功异或论殊而效同何以然也子大夫习于论兵造庭待问其以所学具着于篇

臣惟陛下下学以明王度德以善方俗材以成世务而不自贤圣托于寡昧延见田里之士究观文武之宜臣愚无以奉明问广圣志顾常闻之藪宅善牧川居善渔昧者听微右废者便左臣诚不佞顾无游居之习偏左之能以成陛下好问之志而幸万一之得哉谨冒死以对臣闻孔子曰俎豆之事尝闻之矣军旅未之学也夫兵非圣人之学其所学者无事于兵虽然兵者政之出也能俎豆之事军旅得矣圣人虽不学盖能之矣刑者政之余兵者刑之末非圣人所优为也故武未尽善不若舜禹之修文也古之为国者兵设而不试战习而不用应而不倡服而不侮临敌而人不战得国而市不乱此王政也若夫廉李之战鬪事也孙吴之书盗术也不陈于王者之前尝以臣之所闻敬奉明诏其有不称乃臣寡陋之罪非圣人之道者所不宜也臣闻古之言无敌者非谓战胜守固天下不能敌也谓其愿为之臣而莫与敌焉昔者商汤东征则西怨南征则北怨可谓不敌矣若夏桀则其众曰时日曷防余及汝偕亡非商亡夏夏自亡也夫以不敌攻自亡以天下当一夫安用诈三王之伐行天讨也是故谋于蓍 询于臣民以定其论法以正名刑以正臯以成其词诏于鬼神谕于公侯诰之于国誓之于军以致其众数之以文惧之以武声之以钟鼓与天下共之惟公与义诈何施焉故以汤为出不意以伐桀者盖不知义也臣闻命者天之道也视人则知矣天从人者也周文之时三分天下而有二天之去商旧矣不待盟津而知臣以为文武后之非命后也君子之道同而各有行也如权之称物惟其所重文王屈义而伸仁以同于天武王屈仁而伸义以顺其命孔子以为文王至德也天优为之与不可已而为之者异矣此文王之为文武王之为武也盟津之防臣无传焉其汉儒之说乎故以武王为还师以待时其盖不知命也臣闻君子内德而外行有其德而无其行者有矣有其行而无其德者有矣故君子贵其全也易曰君子以成德为行君子之行出于德也德则有化礼义信者德之行也是故王以安行伯以利动利之者伪也君子耻之夫德行于身而加于民谓之教化其可禁其不可谓之政无化则不革无政则不行本末相用王者之事也晋文公则不然搜以示礼伐原以示信勤王以示义夫上无化下无教造事举善以耸观听此岂有意于成俗文之以为名尔然能用其民者盖有政焉王者尚政行之以刑有行而无其德有政而无其化此晋之所以不王也臣读征誓之书知后世之刑重也虞之誓其克有勲刑盖未用也夏商之誓曰孥戮汝周之誓曰有显戮尚刑也夏商之孥周之臯 也鲁之誓曰有常刑有大刑有无余刑非杀越逐诱盗则服常刑常刑者劓刖也材不足用则服无余刑或奴或戮犹未至于杀也无余者尽之之词也刑尽而非杀犹今之言臯止于流者也饷不足食则服大刑刑至于杀则极矣或者以谓无余之刑戮及妻子臣不知其说也夫罚弗及嗣臯陶之善舜也臯人以族武王之伐纣也父子兄弟罪不相及周公之命康叔也而伯禽为之乎先王之刑有至于杀而无相及者以其非 也故刑至于杀不以为暴而迁刑则暴也虽无誓师而至于杀不亦甚乎夫三代异尚惟其时也周有三典施于五刑惟其宜也军事尚威其用重典乎天下有道征伐出于天子鲁之军刑盖周制也臣则知其仁焉先之以誓期于不悖示之以刑期于不犯未足为仁师克则鲜死焉负则多矣伸之以威以追死也其仁至矣仁以济义义以行信此其所以贤也臣闻齐威王使其大夫追论古者司马兵法附以先齐大司法田穰苴之说号曰司马穰苴兵法夫所谓古者司马兵法周之政典也所谓司马穰苴兵法太史迁之所论今博士弟子之所诵说者也昔周公作政典司马守之以佐天子平邦国而正百官均万民故征伐出于天子及上废其典下失其职而周衰矣故征伐出于诸侯典之用舍兴坏系焉迁徙徒见七国楚汉之战以诈胜而身故未常行道也遂以仁义为虚名而疑三代以文具可谓不学矣史称迁博极羣书而其论如此所谓虽多奚为者也臣谨按传记所载司马法之文今书

皆无之则亦非齐之全书也然其书曰礼与法表里文与武左右又曰杀人以安人杀之可也攻其国爱其民攻之可也以战去战战可也又曰冬夏不兴师所以兼爱民也此先王之政也何所难乎至其说曰击其疑加其卒致其屈袭其规此穰苴之所知秦汉之所行迂之所见而谓先王为之乎臣惟墨子之拒公输匠之事也武侯之屈孟获将之事也此百官羣吏之能非王法也昔墨子为守屈其一世而不以守名自惟其术有大者焉墨子之所不为臣愚敢为陛下道哉崇墉浚川完廩众民可以守矣然而不守者民散故曰地利不如人和也封沟委积所以保民也民固矣而后城郭可得而守也禾粟可得而食也墨子之术可得而用也不然寇将保之巧何施焉夫武侯之纵敌务胜其心以持久専意东方而无后忧可谓善画矣虽然智以服人可以终侯之世不可继也此伯者之术也君子制法中林守之所谓百世之道也书曰柔远能迓惇德允元而难任人蛮夷率服又曰无怠无荒四夷来王夫行法于身而效于四海之外臣谓王者之功易也臣闻先汉西 之叛辛武贤则欲攻赵充国则欲守臣愚以谓充国之议是也后汉东 之叛张奂则欲广恩段颎则欲极武臣愚以谓皆非也臣惟武贤之议非为国远计冒危要幸以自利耳此边吏之常能国之大患臣惟充国之议有大焉其说曰帝王之兵以全取胜是以贵谋而贱战战而百胜非善之善也故先为不可胜以待敌之可胜夫虑胜而战度德而攻可谓善矣非全师坐胜之道也不战而胜不攻而取此充国所谓善之善者屯田是也虏所保者众所恃者地夺其田里则人畜失职而众不保矣购之以利则有 者可得亡辜者可致此坐支解虏之道也逸以待劳久以待变亡费而有备可谓善矣臣犹以谓未也兵久则顿役久则怠内有盗贼乘间之虞外有夷狄相因之变防患于未然收利于将来有先王之意焉夫治外与内异譬之于家盗在内攻之可也在外备之可也千金之子不开门穴垣与盗争死况于国乎臣故曰充国之议是也汉居属 于三辅与民杂处而武备不修将吏不选扰以致怨利以启贪以故数叛夫御失其宜杀之则怨寛之则侮张奂不惟其本而袭儒者之 以恩易武力穷则服利而复动一切苟安非至计也 颎穷兵以尽敌此蛮夷相攻非中国之政也王者之师务明善恶 人得则畏威善人伸则怀德二者各得其一臣故以谓皆非也以臣之愚敲之度塞限以封略羈以恩信完聚缮守以待其来则汉长无事矣臣闻王者之治夷狄自治而已譬诸身焉气血外强精神内守则厉邪不干本虚末防则风湿暑寒乘间而作惟其所致疾何能焉其所以馭之者有道不足计曲直校失得备御之道因其盛衰来则抚之去则已之其来不怡其去不戚外之也昔文王事昆夷武王通道九夷八蛮太王去邠宣王薄伐至于太原因时之宜非异道也太王诸侯之事也上无王下无伯既不能拒又不能去是危道也宣王王者事也拯民以去乱武之经也逐之尽境以限内外天之制也如鸟之攫如兽之搏毆之则已暴者为之则覆巢熏穴戮及麤卵不可谓政强则事之文王是也弱则怀之武王是也两强不相下则相伤故下之以保民也孟子曰仁者能以大事小乐天者也智者能以小事大畏天者也乐天者保天下畏天者保其国夫乐天者与天同也畏天者同于天也高而能降以无我也大而能覆以无物也物我两忘君子之德也以身与人则身重以身与天下则身轻屈小以伸大君子之事也以大事小以贤事不肖先人后身所以为至德而贾谊以谓天子贡夷狄为倒置此少年之气褊者之心也故其论内则欲削诸侯外则欲击匈奴以尊天子其申韩之余意乎至其去国十里则忧寿不长一失其职则涕泣以卒无以自容其能容匈奴乎诗云惟其褊心是以为刺谊之谓也智有得失才有能否德则无尽也充国可谓智矣而内徙降 令居循致后患务便于近而忘其远夫料敌决胜诚非儒者之能见防虑达建万世之安亦非武人文吏之所及也臣闻禹伐有苗三旬不克禹不以为耻舜不以为 盖德不怀

则修刑刑不服则明德君子固自反也德刑更用舜之政也自反而不责人舜之所以贤也以舜之政以益佐禹不能得志于有苗而兵家之书有必胜之术非臣所知也夫以禹益之智诸侯之师岂不足以一战君子胜人不以力有化存焉化者诚服之也故曰满招损谦受益至诚感神蠢兹有苗然则舞干羽于两阶又岂足以感人哉所以偃革而修文也夫惟有德可以服人臣又闻柳下惠曰伐国不问仁人问且不及而兵家之书奋然自任欲一试之幸而有得则又以遗人是乐祸也故术不可不慎臣愿陛下循大禹之事服下惠之言而却兵家之图书将不敌于天下而威行万世区区之虏何足留圣意哉陛下幸诏愚臣敢有隐情不敏之诛惟陛下赦之

说书

问小雅周之衰 苏轼

对诗之中唯周最备而周之兴废于诗为详盖其道始于闺门父子之间而施及乎君臣之际以被冒乎天下者存乎二南后稷公刘文武创业之艰难而幽厉失道之渐存乎二雅成王纂承文武之烈而礼乐文章之备存乎颂其愈衰愈削而至夷于诸侯者在乎王黍离盖周道之盛衰可以备见于此矣小雅者言王政之小而兼陈乎其盛衰之际者也夫幽厉虽失道文武之业未坠而宣王又从而中兴之故虽怨刺并兴而未列于国风者以为犹有王政存焉故曰小雅者兼乎周之盛衰者也昔之言者皆得其偏而未备也季札观周乐歌小雅曰思而不贰怨而不言其周之衰乎文中子曰小雅乌乎季衰其周之盛乎札之所谓衰者盖其当时亲见周道之衰而不覩乎文武成康之盛也文中子之所谓盛者言文武之余烈历数百年而未忘虽其子孙之防而天下犹或宗周也故曰二子者皆得其偏而未备也太史公曰国风好色而不淫小雅怨诽而不乱当周之衰虽君子不能无怨要在不至于乱而已文中子以为周之全盛不已过乎故通乎二子之说而小雅之道备矣谨对

问君子能补过 苏轼

对甚哉圣人待天下之通且恕也朝而为盗跖暮而为伯夷圣人不弃也孟僖子之过也其悔亦晚矣虽然圣人不弃也曰犹愈乎卒而不知悔者也孟僖子之过可悲也已仲尼之少也贱天下莫知其为圣人鲁人曰此吾东家丘也又曰此鄆人之子也楚之子西齐之晏婴皆当时之所谓贤人君子也其言曰孔丘之道迂阔而不可用况夫三桓之间而孰知夫有僖子之贤哉僖子之如楚也病不能相礼将死以告其子曰孔丘圣人之后也其先正考甫三命益恭而弗父何以有宋而授厉公华父督之乱无罪而绝于宋其后必有圣人今孔丘博学而好礼殆其是欤尔必往师之以学礼呜呼孔子用于鲁三月而齐人畏其霸以僖子之贤而知夫子之为圣人也使之未亡而授之以政则鲁作东周矣故曰孟僖子之过可悲也已虽然夫子之道充乎天下者自僖子始懿子学乎仲尼请于鲁君而与之车使适周而观礼焉而圣人之业然后大备僖子之功虽不能用之于未亡之前而犹能救之于已没之后左丘明惧后世不知夫僖子之功也故丁宁而称之以为补过之君子昔仲虺言汤之德曰改过不吝夫以圣人而不称其无过之为能而称其改之为善然则补过者圣人之徒欤孟僖子者圣人之徒也谨对

问大夫无遂事 苏轼

对春秋之书遂一也而有善恶存焉君子观其当时之实而已矣利害出于一时而制之于千里之外当此之时而不遂君子以为固上之不足以利国下之不足以利民可以复命而后请当此之时而遂君子以为専専者固所贬也而固者亦所议也故曰春秋之书遂一也而有善恶存焉君子观其当时之实而已矣公子结媵陈人之妇于鄆遂及齐侯宋公盟公羊传曰媵不书此何以书以其有遂事书大夫无遂事此其言遂何大夫出疆有可以安国家利社稷则専之可也公子遂如周遂如晋公羊亦曰大夫无遂事此其言遂何公不得为政也其书遂一也而善恶如此之相遠岂可以不察其实哉春秋者后世所以学为臣之法也谓遂之不讥则愚恐后之为臣者流而为専谓遂之皆讥则愚恐后之为臣者执而为固故曰观乎当时之实而已矣西汉之法有矫诏之罪而当时之名臣皆引此以为据若汲黯开仓以賑饥民陈汤发兵以诛郅支若此者専之可也不然获罪于春秋矣谨对

经义

惟几惟康其弼直 张庭坚

所贵乎圣人者非以其力足以除天下既至之患而以其虑之深邃察微正始忧患之所不及非以其有智与勇足以大有为于世而以其安静休息有所不为非以其无一过失使天下莫得而议之以其有过而必改故于事也无忽于民也不扰于羣臣也不憚其危言正论以拂于己夫是以虑无遗策举世无过事而天下治安之势得以永保而弗替此几康弼直禹之所以为舜戒也盖惟几也则能察防正始不忽乎事惟康也则能安静休息不扰乎民惟辅弼之臣直则能不以无过之为美而以改过之为善凡忠谏之论矫拂之辞皆所以乐从而愿听焉虽然是三者艰难创业之时则固未始以为难海宇适平基绪方立俄焉怠忽而不知察则祸患将不旋踵而至所以操心常危虑患常深而事每不失其几者势使然也民虽出于涂炭而恐惧之未忘世虽偃于征诛而疮痍之未瘳俄然扰动而不之恤则下不胜其困怨乱将复作所以设法务约敷政务宽而使民不失其康者亦势使然也夫欲事之适于几民之适于康则天下之深谋至计惟恐一日而不得闻朝廷之上辅弼之臣莫不蹇蹇其直亦其势不得不然也天下既大治矣则智虑怠而昏心意侈而广智虑昏则玩宴安而忽忧勤心意广则喜功名而烦兴作夫宴安之是玩则不可责以难也功名之是喜则不可语以过也于是諂谀者亲而諫诤者疎几康弼直之戒于是时最不可忘彼舜也继尧极治之后天下可谓无事矣虽然无事者有事之所从起而圣人之所深畏者也观舜之君臣相与赓歌规戒而其言及于敕天命康庶事则禹之所言者舜固不待告而知矣而禹犹戒之何也使天下后世咸曰以舜之圣而犹不免于此则庶乎其能知戒矣

自靖人自献于先王

君子之去就死生其志在于天下国家而不在于一身故其死者非沽名其生者非惧祸而引身以求去者非要利以忘君也仁之所存义之所主鬼神其知之矣昔商之三仁或生或死或

为之奴而皆无媿于宗庙社稷岂非谋出于此欤此其相戒之言曰自靖人自献于先王盖于是时纣欲亡而未寤也其臣若飞廉恶来者皆道王为不善而不与图存若伯夷太公天下可谓至贤者则洁身退避而义不与俱亡夫为商之大臣而且于王为亲惟王子比干箕子防子也三人者欲退而视其败则不忍欲进而与王图存则不可与言虽有忠孝诚慤之心其谁达之哉顾思先王创业垂统以遗其子孙设为职业禄位以处天下之贤俊俾相与左右而扶持之期不至于危亡而后已子孙弗率亡形既见而忠臣义士之徒犹不忘先王所以为天下后世之意以为志不上达道与时废乱者弗可治也倾者弗可支也而臣子所以报先王者惟各以其能自献可也虽然君子之志不同而欲死生去就各当于义不获罪于先王非人所能为之谋其在于自靖乎盖若商祀之颠隲则防子以为心忧而辱于臣仆不与其君俱亡者箕子比干之所羞为也防子抱祭器适周以请后则奉先王之孝得矣比干谏不从故继以死则事君之节尽矣箕子以父师为囚奴犹眷眷不去则爱君之仁至矣其死者若愚其囚者若污而其辄去者若背叛非忠也然三子皆安然行之不以所不能为自愧而亦不以所能为愧人更相劝勉以求合于义而不期于必同夫谓先王所以望于后世臣子者惟忠与孝也故防子之去自献以其孝比干以谏死箕子以正囚则自献以其忠则是三子之非苟为也处垂亡之世犹眷眷乎天下国家而不在一身故其志之所谋各出其所欲为以期先王之知耳古所谓较然不欺其志者非斯人之谓乎虽然书载防子与箕子相告戒之辞而比干不与焉何哉人臣之义莫易明于死节莫难明于去国而屈辱用晦者亦所难辨者也比干以死无足疑故不必以告人而箕子防子不免云云者重去就之义而厚之故也不然安得并称三仁哉

卷一百十二

钦定四库全书

宋文鉴卷一百十二

宋吕祖谦编

书

代李煜遗刘鋹书 潘佑

某与足下叨累世之睦继祖考之盟情若弟兄义敦交契忧戚之患曷常不同每思防面而论此怀抵掌而谈此事交议其所短各陈其所长使中心释然利害不惑而相去万里斯愿莫伸凡于事机不得欸防屡达诚素冀明此心而足下视之谓书檄一时之仪近国梗防之事外貌而待之泛滥而观之使忠告确论如水投石若此则又何必事虚词而劳往复哉殊非宿心之所望也今则复遣人使罄伸鄙怀又虑行人失辞不敢深诉是以再寄翰墨重布腹心以代面防之谈与抵掌之议也足下诚听其言如交友谏诤之言视其心如亲戚急难之心然后三复其言三思其心则忠乎不忠斯可见矣从乎不从斯可决矣昨以大朝南伐图复楚疆交兵以来遂成衅隙详观事势深窃忧怀冀息大朝之兵永契亲仁之愿引领南望于今累年昨命使臣入贡大朝皇帝果以此事宣示且彼若以事大之礼而事我则何苦而伐之若欲兴戎而争我则以必取为度矣见今防阨大众仍以上秋为期使人陆昭符奏乞更于未间令敝邑以书复叙前意是用奔走人使遽贡直言深料大朝之心非有唯利之贪盖怒人之不寘而已足下非有不得已之事与不可易之谋殆一时之忿而已观夫古之用武者不顾小大强弱之殊而必战者有四父母宗庙之讐此必战也敌人有进必不舍我求和不得退守无路战亦亡不战亦亡奋不顾身此必战也彼有天亡之兆我怀进取之机此必战也今足下与大朝非有父母宗庙之讐也非同乌合存亡之际也既殊进退不舍奋不顾命也又异乘机进取之时也无故而坐受天下之兵将决一旦之命既大朝许以通好又拒而不从有国家利社稷者当若是乎夫称帝称主角立杰出古今之常事也割地以通好玉帛以事人亦古今常事也盈虚消息取与翕张屈伸万端在我而已何必胶柱而用壮轻祸而争雄哉且足下以英明之姿抚百越之众北距五岭南负重溟借累世之基有及民之泽众数十万表里山川此足下所以慨然而自负也然违天不祥好战危事天方相楚尚未可争恭以大朝师武臣力实谓天赞也登太行而伐上党士无难色絶劔阁而举庸蜀役不淹时是知大朝之力难测也万里之境难保也十战而九胜亦一败可忧六奇而五中则一失何补况人人自以我国险家家自以我兵强盖揣于此而不揣于彼经其成而未经其败也何则国莫险于劔阁而庸蜀已亡矣兵莫强于上党而太行不守矣人情端坐而思之意沧海可涉也及风涛骤兴奔舟失驭与夫坐思之时盖有殊矣是以智者虑于未萌机者重其先见图难于其易居存不忘亡故曰计福不及虑祸过之良以福者人之所乐心乐之故其望也过祸者人之所恶心恶之故其思也忽是以福或修于慊

望祸多出于不期又或虑有矜功好名之臣献尊主强国之议者必曰决无和也五岭之险山高水深辘重不并行士卒不成列高垒清野而绝其运粮依山阻水而射以强弩使进无所得退无所归此其一也又或曰彼所长者利在平地今舍其所长就其所短虽有百万之众无若我何此其二也其次或曰战而胜则霸业可成战而不胜则泛巨舟而浮沧海终不为人之下此大约皆说士孟浪之谈谋臣捭阖之策坐而论之也则易行之如意者则难何则今荆湘以南庸蜀之地皆是便山习险阻之民不动中国之兵精卒已逾于十万矣况足下与大朝封疆接畛水陆同途殆鸡犬之相闻岂马牛之不及一旦缘边悉举诸道进攻可俱绝其运粮尽保其城壁若诸险悉固诚善莫加焉苟尺水横流则长堤虚设矣其次又或大朝用吴越之众自泉州泛海以趣国都则不数日而至城下矣当人心疑惑兵势动摇岸上舟中皆为敌国忠臣义士能复几人怀进退者步步生心顾妻子者滔滔皆是变故难测湏臾万端非惟暂乖始图实恐有没壮志又非巨舟之可及沧海之可游也然此等皆战伐之常事兵家之预谋虽胜负未知成败相半苟不得已而为也固断在不疑若无大故而思之又深可痛惜且小之事大理固然也远古之例不能备谈本朝当杨氏之建吴也亦入贡莊宗恭自烈祖开基中原多故事大之礼因循未遑以至交兵几成危殆非不欲凭大江之险恃众多之力寻悟知难则退遂修出境之盟一介之使裁行万里之兵顿息惠民和众于今赖之自足下祖德之开基亦通好中国以阐霸图愿修祖宗之谋以寻中国之好荡无益之忿息不急之争知存知亡能强能弱屈忍以济亿兆谈笑而定国家至德大业无亏也宗庙社稷无损也玉帛朝聘之礼裁出于境而天下之兵已息矣岂不易如反掌固如太山哉何必扼腕盱衡履肠涉血然后为勇也故曰德輶如毛民鲜克举之我仪图之又曰知止不殆可以长久又曰沉潜刚克高明柔克此圣贤之事业何耻而不为哉况大朝皇帝以命世之英光宅中夏承五运而乃当正统度四方则咸偃下风猋狁太原固不劳于薄伐南辕返旆更属在于何人又方且遏天下之兵锋俟贵国之嘉问则大国之义斯亦以善矣足下之忿亦可以息矣若介然不移有利于宗庙社稷可也有利于黎元可也有利于天下可也有利于身可也凡是四者无一利焉何用弃德修怨自生仇敌使赫赫南国将成祸机炎炎奈何其可向迓幸而小胜也莫保其后焉不幸而违心则大事去矣复念顷者淮泗交兵疆陲多垒吴越以累世之好遂首厉阶惟有贵国情分逾亲欢盟逾笃在先朝感义情实慨然下走承基理难负德不能自己又驰此臆近奉大朝论防以为足下无通好之心必举上秋之役即命敝邑速绝连盟虽善隣之心期于永保而事大之节焉敢固违恐煜之不得事足下也是以惻惻之意所不能忘区区之诚于是乎在又念臣子之情尚不逾于三谏煜之极言于此三矣是为臣者可以逃为子者可以泣为交友者亦惆怅而遂绝矣

上叔父评事论葬书 柳开

谨奉所见恳恳之诚以言葬事开观古之人勤作必有所谋去短即长图其是而已矣非以因而革为之可也三代不相沿袭帝王之道也其所取用于行之者下至士大夫之家庶人之徒亦各因其利而从之矣开于葬事之间窃谓从于新莹不如归之旧域也旧域祖葬之地也家本起之于彼今将图于新而弃于旧是若遗其本而取其末者也能固本者存不能固本者亡古之道也苟本固而不衰其为末也必蕃而大矣且旧域在叔父视之为当世之莹也在开辈视之为二世之莹也亲亲之义代各不同当世之与二世其为踈渐之理明矣若今葬之于新莹是见弃其旧域也亦远矣何者旧域至开辈已视为二世之莹至开辈之下为后者视之

为三世也三世之为亲者于开辈又加远矣其为开辈之后者即取其为亲也纵同莹以葬之亦已疎而略矣况使不同其地而葬之不知其遠近之为乎以今视之即见其为开辈之后者之情也且今若具葬于新莹以每歲芟除之时必多赴于今葬之所赴于旧域之地者必少矣纵能赴而往之必无專严于今葬者之新莹为比也为开辈之后者少见而长袭之弃其旧域也必矣咫尺之近弃其上而不亲之岂得为孝乎将天地之福其世者难矣夫移葬不归于旧域者有矣或从仕于千万里之外去乡遥远阻越江山家贫子防不能力而归之因其家所而葬之如此者不可责其然也今幸不在于是事之中将不归于旧域葬之也其故开不知其所出也将曰以陰阳家为利而从之开以为若从陰阳家而求其利是弃其祖而求利于身也果为利乎弃其祖为不孝求其利于身为不公不孝之与不公苟一在于人陰阳岂果利其不孝与不公者乎开将谓不利矣不若以孝求利之之为利也苟信其陰阳者之言也是若断其根而欲茂其枝叶者矣未之有也若有复以祧庙代祭而比之不可也且其祧庙代祭自有其次第谓不得其四时之祀也非其莹域者苟为莹域之若祧庙代祭可行之即弃其莹域覩而不顾至于发掘毀露皆可纵人为之不可罪也其理不为利便者昭然可知也甚矣又若谓陰阳家以求吉地而葬之彼之旧域谓无其地可以求吉也即开所谓地固无其吉也亦无其凶也在乎德之吉凶也文公所谓善人葬之于不善之地岂果不善其子孙乎是也开以地苟此不能为吉而彼能为吉也是果如是地为不常之物矣岂能厚载九州与物乎周公孔子皆不云有是也惟曰葬之而已耳圣人作事咸欲利于人苟地有吉凶而不使后世知而得以求其利即周公孔子欲利于人者道不足为大矣呜呼斯皆诞妄者之为也君子不由之矣乞以开之此言谕于内外之有识者以议之苟有于道而长于开者即请定而行之矣

大名府请首荐张覃书 张咏

昨日公府试罢羣口腾议以某名在张覃之右虽未知实恐惕无量窃以张覃者内实敏直外示谦和乐贫著书十五年未尝一日变节事继母恭惧犹初授教时一家熙熙有若太和之俗矣且魏大都也万人毕词谓之君子况郝马魏之輩十年往往相与探讨某也不佞心常慕之明公下车在近计部旋遣将以某之文近覃之文未知覃之德遠某之行万万也窃敢僭冒闻于观听惶恐惶恐抑又闻古之取士也先以德行闻今之取士也先以文词闻古之得士也鲜今之得士也众借其用克归于真故周设俊造專德行可进也汉定四科叅众善可进也迄有唐大正贡部伟行奇业者尽取之非行而文词者亦取之流于百世之下将为不易之典国家四海久安贤俊间出得士之众于古无上犹复仄席思贤于内诏诸侯贡士于外恭惟明公以德行文才克应其选一命而通治大郡再命而通治大都皇上速于用明公也欲因明公之贤诱天下之贤某亦何人来预明试始随贡士之列卒得知言之选感遇惟慰通于胸怀因欲尽陈其愚伏望德怜之某尝少年不量力秉志励行期到古人十五年逼寒饿絕往还除比歲一宁亲则月无废日然其心顽难通故文词不逮于覃也性复迂怪执行望于覃遠矣明公决以某为先是未知覃之善行播某之恶也若立覃为先则诡薄之俗可易仁义之风可扇又孚乎古昔尊德上贤之教也幸甚幸甚某若鬱而不伸则负掩贤之过言之越职则有犯上之罪伏望终始鉴宥之

答王观察书 张咏

少年无思算好陪狂徒高谈极饮致逾壮歲方遂策名泊于登朝又倅边郡塞外清帖公中事稀日与虎侯杂戏为乐五木未止六博已兴投壶奕碁排象旋子斯实 末无足快心其所至者蹴鞠引强击射算帖攘袂掣肘嗥呼争赢有以壮临军之容资佳防之具其或八月草枯土皆纵猎寒风吹面则皴裂皮肤惊尘随人则缁黑衣屨渴饮已冰之酒饥飡连血之肉马不絕驰弓不下臂知得俊为快不为劳筋为苦也又若天清气和列坐畅饮乐奏繁剧貔貅引前盘槊击剑以电转奔骑角觝以虎争余兴未穷则巨觥相罚非倒瓮非頽冠略未云止与希生者道真堪防魂时弟年方盛气尚壮酒量过常遂成饮癖洩入膜内栖于鬲中良医不逢积痼成疾陰浊之气久而下垂既渐逼于膀胱实难归于胃腑下泄无路上蒸为疮如斯之深又将一纪与膏肓以同道亦腐胁之异名纵得神医亦难措手诚由性愚不知摄养贪酒不知撙节之所致也非身灾命滯之有云有时暂食疮痛饮水血流到开二旬未能入见上负明君授爵之恩下累平生行心之愿由此而较乃是罪人数年前兄为中执中执者诸侯防扈宰相弄权授受匪人风教颇僻法度逾紊私谒公行绳违整纲真执宪之用也俾天子之道廓如坦途凶滥之踪泯然亡絕岂异乎獬豸有睨太阿欲挥持正之风凜然可惧故公卿庶正不可得而洽也兄恳苦相告略无避嫌亲染简题手封灵药遠在千里致于下交必欲祛弟羸痾使之丁壮起弟驱走使之报君有以见君子之用心忧于人急于义不与古贤并者谁可方爰属阻修寻阙报复谅不以为慢而信为感之深兄临民有方馭遠有术苦寒在候善饭是宜无任祝颂瞻望之至

上宰相书 田 锡

伏有鄙见理合上闻愿垂听察之仁不罪僭逾之过矧宰相识量不可不包容众人大臣聪明不可不采择片善今相公佐太平之主理无事之朝四海谧宁万务整肃房杜功名之暉晔良平智略之宏深比于是时不独称美然至明或有所未照至聰或有所未闻未喻相公欲闻说直之言乎未喻相公欲求尘露之益乎悦容下僚輒陈管见不独众人之幸谅益相公之明也某去歲至自宣城入见旒展对敷之后圣防宣付中书旋防殊恩授以大着不数日又差充京西北路转运判官某固非俊迈之才窃慕清华之职遂拜表乞在馆殿冀与编修果廻圣主之恩命作諫垣之吏仍兼史职以尽夙心此皆相公于代天理物之功从小人所求之愿然拜表之际尝诣閣门閣门有司未便收接湏候相公台防又取閣使指挥往复审详然后呈进盖有司稟奉之职理合宜然况臣子重慎之心礼亦可以迓后扈随圣驾留驻漳川泊授奏之爰来与追班而入贺数日后因进圣主平戎歌虽寻达于圣聰亦先稟于台旨又今春二月六日复进请皇帝东封书不敢实封先闻閣使备言已奉台防有司方敢进呈仍依常规先供一状称不敢妄陈利便亦不敢希望恩荣岂有备位諫垣上书詣閣而如此委曲不敢敷陈无乃损相公之明无乃失至公之体设使言事不合理道以言而误至尊自有常刑可以加罪不足一一烦相公台听不劳一一稟相公指踪某才列周行未谙时事若是近朝体例湏至如斯相继因仍未暇厘革则乞相公申明旷荡之理采纳愚直之言应今后諫官上章不湏閣门取状乃是三公之府机扃洞开百职之仪纪纲所在某受相公钧谕之造荷相公特达之恩岂合容易干闻狂简陈述盖闻诸道路称近日左拾遗胡旦上书希求差遣圣主问难酬诘仍于中书不易轻进可否湏覆相府去留皆钧衡也某既闻斯语实介鄙懷何以示人无私曰至公裁事酌中为大体岂相公佐先帝取吴越事今上平并汾识度勲庸昭昭如此何烦寻常之见取次于廊

庙之尊然緘默不言实辜陶铸若披陈不密亦掇讥嫌易不云乎君不密则失臣盖谓下言上泄寘言者于危疑之地也故识者不获已而钳口焉某今进虽奉书而退必焚藁幸相公钧台之鉴恕小人忠谅之诚惶恐徬徨不知所措伏乞相公熟虑而加念也

答乔适书 穆修

近辱书并示文十篇终始读之其命意甚高自及淮西来尝见人言足下少年乐古文固耳闻而心存之但未敢轻取人说遂果知足下能然盖古道息絶不行于时已久今世士子习尚浅近非章句声偶之辞不置耳目浮轨滥辙相迹而奔靡有异途焉其间独取以古文语者则与语怪者同也众又排诟之罪毁之不目以为迂则指以为惑谓之背时远名阔于富贵先进则莫有誉之者同侪则莫有附之者其人苟失自知之明守之不以固恃之不以坚则莫不惧而疑悔而思忽焉且复去此而即彼矣噫仁义中正之士岂独多出于古而鲜出于今哉亦由时风众势驱迁溺染之使不得从乎道也观足下十篇之文则信有志乎古矣其书之问则曰将学于今则成浅陋将学于古则惧不得取名于世学宜何防引韩先生师说之说以求解惑为请足下当少秀之年怀进取之机又学古于仁义不胜之时与之者寡非之者众不得无惑于中焉是以枉书见问某不才而弃于时者也何足为人质其是非可否徒以退拙无所用心因得从事于不急之学知旧者不识其愚且戇或谓之为好古焉故足下以是厚相期待者盖感其声而求其类乎可不少复其意耶试为足下言之夫学乎古者所以为道学乎今者所以为名道者仁义之谓也名者爵禄之谓也然则行道者有以兼乎名守名者无以兼乎道何者行夫道者虽固有穷达云耳然而达于上也则为贤公乡穷于下也则为令君子其在上则礼成乎君而治加乎人其在下则顺悦乎亲而勤修乎身穷也达也皆本于善称焉守夫名者亦固有穷达云耳而皆反乎是也达于上也何贤公卿乎穷于下也何令君子乎其在上则无所成乎君而加乎人其在下则无所悦乎亲而修乎身穷也达也皆离于善称焉故曰行道者有以兼乎名守名者无以兼乎道有其道而无其名则穷不失为君子有其名而无其道则达不失为小人与其为名达之小人孰若为道穷之君子矧穷达又各系其时遇岂古人道有负于人耶足下有志乎道而未忘名乐闻于古而喜求于今二者之心苟交存而无择将惧纯明之性寢微浮躁之气骤胜矣足下心明乎仁义又学识其归向在固守而弗离坚持而弗夺力行而弗止则必立乎名之大者矣学之正伪有分则文之指用自得何惑焉不宣

答枢密范给事书 晏殊

殊闻之于师曰经者世之典常也无典常则制不立学者人之砥砺也无砥砺则器不备以周公之才朝读书百篇夕见七十二士犹恐不足以仲尼之圣自谓非生而知之好古敏以求之易象天地之準矣乃曰君子学以聚之问以辨之商书帝王之范矣亦曰王人求多闻时惟建事学于古训乃有获然则生民以来钜圣大贤未有舍夫学者西汉中叶儒教尤盛公孙 董仲舒用经义决朝廷大政绰有风采夏阳男子犊车诣阙自谓戾太子万目皇皇未知所措隳不疑侃然正色引春秋而戮之孝宣霍光击节惊叹且曰公卿大臣当用经术明于大谊降及东汉兹道弥笃唐柳冕有言西汉尚儒明于理乱是以其人智东汉尚章句师其传习是以其人守名节此其效也前代为学迭相师授是以圣人之防无不坦明近世业儒怠于讲肄是以

先王格训有所滞防唐李善精于文选为之注解因用教授谓之文选学皇朝太平兴国中诏馆阁讐校汉书安德裕取西域传山川名号字之古者改附近古集语钱熙谓人曰予于此书特经师授皆有训说岂可胸臆涂窜以合词章则知文选汉书尚行教授经坟大典可废讲乎殊尝窃志兹说以误朋从至于唱导儒风恢崇教本虽有素蕴未能及也今者明公过听爱忘其陋惠赐与侍讲孙公书述岷山人武陵昌期博贯诸经召寅门下枢铉之隙与之论议且欲出其譔述质于大儒辨正否臧以明公共斋盥披读载欣以扑首见执事经国佐王之志中见执事乐道尚贤之素未见执事选众成人之美非夫操尚敦懿规模宏廓元元本本焯见夫人明自乎诚觉先于后恤横目之流放勤洗心而拯接则安能屈彦辅之重聶硕生之业不逮百舍命蒿莱之隐沦喝见分陰纯緇素之潭奥恂恂汲汲若是之深厚哉夫然则穆防风养万物致隆平颁清庙跻大猷于羲皇绍丕绩乎衡旦斯有日矣眷惟孱虚无足称算猥沐甄采叅于季孟私用澡溉灵府温循宿艺贺吾道之有宗主跂斯人之防润泽奚独五典琴筑三年呻吟腐唇以守黄巷焦心而窥断简者哉机轴严密虑难省谒敢布肝鬲复干闾侍

上相府书 范仲淹

仲淹居亲之防上书言事逾越典礼取笑天下岂欲动圣贤之知为身名之计乎仲淹谓居防越礼有诛无赦岂足动圣贤之知耶矧亲安之时官小禄薄今亲亡矣纵使异日授一美衣对一盛饌尚当泣感风树忧思无穷岂今儿筵之下可为身名之计乎不然何急急于言哉盖闻忠孝者天下之大本也仲淹孝不逮矣忠可忘乎此所以冒哀上书言国家事不以一心之戚而忘天下之忧庶乎四海生灵长见太平况今圣人当天四贤同德此千百年中言事之秋也傥以终防而止则虑庙堂之间或有功成名遂之请后贤之心有一不同则仲淹言之无及矣然圣贤之朝岂资下士之补益乎盖古之圣贤以刳菟之谈而成大美者多矣岂俟仲淹引而质之况儒者之学非王道不谈仲淹敢不企仰万一因拟议以言之皆今易行之事其未易行者仲淹所不言也恭惟相府詹百辟之首享万钟之厚夙兴夜寐未始不欲安社稷跻富寿答先帝之灵致今上之美况圣贤存诚以万灵为心以万物为体思与天下同其安乐然非思之难致之难矣仲淹窃览前书见周汉之兴圣贤共理使天下为富为寿数百年则当时致君者功可知矣周汉之衰奸雄竞起使天下为血为肉数百年则当时致君者罪可知矣李唐之兴也如周汉焉其衰也亦周汉焉自我宋之有天下也经之营之育之以至于太平累圣之功岂不大哉然否极者泰泰极者否天下之理如循环焉惟圣人设卦观象穷则变变则通通则久非知变者何能久乎此圣人作易之大防以授于理天下者也岂徒然哉今朝廷久无忧矣天下久太平矣兵久弗用矣士曾未教矣中外方奢侈矣百姓反困穷矣朝廷无忧则苦言难入天下久平则倚伏可畏兵久弗用则武备不坚士曾未教则贤材不充中外奢侈则国用无度百姓困穷则天下无恩苦言难入则国听不聪矣倚伏可畏则奸雄或伺其时矣武备不坚则戎狄或乘其隙矣贤材不充则名器或假于人矣国用无度则民力已竭矣天下无恩则邦本不固矣傥相府思变其道与国家磐固基本一旦王道复行使天下为富为寿数百年由今相府致君之功也傥不思变其道而但维持歲月一旦乱阶复作使天下为血为肉数百年亦今相府负天下之过也昔曹参守萧何之规以天下久乱与人息肩而不敢有为者权也今天下久平修理政教制作礼乐以防防杜渐者道也张华事西晋之危而正人无徒故维持纪纲以延歲月而终不免祸以大乱天下今圣明在上老成在右可取维持之功而忘磐固之道

哉仲淹窃聆长者谓今相府报国致君之功正在乎固邦本厚民力重名器备戎狄杜奸雄明国听也固邦本者在乎举县令择郡长以救民之 也厚民力者在乎复游散去冗僭以阜时之材也重名器者在乎慎选举敦教育使代不乏材也备戎狄者在乎育将材实边郡使兵不扰其境也杜奸雄者在乎朝廷无过生灵无怨以絶乱之阶也明国听者在乎保直臣斥佞人以致君于有道也夫举县令择郡长以救民之弊者何哉仲淹观今之县令循例而授多非清识之士衰老者为子孙之计则志在苞苴动皆徇已少壮者耻州县之职则政多苟且举必近名故一邑之间簿书不精吏胥不畏徭赋不均刑罚不中民利不作民害不去鰥寡不防游惰不禁播莠不增孝悌不劝以一邑观之则四方县政如此者十有七八焉而望王道之兴不亦难乎仲淹恐来代之书论得失者谓圣朝有不救其 之过矣如之何使斯人之徒为民父母以困穷其天下今朝廷久有择县令郡长之议而不遂行者盖思退人以礼不欲动多士之心故务因循而重改作也岂长世之策哉傥更张之际不失推恩又何损于仁乎今约天下令録自差京朝官外不过千数百员自来郊天之恩鲜及州县若天下令録自大礼以前满十考者可成资日替与职官七考以上可满日循其资俸除録事参军则县令中昏迈平常之流可去数百人矣盖职事官録事参军不甚亲民为害亦细此得谓退人以礼士岂有怨心哉其间课最可尚论荐颇多俟到铨衡别议畴赏前既善退后当精选其判司簿尉不由荐举初入县令之人并可注録事参军如无员阙可授大县簿尉仍赐令録之俸其曾任令録有遇该恩合入前资者可依初入之例颁此数条合入者鲜然后委清望官于募职判司簿尉中厯三考以上具治绩举充其川广福建小处县令可委转运使等就近于判司簿尉中举移庠从人便若此后诸处县令特有课最可旌尚者宜就迁一官更留三载庶其宣政可以成俗其侥幸者自从朝典如此则三五年中天下县政可澄清矣愿相府为天下生灵而行之为国家磐固基本而思之不以听刍蕘为嫌而罢之则天下幸甚幸甚又观今之县长鲜克尽心其或尚迎送之劳贪宴射之逸或急急于富贵之援或孜孜于子孙之计心不在政功焉及民以狱讼稍简为政成以教令不行为坐镇以移风易俗为虚语以简贤附势为知几清素之人非缘囑而不荐贪渎之辈非寒儒而不糾纵胥徒之奸尅恣风俗之奢僭况国家职制禁民越礼颁行已久莫能举按使国家仁不足以物义不足以禁非官实素餐民则菜色有恤鰥寡则指为近名有抑权豪则目为掇祸苟且之 积习成风俾斯人之徒共理天下王道何从而兴乎仲淹恐来代之书论得失者亦谓圣朝有不救其 之过矣然朝廷以黜陟郡长为难者官有定制不欲动摇惧其招怨谤而速侥幸尔故知县两任例升同判同判两任例升知州奈何在下之时饰身修名邀其清誉居上之后志满才乏愆于素时止能偷安未至覆餗故贤愚同等清浊一致此乃朝廷避怨于上移虐于下俟其自败民何以堪故郑莊公伺共叔自毙而春秋罪焉以其长恶也易曰履霜坚冰至由辨之不早辨也此圣人昭昭之训岂用于先王而废于今日以长其恶者乎圣朝诸处郡长以赃致罪者数人皆贯盈之夫久为民患如此之类至终不败者岂止数人而已哉虽转运提刑职在察访其如位望相亚怨仇可敌非至败露鲜敢发明宜乎论道之间无以激扬天下古者天子五载一巡皇上凝命于今六载以军国重大未可行遠古之道今郊礼之余宜宣大庆可于两制以上密选贤明巡行诸道以兴利除害黜幽陟明舒惨四方岂同常务可命御史严谕百寮与出使之官絶书刺往还之礼仍翌日首涂以禁请托苟利天下大体何伤所出之使宜以宣庆为名安遠听也其诸道知州同判耄者懦者贪者虐者轻而无法者堕而无政者皆可奏降以激尸素又四方利病得以上闻未举巡狩之仪而遣观风之使非不典也然后委清望官于朝臣同判中举诸郡长于朝臣知县中举诸同判今后同判之

官非着显效及有殊荐虽或久次止可加恩郡国之符不当轻授其知县之人入同判者宜比此例则天下郡政其滥鲜矣愿相府为天下生灵行之为国家磐固基本而行之不以听刍蕘为嫌而罢之天下幸甚幸甚仲淹前所谓官有定制不欲动摇惧其招怨谤而速侥幸者两宫之圣临轩命使激扬善恶澄清天下何怨谤之有乎自兹以往非举不授举官之责厥典非轻何侥幸之有乎如所举之人果成异政则宜旌尚举主以劝来者圣朝未行此典盖亦阙矣县令郡长既得其才然后复游散去冗僭以阜时之财者何哉仲淹观天下谷帛厥价翔起议者谓生灵既庶使之然矣仲淹谓生者既庶则作者复众岂既庶之为累哉盖古者四民秦汉之下兵与緇黄共六民矣今又六民之中浮其业者不可胜纪此天下之大蠹也士有不稽古而禄农有不竭力而饥工多奇器以败度商多奇货以乱禁兵多冗而不给緇黄荡而不制则六民之浮不可胜纪而皆衣食于农者也如之何物不贵乎如之何民不困乎仲淹谓谷帛之贵由其播莳不增而资取者众也金银之贵由其制度不严而器用者众也或谓资四夷之取而使之然则山泽之所出与恩信之所给自可较之非仲淹之所能料也今议更张之制繁细非一仲淹敢略而陈之夫释道之书以真常为性以清净为宗神而明之存乎其人智者尚难其言而况于民乎故君子弗论者非今理天下之道也其徒繁秽不可不约今后天下童行可于本贯陈牒必使诘其乡党苟有罪戾或父母在鲜人供养者勿从其请如已受度而父母在别无子孙者勿许方游则民之父母鲜转死于沟壑矣斯亦养悖独助孝悌之风也其京师寺观多招四方之人宜给本贯凭由乃许收录斯亦辨奸细复游散之要也其天下寺观每建殿塔蠹民之费动逾数万止可完旧勿许创新斯亦与民阜财之端也又古者兵在于民且耕且战秦汉之下官军为常贵武勇之精备征伐之急也今诸军老弱之兵詎堪征伐虽降等级尚费资储然国家至仁防在存活若诏诸军年五十以上自有资产愿还乡里者一可听之稍省军资复从人欲无所归者自依旧典此去冗之一也又诸道巡检所统之卒皆本城役徒殊非武士使之禁暴十不当一而诸州常患兵少日旋招致谷帛之计其耗万亿以仲淹观之自京畿向千里之间或多寇盗创置巡检路分颇多而卒伍至羸捕掩无效非要害者宜悉罢之所存之处资以禁军训练既精寇盗如取况千里之内抽发非难又使少厯星霜不至骄堕彼无用之卒可减万数庶使诸郡节于招致此去冗之次也又京畿三辅五百里内民田多隙农功未广既已开导沟洫复湏举择令长使询访父老研求利病数年之间力致富庶下被什一之税继以百万之余则江淮馈运庶几减半挽舟之卒从而省焉此亦去冗之大也至于工之奇器败先王之度商之奇货乱国家之禁中外因之侈僭上下得以骄华宜乎大变浇漓申严制度使珠玉寡用谷帛为寶此又去僭丰财之本也又播莳之家古皆督责今诸道使节有劝农之名亡劝农之实每于春首则移文于郡郡移文于县县移文于乡乡矫报于县县矫报于郡郡矫报于使利害不察上下相防岂朝廷之意乎今县令郡长一变其人乃可诏书丁宁复游散之流抑工商之侈去士卒之冗劝稼穡之勤以周礼司徒之法约而行之使播者艺者以时以度勤者惰者有功有戒然后致天下之富寿彼不我富不我寿者岂能革之哉此则厚民力固邦本之道也观夫国风之七月小雅之甫田皆以农夫之务为王化之基岂圣人不思而述者乎故周汉李唐虽有祸乱而能中兴者人未厌德作乱者不能革天下之心是邦本之固也六朝五代之乱鲜克中兴者人厌其德吊民者有以革天下之心是邦本之不固也然则厚民力固邦本非举县令择郡长则莫之行焉或谓举择令长久则乏人亦何道以嗣之仲淹谓用而不择贤孰进焉择而不教贤孰继焉宜乎慎选举之方则政无虚授敦教育之道则代不乏人今士林之间患不稽古委先王之典宗叔世之文词多纖秽士惟偷浅言不及道心无存诚暨

于入官鲜于教化有出类者岂易得哉中人之流浮沉必矣至于明经之士全昧指归讲议未尝闻威仪未尝学官于民上貽笑不暇责其论政百有一焉诗谓长育人材亦何道也古有庠序列于郡国王风云迈师道不振斯文销散由前代国家之不救乎圣朝之弗教乎当太平之朝不能教育俟何时而教育哉乃于选用之际患其才难亦犹不务耕而求获矣今春诏下礼闈凡尚词之人许存策论明经之士特与旌别天下之望翕然称是其间所存策论不闻其谁激劝未明人将安信傥使程试之日先策论以观其大要次诗赋以观其全才以大要定其去留以全才升其等级明经义者别加考试人必强学副其精举复当深思治本渐隆古道先于都督之郡复其学校之制约周官之法兴阙里之俗辟文学掾以専其事敦之以诗书礼乐辨之以文行忠信必有良器蔚为邦材况州县之用乎夫庠序之兴由三代之盛王也岂小道哉孟子谓得天下英才而教育之一乐也岂偶言哉行可数年士风丕变斯择材之本致理之基也又李唐之盛常设制科所得大才将相非一使天下奇士学经纶之盛业为邦家之大器亦策士之上也先朝偶属多务暂停此科今可每因贡举之时申其坠典必有国士继于唐人岂非邦家之盛选欤勿谓未必得人遂废其道此皆慎选举敦教育之道也亦何患乏人哉傥国家行此数事若今刑政之用心则无不成焉前代乱离鲸吞虎噬卜世卜年之意故斯道久缺反为不急之务既在承平之朝当为长久之道岂如西晋之祸而有何公之语者乎愿朝廷念祖宗之艰难愿相府建风化之根本一之日图之二之日行之不以听刍蕘为嫌而罢之则天下幸甚幸甚至于岩穴草泽之士或节义敦笃或文学高古宜崇聘召之礼以厚浇竞之风国家近年已来羔鴈弗降或有考槃之举不逾一教之命孝廉之士适以为辱何敦劝之有乎又流外之官澄清未至沿之则百姓受弊革之则诸司乏人将使羣谤不兴众心知劝不若敦仍旧之制加奨善之方因自簿尉两任多举奏者许入録事参军録事参军多举奏者许入职事官或换三班使臣既有进身之阶岂无畏法之志设使流内之人无迁进之望而能尽公者必亦鲜矣今后百司新入之人或采其蓺能或出于仕族行藏必审考试必精避役之人无图之类严革其高为之防既激其流复澄其源亦何患流外之冗乎仲淹又谓育将材实边郡使兵不扰境者何哉盖闻古之善御敌者将不乏人则师战而不衄边不乏廩则城围而不下敌疑且畏罔敢深入此炎汉之所以长也不善御敌者将在贵臣边湏遠馈故战之则衄围之则下敌无疑畏乘虚深入此石晋之所以亡也今兵久不用未必为福在开元之盛有函谷之败可鉴矣何哉昔之战者皆然已老今之壮者器而未战有名之将往往衰落岂无晚辈未闻边功此必庙堂之所思也仍闻沿边诸将不谋方略不练士卒结援弭谤固禄求宠一旦急用万无成功加以边民未丰边廩未实罢武之际兵足食寡如屯大军必湏遠馈则中原益困敌人益骄深入之虞未可量也于时庙堂之上虽有臯陶之谋伯益之赞不亦难乎夫天下祸福如人家道成于覆簣败于疾雷圣朝岂恃其太平而轻其后计王衍之鉴岂曰不明清谈之间坐受其盖备之弗预知之弗为许下之戎日血十万岂不痛心哉今西北和好诚为令圖安必虑危备则无患昔成周之盛王道如砥及观周礼则大司马阵战之法粲然具存乃知礼乐之朝未尝废武今孙吴之书禁而弗学苟有英杰授亦何疑且秦之火书也将以愚其生人长保天下及其败也陈胜项籍岂读书之人哉前代名将洞达天人嗣续忠孝将门出将史有言焉今侯家子弟蔑闻韬铃无所用心骄奢而已文有武备此能备乎今可于忠孝之门搜智勇之器堪将材者密授兵略厯试边任使其识山水之向背厯星霜之艰难一朝用之不甚颠沛十得三四亦云盛矣至于四海九州必有壮士宜设武举以収其遗唐郭子仪武举所得者也斯可遗乎又臣僚之中素有才识可赐孙吴之术使知文武之方异日安边多可指任此皆育

将材之道也又緣边知同精加举择特授诏命專谋耕桑三五年间丰其军廩此则实边郡之道也将材既育边郡既实师战而不岌城围而不下敌疑且畏敢深入乎纵有骚动朝廷可高枕矣前代御敌其策非一唐陆贄议緣边备守之术请置本土之兵勤营田之利与今事宜相近可约而行也本土之兵者若今北边有云翼招収之军更可增致足为奇兵至于营田之利宜常兴作而加意焉愿相府为国家安危思之五代之乱非遠也为河朔生灵思之景德之前未久也今相府劳一夕之思絕百代之耻无使中原见新羈之马赤子入无知之俗则天下幸甚幸甚圣人曰防管仲吾其被发左衽又曰民到于今受其赐管仲霸臣也而能攘戎狄保华夏功高当时赐及来代况皇朝之盛德乎仲淹又谓朝廷无过生灵无怨以絕乱之阶者何哉盖天下奸雄无代无之或穷为夜舞或起为鉅盗伺朝廷之过执以为辞幸生灵之怨吊而称义不然亦何名而动哉今明盛之朝岂有大过亦宜辨于毫末杜其坚冰或戚近挠权或土木耗国或禄赏未均或任使未平或纲纪未修斯亦过之渐也仲淹敢小举其渐以言之国家戚近之人不可不约除拜之际宜量其才非曰惜恩惧乎致寇若力小任重则挠权乱法增朝廷之过启奸雄之志易曰以小人而乘君子之器盗思夺之矣所谓盗者其奸雄之谓乎今道路传闻或緇黄之流或术艺之辈结托戚近邀求进贡或受恩赐或与官爵此挠权之渐也可不畏乎夫赏罚者天下之衡鉴也衡鉴一私则天下之轻重妍丑从而乱焉此先王之所慎也凡土木之兴久为大蠹或谓土木之费出于帑藏无伤财害民之 故为之而弗戒也仲淹谓帑藏之物出于生灵太祖皇帝以来深思遠虑聚之积之既曰左藏矣复有内藏之名者所以为军国急难之备非諂神佞佛之资也国家祈天承命之道岂在兹乎如洞真寿寧之宫以延燎之灾一夕逮尽岂非天意警在帝心示土木之所崇非神灵之所据也安可取民人膏血之利辍军国急难之备奉有为之惑冀无状之福岂不误哉一旦有仓卒之忧湏给赏之资虽重困生灵暴加率斂其可及乎此耗国之大也可不戒哉倪谓府藏丰盈用不可竭则日者黄河之役使数十州之人极力负资奔走道路岂惜府库之余而不用之耶故土木之妖宜其悉罢岂相府之不言乎两宫之不听乎又文武百官之禄法兵荒五代之制或职轻禄重或职重禄轻重轻之间奔竞者至大亨之世犹患不均岂圣朝之意乎所宜损之益之以建其极又三司之官差除颇异禄赐非轻何知 而不言多养望以自进天下金谷决于羣胥掊克无厌取怨四海使先帝宽财之命弗逮于民和气屡伤丰年寡遇曾不谓之过乎亦由三司之官不制考限不责课最朝受此职夕求他官直云假涂相与匿祸天下受 职此之由岂朝廷之意乎宜其别制考课重议赏罚激朝端之俊杰救天下之疲瘵其庶几乎又自古国之勲臣赏延于世今则每举大庆必行此典自两省以上奏荐子弟并为京官比于庶寮亦既优矣而特每歲圣节各序子弟谓之赏延黷乱已甚先王名器私假于人曾不谓之过乎非君危臣僭之朝何姑息之如是耶遂使廕序之人塞于仕路曾未稽古使以司民国家患之屡有厘革然但革其下而不革其上节于彼而不节于此矣天下岂以为然哉我相府岂惜一孺之恩不为百辟之标表乎又遠恶之官多在寒族权贵之子鲜离上国周旋百司之务懵昧四方之事况百司者朝廷之纲纪风教之户牖咸在童孺曾无激扬使寺省之规剥牀至足公卿之嗣怀安败名未尝试难何以致遠非独招縉绅之议实亦玷钧衡之公此则禄赏未均任使未平纲纪未修之类也斯 已久何可极乎惟我相府能革其 能变其极而天下化成不为难矣晋赵王伦石勒之徒心窥天子口责丞相岂非奸雄之人伺朝廷之过乎又今久安之民不经涂炭劳则易怨扰则易惊猛将谋臣威信未着况边民尚困边廩尚乏苟有骚动馈运所艰武备未坚敌志可骋既挠之以征战或加之以饥饉生灵愁苦奸雄奋迅鼓舞羣小血视千里此五代之鉴昭昭焉

非止方策之有云抑亦耳目之可接也我太祖皇帝太宗皇帝亦尝有事四方劳于馈运而生灵不敢怨奸雄不敢动者何哉五代余民久在涂炭乍覩明盛如子得母纵有劳役未甚曩昔此生灵所不敢怨也当其乘天开之运震神武之威征伐四方动如山压况躬擐甲冑备尝艰难猛将如云谋士如雨此奸雄所不敢动也所谓彼一时此一时尔今朝廷岂谓当时之易而不虑今时之难乎仲淹又谓保直臣斥佞人以致君于有道者何哉有若人未之病则苦口之药鲜进焉国未之危则逆耳之言鲜用焉故佞人易进直臣易退其致君于有道也难哉及其既病也药必错杂而进故鲜效焉及其既危也言必错杂而用故鲜功焉盖佞人在矣直臣远矣其悔之也难哉今朝廷久安苦言而不用者势使然矣天深戒而不变者祸可畏矣伏闻京师去歲大水今歲大疫四方闻之莫不大忧此天之有以戒也岂徒然乎而京师之灾甚于四方何哉盖京师者政教之所出君相之所居也祸未盈而天未絕故鉴戒形焉不独恐惧其心使修省其政明国家之德尚可隆天下之道尚可行也傥弗惧于心弗修于政渐盈于祸渐絕于天则国家四海将如何哉或谓国家之灾由厯数之定非政教之出若如所论则夏禹九畴之书果妖言耶岂欲弃而焚之乎苟天下有善则归诸已天下有祸则归诸天岂圣贤之用心哉愿圣朝黜术士之言奉先王之训必不谬矣必无过矣至于保直臣斥佞人则两宫二府之心如日星焉孰可蔽其明乎纵有行伪而坚言伪而辨试于行事人焉廋哉仲淹往日不极言而今极言者学陋之人思虑未精又亲安之时上惧貽忧下惧失禄不幸亲今亡矣朝廷或恕之则自顶至踵皆可从其忠也又何忧乎傥相府思变其道与国家作能久之计固其基本一旦王道复行使天下为富为寿数百年则福在国家功在相府仲淹得与天下生灵长见太平幸甚幸甚况盛明之代何事而不可行乎曩者国家禁泥金之饰而久未能絕一旦使命妇不服工人不作于今天下无敢衣者使其余奢僭皆如泥金之法亦何患不禁乎又如五代以来诸侯暴酷视民如芥生杀由之皇朝龙兴典章一宽真宗皇帝至仁如天尽心于此中则举执法之吏外则创按刑之司徒流之间无敢差者若今于教化之道复如刑名之用心亦何患于难乎今搢绅之间多议按刑之司无益于外亦思之未深尔如得其人糾察四方絕斯民之冤协先皇之志岂无益乎得人而已不可谓川之既平可坏其防也今王刑既清王道可行此天下士人为相府惜其时也傥疑仲淹之言求圣贤之知为身名计则仲淹岂不能终防之后为歌为颂润色盛德以顺美于时亦何必居防上书逾越典礼进逆耳之说求终身之弃而自置贫贱之地乎盖所谓不敢以一心之戚而忘天下之忧是不为身名之计明矣仲淹观前代国家当其安也士人上书论兴亡之道非圣王贤相百不采一及其往也则后之史臣収于简册为来代之鉴仲淹今日之言愿相府采其一二为国家天下之益不愿后之史臣収于简册为来代之鉴狂斐之人诛赦惟命以庙堂深严恐不得上乃敢相门之下各致此书庶有一达于聪明干犯台严不任战汗激切之至

卷一百十三

钦定四库全书

宋文鉴卷一百十三

宋吕祖谦编

书

答赵元昊书 范仲淹

仲淹谨修诚意奉书于夏国大王伏以先大王归向朝廷心如金石我真宗皇帝命为同姓待以骨肉之亲封为夏王履此山河之大旌旗车服降天子一等恩信隆厚始终如一齐桓晋文之盛无以过此朝聘之使往来如家牛马驼羊之产金银绵帛之货交受其利不可胜纪塞垣之下逾三十年有耕无战禾黍云合甲冑尘委养生葬死各终天年使蕃汉之民为尧舜之俗此真宗皇帝之至化亦先大王之大功也自先大王薨背今皇震悼累日嘻吁遣使行奠赙之礼以大王嗣守其国爵命崇重一如先大王昨者大王以本国众多之情推立大位诚不获让理有未安而遣行人告于天子又遣行人归其旌节朝廷中外莫不惊愤请收行人戮于都市皇帝诏曰非不能以四海之力支其一方念先帝岁寒之本意故夏王忠顺之大功岂一朝之失而骤绝之乃不杀而还假有本国诸蕃之长抗礼于大王而能含容之若此乎省初念终天子何负于大王哉二年以来疆事纷起耕者废耒织者废杼边界萧然岂独汉民之劳耶使战守之人日夜豺虎竞为吞噬死伤相枕哭泣相闻仁人为之流涕智士为之扼腕天子遣仲淹经度西事而命之曰有征无战不杀非辜王者之兵也汝往钦哉仲淹拜手稽首敢不夙夜于怀至边之日见诸将帅多务小功不为大略甚未副天子之意仲淹与大王虽未尝高防向者同事朝廷于天子则父母也于大王则兄弟也岂有孝于父母而欲害于兄弟哉可不为大王一二而陈之传曰名不正则言不顺言不顺则事不成大王世居西土衣冠语言皆从本国之俗何独名称与中朝天子侔拟名岂正而言岂顺乎如众情莫夺亦有汉唐故事单于可汗皆本国极尊之称具在方册仲淹料大王必以契丹为比故自谓可行且契丹自石晋朝有援立之功时已称帝今大王世受天子建国封王之恩如诸蕃中有叛朝廷者大王当为霸主率诸侯以伐之则世世有功王王不绝乃欲拟契丹之称究其体势昭然不同徒使疮痍万民拒朝廷之礼伤天地之仁易曰天地之大德曰生圣人之大宝曰位何以守位曰仁是以天地养万物故其道不穷圣人养万民故其位不倾又传曰国家以仁获之以仁守之者百世之朝昔在唐末天下汹汹羣雄咆哮日寻干戈血我生灵腥我天地灭我礼乐绝我稼穡皇天震怒罚其不仁五代王侯覆亡相续老氏曰乐杀人者不可得志于天下诚不诬矣后唐显宗祈于上天曰愿早生圣人以救天下是年我太祖皇帝应期而生及厯试诸难中外忻戴不血一刃受禅于周广南江南荆湖西川有九江万里之阻一举而下岂非应天顺人之至乎由是罢诸侯之兵革五代之暴垂八十年天下无祸乱之忧太宗皇帝圣文神武表正万邦吴越纳疆并晋就

縛真宗皇帝奉天体道清淨无为与契丹通好受先大王贡礼自兹四海熙然同春今皇帝坐朝至晏从谏如流有忤雷霆虽死必赦故四海之心望如父母此所谓以仁获之以仁守之百世之朝也仲淹料大王建议之初人有离间妄言边城无备士心不齐长驱而来所向必下今以强人猛马奔冲汉地二年于兹汉之兵民盖有血战而死者无一城一将愿归大王者此可见圣宋仁及天下邦本不摇之验也与夫间者之说无乃异乎今天下久平人人泰然不习战鬪不熟纪律刘平之徒忠敢而进不顾众寡自取其困余则或胜或负杀伤俱多大王国人必以获刘平为贺昔郑人侵蔡获司马公子燮郑人皆喜惟子产曰小国无文德而有武功祸莫大焉而后郑国之祸皆如子产之言今边上训练渐精恩威已立有功必赏败事必诛将帅而下大知纪律莫不各思奋力効命争议进兵如其不然何时可了今招讨司统兵四十万约五路入界着其律曰生降者赏杀降者斩获精强者赏害老防妇女者斩遇坚必战遇险必夺可取则取可城则城纵未能入贺兰之居彼之兵民降者死者所失多矣是大王自祸其民官军之势不获而已也仲淹又念皇帝有征无战不杀非辜之训夙夜于怀虽师帅之行君命有所不受奈何锋刃之交相伤必众且蕃兵战死者非有罪也忠于大王耳汉兵战死非有罪也忠于天子耳使忠孝之人肝脑涂地积累怨魄为妖为灾大王其可忽诸朝廷以王者无外有生之民皆为赤子何蕃汉之限哉何胜负之言哉仲淹与招讨太尉夏公经略密学韩公尝议其事莫若通问于大王计而决之重人命也其美利甚众大王如能以爱民为意礼下朝廷复其王爵承先大王之志天下孰不称其贤哉一也如众多之情三让不获前所谓汉唐故事如单于可汗之称尚有可稽于本国语言为便复不失其尊大二也但臣贡上国存中外之体不召天下之怨不速天下之兵使蕃汉边人复见康乐无死伤相枕哭泣相闻之丑三也又大王之国府用或阙朝廷每歲必有物帛之厚赐为大王助四也又从来入贡使人止称蕃吏之职以避中朝之尊按汉诸侯王相皆出真拜又吴越王钱氏有丞制补官故事功高者受朝廷之命亦足隆大王之体五也昨有边臣上言乞招致蕃部首领仲淹亦已请罢大王告谕诸蕃首领不湏去父母之邦但回意中朝则太平之乐遐迩同之六也国家以四海之广岂无遗才有在大王之国者朝廷不戮其家安全如故宜善事主以报国土之知惟同心向顺自不失其富贵而宗族之人必更优恤七也又马牛駝羊之产金银繒帛之货有无交易各得其所八也大王从之则上下同其美利生民之患几乎息矣不从则上下失其美利生民之患何时而息哉仲淹今日之言非独利于大王盖以奉君亲之训救生民之患合天地之仁而已矣惟大王择焉不宣仲淹再拜

上吕相公书 范仲淹

伏防台慈叠赐钧翰而褒许之意重如金石不任荣惧不任荣惧窃念仲淹草莱经生服习古训所学者惟修身治民而已一日登朝辄不知忌讳效贾生恸哭太息之說为报国安危之计而朝廷方属太平不意生事仲淹于搢绅中独如妖言情既齟齬词乃睚眦至有忤天子大臣之威頼至仁之朝不下狱以死而天子指之为狂士然则忤之之情无他焉正如陆 防怪松图赞谓草木之性其本不怪乘阳而生小已遏不伸不直而大丑彰于形质天下指之为怪木岂天性之然哉今擢处方面非朝廷委曲照临则败辱久矣昔郭汾阳与李临淮有隙不交一言及讨禄山之乱则执手泣别勉以忠义终平剧盗实二公之力今相公有汾阳之心之言仲淹无临淮之才之力夙夜尽瘁恐不副朝廷委之之意重负泰山未知所释之地不任惶恐战

栗之极不宣仲淹惶恐再拜

游嵩山寄梅殿丞 谢绛

近有使者东来付仆诏书并御祝封香遣告嵩岳太常移文合用读祝捧币二员府以欧阳永叔杨子聪分摄防尹师鲁王几道至自缙氏因思早时约圣俞有太室中峰之行圣俞仲春时遂往为人闲事所窘未遑也今幸其便又二三子可以为山水游侣然亟与之议皆喜见颜色不戒而赴十二日昼漏未尽十刻出建春门宿十八里河翼日过缙氏阅游嵩诗碑碑甚大字而未镌上缙岭寻子晋祠陟轘辕道入登封出北门斋于庙中是夕寝既兴吏白五鼓有司请朝服行事事已谒新治宫拜真宗御容稍出山麓至峻极中院始改冠服却车徒从者不过十数人轻赍遂行是时秋清日阴天未甚寒晚花幽草亏蔽石壁正当人力清壮之际加有朋簪谈燕之适升高蹑险气豪心果遇盘石过大树必休其上下酌酒饮茗傲然者久之径差平则腰舆以行崭崯斗甚则芒屨以进窥玉女窻捣衣石石诚异窻则亡有迤邐至八仙坛憩三醉石徧访墨迹不复存矣考乎山居所赋亦名过其实午昃方抵峻极上院师鲁体最溢最先到永叔最少最疲于是院漱食从容间跻封禅坛下瞰羣峰乃向所跂而望之谓非插翼不可到者皆培塿焉邑居楼观人物之伙视若蚁壤武后封祀碑故存自号大周当时名贤皆刊姓名于碑阴不虞后代之讥其不典也碑之空无字处覩圣俞记乐理国而下四人同游镌刻尤精仆意古帝王祀天神纪功德于此当时尊美甚盛后之君子不必废之坏之也又寻韩文公所谓石室者因尽诣东峰顶是夕宿顶上防几望天无纖翳万里明月子聪疑去月差近令人浩然絶世间虑盘桓立清露下直觉冷透骨发羸体将不堪可方即舍张烛具丰饌醴五人者相与岸帻褰带环坐满引赋诗谈道间以谑剧然不知形骸之累利欲之萌为何物也夜分少就枕以息明日访归路步履无苦昔闻鼙防穷伎能下而不能上岂近此乎午间至中院邑大夫来逆其礼益谨申刻出登封西门道颍阳宿金占十六日晨发据鞍纵望太室犹在后路曲南西则但见少室若夫观少室之美非繇兹路则不能尽诸邑人谓之冠子山正得其状自行七十里出颍阳北门访石堂山紫云洞即邢和璞著书之所山径极峻扞萝而上者七八里上有大洞防数亩水泉出焉久为道士所居爨烟熏燎又涂墁其内已戒邑宰稍营草屋于侧徙而出之此间峰势危极大抵相向如巧者为之又峭壁有若四字云神清之洞体法确妙盖薛老峰之比诸君疑古苔藓自成文又意造化者笔焉莫得究其本末少留数十刻防将雨而去犹冒夜行二十五里宿吕氏店马上粗苦疲厌则有师鲁语怪永叔子聪歌俚调几道吹洞箫往往一笑絶倒岂知道路之长短也十七日宿鼓婆镇遂缘伊流陟香山上下方饮于八郎滩上始自峻极中院未及此凡题名于壁于石于树间者盖十有四处大凡出东门极东而南之自长夏门入绕崧环一匝四百里可谓穷极胜览切切未满意者圣俞不与焉今既还府恐相次便有尘事侵汨故急寫此奉报庶代一昔之谈

与陈都官书 富弼

牙干至防惠书论君子小人各以类进且取易泰之初九否之初六皆以拔茅茹为爻辞以质其事因及治乱之道率由君子小人而致旨畅而辞密气劲而志坚上发经蕴旁照世 森矗明白其文章之伟欤复谓仆异时必居进退君子小人之位此足下待仆之过也然似有疑仆

临富贵不能守初节廼以忠义见勗于是不可不报足下试听之夫书籍所载皆圣贤所行之道然未有不深其本而敷其末隐其原而扬其流其本深则其末茂其原隐则其流远此圣贤制则之要也凡今之人观书者不究其本不详其原惟末流是习是故不见圣人之心之所存矧又未尽末流之学隘近浅薄防为小人谓读书不为人専以为己也于是以爵位为梯身之具而忘乎其君以禄利为肥身之资而忽乎其民然有尚未能梯肥其身者则有蹈捷急之径趋邪枉之门货贿公行交结相尚千奸万乱亡所不至生偷一时之乐死为后世之诮而不顾也仆谓市贩之贪奴 之猥亦或耻而不肯为而彼人者洋洋自以为计之得己之胜吁可哀也仆不佞自始读书为学必穷其本原不到圣贤用心处辄不止圣贤之心即天地之心也天地生人于其间不能自治必立君长以治之为君者不能独治必求贤以佐之圣者君之贤者臣之君臣合而共治其人人既和天下无事于是君臣处其位相与共享天下之乐以为报也圣贤不待报天下之人奉以为报也是知古之为学者为人不为己也古之得位为君与之佐者亦不为己而为人也故传曰天之爱民甚矣岂其使一人肆于民上又曰天生圣人盖为百姓不独使自娱乐而已也夫为人君者尚不得肆不得自娱乐其为佐者反可以爵禄梯肥而忘乎君忽乎民哉又可朋奸附恶为市贩为奴 之所不为哉是故古者圣贤得其时则假富贵之位以所学之道施于当世之民不得其时则甘贫喜贱亦以所学之道着于书以教后世圣贤之心尽于是而已矣今足下既才仆而誉之又疑而勗仆是果相知乎噫仆视富贵为何等物处之不以义则所处失君相设处仆于位仆将持所学发时之所未治说吾君吾相而治之用吾说康吾民则所谓富贵者真富贵也仆惟恐富贵之不得得之不能久也苟不用吾说不能以所学康吾民仆当自亟去弃富贵如脱屣坠甑还吾贫贱著书为乐且孰能障吾救后世哉仆自断如此复何苦而移吾之节哉仆之惟其直如日月着于天嵩衡植于地日月可陨嵩衡可拔仆之节不可移也不然仆老死其节亦可与仆偕死也舍是必未为交游忧足下谅之所示辨刘牧钩隐图泊制器尚象论皆精絶得人意意外之妙研玩累月仅见阃域其本不以复时一览以纾想望之心

上范司谏书 欧阳修

前月中得进奏吏报云自陈州召至阙拜司谏即欲为一书以贺多事仓卒未能也司谏七品官尔于执事得之不为喜而独区区欲一贺者诚以谏官者天下之得失一时之公议系焉今世之官自九卿百执事外至一郡县吏非无贵官大职可以行其道也然县越其封郡逾其境虽贤守长不得行以其有守也吏部之官不得理兵部鸿臚之卿不得理光禄以其有守也若天下之得失生民之利害社稷之大计惟所见闻而不系职司者独宰相可行之谏官可言之尔故士学古懷道者仕于时不得为宰相必为谏官谏官虽卑与宰相等天子曰不可宰相曰可天子曰然宰相曰不然坐乎庙堂之上与天子相可否者宰相也天子曰是谏官曰非天子曰必行谏官曰必不可行立殿陛之前与天子争是非者谏官也宰相尊行其道谏官卑行其言言行道亦行也九卿百司郡县之吏守一职者任一职之责宰相谏官系天下之事亦任天下之责然宰相九卿而下失职者受责于有司谏官之失职也取讥于君子有司之法行乎一时君子之讥着之简册而昭明垂之百世而不泯甚可惧也夫七品之官任天下之责惧百世之讥岂不重邪非材且贤者不能为也近执事始被召于陈州洛之士大夫相与语曰我识范君知其材也其来不为御史必为谏官及命下果然则又相与语曰我识范君知其贤也他日

闻有立天子陛下直辞正色面争廷论者非他人必范君也拜命以来翘首企足竚乎有闻而卒未也窃惑之岂洛之士大夫能料于前而不能料于后也将执事有待而为也昔韩退之作争臣论以讥阳城不能极谏卒以谏显人皆谓城之不谏盖有待而然退之不识其意而妄讥修独以谓不然当退之作论时城为谏议大夫已五年后又二年始庭论陆贽及沮裴延龄作相欲裂其麻才两事尔当德宗时可谓多事矣授受失宜叛将强臣罗列天下又多猜忌进任小人于此之时岂无一事可言而湏七年耶当时之事岂无急于沮延龄论陆贽两事也谓宜朝拜官而夕奏疏也幸而城为谏官七年适遇延龄陆贽事一谏而罢以塞其责向使止五年六年而遂迁司业是终无一言而去也何所取哉今之居官者率三歲而一迁或一二歲甚者半歲而迁也此又非更可以待乎七年也今天子躬亲庶政化理清明虽为无事然自千里诏执事而拜是官者岂不欲闻正议而乐谏言乎然今未闻有所言说使天下知朝廷有正士而彰吾君有纳谏之明也夫布衣韦带之士穷居草茅坐诵书史常恨不见用及用也又曰彼非我职不敢言或曰我位犹卑不得言得言矣又曰我有待是终无一人言也可不惜哉伏惟执事思天子所以见用之意惧君子百世之讥一陈昌言以塞重望且解洛之士大夫之惑则幸甚幸甚

与尹师鲁书 欧阳修

前在京师相别时约使人如河上既受命便遣白头奴出城而还言不见舟矣其夕及得师鲁手简乃知留船以待怪不如约方悟此奴懒去而见给临行台吏催苛百端不比催师鲁人长者有礼使人惶迫不知所为是以又不留下书在京师但深托君贶因书道修意以西始谋陆赴夷陵以大暑又无马乃作此行沿汴絕淮泛大江凡五千里用一百一十程才至荆南在路无附书处不知君贶曾作书道修意否及来此问荆人云至郢止两程方喜得作书以奉问又见家兄言有人见师鲁过襄州计今在郢久矣师鲁欢戚不问可知所渴欲问者别后安否及家人处之如何莫苦相尤否修行虽久然江湖皆昔所游往往有亲旧留连又不遇恶风水老母用术者言果以此行为幸又闻夷陵有米面鱼如京洛又有梨栗橘柚大笋茶笋皆可饮食益相喜贺昨日因参转运作庭趋始觉身是县令矣其余皆如昔时师鲁简中言疑修有自疑之意者非他盖惧责人太深以取直尔今而思之自决不复疑也然师鲁又云闇于朋友此似未知修心当与高书时盖已知其非君子发于极愤而切责之非以朋友待之也其所为何足惊骇路中来颇有人以罪出不测见吊者此皆不知修心也师鲁又云非忘亲此又非也得罪虽死不为忘亲此事湏相见可尽其说也五六十年来天生此辈沈默畏谨布在世间相师成风忽吾辈作此事下至灶门老婢亦相惊怪交口议之不知此事古人日日有也但问所言当否而已又有深相赏叹者此亦是不惯见事人也可嗟世人不见如往时事久矣往时砧斧鼎镬皆是烹斯人之物然士有死不失义则趋而就之与几席枕藉之无异有义君子在傍见其就死知其当然亦不甚叹赏也史册所以书之者盖特欲警后世愚懦者使知事有当然而不得避尔非以为奇事而诧人也幸今世用刑至仁慈无此物使有而一人就之不知作何等怪骇也然吾辈亦自当絕口不可及前事也居闲僻处日知进道而已此事不湏言然师鲁以修有自疑之言要知修处之如何故略道也安道与子在楚州谈祸福事甚详安道亦以为然俟到夷陵写去然后得知修所以处之之心也又常与安道言每见前世有名人当论事时感激不避诛死真若知义者及到贬所则感感怨嗟有不堪之穷愁形于文字其心欢感无异庸人

虽韩文公不免此累用此戒安道慎勿作感感之文师鲁察修此语则处之之心又可知矣近世人因言事亦有被贬者然或傲逸狂醉自言我为大不为小故师鲁相别自言益慎职无饮酒此事修今亦遵此语咽喉自出京愈矣至今不曾饮酒到县后勤官以惩洛中时懒慢矣夷陵有一路祇数日可至郢白头奴足以往来秋寒矣千万保重

宋文鉴卷一百十三

卷一百十四

钦定四库全书

宋文鉴卷一百十四

宋吕祖谦编

书

与石推官书 欧阳修

前同年徐君行因得寓书论足下书之怪时仆有妹居襄城防其夫匍匐将往视之故不能尽其所以云者而略陈焉足下虽不以仆为狂愚而絶之复之以书然果未能谕仆之意非足下之不谕由仆聴之不审而论之之略之过也仆见足下书久矣不即有云而今乃云者何邪始见之疑乎不能书又疑乎忽而不学夫书一艺尔人或不能与忽不学特不必论是以默默然及来京师见二像石本及闻説者云足下不欲同俗而力为之如前所陈者是诚可诤矣然后一进其説及得足下书自谓不能与前所闻者异然后知所聴之不审也然足下于仆之言亦似未审者足下谓世之善书者能钟王虞柳不过一艺已之所学乃尧舜周孔之道不必善书又云因仆之言欲勉学之者此皆非也夫所谓钟王虞柳之书者非独足下薄之仆固亦薄之矣世之有好学其书而悦之者与嗜饮茗阅图画无异但其性之一僻耳岂君子之所务乎然至于书则不可无法古之始有文字也务乎记事而因物取类为其象故周礼六艺有六书之学其防画曲直皆有其説扬子曰断木为棊椀革为鞠亦皆有法焉而况书乎今虽 字已变于古而变古为 者非圣人不足师法然其防画曲直犹有準则如母母彳亍之相近易之则乱而不可读矣今足下以其直者为斜以其方者为圆而曰我第行尧舜周孔之道此甚不可也譬如设饌于案加防于首正襟而坐然后食者此世人常耳若其纳足于帽反衣而衣坐乎案上以饭实酒卮而食曰我行尧舜周孔之道者以此之于世可乎不可也则书虽末事而当从常法不可以为怪亦犹是矣而足下了不省仆之意凡仆之所陈者非论书之善否但患乎近恠自异以惑后生也若果不能又何必学仆岂区区劝足下以学书者乎足下又云我实有独异于世者以疾释老斥文章之雕刻者此又大不可也夫释老惑者之所为雕刻文章薄者之所为足下安知世无明诚笃厚君子之不为乎足下自以为异是待天下无君子之与己同也仲尼曰后生可畏安知来者之不如今也是则仲尼一言不敢遗天下之后生足下一言待天下以无君子此故所谓大不可也夫士之不为释老与不雕刻文章者譬如为吏而不受货财蓋道当尔不足恃以为贤也

答吴充秀才书 欧阳修

前辱示书及文三篇发而读之浩乎若千万言之多及少定而视焉才数百言尔非夫辞丰意

雄需然有不可御之势何以至此然犹自患依仗莫有开之使前者此好学之谦言也修材不足用于时仕不足荣于世其毁誉不足轻重气力不足动人世之欲假誉以为重借力而后进者奚取于修焉先辈学精文雄其施于时又非待修誉而为重借力而后进者也然而惠然见临若有所责得非急于谋道不择其人而问焉者欤夫学者未始不为道而至者鲜焉非道之于人远也学者有所溺焉尔盖文之为言难工而可喜易悦而自足世之学者往往溺之一有工焉则曰吾学足矣甚者至弃百事不关于心曰吾文士也职于文而已此其所以至之鲜也昔孔子老而归鲁六经之作数年之顷尔然读易者如无春秋读书者如无诗何其用功少而能极其至如是也圣人之文虽不可及然大抵道胜者文不难而自至也故孟子皇皇不暇著书荀卿盖亦晚而有作若子云仲淹方勉焉以模言语此道未足而彊言者也后之惑者徒见前世之文传以为学者文而已故用力愈勤而愈不至此足下所谓终日不出于轩序不能纵横高下皆如意者道未足也若道之充焉虽行于天地入于渊泉无不之也先辈之文浩乎需然可谓善矣而又志于为道犹自以为未广若不止焉孟荀可至而不难也修学道而不至者然幸不甘于所悦而溺于所止因吾子之能不自止又以励修之少进焉幸甚幸甚修白

上杜中丞论举官书 欧阳修

修前伏见举南京留守推官石介为主簿近者闻介以上书论赦被罢而台中因举他吏代介者主簿于台职最卑介一贱士也用不用当否未足害政然可惜者中丞之举动也介为人刚果有气节力学喜辨是非真好义之士也始执事举其材议者咸曰知人之明今闻其罢皆谓赦乃天子已行之令非踈贱当有说以此罪介曰当罢修独以为不然然不知介果指何事而言也传者皆云介之所论谓朱梁刘汉不当求其后裔尔若止此一事则介不为过也然又不知执事以介为是为非也若随以为非是大不可也且主簿于台中非言事之官然大抵居台中者必以正直刚明不畏避为称职今介足未履台门之阃而已因言事见罢真可谓正直刚明不畏避矣度介之才不止为主簿直可任御史也是执事有知人之明而介不负执事之知矣修尝闻长老说赵中令相太祖皇帝也尝为某事择官中令列二臣姓名以进太祖不肯用他日又问复以进又不用他日又问复以进太祖大怒裂其奏掷殿陛下中令色不动插笏带间徐拾碎纸袖归中书他日又问则补缀之复以进太祖大悟终用二臣者彼之敢尔者盖先审知其人之可用然后果而不可易也今执事之举介也亦先审知其可举耶是偶举之耶若知而举则不可遽止若偶举之犹宜一请介之所言辩其是非而后已若介虽忤上而言是也当助以辩若其言非也犹宜曰所举者为主簿尔非言事也待为主簿不任职则可罢请以此辞焉可也且中丞为天子司直之臣上虽好之其人不肖则当弹而去之上虽恶之其人贤则当举而申之非谓随时好恶而高下者也今备位之臣百十邪者正者其斜举一信于台臣而执事始举介曰能朝廷信而将用之及以为不能则亦曰不能是执事自信犹不果若遂言他事何敢望天子之取信于执事哉故曰主簿虽卑介虽贱士其可惜者中丞之举动也况今斥介而他举必亦择贤而举也夫贤者固好辨若举而入台又有言则又斥而他举乎如此则必得愚闇懦默者而后止也伏惟执事如欲举愚者则岂敢复云若将举贤也愿无易介而他取也今世之官兼御史者例不与台事故敢布狂言窃献门下伏惟幸察焉

与四路招讨司幕府李讽田裴元积中书

尹洙

得刘伯壽牒取王文政文牒寻以对送始文政等以罪配 牢城保寧为兵会韩公来以旧狱诉于公公命覆其罪苟不至深切则移籍于广銳蕃落文政等皆在泾于是申上帅府呼此二人幕府不俾二人者来反令取其具狱就泾视之既而帅命二人者来止云材弱射七斗弓箭不满两握其具狱则详之矣于是众议曰具狱往而二人乃来此必审其初罪不为深切矣其言材弱射不中程者虑以广銳处之也蕃落旧箭才五尺三寸近制短指者亦聽狄侯命二旧卒方之不少损又命以射穹九斗弓箭不满二指在旧卒下等之上泾内地不知蕃落所用皆短箭故差繆相遠若必长箭程之虽积功至大校其少且壮者亦不能应格矣又蕃落中有犯奸若盗如此北 军者甚众决不复疑但喜得胜兵者二人遂易其籍帅府乃询去若二人者罪安得不为深切然后乃知帅府之意不欲 此二人于蕃落既已籍之无如之何乃答曰其罪不至极于恶蓋婉其辞所以恭上命也不图又命刘伯壽覆其狱凡泾人之相厚者皆见责曰何乃不禀帅命某闻之甚骇其言若它事则不敢知如止此一事则所以为不禀也何者始本路索此二人于泾帅既不遣复命取具狱视之若果以为巨慝则当下令曰此不足贷二人无可遣理独归其具狱则洙必审视其罪虽其可贷犹当奉承帅防奚必改籍此二卒耶且韩公非素得视此二人具狱也命本路究其罪易其军与不易皆繫于本路也不易不足为忤意易之不足为迎合且本路军与民暨蕃酋以事自诉以功自理于韩公者多矣皆下其事于本路且命详之其以事自诉得辨者十二三以功自理应格者十一二蕃酋所陈其可行者十不一二皆不以先入之言为主也文符尽在可取而覆视岂必以一事为违戾耶兹事极防而洙愚愚为言者诚以害于体为甚大也昨日经略司行某事其于法少疑而事当然者大吏特以前日王文政等无碍于法尚尔今此恐见诘奈何洙叱去之洙谓狄侯曰异日此曹有言必请黥之虽异日黥之徒能制一吏如将校何将校必曰此一细事犹不得遂其行安能使我有畏哉吾独知畏元帅耳此甚足为元帅忧也自洙临本路原州镇戎军决罪有不足死而特死者有当死而惨其刑者洙与狄侯议皆不问其状蓋知其守将可任以事当申其权于下也又有卒犯罪反持其主校过失者洙诘之曰若主校与汝共为隱汝惧累以言或主校濫罚汝不胜其虐以言吾皆聽汝理有罪者今汝自有罪当罚主校若贷汝则过终不闻是使主校皆畏过莫敢答其卒者此军之大 也狄侯暨诸将皆曰善然遂杖去之且大将于士卒非人人能督察抚循之也必有主校焉使军中皆畏其主校则将无所事矣夫士卒不畏其主校则饮博自恣饮博自恣则卒至于贫穷卒至于贫穷则无所不至焉为主校者岂使反畏其下哉故为将者必察羣校之贪虐者自去之无使其下能持焉则卒皆有畏矣是则大将者不使士卒独畏我而不畏其主校又不使属郡之兵独畏我而不畏其守将此治兵之大要也洙秩虽卑然于本路言之与狄侯皆大将之任也责任既重朝夕于邊事无不忧者闻士卒不畏其主校则小以为忧闻属郡不畏其守将则大以为忧今将使一路之人不畏其大将则元帅安得而不忧耶故某所谓于事虽小而于体甚大者以此某得以諫名官凡事之曲直犹当于天子廷辨之今乃不能自辨于元帅反噉嚙于幕府岂畏懦耶蓋元帅之体不当以事诎于部将是某凡辨论事可取直于天子不可取直于元帅幸诸君少留意焉

答张洞书 孙 复

两辱手书辞意勤至道离羣外以仆居今之世乐古圣贤之道与仁义之文也明远以尊道扶圣立言垂范之事问于我我幸而志于斯也有年矣重念世之号进士者率以砥砺辞赋晞占科第为事若明遠穎然独出不汲汲于彼而孜孜于此者几何人哉然吾惧明遠年少气勇而欲速成无以致于文也故道其一二明遠熟察之而已矣天文者道之用也道者教之本也故文之作也必得之于心而成之于言得之于心者明诸内者也成之于言者见诸外者也明诸内者故可以适其用见诸外者故可以张其教是故诗书礼乐大易春秋之文也总而谓之经者以其终于孔子之手尊而异之尔斯圣人之文也后人力薄不克以嗣但当左右名教夹辅圣人而已或则发列圣之防防或则摘诸子之异端或则发千古之未寤或则正一时之所失或则陈仁政之大经或则斥功利之末术或则扬圣人之声烈或则寫下民之愤叹或则陈天人之去就或则述国家之安危必皆临事摭实有感而作为论为议为书防歌诗賛颂箴解铭説之类虽其目甚多同归于道皆谓之文也若肆意構虛无状而作非文也乃无用之瞽言尔徒污简册何所贵哉明遠无志于文则已若有志也必在潜其心而索其道潜其心而索其道则其所得也必深其所得也既深则其所言也必遠既深且遠则庶乎可望于斯文也不然则浅且近矣曷可望于斯文哉噫斯文之难至也久矣自西汉至李唐其间鸿生硕儒齐肩而起以文章垂世者众矣然多以杨墨佛老虚无报应之事沈谢徐庾妖艷邪侈之言杂乎其中至有盈箱满篋发而视之无一言及于教化者岂非无用瞽言徒污简册者乎至于终始仁义不叛不杂者惟董仲舒扬雄王通韩愈而已由是而言之则可容易至之哉若欲容易而至之则非吾之所闻也明遠熟察之无以吾言为忽

上孔中丞书石介

夫子之道不行于当年传于其家直四十余世以俟子孙如此其遠也夫子没后世有子思焉安国焉穎達焉止于发扬其言而已有汉相光唐相纬虽得位亦不能尽行其道夫子之道其肯鬱然蟠伏于其家乃跃起奋出散漫于天下天下人皆可以得之汉高祖唐太宗能得之于上以之有天下三百年孟轲扬雄文中子韩愈能得之于下以之有其名于亿万世唯孔氏子孙无有得之者俟四十余世仅二千年閣下乃得之今夫子之道不專在于閣下也閣下又且赫然有声烈于天下复得位于朝见用于天子閣下徒能得夫子之道其将以夫子之道事于圣君施于天下俾国家为二帝为三王为两汉为钜唐矣夫子之志曰吾志在春秋春秋天子之事也世衰道防邪説暴行有作臣弑其君者有之子弑其父者有之夫子惧之而又时无君已无位不能诛不能正乃作春秋焉所以正王纲举王法故春秋成乱臣贼子惧为司寇则七日而诛少正卯于两观之下摄相事则齐终不敢窥兵河南当时之君则昏也当时之位则摄也尚不及閣下得明君有大位为中丞逾月而未闻有举焉閣下在朝朝廷尚有奸臣敢在位天下蠹贼未悉除是夫子道犹未克尽举岂夫子直四十余世仅二千年以俟閣下閣下宜念之且天子之设御史府尊其位崇其任不与他府并旧有大夫则中丞亚大夫而领其属今大夫阙则中丞其长也故中丞之任特重焉中丞之责尤重焉君有佚豫失德悖乱亡道荒政嗾諫废忠慢贤御史府得以諫责之相有依违顺防蔽上罔下贪宠忘諫專福作威御史府得以糾防之将有骄悍不顺恃武肆害玩兵弃战暴刑毒民御史府得以举劾之君至尊也相与将至贵也且得諫责糾劾之余可知也御史府之尊严也如轩陛之下庙堂之上进退百官行政教出号令明制度纪赏罚有不如法者御史得言之御史府视中书枢密虽若卑中书枢密亦

不敢与御史府抗威争礼而反畏悚而尊事之御史府之重其无与比然须得如閣下者居之始贵矣易曰苟非其人道不虚行礼曰人存则政举閣下圣人之后又能得圣人之道以方重刚正公忠清直烈烈在于朝为天子献可替否贊谋猷持纲纪天下想望其风采者十五年间简于清 期将大用且歷试于外更观其能违更三大藩皆卓然有治声闻于天府浹于日下御史府中丞虚位日班于紫宸殿下佩金煌煌行声锵锵且有百数天子弗録之乃南走三百里以驿召閣下直入其府登其位自陛下独决万几来登崇俊良黜逐纖人革故鼎新百度修举太平之望日月以隆然而天人之心犹鬱然不大舒释者以閣下尚稽大任也至是天人之心始大舒释矣閣下自初及终皆以直道进诗曰靡不有初鲜克有终介尝闻朝大夫语曰有某官为某官时忠鯁直谏謇謇敢言触龙逆鳞不避诛死由是人主知之声名蔼然耸动朝野不四五年取显仕今为某官位弥高身弥贵禄厚惠渥私庭曳青绶者五六人门前炎炎可炙手顾此势力荣宠有所惜也如有物塞其耳如有叶蔽其目如有钳緘其口朝廷有阙政国家有遗事若不闻若不覩而不复言则向之忠鯁谏直謇謇敢言乃沽名耳其以为速进之媒乎噫士之积道德富仁义于厥身蓋假于权位以布诸行事利于天下也岂有屑屑然谋夫衣食者欤正色直已立于朝廷行其道乃使天下有此论庸无伤乎古今君子少小人多君子常不胜小人小人不惟常胜君子而又不能容之恶直丑正囂囂实繁幸而有一君子在于朝则百小人排之非鐵心石肠刚正不折未有不随而靡者小人不容君子也如是而不能死节以永终誉中涂晚节须有渝变宜其为小人之所排也今有人位未显身在下能坚正不顾其身敢直言极谏犯天子顏色封章抗防论天下利害羣小人必丛立指防曰此人速进也沽虚名也非以行道也吁吾徒不见容于小人也敢信于天下也固若是乎学周公孔子之道不用则卷而懷之用则肯已乎实将施及国家布于天下以左右吾君绥吾民矣羣小人排毀不已无足怪也閣下亦当大警戒之勿使天下有所论则君子幸甚天下幸甚

答韩持国书 苏舜钦

近得京信长姊奄逝中懷殞裂不堪其哀更承慰问重增号絶且防见责以兄弟在京不以义相就以尽友悌之道独羈外数千里自取愁苦持国予之素所畏者也今言如是疑非出于持国也然笔迹趣向皆持国又不足疑是持国知其一未知其他予不得不为持国班班而言也予亦人也非翼而飞蹄而驰者也岂无亲戚之情岂不知会合之乐也虽是禽兽亦安肯舍安逸而就愁苦哉此语去离物情遠矣岂当出于持国之口耶昨在京师官时不敢犯人顏色不敢议论时事随众上下心志蟠屈不开固亦极矣不幸适在嫌疑之地不能决然早自引去致不测之祸猝去下吏无人敢言反讐一波共起谤议被废之后喧然未已更欲寘之死地然后为快来者往往钩探言语欲以传播好意相存防者防希矣故闭戸或密出不敢与相见如避兵寇惴惴然惟恐累及亲戚耳偷俗如此安可久居其间遂超然遠举羈泊于江湖之上不惟衣食之累实亦少避其机穽也况血属之多持国见之矣屋庐之隘持国亦见之矣资入之薄持国又见之矣常相团聚不衣与食可乎不可也食虽足闭關常不与人相接见可乎不可也既与人接不与之言可乎又不可也既与之言不与之往还可乎又不可也既与之言语往还人人皆如持国则可今持国尚有此语况亲也义也识也不迨持国者多矣使之加酿恶言喧布上下不能自明则前日之事未为重也便都无此事亦终日劳苦应接之不暇寒暑奔走尘土泥淖中不能了人事羸马傲仆日栖栖取辱于都城使人指背笑我哀闵我亦何顏面安得

不为之愁苦哉此虽与兄弟亲戚相远而伏牖稍充足居室稍宽又无终日应接奔走之劳耳目清旷不设机关以待人心安闲而体舒放三商而眠高舂而起静院明牕之下罗列图史琴樽以自愉逾月不迹公门有兴则泛小舟出盘阊吟啸闲适于江山之间渚茶野酿足以销忧莼鲈稻蟹足以适口又多高僧隐君子佛庙胜绝家有园林珍花奇石曲池高台鱼鸟留连不觉日暮昔孔子作春秋而夷吴又曰吾欲居九夷观今之风俗乐善好事知予守道好学皆欣然愿来过从不以罪人相遇虽孔子复生是亦必欲居此也则持国以彼此较之孰为然否哉人生内自得外有所适固亦乐矣何必高位厚禄役人以自奉养然后为乐今虽侨此亦如仕宦南北安可与亲戚常相守耶持国明年终防昆仲亦必游宦何以尽友悌之道也况予窘迫势不得如持国之意必使我尸转沟洫肉餒豺虎而后可也何其忍耶尝观棠棣之诗云凡今之人莫如兄弟谓兄弟以恩当有急难之时必相拯救五章云防乱既平既安且宁虽有兄弟不如友生谓朋友尚义及安宁之时以礼义相琢磨也予于持国外兄弟也当急难之时不相拯救今又于未安宁之际欲以义相琢磨虽古人所不能及予欲不报虑浅吾持国也前得子华诗意亦然未暇述今遂并此以达子华予非躁而怛咄者察之

宋文鉴卷一百十四

卷一百十五

钦定四库全书

宋文鉴卷一百十五

宋吕祖谦编

书

与吴九论武学书 刘敞

前此有人自京师至言朝廷制作武舞教之庠中者小人窃喜以谓太祖太宗功业轶三王德厚侔天地而庙乐未立雅颂未备公卿大夫乃宜冬不裘夏不葛而日夜谋之所以使名声洋溢与万世无穷百姓有以咏歌四夷有以观听也而濶然寢从功烈掩塞是必天子感焉而作乐崇德以荐之宗庙肆之上帝矣周室既衰管弦之书遂亡于今千岁焉而吾徒乃且复得阅其蹈厉亲其文物是千一之会也以足下方为学官所以欣然奉书求粗问制度亦欲夸动下国奋扬辉光今辱求讯乃知传者之误而国家自以邇鄙未靖故立武学以校骁鸷之士孙吴贲育之俦小人失望又重感叹昔三代之王建辟雍成均以敦化者危冠逢掖之人居则有序其术诗书礼乐其志文行忠信是以无鄙倍之色鬪争之声犹惧其未也故贱诈谋爵人以德褒人以义轨度其信壹以待人故曰勇则害上不登于明堂民知所底而无贰心是以其教不肃而成其政不严而治未曾闻夫武学之制也夫纓胡之纓短后之衣瞠目而语难按剑而疾眦者此所谓勇力之人也将教之以术而动之以利其可得不为其容乎其容可得无变其俗乎吾恐虽有智者未易善其后也而况建博士之职广弟子之员本之不知教化既寢弱矣夫战国之时天下竞于驰骛于是乎有纵横之师技击之学以相残也虽私议巷説有司不及然风俗犹以是薄祸乱犹以是长学者之所甚疾仁人之所忧而辨也若之何其效之且昔先王务教胄子以道而不及武者非无四夷之患诚恐示民以佻也今既示之佻矣道其已乎四方之人何观焉且足下预其议而不能救欤吾所甚惑也足下书曰时事日新恨不我见此独非新事乎吾既见之矣故聊以裁答

答赵内翰书 蔡襄

伏防示下众荐黄晞奏章晞闽人与之游甚久以书自喜不苟于人诚高世懷道之士足下荐之于朝庶乎盛时无有遗材足下之存心不特为晞发也然其奏曰石介在国子监时请晞表率生徒晞以介诈善不直为事非是遂拒之弗往乃晞之先见知人识虑高遠也襄以谓斥介而引晞意所未喻介好论议当时人物故众毁丛至原其所以为心欲君侧无奸邪人人忠孝百姓无疾苦教化明白信周公孔子之言谓太平可立致而不度世务行之难易此介之所以修诚立节之大略也所抵牾者夏竦党辈耳一旦介去朝奸人巧伪百端妄造谤毁必欲赤

其族然后快意赖天子圣明辨是非故介从而自白嗟乎谓介诈善何也夫诈善者将图富贵取名誉也介生不免寒饥而死几斲棺子孙流离诈善者固如是耶守已信道而不顾世俗者伯夷叔齐是也且数百年孔子称之其论遂定若介信道而守死者也其亦有待于后世乎昔介之存襄以同年进士兄事而友之自介之亡未见有如介之自信者介复生当师事之不暇以苟容无所自立为责况敢毁之睇避介聘为学正不肯为介下耳此特小小者岂足为睇高识远虑哉足下与介踈知之不至然天下公议固当有闻足下语论众所瞻望诘可雷同今毁介之人满朝使某箝口固不为少虽开口明介介岂遂明然卖死友以合贵权此襄所不为而足下所见知之者也近为寒气薄中日再食粥者七矣奉教不知疲惫感叹颠倒

答刘蒙书 司马光

昔张伯松语陈孟公曰人各有性长短自裁子欲为我亦不能吾而效子亦败矣马文渊戒兄子欲其效龙伯高之周慎谦俭不欲其效杜季良忧人之忧乐人之乐也光愚无似何足以望万一于古人然私心所慕者伯松伯高而不敢为孟公季良之行也况防时始能言则诵儒书习谨敕长而为吏则读律令守防墨黻然为鄙细之人侧足于庸俗之间不为雄俊奇伟之士所齿目为日久矣不意去岁足下自大河之北洋洋而来游于京师负其千镒之宝欲求良工大贾而售之乃幸顾于陋巷因得窃读足下之文窥足下之志文甚高志甚大语古则浩博而渊防论今则明切而精至诚不能不口夸而心服譬如窈人之子终日环绕爱玩咨嗟传布乞无一钱敢问其直之高下亦终于无益而已矣今者足下忽以亲之无以养兄之无以莜弟妹嫂侄之无以恤策马裁书千里渡河指某以为归且曰以鬻一下婢之资五十万畀之足以周事何足下见期待之厚而不相知之深也光得不骇且疑乎方今豪杰之士内则充朝廷外则布郡县力有余而仁可仰者为不少矣足下莫之取乃独左顾而抵于不肖岂非见期待之厚哉光虽窃托迹于侍从之臣月俸不及数万防桂炊玉晦朔不相续居京师已十年囊褚旧物皆竭安所取五十万以佐从者之疏糲乎夫君子虽乐施予亦必已有余然后能及人就其有余亦当先亲而后踈先旧而后新光得侍足下裁周歲得见不过四五而遽以五十万奉之其余亲戚故旧不可胜数将何以待之乎光家居食不敢常有肉衣不敢纯衣帛何敢以五十万市一婢乎而足下忽以此责之岂非不相知之深哉光视地而后敢行顾足而后敢立足下一旦待之为陈孟公杜季良之徒光能无骇乎足下服儒衣谈孔顏之道啜菽饮水足以尽欢于亲簞食瓢饮足以致乐于身而遑遑焉以贫乏有求于人光能无疑乎足下又责以韩退之之所为若光者何人敢望韩退之哉韩退之能为文其文为天下贵凡当时王公大人庙碑墓碣靡不请焉故受其厚谢随复防之于亲旧此其所以能行义也若光者何人敢望退之哉光自结髮以来虽行能无所长然实不敢錙铢妄取于人此众人所知也取之也廉则其施之人也靳亦其理宜也若既求其取之廉又责其施之厚是二行者诚难得而兼矣足下又欲使光取之于佗人是尤不可之大者防生高乞醯于隣人以应求者孔子以为不直况已不能施而敛之于人以为已惠岂不害于恕乎足下之命既不克承又费辞以释之其为罪尤深足下所称韩退之亦云文章不足以发足下之事业钱财不足以赙左右之匮急糶载而往垂橐而归足下亮之而已

与范景仁论乐书 司马光

防示房生赤法云生尝得古本汉书云度起于黄钟之长以子谷秬黍中者一黍之起积一千二百黍之广度之九十分黄钟之长一为一分今文误脱之起一千二百黍八字故自前世以来累黍为尺纵置之则太长横置之则太短今新赤横置之不能容一千二百黍则大其空径四厘六毫是以乐声太高又尝得开元中笛及方响校太常乐下五律教坊乐下三律皆由儒者误以一黍为一分其法非是不若以一千二百黍实管中随其短长防之以为黄钟九寸之管九十分其长一为一分取三分以度空径数合则律正矣景仁比来称此论以为先儒用意皆不能到可以正积古之缪祛一世之惑光窃思之有所未谕者凡数条敢书布陈幸景仁教之景仁曰房生家有汉书异于今本光按累黍求赤其来从矣生所得书不知传于何世而相承积谬由古至今更大儒甚众曾不寤也又其书既云积一千二百黍之广何必更云一黍之起此四字者将安施設刘子骏班固孟坚之书不宜如此冗长也且生欲以黍实中乃求其长何得谓之积一千二百黍之广孔子称必也正名乎必若所云则为新尺一丈二尺得无求合其术而更戾乎景仁曰度量权衡皆生于律者也今先累黍为尺而后制律返生于度与黍无乃非古人之意乎光谓不然夫所谓律者果何如哉向使古之律存则歛其声而知声度其长而知度审其容而知量校其轻重而知权衡今古律已亡矣非黍无以见度非度无以见律律不生于度与黍将何从生邪夫度量衡所以佐律而存法也古人所为制四器者以相参校以为三者虽亡苟其一存则三者从可推也又谓后世器或壞亡故载之于书形之于物夫黍者自然之物有常不变者也故于此寓法焉今四器皆亡不取于黍将安取之凡物之度其长短则谓之度量其多少则谓之量称其轻重则谓之权衡然量有虚实衡有低昂皆易差而难精等之不若因度求律之为审也房生今欲先取容一龠者为黄钟之律是则律生于量也量与度皆非律也舍彼用此将何择焉景仁曰古律法空径三分围九分今新律空径三分四厘六毫此四厘六毫者从何出耶光谓不然夫径三分围九分者数家言其大要耳若以密率言之径七分者二十有二分也古之为数者患其空积防之太烦则上下辈之所谓三分者举成数而言耳四厘六毫不及半分故弃之也又律管至小而黍粒体圆其中岂无负载空之处而必欲责其丝忽不差邪景仁曰生以一千二百黍积实于管中以为九寸取三分以为空径此自然之符也光按量法方尺之量所受一斛此用累黍之法校之则合矣若从生言度法变矣而量法自如则一斛之物岂能满方尺之量乎景仁曰量权衡皆以千二百黍为法何得度法独用一黍光按黄钟所生凡有五法一曰备数二曰和声三曰审度四曰嘉量五曰权衡量与衡据其容与其重非千二百黍不可于度法止于一黍为分无用其余若数与声则无所事黍矣安在其必以一千二百为为之定率也景仁曰生云今乐太高太常黄钟适当古之仲吕不知生所谓仲吕者果后防之仲吕耶开元之仲吕邪若开元之仲吕则安知今之太高非昔之太下耶笛与方响里巷之乐庸工所为岂能尽得律吕之正乃欲取以为法考定雅乐不亦难乎此皆光之所大惑也君子之论无固无我惟是之从景仁苟有以解之使莹然明白则敢不敛衽服义岂欲徒为此譏譏也不宣光再拜曰

与王介甫书 司马光

光居常无事不敢涉两府之门以是从不得通名于将命者春暖伏惟机政余裕台 万福孔子曰益者三友损者三友光不才不足以辱介甫为友然自接待以来十有余年屡常同僚亦不可谓无一日之雅也虽愧多闻至于直谅不敢不勉若乃便佞则固不敢为也孔子曰君子

和而不同小人同而不和君子之道出处语嘿安可同也然其志则皆欲立身行道辅世養民此其所以和也向者与介甫议论朝廷事数相违戾未知介甫之察不察然于光向慕之心未始变移也窃见介甫独负天下大名三十余年才高而学富难进而易退遠近之士识与不识咸谓介甫不起则已起则太平可立致生民咸被其泽矣天子用此起介甫于不可起之中引参大政岂非欲望众人之所望于介甫邪今介甫从政始暮年而士大夫在朝廷及自四方来者莫不非议介甫如出一口下至闾閻细民小吏走卒亦窃窃怨叹人人归咎于介甫不知介甫亦尝闻其言而知其故乎光窃意门下之士方日誉盛德而贊功业未始有一人敢以此闻達于左右者也非门下之士则皆曰彼方得君而專政无为触之以取祸不若坐而待之不过二三年彼将自败若是者不惟不忠于介甫亦不忠于朝廷若介甫果信此志推而行之及二三年则朝廷之患已深矣安可救乎如光则不然忝备交游之末不敢苟避遣怒不为介甫一一陈之今天下之人恶介甫之甚者诋毁无所不至光独知其不然介甫固大贤其失在于用心太过自信太厚而已何言之自古圣贤所以治国者不过使百官各称其职委任而责成功也其所以養民者不过轻租税薄赋敛已逋责也介甫以为此皆腐儒之常谈不足为思得古人所未尝为者而为之于是财利不以委三司而自治之更立制置三司条例司聚文章之士及晓财利之人使之讲利孔子曰君子喻于义小人喻于利樊须请学稼孔子犹鄙之以为不知礼义信况讲商贾之末利乎使彼诚君子耶则固不能言利彼诚小人耶则惟民是虐以饫上之欲又可从乎是知条例一司已不当置而置之又于其中不次用人往往暴得美官于是言利之人皆攘臂圜视銜鬻争进各鬪智巧以变更祖宗旧法大抵所利不能补其所伤所得不能偿其所亡徒欲别出新意以自为功名耳此其为害已甚矣又置提举常平广惠仓使者四十余人使行新法于四方先散青苗钱次欲使比戸出助役钱次又欲更搜求农田水利而行之所遣者虽皆选择才俊然其中亦有轻佻狂躁之人陵轹州县骚扰百姓者于是士大夫不服农商防业故谤议沸腾怨嗟盈路迹其本原咸以此也书曰民不静亦惟在王宫邦君室伊尹为阿衡有一夫不获其所若已推而内之沟中孔子曰君子求诸已介甫亦当自思所以致其然者不可專罪天下之人也夫侵官者乱政也介甫更以为治术而先施之贷息钱鄙事也介甫更以为王政而力行之繇役自古皆从民出介甫更欲敛民钱雇市佣而使之此三者常人皆知其不可而介甫独以为可非介甫之智不及常人也直欲求非常之功而忽常人之所知耳夫皇极之道施之于天地人皆不可须臾离故孔子曰道之不明也我知之矣智者过之愚者不及也道之不行也我知之矣贤者过之不肖者不及也介甫之智与贤皆过人及其失也乃与不及之患均此光所谓用心太过者也自古人臣之圣无过周公与孔子周公孔子亦未尝无过未尝无师介甫虽大贤于周公孔子则有间矣今乃自以我之所见天下莫能及人之议论与我合则善之与我不合则恶之如此方正之士何由进谏諛之士何由遠方正曰踈谏諛曰亲而望万事之得其宜令名之施四遠难矣夫从諫纳善不独人君为美也于人臣亦然昔郑人游于鄉校以议执政之善否或谓子产毁鄉校子产曰其所善者吾则行之其所恶者吾则改之是吾师也若之何毁之防子冯为楚令尹有宠于防子者八人皆无禄而多马申叔豫以子南观起之事警之防子惧辞八人者而后王安之赵简子有臣曰周舍好直諫曰有记月有成歲有效周舍死简子临朝而叹曰千羊之皮不如一狐之腋诸大夫朝徒闻唯唯不闻周舍之鄂鄂吾是以忧也子路人告之以有过则喜鄧文终侯相汉有书过之史诸葛孔明相蜀发教与羣下曰违覆而得中犹弃敝蹻而获珠玉然人心苦不能尽惟董幼宰参书七年事有不至至于十反孔明尝自校簿书主簿杨颺諫曰为治有体上下不可相侵请为明公

以作家譬之今有人使奴执耕稼婢典炊爨鸡主司晨犬主吠盗私业无旷所求皆足忽一旦尽欲以身亲其役不复付任形疲神困终无一成岂其知之不如奴婢鸡犬哉失其家主之法也孔明谢之及颺卒孔明垂泣三日吕定公有亲近曰徐原有才志定公荐防至侍御史原性忠壮好直言定公时有得失原輒諫争又公论之人或以告定公定公叹曰是我所以贵德渊者也及原卒定公哭之尽哀曰德渊吕岱之益友今不幸岱复于何闻过哉此数君子者所以能功名成立皆由乐闻直諫不讳过失故也若其余骄亢自用不受忠谏而亡者不可胜数介甫多识前世之载固不俟光言而知之矣孔子称有一言而可以终身行之者其恕乎诗云伐柯伐柯其则不远言以其所愿乎上交乎下以所愿乎下事乎上不远求也介甫素刚直每议事于人主前如与朋友争辨于私室不少降辞气视斧钺鼎镬无如也及宾客僚属谒见论事则唯希意迎合曲从如流者亲而礼之或所见小异防言新令之不便者介甫輒艴然加怒或诟骂以辱之或言于上而逐之不待其辞之毕也明主寛容如此而介甫拒谏乃尔无乃不足于恕乎昔王子雍方于事上而好下佞已介甫不幸亦近是乎此光所谓自信太厚者也光昔从介甫游介甫于诸书无不观而特好孟子与老子之言今得君得位而行其道是宜先其所美必不先其所不美也孟子曰仁义而已矣何必曰利又曰为民父母使民盼盼然将终歳勤动不得以养其父母又称贷而益之恶在其为民父母也今介甫为政首制置条例大讲财利之事又命薛向行均输法于江淮欲尽夺商贾之利又分遣使者散青苗于天下而收其息使人人愁痛父子不相见兄弟妻子离散此岂孟子之志乎老子曰天下神器不可为也为者败之执者失之又曰我无为而民自化我好静而民自正我无事而民自富我无欲而民自朴又曰治大国若烹小鲜今介甫为政尽变更祖宗旧法先者后之上者下之右者左之成者毁之弃者取之矻矻焉穷日力继之以夜而不得息使上自朝廷下及田野内起京师外周四海士吏兵农工商僧道无一人得袭故而守常者纷纷扰扰莫安其居此岂老氏之志乎何介甫总角读书白头秉政乃尽弃其所学而从今世浅丈夫之谋乎古者国有大事谋及卿士谋及庶人成王戒君陈曰有废有兴出入自尔师虞庶言同则绎诗云先民有言询于刍蕘孔子曰上酌民言则下天上施上不酌民言则下不天上施自古立功立事未有専欲违众而能有济者也使诗书孔子之言皆不可信则已若犹可信则岂得尽弃而不顾哉今介甫独信数人之言而弃先圣之道违天下人之心将以致治不亦难乎近者藩镇大臣有言散青苗钱不便者天子出其议以示执政而介甫遽悻悻然不乐引疾卧家光被防为批答见士民方不安如此而介甫乃欲辞位而去殆非明主所以防擢委任之意故直叙其事以义责介甫早出视事更新令之不利于民者以福天下其辞虽朴拙然无一字不得其实者窃闻介甫不相识察破督过之上书自辨至使天子自为手诏以逊谢又使吕学士再三谕意然后乃出视事出视事诚是也然当速改前令之非者以慰安士民报天子之盛德今则不然更加忿怒行之愈急李正言言青苗钱不便诘责使之分析吕司封传语祥符知县未散青苗钱劾奏乞行取勘观介甫之意必欲力战天下之人与之一决胜负不复顾义理之是非生民之忧乐国家之安危光窃为介甫不取也光近防圣恩过聴欲使之副贰枢府光窃惟居高位者不可以无功受大恩者不可以不报故輒敢申明去歳之论进当今之急务乞罢制置三司条例司及追还诸路提举常平广惠仓使者主上以介甫为心未肯俯从光窃念主上亲重介甫中外羣臣无能及者动静取舍唯介甫之为信介甫曰可罢则天下之人咸被其泽曰不可罢则天下之人咸被其害方今生民之忧乐国家之安危唯系介甫之一言介甫何忍必遂已意而不恤乎夫人谁无过君子之过如日月之食过也人皆见之更也人皆仰之何损于明介甫诚能进一言于主上请罢

条例司追还常平使者则国家太平之业皆复其旧而介甫改过从善之美愈光大于前日矣于介甫何所亏防而固不移哉光今所言正逆介甫之意明知其不合也然光与介甫趣向虽殊大归则同介甫方欲得位以行其道泽天下之民光方欲辞位以行其志救天下之民此所谓和而不同者也故敢一陈其志以自達于介甫以终益友之义其舍之取之则在介甫矣诗云周爰咨谋介甫得光书僥未赐弃擲幸与忠信之士谋其可否不可示谄谀之人必不肯以光言为然也彼谄谀之人欲依附介甫因緣改法以为进身之资一旦罢局譬如鱼之失水此所以挽引介甫使不得由直道行者也介甫奈何徇此曹之所欲而不思国家之大计哉孔子曰巧言令色鲜矣仁彼忠信之士于介甫当路之时或齟齬可憎及失势之后必徐得其力谄谀之士于介甫当路之时诚有顺适之快一旦失势必有卖介甫以自售者矣介甫将何择焉国武子好尽言以招人之过卒不得其死光常自病似之而不能改也虽然施于善人亦何忧之有用是故敢妄发而不疑也属以辞避恩命未得请且病膝疮不可出不获亲侍言于左右而布陈以书悚惧尤深介甫其受而聽之与罪而絕之或诟骂而辱之与言于上而逐之无不可者光俟命而已

宋文鉴卷一百十五

卷一百十六

钦定四库全书

宋文鉴卷一百十六

宋吕祖谦编

书

与吴丞相书 司马光

光愚戆迂僻自知于世无所堪可以是退伏散地苟窃防禄以庇身保家而已近闻道路之人自京师来者多云相公时语及姓名或云亦尝有所荐引未知虚实光自居洛以来仕宦之心从已杜絶在少壮之时犹不如人况年垂六十须髮皓然视昏聴重齿落七八精神衰耗岂复容有干进之心但以从游之从今日特防齿记感荷知己之恩终身岂敢忘哉顾惟相公富贵显荣丰备已极光踈冗之人无一物可以为报唯忠信之言庶几仰酬盛德之万一耳伏惟明主厯选周行登用人杰以毗元化以光不敢忘知己之心知相公必不轻孤于明主也窃见国家自行新法以来中外恟恟人无愚智咸知其非州县之吏困于烦苛以夜继昼弃置实务崇飾空文以刻急为能以欺诬为才闾阎之民迫于诛斂人无贫富咸失作业愁怨流离转死沟壑聚为盗贼日夜引领冀朝廷之觉寤 法之变更凡几年于兹矣相公聪明岂得不闻之邪今府库之实耗费殆竭仓廩之储仅支数月民间赀产朝不谋夕而用度日广掊斂日急河北京东淮南蠭起之盗攻剽城邑杀掠官吏军已不能制矣若不幸复有方二千里之水旱霜蝗所在如是其为忧患岂可胜讳哉此安得谓之细事保其必无而恬然不以为意乎贾谊当汉文之世以为譬如抱火厝之积薪之下而寝其上火未及然因谓之安若当今日必谓之火已然而安寝自若者也昔周公勤劳王家坐以待旦防胡防尾羽敝口瘡终能为周家成太平之业立八百之祚身为太师名播无穷子孙奄有 防与周升防王夷甫位宰辅不思经国專欲自全置二弟于方镇以为三窟及晋室阽危身亦不免然则圣贤之心岂忘身徇物不自为谋哉蓋以国家兴隆则身未有不预其福者也顾众人之识近而圣贤之虑遠耳如相公之用心固周公之用心也今若法 而不更民疲而不恤万一防窃益多蠱蜚有毒则窃恐庙堂之位亦未易安居虽复委遠机柄均逸外藩外藩固非息肩之处乃至投簪解绂啸傲东山东山亦非高枕之地然则相公今日救天下之急保国家之安更无所与让矣救急保安之道苟不罢青苗免役保甲市易之法息征伐之谋而欲求其成效是犹恶汤之沸而益薪鼓橐欲适鄢郢而北辕疾驱也所求必不果矣欲去此五者而不先别利害以寤人主之心则五者不可得而去矣欲寤人主之心而不先开言路则人主之心不可得而寤矣所谓开言路者非如向时徒下诏书使臣民言得失既而所言当者一无所施行又取其稍讦直者随而罪之此乃塞言路非开之也为今之要在于辅佐之臣朝夕啓沃唯以亲忠直纳谏争广聪明去壅蔽为先务如是政令之得失下民之疾苦粲然无所隱矣以圣主睿明之资有贤相公忠之助使说言日

进下情上通则至治可指期而致 法何难去哉夫难得而易失者时也今病虽已深犹未至膏肓苟制治于未乱保邦于未危尚有反掌之易失今不治遂为痼疾虽邴魏姚宋之佐将末如之何必有噬脐之悔矣相公读书从仕位至首相展志行道正在此时苟志无所屈道无所失其令名高于千古丈夫立身事君始终如此亦可以为无负矣光切于报德贪尽区区不觉辞多

答司马君实论乐书 范 镇

昨日辱书以为镇不当为议状是房庶尺律法始得书 然而惧曰镇违羣公之议而下与匹士合有不适中宜获戾于朋友也既读书乃释然而喜曰得君实之书然后决知庶之法是而镇之议为不谬庶之法与镇之议于今之世用与不用未可知也然得附君实之书传于后世之人质之故终之以喜也君实之疑凡五而条目又十数安敢不尽言解之君实曰汉书传于世从矣更大儒甚众庶之家安得善本而有之是必谬为脱文以欺于镇也是大不然镇岂可欺哉亦以义理而求之也春秋夏五之阙文礼记玉藻之脱简后人岂知其阙文与脱简哉亦以义理而知之也犹镇之知庶也岂可逆谓其欺而置其义理哉又云一黍之起于刘子骏班孟坚之书为冗长者夫古者有律矣未知其长几何未知其空径几何未知其容受几何岂可直以千二百黍置其间哉宜起一黍积而至一千二百然后满故曰一黍之起积一千二百黍之广其法与文势皆当然也岂得为冗长乎若如君实之説以尺生律汉书不当先言本起黄钟之长而后论用黍之法也若尔是子骏孟坚之书不为冗长而反为颠倒也又云积一千二百黍之广是为新尺一丈二尺者君实之意以积为排积之积广为一黍之广而然邪夫积者谓积于管中也广者谓所容之广也诗云乃积乃仓孟康云空径之广是也又云孔子曰必也正名乎者此孔子教子路以正卫之父子君臣之名分岂积与广之谓邪又云古人制律与尺量权衡四器者以相参校以为三者苟亡得其一存则三者从可推也者是也又云黍者自然之物有常而不变者亦是也古人之虑后世其意或当如是然古以律生尺古人之意既知黍之于后世可以为尺岂不知黍之于后世亦可为律而故于其法为相戾乎若如君实之説则是古人知一而不知二也知彼而不知此也又云径三分围九分者数家之大要不及半分则弃之也者今三分四厘六毫其围十分三厘八毫岂得谓不及半分而弃之哉汉书曰律容一龠得八十一寸谓以九分之围乘九寸之长九九而八十一也今围分之法既差则新尺与量未必是也如欲知庶之量与尺合姑试验之乃可又云权衡与量据其容与其重必千二百黍而后可至于尺法止于一黍为分无用其余若以生于一千二百是生于量也且夫黍之施于权衡则由黄钟之重施于量则由黄钟之龠施于尺则由黄钟之长其实皆一千二百也此皆汉书正文也岂得谓一黍而为尺邪岂得谓尺生于量邪又云庶言太常乐太高黄钟适当古之仲吕不知仲吕者果后防之仲吕邪开元之仲吕耶若开元之仲吕则安知今之太高非昔之太下者此正是不知声者之论也无复议也又云方响与笛里巷之乐庸工所为不能尽得律吕之正者是徒知古今乐器之名为异而不知其律与声之同也亦无复议也就使得真黍用庶之法制为律吕无忽防之差乃黄帝之仲吕也岂直后防开元之云乎书曰律和声方舜之时使防典乐犹用律而后能和声今律有四厘六毫之差以为适然而欲以求乐之和以副朝廷制作之意其可得乎其可得乎太史公曰不附青云之士则不能成名君实欲成其名而知所附矣惟其是而附之则可其不是而附之安可哉谚曰抱桥柱而浴者必不溺君实之议

无乃为浴者类乎君实见咨不敢不为此譏譏也不宣镇再拜

请杜醇先生入县学书 王安石

人之生从矣父子夫妇兄弟宾客朋友其伦也孰持其伦礼乐刑政文物数制事为其具也其具孰持之为之君臣所以持之也君不得师则不知所以为君臣不得师则不知所以为臣为之师所以并持之也君不知所以为君臣不知所以为臣人之类其不相贼杀以至于尽者非幸欤信乎其为师之重也古之君子尊其身耻在舜下虽然者鄙夫问焉而不敢忽敛然后其身似不及者有归之以师之重而不辞曰天之有斯道固将公之而我先得之得之而不推余于人使同我所有非天意且有所不忍也安石得县于此逾年矣方因孔子庙为学以教养县子弟愿先生留听而赐临之以为之师安石与有闻焉伏惟先生不与古之君子者异意也幸甚

答韶州张殿丞书 王安石

伏防再赐书示及先君韶州之政为吏民称诵至今不絶伤今之士大夫不尽知又恐史官不能记载以次前世良吏之后此皆不肖之孤言行不足信于天下不能推扬先人之绪功余烈使人人得闻知之所以夙夜愁痛疚心疾首而不敢息者以此也先人之存安石尚少不得备闻为政之迹然尝侍左右尚能记诵教诲之余盖先君所存尝欲大润泽于天下一物枯槁以为身羞大者既不得试已试乃其小者耳小者又将泯没而无传则不肖之孤罪大衅厚矣尚何以自立于天地之间耶阁下勤勤惻惻以不传为念非夫仁人君子乐道人之善安能以及此自三代之时国各有史而当时之史多世其家往往以身死职不负其意盖其所传皆可考据后既无诸侯之史而近世非尊爵盛位虽雄奇雋烈道德满衍不幸不为朝廷所称輒不得见史而执笔者又杂出一时之贵人观其在廷论议之时人人得讲其然不尚或以忠为邪以异为同诛当前而不栗讪在后而不羞苟以履其忿好之心而止耳而况陰挟翰墨以裁前人之善恶疑可以贷褒似可以附毁往者不能讼当否生者不得论曲直赏罚谤誉又不施其间以破其私独安能无欺于 昧之间邪善既不尽传而传者又不可尽信如此唯能言之君子有大功至正之道名实足以信后世者耳目所遇一以言载之则遂以不朽于无穷耳伏惟阁下于先人非有一日之雅余论所及无党私之嫌苟以发潜德为己事务推所闻告世之能言而足信者使得论次以传焉则先君之不得列于史官岂有恨哉

答段缝书 王安石

安石在京师时尝为足下道曾巩善属文未尝及其为人也还江南始熟而慕焉友之又作文粗道其行惠书以所闻诋巩行无纖完其居家亲友惴畏焉怪安石无文字规巩见谓有党果哉足下之言也巩固不然巩文学论议在安石交游中不见可敌其心勇于适道殆不可以刑祸利禄动也父在困厄中左右就养无亏行家事铢髮以上皆亲之父亦爱之甚尝曰吾宗敝所赖者此儿耳此安石之所见也若足下所闻非安石之所见也巩在京师避兄而舍此虽安石亦罪之也宜足下之深攻之也于罪之中有足矜者顾不可以书传也事固有迹然而情不

至是者如不循其情而诛焉则谁不可诛邪巩之迹固然邪然巩为人弟于此不得无过但在京师时未深接之还江南又既往不可咎未尝以此规之也巩果于从事少许可时时出于中道此则还江南时尝规之矣巩闻之輒矍然巩固有以教安石也其作懷友书两通一自藏一纳安石家皇皇焉求相切磨以免于悔者略见矣尝谓友朋过差未可以絕故且规之规之从则已故且为文字自着见然后已邪则未尝也凡巩之行如前之云其既往之过亦如前之云而已岂不得为贤者哉天下愚者众而贤者希愚者固忌贤者贤者又自守不与愚者合愚者加怨焉挟忌怨之心则无之焉而不谤君子之过于聽者又传而广之故贤者当多谤其困于下者尤甚势不足以动俗名实未加于民愚者易以谤谤易以传也凡道巩之云云者固忌固怨固过于聽者也家兄未尝亲巩也顾亦过于聽耳足下乃欲引忌者怨者过于聽者之言县防贤者之是非甚不然也孔子曰众好之必察焉众恶之必察焉孟子曰国人皆曰可杀未可也见可杀焉然后杀之匡章通国以为不孝孟子独礼貌之以为孝孔孟所以为孔孟者为其善自守不惑于众人也如惑于众人亦众人耳乌在其为孔孟也足下姑自重毋轻议巩

答吴孝宗论先志书 王安石

安石辱书又示以先志而怪安石尚有欲为吾弟道者责以一言尽之吾弟所为书博矣所欲为吾弟道者非可以一言尽然吾弟自以为才不及子贡而所言皆子贡所欲闻于孔子而不得者也则安石有欲为吾弟道者可勿怪也积忧久病废学疲懒书不能逮意知己就试国学隆暑自爱他俟试罢见过面尽

贺杜相公书 钱彦遠

闻国家轻重在贤材贤材得失在宰相国虽甚危盜賊充斥水旱荐臻器器若不澹使贤材登用此不足忧适以起其治尔国虽甚安仓廩充实兵甲衅藏于府库使贤材隱匿此是宜忧乱将成矣然贤材有小大道义有取舍唯执政者器使而礼进之俾上下出处当其分辅弼之职毕矣始汉唐初萧何曹参房乔杜如晦为之虐已防意得人尤盛风迹逮同三代暨季末昏错则张禹崔烈柳璨裴贄挟奸窃宠树朋党偿恩讐贤材耻之相与逃去若卓茂葛亮司空图李巨川之徒彷徨陰拱或徇豪杰以摠快其蕴是廼宰相之过也呜呼生民何辜也得失祸福系之二三君子欤明公天与直气繇黄綬歷中外凡四十年至三公情伪险阻尝之矣纲纪故事练之矣古今治乱详之矣前此为枢密使时天下固以想闻风采士类依为盟主者诚以文武吏士老儒新进见公者公悉能判白精粗人人自以各尽其意今公为相实社稷宗庙神灵开诱上心所致然公此举系四海安危故诞告之日无贤不肖搏手相庆而彦遠独惧焉何也公视今贤材果尽用乎天下事果尽正乎则公宜不次擢人夙夜讲议虽 台疎遠不遗为本朝树太平基业奚止缚二小丑梟藁街息饥寒百姓盜弄兵者夫设循嘿守常曰已安已治女辈当束之高阁昔贤材颀颀待公及公复不顾望絕矣君子哉固穷且死万一奸雄事未可究彦遠惧者此也唯受恩最深敢用常礼圖牋引虐辞谏公小人也颇因古义以献且知不言负公矣言不行亦在公矣

上杜相公书 曾 巩

闻夫宰相者以己之材为天下用则用天下而不足以天下之材为天下用则用天下而有余古之称良宰相者无异焉知此而已矣舜尝为宰相矣称其功则曰举八元八凯称其德则曰无为者其舜也与卒之为宰相者无与舜比也则宰相之体其亦可知也已或曰舜大圣人也或曰舜远矣不可尚也请言近近可言者莫若汉与唐汉之相曰陈平对文帝曰陛下即问决狱责廷尉问钱谷责治粟内史周勃曰且陛下问长安盗贼数又可强对邪问平之所以为宰相者则曰使卿大夫各得任其职也观平之所自任者如此而汉之治莫盛于平为相时则其所守者可谓当矣防而至于唐唐之相曰房杜当房杜之时所与共事则长孙无忌岑文本主谏诤则魏郑公王珪振纲维则戴胄刘洎持宪法则张元素孙伏伽用兵征伐则李勣李靖长民守土则李大亮其余为卿大夫各任其事则马周温彦博杜正伦张行成李纲虞世南褚遂良之徒不可胜数夫谏诤其君与正纲维持宪法用兵征伐长民守土皆天下之大务也而尽付之人又与人共宰相之任又有佗卿大夫各任其事则房杜者何为者邪考于其传不过曰闻人有善若已有之不以求备取人不以己长格物随能收叙不隔卑贱而已卒之称良宰相者必先此二人然则着于近者宰相之体其亦可知也已唐以防天下未尝无宰相也称良相者不过一二大节可道语而已能以天下之材为天下用真知宰相体者其谁哉数岁之前阁下为宰相当是时人主方急于致天下治而当世之士豪杰魁壘者相继而进杂糅于朝虽然邪者恶之庸者忌之亦甚矣独阁下奋然自信乐海内之善人用于世争出其力以唱而助之惟恐失其所自立使豪杰者皆若素繇门下以出于是与之佐人主立州县学为累日之格以励学者课农桑以损益之数为吏陞黜之法重名教以矫衰 之俗变苟且以起百官众职之坠革任子之滥明赏罚之信一切欲整齐法度以立天下之本而庶几三代之事虽然纷而疑且排其议者亦众矣阁下复毅然坚金石之断周旋上下扶持树植欲使其有成也及不合矣则引身而退与之俱否呜呼能以天下之材为天下用真知宰相体者非阁下其谁哉使充其所树立功德可胜道哉虽不克其志岂媿于二帝三代汉唐之为宰相者哉若巩者诚鄙且贱然尝从事于书而得闻古圣贤之道每观今贤杰之士角立并出与三代汉唐相侔则未尝不叹其盛也观阁下与之反复议而更张庶事之意知后有圣人作救万事之 不易此矣则未尝不爱其明也观其不合而散逐消藏则未尝不恨其道之难行也以叹其盛爱其明恨其道之难行之心岂须臾忘其人哉地之相去也千里世之相后也千载尚慕而欲见之况同其时过其门墙之下也欤今也过阁下之门又当阁下释袞冕而归非干名蹈利者所趋走之日故敢道其所以然而并书杂文一篇以为进拜之资防赐之一见焉则其愿得矣噫贤阁下之心非系于见否也而复汲汲如是者盖其欣慕之志而已耳伏惟幸察

与孙司封书 曾 巩

窃闻侂智高未反时已夺邕邑地而有之为吏者不能御因不以告皇祐三年邕有白气起廷中江水横溢司户孔宗旦以为兵象防智高必反以书告其将陈拱拱不聽宗旦言不已拱怒诋之曰司户狂邪四年智高出横山略其寨人因其仓库而大赈之宗旦又告曰事急矣不可以不戒拱又不从凡宗旦之于拱以书告者七以口告者多至不可数度拱终不可得意即载其家走桂州曰吾有官守不得去吾亲母为与死也既行之二日智高果反城中皆应之宗旦犹力守南门为书召隣兵欲拒之城亡智高得宗旦喜用之宗旦怒曰贼汝今立死吾岂可污邪骂不絕口智高度终不可下乃杀之当其初使宗旦言不废则邕之祸必不发发而吾有以

待之则必无事使独有此一善固不可不旌况其死节堂堂如是而其事未白于天下比见朝廷所宠赠南兵以来仗节死难之臣宗旦乃独不与此非所谓曲突徙薪无恩泽焦头烂额为上客邪使宗旦初无一言但贼至而能死不去固不可以无赏盖先事以为备守城而保民者宜责之陈拱非宗旦事也今猥令与陈拱同戮既遗其言又负其节为天下者赏善而罚恶为君子者乐道人之善乐成人之美岂当如是耶凡南方之事卒至于破十州覆军杀将防元元之命竭山海之财者其非变发于隱伏而起于仓卒也内外上下有职事者初莫不知或隱而不言或忽而不备苟且偷托以至于不可御耳有一人先能言者又为世所侵蔽令与罪人同罚则天下之事其谁复言耶闻宗旦非独以书告陈拱当时为使者于广东西者宗旦皆歷告之今彼既不能用惧重为已累必不肯复言宗旦尝告也为天下者使万事已理天下已安犹须力开言者之路以防未至之患况天下之事其可忧者甚众而当世之患莫大于人不能言与不肯言而甚者或不敢言也则宗旦之事岂可不汲汲载之天下视聽显扬褒大其人以惊动当世耶宗旦喜学易所为注有可采者家不能有书而人或质问以易则贯穿驰骋至数十家皆能言其意事祖母尽心贫几不能自存好议论喜功名尝与之接故颇知之则其所立亦非一时偶然发也世多非其在京东时不能自重至为世所指目此固一眚今其所立亦可赎矣巩初闻其死之事未敢决然信也前后得言者甚众又得其弟自言而闻祖袁州在广东亦为之言然后知其事使虽有小差要其大防不诬也况陈拱以下皆覆其家而宗旦独先以其亲遁则其有先知之效可知也以其性之喜事则其有先言之效亦可知也以其閣下好古力学志乐天下之善又方使南方以赏罚善恶为职故敢以告其亦何惜须臾之聽尺纸之议博问而极陈之使其事白固有补于天下不独一时为宗旦发也伏惟少留意焉如有未合愿赐还答

上韩范二招讨书 刘 奕

奕皆荷二明公之恩顾而未尝敢一言以干左右者诚有谓也夫位卑者不得僭言职短者不可轻议故虽胸中防鬱亦自释之而已今有身与其事心知不然又安得隱忍不言哉窃见岐府修北路山城蓋上奉朝防乃有经度次招讨之命即议繕完计工数万费材数千虽亦不甚广然皆民力也奕近从府尹往观之府城北走二十里至山足乃曲盘而上仅五里至山顶涉顶而行十余里至今议为城之所行顶而周视羣山蔓延不絕极目如浪按图牒岐陇泾干内郡环是山自泾而南及岐六舍汧源而东抵奉天数百里所谓山者但土坡高原耳非若嵩华终南之有悬崖石壁絕顶孤峰之为限也今所议者岐及泾之一路耳戎马必欲自北而南旁出可作数十路高者平之下者增之岐者盘曲之涧者桥梁之皆人力所能为也加之是城不可屯军马贼至则不守也虽能守之贼由他道而来无所难也恭惟二明公居秦居庆皆尝作城人尚以为劳其如秦之城州城也大而壮之使贼无逼视之心大顺城邊寨也屯军境上壮我邊防是虽劳而有益也今中道作城无军马以守而贼又有他路可行是城之为无益也明矣役已困之民为无益之事于今岂宜哉今作此城蓋为岐之计也奕以谓为岐之计不若此岐之为府城郭民人雍则三分损一仓廩之实帑藏之积监酒之利与雍均船场竹盐鐵冶雍无之造作兵器供应邊須诸郡不及焉民之室比關中内郡亦号富饶其地形南西北皆山险独东去为坦途必若邊城失守贼无后顾之虑长驱而来贼之诣岐有道路之劳不若诣雍之易也若雍之有备则岐为易下也以岐今日之备贼至则破何者无兵也无战具也无是二者

则民不固也前日定川之役人甚不寧閭閻间无赖輩往往有妖言者奕尝私自思之以谓朝廷与招讨得非知岐为自安不足备也今而观之尚使中道作城以御寇是亦为岐之备不为不至也奕以谓为岐之计莫若使有兵三五千能执銳被坚可使者有甲冑弧矢戈防皆称之有能将万兵者一人在城中如此则贼虽大至岐可守也今岐无是兵与器虽中道有数十城无益也况为一城哉奕尝患關中民费财与力十官未得其一今费工数万费财数千郡邑畏威靡敢舒缓其间督促鞭笞吏緣为奸不可胜纪而一无所济是诚可惜也朝廷命二明公專關中之事其寄亦已重矣二明公之忧思諒非不深矣计朝夕事之大者万端此但一小事耳故不足思且慮也明公以为小岐之民以为大劳而有益于事虽大为也劳而无益于事虽小不可为也關中之事所以多失者上轻之而不思下随之而不言增多而为多积小以成大夫事难于谋始易于谋终今此一事其为无益也甚着其能辨之者亦甚众而乃无肯言者恤事可知也奕恃赖恩顾仰干聽覽愿軫思念如此言不至在愿则望稍缓其期使有识者阅而议之然后錄其可否奕下情无任惶恐倾析之至

卷一百十七

钦定四库全书

宋文鉴卷一百十七

宋吕祖谦编

书

与容季书 王回

朝作答书并五积散附沈丘人去比午方得所问然得此书方知手力已到来诸说事甚详冒热出入诚不易然家居者亦岂能常占安侯耶此古人所以欲息其倦而竟无可息之地也廷参之防欲行其私讳于长吏诚多触忌齟齬处所疑者数端皆有之矣然以所据者礼律大意天下以为俗而有司以为法矣使长吏贤邪安肯以怒人使其不贤邪亦安能以外法防命官以罪也且不贤者苟挟其势求肆于下不止则将迫有司故入其辜以死当是时为有司者徒长其怒而从之耶亦守其所司而与之争耶与之争则彼畜其怒或中以他法如之何不与之争则狱情一反已为故入人死罪又如之何试以轻重权之盖就他法之中聊无憾尔人生乘物而游于百年厯观古今所逢无治乱所托无出处祸福之来莫不有而如惑者乃欲以区区之力胜之故有邀福而福愈去避祸而祸愈来盖自然之祸福常伏于万物之间逆理而得之故于人谋为可憾也惟君子为循义而听命故祸福之来无可憾者何则义尽于已而命定于天也汝之深敏读此可以推见其余矣更借一事为汝证之昔春秋之世郑最小国摄之晋楚之彊交责乘陵君臣逊媚犹不能自免及子产为相修其国政驰辞执礼以当晋楚至于攘诸侯之馆垣却逆女之公子草野皆变其常度晋楚初念锐气以临之而其辞直礼明卒莫能屈也循义听命其子产之谓乎其天下礼律尊于朝廷长吏临期寮属虽或不悦敢遽肆其无道如春秋之晋楚哉晋楚不能屈小国之子产惮其辞直尔人子于礼律之内申其私讳非辞直欵而顾惮长吏之能屈乎

上欧阳内翰书 苏洵

洵布衣穷居常窃有叹以为天下之人不能皆贤不能皆不贤故贤人君子之处于世合必离离必合往者天子方有意于治而范公在相府富公为枢密副使执事与余公蔡公为谏官尹公驰骋上下用力于兵革之地方是之时天下之人毛发丝粟之才纷纷然而起合而为一而洵也自度其愚鲁无用之身不足以自奋于其间退而养其心幸其道之将成而可以复见于当世之贤人君子不幸道未成而范公西富公北执事与余公蔡公分散四出而尹公亦失势奔走于小官洵时在京师亲见其事忽忽仰天叹息以为斯人之去而道虽成不复足以为荣也既而自思念往者众君子之仕于朝其始也必有善人焉推之今也亦必有小人焉推之今

世无复有善人也则已如其不然也吾何忧焉姑养其心使其道大有所成而待之何伤退而处十年虽未敢自谓其道有成矣然浩浩乎其胸中若与曩者异而余公适有成功于南方执事与蔡公复相继登于朝富公复自外入为宰相其势将复合为一喜且自贺以为道既已粗成而果将有以发之也既又反而思其向之所慕望爱悦之而不得见之者盖有六人焉今将往见之矣而六人者已有范公尹公二人亡焉则又为之潜然出涕以悲呜呼二人者不可复见矣而所恃以慰此心者犹有四人也则又以自解思其止于四人也则又汲汲欲一识其面以发其心之所欲言而富公又为天子之宰相远方寒士未可遽以言通于前余公蔡公远者在万里外独执事在朝廷之间而其位差不甚贵可以扳援闻之以言而饥寒衰老又痼而留之使不克自致于执事之庭夫以慕望爱悦其人之心十年而不得见其人已死如范公尹公二人者则四人者之中非其势不可遽以言通者何可以不能自往而遽已也执事之文章天下之人莫不知之然窃以为洵之知之特深愈于天下之人何者孟子之文语约而意尽不为饕刻斩绝之言而其锋不可犯韩子之文如长江大河浑浩流转鱼鳖蛟龙万怪惶惑而抑遏蔽掩不使自露而人望见其渊然之光苍然之色亦自畏避不敢迫视执事之文纤徐委备往复百折而条达踈畅无所间防气尽语极言竭论容与简易无艰难劳苦之态此三者皆防然自为一家之文也惟李翱之文其味黯然而长其光油然而幽俯仰揖让有执事之态陆贽之文遣言措意切近的当有执事之实而执事之才又自有过人者盖执事之文非孟子韩子之文而欧阳子之文也夫乐道人之善而不为谄者以其人诚足以当之也彼不知者则以为誉人以求其悦已也夫誉人以求其悦已洵亦不为也而其所以道执事光明盛大之德而不自知止者亦欲执事之知其知我也虽然执事之名满于天下虽不见其文而固已知有欧阳子矣而洵也不幸堕在草野泥涂之中而其知道之心又迂而粗而欲徒手奉咫尺之书自托于执事将使执事何从而知之何从而信之哉洵少年不学生二十五岁始知读书从士君子游年既已晚而不遂刻意厉行以古人自期而视与已同列者皆不胜已则遂以为可矣其多困益甚然后取古人之文而读之始觉其出言用意与已大异时复内顾自思其才则又似夫不遂止于是而已者由是尽烧曩时所作文数百篇取论语孟子韩子及他圣人贤人之文而介然端坐终日读之者七八年方其始也入其中而惶然博观于其外而骇然以惊及其久也读之益精而其胸中豁然以明若人之言固当然者然犹未敢自出其言也时既久胸中之言日益多不能自制试而书之已而再三读之浑浑乎觉其来之易矣然犹未敢以为是也近所为洪范论史论凡七篇执事观其如何嘻区区而自言不知者又将以为自誉以求人之知己也惟执事思其十年之心如是之不偶然也而察之

上富相公书 苏洵

往年天子震怒出逐宰相选用旧臣堪付属以天下者使在宰府与天下更始而阁下之位实在第三方是之时天下咸喜相庆以为阁下惟不为宰相也故默默在此方今困而复起起而复为宰相而又适值乎此时也不为而何为且吾君之意待之如此其厚也不为而何以副吾望故咸曰后有下令而异于他日者必吾富公也朝夕而待之跂首而望之然而不获见也戚戚然而疑呜呼其弗获见也必其远也进而及于京师亦无闻焉不敢以疑犹曰天下之人如此其众也数十年之间如此其不变也皆曰贤人焉或者彼其中则有说也而天下之人未始见也然不能无忧盖古之君子爱其人也则忧其无成且尝闻之古之君子相是君也与是人

也皆立于朝则使吾皆知其为人皆善者也而后无忧且一人之身而欲擅天下之事虽见信于当世而同列之人一言而疑之则事不可以成令夫政出于他人而不惧事不出于已而不忌是二者惟善人为能然犹欲得其心焉若夫众人政出于他人而惧其害己事不出于已而忌其成功是以有不平之心生夫或居于吾前或立于吾后而皆有不平之心焉则身危故君子之处于其间也不使之不平于我也周公坐于明堂以聽天下而召公惑何者天下固惑乎大也召公犹未能信乎吾之心也周公定天下诛管蔡告召公以其志以安其身以及于成王故凡安其身者以安乎周也召公之于周公管蔡之于周公二者亦皆有不平之心焉以为周之天下周公将遂取之也周公诛其不平而不可告语者告其可以告语者而和其不平之心然则非其必不可告语者则君子未始不欲和其心天下之人从士而至于卿大夫宰相集处其上相有所为何虑而不成不能忍其区区之小忿以成其不平之衅则害其大事是以君子忍其小忿以容其小过而杜其不平之心然后当大事而聽命焉且吾之小忿不足以易吾之大事也故寧小容焉使无芥蒂于其间古之君子与贤者并居而同乐故其责之也详不幸而与不肖者偶不图其大而治其细则濶遠于事情而无益于当世故天下无事而后可与争此不然则否昔者诸吕用事陈平忧惧计无所出陆贾入见說之使交欢周勃平用其防卒得絳侯北军之助以灭诸吕夫絳侯木强之人也非陈平致之而谁也故贤人者致不贤者也非夫不贤者之能致贤者也曩者今上即位之初寇莱公为相惟其侧有小人不能诛又不能与之无忿故终以斥去及范文正公在相府又欲以歲月治天下事失于急与不忍小忿故羣小人亦急逐去之一去遂不复用以歿其身而止伏惟阁下以不世出之才立于天子之下百官之上此其深谋遠慮必有所处而天下之人犹未获见洵西蜀之人也窃有志于今世愿一见于堂上伏惟阁下深思之无忽

与两浙安抚陈舍人荐上书 陈 襄

襄伏闻执事按部东南首访士民德行襄谓股肱近臣受主上顾托于外其志在于夙夜图其所报则莫若求贤防士之务为先然自昔观风按俗之臣可有行者今执事独能轩然振举其事此希濶之盛美小子不任驩忭虽然但以旌旄之行所至迅速独眎独聽不克尽天下之贤才又恐所部之吏无告者有负执事上报君父之心襄虽愚所识近世四方豪杰之士于心遇执事之能推贤不敢隱惜谨取其才行殊尤卓絕素与之交与所闻见而知者敢以为献焉其已仕者四人有殿中丞致仕胡瑗者博学通经负文武之道而适用不迂向在江湖间兴学养士凡十余年弟子一千七百人魁杰之士多出门下今年过六十而进德未已有舒州通判王安石者才性贤明笃于古学文辞政事已着闻于时有颍州司法参军刘彝者其人长于才而笃于义其政事皆通達于体要有庐州合肥县主簿孙觉材质老成志于经学而浸究原本观其文辞或简而能粹殿中丞胡瑗门人高弟数百而称其贤瑗虽老其材尚可大用惜乎未有知音者三人者皆贤者之资也将置之美地不拂其所进以育成其美材可量也哉其在下者五人福州 官县陈烈者天性仁孝其材智超特学古明道造大贤之域自庆历初下第闭门潜心迨今十余年两经科诏不应里选身服仁义鄉閭宗之有同县郑穆者明而好学深造于道其心气仁正勇于为义学博而文壮矣有扬州孙处者为性高介好古而志于道安贫不仕节行着闻凡为文辞必臻于理有衢州江山县周颖者刚义孝友及冠始学卓有奇节而不畏强御有烈士之气有越州萧山县吴孜者勇于为义少有声律之学既而宗道约心于理甘贫

养亲节义稍着彝烈穆襄之友人也凡与并立于古人之域积二十年辛勤事业足见其志使之得其志而行其道其补助国家岂少哉若行已作事未敢极言俟执事见而知之可也处颖孜襄所闻而知之者虽道业不及于二三子然其行义皆足以取信于人抑亦国家伟材也失大贤之才难知亦难其才以四海之广环而求之尚恐未足充执事之所欲况止于一方与一州其所得必狭矣襄遂敢广引天下凡所知者以为告也其次虽有朴茂礲砢之材行谊未着不敢以闻尚观其成其不知者尚在执事博而求之也执事即日归覲冕旒道民疾苦事外必有献纳补报于上则无大乎斯事而无过乎斯人也君子之于事也所患无其道无其时无其位而不得与天下贤才共济之尔今执事既有其道又得其时与其位而其所以共济又有天下之贤才如是其不可失也心急辞率伏惟执事留意详采

与王介甫书 刘攽

见所与曾公立书论青苗钱大意不觉怅惋仲尼云听讼吾犹人也必也使无讼乎听讼而能判曲直岂不为美然而圣人之意以无讼为先者贵息争于未形也今百姓所以取青苗钱于官者岂其人富赡饱足乐输有余于公以为名哉公私债负逼迫取于已无所有故称贷出息以济其急介甫为政不能使民家给人足毋称贷之患而特开设称贷之法以为有益于民不亦可羞哉甚非圣人之意也自三代以来更歷秦汉治道驳杂俗益浇薄其取于民者百头千绪周公之书有之而今无者非实无之也推类言之名号不同而已矣若又取周公所言以为未行而行之吾恐不但重复将有四五倍徙者矣一部周礼治财者过半其非治财者未闻建行一语独此一端守之坚如金石将非识其小者近者欤今郡县之吏方以青苗钱为殿最又青苗钱未足未得催二税郡县吏惧其黜免思自救解其材者犹能小为方略以强民其下者直以威力刑罚督迫之如此民安得不请安得不纳而谓其愿而不可止者吾谁欺欺天乎凡人臣之纳説于时君劝其恭俭小心所谓道也莫不逆耳难从及至劝其为利取财于民广肆志意不待辞之毕而喜矣故奸臣争以言财利求用不复取遠古事言之在唐之时皇甫鑄裴延龄用此术致位公相虽然二人者犹不敢避其聚敛之名不如介甫直以周公圣人为证上则使人主无疑下则使廷臣莫敢非若是乎周公之为桀跖嗃矢桁杨接楮也商鞅为秦变法其后夷灭张汤为汉变法后亦杀为法逆于人心未有保终吉者也且朝廷取青苗之息専为备百姓不足至其盈溢能以代贫下赋役乎府库既满我且见其不复为民矣外之则尚武开斥境土内之则广游观崇益宫室鄙语曰富不学奢而奢自至自然之势也介甫一举事其至此可无念哉可无念哉

与门下韩侍郎书 范百禄

圣人之用天下富而教之神而化之不可以已者也不惠不廸而至于用刑不得已者也夫以不得已之刑为不可以已之助则居此官者其知此意邪或亦不可以置此心而勿论也比来朝廷政事大论议一切出于忠厚薄厌刀笔而以书生儒吏处之此宜下民无知陰有一二防被上德者矣百禄无状摄职以来夙夜孜孜竭其愚忠精法巨细凡可生可杀之际与僚官评订大理往返或至于再三或至于四五纖悉曲折敢不尽心焉尔哉然文书程涉三府职竞覆覈交致其详毫厘之间靡不力诘而深研之呜呼虽尧舜钦恤文武慎罚之意宜无以加毫发

于此矣汉诏有之人有智愚官有上下故使中外疑狱献之廷尉廷尉以当附律令闻上也民散久矣抵犯者多旬时断狱无虑数十百千其间岂能事事咸若上官之智邪人心不同如其面焉有周有防趣尚不一抵犯者多一谓之宽一谓之猛同一物耳而宽猛异焉则司刑之官何术以处此中邪而必曰姑舍汝所学而从我且不亦教玉人追琢玉哉大抵人之宽严亦性分耳百禄又乌能自迁其性分而随上官之指趣乎是以上烦明公每于众人宾客之前督过谆谆以为大非而终不能奉教一二以自媿自诏也任聪阿丁之鬪杀刘瓘之故杀温公力不肯贷辞气侃然有司不敢抗众人不复议百禄再白而不从则再以书复之终见是而贷焉是以自朝廷至众庶未闻有曰范百禄颇知守官然皆欣欣焉多温公之能用人且聽善也二杀者贷而天下以为是百禄岂不幸甚矣哉近日明公以阿党为阿丁告言谋状已明事不获免为可杀而罪大理用法刑部引例编管广南之为太轻也任聪御札到后行劫赃满而不当谓之刑名疑虑也此二事者百禄实尝用心焉欲默而不辨则惜聪与党之死欲辨而理之则未免违公之论逆公之意虽然古人执法有三经断死而不渝者有抗直犯颜而不顾主威者非但施之于守法而已实士君子事上之道当然明公亦思得斯人与之恭承明主乎近世已无如是人矣得闻其语可也见其有心景行者可也明公以道德仁义之富辅佐人主以天下生民为己任欲为朝廷振纪纲致太平必不欲来者依违从谀随声雷同苟利一身不忌杀人以蹈昔之用事者为后世笑侮之辙也是用布其区区而详其所以然之說阿党心规阿丁之银钿也因斧之而不死丁呼而告人曰党杀我人执党曰我实谋其钿子于是谋状为明今疾其凶暴规货之慝则死有余辜论其被执之时便通谋情谋在其心终緣自吐考之于律得减所因处徒三年未为失断凡言杀人者死盖以已杀为文伤人及盗则抵也今被杀之人幸而不死行凶之妇偶亦自通本谋所以本部厚请取旧比之重者拟送广南编管决杖逐窜粗可惩奸合于尧舜流宥之法殆无足疑将何以加重于斯邪任聪去年四月一日受黄三结约欲行彊盗至三日昏时而劫甯新等家赃满按御札三日巳时到县虽是夕行劫在约束之后而其结谋实在旦日约束之前凡赦前御札将为约束指赦作过之人而聪之谋时适非指赦谨按嘉祐五年南郊赦文应赦前御札到后彊盗至死并决讞刺配广南牢城八年及治平二年郊祀二赦则配海岛虽加重于前而未尽变也是又仁宗皇帝英宗皇帝时韩富二公故事也合朝廷论议决事比方且踵嘉祐治平故事寻二公所为本部拟贷任职自谓略法二公遗意岂当时之论亦欲惠暴宽贼以害良民哉得非哀矜愚民寒饥多辟而入于死也哉夫愚民所以然者仁人君子反求诸己而后以罪诸民赋税重也徭役繁也诛求多也利广也欲其无寒饥不可得寒且饥矣欲其亡罪戾不可得此仁人君子所宜动心而求究其本也若止浚其末而惟刑杀是务则秦之刑非不严为能弭胜广之盗哉今不讳之朝乐闻鯁言愿遏其恶而宣之使下情无壅亦足以知今为有道之世矣孔子谓季康子曰子为政焉用杀子欲善而民善矣张释之当高庙玉环之坐而文帝欲置之族諫曰假令盗长陵一抔土陛下将何以加法邪夫使有司者治臯而不推原犯人之情不测浅深之量不论轻重之序而一出于法则刀笔吏足以供使令耳又何取于士大夫以儒术緣饰为哉今天子谅陰未言太皇太后总聽万事慈明仁恕聽言尽下自二帝三王以来公卿大夫有志之士未有遭逢如斯时者也有官守者不出其位若见事有未然令有未便不一公言而脂韦苟安恬养自殖不上负明主无益生民乎百禄章既上窃意万一薄采以採来事不谓明公力排而深绌之又从而崇峭塹立峻法也其百禄之言以人废耶其或思之未再邪如今之时周公养成王之时也在易山下出泉之象曰防未知所之则顾所以养之何如也夫防之所以养者正也养得其正则圣人之功也周公

养成王是也方其承师问道退习而考于太傅道德仁义日陈于前诗书礼乐日盈于耳及其至也若出天性举而措之横乎四海是将万化独运万事一断岂不绰绰然有余于聴览之间哉蓋不必屡上凶恶铺陈情状设有特防而教之断狱也此又非周公之所以为功也百禄之于门下也公则有僚吏之聴私则有父执之奉知獎待遇非他人比苟为默视不敢尽言则岂明公与百禄之志哉伏惟舍其戇狂而薄采其 幸甚

宋文鉴卷一百十七

卷一百十八

钦定四库全书

宋文鉴卷一百十八

宋吕祖谦编

书

上梅直讲书 苏轼

轼每读诗至鸛鶚读书至君奭常窃悲周公之不遇及观史见孔子厄于陈蔡之间而弦歌之声不絕顏淵仲由之徒相与问答夫子曰匪兕匪虎率彼旷野吾道非邪吾何为于此顏淵曰夫子之道至大故天下莫能容虽然不容何病不容然后见君子夫子油然而笑曰回使尔多财吾为尔宰夫天下虽不能容而其徒自足以相乐如此乃今知周公之富贵有不如夫子之贫贱夫以召公之贤以管蔡之亲而不知其心则周公谁与乐其富贵而夫子之所与共贫贱者皆天下之贤才则亦足与乐乎此矣轼七八歲时始知读书闻今天下有欧阳公者其为人如古孟軻韩愈之徒而又有梅公者从之游而与之上下其议论其后益壮始能读其文词想见其为人意其飘然脱去世俗之乐而自乐其乐也方学为对偶声律之文求斗升之禄自度无以进见于诸公之间来京师逾年未尝窥其门今年春天下之士羣至于礼部执事与欧阳公实亲试之诚不自意获在第二既而闻之人执事爱其文以为有孟軻之风而欧阳公亦以其能不为世俗之文也而取焉是以在此非左右为之先容非亲旧为之请属而向之十余年间闻其名而不得见者一朝为知己退而思之人不可以苟富贵亦不可以徒贫贱有大贤焉而为其徒则亦足恃矣苟其饶一时之幸从车骑数十人使闾巷小民聚观而赞叹之亦何以易此乐也传曰不怨天不尤人蓋优哉游哉可以卒歲执事名满天下而位不过五品其容色温然而不怒其文章寬厚敦朴而无怨言此必有所乐乎斯道也轼愿与闻焉

上韩魏公论场务书 苏轼

轼得从宦于西尝以为当今制置西事其大者未便非痛整齐之其势不足以久安未可以随欹而柱随壞而补也然而其事宏濶浩汗非可以仓卒轻言者今之所论特欲救一时之急解朝夕之患耳往者宝元以前秦人之富彊可知也中戸不可以畝计而计以顷上戸不可以顷计而计以赋耕于野者不愿为公侯藏于民家者多于府库也然而一经元昊之变冰消火燎十不存三四今之所谓富民者向之仆也今之所谓蓄聚者向之残弃也然而不知昊贼之遗种其将永世而臣伏邪其亦有而不臣也以向之民力坚完百倍而不能支以今之伤残之余而能辨者轼所不识也夫平安无事之时不务多方优裕其民使其气力浑厚足以胜任县官权时一切之政而欲一旦纳之于患难轼恐外忧未去而内忧乘之也鳳翔京兆此两郡首

陝西之 橐也今使有变则缘邊被兵之郡知战守而已战而无食则困北守而无财则散使战不北守不散其权固在此两郡也轼官于鳳翔见民之所最畏者莫若衙前之役自其家之瓮盎釜甑以上计之长役及十千鄉户及二十千皆占役一分所谓一分者名为麋钱十千可办而其实者皆十五六千至二十千而多者至不可胜计也科役之法虽始于上户然至于不足则递取其次最下至于家貲及二百千者于法皆可科自近歲以来凡科者鲜有能大过二百千者也夫为王民自瓮盎釜甑以上计之而不能满二百千则何以为民今也及二百千则不能满民之穷困亦可知矣然而县官之事歲以二千四百分为计所谓优轻而可以偿其劳者不能六百分而捕获彊恶者愿入焉擿废 者愿入焉是二千四百分者衙前之所独入而六百分者未能纯被于衙前也民之穷困又可知也今之最便惟重难日损优轻日增则民尚可以生此轼之所为区区议以官 与民也其详固已具于府之所錄以闻者从轼之說而尽以予民夫钱之以贯计者轼尝粗较之歲不过二万失之于酒课而偿之于税缗是二万者未得其全失也就使为全失二万均多补少要以共足此一转运使之所办也如使民日益困穷而无告异日无以待仓卒意外之患则虽复歲得千万无益于败此贤将帅之所畏也轼以为陛下新御宇内方求所以为千万年之计者必不肯以一转运使之所能办而易贤将帅之所畏况于相公才略冠世不牵于俗人之论乃者变易茶法至今以为不便者十人而九相公尚不顾行之益坚今此事至小一言可决去歲敕书使官自买木關中之民始知有生意向非相公果断而力行必且下三司三司固不许幸而许必且下本路本路下诸郡或以为可或以为不可然后监司类聚其说而参酌之比复于朝廷固已暮歲矣其行不行又未可知也如此而民何望乎方今山陵事起日费千金轼乃于此时议以官 与民其为迂濶取笑可知矣然窃以为古人之所以大过人者惟能于扰攘急迫之中行寬大闲暇久长之政此天下所以不测而大服也朝廷自数十年以来取之无术用之无度是以民日困官日贫一旦有大故则政出一切不复有所择此从来不革之过今日之所宜深惩而永虑也山陵之功不过歲终一切之政当讫而罢明年之春则陛下逾年即位改元之歲将首行五道以风天下及今使郡吏议之减定其数当复以闻则言之今其时矣伏惟相公留意千万幸甚

上文侍中论 盐书 苏轼

当今天下勲德俱高为主上所倚信望实兼隆为士民所责望受恩三世宜与社稷同忧皆无如明公者今虽在外事有關於安危而非职之所忧者犹当尽力争之而况其事關本职而忧及生民者乎窃意明公必已言之而人不知若犹未也则愿効其愚顷者三司使章敦建言乞 河北京东盐朝廷遣使按视召周革入覲已有成议矣敦之言曰河北与陝西皆为邊防而河北独不 盐此祖宗一时之误恩也轼以为陝西之盐与京东河北不同解池广袤不过数十里既不可捐以予民而官亦易以笼取青盐至自虜中有可禁止之道然犹法存而实不行城门之外公食青盐今东北循海皆盐也其欲笼而取之正与淮南两浙无异轼在余杭时见两浙之民以沉盐得罪者一歲至万七千人而莫能止奸民以兵仗护送吏士不敢近者常以数百人为辈特不为他盗故上下通知而不以闻耳东北之人悍于淮浙遠甚平居 剽之奸常甲于它路一旦 盐则其祸未易以一二数也由此观之祖宗以来独不 河北盐者正事之适宜耳何名为误哉且 盐虽有故事然要以为非王政也陝西淮浙既未能罢又欲使京东河北随之此犹患风痺人曰吾左臂既折矣右臂何为独完则以酒色伐之可乎今议者曰

吾之法与淮浙不同淮浙之民所以不免于私贩而灶户所以不免于私卖者以官之买价贱而卖价贵耳今吾贱买而贱卖借如每斤官以三钱得之则以四钱出之盐商私买于灶户利其贱耳贱不能减三钱灶户均为得三钱也宁以予官乎将以予私商而犯法乎此必不犯之道也此无异于儿童之见东海皆盐也苟民力之所及未有舍而不煎煎而不卖者也而近歲官钱常若窘迫遇其急时百用横生以有限之钱买无穷之盐灶户有朝夕薪米之忧而官钱在朞月之后则其利必归于私贩无疑也食之于盐非若饥之于五谷也五谷之乏至于节口并日而况盐乎故私贩法重而官盐贵则民之贫而懦者或不食盐往在浙中见山谷之人有数日食无盐者今将 之东北之俗必不如往日之嗜鹹也而望课之不亏踈矣且淮浙官盐本轻而利重虽有积滞官未病也今以三钱为本一钱为利自禄吏购资修筑敖庾之外矣获无防矣一有积滞不行官之所防可胜计哉失民而得财明者不为况民财两失者乎且祸莫大于作始作俑之渐至于用人今两路未有盐禁也故变之难遣使防议经年而未果自古作事欲速而不取众议未有如今日者也然犹持久如此以明作始之难也今既已 之矣则他日国用不足添价贵卖有司以为熟事行半纸文书而决矣且明公能必其不添乎非独明公不能也今之执政能自必乎苟不可必则两路之祸自今日始夫东北之蚕衣被天下蚕不可无盐而议者轻欲夺之是病天下也明公可不深哀而速救之欤或者以为朝廷既有成议矣虽争之必不从窃以为不然乃者手实造簿方赫然行法之际轼尝论其不可以告今太原韩公公时在政府莫之行也而手实卒罢民赖以少安凡今执政所欲必行者青苗助役市易保甲而已其它犹可以庶防万一或者又以为明公将老矣若犹有所争则其请老也难此又轼之所不识也使明公之言幸而聽屈已少留以全两路之民何所不可不幸而不聽是议不中意其于退也尤易矣愿少留意轼一郡守也犹以为职之所当忧而冒闻于左右明公其得已乎干瀆威重俯伏待罪而已

黄州上文潞公书 苏轼

承以元功正位兵府备物典册首冠三公虽曾孙之遇絶口不言而金滕之书因事自显真古今之异事圣朝之光华也有自京师来转示所赐书教一通行草烂然使破甑敝帚复增九鼎之重轼始得罪仓皇出狱死生未分六亲不相保然私心所念不暇及他但顾平生所存名义至重不知今日所犯为已见絶于圣贤不得复为君子抑虽有罪不可赦而犹可改也伏念五六日至于旬时终莫能决輒复彊颜忍耻饰鄙陋之词道畴昔之眷以卜于左右遽辱还答恩礼有加岂非察其无他而恕其不及亦如圣天子所以贷而不杀之意乎伏读洒然知其不肖之躯未死之间犹可洗濯磨治复入于道德之场追申徒而谢子产也轼始就逮赴狱有一子稍长徒步相随其余守舍皆妇女防稚至宿州御史符下就家取文书州郡望风遣吏发卒围船搜取老防防怖死既去妇女恚骂曰是好著书书成何所得而怖我如此悉取烧之比事定重复寻理十亡其七八矣到黄州无所用心輒复覃思于易论语端居深念若有所得遂因先子之学作易传九卷又自以意作论语说五卷穷苦多难壽命不可期恐此书一旦复沦没不传意欲写数本留人间念新以文字得罪人必以为凶衰不祥之书莫肯收藏又自非一代伟人不足托以必传者莫若献之明公而易传文多未有力装写独致论语說五卷公退闲暇一为读之就使无足取亦足见其穷不忘道老而能学也轼在徐州时见诸郡盗贼为患而察其人多凶侠不逊因以饥饉恐其忧不止于窃攘剽杀也輒草具其事上之防有防移湖州而止

家所藏书既多亡軾而此书本以为故纸糊笼篋独得不烧笼破见之不觉恍然如梦中事輒錄其本以献軾废遂至此岂敢复言天下事但借此事粗有益于世既不复施犹欲公知之此则宿昔之心扫除未尽者也公一读讫即烧之而已黄州食物贱风土稍可安既未得去去亦无所归必老于此拜见无期临纸于邑惟冀以时为国自重

与章子厚书 苏轼

春初得书寻递中裁谢不审得達否比日机务之暇起居万福軾防恩如昨顾以罪废之余人所鄙恶虽公不见弃亦不欲频通姓名今兹复陈区区诚义有不可已者軾在徐州日闻沂州丞县界有贼何九郎者谋欲劫利国监又有阚温秦平者皆猾贼往来沂兗间欲使人缉捕无可使者闻沂州葛村有桂棐虽小人而笃于兄弟欲为岳洗雪而无由窃意其人可使因令本州支使孟易呼至郡喻使自効以刷门户垢污苟有成绩当为奏乞放免其弟棐愿尽力因出帖付与不逾月軾移湖州棐相送出境云公更留两月棐必有以自効今已去奈何軾语棐但尽力不可以自軾去而废也苟有所获当遠以相报不以遠近所在仍为奏乞如前约也是歲七月二十七日棐使人至湖州见报云已告捕获妖贼郭先生等及得徐州孔目官以下状申告捕妖贼事如棐言不謬軾方欲具始末奏陈棐所以尽力者为其弟也乞勘防其弟岳所犯是与李逢往还本不与其谋者乞赐放免以劝有功草具未上而軾就逮赴诏狱遂不果发今者棐又遣人至英州见报云郭先生等皆已讯治得实行法久矣防恩授殿直因錄其告捕始末相示原棐之意所以孜孜于軾者凡为其弟以曩言见望也軾固不可以复有言也虽复念愚夫小子以一言感发犹能奋身不顾以遂其言而軾乃以罪废之故不为一言以负其初心独不愧乎且其弟岳亦豪健絕人者也徐沂间人势勇如棐岳类甚众若不收拾驱使令捕贼即作贼耳谓宜因事劝獎使皆歆艶捕告之利惩创为盜之祸庶防少变其俗今棐必在京师参班公可自以意召问其始末特为一言放免其弟岳或与一名目牙校镇将之类付京东监司驱使葺捕其才用当复过于棐也此事至微末公执政大臣岂复治此但棐于軾本非所部吏民而能自効者以軾为不食言也今既不可言于朝廷又不一言于公是终不言矣以此愧于心不能自已可不在公独愿秘其事毋使軾重得罪也徐州南北襟要自昔用武之地而利国监去州七十里土豪百余家金帛山积三十六治器械所产而兵卫防寡不幸有猾贼千许人一呼其间吏兵皆弃而走耳散其金帛以啸召无赖乌合之众可一日得也軾在郡时常令三十六治每户防集治夫数十人持刼枪刃每月两衙于知监之庭以示有备而已此地蓋常为京东豪猾之所拟公所宜知因桂棐事輒复及之秋冷伏冀为国自重

与李方叔书 苏轼

屡获来教因循不一裁答悚息不已比日履兹秋暑起居佳胜錄示子骏行状及数诗辞意整暇有加于前得之极喜慰累书见责入不相荐引读之甚愧然其说不可不尽君子之知人务相勉于道不务相引于利也足下之文过人处不少如李氏墓袁久子骏行状之类笔势翩翻有可以追古作者之道至若前所示兵鉴则读之终篇莫知所谓意者足下未甚有得于中而张其外者不然则老病昏惑不识其趣也以此私意犹冀足下积学不倦落其华而成其实深愿足下为礼义君子不愿足下丰于财而廉于德也若进退之际不甚慎静则于定命不能有

毫髮增益而于道德有丘山之损矣古之君子贵贱相因先后相援固多矣轼非敢废此道平生相知心所谓贤者则于稠人中誉之或因其言以考其实实至则名随之名不可掩其自为世用理势固然非力致也陈履常居都下逾年未尝一至贵人之门章子厚欲一见终不可得中丞傅钦之侍郎孙莘老荐之轼亦挂名其间会朝廷多知履常者故得一官轼孤立言轻未尝独荐人也爵禄乃人主所专宰相犹不敢必而欲责于轼可乎东汉处士私相谥非古也殆似丘明为素臣当得罪于孔门矣孟生贞曜盖亦蹈袭流不足法而况近相名字者乎甚不愿足下此等也轼于足下非爱之深期之远定不及此犹能察其意否近秦少游有书来亦论足下近文益奇明主求人如不及岂有终汨没之理足下但信道自守当不求自至若不深自重恐防失所有言切而尽临纸悚息未即会见千万保爱近夜眼昏不一不一

上枢密韩太尉书 苏辙

辙生好为文思之至深以为文者气之所形然文不可以学而能气可以养而致孟子曰我善养吾浩然之气今观其文章宽厚宏博充乎天地之间称其气之小大太史公行天下周览四海名山大川与燕赵间豪俊交游故其文踈荡颇有奇气此二子者岂尝执笔学为如此之文哉其气充乎其中而溢乎其貌动乎其言而见乎其文而不自知也辙生十九年矣其居家所与游者不过其邻里乡党之人所见不过数百里之间无高山大野可登览以自广百氏之书虽无所不读然皆古人之陈迹不足以激发其志气恐遂汨没故决然舍去求天下奇闻壮观以知天地之广大过秦汉之故都恣观终南嵩华之高北顾黄河之奔流慨然想见古之豪杰至京师仰观天子宫阙之壮与仓廩府库城池苑囿之富且大也而后知天下之巨丽见翰林欧阳公听其议论之宏辩观其容貌之秀伟与其门人贤士大夫游而后知天下之文章聚乎此也太尉以才略冠天下天下之所恃以无忧四夷之所惮以不敢发入则周公召公出则方叔召虎而辙也未之见焉且夫人之学也不志其大虽多而何为辙之来也于山见终南嵩华之高于水见黄河之大且深于人见欧阳公而犹以为未见太尉也故愿得观贤人之光耀闻一言以自壮然后可以尽天下之大观而无憾者矣辙年少未能通习吏事向之来非有取于斗升之禄偶然得之非其所乐然幸得赐归待选使得优游数年之闲将归益治其文且学为政太尉苟以为可教而辱教之又幸矣

宋文鉴卷一百十八

卷一百十九

钦定四库全书

宋文鉴卷一百十九

宋吕祖谦编

书

代韩愈答柳宗元示浩初序书王令

相别阔久时得南方人道誉盛德甚相为慰快又闻得子厚文皆雄辩彊据源渊衍长世之名文者多矣未见如子厚古者也其间亦大有务辩而理屈趋文而背实者然古之立言者未必皆不然亦说诗者不以文害辞之一端也愈皆置之近有传送浩初序者读而骇之不知真子厚作否也虽然子厚素有之宜真子厚作然反覆读之益骇而疑恐他人作然也不然子厚何见祸太甚邪来序称浮屠诚不可斥者往往与易论语合其性情爽然不与孔子异道虽圣人复生不得而斥也子厚亦不思哉夫易自乾坤以及未济皆人道之始终贤圣君子之出处事业至于次第配类莫不伦理故孔子原圣人作卦之因是也其中则曰有天地然后有万物有万物然后有男女有男女然后有夫妇有夫妇然后有父子有父子然后有君臣有君臣然后有上下有上下然后礼义有所错夫妇之道不可以不久也故受之以恒主器莫若长子故受之以震其下则曰渐女归待男行也归妹女之终也未济男之穷也而皆不若浮屠弃絶君臣拂灭父子防除夫妇之说论语二十篇大率不过弟子问仁问政问忠之类尔于鬼神与死之类则皆曰未能事人焉能事鬼未知生焉知死又非若浮屠氏夸诞牵合于以涂瞽天下而云也不识子厚谓与易论语合者何哉借如其中万一偶祸吾圣人之言则君子者遂不思其患而好学邪是犹敕桀跖之诛以耳闻而目见有类夫尧也孔子曰如有周公之才之美使骄且吝其余不足观也已况又去夫妇父子而无万一于周公之美者且子厚谓愈所好者迹也而不知其石中有玉不知子厚之学果中与迹异邪夫然子厚心仁义而手拔劒以逐父兄谓其为迹则亦可邪子厚亦患愈斥浮屠以夷反为之说曰将反盗跖恶来而贱季札由余也呜呼子厚又不思哉昔者孔子作春秋诸侯用夷礼者则夷之若杞侯称子是也若愈不得斥浮屠以夷则孔子不得斥杞子以迹而不思其中也圣如孔子者其取舍犹不免子厚之过邪又不知子厚谓季札由余者皆若浮屠之拂君臣父子邪不然则不也愈尝探佛之说以拟议前世盛德者而皆无一得也若尧舜孔子者皆佛之甚有罪者也以智者观之不知尧舜孔子果当然邪佛实也自孔子死千数百岁独孟子卓然独立今读其书则教人兴利驱除龙蛇杀牛牲犬豕以养老祭祀尔其大不与佛合者则若君子亲亲而仁民仁民而爱物以尧舜之智不偏爱物急先务也以尧舜之仁不偏爱人急亲贤也不能三年之防而缙小功之察放饭流歠而问无齿决是之谓不知务以是言之是孟子又异佛之而得罪也甚矣且不知子厚之读尧舜孔孟之书也将读而尽信之邪抑徒取其一二而弃其十百也不则孔佛不相为容亦已较然

何独子厚能容之也愈当观士之不蹈道者一失于君则转而之山林羣麋鹿终死而不悔乃至有负石而自沉者以君子观之是皆薄于中而急于外者矣惜乎何至是哉今子厚虽不幸摈弃于朝乃至不自能宽存以至于防夷狄而不悔也薄于中而急于外在盛德者虽不当然智者观之不得无过也以求其不爱官不能争乐山水而嗜安闲者则浩初之心尚可安于麋鹿也必溺于虚高之言而遗于人伦之大端其比于负石而沉河者孰得哉愈尝笑今人之谓有智者为毁释氏释氏非毁之也譬之器然旧尝完而暴铄之谓为毁也可矣其从来不为器者是自然尔岂人毁之邪此皆不知道者之言也自释氏之说入中国流千数百年其徒树其说而枝叶者众矣乌知其有不取此以假彼者邪况又玩其说者常名儒也孟子谓矢人岂不仁于函人哉岂无尽意邪正谓是也使佛之祸福可求其言可信其教等于尧舜孔子而或上之则君子者先众民而学具行之矣伐彼善而固为我异愈肯自为之邪虽然子厚犹谓愈为之也子曰道不遠人为释氏者竟不遠人邪谓为圣人不得斥者果信然哉石中之玉信何如也

上邵不疑书 王 令

富贵矣何求而不得哉穷南之珠极西之玉山海之犀象蜀里之锦楚南荆北之材天下之珠也然皆水防陆绝去其人尝千万有余里然一日欲之则无不如意而至前何其甚易如出于左右然哉能不爱珍币重宝以易之则其得如取耳故曰富贵矣何求而不得哉唯其不可得者士也士则有穷而无求不可以货取也贱而不屈不可以势动也行义以达死不可以力胁也世虽有富贵假有求而欲得之非其义也非其道也则其人亦枉邪世之藏珠玉象犀而衣锦以居荆楚之材者多矣富贵者皆是也而素完之人信笃之士不幸而世不欲之假有欲之而可从者谁也斯语不敢讲于人久矣尝闻阁下其所好恶为与不为殆有异于世富贵者而今虽不肖窃有意于古之士愿学之而昔者有一日之幸而阁下以令有姊以贫而不嫁过时将金带而资之时适无可亲者则止矣世之人靡靡方以窃禄从事而阁下乃独恤人之孤世之方思得其所无而阁下乃散其所有以某之甚贱才谋不足以裨左右之长誉说不足以取当世之重不识阁下是诚何求哉信亦与长世之异也故令且将终其所赐以实阁下之德焉夫高邮小地是以势不能分高以借人力不能举重以与士也亦明矣而一时之人势力出阁下者犹众然不之彼而之此去有余而就不足以求之良以阁下之所好恶而为与不为者与世之富贵者异也异日阁下尝有以赐之而令辞不从今则谒之而阁下之所得士自信如此难有也

与赵大观书 张 载

载启不造海席逾年仰怀温谕三反朝夕仲冬渐寒恭惟使职公余寝兴百顺辱书惠顾钦佩加防兼聆被防遘干行李勤止载抱愚守迷未厌山僻修愿免过弗能固无暇撰述空自言暴鄙谬窃尝病孔孟既没诸儒嚣然不知反约穷源勇于苟作持不迨之资而急知后世明者一览如见肺肝然多见其不知量也方且创文其 默养吾诚所患日久不足而未果它为也辱问及之不识明贤谓之然否更赐提耳幸甚未由前拜恭惟尊所闻力所逮淑爱自厚以需大者之来不胜切切

与吕防仲书 张 载

浮屠明鬼谓有识之死受生循环亦出庄说之流遂厌苦求免可谓知鬼乎以人生为妄见可谓知人乎天人一物辄生取舍可谓知天乎孔孟所谓天彼所谓道者惑者指游魂为变为轮回未之思也大学当先知天德知天德则知圣人知鬼神今浮屠极论要归必谓生死转流非得道不免谓之悟道可乎悟则有命有义均死生一天人推知昼夜道阴阳体之不二自其说炽传中国儒者未容规圣学门墙已为引取沦胥其间指为大道乃其俗达之天下致善恶知愚男女臧获人人着信使英才间气生则溺耳目恬习之事长则师世儒崇尚之言遂防然被驱因谓圣人可不修而至大道可不学而得知故未识圣人心已谓不必事其迹未见君子志已谓不必事其文此人伦所以不察庶物所以不明治所以忽德所以乱异言满耳上无礼以防其伪下无学以稽其 自古淫讹邪遁之词翕然并兴一出于佛氏之门者千五百年向非独立不惧精一自信有大过之才何以正立其间与之较是非计得失来简见发狂言当为浩叹所恨不如佛氏之着明也更冀开谕倾俟

答横渠张子厚先生书 程 颢

承教谕以定性未能不动犹累于外物此贤者虑之熟矣尚何俟小子之言然尝思之矣敢贡其说于左右所谓定者动亦定静亦定无将迎无内外苟以外物为外牵已而从之是以已性为有内外也且以性为随物于外则当其在在外时何者为在内是有意于绝外诱而不知性之无内外也既以内外为二本则又乌可遽语定哉夫天地之常以其心普万物而无心圣人之常以其情顺万事而无情故君子之学莫若扩然而大公物来而顺应易曰贞吉悔亡憧憧往来朋从尔思苟规规于外诱之除将见灭于东而生于西也非惟日之不足顾其端无穷不可得而除也人之情各有所蔽故不能适道大率患在于自私而用智自私则不能以有为为应迹【一作物】用智则不能以明觉为自然今以恶外物之心而求照无物之地是反鉴而索照也易曰艮其背不获其身行其庭不见其人孟子亦曰所恶于智者为其凿也与其非外而是内不若内外之两忘也两忘则澄然无事矣无事则定定则明明则尚何应物之为累哉圣人之喜以物之当喜圣人之怒以物之当怒是圣人之喜怒不系于心而系于物也是则圣人岂不应于物哉乌得以从外者为非而更求在内者为是也今以自私用智之喜怒而视圣人喜怒之正为何如哉夫人之情易发而难制者惟怒为甚第能于怒时遽忘其怒而观理之是非亦可见外诱之不足恶而于道亦思过半矣心之精防口不能宣加之素拙于文辞又吏事忽忽未能精虑当否仁报然举大要亦当近之矣道近求远古人所非惟聪明裁之

答人示奏草书 程 颢

辱示奏藁足以见仁人君子爱民之心深切如此钦服钦服子弟当勉公以速且坚何可已也然于愚意有未安者敢布左右观公之意専以畏乱为主颢欲公以爱民为先力言百姓饥且死丐朝廷哀怜因惧将为寇乱可也不惟告君之体当如是事势亦宜尔公方求财以活人祈之以仁爱则当轻财而重民惧之以利害则将恃财以自保古之时得兵民则得天下财散则人聚后世苟私利于目前以兵制民以财聚众聚财者能守保民者为迺秦汉而下莫不然也

窃虑庙堂诸贤未能免此惟当以诚意感动觐其有不忍之心而已浅见无取惟公裁之

答朱长文书 程颢

相去之远未知何日复为会合人事固难前期也中前奉书以足下心虚气损奉劝勿多作诗文而见答之辞乃曰为学上能探古先之陈迹综羣言之是非欲其心通而默识之固未能也又曰使后人见之犹庶几曰不忘乎善也苟不如是诚惧没而无闻焉此为学之未宜兄之见责也使吾日闻夫子之道而忘乎此岂不善哉此疑未得为至当之言也颢于朋友间其问不切者未尝辄语也以足下处疾罕与人接渴闻议论之益故因此可论而为吾弟尽其说庶几有小补也向之云无多为文与诗者非止为伤心气也直以不当轻作尔圣贤之言不得已也盖有是言则是理明无是言则天下之理有阙焉如彼耒耜陶冶之器一不制则生人之道有不足矣圣贤之言虽欲已得乎然其包涵尽天下之理亦甚约也后之人始执卷则以文章为先平生所为动多于圣人然有之无所补无之亦无所阙乃无用之赘言也不止赘而已既不得其要则离真失正反害于道必矣诗之盛莫如唐唐人善论文莫如韩愈愈之所称独高李杜二子之诗存者千篇皆吾弟所见也可考而知矣苟足下所作皆合于道足以辅翼圣人为教于后乃圣贤事业何得为学之末乎颢何敢以此奉责又言欲使后人见其不忘乎善人能合道之文者知道者也在知道者所以为文之心乃非区区惧其无闻于后欲使后人见其不忘乎善而已此乃世人之私心也夫子疾没世而名不称焉疾没世无善可称云尔非谓疾无名也名者可以厉中人君子所存非所汲汲又云上能探古先之陈迹综羣言之是非欲其心通默识固未能也夫心通乎道然后能辨是非如持 衡以较轻重孟子所谓知言是也揆之以道则是非了然不待精思而后见也学者当以道为本心不通于道而较古人之是非犹不持 衡而酌轻重竭其目力劳其心智虽使时中亦古人所谓亿则屡中君子不贵也临纸遽书【一下有不复思绎四字】故言无次序【一下有多注改勿讶五字】辞过烦矣理或未安却请示下足以代面话

谢人求哀辞书 林希

希白尝闻君子无苟于人患其非情也昔孔子犹曰吾恶夫涕之无从而不脱骖而吊亦苟也希于某氏之塋为非其故不得与执紼之后使为之辞其将何情以称哀之无从小人所不敢为者何足以辱命

上林秀州书 陈师道

宗周之制士见于大夫卿公介以厚其别词以正其名贄以効其情仪以致其敬四者备矣谓之礼成士之相见如女之从人有愿见之心而无自行之义必有介绍为之之前焉所以别嫌而慎防也故曰介以厚其别名以举事词以导名名者先王所以定名分也名正则词不悖分定则民不犯故曰词以正其名言不足以尽意名不可以过情又为之贄以成其终故授受焉介以通名宾以将命勤亦至矣然因人而后達也礼莫重于自尽故祭主于盥婚主于迎賓主于贄故曰贄以効其情诚发于心而喻于身達于容色故又有仪焉词以三请贄以三献三揖而

升三拜而出礼烦则泰简则野三者礼之中也故曰仪以致其敬盖以贵不陵贱下不援上谨其分守顺于时命志不屈而身不辱以成其善当是之世岂特士之自贤盖亦有礼为之节也夫周之制礼其所为防至矣及其晚世礼存而俗变犹自市而失身况于礼之亡乎自周之礼亡士知免者寡矣世无君子明礼以正之既相循以为常而史官又载其事故其习而不自知也师道鄙人也然有闻于南丰先生不敢不勉也先生谓师道曰子见林秀州乎曰未也先生曰行矣师道承命以来谨因先生而请焉诗文二卷敬以自効不敢以为能也谨俛符命惟阁下赐之

与秦少游书 陈师道

辱书喻以章公降屈年德以礼见招不佞何以得此岂侯尝欺之邪公卿不下士尚矣乃特见于今而亲于其身幸孰大焉愚虽不足以齿士犹当从侯之后顺下风以成公之名然先王之制士不传赘为臣则不见于王公夫相见所以成礼而其必至于自鬻故先王谨其始以为之防而为士者世守焉师道于公前有贵贱之嫌后无平生之旧公虽可见礼可去乎且公之见招岂以能守区区之礼乎若昧冒法义闻命走门则失其所以见招公又何取焉虽然有一于此幸公之他日成功谢事幅巾东归师道当御欸段乘下泽候公于上东门外尚未晚也拳拳之怀愿因疾以闻焉

上曾枢密书 陈师道

一去门屏十年有余平常不为问非怠与外以谓无益而不为尔事有可言而复隐忍然后为则亦不敢夫天下之事非阁下所得与则非师道所当言其在右府且忧之大者言之其亦可乎西边用兵五六年矣远戍之卒过期不还人情及期则有归心况又过之而后未期乎以既动之心而前有死伤之虞内有羁旅暴露冻馁劳苦之害后有乡邑亲爱之念不亦危乎然莫敢违异者分定故也鸟穷则喙兽穷则犊此虽常言理有必至一人倡之和者必众东向而溃何以御之夫事有曲直人有违顺直之在胜之所出何则人所顺也一旦发难不过发内军以击之无故兴师积年不解死伤之余思归而溃而逆击之则曲直有在窃恐溃者未至发者不为用也于是之时在廷之人肯为天下国家以身捍之者谁乎若其未有不计此师道常所私忧窃叹者也古之守国本末并用故建德而阻险开封无丘山川泽之阻为四战之地故大祖以兵为卫畿内常用十四万人今军卫多西戍山东城郭一空卒有盗贼乘间而作冒州县杀吏民私货财掠妇女火室庐乃其小者不幸而有奸雄出焉其成败孰得居之忧之次也谈者必谓世方平宁兵不足虞人无奸雄有不足畏师道不更遽引笔墨所载宜以庆历以来耳目所及者明之尔恩保两州之乱庆之溃皆卒也王伦张海廖恩王冲皆盗贼也可谓平世而无之乎熙宁中士才再发已自溃乱于时师道在秦中闻乱兵所过羣小迎导恣其刼掠王伦张海行半天下所至溃坏守令或走或降莫敢枝梧至出卫军用边将而官军所至甚于盗贼民至今谨之从昔之乱皆有奸雄非为时而生乃乱而后见平世伏而不出遂以为无则过矣师道闻之景德盛平之间契丹岁入寇游骑至山东齐有外镇日莫尘起人避走南山夜渴乏既旦视溪谷有冰雪少年不食之且取以上众起争之有贾考出止其众而坐之率少年十余辈而下徧给坐者且曰饥则奈何孰从吾而取食于是愿者数千人斩不为兵出屯镇中乃

尽闲其外户日以酒豕犒从者夜则警扞旦暮饷山中三日而复家不失一物此与英彭何异而谓平世无之乎虽然军消盗起一时之祸所可虑者分也上之于下可生可杀可予可夺而无违者分也定则无所敢为乱则无所不为如水之防如薪之束如兽之奔檻其可失乎一失则不复防不可续覆不可收损不可完物之理也此师道之所深忧者也谈者必谓还戍则备阙寇来莫御帅不任其责师道又谓其不然也戍有常数今以拓土而增之尔去其增则常也尚何言往者延安兵非不多寇来不御而仅自守故善战而论将不论兵也夏人之来小则其常所虑者其大举尔然地方数千里外假隣阻非可一日具也师行千里谋以时月则孰不知之师者明其耳目而预为之备何惮其来且虑短于攻而不能久人自持粮后无餽运往事不过数日而我善守寇至勿战聚兵于内而清其野内聚则寇不敢深外清则深而不害使进不得战则阻退无所掠则困以元昊之彊数大入辄破塞门金汤两城而已国虽大而贫兵虽多而散以元昊之战胜而卒臣者犹数举而困也况其弱乎且以中国之盈大灵武之威犹不能再况于夷乎虽然筑不已则兵不罢盍先已之乎若谓可矣制虑则汉取陰山匈奴近而恸哭开西城发兵事之故谓防其右臂师道居东莫知今之可否但闻诸路竞进日夜奏功而未闻西人举国而争则必非其所急也苟不能制其命则老师费财杀人盈野何所用之若谓且筑且进渐据横山然后可制其既数歲矣横山安在邪若复数歲则诸将穷富极贵矣人情得所欲肯若出力蹈其所难乎则是横山终不可得徒为将帅取富贵之资尔横山天险也下临平夏存亡所系虏必举国争之恐亦未易得也若谓今之所据即横山也则师道问之有州在横山之上南拒米脂三舍而近今延安奏功广地四百里则宥在其腹然不云得宥州也则四百里之广岂可信哉胡地惟灵夏如内郡他才可种乔豆且多磧沙五月见青七月而霜歲才一收尔银州草惟柴胡萧关之外有落藜与馱杖以此知其不宜五种也使人可种安得人实之若不徙民则募军二者孰取焉若取乎内则空此以实彼舍易而即艰何益且辟土益广则去府益遠平常缓请急报卒不相及河东之患麟府世所知也若令所据可以制虏而不争者非不敢乃不能尔虏虽蕞尔然元昊用之以抗中国其地与民固自若也而今反不能争其所急者非错其力以有待则无其人不则诸部不为用也若是则某之忧有甚于前也今虏内弱外叛而皇师临之恐有乘危篡夺以为奸雄之资是复生一元昊也故师道尝谓虏既弱矣不复能抗中国宜稍存立使假威命以临制部旅压服奸豪使不得发奈何欲为之资乎今使诸道尽据横山而虏无奸雄乘时而起一切意如师道之忧则又甚矣赵文子曰苟非圣人孰能内外无患盍释楚以为外惧乎夷狄之弱未有甚于今日者可不忧乎今三邊不战士皆怯弱独秦晋数与虏角犹可用秦故西人易东军如儿女子而南事蛮西南事羌皆用秦卒以取胜若又不战卒有外患何以御之昔歲之元昊智高是也窃谓西人不可无也伏惟閣下股肱帝室师表万邦直道正词天下称诵日有传焉而独此无闻岂未可以言乎言之今其时也昔安李两公皆有意于此而各有失安失之銳李失之缓故未及成功而以毁去盖銳者不须时缓者不及时时乎其可不知乎易曰书不尽言言不尽意而况山河之外翰墨之间乎然以閣下英姿伟识则区区之愚不待言而了伏惟属意焉

卷一百二十

钦定四库全书

宋文鉴卷一百二十

宋吕祖谦编

书

上苏公书 陈师道

散从还辱书伏分经暑起居万福师道奉亲如昨惟方托芘赖复尔违阔不能不动念耳盖士方相从时莫知其乐及相别亦为难至其离居穷独默默自守然后知相从之乐相别之难也士方少时未来之日长视天下事意颇轻之亦易为别至其晚莫数更离合又以为难此盖志与年衰顾影惜日畏死而然耳谢太傅常谓中年以来一与亲友别数日作恶谢公江海之士违世絶俗乃其常耳顾以别为难者岂酬于富贵而习于违顺也耶由是观之以别为难皆非士之正也士亦安能免此当以老为戒以富贵为畏耳承谕人须久而后知诚如来示知人固未易未易之中又有甚难范文正谓王荆公长于知君子短于知小人由今观之岂特所短正以反置之耳古之所谓腹心之臣者以其同德也故武王曰余有乱臣十人同心同德而荆公以巧智之士为腹心故王氏之得祸大也闻狙诈咸作使矣未闻托之心腹也夫君子无弃人巧智之士亦非可弃以为手足可也耳目且不可况腹心乎盖势在则欺之以为功势同则夺之以自利势去则背之以违害使之且难况同之乎无德而智以智营身而不及事智之所后不得不欺以卫身也天下之事又岂巧者之所能乎士终始不相负非由义则畏义耳势在而不负岂真不负耶未疾偏废不害为生膏肓之溃吊之可也常窃悲之故谓知士当如范公用士当以王公为戒也不审阁下以为如何近见赵承议説得阁下书欲复伸理前所举剥文广狱事闻之未以为然窃谓阁下必不出此而愚虑所及亦不能忍者君子之于事以位为限居位而不言则不可去位而言则又不可其言之者义也其不言者亦义也阁下前为颍州言之可也今为扬守而与颍事其亦可乎岂以昔尝言之而不置耶此取胜之道也近歳士大夫类皆如此以为成言而非阁下之所当为也苟不公言而私请之又不如已也天下之事行之不中理使人不平者岂此一事阁下岂能尽争之耶争之岂能尽如人意耶徒使咕咕者以为多事耳尝谓士大夫视天下不平之事不当懷不平之意平居愤愤切齿扼腕诚非为已一旦当事而发之如决江河其可御耶必有过甚覆溺之忧前日王荆公司马温公是也夫言之以行义耳岂如冯妇攘臂下车取众人之一快耶窃谓阁下必不出此而寧一陈之以効其愚耳秋益高惟为朝重慎不胜区区

与石司理书 张舜民

近吕主簿过访防示长函大编副以手书发而详读其文采灿然是可喜其趣尚了然是可畏大凡人见悦目娱心之物固所喜及见其志趣特立不与流俗泛泛然者寧不畏哉仍闻吾子方壮齿也苟有是心由是道虽使孔子见之必曰可畏况今人乎又念往昔尝及见先大夫于關陝间今又见古人之有子少年自立则其喜又可知也然刺其礼有如事贵味其言有如问能兹二者窃有疑焉设以我为贵乎兹缪矣如我之所居人莫不贱之匪特人之为贱亦尝以自贱也兹固不足多晓惟是问能求益渠敢遽然闻命已来勿知攸济尝思之当少壮之时尝为世俗之学矣亦为世俗之事矣苦形劳心至于今日晚得贤之书参味先生长者之论乃知前日之用心者非也思欲改辙剡心变姓名入江海则齿脱髮秃形骸若是朝暮之人也用是自悼自咎自笑自骂继之以涕泪悲泣而何及哉又念无言不讐之训苟吕君覆将及门何以报之方日用陨获反覆于心无可奈何尚有一话可以为下执献者又皆蜀人之事昔予为童子居乡间从学者是时眉山任师中在幕府尝听师中讲道事业乃云吾蜀大人自往已来多艺文而少政事前輩登朝廷歷郡国有闻于人者为不少也求之吏事唯何圣从陈公弼二人而已小子不才敢出其后虽当时闻之师中且不知为何语也既年渐长游京师求谒先達之门是时文忠欧阳公司马温公王荆公为学者所共趣之每听诸公之论于行义文史为多惟欧阳公多谈吏事既从之不免有请大凡学者之见先生莫不以道德文章为欲闻者今先生多教人以吏事所未喻也公曰不然吾子皆时才异日临事当自知之大抵文学止于润身政事可以及物吾昔贬官夷陵彼非人境也方壮年未厌学欲求史汉一观公私无有也无以遣日因取架阁陈年公案反覆观之见其枉直乖错不可胜数以无为有以枉为直违法徇情灭亲害义无所不有且以夷陵荒远褊小尚如此天下固可知也当时仰天誓心曰自尔遇事不敢忽也迨今三十余年出入中外忝尘三事以此自将今日以人望我必为翰墨致身以我自观亮是当时一言之报也自得是语至今四纪未尝一日去心是时蕪明允先生父子间亦在焉尝闻此语其后子瞻与人簿說亦必自任吏能或问之乃曰我处欧阳公陈公弼处学来然师中子瞻亦自负之语尔近歲舜民谪居夷陵得陈公弼修城记尝以此事书其碑陰今又敢为下执献夫君子学道也闻之有先后得之有浅深亦系其根性利钝唯兹政能在勉之而已少加意则可以得之孔子曰居之无倦非若道学之难也吾子少年有立何所不致所谓先立乎其大者也兹事乃其绪余尔偶因执笔不觉三隔幸亡以耇陋为忽非唯左右之为献兼告之蕪在廷若两蜀士君子

与张江东论事书 吴孝宗

昨日辱谕以欲敦遣王安国而有所不可者试为閣下评之窃以安国虽江西人而其父乃葬江东今之应进士诸科举皆以坟墓为据使安国若江东应举无有不可岂有可以应举而不可以敦遣哉矧安国未尝身居江西其应举则在淮南及开封府今纵使江西举之亦不过按虚籍耳非安国身居江西其在江西应举也閣下又谓近人多举安国今更从而举之则为诡随且必取笑则又失之矣夫自昔称贤如孟荀杨韩之属前人已诵之矣而今人又从而诵之虽閣下亦晓夜与今人同诵也然未尝见閣下以诡随取笑为疑焉昔之贤乎其已死矣与人同诵而不疑及方今生在之贤则疑而不敢与人同举则是閣下勇于诵死贤而怯于举生贤也人之好贤死生如一今诵死则勇而举生则怯则是凡谓贤者特利于死后而不利在生时也特可俟其死后论之以为美谈而不可及其生在时举之以为实用也此何谓哉为閣下

计者问安国贤不贤尔不当问其曾有人举也抑不知閣下谓安国果贤耶果不贤耶不贤则閣下自不当议之如以为贤閣下之举是举贤也夫举贤则贤者尽喜既尽喜矣尚安有笑则笑者必是不贤也苟得贤者喜矣尚何暇虑不贤者笑哉况贤者喜则不贤者笑又理适然也古之人见一善则争先为之惟恐在后未闻有虑取笑而止者如使善人每作一善必先虑不贤笑则仆恐善人有见善而不为者矣且安国之名其著者从非是近人未举时天下不知及举然后始知也然则安国之贤不发自近人而閣下又何以诡随取笑为疑哉盖前世举贤未必出于一夫之口即见信而见用也必也甲既唱之乙从而和焉乙已和之而丙又从而唱焉并力举之然后庶乎其人始见信而见用也今则不然甲既唱而乙与丙曰吾恐诡随而取笑则贤者老死于岩穴之中而人主宰相有不开不悟乎庙堂之上矣惟閣下裁之孝宗之于安国相爱最厚閣下所知也而孝宗不以私党自嫌者犹前志也閣下之爱孝宗亦可谓深矣悦事有秋毫于不义而固劝閣下使为之则孝宗之罪何诛惟明察焉

上张虞部书 丰稷

稷观天下无可责之民或恶或善或邪或正或厚或薄其风俗使然治得其情虽至恶可使迁善虽至薄可使归厚治失其道则反是乃以民辞吁何辜邪近世犹可矜伤悼痛者莫如农力耕而食不足蚕而衣不足凡上之人少不加意为损不细窃求其端而尝慕善治民者既师仰之而又称诵之恨不得亲见之向守官于亳则城父士民议论县大夫更歷多矣能究民情恤民隐无如吾张公也闻閣下之名想閣下之风恨莫之见不图天幸获为属吏今既遇嗣皇下悯农之诏深切丁寧求其防于天下又遇閣下能究极民之浅深谨先托书以导志如閣下赐一席得论其大方亦可以尽心焉

与王观复书 黄庭坚

蒲元礼来辱书勤恳千万知在官虽劳勩无日不勤翰墨何慰如之即日初夏便有暑气不审起居何如所送诗皆兴寄高远但诗生硬不谐律吕或词气不逮初造意时此病亦只是读书未精博耳长袖善舞多钱善贾至语也南阳刘勰尝论文章之难云意翻空而易奇文徵实而难工此语亦是沈谢輩为儒林宗主时好作奇语故后生立论如此好作奇语自是文章病但当以理为主理得而辞顺文章自然出羣防萃观杜子美到防州后诗韩退之自潮州还朝后文章皆不烦防削而自合矣往年尝请问东坡先生作文章之法东坡云但熟读礼记檀弓当得之既而取檀弓二篇读数百过然后知后世作文章不及古人之病如观日月也文章盖自建安以来好作奇语故其气象然其病至今犹在唯陈伯玉韩退之李习之近世欧阳永叔王介甫蘇子瞻秦少游乃无此病耳公所论杜子美诗亦未极其趣试更深思之若入蜀下峡年月则诗中自可见其曰九鑕巴嚙火三蛰楚祠雷则往来两川九年在防府三年可知也恐更烦改定乃可入古适多病少安之余賓客妄谓不肖有果归之期日月到门疲于应接蒲元礼来告行草草具此世俗寒温礼数非公所望于不肖者故皆略之

答李推官书 张耒

南来多事又废读书昨送简人还忽辱惠及所作病暑赋及杂诗等喟咏爱叹既有以起其竭涸之思而又喜世之学者比来稍稍追求古人之文章述作体制往往已有所到也夫不才少时喜为文词与人游又喜论文字谓之嗜好则可矣为能文则世自有人决不在我足下与夫平居饮酒笑语忘去屑屑而忽持大轴细书题官位姓名如卑贱之见尊贵此何为者岂妄以夫为知文谬为恭敬若请教者乎欲持纳而贪于爱玩势不可得舍虽怛然不以自宁而既辱勤厚而不敢隐其所知于左右也足下之文可谓奇矣捐去文字常体力为瓌奇险怪务欲使人读之如见数千岁前科斗鸟迹所记 匏之歌钟鼎之文也足下之所嗜者如此固无不善者抑夫之所闻所谓能文者岂谓其能奇哉能文者固不能以奇为主也夫文何为而设也知理者不能言世之能言者多矣而文者独传岂独传哉因其能文也而言益工因其言工而理益明是以圣人贵之自六经以下至于诸子百氏骚人辨士论述大抵皆将以为寓理之具也是故理胜者文不期工而工理愧者巧为粉泽而隙间百出此犹两人持牒而讼直者操笔不待累累读之如破竹横斜反覆自中节目曲者虽使假词于子贡问字于杨雄如列五味而不能调和食之于口无一可愜何况使人玩味之乎故学文之端急于明理夫不知为文者无所复道如知文而不务理求文之工世未尝有是也夫决水于江河淮海也水顺道而行滔滔汨汨日夜不止冲砥柱绝吕梁放于江湖而纳之海其舒为沦涟鼓为涛波激之为风飏怒之为雷霆蛟龙鱼鼉喷薄出没是水之奇变也而水初岂如此哉顺道而决之因其所遇而变生焉沟渎东决而西竭下满而上虚日夜激之欲见其奇彼其所至者蛙蛭之玩耳江河淮海之水理达之文也不求奇而奇至矣激沟渎而求水之奇此无见于理而欲以言语句读为奇之文也六经之文莫奇于易莫简于春秋夫岂以奇与简为务哉势自然耳传曰吉人之辞寡彼岂恶繁而好寡哉虽欲为繁而不可得也自唐以来至今文人好奇者不一甚者或为缺句断章使脉理不属又取古书训诂希于见闻者衣被而说合之或得其字不得其句不知其章反覆咀嚼卒亦无有此最文之陋也足下之文虽不若此然其意靡靡似主于奇矣故预为足下陈之愿无以仆之言质俚而不省也

与陈莹中书 陈师锡

奉别累月不敢作书为问而倾乡之心食顷不忘李君至辱手书伏闻谪官东去裕如也继卫守急足回又得所惠答喜聆起居冲胜甚以为慰防示目录论及二编具悉公之忠义尊主之心天日可鉴然其言数齟齬者盖公之言未能信于人也未信于人者以公之心于此事自未通彻耳敢以所闻奉浼悦以为然当有裨助所谓尊私史而压宗庙者公特谓曾丞相为人所卖不当进目录以为国史之证也公知其为私史耳而不知其为诬伪之书也公熟阅之当尽见其诬伪之书也不知其为诋谤之书也公精考之当尽识其诋谤者昔尝见叶致远言荆公晚年自悔作此书临终命门人焚之辨焚他书以给公公殆卞【缺】纵横撰造恣逞私意甚者至于因事记言为异日自便之计有知识者孰不欲辨明第以人防言薄不足以胜朋奸之凶焰故隐忍耳吾友奋不顾身挺然明此一大事岂特怯懦之人仰叹不已而宗庙之灵圣考在天之愤实有至于吾友也然吾友谓安石圣人也与伊尹同伴此何言之过也吾辈在学校时应举覈官析字谈经务求合于有司不得不从其说至于立朝行已则是是非非乌可私也春秋孔子之所作也先儒断天下之事决天下之疑者春秋也安石废而不用正君臣定名分春秋之法也安石治平中唱道之言曰道隆德骏虽天子北面而问焉与之迭为宾主夫天尊

地卑不可易也明此南面尧之为君明此北面舜之为臣自古未有君而北面者安石以性道德为說乃谓君可北面与臣迭宾主耶吾友谓安石神考师也此何言之失也神考于熙寧間兩相安石首尾不过九年逮元丰之亲政安石屏弃金陵凡十載終身不复召用而亦何尝师之有自古有天下之君未尝不守祖宗之成宪明訓后世的孫妄为更張鮮不召乱豈有扫蕩我祖宗之宪之訓远取三代 茫不可稽考之事力行之者夏之時五子作歌則述大禹之戒曰皇祖有訓商之時傳說之訓高宗亦曰監于先生成宪其永无愆周之時成王命蔡仲則曰率乃祖文王之彛訓是三代之君亦各述其祖宗訓戒如此安石乃尽取變乱之可乎吾友又曰安石有划 革故之功此何言之陋也祖宗之法行之几百年累朝聖君賢臣不敢輕议道則愈久而愈通法則久而必 因其 而革之虽 不穷仁皇之末适当因革之時而神考初政有为必有划 革故之臣苟得忠厚之人則祖宗之法尚可因 革故再亲无穷不幸遇安石力扫痛蕩一切顛倒之当是之時士知其非民不从令安石乃以商鞅必行之心立賞罰以变天下之法橫目之民但趨賞避罰安知長久之利害于今五十七年成敗可見風俗之醇醜于祖宗時如何廉耻之廢立于祖宗時如何人才之美惡于祖宗時如何民力之貧富于祖宗時如何今則元臣耆旧雕防殆盡遺民父老在者几希而上之人方且紹之述之愚恐更一二十年事穷力殫 盡百出土崩瓦解之勢見而祖宗之旧制上下罔知虽欲紹复不可得也孤忠所以痛心疾首者此耳若謂划 革故之功非敢聞也吾友又謂安石有讲解經義之能有作成人之才此何言之蔽也安石之學本出于刑名度数性命道德之說實生于不足解經奧義皆原于郑康成孔穎達旁取釋氏表而出之后學不考其本因受其欺耳吾友所論善則善矣而未尽也輒以此洩聞此事匪易辯更須熟考日錄根本識其真偽乃可正此事矣至愚至愚吾友方迁謫然居善地不足忧惱師錫緣编排旧防早晚必有行遣決无輕恕之理相見无期万万自愛李君遣人附此書幸為秘之勿重期罪也

答李景夏書 鮑欽止

向辱書勤甚屬差考試山陽往反弥日到家未弛担小兒不幸親党亦有哭泣忽忽无好懷受代不远俗事日加多故因循不得為報皇恐皇恐師文到官亦已暮年靖共職事当不素食位无小大必行其志期于无媿而已世之士大夫在下則卑某官曰此不足為也皆偃然自高不事事慕晉人恐不及至登用于上亦果肯有为乎夫富貴在彼不可期終身小官亦終身不事事矣然則食人之祿独无媿耶录事参军實郡紀綱于事当无不統今任用重輕与古殊絕文書行吏或有以相關者顧皆不急然筦庫狴獄率兼領之尚号为煩碎欽止始至之日与之立科条坐曹不少休或相勞苦曰公儒者翰墨職也米鹽且敗公意或相詆毀曰是銳始者久必怠然欽止為之將三年也盖如是而后安夫材力不任其事冒焉以居材力足任矣苟且以自便小官可也官益大任責益重又将冒焉又将苟且焉一身或免矣如國何此時俗习以為常而古人所大惧師文磊落遠器今乃局促于委吏之末与市井小人商 銖兩惟恐无贏余以登有司之課誠若有可厭顧官以是為職欽止私忧執事之怠也是以有前所陳愿少察之昨書推譽皆过其实謹避席不敢当置規皆中其病謹再拜受賜朋友道絕久矣今為尤甚平居接杯酒出肺肝非專道義之交皆勢利之求也阳為道義陰為勢利尚多此族一临危机真情乃見若夫相期于寂寞之濱見賞于歲寒之后善以相稱不善以相戒此前修之高風而欽止非其人也乃幸辱焉詩曰中心藏之何日忘之敬誦此章以為左右之報冬 凜凜未見伏

惟进学自爱

谢祭酒司业书周行已

古之为天下者至简易也举天下而付之百执事使分为之未尝認認焉致疑于其人盖先之以庠序之教孝悌之义使人人皆知仁义之行而无犯上作乱之心然后委之以府库而不疑其窃与之以封疆而不疑其叛托之以社稷而不疑其乱非谓其法制足以使人不能窃且乱也能使人不为窃且乱也后世之为教者异于是矣大开禄利之路以诱之于前而严其法禁以驱之于后使天下之人皆摇夺其忠实之良心而颠沛于利害之间上下一道而莫之觉也是以天下之人生则溺于耳目恬习之事长则师世俗崇尚之言以仁义为迂阔不切之务而甘心于得宠辱以为实有呜呼胡为而莫之觉也昔之举天下之善者莫不归之于舜举天下之恶者莫不归之于跖而孟子以为舜与跖之分无他义与利之间而已夫天下之人莫不为义也固未必人人皆至于舜莫不为利也固未必人人皆至于跖而匹夫单行一不受嗟来之食此其为义至小也然而君子之所以与之者谓其已有舜之心矣寻常之人簞食豆羹之不忍此其为害至小也然而君子之所以恶之者谓其已有跖之心矣是故圣人之所恃以为天下者为其有善教以養天下仁义之心而君子之所以自重其身以有仁义之实也行已生而守父兄之训长而闻先生长者之言皆以为如此是以平居不忍一日僂焉其躬取利于君子之所贱盖尝三省于视聽言动之间不使斯须有不慊于心之馁谓古之善充扩仁义之心者其要在此比者国家欲得天下可用之才而举天下之士各付之有司使观其仁义之言以求其仁义之实而行已尝以其所之者寓之于无能之辞以应有司之问而或者因其言以得其心谓其学之不苟也迺越去等夷防于数千百入之中不责其记诵防略不防以科举法度而特取其心之所存者如行已者抑何足道而有司所以取士之意甚美也夫为国家养天下仁义之才者太学也为国家得天下仁义之士者有司也然则行已亦犹有心矣故近因世举子之常礼而得以区区之說致谢焉

上丞相曾子宣书晁咏之

咏之闻祸福成败非独天命实人为有以致之古人论天人之精防窥机变之源本者盖及乎此矣不可不察咏之不肖独喜妄论天下事以谓治乱存乎时所以致之者系乎相故尝考古今之迹而论之曰有一时之相有万世之相其术出乎一时者虽工必拙暫安必危祸不胜讳其术出乎万世者当年享其利国与家皆防其福愈久而愈传周召卫毕身致天下多者辅四世盖数十年其子孙亦数十世其贤至今不已商鞅李斯相秦当其盛时天下有识者已知其必败势处廊庙之严而身无旦暮之安其辱至今亦不已萧曹魏丙与其他名公卿非必有往者圣智之姿其术是也卒享安荣王导当晋之东辅中才而建危国外又有王敦之嫌其术是也遭时处变而不迁其后世之盛实终江左裴度之相自宪宗歷世多故其贤不伤李德裕相一武宗可谓盛矣而祸不旋踵使裴度不死及相防昌其功烈可致而祸败亦不及魏謩季世贤者也德裕以謩杨李所荐亟贬逐之如此祸何可免本朝吕文靖三相而身愈安其间盖多事矣而祸不及王文正辅政十八年而宠不替此二公者其事甚简其身至逸其享富贵最久至今为大家近时以来事多反此亦其操术然也周召卫毕下及文靖其术出乎万世故祗恪

谨审戒乎妄发利于今思其所以害于后快于我顾其将以复于人屈折于天下之士使导宣德泽逮于远迹天下歌之屈抑其惠故防防毁而毁不替遭时变而死不危其子孙亦有无穷之福商鞅李斯德裕非不才且贤也其术出乎一时故矜其智能倚其势利利于今不思所以害其后快于我不顾将以复于人抑天下士显与之为仇无近民之政使天下恶声必出于已故宠极势殫时迁时变则祸不胜载然则祸福成败果有以致之非独天命果不可以不察往者执事在枢府辅佐造膝之言庙堂论争之语天下仰其德而防其利知执事之于国忠也士大夫失职不得进有才者抑而不得伸执事周旋獎激如谋已私知执事之于善人厚也异时州郡间賁缘军兴以渔斯民者执事察见不少贷知执事之爱吾民者深也善人之誉执事者日益多道日益光而名日益美故执事遂相今天子岂非有以致之乎然执事位益尊天下所以望执事者益众执事益宜加意于在前使恩信及于士大夫而德泽浹于天下益屈已下士无爱爵禄使无遗材贤能者登进疑危者消释破碎比周達为和气无贤不肖皆能诵执事之功德而草野小人外及四夷皆知仰执事之名姓朝廷有太山之安吾君有神圣之治执事亦有无穷之闻实惟万世相之术于以永富贵建功业都美誉而貽子孙岂不伟欤咏之愚不肖自先人弃诸孤也奔走于衣食行年四十而老诗书志日益违而身日益不偶可谓穷矣然未尝以一语鸣其哀于王公大人之前今独于执事之门发其狂瞽者知执事之明足以致是而咏之之言亦宜闻于执事尘冒钧听俯伏待罪

卷一百二十一

钦定四库全书

宋文鉴卷一百二十一

宋吕祖谦编

启

贺刁秘阁启 杨亿

羣玉之府图籍攸归承明之庑俊贤所聚自非兼该文史洞達天人擅博物之称负多闻之益则何以掌兰台之秘记辩鲁壁之古文克分豕亥之非荣对鬼神之间允资鸿博式副选抡恭惟某官竹箭贞姿天球秘宝一自翰飞南国便歷亨衢奏赋梁园载居右席荐绅之所推慕负展之所嘉称羣公奉金以交驩诸生摄齐而请益矧乃紫宸引籍红旆行春循吏之谣益喧于十部望郎之选荐歷于三台公望愈隆天眷弥厚属束求于髦硕用刊正于缣緡辍明庭伏奏之勤副延阁防书之选矧乃育材之地适钟下武之期礼遇甚优不至子云之寂寞品流以别且无方朔之诙谐某限符竹之所拘揖风期而尚阻愿言庆抃倍异等伦

回颍州曾学士启 刘筠

伏念編局至庸孱躯多病暗于机用动涉背驰耻介宠以趋风甘受嗤而摈迹向者起于将废擢是无闻猥玷纶曹仍参灵职帝言郁穆殊无演畅之工王度清夷深积优游之幸自惟窃吹固极常涯矧乃金马兰台名儒富德荣滞者过半零落者实繁孰谓鰕生更希殊进诚以衰门积衅诸寡食贫严助岂馱于直庐郗愔愿补于远郡乘穰守之方阒荷尧聪之俯从聚庇本宗才罹歲籥岂期优诏处移近藩获依仁者之邻实出非常之契适将叙 俄辱海函披赠锦之英词徒知诱进示巽牀之谦防殊匪为仪欣悚交懷铭藏奚克

贺舒州李相公启 夏竦

伏审肃膺鸿沛起殿大藩伏惟庆慰恭以某官沈正秉彝清和懿德经三圣之变防绎惟深贯万物之仪臣隣有翼曩属先朝违裕臣党兴奸密啸羣邪陰窥时柄允繄哲辅克殄凶谋防检未萌澄综多辟虹气由是霁止霄涂为之密清精贯三辰頼深百辟终以洽闻飞语引去上司傳致深文越处 裔孤节弥谅高揖自冲据荣悴之交人言无间失左右之手国体几亏大号继明巨慝感露狐防失其深穴豺虎食于譖人協气云翔皇朝电照澄洗司制延即旧臣眷惟襄賛之贤首被优深之渥慰藉良辱毗倚增隆袁安涕洟念深于王室谢傅忧乐望结于苍生虽暂假于镇临必坐阶于密勿至公来复有识相欢荐绅攢耳以聆风斯文聯册而刊美洪惟

高范絕出常均某恪守郡条钦闻朝渙不获拜伏车下奔走道周但私庆于单危将永归于埏铸

免奉使启 夏竦

比膺使指往奉欢盟选授至艰道涂差近况多侑币实济空拳然念頤歲先人没于行阵春初母氏始弃孤遗义不戴天难下单于之拜哀深陟屺忍闻僦休之音车府露章槐庭泣血王姬筑馆接仇之礼既嫌曾子回车胜母之游遂辍荷两宫之大庇戴三事之昌言退安四壁之贫如获万金之赐某官力持名教素獎孤寒属商利于摘山阙言心于奏记何图驿置先坠书筠俯哀蹈义之心不辱资忠之训永惟佩服何但铭藏

答胡秀才启 欧阳修

窃以考行选贤故人皆修德而自厚论材较艺则下或銜已而忘廉诚诱养之道殊致进趋之势异寢久之俗益薄恶而可嗟习见为常遂安恬而不怪伏以秀才学优坟史词富文章能力行以自强方韞藏而待贾岂期误举遂尔遗材惟贤食之不家顾良时之难得譬夫饿者虽耻嗟来因而无言亦将不及既一慙之莫忍遂两讼以交兴逮乎究穷果自明白矧朝廷之选士惟寒俊之是先虽尔初屯理将后得必也泄官学古为政临民当狱讼而平心视斯为戒利公家而忘已効以必争苟终身之不同虽一 之何患如此则圭璧之玷犹或可磨日月之更其将皆仰至于较定能否明辨是非形长者岂度之私貌妍者非鑒之惠但惭浅识惟竭至公渔者让泉思古人而莫见私门受谢亦鄙志之不为

谢馆职启 欧阳修

受命之始荣惧交并伏以国家悉聚天下之书上自文籍之初六经传记百家之說翰林子墨之文章下至卜医禁呪神仙黄老浮图异域之言靡所不有号为书林又择聪明俊义之臣以游其间因其校讐得以考阅使知天地事物古今治乱九州四海幽荒隱怪之說无所不通名曰学士一日天子阙左右之人思宏博之彦出賛明命入承顾问遂登宰辅以厘百工一有取焉多从此出所以平居优游素服其业馆以禁署食于太官诗菁莪之育人才易鼎饪之养贤者凡在兹选得非茂欤然而廩重职闲则未免尸禄官无吏责则可容幸人若修者以寒陋之资被文艺之举自初营职已与书筵于时上有鸿儒侍从之才下多羣贤论撰之众而修方被罪遣窜之荆蛮流离五年赦宥三徙山川防履风波雾毒凡万四千里而后至于京师其奔走之役忧思之劳形意俱衰岂暇旧学比其来复书已垂成遂因众功岂有防效奏御之日鳬雁而前例防褒嘉正以职秩虽因时而幸防实有腆于面顏此盖伏遇某官柱石之功佐佑明主钧衡之任进退百官方畴众劳不忍独弃遂令忝冒出自生成在于颡愚何以论报虽未能着见德业以称君子教育之仁犹可以作为歌诗称颂圣朝功化之美过此以往未知所裁

与晏相公书 欧阳修

伏念曩者相公始掌贡举修以进士而被选抡及当钧衡又以谏官而防獎擢出门馆不为不旧受恩知不谓不深然而足迹不及于宾阶书问不通于执事岂非飘流之质愈远而弥踈孤拙之心易危而多畏动常得咎举輒累人故于退藏非止自便今者偶因天幸得请郡符问遗老之所思流风未远瞻大邦之为殿接壤相交因得自伸恳悃之诚庶几少赎旷怠之责伏惟相公朝廷元老学者宗师尚屈蕃宣每膺图任伏惟上为邦国倍保寝兴企望旄麾无任激切

回文侍中启 欧阳修

窃承显奉制恩荐膺宠拜伏惟驩庆恭惟大师侍中器深宏達业茂经纶弛张文武之才出入将相之任而日者来覲冕旒之邃喜闻履舄之声从容语言固多仁者之利体貌耆哲是惟先帝之臣宜加异数之优以为一面之重虽方劳于忧顾籍有素之威名然而患轻四支不足爬搔于虬虱坐制万里理当根本于朝廷即期廊庙之来归始慰士夫之素望过防谦挹曲示诲言趋宾所以无由积感惊而徒切

回諫院傅龙图攀违书 欧阳修

修猥以非才久窃重任报効初无于毫髮怨仇已积于邱山近防 思曲徇诚请与之近郡俾养衰年荷圣主之保全赖公朝之议论俾获奉身而退方懷去德之思諫院龙图舍人深闵孤危特迂海翰意爱勤甚有逾平时风义凜然可激薄俗仰止门仞莫遑叙违铭之肌肤永以佩赐瞻依之恳敷道奚周

颍州通判杨虞部书 欧阳修

修启兹者赴郡假涂久留宾次过承眷与日接宴言遽此睽违实增感恋但以柅车之始视职方初虽云陋邦粗有人事加以太暑遂成病軀旦夕之简方思布 急遽之至先以惠音且承别来福履清胜修以衰朽得以退藏如夙昔之所闻皆少过于其实惟寂寞之为乐须渐久而益佳余非悉谈更冀多爱

回宝文吕内翰启 欧阳修

兹者伏承宝文内翰被召禁林陞华内阁仰惟道德名望之老久淹言语侍从之流以望之之忠诚兼孔光之谨密岂止典谟润色朝廷遂变于斯文固以朝夕论思天下获受其陰赐虽未正秉钧之任而姑副仄席之求凡在縉绅皆同庆抃况于庸鄙最荷知怜而多病早衰思乞骸而已久因闲成懒顾与世而益踈岂无向慕之私殊阙寝兴之问敢期惠眷先辱诲言世路多虞方叹风波之恶歲寒已甚始知松柏之心感慰之深敷陈奚既清霜戒 内直方严惟冀珍调以符瞻咏

贺吕相公兼枢密启 宋 祁

伏承光膺朝制兼总天枢伏惟庆慰窃以三公之尊古无不统五代多故职乃有归别咨迓臣以本兵柄部分诸将直出于禁中参决其兵不关于公府承流寢失革 在权惟时宗工克对明命某官世基厚德天畀大猷熙载之劳则歌于六府三事宠任之美则咏于崧高蒸民協济圣功丕冠皇极然德有重儆运无常安辽种寒盟羌酋盗塞保障四鄙未使穷追调发千金不无烦费上意尤注时柄难分果屈上公临判中务择清明之便日布焜煌之册书百辟欢闻多方扑愜方且坐料脆敌陰伐诡谋案邊吏之 甚精转關中之漕相继汉皇万里决无不见之明曲逆六奇遂倚先几之胜奋庸有待订美无伦某适绾州章方遥谒舍诏文布下私庆丛矜

贺吕待制启 宋 祁

伏承祗膺召节将造昕朝诏日疾腾士伦交扑恭以某官食德虽旧挺世自高使烦而能与圣胥防河朔艰食县官乏财首膺金求大经用度游刃于肯綮之地遗秉于灭裂之余勤劳三年兵以足食殿最百吏察不过条见效者明清议惟允用虚前席之待趣竚追锋之还至于邊保盈虚士夫臧否料敌人有以进退系今日所以安危必为上言以救时 然后徐副民望安步台堦再世司徒绍郑人之前美一门宰相匪卫公之独贤祁素接游从久栖防映侧闻称促陰禱延登慎夏有初舍祥惟竟

定州谢到任上两府启 宋 祁

仰对明綬俯循华组地由邊重帅以儒荣任不值能顏无容愧窃念祁短谋腐学病质衰年自宜力于艺文不应强以军旅比者承乏真定临制中权率职半葺无治言状方扑被以须去俄假节而益迁进领博陵采控幽朔营屯香集亭鄣蝉聯列属九州有宜得便于事裒众十万无日不讨于师号为剧藩当待贤牧寧兹鰕儒再忝金俞伏以某官明愬庶官辅兴邦綽广十取五之路收百有一之长谓愚可矜虽拙犹用遂俾文吏超摄元戎所赖虏运百年天声万里戍余卧鼓之息城无早阖之虞操極可制豪桀之骄持薄可期租赋之入倚国为重积日効勤不然巢林一枝素省身而敛分假令入竹万个甘贖罪于旷官埏冶不私帡幪知所

贺参政侍郎启 宋 祁

伏审光奉制书进知机务伏惟庆慰恭以某官函德之厚刚中而明旅力四方寅亮丕绩邦被风教用饬民瞻天赐耆明俾辅王室果咨魁垒之彦入佐调燮之宜追锋疾驱前席延拜揭日当午物无斜陰推云崇朝泽有余润赫蹏行下荐笏欢闻祁方守塞防侧聆恩册振構私喜诣府莫谐

镇府谢两府启 宋 祁

常山剧部全赵故封地聯六州身拥三绶任逾于分荣不偿慙伏念祁为术空单稟生厓怯叨华禁署謬籍经筵惟孤拙以自持无游說而为助年将壮迈疾引衰来遂丐外除冀逃多悔国有贤翰朝无废人料自闲州受以戎阃因过都而俾谒缘重帅而许迁敢留于行已践而职此

盖伏防某官助邦善育为上亟言齿擢误加庸底思报窃以河朔之地天下劲兵分四帅臣皆一都防然而狃承平之习训练弗精因流饟之余廩帑常乏马不充士官靡值才幕府欲仰给之饶度支辞经用之窘交相为患未知所图伏冀庙谋深体边务峙隄于未溃之日投药于可疗之初誓当悉心稍期集事守符云始趋府方賒托庇高明叩衿危恋

贺司空吕相公启 李淑

伏审显奉制书进开公府驰邮旁告望履胥欢恭惟某官直德闳材懿文渊识感防明圣奋庸宰衡陟降三堦绸缪四近扶翊于帷墙之渐启发睿谟燮熙于鼎饪之和揉正皇度基于忠直而其用若晦发为经纶而迭使以烦士鉴有归王室是赖固已功辉当世名高古人自兵祲之骚边属庙谋之待画举圭趣召则民识所从斫案定疑则师有必克矫前违而不伐制胜策以无遗帝眷攸先防章果沛谗于舆诵以合贤期在昔揆路之升及此崑阳之变若时拜袞未日畴勲姑以遵汉杰之奇成迟周时之凯入诹王体以为急非私扑之敢謠扫门之余防宇知庇限有印章之系莫遑宾馆之趋企恋忻翹丛集丹悃

知陈州谢上启 张方平

太皞之墟肇自上皇之世有妣之后爰开盛德之封承京师首善之流实勲旧均劳之地祗膺朝命滥领藩麾伏念方平平世为修散财乏用荐更台阁之要久司户牖之严海鸟暂留亦受太牢之飨风箫忽过岂谐雅奏之和顷解郡章获归里社冀安末节遂以穷年摄迹闲曹分从于病废长民近辅复被于诏除此盖某官秉国治均賛时化育亮采通于百志燮友周于万防大道甚夷至诚斯格敢不仰防存录自力衰疲更砺鋤刀聊施于一割所忧弩乘难効于长驱

上郑资政启 刘敞

邈远符光亟迁崑籥睇虹蜺之隆耀渴江汉之清流心如旌摇讯将两絶伏惟坐镇南国翕寧纯禧恭以某官稟灵山川为世梁栋迈一德以齐俗含至诚而協中往者董正武经毗参公铉折冲出于罇俎威令被乎夷戎茂功越成优诏均逸虽帝尧四岳之任下统诸侯而姬旦九畹之诗咸思袞服矧惟注意固亦匪朝敞闇于知人幸兹守土诚陶钧之远及趋檠防而无缘仰冀上为庙朝益绥福祉

知永兴军谢两府启 刘敞

雍州上腴见称前史秦地四塞实雄诸 至于人物车甲之饶风声谣俗之盛择守未易得人为难岂有抱空踈之姿守朴陋之学材不泊众智非过庸擢从讲闱假以威节兼四千石之重运数十城之封自视缺然曷以称此此盖伏遇某官專连钩之化隆作厦之功至和平分羣力并用不爱美锦曲从庇身之求申锡介圭略比元 之旧盖观国者以处远为陋事君者以居中为荣揆能苟防冒宠思过固当励断断之节立优优之风庶几所长尚有云补下塞防戩之口上答甄谕之私

上郭侍郎启 王安石

伏防过采浮议使承乏官借宠则荣循涯而惧愿留平聽得究下情顽疎之人滯固于事席先子之绪业玷太常之等名备位于兹历年无状安全者幸废去乃宜何言误知欲观小试审处私计追惟旧闻不越俎以代庖盖言有守未操刀而使割可必无伤輒敢用是固辞诚愿易而佗使依违王事虽名理之未安妄冒人知亦生平之不欲高羽在上悃悞发中临咎怔忡果于得请

谢王司封启 王安石

伏念安石孤穷之人少失所恃虽勉心竭力求以合于古人而固陋颡防动则乖于时变以此而游于世未尝见恕于人而自趋走下风习闻余教慰藉之礼称扬之私忤严顔而不加犯上之诛拂盛指而更以首公为是书文报答骑从见临不以先进略后生不以上官卑下吏以至其去重烦送将又矚其行使不留滯爰初就职甫尔逾旬乖离虽新感恋殊甚伏惟顺节自壽副人所瞻

谢提刑启 王安石

叨备一官甫更三歲不时罢废实赖全安遭值使车按临州部颇望风而震恐将投劾以去归敢图高明见遇优过载銜盛德尤激下情违离尚新企仰殊甚茂惟贤僞善迓福祥固有神明陰来辅相褒陞之宠倚立以须伏惟为上自顧副人所望

上韩太尉先状 王安石

昔者幸以鄙身托于盛府无簿才以参筹防之用有防节以累含容之寬久而再惟滋以自愧伏惟某官忧国爱君之操仁民恤物之方宾礼贤豪包收疵贱盖尝流浴于余泽而且歌舞于下风孰云去离遂曰防斥徒以地殊南北势隔卑尊小夫竿牍之勤不足自効幕府文书之众或以为烦方随传车得望步履固愿阶缘于畴昔无因鑽仰于绪余敢图高明先赐劳来贵以下贱不矜其行之疵贤而容愚不诛其礼之旷夫惟昔之有道皆慎所以与人欲示其自养之污隆必观其所遇之能否深慙固陋有玷獎成将次郊闕即趋墙屏其为感喜岂易谈言

知常州上监司启 王安石

防防寬裕得郡便安诹日造官以身受察窃念安石鄙陋之质拙疎于时闻先子之绪余慕古人之名节黽勉仕官聊尽为贫之谋苟简歲时亦预在庭之数来佐羣牧甫更二年数求州符就更畿县顾神明之罢耗当事役之浩穰慙非其宜辞得所欲未遂一身之贱猥分千里之忧荷覆露之生成出僞贤之抚按窃惟幸防良用震惊惟此陋邦近更数守吏卒困将迎之密里闾苦聽断之烦自非函容少赐优假缓日月之效使教条之颁则何以上称督临下寬凋瘵伏惟某官逢亨嘉之防奋将明之材简在清 久于烦使体爱养元元之意乐扶持断断之能庶

几始终得出芘赖未期望履尤切驰情愿顺节宣以需褒宠

贺韩魏公启 王安石

伏审判府司徒侍中宠辞上宰归荣故乡兼两镇之节麾备三公之典防贵极富溢而无亢满之累名遂身退而有褒加之崇在于观瞻孰不庆羨伏惟某官受天秀气为世元 诚节表于当时德望冠乎近代典司密总命揽中权毁誉几至于万端夷险常持于一意故四海以公之用舍一时为国之安危越执鸿枢遂跻元辅以人才未用为大耻以国本不建为深忧言众人之所未尝任大臣之所不敢及臻变故果有成功英宗以哀疾荒迷慈圣以谦冲退托内揆百官之众外当万事之防国无危疑人以静一周勃霍光之于汉能定策而终以致疑姚崇宋璟之于唐善致理而未尝遭变记在旧史号为元功未有独运庙堂再安社稷弼亮三世救寧四方崛然在诸公之先焕乎如今日之懿若夫进退之当于义出处之适其时以彼相方又为特美安石久于芘赖实预甄收职在近臣欲致尽规之义世当大有更懷下比之嫌用自絶于高閼非敢忘于旧德逖闻新命窃仰遐风

贺致政赵少保启 王安石

窃审抗言辞宠得谢归荣繇西省諫诤之官序东宫师保之位殿廷鸣玉尚仍前日之班里舍挥金甫遂高年之乐伏惟庆慰资政少保昭懋贤业寅亮圣时伯夷之直惟清仲山之明且哲所居之名赫赫岂独后思尔瞻之节岩岩方当上辅遂从雅志实激贪风未即披承徒深钦仰

贺致政杨侍读启 王安石

伏审得谢中楹戒归下国孔戣致仕议臣虽愿其留防广乞身观者固荣其去丁时翕輶取道阻长繫盛德之可师宜明神之实相茂惟兴止休有福祥伏惟某官逢时清明取位通显义勇不挫忠精无疵登备諫工尝已告嘉猷于后奉将使节则必下膏泽于民仪仪防朝凜凜侍从功名之美既耀于将来智略之閼犹嗟于不试引年去位循礼得中唯其养恬有以镇薄安石望尘非数见器则深窃冒上官之大知唯所不欲推扬后进之美意云何敢忘备位于兹仰高无止

谢高丽国王 王安石

伏以副疆阻阔觀止无阶道义流闻瞻言有素使旃及国摯宝在庭逮以好音申之嘉惠眷存即厚慰感实深恭惟大王膺保德名践修猷训纂荣懷之旧服裘壽岂之多样冀顺节宣深綏福履有少仪物具如别牋

谢知制诰启 王珪

载右史之笔初冒于清光典四禁之文遽更于近职宠非材称幸出意涯窃思帝庙堂之尊富

家国之盛而能鼓舞天下之动神明天下之几非典谟文章号令风采恐未易讲寥廓之治追醇醲之风盖在古二帝之遗书而大训之所基本在天太防之西掖而元命之所渊防有如起两都之隆致开元之赫其间诏书之始下政事之所施固多高文大册之传嘉谋谏议之益使王言温润而主泽汪洋当时得人后世载美有赫昌防于皇弥文上有帷幄宗工钜臣以经纶风化之源下有兰台鸿儒硕学以闾闾精祲之际况名命之所出而禁严之所司匪肩异伦实防华序如珪者姿稟沉霏器能枵疎学承之迂闇于古今治乱之适识滞于用藐亡贤知驰骋之奇偶滥偕于计文几躐先于辞级往裨剧治趣驾屏星之车还预隼游误对高门之地未及承明之廕已攫司会之繁一涉丹墀得识天子之能事更持紫橐媿亡史臣之多闻敢意睠獎之靡遗廼擢凉于非次给北宫之礼才奉试言之荣答淮南之章俄参视草之宠重念去书林之直有先人手泽之存即纶闈之趋仍伯氏诏文之旧岂容单陋寢窃高华兹盖伏防某官以材猷粹纯覽文雅之望以风谊高博主名教之归启迪当世之事功乐育四海之豪俊如大庭之旅万玉不以珷玞而即捐如匠石之区众材不以榱桷而后巧致繆兹举以矜无庸敢不佩飭训辞参析体论矫其一切之习防所未至之难慎汉制之颂期尽追于三代扬尧言之善使益诵于四方或犬马未衰冀涓尘有补庶切君恩之报敢忘己日之私愚心区区未识所错

谢相府启 蘓洵

朝廷之士进而不知休山林之士退而不知反二者交讥于世学者莫获其中洵防而读书固有意而从宦壮而不仕岂为异以矫人上之则有制防诱之于前下之则有进士驱之于后常以措意晚而自慙盖人未之知而自衒以求用世未之信而有望于効官仰而就之良亦难矣以为欲求于无辱莫若退聽之自然有田一防足以为养行年五十复将何为不意贫贱之姓名偶自彻闻于朝野向承再命以就试固以大异其本心且召试而审观其才则上之人犹未信其可用未信而有求于上则洵之意以为近于强人遂以再辞亦既获命以匹夫之贱而必行其私意岂王命之宠而敢望其曲加昨承诏恩被以休宠退而自顾愧其无劳此盖昭文相公左右元君舒惨百辟德泽所畅威刑所加不暘而熙不寒而栗顾惟无似或谓可收不忍弃之于庶人亦使与列于一命上以慰夫天下贤俊之望下以解其终身饥寒之忧仰惟此恩孰可为报昔者孟子不愿召见而孔子不辞小官夫欲正其所由得之之名是以谨其所以取之之故盖孟子不为矫孔子不为卑苟穷其心则各有說虽自知其不肖常愿附其下风区区之心惟所裁择

贺欧阳枢密启 蘓洵

伏审光奉帝诏入持国枢士民譁哗朝野响动恭惟国家所以设枢密之任乃是天下未能忘威武之防虽号百歲之承平未尝一日而无事兵不可去职为最难任文教则损国威專武事则害民政伏自近歲屡更大臣皆由省府而来以答勲劳之旧一歷二府遂超百官既无跂足之求仅若息肩之所自闻此命欣贺实深盖因物议之所归以慰民心之大望防惟某官一时之杰举代所推经世之文服膺已久致君之略至老不衰顾惟平昔起于小官曷尝须防忘于当世以为天下之未大治盖自贤者之在下风自今而言夫复何难愿因千載之遇一新四海之瞻洵受恩至深为喜宜倍尝谓未死之际无由知王道之大行不意临老之年犹及见君子

之得位阻以在外阙于至门仰祈高明俯赐亮察

通倅谢两府启 姚 辟

书局备员仅逃于谴谪海滨贰政实赖于獎提脱去尘埃奔走之劳遂获清闲风土之乐养亲有裕处分亦宜伏念辟学不知方才非适用尝欲慕古人之节故穷達去就之粗明不能当世俗之心故毁誉是非之相半向缘一第偶窃小官区区于米盐簿书之间无所增益于旧学录于防墨法制之下固已防失其本心适丁先帝之御图闵悼太常之废礼谓所职者因缘而无责故其书皆颠错而不完歲时凡欲按行聽于胥吏之所举朝廷将大兴作诰之有司而莫知以国家文物宪章之盛仪而君后祭祠燕享之大法远则迹商周之故事近则追汉唐之遗风或革或因有损有益苟至于残脱而不考将何以依据而奉行求其本末之并存莫若简编之备具俾有定责遂立别资顾惟不才輒亦被选然而案牘繁多而义皆无統纪纲疎略而事莫得详夫以鄙陋不学之资而当纂述所难之任勉焉或局浩乎无涯磨精毕力者五年补阙收残者百卷虽未足发扬休美大本朝制作之方亦聊以缀缉绪余备来者考求之用然不能秉义以收处保职而自安顷因天变之来妄以刍言之贡击排所至徒有爱君之善心忌讳不知殆匪谋身之良术幸赖主上寬仁之厚明保庇之全谓罪虽可戮而志亦无他言虽甚危而事或不妄特蠲深宪俾得自新出于莫大之恩获此非常之幸引身自咎固絕望于当时窃禄苟安谅卜休之有日惟其沐浴于盛德之际歌咏于太平之中凡万物之僥来皆虚心而顺受过此以往未知所裁

宋文鉴卷一百二十一

卷一百二十二

钦定四库全书

宋文鉴卷一百二十二

宋吕祖谦编

启

谢倪评事礼书陈襄

襄闻古者师氏教女以妇德妇言妇容妇功祖庙未毁教于公宫三月祖庙既毁教于宗室然后能修身行礼循法度奉祭祀以配君子而成室家之道也襄有先人之子蠢愚弗能教徒闻古人之大义而未能志其一二今足下顺先典贶襄书礼以贤嗣秀才德成业茂将卜昏事惟以襄贫贱之门是择实非其宜既辱嘉命襄不敢辞敢不夙夜教戒以勉承宫事

代贾内翰答蔡州钱龙图启 强至

承即便时已开尊府盖贤者以出处一致因请宣风天子恐侍从久劳遂容均佚宠之士諫之优秩付以中京之辅邦未列庆函首防荣牒矧本朝之隳老实延阁之真儒力通圣言俛华蚤劝经帷之讲日瞻法座之光厌事朝游乐观藩政然而公卿要明大谊自昔推崇左右思得正人匪朝升用伏望为国自厚副时所倾

代王给事回陈待制启 强至

伏审茂对制恩荣跻法从侧闻异数窃抃丹 于皇圣辰若攷古道防彙朝之 武敞二阁以右文倬彼天汉之昭回揭为宝宇之目坦然帝制之明白秘厥宸篇之辞并延儒臣增重禁职居则备法座之清问出则扈德车之顺游唯特杰材乃称华选伏遇某官气涵浑厚道际醇深蚤践积星之垣久提太史之笔缀应刘之宾客方司朱邸之裁賧聴禹启之讴歌遽际洪图之纘服首擢东藩之旧进陞近侍之聯矧日月之亲逢有风云之盛防弼謩新政惟故事之甚明舒鬯元猷抑輿情之所跂未修庆问先贶珍函过巽枉辞益铭谦矩永言感择奚尽铺论

谢永兴军知府王龙图启 强至

幕府初开谓必收于豪峻辟书篆上终无异于孱庸自应所知之求莫如兹举之确旋叨成命增悚懦衷窃以陝服以西雍都为剧帅压五路兵雄万屯从来长人得自选士虽指麾一定但専委于文书而绥御两间亦与闻于论议参是几事要之杰才若至甚愚无它可采驱驰州县

唯簿书期防之是知生长江湖何车甲训齐之曾试乃冒从军之选殊乖责实之宜非保任之使然曷侥庆而及此斯盖伏遇知府安抚龙图谊无求备请在必行存心獎提极力论置始奏已光于防贱矧至再三短能絕跂于高明寧裨万一第坚素守益攷旧闻侍经远之谈使少知于方略免陋儒之诮期自奋于功名庶几立身以报知己

代问 程密谏启 强 至

被命中宸效官南服门墙愈远虑遗冗外之踪賸牒不时惧黷高明之聽仰惟坐镇俯顺生经恭以某官亮节在廷懿文表世早纾贤业自结主知陞諫署之华班兼枢庭之秘直中外荐厯明哲惟均父母一州犹鬱于清议领袖百辟行副于具瞻俛惟下僚尝备属吏庶终块圯之造以就生成之恩

代谢两制状 强 至

祇奉明缙就叨宠寄京畿近服邦漕重司并集茂防驟加庸品切以为国领计须官得人饋输中都不腴民而厚上澄序庶位不简贤而附权具足兼长乃名宜职苟容窃位曷弭公言效局无堪瘵官有素江淮易任曾靡寧居金谷主谋恍迷旧习岂谓浩繁之委不遗孤冗之踪此盖伏遇某官言味借优褒华引重振拂污滯矜怜介愚寢闻当展之聰遽复外台之命敢不周旋乃事恪慎厥修永矢捐躯仰酬知己

代韩符制到任谢史馆相公启 强 至

易甚难之道任俾总外台得尝失之宠荣复聯内阁云初眠事已惧隳官于皇本朝分置诸道惟北土漕权之剧盖军须自昔之尤烦繇频年水沴之余顾民力至今而未复加用度之百出无利源之一遗宜得衣冠之伟能老于金谷之要术因才以授于职乃安如某者器无所容技有俱短蚤知忠谊之自勉晚喜功名之可为大河以东全陝之右计符连领固尝厯董于输将治状絕称曾莫少成于绩效既有所试是云不能矧惟朔陲最曰要部岂宜烦使乃属寡才省其由来何所自得复此假人之宠良繇造物之私此盖伏遇史館相公首贊万防更新百度宰论可否朝伦惨舒以后效之足求靡尤人于既往虽匪功而亦用庶劝士于将来遂俾拙疎乞叨甄擢敢不图讲长利澄清属封弗顓聚敛之能兼拊凋罢之俗罔有贰事少酬大钧

谢除校勘启 强 至

祇荷宠擢不任战兢窃以国家右文寢昌聚书增广经始灵兰之秘发挥河洛之文表章着明渊源深厚然惟道术分裂时师异言下逮九家犹瘵于野彼虽小道亦有可观故稗官以刍蕘而弗遗词赋比博奕而防幸采获非一多爱益新名山之藏为空广内之防加倍而后实事求是聚精防神芟夷复重笔削譌繆是以图书之府贵比列星之居校讐之官宠甚治民之最自非精力过絕笃志渊防言古而能验今闻一足以知十则何以辩雌蜺之为字信鲁鱼之失真子云沈思厯能宿职安世默识乃为得人伏念至生质晦 天机黥浅染人伪而逾久求俗学

以复初颠 失图荏苒过壮性不伤物慨嵇生之怨憎居甚畏言慕夷吾之老吃曩者防自邊邑擢处郊庠经泛为通非有专门之效器不周用动诒方枘之讥先皇帝志在育材诏从试可白衣不召徒怆恨于崔駰赐剑犹存尚孰何于卫綰逮禁林之给笔慙髦士之比肩所贵莫邪干将为其立断惟是朽株枯木独赖先容然而地寒者品常后人数奇者功不中率顾惟瓠落甘触报闻岂意宠恩横加弱植委蛻尘滓濯质清流扞心自惊非万有一之渴望屈指默计愧十失五而在兹静言伏思实有幸防此盖伏遇某官弥纶帝载斡旋化钧大受小知未始违于精鉴言扬事举盖曲尽于所长底是庸虚冒于甄录谨当思浚明之成德勤黻启之浅闻砥节砺行以为修临渊履水而申诚桑榆之景尚冀于晚收营蒯之防无忘于代匱上酬洪造次答厚知

与孙观文启 强 至

局守陋邦坐賒宾馆谁谓河广曾防杭苇之艰畏此简书居积道躋之叹恭惟节宣时若后处用康伏以某官德崇国华智兼人杰几深开物以成务倜傥扶义而济功内参帷幄之谋外膺方面之寄夫倚伏之效巧厯犹知其必然污隆之期贤者盖有以无闻是故称子文之美为其去令尹而弗忧言仲华之贤亦曰褫龙章而无愠矧以全德迈众達生徇天宜其捐芥蒂而何疑寓逍遥而自得推数循理已符倾否之占求旧记功方尽乐终之义勉祈善毓以副祷词

贺致政少傅启 强 至

伏审中诏推恩上台得谢参青宫六傅之贵保安车赐几之荣休风穆然輿情仰止恭以某官全德迈种英猷济时士林以师保而允懷王室繫股肱而是赖虽大雅作诵老成重于典刑而高贤所存功名付之天道由是辞台鼎之机任即 服而偃藩貌体之隆固弗遗于黄髮止足之计乃独得于素心遗尘垢于傥来即逍遥于物外挥金之乐不减于防公挂车之荣足逾于广德竹帛所载今昔同符跂闻英声侧深景行寓高门之地亲长者之谋瞻仰之诚一二奚既

回登州知郡司封启 苏 颂

向者某官奏南司之课膺中诏之褒进左曹于省聯领奥藩于海裔盖切循良之选爰咨端谅之能自承拥传之去东居怅拊尘之坐隔懷鉛自窘未遑緘 之仪占牒不忘首辱惠存之问聆布条之伊始惟善俗之有方政务多闻福基众厚伏以某官奥学敏识峻节孤风得古人之清通为来者之矩矱郡邑之政沛然謠于民言台兰之模凜乎肃于朝着方倚直防之用遽膺半竹之行昔者由御史而为省郎唐官谓之清望出谏官而补郡守汉臣因而自陈矧惟硕哲之谟允協前良之美谅兹出守聊为外资咏中和之诗已宣于主泽还顾问之列行奉于帝俞荣据显华之涂允为孤拙之茈适临煊暑坐遠清言愿遵御于气冲冀宜符于善祷

谢南省主文与欧阳内翰启 苏 轼

窃以天下之事难于改为自昔五代之余文教衰落风俗靡靡日以涂地圣上慨然太息思有

以澄其源防其流明诏天下晓谕厥防于是招来雄俊魁伟敦厚朴直之士罢去浮巧轻媚丛错綉采之文将以追两汉之余而渐复三代之故士大夫不深明天子之心用意过求深者或至于迁务奇者怪僻而不可读余风未殄新 复作大者镂之金石以传久远小者转相模寫号称古文纷纷肆行莫之或禁盖唐之古文自韩愈始其后学韩而不至者为皇甫湜学皇甫湜而不至者为孙樵自樵以降无足观矣伏惟内翰执事天之所付以收拾先王之遗文天下之所待以觉悟学者恭承王命亲执文柄意其必得天下之奇士以塞明诏轼也远方之鄙人家居碌碌无所称道及来京师久不知名将治行西归不意执事擢在第二惟其素所蓄积无以慰士大夫之心是以羣嘲而聚骂者动满千百亦惟恃有执事之知与众君子之议论故恬然不以动其心犹幸御试不为有司之所排使得搢笏跪起谢恩于门下闻之古人士无贤愚惟其所遇盖乐毅去燕不复一战而范蠡去越亦终不能有所为轼愿长在下风与宾客之末使区区之心长有所发夫岂惟轼之幸亦执事将有取一二焉

谢应中制科启 苏轼

临轩防士方搜絶异之才随问献言误占久虚之等忽从佐县擢与评刑内自顾于无堪凛不知其所措恭惟制治之要惟有取人之难用法者畏有司之不公故舍其平生而论其一日通变者恐人材之未尽故详于采聴而略于临时兹二者之相形顾两全而未有一之于考试而奄之于仓卒所以为无私也然而才行之迹无由而深知委之于察举而要之于久长所以为无失也然而请属之风或因而长此隋唐进士之所以为有 魏晋中正之所以为多奸惟是贤良茂异之科兼用考试察举之法每中年輒下明诏使两制各举所闻在家者能孝而恭在官者能廉而慎临之以患难而能不变邀之以宠利而能不回既已得其行已之大方然后责其当世之要用学博者又须守约而后取文丽者或以用寡而见尤特于万人之中求其百全之美凡与中书之召命已为天下之选人而又有不可测知之论以观其默识之能无所不问之防以攷其博通之实至于此而不去则其人之可然犹使御史得以求其疵諫官得以求其素一防清议輒为废人是以始由察举而无请谒公行之私终用考试而无仓卒不审之患盖其取人也如此之密则夫不肖者安得而容轼才不迨人少而自信治经独传于家学为文不愿于世知特以饥寒之忧出求斗升之禄不谓诸公之过聴使与羣豪而并游始不自量欲行其志遂窃俊良之举不知才力之防论事迂阔而不能动人读书踈畧而无以应敌取之甚愧得之益惭此盖伏遇某官以尧舜之道辅吾君以伊周之业为己任恐一夫不获自尽以为庙堂之忧思天下所以太平必用刍蕘之说亟收末学以辅大猷然志卑处高德薄宠厚厯观前辈由此为致君之资敢以防躬自今为许国之始

贺杨龙图启 苏轼

伏审新改直职擢司諫垣传闻遐遐竦动观聴咸谓国家之钜福乃用諫诤之真才必能深言以补大化方今朝廷之上号为无讳而太平之美终不能全台諫之列歳不乏人而众 之原犹或未去岂聴之者徒能容而不能用言之者但为名而不为功厯观古人之效忠皆因当世而用智不务过直期于必行右尹子革因坟典而道祈招之诗左师触龙语饘粥而及长安之质徒尽拳拳之意不求赫赫之名此仁人及物之休功忠臣爱君之至分伏自顷歳所更几人

席未暖而輒迁踵相蹶而继去然一身之讥固足以免矣而积歳之病当使谁去之恐习惯以为常遂因循而不振虽在僻陋顾常隐忧以为必得朴忠忧国之人而又加以辩智得君之术言苟获用国其庶几伏惟谏院龙图才雄于世而常若不胜节过于人而未尝自异素练边事深知兵骄顷持铨衡实识官冗必将举大体而不论小事务实效而不为虚名轼最防深知愧无少补方倾耳以听愿续书谏苑之篇若有待而言或能着争臣之论阻以在外无由至门踊跃之懷实倍伦等

贺欧阳少师致仕启 苏轼

伏审抗章得谢释位言还天眷虽隆莫夺已行之志士流太息共高难继之风凡在庇庥共增庆慰伏以懷安天下之公患去就君子之所难世靡不知人更相笑而道不胜欲私于为身君臣之恩系縻之于前妻子之计推葺之于后至于山林之士犹有降志于垂老而况庙堂之旧欲使辞福于当年有其言而无其心有其心而无其决愚智共蔽古今一涂是以用舍行藏仲尼独许于顔子存亡进退周易不及于贤人自非智足以周知仁足以自爱道足以忘物之得防志足以一气之盛衰则孰能见几祸福之先脱履尘垢之外常恐兹世不见其人伏惟致政观文少师全德难名巨材不器事业三朝之望文章百世之师功存社稷而人不知躬履艰难而节乃见纵使耄期笃老犹当就见质疑而乃力辞于未及之年退托以不能而止大勇若怯大智如愚至贵无轩冕而荣至仁不导引而壽较其所得孰与昔多轼受知最深闻道有自虽外为天下惜老成之去而私喜明哲得保身之全伏暑向阑台 何似伏冀为时自重少慰輿情

贺吕副枢启 苏轼

伏审近膺告命入总枢机中外耸观朝廷增重伏惟庆慰窃以古之为国权在用人德厚者辅其才而名益隆望重者无所为而人自服是以淮南叛国先止谋于长孺汾阳元老尚改观于公权樽俎可以折冲藜藿为之不采哀此风流之莫继久矣寂寥而无闻天亦厌于凡才上复思于旧德恭惟枢密侍郎性资仁义世济忠嘉岂惟清节以镇浮固已直言而中病出领数郡若将终身小人谓之失时君子意其复用迨兹显拜夫岂偶然然而荷三朝两世之恩当春秋贤者之贵推之不去凛乎其难进伯玉而退子瑕人皆望于门下烹桑羊而斩樊哙公无愧于古人莫若尽行畴昔之言庶几大慰天下之望轼登门最旧称庆无缘踊跃之懷实倍伦等

贺文太尉启 苏轼

伏审孚号杨庭临轩遣使出节少府授钺斋坛夷夏耸观兵民交庆盖功业盛大则极名器而后称惟德度宏远故处富贵而若无蔚为三世之宗臣岂独一时之盛事恭惟留守太尉道本天合德为人师信及山川之豚鱼威加两河之草木身任休戚言为重轻始若留 弱冠而遇高祖晚同尚父黄髮而亮武王既奉册书益新民聽方将威懷北虏系颈长缨约束何公轨流故道然后入调伊傅之鼎归蹶松乔之游輿论所期斯言可必轼谪官有限趋侍无缘踊跃之心宣寫难尽

登州谢两府启 苏轼

迂愚之守没齿不移废逐之余归田已幸岂谓承宣之寄忽为枯朽之荣誉此东州下临北徼俗近齐鲁之厚迹皆秦汉之陈宾出日于丽樵山川炳耀传夕烽于海峤鼓角清闲顾静乐之难名笑妄庸之滥据此盖伏遇某官股肱元圣师保万民才全而德不形任重而道愈远谓使功不如使过而观过足以知仁特借齿牙曲成羽翼轼敢不服勤簿领祇畏简书防蹇磨鋤少答非常之遇息黥补劓渐收无用之材过此以还未知所指

谢中书舍人启 苏轼

起于贬所未及期年擢置周行遽参法从省躬无有被宠若惊窃惟人材进退之间实为风俗隆替之渐必欲致治在于得贤虽一薛居州齐言不能移楚而用范武子晋盗可使奔秦崔琰进而廉俭成风扬绂用而淫侈改度诚国是之先定虽民散而可收防茅茹者以彙而征附马者必先其直用舍既见好恶自明人知所趋势有必至今朝廷方讲当世之务力追前代之隆虽改定法令足以便事而未足以安民宽弛赋役足以安民而未足以成俗是以登进耆老搜求隲良将使士知向方民亦有耻如轼者山林下士轩冕弃材少而学文本声律雕虫之技出而从仕有狂狷婴鳞之愚沟中不愿于青黄爨下无心于宫徵误防收拾已出优恩荐履禁严殊非素望此盖伏遇某官德配前哲望隆本朝名重圭璋上助庙堂之用言为蓍蔡下同卿士之谋余论所加虚名增重知丹心之尚在怜白首之无归特借宠光以宽衰病任隆才下恩重报轻直道而行恐非所以安愚不肖之分充位而已又不足以解卿大夫之忧蚤夜以思进退惟谷恐惧战越不知所裁

答试馆职人启 苏轼

伏承射策玉堂方观笔阵校文天禄遂秀儒林党友增华缙绅共庆国家求贤之道必于闲暇无事之时贤者报国之功乃在缓急有为之际养之无素则一旦欲用而何由待以非常则临事欲辞而不可故纳之于英俊相从之地观之以世俗不见之书非独使之业广而材成抑将待其资深而望重某官学优而仕行浮于名辞令从容议论慷慨追还正始文章为之一新传写都城纸墨几于骤贵得士之喜非我敢私轼衰病侵寻文思荒落职在翰苑当发防而莫辞识匪通儒惧摘藻之不称过烦临贶宠以书词永为巾笥之珍愧乏琼瑶之报

谢贾朝奉启 苏轼

自蜀徂京几四千里携孥去国盖二十年侧闻松楸已中梁柱过而下马空瞻董相之陵酌以只鸡谁副桥公之约宦游岁晚坐念涕流未报不赉之恩敢怀盍归之意常恐樵牧不禁行有雍门之悲雨露既濡空引太行之望岂谓通判某官政先慈孝义笃友朋首隆学校之师儒次访里闾之耆旧自嗟来暮不闻防薤之规尚意神交特致生刍之奠父老感叹桑梓光华深衣练冠莫克垂涕于墓道昔儒今袴尚能鼓舞于民谣仰佩之深力占难尽

贺范端明启 苏轼

恭承明诏追录旧勲名陞秘殿之严实遂安车之养仍推余泽以及后昆闻命以还有识相庆窃谓死生之事圣贤有不能了父子之际古今以为难言方其犯雷霆于一时岂意收功名于今日惟天知我絶口不言伟事发之相重非人谋之所及恭惟致政端明学士至诚格物隱德在人弼亮四世如毕公壽考百年如卫武独立不惧舍之则藏惟有清蒲之言尚在金滕之匱白日一照浮云自开坐使遗民复观盛事子孙归沐下万石之里门君相乞言授三老之几杖更延眉壽永作元

上参政侍郎启 王安国

伏审参政侍郎被书法座賛政台司 筮献祥縉绅協望窃以海岳形势非聪明独运之能安庙堂经纶尽圣贤相济之成効是繫丞弼之重以底神人之和盖内揆百工坐弭瘵官之患而外厘四鄙默销猾夏之谋畴咨命世之豪仰称代天之任幸千齡之胥契聳亿姓之具瞻恭惟某人文妙于古今行孚于典防应不测之变而制作若出闲暇议非常之礼而利害莫能动摇凜然名声播在夷貊北门持橐三朝积润色之功东府秉均多士发稽留之叹侧闻孚号毕罄欢心矧忧患之余生辱品题之旧赐病骨未逢于起废朽株尚冀于嘘枯引望门阑但驰悃悞

贺諫院舍人启 沈 恬

伏审外庭拜命西掖代言英材防知清论归美窃以文章辞令之选兹实法度风教之原惟厚薄邪正之所归乃治乱盛衰之攸系纂辞深厚故能通物变之防賛指坦明遂可格天下之动以至谕恩恳恻隱民疲俗之变心申制简严武夫悍卒之夺气盖识通于用者则遇变皆合言发于性者则感人易深岂特经纶之大猷兹惟鼓舞之盛事矧欲流风之复古属当施惠以趋时宜席真贤上副明主恭以諫院舍人纯赋学敏深资性原兼来百善之长独收高世之誉机灵深造于道德志力久形于功名润色铺张固归大手建明将顺实稟素心謇谔霜台耻混众人之诺诺讲摩圣训力震大声之咄咄以乐育则休有成材之风以直笔则刊正后来之法振翼云汉垂光虹蜺远近所传縉绅交颂灿然述作将建一家之言鋭于讨论庶追三代之业盛际甫期于登賛庶休行被于康功雅辱眷存窃盛欣跃未遑庆覲先屈眷辞深惟降挹之谦祗益感铭之实

贺蔡密学启 张 载

兹审显被眷图擢陞要近宠辉之涣虽儒者至荣付任所期盖朝廷有待藹传中外孰不欣愉窃以笃实辉光日新而不可掩者德之修祸福吉凶人力所不能移者命之正今天下谋明守固功累治勤浮议不能摇巨力不能破未有若明公之盛也上知之民信之所不足独未施于庙堂之上耳顷庆卒内向惶骇全陝府郡昼闭莫知所为士民失措室家相吊继闻为渭师所败溃遁而东其气沮摧十亡八九虽非盛举然应机敏捷使大患遽销明识之士知有望焉今戎毒日深而邊兵日弛后患可悼而国力既殫将臣之重岂特司命王卒惟是三秦生齿存亡

舒惨之本莫不系之旌旆在秦正犹长城巨防利兵坚甲幸少选未召乃西陲不赉之福载投迹山荒所有特一家之众担石之储方且仰依兵庇有恃而生诚愿明公置懷安危维夙夜自信之心宜升不息以攘患保民为己任盖知浮议强力不足以胜人心夺天命则含识之徒不胜至幸引跂门仞无任欢欣祈俟之极

谢馆阁校勘启 林 希

备员书局已忝下陈假职儒林尤非素望始甚疑而终信外弥惧以中慚抚已何堪腴顏无措恭惟本朝右文之盛列圣向儒之勤悉聚前世之书远侔治古之烈虽禁中所览别贮于太清而秘阁所藏颇多于三馆并选髦峻俾资校讐百年之间顾网罗遗逸之不暇四库之录犹品类参差之不齐固尝订正其舛讹又已撰次其条目积有朽渍寢忘本真爱自嘉祐以来始诏儒臣更定就给笔札增置吏员悉发广内之藏兼访名山之副于是有出于閤间而应募寫于郡国而送官其来不穷所得益广互抄以补残缺相校而除复重一新黄卷之风尽销白简之蠹凡择诸儒而共处或容贱士于其间并列承明之庠仰给太官之膳优游职业得惠意以讨论从容歲年可观人之能否遂因奏课例进职名方其始时可谓慎选至于希者何足道哉曩在治平之初尝预集贤之才召逾朞月遽遭凶余生仅存孤养甫迫比兹再至功已垂成计其旧劳已实何有矧以平时着令先进诸公必有大臣之荐论重加禁林之校试尚须第等然始推恩而希忧患早衰荒唐不学久游吴市莫获异书未过蜀人安知竒字由趋走州县之贱登道家之蓬山脱钩校簿书之烦窥上帝之册府并为侥幸徒速嘲讥退思厥由何以致此兹乃伏遇留守司徒侍郎台衡旧德社稷元勲鸿钧运乎至和以无弃物菁莪喜乎乐育罔有遗材得由下邑之卑擢陪诸生之后良以寅缘之旧迄兹亨防之成遂俾陋愚获被嘉宠虽远施者不以其报而自知者所以为明昔者西汉藏书之多天禄石渠号称其最盛当时校文之士刘向扬雄得久于其中况今简帙甚繁鉛槧未已愿少假以时日庶得就其编摩岂惟平生多所未见实亦终老庶几自娱譬夫就市阅书委身为吏较前贤而已幸冀夙志之可偿区区之愚有在于是过此以往未知所裁

谢中制科启 苏 辙

辙以薄材亲承大问论议羣起予夺相乘不意圣恩之曲加犹获从吏之殊宠伏读告命重积震惶嘉其爱君之心期以克终之誉辞不获命媿无以堪辙生于远方有似愚直防承父兄之余训教以彊已而力行虽为朝廷之直臣常欲挺身而许国位卑力薄自许过高言发譴生事势宜尔迨寻防问之防意实皆安危之大端自谓不及则曰志勤道远开其不讳则曰无悼后害窃以制防之及此又念科目之谓何罄其平时之所懷犹惧不足以仰对言多迂濶罪岂容诛伏以国家取人之科惟是刚柔适中之士太刚则恶其猖狂不审太柔则畏其选懦不胜将求二者之中属之以事固非一介之贱所或能当辙之不才过乃由此然而诃切愤悱为知士之所不许因循鹵莽又有国之所乐闻使举世将以从容而自居则天下谁当以奋发而为意此盖某官羽翼盛时冠冕多士思尽刍蕘之议以明寬厚之风羈危之所恃以为无忧纷紜之所恃以为定论顾惟无似尚辱甄收感恩至深求报无所昔者西汉之盛莫如文景孝武之贤制防所兴世称晁董公孙之对然而数子者颂咏德美而不及其讥刺故三帝者好爱文字而

无闻于寬容豈其时君不可为之深言抑其羣臣亦将有所不悦轍才虽不逮时或见容非懷爵祿之荣窃喜幸防之至

贺河阳文侍郎启 苏 轍

伏审力辞枢务得请名邦恩礼便蕃中外庆慰伏惟判府司徒侍郎辅相三世始终一心器业崇深不言而四方自服道德高妙无为而庶务以成此朝廷所以迟迟于均佚之书而士民所以睠睠于保厘之命顾惟出处之义实繫功名之终留侯志于赤松晋公安于綠野油然自得夫岂不懷矧惟三城密迩全洛政独止于民社乐有助于林泉道大难名信后来之莫继民犹思治恐久安之未遑

宋文鉴卷一百二十二

卷一百二十三

钦定四库全书

宋文鉴卷一百二十三

宋吕祖谦编

啓

上韩康公啓程頤

窃以朝廷取士所以为致治之先公卿荐贤固必有知人之实允谐公议始厌众闻頤也不才少而从学致知格物粗窥圣道之端倪明善诚身未得古人之髣髴徒忘懷于白首窃有志于斯文时和歲丰已足素望言扬德进敢有觊心属嗣皇访落之初乃元老告猷之防岂虞过聽猥被明扬文陛进登被德音之温厚西清入侍密宸宸之辉光考于近世而来可谓非常之遇荷恩为愧揣分则逾若何行为可以报称惟殫素学勉副厚知

定亲书程頤

伏以古重大昏盖将传万世之嗣礼称至敬所以合二姓之欢顾族望之非华愧声猷之弗竞不量非偶妄意高门以頤第几男虽已胜冠未谐受室恭承贤阁第几小娘子性质甚茂德容有光輒缘事契之家敢有防姻之愿岂期谦厚遽赐允从穆卜良辰恭申言定有少仪物具如别牋

贺提刑上官正言状曾肇

审奉诏书改临淮甸端人所至善类交欣窃以提刑正言学有本原行无缙涅鸿笔丽藻兼大夫之九能直道正言过士师之三黜少缓追锋之召复为揽辔之行内顾缺然居常仰止岂意偷安之迹获依善贷之仁未即趋风采深企德

谢校勘啓曾肇

叨荣非据循分起羞窃以道有降升得人则举士之贵贱繫上所行国家稽古尚贤因能任职尊朝廷以待非常之豪杰虚馆阁以收未试之英材凡预详延毕归遴简岂容积累辄冒甄升如肇者稟生多艰受性不敏防赖母兄之教育长闻师友之绪余窃玩文辞居有顓防之累欲追时俗故无防给之材知直道而事人耻曲学以阿世因缘干禄黽勉入官顾山林独往之姿乏左右先容之助分甘流落望絕亨嘉岂图日月之余光不见尘埃之末路滥姓名于册府尸

友教于上庠诵陈言于新学之前处无用于有为之防每见讥于踈阔愈自信于行藏迨此歲成亦偕序进此盖伏遇史馆相公秉心岂弟为世典刑乐育人材獎成士类顾惟弱质久玷下陈徒窥夫子之文章岂识周公之制作蚤防收引曲荷并包致葑菲之弗遗实陶镕之有素敢不防寻旧学尊信所闻不忤不求肯易终身之守无适无莫庶几惟义之从非徒成自爱之私亦以答太公之施

谢中书舍人啓 曾肇

叨居近着与典贊书自顾无堪将何以称歷观虞夏商周之盛则有典谟训诰之传肆笔矢言之文是为歷代之宝岂独一时之士莫匪圣贤之徒盖其四海食味别声之伦皆知道德之意迨夫王迹既熄流风仅存射父之作训辞安于之贊名命犹能称厥前世行于诸侯至两汉之兴文章为盛而三王之册简牘具存自兹以还去古弥远然而诵美阳之诰则文士为之变风读奉天之书则武夫至于垂涕盖以用人之得失系于斯道之盛衰岂兹妄庸可备任使如肇者学虽有志材不逮人闻诗礼之绪余仅传糠粕议帝王之制作未及门墙蚤缘雕篆之科遂齿缙绅之末越从州县入校图书邓高密之素心止希文学应汝南之自媿骤玷承明歲月屡迁宠灵寢厚纪三朝之功德书二圣之勲言徒窃食于太官每腆顏于文陛固盍投身于冗散岂堪厠迹于凝严冒居四禁之聯分押六司之事伶俜弱质从属车之清尘蹇浅寡闻参外廷之末议虽云荣耀更积惊忧重念出自寒鄉幸逢圣代维是一门之内实防六帝之恩举防造化之仁亦赖陶镕之赐此盖伏遇某官辅成世教協贊人文櫛栉侏儒虽小不废豨苓鸡壅有用必收遂令一介之愚获出羣贤之后敢不勉进薄技力行所知润色乾坤之容辞虽不逮委输海岳之广志则有余冀收效于毫厘庶酬恩于万一

回冯如海学士啓 曾肇

窃审擢自南宫进陞东观增重藩垣之寄允为簪纓之光伏惟庆慰知府学士赋性中和受材閎郭质直好义久见推于士林平易近民矧廉明于吏道兰虽幽而自媚玉愈久而弥温骑尉即潜乏懷鉛之递直黄門久次防负弩之荣归兼是宠光可称宦達未展及門之庆忽防冯允之辞服谊甚高铭心敢怠

贺翰林曾学士啓 陈师道

内翰文丈召从西掖入直北門岂惟儒者之荣实系朝廷之重恭惟论思献纳之任必须道德文学之流不杂用于他材故專收于夙望成命既下欢声大同虽图任未快于羣情而天下已被其陰賜兄弟相望乃平世之荣光鲁卫同升亦熙朝之故事顾惟庸望早辱知怜虽老弃诸侯乃下流之自取而早亲文席顾遗迹之尚存侧闻新命之传倍有輿人之庆秋阳尚炽禁直云初伏冀上为庙朝精调寢寤

谢馆职啓 秦观

法同博士阅五载而迁官例比编书通三年而改秩宠灵既逮愧惧实深伏念观族系单防器能浅陋少时好赋仅成童子之雕虫中歲穷经未究古人之糟粕始荣名于进士俄充赋于直言滥居方物之前叨被传车之召文章末技固非道义之尊箕斗虚名祇取谤伤之速亟从引避几至颠隮褒未就于袞华恶已成于疮痍三朞之内王尊乍佞而乍贤七年之中鲁田一与而一夺但以偏亲垂老生计屡空聊复腴顔以居未能投効而去日期沙汰分絶进升岂期积日以累劳輒亦逢年而遇合束縕还妇虽防假借之私惩羹吹虀尚虑谴诃之及窃观前史具见鄙悰西属中郎孔明呼为学士东海钓客建封任以校书虽为将相之品题实匪朝廷之选用夫何寡陋遽有遭逢此盖伏遇某官道欲济时仁能锡类始怜贫女稍分秦璧之光终念波臣为激越江之水矧兹竒蹇亦与甄收敢不以古人行已之方为国土报君之义千金 帚聊依翰墨以自娱一割鉛刀或冀事功之可立

防书 秦观

蚤年拥彗尝趋大丞相之门末路防书实佐先翰林之事重以世母出于伯姜既事契之久敦宜婚姻之申结敬承佳命增慰夙心

答林学士啓 张耒

伏审光膺宸綍进直兰堂荣命始行儒林增重窃惟馆阁之选盖待儒学之臣既非典领之权几于冗散又无议论之责少补丝毫宜非仕者之愿居而为一出之所尚盖学问者君子之事职卑而待之不轻诗书非俗远所知禄薄而意则甚厚虽厌居寂寞夸者至谓之病坊而脱落等夷赤尉均称于宰相名既如此人犹贵之而况将相之选踵武相寻祖宗以来抡择为重故本朝之宠儒者虽他官必假此名伏惟某官文丽而用长才周而学富父子济美兄弟有声行实着于家庭彊济冠于朝右冠豸弹击风霜凜然揽轡按行窾窾立解已进登于卿棘复入宜于道山岂專足止之功实示超腾之渐耒淮楚晚进场屋后来辱登门墙尝备官属当趋风于末坐乃首贄于长牋为礼则勤循分而惧孔鸾同列笑鲁钝之卑飞珠玉藏家腾辉光于贫屋永为好也何日忘之

润州谢执政啓 张耒

伏以文章为学者余端故先王不以经世富贵非人力所制故君子以为在天而况修辞寒浅未涉作者之流趋世濶迂每在众人之后则其投闲置散防后跋前在所当然夫复何恨伏念耒羈孤一介憔悴余生困極楚者十年追饥寒于斗禄仕已成于漫浪意何有于功名始误寘于成均复进升于儒馆佐东观之论著颇见旧闻纪先帝之事功遂游藏室擢升右史密侍清光虽儒学之至荣岂草茅之素望而疾病侵耗心力衰疲分敢自安义当引去尚叨便郡获养残躯静循此恩盖有所自兹盖伏遇某官曲成万类器使庶工直铸鏐防疾者未尝遽废大梁小桷施之各以其宜致此枵虚未即捐弃狱讼希简职事不废乎诗书山林幽深形骸颇为之清快庶余龄之可养幸沉痾之有瘳仰报至恩将必有在

贺潘奉议致仕啓 张 耒

伏审亲家致政奉议上还印绶退即里闾已私知止之安将受永年之福凡居亲旧实助忻愉窃以人之多难在于儒者尤甚壮年讲学谓富贵利禄之可期出试多遗信功名遇合之有命加以歲月荏苒时不待人目顾簪裳义则当止彼贪冒无耻者率皆优佚而老惟进退顾义者不免饥寒之忧未余汉庭之赐金复休故社之乔木追计官游之廩禄何有一毫复与平生之簞瓢相从三迳莫非命也谓之何哉伏惟某官奥学渊源懿行金玉久栖迟于末路遂高退于明时清誉益隆多样有在耒自怜罪戾久困泥涂延企高风但懷景仰

谢解啓 李 廌

古之士重今之士轻时世使然风俗乃尔贩牛版筑奚必诗书钓渭耕莘曾何科目盖君子之学以道义为己任故古之仕者以卿相为当然有三顾五聘而未从或千驷万钟而不受今以言取士但愧空文凡应举覓官隣于自鬻宾兴久废法禁益严徒以困穷之身愿入英雄之彀廌行年二十有九蚤苦衰残著书十万余言常懷忠愤谋已甚拙许国惟坚虽频待诏于公车未得为郎于金马屡作逐客每叹虚生第深没世而无名以累青云之知己比缘秋试偶尔计偕輒生妄心窃有荣幸此盖伏遇某官久垂教诲曲赐题评恩等丘山义同卵翼致兹昧陋有望亨衢敢不益励进修上副眷予

回永兴李待制啓 蔡 肇

西鄙宿师视故都为襟要中宸出命借旧德以镇临去湖山清絕之观揽闕辅浩穰之防师垣倚重麾帟有光虽善奏之屡陈谅雅懷之难徇闻斋 之取道属驿骑之按邊但欣覲德之嘉已负修辞之晚敢图眷与先赐拊存维谦德之光可以厚俗然等威之制誠不遑安残律凝寒修途匱薄神明所履福履宜臻将迓趋承更加调防以体朝家之眷用慰邦人之思

回知河中府宇文文学士啓 蔡 肇

单车赴治喜并川涂传舍投间屡烦輿卫属抗旌之已远慙追路之不遑窃承临莅之初首辱緘封之赐教条孚若足见余材词义焕然载加厚礼茂惟贤哲休有福祥恭惟某官抱识清明受材宏博韞以传经之学发为华国之文自识拔于先朝久践扬于要职中外歷试休显有称暂屈远图请一麾而坐府即膺宠渥宜三节而造庭肇此备官实资芘赖遂将承教但窃欣愉

与常州廖明略学士啓 蔡 肇

防鄙之资顽钝于事寸长尺短素分岂不自知利后责先涉世盖常如此众譴不息公论莫逃自取斥防尚防全度东南佐郡乡庐以得为荣饱暖荷恩家人恨降之晚勿违懷土窃复依仁伏惟某官汪洋之学造防瑰玮之文絕众久推雅量素着直声早登献可之班暂辍承流之寄顾惟蹇薄每辱矜怜赐第西清早忝同升之义讐书东观晚叨聯事之荣暨兹索米之穷亦拜

指困之惠坐曹同力暂无画诺之良旁舍见容悦知歌呼之治愈降问望即被褒升愿言其私预以为念

贺陈复常教授启 晁补之

擢领掾曹归临乡校与从游之良旧私慰喜以居多窃惟国之求才病取舍之胶于法士之涉世患进退之失其中设科举爵位以诱人假诵数词章以干禄须其出试则乡党自好者耻夫屡献不以礼际则山林长往者岂其肯来故上安于有司之区区糊名以为公而士惑于古人之皇皇载质以为辱莫闻览德之凤率多食饵之鱼恭以某官行独而通志防而降不落落以如玉矧泛泛其若鳧穷无立锥术可济国至于博览之学絶世之文要其平生固曰余事尚不屑去安有求闻声自籍于诸公章数腾于当宁拔起闾里朋类之荣收还妻孥亲党所喜未促公车之诏聊从泮水之行庶观成山必自累土辞尊及富仕何往而非安有为与行志苟存而皆可貽賤良幸修庆独稽倾咏之诚倍于侪等

答贺李祥改宣德启 晁补之

延对宸廷改荣京秩从游兹旧慰喜良多恭以宣德懿行不羣令仪可度粤从防学夙有俊声下帷未省窥园持竿寧悟流麦其精如此故资之深珠玉蕴含山川辉媚自当名世岂独传家补之气合相求心均莫逆泝澣紱之何取櫟株拘之自留临水送将牛羊方下望风懷想鸿雁欲来庶几逢声子之班荆且复过孟公而投辖未遑驰庆先辱流音尚阻盍簪惟期彊饭

永兴提刑谢到任启 李昭玘

委辔下车勤吏民之趋走据桉涉笔拥文墨之纷纭将何补于事功徒有慙于面目伏念昭玘迂疎末学鄙野孤生赋才不长闻道最晚栖迟日月经成九转之功蹭蹬风尘未防一顾之价再预充庭之贡漫为入格之游敢意斐文偶尘精览初乏青钱之作宜置下陈误经黄绢之评遽超数等叨从禄仕擢备儒官詎能握管以窥天良愧奔蜂之化蠋属大明之继照延旧德以亮功博牧人才盛集册府开阁之始岂乏异能备员者谁乃出下客人共荣于入彀时皆谓之登瀛正始诸贤滥陪武步石渠秘籍顿发见闻惟知反己以自求敢觊因人而幸进谓有昭昭之明者必有冥冥之志无赫赫之热者亦无凜凜之寒欲寡过而未能恐修名之不立以愚自信曷尝称博而毁丹与世何尤不暇去婴而归蚡安有本同而未异奚先尝病而后瘳处冲季孟之间仅知所立甘陵南北之部适幸两忘能不能各自其人得不得必尸诸命洋然迎饵詎为宓氏之鱼兀若畏人反类羊公之鹤叹源泉之有本惊蒲柳之先衰一传未终恍已迷其姓氏片文屡过几不辨其偏旁但縻廩粟以偷安何罪书鱼之成蠹久玷外庭之列聊从别乘之行迨及更书复还旧直竟无他异莫追终贾之才名必有可观窃预赵张之政事舍丹鉛之防勘视鞭扑之喧嚣精神仅及于目前智虑或遗于意表蝇纷诉牒驱即复来雁集吏行守之不置间關畏罪龟勉赴功入水必濡每忧揭厉遇风知退冀免摧頽虽殫十驾之劳蔑有尺寸之补间以私门艰窘多事侵陵禄未逮于孤穷歳已惊于迟暮田无附郭久负陶潜之归盗不过门素多张禹之爱屡申愚恳愿守方州猥霑造物之私特假祥刑之任池占河關之胜道连雍

陝之雄小民尚气而喜争巨猾濒山而为盗素称剧部尤籍长才自非冰镜无疵权衡不挠则何以吏知守法人不称冤顾烦闇之无堪适选抡之误及此盖某官元功播物一德亮天见远业于有为期太平之可致论事必同于善使人乐尽其才引伛偻以升高徒烦假手削轮囷而成器几误挥斤敢不慎守官箴勉思民事不近民而邀福无倚法以作威概以中平得之安静少图裨报上副陶成美廕方休曾未虞于巨臂不才自养终愿托于长年过此以还未知所措

昭雪谢执政啓 刘 跋

上圣端临羣贤拱辅万事罔有勿理百姓自以不冤鸿惟累朝钦慎庶狱匹夫輒讞尚戒毫厘之差大臣见诬可容白黒之 昨以祸起不测谤加已亡防燕桑之谋圣主觉其书诈抱田贯之义志士或以死明备见不根之情犹施及嗣之罚穷海万里两枢弗归毒疔三年一门垂尽肆龙飞而云变聿覩见而雪消藐是诸孤首防拯拔实虽甚厚名则未然且将而必诛岂容降等之坐而否则无罪安用防赦之文载援疑辞上求决语初屏错于羣枉又刊落于旧章诏音一传士气如洗此盖某官房杜在位丙魏有声直道以尽大臣之能虚心以应天下之务推引人物不闲戚疎驯致上恩以及存歿重惟先正早预官僚晚歳离骚魂竟招于异域平生精爽梦犹托于故人幸山公之在朝痛介侯之无禄霜露所感日月有期然而贬降之秩未还吊恤之恩尚阙扶杖以聴终观诏令之行造膝而陈更赖弼谐之助言尽于此涕不自收

贺同州侍郎啓 晁咏之

伏审抗防中山易符左辅过家上冢荣动乡邦入境观风喜交隣壤光尘在望跂抃载深恭以某官识洞高明材资英博究观至理深達于天人游戏斯文仰参于造化此古人所以名世而执事与之同风故应变则兼文武而有余惟守道则贯金石而不屈奸谋自寝知汲黯之在朝正色弗回识张公之论事卷舒不失乎正进退愈见其忠弭节藩宣眤三峰而少息秉钧廊庙冠百辟以高騫咏之固陋无闻羈孤寡与未列韩门之弟子詎先鲁国之儒生欣愿执鞭庶几发药虽精神之每竭顾奔走以无阶聴益州之诗获近陪于歌颂就河东之赋实久待于吹嘘翬翬自怜拳拳罔罄

谢永兴待制啓 晁咏之

窃阶奏牍获列宾僚素心每违玷始平之屡荐故人独贺谓宣州之多贤与有欣荣岂徒感激伏念咏之少知自信老迄不逢惟嗜书之甚愚更折臂而弗悔自投筦库殆欲半生力求田园便期归老子平之防嫁未毕西华之兄弟皆贫坐此艰难犹当龟勉然而施者积久而既倦贵或易忘而弗酬欲冀一官弥嗟百拙此盖伏遇某官慨然以风义自任信乎非权势可移力拯穷途如谋己事凡当辟置必欲招徠夫岂徒然曷以称此惟昔人称幕中之客岂特專簿书期防之间而君子报国土之知亦以事容悦阿防为耻窥执事之所以见赐与不悦之所以仰从窃自比于前修要不慙于它日

宋文鉴卷一百二十三

卷一百二十四

钦定四库全书

宋文鉴卷一百二十四

宋吕祖谦编

策问

策问七首 欧阳修

问礼乐治民之具也王者之爱养斯民其于教导之方甚勤而备故礼防民之欲也周乐成民之俗也厚苟不由焉则赏不足劝善刑不足禁非而政不成大宋之兴八十余岁明天子仁圣思致民太平久矣而天下之广元元之众州县之吏奉法守职不暇其他使愚民目不识俎豆耳不闻 歌民俗顽鄙刑狱不衰而吏无任责夫先王之遗文具在凡岁时吉凶聚防考古礼乐可施民间者其别有几顺民便事可行于今者有几行之固有次第其所当先者又有几礼乐兴而后臻于富庶坎将既富而后教之坎夫政缓而迺鲜近事实教不以渐则或戾民欲其不迺而政易成有渐而民不戾者其术何云儒者之于礼乐不徒诵其文必能通其用不独学于古必将施于今愿悉陈之无让

问六经者先王之治具而后世之取法也书载上古春秋纪事诗以微言感刺易道隐而深矣其切于世者礼与乐也自秦之焚书六经尽矣至汉出者皆其残脱颠倒或传之老师昏耄之說或取之冢墓屋壁之间是以学者不明异說纷起况乎周礼其出最后然其为书备矣其天地万物之统制礼作乐建国君民养生事死禁非道善所以为治之法皆有条理三代之政美矣而周之治迹所以比二代而尤详见于后世者周礼着之故也然汉武以为渎乱不验之书何休亦云六国陰谋之說何也然今考之实有可疑者夫内设公卿大夫士下至府史胥徒以相副貳外分九服建五等差尊卑以相统理此周礼之大略也而六官之属略见于经者五万余人而里闾县鄙之长军师卒伍之徒不与焉王畿千里之地为田几井容民几家王官王族之国邑几数民之贡赋几何而又容五万人者于其间其人耕而赋乎如其不耕而赋则何以给之夫为治者故若是之烦乎此其一可疑者也秦既诽古尽去古制自汉以后帝王称号官府制度皆袭秦故以至于今虽有因有革然大抵皆秦制也未尝有意于周礼者岂其体大而难行乎其果不可行乎夫立法垂制将以遗后也使难行而万世莫能行与不可行等尔然则反秦制之不若也脱有行者亦莫能兴或因此取乱王莽后周是也则其不可用决矣此又可疑也然其祭祀衣服车旗似有可采者岂所谓郁郁之文乎三代之治其要如何周礼之经其失安在宜于今者其理安从其悉陈无隐

问古者为治有繁简其施于民也有浅深各适其宜而已三代之盛时地方万里而王所自治

者千里而已其余以建诸侯至于礼乐刑政颁其大法而使守之则其大体盖简如此诸侯大小国盖数千必各立都邑建宗庙卿士大夫朝聘祭祀训农练卒居民度土自一夫以上皆有法制则其于众务何其繁也今自京师至于海隅徼障一尉卒之职必命于朝政之大小皆自朝出州县之吏奉行而已是举天下皆所自治其于大体则为繁矣其州县大小邑间田井训农练卒一夫以上略无制度其于众务何其忽而简也夫礼以治民而乐以和之德义仁恩长养涵泽此三代之所以深于民者也政以一民刑以防之此其浅者尔今自宰相至于州县之有司莫不行文书治吏事其急在于督赋敛断狱讼而已此特浅者尔礼乐仁义吏不知所以为而欲望民之被其教其可得乎夫治大以简则力有余治小以繁则事不遗制民以浅则防其僻渐民以深则化可成此三代之所治也今一切悖古简其当繁繁其可简务其浅而忽其深故为国百年而仁政未成生民未厚者以此也然若欲使国体大小适繁简之宜政事弛张尽浅深之术诸侯井田不可卒复施于今者何宜礼乐刑政不可卒成用于今者何便悖古之失其原何自修复之方其术何始迹治乱通古今子大夫之职也其悉心以陈焉

问三王之治损益不同而制度文章惟周为大备周礼之制设六官以治万民而百事理夫公卿之任重矣若乃祭祀天地日月宗庙社稷四郊明堂之类天子大臣所躬亲者一歲之间有几又有巡狩朝防师田射耕燕飧凡大事之举一歲之间又有几而为其民者亦有畋猎学校射乡饮酒凡大聚防一歲之间有几又有州党族官歲时月朔春秋酺祭询事读法一歲之间又有几其斋戒供给期召奔走废日几何由是而言疑其官不得安其府民不得安其居亦何暇修政事治生业乎何其烦之若是也然說者谓周用此以致太平岂朝廷礼乐文物万民富庶恺悌必如是之勤且详然后可以致之欤后世苟简不能备举故其未能及于三代之盛欤然为治者果若是之劳乎用之于今果安焉而不倦乎抑其设施有法而第弗深考之欤诸君子为言之问孟子以谓井田不均则谷禄不平经界既正而分田制禄可坐而定也故曰仁政必自经界始盖三代井田之法也自周衰迄今田制废而不复者千有余歲凡为天下国家者其善治之迹虽不同而其文章制度礼乐刑政未尝不法三代而于井田之制独废而不取岂其不可用乎岂憚其难而不为乎然亦不害其为治也仁政果始于经界乎不可用与难为者果万世之通法乎王莽尝依古制更名田矣而天下之人愁苦怨叛卒共起而亡之莽之恶加于人者虽非一而更田之制当时民特为不便也呜呼孟子之所先者后世皆不用而治用之而民特愁苦怨叛以为不便则孟子谓仁政可乎记曰异世殊时不相沿袭书又曰事不师古匪說攸闻书传之言其戾如此而孰从乎孟子世之所师也岂其泥于古而不通于后世乎岂其所谓迂阔者乎不然将有說也自三代之后有天下莫盛汉唐汉唐之治视三代何如其民田之制税赋之差又何如其可施于今者又何如皆愿闻其详也

问为政者徇名乎袭迹乎三代之名正名也其迹治迹也所谓名者万世之法也迹者万世之制也正名立制言顺事成然后因名迹以考实而其文章事物粲然其无不备矣可谓盛哉董仲舒以谓三代质文有改制之名而无变道之实者是也自秦肆其虐灭弃古典然后三代之名与迹皆变易而丧其实岂所谓变其道者邪然自秦迄今千有余歲或治或乱其废兴长短之執各由其人为之而已其袭秦之名不可改也三代之迹不可复也岂其理之自然欤岂三代之制止于三代而不可施于后世欤王莽求其迹而复井田宇文求其名而复六官二者固昏乱败亡之国也然则孔子言为政必也正名孟子言为政必始经界岂虚言哉然自秦以来

治世之主几乎三代者唐太宗而已其名迹固未尝三代之一二而其治则几乎三王岂所谓名迹者非此之谓与岂遗名与迹而直考其实欤岂孔子之所谓者有宜而学者弗深考之欤其酌古今之宜与其同异者以对

问古之取士者上下交相待以成其美今之取士者上下交相害欲济于事可乎古之士教养有素而进取有渐上之礼其下者厚故下之自守者重上非厚礼不能以得士士非自重不能以见礼于上故有国者设爵禄车服礼乐于朝以待其下为士者修仁义忠信孝悌于家以待其上设于朝者知下之能副其待则愈厚屈下者知上之不薄于己故愈重此岂不交相成其美欤后世之士则反是上之待其下也以谓千利而进尔虽有爵禄之设而日为之防以革进之滥者下之视其上也以谓虽自重上孰我知不自进则不能以達由是上之待其下也益薄下之自守者益不重而轻呜呼居上者欲得其人在下者欲行其道其可得邪原夫三代取士之制如何汉魏迨今其变制又如何宜歷道其详也制失其本欲其复古当自何始今之士皆学古通经稍知自重矣而上之所以礼之者未加厚也噫由上之厚然后致下之自重欤必下之自重然后上礼之厚欤二者两不为之先其孰亦奚由而合也宜共陈其本末与其可施今者以对

策问二首 刘敞

问唐时歲举进士至烦矣然所取不过三四十人今国家间四歲乃一举进士至简矣然取之多或至五六百人议者甚疾此欲放唐制则恐贤士失职者众欲仍旧贯则吏员不可胜纪夫贤士失职者众则怨必兴于下吏员不可胜纪则力必屈于上裁此二者宜奈何诸生极意画焉

问学者治仁义之术皆称孟轲轲讥宋牼之言利也曰号则不可是所慎者莫如号也然而轲教梁齐之君则曰好勇不害好乐不害好货不害好色不害夫勇之与乐货之与色足为号乎轲之讥人甚详而自任太略轲不宜至此者也试相与辨之

策问二首 范镇

问律之例有八以准皆各其及即若若春秋之凡然学者不可以不知也当条八者之意与夫着于篇者之說则可以观从政之能不能也

问契稷同出于嘗而分治商周方尧舜时功德俱施于民者及汤武有天下国号曰商号曰周以明受之于祖也高祖起汉中定秦暴虐号曰汉得之自己也国朝太祖受周禪平五代之乱起于宋号曰宋得之亦自己也僖祖尝迁矣乃者复迁而东向法商周乎抑法汉乎将前世亦有考乎其明言之

策问二首 张载

问三代道失而民散民散浸淫而盗不胜诛矣鲁之衰也季康子患盗孔子谓荀子之不欲虽赏之不窃夫制产厚生昭节俭贱货财使人安其分宜若可为也今欲使举世之民厚赏焉不窃如夫子之言其亦有道乎问世禄之荣王者所以録有功尊有德爱之厚之示恩遇之不穷也为人后者所宜乐职劝功以服勤事任长廉远利以嗣述世风而近世公卿子孙方且下比布衣声病售有司为不得已为贫之仕诚何心哉盖孤秦以战力窃攘灭学法坏田制使儒者风义寢敝不传而士流困穷有至糟糲不厌自非学至于不动心之固不惑之明莫不降志辱身起皇皇而为利矣求口实而朶其颔为身谋而屈其道习久风变因不知求任非义而反羞循理为不能不知廕袭为荣而反以虚名为善继今欲举三王教胄之法使英才知劝而志行修阜四方养士之财使寒俊有归而衣食足取充之计讲擢之方近于古而适于今必有中制众君子彊学待问因将裨起盛明助朝廷政治着于篇观厥谋之得失

私试策问一首 苏轼

问人主莫不欲安存而恶危亡然而其国常至于不可救者何也所忧者非其所以乱与亡而其所以乱与亡者常出于其所不忧也请借汉以言之昔者高帝之世天下既平矣当时之所忧者韩彭英卢而已此四王者皆不能终高帝之世相继仆灭而不复续及至吕氏之祸则由异姓也吕氏既已灭矣而呉楚之忧几至于亡国方韩彭吕氏之祸惟恐同姓之不蕃炽昌大也然至其为变则又过于异姓远矣景帝之世以为诸侯分裂破弱则汉可以百世而无忧至于武帝诸侯之难以衰而匈奴之患方炽则又以为天下之忧止于此矣及昭宣元成之世诸侯王既已无足忧者而匈奴又破灭臣事于汉然其所以卒至于中絶而不救则其所不虑之王氏也世祖既立上惩韩彭之难中鉴七国之变而下悼王氏之祸于是尽诸侯将而不任以事裁灭同姓之封而黜三公之权以为前世之 尽去矣及其衰也宦官之权盛而党锢之难起士大夫相与搢腕而游谈者以为天子一日诛宦官而解党锢则天下犹可以无事于是外召诸侯而内胁其君宦官既诛无遗类而董卓曹操之徒亦因以亡汉汉之所忧者凡六变而其乱与亡輒出于其所不忧而终不可备由此观之治乱存亡之势其皆有以取之欤抑将不可推如江河之徙移其势自有以相激而不自知欤其亦可以理推力救而莫之为也今将使事至而应之患至而为之谋则天下之患不可以胜防而政化不可以胜变矣则亦将朝文而莫质忽寛而骤猛欤意者亦有可以长守而不变虽有小患而不足防者欤愿因论汉而极言其所以然

国学秋试策问一首 苏轼

国所贵乎学士大夫者以其通古今而考成败也昔之人尝有以是成者我必袭之尝有以是败者我必反之如是其可乎昔之为人君者患不能勤然而或勤以治亦或以乱文王之日昃汉宣之厉精始皇之程书隋文之传餐其为勤一也昔之为人君者患不能断然而或断以兴亦或以衰晋武之平呉宪宗之征蔡苻坚之南伐宋文之北侵其为断一也昔之为人君者患不信其臣然而或信以安亦或以危秦穆之于孟明汉昭之于霍光燕唵之于子之德宗之于卢杞其为信一也此三者皆人君之所难有志之士所常咨嗟慕望旷世而不获者也然考此数君者治乱兴衰安危之效相反如此岂可不求其故欤夫贪慕其成功而为之与惩其败而

不为此二者皆过也学者将何取焉按其已然之迹而诋之也易推其未然之理而辨之也难是以未及见其成功则文王之勤无以异于始皇而方其未败也苻坚之断与晋武何以辨请举此数君者得失之源所以相反之故将详观焉

省试策问一首 苏轼

问孟子曰君仁莫不仁君义莫不义君正莫不正一正君而国定君子之至于斯也亦可谓用力省而成功博矣陛下嗣位于今四年未言而民信之无为而天助之虽羣臣有司不足以识知盛德之所在然窃意其万一殆专以仁孝礼义好生纳諫治天下也子大夫生于此时而又以德行道艺寘兴于庭将必有意于孟子之言正君而国定愿闻所谓一言而兴邦修身而天下服者尧舜尚矣学者无所复议自汉以来道德纯备未有如文帝也今考其行事而可疑者三上林令吏之不才而虎圈嗇夫才之过人者也才者遗而不录不才者置而不问则事之不废坏者有防然则兵偃刑措何从而致之南越不臣宠以使者呉王不朝赐以几杖此与唐之陵夷藩镇自立以邀旄钺者何异不防于姑息苟简之政欤传曰三王臣主俱贤五霸不及其臣文帝不见贾生自以为过之既见不如也文帝岂霸者欤帝自以为不如而魏文帝乃以为过之此又何也抑过之为贤欤将自谓不如为贤欤汉文所以为文殆以是三者而可疑如此愿与子大夫论之以待上问而发焉

进士策问三首 刘攽

问古者藏冰以御雹灾禁原蚕以蕃马四时改火以救民疾出土牛以送寒气夫天人相感皆以其类凡此数者其説谓何且其説皆春秋周礼月令圣贤之记非鄙近浅陋所传述者诸生毋以不通而轻沮毁之也问古有宗子者以管领族人今不知其説如何为之者何人分大小者何故领族人之状何若累世之后有所断絶否今世亦可行之乎当为明説焉

问古者议事以制不为刑辟今国家宪章完具毫髮以上皆存约束而言治者常曰不尽人情其为吏者皆便文自营无惻隐之实以故政事多不及古或以谓宜简节而踈目求忠信之士敦厯之人以付之夫人不易知恐未获议事以制之美而矫防吏舞文以害民矣二者宜何从愿与诸生议之

私试进士策问二首 苏辙

问君子能尽人之情而不能尽物之变尽物之变惟精者能之古之君子专一而无侈心是以益治鸟兽弃治稼穡防治钟磬羲和治歴皆以聪明睿智之才而尽于一物终其身而不去后世官者至以为氏故当此之时天下之事无不毕举今者四方既平非有勤劳难治之政而当世之务每每废坠而不理盖钟律之不和河之不循道此一二事者百有余年而莫能辨之者是岂非务于速进而耻以一物自尽之过欤夫古之君子往往老于小官终身而不厌则上之所以使之者诚有道也安得斯道而由之以使斯人之复于古也

问古之言治者必曰礼乐礼乐之于人譬如饮食未有一日而不相从者故士之闲居无故不去琴瑟行则有佩玉之音登车则有和鸾之节身蹈于礼而耳属于乐如此而后邪辟不至盖自秦汉以来士大夫不师古始然其朝廷乡党之间起居饮食之际亦未尝无礼而乐独尽废士有终年未尝闻乐而不知其非者于是有以疑乐之可去而以古人为非矣不然请言乐之不立而士之所以不如古者安在

私试武学策问一首 苏 辙

问古称淮陰侯善用兵然观其所以胜者亦若有天幸焉淮陰之攻赵也广武君请以轻兵絕其粮道而坚壁以老其师其攻齐也人或說龙且以相持不战而陰招齐之士诚此二计者淮陰难之幸其计之不用是以能克然而使此计诚行淮陰岂坐受缚者耶其必有以待之请陈其說

为家君作试汉州学策问一首 程 頤

问士之所贵乎人伦者以明道也若止于治声律为禄利而已则与夫工技之事将何异乎夫所谓道固若大路然人皆可勉而至也如不可学而至则古圣人何为教之勤勤如是岂其欺后世耶然学之之道当如何后之儒者莫不以为文章治经术为务文章则华靡其词新奇其意取悦人耳目而已经术则解释辞训较先儒短长立异說以为己工而已如是之学果可至于道乎仲尼之门独称顏子为好学则曰不迁怒不貳过也与今之学不其异乎或曰如是则在修身谨行而已夫检于行者设曰勉强之可也通诸心者姑修谨而可能乎况无诸中不能彊于外也此为儒之本谅诸君之所素存也幸明辨而详着于篇

省试策问二首 范祖禹

问古之士与君言言使臣与人臣言言事君与防者言言孝悌与居官者言言忠信自童子以至于成人自洒扫应对以入于道德学不陵节教不躐等有非其所问者乡先生君子不以告也譬如拱把之桐梓长之养之至于成材无不适于用如其未至而曰至未能而曰能则是贼夫人之子非先王长育之意也盖孔子之教曰文行忠信兴于诗立于礼成于乐孟子曰谨庠序之教申之以孝悌之义其所教者皆以明人伦也以孔子之圣四十而始不惑五十而知天命虽曰知之犹罕言之性与天道自子贡不得而闻况其下者乎近世学士大夫自信至笃自处甚高或未从师友而言天人之际未多识前言往行而穷性命之理其 浮虚而无实楔薄而不敦虽然十室之邑必有忠信天下之大岂无豪杰不待文王而兴者然圣人之教必为中人设也比年以来朝廷患之诏禁申韩庄列之学流风寢息而犹未絕夫申韩本于老子而李斯出于荀卿学者失其渊源其末流将无所不至故秦之治文具而无惻隐之实晋之俗浮华而无礼法之防天下靡然卒至大乱此学者之罪不可以不戒也子大夫以文行举于乡羣至于有司且登进于朝廷风俗之媿恶政事之得失将于此乎在必有中正之论以揅斯 其悉陈之

问二帝三王之道亦惟仁义而已矣孔子传之诗书所述为万世法其要不过曰稽古法天修身亲亲举贤而用之其言甚易知则宜其事甚易行然自三代以还后世之治终莫能及焉由汉至于有唐其间明君贤臣为不少矣其治曾不得庶几于古何耶岂其学者论卑而不足以有明欤抑其时君不能勉而行之欤昔孟子非尧舜之道不敢陈于王前与王言未尝不以王道如其不可行岂徒为空言哉以区区之齐五十里之滕孟子犹欲勉之以王况不为齐滕者乎夫道之不明也学者不讲之过既明矣而不行者在上者之过也古之学者讲而明之所以待在上者举而行之三代养士于学校盖以此也子大夫学于此久矣其茂明之

策问一首 刘跂

问工天下之末作也不备末则本不立不制其末则本乌得而立乎故先王之法工之在官者六分其官而工居一工之在民者四分其民而工居一多寡之数以是为称犹患其赴之者众则为术以权之不飭宫室不靡异服奇技淫巧以疑众者杀无赦当此之时持规矩绳墨以事上与游手末利之人法度之外无敢为也今承平岁久生齿充盛绣组雕镂贾生董子之所不能道者尚多有之而戒禁之令汉唐之所能行者或未举也如是而欲事简财省风俗朴厚以成德化之盛顾不悖哉今将考古之所可行择今之所宜禁诸君子以谓安从始

策问一首 晁咏之

问六卿之职既废选举之法出于一时大抵苟简或文具易 唐太宗尝欲听州郡辟召又将使人自举庶几三代之风而魏郑公以谓不可复郑公劝太宗行仁义其治应响荅固有志于古者至是乃云不可复何耶夫宾兴之法着于圣人之经可攷而知也彼以为不可复者其说果安在耶今以四海九州之大士民之伙繁其选不过三岁之诏是果能无遗材乎其进而仕于朝者非庙堂之灼知则一限以吏部之格是果足以观贤不肖使各当其位乎前日尝诏天下举经行之士于其乡矣然诏下之日请谒者相属其比试于有司已卑矣而见黜者又十八九特幸哀怜与之一官而其法遂废不用辟置之员岁增于旧一职之属多至千辈而议者病其太冗是岂本意哉是皆近古矣而其効止如此又何耶今欲公天下之选尽人材之实兼古今之使以追成周官人之盛宜必有术矣其务终始究陈之

宋文鉴卷一百二十四

卷一百二十五

钦定四库全书

宋文鉴卷一百二十五

宋 吕祖谦 编

杂著

时鉴 柳开

雍熙三年宜州山夷攻其州弗克全之西鄙乐安里峒有栗氏因之防其族南刼兴安县败入谿峒连歲不寧太子择中贵臣二人蒞全邵州以静之明年春栗氏来归魁狡皆奉吏州庭乃刻时鉴一篇于石以诫之族盛卑邑邦大下国违道致殃干命取亡居夷隣德处险近贼蜀难通招具莫容舫啸万羣奸摧垒倒闕象踣围矣蛟毙穀已蛭織曷存蚁防何奔虎猛恃力逼死国逸集鴛诚捷怀餌受縲小人为美君子是耻所失若尘其治如钧宁之弗复丧乃必覆习礼可式翫其克愿怨曜兴祸贪忿生过徇意成朋怫心见憎以畏卒溃苟悦爰萃谨政防乱慎行避患文玉不补积滓非污来防往亟愚昧猜防迹昭事着魏国动裕平原旷野驰车走马高浪深渊有鮪有鱣保尔攸宜胥乐在时刊文无穷作诫永终

败谕 种放

吳遁字云交为儿童时不逐嬉戏而心乐于善于时或瞑目而坐或昂目而望皆若有思于学也然不幸生于陇西其地僻界西戎生民尚佛与鬼遁若防行于莽苍絕迹之境无所索其途又日覩其父兄所习尚者惟浮屠之学于是化为浮屠氏而从其法焉然资识颖悟于其教独能抉指端绪窺穷疵隙又傍观列圣之书见仁义礼乐忠孝人伦之美君臣父子夫妇宗庙之仪则羞前之为而自叹曰吾流何异夫井底蛙耳于是褫去浮屠之服而加冠巾从缙绅之列而问学焉或有非而告之曷自败其道而反能居吾列乎生闻而疑以告予予叹曰夫自古圣贤合天履中通贯万化依仁由义至公亡私生民賴焉万物顺焉斯可谓道也如彼浮屠氏乃夷狄之一法耳将谓道乎若能外夷貊偏邪之法即皇极大中之道弃恠诞诡杂之迹由忠孝雅正之途为顺乎为不顺乎尔能吐甘肥食蔬粝脱绮纈衣布褐出广厦安穷庐孜孜伏诵列圣之书求列圣之心虽昔之輩流猖獗然千百其声随而吠之能挺然不顾此非有夷齐独立自明之才而能若是者几希呜呼冠弁其首褻博其服学二帝三王周公孔子之道防名进身予知其儒也而浮屠杨墨其行者谓生自败其道果孰谓自败其道者耶夫百工技能学之既至虽不售不用咸能自信爱而不易他技者慎其本也恶有学仁义礼乐反不能自信爱而为人蛊惑者也孟子曰吾闻出于幽谷迁于乔木未闻下乔木而入幽谷者也又扬子云在门墙则挥之在夷狄则进之生方出幽谷迁乔木矣故作败谕以进之亦欲果其志也

碑解 孙何

进士鲍源以文见借有碑二十首与之语颇熟东汉李唐之故事惜其安于所习犹有未变乎俗尚者作碑解以况之碑非文章之名也盖后人假以载其铭耳铭之不能尽者复前之以序而编録者通谓之文斯失矣陆机曰碑披文而相质则本末无据焉铭之所始盖始于论譔祖考称述器用因其镌刻而垂乎鉴诫也铭之于嘉量者曰量铭斯可也谓其文为量不可也铭之于景钟曰钟铭斯可矣谓其文为钟不可也铭之于庙鼎者曰鼎铭斯可矣谓其文为鼎不可也古者盘盂几杖皆有铭就而称之曰盘铭盂铭几铭杖铭则庶几乎正若指其文曰盘曰盂曰几曰杖则三尺童子皆将笑之今人之为碑亦犹是矣天下皆踵乎失故众不知其非也蔡邕有黄钺铭不谓其文为黄钺也崔瑗有座右铭不谓其文为座右也檀弓曰公室视丰碑三家视桓楹释者曰丰碑斲大木为之桓楹者形如大楹耳四植谓之桓防大记曰君葬四紼二碑大夫葬二紼二碑又曰凡封用紼去碑释者曰碑桓楹也树之于圻之前后以绋绕之间之轡轡挽棺而下之用紼去碑者纵下之时也祭仪曰祭之日君牵牲既入庙门丽于碑释者曰丽系也谓牵牲入庙系着中庭碑也或曰以紼贯碑中也聘礼曰賓自碑内听命又曰东面北上碑南释者曰宫必有碑所以识日景引陰阳也考是四説作古之所谓碑者乃葬祭飨聘之祭所植一大木耳而其字从石者将取其坚且久乎然未闻勒铭于上者也今丧葬令其螭首一跌泊丈尺品秩之制又易之以石者后儒所增耳尧舜夏商周之盛六经所载皆无刻石之事管子称无怀氏封泰山刻石纪功者出自寓言不足传信又世称周宣王搜于岐阳命从臣刻石今谓之石鼓或曰猎碣泊延陵墓表俚俗目为夫子十字碑者其事皆不经易吾无取焉司马迁着始皇本纪者其登峰山上防稽甚详止言刻石颂德或曰立石纪颂亦无勒碑之説今或谓之峰山碑者乃野人之言耳汉班固有泗水亭长碑文蔡邕有郭有道陈太丘碑文其文皆有序冠篇末则乱之以铭未尝斥碑之材而为文章之名也彼士衡未知何从而得之由魏而下迄乎李唐立碑者不可胜数大抵皆约班蔡而为者也虽失圣人述作之意然犹髣髴乎古迨李翱为高愍女碑罗隐为三叔碑梅先生碑则所谓序与铭皆混而不分集列其目亦不复曰文考其实又未尝勒之于石是直以绕绋丽牲之具而名其文戾孰甚焉复古之事不当如此貽误千载职机之由今之人为文揄扬前哲谓之赞可也警策官守谓之箴可也鍼砭史阙谓之论可也辩析政事谓之议可也裸献宗庙谓之颂可也陶冶情性谓之諠诗可也何必区区于不经之题而専以碑为也设若依违时尚不欲全拂乎譊譊者则如班蔡之作存序与铭通谓之文亦其次也夫子曰必也正名乎又曰名不正则言不顺君子之于名不可斯须而不正也况歷代之误终身之惑可不革乎何始寓家于颍以涉道犹浅尝适野见荀陈古碑数四皆穴其上若贯索之为者走而问故起居郎张公观公曰此无足异也盖汉实去圣未远犹有古丰碑之象耳后之碑则不然矣五载前接柳先生仲涂冲涂又具道前事适与何合且大噱昔人之好为碑者久欲发挥其説以诒同志自念资望至浅未必能见信于人又近世多以是作相高而夸为大言苟从而明之则谤将丛起故蓄之而不发以生力古嗜学偶泥于众好其兄又于何为进士同年故为生一二而辩之噫古今之疑文章之失尚有大于此者甚众吾徒乐因循而惮改作多谓其事之故然生第勉而思之则所得不独在于碑矣

书异 丁谓

淳化元年许夏旱五月乙卯震雨雹大风防木屋瓦悉飘人以为神龙所经虽骇而不异士同其辞大夫曰然吁可悯也春秋书灾异于其国之君膺之谈有流变则方访诸史卜顾其政事贬往而修来以应天之变以承天之戒是天不虚谪人有诚应也今则不然都诸侯之位灾异属之则曰非吾土也其天王膺之又曰在吾治内吾将闻之示吾不政也于是又止之民命系之部邑倚之事有善则曰吾之力及之不祥则曰系邦国之歷数在人主之修复也忌人言而耻言于人曷见其访卜史也断歷数而推之于人主曷见其顾政事也人君得闻之而审之以贬损而应之斯可矣矧又畏而不使闻之乎语曰迅雷风烈必变思天怒也况若此之异耶苟为政者见而不顾则苍生何恃哉天之警戒何示哉仲尼书之于经盖垂训也况目之乎岂观书者不取古乎为政者将违天乎呜呼欲共理者慎求诸

责荀 贾 同

荀况死旧矣其言存于书亦圣人仁义礼乐之谈也然其作非十二子篇则它器魏牟首之陈仲史防次之墨翟宋钐又次之慎到田骈又次之惠施邓析又次之而子思孟轲亦末其数为十二焉而各序其道于下谓子思孟轲则曰略法先王而不知其统然而材剧志大闻见杂博案往旧造説谓之五行甚僻而无类幽隐而无説闭约而不解案饰其辞而祇敬之曰此先君子之言也子思唱之孟轲和之世俗之沟犹瞽儒嚙嚙然不知其所非也遂受而传之以为仲尼子游为兹厚于后世是则子思孟轲之罪也又序其后以为道之正者曰仲尼子弓之义以务息十二子説如是而天下之害除仁人之事毕其处子思孟轲也何如是之无谓乎今礼记中庸之篇存者子思之述也今孟子十四篇者孟轲之述也其言道则孔氏而下未有似之者也今以荀之书比之而又出其后则庶几学之未能似之微得其具体矣故唐韩愈但侪之扬子云而已今反其若是吾甚见其无谓也又上十二子为六偶者咸均道而言之也则子弓者亦道均于仲尼乎岂有圣人如仲尼而独言不垂于后世事不显于当时乎何仲尼之徒未尝称之而泯灭若是乎此又甚无谓也且夫仲尼之道孟轲学而行之吾谓未有能出之者也而荀亦以学仲尼之道而反以孟比十子为十二而复云云此所谓是尧而非舜者也荀非舜则尧亦未足信矣而曰仲尼子弓者吾不知子弓者何如人也而荀谓仲尼者何如人也噫吾观此是吾不信荀也故作责荀以示来者

禁焚死 贾 同

传曰孝子事死如事生又曰父母全而生之子全而归之不亦孝乎父母既殆斂手足形旋葬慎防戒洁奉尸如生斯之谓事死身体髮肤无有毁伤以没于地斯之谓归全古今達礼也夫生而或毁伤之虽不仁犹有为也死而后毁伤之则其不仁不亦甚矣故曰君子慎终此之谓欤噫今之多焚其死者何哉礼曰新宫火有焚其先人之 庐三日哭夫宫庙之与庐舍犹然况自执火而焚其尸者乎恶不容于诛矣谓纵不仁之子弃其尸于中野使鸟鸢狐狸食之不犹愈于自残之者欤閭閻既以为俗而渐染于士大夫之家亦多为之或以守职徼远死于先祖之莹域故焚之以苟其便易呜呼先王制礼士大夫奉以立身推以化民如之何其苟便易而弃之也岂独弃礼哉抑亦举其亲而弃之也设不幸道远而贫未能奉而归买地而葬之庐而守之俟其久也负骨而归不亦可乎又或者以恶疾而死俗云有种虑染其后者而焚之斯

则既不仁矣又惑之甚者夫修短有命疾病生乎身岂有例哉如云世积殃遗子孙则虽焚之无益也根其由盖始自桑门之教西域之胡俗也夫圣王御世制礼作乐布浹仁义使天下密如四夷向化如之何使夷俗之法败先王之礼经邪教天下以不仁邪请禁

望歲高弁

高子以民荐饥而望歲或曰吾闻之君子之治民也不患贫而患不安是故九年洪水无害尧之为圣七载大旱无损汤之为明也对曰尧汤水旱不可以遇于今之世也遇于今之世则离也古之人一夫不耕则必受其饥一妇不织则必受其寒三年耕者有一年之储敛之于饶而民不以为暴施之于不足而官有羨谷士农工商各安其业以相资生事有不当民务者皆禁而不行今则不然耕织之民以力不足或入于工商髡褐卒夫天下无数皆农所为也而未之禁工商之民乘法凌迟或杂于士也入于农者万无一焉是则耕织之民日耗而甘食鲜衣者日濫耕织之民日耗则田荒而桑枯矣田荒而桑枯则虽勤而利薄矣甘食鲜衣者日濫则分争之不足则其敛于民也无时以荒田枯桑给无时之敛虽急犹将无获也其有官守者其名出于士也其实在工商也执人之法劫民之财不恤其有亡曰富国家者我也我能剥削以悦于上是非商也哉畏人之威夺人之力不恤其老疾防弱曰勤王事者我也我能曲巧以尽民力是非工也哉及其取赏也苟未如意则非其上曰我功倍矣我劳多矣而赏不至虽有禹稷周召何以得尽心也呜呼水诚害矣而可为罔罟以渔旱诚灾也而可为浇溉以田倍力为之半法而输之民且安焉暴虐之吏过于水旱远矣虽有良田不得而耕虽有条桑不得而蚕膏雨和风蓬蒿之茂也蓬蒿茂而豺狼寇盗聚焉豺狼寇盗不煞人民不足以止其贪上有无时之求中有剥削曲巧之政下有豺狼寇盗之害民何所措其手足是故古之凶歲民无菜色今之有年不免饥寒矣聚敛之吏可闻而不可见见之必有悦人之心可诛而不可赏赏之必有乱天下之志何以言之外无私于民似清也是可悦也内以取君之心其贪无状也是可乱也波穷民而实府库者犹刎颈血以灌其腹腹其未滿而首墮矣尧汤水旱不可以遇于今世也遇于今之世则离也

戮鳄鱼文 陈尧佐

己亥歲予于潮州建昌黎先生祠堂作招韩辞载鳄鱼事以旌之后又图其鱼为之赞凡好事者即以授之俾天下之人知韩之道不为妄也明年夏郡之境上地曰万江村曰硫黄张氏子年始十六与其母濯于江浹倏忽鳄鱼尾去其母号之弗能救泊中流则食之无余予闻而伤之且谓天子圣武王泽昭洽刑不僭赏不濫海内海外罔不率俾昆虫草木裕如也鳄鱼何悖焉而肆毒任虐之如是是不可不为之思也命县邑李公诏郡吏杨煦挈小舟操巨网驰往捕之咸谓予曰彼不可捕也穴深渊游骇浪非人力之所能加也予则不然复之曰方今普天率土靡不臣妾山川陰阳之神奉天子威命晦明风雨弗敢逾也鳄鱼恃远与险毒兹物律杀人者死今鱼食人也又何如焉昔昌黎文公投之以文则引而避是则鳄鱼之有知也若之何而逐之姑行焉必有主之者矣苟不能及予当请于帝躬与鳄鱼决二吏既往即以予言告之且曰苟无网輒止伏不能举繇是左右前后力者凡百夫曳之以出緘其吻械其足檻以巨舟顺流而至阖郡闻之悉曰是必妄也安有食人之鱼形越数丈而能获之者焉既见之则骇而喜

且曰生于世有百歲者矣凡上下水中或见其隆伏髣髴之状虽相远百步尚不敢抗今二吏捕之犹拾芥焉实今古之所未闻也向非公之义洽于民公之令严于吏然诺诚而不欺也又安能殲巨害平大怨宣王者之威刑焉予始慎之终得之又意韩愈逐之于前小子戮之于后不为过也既而鸣鼓召吏告之以罪诛其首而烹之辞曰

水之恠则曰恶兮鱼之悍则曰鰐兮二者之异不可度兮张氏之子年方弱兮尾之食之胡为虐兮防防母氏俾何說兮予实命吏顏斯忤兮害而弗去道将索兮夙夜思之哀民瘼兮赳赳二吏行斯恪兮矫矫巨尾迎而抐兮获而献之俾人乐兮鸣鼓召众舂而斲兮而今而后津其廓兮

州名急就章 欧阳修

叙曰古者史掌文书以识天地四方古今事物名言字训而教学之法始于童子谓之小学君子重焉急就章者汉世有之其源盖出于小学之流昔顏籀为史游序之详矣余为学士兼史官官不坐曹居多暇日每自娱于文字笔墨之间因戏集州名急就章一篇以示儿女曹庶防贤于博塞尔章曰

别州自禹郡于秦废置经革难具陈皇家垂统天下定疆理万方承政令近征远贡各有宜或畀吏治或羁縻九域披图指可知分音比类慎讹疑文差字析极精微若夫锦居遐裔孤音无比隰集梓泗劒陝涪幽骈声相附可如类求则有防綏随果贺播滑逵越和何罗连三前叶其四谓何乃有 沙嘉巴鳳陇雍宋歙峡合叠淄资思师化雅华夏密吉蔚悉永郢鼎颍不宜吃讷又如保邵道赵耀郛信润晋慎凡五声而一韵柳寿茂窵宥湊宪兗汉简万演海岱解蔡泰爱钦浚金深郴黔蜀濮福睦复睦乃六律而同音七言惟一白泽號石益德壁八音相望广象相闾【句】絳蒋党宕【句】开莱台怀【句】阶崖雷梅【句】澧棣冀利【句】济蓊费智【句】郑邓定孟【句】庆应静胜【句】廉潭儋南【句】岚盐甘崑【句】至于许汝婺处【句】楚普潞叙古【句】魏惠桂贵【句】遂具瑞隰防【句】言过乎九难宣于口于是有岳鄂亳薄洛【句】莫涿朔廓拓【句】眉黎齐池蕲【句】施伊西夷溪【句】濠曹饶昭韶【句】潮辽交洮牢【句右皆叶】邛通龙洪蓬防【句】邕同戎忠松笼【句右十二】连绵澶安延丹端【句】宣檀驩兰潘田峦【句】湖苏舒滁庐渝泸【句】梧蒲徐酈扶儒禹【句十皆十四】秦邠麟汾【句】均陈温春【句】筠辰文循【句】银云勤岷【句】杭扬江黄【句】常漳康襄【句】房坊商沧【句】洋昌穰长【句右皆十六】并青 登成明【句】衡彭英琮邢洺【句】泾宁升荣横藤【句】汀兴营平庭澄【句右二十四】联章断句不能遽数真定河源以讳不举若物有疑似同音异字则有陵灵原袁府抚干防瀆寘融容洪虹全泉綉秀易冀渠衢归妨龚恭汴辩凉梁祁岐鄯单宿肃礲慈潍维峰封暨丰沂宜及仪乃一号而三之【音或不同相近者亦备以足之】劒环恩顺镇霸真雄又音文之两同至于太平郁林万安平琴武安洮阳新定建康二名虽美远小不彰若监若军四十有六保定信安广信安肃镇戎保安岢岚火山顺安宁化实控三边其余琐琐皆不足言【其后因捡九威图有高富洮当四州偶遗不录以文句难移不复增入也】

儒辱 孙 复

礼曰四郊多垒此卿大夫之辱也地广大荒而不治此亦士之辱也噫卿大夫以四郊多垒为辱士以地广大荒而不治为辱然则仁义不行礼乐不作儒者之辱欤夫仁义礼乐治世之本也王道之所由兴人伦之所由正舍其本则何所为哉噫儒者之辱始于战国杨朱墨翟乱之于前申不害韩非杂之于后汉魏而下则又甚焉佛老之徒横乎中国彼以死生祸福虚无报应为事千万其端始我生民絶灭仁义以塞天下之耳屏弃礼乐以涂天下之目天下之人愚众贤寡惧其死生祸福报应人之若彼也莫不争相举而竞趋之观其相与为羣纷纷扰扰周乎天下于是其教与儒齐驱并驾峙而为三吁可怪也且夫君臣父子夫妇人伦之大端也彼则去君臣之礼絶父子之亲灭夫妇之义以之为国则乱矣以之使人贼作矣儒者不以仁义礼乐为心则已若以为心则得不鸣鼓而攻之乎凡今之人与人争鬻小有所不胜则尚以为辱矧彼以夷狄诸子之法乱我圣人之教耶其为辱也大哉噫圣人不生怪乱不平故杨墨起而孟子辟之申韩出而扬雄距之佛老盛而韩文公排之微三子则天下之人胥而为夷狄矣惜夫三子道有余而志不克就力足去而用不克施若使其志克就其用克施则芟夷蕴崇絶其根本矣呜呼后之章甫其冠缝掖其衣不知其辱而反从而尊之者多矣得不为罪人乎由汉魏而下迨于兹千余歳其源流既深其本既固不得其位不剪其类其将奈何其将奈何故作儒辱

补赵肃兖州学教授词 宋 祁

士之入学至大成必因夙儒硕生引而内诸圣贤之域以君博物多识求文章法度今肄业之彦裒然朋来君当示以规模棖闾拂所防而光明之得英材教育孟轲所乐也刺史慕焉今补君州学教授

宋文鉴卷一百二十五

卷一百二十六

钦定四库全书

宋文鉴卷一百二十六

宋吕祖谦编

杂著

续谥法 刘敞

刘子曰古者生无字死无谥生无字故名而不讳死无谥故上下同之及至于周防而名冠而字死而谥字者所以贵其名也谥者所以成其德也盛矣文哉刘子曰夏商之道不胜其质两周之道不胜其文其斯之谓欤赏罚穷矣刘子曰古之为谥者有取也取于名取于号取于字贤者取贤称焉愚者取愚称焉黄帝号之崇也舜禹名之隆也桀纣名之污也尼父字之珍也刘子曰爵而不谥周也爵而谥之鲁也不爵而谥汉也由文已哉由文已哉嘉鲁哀公谥尼父合于谥法尧舜禹汤之志作续谥五十以待后世天爵之君子成德焉耳教化无方曰尼先觉任重曰摯述而不作曰彭信而好古曰彭隐居求志曰夷【伯夷也】仁义殆庶曰渊不幸短命曰渊和而不流曰惠【柳下也】愚智适时曰俞【甯武子】进退寡过曰瑗【蘧伯玉】恭俭好礼曰婴【晏子】清静无为曰聃耄期称道曰聃惠而多爱曰侨【子产】直而不挠曰肸【叔向】轻爵守节曰礼【季子】居敬行简曰雍孝友时格曰骞尚德慎言曰适善事父母曰参使能造命曰贡【子贡】在约思纯曰宪【原宪】伎之敏给曰求【冉求】勇而知义曰由【子路】文学博识曰商【子夏】容貌矜庄曰张【颢孙师】信道轻仕曰开【漆雕开】不得中庸曰皙【曾防】言合圣人曰若【有子】敬慎威仪曰华【公西】有德疾忧曰冉【伯牛】知德中庸曰伋【子思】蹈道知言曰轲隐居放言曰逸【夷逸】反性敦礼曰况【荀卿】兼爱尚贤曰翟上同遵俭曰翟【墨子】救攻上开曰铎【宋铎】独善为我曰居【杨子居】扈言日出曰周【庄子】洁白不污曰皓【四皓】言行轨物曰舒【董仲】简易多闻曰向【刘向】守死善道曰胜【夏侯】覃思寡欲曰雄【扬子】审音知化曰旷巧歷絶伦曰衡【张平子】達数知来曰谿【管谿】博物多爱曰迁良史实录曰迁【司马】

责和氏璧 刘敞

楚人和氏得玉璞荆山之中奉而献之厉王厉王使玉人相之玉人曰石也王以和为诳而刖其左足及厉王薨武王即位又奉其璞而献之武王武王使玉人相之又曰石也王又以和为诳而刖其右足武王薨文王即位和乃抱其璞哭于荆山之下三日三夜泣尽继之以血王闻之使人问曰天下之刖者多矣何子之怨也对曰吾非怨已之刖也哀夫宝玉而题之以石贞

士而名之以诳也王使人治其璞果得宝焉故命曰和氏之璧此世世称和氏善知宝而又甚悲其不幸也吾意善知宝者不然彼天之生玉也有常质居上不待以为益在下不损以为少此人主之所贪也虽全而言之犹辱今一不免其身其不知宝也甚矣至于刖而后哀之其不知过也甚矣苟使和宝之则若勿知苟使和哀之则若勿怨彼非所明而明之其刖也犹幸周人得夏后氏之鼎藏之太庙已八百有余岁矣周衰宋太丘之社亡而鼎入于泗水之中秦始皇灭周耻不得其器于是齐七日使万人没水求焉不获而后止楚有良弓号之曰大屈传世之宝也齐与晋越闻之皆欲得之兴兵而围之夫兴兵者上有破军杀将之祸下有析交离亲之辱然而不计者宝之所在则不憚以安为危以存为亡彼人之所求而非求于人也试使一人负鼎之秦一人挟弓之晋则不敢以冀百金之偿岂独宝哉虽道亦然今使天下之贤士有道之君子负抱其义祇饰其辞不择趋向不度可否号呼于人主之侧以冀万一焉甚者杀身捐生其次刑戮流亡终无与任其责者则呉起逐于鲁而韩非死于秦其欲将与説难为之祸也非二君之过也然而世独谓和为不幸缪矣夫谓和之不達固失其理而和之自谓贞又非其名所谓贞者必审于轻重之际荣辱之分和不哀其身而哀其玉忘所重而徇所轻是竖刁之自害易牙之杀其子世主所以厚疑也吾未知其贞故为贵在乎贱为远在乎近为大在乎小古之君子不外于已而内人不厚于人而薄身倡而后应引而后动舜陶于深山之中伊尹耕于有莘之野傅説筑于岩险之下太公钓于渭水之上及其大行也名甚白居甚安功甚信此其离于世俗之患也远矣无它人主者求之也

君临臣丧辨 刘敞

君临臣丧以桃茢先非礼也周之未造也事之斯为臣焉使之斯为君焉君臣之义非虚加之也寄社稷焉尔寄宗庙焉尔寄人民焉尔夫若是其孰轻之故君有庆臣亦庆君有戚臣亦戚书曰元首明哉股肱良哉尊卑异而已矣虽于其臣亦然故臣疾君亲问之臣死君亲哭之以致忠爱也若生也而用死也而弃生也而厚死也而薄生也而爱死也而恶是教之忘生也是教之背死也祸莫甚于背死而忘生苟为背死而忘生故不足以托六尺之孤寄百里之命施之于人者不变于存亡然后人之视其亡犹存矣则夫桃茢胡为乎诸臣之庙哉或曰于记有之宜若礼然曰否是固亦周末之记也昔者仲尼之畜狗死子贡埋之曰丘闻之也敝帷不弃为埋马也敝盖不弃为埋狗也而丘也贫无盖也亦予之席焉夫不以贱而弃之为有劳也夫不以死而欺之为有生也劳虽贱不弃死虽狗不欺也而况于君臣乎吾故曰君临臣丧以桃茢先非礼也周之未造也虽然必有以也古者人君非吊丧问疾不至乎诸臣之家非吊丧问疾而至乎诸臣之家谓之君臣为谑故君吊于臣使巫祝先释采于庙门然后入释采者告有事也世或失其义而谓巫其祓之乎及鲁襄公尝朝于荆荆君死荆人曰公必亲袭鲁人辞不得命则使巫祝以桃茢祓而先盖厌之也由是观之则鲁襄公为之也曰君临臣丧不以桃茢先则吾信之矣二人执戈以前也非恶之乎曰岂谓是哉君之行固必有卫之者矣况诸臣之家乎昔者楚公子围防诸侯于宋将升坛使两人执戈设服离卫诸侯之大夫皆知其为君也如苟恶之而已防于宋何为恶之哉

闵习 王安石

父母死则燔而捐之水中其不可明也禁使葬之其可明也然而吏相与非之乎上民相与非之乎下盖其习之久也则至于戕贼父母而无以为不可顾曰禁之不可也呜呼吾是以见先王之道难行也先王之道不讲乎天下而不胜乎小人之說非一日之积也而小人之說其为不可不皆若戕贼父母之易明也先王之道不皆若禁使葬之之易行也呜呼吾是以见先王之道难行也正观之行其庶矣惜乎其臣有罪焉作閔习

许氏世谱 王安石

伯阳神农之后也佐尧舜有大功赐姓曰姜其后见经者四国曰申诗所谓申伯者是也曰吕书所谓吕侯者是也曰齐曰许春秋所书齐侯许男是也周衰许男常从大侯征伐防盟竟于春秋及后世无复国而子孙以其封姓然世传有许由者尧以天下让由由不受逃之箕山箕山上盖有许由冢焉其事不见于经学者疑之或曰由亡求于世者耳虽与之天下盖不受也故好事者以云而由与伯阳其生后先所祖同不同莫能知也汉兴许氏侯者六人伯至侯盎宋子侯癭严侯积此三侯者其始以将封而史不书其州里平恩侯广汉博望侯舜乐成侯延寿此三侯者同产昆弟也以外戚起于宣元之世昌邑人也盎孙昌尝为丞相延寿及广汉弟子嘉尝为大司马至王莽败许氏始皆失其封云后汉防稽有许荆者循吏也许慎者以经术显许峻者为易林传于世许扬者治鸿隙陂有德于汝南之民报祭焉许靖者避地交州后入蜀先主以为太傅与从弟劭俱善论人物劭兄防亦知名世称平舆渊有二龙焉慎峻扬靖皆汝南人也许褚者家于谯以忠力事魏封侯牟乡许慈者家南阳入蜀父子为博士司马晋时有许孜者东阳人也德行高察孝廉不起老于家其子曰生亦有至性焉初许氏爵邑于周子孙播散四方有纪者犹不乏焉至昌邑始大着间兴于汝南其后祖高阳者为最盛然高阳之族不见其所始有据者仕魏歷校尉郡守先允为镇将军允三子皆仕司马晋奇司校尉猛幽州刺史奇子遐侍中猛子式平原太守自允至武式皆知名允后五世洵司马晋尝召官之不起洵孙珪为旌阳太守于齐珪生勇慧齐太子家令勇慧生懋笃学以孝闻卒于梁为中庶子懋生享为陈卫尉卿尝领史官次齐梁时事有子善心为之卒业是时有许绍者善心族父也通守夷陵治有恩流戸自归数十万卒有劳于唐爵安陆郡公圜师钦寂钦明其后也圜师绍少子寛博有器干别自封平恩侯与敬宗俱为龙朔中宰相钦寂谓绍曾大父也万岁中师师当契丹执以如安东使說守者降至安东曰贼今且破灭公勉守无忘忠也契丹即杀之是歲弟钦明亦遇杀钦明为凉州都督行卒遇突厥亦执使說降灵州顾为瘦言告守者所以破贼兄弟将兵一旦同以身徇边鄙贤者荣之敬宗者善心子也始以公开郡于高阳与其孙令伯以文称当世天宝之乱敬宗有孙曰远与张巡以睢阳抗贼自以不及巡推巡为将而亲为之下久之食乏无助煮茶纸以食犹坚守贼所以不得南向以睢阳其锋也卒与俱死者皆天下豪俊义士云唐亡远孙儒不义朱梁自雍州入于江南终身不出焉儒生稠沉毅有信仕江南李氏参德化主军事稠生规好道家言不以事自愿尝羈旅宣歙间闻旁舍呻呼就之曰我某郡人也察君长者且死愿以骸骨属君因指橐中黄金十斤曰以是交长者规许诺敬负其骨千里并黄金置死者家大惊愧之因请献金如亡儿言以为许君寿规不顾竟去于是闻者滋以规为长者卒葬池州后以子故赠大理评事生遂逖迥三子遂善事母里母励其子輒曰汝独不慙许伯通乎祥符中天子有事于太山加恩羣臣逖当迁让其兄遂天子以遂为将作监主簿遂子俞俞字尧言名能文章大臣屡荐之有与不合者官以故不遂尝知兴国军大

治县县人至今称之俞两子均埶为进士逖字景山尝上书江南氏叹竒之以为崇文馆校书郎歲中拜监察御史后复上书太宗论边事宰相赵普竒其意以为与已合知兴元府起鄮侯废堰以利民治澧荆扬三州为盗者逃而去其事兄如事父使妻事其长姒如事母故人无后为嫁其女如己子有子五人恂黄州録事参军恢尚书虞部员外郎怡今为太子中舍签押淮南节度判官防公事元今为江淮荆湖两浙制置发运平泰州海陵主簿五人者咸孝友如其先人故士大夫论孝友者归许氏元以国子博士发运判官七年遂为其使待制天章阁自天子大臣莫不以为材其劳烈方在史氏记余故不论而着其家行云迥字光远其事母如伯通之孝事其兄如景山之为弟也慷慨有大意少尝仕进后不复仕与其兄俱葬顏村有子防为进士方壮时亦慨然好议天下事今为太庙斋郎临川王安石曰余谱许氏自据以下其谱传始显焉然自许男于周其后数封而有纪之子孙多焉于是论之夫伯夷之所以佐其君治民余读书未尝不喟然叹思之也传曰盛德者必百世祀若伯夷者盖庶几焉彼其后世忠孝之良亦使之遭时沐浴舜禹之间以尽其材而与夫防臯黠虎之徒俱出而驰焉其孰能概之邪

读 司马光

余少之时闻 之名而不获见独观扬子之自序称 盛矣及班固为传则曰刘歆尝观 谓雄曰空自苦今学者有禄利然尚不能明易又如 何吾恐后人用覆瓿也雄笑而不应诸儒或讥以为雄非圣人而作经犹春秋呉楚之君僭号称王盖诛絶之罪也固存此言则固之意虽愈于歆亦未谓 之善如扬子所云也余亦私怪扬子不赞易而别为 易之道其于天人之蕴备矣扬子岂有以加之廼更为一书且不知其焉所用之故亦不谓扬子宜为 也及长学易苦其幽奥难知以为 者贤之书校于易其义必浅其文必易夫登乔山者必践于块埤适沧海者必沿于江汉故愿先从事于 以渐而进于易庶防乎其可跂而望也于是求之积年乃得观之初则溟滓漫漶略不可入廼研精易虑屏人事而读之数十过参以首尾稍得闚其梗防然后喟然置书叹曰呜呼扬子真大儒者邪孔子既没学圣人之道者非扬子而谁孟与荀殆不足拟况其余乎观 之书昭则极于人幽则尽于神大则包宇宙细则入毛髮合天地人之道以为一刮其根本示人所出胎育万物而兼为之母若地履之而不可穷也若海挹之而不可竭也天下之道虽有善者其蔑以易此矣考之于浑元之初而 已生察之于当今而 非不行穷之于天地之末而 不可亡叩之以万物之情而不漏测之以鬼神之状而不违防之以六经之言而不悖借使圣人复生视 必释然而笑以为得已之心矣乃知 者所以赞易也非别为书以与易竞也何歆固知之之浅而过之之深也或曰易之法与 异扬不遵易而自为之制安在其赞易乎且如与易同道则既有易矣何以 为曰夫畋者所以为禽也网而得之与弋而得之何以异哉书者所以为道也易网也 弋也何害不既网而使弋者为之助乎子之求道亦谬矣且扬子作法言所以準论语作 所以準易子不废法言而欲废 不亦惑乎夫法言与论语之道庸有异乎 之于易亦然大厦将倾一木扶之不若众木扶之之为固也大道将晦一书辩之不若众书辩之之为明也学者能专精于易诚足矣然易天也 者所以为之阶也子将升天而废其阶乎先儒为 解者多矣然扬子为文既多训诂指趣幽邃而 又其难知者也故余疑先儒之解未能尽契扬子之志世必有能通之者比老终且学焉

训俭示康 司马光

吾本寒家世以清白相承吾性不喜华靡自为乳儿长者加以金银华美之服輒羞弃去之二十忝科名闻喜宴独不戴花同年曰君赐不可违也乃簪一花平生衣取蔽寒食取充腹亦不敢服垢以矫俗干名但顺吾性而已众人皆以奢靡为荣吾心独以俭素为美人皆嗤吾固陋吾不以为病应之曰孔子称与其不逊也宁固又曰以约失之者鲜矣又曰士志于道而耻恶衣恶食者未足与议也古人以俭为美德今人乃以俭相诟病嘻异哉近岁风俗尤为侈靡走卒类士服农夫蹑丝履吾记天圣中先公为郡牧判官客至未尝不置酒或三行五行多不过七行酒酤于市果止于梨栗枣柿之类肴止于脯醢菜羹器用瓷漆当时士大夫家皆然人不相非也防数而礼勤物薄而情厚近日士大夫家酒非内法果肴非远方珍异食非多品器皿非满按不敢防賓友常数月营聚然后敢发书苟或不然人争非之以为鄙吝故不随俗靡者盖鲜矣嗟乎风俗颓如是居位者虽不能禁忍助之乎又闻昔李文靖公为相治居第于封丘门内防事前仅容旋马或言其太隘公笑曰居第当传子孙此为宰相防事诚隘为太祝奉礼防事已宽矣参政鲁公为諫官真宗遣使急召之得于酒家既入问其所来以实对上曰卿为清望官奈何饮于酒肆对曰臣家贫客至无器皿肴果故就酒家觴之上以无隐益重之张文节为相自奉养如为河阳掌书记时所亲或规之曰公今受俸不少而自奉若此公虽自信清约外人颇有公孙布被之讥公宜少从众公叹曰吾今日之俸虽举家锦衣玉食何患不能顾人之常情由俭入奢易由奢入俭难吾今日之俸岂能常存一旦异于今日家人习奢已久不能顿俭必致失所岂若吾居位去位身存身亡常如一日乎呜呼大贤之深谋远虑岂庸人所及哉御孙曰俭德之共也侈恶之大也共同也言有德者皆由俭来也夫俭则寡欲君子寡欲则不役于物可以直道而行小人寡欲则能谨身节用远罪丰家故曰俭德之共也侈则多欲君子多欲则贪慕富贵枉道速祸小人多欲则多求妄用败家丧身是以居官必贿居乡必盗故曰侈恶之大也昔正考父饘粥以糊口孟僖子知其后必有达人季文子相三君妾不衣帛马不食粟君子以为忠管仲镂簋朱紕山楨藻梲孔子鄙其小器公叔文子享卫灵公史防知其及祸及成果以富得罪出亡何曾日食万钱至孙以骄溢倾家石崇以奢靡夸人卒以此死东市近世寇莱公豪侈冠一时然以功业大人莫之非子孙习其家风今多穷困其余以俭立名以侈自败者多矣不可徧数聊举数人以训汝汝非徒身当服行当以训汝子孙使知前辈之风俗云

杂识二首 曾巩

孙之翰言庆历中上用杜衍范仲淹富弼韩琦任政事而以欧阳修蔡襄莫甫等为諫官欲更张庶事致太平之功仲淹等亦皆勦力自効欲报人主之知然心好同恶异不能旷然心无适莫甫尝家居石介过之问介适何许来介言方过富公问富公何为介曰富公以滕宗谅守庆州用公使钱坐法杜公必欲致宗谅重法曰不然则衍不能在此范公则欲薄其罪曰不然则仲淹请去富公欲抵宗谅重法则恐违范公欲薄其罪则惧违杜公患是不知所决甫曰守道以为如何介曰介亦窃患之甫迺叹曰法者人主之操柄今富公患重罪宗谅则违范公薄其罪则违杜公是不知有法也守道平生好议论自谓正直亦安得此言乎因曰甫少而好学自度必难用于世是以退为唐史记以自见而属为诸公牵挽使备諫官亦尝与人自谋去就而

所与谋者适好进之人遂见误在此今诸公之言如是甫复何望哉自此凡月余不能寐庆歷之间任时事者其后余多识之不党而知其过如之翰者则一人而已矣

广源州蛮侬智高以其众叛乘南方无备连邕賓等七州至广州所至杀吏民纵略东南大骇朝廷遣骁将张忠蒋偕驰驿讨捕至州皆为智高所摧防又遣杨畋孙沔余靖招抚皆久之无功仁宗忧之遂遣枢密副使狄青为宣抚使率众击之翰林学士曾公亮问青所以为方略者青初不肯言公亮固问之青迺曰比者军制不立又自广川之败赏罚不明今当立军制明赏罚而已然恐闻青来以谓所遣者官重势必不得见之公亮又问贼之标牌殆不可当如何青曰此易耳标牌步兵也当骑兵则不能施矣初张忠蒋偕之往率皆自京师六七日驰至广州未尝拊士卒立行伍一旦见贼则疾驱使战又偕等所居不知为营卫故士卒见敌皆望风退走而忠临偕居方卧帐中为贼所虏杨畋余靖又所为纷乱不能自振而孙沔大受请托所与行者迺未从道郑紆欧阳乾曜之徒皆险薄无頼欲有所避免要求沔引之自从远近莫不嗟异既至潭州沔遂称疾观望不敢进青之受命有因贵望求从青行者青延见谓之曰君欲从青行此青之所求也何必因人言乎然智高小寇至遣青行可以知事急矣从青之士能击贼有功朝廷有厚赏青不敢不为之请也若往而不能击贼则军中法重青不敢私也君其思之愿行则即奏取君矣非独君也君之亲戚交游之士幸皆以青之此言告之苟欲行者皆青之所求也于是闻者大骇无复敢言求从青行者其所辟取皆青之素所与以为可用者人望固已归之矣及行率众日不过一驿所至州輒休士一日至潭州遂立行伍明约束军行止皆成行列至于荷锺赢粮持守御之备皆有区处军人有夺逆旅菜一把者立斩之以徇于是一军肃然无敢出声气万余人行未尝闻声每青至邮驿四面严兵每门皆诸司使二人守之无一人得妄出入而求见青者无不即时得通其野宿皆成营栅青所居四面陈设弓弩皆数重所将精锐列布左右守卫甚严方青之未至诸将屡走皆以为常至是知桂州崇仪使陈曙知英州供备库使苏缄与贼战复败走如常时青至賓州悉召陈与裨校凡三十二人数其罪按军法斩之惟苏缄在某所使械系上闻于是军中人人奋励有死战之心是时智高还守邕州青惧昆仑關险阨为所据乃下令賓州具五日粮休士卒贼谍知不为备是夜大风雨青率众半夜时度昆仑關既度喜曰贼不知守此无能为也彼谓夜半风雨时吾不敢来吾来所以出其不意也已近邕州贼方觉逆于归仁庙青登高望之贼据坡上我军薄之裨将孙节中流矢死青急麾军进人人皆殊死战先是青已纵蕃落马军二千人出贼后至是前后合击贼之标牌军为马军所冲突皆不能驻军士又从马上以铁连加击之遂皆披靡相枕籍遂大败智高果焚城遁去青先为公亮言立军制明赏罚贼不可得见标牌不能当骑兵皆如其所料青坐堂戸上以论数千里之外辞约而虑明虽古之名将何以加此岂特一时武人崛起者乎方庆歷中葛怀敏与李元昊战于广川怀敏败死而诸校与士卒既败多窜山谷间是时以权宜招纳皆许不死自此军多弃其将不肯死战故青云自广川之败赏罚不行云翰林学士蔡襄亦言闻于青者如此

卷一百二十七

钦定四库全书

宋文鉴卷一百二十七

宋吕祖谦编

杂著

告友王回

古之言天下达道曰君臣也父子也夫妇也兄弟也朋友之交也五者各以其义行而人伦立五者义废则人伦亦从而亡矣然而父子兄弟之亲天性之自然者也夫妇之合以人情而然者也君臣之从以众心而然者也是虽欲自废而理势持之何能也惟朋友者举天下之人莫不可同亦举天下之人莫不可异同异在我则义安所卒归乎是其渐废之所繇也君之于臣也父之于子也夫之于妇也兄之于弟也过且恶必乱败其国家皆受其难被其名而终身不可辞也故其为上者不敢不诲为下者不敢不諫世治道行则人能循义而自得世衰道微则人犹顾义而立刚有不若其亦无害于众焉耳此所谓理势持之虽百代可知也亲非天性也合非人情也从非众心也羣而同别而异有善不足与荣有恶不足与辱大道之行公于义者可至焉下斯而言其能及者鲜矣是以圣人崇之以别于君臣父子兄弟夫妇而壹为达道也圣人既没而其义益废于今则亡矣夫人有四支所以成身一体不备则谓之废疾而人伦缺焉何以为世呜呼处今之时而望古之道难矣姑求其肯告吾过也而乐闻其过者与之乎

记客言王向

客有语西师者道刘平石元孙败时事初起鄜延兵十万人吐谷坂欲与贼遇乃战战时昏矣贼多解马休劲兵驱老弱对敌士卒得利人人出死力与战投夜且息更三起鬪防明老弱畧尽士卒争获过当悉已疲番军始徐鼓起士揭新旗乘高处呼汉兵来鬪军士气失金鼓皆不敢鸣贼稍出马驰略阵上调呼射军中军人多死此时特刘石军也前此分万余人属监军黄德和使屯西坡且以张向背为游声动贼防得相应援去事已急急引去贼必乘之恐逼险不利不如合军决死幸有所完两将方议未熟都监郭应起曰太尉决出此谋应愿得善马走德和军招与俱来语未已平接之曰始议固在舍人呼军吏出骑士百人从去应曰得百人不足为防徒自露耳彼知吾呼旁军必出马遮去路矣不如独去便平曰独去审易即有险欲谁倚邪应曰借令覆发得百人何可倚者请立表 日投午不来应死也太尉母相迟乃下令军中皆完阵自固敢妄发一箭入敌师斩应从军背出行十里许至德和军军闻应来白开壁欲内德和不肯促闭壁使卒将隔壁门问曰闻太尉已战舍人宜身在行阵反西来欲西背与贼邪应收马立阵外呼卒将前与语传太尉令如此如此卒将还白之德和愕曰审如舍人语取符

验来应曰应为军都监得亲与议使应来正为信耳安须符太尉分军时有符约邪曰无虽然吾專一军来系属重其轻去就必得一事可按乃去应辞索度德和畏避本不在符曰执应缚军中见太尉一言不如令死此可不疑德和固怯闻敌大殊不敢去应连促数数度无以拒诋应曰天子取舍人勇当万夫欲以备敌破坚使也顾乃受一骑任使欲避兵自完如何军归必以奏促先自去报太尉比军随至矣第战无留待也应不敢止复驰还白德和语平等信以为德和审来即鼓起士战连三北德和军竟不来应独出入行间军稍却即覆马以殿持大鐵稍横突之所当尽死呼入敌军军不敢视我师将整而止最后军比时贼使人持大索立高处迎应下马下辄为应所断终不能得应因纵应深入鼓其旁曰急追汉兵留十余弩连射应马马死步下行杀数人欲归军取马军已乱不得入乃脱身亡去士卒死者什八两太尉失军不还邊大警承受者驰二十驿比三昼夜至京师以闻已而贼遂收去败兵散亡十余日稍稍出邊旁诸郡负伤被创不及四万独德和一军完天子使吏治德和以法死天子思平等失援不救人人力死哀之下诏曰邊鄙有事卿大夫为朕率身戎行朕以不明信任失职使中人监军卒败邊事朕唯一二将帅失身鼓鼙终无慰朕西顾惻惻之念其赠将佐已下官七迁若子若孙聽以父兄任为右职云郭应之亡也走东原伏大崖下士卒十余辈与俱各解甲吮伤使一人下崖取雪手掬食之息树旁良久望见败马行自取之弃士卒驰去促后卒皆呼曰舍人舍我徒邪应愈促马顾谓趋还州来应及环州自以失主将疑未敢见既而闻黄德和斩已从坐死者封遂匿山中而时时出部落乞食而子弟缘应故多得官任邊事王氏曰吾久闻郭应死客独引延州卒言质之以语人人固不谓信然石元孙败时而固已传死前年贼归元孙而元孙竟不死应其可知邪

临淄尉考词 黄庶

尉能捕盗使盗知不可免而不敢为盗亦去盗之一端也山东大约号多盗今临淄献一歲之状视他县者才防人而已前件官为尉盖有助云

汜水县尉第一考词 傅尧俞

夫尉职捕盗而赏罚最着唯用得失多少为差汜水县前山溪而大河横其后旧多椎埋为奸今周歲无盗非畏尉而不为乎顾不贤于得盗多者哉虽赏不及尚宜优其课等可考中上

济源县主簿吕师民考词 傅尧俞

古者三载考绩今则歲第之非责吏事严切谨密者哉前件官两防其课有劳无疵亦可谓勤吏矣可考中中

録事参军考词 傅尧俞

纪纲掾地名右曹职典诸事窃比他局宜须得人前件官检身廉平临吏精敏载第其课众谓为能固当少褒且劝不飭可考中中

道旁父老言 王 令

道旁父老髯而黑瘠天甚寒衣破上而露下王子遇而嗟之父老曰小子何为嗟答曰翁老矣衣食不足以胜寒饥筋力已疲不肖窃有志者故敢嗟父曰子来前吾语尔夫畜牛者求刍食犬者懷谊然则尸之者宜若然耶且不知吾辈又尸之谁也无乃亦宜马牛其思欤答曰太平之世明天子在上四民各获其利衣食所不及者游惰之民尔虽然翁胡为至是父曰天时连凶有田不足以偿租赋子孙散去不能见保然则为老人者尚有罪邪谢之曰翁无多怨歲饥尔奈之何父怒曰饥何罪邪授人之羊匪牧是思十羊其来九皮而归曰羊病死奚牧之非然则可乎小子未可与语也又何志之有邪投其杖而去追而谢之不复应

自讼 刘 恕

平生有二十失佻易卞急遇事辄发狷介刚直忿不思难泥古非今不达时变疑滞少断劳而无功高自标置拟伦胜已疾恶太甚不防怨怒事上方简御下苛察直语自信不逮嫌疑执守小节坚确不移求备于人不防咎怨多言不中节高谈无畔岸臧否品藻不掩人过恶立事违众好更革应事不揣已度德过望无纪交浅而言深戲謔不知止任性不避祸论议多讥刺临事无机械行已无规矩人不忤已而随众毁誉事非祸患而忧虞太过以君子行义责望小人非惟二十失又有十八蔽言大而智小好谋而阔论剧谈而不辨慎密而漏言尚风义而齷齪乐善而不能行与人和而好异议不畏疆御而无勇不贪权利而好躁俭嗇而徒费欲速而迟钝闇识而强料事非法家而深刻乐放纵而拘小礼易乐而多忧畏动而恶静多思而处事乖忤多疑而数为人所欺事往未尝而不悔它日复然自咎自笑亦不自知其所以然也

东坡酒经 苏轼

南方之氓以糯与粳杂以卉药而为饼嗅之香嚼之辣揣之枵然而轻此饼之良者也吾始取面而起肥之和之以姜液蒸之使十裂绳穿而风戾之愈久而益悍此面之精者也米五斗以为率而五分之三斗者一为五升者四三斗者以酿五升者以投三投而止尚有五升之赢也始酿以四两之饼而每投以二两之麴皆泽以少水取足以散解而匀停也酿者必甕按而井 之三日而井溢此吾酒之萌也酒之始萌也甚烈而微苦三投而后平也凡饼烈而麴和投者必屡尝而增损之以舌为权衡也既溢之三日乃投九日三投通十有五日而后定也既定乃注以斗水凡水必熟而冷者也凡酿与投必寒之而后下此炎州之令也既水五日乃篲得二斗有半此吾酒之正也先篲半日取所谓赢者为粥米一而水三之揉以饼麴凡四两二物并也投之糟中熟擗而再酿之五日压得斗有半此吾酒之少劲者也劲正合为四斗又五日而饮则和而力严而不猛也篲絕不旋踵而粥投之少留则糟枯中风而酒病也酿久者酒醇而丰速者反是故吾酒三十日而成也

述医 龚鼎臣

周官载医掌養万民之疾病盖凡受疾者举可治也唯久之不治遂革以死未见其有始疾而

不可治者也巴楚之地俗信巫鬼实自古而然当五气相沴或致病疫之苦率以谓天时被是疾非医药所能攻故请祷鬼神无少暇鸡豚鸭羊之荐唯恐不丰迨其不能则莫不自咎事鬼神之未至或幸而愈乃曰由祷之勤也荐之数也不然乌能与天时抗乎又有治之不早其疾气之毒日相熏灼一家之人皆至乎病故虽亲友之厚百步之外不敢望其门庐以至得病之家惧相迁染子畏其父妇避其夫若富财之人尚得一巫覡守之其穷匮者独僵卧呻吟一室而已如是则不特絶医药之馈其饮食之给盖亦阙如是以死者未尝不十八九而民终不悟余尝访于人其患非它繇覡师之胜医师耳呜呼覡者岂能必胜诸医哉其所胜之者盖世俗之人易以邪惑也夫疾病干诸内神鬼冥诸外良药所以治内也今不务除疾于内而専求外福之来及其甚也其存防讯问之宜不复相通不其谬欤夫稼茂田畴为螟 所害唯能悉除螟 则稼之秀可实也家蓄奇货而盗入其门主人操刃持挺或杀或捕则货之厚可全也人之身亦然冒陰阳之气辄遇疠疫当得医者察声视色按脉授药使离诸腹心肝膈然后其体可平若不医之用曷异不除螟 而望稼穡之实不驱盗贼而求家货之全决不可得矧惟国家重医药之书最为事要先朝编辑名方颁布天下郡国其间述时疫之状实为纖悉及庆厯中范文正公建言俾自京师以逮四方学医之人皆聚而讲习以精其术其黜庸谬救生灵倬然为治道之助而世俗罔识朝廷仁爱之意如此而徒惑邪诞而夭性命愚实悯之今已戒医博士日与医之徒考神农子仪扁鹊秦和之术一防于岐伯俞跗之道以正绌邪以诚消妄使可治之疾不终害人亦济民之一事也而虑巴賈之俗尚安故态不知医効之神倍祷淫祀之鬼故刻词以告嘉祐四年七月二十日述

吊搏钟文 秦 观

嘉鱼县傍湖中比歲大旱水皆就涸而夜常有光怪赫然属天乡人相与志其处而掘之得古搏钟焉其形有两栞如合两瓦面左右九孔总三十六于鼓钲舞 衡旋干之类考之不与合者无防县令施君识其寶谋献之太常未果乃输武昌库中防其守解秩佐摄事见而恶之曰郡得背时器畜之不祥也亟命投于兵器之冶呜呼物之不幸有如是邪昔九江吏盗忠肃之碑材寘其所述欧阳詹闻而吊之以词予悲夫搏钟鼓乐之器先王所以被功德而和人神审音之士至有振车铎于空地而求之者非若九江碑材因人而贵也而辱于泥涂无所自効遇其非鉴以触废毁好古之士焉得默默而已乎乃作文以吊之词曰呜呼众方之生谬形殊器更首迭尾雌雄相废朝为美姬夕为蕉萃或奇偶之相续或九升而一蹶清饿和黜刑王眇贵生犊失明得骏折髀洞所遇之参差莽循还于一气传曰黄钟毁弃瓦缶雷鸣余始以为不然今乃信之矣呜呼搏钟何世所为质不呈刚形不露奇协律中度浑如天资掩抑虽久不见瑕疵爰有两栞三十六孔厥音琅然小大随叩曷所挺之瓌伟而偶沉于幽陋辱泥涂之污漫厌鳞鬣之腥臭嗟笋簴之一辞遽月宏之防穀幸阳愆而水涸天日怳其复覲谓庭贡之是充获効鸣于金奏何夜光之暗投卒按劒而莫售呜呼赤刀大训天球河图秦玺汉劒赵璧隋珠韃为之磬汾阳之鼎曲阜之履大泽之孤厯世相传以华国都下至威斗错刀羯鼓之椀破镜缺符遗簪堕珥信无益于经纶犹见收于好事是钟也郊庙所荐乐之纪纲统和元气舞兽仪凤令大河而更清使左角其不芒变化风俗返乎羲皇而乃废于深渊出而遇毁殆藻盘之不如矧牛铎之敢企此义夫志士所为疾心而切齿也然余闻之陰精之纯燥气之裔虽从火革其质不变一晦一明昔者既然僨而复起可无毕乎呜呼钟乎今焉在乎岂复为激宫流羽以嗣

其故乎将凭化而迁改服易制以周于用乎岂为钱为镈为铤为釜以供耕稼之职将为鼎彝以効烹饪之功乎岂为浮图老子之像巍然瞻仰于缙素乎岂为麟趾防蹄之形翕然玩于邦国乎岂为干越之劒气如虹霓扫除妖氛于指顾之间乎将为百鍊之鉴湛如止水别妍丑于高堂之上乎新故相代未始云毕纷然殊途必有一出决不泯没草亡木卒呜呼镈钟又将奚防

责沈文贻知默侄 陈 瓘

适越而北辕越不可至徙越人而置于齐里则越语可易而为齐然而气质一定而不能自易其习者非以其不学欤气质之用狭道学之力大习其所自习者未尝察也天气而地质无物不然人藐乎其间亦一物耳物与物奚以相遠或哲或愚不系其习乎思诚之道莫先于学务学之要在于求师顏子之不迂不貳得于孔子晞顏之人将孰师焉叶公问孔子于子路子路不对夫叶公有知人之明有谋国之忠爱贤而得民慎微而忧遠其事皆有可指其遗语之记于缙衣者亦可观焉楚国之贤谁出其右子路非慢贤者也鲁有尼而彼不知焉则于其问也何足对哉陈良楚产也而能使北方之学者莫或先之故孟子以良为豪杰之士为其能悦周公孔子之道而已不知仲尼则虽贤如子高亦孔门之所不对也为士而稽古者可不鉴哉予元丰乙丑夏为礼部贡院防检官适与校书郎范公醇夫同舍公尝论顏子之不迂不貳惟伯淳有之予问公曰伯淳谁也公默然久之曰不知有程伯淳耶予谢曰生长东南实未知也时予年二十有九矣自是以来常以寡陋自愧得其传者如杨中立先生亦未之识也崇寧之初兄孙渐就学其门时予在合浦始获通问予之内讼改过赖其一言渐于是时亦以所闻警予之繆予始忽其言久而后知其为药石也今渐来天台考其学益进闻其言益可喜陶染薰铸有自来矣举修步于南溟观洪澜于北壑此可遠之基也始之不谋何以得此古之善学者心遠而莫御然后气融而无间物格而不二然后養熟而道凝山上有木其进也渐合抱之干岂一朝一夕之所可俟哉人之患在不立其基基立而不勉亦何以愈于彼乎物之终始可不严哉始识而终成同乎一默非言语所能究也予以多言取祸尚未诛殛戴恩自幸不知歲月之久而生死之有二也既老且病手痺目昏简编笔砚殆将捐弃今于渐之行不能忘言作责沈以贻之喜渐之能谋其始而笃之使有成也政和三年八月九日

宋文鉴卷一百二十七

卷一百二十八

钦定四库全书

宋文鉴卷一百二十八

宋 吕祖谦 编

对问

应责 柳开

或责曰子处今之世好古文与古人之道其不思乎苟思之则子胡能食乎粟衣乎帛安于众哉众人所鄙贱之子犹贵尚之孰从之子化也忽焉将见子穷饿而死矣柳子应之曰于乎天生德于人圣贤异代而同出其出之也岂以汲汲于富贵私丰于已之身也将以区区于仁义公行于古之道也已身之不足道之足何患乎不足道之不足身之足则孰与足今之世与古之世同矣今之人与古之人亦同矣古之教民以道德仁义今之教亦以道德仁义是今与古胡有异哉古之教民者得其位则以言化之是得其言也众从之矣不得其位则以书于后传授其人俾知圣人之道易行尊君敬长孝乎父慈乎子大哉斯道也非吾一人之私者也天下之至公者也是吾行之岂有过哉且吾今栖栖草野位不及身将已言化于人胡后于吾矣故吾有书自广亦将以传授于人也子责我以好古文子之言何谓为古文古文者非在辞澁言苦使人难读诵之在于古其理高其意随言短长应变作制同古人之行事是谓古文也子不能味吾书取吾意今而视之今而诵之不以古道观吾心不以古道观吾志吾文无过矣吾若从世之文也安可垂教于民哉亦自愧于心矣欲行古人之道反类今人之文譬乎游于海者乘之以骥可乎哉苟不可则吾从于古文吾以此道化于民若鸣金石于宫中众且曰丝竹之音也则以金石而听之矣食乎粟衣乎帛何不能于众哉苟不从于吾非吾不幸也是众人之不幸也吾非以众人之不幸易我之幸乎纵吾穷饿而死死则死矣吾之道岂能穷饿而死之哉吾之道孔子孟轲扬雄韩愈之道吾之文孔子孟轲扬雄韩愈之文也子不思其言而妄责于我责于我也即可矣责于吾之文吾之道也即子为我罪人乎

答客问 尹源

客谓予曰敢问人臣不忠孰为大曰无过为大客曰过之为言失中之谓也为臣有是则悖于事而害于治君子善于无过而子以为不忠惑矣曰余所谓无过者非果能无过众人不以为过无迹可攻也何则自古人臣为不忠者未有不外示畏谨循法度而能固其宠久其权以遂其邪者内则为宰相为卿大夫不敢主天下事与进退贤不肖曰吾知循故事尔専则罪也外则为郡为邑以至廉察一道视政之 不敢革视民之疾不敢去曰吾知奉法尔违乃辟也若此者不惟时君以后无过天下之人亦以为无过苟终不能辨之使内外相济以成其俗则国

日削民日敝以至大乱而莫之御谓之忠可乎忠臣则不然一心公乎天下不以身之安危易其守其行事也或犯上之忌或冒下之谤若此者不惟时君以为过天下之人亦以为过矣苟能辨之使得行其道则国享其利民被其赐谓之不忠可乎故忠臣本于爱君奸臣本于爱身未有爱君而先其身爱身而先其君者客曰如子之說仲山甫明哲保身万石君崔光忠谨无过皆不忠乎曰若数子皆纯乎其中非求无过之名以为已利故忠臣之过小而必形奸臣之过大而不章世人徒见其形者以为过也孔光张禹所以危汉宗林甫所以祸唐室曰然则人君何以辨之曰舍其迹而责其心术斯得矣

谕客 刘敞

寶元康定之间元昊畔诏书求材谋之士于是言事自荐者甚众辄下近臣问状高者除郡从事其次补掾史且数百人时予方遊吴中客有相哀者作谕客客谓公是先生曰盖闻贤者不遗利智者不失时因形推势以事为机是以功勲流于竹帛盛德载于黎庶历百世而不衰掩众人以独骖此所谓豪杰之士也而先生亦有意于此乎先生曰何以教之客曰今西兵距境昆仑道絕主上不怡邊有宿甲旃裘之贡不入钟鼓之娱不劝者于今三年矣是以下求贤之诏开自荐之路总摯奇俊兼聽天下恩涵于人心义激于肺腑故令下之日坐者泣沾襟卧者涕交頤咸欲奋必死之力蹈难测之机忘山川之苦薄战伐之危请长纓以系颈输家财以济师拜章者交乎公车献策者满乎北阙起徒步以析爵由一言以改列此亦遭遇之时变化之契勇辯之辰敌国之势穰苴所以权军而西出苏秦所以掉舌而东逝也今先生乃悄乎如不知藐乎如不闻名与智寂迹与世沦懷书满腹不如众人意者暗于事势而然乎且夫道期于用不必全洁功期于成不必无辱是以伊尹负鼎伍员鼓腹百里食牛包胥恸哭乘时因势大直细曲崇如丘山炳若执烛今先生乃独习无用之言守难行之事遗弃诸子專意六艺井田虽通不可以厚财赋之入乡饮虽讲不可以助军旅之急羽舞虽文不可以代干防之执麻冕虽纯不可以更甲冑之裘睢盱拳曲空言少实不可图进取之益则何不卑论侪俗夜寝夙兴驰骋乎孙吴之场揣摩乎苏张之营舌如电流功如雷行威名并建家国两荣乃反侈陋巷之处甘藜藿之食目无韶曼耳絕金石抱瓮而汲不知用力行身若此老且奚益先生曰吁客何貌之壮而语之少何愿之大而智之小信难以议道矣虽然不可以不陈也昔者轩有版泉之师尧有丹浦之征舜有三苗之诛啓有扈氏之兵成汤造攻于牧宫文王收績于崇城当此之时覆載侔于天地文明比于日月休恩渗于时雨厉威粲于霜雪跂行喙息罔有不服然且干戈未尽戢弓矢未尽闭小至俘馘大至流血巍巍之功不为之差减赫赫之号不为之灭裂适足以增其徽名广其休烈而已客以谓有损于盛德邪夫狂童鴟张天夺其魄跳踉颠踣假命顷刻亲戚不言思得所殛狗吠其主防窃疆场此亦蚩尤三苗何以异哉然而将帅之臣阅于诗礼介冑之卒奋于防兇赏未及悬刑未及峻而天下之民亿兆之众固已集矣于是乎虎眄鹰眊龙行云起譬若挽千石之弩决垂溃之疽引洪河之流沃殆灭之燬曾不移息而可见又何足烦天下之学士主上所以干干夕惕劳于求贤通自进之路开博访之门者恐伯高傅說之流藏于岩野伊尹大师之品逸于屠钓又所以明谦让之义恭聽卑之操使非常之业与士大夫共有也此乃三王所不及五帝所难行愚陋之人岂能昭见其情哉昔燕欲骏马乃市朽骨而千里之驹果至越欲勇士乃捐怒 而百夫之勇来萃主上亦欲致特达之人是以狂狷者无所拂排触者无所忌高爵重禄或富或贵鉴洞乎神明量配乎天地岂以为小丑之未夷

羣凶之尚恣哉且夫东渐岛夷南及交趾西奄孤竹北越凿齿受令朝朔齐一车轨雷动风行方百万里观数郡之地元昊之众曾不若黑子之着面蚁之循穴而欲以敌国论之固失类矣且客独不闻宋受命之說乎昔者唐失其御海水横溢寰宇之内分为六七不贡不朝靡所统一于是蠢蠢之氓困于戈鋌积尸为山流血成川糜溃屠剥者盖五十余年上帝眷之乃命太祖受禅啓国方行千里犹有残孽弗率弗祀太宗平之真宗成之至于制作之道以或未遑然亦开籍田封太山礼河汾考百王皇上率循圣武靡有遗轍而胜残去杀适底今日是以往者申访古乐绪正郊配大定六籍谨敕元防欲以就一王之法成必世之期使后嗣遵其矩太常肆其仪参于六经表于万年泽漏于重溟功陟乎上天还成康之俗俪典谟之篇包弓偃革无得逾焉此学者所以踊跃而鄙儒所以拳拳也何以苏张于平世孙吴于异类终无益于王道空自絶于圣治客徒笑我暗于事机我亦悲客躁于富贵而不知制作之义也言未毕客竦而谢曰荒野之人溺于所闻先生幸教之谨受令矣

反求斋对 谢逸

李子作斋于防事之北求名于余其名曰反求李子请曰愿闻反求之义对曰子不闻楚国之盗者乎楚之盗曰支贡者行若无迹语若无息逾垣若鸟穴土若防居于楚国人无夜不亡其物焉国人心知其贡也而执之无状每亡物必骂曰是必贡也其如不可执何居一日贡语其隣之子曰楚之盗不为寡矣每亡物必尤贡也何隣之子曰子无怒国人之尤已也子能为盗故亡物者必尤子子而不为盗其谁尤子哉贡曰是不难也吾且阖户不出矣悦夜有亡物者亦将以尤贡可乎是夜楚人彻卫释禁而国中无犬吠之惊君子曰人不可不反求诸已也仁所以爱人者也爱人不亲则反诸已曰仁未至也智所以治人者也治人不治则反诸已曰智未至也敬所以礼人者也礼人不答则反诸已曰敬未至也行有不得者皆反求诸已而惟人之责则与楚之盗日攘其物而怒人之尤已也何异哉反求之义其在斯乎李子恍然为间曰命之矣李子名绂字明服余表弟也又从余故告之以名斋之义使归而书诸壁焉

三山移文 宋白

三山之英十洲之灵排烟拂雾勒移山庭夫以逍遥 俗之姿缥缈飞仙之状控白鹤于云末骖青鸾于天上吾方知之矣若其冥冥帝先杳杳象外厌浮世而龙摠曳天倪而蝉蜕聆白雪于太虚挹流霞于上界因亦有焉岂其侈靡轻浮猖狂迅速习夏癸之奢用商辛之酷将大道以为戲勦万民而逞欲何其谬哉呜呼龙驭不存鼎湖长往万古千秋英灵盼蟹世有秦皇爰及汉帝既崇登高益骄益炽然而貌学希夷情忘橐籥窃祀神山滥封东岳污吾真风轻吾上药虽笃志于仙林竟无心于天爵其始至也将拍洪崖挹浮丘捐百揆弃诸侯鼃梁架日劒气凌秋或思玉皇可接或忆金仙共游废元元以不治仰苍苍而是求燕昭何足比子晋不能俦及其妄說斯行贪诚弥勇智刃挥霍灵台飞动乃阅意海隅穷奢世上泛楼船而济重溟建祈年而侔大壮兰橈馥其天风桂栋凌乎辰象望仙阙而何极顾又寰而如防至其俨霞冠垂珠绶履鳳文之舄列蛟龙之绣焚百和于筵上辉九华于坐右羽旆争耸瑶坛竞开丹台紫府在何处白凤青鸾犹未来大寶非贵三清是属耻万机之 屑隘六合之局促将纪号于真图任销声于帝篆希风七十君委政三十穀使我徒费步虚尝轻举徐福不归安期谁侣文成五利

并虚词太一上元徒延伫至于栢梁灰烬承露飘零甲帐空兮暮烟怨羽人去兮秋风惊昔求
长生跻壽域今见委骨在穷尘是知碧海汪洋瀛洲浩渺方丈争奇蓬莱竦峭慨沙丘之云云
悲茂陵而谁吊故其露惨长寒风啼自咽秋草凄凉春花愁絕嗟罗绮之皆空叹池台之已灭
且夫奄有神器化育羣生将天地以合德与日月而齐明岂可使凤宸寂寥龙图销毁帝道荒
芜天潢泥滓游心于幻路教臣民而以诡宜局玉洞掩天闕扬大雾涌惊湍隔袂风于海上杜
妄魄于云端于是瞠波如山怒云寡色斥二主之讹谬警后王之道德请为治世君无俟宾天
客

跋奚移文 黄庭坚

女弟阿通归李安诗为置婢无所得乃得跛奚蹒跚离疏不利走趋颍出屋檐足达戸枢三姬
挽不来两姬推不去主人不悦厨人骂怒黄子笑之曰堯牵羊而舜鞭之羊不得食堯舜俱疲
百羊在谷牧一童子草露晞而出草露降而归不亡一羊在其指防故曰使人也器之物有所
不可则亦有所宜警夜偷者不以马司昼漏者不以鸡准绳规矩异用殊施天倾西北地缺东
南尺有所不逮寸有所罅子不通之则屨不可运土簣不可当屨坐而睨之小大俱废子如通
之则瞽者之耳聋者之目絕利一源收功十百事固有精于一则尽善徧用智则无功有所不
能乃有所大能焉呼跛奚来前吾为若诏之汝能与壮士拔距乎能与羣狙赋芋乎能与八骏
取路乎能逐三窟狡兔乎皆曰不能曰是固不能闺门之内固无所事此今将诏若可为者汝
无状于行当任坐作不得顽痴自令谨飭晨入庖舍涤鎗澹釜料简蔬茹留精黜犒脔肉法欲
方脰鱼法欲长起溲如截肪羹饼深注汤和糜勿投醯醢臼晚用姜葱防不欲焦旋 不欲黄
饭不欲着牙扬盆勿驻沙进火守炷水沃沸鼎斟酌芰苳生熟必告姨防临食爬垢撩髮染指
杓嚼截懷骨事无小大尽当關白食了涤器三正三反枚拭罇洁寝匙覆碗陶瓦髹素视在
谨数兄弟为行牡牝相当日中事闲浣衣漱襦器秽器净谨循其初素衣当白染衣增色梔郁
为黄红螺蚌光揆蓝杵草茅搜橐皂浆胰粉白无不媚好燥湿处亭尉帖坦平来往之役资它
使令牛羊下来唤鸡栖桀撑拒門闕闲防草窃饮饭猫犬堙塞防穴凡鸟攫肉猫触鼎犬 鎗
防窺甑皆汝之罪也春蚕三卧升簇自裹七昼七夜无得停火纈麻藤葛蕉任絺绤锡踈手作
无有停时紵缉偷工夫一日得半工一纓亦有余暑时蕴蒸扇凉蜜水薰艾出蚊水盘去蝇果
生守树果熟守筥执弓懷弹驱吓飞鸟无得吮尝日使残少姆姬骂讥 痢泄呕天寒置笼衣
食毕烘搔痒抑痛炙手擱冻无事倚墙鞦履可作堂上叫呼传声代诺截长续短鳬鹤皆忧持
勤补拙与巧者俦凡前之为汝能之不跛奚对曰我缺于足犹全于手如前之为虽劳何咎黄
子曰若是则不既有用矣乎皆应曰然无不意满

连珠

连珠二首 徐铉

道不可以权行终则道防情不可以苟合久则情踈是以兵諫爱君君安而忠敬已失同舟济
险险夷而取授自殊

运不常偶体道者无忧时不常来抱器者无滞是以霜露既降徂来不易其贞弓矢载囊董泽不逾其利

连珠一首 晏殊

时平德合秉均者续隐于防先运极道消享位者誉隆于事外是以房杜之恩勤莫二无迹可寻郭裴之退黜居多其名益大【郭汾阳裴晋公也】

连珠一首 宋庠

山有梗梓之材居山茂草而舍田有禾稷之实力田者半菽而饱廐有骥骤之乘掌廐者羸股而步此所谓役于物者智不建乎物也无木者有华榱之防无田者有嘉穀之享无廐者有上駟之御此所谓役物者智包乎物也故君子逸于用德小人劳于用力

连珠一首 刘攽

盖闻诡道取胜得以暂用懷恶致讨未有能克是故以桀诈桀可容于微幸用燕伐燕不足以相服

宋文鉴卷一百二十八

卷一百二十九

钦定四库全书

宋文鉴卷一百二十九

宋吕祖谦编

琴操

怀归操 刘敞

蟋蟀在堂歲云除今我不乐鬱以防岂不怀归畏简书蟋蟀在堂歲云逝今我不乐濡以滯岂不怀归友朋畏

醉翁操 苏轼

琅邪幽谷山水奇丽泉鸣空涧若中音防醉翁喜之把酒临听輒欣然忘归既去十余年而好奇之士沈遵闻之往游以琴写其声曰醉翁操节奏疎实而音指华畅知琴者以爲絶伦然有其声而无其辞翁虽爲作歌而与琴声不合又依楚词作醉翁引好事者亦倚其词以制曲虽粗合均度而琴声爲词所防约非天成也后三十余年翁既捐馆舍而遵亦没从矣有庐山玉涧道人崔闲特妙于琴恨此曲之无词乃谱其声而请于东坡居士以补之云

琅然清圓谁弹响应空山无言惟翁醉中知其天月明风露娟娟人未眠荷蕢过山前曰有心也哉此贤【泛声同此】醉翁啸咏声和流泉醉翁去后空有朝吟夜怨山有时而童顛水有时而囿困思翁无歲年翁今爲飞仙此意在人间试听徽外三两

于忽操 王令

刘表见庞公将起之而公不愿也表曰然则何谓公曰我可歌乎既歌命子弦之凡三操

于忽乎不可以爲其又奚爲离娄之精夜何有于明瞽旷之耳聋者亦有耳【一本作塞何有于声】東王良之手兮后车载之前行险以既覆兮后逐逐其犹来虽目盼而心骇兮顾其能之安施委墨防以听人兮虽班输亦奚以爲于忽乎不可以爲其又奚爲椽栳桷榱之累重顾柱小之奈何方风雨之晦陰行者艰而莫休居者坐以笑歌不知压之忽然兮其谁安何

于忽乎不可以爲其又奚爲谓鸡斯飞谁得之吾方饥而羈谓豕斯突何取于防是皆以食而得之吾方饥而后噫噫鸡豕兮死以是兮

昼操【孟子去齐舍于昼作】 林 希

彼滔滔之天下余孰从而与归来何其然兮其去何为吾行或使矣止或尼之母嗟吾行矣于此迟迟弃其量鬴兮 撮安施钩石则委兮亦何用于铢铢顾瞻咨嗟兮人曷余疑呜呼余归兮已而已而

上梁文

开封府上梁文 杨 亿

受三灵之眷命开百世之丕基居中土以制四方坐明堂而朝万国上观 象设路寝而辟应门下鉴黄图定神州而分赤县玉帛骏奔而荐至舟车辐凑以交驰居民最处于浩穰寰宇共瞻于表式法天崇道皇帝陛下道光上圣仁洽普天性尧舜之聪明体禹汤之勤俭垂衣裳而布政悬法象以授人旰食视朝俾精求于理本临轩遣使常散采于民謡物情而煦育如春王道而坦平若砥故得五兵不试边陲无金革之声四序由康陇畝起仓箱之咏敦淳反朴黎民尽致于可封献賁输防异域曾无于后至混车书而一統颁正朔于四夷十年逵过于成周拓土更逾于彊汉乃眷京畿之千里旁连魏阙之九重包括诸华仪刑列郡疆理既推于广斥閭閻最号于便蕃岂惟狭少之场所谓帝王之宅爰求控 实在元良皇太子道契黄离位隆苍震问安视膳素彰周寝之勤主鬯承祧爰践汉储之贵自春宫而育德镇天邑以分忧诞扬慈惠之风广布神明之政緑林屏息絶吠犬以堪惊玉烛匀调无喘牛而可问于是决断簿书之暇经营土木之功广栋宇之新规集班输之絶艺挥斤者成市荷锺者如云度梗枿杞梓之材召丹雘圉圉之匠百堵皆作不日而成梁横防竦以蜿蜒瓦叠鸳鸯而迤邐堂皇有炜防事斯严廊回合以四周庭清虚而中敞制度迭彰于壮丽形容备极于巍峩足以明东朝副贰之尊表南府镇临之盛儿郎伟今兹吉日将毕奇防爰自抛梁式申犒劳散金钱而满地堆饼餌以如山卮酒 肩盈樽满案极量而饮应不羨于单醪实腹而飡固如填于巨壑既醉以饱式舞且歌同承涣汗之恩共乐升平之化

抛梁东三韩百济慕华风毛车逵涉浮天浪欢呼鼓舞未央宫

抛梁西雪岭金河路不迷万里玉关皆我土葡萄苜蓿徧高低

抛梁南跼鸢浪泊圣恩覃大贝明珠盈帑藏崔嵬铜柱拂烟岚

抛梁北匈奴逃遁空沙碛茫茫絶漠胡无人待上陰山重刻石

抛梁上非烟颢气何萧爽历历天边种白榆亭亭云际峩仙掌

抛梁下万井繁华堪大詫家家楼阁倚晴空处处弦歌乐皇化

伏愿抛梁已后风调雨顺时和年丰圣壽灵长与大椿而难老邦家巩固将磐石以无穷少海长浮于厚载前星永耀于 穹济济宫庭之僚属森森天府之賓从尽预商山之羽翼咸依俭幕之芙蓉将吏奔趋而有幸军民抚育以皆同悉倾心而奉上并竭节以向公路絕寇攘夜戸而从兹不闭人无争讼圜扉而自此常空百姓咸跻于寿域八方悉被于仁风然后我皇帝之千秋万歲长端拱以居中

英宗殿上梁文 王安石

天都左界帝室中经诞惟僊圣之祠夙有神灵之宅嗣开宏筑追奉睟容方将广舜孝于无穷岂特尚汉仪之有旧先皇帝道该五泰德贯三仪文摘云汉之章武布风霆之号华夏归仁而砥属蛮夷驰义以骏奔清蹕甫传灵輿忽往超然姑射山无一物之疵邈矣寿丘台有万人之畏已 鼎湖之弓劍将游高庙之衣冠今皇帝孝奉神明恩涵动植纂禹之服期成万世之功见尧于羹未改三年之政乃眷熏修之吉壤载营馆御之新宫考協前彝述追先志孝严列峙寢門可象于平居广拓旁开輦路故存于陈迹官师肃给斤筑隆施揆吉日以庀徒举修梁而考室敢申善颂以相欢謠

儿郎伟抛梁东圣主迎阳坐禁中明似九天升晓日恩如万国转春风

儿郎伟抛梁西瀚海兵销太白低王母玉璫方自执大宛金马不须赍

儿郎伟抛梁南丙地星高每歲占千障灭烽闻岭徼万艘输餽引江潭

儿郎伟抛梁北边头自此无鸣镝即防呼韩渭上朝休夸窳窳燕然勒

儿郎伟抛梁上彷彿神游今可想风马云车世世来金輿玉笋年年往

儿郎伟抛梁下万灵隤祉扶宗社天垂嘉种已丰年地产珍符方极化

伏愿上梁之后圣躬乐豫寶命灵长松茂猷两宫之寿椒繁占六寢之祥宗室蕃维之彦朝廷表干之良家传庆誉代袭龙光肩一心而显相保鑣祝之无疆

披云楼上梁文 陈履常

夙夜在宫必有燕休之地上下同乐孰知兴作之勤惟此东州称为辅郡遗泽未息犹有陶虞之风王化既成更同齐鲁之俗河山千里枹鼓不鸣闾巷百年豪杰间出地滋垦辟歲嗣丰穰里无愁叹之声吏絕追呼之扰因斯时之暇豫乐此地之登临革故增高事非过制断长续短费不及民栋宇靓深称吏民之观望歲时游豫遂老防之欢娱爰历灵辰用兴危架听于輿颂落此成功

拋梁東日上云開四顧中今代功名歸二老當年富貴有朱公

拋梁南舳舻街尾系江潭朝隲已作豐年雨暑飲行听抵掌談

拋梁西陰陰桃李下成蹊舉頭更 長安近送日長隨落日低

拋梁北瑞塔亭亭入雲直百年戰鬪及明時千里河山余故國

拋梁上危架岿巍逮千丈房心瑞璫近檐楹海岱摧藏但空曠

拋梁下割肉成堆酒如洿燕雀投人也自忙防蝠旋墻不容罅

伏愿上梁以后人神同力暘雨以时水宿涂行夜无风露之警盆縑鎌割家有 廩之余囹圄一空鞭笞不试商旅四集货贿遂通据榻以谈不减庾公之兴从游而赋尚须韩子之文

书判

辛捕罪人丁过而不救辞云家有急事救疗

余靖

逋播未播宜同掩袭弥留待救安可逋迍苟或责其容奸姑合先于拯患辛事当祇役职在追逃力而拘之饥鹰之効未展势不足者因兽之鬪方劳眷彼遵涂之人式冀执兵之助备其越逸此望惠然肯来忧在族姻彼乃往而不返诚或虑其飾詐謀合原其执心网恐论于吞舟固宜并力病方深于易箠安得忘情徒欲诘其图全未可罪其为已囚其亡命虽追捕以攸先人各有亲当患难而自救纵云行迈殊匪坐观捕逃之党未除遽令譴我瞋 之求不济则欲怒谁职且异于追胥罚难加于行路是则彼有词矣姑合宥而舍之

丙越度官府垣篱官司罪之辞云随甲而往

余靖

協謀抵禁法有減論冒度干刑理无从坐既投足而同往豈原心而或殊丙德之弗修動而有悔不如已者方逾數仞之墻因而從之遂罹三尺之法自疎明慎猶啓薄言況穴隙以相從惟蔭茨而自履前王着令徒攀共犯之條君子向儒盍守獨行之節矧府寺之攸設惟藩屏而是崇不得其門同臨蔽惡之地必求諸道當慙由徑之非雖曰比之匪人實亦動而過則原其發慮遽云職汝之由詳彼治躬豈可効人之僻咎將誰執戚實已招視篱落之具存當跬步而為過別冒漢家之網或異首科自絕蒲人之祛諒難降等三千之條備紀七十之杖何逃罪必心詞奚苦訴

丙为左仆射门立槩防其子封国公复请立防仪曹

不许 余靖

位縻王爵固有彝仪名列子伦所宜降礼既高閼之共处岂列防以重施丙鹄印传家蝉聯袞宠斗枢逾贵既升八座之荣社土启封遂及一经之嗣胡为令子罔達宏规以谓秩视诸公幸列分茅之位勲崇三品请颁立槩之仪展矣攸司详夫大体且乘轩服冕虽同列国之权问寝趋庭岂有异门之制纵未该于令式宜必叶于谋猷况乎尊有压卑之文备存典册子存避父之礼綽着章程国有大焉古之道也恩荣沓至任旌高穎之勲制度问愆宜喜柳或之见必当固执无谓他规戴记传芳车马犹称于不及隋书劝善槩防寧闻于再颁必采礼卿之词勿貽侯氏之过

乙夜居于外丙往吊之或责其非

余靖

宴安有度式贵慎仪出处无容固宜行吊既自愆于所止亦何怒于相随乙德之不修动而有悔安身克谨当从嫡寝之间居外尤非自比遭丧之变眷惟益友深達彝章朝夕四时既失常于访问吉凶五礼遂矫辞于祸灾纵未至于嫌疑抑已陈于规诲进退可度燕衣将乱于悲哀居处以庄环经何慙于讽刺尔惟失节我岂废言所期克举其仪孰谓不知而作衣服宫室虽弗袭于褰裳揖让周旋固可讥于牀第理既同于事死问乃比于知生况彰终夕之嫌复异致斋之制改容并进虽兴言偃之非问疾同辞宜守仲尼之训吊之可也人其谓何

乙为政请隳都城讥其无备辞云都城不过百雉

余靖

政在保民固宜多备城苟过制何谓弱枝爰启见机之谋当许复隍之请乙器能高世忠亮防羣方推许国之忠遽展济时之略以谓金汤作固诚多藩屏之功控带相高必启寇戎之害式陈良算允叶明谋庇民无假于深池頽墙愿填于濬洫且赫连定霸虽增蒸土之劳士蔦知权寧慎寘薪之役深详得失妙察兴衰纵墨翟多能九攻闻解带之术而郑丹遠识五大有在邊之讥蓋虞乎讐必保焉盍循乎古之制也今京不度在百雉以貽忧夫鲁有初諒三都之必毁允合仲尼之志何慙由也之忠

丁去官而受旧属馈与或告其违法诉云家口已

离本任 余靖

食槩养廉执心斯可及 受代改操则非安得因其去官遂不思于洁已丁也才高有立秩满

将迁飞凤衔书亦既荣于宠命解 罢政遂靡让于好羞谓行迈之有期曾厌私而不惧况古之循吏名列青编挂府丞之鱼诚在涖官之日留壽春之犊实惟去任之晨何乃肆贪罔知守节歌邓侯之五鼓曾是遵途特山阴之一钱当思励俗徒欣苟得岂曰能谋重耳受殍蓋当于旅食叔鱼反锦益愧于公行如云不尔瑕疵则恐罔知纪极推恩布化未闻畫象之遗风黥货启奸遽恣贪狼之本性纵离境壤终丧廉隅減三等以定刑乃九章之垂统甲为县令士乙与其故人丙醉欧乙乙诣县讼丙令问曰伤乎曰无伤也相识乎曰故人三十年矣尝相失乎曰未也何谓而欧汝乎曰醉也解之使去有司劾甲故出丙罪甲曰鬪不致伤敕许在村了夺耆长则可县令顾不可乎

王 固

令亲民而殴之于善者也士所以学为君子也今释一醉忿相欧笞四十之过全其三十年间未尝相失之交欧民于善而责士以君子之道者也仲尼为鲁司寇赦父子之讼汉冯朝韩延壽不肯决昆弟之争笃于亲而故旧不遗其义蓋一耳甲之所为于古为能教于今为应法不可劾

甲为出妻已告其在家尝出不逊语指斥乘輿有司言虽出妻而所告者未出时事也或疑薄君臣之礼隆夫妇之恩律不应轻

王 固

指斥乘輿臣民之大禁至死者斩而旁知不告者犹得徒一年半所以申天子之尊于海内使虽遐逖幽陋之俗犹无敢窃言讪侮者然书称商周之盛王闻小人怨骂乃皇自敬德不以风俗既美而臣民俨然戴上不待刑也则此律所禁蓋出于秦汉之苛耳若妻为夫服斩衰而降其义甚重传礼已来未之有改也且挟虐犯法既许自诉而七出义絶和离之类岂有穴怨顾恬然借衽席之所知喜为路人挤之死地其恶愍矣宜如有司所论已若夫減所告罪一等甲【缺】首以律附经窃谓非薄君臣之礼而隆夫妇之【缺】

宋文鉴卷一百二十九

卷一百三十

钦定四库全书

宋文鉴卷一百三十

宋吕祖谦编

题跋

跋放生池碑 欧阳修

右放生池碑不著书撰人名氏放生池唐世处处有之王者仁泽及于草木昆虫使一物必遂其生而不为私惠也惟天地生万物所以资于人然代天而治物者常为之节使其足用而取之不过万物得遂其生而不夭三代之政如斯而已易大传曰庖牺氏之王也能通神明之德以类万物之情作结绳而为网罟以佃以 盖言其始教民取物资生而为万世之利此所以为圣人也浮屠氏之说乃谓杀物者有罪而放生者得福苟如其言则庖牺氏遂为人间之圣人地下之罪人矣

跋华岳题名 欧阳修

右华岳题名自唐开元二十三年讫后唐清泰二年实二百一年题名者五百十一人再题者又三十三人录为十卷往往当时知名士也或兄弟同游或子侄并侍或寮属将佐之咸在或山人处士之相携或奉使奔命有行役之劳或穷高望远极登临之适其富贵贫贱欢乐忧悲非惟人事百端而亦世变多故开元二十三年歲在丙午是歲天子耕籍田肆大赦羣臣方颂太平请封禅蓋有唐极盛之时清泰二年歲在乙未废帝篡立之明年也是歲石敬瑭以太原反召契丹入自鴈门废帝自焚于洛阳而晋高祖入自太原五代极乱之时也始终二百年间或治或乱或盛或衰而往者来者先者后者虽穷达壽夭参差不齐而斯五百人者卒归于共尽也其姓名歲月风霜剥裂亦或在或亡其存者有千仞之山石尔故特錄其题刻每抚卷慨然何异临长川而叹逝者也

跋平泉草木记 欧阳修

右平泉草木记李德裕撰余尝读鬼谷子书见其驰說诸侯之国必视其为人材性贤愚刚柔缓急而因其好恶喜惧忧乐而捭阖之阳开阴塞变化无穷顾天下诸侯无不在其术中者惟不见其所好者不可得而说也以此知君子宜慎其好蓋泊然无欲而祸福不能动利害不能诱此鬼谷之术所不能为者圣贤之高致也其次简其所欲不溺于所好斯可矣若德裕者处富贵招权利而好奇贪得之心不已至或疲弊精神于草木斯其所以败也其遗戒有云坏一

草一木者非吾子孙此又近乎愚矣

跋景阳井铭 欧阳修

景阳井铭不着撰人名述隋灭陈叔宝与张丽华等投井事其后有铭以戒又有唐江宁县丞王震井记云井在兴严寺其石槛铭有序称余者晋王广也其文字皆磨灭仅可识者其十一二叔宝事史书之甚详不必见于此然录之以见炀帝躬自灭陈目见叔宝事又尝自铭以为戒如此及身为淫乱则又过之岂所谓下愚之不移者哉今其铭文隱隱尚可读处有云前车已倾负乘将没者又可叹也

跋王献之法帖 欧阳修

右王献之法帖余尝喜览魏晋以来笔墨遗迹而想前人之高致也所谓法帖者其事率皆吊哀 病叙睽离通讯问施于家人朋友之间不过数行而已蓋其初非用意而逸笔余兴淋漓挥洒或妍或丑百态横生披卷发函烂然在目使人骤见惊絕徐而视之其意态愈无穷尽故使后世得之以为奇翫而想见其人也至于高文大策何尝用此而今人不然至或弃百事精疲力以学书为事业用此终老而穷年者是真可笑也

读李翱文 欧阳修

予始读复性书三篇曰此中庸之义疏尔智者识其性当复中庸愚者虽读此不晓也不作可焉又读与韩侍郎荐贤书以谓翱特穷时愤无荐已者故丁宁如此使其得志亦未必然以翱为秦汉间好事行义之一豪雋亦善论人者也最后读幽怀赋然后置书而叹不已复读不自休恨翱不生于今不得与之交又恨予不得生翱时与翱上下其论也况乃翱一时有道而能文者莫若韩愈愈尝有赋矣不过羨二鸟之光荣叹一饱而无时尔推是心使光荣而饱则不复云矣若翱独不然其赋曰众器器而杂处兮咸叹老而嗟卑视予心之不然兮虑行道之犹非怪神尧以一旅取天下后世子孙不能以天下取河北以为忧呜呼使当时君子皆易其叹老嗟卑之心为翱所忧之心则唐之天下岂有乱与亡哉然翱幸不生今时见今之事则忧又甚矣奈何今之人不忧也余行天下见人多矣脱有一人能知翱忧者又皆疏遠与翱无异其余光荣而饱者一闻忧世之言不以为狂人则以为病子不怒则笑之矣呜呼在位而不肯自忧又禁他人使皆不得忧可叹也矣

读封禅书 刘敞

刘子曰新垣平 日再中文帝以建元言汾阴有宝鼎气乃效于后平之于术亦可免矣其卒以诈死为世大僂何哉彼以其术为遠而饰之以巧以其利为迂而益之以谄者也败不亦宜乎是故博学而精择之正言而谨守之不为顷久变志不以利钝迂虑辟此患也庄周有言母以人徇天母以故灭命岂新垣平之谓邪悲矣

书种放事 王 回

景德二年右谏议大夫种放赐假游嵩山真宗御资政殿置酒饯放侍臣当直者四人预之时有司不宿戒宣召既集皆相顾莫敢就坐上乃亲定其仪翰林学士晁迥西面侍上资政殿学士王钦若东面侍上知制诰朱巽南次迥待制戚纶南次钦若放北面对上示特客之云酒半上作七言诗一首赐放放奉和侍臣应诏皆作而钦若最后成二首焉初放养其母隐终南山讲经书着嗣禹表孟子文秦蜀诸生多从之游其母好道家言修辟谷之术放阿其好终身不娶妇世以其能行人之所难益高之朝臣屡表荐闻太宗召之辞疾不出上即位张齐贤以旧相守京兆又荐焉乃遣内供奉官周班赍手诏召放放应召既至拜右司谏直昭文馆赐名第什器御厨给膳四迁至工部侍郎卒放虽居官屡请假还山上辄为作诗置酒饯之后赐两制三馆学士等御筵饯之于琼林苑常手诏问以政事欲大用之放辞乃止昔尧起舜于畎亩之中位以司徒商高宗起傅说于岩野而位冢宰彼授受之际不嫌骇众如此而功烈竟立岂借其虚名而诞后世哉窃观真宗特礼宠放近世天子盖未闻也而放之行乃叛其所学以弃人伦为难有君而无臣惜哉放既正已不足则其用舍行止之节曷议焉

书襄城公主事 王 回

唐太宗长女襄城公主出降太常卿汾州刺史萧锐初公主在女时笃行好礼太宗贤之尝指以海诸公主既降锐锐父宋国公瑀尚无恙而太宗勅有司为公主起第公主辞曰妇事舅姑如子事父母定省朝夕所以养也而容别居者据何理也太宗不许而公主固辞不可夺太宗乃即瑀之私第其旁隋炀旧晋邸葺以为襄城公主第第成当施公主槩防于门公主又辞曰礼无以抗于尊者为荣也今舅之门既立防矣而更于女门施防是妇抗于舅而为礼岂所以荣女也太宗不许而公主终辞不可夺太宗乃勅以公主槩防并施于宋国公之门昔尧将任舜以天下以二女嫔之畎亩之中而不敢留于帝室者以舜有父母未顺其心虽与天下舜必不受也使舜受之顾非所以任天下者也周之王姬嫁于诸侯车服不系其夫犹执妇道以成肃雝之德故其诗曰曷不肃雝王姬之车自秦以来祖于申韩之术其治务以隆君抑臣为甚天子之女特创其号曰公主而壻者不得自当其妃匹曰尚公主其弊之渐至于父母不敢畜其子舅姑不敢畜其妇原其故以隆君抑臣为治也而使人伦諄于上风俗坏于下又岂所以隆君而治哉呜呼以唐太宗之明常指襄城以海诸女可谓知其贤矣然襄城辞切于礼而应于治古之效犹劳于再三而仅从其心则他公主之有舅姑者益亦别居耳盖 流于千载者虽愿治之明主犹不能遽变其习也而一女子卓然出其间可不谓贤哉

书洪范传后 王安石

王安石曰古之学者虽问以口而其传以心虽听以耳而其受以意故为师者不烦而学者有得也孔子曰不愤不启不悱不发举一隅不以三隅反则不复也夫孔子岂敢爱其道鹜天下之学者而不使其蚤有知乎以谓其问之不切则其听之不专其思之不深则其取之不固不专不固而可入者口耳而已矣吾所以教者非将善其口耳也孔子没道日以衰熄浸淫至于汉而传注之家作为师则有讲而无应为弟子则有读而无问非不欲问也以经之意为尽于

此矣吾可无问而得也岂特无问又将无思非不欲思也以经之意为尽于此矣吾可以无思而得也夫如此使其传注者皆已善矣固足以善学者之口耳而不足善其心况其有不善乎宜其历年以千数而圣人之经卒于不明而学者莫能资其言以施于世也予悲夫洪范者武王之所以虚心而问与箕子之所以悉意而言为传注者汨之以至于今冥冥也于是为作传以通其意呜呼学者不知古之所以教而蔽于传注之学也久矣当其时欲其思之深问之切而后复焉则吾将孰待而言邪孔子曰予欲无言然未尝无言也其言也盖有不得已焉孟子则天下固以为好辩盖邪说暴行作而孔子之道几于熄焉孟子者不如是不足与有明也故孟子曰予岂好辩哉予不得已也夫予岂乐反古之所以教而重为此譊譊哉其亦不得已焉者也

读江南录 王安石

故散骑常侍徐公铉奉太宗命撰江南录至李氏亡国之际不言其君之过但以厯数存亡论之虽有愧于实录其于春秋之义【春秋臣子为君亲讳礼也】箕子之说【周武王克商问箕子商所以亡箕子不忍言商之恶以存亡国宜告之】徐氏录为得焉然吾闻国之将亡必有大恶恶者无大于杀忠臣国君无道不杀忠臣虽不至于治亦不至于亡纣为君至暴矣武王观兵于孟津诸侯请伐纣武王曰未可及闻其杀王子比干然后知其将亡也一举而胜焉季梁在随随人虽乱楚人不敢加兵虞以不用宫之奇之言晋人始有纳璧假道之谋然则忠臣国之与也存与之存亡与之亡予自为儿童时已闻金陵臣潘佑以直言见杀当时京师因举兵来伐数以杀忠臣之罪及得佑所上諫李氏表观之词意质直忠臣之言予诸父中旧多为江南官者其言金陵事颇详闻佑所以死则信然则李氏之亡不徒然也今观徐氏录言佑死颇以妖妄与予旧所闻者甚不类不止于佑其它所诛者皆以罪戾何也予甚怪焉若以商纣及隋虞二君论之则李氏亡国之君必有滥诛吾知佑之死信为无罪是乃徐氏匿之耳何以知其然吾以情得之大凡毁生于嫉嫉生于不胜此人之情也吾闻铉与佑皆李氏臣而俱称有文学十余年争名于朝廷当李氏之危也佑能切諫铉独无一說佑见诛铉又不能力诤卒使其君有杀忠臣之名践亡国之祸皆铉之由也铉惧此过而又耻其善不及于佑故匿其忠而污以它罪此人情之常也以佑观之其它所诛者又可知矣噫若果有此吾谓铉不惟厚诬忠臣其欺吾君不亦甚乎

读孟尝君传 王安石

世皆称孟尝君能得士士以故归之而卒赖其力以脱于虎豹之秦嗟乎孟尝君特鸡鸣狗盗之雄耳岂足以言得士不然擅齐之强得一士焉宜可以南面而制秦尚取鸡鸣狗盗之力哉夫鸡鸣狗盗之出其门此士之所以不至也

书刺客传后 王安石

曹沫将而亡人之城又劫天下盟主管仲因勿倍以市信一时可也予独怪智伯国士豫让岂顾不用其策耶让诚国士也曾不能逆策三晋救智伯之亡一死区区尚足校哉其亦不欺其

意者也。聂政售于严仲子，荆轲参于燕太子丹，此两人者，污隐困约之时，自贵其身，不妄愿知，亦曰有待焉。彼挟道德以待世者，何如哉？

读柳宗元传 王安石

余观八司马皆天下之奇材也。一为叔文所诱，遂陷于不义。至今士大夫欲为君子者，皆羞道而喜攻之。然此八人者，既困矣，无所用于世，往往能自强以求别于后世，而其名卒不废焉。而所谓欲为君子者，吾多见其初而已，要其终，能母与世俯仰以自别于小人者，少耳。复何议于彼哉？

书沿淮巡检防壁 傅尧俞

巡检职捕盗，职举则盗去如失，其职兵皆盗也。何则？上既不戢，下从而纵，恃赖势力，侵渔良民，非盗而何？噫，鼠窃狗偷者，逐可去，捕可擒，系縲囚戮，其势易制。至于士兵一得纵放，则欺扰公行使，民口胶舌，结噤不敢出声，是诚盗之巨者。新息，腋淮面山地，虽褊隘，实为咽喉，故置巡检，提健兵百人以遏狂寇，官事修举，民倚之得安存，一非其人，下罹苦害，以区区之邑，若先用百盗，纵乎其间，傍与它盗者并力，贼之则虽欲背死趋生路，亦无繇也。曹君德华受命职捕盗，既至，颇革前约，身廉驭兵严，士不敢犯民，则向所谓百盗者，固以息矣。于是封域静宁，帖焉亡惊，居日多暇，颇图燕安。先是，视事防风，颶雨剥殆，不可居，德华丑之，命工新其栋宇，虽有取于民，半出私奉，规模宏伟，数倍平昔，可以示壮大。若益坚其廉，益厉其严，虽亡是防，不害居是防，不媿苟改其廉，弛其严，则是防广豁邃深，轩危瑰琦，更盛于今日，亦奚以为哉？徒增过重，不德尔后人至者，其廉与严，思有以上曹君可也。若曰某屋未丰，于是防某屋未华，于是防，思以土木之功加之，则可乎不可也？吾惧来者不知而务侈，以残吾民志，壁以示之。

书贾伟节庙 王安石

息之灭亡，移徙尚矣。其俗颇好鬼，视正直聪明之神，则蔑然。先是，邑之南几十数里，有其故侯之庙，国人事之，箫鼓豆牢，岁时甚谨。而公之祠在新城之北，密迩民间，不逮数步，门宇不崇，奠享不恭。人之至者，岁无一二，予甚疑。乘间因询诸故老，金曰：侯之祠不信，不祀，则祸福时至。贾公之神，虽不祭，不我为害。予曰：嘻，来！吾语尔。侯为息之君，不能保有尔众，至于丧社稷而亡国，其身殒，则其灵歇，恶乎能惊动此民，而祸福加于后世？此其怪妖，依凭恐诸愚，以幸祀尔。若贾公者，其民之主乎？昔尔之先有子曰男，曰女，皆杀而不育。公为邑之长，严为制而禁之，赖是生者以千数，非公息民，其遂绝尔将安出？昔之男，尔民之父也；昔之女，尔民之母也。活尔父母而不报，可乎？况公之英风灵气，固当未泯。以昔时之人，今日未必无阴相也。反以其不祸，诬以其不能而怠之，罪孰甚焉？尔归厚报尔之主，可也。无为奔走乎怪妖之庭，况礼曰：有功德于民，则祀之。是公之堂可祠，而侯之庙可废惜也。吾之贱，而侯之庙在籍，去之不可。尔听吾言而亟改，则尔之休茂矣。金曰：唯。而心不以为然。事如初。异日过公之祠，登公之堂，伤民之过，遂志于壁。

活尔父母，奠报不举，实吾神之侮，为民祸尤。豆牢是求，则吾神之羞。我瞻公之象，昂昂可仰。我

想公之灵英英如生厚矣公德在息之国嗟哉息民忘公之仁呜呼怪妖是趋明灵是诬尔则无知神不尔诛

书魏郑公传 曾 巩

予观太宗常屈已以从羣臣之议而魏郑公之徒喜遭其时感知已之遇事之大小无不谏诤虽其忠诚自至亦得君以然也则思唐之所以治太宗之所以称贤主而前世之君不及者其渊源皆出于此也能知其有此者以其书存也及观郑公以谏诤事付史官而太宗怒之薄其恩礼失终始之义则未尝不反覆嗟惜恨其不思而益知郑公之贤焉夫君之使臣与臣之事君者何大公至正之道而已矣大公至正之道非灭人言以揜已过取小亮以私其君此其不可者也又有甚不可者夫以谏诤为当掩是以谏诤为非美也则后世谁复当谏诤乎况前代之君有纳谏之美而后世不见则非惟失一时之公又将使后世之君谓前代无谏诤之事是启其怠且忌矣太宗末年羣下既知此意而不言渐不知天下之得失至于辽东之败而始恨郑公不在世未尝知其悔之萌芽出于此也夫伊尹周公何如人也伊尹周公之谏切其君者其言至深而其事至迫也存之于书未尝揜焉至今称太甲成王为贤君而伊尹周公为良相者以其书可见矣令当时削而弃之成区区之小让则后世何所据依而谏又何以知其贤且良与桀纣幽厉始皇之亡则其臣之谏词无见焉非其史之遗乃天下不敢言而然也则谏诤之无传乃此数君之所以益暴其恶于后世而已矣或曰春秋之法为尊亲贤者讳与此戾也夫春秋之所讳者恶也纳谏诤岂恶乎然则焚藁者非欤曰焚藁者谁欤非伊尹周公为之也近世取区区之小亮者为之耳其事又未是也何则以焚其藁为掩君之过而使后世传之则是使后世不见藁之是非而必其过常在于君美常在于已也岂爱其君之谓欤孔光之去其藁所言其在正邪未可知也其焚之而惑后世庸詎知非谋已之奸计乎或曰造辟而言诡辞而出异乎此曰此非圣人之所曾言也今万一有是理亦谓君臣之间议论之际不欲漏其言于一时之人耳岂杜其告万世也噫以诚信待已而事其君而不欺乎万世者郑公也益知其贤云岂非然哉岂非然哉

书资治通鉴外纪后 刘 恕

刘恕曰孔子作春秋笔削美刺子游子夏门人之高弟不能措一辞鲁太史左丘明以仲尼之言高遠难继而为之作传后之君子不敢绍续焉惟陆长源唐春秋吴楚之君僭号称王诛絕之罪也左氏传据鲁史因诸侯国书系年叙事春秋所贬损大人当世君臣有威权势力其事实皆形于传故隱其书而不宣以免时难后汉献帝以班固汉书文繁难省命荀悦依左传体为汉纪言约事详大行于世晋太康初汲郡人发魏襄王冢得纪年文似春秋其所记事多与左氏符同诸儒乃知古史记之正法自此袁宏张璠孙盛干宝习凿齿以下为编年之书至唐五代其流不废汉晋起居注梁唐实录皆其遗制也国语亦左丘明所着载内传遗事或言论差殊而文词富美为书别行自周穆王尽晋知伯赵襄子当贞定王时凡五百余年虽事不连属于史官蓋有补焉七国有战国策晋孔衍作春秋后语并时分国其后絕不录焉唐柳宗元采摭片言之失以为诬淫不防于圣作非国语六十七篇其說虽存然不能为国语轻重也司马迁始撰本纪年表八书世家列传之目史臣相续谓之正史本朝去古益遠书益烦杂学者

牵于属文專尚西汉书博览者乃及史记东汉书而近代士颇知唐书自三国至隋下逮五代懵然莫识承平日久人愈怠惰庄子文简而义明言虚诞而似理功省易习陋儒莫不尚之史学浸微矣按历代国史其流出于春秋刘歆叙七畧王俭撰七志史记以下皆附春秋荀勗分四部史记旧事入丙部阮孝绪七录记传录记史传由是经与史分夫今之所以知古后之所以知今因善恶以明褒贬察政治以见兴衰春秋之法也使孔子赞易不作春秋则后世以史书为记事琐杂之语春秋列于六艺愚者莫敢异說而终不能晓也恕皇祐初举进士试于礼部为司马公门生侍于大儒得闻余论嘉祐中公尝谓恕曰春秋之后迄今千余年史记至五代史一千五百卷诸生历年莫能竟其篇第毕世不暇举其大畧厌烦趋易行将泯絕予欲托始于周威烈王命韩魏赵为诸侯下迄五代因丘明编年之体仿荀悦简要之文网罗众说成一家书恕曰司马迁以良史之才叙黄帝至秦汉兴亡治乱班固以下世各名家李延壽总八朝为南北史而言词卑弱义例烦杂书无表志沿革不完梁武帝通史唐姚康复统史世近亡軼不足称也公欲以文章论议成厯世大典高勲美德褒赞流于万世元凶宿奸贬絀甚于诛殛上可继仲尼之经丘明之传司马迁安可比拟荀悦何足道哉治平三年公以学士为英宗皇帝侍讲受诏修厯代君臣事迹恕防辟寘史局尝请于公曰公之书不始于上古或尧舜何也公曰周平王以来事包春秋孔子之经不可损益曰曷不始于获麟之歲曰经不可续也恕乃知贤人著书尊避圣人也如是儒者可以法矣熙宁三年冬公出守京兆明年春移帅颍川固辞不行退居洛阳恕徧狷好议论不敢居京师请归江东养亲又以新书未成不废刊削恕亦遥局中尝思司马迁史记始于黄帝而包牺神农阙漏不录公为厯代书而不及周威王之前学者考古当阅小説取舍乖异莫知适从若鲁隱之后止据左氏国语史记诸子而增损不及春秋则无与于圣人之经包牺至未命三晋为诸侯比于后事百无一二可为前纪本朝一祖四宗一百八年可请实录国史于朝廷为后纪昔何承天乐资作春秋前后传亦其比也将俟书成请于公而为之熙宁九年恕罹家祸悲哀愤郁遂中瘫痪右肢既废凡欲执笔口授稚子羲仲书之常自念平生事业无一成就史局十年俛仰窃禄因取诸书以国语为本编通鉴前纪家贫书籍不具南徼僻陋士人家不藏书卧病六百日无一人语及文史昏乱遗防烦简不当遠方不可得国书絕意于后纪乃更前纪曰外纪如国语称春秋外传之义也自周共和元年庚申至威烈王二十一年丁丑四百三十八年见于外纪自威烈王二十三年戊寅至周显德六年己未一千三百六十二年载于通鉴然后一千八百年之兴废大事坦然可明昔李基用心过苦积年疾而药石不继卢升之手足挛废着五悲而自沈颍水予病眼病创不寐不食才名不逮二子而疾疹艰苦过之陶潜豫为祭文杜牧自撰墓志夜台甫还归心若飞聊序不能作前后纪而为外纪焉佗日书成公为前后纪则可删削外纪之烦冗而为前纪以备古今一家之言恕虽不及见亦平生之志也

卷一百三十一

钦定四库全书

宋文鉴卷一百三十一

宋吕祖谦编

题跋

书东臯子传 苏轼

予饮酒终日不过五合天下之不能饮无在予下者然喜人饮酒见客举杯徐引则予胸中为之浩浩焉落落焉酣适之味乃过于客闲居未尝一日无客客至未尝不置酒天下之好饮亦无在予上者常以谓人之至乐莫若身无病而心无忧我则无是二者矣然人之有是者接于予前则予安得全其乐乎故所至常蓄善药有求者则与之而尤喜酿酒以饮客或曰子无病而多蓄药不饮而多酿酒劳已以为人何也予笑曰病者得药吾为之体轻饮者困于酒吾为之酣适盖专以自为也东臯子待诏门下者日给酒三升其弟静问曰待诏乐乎曰待诏何所乐但美醖三升殊可恋耳今岭南法不禁酒予既得自酿酒月用米一斛得酒六斗而南雄广惠循梅五太守间复以酒遗予略计其所获殆过于东臯子矣然东臯子自谓五斗先生则日给三升救口不暇安得及客乎若予者乃日有三升五合入野人道士腹中矣东臯子与仲长子光游好养性服食预刻死日自为墓志予盖友其人于千载或庶几焉

书黄子思诗集后 苏轼

予尝论书以谓钟王之迹萧散简远妙在笔画之外至唐颜柳始集古今笔法而尽发之极书之变天下翕然以为宗师而钟王之法益微至于诗亦然苏李之天成曹刘之自得陶谢之超然盖亦至矣而李太白杜子美以英玮绝代之姿凌跨百代古今诗人尽废然魏晋以来高风绝尘亦少衰矣李杜之后诗人继作虽间有远韵而才不逮意独韦应物柳宗元发纤秣于简古寄至味于澹泊非余子所及也唐末司空图崎岖乱兵之间而诗文高雅犹有承平之遗风其论诗曰梅止于酸盐止于咸饮食不可无盐梅而其美常在咸酸之外盖自列其诗之有得于文字之表者二十四韵恨当时不识其妙予三复其言而悲之闽人黄子思庆历皇祐间号能文者予尝闻前辈诗每得佳句妙语反复数四乃识其所谓信乎表圣之言美在咸酸之外可以一唱而三叹也予既与其子几道其孙师是游得窥其家集而子思笃行高志为吏有异材见于墓志详矣予不复论独评其诗如此

题唐氏六家书后 苏轼

永禪師書骨氣深穩體兼眾妙精能之至反造疎淡如觀陶彭澤詩初若散緩不收反復不已乃識其奇趣今法帖中有云不具釋智永白者誤收在逸少部中然亦非禪師書也云謹此代申此唐末五代流俗之語耳而書亦不一歐陽率更書妍緊拔羣尤工于小楷高麗遣使購其書高祖嘆曰彼觀其書以為魁梧奇偉人也此非知書者凡書象其為人率更貌寒寢敏悟絕人今觀其書勁嶮刻厲正稱其貌爾褚河南書清遠蕭散微雜 體古之論書者兼論其平生苟非其人雖工不貴也河南固忠臣但有潛殺劉洎一事使人怏怏然余嘗考其實恐劉洎末年褊忿實有伊霍之語非潛也若不然馬周明其無此語太宗獨誅洎而不問周何哉此殆天后朝許李所誣而史官不能辨也張長史草書頽然天放略有防畫處而意態自足号称神逸今世稱善草書或有不能真行此大妄也真生行行生草真如立行如行草如走未有未能行立而能走者也今長安猶有長史真書郎官石柱記作字簡遠如晉宋間人顏魯公書雄秀獨出一變古法如杜子美詩格力天縱奄有漢魏晉宋以來風流后之作者殆難復措手柳少師書本出于顏而能自出新意一字百金非虛語也其言心正則筆正者非獨諷諫理固然也世之小人書字雖工而其神情終有睚眦側媚之態不知人情隨想而見如列子謂竊斧者乎抑真爾也然至使人見其書而猶憎之則其人可知矣余謫居黃州唐林夫自湖口以書遺余云吾家有此六人書子為我略評之而書其后林夫之書过我遠矣而反求于余何哉此又未可曉也

題逸少帖 蘓軾

逸少為王述所困自誓去官超然于事物之外常自言吾當卒以樂死然欲一游岷嶺勤勤如此而至死不果乃知山水游放之樂自是人生難必之事況于市朝眷戀之徒而出山林獨往之言固已疎矣

書鮮于子駿八詠后 蘓軾

始余過益昌子駿治漕利路其后八年余守膠西而子駿始移漕京東自朝廷更法以來奉法之吏尤難其人刻急則傷民寬厚則廢法二者其理難通而山峽地瘠民貧役重其推行為尤難子駿世家南隆親族故人散處所部以親則害法以法則傷恩二者其勢難全是三難者萃于子駿而子駿為之九年其聲藹然聞之四方上不害法下不傷民中不廢親自講議措置至于立法定制皆成于其手吏民舉欣欣焉而子駿亦自治園囿亭榭賦詩飲酒雍容有余如平時為監司者君子以是知其賢子駿以其所作八詠寄余余甚愛其詩欲作而不可及乃書其末以遺益昌之人使刻石以無忘子駿之德

書鄭 傳林希

余嘗謂聖人之教尤備于禮自堯舜以來積于三代周之所以為周者守此也秦悖人道書灰火學士腐于坑天下之口不復敢言仁義先王之道不亡而存者防何也賴當時耆儒老叟遺及漢世口誦手傳或山岩屋壁之間收拾缺編折冊朽蠹斷絕之余次而成文猶有篇章條類明白蓋其初不經于聖人之手至后世又遭磨滅其不能完而少有訛誤豈能免也及得鄭氏

注精微通透钩联读会故古经益以明后世学者皆知求而易入识为人之道者汉诸儒之功而成之者郑氏也其于法制更为章明独失之者纬也然当大坏之后圣人不世以一人之思虑欲穷万世之文岂不难哉世之人犹指其一二而讥之遂以郑为一家之小学噫亦甚愚矣盖玩文辞则薄于经术抑不思其所为功者虽 犹有所不敢尽况无 哉当汉之末奸雄竞起 身出禁锢四方聘请不能动其志脱一身于污浊之世独全其道至使黄巾望 而拜不入其境嗟夫历千百年及此者乃几人尚敢辄汕 哉若 者可谓贤矣

题论衡后 吕南公

传言蔡伯喈初得此书常秘玩以助谈或搜其帐中见之辄抱以去邕且丁宁戒以勿广也嗟乎邕不得为贤儒岂不宜哉夫饰小辩以惊俗充之二十万言既自不足多道邕则欲以独传为过人之功何缪如之良金美玉天下之公宝为其贵于可用耳小夫下人偶获寸片则卧握行怀如恐人之弗知又兢兢于或吾寇也而金玉果非天下所无信以充书为果可用乎孰御天下之同贵有如不然也邕之志虑曾小夫下人之及耶

书郑繁传 徐积

天下之所恃而为安危者谁乎曰宰相焉耳故自朝廷百执事至于州县之吏不幸而一非其人不过败其一局之事耳至于宰相者其人一非则天下殆矣虽亡宗赤族何益于败盖天子之于天下也得其术则其道甚易宰相佐天子治天下以一身而当天下之责虽得其术其道甚难临之六五曰知临大君之宜此岂非易乎干之九三曰君子干干夕惕若此岂非难乎然而人皆易之何也曰不知量也今有马于此且其行不过百里也驱而倍之则马且病矣龠合升防之量各有所受也以龠合而加之防升之上则溢矣况防升之受一斛之量乎故一邑之才施之一郡则不可也其以一郡之才而当天下之责可乎此黄霸之所以得令名于前而见讥于后也况遽不迨霸者乎甚矣人之不知量也坤之六五黄裳元吉盖君子之有诸中形诸外如此可也大有之九二曰大车以载盖君子以盛德大烈当天下之责如此则可也干之九三曰君子终日干干盖君子履天下之危当天下之责其忧劳如此可也忠烈如伊尹勲劳如周公而又终以谦易曰劳谦君子有终吉呜呼其难若此而人皆易之何也曰好之也尊官重禄固人之所好也不如是不足充其好快其欲彼安肯曰吾不才也吾辱其位者即其祸败随之耶取天下笑耶为万世之羞耶甚者亡人之国危人之天下不顾也岂予谓不知量者耶安得知量者见之乎予读陈平传嘉平知其任读郑君传爱君知其量呜呼如君者岂易得哉岂易得哉

题张唐公香城记后 潘兴嗣

唐公国士也立朝敢言名动缙绅视万钟之禄不易其操一丘一壑自谓过之方此时仆齿髮方少已无仕宦意第以琴书为乐相视莫逆至于忘年可谓以无累之神合有道之器不愧于古人矣每一至此视公笔迹于坏壁间字浸漫灭惘然于怀真觉上人好事次录其言勒于石

书王知载晦山杂咏后 黄庭坚

诗书人之情性也非强谏争于廷怨忿诟于道怒隣骂坐之为也其人忠信笃敬抱道而居与时乖逢遇物悲喜同牀而不察并世而不闻情之所不能堪因发于呻吟调笑之声胸次释然而闻者亦有所劝勉比律吕而可歌列干羽而可舞是诗之美也其发为讪谤侵陵引颈以承戈披襟而受矢以快一朝之忿者人皆以为诗之祸是失诗之旨非诗之过也故世相后或千歲地相去或万里诵其诗而想见其所居所养如旦莫与之期隣里与之游也营丘王知载仕宦在予前予在江湖浮沉而知载已没于河外不及相识也而得其人于其诗时不遇而不怒人不知而独乐博物多闻之君子有文正公家风者邪惜乎不幸短命不得发于事业使予言信于流俗也虽然不期于流俗此所以为君子者耶

书赠韩琼秀才 黄庭坚

读书欲精不欲博用心欲纯不欲杂读书务博常不尽意用心不纯讫无全功治经之法不独玩其文章谈說义理而已一言一句皆以养心治性事亲处兄弟之间接物在朋友之际得失忧乐一考之于书然后尝古人之糟粕而知味矣读史之法考当世之盛衰与君臣之离合在朝之士观其见危之大节在野之士观其奉身之大义以其日力之余玩其华藻以此心术作为文章无不如意何况翰墨与世俗之事哉

书邢居实南征赋后 黄庭坚

阳夏谢师复景四年未二十文章絕不类少年书生语余尝序其遗藁云方行万里出门而车轴折可为賁涕今观邢惇夫诗赋笔墨山立自为一家甚似吾师复也日者阅国马圉人曰千里驹往往不及奉輿毙于早枵驾蹇十百为羣未尝求国医也闻之喟然曰吾惇夫亦足以不朽矣

书邢居实文卷 黄庭坚

余观学记论君子之学有本末等衰人虽不能自壽百歲然必不躐等如水行川盈科而后进耳小学之事虽若糜废日月要须躬行必晓所以致大学之精微耳吾惇夫才性高妙超出后生千百辈然慕大略小初日便为涂遠之计则似可恨后生可畏当欣慕其才而鉴其失也

题济南伏胜图 黄庭坚

御史晁大夫号为峭直刻深观所寫形质似未至也然作伏胜宛然故齐之老书生耳又作胜女子郁然是儒家子此亦丹青之妙

题摹燕郭尚父图 黄庭坚

凡书画当观韵往时李伯时为余作李广夺敌人马挟之南驰又取其弓引满以拟追骑观箭锋所直发之人马皆应也伯时笑曰使俗子为之当作中箭追骑矣余因此深悟画格此与文章同一关键但难得人人神会耳

题陈自然画 黄庭坚

水意欲远鳬鸭闲暇芦苇风霜中犹有能自持者予观李营丘六轴骤雨图偶得此意陈君以佛画名京师戏作秋水寒禽便可观因书以题之

题徐巨鱼 黄庭坚

徐生作鱼庖中物耳虽复妙于形似亦何所赏但令鸢獠生涎耳向若能作底柱析城龙门岌岌惊涛险壮使王鲋赤鯈之流仰波而上溯或其瑰怪雄杰乘风霆而龙飞彼或不自料其能薄乘时射势不至乎中流折角防额穷其变态亦可以为天下壮观也

题自书卷后 黄庭坚

崇宁三年十一月余谪处宜州半岁矣官司谓余不当居闕城中乃以是月甲戌抱被入宿于城南余所僦舍喧寂斋虽上雨傍风无有盖障市声喧愤人以为不堪其忧余以为家本农耕使不从进士则田中庐舍如是又何不堪其忧邪既设卧櫟焚香而坐与西隣屠牛之机相直为资深书此卷实用三钱买鸡毛笔书

题崔圆传后 王无咎

天下之郡无大小远近天子皆为之置官佐曹掾者不唯共守境土行条约均职务而已固将有以出谋议规过失也故守臣虚屈意以事访于官佐曹掾而为官佐曹掾者亦专专然不憚举其守之缺者乃其势然也予观近世之为郡者多不知其势之如此故鲜有能尽以事访于其属而为其属者亦鲜有能举上之缺设有能然者则往往骤取譴怒摔辱甚者万方掇拾行事酿成其事而去之以骋已之愤而遂其非焉故今天下多不治之郡而朝廷有不审择之过予尝有憾于此也久矣每观韩愈志韩文公墓称其父绅卿为扬州录事参军大衙会日举崔圆之过曰公与小民狎至其家害于政圆惊谢曰录事言是圆实过乃自署罚钱五十万则未尝不反复叹慕其贤焉及读唐书绅卿则固无传圆虽有传然是事乃不列于其中亦可惜也夫愈以文行贤后世必不轻其言过誉诸人其事可信无疑矣然而史不列之者岂其有遗者欤故予辄取其事书于传之后以补之噫古之遗者良多予独区区以补此者是亦有为而然也

书五代郭崇韬卷后 张耒

自古大臣权势已隆极富贵已亢满前无所希则必退为身虑自非大奸雄包异志与夫甚庸弩昏闇茸鲜有不然者然其为虑也实难不忧思之不深计之不工然异日衅之所起往往自

夫至深至工是故莫若以正夫正者操术简而周智者为绪多而拙夫正者无所事计也行所当然虽怨仇不敢议之况继之者贤乎郭崇韬于五代亦聪明权智之士也佐庄宗决策灭梁遂一天下自见功高权重奸人议已而庄宗之昏为不足赖也乃为自安之计时刘氏有宠庄宗嬖之因请立爲后而中庄宗之欲又结刘氏之援此于刘氏为莫大之恩而庄宗日以昏湎内听妇言为计宜无如是之良者然卒之杀崇韬者刘氏也使崇韬缪计不过刘氏不能有所助而已岂知身死其手哉好谋之士败于谋好辩之士败于辩惟道德之士为无所穷而祸福之变岂思虑能究之哉

题郇公诗帖 张舜民

我生不及郇公而家有公选诗十卷所选皆精于时已信公之能诗也迨观此作为信然其文采深润与字书故同当时非特郇公大抵前辈皆若此傥与今人语必曰其文未甚高其书未甚精至其自秉笔命语则鲜不戾者艺顾如此况其大者乎苟率是求攻坚致遠之效是以误成事

主父之事 张舜民

近歲渭南縣有田夫得宿藏于土中凡七瓮水銀者二金銀者五金銀皆刻主父字按漢主父偃以金敗而至于杀其身灭其家今日乃知偃之死非繆也中庸曰莫見乎隱莫显乎微故君子慎其独也荀卿曰声无遠而不闻行无微而不彰当偃之死于今久矣徒观其事而不见其迹犹未足以为信何以暴其数千年之后今之人结交于户牖之间托物于苞苴之内期于无人之境投于夜半之时欲人之不我知真愚也哉

龙井题名 秦观

元丰二年中秋后一日余自吴兴道秬东还会稽龙井有辨才大师以书邀余入山比出郭日已夕航湖至普宁遇道人参寥问龙井所遣篮舆则曰以不时至去矣是夕天宇开霁林间月明可数毫髮遂弃舟从参寥策杖并湖而行出雷峯度南屏濯足于惠田涧灵石坞得支径上风篁岭憩于龙井亭酌泉据石而饮之自普宁凡经佛寺十五皆寂不闻人声道傍庐舍或灯火隱显草木深郁流水上激悲鸣殆非人间之境行二鼓矣始至壽圣院谒辨才于潮音堂明日乃还

记残经 李昭玘

南台古刹有佛书数百卷多唐季五代时所书字画精劲厯厯可喜按大藏经目凡五千四百卷今所存才十一首尾可读者又无防也阿含经四卷泰宁军节度使齐克让造广明元年刘汉宏合黄巢侵扬州高骈按兵不出诏克让屯汝州会许州部将周苋杀其帅薛能克让惧其叛引其军还兗十二月巢攻潼關克让复出战關外士饥烧营以噪克让遽走入關势不能守贼遂犯京师昔王缙相代宗或边兵入境必合众沙门诵防国仁王经为禳厌人事不修而终

以赅败呜呼将相大臣不能以身任社稷安危信浮屠氏以生死负天下多矣然辱国丧师不罹诛殛之祸者又何幸也正法华经一卷干符六年女弟子牛妙音书僖宗既立天下多乱盗贼羣啸王仙芝摇毒于江湖黄巢磨牙于闽粤荒墟暴骨不堪行路士大夫顾唐将亡窜匿避祸如触网罟畏死无日闺门女子区区媚佛以自救亦可哀矣大涅槃般若经共三十卷宁武军节度使朱友恭造友恭全忠养子李彦威也后为龙武都统军与氏叔琮同弑昭宗全忠亟诛之以灭天下谤此经天复三年所书崔垂休召全忠诛宦官韩全海劫天子奔凤翔昭宗初不知谋全忠既至帝怒谕使还镇未几复引兵薄城下恶焰赫然寢逼輿卫强藩悍镇陰虞烂额之祸进退首防莫肯同出一手以扶天步全忠祸心滋大欺天盗国人共怨怒友恭犹诡情佞佛以厌天下耳目使世无佛则可果佛能报应人则又将欺佛而盗祸不亦愚乎毗奈耶杂事一卷德妃伊氏造唐庄宗次妃初神闵敬皇后刘氏以防贱得立归赐于佛性喜聚敛货贿山积惟寫佛书馈赂僧尼而士卒不得衣食妃为此经岂非畏后所逼耶后有印章曰燕国夫人伊氏蓋未进封时所制也唐制太后置之寶皆主之未尝用印凡封令书即太后用宫官印皇后用内侍省印而夫人不闻有用印之礼是时两宫交通藩镇使者旁午于道而恬不知禁则夫人私自铸亦不为僭矣按五代史称德妃与韩淑妃居太原晋高祖反时为契丹所虏不知是经何从至也其余中断横裂虫蚀鼠齧雨败尘腐无复完缀想夫飘散蹂借炷灯拭案补坏帷塞屋漏者又不胜数也释氏之戒能为人寫四句偈获福无量心生不信罪抵千劫今其徒怠弃如此何顽顿之甚也不然祸福自人不在于黄藤赤轴之间耶余感其祸乱之迹残缺之余因书其事聊寄其一叹云

书洛阳名园记后 李格非

洛阳处天下之中挟殽崤之阻当秦陇之襟喉而赵魏之走集盖四方必争之地也天下常无事则已有事则洛阳必先受兵余故尝曰洛阳之盛衰者天下治乱之 也方唐贞观开元之间公卿贵戚开馆列第于东都者号千有馀邸及其乱离继以五季之酷其池塘竹树兵车蹂蹴废而为丘墟高亭大榭烟火焚燎化而为灰烬与唐共灭而俱亡者无余处矣余故曰园囿之兴废者洛阳盛衰之 也且天下之治乱 于洛阳之盛衰而知洛阳之盛衰 于园囿之兴废而得则名园记之作余岂徒然哉呜呼公卿大夫方进于朝放乎以一己之私自为而防天下之治忽欲退享此得乎唐之末路是已

跋薛唐卿秦玺文 周行已

李斯篆世传为第一学者莫不爱之吾每见其书几不疾唾而却走者何哉谓夫人善成其君之过也夫秦之君其资亦未若桀纣之恶之甚也而二三臣酿其君于不善则又有甚焉者呜呼斯乎是尝去诗书以愚百姓者乎是尝听赵高以立胡亥者乎是尝杀公子扶苏与防恬者乎是尝教其君严督责而安恣睢者乎使其玺不得传者斯人也而其刻画吾忍观之哉顾唐卿犹区区珍藏之者岂不欲传百世以为监欤吁是可以监也书与贾明叔书后呈崔德符 田画

此书成与诸弟读之相对悲不自胜嗟乎身长七尺气塞天地不能饱一母富家僮仆厌饫粱

肉吾道非耶奚为而至此然折节售文章真鄙夫事此书迟迟未投尚惜此也其势正如提孤军薄坚敌矢穷力尽饷道不继伏兵又从而乘之当是时不折北者鲜矣公其筹之书张主客遗事【名咸寧字子安华州人】晁咏之

祖宗以武定天下至章圣时益厌兵澶渊之役契丹之众可覆而取也纵其去不忍杀自是不复言兵封泰山祀汾阴天神降格休祥并至以文太平缙绅之士以此相继受爵秩于朝将相大臣往往列于三公侍从多至丞郎以上其以武受赏者殆无其人此主客公之功所以不录然公之名繇此以显出入中外为时名臣蓋当时廷臣奉使于外者举天下三四十人耳邦之大计总于三司而诸道各有转运使一人其财赋调度凡利害之入悉归之其权比今为甚重每改使一道辄推恩官其子若孙一人其它礼遇称此蓋其部吏尊其使者亦以此当是时大臣多白首耆艾加公十年之壽以驯致公卿必矣然则朝廷未尝薄公之功也论者见公一旦断河桥捕朱能灭其凶焰而赏不加不知朝廷所以待士大夫者固自有在或比公仲连辞封不愿其言美矣然仲连纵横辯士 奇于衰世非公之所愿学尝观景德祥符以来风俗淳厚士大夫人人自重有长者之风公之不自言其所以自处蓋甚厚非有激而为者方其少时以经明动场屋其为吏防治剧名一时大臣多荐公者寇莱公知公尤深然则公之所养可知蓋自公继其父光祿公起家至公百有余年传六世世有人其泽未艾彼以尺寸之势自鬻于一时过取爵位者曾不旋踵辄致陨败顾何以传来世然则天之所以报公亦甚厚咏之官长安公之曾孙介夫为鄠令间以事抵府数相过爱其温厚儒雅意其先世必有盛德之士果得公遗事为攷其世而论之

宋文鉴卷一百三十一

卷一百三十二

钦定四库全书

宋文鉴卷一百三十二

宋吕祖谦编

乐语

教坊致语 宋 祁

臣闻璿杓东指披宝典以开年玉节南驰重欢隣而讲好国美春台之享朝惟宴俎之慈用洽乐康式昭 盛恭惟尊号皇帝陛下绍承丕烈奄宅中邦坐黄屋以训恭拥绿图而进道五辰顺理九扈告丰圆璧方琮并荐精纯之祀巽风解雨交流旷荡之恩五刑则解网画冠一尉则垂橐卧鼓鸿休绍至協气翔臻属歲朔之申仪加使华之修聘爰开广殿胥庆佳辰玉人捧日以扬辉方丈移山而献壽珍羣肃穆睟表颺昂瑞藻跃鱼嘉镐京之饮酒翠梧倾鳳应韶舞之枳金式均防湛之仁普咏丛云之旦臣滥巾法部旅进神庭切抃享期敢进口号千官星拱侍凝旒紫殿余寒已暗收日湛露华浮宴席天回春色徧皇州云韶三闋翔朱鹭锦幕千层舞翠虬拭玉隣邦通使节万龄亨会庆洪猷

勾合曲 宋 祁

玉色凝温盛庆仪于端日葵心委照同华宴于需云矧韶律以方融顾羣萌之将达宜陈备奏用洽太和徐韵宫商教坊合曲

勾小儿队 宋 祁

防岫峩崑烂仙葩于晓日霞裾转炫叠华鼓于春雷乌漏未移鸾觴在御宜进游童之列俾陈逸缀之妍上奉宸欢教坊小儿入队

队名 宋 祁

紫殿开慈宴 青衿缀舞行

问小儿 宋 祁

便娟蹑履皆竹马之髫龄蹀躞交竿尽兰觴之雅饰既乐陶姚之化盍陈象勺之因进叩天阶

雍容敷奏

小儿致语 宋 祁

臣闻庆朔履端俨鹭雍而四会寶隣驰骋拭虹玉以申欢嘉乃礼成眷兹作首爰诏夏渠之飡允昭交泰之期恭惟尊号皇帝陛下德总右文功宣下武顺四时之和烛济万世于夷庚海不扬波地无爰寶属以阶萸肇歷律鳳回春顺邦令以布和修国仪而行庆承云调露方谐广乐之音醕饮陪飧普适中衢之赐洽欢心于苹鹿暢羣扑于先鼈臣等虽愧妙年同欣盛际既造规蒲之地愿陈秉翟之容未敢自專伏 进防

勾杂剧 宋 祁

回鸾逗节已徧于余妍舒鴈分行聊亭于合奏天顏益粹日舍方徐宜参优孟之滑稽式助都场之曼衍童裳却立杂剧来欵

放队 宋 祁

金徒漏改玉斿巡周既殫雅舞之容复罄欢謡之乐宜遵矩步归咏雩风再拜天阶相将好去

教坊致语 王 珪

臣闻高廩登秋美粢盛之已报需云命燕嘉饮食之维时况寶厯之逢 复皇居之乘豫乐与羣臣之饫翕同万物之和恭惟尊号皇帝陛下德迈前王仁敷中防虎旗犀甲韬兵武库之中桂海水天献賚彤墀之下邦有休符之应民跻壽域之康 爽气于重霄置清觴于别殿下珍羣之鸛鹭发和奏之笙鏞于时日上扶桑风生闾阖度芝蓋于丹城降金輿于紫闥百兽感和来舞帝虞之乐羣生遂性如登老氏之台固已追平乐之胜游掩栢梁之高会臣繆参法部获望清光靡揆才芜敢进口号翠輦鸣梢下未央千官齐望赭袍光霜清玉佩中天响风转金炉合殿香仙路忽惊蓬岛近昼阴偏度汉宫长年年万寶登秋后常与君王献壽香

勾合曲 王 珪

露泛帝觴凝九秋之颢气星聯朝弁灿初日之长晖方鱼藻以均欢宜箫韶之合奏宸游正治乐节徐行上悅天顏教坊合曲

勾小儿队 王 珪

燕觴飞羽方歌湛露之诗广乐撓金已极钧天之奏宜命游童之缀来陈舞佾之容上奉皇慈教坊小儿入队

队名 王珪

红茵铺禁阼 绛节引僊童

问小儿队 王珪

宸庭广御仰侔太紫之躔钧乐更和曲尽咸英之奏何处采髦之侣辄趋文陛之前必有所陈
雍容敷奏

小儿致语 王珪

臣闻舜帝深仁众极慕羶之乐周家盛德时歌在藻之娱矧逢下武之期屡治登年之瑞张君
臣之广燕焕今古之多仪恭惟尊号皇帝陛下躬神睿之姿抚休明之运礼乐兼于三代文章
迈于两京矧乃武库韬戈戍亭彻 百蛮犇走南逾铜鼓之乡万里讴謡西出玉闕之路今则
清商应律滞穗盈畴奏肆夏之音事轶元侯之飧咏嘉鱼之什礼交君子之欢足以崇胜会于
难追腾颂声于无既臣等生陶醴化谬齿伶坊虽在童髦尝习舞干之妙趣趋君陛愿随乐节
之行未敢自専伏 进止

勾杂剧 王珪

华旌炫影观童舞之成文画敌収声识钧音之终曲助以优人之伎卜为清昼之欢上悵宸顏
杂剧来欵

放小儿队 王珪

铜壶递箭屡移宫树之音鹭羽充庭久曳童髦之防既闕韶音之奏难停舞缀之容再拜天阶
相将好去

勾女弟子队 王珪

华簪照席再严百辟之趋宝幄更衣复覩中天之坐宜度仙磬之曲更呈舞袖之妍上奉皇慈
两军女弟子入队

队名 王珪

宫锦祥鸾下 仙防采鳳来

问女弟子队 王珪

金徒缓刻延丽日于壶中翠羽飞觴醉流霞于天上何仙姿之绰约叩丹陛以踟躅须有部陈
近前敷奏

女弟子致语 王珪

妾闻 凝霜降属百工之告休歌起鹿鸣见羣臣之合好矧万几之多豫复千载之盛期启燕
良辰腾欢绵防恭惟尊号皇帝向明紫极储思岩廊迈三皇五帝之风绍一祖二宗之烈 亭
相属不赍万里之粮年廩屡登又美曾孙之稼时及授衣之 民多击壤之禧广慈惠于前仪
庆升平于兹日玉觴盈醴均流湛露之恩翠虞撝金合奏洞庭之曲感福休于靡极召和乐于
无穷妾等幸遇昌时预陈法部举听铿纯之节来参蹈厉之容未敢自专伏 进止

勾杂剧 王珪

鸾拂宫茵极七盘之妙态鳳仪僊曲终九奏之和声方镐饮之穷欢宜秦优之进技宸顏是奉
杂剧来欵

放女弟子队 王珪

宫花翦彩恍疑天上之春海日衔规忽觉人间之暮宜整羽衣之缀却回云岛之游再拜彤庭
相将好去

集英殿秋燕教坊致语 元绛

臣闻灏气澄爽当金飊沆砀之时岩廊穆清乃黄屋燕闲之日肆陈广会申惠庶工庆盛世之
熙隆浹輿情而鼓舞恭惟皇帝陛下九干毓粹三象储精丕承累洽之基茂建大中之治纵横
文武声教塞于天渊出入圣神威灵震于戎狄方且辑瑞而朝羣后垂防而揖三皇光图丽史
之祥纷纶而洊至軼漠逾沙之贡竭蹶以相趋运独化于陶钧寘怀生于仁壽属商炜之道暮
方歲物之顺成特御大庭爰开高宴动诏蹕于丹禁集朝簪于赤墀美乐在陈下九苞之鳳舞
嘉觴来上腾万歲之山声续卿云复旦之歌合湛露晞阳之雅臣等叨参法部幸对威顏上渎
圣聰敢进口号秋风闾阖九门开天上鸣鞘步辇来万乐筦 流紫府千官簪佩集钧台华胥
云雾凝仙杖南极星辰入壽杯既醉太平均五福明良賡载咏康哉

勾合曲 元绛

金飊日爽庆嘉禾登稔之祥玉座天临宣惠宴均懽之泽宜按鳳韶之奏载賡鱼藻之歌上奉
宸严教坊合曲

勾小儿队 元绛

箫韶迭奏通天地以均和簪组相趋协君臣之同乐宜命垂髻之侣来陈舞象之容徐韵宫商
教坊小儿入队

队名 元 绛

舞羽虞庭乐 歌云沛水童

问小儿队 元 绛

广乐张庭华茵匝地何尔童觴之侣来瞻宸扆之严必有叙陈分明敷奏

小儿致语 元 绛

臣闻霜气始肃登万宝以顺成金行当期奄四远而率服乘萧辰之爽澈开广宴之光华亲御
九宸均懽百辟恭惟皇帝陛下至仁溥博盛德昭清独观万化之原遐踵三皇之武振张礼乐
垂玉度于区中总揽英雄懽霆威于徼外神功广运圣业永昌方黄屋之清居乘素商之令序
肆瑶席于黼帐下雕輿于紫闼壽斝九行懽声动而六鼇扑钩箫八阙和气浹而丹鳳翔仰属
重熙诞膺多福臣等甫当髻髻幸阅声明习戲康衢尝为于蹈舞进趋文陛愿效于伎能未敢
自專伏 进止

勾杂剧 元 绛

叠鼓凝箫未已九成之奏垂髻佩鞞暂分八佾之行宜陈优戲之容上奉威顏之乐再更妙引
杂剧来欵

放小儿队 元 绛

金胥漏缓玉案香浓天酒千钟眷簪绅之具醉童衣五防促步武以将归再拜天阶相将好去

勾女弟子队 元 绛

日转彤墀香飘黼座宜旅陈于舞缀以仰奉于宸懽上悦天顏两军女弟子入队

队名 元 绛

承云钧籥合 回雪舞桂轻

问女弟子 元 绛

翠华日丽玉殿风清飘然妙舞之容来此丹涂之地帝晖在望画漏已移必有叙陈分明敷奏

女弟子致语 元绀

妾闻周诗既醉工歌均五福之祥汉宴无咎国礼重九仪之序方戒肃霜之候特推湛露之恩百辟相趋三灵共悦恭惟皇帝陛下握枢临极秉箴御乾道昭五圣之光孝奉两宫之养聪文若古动云汉之明回智武如神驰雷霆之震赫羌戎率服稼穡阜成当秋籥之澄凝方政几之暇豫转清跸于黄道集华簪于赤墀泛齐千钟共享衢樽之美咸池九奏具闻天籁之和维兹燕恺之娱属是休嘉之防妾等叨陪乐府得践宫涂望咫尺之威实欣于天幸效蹁跹之舞愿奉于宸懽未敢自专伏候进止

勾杂剧 元绀

舞佾徊翔已奉建章之会倡俳调笑宜来平乐之场上悦天颜杂剧来欵

放女弟子队 元绀

香凝黼幄听玉漏之频移日转文茵顾霓裳之久驻已尽七盘之妙宜还三洞之游再拜天阶相将好去

集英殿秋宴教坊致语 苏轼

臣闻天无言而四时成圣有作而万物覩清浄自化虽仰则于帝心恺悌不同亦俛同于众乐属此九秋之 粲然万寶之成吾王不游何以劳农而休老君子如喜则必大亨以养贤恭惟皇帝陛下孝通神明仁及草木行尧禹之大道守成康之小心中外来同天地并应以谓福莫大于无事瑞曷加于有年南极呈祥 秋分而老人见西方慕义涉流沙而天马来嘉与臣工肃陈燕俎礼元侯于三夏谐庶尹于九成宣示御觞耸近臣之荣观胪传天语溢两庑之欢声臣等幸覩昌辰叨尘法部采謡言于击壤助蒙眛之陈诗仰奉威颜敢进口号霜霏碧瓦尚生烟日泛彤庭已集仙蔼蔼四门多吉士熙熙万国屡丰年高秋爽气明宫殿元祐和声入管弦菊有芳兮兰有秀从臣谁和白云篇

勾合曲 苏轼

西风入律间歌秋报之诗南籥在庭备举德音之器弦匏一倡钟鼓毕陈上奉宸严教坊合曲

勾小儿队 苏轼

皇慈下逮罄百执以均欢众技毕陈示四方之同乐宜进垂髫之侣来修秉翟之仪上奉威颜教坊小儿入队

队名 苏轼

登歌依颂磬 下管舞成童

问小儿队 苏轼

大君有命肆陈管磬之音童子何知入箴工师之末欲详来意宜悉奏陈

小儿致语 苏轼

臣闻天行有信正得秋而万宝成君德无私日将旦而羣阴伏清风应律广乐在庭占歲事于金禳望天顏之玉粹沔浴膏泽咏歌升平恭惟皇帝陛下天纵聪明日跻圣知无一物之失所得万国之驩心虽击壤之民固何知于帝力而后天之祝亦各抒于下情臣等幸以韶亂之年得居仁壽之域咏舞雩于沂水久乐圣时唱铜鞮于汉濱空慙俚曲愿陈舞缀少奉宸驩未敢自專伏 进止

勾杂剧 苏轼

朱弦玉管屡进清音华翟文竿少停逸缀宜进诙谐之技少资色笑之欢上悅天顏杂剧来欵

放小儿队 苏轼

回翔丹陛已陈就日之诚合散广筵曲尽流风之妙歌钟告阕羽籥言旋再拜天阶相将好去

勾女童队 苏轼

锦荐云舒来九成之丹鳳霞衣鳞集隱三叠之灵囂上奉宸严教坊女童入队

队名 苏轼

香澣浮绣展 花浪舞彤庭

问女童队 苏轼

清禁深严方缙绅之云集仙音啾缓忽簪珥之星陈徐步香茵悉陈来意

女童致语 苏轼

妾闻钧天广乐空传帝所之游闾阖清风理絕庶人之共夫何僊圣靡隔尘凡仰瞻八采之威

共庆千龄之遇恭惟皇帝陛下干健而粹离明而文规摹六圣之心人将自化仪刑文母之德天且不违乐兹大有之年申以示慈之会虞韶既毕夏籥将兴妾等分缀以须审音而作愿俟工歌之阙少同率舞之欢未敢自專伏取进止

勾杂剧 苏轼

弦匏迭奏干羽毕陈洽闻舜乐之和稍进齐谐之技金丝徐韵杂剧来欵

放队 苏轼

羽觞湛湛方陈既醉之诗鼙鼓渊渊复奏言归之曲娥鬟伫立敛袂却行再拜天阶相将好去

会老堂致语 欧阳修

某闻安车以适四方礼典虽存于往制命驾而之千里交情罕见于今人伏惟致政少师一德元臣三朝宿望挺立始终之节从容进退之宜谓青衫早并于俊游白首各谐于归老已释轩裳之累却寻鸡黍之期遠无憚于川涂信不渝于风雨幸会北堂之学士方为东道之主人遂令颍水之濱复见德星之聚里闾拭目觉陋巷以生光风义耸闻为一时之盛事敢陈口号上赞清欢欲知盛集继荀陈请防当筵主与賓金马玉堂三学士清风明月两闲人红芳已尽莺犹啅青杏初尝酒正醇美景难并良会少乘欢举首莫辞频

哀辞

哭尹舍人词【并序】 富弼

亡友河南尹洙字师鲁尝为起居舍人直龙图阁知渭州乙酉歲谪官汉东未防稍迁于均疾且革访医南阳以托范公医不效遂没焉时予官汶上又东徙乎卢距其没所遠甚叹师鲁之不得见复不得抚其櫟一祭其神因追思其平生所可列恨未有以卒其志为辞而哭之呜呼人皆贵君实悴焉人皆富君实窶焉人皆老君实夭焉吾知君为深是三者举非君之志不吾焉哭哭必义始君作文世重淫丽诸家舛殊大道破碎漫漶费词不立根柢号类啸朋争相教碁上翔公卿下典书制君于厥时了不为意独倡古道以救其敝时俊化之识文之诣今则亡矣使斯文不能救其源而极其致吾是以哭之始君为学遭世乖离掠取章句属为文词经有仁义曾非所治史有褒贬亦弗以思君顾而叹嫉时之为钩抉六籍潜心以稽上下百世指掌而窥功不苟进习无匪彝今则亡矣使所学不能信于人而用于时吾是以哭之惟文与学二事既隆克用而衷丰于时穷纯深蕴积资而为德行乎已而已必裕刑乎家而家必克今则亡矣使贤者之行不能移人心而化大国吾是以哭之积德既成道随而生谋罔不究动必有经列于庭则以謇谤见黜用于边则以威怀取宁才望既出谗嫉以兴酷罚嗣降愠色不形今则亡矣使君子之道不能被天下而致太平吾是以哭之呜呼师鲁君生于时实惟恢竒钟此具美谓必有光大以奋康济是期胡既厚其稟而反速其萎凡粤中蕴百亡一施岂茫茫下土天

亦有所不知耶将防防上穹人固非其所司耶何恶不必衅而善不必禔忠良而天险狠而耆汨淆参错颠倒乖睽天其或者世不欲常泰人不欲常熙吾疑夫激者之论差不得而信之第于师鲁哭无已而一哭而恸再哭而咽三哭而魂离四哭而肠绝苏而复哭哭又不足聊以写吾之哭声而寓于辞庶不泯没于陵谷

哀穆先生文【并序】 苏舜钦

呜呼穆伯长以明道元年夏客死于淮西道中友人苏叔才予美作诗悼之遣人驰吊之痛夫道不光予又次其一二行以鉴于世为文哀之先生字伯长名修防嗜书不事章句必求道之本原皆记士徒无意处熟习评论之性刚介喜于背俗不肯下与庸人小合愿交者多固拒之议事坚明上下今古皆可录然好诋卿弼斥言时病谨细后生畏闻之又独为古文其语深峭宏大羞为礼部格诗赋咸平中举进士得出身调泰州司法参军牧守称其才贰郡者恶之又尝以言忤贰郡者守病告贰者私黠吏使诬告先生受赂具狱聚左证后召先生使众参考之由是贬池州中道窜谪阙下叩登闻鼓称冤会贰郡者死复受谴于朝后累恩得为蔡州参军先生自废来读书益勤为文章益根柢于道然耻以文干有位以故困甚张文节守毫亳之士豪者作佛庙文节使以骑召先生作记记成竟不窜士名士以白金五斤遗之曰枉先生之文愿以此为寿又使周旋者曰士所以遗者乞载名于石图不朽耳既而亟召士让之投金庭下遂俶装去郡士谢之终不受尝语之曰宁区区糊口为旅人不为匪人辱吾文也天圣末丞相有欲置为学官者耻诣谒之竟不得尝客京师南河邸中往往醉暮归遶地如不省持者夜半邸人犹闻其吟诵喟叹声因隙窥之则张灯危坐苦矐执卷亦出曙用是贷其资母丧徒跣自负槨成葬日诵孝经丧记未尝观佛书饭浮屠氏也识者哀怜之或厚遗则必为盗取去不然且病或妻子卒后得柳子厚文刻货之售者甚少逾年积得百缗一子辄死将还淮西遇病气结塞胸中不下遂卒噫吁天之厌文久矣先生竟以黜废穷苦终其身顾其道宜不容于今世然由赋数奇只常罗兵贼恶少辈所辱困其节行至死不变有孤儒且防遗文散坠不收伯长之道竟已矣乎初先生死梁坚自解以书走上党遗予欲访其文俾予集序之去年赴举京师厯问人终不复得一篇惟有任中正尚书家庙碑静胜亭记徐生墓志蔡州塔记皆平昔所为又不足成卷今舅氏守蔡近以书使存其家且求所着文字未至问作文哀之道不胜于命命不会于时吁嗟先生竟胡为

吊岳二生文【并序】 刘敞

今年有诏州郡皆立学乃命处士有不受学者勿举之其受学者更为设员程日夜不休有疾病庆吊辄书其日为后按脉当偿之满日如律令乃可与岳有两生自下邑辞其亲而来为博士弟子既久告归当渡洞庭时方大风不可渡两生畏失期而吏黜之遂渡溺死予悲其意而吊之其文曰

盖君子道而不径舟而不游所以为孝也彼洞庭之天险兮夫何二子之乘舟路幽昧以不顾兮委死生其若浮自古皆有死兮子独失身乎江流意有所恨兮而曾不得其由魂放荡而无归兮骨沉潜而不收父母悲于堂上兮妻子号乎中洲谅行险之来患兮信傲幸之为尤且使

子而无学兮又安得此之忧是以君子溺名小人死利夸者没权贪夫踣势岂独二子兮吾又以悲于今之世竞进之为悦兮静退之为愚干禄之为敏兮守节之为迂一世之皆然兮固若人以丧躯昔重华之事叟兮躬秉耒乎历山之下受帝禅之不喜兮夫孰欣于进取乘沅湘以南征兮吾知华之絶汝生泛泛而无名兮死惸惸而终古故君子审乎自得安乎幽贞道德为爵仁义为荣不以贵故学问不以贱故自轻悠悠兮江波奈何乎二生

苏明允哀词【并序】 曾 巩

明允姓苏氏讳洵眉山人也始举进士又举茂才异等皆不中归焚其所为文闭户读书居五六年所有既富矣乃始复为文益少或百字多或千言其指事析理引物托喻侈能尽之约远能见之近大能使之微小能使之着烦能不乱肆能不流其雄壮俊伟若决江河而下也其辉光明白若引星辰而上也其略如是以余之所言于余之所不言可推而知也明允每于其穷达得丧忧欢乐念有所属必发之于此于古今治乱兴坏是非可否之际意有所择亦必发之于此于应接酬酢万事之变者虽错出于外而用心于内者未尝不在此也嘉祐初始与其二子轼辙复去蜀游京师今参知政事欧阳公修为礼部又得其二子之文擢之高等于是三人之文章盛传于世得而读之者皆为之惊或叹不可及或慕而效之自京师至于海隅障徼学士大夫莫不咸知其名家有其书既而明允召试舍人院不至特用为秘书省校书郎顷之以霸州文安县主簿编纂太常礼书而轼辙又以贤良方正策入等于是三人者表见于时而其名益重于天下治平三年春明允上其礼书未报四月戊申以疾卒享年五十有八自天子辅臣至闾巷之士皆闻而哀之明允所为文有集二十卷行于世所集太常因革礼一百卷更定謚法二卷藏于有司又为易传未成读其书者则其人之所存可知也明允为人聪明辩智遇人气和而色温而好为策谋务一出已见不肯蹶故迹颇喜言兵慨然有志于功名也二子轼为殿中丞直史馆辙为大名府推官其年以明允之丧归葬于蜀地既请欧阳公为其铭又请余为辞以哀之曰铭将纳之于圻中而辞将刻之冢上也余辞不得已乃为其文曰

嗟明允兮邦之良气甚夷兮志则彊阅今古兮辨兴亡惊一世兮擅文章御六马兮驰无疆决大河兮啖浮桑粲星斗兮射精光众伏玩兮雕肺肠自京师兮泊幽荒矧二子兮与翱翔唱律吕兮和宫商羽戔戔兮势方飏孰云命兮变不常奄忽逝兮汴之阳维自着兮晔煌煌在后人兮庆弥长嗟明允兮庸何伤

钱君倚哀词 苏轼

大江之南兮震泽之北吾行四方而无归兮逝将此焉止息岂其土之不足食兮将其人之难偶非有食无人之为病兮吾何适而不可独徘徊而不去兮眷此邦之多君子有美一人兮了然而瘦亮直多闻兮古之益友带规矩而蹈绳墨兮佩芝兰而服明月载而之世之人兮世悍坚而不答虽不答其何丧兮超彷徨而自得吾将观子之进退以自卜兮相行止以效清浊子奄忽而不返兮世混混吾焉则升空堂而挹遗象兮吊凝尘于几席苟律我者之信亡兮吾居此其何益行傍徨而无徒兮悼舍此而奚向岂存者之举无其人兮辽辽如晨星之相望吾比年而三哭兮堂堂皆国之英苟处世之恃友兮几如是而吾不亡临大江而长叹兮吾不济其

有命

钟子翼哀词【并序】 苏轼

某年始十二先君宫师归自江南曰吾南游至防有隐君子钟君与其弟防从吾遊同登马祖岩入天竺寺观乐天墨迹吾不饮酒君常置醴焉方是时先君未为时所知旅游万里舍者常争席而君独知敬异之其后五十有五年某自海南还过赣上访先君遗迹故老皆无在者君之没盖三十有一年矣见其子志仁志行志远相持而泣念无以致其哀者乃追作此词君讳斐字子翼博学笃行为江南之秀欧阳永叔尹师鲁余安道曾子固皆知之然卒不遇以没依智高叛岭南声摇江西防守曹观欲籍民财为战守备谋之于君君曰智高必不能过岭无事而籍民民惧且走观曰如缓急何君曰同舟遇风秦越可使为左右手况吾民乎不幸而至于急则官与民为一家夫孰非吾财者何以籍为观悟而止防人以安其词曰

崆峒摩天章贡激石致两确高深相临悍坚相排汹岳岳是故其民勇而尚气巧砉斲而其君子抗志厉节敏于学矫矫钟君泳于德渊自澡濯贫不怨天困不求人老愈慤嘉言一发排难解纷已残剥吾先君子南游万里道阻邈如金未镕木未绳墨玉未琢君于众中一见定交陈礼乐曰子不饮我醪甚甘酺此浊览观江山扣厯泉石步苹确先君北归君老于防望南朔我来易世池台既平墓木握三子有立移书问道过我数我亦白首感伤薰心殒涕渥是身空虚俯仰变灭过电電何以寓哀追颂德人诏后觉

哭李仲防词 文同

慄慄栗兮临清秋懷空憤兮紛千忧拂其弭兮久复留念将焉适兮升高丘问胡然兮予之思絙予心兮不解以繆谓遐阔兮愿如其宫怅西南兮川涂缅修已忽寤兮往尝此以计蓋子之生于世兮期为已休万感芸然兮防予之中魄干漂潰兮索其若抽念子一去兮不可以复见顾子之于道兮尚胡为而此谋欲子似兮取友但寥寥兮安求孰识子兮子深当何人兮与侔彼徒以文行兮为子之高其不为贱正体而贵余肱如刻画兮妄以累子顙神珠兮衅天球如子之末兮尚可以表世其不能究者兮彼又何尤已矣乎子之存兮在予忆子之疚兮将何时而可瘳敛予恨兮暮来归烟云飘萧兮奉子以愁

毗陵张先生哀辞【并序代吕侍讲作】 汪革

毗陵有隱君子曰张先生孝悌修于家忠信行于友而声名闻于人达于遠近当世之鉅公伟人莫不闻之有过毗陵而不造先生之门者人以为耻平居萧然自得凡世人之所趋而向者先生不一经意至接世俗而与之酬酢则无一毫不中节度人委之以事未尝以难易为解有造之者为设尊酒一笑相乐亦未尝不欣然也有劝之仕者推挽虽甚力终不应固非若前世隱遁之士事诡激甘槁薄臞悴于山砧水厓穷居独游使影响昧昧不闻于人然后为高也而未尝崇饰小节要乡党宗族之誉自少力学于古书无所不窥而时发于为诗语皆清新出人意表其善于笔札天性也当世士大夫欲铭述其先人功德图不朽于后世者得先生书以为

荣既壮长益放弃世事遂以终其身是可谓君子也已先生讳举字子厚用叔祖天章公崧之奏补郊社斋郎治平四年甲科调睦州青溪主簿先生初无意于仕又无兄弟之助独养其亲故力取科第以慰亲志既得又不忍舍朝夕之养而从禄于他郡朝奉君亦安于小官不汲汲于先生遂不赴青溪终其身人不能相吏后用近臣荐起为颍州学官复不就其后孙莘老胡完夫范淳夫及外台交荐其能苏子瞻亦数言于朝于是勅郡县以礼遣盖将用之也先生终不屈呜呼今死矣予以天章公婿自先生防时已异其为人而亲厚之先生亦喜从吾兄弟游及长且老凡四五十年间其相与之意益以笃有自东南来者先生未尝不导之以见予予与之书虽寸纸皆藏之故其死也予哭之尤哀曾祖秘给事中祖益之尚书郎父次道朝奉郎其先江南人给事为李氏不能用故亡随李氏入朝以直道受知于祖宗朝奉君仁孝慈祥兄死抚其孤犹己子不欲远去屡以笕库请于朝终不大用于时先生之节盖朝奉君成就之为多词曰

维古制行必中庸兮出处用舍道之从兮降及末世戾不通兮首阳柱下更拙工兮山栖木茹初无庸兮鸟兽之羣乌可同兮伟哉先生蹈厥中兮达不苟进退不穷兮以仁为爵峻且崇兮禄虽不富义则丰兮忠信孝友施家邦兮载瞻眉宇心则降兮激贪敦薄助教风兮固非乱伦而洁躬兮惠泉辽绕山复重兮窅然其深如有容兮桂枝相繚蒨青葱兮先生之庐今一空兮目极东南涕沾胸兮伸之以词寫予衷兮

王升之诔【并序】 刘跋

维政和二年五月壬戌钜野王君升之卒于京师七月丙辰返柩于郛乡人所厚善皆防哭其孤儿孟博出临终书二纸遗余言嵎不幸病且死妻弱子防恐此骨流落不得下从先人伏惟哀怜与诸贤经纪之书凡百余字语无错缪问其家言病甚棺敛皆自营将絶付嘱后事情不悲哽既授书其子教以面达余状遂奄忽不能言余属皆哭尽哀因相与定计告其家以八月乙酉葬先墓之丙穴囊橐中空无有卖屋未即售合凡赙赠得钱九万五千乃使斲石治穿买椽席灰苇诸下里物事皆前为之期如期而窆君黄州翰林公之 孙寶文公之子少不羈既长学问尤邃汉书效李长吉为诗有致思葬其亲至破产雅不喜嬾嗇又体羸多疾日事药餌因积贫窶得官未及赴疾亟寿财四十有一惟前人悲哀称述必借文字乃作诔以见意其词曰

大钧无垠一播万殊靡生不遂条达纷敷孰戕尔根隆夏陨枯哀众若人亦孔之辜伟君高门一世楷樞遗烈言言休声吳吳爰及穆考养德丰腴维君妙龄孔鸾将雏踵武前修建旆礼輿逢辰清明驾言驰驱壽或柅旃防所适徂机心日灰骄色自耜名列仕版自佚里闾优游卒歲文史为娱毓草蓺木畦苑踟躇良朋萃止有设醴 退察其私盎不宿储宁独贫攻亦复病拘萧然壁立副是形癯休文革带许月有余防安絮帽当暑不除乳石断下糜粥充虚长为散人庶以全躯云胡遽行旅舍僂拘沈疴顿剧颠倒医巫东野后事孝权遗书岂无他人顾以属余呜呼哀哉壮心兮摧頽白日兮须防永违兮昭代不沦兮幽墟大暮兮何晨防行兮空居嫠妇兮嗷嗷防子兮呱呱谁与兮晤歌猖狂兮防魑谓君兮非存君墨兮犹濡谓君兮非亡君屋兮谁庐折芳馨兮素华湛玉沥兮清醑况思君兮不见揽涕泪兮歔歔呜呼哀哉蹇物化之徂迁

慨有生之迷途何神爽之泰定临惊惧而弗渝遵宁宅于先丘寫幽愤于素纛庶无愆于遗托
君亦不昧夫所如

宋文鑑卷一百三十二

卷一百三十三

钦定四库全书

宋文鉴卷一百三十三

宋 吕祖谦 编

祭文

祭薛尚书文 欧阳修

景祐之元公初解政虽告于家而疾未病若修之鄙敢辱公知公于此时欲以女归公德方隆谓当再起齐大之婚敢辞以礼天不憖遗公薨忽然其后二年卒追前言生死之间以成公志挂剑于墓古人之义公敏于材刚毅自励不顾不随以直而遂命也在天位则难期惟其行已敢言是师有罪之身窜逐困拘生不及门 不送车致诚薄奠因道终初

祭尹子渐文 欧阳修

呜呼天于万物与吾人孰爱憎而薄厚其生未始以一齐其死宜其有夭寿苟百年者亦死则短长之何较惟善人之可喜谓宜在世而常存曰仁者寿兮是亦爱之者之説谓善必福兮得非以已而推天祸福吉凶至其难通虽圣人亦曰命而罕言兮岂其至而辞穷寿夭置之吾不能问嗟乎子渐吾独有恨我不见子于今几时自子得懷始有见期子不能来我欲亟往子今安归我往何访昔我在朝谏官侍从职当荐贤知子不贡朋党之诬苟避谗讽两相知而以心谓尺书之不用遂声音之永隔哭不闻而徒恸嗟此奠之一觞本冀欢言之可共往莫及兮难追哀以辞而永送

祭尹师鲁文 欧阳修

嗟乎师鲁辩足以穷万物而不能当一狱吏志可以狭四海而无所措其一身穷山之崖野水之濱猿猱之窟麋鹿之羣犹不容于其间兮遂即万鬼而为隣嗟乎师鲁世之恶子之多未必若爱子者之众何其穷而至此兮得非命在乎天而不在于人方其奔颠斥逐困扼艰屯举世皆冤而语言未尝以自及以穷至死而妻子不见其悲忻用舍进退屈伸语默夫何能然乃学之力至其握手为诀隐几待终顔色不变笑言从容死生之间既已能通于性命忧患之至宜其不累于心曾自子云逝善人宜哀子能自达予又何悲惟其师友之益年生之旧情之难忘言不可防嗟乎师鲁自古有死皆归无物惟圣与贤虽埋不没尤于文章炜若星日子之所为后世师法虽嗣子尚防未足以付予而世人藏之庶可无于坠失子于众人最爱予文寓辞千里侑此一罇冀以慰子闻乎不闻

祭苏子美文 欧阳修

哀哀子美命止斯邪小人之幸君子之嗟子之心胸蟠屈龙蛇风云变化雨雹交加忽然挥斧霹 轰车人有遭之心惊胆落震仆如麻须防霁止而回顾百里山川草木开发萌芽子于文章雄豪放肆有如此者吁可怪邪嗟乎世人知此而已贪悦其外不窥其内欲知子心穷達之际金石虽坚尚可破碎子于穷達始终仁义唯人不知乃穷至此蕴而不见遂以没地独留文章照耀后世嗟世之愚掩抑毁伤譬如磨鉴不灭愈光一世之短万世之长其间得失不待较量哀哀子美来举予觞

祭范文公文 欧阳修

呜呼公乎学古居今持方入圆丘轲之艰其道则然公曰彼恶公为好讐公曰彼善公为树朋公所勇为公则躁进公有退让公为近名谗人之言其何可聽先事而斥羣讥众排有事而思虽仇谓材毁不吾伤誉不吾喜谁非公徒谗人岂多公志不舒善不胜恶岂其然乎成难毁易理又然欤呜呼公乎欲壞其栋先催桷榱倾巢破鷄披折傍枝害一损百人谁不罹谁为党论是不仁哉呜呼公乎易名謚行君子之荣生也何毀没也何称好死恶生殆非人情岂其生有所嫉而死无争自公云亡谤不待辨愈从愈明由今可见始屈终伸公其无恨写懷平生寓此薄奠

祭杜文公文 欧阳修

士之进显于荣禄者莫不欲安享于丰腴公为辅弼饮食起居如陋巷之士壤堵之儒他人不堪公处愉愉士之退老而归休者所以思自放于闲适公居于家心在于国思虑精深言辞感激或達旦不寐或忧形于色如在朝廷而官有责呜呼进不知富贵之为乐退不忘天下以为心故行于已者老益笃而信于人者从愈深仁之爱公宁有猷已寿胡不多八十而止自公之丧道路嗟咨况于愚鄙久辱公知系官在朝心往神驰送不临穴哭不墾帷衔辞写恨有涕涟 漣

祭石曼卿文 欧阳修

呜呼曼卿生而为英死而为灵其同乎万物生死而复归于无物者暂聚之形不与万物共尽而卓然其不朽者后世之名此自古圣贤莫不皆然而着在简册者昭如日星呜呼曼卿吾不见子从矣犹能髣髴子之平生其轩昂磊落突兀峥嵘而埋藏于地下者意其不化为朽壤而为金玉之精不然生长松之千尺产灵芝而九茎奈何荒烟野蔓荆棘纵横风凄露下走燐飞萤但见牧童樵叟歌吟而上下与夫惊禽骇兽悲鸣踯躅而咿嚶今固如此更千秋而万歲兮安知其不穴藏狐貉与鼯鼪此自古圣贤亦皆然兮独不见夫累累乎旷野与荒城呜呼曼卿盛衰之理吾固知其如此而感念畴昔悲凉凄怆不觉临风而陨涕者有媿乎太上之忘情

祭丁学士文 欧阳修

呜呼元珍善恶之殊如火与水不能相容其势然尔是故乡人皆好孔子不然恶于不善然后为贤子之美才懿行纯德谁称诸朝当世有识子之憔悴遂以湮沦问孰恶子可知其人毁善之言譬若蝇矢防彼白玉濯之而已小人得志暂快一时要其得失后世方知受侮被谤无如仲尼巍然袞魄不祀桓魋孟轲之道愈久弥光名尊四子不数臧仓是以君子修身而俟扰扰奸愚经营一世殆荣华之销歇嗟泯没其谁记是皆生则狐防死为狗彘惟一贤之不幸历千载而犹伤自古孰不有死至今独吊乎沅湘彼灵均之事业初未见于南邦使不遭罗于放斥未必功显而名彰然则彼谗人之致力乃借誉而揄扬呜呼元珍道之通塞有命在天其如予何孔孟亦然何以慰子聊为此言寄哀一奠有涕涟涟

祭吴大资文 欧阳修

惟公以孔孟之学晁董之文佐佑三朝始终一节顾惟庸缪敢启光尘而金门玉堂早接隼游之末紫枢黄阁晚陪国论之余虽出处之畧同在进退而则异余实衰病从思返于田畴公方盛年宜复还于廊庙岂期白首来哭素帷饮醉百分尚想平生之意气写哀一奠不知涕泪之纵横

祭孙仆射文【代诸朝贤作】 宋 祁

呜呼圆方相函有奥有清稟乎粹灵贤人挺生筌宰相期有睽有遇值其嘉防盛烈斯举允矣我公懿德乘时总是二美蔚为人师齐风泱泱洙浴闾闾弱龄就傅典学书绅巾箱襞积油素纷纶神宗御天擢首儒先所立卓尔其声褒然一命筮仕十铨密啓缓袂缙帷繙经璧水礼有爱羊河无渡豕我冠两梁我绂斯皇进陪朝櫨兼侍潘房诸家去圣诋諆夺攘空言秕稗异制析杨公愤若时毅然含章层墀发墨塞路摧杨诜诜学徒终知向方章圣临驭神庭搆宇命公待诏轩然凤举邦实上贤人荣稽古鯁亮摩切优游博裕匪尺是枉伊柔弗茹前膝宸帷叩头省户砥刃以须袞章輒补谋之其臧 庶遄沮帝念蒸黎连翩出麾奉行细札褰去垂帷神明树政乐职闻诗居则率俾去而见思乃践谏雷乃官琐闥长君继明进阶贰卿追锋趣召燕席光亨宣室清问华光授经有猷有为弗猥弗并典常坟大武戒汤铭诵言必对嘉猷是经曰首魁奎与世作程银台崇崇公阅其封牧驹耳耳公専厥使或司绵蕞或教国子惟公得之异乎求之截河弗溷导疑靡亏大车而载秋阳以辉鸿飞冥冥不慕矰弋公居法从志澹虚极抗章引年阖门谢客上所固留愿焉弗获龙筵纳言得请束藩奎钩洒翰宴笋申恩亦命四近赋诗赠言卧阁逾歳乞骸去位春坊传席菟裘仙里疏受挥金式宴以喜广德挂车貽孙及子天且佚老君能知止向用五福与善则常公明且哲宜壽而昌天乎弗淑萎哲殲良皖簀占命忠言孔彰玉辉金相掩此不暘人彛代矩今也云亡士类相吊朝家悯伤恤恩告第蹕书密章高明令终防公孰当某等或奉绪言或麻大庇游藩防润挹流疏稊平日函文今兹交臂拘此宿官永乖薄酌有李成蹊有碑堕淚遐賚令芳庶展哀恹呜呼哀哉

祭孔中丞文 石 介

昔公为谏议大夫知兗州臣僚有以诗千篇献上者执政者即请进为龙图阁直学士上曰千

首诗岂若孔某一言即日拜公龙图阁直学士公再为中丞风格益峻及公没刘平战死于阵
谗贼害忠良诬奏平非战屈乃叛耳天子怒将夷平家平家胥靡就阙冤号道途逢骑唱中丞
来平家将叩中丞马言其事两街卖贩儿以数千叹曰徒往诉耳是非孔中丞者平家恸哭而
止噫至尊极者君至愚暗者民尊极则不信愚暗则难开非公至忠岂能动尊极耶非公至诚
岂能感愚暗耶动乎尊极感乎愚暗公之道格于上下矣呜呼公之生也君称之公之死也人
感之公之道全于死生矣夫道格于上下为着全于生死为难举是二节公之道充于天地之
间矣大冬残腊风号云咽节物惨淡心肝摧折炉烟氤氲樽酒冷烈享诚不享味公来降兹

祭王沂公文 尹洙

景祐初公临洛师某在幕府公以才敏见目数被器使议狱处事某或依违其言公必丁宁聃
以正道及公再秉大政尝以身事有请门下公庄色厉辞不少恩假某始惧中慊终则大悟呜
呼凡公语言虽因事见海然公在大位默不敢传公今薨谢輒录以自思一言之诬天实鉴之
以衰服不获备故吏之列情礼莫伸呜呼哀哉

祭梅圣俞文 刘敞

谨以清酌庶羞祭于圣俞二十五兄之灵乃者隣几病革君往问之退而过我相对嗟咨我视
君色异于他时自为君诊劝君从医君虽我信其中犹疑明日大飧四方来贺奉觞上寿戎客
在坐百辟相趋敢或私卧赐食上前谨惧已过疾果大作仆而不能起俗医控搏以表为里中
涸外干翕翕如燬势一大跌不得中止俯仰晨夕遂有生死痛骇惊呼曷云能已孰谓旬日杀
二贤士呜呼哀哉物固有生固有限岂曰君子独天其性君之文学信于友朋君之孝友乡
党是称仕不过庸寿不百龄一至于此何其不平丧还故乡义从此诀哭送遁周情岂能绝

告伯父殡文 刘敞

古者庶人之防隣里执事在其土千里赴义及其送 涂潦毋避焉有至亲而或不至某独不
幸受命典城戎马是司匍匐不能不哭于堂不祖于堂不祖于庭窆不复土虞不奉牲回望万
里悲号失声门外之治王命实行盖古亦云不即人情于奠陈词以昭哀诚

祭范颍州文 王安石

呜呼我公一世之师由初迄终名节无疵明肃之盛身危志殖瑶华失位又随以斥治功亟闻
尹帝之都闭奸兴良稚子歌呼赫赫之家万首俯趋独绳其私以走江湖士争留公蹈祸不栗
有危其辞谒与俱出风俗之衰骇正怡邪蹇蹇我初人以疑嗟力行不回暮者兴起儒先酋酋
以节相侈公之在贬愈勇为忠稽前引古谊不营躬外更三州施有余泽如酺河江以灌寻尺
宿臧自解不以刑加猾盗涵仁终老无邪讲艺 歌暮来千里沟川障泽田桑有喜戎孽獠狂
敢齧我疆铸印刻符公屏一方取将于伍后常名显收士至佐维邦之彦声之所加虏不敢瀕
以其余威走敌完隣昔也始至疮痍满道药之養之内外完好既其无为饮酒笑歌百城宴眠

吏士委蛇上嘉曰材以副枢密稽首辞让至于六七遂参宰相厘我典常扶贤賛保乱穴除荒
官更于朝士变于乡百治具修偷墮勉强彼阙不遂归侍帝侧卒屏于外身屯道塞谓宜耆考
尚有以为神乎孰忍使至于斯盖公之才犹不尽试肆其经纶功孰与计自公之贵廐库逾空
夷其色辞傲讦以容化于妇妾不靡珠玉翼翼公子 涕恶粟闵死怜穷惟是之奢孤女以嫁
男成厥家孰堙于深孰楔乎厚其传其详以法永久硕人今亡邦国之忧矧鄙不肖辱公知尤
承凶万里不往而留涕哭驰辞以賛醪羞

祭吴冲卿文 王安石

呜呼公命在西长我一时公先我茁我后公萎中间仕宦有合有离后我所践公輒仍之出则
交轡处则连攘坐肘则并行肩则差岂愿敢及天实我貽公之停蓄及所设施有诰有诰亦有
铭诗又将有史传所不疑我既惫眊何辞能为婚姻之故唯以告悲

祭杜待制文 王安石

士耻无材耻不修身身修而材有不及民凡世可愿于公皆有孰窘其年不使难老贵者善防
其有孰窥公心豁豁不置墙帷有挟易骄不难拒善公义所在服之无贱惟以时施宜以每成
又况于公强果以行物贵于时常以其少悲矣子思我如其久钟山北蟠江落而东完厚密牢
万世之宫其归孰知愚与在此酌公以文以配铭史

宋文鉴卷一百三十三

卷一百三十四

钦定四库全书

宋文鉴卷一百三十四

宋吕祖谦编

祭文

祭韩钦圣文 王安石

嗟为君兮邦之特目揚秀兮顏髮泽纷百家兮并涉超独懷兮道德博荡荡兮无畛寬恂恂兮莫逆出当官兮发论使权彊兮累息年何尤兮止此禄不多兮谁嗇具壶觴兮酌哭攀防车兮启夕岂独愁兮吾僚隐多闻兮谅直顾笑语兮已矣冀来嘉兮魂魄

祭曾博士文 王安石

呜呼公以罪废实以不幸卒困以天亦惟其命命与才违人实知之名之不幸知者为谁公之闾里宗亲党友知公之名于实无有呜呼公初公志如何孰云不谐而厄孔多地大天穹有时而毀星日脱败山倾谷圯人居其间万物一偏固有穷通世数之然至其寿夭尚何忧喜要之百年一蜕以死方其生时窘若囚拘其死以归混合空虚以生易死死而不祈唯其不见生者之悲公今有子能隆公后惟彼生者可无甚悼嗟理则然其情难忘哭泣驰辞往侑奠觴

祭王深甫文 王安石

嗟嗟深甫真弃我而先乎孰谓深甫之壮以死而吾可以长年乎虽吾昔日执子之手归言子之所为实受命于吾母曰如此人乃与为友吾母知子过于子初终子成德多吾不如呜呼天乎既防吾母又夺吾友虽不即死吾何能从抃胸一恸心摧志朽泣涕为文以荐食酒嗟嗟深甫子尚知否

祭欧阳少师文 曾巩

惟公学为儒宗材不世出文章逸发醇深炳蔚体备韩马思兼庄屈垂光简编焯若星日絕去刀尺混然天质辞穷卷尽含意未卒读者心醒开防愈疾当代一人顾无俦匹諫垣抗议气震囿遙鼓行无前防防非恤世伪难胜孤坚意窒紫防玉堂独当大笔二典三谟生明藏室弥挫弥厉诚纯志壹斟酌损益论思得失经体虑萌沃心造膝帝曰汝贤引登辅弼公在庙堂尊明道术清静简易仁民爱物敛不烦苛令无迫猝栖置木索里安户逸犊敛兵革天清地谧日进

昌言从容密勿开建国本情忠力悉卯未之歲龙驾颺歟再极大艰垂绅秉笏乾坤正位上下有秩功被社稷等夷召毕公在庙堂总持纪律一用公直两忘猜昵不挟朋比不虞讪嫉独立不回其刚屹屹爱養人材獎成诱掖甄拔寒素振兴滯屈以为己任无有废咈维公平生恺悌忠实内外洞澈初终若一年始六十悬辞冕黻连章累歲乃俞所乞放意丘樊脱遗羈罽沉浸图史左右琴瑟气志浩然不陋蓬荜意谓百齡重休累吉还幹鼎轴贊微计密云胡倾俎慙遗则弗闻讵失声眦泪横溢慙宜不敏早防振防言繇公海行繇公率戴德不酬懷情独郁西望轻车莫持纠缠维公萃萃德义譔述为后世法终不泯没记辞叙心曷能髣髴呜呼哀哉

祭王平甫文 曾 巩

呜呼平甫决江河不足以为子之高谈雄辯吞云梦不足以为子之博闻强记至若操纸为文落笔千字倘往恣肆如不可穷秘恠恍惚亦莫之系皆足以高视古今桀出伦类而况好学不倦垂老愈專自信独立在约弥厉而志屈于不伸材穷于不试人皆待子以将昌神胡速子于长逝呜呼平甫余昔相逢我壮子稚间托婚姻相期道义每心服于超軼亦情亲于乐易何堂堂而山立忽泯泯而颺驶计皎皎而犹疑泪汎汎而莫制聊寓荐于一觴纂斯言而见意

祭欧阳文忠公文 苏 轼

呜呼哀哉公之生于世六十有六年民有父母国有蓍龟斯文有传学者有师君子有所恃而不恐小人有所畏而不为譬如大川乔岳不见其运动而功利之及于物者蓋不可以寻计而周知今公之没也赤子无所仰芘朝廷无所稽疑斯文化为异端而学者至于用夷君子以为无与为善而小人沛然自以为得时譬如深渊大泽龙亡而虎逝则变怪杂出舞防鱗而号狐狸昔其未用也天下以为病而其既用也则又以为迟及其释位而去也莫不冀其复用至其请老而归也莫不惆悵失望而犹庶几于万一者幸公之未衰孰谓公无复有意于斯世也奄一去而莫予追岂厌世溷浊洁身而逝乎将民之无祿而天莫之遗昔我先君懷宝遁世非公则莫能致而不肖无状因緣出入受教于门下者十有六年于兹闻公之丧义当匍匐往救而懷祿不去愧古人以忸怩緘词千里以寓一哀而已矣蓋上以为天下恟而下以哭其私呜呼哀哉

祭魏国韩令公文 苏 轼

天生元圣必作之配有神司之不约而防既生尧舜禹稷自至仁宗龙飞公举进士妙齡秀发秉笔入侍公于是时仲舒贾谊方将登庸盜起西夏四方骚然帝用不赦授公鉞钺往督西旅公于是时方叔召虎入贊兵政出殿大邦恩威并行春雨秋霜兵练民安四夷屈降公于是时临淮汾阳帝在明堂欲行王政羣后奏功罔底于成召自北方付之枢衡公于是时萧曹魏邴二帝山陵天下悸惴呼吸之间有雷有风有存有亡有兵有戎公于是时伊尹周公功成而退三镇偃息天下噉然曷日而复毕公在外心在王室房公且死征辽是防呜呼哀哉六月甲寅人之无祿丧我宗臣我有黎民谁与教之我有子孙谁与保之巍巍堂堂宁复有之公之云云我无日矣恟哭涕流何嗟及矣昔我先子没于东京公为二诗以祖其行文追典诰论极皇王

公言一出孰敢改评施及不肖待以国士非我自知公实见谓父子昆弟并出公门公不责报我岂怀恩惟此涕泣实哀斯人有肉在俎有酒在樽公归在天宁闻我言呜呼哀哉

祭任师中文 苏轼

允义大夫维蜀之珎诗之老成易之文人去我十年其德日新庶一见之遽没元身惟慥与轼匪友则亲自丙以降昔惟州民旅哭于庭惻焉酸辛祸福之来孰知其因自寿自夭自屈自信天莫为之矧凡鬼神生荣死哀自昔所难持此令名归于九原

黄州再祭文与可文 苏轼

呜呼哀哉我官于岐实始识君方口秀眉志信而文志气大刚谈词如云一别五年君誉日闻道德为膏以自濯薰艺学之多蔚如秋蕢脱口成章粲莫可耘骋骋百家错落纷纷使我羞叹笔砚为焚再见京师默无所云杳兮清深落其华芬昔蓺我黍今熟其饋啜醯歌呼得淳而醺天力自然不施胶筋坐了万事气回三军笑我皇皇独违垢纷俯仰三州眷恋桑粉仁施草木信及麋麇昂然来归独立无羣俛焉复去初无戚欣大哉死生凄怆蒿焄君没谈笑大钧徒勤防之西归我窜江濱何以荐君采江之芹相彼日月有朝必曛我在茫茫凡几合分尽此一觴归安于坟呜呼哀哉

祭范蜀公文 苏轼

呜呼仁宗在位四十二年畦而种之有得皆贤既历三世悉为名臣今如晨星存者几人孰如我公顾大光明导日而升灿焉长庚死生契濶公独寿考天实耆之以殿诸老二圣嗣位仁义是施公昔所言畧行无遗维乐未和公寝不宁乐成而薨公往则瞑凡百君子愿公无极胡不万年以重王国责难之忠爱莫助之嗟我后来谁复似之吾先君子秉德不耀与公弟兄一日之少穷達不齐欢则无间岂以间里忠义则然先君之终公时在陈宵梦告行晨起讎闻先友尽矣我亦白发闻公之防方食哽噎堂堂我公岂其云亡望公凜然犹举我觴

祭欧阳文忠公夫人文 苏轼

呜呼文忠之薨十有八年士无所归散而自贤我是用惧日登师门既友诸子入拜夫人望之愀然有穆其言简肃之肃文忠之文虽无老成典刑则存何以嗣之使世不忘诸子惟迨好学而刚夫人实使兄弟吾孙徽福文忠及我先君出守东南往违其顔病不能见卒以讎闻自斂及 餽奠莫亲匪愧于今有腍昔人寓词千里侑此一樽尚享

颍州祭欧阳文忠公文 苏轼

呜呼轼自韶亂以学为嬉童子何知谓公我师昼诵公文夜梦见之十有五年乃克见公公为拊掌欢笑改容此我辈人余子莫羣我老将休付子斯文再拜稽首过矣公言虽知其过不敢

不勉契濶艰难见公汝陰多土方晬而我独南公曰子来实获我心我所谓文必与道俱见利而迁则非我徒又拜稽首有死无易公虽云亡言如皎日元祐之初起自南迁叔季在朝如见公顔入拜夫人罗列诸孙敢以中子请婚叔氏夫人曰然师友之义凡二十年再升公堂深衣庙门垂涕失声白发苍顔复见颖人颖人思公曰此门生虽无以报不辱其门清颖洋洋东注于淮我怀先生岂有涯哉

祭滕大夫母杨夫人文 苏轼

呜呼士盛庆厯如汉武宣用兵西方故西多贤惟时滕公实显于西文武殿邦尹范是齐功名不终有命有义我时童子知为公喟四十余年墓木卜圉乃识其子倾盖不疑忠厚且文前人是以前心平反慈训则尔仰止德人如冈如陵升堂而拜犹愧未能岂其防疾一恸永已胡不百年以慰其子寿禄在天考终非亡鹄巢之应子孙其昌

祭柳仲遠文二首 苏轼

呜呼哀哉我生多故愈老愈艰亲朋几人日代日迁逝者如风计来逾年一恸海徼摧胸破肝痛我令妹天独与贤德如召南寿甫见孙矧我仲遠孝友防温天若成之从政有闻富以学术又曰以言久而不试理岂其然崎岖有求凡以为亲虽不负米实劳且歎知止于此不如归闲哀我孤甥生如闵顔衔痛遠诉谁抚谁存逝者已矣存者何冤慎勿致败以全汝门以慰我仲遠永归之魂呜呼哀哉我厄于南天降罪疾方之古人百死有溢天不我亡亡其朋戚如柳氏妹夫妇连璧云何两逝不慙遗一我归自南宿草再易哭堕其目泉壤咫尺閔也有 气贯金石我穷且老似舅何益易其墓侧可置万室天定胜人此语其必

再祭亡兄端明文 苏轼

呜呼惟我与兄出处昔同幼学无师先君是从游戏图书寤寐其中曰予二人要知是终后迫寒饥出仕于时乡举制策并驱而驰猖狂妄行误为世羈始以是得终以失之兄迁于黄我窜于筠流落空山友其野人命不自知还复簪绅俛仰几何宠禄遄臻欲去未遑祸来盈门大庾之东涨海之南黎蜨杂居非人所堪瘴起袭帷赬来掀檐卧不得寐食何暇甘如是七年雷雨一覃兄归晋陵我还颍川愿一见之乃有不然瘴暑相寻医不能痊嗟兄与我再起再颠未尝不同今乃独先呜呼我兄而止斯耶昔始宦游诵韦氏时夜雨对床后忽有违进不知退践此齟机欲复斯言而天夺之先塋在西老泉之山归骨其旁自昔有言势不克从夫岂不懷地虽郟鄏山曰峩眉天实命之岂人也哉我寓此邦有田一防子孙安之殆不复迁兄来自西于是盘桓卜告孟秋归于其阡颍川有苏肇自兄先

为家君祭吕申公文 程颢

呜呼公禀则异得天之粹遭兹昌辰出为嘉瑞生而富贵处之无累幼而聪明充之能至学既知真仕则为道出入屡更险夷一操二圣临御人望是从起藩入辅命相再公平日视公静默

恂恂国论所防一言万钧谓公无位位为相臣谓公得志志存未伸然公心如权衡所以无间言于率土德如山岳所以致敬心于人主从容语默之间人孰量其所补胡上天之不吊不一老之愍遗渊水无涯将孰求于攸济百身莫赎为有识之同悲呜呼哀哉羸老余生辱知有素二男论忘势之交不偶无酬知之路阻临穴以伸哀姑托文而披露相英灵兮如在监丹诚而来顾

祭知命弟文 黄庭坚

君歿荆州我在万里歿后四月始闻讣音既无孤悍恃有兄弟天既丧我君不能年自我哭君头发尽白英风豪气窘此一棺拊棺长号殆无生意公私之计身有所縻既难以归舟车可虑乃得吉土旅殡僧坊虽远至亲理则安宴无惊无恐扶将上輦絶恻一觞其君尚飨

祭彭江州文 曾肇

呜呼器资忽不见其安之乎孰为天生斯人而止于斯乎人固忌子之独立天亦责子之不诡随乎不然何以壽不跻于六十位不过四品卒泯默而无施乎呜呼器资凡世可贵学问文章言语政事有一于兹足高士类而况居今行古蹈义依仁众人所趋而视若无有举世所背而仔肩以身防穽当前而不避曾何得丧之足云此固圣贤之自任岂止度越于时人至若孝友着于闺门信义行于乡闾处荣悴而无亏临死生而不

乱可谓内外全德始终一贯实横流之砥柱宜大厦之栋干奈何道未行于当世福未及于生灵忽飘流于下国遂夭阏于修龄去此昭昭即彼 有志不就銜恨泉扃惟自立之卓伟亘万世如日星彼一时之苟得譬熠燿之与长庚呜呼器资末俗陵迟朋友道熄许与之分切磋之益众皆訑訑子独汲汲我生昏愚与世殊适惟子好我论心莫逆我先我后子为羽翼我有过咎子为药石子今云亡有善谁责岂无他人莫如子直呜呼器资念昔太学相从之初绸缪繾綣二十余年中间省闕并典贊书出入风议惟予子俱子如飞赏岂受罍拘有言不用去不须防我亦遭谗自请州符迹有乖隔心焉弗殊去歲京城子留我北中情莫宣相视默默我行未几子亦南迁孰云契阔曾不经年尺书未达已隔终天寝門一恸有泪如泉呜呼器资子讣之来我适罪逐相念平生了然在目匍匐欲往身有羈束千里寓辞以代号哭

代范枢密祭温公文 张耒

呜呼天祚有邦俾之元 笃生我公为世父师夷齐之清渊騫之德子产之惠叔向之直人擅其一足以成名公兼众德干干不宁九流百家金匱石室钩索沉隱裁其失得根柢治乱经纶皇极作为文章有书秩秩 圭大裘望之肃然冬暘夏水赴者争先仁英两朝鎗鎗厥声国有正人折奸于萌莠染柔木求直于防我公尽规君心则宁烈烈神考体貌有德公献有可岩岩翼翼言有未用不敢受爵深衣幅巾归休于洛公则休矣四方颯颯君子野人泊于他邦闻风懷归于父于兄天施不齐或怨寒暑公独何施四海一誉元丰末年国有大事穆穆文母宥我神嗣爰立作相媚于神人我公在庭其重万钧士贺于朝民歌于防农庆于野兵休于边燠尔

栗寒养其饥孱无瘠于饥无休于田培其本根枝叶则茂岂曰我作宪章惟旧于赫圣考左右上帝休公于家实遗圣子卷耳思贤夙夜周京不惑不疑成此太平公之去来人之戚嬉人之戚嬉帝之从违岂人事耶天实为之纯仁不才辱公之深人之相知贵相知心惟公我知洞达表里采其所长谓或可使申结义好丘山不移匪我则然公实取之泚泚清洛独乐之园嘉华春剪修竹夏寒清酌翛然我招我从琅琅嘉言有铭在躬朝偶乏人备位枢机入与国论获亲风规六七年间为益不赀私祈白首从公以归忧劳伤生公既遭疾庶几有瘳卒相王室国祠既誓公以丧闻我心之悲不获至门入哭于室公既大敛终天之情不一见面人生有死如旦夜耳曾子将没知免而喜公身既修公志既毕既寿令终无有其失有如公者古今万一任重道远税驾兹日庶几念此以纾我悲犹有鬼神实闻我辞

代祭刘贡甫文 张耒

呜呼子之强学博敏超絶一世肇自载籍孔墨百氏太史所录俚问野记延及荒外阴阳鬼神细大万殊一载以身下至律令老吏所疑故事旧章在廷不知有问于子归如得师直贯旁穿水决矢飞一时书林众俊并驰满堂贤豪视子尘挥逸足奇毛不受絏羈宾守列郡吏民畏思治盗宛胸不事诛斩他严见欺子爱不犯中斥于南人忧子怡归来白首晚职训词子之来归亦既疾病惟其精明犹足以永谁云如子竟止斯耶国失君子善人之嗟方其盛时弛不得张亦既有遭而盍其强谁与子仇败子百世虽然今日竟何有亡惟我与君同年进士申以婚媾兼恩与义平生笑谈樽席安喜其当在耶临此酒馔

祭张生文 张舜民

呜呼学者所以去乡里离父母妻子甘淡薄尽勤劳继昼夜而不息者知患其道之不至而不患乎身之不安也身安可以学道知爱其道以亡其身亦蔽之深者也而吾子既死矣其知之乎否耶然谏争之臣死于朝廷疆场之臣死于敌国吾子死于庠序其志一也有虽凶而无咎者吾子之谓乎呜呼吾子年犹未壮敏而好学死乎数千里之外母老而失所养妻寡而失其养晚节末路委为穷人天道固如何哉是可悲也已

祭王枢密文 张舜民

夫物有自小而致大积卑而致高唯豫章之材数年而过百尺骐驎之足一日而驰千里黄河发源而注海太华防地而参天与夫命世之英特起之士布衣负公辅之望小官蕴廊庙之器一旦遭时遇主建功立业奸邪望风而屏息贤者引类而彙征朝廷以之治安礼乐由是兴起则岂特豫章骐驎黄河太华之比也其公之谓乎唯公少而居家则膺令名长而出任则有公望乘时设施自州县之卑数年之间致位二府危言大节 动天下之耳目明而可见者着以为甲令隐而不露者杜患于未形披榛攘棘正路广开大奸雄怵束手窜身歴观先世以来固有以兵武而充祸乱定册而安邦家者率皆涂炭驱除糜烂而后止曾未若雍容于防箔之前启廸于方幅之内兴利除害如医者以毫芒之鍼刀圭之药愈膏肓沉痾之疾不知其工妙之端也宜其天下为之瞩目二圣谓之有功孟子自谓放淫辞诘波行以承三圣程公之力较公

之才固不在孟子之下然才高则多嫉位隆则招殃曾不旋踵谗言遽兴未及中年百疾交作二圣方隆之眷而有云亡之叹八十待养之亲而婴哭子之情善人堂堂殡死畧尽为国家者将何赖焉始犹疑之人事今日乃知天极自天复何言哉呜呼公之存不能共致其力公之歿不能一哭其门徒然予知有愧古昔遣词挥泪灵乎歆哉

祭范忠宣公文 陈 权

昔文正公在仁祖时忠于谋国众正所依心虚而明照了不疑先事而虑有如蓍 两遭勅榜益奋不移外御元昊数蹈祸机国势既安奚恤我危考公行事允也似之安不择地难不敢辞至于言兵则曰不可岂曰为异各遵其时不述其迹是乃无违三年遽改生事者谁蔡相南行公独救之一胜一复其兆在兹公可以默又进忱辞人亦有言公尔忘私孰能临义舍安取危一斥四年盲废始归天子哀怜拜命涕洟其心不盲意欲有施人愿公留为帝龙防病不能对人所叹咨天子曰吁疾尚可为锡以上剂临遣国医丁宁训飭速疗勿迟云何不淑竟止于斯呜呼哀哉公果已矣举世思公公不来矣人之于公有合有睽闻公之歿睽者亦悲情隔生死公论乃出悲公之人始自今日临终不昧忍死有述小其一身大我王室置小恤大自初迄终可使闻者劝而作忠太宗征辽乔死不忘心之所虑奚独一方愿惜生灵愿合朋党愿为宣仁一洗诬谤愿正其事愿辨其人愿以中道行帝之仁呜呼哀哉言惟心声孰无此声孰有此诚神器虽大如人之形爱养胃气可以保生阳明之经徧于四体呼吸之间无有不差左络连右首脉应趾中经流行宁有定位彼执一者弃异取同异我曰偏同我曰中语各有心心各有物孰能审是而不彼恤公独有言继者谁乎公薨我悲岂縁葭莩公昔南迁我在北陲侧身以望心往从之及公之还我有言责陈留虽近欲往不得平生想慕独未识公见公之心何必形容文正歿后公又亡矣仲季方兴公复有子其门益大其道益光公可无憾我亦奚伤

祭吕申公文 邹 浩

天祐主上笃生我公来对休运为今大鸿面槐执璧启心而恭众方窘迫公独从容爰有因革论起如蜂公徐一言翕然以从事已而默终日敛躬若无所与莫测胸中但见百官上下以功但见四夷车书以同但见田野年谷以丰流离者复憔悴者充白颠黄馘端见儿童爱笑爰语防咏时雍朝廷益尊勲业益隆殊尤俊伟益振家风人亦有言孰不荐绅维公秉国始为有臣人亦有言孰不是似维公肯构始为有子窃惟公初信非凡人情不声色学不空文西山之清孟轲之醇德盛行高孰与拟伦如古宝器如时庆云世获覩者倍万懽欣所以施設如前所陈公昔去位君子怛伤比登三事交贺壶觞宜其昊天裨寿而康曷为不仁祸降非常两楹入梦中台坼光歲值龙蛇遽尔云亡橐岌大厦摧其栋梁爰自二圣遠极八荒知与不知失声沾裳顾如某者顷在广陵辱公青眼收之门庭岂徒应格荐其姓名每及人物猥赐题评遂令疎贱闻于公卿重念参侍屏息人后未尝请问敢祈公售尔来日月不为不久文章工乎问学正不公竟不问不考其有若为怜之久而益厚仰惟此恩山岳在首吉卜伊迺将举神匱义当舍官躬设鸡酒愿莫之遂视古则丑寓兹一奠以昭不苟公骑箕尾宁来钦受

祭王和甫文 田 画

惟公心符于迹实称其名包含蕴蓄见于力行顷在并府参详机务韩侯于宣城彼西土发民四万以踵其武将臣依违莫敢或牾公曰不然深入贼所师干之用兹亦焉取振旅言旋书可挿羽毋空我师祗以餌虜我言有成帝用嘉止陟于陪属亦既显仕士有险虜寘人危机媚彼技能掇于文词童膺孺防羣舌毛起公独营之卒免于死明明天子从谏如流爰属星变直言是求敢谓臣隣不臧其谋厚斂竭作变则有由擢尹王畿剖烦折微游刃砉□风飈霆飞曾未百日狴犴告空夷人骇观邦史奏公遗书上变蔓延无辜公摘其奸弭于须臾丘封万计终以不徙请师文王掩骼埋骹乃发搜慝乃治强梗贵幸侧目权豪斂衽遂跻丞辖天子是毗正人所倚细民所腓有夏多罪天命徂征鼠奔鸟窜师老于行皇帝震怒载整其旅简期授材恢我疆圉内焉卿士噤不一语外焉方镇则惟所举公力如虎公乃有陈岂不来威眷此下民皇帝曰都汝惟可信一言罢师天子神圣其惠伊何曰蠲其逋其怨伊何曰缓其狱忠烈允着仁风载穆孰是勲庸而不公属法吏沾沾吹毛刻骨陵借衣冠狐防豕突有如公者致于弹文竟坐焚墨废其终身粤隼在下实公貽耻勿俾埋沉式穀以位殲佞截截心折胆落嫉公居中肆是谗譎出领大邦曰升与青周旋杨雍晚殿宇并政尚寬大存鰥吊 肆靖我境其隱如城公在帷幄恩威延延彼蠹者羌毋取犯边施及卒伍以至降虜祝公百年稽顙蹈舞胡为遇疾奄见殂殁畴昔起之以定王国于皇圣君谁适谋矣哲人云亡梁木隳矣蚩蚩之眚靡所依矣街祭巷泣嗟何及矣维昔不肖往官江濱龙蟠凤翥始见伟人平生知己世无拟伦执手上堂得于逡巡匪惟知之抑又存之保厘我躬燕及其私自时契阔亦复流离川涂阻越梦寐懷思旌旆北来言适大鹵迎拜霍丘笑言如故恩斯闵斯公意愈隆引寘幕府猷疇从容谓公壽康归相天子乃今防防声采顿委大明在上品物在下巍巍堂堂遽即长夜我心伤悲公塋有期念非古人懷祿在兹旒车髣髴与公永违致彼薄奠有愧公知呜呼哀哉

祭范德孺文 毕仲游

曩歲识公灵武之城公貌既伟公气亦英黄河瀚海间關共行公矜我慙我知公誠遂同夷險期以死生其后公显鏗鉤有声既显而贵隱然大名帅庆帅延帅熙帅并武夫悍卒怖若雷霆军师老将心服其宁属□听命甘从使令四路十年不知有兵及公伊洛以严輔明下教既悉擿伏亦精洛城万室千里为响家家畏公如公是隣宿奸巨猾魂褫魄沦击断取舍莫知其因遂皆斂手以公为神凡人之情侥幸苟得公独裁之如穴被塞凡人之情好寬喜逸公独检之规矩防墨宜其不悻而以为病乃独懷公式歌且咏岂其施設遠而难窺人乐其大而忘其私不然则公不足为奇矧公門戶奕世显荣太师为父相辖为兄公又崛起岷嶺嶢嶢宜继三人秉国之成而公一废十有八齡公废于家匪公匪卿二边倚重犹如长城人言公复士夫修兴人言公用夷虜震惊公复之日万耳皆倾复未之用公而已薨呜呼哀哉吉人今喪矣胸中之奇包而往矣威名气像岂可为矣予末小生将何依矣恸哭于野出相送矣追念平昔恍如梦矣呜呼哀哉

祭陈了翁文 游酢

呜呼陈公万夫之杰太虚无尘心凝知彻经纶大猷如挈裘领灼知几先 绵作炳虑遠而知者疑言危而弱者警著 有稽可观而省呜呼陈公知事道而已不知鼎鑊之临其颠也知徇

国而已不知蹈弃之横其前也阨之白首而气愈和蹙之死地而志愈坚处约弥久妻孥裕然畎畝念忠顶踵利物人疑其为墨平生拯饥任重一身吾知其为稷行道之人闻者心恻意者天将降之大任而空乏其身耶意者吾君将追念其笃诚发独防而收之以泽斯民耶呜呼孰谓流离川涂遭回万状而沦于淮楚之滨耶呜呼孰谓谋可以托心膂力可以任股肱而志愿卒不伸耶浩浩元精惨不知其因耶歲首之书后计而达孰书一恸骨惊心折呜呼陈公蓋将有哲人能尽知而贤之有志士能慷慨而言之有仁人能经纪其家而存之有良史能具载其实而传之区区鄙词曷足以涉其流而诉其源乎寓奠一觞聊荐悃悃东望伤怀泪落横臆尚飡

祭程伊川文 张 绎

呜呼利害生于身礼义根于心伊川此心丧于利害而礼义以为虚也故先生踽踽独行于世众乃以为迂也维尚德者以为卓絕之行而忠信以为孚也立义者以为不可犯而达权者以为不可拘也在吾先生曾何有意心与道防防然无际无欲可以系羈兮自克者知其难也不立意以为言兮知言者识其要也德輶如毛毛犹有伦无声无臭夫何可亲呜呼先生之道不可得而名也伊言者反以为病兮此心终不得而形也维太山以为高兮日月以为明也春风以为和兮严霜以为清也在昔诸儒各行其志或得乎数可观乎礼学者赖之世济其美独吾先生淡乎无味得味之真死其乃已自我之见七年于兹含孕化育以蕃以滋天地其容我兮父母其生之君亲其临我兮夫子其成之欲报之心何日忘之昔先生有言见乎文字者有七分之一心绘乎丹青者有七分之一仪七分之一仪固不可益七分之一心其犹可推而今而后将筑室于伊洛之滨望先生之墓以毕吾此生也呜呼夫子没而微言絕则吾固不可得而闻也然天不言而四时行地不言而百物生惟与二三子洗心去智格物去意期默契斯道在先生为未亡也呜呼二三子之志不待物而后见先生之行不待谏而后征然而山頽梁坏何以寄情凄风一奠敬祖于庭百年之恨并此以倾

祭郑庭诲文 毛 滂

石梁郁然上有佳气下走清湍昔闻异人相携盘桓寥寥至今渔樵所安尚意山间人必有异下乃君庐长【缺】甲第记初识君在稠人中孤熊傲兀知不可笼一见倾蓋定交尊俎岂唯姻聯气则相许予才闕茸寡谐于世所赖得君差彊人意奋然高谈气蓋一座有非吾曹瞪目欲唾君真伟人秀睂奇状使当卒学仕必人上退托于酒日饮亡何羽衣岸巾枕麴而哦小诗立成晚更婉熟不朴不园元和賸馥挥金如土结客如市逴韵翛然形骸之外名利之徒其隘如发败意苦心十居七八开口一笑人生能几君醉不知笑以没齿君年不足行乐则过胡用百忧齿摇发堕曩予西征相酌以酒酣歌悲壮起舞为壽予为此别行当来归当益酿酒从君傲嬉予归酒熟君不复临有佳风月如聆车音荐酒君堂予目 然呼君不闻是岂猝泯

宋文鉴卷一百三十四

卷一百三十五

钦定四库全书

宋文鉴卷一百三十五

宋吕祖谦编

祭文

祈雨祭汉景帝文 欧阳修

县有州帖祈雨诸祠县令至愚以谓雨泽颇时民不至于不足不敢以烦神之视听癸丑出于近郊见民稼之苗者荒在草间问之曰待雨而后耘耔又行见老父曰此月无雨岁将不成然后乃知前所谓雨泽颇时者徒见于城郭之近而县境数百里山陂田亩之间盖未及也修以有罪为令于此宜勤民事神以塞其责令既治民狱讼之不用又不求民之所急至去县十余里外凡民之事皆不能知顽然慢于事神此修为罪又甚于所以来为令之罪惟神为汉明帝生能惠泽其民布义行刚威灵之名照临后世而尤信于此土之人神其降休以答此土之民之信

祭城隍神文 欧阳修

雨之害物多矣而城者神之所职不敢及佗请言城役用民之力六万九千工食民米一千五百石众力方作雨则止之城功既成雨又壤之敢问雨者于神谁尸吏能知人不能知雨惟神有灵可与雨语吏竭其力神祐以灵各拱其职无媿斯民

祈雨祭汉高皇帝文 欧阳修

吏有常职来官于滁者不三四岁而易也神食于此无穷已也神与吏于滁人孰亲且从孰宜爱其人之深也滁人敢慢神而犯威灵也其畏信勤事于神也吏于凡小事犹皆动有法令约束违则有罚孰若神之变化不测而能与民转灾为福也吏朝夕拜祷弥旬越月而无感动神之招呼风云开阖阴阳而役使鬼物顷刻之间也今民田待雨急矣吏知人力不能为犹竭其力而不得已况神之易为也况滁人畏信勤事之久而亲神宜爱之而又有可以转灾为福变化不测之能也吏谁敢与神较而修輒以此为黥者盖哀民之急辞也其政不善而召灾旱又以为黥神宜降殃于修而赐民以雨使赏罚并行而两得也民之幸也修之愿也

北岳祈雪文 宋祁

自冬无雪大寒不效宿麦枯槁涉春之仲土坼冻泮天极愈高暖气蚤来厉鬼挟疫以中齐人寒咳僵作赭埃防田耒耜弗施夫家愁叹疾首无诉并待饥虐臣荷二千石印绶克长此邦部九州军地幅员千里民有不获匪臣孰同临政不敏御下弗明事神不防怨诅誉布为疾为旱职臣所召向者已遣府从事投诉祠阙冀防嘉生而涉月跨岁大和 郁终风连朝云合輒披臣日者自省不知所救惟身多罪蔽暗懦愚非帝所赦不敢逃诛斯民何辜罹此亢厄孩耄相持驱就困穷有仁如帝而不垂闵侧闻古诸侯祭境内山川以山川能出云为风雨见怪物福庇其下而血食之自侯以降养牺储醪跽伏进荐或禴或尝不敢有贰以能为之主也惟帝所主乃州之望何材不取何变不储然则蓄而泄之沛润千里振洗熒焚奋张叶牙滋液流浸后侑有年是岳所以主而州所以为望也人能事神神能庇人方穷而诉必见哀情物薄请丰所持至诚

祭左丘明文 黄 晞

噫嘻呜呼天地何私钟材特殊胸罗万象器函八隅尧形舜骨禹步汤趋巍巍左丘千古德孤周孱鲁恠玉石混渝何王何侯何主何奴鬼哭朝阳狐巢国都丁艰愤辰闭目涕裾捉简磨铅申杼踟蹰仲尼经之神居纬诸百王千法电熠霞铺浮忠暴孝窜奸磔防弗官而赏弗斧而诛云龙谲诡麟凤怡愉星纪二十鳞如灿如后俗荒醉履捷迷途跬步咫尺荆棘扶疎邹夹公谷不式不谟侵官盗位犯禁罹辜指白为赤惊聋骇愚太阳无色残灯有余惟圣作古降圣冀区四子于是折言厚诬仲舒刘向习异牵拘病在膏髓徒信皮肤有汉后叶方漏本书子骏元凯怒气虹舒赤地申力横流展图大年倏臻平原罔虞凜然千祀清风袭予时移事远迷终反初陆淳啖赵信吠空虚黄踵成习夸紫乱朱方孩踣躅作气跼蹐骨干葱弱吻龈乳濡张唇哆齿啊 嚙狂圣姝厉齐鑣并驱虬口蟬腹性稟只且张皇受纳毫芒碎铄孰先而师孰后而徒更唱迭和蝇喧蠓吁噫嘻呜呼有梟者子食母含腴有梟之士为儒贼儒古人有法砥尔之躯少宰司寇木偶尸蛆折劔尺铁土蚀阶除徬徨观者血迸睛枯歲次庚寅假道曹墟秀领参天苦雾 纾寤寐晷刻臍蠶 符惊醒感嗟肃斋造祠酌水投文噫嘻呜呼

祭马当山上水府文 吕 诲

惟神道灵水府雄据长江济物利人载在祀典然风波重阻帆樯交防物货 迁者商人之利也又如冒官贩墨侵渔下民重装以还者贪利之吏也是皆行险徼幸日进千里而不知其径者利汨于中岂计于险易一有倾覆固其宜矣至若舳舻相衔率钟致石逵奉公上固有期防岂得已者又况忠臣义士忘躯报国一言忤时谪斥万里虽塋于鱼腹未厌仇人之欲与夫徇福诚异趣尔意天地设险阻舟楫济不通皆有所谓神据险阻受国封爵济物利人福善祸淫乃其职尔今狂蛟肆怒乘风鼓浪恣其覆没阡危若是果威灵不能制耶彼安济者皆其幸耶海六年中再得罪沿泝上下者四移麾晋阳舟次于是适值风涛几为沦溺三日未霁故具牢醴祷诉所诚神其监焉

诸庙谢雨文 曾 巩

吏之罪大矣一切从事于谨防墨督赋役而已民之所欲不能与所恶不能去自恕以窃食不知其可媿安能使陰阳和风雨时乎故若巩者任职于外六年于兹而无歲不勤于请雨赖天之仁鬼神之灵閔人之穷輒赐甘泽以救大旱吏知其幸而已其为酒醴牲饗以报神之赐曷敢不防维神尚终惠之使永有年则神亦无穷有依于人

福州鱣溪祷雨文 曾 巩

嗟呼旱也谁则为之芄芃之稼将槁而萎嗷嗷之众曷望而依为闽属者寇贼之罹逮其既附我土已疲余丑成羣百十睢睢跳浪出没负力乘巘亦有为渠诸偷所推相望碁布未受罽羈室家莫宁遠近以疑我畜以柔亦震以威从有法赏不从系累或扰而序或就繯徽逮歲朔易荡定无遗山林夜行笑语追隨吾人即安含糗而嬉士马亦奋桓桓騑騑天子圣德海邦是绥维此海拜初亦难饥今宇宁矣师征始归今食足矣廩实尚徽若歲大熟如梁如茨如陵如坻自公及私狱无讼系里无盜闚式于永世方始在兹今此大田既硕而齐俾不卒成熟忍为斯神有灵迹国人所祇神有显号天子所跻萎能起之槁能泽之胡能有余斂而不施我用卜日蚤驾以驰即告潭侧尚其听之攘除骄阳腾云曠霓播为甘液霈洒淋漓俾农有秋百物具宜熄偷与争长置刑答人于报事岂有戮思

始定时荐告庙文 张 载

自周衰礼壞秦暴学灭天下不知鬼神之诚继孝之厚致丧祭失节报享失防徂尚浮图可耻之为杂信流俗无稽之论世代浸久习为厥常载私淑祖考遗训圣贤图书歲耻月慙朝憤夕惕比用瞻拜愧汗不容自安窃自去秋以来稍罢无谓节名閭閻俗具一用拜朔之辰移就新荐然而四时正祀尚未讲修礼谓土有田则祭无田则荐祭用四孟荐用仲月载于秩命乃视天子中土当用四仲择日申荐成礼故议自今春二月为始决用四时分至之日举行常仪然尚惧采择之未明括俗之易骇或财用不足或时不得为未免杂用防味燕器参从近事遽尔变创要之所安恭惟考妣恩明尚赐矜享间未尽仍幸稍益改修方歲之初不敢不告惟赐鉴谅幸甚

生擒西蕃鬼章奏告永裕陵祝文 苏 轼

大猷获禽必有指纵之自丰年高廩孰知耘耔之劳憬彼西戎古称右臂自嘉祐末木征扰边至熙寧中董氐方命于赫圣考恭行天诛非贪尺寸之疆蓋为民除蠱贼遂建长久之策不以贼遗子孙而西蕃大首领鬼章首犯南川北连拓拔申命诸将择利而行旋闻偏师无往不剋吏士用命争酬未报之恩圣灵在天难逃不漏之网已于八月戊戌生擒鬼章颺利成擒初无渭水之耻郅支授首聊报谷吉之冤谨当推本圣心益修戎畧务在服近而来遠期于偃革以息民仰冀威神曲垂昭鉴

祷雨社稷四首 苏 轼

噫我侯社我民所恃祭于北墉答陰之义阳亢不反自春徂秋迄冬不雨嗣歲之忧吏民嗷嗷
谨以病告锡之雨雪民敢无报【社神】

神食于社蓋数千年更歷圣王讵莫能迁源深流遠爱民宜厚雨不时应亦神之疾社稷惟神
我神惟人去我不遠宜軫我民【后土】

农民所病春夏之际旧谷告穷新谷未穡其间有麦如喝得凉如行千里弛檐得浆今神何心
恣此雨雪敢求其他尚悯此麦【稷神】

惟神之生稼穡是力瘡身为神尚莫顾惜矧今在天与天同功招呼风云孰敢不从岂惟农田
井竭无水我求于神亦云亟矣【后稷】

祭战马文 路振

咸平中契丹犯高阳關执大将康保裔略河朔而去天子幸魏遣特将王荣以五千骑追之荣
无将材但能走马以驰射为事受命惟怯数日不敢行伺贼渡河而后发贼有剽淄齐者数千
骑尚屯泥沽荣不欲见敌遂以其骑略界河南岸而还昼夜急驰马不秣而道毙者十有四五
天子悯之遣使收瘞焉因作祭文曰房驷之精降为骊骅泉水呀风流沙激庭虎脊孤耸龙媒
鸷狩丹髦晓霞的颢秋星葦方着干宜乘旋鷹嶠肱角起方眦珠明尔其絕塞草荒八月陨霜
毛缩蹄研筋舒脉张兽恶恐噬虬狞欲骧噴沙散沫千里飞雪戎人负紉武士索铁前遮后突
雷动地裂忽挽一而制百终伏撻而授絙戎官劬劬歲入券书蹄 累累通乎鬼驱名驹大
衔尾入塞劳其酋长节以驿俚蜀锦吴绉积如丘陵马归于我也重币入于彼也轻于是络黄
金之羈浴天池之波鼓鬣云衢弄影星河或踞而齧或齶而叱 蚕申禁駟骏何多帝念神物
来经遠道阅之于内殿养之于外阜饮以玉池秣之瑶草穷冬虏尘入我河湟羽书宵飞龙驭
北巡选仗下之名马属阃外之武臣雕戈电烛禁旅星防授以长策帅以全军将士怒兮山可
擘猛马哮兮虎可咋向嚙啖之无勇反迁延而避敌冰霜凄凄介甲而驰不饮不秣载渴载饥
骏马饿死行人嗟咨委天骨于衢路返星精于云雾报主恩之无及齐戎力而何悞生刍致祭
敝帷成礼瘞于崇冈全尔全体马如有神知帝之仁呜呼

諡议

贈尚书右仆射孙奭諡议 宋 祁

博士宋祁议曰仆射清明庄重体柔而用健惕和吸精储为英华在布衣韦带有深沈不器之
韵缓袂弹冠實于王门是时宋兴四十余歲天子上文向学开太平之原薪爇髦士充布台阁
而未有卓然以儒名家仆射由经生博贯前载乃以诗之多识书之知达易之肆而隱春秋之
婉而微礼之肃雍乐之易良参劝讲授为荐绅倡始执据圣道淘汰羣疑斗杓所建遂成寒暑
珩璜所触自然宫征歷官上庠居为时宗既而籍内禁阁踐諫省駁曹之任入进其规出诡其
辞批鳞罔憚职衮无阙在蹇王臣匪躬在說命朝夕纳海惟仆射举之爱莫助之属今上濬明

厥初物色旧老实膺丹书之问进对华光之涂用阶告猷式克膺圣桓荣稽古寬中 论惟仆射有之是以似之及宸幄归道安车税驾天文褒饥士伦嗟挹俸耆而艾以歿元身大君废朝行路相吊賻布所须一出长府密章加等昭飭下泉信乎令终之高显大雅之明哲矣谨按諡法体和居中善问周达曰宣如仆射处躬弥冲在丑忘竞不居物累不为盜憎其让如范宣其慎如子孺能体和矣内治家事外施邦政接士无貌言祝神无媿辞協用通介时其进退能居中矣行成束修节贯华皓终以碩望显升师臣其所荐士皆足以经哲秉猷敷贲皇极逊逮时誉常如不及以年得谢向考终之福生平素守鲜如晨葩信善问矣建白防次百余篇传经见义质圣行遠藏于册府副在家楹推明则董仲舒博洽则刘向其周达矣节惠知行请諡曰宣谨议

张忠定諡议 刘 敞

太常礼院諡故礼部尚书张公曰忠定太子中允直集贤院同判吏部尚书曹刘敞覆议曰尚书布衣之时任侠自善破产以奉賓客而借軀报仇往往过直及读书为文折节受学则爽厉明白务求道直至于策名试吏傲倪奋发思自见于世不令已失时蓋有古贤之风而神宗圣考知人善任使每尽其用虽专防于外而上不疑此其所以感激慷慨能成功名者也夫英伟卓犖之人固自负其材可以意气忠信结而不可以禄位货利取也尚书再在蜀及佗临涖皆朝廷所倚重或兵荒之余而言听计从德泽下流民到于今称之蓋君之图任一则士之报施重不其然欤自宋兴以来且百年言治者甚众其直已以事上尽心以抚下生有荣名死有遗爱者尚书殆无与并焉末年以疾害于朝谒不至大位士君子以为恨今主上甄德念功使有司追赐之諡而曰防方公正安大慮窃以谓无间然矣请从博士之论以充太史之錄谨议

赵僖质諡议 刘 敞

议曰春秋之议视遠物者见其形不见其容听遠声者闻其疾不闻其舒此褒贬之审也少傅公歷事三朝尝列四辅谋谟之益施为之效蓋多有矣然而入则极论出则诡词是以人无闻焉虽推美让德大臣之宜亦其性恭慎然也今太常易名谓之僖质稽类揣称窃以为允谨议

陈执中諡荣灵议 韩 维

执中幸得以公卿子遭世承平因缘一时之言遂至贵显皇祐之末天子以后宫之丧问所以塋祭之礼执中位为上相不能总率羣司考正仪典以承答天问知治丧皇仪非嫔御之礼追册位号于宫闈有嫌建庙用乐逾祖宗旧制执中白而行之曾不愧憚遂使圣朝大典着非礼之举此不忠之大者闺门之内礼分不明夫人正室疎薄自绌庶妾贱人悍逸不制丑声流布行路共知此又治家无足言者夫宰相所当秉道率礼以弼天子正身齐家以仪百官执中不务出此而方杜门深居谢絕賓客曰我无私也我不党也岂不陋哉谨按諡法宠禄光大曰荣不勤成名曰灵执中出入将相以一品就第可谓宠禄光大矣得位行政不为不逢死之日贤士大夫无述焉可谓不勤成名矣请合一法諡曰荣灵

欧阳文忠公諡议 李清臣

太子太师欧阳公归老于其家以疾不起将葬行状上尚书省移太常諡太常会议曰公维圣宋贤臣一世学者之所师法明于道德见于文章究览六经羣史诸子百氏驰骋贯穿述作数十百万言以传先王之遗意斯文卓然自成一家比司马迁扬雄韩愈无所不及而有过之者方天下溺于末习为章句声律之时闻公之风一变为古文咸知趋尚根本使朝廷文明不愧于三代汉唐者太师之功于教化治道为最多如太师真可谓文矣博士李清臣得其议则阅读行状考按諡法曰唐韩愈李翱权德舆孙逖本朝杨亿皆諡文太师固宜以諡吏持众议曰太常官长有曰文则信然不可易也然公平生好谏争当加献为文献无已则忠为文忠众相视曰其如何则又会议曰文献叠犯庙諡固不可忠亦太师之大节太师常参天下政事进言仁宗乞早下诏立皇子使有明名定分以安人心及英宗继体今上即皇帝位两预定策谋有安社稷功和裕内外周旋两官间迄于英宗之视政盖太师天性正直心诚洞达明白无所欺隐不肯曲意顺俗以自求便安好论列是非分别贤不肖不避人之怨诽狙疾亡身履危以为朝廷立事按諡法道德博闻曰文廉方公正曰忠今加忠以丽文宜为当众以状授清臣为諡议清臣曰不改于文而傅之以忠议者之尽也清臣其敢不从遂諡文忠谨议

范忠宣公諡议 邓忠臣

伏惟太常寺定开府仪同三司范纯仁諡议如前议曰諡法云虑国忘家曰忠善闻周达曰宣古之虑国忘家者固尝有焉兼之善闻周达者盖亦鲜矣全是二美得之纯仁太常既易其名博士又为之议移文覆订属于考巧忠臣按纯仁为大臣之子布被脱粟而不以为非都上公之司衮衣绣裳而不以为泰要终原始考实求声歷事五朝坚持一节厚同宗之族犹葛累之茈本根见慢上之人如鹰鹯之逐鸟雀凡言责与官守皆谏行而计从说论嘉谋确乎其不拔令名广誉闇然而日彰在畎亩未尝忘君思饥溺不获由已作尚书解以进如宋璟之为元抗濮园议以闻如师丹之为黄耆临公家之利知无不为得小大之情矜而不喜每思捐身而开策所愿休兵而息民祇如扶危而济倾宁恤跋前而防后又有黄裳之吉而内美言无白圭之玷而外华顷縁秉钧适丁连茹方谗言乱国而明蔡确之无实泊奸党投名而谓大防之可原当众人莫敢言之时在偏州无所用之地义形于色愤发至诚非止救当时正人端士之织罗直欲戒后世乱臣贼子之迷罔徇公忘己为国惜贤兴言嗟叹使人于邑父母之国有时而去股肱之义于是或亏放之江湖忽如草芥纫兰泽畔更甚屈原之患占鰲坐隅已分贾生之死惟天知善惟君知臣适访落之初年讲图旧之新政侧席南望而决浮云之蔽拥节东归而咏零雨其蒙公望益隆恩数弥渥法座想见其风采诏书相望于道涂欲入覲则未能愿养疾者益恳改元三日以不起闻天子于是震悼辍朝赙赠加等告其弟开府仪同三司之府表其墓赐世济忠直之碑人臣哀荣无以尚此古学有训阿衡诂专美乎商君违不忘臧孙将有后于鲁古之遗直今也则亡諡曰忠宣于义为允

宋文鉴卷一百三十五

卷一百三十六

钦定四库全书

宋文鉴卷一百三十六

宋吕祖谦编

行状

冯侍讲行状 宋祁

冯元字道宗年六十三公之先始平人四代祖官广州唐末闕辅乱不敢归而刘氏据南海侨防士人故三世食其禄太祖定广公之祢本刘氏日御国除始为王官授保章正老病免遂占数都内公少嗜学保章君不欲公畴其业使从故仆射孙宣公授五经大义又友博士崔頤正逮冠彊立博览外嗛嗛若不足中敏力甚自经典故训祖袭师承穿穴筵楹皆能驾其說浸防翰为词章默而有沉郁之思出入服褒衣习矩步如大賔祭乡人化其谨至以俚语谚之不忘交游惟乐安孙质吴陆参譙夏侯圭相友善三人皆直谅而材故号四友家贫盛冬无薪燎夜輒市瓶酒与圭对经研推一再酌以自温或达旦不瞑真宗大中祥符元年由进士调临江县尉再朞罢防讲员缺诏冬集吏能明经得自言试可公往应令时谏议大夫谢泌领选精果有风鉴见公儒者嘻笑曰吾闻古治一经至皓首生能尽善也邪对曰达者一以贯之可矣谢奇其对因挾经义疑晦者廷问参诘公条陈详诣言简气愿谢抵掌嗟伏即日闻上授国子监直讲由是名震京师公卿大夫家争欲屈公授道者久之迁廷尉平又兼崇文院检讨其八年程覆俊选公待诏殿中帝读易至泰卦命說其义公既道繇象云云因本君臣感防所以辅相财成者帝悦赐五品服稍亲近之禁中建龙图阁庋藏秘册置学士待制等员为缙绅誉处时用尚书工部郎中李虚已兵部员外郎李行简待制是时公仕资浅故以太子中允充直阁直阁蓋由公始数召入与二李赐清间說易尽上下经帝尝称公誦說通而不泥言外自有余趣非专门一经士也俄改三品服天禧元年以谏议大夫假节使契丹还迁太常丞兼判礼院吏部南曹先是今上在储闈帝欲得肃义长者使之劝学访于宰相时太尉文正公特以公对或者谓公年差少罢不用更用博陵崔遵度四年遵度卒帝即擢公左正言兼太子右谕德代其任它职如旧初文正闻公名而未之职一日召至第先使诸子质经义密视其人淹粹亮恪乃自见之授其老子它日令詣府与执政众试已而为帝言数矣故公之显文正力焉公由孤生挟儒术进出入十余年鍚玉华綬与诸儒献歌颂数得进见两宫所以褒礼赐予尤渥便蕃光明为时宗国器当世休之今上嗣位改尚书工部员外郎升为直学士兼侍讲未几孙宣公亦入露门执经递进公得孙同列以为宠孙得公亦自以知人为多两人提衡讽道上益向学俄兼防灵观副使知通进银台司兼门下封駁事天圣元年判登闻检院明年判国子监三年改礼部郎中五年同知贡举时天下阶计参陪公协力程综片善必録虽钩捶臬平不计其公未几正为学士当是时天子念先帝盛烈裁绩信书为一王吉故貳卿中山刘公筠今资政殿学士

常山宋公绶丞相颍川陈公同领史事而已丞相为开封府浩穰剧三辅乃罢史官诸公亟以公请诏从之书阅两朝论次笔削者众至是褒贬谨严近古风烈矣其十一月燎祭南郊为卤簿使七年召入翰林为学士凡三禁职皆天下选而公兼有且优为之又判尚书都省俄为三班院歲余改吏部郎中八年以国书成进谏议大夫充史馆修撰九年为吏部流内铨兼羣牧使明道元年十月既考室谢享宗庙又为卤簿使以赦令例迁给事中明年耕籍田使任如庙礼俄为庄献庄懿二太后园陵卤簿使前此庄懿之未祔也崩都城右郊公尝假鸿胪防其葬及梓宫之迁斥土沮湿近戚诋公监视亡状十月解翰林学士及侍讲二职出守河阳辞得见上但顿首引咎自请治郡满三年奉计以报防太学官属叩丞相府上书留公柄臣悔欲弗遣公固愿行到部以清静称不作条教今左仆射王沂公自洛师入覲为上言冯某东朝隳老不宜以纖介弃外上亦意合即日驰传诏公景祐二年春二月至日自河阳改礼部侍郎兼翰林侍讲学士兼知审官院复判太常礼院国子监公既还朝自以羽翼旧人身托劝讲宜出入讽议不苟默而已乃献金华五箴弼违告猷词兼婉切上纳其戒优诏答之防上留意雅乐阅经文残缺规创大典夏四月诏公领修乐书俄复为南郊卤簿使管祥源观事明年七月书成上号其书为景祐广乐记特迁戸部赏劳也公素有蹠齮不堪趋拜四年春病寢剧告未滿三月防小瘳公自力造朝未几病复甚气上遯害言语后四月戊戌终于正寢上闻讣震悼以本曹尚书告其柩赙钱三十万絹百匹糲米牢具称之愍赠之所以优加君臣之际深矣公之配夫人周氏封临汝郡无息以兄之子大理评事諱为嗣公歿夫人命諱以衰经经即次于殡东防诏到门问公亲属夫人即表公遗命诏可擢諱卫尉寺丞諱子二人释褐并为将作监主簿防孤厚忠之恩乃如是是其德已侈大哉公自褫巾至捐馆进阶及勲各六诏爵五封戸五加而再实其食如今署焉志闲素恬于仕进无表襮之飾虽当路诸公率贺吊一与众往异时不造也门无杂賓惟经生朔望承问及縉绅道义交数人而已接士以礼虽新进后世与之均终日谈便便惟谨无戏言惰色是以受诏八主戎客于都亭馆由慎恪以得之不呼僧及道士尝执亲丧自括发至祥练皆案礼变服未始为世之所为斋荐者惟卒哭后遇祭日与数门生诵說孝经而已罕语浮屠氏亦不诵言排訾之熏蒿禳可以动气焰者皆不动近不问家产增损昼治官事夜还读书 御亦简其面故能多识博练自台阁文书故新品式丛伙纷庞有所咨访者咸能记之太学禁阁容巨三局阅二十年仍其任本不愆不忘故也尤精易及扬雄方部学初公七歲母夫人令授易是夕梦公吞紺莲夫人旦而抚公曰儿善读此后必贵显真宗果以识拔晚年愈刻志率三日一读又欲为子云诸首作章句且患宋 陆积范叔明宋惟干漫漶舛驰思尽黜之最后得唐王涯注以为差近先作释文一篇欲遂因王說而补正之亦终不果公尝预注先帝集同修卤簿记拔后汉志孟子及律并义疏采防是正多得其真同修玉牒分撰国朝防要未克就生平著述无编次家人搜攬得数百篇清致平粹及在禁署益尔雅务为温纯而采加焉居三城作诗百余章推已指物旷而不怨有雅人余风性寬厚多恕当官下未尝以罪平镌吏吏亦畏其明而安其仁乐道人之善好与人为善无议事不肯自意出大者荐之二府小者与其属联请类多不可纪公一无建白者其遠名若此然内刚有守不流于众初善音者取上党黍纵累为尺因裁十二律以献遂改大乐钟石以合其私老师宿工者首防不敢议后有建言其非者上未有以决遣中人即太常下舍问公新乐以纵黍定尺宁有非邪公即撻班固律历志唐令两說付中人因对古者横黍度寸今以纵乱横其法非是中人驰入明日上坐迹英阁语公曰尚考正大乐患其寢高而急今也下而缓二者不得其中失在律卿言是矣因出横黍新尺示羣臣比纵尺差二寸一分而弱以校衡斗皆不讐当是时微公言几

无发其谬者假有之果且不能取信于上俾曰仁人之言固博而利欤公前歿三日属于一二僚执曰吾仕愿素足今无一私以于县官惟是窳窳累诸君已而得遗礼之文谆谆纳忠讫无它语用是中外尤痛惜之分友陇西李公淑敕故吏相諫以终事呜呼公有佐王之材不自显虽持囊珥笔在省户为名命训辞所出裁十二三使公当其而稍自崖异不难于进益发素蕴幸而十四五且次入衡弼不为婆娑连蹇如今章章矣虽然命有屈于公公无不慊于道使素防清埃奋厉无穷薄夫敦夸夫惧百世之后呻吟想风者以辈鲁臧文仲汉贾谊董仲舒此彼相易宁有失得间邪某曩以胄筵仪絶刊缀音典皆为公属及此绪训又参闻之故公治行之全颇获详究今日月有期矣官在三品法当得諡谨用第述上于有司节諡受名请遵故实谨状

张文定公行状 宋 祁

张咏字复之年七十惟公禀尊严之气疑隱正之量粤在羈贯不偕儿曹嶷然志向高自标置就外传即览羣经书必味于义根学乃知于言选家贫无以本业往往手疏坟史每有属綴輒据庭树槁枝而瞑苟不终篇未尝就舍砖礫若多节默表大厦之材居然晚器弗示良工之朴太原王搏名知人见公 然异之独谓公曰唐魏文公本生此乡故老有言后五百年复出一佳士元精回复祭酒当之矣公谢不敢当兴国四年始游邺下与故上谷寇公准推轂引重时属乡里命秀方国试言府将雅钦公名议为举首夙儒张覃者恟恟有行疏略少文公即以檄谒府盛称其长覃于得荐公为之下彙茅有吉爵砥相先让夷之风一变河朔明年进士及第释褐大理评事知鄂州崇阳尤厉风迹大江之南民裕文敝囚以手而上下狱为人而重轻公防知其状痛防以法精力于职撻伏如神洗其楔薄镇之忠厚吏乐其职多一笑而归休民协攸居或减年而从役就改将作监丞著作佐郎解秩授太子中允闕掌麟州军事夏台弗精西戎方强公缮起亭鄣精明防火坐賛叔敖秉羽之荣多参嫖姚穿土之乐伐谋取胜西鄙以安瑞拱纪元天田躬籍转秘书丞明年充礼部考试官已事复倅相州一惧之年始为亲解百斤之续终以恳辞乞董濮上市征以便迎养诏可其奏月余召赐五品服知浚仪县俄为荆湖北路转运使事不谗上世咨其清劾罢太守奸赃疲堞者十数人悉条所部废格于敝者百余事稜威所振吏皆股弁察防使上其理状玺书褒美三年迁太常为郎中再旬乘驿赴覲加锡金紫翌日迁虞部为郎中再旬授枢密直学士赐钱五十万判银台丞进司门下封駁事兼三班院河东大将张永德小校犯法因笞而死诏按其罪公即封还制书白上曰永德为国牙爪居天下劲兵处若以一部曲摧辱王帅臣恐有轻上之心不纳因不闕银台而下书譙让未几果有营兵胁讼军候者公复争前事上輒优容谢之防贼顺縁间坤维摇乱偏师数万鼓行而西太宗以为潢池防赤子之兵荆棘生大军之后畴咨上辍崇简守臣叅豫武功苏易简白上曰某甫可属大事当一面若奉将威命降谕剧贼陛下高枕永无西顾之忧矣乃命公知益州揆日占谢赐白金一百四十斤鸿卿出郊不复内御子顔引道初无辨严朝家方以大师未集留之半歲公潜簿所赐上还长府其秋遂诏赴部公终不复言至道二年改兵部犹为郎中防丁新昌郡太夫人之丧恩诏夺服阳秋之义不以家事为辞礼经所执亦推顺变之人真考嗣厯迹臣均霈即拜諫议大夫归朝迁给事中户部使七旬拜御史丞咸平二年知贡举杜絶书谒时称得人夏改工部侍郎知杭州五年移京兆明年转刑部复为枢密直学士再知益州寻加吏部犹为侍郎景德三年罢归领三班登闻检院奉朝请先时生瘡于脑至是弗损家第赐告

环中造适移状言上酷请外藩寻知金陵兼江南安抚使岱宗成礼改尚书左丞升人以秩满愿留即拜工部汾睢饮至又进礼部皆为尚书疾剧还台求访高手荐剡需头之奏愿遂角巾之游魏舒之先行后言人无知其去位平津之何恙不已诏益勉于存神猗违半年必于得谢上不获已出公知陈州以大中祥符八年八月一日遂终于理下享年七十呜呼景命弗究宗工其萎知仁均哀殲我何赎邦人改祠而为讳道路举音以过丧真宗闻讣震嗟追赠尚书左仆射以天禧四年十一月二十七日权窆于陈州宛丘县孝悌乡谢村焉从宜也公始娶夫人唐氏卒继室以太原郡夫人王氏即河阳节度使显之女允执妇道以佐君子后公三年而歿子从质以父任累迁至卫尉丞居公之丧一月以毁而夭女一人适故内相王公禹偁子嘉佑母弟诜以公延赏今为虞部员外郎孙四人曰约曰综曰绰曰绅咸以忠厚世其家公偕至正奉大夫勲上柱国爵开国公食封三千七百户实户肆伯其大较也公姿宇爽迈谋谟沉敏道架俗表气笼霄极任节挟已然诺不窕不撝如玉如莹修词立诚博见强志部书兼两廩益成陰佐郡被边遭时右武入螳封而试马回策若萦张狸步以射侯舍矢如破总物纖密絕人遠甚及夫司封駁则详言粹仪有任隗之沈正总台宪则摧奸触佞有傅咸之刚简治益部也宿师屯结县官乏食椽史搏手狂狡启心公乃贱售盆盐翔贵困米 迁钟豆讽告乡县民或妄言沮公公斩之以徇自是见粮大集战士倍气矣自不逞挺乱重城晏闭主师王继恩上官正顿师入保理根不进坐失脱免之拒居若贾胡之留公以为将不亲行众不可使乃劝正自当一队以贾羣勇正许诺行有日矣公虑其不进于是椎牛宿帐具出饯之礼中坐酒酣亲举属军尉曰尔曹俱有亲弱在东防国恩厚恐无以塞责此行当直捣寇垒尽其嚙类平定之日东向以报目见朝廷举万年之觞岂不快耶若犹老师逸囚疲民旷日即此地还为汝死处也正由此车行深入诡道兼进殊死鏖战尽俘凯旋公乃出车劳勤撝金大防以次论获先命行赏皆伏公气决不敢迎视继恩帐下卒縋城夜逸吏执以告公恶与继恩不叶即命繫投智井一府无知者先时劫掠之际诬染尤众胁从有状归诉无阶各保营壁共怀猜貳公以为鹿不择陰既亡生路虫入其腹惧益厉阶亟下符移镌說魁宿宥其枝党纵归田里譬以大恩讫无敢桀及再任也属六羸南牧灵旗薄伐公虑遠夷为变欲出奇以胜之因取盗贼之尤无状者磔死于市凜然人望遂臻靖嘉每吏牒便文久不得判公率尔署决人皆厌伏罚既值罪案无庾情蜀中喜事者论次其词总为诫民集镂墨传布虽张敞之为京兆时时越法纵舍黄霸之守颍川人人咸知上意无以过之牧余杭也遭民荐饥方蜡不启稻蟹无种原田若艺民挟盐利以冒公禁者日数百辈公一切答遣不徇彝法逻戍人启曰法乱如是人将安禁公劳之曰余杭十万户饥者七八弗挟盐利无复生意若暴禁之彼将圜视衡击以扰居者则为祸大矣尔曹第忍之俟其歲定则太守复以三尺律从事矣是年虽歉人无从命者富家子与婿分财不协诣府廷辩婿曰彼先子有貽命婿七子三因出遗札子不能举其契公索酒酹地曰彼父智人也当死之日子方冲孺托养于婿苟子有七分之约则亦死于婿手矣今当七分归子三分归婿于是二人号恸以为神明公之操决率是类也原其遇二圣也以功名自任故力与命偕显入座也以方格见信故言与行危本乎直清贯以忠恕无乞灵徼福无人非鬼责履重刚不险临大节不夺葵藿弗采于猛兽山川宁舍于骅角若夫安世之恨谢公归之灭私大有之文明小雅之恺悌公皆兼有其美惜其未极柄用遽愆腴理上欲为相者数矣天之不憖也悲夫公雅好着文深切惊迈以不偶俗尚自号乖崖公尤善诗笔必覈情理故重次薛能诗序之曰放言既奇意在言外议者以公自道也生平论著仲氏诂集之成十卷以行于代内外归之日无搢膺之妾无杂吊之賓终齐事而乃瞑取禅书而颂德汉廷诸老恨王骏之不侯天下之人

为陇西而流涕斯非遗爱遗直立功立言之极欤敢抚令猷以须史阙谨状

宋文鉴卷一百三十六

卷一百三十七

钦定四库全书

宋文鉴卷一百三十七

宋吕祖谦编

行状

司马温公行状 苏轼

曾祖政赠太子太保曾祖母薛氏赠温国太夫人祖炫试秘书省校书郎知耀州富平县事赠太子太傅祖母皇甫氏赠温国太夫人父池尚书吏部郎中充天章阁待制赠太师追封温国公母聂氏赠温国太夫人公讳光字君实其先河内人晋安平献王孚之后王之裔孙征东大将军阳始塋今陝州夏县涑水乡子孙因家焉自高祖曾祖皆以五代衰乱不仕富平府君始举进士没于县令皆以气节闻于乡里而天章公以文学行义事真宗仁宗为转运使御史知杂事三司副使歷知凤翔河中同杭號晋六州以清直仁厚闻于天下号称一时名臣公自儿童凜然如成人七歲闻讲左氏春秋大爱之退为家人讲即了其大义自是手不释书至不知饥渴寒暑年十五书无所不通文词醇深有西汉风天章公当任子次及公公推与二从兄然后受补郊社斋郎再奏将作监主簿年二十举进士甲科改奉礼郎以天章公在杭辞所迁官求签书苏州判官事以便亲许之未上丁太夫人忧未除丁天章公忧执丧累年毁瘠如礼服除签书武成军判官事改大理评事为国子直讲迁本寺丞故相庞籍名知人始与天章公游见公而奇之及是枢密副使荐公召试馆阁校勘同知太常礼院中官麦允言死诏以允言有军功特纠鹵簿公言孔子不以名器假人繁纓以朝且犹不可允言近习之臣非有元勲大劳而赠以三公之官给以一品鹵簿其为繁纓不亦大乎故相夏竦卒诏赐諡文正公言諡之美者极于文正竦何人可以当此书再上改諡文庄迁殿中丞除史馆检讨修日歷改集贤校理庞籍为郢州徙并州皆辟公通判州事公感籍知己为尽力时赵元昊始臣河东贫甚官苦贵余而民疲于遠输麟州窟野河西多良田皆故汉地公私杂耕天圣中始禁田河西者虜乃得稍蚕食其地俯窥麟州为河东忧籍请公按视公为画五策宜因州中旧兵益禁兵三千厢兵五百筑二堡河西可使堡外三十里虜不敢田则州西六十里无虜矣募民有能耕麟州闲田者复其税役十五年能耕窟野河西者长复之耕者必众官虽无所得而余自贱可以渐纾河东之民籍移麟州如公言而兵官郭思勇且狂夜开城门引千余人渡河载酒食不为战备遇敌死之议者归罪于籍罢节度使知青州公守關三上书乞独坐其事不报籍初不以此望公而公深以自咎籍既没升堂拜其妻如母抚其子如昆弟时人两贤之改太常博士祠部员外郎直秘阁判吏部南曹迁开封府推官赐五品服交趾贡异兽谓之麟公言真伪不可知使其真非自然而至不足为瑞若伪为遠夷笑愿厚赐其使而还其兽因奏赋以讽迂度支员外郎判句院擢修起居注五辞而后受判礼部有司奏六月朔日当食公言故事食不满分或京师

不见皆贺臣以为日食四方见京师不见天意人君为陰邪所蔽天下皆知而朝廷独不知其为灾当益甚皆不当贺诏从之后遂以为常迁起居舍人同知諫院苏辙直言策入第四等而考官以为不当收公言轼于同科四人中言最切直有爱君忧国之心不可不收时宰相亦以为当黜仁宗不许曰求直言以直弃之天下其谓朕何公遂与諫官王陶同上疏愿为宗庙社稷自重却罢燕饮安养神气后宫嫔御进见有度左右小臣赐予有节厚味腊毒无益奉养者皆不宜数御上皆纳之初至和三年仁宗始不豫国嗣未立天下寒心而不敢言惟諫官范镇首发其议公时为并州通判闻而继之上疏言礼太宗无子则小宗为之后为之后者为之子也愿陛下择宗室贤者使摄储贰以待皇嗣之生退居藩服不然则典宿卫尹京邑亦足以系天下之望疏三上其一留中其二付中书公又与镇书此大事不言则已言一出岂可复反愿公以死争之于是镇言之益力及公为諫官复上疏且面言臣昔为并州通判所上三章愿陛下果断而力行之时仁宗简默不言虽执政奏事首肯而已闻公言沈思久之曰得非欲选宗室为继嗣者乎此忠臣之言但人不敢及耳公曰臣言此自谓必死不意陛下开纳上曰此何害古今皆有之因令公以所言付中书公曰不可愿陛下自以意喻宰相是日公复言江淮盐事诣中书白之宰相韩琦问公今日复何所言公默计此大事不可不使琦知思所以广上意者即曰所言宗庙社稷大计也琦喻意不复言后十余日有防令公与御史里行陈洙同详定行户利害洙与公屏语曰日者大飡明堂韩公摄太尉洙为监察公从容谓洙曰君与司马君实善君实近建言立嗣事恨不以所言送中书欲发此义无自发之行户利害非所以烦公也洙见公达此意耳时嘉祐六年闰八月也至九月公复上疏面言臣向者进說陛下欣然无难意谓即行矣今寂无所闻此必有小人言陛下春秋鼎盛子孙当千亿何遽为此不祥之事小人无远虑特欲仓猝之际援立其所厚善者耳唐自文宗以后立嗣皆出于左右之意至有称定策国老门生天子者此祸岂可胜言哉上大感悟曰送中书公至中书见琦等曰诸公不及今定议异日夜半禁中出寸纸以某人为嗣天下莫敢违琦等皆唯唯曰敢不尽力后月余诏英宗判宗正寺固辞不就职明年遂立为皇太子称疾不入公复上疏言凡人争丝毫之利至相夺今皇子辞不赀之富至三百余日不受命其贤于人远矣有讥闻之足以知陛下之圣能为天下得人然臣闻父召无诺君命召不俟驾而行使者受命不受辞皇子不当辞避使者不当徒反凡召皇子内臣皆乞责降且以臣子大义责皇子宜必入英宗遂受命充国公主下嫁李玮以骄恣闻公上疏言太宗时姚坦为兗王翊善有过必諫左右教王诈疾逾月太宗召王乳母入问起居状乳母曰王无疾以姚坦故郁郁成疾耳太宗怒曰王年少不知为此汝辈教之杖乳母数十召坦慰勉之齐国献穆大长公主太宗之子真宗之妹陛下之姑而谦恭率礼天下称其贤愿陛下教子以太宗为法公主事夫以献穆为法已而公主不安于李氏诏玮出知卫州公主入居禁中而玮母扬归其兄璋散遣其家人公言陛下追念章懿太后故使玮尚主今乃母子离析家事流落陛下独无雨露之感凄惻之心乎玮既责降公主亦不得无罪上感悟诏公主降封沂国待李氏恩礼不衰判检院权州国子监除知制诰力辞至八九改受天章阁待制兼侍讲赐三品服仍知諫院上疏言经略安抚使以便宜从事出于兵兴权制非永世法及将相大臣典州者多以贵倨自持凌忽转运使使不得举职朝廷务省事专行姑息之政至于胥史讙哗而逐御史中丞輦官悖慢而退宰相卫士凶逆而狱不穷奸泽加于旧军人詈三司使而法官以为非犯塔级于用法疑有余其一夫流言于道路而为之变法推恩多矣皆陵迟之渐不可以不正充媛董氏薨追赠婉仪又赠淑妃辍朝成服百官奉慰定諡行册礼塋给卤簿公言董氏秩本微病革之日方拜充媛古者妇人无諡近制惟皇后有之卤簿本

以赏军功未尝施于妇人惟唐平阳公主有举兵佐高祖定天下之功乃得给至韦庶人始令妃主葬日皆给鼓吹非令典不足法时有司新定后宫封赠法皇后与妃皆赠三代公言别嫌明微妃不当与后同袁盎引却慎夫人坐正为此耳天圣亲郊太妃止赠二代而况妃乎知嘉祐八年贡举仁宗崩英宗以哀毁致疾慈圣光献太后同听政公首上疏言章献明肃太后保佑先帝进贤退奸有大功于赵氏特以亲用外戚小人故负谤天下今太后初摄大政大臣忠厚如王曾清纯如张知白刚正如鲁宗道质直如薛奎者当信用之鄙猥如马季良谗谄如罗崇勲者当疎遠之则天下服又上疏英宗言汉宣帝为昭帝后终不追尊卫太子史皇孙光武起布衣得天下自以为元帝后亦不追尊钜鹿都尉南顿君惟哀安桓灵皆自旁亲入继大统追尊其父祖天下非之愿以为戒时公所得仁宗遗赐珠金直百余万率同列三上章言国有大忧中外窘乏不可专用干兴故事若遗赐不可辞则宜许侍从以上进金钱佐山陵费不许公乃以所得珠为谏院公使金钱以遗其舅氏义不藏于家英宗疾既平皇太后还政公上疏言治身莫先于孝治国莫先于公其言切至皆母子间人所难言者时有司立法皇太后有所取用有司奏覆得御宝乃供公极论以为不可当直下合同司移所属立供如上所取已乃具数奏太后以防矫伪曹佾除使相两府皆迁公言佾无功而得使相陛下以慰母心耳今两府皆迁无名若以还政为功则宿卫将帅内侍小臣必有觊望已而都知任守忠等皆迁公复争之因论守忠大奸陛下为皇子非守忠意沮壞大策离间百端赖先帝不听及陛下嗣位反覆革面交搆两宫国之大贼人之巨蠹乞斩于都市以谢天下诏以守忠为节度副使蕲州安置天下快之时有诏陝西刺民兵号义勇公上疏极论其害云康定庆历间籍陝西民为乡弓手已而刺为保防指挥民被其毒兵终不可用遇敌先北正兵随之每致崩溃县官知其坐食无用汰遣归农而惰游之人不能复反南亩强者为盗弱者转死父老至今流涕也今义勇何以异此章六上不从乞罢諫官不许王广渊除直集贤殿公言广渊奸邪不可近昔汉景帝为太子召上左右饮卫綰独称疾不行即帝位待綰有加周世宗镇澶渊张美为三司吏掌州之钱谷世宗私有求假美悉力应之及即位薄其为人不用今广渊当仁宗之世私自结于陛下岂忠臣哉愿黜之以厉天下执政建言濮安懿王德盛位隆宜有尊礼诏太常礼院与两制议翰林学士王珪等相顾不敢先公独奋笔立议曰为之后者为之子不敢复顾其私亲今日所以崇奉濮安懿王典礼宜一准先朝封赠期亲尊属故事高官大爵极其尊荣议成珪即敕吏以公手藁为案至今存焉时中外汹汹御史吕海博尧俞范纯仁吕大防赵鼎瞻等皆争之相继降黜公上疏乞留之不可则乞与之皆贬初西戎遣使致祭而延州指使高宜押伴傲其使者侮其国主使者诉于朝廷公与吕海乞加宜罪不从明年西戎犯边杀略吏士赵滋为雄州专以强悍治边公亦论其不可至是契丹之民有捕鱼界河伐柳白沟之南者朝廷以知雄州李中祐为不材选将伐之公言国家当戎狄附顺时好与之计较末节及其桀傲又从而姑息之近者西戎之祸生于高宜北狄之隙起于赵滋朝廷方贤此二人故边臣皆以生事为能今若选将代中祐则来者必以滋为法而以中祐为戒渐不可长宜敕边吏疆场细故徐以文檄往反若轻以矢刃相加者坐之京师大水公上疏论三事皆尽言无所隐讳除龙图阁直学士判流内铨改右谏议大夫知治平四年贡举神宗即位首擢公为翰林学士公力辞不许上面谕公古之君子或学而不文或文而不学惟董仲舒扬雄兼之卿有文学何辞焉公曰臣不能为四六上曰如两汉制诏可也公曰本朝故事不可上曰卿能举进士取高等而云不能四六何也公趋出上遣内臣至阁门彊公受告拜而不受趣公入谢曰上坐以待公公入至廷中以告置公懷中不得已乃受遂为御史中丞初中丞王陶论宰相不押常朝班为不臣宰相不从陶

争之力遂罢公既继之言宰相不押班细故也陶言之过然爱礼存羊则不可已自顷宰相权重今陶复以言宰相罢则中丞不可复为臣愿俟宰相押班然后就职上曰可陶既出知陈州谢章诋宰相不已执政议再贬陶公言陶诚可罪然陛下欲广言语屈已受陶而宰相独不能容乎乃已公上疏论修心之要三曰仁曰明曰武治国之要三曰官人曰信赏曰必罚其说甚备且曰臣昔为谏官即以此六言献仁宗其后以献英宗今以献陛下平生力学所得尽在此矣公在英宗时与吕海同论祖宗之制勾当御药院常用供奉官以下至内殿崇班则出近岁居此位者皆暗理官资食其廩给非祖宗大意又故事年未五十不得为内侍省押班今除张茂则止四十八不可至是又言之因论高居简奸邪乞加遽窜章五上上为尽罢寄资内臣居简亦补外未几复留陈承礼刘有方二人公复争之又言近者王中正往陕西知泾州刘涣等谄事中正而鄜延钤辖吴舜臣违失其意已而涣等进擢舜臣降黜权归中正谤归陛下是去一居简得一居简上手诏问公所从知公曰臣得之賔客非一人言事之有无惟陛下知之若无臣不敢避妄言之罪万一有之不可不察诏用官邸直省官郭昭选等四人为阁门祗候公言国初草创天步尚艰故即位之始必以左右旧人为腹心耳目谓之随龙非平日法也阁门祗候在文臣为馆职岂可使厮役为之英宗山陵公为仪仗使赐金五十两银合三百两三上章辞从之边吏上言西戎步将嵬名山欲以横山之众取谅祚以降诏边臣招纳其众公上疏极论以为名山之众未必能制谅祚幸而胜之灭一谅祚生一谅祚何利之有若其不胜必引众归我不知何以待之臣恐朝廷不独失信于谅祚又将失信于名山若名山余众尚多还北不可入南不受穷无所归必将突据边城以救其命陛下独不见侯景之事乎上不听遣将种諤发兵迎之取绥州费六十万万西方用兵盖自是始矣兼翰林侍读学士登州有不成婚妇谋杀其夫伤而不死者吏疑问即承知州事许遵谏之有司当妇绞而诏贷之遵上议准律因犯杀伤而自首者得免所因之罪妇当减二等不当绞诏公与王安石议之安石是遵公言谋杀犹故杀也皆一事不可分若谋为所因与杀为二则故与杀亦可为二邪自宰相文彦博以下皆附公议然卒用安石言至今天下非之权知审官院百官上尊号公当答诏上疏言先帝亲郊不受尊号天下莫不称颂末年有建言者国家与契丹有往来书信彼有尊号而我独无以为深耻于是羣臣复以非时上尊号昔汉文帝时单于自称天地所生日月所置匈奴大单于不闻文帝复为大名以加之也愿陛下追用先帝本意不受此名上大悦手诏答公非卿朕不闻此言善为答词使中外晓然知朕至诚非欺众邀名者遂终身不复受尊号执政以河朔灾伤国用不足乞今岁亲郊两府不赐金帛送学士院取防公言两府所赐以匹两计止二万未足以救灾宜自文臣两省武臣宗室敕史以上皆减半公与学士王珪王安石同对公言救灾节用宜自贵近始可听两府辞赐安石曰常袞辞赐饌时议以为袞自知不能当辞位不当辞禄且国用不足非当今之急务也公曰袞辞禄犹贤于持禄固位者国用不足真急务安石言非是安石曰不足者以未得善理财者故也公曰善理财者不过头防箕敛以尽民财民穷为盗非国之福安石曰不然善理财者不加赋而上用足公曰天下安有此理天地所生财货百物止有此数不在民则在官譬如雨泽夏涝则秋旱不加赋而上用足不过设法阴夺民利其害甚于加赋此乃桑羊欺汉武帝之言太史公书之以见武帝不明耳至其末年盗贼蜂起几至于乱若武帝不悔祸昭帝不变法则汉几亡争议不已王珪进曰救灾节用宜自贵近始司马光言是也然所费无几恐伤国体王安石言亦是惟明主裁择上曰朕意与光同然姑以不允答之防安石当制遂引常袞事责两府亦不复辞兼史馆修撰上问公可为谏官者公荐吕海海以天章阁待制知谏院诏公与张茂则同相视二股河及土堤利害公用都水监丞

宋昌言策乞于二股之西置土堤约水东流若东流日深北流自浅薪刍渐备乃塞其北放出御河胡芦河下流以纾恩冀深瀛以西之患时议者多不同公于上前反覆论难甚苦卒从之后皆如公言赐诏獎谕王安石始为政创立制置三司条例司建为青苗助役水利均输之政置提举官四十余员行其法于天下谓之新法公上疏逆陈其利害曰后当如是行之十余年无一不如公言者天下传诵以为公真宰相虽田父野老皆号公司马相公而妇人孺子知其为君实也迺英进读至萧何曹参事公曰参不变何法得守成之道故孝惠高后时天下晏然衣食滋殖上曰汉常守萧何之法不变可乎公曰何独汉也使三代之君常守禹汤文武之法虽至今存可也武王克商曰乃反商政政由旧然则虽周亦用商政也书曰无作聪明乱旧章汉武帝用张汤言取高帝法纷更之盗贼半天下元帝改宣帝之政而汉始衰由此言之祖宗之法不可变也后数日吕惠卿进讲因言先王之法有一年变者正月始和布法象魏是也有五年一变者巡狩考制度是也有三十年一变者刑罚世轻世重是也有百年不变者父慈子孝兄友弟恭是也前日光言非是其意以讽朝廷且讥臣为条例司官耳上问公惠卿言何如公曰布法象魏布旧法也何名为变若四孟月朔属民读法为时变月变耶诸侯有变礼易乐者王巡守则诛之王不自变也刑新国用轻典乱国用重典平国用中典是为世轻世重非变也且治天下譬如居室敝则修之非大壊不更造也大壊而更造非得良匠美材不成今二者皆无有臣恐风雨之不庇也公卿侍从皆在此愿陛下问之三司使掌天下财不才而黜可也不可使两府侵其事今为制置三司条例司何也宰相以道佐人主安用例苟用例而已则胥史足矣今为看详中书条例司何也惠卿不能对则诋公曰光为侍从何不言言而不从何不去公作而答曰是臣之罪也上曰相与论是非耳何至是讲毕赐坐户外将出上命徙坐户内左右皆避去上曰朝廷每更一事举朝汹汹何也王珪曰臣疏贱在阙门之外朝廷之事不能尽知借使闻之道路又不知其虚实也上曰闻则言之公曰青苗出息平民为之尚能以蚕食下户至饥寒流离况县官法度之威乎惠卿曰青苗法愿取则与之不愿不彊也公曰愚民知取债之利不知还债之害非独县官不彊富民亦不彊也臣闻作法于凉其犹贪作法于贪将若之何昔太宗平河东立和权法时米斗十余钱草束八钱民乐与官为市其后物贵而和籴不解遂为河东世世患臣恐异日之青苗犹可兼之和籴也上曰陝西行之久矣民不以为病公曰臣陝西人也见其病不见其利朝廷初不许也而有司尚能以病民况立法许之乎上曰坐仓籴米何如坐者皆起曰不便上已罢之幸甚上曰未罢也公曰京师有七年之储而钱常乏若坐仓钱益乏米益陈奈何惠卿曰坐仓得米百万斛则省东南百万之漕以其钱供京师何患无钱公曰东南钱荒而米狼戾今不籴米而漕钱弃其有余取其所无农末皆病矣侍讲吴申起曰光言至论也公曰此皆细事不足烦人主但当择人而任之有功则赏有罪则罚此则陛下职也上曰然文王罔攸兼于庶言庶狱庶慎惟有司之牧夫公趋出上曰卿得无以惠卿之言不乐乎公曰不敢韩琦上疏论青苗之害上感悟欲罢其法安石称疾求去防拜公枢密副使公上章力辞至六七日上诚能罢制置条例司追还提举官不行青苗助役等法虽不用臣臣受赐多矣不然终不敢受命上遣人谓公枢密兵事也官各有职不当以他事为辞公言臣未受命则犹侍从也于事无可言者安石起视事青苗法卒不罢公亦卒不受命则以书喻安石三往反开喻苦至犹幸安石之听而改也且曰巧言令色鲜矣仁彼忠信之士于今当路时虽齟齬可憎后必徐得其力谄谀之人于今诚有顺适之快一旦失势必有所卖公自售者意谓吕惠卿对賓客輒指言之曰覆王氏者必惠卿也小人本以利合势倾利移何所不至其后六年而惠卿叛安石上书告其罪苟可以覆王氏者靡不为也由是天下服公先知

公求补外上犹欲用公公不可以端明殿学士出知永兴军朝辞进对犹乞免本路青苗助役宣抚使下令分义勇四番欲以更戍边选诸军骁勇募间里恶少为奇兵调民为干粮皱饭虽内郡不被边皆修城池楼防如边郡且遣兵就粮长安河中邠三辅骚然公上疏极言方凶歲公私困不可举事而永兴一路城池楼防皆不急干粮皱饭昔常造后无用腐弃之宣抚司令臣皆未敢从若乏军兴臣坐之于是一路独得免顷之诏移知许州不赴遂乞判西京留司御史台以归自是絶口不论事以祀明堂恩加上柱国至熙宁七年上以天下旱蝗诏求直言公读诏泣下欲默不忍乃复陈六事一青苗二免役三市易四边事五保甲六水利此尤病民也宜先罢又以书责宰相吴充天子仁圣如此而公不言何也元丰五年公忽得语涩疾自疑当中风乃豫作遗表大略如六事加详尽感防亲书緘封置卧内且死当以授所善范纯仁范祖禹使上之凡居洛十五年再任留司御史台四任提举崇福宫官制行改太中大夫加资政殿学士神宗崩公赴阙临卫士见公入皆以手加额曰此司马相公也民遮道呼曰公无归洛留相天子活百姓所在数千人聚观之公惧防放辞谢遂径归洛太皇太后闻之诘问主者遣使劳公问所当先者公言近歲士大夫以言为讳闻阁愁若于下而上不知明主忧懃于上而下无所诉此罪在羣臣而愚民无知归怨先帝宜下诏首开言路从之下诏榜朝堂而当时有不欲者于诏语中设六事以禁切言者曰若陰有所怀犯非其分或扇摇机事之重或迎合已行之令上以观望朝廷之意以侥幸希进下以感流俗之情以干取虚誉若此者必罚无赦太皇太后封诏草以问公公曰此非求谏乃拒谏也人臣惟不言言则入六事矣时太府少卿宋彭年水部员外郎王谔皆应诏言事有欲借此二人以征天下言者皆以非职而言赎铜三十斤公具论其情且请改赐诏书行之天下从之于是四方吏民言新法不便者数千人公方草具所当行者而太皇太后已直散遣修京城役夫罢减皇城内覘者止御前工作出近侍之无状者三十余人戒敕中外无敢苛刻暴敛废导洛司物货场及民所养户马寬保马限皆从中出大臣不与公上疏谢当今急务陛下略已行之矣小臣稽慢罪当万死诏除公知陈州且过阙入见使者劳问相望于道至则拜门下侍郎公力辞不许数赐手诏先帝新弃天下天子冲幼此何时而君辞位耶公不敢复辞以覃恩迁通议大夫初神宗皇帝以英伟絶人之资励精求治凜凜乎汉宣帝唐太宗之上矣而宰相王安石用心过当急于功利小人得乘间而入吕惠卿之流以此得志后者慕之争先相高而天下病矣先帝明圣独觉其非出安石金陵天下欣然意法必变虽安石亦自悔恨其去而复用也欲稍自改而惠卿之流恐法变身危持之不肯改然先帝终疑之遂退安石八年不复召而惠卿亦再逐不用元丰之末天下多故及二圣嗣位日夜引领以观新政而进說者以为三年无改于父之道欲稍损其甚者毛举数事以塞人言公慨然争之曰先帝之法其善者虽百世不可变也若安石惠卿等所建为天下害非先帝本意者改之当如救焚拯溺犹恐不及昔汉文帝除肉刑斩右趾者弃市笞五百者多死景帝元年即改之武帝作盐铁酤均输等法昭帝罢之唐代宗纵宦官公求赂遗置客省拘滯四方之人德宗立未三月罢之德宗晚年为宫市五方小儿暴横盐铁月进羨余顺宗即位罢之当时悦服后世称颂未有或非之者也况太皇太后以母改子非子改父众议乃定公以为治乱之机在于用人邪正一分则消长之势自定每论事必以人物为先凡所进退皆天下所谓当然者然后朝廷清明人主始得闻天下利害之实遂罢保甲团教依义勇法歲一阅保马不复买见在者还监牧给诸军废市易法所储物皆鬻之不取息而民所欠钱皆除其息京东铸钱河北江西福建湖南盐及福建茶法皆复其旧独川陝茶以边用未即罢遣使相视去其甚者户章左右曹钱谷皆领之尚书凡昔之三司使事有散五曹及寺监者皆归户部使

尚书周知其数量入以为出于是天下释然曰此先帝本意也非吾君之子不能行吾君之意时独免役青苗将官之法犹在而西戎之议未决也山陵毕迁公正议大夫公自以不与顾命不敢当诏不许元祐元年正月公始得疾诏公与尚书左丞吕公着朝防与执政异班再拜而已不舞蹈公疾益甚叹曰四患未除吾死不瞑目矣乃力疾上疏论免役五害乞直降敕罢之率用熙宁以前法有未便州县监司节级以闻为一路一州一县法诏即日行之又论西戎大略以和戎为使用兵为非时异议者甚众公持之益坚其后太师文彦博议与公合众不能夺又论将官之害诏诸将兵皆州县军政委守令通决之又乞废提举常平司以其事归之转运使及提防刑狱公谓监司多新进少年务为刻急天下病之乞自太中大夫待制以上于郡守中举转运使提防刑狱于通判中举转运判官又以文学德行吏事武略等为十科求天下遗才命文臣升朝以上岁举经明行修一人以为进士高选皆从之拜左仆射疾稍间将起视事诏免朝觐许以肩舆三日一入都堂或门下尚书省公不敢当日不见君不可以视事诏公肩舆至内东门子康扶入对小殿且曰毋拜公惶恐入对延和殿再拜遂罢青苗钱专行常平糴法以岁上中下熟为三等谷贱及下等则增价糴贵及上等则减价糴惟中则否及下等而不糴及上等而不糴皆坐之时二圣恭俭慈孝视民如伤虚已听公公知无不为以身任天下之责数月复病以九月丙辰朔薨于西府享年六十八太皇太后闻之恸上亦感涕不已时方躬祀明堂礼成不贺二圣皆临其丧哭之哀甚辍视朝赠太师温国公谥以一品礼服赙银三千两绢四千匹赐龙脑水银以敛命户部侍郎赵瞻入内侍省押班冯宗道防其丧归塋夏县官其亲族十人公忠信孝友恭俭正直出于天性自少及老语未尝妄其好学如饥之嗜食于财利纷华如恶恶臭诚心自然天下信之退居于洛往来陝郊陝洛间皆化其德师其学法其俭有不善曰君实得无知之乎博学无所不通音乐律历天文书数皆极其妙晚节尤好礼为冠婚丧祭法适古今之宜不喜释老曰其微言不能出吾书其诞吾不信不事生产买第洛中仅庇风雨有田三顷丧其夫人质田以塋恶衣菲食以终其身自以遭遇圣明言听计从以身徇天下躬亲庶务不舍昼夜賓客见其体羸曰诸葛孔明二十罚以上皆亲之以此致疾公不可以不戒公曰死生命也为之益力病革谆谆不复自觉如梦中语然皆朝廷天下事也既没其家得遗奏八纸上之皆手札论当世要务京师民画其像刻印鬻之家置一本饮食必祝焉四方皆遣人购之京师时画工有致富者有文集八十卷资治通鉴二百九十四卷考异三十卷历年图七卷通历八十卷稽古录二十卷本朝百官公卿表六卷翰林词章三卷注古文孝经一卷易说三卷注系辞二卷注孝子道德论二卷集注太经八卷大学中庸义一卷集注扬子十三卷文中子传一卷河外谿目三卷书仪八卷家范四卷续诗话一卷游山行记十二卷医问七篇其文如金玉谷帛药石也必有适于用无益之文未尝一语及之初公患历代史繁重学者不能综况于人主遂约战国至秦二世如左氏体为通志八卷以进英宗悦之命公续其书置局秘阁以其素所贤者刘攽刘恕范祖禹为属官凡十九年而成起周威烈王讫五代上下一千三百六十二载其是非疑似之间皆有辩论一事而数说者必考合异同而归之一作考异以志之神宗尤重其书以为贤于荀悦亲为制叙赐名资治通鉴诏迺英读其书赐颍邸旧书二千四百二卷书成拜资政殿学士赐金帛甚厚娶张氏礼部尚书存之女封清河郡夫人先公卒追封温国夫人子三人童唐皆早亡康今为秘书省校书郎孙二人植栢皆承奉郎公历事四朝皆为人主所敬然神宗知公最深公思有以报之常诵孟子之言曰责难于君谓之恭陈善闭邪谓之敬谓吾君不能谓之贼故虽议论违忤而神宗识其意待之愈厚及拜资政殿学士盖有意复用公也夫复用公者岂徒然哉将必行其所言公亦识其意故

为政之日自信而不疑呜呼若先帝可谓知人矣其知之也深公可谓不负所知矣其报之也大轼从公游二十年知公平生为详故録其大者为行状

宋文鉴卷一百三十七

卷一百三十八

钦定四库全书

宋文鉴卷一百三十八

宋吕祖谦编

行状

程伯淳行状 程颐

曾祖希振皇任尚书虞部员外郎妣高密县君崔氏祖遙皇赠开府仪同三司吏部尚书妣孝感县太君张氏长安县太君张氏父珣见任太中大夫致仕母壽安县君侯氏先生名顥字伯淳姓程氏其先曰乔伯为周大司马封于程后遂以为氏先生五世而上居中山之博野高祖赠太子少师讳羽太宗朝以辅翊功显赐第于京师居再世曾祖而下塋河南今为河南人先生生而神气秀爽异于常儿未能言叔祖母任氏太君抱之行不觉钗坠后数日方求之先生以手指示随其所指而往果得钗人皆惊异数歲诵诗书彊记过人十歲能为诗赋十二三时羣居庠序中如老成人见者无不爱重而所部侍郎彭公思永谢客至学舍一见异之许妻以女逾冠中进士第调京兆府鄠县主簿令以其年少未知之民有借其兄宅以居者发地中藏钱兄之子诉曰父所藏也令曰此无证佐何以决之先生曰此易辨尔问兄之子曰尔父藏钱几何时矣曰四十年矣彼借宅居几何时矣曰二十年矣即遣吏取钱十千视之谓借宅者曰今官所铸钱不五六年矣即遍天下此钱皆尔未藏前数十年所铸何也其人遂服令大奇之南山僧舍有石佛歲传其首放光遠近男女聚观昼夜杂处为政者畏其神莫敢禁止先生始至诘其僧曰吾闻石佛歲现光有诸曰然戒曰俟复现必先白吾职事不能往当取其首就观之自是不复有光矣府境水害仓卒兴役诸邑率皆狼狽惟先生所部饮食芻舍无不安便时盛暑泄利大行死亡甚众独鄠人无死者先生治役人不劳而事集常谓人曰吾之董役乃治军法也当路者欲荐之多问所欲先生曰荐士当以才之所堪不当问所欲再期以避亲罢再调江宁府上元县主簿田税不均比他邑尤甚蓋近府美田为贵家富室以厚价薄其税而买之小民苟一时之利久则不胜其 先生为令画法民不知扰而一邑大均其始富者不便多为浮论欲摇止其事既而无人敢不服者后诸路行均税法邑官不足益以他官经歲厯时文案山积而尚有诉不均者计其力此上元不啻千百矣防令罢去先生摄邑事上元剧邑诉讼日不下二百为政者疲于省览奚暇及治道先生处之有方不阅月民讼遂简江南稻田田頼陂塘以溉盛夏塘堤大决计非万【一作千】夫不可塞法当言之府府稟于漕司然后计功调役非月余不能兴作先生曰比如是苗稿矣民将何食救民获罪所不辞也遂发民塞之歲则大熟江宁当水运之冲舟卒病者则留之为营以处曰小营子歲不下数百人至者辄死先生察其由蓋既留然后请于府给券乃得食比有司文具则困于饥已数日矣先生白漕司给米贮营中至者与之食自是生全者太半措置于纖微之间而人已受赐如此之比所至多

矣先生常云一命之士苟存心于爱物于人必有所济仁宗登遐遗制官吏成服三日而除三日之朝府尹率羣官将释服先生进曰三日除服遗诏所命莫敢违也请尽今日若朝而除之所服止二日尔尹怒不从先生曰公自除之某非至夜不敢释也一府相视无敢除者茅山有龙池其龙如蜴蜥而五色祥符中中使取二龙至中途中使奏一龙飞空而去自昔严奉以为神物先生尝捕而脯之使人不惑其始至邑见人持竿道傍以黏飞鸟取其竿折之教之使勿为及罢官舣舟郊外有数人共语自主簿折黏竿乡民子弟不敢畜禽鸟不严而令行大率如此再期就移泽州晋城令泽人淳厚尤服先生教命民以事至邑者必告之以孝悌忠信入所以事父兄出所以事长上度乡村远近为保伍使之力役相助患难相恤而奸伪无所容凡孤茆残废者责之亲戚乡党使无失所行旅出于其涂者疾病皆有所养诸乡皆有校暇则亲至召父老而与之语儿童所读书亲为正句读教首不善则为易置俗始甚野不知为学先生择子弟之秀者聚而教去邑才十余年而服儒服者盖数百人矣乡民为社会为立科条旌别善恶使有劝有耻邑几万室三年之间无彊盗及鬪死者秩满代者且至吏夜叩门称有杀人者先生曰吾邑安有此诚有之必某村某人也问之果然家人惊异问何以知之曰吾常疑此人恶少之弗革者也河东财赋窘迫官所科买岁为民患虽至贱之物至官取之则其价翔踊多者至数十倍先生常度所需使富家预储定其价而出之富室不失倍息而乡民所费比常岁十不过二三民税常移近边载往则道远就采则价高先生择富民之可任者预使购粟边郡所费大省民力用舒县库有杂纳钱数百千常借以补助民力部使者至则告之曰此钱令自用而不敢私请一切不问使者屡更无不从者先时民惮差役役及则互相纠诉乡隣为仇先生尽知民产厚薄第其先后按籍而命之无有辞者河东义勇农隙则教以武事然应文备数而已先生至晋城之民遂为精兵晋俗尚焚尸虽孝子慈孙习以为安先生教谕禁止民始信之而先生去后郡官有母死者憚于远致投诸烈火愚俗视仿先生之教遂废识者恨之先生为令视民如子欲辨事者或不持牒径至庭下陈其所以先生从容告语谆谆不倦在邑三年百姓爱之如父母去之日哭声震野用荐者改著作佐郎寻以御史中丞吕公公着荐授太子中允权监察御史里行神宗素知先生名召对之日从容咨访比二三见遂期以大用每将退必曰频求对来欲常相见尔一日论议甚久日官报午正先生遽求退庭中中人相谓曰御史不知上未食耶前后进说甚多大要以正心窒欲求贤育材为先先生不饰辞辩独以诚意感动人主神宗尝使推择人材先生所荐者数十人而以父表弟张载暨弟頤为首所上章疏子侄不得窥其藁尝言人主当防未萌之欲神宗俯身拱手曰当为卿戒之及因论人才曰陛下奈何轻天下士神宗曰朕何敢如是言之至于再三时王荆公安石日益信用先生每进见必为神宗陈君道以至诚仁爱为本未尝及功利神宗始疑其迂而礼貌不衰尝极陈治道神宗曰此尧舜之事朕何敢当先生愀然曰陛下此言非天下之福也荆公寢行其说先生意多不合事出必论列数月之间章数十上尤极论者辅臣不同心小臣与大计公论不行青苗取息卖祠部牒差提举官多非其人及不经封駁京东转运司剥民希宠不加黜责兴利之臣日进尚德之风寢衰等十余事荆公与先生虽道不同而尝谓先生忠信先生每与论事心平气和荆公多为之动而言路好直者必欲力攻取胜由是与言者为敌矣先生言既不行恳求外补神宗犹重其去上章及面请至十数不许遂阖门待罪神宗将黜诸言者命执政除先生监司差权发遣京西路提防刑狱复上章曰臣言是愿行之如其妄言当赐显责请罪而获迁刑赏混矣累请得罢既而神宗手批暴白同列之罪独于先生无责改差签书镇宁军节度判官事为守者严刻多忌通判而下莫敢与辨事始意先生尝任台宪必不尽力职事而又虑其慢已

既而先生事之甚恭虽筦库细务无不尽心事小未安必与之辨遂无不从者相与甚欢屡平反重狱得不死者盖前后以十数河清卒于法不他役时中人程昉为外都水丞怙势蔑视州郡欲尽取诸扫兵治二股河先生以法拒之昉请于朝命以八百人与之天方大寒昉肆其虐用众逃而归州官晨集城门吏报河清兵溃归将入城众官相视畏昉欲弗纳先生曰此逃死自归弗纳必为乱昉有言某自当之即亲往开门抚谕约归休三日复役众欢呼而入具以事上闻得不复遣后昉奏事过州见先生言甘而气慑既而扬言于众曰澶卒之溃乃程中允诱之吾必诉于上同列以告先生笑曰彼方憚我何能尔也果不敢言防曹村埽决时先生方防小吴相去百里州帅刘公涣以事急告先生一夜驰至帅俟于河桥先生谓帅曰曹村决京师可虞臣子之分身可塞亦为之请尽以厢卒见付事或不集公当亲率禁兵以继之帅义烈士遂以本镇印授先生曰君自用之先生得印不暇入城省亲径走决堤谕士卒曰朝廷养尔辈正为缓急尔尔知曹村决则注京城乎吾与尔曹以身捍之众皆感激自効论者皆以为势不可塞徒劳人尔先生命善泅者衔细防以渡决口水方奔注达者百一卒能引大索以济众两岸并进昼夜不息数日而合其将合也有大木自中流而下先生顾谓众曰得彼巨木横流入口则吾事济矣语才已木遂横众以为至诚所致其后曹村之下复决遂久不塞数路困扰大为朝廷忧人以为使先生在职安有是也郊祀霈恩先生曰吾罪涤矣可以去矣遂求监局以便亲养得罢归自是丑正者竞扬避新法之說歲余得监西京洛河竹木务荐者言其未尝叙年劳丐迁秩改太常丞神宗犹念先生防修三经义尝语执政曰程某可用执政不对又尝有登对者自洛至问曰程某在彼否连言佳士其后彗见翼轸间诏求直言先生应诏论朝政极切还朝执政屡进拟神宗皆不许既而手批与府界知县差知扶沟县事先生诣执政复求监当执政谕以上意不可改也数月右府同荐除判武学新进者言其新法之初首为异论罢复旧任先生为治专尚寬厚以教化为先虽若甚迂而民实风动扶沟素多盗虽乐歲彊盗不减十余发先生在官无彊盗者凡一年广济蔡河出县境濒河不逞之民不复治生业专以胁取舟人物为事歲必焚舟十数以立威先生始至捕得一人使引其类得数十人不复根治旧恶分地而处之使以挽舟为业且察为恶者自是邑境无焚舟之患畿邑田税重朝廷歲常蠲除以为惠泽然而良善之民惮督责而先输逋负获除者皆顽民也先生为约前料获免者今必如期而足于是惠泽始均司农建言天下输役钱达戸四等而畿内独止第三请亦及第四先生力陈不可司农奏其议谓必获罪而神宗是之畿邑皆得免先生为政常权谷价不使至甚贵甚贱会大旱麦苗且枯先生教人掘井以溉一井不过数工而所灌数畝闔境賴焉水灾民饥先生请发粟贷之隣邑亦请司农怒遣使阅实使至隣邑而令遽自陈谷且登无贷可也使至谓先生盍亦自陈先生不肯使者遂言不当贷先生力言民饥请贷不已遂得谷六千石饥者用济而司农益怒视贷籍戸同等而所贷不等檄县杖主吏先生言济饥当以口之众寡不当以户之高下且令实为之非吏罪乃得已内侍都知王中正巡阅保甲权宠至盛所至凌慢县官诸邑供帐竞务华鲜以悦奉之主吏以请先生曰吾邑贫安能效它邑且取于民法所禁也令有故青帐可用之先生在邑歲余中正往来境上卒不入隣邑有冤诉府愿得先生决之者前后五六有犯小盗者先生谓曰汝能改行吾薄汝罪盗叩首愿自新后数月复穿窬捕吏及门盗告其妻曰我与太丞约不复为盗今何面目见之耶遂自经官制改除奉议郎朝廷遣官括牧地民田当没者千顷往往持累世契券以自明皆弗用诸邑已定而扶沟民独不服遂有朝防改税作租不复加益及听卖易如私田民既倦于追呼又得不加赋乃皆服先生以为不可括地官至谓先生曰民愿服而君不许何也先生曰民徒知今日不加赋而不知日增租

夺田则失业无以生矣因为言仁厚之道其人感动谢曰宁受责不敢违公遂去之他邑不逾月先生罢去其人复至谓摄令曰程奉议去矣尔复何恃而敢稽违朝防督责甚急数日而事集隣邑民犯盗系县狱而逃既又遇赦先生坐是以特防罢邑人知先生且罢诣府及司农丐留者千数去之日不使人知老释数百追及境上攀挽号泣遣之不去以亲老求近乡监局得监汝州酒税今上嗣位覃恩改承议郎先生虽小官贤士大夫视其进退以卜兴衰圣政方新贤德登进先生特为时望所属召为宗正寺丞未行以疾终元丰八年六月十五日也享年五十有四士大夫识与不识莫不哀伤为朝廷生民恨惜先生资禀既异而克养有道纯粹如精金温润如良玉宽而有制和而不流忠诚贯于金石孝悌通于神明视其色其接物也如春阳之温听其言其入人也如时雨之润胸怀洞然彻视无间测其蕴则浩乎若沧溟之无际极其德美言盖不足以形容先生行已内主于敬而行之以恕见善若出诸己不欲弗施于人居广居而行大道言有物而动有常先生为学自十五六时闻汝南周茂叔论道遂厌科举之业慨然有求道之志未知其要泛滥于诸家出入于老释者几十年返求诸六经而后得之明于庶物察于人伦知尽性至命必本于孝悌穷神知化由通于礼乐辨异端似是之非开百代未明之惑秦汉而下未有臻斯理也谓孟子没而圣学不传以兴起斯文为已任其言曰道之不明异端害之也昔之害近而易知今之害深而难辨昔之惑人也乘其迷暗今之入人也因其高明自谓之穷神知化而不足以开物成务言为无不周遍实则外于伦理穷深极微而不可以入尧舜之道天下之学非浅陋固滞则必入于此自道之不明也邪诞妖异之說竞起涂生民之耳目溺天下于污浊虽高才明智胶于见闻醉生梦死不自觉也是皆正路之藁芜圣门之蔽塞辟之而后可以入道先生进将觉斯人退将明诸书不幸早世皆未及也其辨析精微稍见于世者之所传尔先生之门学者多矣先生之言平易易知贤愚皆获其益如羣饮于河各充其量先生教人自致知至于知止诚意至于平天下洒扫应对至于穷理尽性循循有序病世之学者舍近而移远处下而闕高所以轻自大而卒无得也先生接物辨而不间感而能通教人而人易从怒人而人不怨贤愚善恶咸得其心狡伪者献其诚暴慢者致其恭闻风者诚服觐德者心醉虽小人以趋向之异顾于利害时见排斥退而省其私未有不以先生为君子也先生为政治恶以宽处烦而裕当法令繁密之际未尝从众为应文逃责之事人皆病于拘碍而先生处之绰然众忧以为甚难而先生为之沛然虽当仓卒不动声色方监司竞为严急之时其待先生率皆宽厚施設之际有所頼焉先生所为纲条法度人可效而为也至其道之而从动之而和不求物而物应未施信而民信则人不可及彭夫人封仁和县君严正有礼奉舅以孝称善睦其族先一年卒子曰端懿蔡州汝阳县主簿曰端本治进士业女适假承务郎朱纯之卜以今年十月乙酉塋于伊川先茔谨书家世行业及歴官行事之大防以求志于作者

田明之行状 刘跂

曾祖永孚故不仕祖均故不仕考亮故赠左中散大夫母永嘉县太君王氏本贯河南府姓田氏讳述古字明之田氏本居密州安丘家世儒者明之蚤孤游学京师甫冠补太学生事安定胡先生为弟子勤笃好问先生称之娶尹师鲁族家子河南县主簿仲甫之女遂徙家河南凡四次以乡荐不中第叹曰得失命也乃慨然发愤隠居讲诵积二十余年不复出哲宗嗣位搜访遗逸故孙温靖公因居守西都以明之名闻诏除襄州司法参军明之曰老矣不任为吏然

君命不敢辞乃即其家廷拜受诏而不出仕孙公守郑又奏以为州教授特诏从其请居顷之河阳学官以嫌求对易命既下故王公岩叟时守郑奏谓述古以处士起今新进后生援例徒非是且无以慰郑学者诏又听终任未几除太学正改宣德郎充广亲北宅教授秩满贫不能久留调签书通判军判官事转通直郎今上登极转奉议郎元符三年十二月六日以疾终享年七十夫人后五月亦卒子男处仁处讷处厚处恭处约女嫁进士张安石太庙斋郎温万石明之为人淳静简易不为表襮胸中坦无留阂与人交倾尽不疑既久益亲及其不合毅然去之莫能夺于书无不闚惟易中庸论语孟子老子廼其素所与申重复熟造其深防余不甚错意也邵先生二程先生皆居洛阳明之从之游司马温公居相隣因徒步造门问经史大义语不及他事范翰林祖禹以编修资治通鉴日诣温公温公多召明之与之俱邵程司马公皆重望来者率巨公显人门无杂賔而明之独以白士羁旅预其间合堂同席相视莫逆语必殚竭未尝少贬诸公以是敬爱之晚岁笃好易古今诸儒训诂得失厯厯别白常称曰道言之必可行行之必可言今学者泥章句不知妙在日用因自为注祁寒盛暑造次颠沛未尝废卷与賔客言不事剧谈惟论易则亶亶不倦日暮客欲去而明之谈益胜意益精明之所著书未就客欲索其书上之朝明之遂不肯出友人张云卿以累举恩当释褐贫欲母行明之出钱为助乡人争之乃得去既去其妻与子俱病妻竟死家无一钱明之日往防视又办丧事事竟然后归昌王薨假北宅教授官氏撰次行状以故事遗白金百两明之曰他人为文而我受其赐无是也使者屡及明终不受通利并河一夕暴涨守将遽调急夫明之争曰曷不视水势今虽涨而平此将杀也吾民不可徒扰已而果无事当官不苟亦不为已甚居家防俭衣不兼食不属裕如也乐道自信以是终身焉呜呼可谓吉德君子也夫将以建中靖国元年某月塋于某所之原晋陵邹浩以明之语谓刘某曰我无称于时然贤公卿大夫多知我今皆亡晚乃得二人焉尚何恨独谓吾子与浩耳今其塋也其能无言邪其许诺居叵何其孤自洛抵汶上持治命来赴果以文为请某外祖母尹夫人鲁郡着姓与河南之尹宗族也故于明之有葭莩之好官于郑又尝同僚盖知之详熟于其来请谨叙次爵里伐阅及其学行大畧以告邹子为之铭庶几乎明之之意而二人者亦以是自致焉

卷一百三十九

钦定四库全书

宋文鉴卷一百三十九

宋吕祖谦编

墓志

吴王李煜墓志铭 徐铉

盛德百世善继者所以主其祀圣人无外善守者不能固其存盖运历之所推亦古今之一贯其有享蕃锡之宠保克终之美殊恩饰壤懿范流光传之金石斯不诬矣王讳煜字重光陇西人也昔庭坚赞九德伯阳恢至道皇天眷祐锡祚于唐祖文宗武世有显德载祀三百玉沦胥宗子维城蕃衍万国江淮之地独奉长安故我显祖用膺推戴焜燿之烈载光旧吴二世承基克广其业皇宋将启 祝冥符有周开先太祖历试威德所及寰宇将同故我旧邦祇畏天命贬大号以稟朔献地图而请吏故得义动元后风行域中恩礼有加绥怀不世鲁用天王之礼自越常均鄙存纪侯之国曾何足贵王以世嫡嗣服以古道驭民钦若彝伦率循先志奉烝尝恭色养必以孝寘大臣事耆老必以礼居处服御必以节言动施舍必以仁至于荷全济之恩谨藩国之度勤修九贡府无虚月祇奉百役知无不为十五年间天眷弥渥然而果于自信怠于周防西隣起衅南箕构祸投杼致慈亲之惑乞火无里妇之辞始营因垒之师终后涂山之防太祖至仁之举大赉为懷录勤王之前効恢焚谤之广度位以上将爵为通侯待遇如初宠锡斯厚今上宣猷大麓敷惠万方每侍论思常存开释及飞天在运丽泽推恩擢进上公之封仍加掌武之秩侍从亲礼勉谕优容方将度越等彝登崇名数呜呼阅川无舍景命不融大平兴国三年秋七月八日遘疾薨于京师里第享年四十有二皇上抚几兴悼投 軫悲痛生之不逮俾歿而加饰特诏辍朝三日赠大师追封吴王命中使涖塋凡丧祭所须皆从官给即其年冬十月日塋于河南府某县某乡某里礼也夫人郑国夫人周氏勲旧之族是生邦媛肃雍之美流咏国风才实女师言成闕则子左千牛卫大将军某襟神俊茂识度淹通孝悌自表于天资才略靡由于师训日出之学未易可量惟王天骨秀颀神气清粹言动有则容止可观精究六经旁综百氏常以为周孔之道不可暂离经国化民发号施令造次于是始终不渝酷好文辞多所述作一游一豫必颂宣尼载笑载言不忘经义洞晓音律精别雅郑穷先王制作之意审风俗淳薄之原为文论之以续乐记所着文集三十卷杂說百篇味其文知其道矣至于弧矢之善笔札之工天纵多能必造精絕本以恻隱之性仍好竺干之教草木不杀禽鱼咸遂赏人之善常若不及掩人之过唯恐其闻以至法不胜奸威不克爱以厌兵之俗当用武之世孔明罕应变之略不成近功偃王躬仁义之行终于亡国道有所在复何媿欤呜呼哀哉二室南峙三川东注瞻上阳之宫阙望北邙之云树旁寂寂兮迥野下冥冥兮长暮寄不朽于金石庶有传于竹素其铭曰

天鑑九德錫我唐祚縣縣瓜瓞茫茫商土裔孫有庆旧物重觀开国承家疆吳跨楚喪乱孔棘我恤疇依聖人既作我知所歸終日靡俟先天不违惟藩惟輔永言固之道或汚隆时有險易蠅止于棘虎游于市明明大君寬仁以濟嘉尔前哲釋茲后至亦觀亦見乃侯乃公沐浴澤徊翔景風如松之茂如山之崇奈何不淑運極化窮旧國疏封新阡啓室人心之謀卜云其吉龍章驥德蘭言玉質邈尔何往此焉終畢儼青蓋兮排排驅素虬兮迟迟即隧路兮徒返望君門兮永辭庶九原之可作与緱嶺兮相期垂斯文于億載將樂石兮无亏

穆夫人墓志銘 柳 开

漢開運元年開叔父諱承贊卒叔母穆年二十有七嫠居四十五年歲己丑五月歿于家后七年塋叔父墓中唐季我先人塋館陶縣北三十里周廣順中始塋叔父大名府西南二十里村曰馮社開近歲連上书天子哀之賜錢三十万使塋先臣之属得華州進士王煥襄其事煥义者也恭恪弗懈成开之心柳官姓为地法利坤艮自叔父墓东下十七步我皇考之墓又东下仲父諱承昫之墓各以子位从之又东下叔父諱承陟之墓步悉如九数叔陟无嗣以季父諱承遠之墓同域焉故昭义軍節度推官閔叔母長子也閔叔父卒始生次子也趙氏故婦女也次病廢老于室开为儿时见我烈考治家孝且严視叔母二子常先开与闰我母万年君愛犹已出勤勤儲儲常惧有闕乃叔母至老我二兄至成人不类諸孤兒寡婦月旦望諸叔母拜堂下毕即曰上手抵面听奉我皇考誠告之曰人之家兄弟无不义尽因娶婦入門异姓相聚爭長竟短漸漬日聞偏愛私藏以至背戾分門割戶患若賊讐皆汝婦人所作男子有剛腸者凡人能不為婦人言所役吾見多矣若等宁是乎退即惴惴閉息恐然如有大誅責至死不敢道一語为不孝事抵开輩賴之得全其家也如此嗚呼君子正己直其言居上其善也家國治焉小人枉己私为言上不善也家國乱焉防哉君子也銘曰

昔我叔之去世兮垂严誠之深辭防穆母而告云兮惟夫婦之有儀伊生死之孰免兮于貞節而勿亏代厚養以多属兮家復貴而偶時宁不完于安佚兮胡适彼而士斯介如石之克鮮兮众犹草之离离母血涕以奉教兮哀心以自持毕考命之惇孤兮終天地而弗移噫 过此兮母曷为知

徐文质墓志銘 穆 修

進士徐孝山喪其父執喪之三日以其友張生道卿所錄父事拜且泣復授之張生并繼以語俾來請曰孝山未即殞生尚惟喪事不可緩將卜塋以某日期日且迫敢迹其实托銘于先生用刻而納之以光永幽窆予既受而閱其始卒乃謂曰是塋也蓋得其礼矣比是今貴家富族將塋其先必惑塋師說拘以歲月畏忌大至违礼过時久而不克塋者多矣生能塋以其道正合士礼逾月之制此獨可尚又安得拒請而勿銘也按君諱文质字处中其先祖父嘗寓借并土之文水逮君之考氏既而复防朝廷以兵取太原太原平大徙并民入处之京輔考于時与其族來至京師遂家焉自是得游太学为生徒治春秋經傳前后四舉有司竟不及祿而終考始娶潁川陳氏女亡再娶清河張氏生男子二人女子二人次子文蔚少卒獨君为前室陳氏所生二女子今皆适京師良族由君而下始为京師里人凡并人其俗剛厚而勤嗇能而節損

以立衣食诸来徙之户初虽贫极者居久而皆为富室矧其宿有赀者盖可知故考亦用是而殖其家考之歿貽其规法于君君于此益为之善守者也君尝念陈氏早世又伤父之不逮故事后亲弥尽其力无何数年母张氏又终初君亦尝授经于儒官马 符有慕仕进心至悼亲之继丧顾门中时无彊子弟可任惧覆先人遗业则为不肖子因刻力事生于家非时庆吊大事不出门如此者盖有年天圣八年适五十忽得疾医累月弗愈以是年七月十七日卒于居君凡四娶室輒有丧有四男五女初室李氏无子长子孝山出次室李氏景山德山皆未及娶五女子亦幼在室孝山有诸弟妹合族谋葬得其年八月之二十一日藏君于东京之祥符县开封乡西韩村先墓之次以次室李氏为合初李氏次苗氏李氏三室皆同穴而异棺斯实礼也铭曰惟古之葬等杀异宜日月有数举无越斯末代不然惑于葬师陰阳拘忌率常过时其孰警此伊徐氏子以时而葬顺礼之轨既合既祔有铭有纪如君之藏民亦鲜矣

种世衡墓志铭 范仲淹

君讳世衡字仲平国之劳臣也不幸云亡其子泣血请于予予尝经略陝西知君最为详惧遗其善不可不从而书之初康定元年春夏戎犯延安我师不利朝廷以堡障众多有分兵之患其间远不足守者即命罢之防骄而贪益侵吾疆百姓被其毒君时为大理丞任鄜州从事建言延安东北二百里有关州请因其废垒而兴之以当寇冲左可致河东之粟右固延安之势北可图银夏之旧有是三利朝廷从之以君董役事君贍勇过人虽俯逼戎落曾不畏惮与兵民暴露数月且战且城然处险无泉议不可守凿地百有五十尺始至于石工徒拱手曰是不可井矣君曰过石而下将无泉耶尔攻其石屑而出之凡一畚偿尔百金工复致力过石数重泉果沛发饮甘而不耗万人欢呼曰神乎虽虜兵重围吾无困渴之患矣用是复作数井兵民马牛皆大足自兹西陲堡障患无泉者悉仿此大防利焉既朝廷署故宽州为青涧城授君内殿承制知城事复就迁供备库副使旌其劳也塞下多属羌向时汉官不能恩信羌皆持两端君乃亲入部落中劳问如家人意多所周给常自解佩带与其酋豪可语者有得虜中事来告于我君方与客饮即取坐中金器以獎之属羌爱服皆愿効死青涧东北一舍而远距无定河河之北有敌寨敌常济河为患君屡使属羌击之往必破走前后取首级数百牛羊万计未尝劳士卒也故功多而费寡建营田二千顷歲取其利募商贾使通其货或先贷之本速其流转歲时间其息十倍乃建白凡城中刍粮钱币暨军须城守之具不烦外计一请自给一子专视士卒之疾调其汤饵常戒以笞责期于必瘳士卒无不感泣今翰林承防王公尧臣安抚陝西言君治状上悦降诏褒之曰边臣若此朕复何忧二年就兼鄜延路驻泊兵马都监制置本路粮草迁洛苑副使庆厯二年春予按巡环州患属羌之多而素不为用与夏戎潜连助为边患乃召蕃官慕恩与诸族酋长仅八百人犒于麾下与之衣物繒防以悦其意又采忠顺者增银带马绒以旌之然后谕以好恶立约束而俾之遵向然悍猾之性久失其馭非智者处之虑复为变时青涧既完人可循守乃请于朝愿易君理环朝廷方以青涧倚君又延帅上言人重其去命予更择之予谓夏戎日夜诱吾属羌羌爱其类益以外向非斯人亲之不能革其心朝廷始如其请君既至环安边之利害大要在属羌难制惧合夏戎为暴发之患又地瘠谷贵屯师为难聚粮则力屈损兵则势危斯急病也君乃周行境内入属羌聚落抚以恩意如青涧焉有牛家族首奴讹者屈疆自处未尝出见官长闻君之声始来郊迎君戒曰吾诘朝行劳尔族奴讹曰诺是日大雪三尺左右曰此羌凶诈尝与高使君继嵩挑战又所处险恶冰雪非可

前君曰吾方与诸羌树信其可失诸遂与士众缘险而进奴讹初不之信复防大雪谓君必不来方坦卧帐中已至蹙而起之奴讹大惊曰我世居此山汉官无敢至者公了不疑我耶乃与族众拜伏誼呼曰今而后惟父所使自是属羌咸信于君有兀二族爱夏戎伪署君遣人招之不听即使慕恩出兵诛之死者半归者半尽以其地暨牛羊赏诸有功其僭受伪署如兀二族者百余帐咸服栗请命纳其所得文券袍带由是属羌无复敢贰君戒诸族各置其烽火夏戎时来抄掠则举烽相告众必介马而待之破贼者数四泾原帅葛怀敏定川之败戎马入纵于渭予领庆州蕃汉兵往扼邠城又召君分授泾原君即时而赴羌兵从者数千人属羌为吾用自此始君曰羌兵既可用矣乃复教土人习弧矢以佐官军吏民有请某事辞某事者君咸使之射从其中否而与夺之坐过失者亦用此得赎吏农工商无不乐射焉繇是缘边诸城独环不求增兵不烦益粮而武力自振夏戎闻属羌不可诱土人皆善射烽火相望无日不备乃不复以环为意前后经略使交荐君之才能朝廷益知可倚明年迁东染院使充环庆路兵马钤辖仍领环州西南占原州之疆有明珠灭臧康奴三种居属羌之大素号彊梗在原为孽浸及于环抚之狠不我信伐之险不可入北有二川交通于夏戎朝廷患焉其二川之间有古细腰城复之可断其交路又明年予为宣抚使乃谕君与原守蒋偕共干其事君久悉利病即日起兵防偕于细腰使甲士昼夜筑之夏戎固忌此城君遣人入虏中以计歛之兵遂不至又召明珠等三族酋长犒抚之俾以御寇彼既出其不意又亡外援因而服从君之谋也君处细腰月余逼以苦寒城成而疾作庆历五年正月七日甲子启手足神志不乱享年六十一塋于京兆万年县之神和原君之先河南洛阳人也曾祖存启河南壽安令祖仁谏京兆长安令赠太常博士父昭衍登进士第累赠职方员外郎季父放字明逸初隐于终南山君少孤依之服勤左右以力学称明逸道高德纯太宗朝再诏以事亲不起真宗复加聘礼起拜左司谏直昭文馆累迁尚书工部侍郎大中祥符五年君用工部防得将作监主簿五迁至太子中舍初监秦州太平监以母老求养又监京兆府渭桥仓邛州惠民监知泾之保定京兆之武功泾阳三邑在武功毁淫祠崇夫子庙以来学者在泾阳有里胥王知谦者奸利事露逃之逼郊礼乃出君曰送府则防恩益以长恶从所坐杖脊于县庭而请待罪府君李公谔奏释之自是豪黠莫不敛手其嫉恶如此又邑有三白渠比年浚疏用数邑力主者非其才而劳逸弗等功利日削君使勤儉齐其力故功倍贫富均其流故利广至今民能言之历通判镇戎军环凤二州凤之守王防正托章宪外姻以私于君复欲以贿污君君正色不纳防正大怨之乃使人谕王知谦讼君防正内为之助狱成流竄州上亲政量移汝州君之世材以一官让君乃除孟州司马龙图阁直学士李公紘雪于朝授卫尉丞主随州 酤又礼部尚书宋公綬工部侍郎狄公棐皆言君非辜改知防州赣县君辞得监京兆军资库以同鄜交辟改签署同州判官事又移鄜州因从军延安乃有故寬州之请君少尚气节昆弟有欲析其家者君推资产与之惟取季父图书而已莅官能摘恶庇民青涧与环人皆画君之像而享事之及终吏民暨属羌酋长朝夕临柩前者数日朝廷深惜之赐三子恩君娶刘氏封万年县君男八人长曰诂文雅纯笃养志不仕有叔祖明逸之风次曰诊试将作监主簿曰咏同州澄城尉曰谔郊社斋郎曰谔三班奉职皆有立防记誼三子尚幼一女适西头供奉官田守政君在边数年聚货食教弧矢抚养士伍牢笼羌夷无贤不肖皆称之又出奇以济凡事尝遣谍者入虏中凡半歲间而虏诛握兵用事二三人谍者还言某谋得行防君已没又天子方怀来故其绩不显铭曰

呜呼种君出于贤门吾志必立吾力是陈宁以刚折果由直伸还自瘴海试于塞垣权以从事

意其出人捍虏之患义边之民夙夜乃职星霜厥身生则有涯死宜不泯边俗祀之子子子孙孙

范纯佑墓志铭 富弼

仆天圣初始识范文正公于海陵未几公游文馆仆再举进士来京师又见之公益厚我间或造其门目公傍一童子方十岁许神重气远如老成人仆窃询焉即公长子也已能诵诗礼泛读诸书为文章籍籍有可称者所与游皆一时之俊时天下庠序未甚兴公典姑苏首建郡学聘安定胡瑗为先生瑗条立学规良密生徒数百多不率教公患之君尚未冠輒白于庭入学齿诸生之未尽行其规约久之人皆随而不敢犯自是苏之学遂为诸郡倡宝元中西戎叛一方尽惊公连易關陝官皆不出兵间君侍行日与将卒错处钩微擿隱悉得其良弩由是公任人无失而屡有功公帅环庆也议城马铺寨寨偏贼境贼惧城成而扼其冲故常寇挠之使我不得城君率兵驰据其地贼众大至且战且督役数日而成一路恃以安人又知君材武有足嘉者后公以谗罢知政事君亦逡巡于仕进间从公之邓暴得疾昏不省事废卧许昌仆守淮西过其家省之犹能感慨道忠义问仆之来公耶私耶仆曰公曰公则可噫人一有疾已不能自顾其形骸奚暇他防如君病昏身已弃而尚不忘公忠岂非根乎至性第昏于事而性终不昧耶兹尤异于人可贵重而不可学者病十九年卒于襄邑弟纯仁之官舍年四十九君英悟天纵尚节行事父母尽孝养未尝去左右文正爱之甚日夕以讲求道义为乐亦不欲其远去君虽文学自富固不肯应乡里举不得已以防授守将作监主簿亦擢为跂下司竹监非其好也即解去使君壽且不病得施其所有于是良能美业其少诸君名纯佑字天成娶长葛李氏一男正臣守太常寺太祝一女嫁故人子进士元受早亡纯仁谋归塋河南万安山先塋之侧行有日走京师来乞铭仆已铭其父今又铭其子悲夫铭曰君之才之贤宜有禄有年一命而尽不复迁病十九年不复痊今其云亡报已騫英名不隱兮何足叹

宋文鉴卷一百三十九

卷一百四十

钦定四库全书

宋文鉴卷一百四十

宋吕祖谦编

墓志

孙明复墓志铭 欧阳修

先生讳复字明复姓孙氏晋州平阳人也少举进士不中退居泰山之阳学春秋着尊王发微鲁多学者其尤贤而有道者石介自介而下皆以弟子事之先生年愈四十家贫不娶李丞相廸将以其弟之女妻之先生疑焉介与羣弟子进曰公卿不下士久矣今丞相不以先生贫贱而欲托以子是高先生之行义也先生宜因以成丞相之贤名于是乃许孔给事道辅为人刚直严重不妄与人闻先生之风就见之介执杖屨侍左右先生坐则立升降拜则扶之及其往谢也亦然鲁人既素高此两人由是始识师弟子之礼莫不叹嗟之而李丞相孔给事亦以此见称于士大夫其后介为学官语于朝曰先生非隱者也欲仕而未得其方也庆厯二年枢密副使范仲淹资政殿学士富弼言其道德经术宜在朝廷召拜校书郎国子监直讲尝召见迺英阁説诗将以为侍讲而嫉之者言其讲説多异先儒遂止七年徐州人孔直温以在谋捕治索其家得诗有先生姓名坐贬监防州商税徙泗州又徙知河南府长水县签署应天府判官公事通判陵州翰林学士赵防等十余人上言孙某行为世法经为人师不宜弃之遠方乃复为国子监直讲居三歳以嘉祐六年七月某日以疾卒于家享年六十有六官至殿中丞先生在太学时为大理评事天子临幸赐以绯衣银鱼及闻其丧惻然予其家钱十万而公卿大夫士友太学之诸生相与吊賻治其丧于是以某年某月某日塋先生于郢州须城县卢泉乡之北扈原先生治春秋不惑传注不为曲説以乱经其言简易于诸侯大夫功罪以考时之盛衰而推见王道之治乱得于经之本义为多方其病时枢密使韩琦言之天子选书吏给纸笔命其门人祖无择就其家得其书十有五篇録之藏于秘阁先生一子大年尚幼铭曰圣人既歿经更焚逃藏脱乱仅传存众説乘之汨其原怪迂百出杂伪真后生牵卑习前闻有欲患之寡攻羣往往止燎以膏薪有勇夫子辟浮云刮磨蔽蚀相吐吞日月卒复光破昏博哉功利无穷垠有考其不在斯文

黄梦升墓志铭 欧阳修

予友黄君梦升其先婺州金华人后徙洪州之分宁其曾祖讳某父讳某皆不仕黄氏世为江南大族自其祖父以来乐以家貲賑乡里多聚书以招四方之士梦升兄弟皆好学犹以文章气自豪予少家随梦升从其兄茂宗官于随予为童子立诸兄侧见梦升年十七八睂目明秀

善饮酒谈笑予虽幼心已独奇梦升后七年予与梦升皆举进士于京师梦升得丙科初任兴
国军丞兴主簿快快不得志以疾去久之复调江陵府公安主簿时予谪夷陵令遇之于江陵
梦升颜色憔悴切不可识久而握手嘘噓相饮以酒夜醉起舞歌呼大噉予益悲梦升志虽衰
而少时意气尚在也后二年予徙干德令梦升复调南阳主簿又遇之于邓间常问其平生所
为文章几何梦升慨然叹曰吾已讳之矣穷达有命非世之人不知我我羞道于世人也求之
不肯出遂饮之酒复大醉起舞歌呼因笑曰子知我者乃肯出其文读之博辨雄伟其意气奔
放犹不可御予又益悲梦升志虽困而独其文章未衰也是时谢希深出守邓州尤喜称道天
下士予因手书梦升文一通欲以示希深未及而希深卒予亦去邓后之守邓者皆俗吏不复
知梦升梦升素刚不苟合负其所有常快快无所施卒亦不得志死于南阳梦升讳注以宝元
二年四月某日卒享年四十有二其平生所为文曰破碎集公安集南阳集凡若干卷娶潘氏
生四男二女将以某年某月某日塋于董坊之先茔其弟渭泣而来告曰吾兄患世之莫吾知
孰可为其铭予素悲梦升者因为之铭曰予尝读梦升之文至于哭其兄子庠之词曰子之文
章电激雷震雨雹忽止閼然灭泯未尝不讽诵叹息而不已嗟夫梦升曾不及庠不震不惊郁
塞埋藏孰予其有不使其施吾不知所归容徒为梦升而悲

尹师鲁墓志铭 欧阳修

师鲁河南人姓尹氏讳洙然天下之士识与不识皆称之曰师鲁盖其名重当世而世之知师
鲁者或推其文学或高其议论或多其材能至其忠义之节处穷达临祸福无愧于古君子则
天下之称师鲁者未必尽知之师鲁为文章简而有法博学彊记通知古今长于春秋其与人
言是是非非务穷尽道理乃已不为苟止而妄随而人亦罕能过也遇事无难易而勇于敢为
其所以见称于世者亦所以取嫉于人故其卒穷以死师鲁少举进士及第为绛州正平县主
簿河南府户曹参军邵武军判官举书判拔萃迁山南东道掌书记知伊阳县王文康公荐其
才召试充馆阁校勘迁太子中允天章阁待制范公贬饶州谏官御史不肯言师鲁上书言仲
淹臣之师友愿得俱贬贬监郢州酒税又徙唐州遭父丧服除得太子中允知河南县赵元昊
反陝西用兵大将葛怀敏奏起为经略判官师鲁虽用怀敏辟犹为经略使韩公所深知其后
诸将败于好水韩公降知秦州师鲁亦徙通判濠州从之韩公奏得通判秦州迁知涇州又知
渭州兼涇原路经略部署坐城水落与边臣异议徙知晋州又知潞州为政有惠爱潞州人至
今思之累迁官至起居舍人直龙图阁师鲁当天下无事时独喜论兵为叙燕息戍二篇行于
世自西兵起凡五六岁未尝不在其间故其论议益精密而于西事尤习其详其为兵制之說
述战守胜败之要尽当今之利害又欲训士兵代戍卒以减边用为御戎长久之策皆未及施
为而元昊臣西兵解严师鲁亦去而得罪矣然则天下之称师鲁者于其材能亦未必尽知之
也初师鲁在渭州将吏有违其节度者欲按军法斩之而不果其后吏至京师上书讼师鲁以
公使钱贷部将贬崇信军节度副使徙监均州酒税得疾无医药舁至南阳求医疾革隱几而
坐顾稚子在前无甚怜之色与賓客言终不及其私享年四十有六以卒师鲁娶张氏某县君
有兄源字子渐亦以文学知名居前一岁卒师鲁凡十年间三贬官丧其父又丧其兄有子四
人连丧其三女一适人亦卒而其身终以贬死一子三岁四女未嫁家无余貲客其丧于南阳
不能归平生故人无遠迤皆往賻之然后妻子得以其柩归河南以某年某月某日塋于先茔
之次余与师鲁兄弟交尝铭其父之墓矣故不复次其世家焉铭曰藏之深固之密石可朽铭

不灭

苏子美墓志铭 欧阳修

故湖州长史苏君有贤妻杜氏自君之丧布衣蔬食居数岁提君之孤子敛其平生文章走南京号泣于其父曰吾夫屈于生犹可伸于死其父太子太师以告于予予为集次其文而序之以着君之大节与其所以屈伸得失以深诮世之君子当为国家乐育贤材者且悲君之不幸其妻卜以嘉祐元年十月某日塋君于润州丹徒县义里乡檀山里石门村又号泣于其父曰吾夫屈于人间犹可伸于地下于是杜公及君之子泌皆以书来乞铭以塋君讳舜钦字子美其上世居蜀后徙开封为开封人自君之祖讳易简以文章有名太宗时承防翰林为学士参知政事官至礼部侍郎父讳耆官至工部郎中直集贤院君少以父防太庙斋郎调蒙阳尉非所好也已而锁其防去举进士中第改光禄寺主簿知防城县丁父忧服除知长垣县迁大理评事监在京楼店务君状貌奇伟慷慨有大志少好古工为文章所至皆有善政官于京师位虽卑数上疏论朝廷大事敢道人之所难言范文正公荐君召试得集贤校理自元昊反兵出无功而天下殆于久安而困兵事天子奋然用三四大臣欲尽革众以纾民于是时范文正公与今富丞相多所设施而小人不便顾人主方信用思有以撼动未得其根以君文正公之所荐而宰相杜公壻也乃以事中君坐监进奏院祠神奏用市故纸钱防客皆一时贤俊悉坐贬逐然后中君者喜曰吾一举网尽之矣其后三四大臣继罢去天下事卒不复施为君携妻子居苏州买水石作沧浪亭日益读书大防肆于六经而时发其愤闷于歌诗至其所激往往惊绝又喜行草书皆可爱故其虽短章醉墨落笔争为人所传天下之士闻其名而慕见其所传而喜往揖其貌而竦听其论而惊以服久与其居而不能舍以去也居数年复得湖州长史庆历八年十二月某日以疾卒于苏州享年四十有一君先娶郑氏后娶杜氏三子长曰泌将作监主簿次曰液曰澈二女长适前进士陈纘次尚幼初君得罪时以奏用钱为盗无敢辨其冤者自君卒后天子感悟凡所被逐之臣复召用皆显列于朝而至今无复为君言者宜其欲求伸于地下也宜予述其得罪以死之详而使后世知其有以也既又长言以为之辞庶几并写予之所以哀君者其辞曰

谓为无力兮孰击而去之谓为有力兮胡不反子之归岂彼能而此不为善百誉而不进兮一毁终世以颠挤荒孰问兮杳难知嗟子之中兮有韞而无施文章发耀兮星日光辉虽冥冥以掩恨兮不昭昭其永垂

梅圣俞墓志铭 欧阳修

嘉祐五年京师大疫四月乙亥圣俞得疾卧城东汴阳坊明日朝之贤士大夫往问疾者骆呼属路不绝城东之人市者废行者不得往来咸惊顾相语曰兹坊所居大人谁邪何致客之多也居八日癸未圣俞卒于是贤士大夫又走吊哭如前日益多而其尤亲且旧者相与聚而谋其后事自丞相以下皆有以赙防其家粤六月某日其孤增载其柩南归以某年某月某日塋于某所圣俞字也其名尧臣姓梅氏宣州宣城人也自其家世颇能诗而从父询以仕显至圣俞遂以诗闻自武夫贵戚童儿野叟皆能道其名字虽妄愚人不能知诗义者直曰此世所贵

也吾能得之用以自矜故求者日踵门而圣俞诗遂行天下其初喜为清丽闲肆平淡久则涵演深邃间亦琢刻以出怪巧然气完力余益老以劲其应于人者多故辞非一体至于侘文章皆可喜非如唐诸子号诗人者僻固而狭陋也圣俞为人仁厚乐易未尝忤于物至其穷愁感愤有所骂讥笑谑一发于诗然用以为驩而不怨心可谓君子者也初在河南王文康公见其文叹曰二百年无此作矣其后大臣屡荐宜在馆阁尝一召试赐进士出身余輒不报嘉祐元年翰林学士赵防等十余人列言于朝曰梅某经行修明愿得留与国子诸生讲论道德作为雅颂以调咏圣化乃得国子监直讲三年冬谿于太庙御史中丞韩绛言天子且亲祠当更制乐章以荐祖考惟梅某为宜亦不报圣俞初以从父防补太庙斋郎历桐城河南河阳三县主簿以德兴县令知建德县又知襄城县监湖州盐税签署忠武镇安两军节度判官监永济仓国子监直讲累官至尚书都官员外郎尝奏其所撰唐载二十六卷多补正旧史阙繆乃命编修唐书书成未奏而卒享年五十有九曾祖讳某祖讳某皆不仕父讳某太子中舍致仕赠职方郎中母曰仙游县太君束氏又曰清河县太君张氏初娶谢氏再娶刁氏封某县君子男五人曰增曰墀曰 曰 儿一早卒女二人长适太庙斋郎薛通次尚幼圣俞学长于毛氏诗为小传二十卷其文集四十卷注孙子十三卷余尝论其诗曰世谓诗人少达而多穷盖非诗能穷人殆穷者而后工也圣俞以为知言铭曰

不戚其穷不困其鸣不蹶于难不履于倾养其和平以发厥声震越浑惶众听以惊以扬其清以播其英以成其名以告诸冥

石守道墓志铭 欧阳修

徂徠先生姓石氏名介字守道兗州奉符人也徂徠鲁东山而先生非隱者也其仕尝位于朝矣鲁之人不称其官而称其德以为徂徠鲁之望先生鲁人之所尊故因其所居山以配其有德之称曰徂徠先生者鲁人之志也先生貌厚而气完学笃而志大虽在畎亩不忘天下之忧以谓时无可为为之无不至不在其位则行其言吾言用功利施于天下不必出乎已吾言不用虽获祸咎至死而不悔其遇事发愤作为文章极陈古今治乱成败以指切当世贤愚善恶是是非非无所讳忌世俗颇骇其言由是谤议喧然而小人先嫉恶之相与出力必挤之死先生安然不惑不变曰吾道固如是吾勇过孟轲矣不幸遇疾以卒既卒而奸人有欲以奇祸中伤大臣者犹指先生以起事谓其诈死而北走契丹矣请发棺以验賴天子仁圣察其诬得不发棺而保全其妻子先生世为农家父讳丙始以仕进官至太常博士先生年二十六举进士甲科为郢州观察推官南京留守推官御史台辟主簿未至以上书论赦罢不召秩满迁某军节度掌书记代其父官于蜀为嘉州军事判官丁内外艰去官垢面跣足躬耕徂徠之下塋其五世未塋者七十丧服除召入国子监直讲是时兵讨元昊久无功海内重困天子奋然思欲振起威德而进退二三大臣增置諫官御史所以求治之意甚銳先生跃然喜曰此盛事也雅颂吾职其可已乎乃作庆厯圣德诗以褒贬大臣分别邪正累数百言诗出太山孙明复曰子祸始于此矣明复先生之师友也其后所谓奸人作奇祸者乃诗之所斥也先生自闲居徂徠后官于南京尝以经术教授及在太学益以师道自居门人弟子从之者甚众太学之兴自先生始其所为文章曰某集者若干卷曰某集者若干卷其斥佛老时文则有怪說中国论曰去三者然后可以有为其戒奸臣官女则有唐鉴曰吾非为一世监也其余喜怒哀乐必见于

文其辞博辩雄伟而忧思深邃其为言曰学者学为仁义也惟忠能忘其身笃于自信者乃可以力行也以是行于己亦以是教于人所谓尧舜禹汤文武周公孔子孟轲杨雄韩愈氏者未尝一日不诵于口思与天下之士皆为周孔之徒以致其君为尧舜之君民为尧舜之民亦未尝一日少忘于心至其违世惊众人或笑之则曰吾非狂痴者也是以君子察其行而信其言推其用心而哀其志先生直讲岁余杜祁公荐之天子拜太子中允今丞相韩公又荐之乃直集贤院又岁余始去太学通判濮州方待次于徂徕以庆历五年七月某日卒于家享年四十有一友人庐陵欧阳修哭之以诗以谓待彼谤焰熄然后先生之道明矣先生既没妻子冻馁不自胜今丞相韩公与河阳富公分俸买田以活之后二十一年其家始克塋先生于某所将塋其子师讷与其门人姜潜杜默徐遁等来告曰谤焰熄矣可以发先生之光矣敢请铭某曰吾诗不云乎子道自能久也何必吾铭遁等曰虽然鲁人之欲也乃为之铭曰徂徕之岩岩与子之德兮鲁人之所瞻汶水之汤汤与子之道兮逾远而弥长道之难行兮孔孟遑遑一世之屯兮万世之光曰吾不有命兮安在夫桓魋与臧仓自古圣贤皆然兮噫子虽毁其何伤

苏明允墓志铭 欧阳修

有蜀君子曰苏君讳洵字明允眉州眉山人也义修于家信于乡里闻于蜀之人久矣当至和嘉祐之间与其二子轼辙偕至京师翰林学士欧阳修得其所著书二十二篇献诸朝书既出而公卿士大夫争传之其二子举进士皆在高等亦以文学称于时眉山在西南数千里外一日父子隐然名动京师而苏氏文章遂擅天下君之文博辩宏伟读者悚然想见其人既见而温温似不能言及即之与居愈久而愈可爱间而出其所有愈叩而愈无穷呜呼可谓纯明笃实之君子也曾祖讳某祖讳某父讳某赠尚书职方员外郎三世皆不显职方君三子曰澹曰涣皆以文学举进士而君少独不喜学年已壮犹不知书职方君纵而不问乡闾亲族皆怪之或问其故职方君笑而不答君亦自知也年二十七始大发愤谢其素所往来少年闭户读书为文辞岁余举进士再不中又举茂材异等不中退而叹曰此不足为吾学也悉取所为文数百篇焚之益闭户读书绝笔不为文辞者五六年乃大究六经百家之说以考质古今治乱成败圣贤穷达出处之际得其粹精涵畜充溢抑而不发久之慨然曰可矣由是下笔顷刻数千言其纵横上下出入驰骤必造于深微而后止盖其禀也厚故发之迟志也愨故得之精自来京师一时后生学者皆尊其贤学其文以为师法以其父子俱知名故号老苏以别之初修为上其书召试紫微阁辞不至遂除试秘书省校书郎防太常修纂建隆以来礼书乃以为霸州文安县主簿使食其禄与陈州项城县令姚辟同修礼书为太常因革礼一百卷书成方奏未报而君以疾卒实治平三年四月某日也享年五十有八天子闻而哀之特赠光禄寺丞勅有司具舟载其丧归于蜀君娶程氏大理寺丞文应之女生三子曰景早卒轼今为某官辙某官三女皆早卒孙曰迈曰迟有文集若干卷谥法三卷君善与人交急人患难死则防养其孤乡人多德之盖晚而好易曰易之道深矣汨而不明者诸儒以附防之说乱之也去之则圣人之防见矣作易传未成而卒某年某月某日而塋于彭山之安镇乡可龙里君生于远方而学又晚成常叹曰知我者惟吾父与欧阳公也然则非余谁宜铭铭曰

苏显唐世实栲城人以官留眉蕃蕃子孙自其高曾乡里称仁伟欤明允大发于文亦既有文而又有子其存不朽其嗣弥昌呜呼明允可谓不亡

宋文鑑卷一百四十

卷一百四十一

钦定四库全书

宋文鉴卷一百四十一

宋吕祖谦编

墓志

南阳郡君谢氏墓志铭 欧阳修

庆历四年秋予友宛陵梅圣俞来自吴兴出其哭内之诗而悲曰吾妻谢氏亡矣丐我以铭而葬焉予未暇作居一歲中书七八至未尝不以谢氏铭为言且曰吾妻故太子宾客讳涛之女希深之妹也希深父子为时闻人而世显荣谢氏生于盛族年二十以归吾凡十七年而卒卒之夕敛以嫁时之衣甚矣吾贫可知也然谢氏怡然处之治其家有常法其饮食器皿虽不及丰侈而必精以防其衣无故新而澣濯缝纫必洁以完所至官舍虽庳陋而庭宇洒扫必肃以严其平居语言容止必怡以和吾穷于世久矣其出而幸与贤士大夫游而乐入则见吾妻之怡怡而忘其忧使吾不以富贵贫贱累其心者抑吾妻之助也吾尝与士大夫语谢氏多从户屏窃听之间则尽能商确其人才贤否及时事之得失皆有条理吾官吴兴或自外归必问曰今日孰与饮而乐乎闻其贤者也则悦否则叹曰君所交皆一时贤隲今与是人饮而欢邪是歲南方旱仰见飞蝗而叹曰今西兵未解天下重困盗贼暴起于两淮而天旱且蝗如此我为妇人死而得君葬我幸矣其所以能安吾贫而不困者其性识明而知道理多类此其生也迫吾之贫而没也又无以厚焉谓惟文字可以着其不朽且其平生尤知文章为可贵歿而得此庶几以慰其魂且塞予悲此吾所以请铭于子之勲也若此予忍不铭夫人享年三十七用夫恩封南阳县君二男一女以某年七月某日卒于高邮梅氏世葬宛陵以贫不能归也某年某月某日葬于润州之某县某原铭曰

高崖断谷兮京口之原山苍水深兮土厚而坚居之可乐兮卜者曰然骨肉虽土兮魂气则天何必故乡兮然后为安

张晦之墓志铭 宋祁

呜呼有宋文人张晦之之墓晦之名景江陵公安人羈尹能言长嗜学尤力未冠涉通艺文颇班班言当世务贫不治产往从崇仪使解人柳开以文自名而荐宠士类一见欢甚悉出家书畀之由是属辞益有法度开每曰今日在朝廷挈囊荐笏谁逾晦之者即厚遣使如京师时富春孙仅沛国朱严成纪李庶几号为豪英晦之敝衣与游名称借借美不容口真圣谅闇未即听政责有司精覆计偕与者十一二晦之名在第四调主大名馆陶簿年少气锐未能以智自

将坐公累为吏痛诋贬全州防赦还豪长者得罪并坐所知继为房襄二州文学参军晦之中废不用则大覃思古今为洪范王霸二书常病浮图氏怪迂诞荒塔庙日炽虽服儒衣冠者皆胡言膜拜共宠神之愍寘六经反为外典故因事见文为记传数十篇而辨析之虽与世舛驰而自信不踰云康肃陈公尧咨以西台舍人为本府雅闻晦之为言于上复选楚州宝应主簿最状应条监司以闻改大理评事知泗州昭信县淮岛伦杂冯戾祲巫晦之剪除傍祀且百所输入材瓦以完吏舍急病职劳邑人宜之转运使任其能移掌真州茶务既又请通理州事可制已报防遘疾终官下年四十九实天禧二年三月十日噫世之言材而显善而艾皆若可信如晦之终始报向独大谬不然者邪晦之防二亲有终身之戚方其间闕蓬累而竭诚尽物克襄事焉墓不用璧既窆下土实之曰千歲后无为狐兔宅不亦善乎荆人高之咸曰张氏有子矣事崇仪也崇仪欲以兄子妻之未归而亡又委禽于唐氏生二女子皆有行一男早夭晦之即世夫人奉柩以如许昌将便时来南以歲之不易久而去室康定元年著作佐郎王仪太初始得襄防柳以某月日祔塋其先茔从昭穆之图成君志也三代之讳之行则渤海胡旦及康肃公为先圻之志若表在焉平生文章门人万称集为二十五通太初与晦之再世表重节义然诺且少相友善故哀状丐文而毕此封树焉铭曰瞻才章兮懿淳孝至膺仕兮难老嗇弗予兮孰天道蹇皇皇兮晚获伸发吾怀兮露珍甫半道兮摧华轮倚庐空兮无家嗣从藁殡兮二纪梦防防兮何所止彼戚友兮义弗违奉輅柩兮来归穴虞祔兮人所悲兄弟鲜兮立后神茫茫兮安究尚立言兮参不朽

吕献可墓志铭 司马光

君讳晦字献可幼孤自力为学家于洛阳性沈厚不妄交游洛阳士人往往不之识登进士第调浮梁尉不之官厯旌德扶风主簿迁云阳令改著作佐郎知翼城县徙签书定国军节度判官通判梓州事未至官遭母防服除知大通监兼交城县召入为殿中侍御史弹劾无所避充国公主仁宗之爱女下嫁李玮薄其夫家尝因忿恚夜开禁门入诉于上献可奏宿衛不可不严公主夜叩禁门者不当听入并劾奏公主閤宦者梁怀吉梁全一窜逐之防有新除枢密副使者当时人有疑论献可与其僚直以众言陈上前谓必不可留章十七上卒与之俱罢献可得知江州久之复召还台英宗即位改起居舍人同知諫院时上有疾太后权同听政内侍郎都知任守忠久用事于中上之立非守忠意乘此与其徒间构两宫造播恶言中外恟惧献可连上两宫书开陈大义辞情切至由是慈孝益笃谗言不得行上疾久未平献可请早建东宫以安人心既而上小瘳谦默未可否事献可屡乞亲万几揽威福延近臣通下情太后间数日一御东殿渐遠庶务自谋安佚防小旱因请上亲出祷雨使外疑释然太后既归政献可复言于上今虽專听断太后辅佐先帝久多阅天下事事之大者犹宜關白咨访然后行示不敢专以报盛德任守忠谋不售而惧乃更巧为諂谀求自入于上献可曰是不可使久处左右亟言上数其前后巨恶并其党史昭锡窜于南方因上言大奸已去其余向日凭恃无礼者宜一切纵舍勿念以安反侧顷之以兵部员外郎兼侍御史知杂事执政建言欲如汉氏故事推尊濮安懿王献可率僚属极陈其不可且请治执政之罪积十余章不听乃求自贬又十余章怀知杂御史勅告纳上前曰臣言不効不敢居其位上重违大臣又嘉台官敢直言章留中不下还其勅告屡诏令就职献可与僚属具錄所上奏草纳中书称不敢奉诏固请即罪上不得已听以本官出知蘄州已而徙知晋州今上即位加集贤殿修撰知河中府未几召为刑部郎中

充盐铁副使上素闻其彊直擢为天章阁待制复知諫院迁諫议大夫权御史中丞是时有侍臣弃官家居者朝野称其材以为古今少伦天子引参大政众皆喜于得人献可独以为不然众莫不怪之居无何新为政者恃其材弃众任己厌常为奇多变更祖宗法專汲汲敛民财所爱信引防时或非其人天下失望献可屡争不能得乃抗章悉条其过失且曰误天下苍生必此人如久居庙堂必无安静之理又曰天下本无事但庸人扰之上遣使谕解献可执之愈坚乃罢中丞出知邓州虽在外遇朝廷有大得失犹言之不置防疾奏乞闲官归乡里朝防未许乃乞致仕诏提举西京崇福宫到官又乞致仕许之以熙宁四年五月甲午终于家年五十有八初王 公薨其家日益贫献可既仕常分俸之半以给宗族孤嫠者室无余资所以自奉养至俭薄其治民主于爱利而疾奸暴大抵防以公平故所至人安之屡为言职其奏草存可见者凡二百八十有九厯观古人有能得其一二已可载之列传垂示后世在献可曾何足道今特举其事系安危者书之至于进对口陈之语不可得而闻也前后三逐皆以违犯大臣所与敌者莫非秉大权天子所信向气势轧天下献可视之若无所睹正色直辞指救其非不去不已旁侧为之股栗而献可处之自如平居容貌语言恂恂和易使之不得位于朝人不过以谨厚长者名之而已矣及遇事苟义所当为疾趋径前如救焚溺所不当为畏避逺去如顾陷穽惟恐坠焉晚年病卧洛阳犹旦夕愤叹以天下事为忧过于在位任其责者曾不念其身之病子孙之贫也呜呼今之世爱君忧民发于心无所为而为之可已而不已始终不变有如献可者能几人耶故其歿之日天下识与不识皆咨嗟痛惜彼其心岂独私于献可哉献可始娶张氏故丞相邓公之孙后娶时氏故御史旦之孙封同安郡君四男长曰由庚金水主簿次曰由圣由礼由诚皆将作监主簿六女长适罗山令鞠丞之次蚤卒次适光禄寺丞吴安诗次适进士姚辉处者二人以其年八月二十日塋于伊阙县神陰乡中费里先茔之西献可病亟为手书命光为埋文光往省之至则目且瞑光伏呼曰更有以见属乎张目强视曰无光出门而献可歿噫如光者乌足以副献可之所待耶顾义不得辞哭而为铭曰

有宋名臣吕正 公之孙以忠直敢言克绍其门位则不究道则不负年则不壽名则不朽呜呼为人臣为人嗣始终无愧能底于是可谓备矣

葛源墓志铭 王安石

葛公姓也源名也宗圣字也处州之丽水公所生也明州之鄞后所迁也贯曾大考遇大考也旺累赠都官郎中考也进士公所起也洪州左司理参军吉州太和县主簿江州德化县令监兴国茶场威武军节度推官知广州四防县著作佐郎知开封府雍丘县秘书丞知泉州同安县太常博士通判建州屯田员外郎知庆成军都官员外郎知南劍州司封员外郎祠部郎中江浙荆湖福建广南提防银铜坑冶铸钱度支郎中荆湖北路提防刑狱此公之所阅官也州将之甥与异母兄毆人而甥杀之州将胁公曰两人者皆吾甥而杀人者乃其兄也我知之彼大姓也无为有司所误不然此狱也将必覆公劾不为变也此公之为司理参军也州符徙吉州行令事佗日令始至大猾吏輒诱民数百讼庭下设变诈以动令如此数日令厌事常在吏矣公至立讼者两庑下取其状视有如吏所为者使自书所诉不能书者吏受之往往不能如状穷輒曰我不知为此乃某吏教我所为悉捕劾致之法讼以故少吏亦终不得其意毛氏寡妇告其子以恩义说之不得即使人徵捕得之与间语者验其对乃书寡妇告者也穷治具服

为谋私其子孙距州溪水恶而歲租几千万碩舟善败民以输为愁公始议县置仓以受输则官漕之亦便州不听公公论之不已仓成至今赖其利此公之为主簿也中贵人击驿吏取所给过家以言府府不敢劾公曰中贵人何憚为吾民而有陵之者吾亦耻之上书论其事中贵人坐绌此公之为县于雍丘也属吏常有隙于公同进者因谗之公察其防不听以为举首此公之为州于南劍也铸钱歲十六万其所施置后以为法程此公之为银铜坑冶铸钱也鄂州崇阳大姓与人妻谋而杀其夫州受赇出之公使再劾劾者又受赇狱如初而公终以为不直其弟诉之转运使虽他在事者亦莫不以为冤复置之狱卒得其奸赇状论如法此公之为提防刑狱也甲子四百三十五公所享年也至和元年六月乙未卒之年月日也润州之丹徒县长乐乡显阳村公所塋也嘉祐元年十月壬申塋之年月日也乡邑孙氏今附以塋者公元配也万年县君范阳卢氏公继配也良肱良佐良嗣公子也妻太常博士黄知良曰金华县君公女也起进士为越州余姚县尉主公之防而请铭以塋者良嗣也论次其所得于良嗣而为之铭者临川王安石也铭曰

士窾以养交兮弛官之不思维公之所至兮乐职嗜事彼能显闻兮公则不晰不铭示后兮孰劝为瘁

苏安世墓志铭 王安石

庆历五年河北都转运使龙图直学士信都欧阳修以言事切直为权贵人所怒因其孤甥女子有狱诬以奸利事天子使三司戶部判官太常博士武功苏君与中贵人杂治当是时权贵人连内外诸怨恶修者为恶言欲倾修锐甚天下汹汹必修不能自脱苏君卒白上曰修无罪言者诬之耳于是权贵人大怒诬君以不直绌使为殿中丞泰州盐税然天子遂寤言者不得意而修等皆无恙苏君以此名闻天下嗟乎以忠为不忠而诛不当于有罪人主之大戒然古之陷此者相随属以有左右之谗而无如苏君之救是以卒至于败亡而不寤然则苏君一动其于天下岂小也哉苏君既出逐权贵人更用事凡五年之间再赦而君六徙东西南北水陆奔走輒万里其心恬然无有怨悔遇事强果未尝少屈蓋孔子所谓刚者殆苏君矣苏君之仁与智又有足称者尝通判陝府当葛怀敏之败边告急枢密使取道路戍还之卒再戍大怨即讙聚谋为变吏白闭城城中无一人敢出君徐以一骑出卒间谕止之而以便还使者戍卒喜曰防苏君吾不得生陝人曰微苏君吾其掠死矣有令刺陝西之民以为兵败亡者死既而亡者得有司治之以死而君輒纵去言上曰令民以死者为事不集也事集而亡者犹不赦恐其众相聚而为盜惟朝廷幸哀怜愚民使得自反天子以君言为然而三十州之亡者皆不死其后知坊州州税赋之无归者里正代为之输歲弊大家数十君钩治使归其主坊人不忧为里正自苏君始也苏君讳安世字梦得其先武功人后徙蜀蜀亡归于京师今为开封人也曾大考进率府副率大考讳继殿直考讳咸熙贈都官郎中君以进士起起三十二年其卒年五十九为广西转运使而官止于屯田员外郎者以君十五年不求磨勘也君娶南阳叶氏又娶清河某氏子四人台文永州推官祥文太庙斋郎炳文试将作监主簿彦文未仕女子五人适进士防稽江松单州鱼台县尉江山赵杨三人尚防君既卒之三年嘉祐二年十月庚午其子塋君扬州之江都东兴宁乡马坊村而太常博士知常州军州事临川王安石为铭曰

皇有四极周綏以福使维苏君奠我南服元元苏君不圆其方不晦其明君子之刚其枉在人我得吾直谁恻谁愠祇天之役日月有丘其下冥冥昭君无穷安石之铭

许平墓志铭 王安石

君讳平字秉之姓许氏余尝谱其世家所谓今泰州海陵县主簿者也君既与兄元相友爱称天下而自少卓犖不羁善辨说与其兄俱以智畧为当世大人所器宝元时朝廷开方畧之选以招天下异能之士而陝西大帅范文正公郑文肃公争以君所为书以荐于是得召试为太庙斋郎已而选泰州海陵县主簿贵人多荐君有大才可试以事不宜弃之州县君亦常慨然自许欲有所为然终不得一用其智能以卒噫其可哀也已士固有离世异俗独行其意骂讥笑侮困辱而不悔彼皆无众人之求而有所待于后世者也其龃齬固宜若夫智谋功名之士窥时俯仰以赴势物之防而輒不遇者乃亦不可胜数辩足以移万物而穷于用说之时谋足以夺三军而辱于右武之国此又何说哉嗟乎彼有待而不悔者其知之矣君年五十九以嘉祐某年某月某甲子塋真州之杨子县甘露乡某所之原夫人李氏子男瓌不仕璋真州司户参军琦太庙斋郎琳进士女子五人已嫁者二人进士周奉先泰州泰兴县令陶舜元铭曰

有拔而起之莫挤而止之呜呼许君而已于斯谁或使之

陈比部墓志铭 王安石

陈晋公有子五人其一人今宰相是也公晋公之中子而今宰相弟晋公讳恕事始卒在史官公讳某字某九歲用晋公恩守祕书省校书郎晋公薨恩改太常寺奉礼郎服除久之防封禅恩改大理评事监凤翔府酒税又防祀汾陰改卫尉寺丞归以最升知邵武之邵武县献文章得试学士院宰相才之议与科名公固辞亲在愿得进官职也不愿得科名从之通判秀州改大理寺丞归又献文章表乞治剧郡得淮阳军改太子中舍今上即位恩加改殿中丞是歲赐绯衣银鱼知临江军还得睦州荐者数人天子以公名属审官又徙知遂州以齐国太夫人疾辞还改虞部员外郎上便宜数事得引对因自赞天子欲稍进用之而遭齐国太夫人之防以去居无何睦州人王稷上书斥公赦前数事服除犹坐是监防州税明道元年恩改比部员外郎通判建州改驾部用举者徙知吉州坐法免起为比部监泗州粮料院又坐法免起为虞部监饶州钱监复得比部归羈居京师久之乃出监江陰军酒税道疾病上书自言先臣恕得幸先皇帝至大臣臣阶先臣以得仕屡进所学防记识方壮少时颇汲汲欲自奋取一日之効以卒事陛下之分而孤行单立无党友之助又薄命不幸数遭小人以见困蹙负先臣余教辱陛下器使之恩今老矣念终无以报盛德其心媿耻夙夜忧畏以故得疾病且死无田园以归无强有力子弟以养唯男一人世昌去年为进士得嘉庆县院解臣兄在中书奏不得试礼部今当为遠官去臣旁遠甚陛下怜之幸听臣分司改世昌苏常间一官以卒养臣天地之赐也臣诚穷即无自言谁当为臣言者乎书入未报竟卒于江宁得年若干时某年月也夫人某氏子男两人世昌泉之晋江主簿防世长前死女两人皆已嫁主簿将以某年月塋公某处塋有日使来乞铭初公为临江军先君为之佐其后二十五年安石得主簿于淮南而兄事之仍世有好义不可以辞无铭也公名臣子少壮得美仕间以文艺自进意自以为且贵富世其家而遭

平世防以文法持臣下故其材不得有所肆而卒以齟齬穷其感激怨怼往往见于文辞主簿离其藁为二十卷读之知其心之所存也而其求分司语尤悲因掇其大防而存之噫其亦可悲也夫铭曰

于此有木焉一本而中分其材均树之时又均或断而焚或剖以为牺尊谁令然耶其偶然邪吾又何嗟

王深甫墓志铭 王安石

吾友深父书足以致其言言足以遂其志志欲以圣人之道为已任葢非至于命弗止也故不为小廉曲谨以投众人耳目而取舍进退去就必度于仁义世皆称其学问文章行治然真知其人者不多而多见谓迂濶不足趣时合变嗟乎乃是所以为深父也令深父而有以合乎彼则必无以同乎此矣尝独以谓天之生夫人也殆将以壽考成其才使有待而后显以施泽于天下或者诱其言以明先王之道觉后世之民呜呼孰以为道不任于天德不酬于人而今死矣甚哉圣人君子之难知也以孟轲之圣而弟子所赖止于管仲晏婴况余人乎至于扬雄尤当世之所贱简其为门人者一侯芭而已芭称雄书以为胜周易易不可胜也芭尚不为知雄者而人皆曰古之人生无所遇合至其没久而后世莫不知若轲雄者其没皆过千岁读其书知其意者甚少则后世所谓知者未必真也夫此两人以老而终幸能著书书具在然尚如此嗟乎深父其智虽能知轲其于为雄虽几可以无悔然其志未就其书未具而既早死岂特无所遇于今又将无所传于后天生夫人也而命之如此葢非余所能知也深父讳回本河南王氏其后自光州之固始迁福州之候官为候官人者三世曾祖讳某某官祖讳某某官考讳某某尚书兵部员外郎兵部葬颍州之汝陰故今为汝陰人深父尝以进士补亳州卫真县主簿岁余自免去有劝之仕者辄辞以養母其卒以治平二年七月二十八日年四十三于是朝廷用荐者以为某军节度推官知陈州南顿县事书下而深父死矣夫人曾氏先若干日卒子男一人某女二人皆尚幼诸弟以某年某月某日葬深父某县某乡某里以曾氏祔铭曰

呜呼深父维德之仔肩以廸祖武厥艰荒遐力必践取莫吾知庸亦莫吾侮神则尚反归形此土

赵师旦墓志铭 王安石

依智高反广南攻破诸州州将之以义死者二人而康州赵君余尝知其为贤者也君用叔祖防试将作监主簿迁许州阳翟县主簿潭州司法参军数以公事抗韩运使连劾奏君而州将为君讼于朝以故得无坐用举者为温州乐清县令又用举者就除宁海军节度推官知衢州江山縣防治出已当于民心而吏不能得民一钱弃物道上人无敢取者余尝至衢州而君之去江山葢已久矣衢人尚思君之所为而称說之不容口又用举者改大理寺丞知徐州彭城县祀明堂恩改太子右赞善大夫移知康州至二月而依智高来攻君悉其卒三百以战智高为之少却是夜君顾夫人取州印佩之使负其子以匿曰明日贼必大至吾知不敌然不可以去汝留死无为也明日战不胜遂抗贼以死于是君年四十二兵马监押马贵者与卒三百人

亦皆死而无一入亡者初君战时马贵惶扰至不能食饮君独饱如平时至夜贵卧不能着寝君即大斲比明而后寤夫死生之故亦大矣而君所以处之如此呜呼其于义与命可谓能安之矣君死之后一日而州司理谭必始为之棺敛又百日而君弟至遂护其丧归葬至江山江山人老幼相携扶祭哭其迎君丧有数百里者而康州之人亦请于安抚使而为君置屋以祠安抚使以君之事闻天子赠君光禄少卿官其一子覲右侍禁官其弟子试将作监主簿又以其弟润州録事参军师陟为大理寺丞签书泰州军事判官防公事君讳师旦字潜叔其先覃州之成武人曾祖讳晟赠太师祖讳和尚书比部郎中赠光禄少卿考讳应言太常博士赠尚书屯田郎中自君之祖始去成武而葬楚州之山阳故今为山阳人而君弟以嘉祐五年正月十六日葬君山阳上乡仁和之原于是夫人王氏亦卒矣遂举其丧以祔铭曰

可以无祸有功于时玩君安荣相顾莫为谁其视死高蹈不疑呜呼康州铭以昭之

宋文鉴卷一百四十一

卷一百四十二

钦定四库全书

宋文鉴卷一百四十二

宋吕祖谦编

墓志

孔宁极墓志铭 王安石

先生讳旼字宁极睦州桐庐县尉讳询之曾孙赠国子博士讳延滔之孙尚书都官员外郎讳昭亮之子自都官而上至孔子四十五世先生尝欲举进士已而悔曰吾岂有不得已于此邪遂居于汝州之龙兴山而上塋其亲于汝汝人争讼之不可平者不听有司而听先生之一言不羞犯有司之刑而以不得于先生为耻庆历七年诏求天下行义之士而守臣以先生应诏于是朝廷赐之米帛又勅州县除其杂赋嘉祐三年近臣多言先生有道德可用而执政度以为不肯屈除守秘书省校书郎致仕四年近臣又多以为言乃召以为国子监直讲先生辞乃除守光禄寺丞致仕五年大臣有请先生为其属县者于是天子以知汝州龙兴县事先生又辞辞未听而六月某日先生终于家年六十七大臣有为之请命者乃特赠太常丞至七月某日弟防塋先生于尧山都官之兆而以夫人李氏祔李氏故大理评事昌符之女生一女嫁为士人妻而先物故先生事父母至孝居防如礼遇人恂恂虽仆奴不忍以辞气加焉衣食与田桑有余辄以赙其乡里贷而后不能偿者未尝问也未尝疑人人亦以故不忍欺之而世之传先生者多异学士大夫有知而能言者盖先生孝弟忠信无求于世足以使其乡人畏服之如此而先生未尝为异也先生博学尤喜易未尝著书独大衍一篇传于世考其行治非有得于内其孰能致此耶当汉之东徙高守节之士而亦以故成俗故当世处士之间独多于后世乃至如今知名贤而处者盖亦无有几人岂世之所不尚遂湮没而无闻抑士之趋操亦有待于世邪若先生固不为有待于世而卓然自见于时岂非所谓豪杰之士者哉其可铭也已铭曰

有入而不出以身易物有往而不反以私其佚呜呼先生好洁而无尤匪佚之为私维志之求

戚舜臣墓志铭 曾巩

余观三王所以教天下之士而至于节文之者知士之出于其时者皆世其道德盖有以然也去三王千数百年之间教法既以坏士之学行世其家若汉之袁氏杨氏陈氏唐之柳氏其操义风防有以厉天下矫异世否邪以余所闻若宋之戚氏其事可以次叙焉公其家子也叙曰公宋之楚丘人大父讳同文唐天祐元年生历五代入宋皆不仕以文学义行为学者师歿其徒相与号为正素先生后以子贵赠兵部侍郎考讳纶事太宗真宗以贤能为枢密直学士与

其兄职方郎中维以友爱闻祥符天禧之间学士以论天书绌而郎中考亦举贤良不就以为曹国翊善不合去盖其父子兄弟之出处如此学士后以子贵赠司徒公名舜臣字世佐司徒之少子也防谨恂恂举措必以礼择然后出言与其兄某官舜宾某官舜举复以友爱能帅其家有先人法度闻自天祐至今百有五十余年天下六易士之名一能守一善或身不终或至子孙而失者多矣而戚氏之世德独久如此何其盛也然世之谈者方多人之囂子儉孙隆名极位世世苟得者以为能守其业是本何理哉公少以防补将作监主簿然三十犹在司徒之侧司徒终而贫乃出监雍丘税又监衢州酒迁知舒州太湖县兼提举茶场治有 爱民乞留从之后三年乃得代献诗言赋茶之苛歲用万杖愿弃勿采以感动当世归监在京盐院言盐之利宜通商听之出通判泗州能使转运使不能以暴斂侵其民而民之养人者得以其义贯死又通判濮州当王则反于冀民相惊几乱公斩一人摇濮中者惊乃止已而提防刑狱以为功得改官公自不言转知抚州其治大方务除苛去烦州之诡祠有太常号者祠至百余所公悉除之民大化服徙知南安军至未及有所施为而公盖已病矣皇祐四年六月七日卒于官年五十有七自主簿凡十一迁其官至尚书虞部郎中公濮州之归也以其属与公之配陈氏凡十三防葬宋之北原皇祐六年正月八日公之子师道遂以从陈氏塋戚氏者衞之大夫孙文子食于河上之邑曰戚为姬姓之后至后世失其所食邑而更自别曰戚氏汉有以郎从高祖封临辕侯者曰戚鳬侯四世而失梁有以三礼为博士入陈卒者曰戚袞袞称吴郡盐官人侍郎之曾祖曰遠祖曰琮父曰圭其谱曰琮自长丰之戚孙徙居楚丘故今为楚丘人此戚氏之先后可见者也观公之守其业者可以知其恭观公之施于事者可以知其厚矣然人亦少有能爱之者盖世之为聪明立声威者虽荒謬悖冒无不遇于世至恭让质直不能驰骋而遇困蹙者独不可称数余甚异焉夫赴时趣务则材者固亦重矣而立人成俗则洁身积行岂可轻也哉然时之取舍若此亦其不幸不遇处之各适其理也铭曰

隆隆戚宗自姬出临辕盐官耀名实侍郎家梁自祖琮违世恬幽树儒术司徒郎中艺且贤诋符绳公事魁崛恂恂南安得家规庄容恣辞若遵律盛哉徽名后宜闻刻铭方珉告幽室

钱纯老墓志铭 曾 巩

公钱氏也故为王家有吴越之地五世祖鏐号武肃王高祖元瓘文穆王曾祖俨昭化军节度使祖昭慈赠左卫将军考顺之左侍禁閤门祗候赠尚书刑部侍郎公应说书进士贤良方正能直言极谏皆中科历宣州旌德县尉大理寺丞殿中丞太常博士尚书祠部度司封员外郎工部郎中换朝奉大夫充国子监直讲编校集贤院书籍迁祕阁校理选为修英宗实录院检讨官直舍人院同修起居注遂知制诰直学士院迁枢密直学士翰林侍读学士尝通判秀州知婺州入判尚书考功改开封府判官出知邓州入判尚书吏部流内铨兼判集贤院又兼判军器监兼提举司天监公事公防孤家贫母嫁既长还依其族之大人刻励就学并日夜忘寝食于书无所不治已通其大防至于分章别句类数辨名丛细委曲无不究尽其见于文辞闳放隳伟故出而与天下之士挟其所有较于有司常出众上以其故名动一时其为尉及为秀婺邓更革防坏理具设张为直讲以能教诱学者归之为校理属英宗之初慈圣光献皇后听政公三上书请还政天子为吏部谨绳墨选者称其平为开封以慈恕简静为体不求智名以投世取显为公属者有不与公合然公遇之未尝有厚薄意士以此多公而为公属者后卒亦

心服也公于众不矫矫为异亦不翕翕为同以其故人莫能亲疎至于势利之际人所竞逐公方隤然迹与众遠故虽有夸者亦不以公为可忌也公之为判官也府尝有狱或探大臣意谓欲有所附致公不为动徐论其意而已公平居乐易无崖岸及至有所特立人固有所不能及者类如此也公为人谨畏清约与人交淡然久而后知其笃也公之先既籍疆土归天子其后至昭化守和州十有八年以卒诏葬和州子孙因家焉至公始葬其母于苏州吴县龙冈村之天平山故今又为苏州人公讳藻字纯老封仁和县开国伯赐服金紫年六十有一元丰五年正月庚寅卒于位某年某月某甲子葬天平山从其母永嘉郡太君丁氏之兆公妻孙氏泰兴县君男曰某曰某蚤世曰 某官孙曰某某官公卒上驰使临视其家知其贫特赐钱五十万而官其弟若子孙凡三人公与余尝为僚相善其且歿以遗事属余而其家因来乞铭铭曰钱姓武王五氏之孙开迹东南以学以文学则知经文则能赋矧曰方闻扬声天路廼校中书廼掌帝制廼列禁林从容讽议治已伊何维直而清治人伊何维简而平人以怒迁公能自克人以利向公能不惑士夫所望天子所器胡不百年胡不三事龙冈之宅考卜维新公安于此尚利后人

孙适墓志铭 曾 巩

黟县之孙氏有起进士为尚书工部郎中广南西路转运使以卒者讳抗以文学见于世其葬在黟之上林有子亦起进士为永州推官以卒卒时年二十有八者讳适亦以文学见其葬在其父左将葬其弟邈以告而乞铭于南丰曾巩其叙曰孙氏世家富春唐有徙歙之黟县者讳师睦始自别为黟县之孙氏师睦生讳延绪延绪生旦旦生讳遂良以予恩为尚书职方员外郎职方生工部工部实生君君年十有四辞亲学问江东已有闻于人往从临川王安石受学安石称之后主越州上虞簿去以父恩得永州父卒万里致防疾不忍废事既葬携扶防老将就食淮南疾益革卒于池州大安镇实至和二年始工部为御史不合而出及使南方仆且起遽卒君尤自力学行谓蕴必发其在君又此君于学问好其治乱得失之说不狃近卑于文以古为归不夸以浮虽素羸不废书虽进不怠以止既肆而通矣而不得极其至其铭曰

孙世来黟拔身艰故为世闻家始自工部工部孰有有书百篇永州之学自其父传其果以力其敏以明内有其质外以华英再以不就其后当侈君不有子君多兄弟

沈率府墓志铭 曾 巩

君讳某字某姓沈氏自太子家令约家于吴兴故世为吴兴人至君之大父讳某考讳某始自吴兴之东林徙家于钱塘故今为钱塘人君以宗室密州观察使宗旦恩即其家得为太子右清道率府副率致仕又以祀明堂恩迁太子右司御率府副率兼官检校国子祭酒兼监察御史阶银青光禄大夫勲武骑尉蓋密州观察使宗旦者今天子之侄潞王之孙而其母夫人蓋君之侄也君为人质朴无外饰其居乡间寬然长者也其事父兄能力以严眎族人能爱以均虽饶财为大家而衣服饮食自与尤寡约至人有急归我则惟财赴之无錙铢顾惜意隣里歲饥輒发仓以救人有欺其财者皆不校既老治其家事不肯懈曰吾先人之所以传我也处其子孙不以逸曰所以使汝守吾先人之法也嘉祐二年三月一日以疾卒于家享年七十有六

其年十一月十五日葬钱塘之西城初娶吴氏再娶车氏某县君其葬也吴氏实从子三人曰晔曰晄曰时孙八人曰沔曰溱曰沂曰淑曰灌曰湜曰渐曰瀚曾孙三人曰师杨曰师荀曰师轲时沔沂皆举进士余亦皆有学行盖君之教也铭曰

赫赫宗子保藩于密天子曰嘻汝维沈宗予假汝宠锡其外亲东宫之属有长衛军命君于家俾休其老以偃以侧服章华好天子命我匪我有求隤然顺退媚于林丘不蕴于机不阻为畦曰遠无仇曰近无疵里巷之依惟此令人流问余泽化其子孙惟身之祥既壽而康惟后之祥宜炽而昌惟墓有域其藏有石刻此铭诗昭示无极

宋文鉴卷一百四十二

卷一百四十三

钦定四库全书

宋文鉴卷一百四十三

宋吕祖谦编

墓志

程伯淳墓志铭 韩维

伯淳姓程氏讳顥其先有为周大司马者曰乔伯封于程后遂以为氏高祖赠太子少师讳羽有功太宗朝赐第室京师居再世迁河南今为河南人先生生而秀爽异于常儿才数岁诵诗书强记过絶人户部侍郎彭公季长一见异之遂许妻以女举进士中第调京兆鄠县主簿南山有石佛像浮屠岁传佛首放光则远近男女昼夜集防观不止为县者畏其神莫敢禁先生始至诘其徒曰吾闻石像岁现光有诸曰然戒之曰光现必先告我我当取其首视之自是不复有光矣府境大水诸县仓卒兴役皆狼狈失措置惟先生所治饮食芟舍无一不具时暑甚疫人病多死独鄠人无死者监司欲荐之问其所欲先生答以荐士当以才之所堪不当问所欲避亲嫌移江宁上元县主簿田税不均比他邑尤甚先生为令画法民不知扰而税遂均防令罢摄邑事牒诉日不减三二百数先生处之不阅月民讼遂简江南俗种稻赖塘陂以溉盛夏塘溃计非千夫不能塞故事当言之府禀之监司然后计功调役先生曰比如是苗槁矣救民获罪所不辞也遽发民塞之岁则大穰仁宗升遐遗制官吏成服三日除三日旦知府事王贄率羣官将释服先生进曰请尽今日贄怒不从先生曰公自除之某非至夜不敢释一府视君亦莫敢除移泽州晋城县令民以事至庭下者必教之以事父兄奉长上之道暇则亲至诸乡校召父老与之语儿童读书者为正其章句置师不善则易之初俗甚野不知为学后数年服儒衣冠者遂众乡里远近为位保使之力役相助患难相恤奸伪无所容孤防老疾者责亲党使毋失所行旅出于其涂者疾病皆有所养三年盗无剽刼民无鬪死者河东路财赋不充官有科买则物价腾踊岁为民患先生计所须使富家预储其物定价而出之富家不失息而知民所费比旧才十二三县库有杂纳钱数百千常借以补助民力部使者至则告以此钱令自用而不敢私使者亮君之诚亦不问先时民惮差役互相纠诉乡邻往往为仇先生尽得民产厚薄按籍而命之莫有辞者义勇常以农隙讲事然但文具而已先生至晋城之民遂为精兵用荐者改著作佐郎寻以御史中丞吕公晦叔荐授太子中允权监察御史里行神宗素闻先生名陛对之日从容咨访比二三见遂期以显用前后进说大要以正心窒欲求贤育材为先尝言人主当防未萌之欲神宗俯身拱手曰当为卿戒之时王荆公为宰相多所措置先生每进见必为上陈君道以至诚仁爱为本不当及功利又极陈治道神宗曰此尧舜之事朕何敢当先生愀然曰陛下有此言非天下之福也章数十上论辅臣不同心小臣与大计卖祠部牒青苗取息提举官多非其人命出不由门下兴利之臣日进尚德之风 衰荆公虽与先生

异论而尝目君以忠信言既数不用恳求外补神宗犹重其去上章及面请至十数不许遂阖门待罪差权发遣京西路提防刑狱复上章曰臣言是愿行之如其妄当赐显黜请罪而获迁失刑赏矣改差签书镇宁军节度判官事河清卒法不他役时中贵人程昉为外都水怙势凌蔑州郡欲尽取诸埽兵治二股河先生拒以法昉请于朝命以八百人与之天方大寒众不胜役溃而归城门吏来报一府相视畏昉不敢纳先生曰此逃死自归休三日而复役曹村决先生方护小吴埽知州军事刘涣以急告先生夜驰至州谓涣曰曹村决京城可虞臣子之分身可塞亦为之请尽以厢兵见付事或未集公当率禁兵继之径走埽下谕士卒曰朝廷养尔曹正为缓急尔知曹村决则注京城乎吾与尔以身扞之众皆感激自効决口将合有大木自中流而下先生谓众曰得彼木横流入口吾事济矣语已木遂横众以谓至诚所致郊祀霈恩先生曰吾罪涤可以去矣遂求监临得西京洛河竹木务荐者言君未尝叙年劳迁秩特改太常丞其后彗星见诏求直言先生极论时政语甚切直还朝廷差知扶沟县事广济河出县境滨河奸民不治生业专以胁取舟人物为事岁必焚舟数十以立威先生始至捕一人使列其党与得数十辈不复根治旧恶分地而处之使以挽舟为业且察奸不变者自是焚舟之患遂绝畿县民税重岁常以赦获蠲免然良农输率以时而稽故获免者皆顽民先生与之约前获免者后必如期而足于是泽始均司农建言天下输役钱达户四等而畿内独止三请及第四先生力陈不可诸邑赖以皆免水灾民饥先生请发粟贷之邻邑亦请司农怒遣使阅实而邻邑令遽自陈谷且登可无贷使至谓先生曰盍亦自陈先生请贷不已遂得谷六千石饥者以济司农亦怒视贷籍而所赋不等檄县杖主吏先生言济饥当以口而不当以户之高下且令实为之非吏罪乃已内侍都知王中正行按保甲所至官吏多见慢辱诸邑供帐竞务华洁以悦其意主吏以请先生曰吾邑贫安能效他邑且取于民法所禁令有故青帐可用之先生在邑岁余中正往来境上卒不入有犯窃盗者先生谓曰汝能改行吾薄汝过盗叩头愿自新后数月复穿窬捕吏及门盗告其妻曰吾与太丞约不复为盗今何面目见之遂自缢官制行改奉议郎朝廷遣官括牧地民田当没者千顷往往持累世券契自明皆弗用诏改税作租许卖易如私田民乃服先生犹不可指地官至谓先生曰民愿服而君不许何也先生曰民徒知今日不加赋而不知后日增租夺田则失业死矣因为言仕者当以仁厚为心不可便已以害人官感动谢曰宁受责不敢违公命遂去之他邑邻邑民犯盗系县狱而逸更赦犹以特防罢先生邑事邑人诣开封及司农乞留者以千数先生之去县不使人知老稚追及境上攀挽号哭不肯去以亲老求折资便养得监汝州酒税今上嗣位防改承议郎召为宗正寺丞未行以疾卒元丰八年六月十五日也享年五十有四士大夫识与不识莫不伤吊以朝廷失贤者为恨父响太中大夫致仕时年八十母 氏寿安县君妻彭氏仁和县君皆先君以卒五子三早卒曰端懿蔡州汝阳县主簿曰端本举进士四女三夭一适假承务郎朱纯之卜得卒之岁十月乙酉塋于伊川之先茔先生于书无所不读自浮屠老子庄列莫不思索究极以知其意而卒宅于吾圣人之道其持已清峻若不可及而与人甚恕而温论治道卓乎至于无能名而应世接物莫不曲尽其宜苟善于君矣爵禄可舍也苟利于民矣法禁不避也自元丰以来论贤士大夫宜在天子左右者君必与焉先生之罢扶沟贫无以家至颍昌而寓止焉大夫以清德退君弟頤正叔乐道不仕先生与正叔朝夕就养无违志闺门之内雍肃如礼家无儋石之储而愉愉也予方守颍昌遂得从先生游先生不以老耄弃我周旋启告所以为益良厚故于其亡也哭之加哀而铭不以辞铭曰善乎孟轲之言义命也盖不知义不足以立命不知命不足以存义先生居官不问内外大小率所言所事一出于正虽贵势豪力不为少变呜呼其处义命

可谓兼之矣

邵古墓志铭 陈 绎

河南邵尧夫执亲防之三月泣为书以告其里人陈绎曰我先君以壽考终以士礼葬葬有日愿凿文以识其墓余与尧夫游知尧夫者从而知其先君亦隱君子也铭固不让君讳古字天叟其姓姬出自召公别封燕世为燕人不絕祖讳令进善骑射歷事太祖皇帝以军校尉老归范阳戎难避居上谷又徙中山转衡漳而家焉父讳德新读书为儒者早卒君生衡漳才十一歲而孤能事母孝力贫且养长益好学必求义理之尽余二十年而终母防于衛天圣中尝登苏门山顾谓其子雍曰若闻孙登之为人乎吾所尚也遂卜隱居于山下异时尧夫侍亲往来洛阳见山川水竹之胜人情舒暇始得闲旷之地架屋竹间水流其闲浩然其趣也因自号伊川丈人忽一日得小疾逮旬浹饮水不食谓其家曰吾今七十九矣逢时太平而康而壽有子若孙贫且自如没无恨矣虽然身无有于物慎勿为浮屠事以荐吾死惟择高垵地藏焉幸速朽尔言絕而逝实治平元年正月朔日也君性简寡独喜文字学用声律韵类古今切正为之解曰正声正字正音者合三一篇先娶李氏生子雍即尧夫也再娶杨氏次子睦举进士一女适卢氏孙男三人皆防呜呼先生有道者欤有子而贤塋之祭之其可无铭铭曰

世范阳家伊川卒十月葬乙未神陰原原西南

范蜀公墓志铭 苏 轼

熙宁元丰间士大夫论天下贤者必曰君实景仁其道德风流足以师表当世其议论可否足以荣辱天下二公蓋相得欢甚皆自以为莫及曰吾与子生同志死当同传而天下之人亦无敢优劣之者二公既约更相为传而后死者则志其墓故君实为景仁传其畧曰吕献可之先见景仁之勇决皆予所不及也轼幸得游二公间知其平生为详蓋其用舍大节皆不谋而同如仁宗时论立皇嗣英宗时论濮安懿王称号神宗时论新法其言若出一人相先后如左右手故君实常谓人曰吾与景仁兄弟也但姓不同耳然至于论钟律则反复相非终身不能相一君子是以知二公非苟同者君实之没轼既状其行事以授景仁景仁志其墓而轼表其墓道今景仁之墓其子孙皆以为君实既没非予谁当志之且吾先君子之益友也其可以辞公姓范氏讳镇字景仁其先自长安徙蜀六世祖隆始塋成都之华阳曾祖讳昌祐妣索氏祖讳璩妣张氏累世皆不仕考讳度贈开府仪同三司妣李氏贈荣国太夫人庞氏贈昌国太夫人开府以文藝节行为蜀守张咏所知有子三人长曰鎡终陇城令次曰锴终衛尉寺丞公其季也四歲而孤从二兄为学薛奎守蜀道遇鎡求士可客者鎡以公对公时年十八奎与语奇之曰大范恐不壽其季廊庙人也还朝与公俱或问奎入蜀所得曰得一伟人当以文学名于世时故相宋庠与弟祁名重一时见公称之相与为布衣交由是名动场屋举进士为礼部第一故事殿廷唱第过三人则礼部第一人者必越次抗声自陈因擢置上第公不肯自言至第七十九人乃出拜退就列无一言廷中皆异之释褐为新安主簿宋綬留守西京召置国子监助教诸生秩满又荐诸朝为东监直讲用参知政事王举正荐召试学士院除馆阁校勘充编修唐书官当迁校理宰相庞籍言公有异材恬于进取特除直祕阁为开封府推官擢起居舍人

知諫院兼管勾国子监上疏论民力困弊请约祖宗以来官吏兵数酌取其中为定制以今赋入之数十七为经费而储其三以备水旱非常又言古者冢宰制国用唐以宰相兼盐铁转运或判戸部度支今中书主民枢密主兵三司主财各不相知故财已匮而枢密益兵无穷民已困而三司取财不已请使中书枢密通知兵民财利大计与三司同制国用堊温成皇后太常议礼前谓之园陵宰相刘沆前为监护使后为园陵使公言尝闻法吏舞法矣未闻礼官舞礼也请诘问前后议异同状又请罢焚瘞锦绣珠玉以纾国用从之时有敕凡内降不如律令者令中书枢密院及所属执奏未及一月而内臣无故改官者一日至五六人公乞正大臣被诏故违不执奏之罪石全斌以护温成堊除观察使凡治堊事者皆迁两官公言章献章懿章三太后之堊推恩皆无此比乞追还全斌等告敕文彦博富弼入相百官郊迎时两制不得诣宰相居第百官不得间见公言隆之以虚礼不若开之以至诚乞罢郊迎而除谒禁以通天下之情议减任子及间歳取士皆公发之又乞令宗室属疎者补外官仁宗曰卿言是也顾恐天下谓朕不能睦族耳公曰陛下甄别其贤者显用之不没其能乃所以睦族也虽不行至熙宁初卒如公言仁宗性寛容言事者务许以为名或诬人陰私公独引大体畧细故时陈执中为相公尝论其无学术非宰相器及执中嬖妾笞杀婢御史劾奏欲逐去之公言今陰阳不和财匱民困盜賊滋炽狱犴充斥执中当任其咎闺門之私非所以责宰相识者韪之仁宗即位三十五年未有继嗣嘉祐初得疾中外危恐不知所为公独奋曰天下事尚有大于此者乎即上疏曰太祖舍其子而立太宗此天下之大公也周王既薨真宗取宗室子养之宫中此天下之大虑也愿陛下以太祖之心行真宗故事择宗室贤者异其礼物而试之政事以系天下心章累上不报因闔門请罪防有星变其占为急兵公言国本未立若变起仓卒祸不可以前料兵孰急于此者乎今陛下得臣疏不以留中而付中书是欲使大臣奉行也臣两至中书大臣皆设辞以拒臣是陛下欲为宗庙社稷计而大臣不欲也臣窃原其意特恐行之而陛下中变耳中变之祸不过于死而国本不立万一有如天象所告急兵之忧则其祸岂独一死而已哉夫中变之祸死而无愧急兵之忧死且有罪愿以此示大臣使自择而审处焉闻者为之股栗除兼侍御史知杂事公以言不从固辞不受执政谓公上之犹豫大臣尝建此防矣今闻言已入为之甚难公复移书执政曰事当论其是非不当问其难易速则济缓则不及此圣贤所以贵机防也诸公言今日难于前日安知他日不难于今日乎凡见上面陈者三公泣上亦泣曰朕知卿忠卿言是也当更俟三二年凡章十九上待罪百余日鬓发为白朝廷不能夺乃罢知諫院改集贤殿修撰判流内铨修起居注除知制诰公虽罢言职而无歳不言儲嗣事以仁宗春秋益高每因事及之冀以感动上心及为知制诰正谢上殿面论之曰陛下许臣今复三年矣愿早定大计明年又因裕享献赋以讽其后韩琦卒定防立英宗迁翰林学士充史馆修撰改右諫议大夫英宗即位迁给事中充仁宗山陵礼仪使坐误迁宰臣官改翰林侍读学士复为翰林学士中书奏请追尊濮安懿王下两制议以为宜称皇伯高官大国极其尊荣非执政意更下尚书省集议已而台諫争言其不可乃下诏罢议令礼官检详典礼以闻公时判太常寺率礼官上言汉宣帝于昭帝为孙光武于平帝为祖则其父容可以称皇考然议者犹非之谓其以小宗合大宗之統也今陛下既考仁宗又考濮安懿王则其失非特汉光武之比矣凡称帝若皇若皇考立寢庙论昭穆皆非是于是具列仪礼及汉儒论议魏明帝诏为五篇奏之以翰林侍读学士出知陈州陈饥公至三日发库廩三万贯石以贷不及奏监司绳之急公上书自劾诏原之是歳大熟所贷悉还陈人至今思之神宗即位迁礼部侍郎召还复为翰林学士兼侍读羣牧使勾当三班院知通进银台司公言故事門下封駁制勅省审章奏纠举违滯着

于所授勅其后刊去故职寝废请复之使知所守从之纠察在京刑狱王安石为政始变更法令改常平为青苗法公上疏曰常平之法始于汉之盛时视谷贵贱发敛以便农末最为近古不可改而青苗行于唐之衰乱不足法且陛下疾富民之多取而少取之此正百步与五十之间耳今有二人坐市贸易一人下其直以相倾夺则人皆知恶之其可以朝廷而行市道之所恶乎疏三上不报迺英阁进读与吕 卿争论上前因论旧法预买防绢亦青苗之比公曰预买亦弊法也若陛下躬节俭府库有余当并预买去奈何更以为比乎韩琦上疏极论新法之害安石使送条例司疏駁之谏官李常乞罢青苗钱安石令常分析公皆封还其诏诏五下公执如初司马光除枢密副使光以所言不行不敢就职诏许词免公再封还之上知公不可夺以诏直付光不由门下公奏由臣不才使陛下废法有司失职乞解银台司许之防有诏举谏官公以轼应诏而御史知杂谢景温弹奏轼罪公又举孔文仲为贤良文仲对策极论新法之害安石怒罢文仲归故官公上疏争之不报时年六十三即上言臣言不行无颜复立于朝请致仕疏五上最后指言安石以喜怒赏罚事曰陛下有纳谏之资大臣进拒谏之计陛下有爱民之性大臣用残民之术安石大怒自草制极口诋公落翰林学士以本官致仕闻者皆为公惧公上表谢其畧曰虽曰乞身而去敢忘忧国之心又曰望陛下集羣议为耳目以除壅蔽之奸任老成为腹心以养和平之福天下闻而壮之安石虽诋之深人更以为荣焉公既退居専以读书赋诗自娱客至輒置酒尽欢或劝公称疾杜门公曰死生祸福天也吾其如天何同天节乞随班上 壽许之遂着为令久之归蜀与亲旧乐饮振施其贫者暮年而后还轼得罪下御史台狱索公与往来书疏文字甚急公犹上书救轼不已朝廷有大事輒言之官制行改正议大夫今上即位迁光禄大夫初英宗即位祔仁宗主而迁 僖祖及神宗即位复还 僖祖而迁顺祖公上言太祖起宋州有天下与汉高祖同 僖祖不当复还乞下百官议不报及上即位公又言乞迁 僖祖正太祖东向之位时年几八十矣韩维上言公在仁宗朝首开建储之议其后大臣继有论奏先帝追録其言存没皆推恩而镇未尝以语人人亦莫为言者虽 顔子不伐善介之推不言禄不能过也悉以公十九疏上之拜端明殿学士特诏长子清平县令百揆改宣德郎且起公兼侍读提举中太一宫诏语有曰西伯善养二老来归汉室卑词四臣入侍为我强起无或憚勤公固辞不起天下益高之改提举嵩山崇福宫公仲兄之孙祖禹为著作郎谒告省公于许因复赐诏及龙茶一合存问甚厚数月复告老进银青光禄大夫再致仕初仁宗命李照改定大乐下王朴乐三律皇祐中又使胡瑗等考正公与司马光皆与公上疏论律尺之法又与光往复论难凡数万言自以为独得于心元丰三年神宗诏公与刘几定乐公曰定乐当先正律上曰然虽有师旷之聪不以六律不能正五音公作律尺龠合升斗豆区鬴斛欲图上之又乞访求真黍以定黄钟而刘几即用李照乐加用四清声而奏乐成诏罢局赐赉有加公谢曰此刘几乐也臣何与焉及提举崇福宫欲造乐献之自以为嫌乃先请致仕既得谢请太府铜为之逾年乃成比李照乐下一律有奇二圣御延和殿召执政同观赐诏加 獎以乐下太常诏三省侍从台阁之臣皆往观焉时公已属疾乐奏三日而薨实元祐三年闰十二月癸卯朔享年八十一 讣闻辍视朝一日赠右金紫光禄大夫諡曰忠文公虽以上 壽贵显考终于家无所憾者而士大夫惜其以道德事明主阅三世皆以刚方难合故虽用而不尽及上即位求人如不及厚礼以起公而公已老无意于世矣故闻其防哭之皆哀公清明坦夷表里洞达遇人以诚恭俭谨默口不言人过及临大节决大议色和而语壮常欲继之以死虽在万乘前无所屈笃于行义奏补先族人而后子孙乡人有不克婚塋者輒为主之客其家者常十余人虽僦居陋巷席地而坐饮食必均兄 鎡卒于陇城无子闻其有遗腹子在外公时未仕徒步求

之两蜀间二年乃得之曰吾兄异于人体有四乳是儿亦必然已而果然名之曰百常以公防
今为承议郎公少受学于乡先生庞直温直温之子昉卒于京师公娶其女为孙妇养其妻子
终身其学本于六经仁义口不道佛老申韩异端之说其文清丽简邃学者以为师法凡三入
翰林知嘉祐二年六年八年及治平二年贡举门生满天下贵显者不可胜数诏修唐书仁宗
实录玉牒日历类篇凡朝廷有大述作大议论未尝不与契丹高丽皆知诵公文赋少时尝赋
长啸却胡骑及奉使契丹虏相目曰此长啸公也其后兄子百禄亦使虏虏首问公安否有文
集一百卷諫垣集十卷内制集三十卷外制集十卷正言三卷乐书三卷国朝韵对三卷国朝
事始一卷东斋记事十卷刀笔八卷积勲柱国累封蜀郡开国公食邑加至二千六百户实封
五百户娶张氏追封清河郡君再娶李氏封长安郡君子男五人长曰燕孙未名而卒次百揆
宣德郎监中岳庙次百嘉承务郎先公一年卒次百崧太康主簿先公六年卒次百虑承务郎
女一人尝适左司諫吴安时复归以卒孙男十人祖直襄州司户参军祖朴长社主簿祖野祖
平假承务郎祖封右承奉郎祖耕承务郎祖淳祖舒祖京祖恩皆不仕孙女六人曾孙女三人
公晚家于许许人爱而敬之其薨也里人皆出涕以元祐四年八月己未塋于汝之襄城县汝
安乡推贤里夫人李氏祔公始以诗赋为名进士及为馆阁侍从以文学称虽屡諫争及论储
嗣事朝廷信其忠然事颇秘世亦未尽知也其后议濮安懿王称号守礼不回而名益重及论
熙宁新法与王安石吕 卿辩论至废黜不用然后天下翕然师尊之无贵贱贤愚谓之景仁
而不敢名有为不义必畏公知之公既得谢轼往贺之曰公虽退而名益重矣公愀然不乐曰
君子言听计从消患于未萌使天下陰受其赐无智名无勇功吾独不得为此命也夫使天下
受其害而吾享其名吾何心哉轼以是愧公铭曰

凡物之生莫累于名人顾趋之以累为荣神人无名欲知者希人顾忧之以希为悲熙宁以来
孰擅兹器嗟嗟先生名所不置君实在洛公在颍昌皆欲忘民民不汝忘君实既来遁归于洛
縻而维之莫之胜说为天相君为君牧民道遽年徂卒徇以身公独坚卧三诏不起遂解天刑
竟以乐死世皆谓公贵身贱名孰知其功圣人之清贫夫以廉懦夫以立不尸其功无防无得
君实之用出而时施如彼水火宁除渴饥公虽不用亦相其行如彼山川出云相望公维蜀人
乃塋于汝子孙不忘尚告来者

卷一百四十四

钦定四库全书

宋文鉴卷一百四十四

宋 吕祖谦 编

墓志

周茂叔墓志铭 潘兴嗣

吾友周茂叔讳敦颐其先营道人曾祖讳从逵祖讳智强皆不仕考讳辅成任贺州桂岭县令赠諫议大夫君幼孤依舅氏龙图阁学士郑向以君有逵器爱之如子龙图公名子皆用敦字因以敦名君景祐中奏补试将作监主簿授洪州分宁县君博学行已遇事刚果有古人风众交口称之部使者以君为有才奏举南安军司理参军转运使王逵以苛刻莅下吏无敢可否君与之辨狱事不为屈因置手版归取诰敕纳之投劾而去逵为之改容复荐之移郴令改桂阳令皆以治绩用荐者迁大理寺丞知洪州南昌县其为治精密严恕务尽道理民至今思之改太子中舍签判覃恩改虞部员外郎通判永州今上即位恩改驾部赵公抃入参大政奏君为广南东路转运判官称其职迁虞部郎中提防本路刑狱君尽心职事务在矜恕虽瘴疠僻远无所惮劳竟以此得疾恳请郡符知南康军未几分司南京赵公抃复奏起君而君疾已笃熙宁六年六月七日卒于九江郡之私第享年五十七君笃气义以名节自处郴守李初平最知君既荐之又矜其所不给及初平卒子尚幼君防其防以归塋之士大夫闻君之风识与不识皆指君曰是能塋举主者君奉养至廉所得俸禄分给宗族其余以待宾客不知者以为好名君处之裕如也在南昌时得疾暴卒更一日一夜始苏视其家服御之物止一敝篋钱不满数百人莫不叹服此予之所亲见也尝过浔阳爱庐山因筑室溪上名之曰濂溪书堂每从容为予言可止可仕古人无所必束发为学将有以设施可泽于斯人者必不得已止未晚也此濂溪者异时与子相从于其上歌咏先王之道足矣此君之志也尤善谈名理深于易学作太极图易说易通数十篇诗十卷今藏于家母郑氏封仙居县太君娶陆氏职方郎中参之女再娶蒲氏太常丞师道之女子二人曰壽曰焘皆补太庙斋郎以其年十一月二十一日窆于德化县德化乡清泉社母夫人之墓左从遗命也壽等次列其状来请铭乃泣而为之铭铭曰

人之不然我独然之义贯于中贵于自期謏謏日甚风俗之偷乃如伊人吾复何求志固在我壽则有命道之不行斯谓之病

邵康节先生墓志铭 程颢

熙宁丁巳孟秋癸丑尧夫先生疾终于家洛之人吊者相属于途其尤亲且旧者又聚谋其所

以塋先生之子泣以告曰昔先人有言志于墓者必以属吾伯淳噫先生知我者以是命我何可辞谨按邵本姬姓系出于召公故世为燕人大王父令进以军职逮事艺祖始家衡漳祖德新父古皆隱德不仕母李氏其继杨氏先生之幼从父徙共城晚迁河南塋其亲于伊川遂为河南人先生生于祥符辛亥至是蓋六十七年矣雍先生之名而尧夫其字也娶王氏伯温仲良其二子也先生之官初举遗逸试将作监主簿后又以为颍川团练推官辞疾不赴先生始学于百源勤苦刻厉冬不炉夏不扇夜不就席者数年衛人贤之先生叹曰昔人尚友于古而吾未尝及四方遽可已乎于是走吴适楚过齐鲁客梁久矣而归曰道其在是矣蓋始有定居之意先生少时自雄其才慨慷有大志既学力慕高遠谓先王之事为可必致极其学益老德益劭玩心高明观天地之运化陰阳之消长以达乎万物之变然后頽然其顺浩然其归在洛几三十年始也蓬荜环堵不蔽风雨躬防以养其父母居之裕如讲学于家未尝强以语人而就问者日众乡里化之遠近尊之士人道之来之洛者有不之公府而必之先生之庐先生之德气粹然望之可知其贤然不事表襮不设防畛正而不諂通而不污清明坦夷洞彻中外交人无贵贱亲疎之间羣居燕饮笑语终日不取甚异于人顾吾所乐何如耳病畏寒暑常以春秋时行游城中士大夫家听其车音倒屣迎致虽儿童奴 皆知懽喜尊奉其于人言必依于孝弟忠信乐道人之善而未尝及其恶故贤者悅其德不贤者服其化所以厚风俗成人材者先生之功多矣昔七十子学于仲尼其传可见者惟曾子所以告子思所以授孟子者耳其余門人各以其材之所宜为学虽同尊圣人所因而入者門戶则众矣况后此千余歲师道不立学者莫知其从来独先生之学为有传也先生得之于李挺之挺之得之于穆伯长推其防流遠有端绪今穆李之言及其行事蓋可见矣而先生纯一不杂汪洋浩大乃其所自得者多矣然而名其学者岂所谓門戶之众各有所因而入者与语成德者昔难其居先生之道若就所至而论之可谓安且成矣先生有书六十卷命曰皇极经世古律诗二千篇题曰击壤集先生之塋祔于先茔实其终之年孟冬丁酉也铭曰

呜呼先生志豪力雄濶步长趋凌高厉空探幽索隱曲暢旁通在古或难先生从容有问有观以饫以丰天不憖遗哲人之凶呜皇在南伊流在东有宁一宫先生所终

李仲通墓志 程顥

予友李君仲通讳敏之世居北燕高祖避乱南徙今为濮人丞相文定公迪乃其世父也曾祖令珣祖护皆以丞相故赠太师尚书令考逊用子贵赠吏部尚书仲通生而有贤资端厚仁恕见于提孩之时举动齐整不妄言笑燕居终日泊然而无墮容望之者皆知其君子人矣与人言无隱情惟闻人之过则未尝出口而复安靖寡欲居贫守约裕如也好古立学博观羣书尤精于春秋诗易其后所得殊为高深方勇厉自进不幸短命惜夫未见其止也死之年才三十矣仲通之德蓋完于天成孝友之性尤为絕异侍太夫人疾衣不解带者累月及居防毁过甚中外数百口上爱下信人无间言而羣从聚居臧获使令者众虽馭之过严不能使之无犯准偶为仲通所责则其人必慚恨累日痛自励及仲通之亡濮之人无贤不肖皆失声痛惜或为隕涕非至诚及物其能有是乎仲通外甚和易遇物如恐伤之虽家人未始见其喜怒及其出辞气当事为则庄厉果断不可以非义回屈始用防补郊社斋郎调防州瑞金县主簿防剧贼戴小八攻害数邑朝廷患之命御史督视仲通时承尉乏与其令谋曰刘石鹄石门罗姓者皆

健贼诏捕之累年矣小八不能连二盗以自张吾知其无能为也当说使自効则贼为不足破矣乃遣人谕二盗皆曰我服李君仁信久矣愿为之死然召我亦有以为信乎仲通即以其符诰与之且约曰某日当以甲二百来见我于邑中众皆恐惧仲通曰彼欲为恶虽不召将至且吾信于邑人彼亦吾人也何惮乎乃将二盗与之周旋卒得其利遂斩小八尽平其党朝廷嘉之迁卫尉寺丞仍升一任御史用间者言将诛刘罗二党仲通以为失信不义抗论甚力久始见从仲通又自言于朝请因其立功縻以冗职可絶后患书奏不报其罗姓者果复为害仲通宰江宁之上元有古循吏之风邑之旧田税不均贫弱受其弊仲通为法以平之豪猾恶其害已共为谤语有借势于上官以摇其事人皆为仲通危仲通坚处不变未满岁而所均者万七千室事业虽百未一施防是二节则高明之见刚勇之气发于事者亦可知已呜呼人非有古今之殊特患夫忽近而慕远耳如吾仲通之材之美古独可以多乎哉向若天假之年成就其所学自当无愧于古人况使得古之人并而亲炙于圣人之时乎则吾知其果不后曾闵之列矣仲通以治平三年五月终于家熙宁七年二月庚寅葬于濮州鄆城县遗直乡之先茔夫人王氏祔焉夫人太子中舍果之女贤慧靖淑雅有法度及寡居益自晦重素衣一食以终身焉盖后仲通六年而亡仲通尝生二女皆夭卒无子以兄之子孝和为嗣仲通平生相知之深者予故将葬其家以志文来属其可辞乎铭曰

二气交运兮五行顺施刚柔杂糅兮美恶不齐稟生之类兮偏駁其宜有钟粹美兮防元之期圣虽可学兮所贵者资便儼皎厉兮去道远而展矣仲通兮赋材特奇进复甚勇兮其造可知德何完兮命何亏秀而不实圣所悲孰能使我无愧辞后欲有考观铭诗

张天祺墓志铭 张 载

哀哀吾弟而今而后战兢免夫有宋太常博士张天祺以熙宁九年三月丙辰朔暴疾不禄越是月哉生魄越翌日壬申归祔大振社先大夫之茔其兄载以报塋不得请铭它人手疏哀词十二各使刊石置圻中示后人知德者博士讳戡世家东都防名入仕歷中外二十四年立朝莅官才德美厚未试百一而天下耸闻乐从莫不以公辅期许率已仲尼践修庄笃虽孔门高弟有所后先不幸壽稟不遐生四十七年而暴终它馆志享交戾命也奈何治其防者外姻侯去惑益节賁及婿李上卿郭之才从母弟质京甥宋京攀号之不足又属辞为之志

商瑶墓志铭 张 耒

公讳瑶淄州人曾祖重进祖文俊皆不仕父余政赠大理寺丞君登景祐元年进士第为莱芜单父县尉临沂县令知下邳县签书平定军判官事以尚书屯田员外郎知襄邑县卒年五十至和二年正月二十七日也阶至承事郎勲为骑都尉君少博学为文词豪健貌魁杰严整不可犯而平居乐易长者也单父多盗君以防钩猎裒绞且尽盗怨毒入骨罢官还乡次大泽中一夕有叟密来语曰林中有恶少年十数摻利兵而伏期今日必杀单父尉是君非耶君从者惧欲亡去公执弓矢徐出有大木去百步许望之中有空焉公谓其人曰我为君射彼空者再发皆中之林中恶少年大惧争先遁其治下邳决讼多辨谕劝说之不尽临以法民始鬪怒中忽喜悟相与请平者常十七八老猾吏旁瞪视不得刺手父老戒子弟曰若忍犯此令乎富韩

公守青州闻其治状数委公决难事始君为包孝肃公知韩忠献心器公见必访以世务而公无所苟合贵人终不肯出气力引摯之其胸中不少防见而死矣先妻刘夫人继室王夫人封壽昌县君三男子皆已卒一孙求之举进士女二人曾孙一人尚防公之从子太学博士倚以元祐八年十月日将塋公淄州万年之原以二夫人祔而博士又以公之爵里行事告于著作郎张耒曰子史官也凡世有善而无传则子有罪耒不敢辞乃为志使刻石墓中曰

天下平治士无功名才否一区之死无声或宏其声而中乃枵窾实靡订孰昧孰昭有淄商侯甚蓄不施时弃其直则已光辉彼不人逢位下固宜嗇不使年造物则奚

唐充之墓志铭 陈 瓘

充之姓唐氏讳广仁充之字也其先幽州人自石晋割地至五世祖始得从归沧州乐陵咸平中曾祖克勤被诏试武艺授三班借职以天雄军管界巡检使卒于官因家焉遂为大名内黄人祖中立大名司法参军父愈喜儒士自充之五六歲时训以诗书浸长使从学于外充之能择交游言行谨饬读经史讲义理亦长于科举之习中元祐六年进士第调干宁军司法参军界河驿有杀畧人者守将械送狱俾鞫之疑其诬服以白守守不信方趣决不已而霸州获真盗然后释无罪者凡四人后为常州録事参军部使者闻充之在干宁有审克之誉部有疑讼多以属之充之所辨正合人情者非止一事改官制授通仕郎以荐者及格当改官坐元符末上书命格不下调监壽州开顺口盐矾酒税未赴丁母忧服阙监苏州酒税务郡守李尚书孝壽治尚峻猛不任僚属充之权幕官敢与论曲直苏人多赖之后守盛待制章于充之为姻家初与充之善郡人朱氏有势焔守所歆慕众皆帖帖屈随而充之一切自异着憎慢之迹守不能堪众或怒置充之于狱吹毛无实以酤酒防饶为罪充之既废贫困不能北归居楚之宝应益以读书教子为事又七年以疾卒于家宣和己亥五月丙辰也以某年某月某日甲子塋于扬州之某地充之娶张氏中散大夫某之女子男四人曰激曰濬曰防曰洪女四人长适从事郎赵枋余未嫁初充之客寓寶应苟营屋室而勉竭其力以择塋地于维扬躬诣内黄啓祖考之迎护以来将卜日厯蓋犇走自效服勤累歲未克迁奉而充之得疾卒矣今其子激等既塋充之又能率先志并襄大事使三世窀穸之事讫无可憾亦可以见充之身教之遗美矣激等遣人自寶应来南康以吕本中所状充之之行求铭于瓘书辞惨切且曰先人疾亟时尝问曰居仁约访我尚未到又叹曰我欲一游庐山今不能矣诸孤不肖摧割待尽念欲毕闻余训永不可得维行状既获所属而礲石穴土以需于掩圻之后者将孰请而可乎居仁本中字也正献公之曾孙言行有家法其所叙次皆可考证其载充之教子之言曰涑水文正公尝谓平生无以过人但事无大小皆可使人知尔汝曹不可一日忘此语也睢阳刘公尝谓充之材用有余遽闻其死嗟惜不已呜呼可达可壽而废斥夭短岂非命欤其所厚善率皆迟钝迂濶之士于其歿也能相与戚嗟而已悲夫铭曰

木摇难栖波涌莫济穠蓂积劳未穰而逝饥穰天也人岂能违奄忽不俟岂唯我悲

任宗谊墓志铭 刘 防

公讳宗谊字仲宜姓任氏赠尚书司封员外郎讳肱之曾孙尚书工部郎中直史馆赠吏部尚书讳子舆之孙太常少卿致仕赠正议大夫讳粹南阳郡太夫人尹氏之子上世故为博平人尚书公改葬于郛因家焉公以父任为太庙斋郎调陇州陇安庆州合水二县尉亲防服除调滨州司户参军亳州鄆县令用荐为宣德郎知曹州乘氏县不赴签书镇海军判官事管句京东转运司文字转通直郎通判南平军不赴监真州转般仓转奉议郎赐绯鱼袋通判永宁军不赴转承议郎通判沂州今上即位恩转朝奉郎朝散郎管句宫观以沂州督捕贼转朝请郎转朝奉大夫通判泰州不赴除知淄州借紫加勲骑都尉大观元年七月二十四日寝疾终于家享年五十有九公濶达好义有气畧少时浮沈闾里泛爱下士人乐从之游既孤塋昏仰食贫甚至鬻其产譬用遂屈公曰差易耳厘力治生调度纤啬居数年复其产如初乡人奇之宗族赖焉天性明吏事在官务核实不肯便文自营所临可纪鄆有民椎埋剽及败则行钱诋谰数得脱前令不能制公因事杀之以徇有盗羣行入境微得其处防尉不在公部分方畧以授主簿曰往取贼受赏以君有母故为公得主簿感激如公教尽获之遂先公改京秩沂某氏子坐小法当受笞公审其可教争于州将以赎论是歲遂预乡举直州仓室屋七百区费大莫敢任葺事歲霖雨坏米至万计吏夜徙弃水中以灭迹公大撒而新之计司吝费公曰仓虽在真本漕六路聚米以供京师则费宜均赋之六路众是公议上之朝遂着为令在滨摄沧之乐陵令在郛摄须城令治行皆如在鄆凡民诉久不竟若冤不能自直者撻其要害躬为镌谕无不厌服日所受书檄与凡小治讼区处立决廷无留事狱戸可罗雀豪恶吏屏气竟歲无敢犯或云为政必锄猾吏奈何并容公笑曰懦令倚吏以辨又憚其纵则横撻之是滋使籍以蠹民且去一猾吏得一猾吏今予夺我在吏供笔札奉案牒而已何谓云云前后所辟荐公皆名士伟人其与人交倾盖不疑不为回隱小不可輒以告然资乐易喜宾客酣饮笑噱恢然无忤人更服为长者晚尤好书阅古今评其人得失以自致其意领宫观归家趣供具召亲属故旧无虚日叹曰老矣无所用如某人治某事我虽老尚能兼此人数辈雅知公者亦多以为信云方朝廷察公行能优除便郡未赴感疾不起壽不满六十于戲惜哉娶尹氏南阳夫人弟之子封壽安县君子男四人羲之猷之久之延之皆举进士羲之以公遗奏授假将仕郎女七人嫁王誉郭俦士廉张平张大辨谢敦頤俦右班殿直敦頤假承务郎余皆举进士一未嫁孙男七人以大观二年九月二十六日塋须城县黄陂乡之刘村先塋之次跂皇妣鲁国太夫人正议公中女筠于同气之爱怜公防护视之尤厚南阳君于诸外孙爱某特异躬自鞠育跂又少公四歲相与嬉戏俱从我先公授书学丁壮昏官出处相先后虽舅甥有舅弟之好焉诸孤谓知公无如某者请志其墓谨论次如石谓之铭曰

服周于身棺周于服刳石序文以为之椁度三之一得其函深如函之深为之蓋博其封可隱其坎可席从先大夫归此真宅

王公旦墓志铭 滕宗谅

夫文灼于外而钓名驾说重叠于时者欲其潜爱怒于心术汰胜尚于意表亦以鲜矣道行于官而欲至心得光显当朝者求其敦洁而耻浮澹进而勇退厥惟艰哉其有体真师常先后学进退蹈道终始可述则见之于太原王公焉公当真宗皇帝世以县佐吏有文选入阁下崇文院典理御书日以进用立朝侃侃居羣以和人推为长者出牧五郡所至职办因俗为政

不务皁察时号为循吏今天子明道建元之初抗章引年朝廷不欲夺其志许以本官致仕命一子自布衣试秘书省校书郎盖所以享耆德而嘉廉退也得谢之后疏林壑以放志治丹石以疗疾接乡里以信顺训子弟以端孝呜呼昊天不憖弗报永龄以景祐二年九月十一日考终于建阳县羣玉乡崇德里之第享年七十四明年二月塋于所居之南山颠也公讳昱字公旦世家于建阳曾祖礪祖枢考纶皆蕴龙德生值唐季四海妃裂葆光全素美庆厥后由公之贵烈考赠尚书度支郎中母封南阳县太君刘氏继母丁氏封清河县太君公才具夙成年十八歲以文行高妙为本郡举首咸平初登礼部上第除舒州桐城县主簿陞大理评事再迁殿中丞改太常博士转尚书屯田度支二曹员外郎典职崇文院祕阁知柳州坐邻郡大贼莽佚界上捕之不时得黜临江军监新淦县酒税内徙楚州监盐复知南康军召还 职中祕出守润州逾年移牧武昌再丁内艰以度支郎复吉居阁下歲久以便乡里求知邵武军得之遂老千家夫人严氏早亡继室仁和县君沈氏左右君子动循礼则子四人长曰楷前漳州长防县令次曰格汀州司法参军次曰栩太庙斋郎次曰杞今校书郎女三人长适严氏次适范氏次尚防宗谅接公之旧德矣尝宰武阳居公治下公晚以少子结义于予诸孤之将议塋也使家老状公之事千里重趼且来乞文以志神隧纪信示逮予不让也宜矣晏詹嗣而铭曰

建水之灵武夷之英猗欵王公才为时生贤推仕汉帝选登瀛直如朱弦莹若壶冰守藩方入出趋台阁德化优柔文锋错落播在民謡赓于圣作辞絶累句言无宿诺致政于君归全返真雅合天道光昭缙绅有典有则不缁不磷壽钟五福庆延后昆隱隱南山悠悠东渚草没新阡烟昏拱树勒珉贞兮识太原君子之墓

宋文鉴卷一百四十四

卷一百四十五

钦定四库全书

宋文鉴卷一百四十五

宋 吕祖谦 编

墓表

石曼卿墓表 欧阳修

曼卿讳延年姓石氏其上世为幽州人幽州入于契丹其祖自成始以其族间走南归天子嘉其来将禄之不可乃家于宋州之宋城父讳补之官至太常博士幽燕俗劲武而曼卿少以气自豪读书不治章句独慕古人奇节伟行非常之功视世俗屑屑无足动其意者自顾不合于时乃一混以酒然好剧饮大醉颓然自放由是益与时不合而人之从其游者皆知爱曼卿落落可奇而不知其才之有以用也年四十八康定二年二月四日以太子中允秘阁校理卒于京师曼卿少举进士不中真宗推恩三举进士皆补奉职曼卿初不肯就张文节公素奇之谓曰母老乃择禄耶曼卿矍然起就之迁殿直久之改太常寺太祝知济州金乡县叹曰此亦可以为政也县有治声通判干宁军丁母永安县君李氏忧服除通判永静军皆有能名充馆阁校勘累迁大理寺丞通判海州还为校理庄献明肃太后临朝曼卿上书请还政天子其后太后崩范讽以言见幸引尝言太后事者遽得显官欲引曼卿曼卿固止之乃已自契丹通中国德明尽有河南而臣属遂务休兵养息天下然内外防武三十余年曼卿上书言十事不报已而元昊反西方用兵始思其言召见稍用其说籍河北河东陕西之民得乡兵数十万曼卿奉使籍兵河东还称防赐绯衣银鱼天子方思尽其才而且病矣既而闻边将有欲以乡兵扞贼者笑曰此得吾粗也夫不教之兵勇怯相杂若怯者见敌而动则勇者亦牵而溃矣今或不暇教不若募其敢行者则人人皆胜兵也其视世事箴若不足为及听其施設之方虽精思深虑不能过也状貌伟然喜酒自豪若不可绳以法度退而质其平生趣舍大节无一悖于理者遇人无贤愚皆尽忻欢及问而可否天下是非善恶当其意者无几人其为文章劲健称其意气有子济滋天子闻其丧官其一子使禄其家既卒之三十七日葬于太清之先茔其友欧阳修表于其墓曰

呜呼曼卿宁自混以为高不少屈以合世可谓自重之士矣士之所负者愈大则其自顾也愈重自顾愈重则其合愈难然欲与共大事立奇功非得难合自重之士不可为也古之魁雄之人未始不负高世之志故宁或毁身污迹卒困于无闻或老且死而幸一遇犹克少施于世若曼卿者非徒与世难合而不克所施亦其不幸不得至乎中寿其命也夫其可哀也夫

太常博士周君墓表 欧阳修

有笃行君子曰周君者孝于其亲友于其兄弟居父母丧与其兄某弟某居于倚庐不饮酒食肉者三年其言必戚其哭必哀除丧而癯然不能胜人事者盖久而后复自孔子在鲁而鲁人不能行三年之丧其弟子疑以为问则非鲁而他国可知也孔子歿而其后世又可知也今世之人知事其亲者多矣或居防而不哀者有矣生能事而死能哀或不知丧礼者有矣或知礼而以谓丧主于哀而已不必合于礼者有矣如周君者事生尽孝居丧尽哀而以礼者也礼之失久矣丧礼尤废也今之居丧者虽仕宦婚嫁听乐不为此特法令之所禁尔其衰麻之数哭泣之节居处之别饮食之变皆莫知夫有礼也在上位者不以身率其下在下者无所望于其上其遂废矣乎故吾于周君有所取也君讳某字某某州某县人也天圣二年举进士累官至太常博士歷连衡二州司理参军桂州司録知高安寧化二县通判饶州未行以庆历五年六月朔日卒于朝集之舍享年五十有一皇祐五年某月日葬于道州永明县紫微冈曾祖讳某祖讳某父讳某贈官某母唐氏封某县太君娶某氏封某县君君学长于毛郑诗左氏春秋家贫不事生产喜聚居官禄虽薄常分俸以贖宗族朋友人有慢已者必厚为礼以愧之其为吏所居皆有能政有文集二十卷君有子七人曰谕鼎州司理叅军曰诜湖州归安主簿曰謐曰讽曰諲曰説曰谊皆未仕呜呼孝非一家之行也所以移于事君而忠仁于宗族而睦交于朋友而信始一乡推之四海表于金石示之后世而观考君之所施者无不可以书也岂独俾其子孙之不隕也哉

胡翼之墓表 欧阳修

先生讳瑗字翼之姓胡氏其上世为陵州人后为泰州如臯人先生为人师言行而身化之使诚明者达昏愚者励顽傲者革故其为法严而信为道久而尊师道废久矣自景祐明道以来学者有师惟先生暨泰山孙明复石守道三人而先生之徒最盛其在湖州之学弟子去来常数百人各以其经转相传授其教学之法最备行之数年东南之士莫不以仁义礼乐为学庆历四年天子开天章阁与大臣讲天下事始慨然诏州县皆立学于是建太学于京师而有司请下湖州取先生之法以为太学法至今为着令后十余年先生始来居太学学者自遠而至太学不能容取旁官署以为学舍礼部贡举歲所得士先生弟子十常居四五其高第者知名当时或取甲科居显仕其余散在四方随其人贤愚皆循循雅饬其言谈举止遇之不问可知为先生弟子其学者相与称先生不问可知为胡公也先生初以白衣见天子论乐拜秘书省校书郎辟丹州军事推官改密州观察推官丁父忧去职服除为保寧军节度推官遂居湖学召为诸王宫教授以疾免已而以太子中舍致仕迁殿中丞于家皇祐中驿召至京师议乐复以为大理评事兼太常寺主簿又以疾辞歲余为光禄寺丞国子监直讲廼居太学迁大理寺丞赐绯衣银鱼嘉祐元年迁太子中允充天章阁侍讲仍居太学已而病不能朝天子数遣使者存问又以太常博士致仕东归之日太学之诸生与朝廷贤士大夫送之东门执弟子礼路人嗟叹以为荣以四年六月六日卒于杭州享年六十有七以明年十月五日塋于乌程何山之原其世次官邑与其行事莆阳蔡君谟具志于幽堂

呜呼先生之德在乎人不待表而见于后世然非此无以慰学者之思乃揭于其墓之原六年八月三日庐陵欧阳修述

泂冈阡表 欧阳修

呜呼惟我皇考崇公卜吉于泂冈之六十年其子修始克表于其阡非敢缓也盖有待也修不幸生四歲而孤太夫人守节自誓居贫自力于衣食以长以教俾至于成人太夫人告修曰汝父为吏廉而好施与喜宾客其俸禄虽薄常不使有余曰无以是为我累故其亡也无一瓦之覆一垆之植以庇而为生吾何恃而能自守邪吾于汝父知其一二以有待于汝也自吾为汝家妇不及事吾姑然知汝父之能养也汝孤而幼吾不能知汝之必有立然知汝父之必将有后也吾之始归也汝父免于母丧方逾年歲时祭祀则必涕泣曰祭而丰不如养之薄也间御酒食则又涕泣曰昔常不足而今有余其何及也吾始一二见之以为新免于丧适然耳既而其后常然至其终身未尝不然吾虽不及事姑而以此知汝父之能养也汝父为吏尝夜烛治官书屡废而叹吾问之则曰此死狱也我求其生不得尔吾曰生可求乎曰求其生而不得则死者与我皆无恨矧求而有得邪以其有得则知不求而死者有恨也夫常求其生犹失之死而世常求其死也回顾乳者抱汝而立于旁因指而叹曰术者谓我歲行在戌将死使其言然吾不及见儿之立也后当以我语告之其平居教他子弟常用此语吾耳熟焉故能详也其施于外事吾不能知其居于家无所矜饰而所为如此是真发于中者邪呜呼其心厚于仁者邪此吾知汝父之必将有后也汝其勉之夫养不必丰要于孝利虽不得博于物要其心之厚于仁吾不能教汝此汝父之志也修泣而志之不敢忘先公少孤力学咸平三年进士及第为道州判官泗绵二州推官又为泰州判官享年五十有九葬沙溪之泂冈太夫人姓郑氏考讳德仪世为江南名族太夫人恭俭仁爱而有礼初封福昌县太君进封乐安安康彭城三郡太君自其家少微时治其家以俭约其后常不使过之曰吾儿不能苟合于世俭薄所以居患难也其后修贬夷陵太夫人言笑自若曰汝家故贫贱也吾处之有素矣汝能安之吾亦安矣自先公之亡二十年修始得禄而养又十有二年列官于朝始得赠封其亲又十年修为龙图阁直学士吏部郎中留守南京太夫人以疾卒于官舍享年七十有二又八年修以非才入副枢密遂叅政事又七年而罢自登二府天子推恩褒其三世盖自嘉祐以来逢国大庆必加宠锡皇曾祖府君累赠金紫光禄大夫太师中书令曾祖妣累封楚国太夫人皇祖府君累赠金紫光禄大夫太师中书令兼尚书令祖妣累封吴国太夫人皇考崇公累赠金紫光禄大夫太师中书令兼尚书令皇妣累封越国太夫人今上初郊皇考赐爵为崇国公太夫人进号魏国于是小子修泣而言曰呜呼为善无不报而迟速有时此理之常也惟我祖考积善成德宜享其隆虽不克有于其躬而赐爵受封显荣褒大实有三朝之锡命是足以表见于后世而庇赖其子孙矣乃列其世谱具刻于碑既又载我皇考崇公之遗训太夫人之所以教而有待于修者并揭于阡俾知夫小子修之德薄能鲜遭时窃位而幸全大节不辱其先者其来有自熙寧三年歲次庚戌四月辛酉十五日乙亥男推诚保德崇仁翊戴功臣观文殿学士特进行兵部尚书知青州军州事兼管内劝农使充京东东路安抚使上柱国乐安郡开国公食邑四千三百戶食实封一千二百戶修表

处士征君墓表 王安石

淮之南有善士三人皆居于真州之扬子杜君者寓于医无贫富贵贱请之辄往与之财非义辄谢而不受时时穷空几不能以自存而未尝有不足之色盖善言性命之理而其心旷然无

累于物而予尝与之语久之而不厌也徐君忠信笃实遇人至谨虽疾病召筮不正衣巾不见寓于筮日得百数十钱则止不更筮也能为诗亦好属文有集若干卷两人者以医筮故多为贤士大夫所知而征君独不闻于世征君者讳某字某事其母夫人至孝居乡里恂恂恭谨乐振人之穷急而未尝与人校曲直好蓄书能为诗有子五人而教其三人为进士某今为某官某今为某官某亦再贡于乡征君与两人者相为友至驩而莫逆也两人者皆先征君以死而征君以某年某月甲子终于家年七十七噫古者一乡之善士必有以贵于一乡一国之善士必有以贵于一国此道亡也久矣余独私爱夫三人者而乐为好事者道之而征君之子又以请于是书以遗之使之饘诸墓上杜君讳婴字太和徐君讳仲坚字某

外祖母黄夫人墓表 王安石

外祖夫人黄氏生二十二年归吴氏归五十年而卒三月而塋康定二年十二月也夫人渊静裕和不强而安事舅姑夫抚字皆顺适吴氏内外族甚大朝夕相与居岁时以辞币酒食相缀接卒夫人之世戚疏愚良无一间言又喜书史晓大致往往引以辅导处士信厚闻于乡子为士无亏行絜夫人之助夫人资寡言笑声若不能出虽族人亦不知其晓书史也安石外孙也故得之详明道中过舅家夫人春秋高矣视其礼犹若女妇然视其色不知其有喜愠也病且革以薄葬命子亿其可谓以正始终也已舅藩既志其塋四年安石还自扬州复其墓复表曰圣人之教必繇闺门始后世志于教者亦未之勤而已天下相重以戾相荡以侈疣然歟矣自公卿大夫无完德岂或女妇然或者女妇居不识防屏笑言不闻邻里是职然也置则悖矣然其死也闻人传焉以美之是亦教之熄也人人之不能然也传焉以美之宜也矧如夫人者有不可表耶于戏

程伯淳墓表 程頤

先生名顥字伯淳葬于伊川潞国太师题其墓曰明道先生弟頤序其所以而刻之石曰周公没圣人之道不行孟轲死圣人之学不传道不行百世无善治学不传千载无真儒无善治士犹得以明乎善治之道以淑诸人以传诸后无真儒天下贸贸焉莫知所之人欲肆而天理灭矣先生生千四百年之后得不传之学于遗经志将以斯道觉斯民天不慙遗哲人早世乡人士大夫相与议曰道之不明也久矣先生出倡圣学以示人辨异端辟邪說开歷古之沈迷圣人之道得先生而后明为功大矣于是帝师采众议而为之称以表其墓学者之于道知所向然后见斯人之为功知所至然后见斯名之称情山可夷谷可堙明道之名亘万世而常存勒石墓旁以诏后人

吕和叔墓表 范育

元丰五年歲次壬戌六月癸酉吕君和叔卒九月乙巳从塋骊山之趾先大夫之墓其孤义山请识以文惟君明善至学性之所得者尽之于心心之所知者践之于身妻子刑之朋友信之乡党宗之可谓至诚敏德者矣乃表其墓曰诚德君子而系其身行云君讳大钧字和叔其先汲郡人皇考鹄赠司封员外郎王考通太常博士赠兵部侍郎考蕢比部郎中赠左谏议大夫

由兵部堊京兆之蓝田故子孙为其县人焉初谏议学游未仕教子六人后五人相继登科知名当世其季贤而早死缙绅士大夫传其家声以为美谈君其第三子也中进士乙科调秦州右司理叅军监延州折博务改光禄寺丞知耀州三原县请代亲入蜀移绵州巴西县谏议致仕居里君亦移疾不行丞相韩公子华宣抚陝西河东辟书寫机密文字府罢移福州侯官县故相曾宣靖公镇京兆荐泾阳县皆不赴丁谏议忧服除独家居讲道数年仲兄龙图阁待制大防请监鳳翔府造船务君起就之官制改为宣义郎防诏伐西夏鄜延路转运司檄君从事法为可辞使者请于朝君亦以礼际善而得行乃往从君亦尽力不苟以避使者愈贤之荐管勾文字数月感疾卒延州官舍享年五十有二君性纯厚易直强明正亮所行不二于心所知不二于行其学以孔子下学上达之心立其志以孟子集义之功养其德以顏子克己复礼之用厉其行其要归之诚明不息不为众人沮之而疑小辨夺之而屈势利刼之而回知力穷之而止其自任以圣贤之重如此盖大学之教不明于世者千五百年先是扶风张先生子厚闻而知之而学者未之信也君于先生为同年友一言而契往执弟子礼问焉君谓始学必先行其所知而已若夫道性命之际正惟躬行礼义久则至焉先生以谓学不造约虽劳而艰于进德且谓君勉之当自悟君乃信已不疑设其义陈其数倡而行之将以抗横流继絕学毅然不恤人之非间已也先生亦叹其勇为不可及始居谏议丧衰麻殡敛奠祭之事悉捐俗习事尚一仿诸礼后乃寢行于冠昏饮酒相见庆吊之间其文节粲然可观人人皆识其义相与起好矜行一朝知礼义之可贵久之君之志既克少施而于趣时求中未能沛然不疑然后信先生之学本末不可逾以造约为先务矣先生既歿君益脩明其学援是道推之以善俗且必于吾身亲见之既而曰有命不得于今必得于后世其始讲脩先王之法曰如有用我者举而措之而已既又知夫君子之德不存焉虽不信而不悔始也急于行已既乃至而不迫优游乎道之可乐始也严于率人既乃和而不懈使学者趋而不厌呜呼非持久不已孰能与于此君疾命扫室正席默坐问者至语未终而歿其徒闻疾或自家于官所及讣至相率迎其丧遠至数十百里贫者位于别馆哭之卒时夫人种氏治其丧如君所以治谏议之丧其孤既塋而祭于家必以礼呜呼死生之际安而不惑可以见养之至道行乎妻子善信乎朋友乡党可以见诚之感君与人语必因其所可及而喻诸义治经說德于身践而心解其文章不作于无用尝譔次井田兵制为图籍案之易易大臣有荐官邸教授者法当献文君上天下为一家中国为一人赋推是道也忤乎天下矣君始娶马氏再娶则种夫人也子义山能传其父学孙男麟愈舟女一鸣呼仲尼七十而变化不息顏子短命未见其止曾子老而德优先生有言乐正子与舜同术顾其行有未至若君之术与圣人同其至足以观之惜乎不得见其老放乎致极以立乎圣人之门一朝之遇措乎天下国家乃中身而止矣乌乎君之自信其所行以致其所及可为众人道者也若信诸已而知乎天者则又非众人之所可知必有君子而知君者矣安得孔子之門人与论君之德者乎

神道碑

资政殿学士礼部侍郎范文正公神道碑铭

欧阳修

皇祐四年五月甲子资政殿学士尚书礼部侍郎汝南文正公薨于徐州以其年十有二月壬申葬于河南尹樊里之万安山下公讳仲淹字希文五代之际世家苏州事吴越太宗皇帝时吴越献其地公之皇考从钱俶朝京师后为武宁军掌书记以卒公生二歲而孤母夫人贫无依再适长山朱氏既长知其世家感泣去之南都入学舍扫一室昼夜讲诵其起居饮食人所不堪而公益自刻苦居五年大通六经之防为文章论說必本于仁义祥符八年举进士礼部选第一遂中乙科为广德军司理叅军始归迎其母以养及公既贵天子赠公曾祖苏州粮料判官讳某为太保祖秘书监讳某为太傅考讳某为太师妣谢氏为吴国夫人公少有大节于富贵贫贱毁誉欢戚不动其心而慨然有志于天下常自诵曰士当先天下之忧而忧后天下之乐而乐也其事上遇人一以自信不择利害为趋舍其所有为必尽其方曰为之自我者当如是其成与否有不在我者虽圣贤不能必吾岂苟哉天圣中晏丞相荐公文学以大理寺丞为秘阁校理以言事忤章献太后防通判河中府久之上记其忠召拜右司諫当太后临朝听政时以至日大防前殿上将率百官为壽有司已具公上疏言天子无北面且开后世弱人主以强母后之渐其事遂已又上书请还政天子不报及太后崩言事者希防多求太后时事欲深治之公独以谓太后受托先帝保佑圣躬始终十年未见过失宜掩其小故以全大德初太后有遗命立杨太妃代为太后公諫曰太后母号也自古无代立者由是罢其册命是歲大旱蝗奉使安抚东南使还防郭皇后废率諫官御史伏阁争不能得贬知睦州又徙苏州歲余即拜礼部员外郎天章阁待制召还益论时政阙失而大臣权幸多忌恶之居数月以公知开封府开封素号难治公治有声事日益简暇则益取古今治乱安危为上开說又为百官图以献曰仕人各以其材而百职修尧舜之治不过此也因指其迁进迟速次序曰如此而可以为公可以为私亦不可以不察由是吕丞相怒至交论上前公求对辨语切坐落职知饶州明年吕公亦罢公徙润州又徙越州而赵元昊反河西上复召相吕公乃以公为陝西经畧安抚副使迁龙图阁直学士是时新失大将延州危公请自守鄜延扞贼乃知延州元昊遣人遗书以求和公以谓无事请和难信且书有僭号不可以闻乃自为书告以逆顺成败之說甚辯坐擅复书夺一官知耀州未逾月徙知庆州既而四路置帅以公为环庆路经畧安抚招讨使兵马都部署累迁諫议大夫枢密直学士公为将务持重不急近功小利于延州筑青涧城堡营田复承平永平废寨熟 归业者数万戸于庆州城大顺以据要害又城细腰葫芦于是明珠灭臧等大族皆去贼为中国用自边制久隳至兵与将常不相识公始分延州兵为六将训练齐整诸路皆用以为法公之所在贼不敢犯人或疑公见敌应变为如何至其城大顺也一旦引兵出诸将不知所向军至柔遠始号令告其地处使往筑城至于版筑之用大小毕具而军中初不知贼以骑三万来争公戒诸将战而贼走追勿过河已而贼果走追者不渡而河外果有伏贼失计乃引去于是诸将皆服公为不可及公待将吏必使畏法而爱已所得赐赉皆以上意分赐诸将使自为谢诸蕃质子纵其出入无一人逃者蕃长来见召之卧内屏人彻衛与语不疑公居三歲士勇边实恩信大洽乃决防谋取横山复灵武而元昊数遣使称臣请和上亦召公归矣初西人籍其郷兵者十数万既而黥以为军惟公所部但刺其手公去兵罢独得复为民其于两路既得熟羌为用使以守边因徙屯兵就食内地而纾西人馈挽之劳其所设施去而人德之与守其法不敢变者至今尤多自公坐吕公贬羣士大夫各持二公曲直吕公患之凡直公者皆指为党或坐窜逐及吕公复相公亦再起被用于于是二公驩然相约戮力平贼天下之士皆以此多二公然朋党之论遂起而不能止上既贤公可大用故卒置羣议而用之庆厯三年春召为枢密副使五让不许乃就道既至数月以为叅知政事每进见必以太平责

之公叹曰上之用我者至矣然事有先后而革弊于久安非朝夕可也既而上再赐手诏趣使条天下事又开天章阁召见赐坐授以纸笔使疏于前公惶恐避席始退而条列时所宜先者十数事上之其诏天下兴学取士先德行不专文辞革磨勘例迁以别能否减任子之数而除滥官用农桑考课守宰等事方施行而磨勘任子之法侥幸之人皆不便因相与腾口而嫉公者亦幸外有言喜为之佐佑防边奏有警公即请行乃以公为河东陝西宣抚使至则上书愿复守边即拜资政殿学士知邠州兼陝西路安抚使其知政事才一歲而罢有司悉奏罢公前所施行而复其故言者遂以危事中之赖上察其忠不听是时夏人已称臣公因以疾请邓州守邓三歲求知杭州又徙青州公益病又求知颍州肩舁至徐遂不起享年六十有四方公之病上赐药存问既薨辍朝一日以其遗表无所请使就问其家所欲赠以兵部尚书所以哀防之甚厚公为人外和内刚乐善泛爱丧其母时尚贫终身非宾客食不重肉临财好施意豁如也及退而视其私妻子仅给衣食其为政所至民多立祠画像其行已临事自山林处士里间田野之人外至边陲莫不知其名字而乐道其事者甚众及其世次官爵志于墓谱于家藏于有司者皆不论著着其系天下国家之大者亦公之志也欵铭曰范于吴越世实陪臣俶纳山川及其土民范始来北中间几息公奋自躬与时偕逢事有罪功言有违从岂公必能天子用公其艰其劳一其初终夏童跳边乘吏殆安帝命公往问彼骄顽有不听顺锄其穴根公居三年怯勇隳完儿怜兽扰卒俾来臣夏人在廷其事方议帝趣公来以就予治公拜稽首兹为难哉初匪其难在其终之羣言营营卒壞于成匪恶其成惟公是倾不倾不危天子之明存有显荣歿有赠諡藏其子孙宠及后世惟百有位可劝无怠

太尉王文正公神道碑铭 欧阳修

至和二年七月乙未枢密直学士右谏议大夫王素奏事殿中已而泣且言曰臣之先臣旦相真宗皇帝十有八年今臣素又得待罪侍从之臣惟是先臣之训其遗业余烈臣实无似不能显大而墓碑至今无辞以刻惟陛下哀怜不忘先帝之臣以假宠于王氏而勗其子孙天子曰呜呼惟汝父旦事我文考真宗叶德一心克终厥位有始有卒其可谓全德元老矣汝素以是刻于碑素拜稽首泣而出明日有诏史馆修撰欧阳修曰王旦墓碑未立汝可以铭臣修谨按故推诚保顺同德守正翊戴功臣开府仪同三司守太尉充玉清昭应宫使上柱国太原郡开国公赠太师尚书令兼中书令追封魏国公諡曰文正王公讳旦字子明大名莘人也皇曾祖讳言滑州黎阳令追封许国公皇祖讳彻左拾遗追封鲁国公皇考讳祐尚书兵部侍郎追封晋国公皆累赠太师尚书令兼中书令曾祖妣姚氏鲁国夫人祖妣田氏秦国夫人妣任氏徐国夫人边氏秦国夫人公之皇考以文章自显汉周之际逮事太祖太宗为名臣尝谕杜重威使无反汉拒卢多逊害赵普之谋以百口明符彦卿无罪故世多称王氏有阴德公之皇考亦自植三槐于庭曰吾之后世必有三公者此其所以志也公少好学有文太平兴国五年进士及第为大理评事知临江县监潭州银场再迁著作佐郎与编文苑英华迁殿中丞通判郑濠二州王禹偁荐其材任转运使驿召至京师辞不受献其所为文章得试直史馆迁右正言知制诰知淳化三年礼部贡举迁虞部员外郎同判吏部流内铨知考课院右谏议大夫赵昌言叅知政事公以壻避嫌求解职太宗嘉之改礼部郎中集贤殿修撰昌言罢复知制诰仍兼修撰判院事召赐金紫久之迁兵部郎中居职真宗即位拜中书舍人数日召为翰林学士知审官院通进银台封驳事公为人严重能任大事避远权势不可干以私由是真宗益知其贤

钱若水名能知人常称公曰真宰相器也若水为枢密副使罢召对苑中问谁可大用者若水言公可用真宗曰吾固已知之矣咸平三年又知礼部贡举居数日拜给事中同知枢密院事明年以工部侍郎叅知政事再迁刑部侍郎景德元年契丹犯边真宗幸澶州雍王元份留守东京得暴疾命公驰自行在代元份留守二年迁尚书左丞三年拜工部尚书同中书门下平章事集贤殿大学士监脩国史是时契丹初请盟赵德明亦纳誓约愿守河西故地二边罢兵不用真宗遂欲以无事治天下公以为宋兴三世祖宗之法具在故其为相务行故事慎所改作进退能否赏罚必当真宗久而益信之所言无不听虽他宰相大臣有所请必曰王某以为如何事无大小非公所言不决公在相位十余年外无夷狄之虞兵革不用海内富贵羣工百司各得其职故天下至今称为贤宰相公于用人不以名誉必求其实苛贤且材矣必久其官而众以为宜某职然后迁其所荐引人未尝知冠準为枢密使当罢使人私公求为使相公大惊曰将相之任岂可求耶且吾不受私请準深恨之已而制出除準武胜军节度使同中书门下平章事準入见涕泣曰非陛下知臣安能至此真宗具道公所以荐準者準始媿叹以为不可及故叅知政事李穆子行简有贤行以将作监丞居于家真宗召见慰劳之迁太子中允初遣使者召之不知其所止真宗命至中书问王某然后人知行简公所荐也公自知制诰至为相荐士尤多其后公薨史官修真宗实录得内出奏章乃知朝廷之士多公所荐者公与人寡言笑其语虽简而能以理屈人默然终日莫能窥其际及奏事上前羣臣异同公徐一言以定今上为皇太子太子谕德见公称太子学书有法公曰谕德之职止于是耶赵德明言民饥求粮百万斛大臣皆曰德明新纳誓而敢违请以诏书责之真宗以问公公请勅有司具粟百万于京师诏德明来取真宗大喜德明得诏书慚且拜曰朝廷有人大中祥符中天下大蝗真宗使人于野得死蝗以示大臣明日他宰相有袖死蝗以进者曰蝗实死矣请示于朝率百官贺公独以为不可后数日方奏事飞蝗蔽天真宗顾公曰使百官方贺而蝗如此岂不为天下笑耶宦者刘承规以忠谨得幸病且死求为节度使真宗以语公曰承规待此以瞑目公执以为不可曰他日将有求为枢密使者奈何至今内臣官不过留后公任事久人有谤公于上者公辄引咎未尝自辨至人有过失虽人主盛怒可辨者辨之必得而后已荣王宫火延前殿有言非天灾请置狱劾火事当坐死者百余人公独请见曰始失火时陛下以罪已诏天下而臣等皆上章待罪今反归咎于人何以示信且火虽有迹寧知非天谴耶由是当坐者皆免日者上书言宫禁事坐诛籍其家得朝士所与往还占问吉凶之說真宗怒欲付御史问状公曰此人之常情且语不及朝廷不足罪真宗怒不解公因自取尝所占问之书进曰臣少贱时不免为此必以为罪愿并臣付狱真宗曰此事已发何可免公曰臣为宰相执国法岂可自为之幸于不发而以罪人真宗意解公至中书悉焚所得书既而真宗悔复驰取之公曰臣已焚之矣由是获免者众公累官至太保以病求罢入见滋福殿真宗曰朕方以大事托卿而卿疾如此因命皇太子拜公公言皇太子盛德必任陛下事因荐可为大臣者十余人其后不至宰相者李及凌防二人而已然亦皆为名臣公屡以疾请真宗不得已拜公太尉兼侍中五日一朝视事遇军国大事不以时入叅决公益惶恐因卧不起以疾恳解册拜太尉玉清昭应宫使自公病使者存问日常三四真宗手自和药赐之疾亟遽幸其第赐以白金五千两辞不受以天禧元年九月癸酉薨于家享年六十有一真宗临哭辍视朝三日发哀于苑中其子弟门人故吏皆被恩泽即以其年十一月庚申塋公于开封府开封县新里乡大边村公娶赵氏荣国夫人后公若干年卒子男三人长曰司封郎中雍次曰赞善大夫冲次曰素女四人长适太子太傅韩亿次适兵部员外郎直集贤院苏耆次适右正言范令孙次适龙图阁直学士兵部郎中吕公

弼公事寡嫂谨与其弟旭相友悌尤笃任以家事一无所问而务以俭约率励子弟使在富贵不知为骄侈兄子睦欲举进士公曰吾常以太盛为惧其可与寒士争进至其薨也子素犹未官遗表不求恩泽有文集二十卷干兴元年诏配享真宗庙廷臣修曰景德祥符之际盛矣观公之所以相而先帝之所以用公者可谓至哉是以君明臣贤德显名尊生而俱享其荣歿而长配于庙可谓有始有卒如明诏所褒昔者烝民江汉推大臣下之事所以见任贤使能之功虽曰山甫穆公之诗实歌宣王之德也臣谨考国史实录至于缙绅故老之传得公终始之节而录可纪者辄声为铭诗昭示后世以彰先帝之明以称圣恩褒显王氏流泽子孙与宋无极之意铭曰

烈烈魏公相我真宗真庙翼翼魏公配食公相真宗不言以躬时有大事事有大疑匪卜匪筮公为蓍公在相位终日如默问其边方包裹兵革问其卿士百工以职问其庶民耕织衣食相有赏罚功当罪明相所黜升惟否惟能执其权衡万物之平孰不事君胡能必信孰不为相其谁有终公薨于位太尉之崇天子孝思来荐清庙侑我圣考惟时元老天子念功报公之隆春秋从享万祀无穷作为诗歌以谄庙工

宋文鉴卷一百四十五

卷一百四十六

钦定四库全书

宋文鉴卷一百四十六

宋 吕祖谦 编

神道碑铭

晏元献公神道碑铭 欧阳修

至和元年六月观文殿大学士行兵部尚书西京留守临淄公以疾归于京师八月疾少间入见天子曰噫予旧学之臣也乃留侍讲迺英阁诏五日一朝前殿明年正月疾作不能朝勅太医朝夕往视有司除道将幸其家公叹曰吾无状乃以疾病忧吾君即驰奏曰臣疾少间行愈矣乃止其月丁亥以公薨闻天子震悼亟临其丧以不即视公为恨赠公司空兼侍中諡曰元献有司请辍视朝一日诏特辍二日以其年三月癸酉葬公于许州阳翟县麦秀乡之北原既葬赐其墓隧之碑首曰旧学之碑既又勅史臣修考次公事具书于碑下臣修伏读国史见真宗皇帝时天下无事天子方推让功德祠祀天地山川讲礼乐以文颂声而儒学文章雋贤伟异之人出公世家江西之临川年始十四一起田里进见天子时方亲阅天下贡士防廷中者千余人与夫宫臣衞官拥列圜视公不动声气操笔为文辞立成以献天子嘉赏赐同进士出身遂登馆阁掌书命以文章为天下所宗逮陛下养德东宫先帝选用臣属即以公遗陛下由王官宫臣卒登宰相凡所以辅道圣德忧勤国家有旧有劳自始至卒五十余年公既薨而先帝之名臣与陛下东宫之旧人皆无在者宜其褒宠优异比公甘盘臣修幸得执笔史官奉明诏谨昧死上临淄公事曰公讳殊字同叔姓晏氏其世次晦显徙迁不常自其高祖讳墉唐咸通中举进士卒官江西始着籍于高安其后三世不显曾祖讳延昌又徙其籍于临川祖讳郢追封英国公考讳固追封秦国公自曾祖以下皆用公贵累赠开府仪同三司太师中书令兼尚书令曾祖妣张氏陈国太夫人祖妣傅氏许国太夫人妣吴氏唐国太夫人公生七岁知学问为文章乡里号为神童故丞相张文节公安抚江西得公以闻真宗召见既赐出身后二日又召试诗赋论公徐启曰臣尝私习此赋不敢隐真宗益嗟异之因试以他题以为秘书省正字置之秘阁使得悉读秘书命故仆射陈文僖公视其学明年献其所为文召试中书迁太常寺奉礼郎封祀太山推恩迁光禄寺丞数月充集贤校理明年迁著作佐郎丁父忧去官已而真宗思之即其家起复命淮南发运使具舟送之京师从祀太清宫赐绯衣银鱼同判太常礼院又丁母忧求去官服丧不许今天子始封升王公以选为府记室叅军再迁左正言直史馆今天子为皇太子以户部员外郎充太子舍人赐金紫知制诰判集贤院迁翰林学士充景灵宫判官太子左庶子兼判太常寺知礼仪院公既以道德文章佐佑东宫真宗每所谘访多以方寸小纸细书问之由是叅与机密凡所对必以其藁进示不泄其后悉阅真宗阁中遗书得公所进藁类为八十卷藏之禁中人莫之见也初真宗遗诏章献明肃太后权听军国事宰

相丁谓枢密使曹利用各欲独见奏事无敢决其议者公建言羣臣奏事太后者垂帘听之皆毋得见议遂定干兴元年拜右谏议大夫兼侍读学士迁给事中景灵宫副使判吏部流内铨以易侍讲崇政殿迁礼部侍郎知审官院为枢密副使迁刑部侍郎上疏论张耆不可为枢密使由是忤太后防坐以笏击其仆误折其齿罢留守南京大兴学校以教诸生自五代以来天下学废兴自公始召拜御史中丞改兵部侍郎兼秘书监资政殿学士翰林侍读学士知天圣八年礼部贡举明年为三司使复为枢密副使未拜改叅知政事迁尚书左丞太后谒太庙有请服袞冕者太后以问公公以周官后服对太后崩大臣执政者皆罢公为礼部尚书知亳州徙知陈州迁刑部尚书复召为御史中丞又为三司使知枢密院事拜枢密使再加检校太尉同中书门下平章事庆历三年三月遂以刑部尚书居相位充集贤殿大学士兼枢密使自公复召用而赵元昊反师出陝西天下弊于兵公数建利害请罢监军兼以阵图授诸将使得应敌为攻守及制财用为出入之要皆有法天子悉为施行自宫禁先以率天下而财赋之职悉归有司卒能以谋臣元昊使听约束乃还其王号公为人刚简遇人必以诚虽处富贵如寒士罇酒相对欢如也得一善称之如已出当世知名之士如范仲淹孔道辅等皆出其门及为相益务进贤才当公居相府时范仲淹韩琦富弼皆进用至于台阁多一时之贤天子既厌西兵闵天下困弊奋然有意遂欲因羣材以更治数诏大臣条天下事方施行而小人权幸皆不便明年秋防公以事罢而仲淹等相次亦皆去事遂已公既罢以工部尚书知颍州徙知陈州又徙许州三迁户部尚书拜观文殿大学士知永兴军充一路都部署安抚使徙知河南府西京留守累进阶至开府仪同三司勲上柱国爵临淄公食邑一万二千户实封三千七百余户公享年六十有五自少笃学至其病亟犹手不释卷有文集二百四十卷尝奉勅修上训及真宗实录又集类古今文章为集选二百卷其为政敏而务以简便其民其于家严子弟之见有时事寡姊孝谨未尝为子弟求恩泽其在陈州上问宰相曰晏某居外未尝有所请其亦有所欲邪宰相以告公公自为表问起居而已故其薨也天子尤哀悼之赐予加等以其子承裕为崇文院检讨孙及甥之未官者九人皆命以官公初娶李氏工部侍郎虚己之女次孟氏屯田员外郎虚舟之女封钜鹿郡夫人次王氏太师尚书令超之女封荣国夫人子八人长曰居厚太理评事早卒次承裕尚书屯田员外郎宣礼赞善大夫崇让著作佐郎明遠祗德皆大理评事几道传正皆太常寺太祝女六人长适户部侍郎同中书门下平章事富弼次适礼部侍郎三司使杨察其四尚幼孙十有二人公既乐善而称为知人士之显于朝者多公所荐达至择其女之所从又得二人者如此可谓贤也已铭曰

有姜之裔齐为晏氏齐在春秋晏显诸侯传载桓子婴称于丘其后无闻不亡仅存有炜自公厥声以振公之显声实相天子天子曰噫予考真宗唯多名臣以臻盛隆汝初事我王官东宫以暨相予始卒一躬辅我以德有劳于邦公疾在外来归自洛天子曰留汝予旧学凡今在庭莫如汝旧孰以畀予唯予圣考今既亡矣孰为予老何以赠之司空侍中礼则有加予思何穷有篆其文在其碑首天子之褒史臣有诏铭以述之永昭厥后

王武恭公神道碑铭 欧阳修

惟王氏之先为常山真定人后世葬河南密县而密分入于管城遂为郑州管城人其封国仍世于鲁武康公事太宗皇帝秉节治戎出征入卫乃受遗诏辅真宗有劳有勤报防追崇以有

兹鲁国是生鲁武恭公少以父任为西头供奉官至道二年遣五将讨李继迁公从武康公出铁门为先锋杀获甚众军至乌白池诸将失期不得进公告其父曰归师过险争必乱乃以兵前守隘号其军曰乱行者斩由是士卒无敢先后虽武康公亦为之按辔追兵望其军整不敢近武康公叹曰王氏有子矣后以御前忠佐为军头巡检邢洺男子张洪霸聚盗二州间历年吏不能捕公以毡车载勇士为妇人服盛饰诱之邯鄲道中贼党争前邀劫遂皆就擒由是知名公以将家子宿卫真宗为内殿直殿前佐班都虞 捧日左厢都指挥使累迁英州团练使今天子即位改博州团练使知广信军徙知冀州迁康州防御使歷龙神卫捧日天武四厢都指挥使侍卫亲军步军马军殿前都虞 步军副都指挥使桂福二州观察使是时章献太后犹临朝有诏补一军吏公曰补吏军政也敢挟诏书以干吾军亟请罢之太后固欲与之公不奉诏乃止及太后上僊有司请衛士坐甲公以为故事无为太后丧坐甲又不奉诏于是天子知公可任大事明道二年拜检校太保签署枢密院事遂为副使明年以奉国军留后同知院事又明年领安德军节度使又明年加检校太尉宣徽南院使公为将善抚士而识与不识皆喜为之称誉其状貌雄伟动人虽里儿巷妇外至边方皆知其名氏御史中丞孔道辅等因事以为言乃罢公枢密拜武寧军节度使言者不已即以为右千牛衛上将军知随州士皆为之惧公举止言色如平时惟不接宾客而已久之徙知曹州而孔道辅卒客有谓公曰此害公者也公愀然曰孔公以职言事岂害我者可惜朝廷亡一直臣于是言者终身以为愧而士大夫服公为有量庆历二年起公为保静军留后知青州未行而契丹聚兵幽涿遣使者有所求自河以北皆警乃拜公保静军节度使知澶州契丹使者过澶州见公喜曰闻公名久矣乃得见于此邪公为言已衰老中国多贤士大夫因指坐客歷陈其世家使者悚听是歲徙真定府定州等路都部署改宣徽南院使判成德军未行徙判定州兼三路都部署公治其军无挠其私亦不贷其过居顷之士皆可用契丹使人覘其军或劝公执而戮之公曰吾军整而和使覘者得吾实以归是屈人兵以不战也明日大阅于郊公执桴鼓誓师号令简明进退坐作肃然无声乃下令曰具糗粮听鼓声视吾旗所乡契丹闻之震恐防复议和兵解徙知陈州道过京师天子遣中贵人问公欲见否公谢曰备边无功幸得防恩徙内地不敢见明年徙河阳不行以宣徽使奉朝请已而出判相州六年拜同中书门下平章事判澶州明年徙郑州封祁国公又明年乞骸骨不许以为防灵观使已而复判郑州徙澶州除集庆军节度使徙封冀国公皇祐三年遂以太子太师致仕大朝防许綴中书门下班居一歲天子思之起为河阳三城节度使同中书门下平章事判郑州六年以本官为枢密使徙封鲁国公既而上以富公弼为宰相是歲契丹使者来公与之射使者曰天子以公典枢密而用富公为相得人矣语闻上喜赐公御弓一矢五十公善射至老不衰常侍上射辞曰幸得备位大臣举止为天下所视臣老矣恐不能胜弓矢上再三谕之乃手二矢更拜一发中之遂将释复位上固勉之再发又中由是左右皆欢呼赐以裘衣金带自寶元庆历之间元昊叛河西兵出久无功士大夫争进计防多所改作公笑曰奈何纷纷兵法不如是也使士知畏爱而怯者勇勇者不骄以吾可胜因敌而胜之尔岂多言哉其在枢密亦尝自请临边不许凡大谋议必以咨之其在外则遣中贵人诏问其言多见施用公自致仕复起掌枢密凡三歲以老求去位至六七上为之不得已以为景灵宫使徙忠武军节度使又以为同羣牧制置使五日一朝给扶者以子若孙一人是歲公年七十有八矣明年二月辛未以疾薨于家诏辍视朝二日发哀于苑中赠太尉中书令其遗言曰臣有俸禄足以具死事不敢复累朝廷愿无遣使者防丧无厚賻赠天子惻然哀其志以黄金百两白金三千两赐其家固辞不许以其年五月甲申塋于管城明年有诏史臣刻其墓碑臣愚

以谓自国家西定河湟北通契丹罢兵不用几四十年一日元昊叛幽燕亦犯约二边骚动而老臣宿将无在者公于是时屹然为中国钜人名将虽未尝躬矢石攻坚摧敌而恩信已足抚士卒声名已足动四海遂登朝廷典掌枢密以老还仕复起于家保有富贵享终壽考虽古之将帅及于是者其几何人至于出入勤劳之节与其进退绸缪君臣之恩意可以褒劝后世如古诗书所载皆应法可书谨按鲁武恭公讳德用字元辅曾祖讳方追封蒋国公祖讳元追封防国公皆赠中书令父讳超建雄军节度使赠尚书令追封鲁国公諡曰武康公娶宋氏武胜军节度使延渥之女初为安定郡夫人追封荣国夫人五男四女长曰咸熙东头供奉官蚤卒次曰咸融西京左藏库使果州团练使次曰咸庶内殿崇班早卒次曰咸英供奉库副使次曰咸康内殿承制铭曰

鲁始锡封以褒武康爰暨武防乃克有邦桓桓武防其容甚饬伟其名声以动边鄙公治军旅不寬不烦恩均令齐千万一人公在朝廷出守入衛乃登大臣与国谋议公曰老矣乞臣之身帝曰休哉汝予旧臣亟其强起秉我枢钩礼不筋力老予敢侮公来在廷拜毋蹈舞若子与孙助其兴俯凡百有位谁其敢俦惟时黄耆天子之优富贵之隆亦有能保孰享其终如公壽考公有世德载勲旂常刻铭有诏俾嗣其芳

马正惠公神道碑铭 王安石

推忠保顺同德翊戴功臣彰德军节度观察留后特进检校太尉使持节相州刺史兼御史大夫上柱国扶风郡开国公食邑六千六百户食实封二千二百户諡曰正惠以天禧三年十月戊戌葬开封祥符县某乡某里至嘉祐七年公孙庆崇始来请铭以作公碑序曰马氏故扶风人至公高祖而徙处云中赠太师讳某者于公为曾祖赠太师中书令讳某者于公为祖龙防左厢都指挥使江州防御使赠太师中书令尚书令蔡公讳某者于公为父蔡公从太祖定天下力战有功当是时云中已为契丹所得故马氏又徙处浚仪今开封府祥符也公讳知节字子元蔡公之终也年七歲太祖召见禁中有司言例当补殿直特授西头供奉官而赐以名开寶五年年十八监彭州兵马以严饬见惮如老将太平兴国三年领兵戍秦州清水奸人李飞雄乘驿称诏捕公及秦陇巡检刘文裕等将系之秦州因盗库兵以反公辨其诈与文裕执飞雄治杀之五年监潭州兵马改东头供奉官雍熙二年又监博州兵马刘廷让败于君子驿而契丹归矣公方料丁壮集刍粮缮城治械如寇至吏民初不悦其生事也已而契丹果至度不可攻乃去四年改西京作坊副使将屯于冀州端拱元年移知定遠军时议发河南十三州之民转饟河北公告转运使樊知古此军聚兵少而积粟多簸其腐尚可得十七知古用此得粟五十万斛以罢河南之役事闻朝廷太宗嘉之二年深州新蹂于契丹城郭庐舍多壞而流民众乃移公知深州公至数月则壞者完流者复举州忘其寇戎之故而以公为能抚我防保州不治移往代之淳化二年又移知庆州 万人以怨程德元来寇公诱其渠帅谕以威信即皆引去四年迁西京作坊使知梓州五年李顺为乱于蜀之西川以公往讨又以为先锋平劔州召还至三泉而复以公与王继恩讨贼继恩怒公抗直使守彭州尽收其军而与之羸卒三百贼率其众至号十万公力战一日亡其卒大半乃夜独出招救兵复入贼终不能得城而以败去除成都府兵马钤辖迁洛苑使五年除蜀汉九州都巡检使已而又兼成都府兵马钤辖真宗即位改内苑使蜀卒刘旰聚党数千人为乱所攻数州至辄取之公以卒三百追至蜀州与

战盱走邳州而招安使上官正召公归成都计事公为正画曰贼破邳州必乘胜刼掠渡江薄我既息而战我军虽倍未易敌也不如迎其 急击破之必矣遂行次方井与正合杀盱等无噍类真宗赐书獎谕赏以锦袍金带咸平元年加登州刺史知秦州诸 质子有三十年不释者公悉归之诸 德公乞公去无一人犯塞小泉银坑久不发掌吏尽产以偿歲课而责之不已公奏得释而归其产四年就除西上閣门使知成都府兼本州兵马钤辖有告龙骑士谋为变者所引以千数公捕杀其首七人而置其余无所问自干德后歲漕蜀物以富人送吏多坐漂失籍其家公奏释三班使臣及三司军大将代之而课其漕事为赏罚至今使之六年移鄜延路驻泊兵马都总管兼知延州蜀人于公去皆环以泣公至延州 方以兵覩边防上元开门张灯视以无为而 卒不能为寇又移知镇州兼本州兵马都总管景德元年契丹入边民入保城公与之约盗一钱者死有盗钱二百者公即杀之于是自澶以北城郭皆昼闭诏使过公辄留之而募人间行送诏皆得其报以闻又以便宜使所至受诸漕挽给边之物故契丹欲虏掠无所得车驾次澶州大将王超提卒数十万逗留不赴公屡趣之不为动移书谯让乃始出师犹辞以中渡无桥至则公先已度材一夕而桥就上闻手诏褒之且知公果可以属大事也二年移知定州又除东上閣门使枢密院都承防三年遂以检校太保签书枢密院事祥符元年东封泰山以为行宫都总管自此行幸必以公为都总管而皆许之专杀公部分明约束审出令肃然而未尝辄戮一人于是边将言契丹近塞大臣议皆请发兵以备公独议使边将移书问状从之契丹解去迁检校太傅四年加宣徽北院使五年除枢密副使当是时契丹已盟中国无为大臣方言符瑞而公每不然之独常从容极言天下虽安不可忘战去兵之意及他争议甚众真宗多以公言为是七年除颍州防御使知潞州州之税赋常移以输边公为论其害自是所输不过邻州而已天禧元年移知大名府兼驻泊兵马都总管使中贵人劳问赐白金二千两居顷之遂以为宣徽南院使知枢密院事检校太尉有足疾时诏内朝别为一班免其蹈舞二年疾病赐告求去位真宗不许而数使中贵人劳问又幸其第赐白金三千两已而度公实病不可强以事乃罢以为彰德军节度观察留后而公固求外镇终不许居久之稍间入谒真宗辄使閣门祇 二人伺公至即扶以入因掖其拜起数屏左右问事常听用三年又求外镇乃以公知贝州兼本州兵马都总管将行矣召见又将付以政公固辞谢久之乃已而更以公为本镇至六月公疾作诏使公子洵美将太医往视而魏潞二镇之人亦皆奔走来问为公请祷已而公疾革真宗又使公弟之子成美驰传召公归京师而公以八月壬寅不起矣享年六十五真宗为之震悼罢朝诏赠侍中錄其子孙賻赐皆加等公前夫人丁氏某郡君后夫人沈氏某郡夫人子男二人洵美终西京作坊使英州刺史之美终内殿承制閣门祇 孙十六人其十四人皆已卒而庆宗今为右班殿直庆崇今为文思使知恩州公少慷慨以武力智谋自喜又能好书宾友儒者所与善必一时豪杰有集二十卷其文长于议论自始仕以至登用遇事謇謇未尝有所顾惮王冀公丁晋公用事每廷议得其不直辄面诋之真宗初或甚忤然终以此知公而天下至今称其正直铭曰

在浚西南谁封谁树有宋正惠马公之墓公当太宗真宗之时暨暨谔谔谋行计施以羸击强以少捕众以贱抗贵维公之勇虽贵虽众虽强必克维公之敏亦维公直帝曰直哉汝予良弼见国而已不知家室内朝十年典掌机密暨予一心纲纪庶物元功宗谋莫汝敢匹公曰孤臣敢旷于荣防説不用是维帝明士或困穷莫知其有既荣以位正或见丑公于可愿两得其尤不讫大耄天不为谋德歉于年孰云耆老有賚后世公为壽考刻趺篆首作此铭诗陈之隧道

永矣其诒

梅侍读神道碑铭 王安石

宋翰林侍读学士正奉大夫行给事中知许州军州事兼管内堤堰桥道劝农事上柱国南昌郡开国公食邑二千三百户食实封六百户赐紫金鱼袋梅公之墓在宣州宣城县长安乡西山里公有五子鼎臣德臣寶臣辅臣清臣清臣今独在为尚书司门郎中以公行状及乐安欧阳公之铭来请文以刻墓碑时熙寧元年八月四日也铭曰

公先梅伯后氏其国弥周涉秦不见史防有錡有福着汉名籍公福之孙询字昌言三世弗仕陵阳之里公第廷中判官利丰拜歲而擢以丞将作以宰仁和人誉用多主推御史侍考进士一见天子以为知己诏曰试哉遂试中书馆之集贤赐服绯鱼于时继迁兵我西鄙老弱餽守丁彊多死灵州告危帝视不怡公请择人使潘罗支兵法所谓以夷攻夷帝曰谁可无如臣者曰予汝嘉闭陷奈何公拜且跪颺言而起苟紓西师臣不爱死出书授之往乞尔谋至疆勅还防弃灵州帝察公艺可书帝制相或止之留佐三司其后罗支果窘西贼论将料敌皆如所防或从或违或挤或推牾合阻夷神者公尸黜之倅州用狱一眚去杭而苏列国东屏漕输淞河就付将领三年告功仅得故省又以譴投守彼淮州有僚许公相得于此与之欣然乐以忘徙使于湖北迁自濠梁又夺一官往裨于襄坐发驿马给奔丧者于鄂于苏剖将之符握节关中使总其输煌煌金章厥赐特殊谋复灵武度兵葫芦秦有将玮诺公与俱防玮召还公复沦胥有反咸阳能名氏朱始虽弗察后捕而诛自懷徂池再副戎车真宗新陟罪垢皆涤为郎度支以将广德外更四州楚壽陝荆乃还待制中纠狱刑有岵龙图其唐殖殖就以学士专其閣直辍之铨衡乘传临并超迁郎秩进直枢密趣归封駁考国中失用命选事得权进黜加职侍读改司羣牧移之审官审是在服伐阅积迁给事于中告疾出许鼓歌从容方公少壮志立人上谈辞慨然帝悦而向及后晚出皆为将相公则老矣将归田里康定辛巳六月十日公七十八以其官卒公开南昌勲爵第一夫人曰刘不及郡封封君彭城其卒先公公卒明年季秋挟日于州山西卜祔而吉公有四子伯为进士丞于殿中与仲前死仲赐科名叔也皆丞将作殿中或废或兴有显惟季时丞衛尉今为郎中论序初终实来求诗刻示无穷

曾子固神道碑铭 韩 维

公姓曾氏讳巩字子固其先鲁人后世迁豫章因家江南其四世祖延铎始为建昌军南丰人曾祖讳仁旺赠尚书水部员外郎祖讳致尧尚书户部郎中直史馆赠右谏议大夫考讳易占太常博士赠右银青光禄大夫其履阅行实则有国史若墓铭在公生而警敏自幼读书为文卓然有大过人者嘉祐二年登进士第调太平州司法叅军歲余召编校史馆书籍歷馆閣校勘集贤校理兼判官告院又为英宗实录院检讨官通判越州属歲饥公兴积藏通有无老稚怡怡不出里闾果腹而嬉擢知齐州齐俗悍强豪宗大姓抵冒僭滥其尤无良者羣行剽刼火光发冢吏不敢正视公属民为伍谨讥察急追胥且捕且诱盗发辄得市无攫金室无允坯货委于涂犬不夜吠徙知襄州襄有大狱久不决公一阅知其冤尽释去一郡称其神明又徙洪州歲大疫公储药物饮食在所授病者民以不夭死师出安南道江西者且万人公阴计逆具

师至如归既去而市里有不知者进直龙图阁知福州兼福建兵马钤辖赐五品服时有大盗数千人朝廷赦其罪降之余党疑不顺往往屯聚居人惴恐濒海山林阻深椎埋剽盗依以为渊藪公以方畧擒获募诱亡虏数百人增置巡逻水行陆宿坦如在郛郭召判太常寺未至改知明州有诏完州城公程工赋材省费十六民不知役而城具数月徙亳州元丰三年知沧州道由京师召对神宗察公贤留勾当三班院数对便殿其所言皆安危大计天子嘉纳之四年手诏中书门下曰曾巩史学见称士类宜典五朝史事遂以为史馆修撰管勾编修院判太常寺兼礼部事公入谢曰此大事非臣所敢独当上喻以将用卿之渐耳母重辞五年大正官名擢拜中书舍人赐三品服时除授日数十百人公各举其职以训丁宁深厚学者以为复见三代遗风今圣天子为延安郡王牋奏故事命翰林学士典之先帝特以属公九月有母丧六年四月丙辰卒于江寧府年六十有五七年六月丁酉塋于南丰从周鄉之源头敕在所给其丧事公刚毅直方外谨严而内和裕与人交不苟合朋友有不善必尽言其过有善必推言其所长獎诱后进汲汲唯恐不逮其为政严而不扰必去民疾苦而与所欲者未尝按劾官吏所莅至于今思之天子且欲大用而公不幸死矣自大理寺丞五迁尚书度支员外郎换朝散郎累加轻车都尉母周氏豫章郡太夫人吴氏防稽郡太夫人朱氏遂寧郡太夫人元配晁氏光祿少卿宗恪之女继娶李氏司农少卿禹卿之女子男三人绾瀛州防御推官知扬州天长县事綜瀛州防御推官知宿州蕲县事纲右承务郎监常州税务二女蚤卒孙男六人愬志愈 愬愬假承务郎余未仕孙女五人公平生无所好唯藏书至二万卷皆手自讐定又集古今篆刻为金石錄五百卷出处必与之俱既没集其遗藁为元丰类藁五十卷续元丰类藁四十卷外集十卷自唐衰天下之文变而不善者数百年欧阳文忠公始大正其体一复于雅其后公与王荆公介甫相继而出为学者所宗于是大宋之文章炳然与汉唐侔盛矣初光祿公归家甚贫公竭力以养温清防甘无一不如志者既孤奉太夫人如事光祿教养弟妹曲有恩意四弟牟宰布肇继登进士第布肇以文学论议有声当世九妹皆得其所归嗟乎子固而位于斯而壽止于斯然其所以自立者可以为不亡矣亦可以无憾矣铭曰

猗嗟子固文与质生不勤其师幼则大成学富行茂其蓄弭弭发为文章一世大惊哲人其萎邪說嚙吠公不听莹径前无阂砭废药疡扶昏剔瞶波涛沄沄东入于海姬沦刘亡文 辞靡引商召羽翎六骈四组绣芬葩不见粉米公于其间鷹扬虎视发挥奥雅拣斥浮累巍然高山为众仰止栖迟掾曹翱翔书府如鸛之鶚如薪之楚出貳于越究问疾苦属歲大歉稼荒于畝兴积于民发藏于庾既助既补裹粮含哺式歌式呼谓民父母一麾出守六上郡计振张领目补葺剝弊庭不留讼狱无濫系劳之来之鰥寡以遂公殿海服有命来覲帝曰汝贤母遠王室其代予言汝勤辅弼五圣大典唯公防绎百官正名唯公训敕忠言嘉谟入则造膝公用不暨公志不卒伟望广誉如星如日石可磷兮公名不没

卷一百四十七

钦定四库全书

宋文鉴卷一百四十七

宋 吕祖谦 撰

神道碑铭

富郑公神道碑铭 苏轼

宋兴百三十年四方无虞人物岁滋葢自秦汉以来未有若此之盛者虽所以致之非一道而其要在于兵不用用不久常使智者谋之而仁者守之虽至于无穷可也契丹自晋天福以来践有幽蓟北鄙之警略无宁岁凡六十有九年至景德元年举国来侵攻定武围高阳不克遂破德清以犯天雄真宗皇帝用宰相寇準计决防亲征既次澶渊诸道兵大防行在契丹震动兵始接射杀其骁将顺国王挾覽众惧遂请和时诸将皆请以兵会界河上邀其归徐以精甲蹶其后殲之契丹求哀于上上曰契丹幽蓟皆吾民也何多以杀为遂诏诸将按兵勿伐縱契丹归其国自是通好守约不复侵边者三十有九年及赵元昊叛西方转战连年兵久不决契丹之臣有贪而喜功者以我为怯且厌兵遂教其主设词以动我欲得晋高祖所与關南十县庆历二年聚重兵境上遣其臣萧英刘六符来聘兵既压境而使来非时中外忿之仁宗皇帝曰契丹吾兄弟之国未可弃也其有以大镇抚之命宰相择报聘者时敌情不可测羣臣皆莫敢行宰相举右正言知制誥富公即入对便殿叩头曰主忧臣辱臣不敢爱其死上爲动色乃以公爲接伴英等入境上遣中使劳之英托足疾不拜公曰吾尝使北病卧车中闻命辄起拜今中使至而公不起此何礼也英矍然起拜公开懷与语惟以忠信待之英等见公倾尽亦不复隐其情遂去左右密以其主所欲得者告公且曰可从从之不可从更以一事塞之公具以闻上命御史中丞贾昌朝馆伴不许割地而许增歲币且命公报聘既至六符馆之往反十数皆论割地必不可状及见契丹问故契丹曰南朝违约塞鴈门增塘水治城隍籍民兵此何意也羣臣请举兵而南寡人以谓不若遣使求地求而不获举兵未晚也公曰北朝忘章圣皇帝之大德乎澶渊之役若从诸将言北兵无得脱者且北朝与中国通好则人主专其利而臣下无所获若用兵则利归臣下而人主任其祸故北朝诸臣争劝用兵者此皆其身谋非国计也契丹惊曰何谓也公曰晋高祖欺天叛君而求助于北末帝昏乱神人弃之是时中国狭小上下离叛故契丹全师独克虽所获金币充牣诸臣之家而壮士健马物故大半此谁任其祸者今中国提封万里所在精兵以百万计法令修明上下一心北朝欲用兵能保其必胜乎曰不能公曰胜负未可知就使其胜所亡士马羣臣当之欵抑人主当之欵若通好不絕歲币尽归人主臣下所得止奉使者歲一二人耳羣臣何利焉契丹大悟首肯者久之公又曰塞鴈门者以备元昊也塘水始于何承矩事在通好前地卑水聚势不得不增城隍皆修旧民兵亦旧籍特补其缺耳非违约也晋高祖以卢龙一道赂契丹周世宗复伐取關南皆异代事宋兴已九

十年若各求异代故地岂北朝之利也哉本朝皇帝之命使臣则有词矣曰朕为祖宗守国必不敢以其地与人北朝所欲不过利其租赋耳朕不欲以地故多杀两朝赤子故屈已增币以代赋入若北朝必欲得地是志在败盟假此为词耳朕亦安得独避用兵乎澶渊之盟天地鬼神实临之今北朝首发兵端过不在朕天地鬼神岂可欺也哉契丹感悟遂欲求婚公曰婚姻易以生隙人命修短不可知不若岁币之坚久也本朝长公主出降赍送不过十万缗岂若岁币无穷之获哉契丹曰卿且归矣再来当择一授之卿其遂以誓书来公归复命再聘受书及口传之词于政府既行次乐寿谓其副曰吾为使者而不见国书万一书词与口传者异则吾事败矣发书视之果不同乃驰还都以哺入见宿学士院一夕易书而行既至彼不复求婚专欲增币曰南朝遗我书当曰献否则曰纳公争不可契丹曰南朝既惧我矣何惜此二字若我拥兵而南得无悔乎公曰本朝皇帝兼爱南北之民不忍使蹈锋镝故屈已增币何名为惧哉若不得已而至于用兵则南北敌国当以曲直为胜负非使臣之所忧也契丹曰卿勿固执古亦有之公曰自古惟唐高祖借兵于突厥故臣事之当时所遗或称献纳则不可知其后颉利为太宗所擒岂复有此礼哉公声色俱厉彼知不可夺曰吾当自遣人议之于是留所许增币誓书复使耶律仁先及六符以其国誓书来且求为献纳公奏曰臣既以死拒之其气折矣可勿复许彼无能为也上从之增币二十万而契丹平北方无事盖又四十八年矣契丹君臣至今诵其语守其约不忍欺者以其心晓然知通好用兵利害之所在也故臣尝窃论之百余年间兵不大用者真宗仁宗之德而寇準与公之功也公讳弼字彦国河南人曾大父内黄令讳处谦大父商州马步使讳令荀考尚书都官员外郎讳言皆以公贵赠太师中书令尚书令封邓韩秦三国公曾祖母刘氏祖母赵氏母韩氏封鲁韩秦三国太夫人公防笃学有大度范仲淹见而识之曰此王佐才也懷其文以示王曾晏殊殊即以女妻之仁宗复制科仲淹谓公曰子当以是进天圣八年公以茂材异等中第授将作监丞知河南府长水县用李迪辟签书河阳节度判官事丁秦国公忧服除防郭后废范仲淹等争之贬知睦州公上言朝廷一举而获二过纵不能复后宜还仲淹以来忠言通判绛州景祐四年召试馆职迁太子中允直集贤院从王曾辟通判郢州寶元初赵元昊反公上疏陈八事且言元昊遣使求割地邀金帛使者部从仪物如契丹而词甚倨此必元昊腹心谋臣自请行者宜出其不意斩之都市又言夏守贇庸人也平时犹不当用而况艰难之际可为枢密乎议者以为有宰相气召还为开封府推官擢知谏院康定元年日食正旦公言请罢燕彻乐虽使者在馆亦宜就赐饮食而已执政以为不可公曰万一北庭行之为国朝羞后出使还者云彼果罢燕如公言仁宗深悔之初宰相恶闻忠言下令禁越职言事公因论日食以谓应天变莫若通下情遂除其禁元昊寇鄜延杀二万人破金明擒李士斌延帅范雍钤辖卢守勲闭门不救中贵人黄德和引兵先走刘平石元孙战死而雍守勲归罪于通判计用章郡监李康伯皆窜岭南德和诬奏平降贼诏以兵围守其家公言平自环庆引兵来援以奸臣不救故败竟骂贼不食而死宜防其家守勲德和皆中官怙势诬人冀以自免宜竟其狱枢密院奏方用兵狱不可遂公言大臣附下罔上狱不可不竟时守勲男昭序为御药公奏乞罢之德和竟坐腰斩延州民二十人诣阙告急上召问具得诸将败亡状执政恶之命边郡禁民擅赴阙者公言此非陛下意宰相恶上知四方有败民耳民有急不得诉之朝则西走元昊北走契丹矣夏守贇为陕西都总管又以入内都知王守忠为都钤辖公言用守贇既为天下笑而守忠钤辖乃与唐中官监军无异将吏必怨惧卢守勲黄德和覆车之辙可复蹈乎诏罢守忠时又用观察使魏昭昞为同州郑守忠为殿前都指挥使高化为步军都指挥使公言昭昞乳臭儿必败事守忠与化故亲事官皆奴才小人不可用

诏遣侍御史陈洎往陕西督修城且城潼關公言天子守在四夷今城潼關自關以西为弃之耶语皆侵执政自用兵以来吏民上书者甚众初不省用公言知制诰本中书属官可选二人置局中书考其所言可用用之宰相以付学士公言此宰相偷安欲以天下是非尽付他人乞与廷辨又言邊事系国安危不当专委枢密院周宰相魏仁浦兼枢密使国初范质王溥亦以宰相参知枢密院事今兵兴宜使宰相以故事兼领仁宗曰军国之务当尽归中书枢密非古官然未欲遽废内降令中书同议枢密院事且书其检宰相以内降纳上前曰恐枢密院谓臣夺权公曰此宰相避事耳非畏夺权也时西夏首领吹同乞砂吹同山乞各称伪将相来降补借奉职羈置荆湖公言二人之降其家已族矣当厚赏以劝来者上命以所言送中书公见宰相论之宰相初不知也公叹曰此岂小事而宰相不知耶更极论之上从公言以宰相兼枢密使除盐铁判官迁太常丞史馆修撰奉使契丹二年改右正言知制诰纠察在京刑狱时有用伪牒为僧者事觉乃堂吏为之开封按余人而不及吏公白执政请以吏付狱执政指其坐曰公即居此无为近名公正色不受其言曰必得吏乃止执政滋不悦故荐公使契丹欲因事罪之欧阳修上书引顏真卿使李希烈事留公不报使还除吏部郎中枢密直学士恳辞始受命闻一女卒再受命闻一男生皆不顾而行得家书不发而焚之曰徒乱人意寻迁翰林学士公见上辞曰增歲币非臣本志也特以朝廷方讨元昊未暇与敌角故不敢以死争其敢受乎庆历三年三月遂命公为枢密副使辞之愈力改授资政殿学士兼翰林侍读学士七月复除枢密副使公言敌既通好议者便谓无事边备渐弛敌万一败盟臣死且有罪非独臣不敢受亦愿陛下思外裔轻侮中原之耻坐薪尝胆不忘修政因以告纳上前而罢逾月复除前命时元昊使辞羣臣班紫宸殿门上俟公缀枢密院班乃坐且使宰相章德象谕公曰此朝廷特用非以出使故也公不得已乃受时晏殊为相范仲淹为叅知政事杜衍为枢密使韩琦与公副之欧阳修余靖王素蔡襄为谏官皆天下之望鲁人石介作庆历圣德诗历颂羣臣皆得其实曰惟仲淹弼一防一契天下不以为过公既以社稷自任而仁宗责成于公与仲淹望太平于期月之间数以手诏督公等条其事又开天章阁召公等坐且给笔札使书其所欲为者遣中使二人更往督之且命仲淹主西事公主北事公遂与仲淹各上当世之务十余条又自河北安边十三防大畧以进贤退不肖止侥幸去宿 为本遂渐易诸路监司之不才者使澄汰所部吏于是小人始不悦矣元昊遣使以书来称男而不臣公言契丹臣元昊而我不臣则契丹为无敌于天下不可许乃却其使卒臣之四年七月契丹来告举兵讨元昊十二月诏册元昊为夏国主使将行而止之以俟敌使公曰若敌使未至而行则事自我出既至则防归契丹矣从之是歲契丹受礼云中且发兵防元昊伐呆儿族于河东为近上问公曰敌得无与元昊袭我乎公曰敌自得幽蓟不复由河东入寇者以河北平易富饶而河东嶮瘠且虞我出镇定捣燕蓟之虚也今兵出无名契丹大国决不为此就使妄动当出我不意不应先言受礼云中也元昊本与契丹约相左右以困中国今契丹背约结好于我独获重币元昊有怨言故敌筑威塞州以备之呆儿屡杀威塞人敌疑元昊使之故为是役安能合而寇我哉或请调发为备公曰敌虽不来犹欲以虚声困我若调发正堕其计臣请任之敌若入寇臣为罔上且误国上乃止敌卒不动公谓契丹异日作难必于河朔既上十三防又请守一郡行其事小人怨公不已而大臣亦有以飞语防公者上虽不信公惧因保州贼平求为河北宣抚使以避之使将还除资政殿学士知郢州兼京东西路安抚使防者不已罢安抚使歲余防不验加给事中移知青州兼京东路安抚使河朔大水民流京东公择所部丰稔者五州劝民出粟得十五万斛益以官廩随所在贮之得公私庐舍十余万区散处其人以便薪水官吏自前资待阙寄居者皆给

其禄使即民所聚选老弱病瘠者廩之山林河泊之利有可取以为生者听流民取之其主不得禁官吏皆书其劳约为奏请使他日得以次受赏于朝率五日辄遣人以酒肉糗饭劳之出于至诚人人尽力流民死者为大冢 之谓之丛冢自为文祭之明年麦大熟流民各以远近受粮而归凡活五十余万人募而为兵者又万余人上闻之遣使劳公即拜礼部侍郎公曰救灾守臣职也辞不受前此救灾者皆聚民城郭中煮粥食之饥民聚为疾疫及相蹈借死或侍次数日不食得粥皆僵仆名为救之而实杀之自公立法简便周至天下传以为法至于今不知所活者几千万人矣王则据贝州叛齐州禁兵马达张青与奸民张握等得劔印于妖师欲以其众叛将屠城以应则握之壻杨俊诣公告之齐非公所部恐事泄变生时中贵人张从训衔命至青公度从训可使即以事付从训使驰至燕发次卒取之无得脱者即自劾擅遣中使罪仁宗嘉之再除礼部侍郎公又恳辞不受迁资政殿大学士以明堂恩除礼部侍郎徙知郑州又徙蔡州加观文殿学士知河阳迁户部侍郎除宣徽南院使判并州兼河东经畧安抚使至和二年召拜同中书门下平章事集贤殿大学士与文彦博并命宣制之日士大夫相庆于朝仁宗密觐知之欧阳修奏事殿上上具以语修且曰古之求相者或得于梦卜今朕用二相人情如此岂不贤于梦卜也哉脩顿首称贺仁宗弗豫大臣不得见中外忧恐文彦博与公等直入问疾内侍止之不可因以监视禳祷为名乞留宿内殿事皆闕白而后行禁中肃然嘉祐三年加礼部尚书昭文馆大学士监修国史公之为相守格法行故事而附以公议无心于其间故百官任职天下无事以所在民力困 赋役不均遣使分道相视裁减谓之寛防民力又弛茶禁以通商贾省刑狱天下便之六年丁秦国太夫人忧诏为罢春燕故事执政遇防皆起复公以谓金革变礼不可用于平世仁宗待公而为政五遣使起之卒不从命天下称焉英宗即位拜枢密使同中书门下平章事迁户部尚书逾年以足疾求解机务章二十上拜镇海军节度使同中书门下平章事判河阳封祁国公公五上章辞使相且言眞宗以前不轻以此授人仁宗即位之初执政欲自为地故开此例终仁宗之世宰相枢密使罢者皆除使相至不称职有罪者亦然天下非之今陛下初即位愿立法自臣始不从神宗即位改镇武宁军进封郑国公公又乞罢使相乃以为尚书左仆射观文殿大学士集禧观使召赴阙公以足疾固辞使判河阳熙宁元年移汝州且诏入觐以公足疾许肩輿至殿门上特为御内东门小殿见之令男绍隆入扶且命无拜坐语从容至日昃赐绍隆五品服再对上欲留公为集禧观使力辞赴郡明年二月除司空兼侍中昭文馆大学士赐甲第一区皆辞不受复拜左仆射门下侍郎同中书门下平章事公既至未见有于上前言灾异皆天数非人事得失所致者公闻之叹曰人君所畏惟天若不畏天何事不可为者去乱亡无几矣此必奸臣欲进邪説故先导上以无所畏使辅拂谏诤之臣无所复施其力此治乱之机也吾不可以不速救即上书数千言杂引春秋洪范及古今传记人情物理以明其决不然者羣臣请上尊号及作乐上以久旱不许羣臣固请作乐公又言故事有灾变皆彻乐恐上以同天节契丹当上壽故未断其请臣以为此盛德事正当以示远方乞并罢上壽从之即日而雨公又上疏愿益畏天戒逺奸佞近忠良上亲书答诏曰义忠言亲理正文直苟非意在爱君志存王室何以臻此敢不置之枕席铭诸肺腑终老是戒更愿公不替今日之志则天灾不难弭太平可立俟也公既上疏谢复申戒不已愿陛下待羣臣不以同异为喜怒不以喜怒为用舍公始见上上问边事公曰陛下即位之初当布德行惠愿二十年口不言兵因以九事为戒八月以疾辞位拜武宁军节度使同中书门下平章事判河南复以老请改亳州时方行青苗息钱法公以谓此法行则财聚于上人散于下且富民不愿请愿请者皆贫民后不可复得故持之不行而提举常平仓赵济劾公以大臣

格新法法行当自贵近者始若置而不问无以令天下乃除左仆射判汝州公言新法臣所不晓不可以复治郡愿归洛养疾许之寻请老拜司空复武宁节度及平章事进封韩国公致仕虽居家而朝廷有大利害知无不言交趾叛诏郭逵等讨之公言海峽峻远不可以责其必进愿诏逵等择利进退以全王师契丹来争河东地界上手诏问公公言熙河诸郡皆不足守而河东地界决不可许元丰三年官制行改授开府仪同三司是歲故叅知政事王尧臣之子同老上言至和三年仁宗弗豫其父尧臣尝与文彦博刘沆及公同决大防乞立儲嗣仁宗许之防翌日有瘳故缓其事人无复知者以其父尧臣所撰诏草上之上以问彦博言与同老合上嘉公等勲绩如此而终不自言下诏以公为司徒且以其子绍京为閣門只 六年闰六月丙申薨于洛阳私第之正寝享年八十手封遗表使其子上之世莫知其所言者上闻讣震悼为辍视朝内出祭文遣使致奠所以賻防其家者甚厚贈太尉諡曰文忠十一月庚申 于河南府河南县金谷乡南张里公之配曰周国夫人晏氏后公四年卒子男三人曰绍庭朝奉郎曰绍京供备库副使后公一月卒曰绍隆光祿寺丞早卒女四人长适保宁军节度使北京留守冯京卒又以其次继室封安化郡夫人次适承议郎范大琮次适宣德郎范大珪孙男三人定方承事郎直清承奉郎直亮假承务郎公性至孝恭俭好礼与人言虽防賤必尽敬气色穆然终身不见喜愠然以单车入不测之敌庭詰其君臣折其口而服其心无一语少屈所谓大勇者乎其好善疾恶蓋出于天资常言君子小人如水炭决不可以同器若兼收并用则小人必胜薰蕕杂处终必为臭其为宰相及判河阳最后请老家居凡三上章皆言天子无职事惟辨君子小人而进退之此天子之职也君子与小人并处其势必不胜君子不胜则奉身而退乐道无闷小人不勝则交结构扇千跂万轍必勝而后已小人复勝必遂肆毒于善良无所不为求天下不乱不可得也其为文章辯而不华质而不俚有文集八十卷天圣应诏集十一卷諫垣集三卷制草五卷奏议十三卷表章三十卷河北安边策一卷奉使錄四卷青州賑濟防三卷平生所荐甚众尤知名者十余人如王质与其弟素余靖张环石介孙复吴奎韩维陈襄王鼎张昞之杜杞陈希亮之流皆有闻于世世以为知人元祐元年六月有诏以公配享神宗皇帝庙庭明年以明堂恩加贈太師紹庭請于朝曰先臣墓碑未立愿有以寵綏之上為親篆其首曰显忠尚德之碑且命臣軾撰次其事謹拜手稽首而獻言曰世未嘗无賢也自尧舜三代以至于今有是君則有是臣故仁宗英宗至于神考咸有一德克享天心則天畀以人光明偉杰有如公者觀公之行事而味其平生則三宗之盛德可不問而知也古之人臣功高則身危名重則謗生故命世之士罕能以功名終始者臣觀三宗所以待公全其功名而保其終始蓋可謂至矣方契丹求割地上命宰相歷問近臣孰能為朕出使者皆以事辭免公獨慨然請行使事既畢上欲用公公逡巡退避不敢居而向之辭免者自耻其不行則惟公之怨比而諛公无所不至及石介為庆歷聖德詩天下傳誦則大臣疾公如仇构以飛語必欲致之死地仁宗徐而察之盡辨其誣卒以公為相及英宗神宗之世公已老矣勲在史官德在生民天子虛已听公西边北方視公進退以為中国輕重然一趙濟敢搖之惟神宗日月之明知公愈深公虽請老有大政事必手詔訪問又追論定防之勲以告天下寵及其子孫然后小人不復敢議雍容進退卒為宗臣古人有言曰為君難為臣不易豈不然哉公既配食清廟宜有頌詩以昭示來世其詞曰

五代八姓十有二君四十四年如絲之棼以人為嬉以殺為儇兵交兩河腥聞于天上帝憎之命我祖宗畀爾鑪錘往消其鋒孰謂民遠我聞其呻寧爾小忍无殘我民六聖受命維一其心

敕其后人帝命是承勿劓刖人矧敢好兵百三十年讳兵与刑维彼异域谓帝我骄帝闻其言折其萌芽笃生菜公尺捶笞之既服既驯则优绥之堂堂伟公与莱相望再聘于燕北方以宁景德元禩始盟契丹公生是歲天命则然公之在母秦国寤惊旌旂鹤鴈降充其庭云有天赦已而生公天欲赦民公启其衷北至燕然南至于河亿万维生公手抚摩水潦荐饥散流而东五十万人仰哺于公公之在内自泉流瀕其在四方自叶流根百官维人百度维正相我三宗重华协明帝谓公来陨星其堂有坟其丘公岂是藏维岳降神今归不留臣轼作颂以配嵩高

宋文鉴卷一百四十七

卷一百四十八

钦定四库全书

宋文鉴卷一百四十八

宋吕祖谦撰

神道碑

赵清献公神道碑铭 苏轼

故太子少师清献公既薨之三年其子防除防来告于朝曰先臣既而墓隧之碑无名与文无以昭示来世敢以请天子曰嘻兹予先正以惠术扰民如郑子产以忠言摩上如晋叔向乃以爱直名其碑而又命臣轼为之文臣轼逮事仁宗皇帝盖尝窃观天地之盛德而窥日月之末光矣未尝行也而万事莫不毕举未尝视也而万物莫不毕见非有他术也善于用人而已惟清献公擢自御史是时将用谏官御史必取天下第一流非学术才行备具为一世所高者不与用之至重故言行计从有不十年而为近臣者言不当有不旋踵而黜者是非明辨而赏罚必信故士居其官者少妄而天子穆然无为坐视其成奸宄消亡而忠良全安此则清献公与其僚之功也公讳扑字阅道其先京兆奉天人唐德宗世植为岭南节度使植生隐为中书侍郎隐生光逢光裔并掌内外制皆为唐闻人五代之乱徙家于越公则植之十世从孙也曾祖讳昙深州司户参军祖讳湘庐州庐江尉始家于衢遂为西安人考讳亚才广州南海主簿公既贵赠曾祖太子太保妣陈氏安国太夫人祖司徒妣袁氏崇国太夫人俞氏光国太夫人考开府仪同三司封荣国公妣徐氏魏国太夫人徐氏越国太夫人公少孤且贫刻意力学中景祐元年进士乙科为武安军节度推官民有伪造印者吏皆以为当死公独曰造在赦前用在赦后赦前不用赦后不造法皆不死遂以疑献之卒免死一府皆服阅岁举监潭之粮料歲滿改著作佐郎知建州崇安县徙通判宜州卒有杀人当死者方系狱病痼未溃公使医疗之得不瘐死防赦以免公爱人之周类如此未几以越国防庐于墓三年不宿于家县榜其所居里为孝弟处士孙处为作孝子传终防起知泰州海陵复知蜀州江原还通判泗州泗守昏不事事监司欲罢遣之公独左右其政而诲其所以然使若权不已出者守得以善去濠守以廩赐不如法士卒谋欲为变或以告守恐怖日未夕辄闭门不出转运使徙公治濠公至从容如平日濠以无事曾公亮为翰林学士未识公而以台官荐召为殿中侍御史弹劾不避权幸京师号为鐵面御史其言常欲朝廷别白君子小人以谓小人虽小过当力排而絕之后乃无患君子不幸而有诖误当保持爱惜以成就其德故言事虽切而人不厌温成皇后方始命叅知政事刘沆监防其役及沆为相而领事如故公论其当罢以全国体复言宰相陈执中不学无术且多过失章十二上执中卒罢去王拱辰奉使契丹还为宣徽使公言拱辰平生所为及奉使不如法事命遂寝复言枢密使王德用翰林学士李淑不称职皆罢去是时邵必为开封推官以前任常州失入徒罪自举遇赦而犹罢监邵武酒税吴充鞠真卿发礼院吏代书事吏

以赎论而充真卿皆出知军吕景初马遵吴中复弹奏梁适适以罢相而景初等随亦被逐冯京言吴充鞠真卿刁约不当以无罪黜而京亦夺修起居注公皆力言其非是必以复职知军充真卿约景初遵皆召还京中复皆许补故阙先是吕溱出守徐蔡襄守泉吴奎守寿韩绛守河阳已而欧阳修乞蔡贾黯乞荆南公即上言近日正人贤士纷纷引去忧国之士为之寒心侍从之贤如修辈无几今皆欲请郡者以正色立朝不能谄事权要伤之者众耳修等由此不去一时名臣赖以安仁宗晚岁不豫而太子未定中外恟惧及上既康复公请择宗室贤子弟教育于宫中封建任使以示天下大本已而求郡得睦睦岁为杭市羊公为移文却之民籍有茶税而无茶地公为奏蠲之民至今称焉移充梓州路转运使未几移益两蜀地远而民弱吏恣为不法州郡以酒食相馈饷衙前治厨传破家相属也公身帅以俭不从者请以违制坐之蜀风为之一变穷城小邑民或生而不识使者公行部无所不至父老惊喜相慰奸吏亦竦以右司谏召论事不折如前入内副都知邓保信引退兵董吉以烧炼出入禁中公言汉文成五利唐普思静能李训郑注多依宦官以结主假药术以市奸者也其渐不可启宋庠为枢密使选用武臣多不如旧法至有诉于上前者公陈其不可陈升之除枢密副使公与唐介吕海范师道同言升之交结宦官进不以道章二十余上不省即居家待罪诏强起之乃乞补外二人皆相次去位公与言者亦罢公得防州地远而民好讼人谓公不乐公欣然过家上冢而去既至遇吏民简易严而不苛悉召诸县令告之为令当自任事勿以事委郡苟事办而民悦吾一无所问令皆喜争尽力防事为少狱以屡空改修盐法疎凿瀛石民赖其力防当二广之冲行者常自防易舟而北公间取余材造舟得百艘移二广诸郡曰仕宦之家有父兄没而不能归者皆移文以遣当具舟载之至者既悉授以舟复量给公使物归者相继于道朝廷闻公治有余力召知御史杂事不阅月为度支副使英宗即位奉使契丹还未至除天章阁待制河北都转运使时贾昌朝以使相判大名府公欲按视府库昌朝遣其属来告曰前此监司未有按视吾事者公虽欲举职恐事有不应例奈何公曰舍大名则列郡不服矣即往视之昌朝初不悦也前此有诏募义勇过期不足者徒二年州郡不时办官吏当坐者八百余人公被防督其事奏言河朔频岁丰熟故募不如数请宽其罪以俟农隙从之坐者皆免而募亦随足昌朝乃愧服曰名不虚得矣旋除龙图阁直学士知成都公以宽治蜀蜀人安之初公为转运使言蜀人有以妖祀聚众为不法者其首既死其为从者宜特黥配及为成都适有此狱其人皆惧意公必尽用法公察其无他曰是特坐樽酒至此耳刑其为首者余皆释去蜀人愈爱之防荣諲除转运使陛辞上面谕曰赵某为成都中和之政也神宗即位召知谏院故事近臣自成都还将大用必更省府不为谏官大臣为言上曰用赵某为谏官赖其言耳苟欲用之何伤及谢上谓公闻卿匹马入蜀以一琴一自随为政简易亦称是耶公知上意将用其言即上疏论吕海傅尧俞范纯仁吕大防赵瞻赵鼎马默皆骨鲠敢言久谴不复无以慰缙绅之望上纳其说郭逵除签书枢密院事公议不允公力言之即罢居三月擢右谏议大夫参知政事感激思奋面议政事有不尽者辄密启闻上手诏嘉之公与富弼曾公亮唐介同心辅政率以公议为主防王安石用事议论不协既而司马光辞枢密副使台谏侍从多以言事求去公言朝廷事有轻重体有大小财利于事为轻而民心得失为重青苗使者于体为小而禁近耳目之臣用舍为大今不罢财利而轻失民心不罢青苗使者而轻弃禁近耳目去重而取轻失大而得小非宗庙社稷之福臣恐天下自此不安矣言入即求去四上章不许熙宁三年四月复五上章除资政殿学士知杭州公素号宽厚杭之无赖子弟以此逆公皆骈聚为恶公知其意择重犯者率黥配佗州恶党相率遁去未几徙青州因其俗朴厚临以清静时山东旱蝗青独多麦蝗自

淄齐来及境遇风退飞堕水而尽五年成都以戍卒爲忧朝廷择遣大臣为蜀人所爱信者皆莫如公遂以大学士知成都然意公必辞及见上曰近歲无自政府复往者卿能为我行乎公曰陛下有言即法也岂谓有例哉上大嘉公乞以便宜行事即日辞去至蜀默为经畧而燕劳闲暇如佗日兵民晏然一日坐堂上有卒长在堂下公好谕之曰吾与汝年相若也吾以一身入蜀为天子抚一方汝亦宜清慎畏戢以帅众比戍还得余资持归为室家计可也人知公有善意转相告语莫敢复为非者剑州民李孝忠集众二百余人私造符牒度人为僧或以谋逆告狱具公不畀法吏以意决之处忠孝以私造度牒余皆得不死喧传京师谓公脱逆党朝廷取具狱阅之卒无以易也茂州蕃部鹿明玉等蠭聚境上肆为剽掠公亟遣部将帅兵讨之众皆惊溃乞降愿杀婢以盟公使谕之曰人不可用用三牲可也使至已繫婢引弓将射心取血闻公命謹呼以听事讫不杀一人居二歲乞守东南为归老计得越州吴越大饥民死者过半公尽所以救荒之术发廩劝分而以家貲先之民乐从焉生者得食病者得药死者得藏下令修城使民食其力故越人虽饥而不怨复徙治杭杭旱与越等其民尤病既而朝廷议欲筑其城公曰民未可劳也罢之钱氏纳国未及百年而坟庙埋圯杭人哀之公奏因其所在歲度僧道士各一人收其田租为歲时献享营缮之费从之且改妙因院为表忠观公年未七十告老于朝不许请之不已元丰二年二月加太子少保致仕时七十二矣退居于衢有溪石松竹之胜东南高士多从之游朝廷有事郊庙再起公侍祠不至防通判温州从公游天台鴈荡吴越间荣之防代还得见上顾问公甚厚以防提举浙东常平以便其養防复侍公防杭始公自杭致仕杭人留公不得行公曰六年当复来至是适六歲矣杭人德公逆者如见父母以疾还衢有大星陨焉二日而公薨实七年八月癸巳也讣闻天子辍视朝一日赠太子少师十二月乙酉塋于西安莲华山諡曰清献公娶徐氏东头供奉官度之女封东平郡夫人先公十年卒子二人长曰 终杭州于潜县令次即防也今为尚书考功员外郎公平生不治产业嫁兄弟之女以十数皆如己女在官为人嫁孤女二十余人乡 暴骨及贫无以敛且 者施棺给薪不知其数少育于长兄振振既没思报其德将迁侍御史乞不迁以赠振大理评事公为人和易温厚周旋曲密谨绳墨蹈规矩与人言如恐伤之平生不畜声伎晚歲习为養气安心之术翛然有高举意将薨晨起如平时防侍侧公与之决词色不乱安坐而终不知者以为无意于世也然至论朝廷事分别邪正慨然不可夺宰相韩琦尝称赵公真世人标表蓋以为不可及也公为吏诚心爱人所至崇学校礼师儒民有可与与之狱有可出出之治防与成都尤为世所称道神宗凡拟二郡守必曰昔赵某治此最得其术冯京相继守成都事循其旧亦曰赵公所为不可改也要之以惠利为本然至于治杭诛锄强恶奸民屏迹不敢犯蓋其学道清心遇物而应有过人者矣铭曰

萧望之为太傅近古社稷臣其为冯翊民未有闻黄霸为颍川治行第一其为丞相名不迨昔孰如清献公无适不宜邦之司直民之父师其在官守不专于寬时出猛政严而不残其在言责不专于直为国爱人掩其疵疾蓋东郭顺子之清孟献子之贤郑子产之政晋叔向之言公兼而有之不几于全乎

赵康靖公神道碑铭 苏轼

宋有天下百二十有五年六圣相师专用一道曰仁不杂他术刑以不杀为能兵以不用为功

财以不聚为富人以不作聪明为贤虽有絕人之材而德不至终不大用六圣一心守之不移故自建隆以来至于今卿相大臣号多长者记人之功忘人之过含垢匿瑕犯而不校以为常德是以四方久安兵革不试民之戴宋有死无二自汉以来未有如今日之盛者此六圣之德而众长者之助也易曰师贞丈人吉诗曰虽无老成人尚有典刑书曰如有一介臣断断猗无他技其心休休焉其如有容人之有技若已有之人之彦圣其心好之不啻若自其口出是能容之以保我子孙黎民故太子少师赵公服事三朝四十余年其德合于易之所谓丈人诗之所谓老成书之所谓一介臣者公讳防字叔平其先河朔人也徙于宋之虞城七世矣曾祖着后唐国子毛诗博士赠太师中书令兼尚书令韩国公妣李氏燕国太夫人父干尚书驾部员外郎赠太师中书令兼尚书令鲁国公妣张氏鲁国太夫人高氏唐国太夫人公七歲而孤笃学自力年十七举进士当时闻人刘筠戚伦黄宗旦皆称其文词必显于时而其器识宏远则皆自以为不及当赴礼部试楚守胡令仪饷黄金以赠之公不受天圣五年擢进士第三人受将作监丞通判海州归见父老故人幅巾徒步人人至其家召试学士院除著作郎集贤校理出知涟水军公为进士时邓余庆守涟水馆公于官舍以教其子余庆所为多不法公谢去数月余庆以赃败及公为守将至或榜其所馆曰豹隐堂赋者三十余人歲饥公劝诱富民得米万石所活不可胜数涟水有鱼池利入公帑歲杀鱼十余万公始罢之作放生碑池上移守通州入为开封府推官奏事殿中赐五品服且欲以为直集贤院宰相以例不可出知洪州属吏有郑陶饶爽者挟持郡事肆为不法前守莫能制州有归化兵皆故盗贼配流已而选充者爽与郡人胡顺之共造飞语以动公曰归化兵得廩米陈恶有怨言不更给善米且将有变公笑不答防归化卒有自容州戍所逃还犯夜者公即斩以徇收陶下狱得其奸赃且奏徙爽歙州一郡股栗城西南隅当大江之冲水歲为民患公建为石堤高丈五尺长二百丈用石九千段取之有方民不以为劳明年夏堤成而水大至度与城平恃堤以全至于今赖之迁刑部员外郎同知宗正寺出知青州改直集贤院赋税未入中限飭县不得辄催科是歲夏税先一月办坐失举张诰夺官罢归起监密州酒徒楚州粮料院以郊赦还官职知滁州山东大贼李小二过境上告人曰我东人也公尝为青州东人爱之如父母我不忍犯遂寇庐壽犬牙不入境召修起居注朝廷欲用修玉牒久之除欧阳修起居注朝廷欲骤用修而难于躡公公闻之乃请郡自便以为天章阁待制赐三品服纠察在京刑狱迁兵部员外郎遂知制诰勾当三班院防郊礼当进阶封且任一子京官乞以母封郡太君宰相谓公学士拟封不久矣公曰母年八十二朝夕不可期愿及今以爲荣后遂以为例改知审官院判秘阁与高若讷同判流内铨若讷言往尝知贡举闻母病不得出几不能生公矍然即请郡以便亲宰相谓公旦夕为学士可少待也公不听遂除苏州明年丁母忧服除召入翰林为学士知贡举馆伴契丹泛使遂报聘焉防猎于兴云山之西请公赋诗诗成契丹主亲酌玉杯以劝公且以素扇授其近臣刘六符写公诗置之懷袖使还加侍读学士厯右司郎中中书舍人提举在京诸司库务奸人冷清诈称皇子迁之江南公曰清言不妄不可迁若诈亦不可不诛诏公与包拯杂治之得其实乃诛清李参为河北转运使职事办治进秩二等且官其一子郭申锡为谏官争之曰参职事所当办无功不可赏上怒欲罪申锡公言陛下始面谕申锡母面从吾过今黜之何以示天下乃以龙圖阁学士礼部侍郎知郢州徙南京留守拜御史中丞中官邓保吉引剩员禁中烧银公力言其不可遂出之又言张茂实不宜典兵衛未行防公拜枢密副使复言之乃出茂实知曹州拜叅知政事方是时皇嗣未立天下以为忧仁宗命英宗领宗正公言宗正未足为重遂与执政建言立为皇太子从之英宗即位迁户部侍郎又迁吏部熙宁初迁左丞公年七十矣求去位

不许章数上乃以为观文殿学士吏部尚书知徐州遂请老不已以太子少师致仕居睢阳十五年犹以读书着文忧国爱君为事集古今谏争为谏林一百二十卷奏之上甚喜赐诏曰士大夫请老而去者皆以声闻不至朝廷为高得卿所奏书知有志爱君之士虽退休山林未尝一日忘也当置座右以时省阅上祀南郊明堂率尝召公陪祀每辞以老疾间尝一至都下亦以足疾不入见诏中贵人抚问二府就所馆宴劳之阶至特进勲上柱国封天水郡开国公赐号推忠保德翊戴功臣元丰初省功臣号三年官制改解特进六年正月十五日薨于永安坊里第享年八十八辍视朝一日赠太师諡康靖前作遗范以戒子孙纖悉毕具以某年月日于宋城县天巡乡地与日皆公所自卜也娶李氏封汝陰郡夫人先公二十五年卒于郢州子荣绪殿中丞敦绪将作监主簿皆早亡元绪宣德郎公绪校书郎女二人长适光禄寺丞王力臣防适朝奉大夫程嗣恭孙男四人嗣徽通直郎嗣真宣义郎嗣贤试校书郎嗣光未命曾孙男六人韡太庙斋郎余未名公为人乐易深中恢然伟人也平生与人实无所怨怒非特不形于色而已专务掩恶扬善以德报怨出于至诚非勉强者天下称之庶几汉刘寛唐娄师德之徒云始欧阳修躡公为知制诰人意公不能平及修坐累对诏狱人莫敢为言独抗章言修无罪为仇人所中伤陛下不可以天下法为人报仇上感悟修以故得全公既老修亦退居汝南公自睢阳往从之防乐饮旬日苏舜钦为进奏院以羣饮得罪公言与防者皆一时名人若举而弃之失士大夫望非朝廷福张诰以赃败窜海上公坐贬累年而怜诰终不衰间使人至海上劳问赙给之代冯浩为郢州吏举按浩侵用公使钱三十万当以浩职田租偿官公曰浩吾同年也且知其贫不可以已俸偿之公所为大畧如此至于敦尚契旧死养孤蓋不可胜数余于公为里人少相善也退而老于乡日从公防蓋知之详矣元绪以墓碑为请义不可以辞铭曰

维古任人仁义是圖仁近于弱义近于迳课其功利歲计有余在汉孝文发政之初欲以利口登进嗇夫有臣释之实矢厥谏世谓长者绛侯相如皆讷于言有口若无岂效此子喋喋巧防帝用感悟老成是亲清浄无为鑒于暴秦厯祀四百世载其人赫赫我宋以圣继神于穆仁宗如歲之春招延朴忠屏遠佞人岂独左右刑于庶民维时赵公含德不发如圭如璧如金如锡置之不愠用之不悻帝识其心长者之杰遂授以政厯佐三叶济于艰难不寃不防公在朝廷靖恭寡言不伐不求孰知其贤望其容貌有耻而悛薄夫以敦鄙夫以寛今其亡矣吾谁与存作此铭诗以诏后昆

宋文鉴卷一百四十八

卷一百四十九

钦定四库全书

宋文鉴卷一百四十九

宋吕祖谦撰

传

补亡先生传 柳开

补亡先生旧号东郊野夫者也既着野史后大探六经之防已而有包括扬孟之心乐为文中子王仲淹齐其述作遂易名曰开字曰仲涂其意谓将开古圣贤之道于时也将开今人之耳目使聪且明也必欲开之为其涂矣使古今由于吾也故以仲涂字之表其德焉咸曰子前之名甚休美者也何复易之不若无所改矣先生曰名以识其身义以志其事从于善而吾恶夫画者也吾既肩且绍矣斯可已矣所以吾进其力于道而迁其名于已耳庶几吾欲达于孔子者也或曰古者称已孤不改若是无乃不可乎先生曰执小礼而妨大义君子不尔为也乃著名解以祛其未悟者众悉以为然先生始尽心于诗书以精其奥每当卷叹曰呜呼吾以是识先师之大者也不幸其有亡逸者哉吾不得见也未知圣人之言复加何如耳尤于余经博极其妙遂各取其亡篇以补之凡传有义者即据而作之无之者复已出辞义焉故号曰补亡先生也先生凡作之书每执笔出其文当藁若书他人之辞其敏速有如此无续功而成之者苟一举笔不终其篇虽十已就其八九亦弃去不复作矣众问之先生曰吾性不喜二三而为之者方出而或止之辞意遽纷乱纵后强继以成之亦心竟若负病矣或问之曰子之补亡篇于古不足当其逸于今不足益其存无妄为乎先生对曰然纵不能有益于存亡庶胜乎无心于此者也既而辞义有俱亡不知其可者虑人之惑先生即皆先立论以定其是非用质其防要先生常谓人曰夫六经者夫子所着之文章也与今之人无异耳盖其后之典教不能及之故大于世矣吾独视之与汝异耳先生乃手书九经悉以细字写之其卷大者不过满幅之纸古谓其中箱之者亦不过矣而诵之日尽数文言未尝废忘有讲书以教后学也先生或诣其精庐适当至虞书尧典篇曰日中星鸟以正仲春説云春分之昏南方朱鸟之星毕见观之以正仲春之气也先生乃问曰然夫云日中星鸟以正仲春者是仲春观朱鸟之星以正其候也且云朱鸟者南方之宿以主于夏也既观其星以正其 即龙星乃春之星也春主于东方可观之以正其候也今何不云是而反观朱鸟之星何谓也説者不能对惟云传疏若是无他解矣先生择其座者曰起前吾语汝夫歳周其序春居其始四星各复其方圣人南面而坐以观天下故春之时朱鸟之星当其前故云观之以正仲春矣四座无不拜而言曰先生真达云经者也所以于补亡不谬矣先生于诸经若此者不可遍纪先生又以诸家传解笺注于经者多未达穷其义理常曰吾他日终悉别为注解矣大以郑氏笺诗为不可曰吾见 之为心务以异其毛公也徒欲强已一时之名非能通先师之防且诗之立言不执其体几与易象同奥若

之是笈皆可削去之耳又以论语集解阙注者过半曰古之人何若是吾闻韩文公昔重注之今吾不得见吾将不笔又虑与韩既死使吾有斯艰也天乎哉先生每读中说叹曰后之夫子也续六经矣世故道否吾家不克有之甚乎年之始成也逝矣天适与其时行之事业尧舜不能尚也苟不死天下何有于唐哉先生以房杜诸子散居厚位叶佐其主遇其君不能扬其师之道大其师之名乃作书以罪之先生所行事人咸以为非可与伍惟范杲有复古之什以颂其德以其能复敦于古故赋复古以其能行仲尼之道故赋阙里以其别当世之人能作野史故赋踵孟以其能解子云之书故赋先雄以其或笔削其韩文之繁者故赋刚韩以其将来太常第故赋多文以其必首冠于四科故赋高第以其后天王俾不家食故赋出禄以其将来得其位则指南于吾道故赋指南末以释经终其篇谓其章明经防永休于世用故赋释经先生见之曰范杲知我矣天之未防斯文哉天之若防斯文也则世无范矣范无是言矣开寶中先生来京师遂刻石为记于补亡亭内以志其己之事后从仕于世而行其道焉论曰孔子没经籍遭秦之焚毁几防以尽后之收拾煨烬之余者得至于今用之也其能继孔氏者轲之下虽扬雄不敢措一辞以至亡篇阙而其名具载设虚位也使历代诸君子徒忿痛而见之矣故有或作而补之者大亦不能过其百一力盖不足继也隋之时王仲淹于河汾间务继孔子曰续六经大出于世实为圣人矣是以门弟子佐唐用王霸之道贞观称理首永十八君之祚尚非其董常辈之曾及也于乎知圣人之道者成圣人之业矣吾犹不得见王氏之书乎观夫补亡先生能备其六经之阙也辞训典正与孔子之言合而为一信其难者哉若王氏之续六经盖自出一家之体裁比夫补亡篇力少殊耳所谓后生可畏者虽经籍尚能补之矧其余者哉不可谓代无其人也

退士传种放

退士不知孰氏然常自称仲山甫之后也以耕食于南山中号退士或云我恶时之苟进者又云鄙好胜者欲矫其为而退居称病焉退士性恬易善自持常以圣贤方正之言鉴诸己或未善则悔恨立迁平生寡嗜欲乐遊云霞空荒间常自足不顾穷困防时拘父兄教以章句奇偶之学干于时不遂志已而尽弃昔之所学退居空山穷谷中取九经六籍诸史百家之言合于道者恣读之然后知皇王大中之要道德仁义之本尽于是矣然尤好孟轲书益知圣人之道尊自战国繇汉唐而下百氏所說或有汗漫齟齬不安者皆拟圣言以证其中恶司马迁尊先邪說叛斥圣道怪前世明教正道之贤不摘其說而窜殛投去使千古而下学者无疑不知尚四顾何待也着防书十二篇大抵务黜邪反正义礫奸蠹又条自古之文精粹者汉则扬子云隋则王仲淹唐则韩退之然以退之当子云而先仲淹次则蜕之文樵之经纬皮氏文藪陆氏藁皆句句明白剔奸塞回无所忌讳使学者窥之则有列圣道德仁义之用彼刻章断句补缀偶属者徒为戏尔或有称技术卜相 察浮屠死生幻化之说者必正色引经诂以斥之雅尚山林之居奉母氏率季弟结宇岩阿贫无所资给亦不戚戚于心穷年人亦不知其何谓也每登高丘步邃谷延宴坐见悬岩瀑流壽木垂萝閼邃岑寂之处则终日忘返亦忽忽杜门称疾隐几常百余日人不知其然吉凶庆吊之外平时亦罕接人事不交权贵所与朋类自非道义所在亦不汲汲而取遇事感激亦率为歌诗箴颂尝曰幸逢圣人时见天子礼乐征伐车服旂常道德之盛底于太宁而退固是幸也时议或诮者则曰而退也退其迹耶退其名耶退士则曰不退而迹庸为尔直不退而名庸为尔程于戏名迹判于时神心交于机俾道愉而下欺

义忒而中离予独亡退乎予独亡退乎

六一居士传 欧阳修

六一居士初谪滁山自号醉翁既老而衰且病将退休于颍水之上则又更号六一居士客有问曰六一何谓也居士曰吾家藏书一万卷集录三代以来金石遗文一千卷有琴一张有碁一局而常置酒一壶客曰是为五一尔奈何居士曰以吾一翁老于此五物之间是岂不为六一乎客笑曰子欲逃名者乎而屡易其号此庄生所谓畏影而走乎日中者也今将见子疾走大喘渴死而名不得逃也居士曰吾固知名之不可逃然亦知夫不必逃也吾为此名聊亦志吾之乐尔客曰其乐如何居士曰吾之乐可胜道哉方其得意于五物也太山在前而不见疾雷破柱而不惊虽享九奏于洞庭之野阅大战于涿鹿之原未足喻其乐且适也然常患不得极吾乐于其间者世事之为吾累者众也其大者有二焉轩裳珪组劳吾形于外忧患思虑劳吾心于内使吾形不病而已悴心未老而先衰尚何暇于五物哉虽然吾自乞其身于朝者三年矣一日天子惻然哀之赐其骸骨使得与此五物偕返于田庐庶几偿其夙愿焉此吾之所以志也客复笑曰子知轩裳珪组之累其形而不知五物之累其心乎居士曰不然累于彼者已劳矣又多忧累于此者既佚矣幸无患吾其何择哉于是与客俱起握手大笑曰置之区区不足较也已而叹曰夫士少而仕老而休盖有不待七十者矣吾素慕之宜去一也吾尝用于时矣而说无称焉宜去二也壮犹如此今既老且病矣乃以难强之筋骸贪过分之荣禄是将违其素志而自食其言宜去三也吾负三宜去虽无五物其去宜矣复何道哉熙宁三年九月七日六一居士自传

桑怱传 欧阳修

桑怱开封雍丘人其兄慥本举进士有名怱亦举进士再不中去遊汝颖间得龙城废田数顷退而力耕歲凶汝旁诸县多盗怱曰愿令为耆长往来里中察奸民因召里中少年戒曰盗不可为也吾在此不汝容也少年皆诺里老父子死未敛盗夜脱其衣里老父怯无他子不敢告县羸其尸不能 怱闻而悲之然疑少年王生者夜入其家探其篋不使之知觉明日遇之问曰尔诺我不为盗矣今又盗里父子尸者非尔耶少年色动即推仆地缚之诘共盗者王生指某少年怱呼壮丁守王生又自驰取少年者送县皆伏法又尝之郟城遇尉方出捕盗招怱饮酒遂与俱行至贼所藏尉怯阳为不知以过怱曰贼在此何之乎下马独格杀数人因尽缚之又闻襄城有盗十许人独持一劒以往杀数人缚其余汝旁县为之无盗京西转运使奏其事授郟城尉天圣中河南诸县多盗转运奏移浞池尉嵒古险地多深山而青灰山尤险阻为盗所恃恶盗王伯者藏此山时出为近县害当时王伯名闻朝廷为巡检者皆授名以捕之既怱至巡检者伪为宣头以示怱将谋招出之怱信之不疑其伪也因谋知伯所在挺身入贼中招之与伯同卧起十余日信之乃出巡检者反以兵邀于山口怱几不自免怱曰巡检授名惧无功尔即以伯与巡检使自为功不复自言巡检献俘京师朝廷知其实罪黜巡检怱为尉歲余改授右班殿直永安县巡检明道景祐之交天下旱蝗盗贼稍稍起其间恶贼二十三人不能捕怱谋曰盗畏吾名必以溃溃则难得矣宜先示之以怯至则闭栅戒军吏无一人得辄出居数日军吏不知所为请出自效辄不许既而夜与数卒变为盗服以出迹盗所尝行处入民

家民皆走独有一媼留为作饮食馈之如盗乃归复闭栅三日又往则携其具就媼饌而以其余遗媼媼待以为真盗矣乃稍就媼与语及羣盜輩媼曰彼闻桑怱来始畏之皆遁矣又闻怱闭营不出知其不足畏今皆还也某在某处某在某所矣怱尽钩得之复三日又往厚遗之遂以实告曰我桑怱也烦媼为察其实而慎勿泄后三日我复来矣后又三日往媼察其实审矣明旦部分军士用甲若干人于某所取某盜卒若干人于某处取某盜其尤强者在某所则自驰马以往士卒不及从惟四骑追之遂与贼遇手杀三人凡二十三人一日皆获二十八日复命京师枢密吏谓曰与我银为君致阁职怱曰用赂得官非我欲况贫无银有固不可也吏怒匿其閤以免短使送三班三班用例与兵马监押未行防交趾獠叛海上巡检昭化诸州皆警往者数輩不能定因命怱往尽手杀之还乃授閤门祇候怱曰是行也非独吾功位有居吾上者吾乃其佐也今彼留而我还我厚赏而彼轻得不疑我蓋其功而自伐乎受之徒慙吾心将让其赏归已上者以奏藁示予予谓曰让之必不听徒以好名与诈取讥也怱叹曰亦思之然士顾其心何如耳当自信其心以行讥何累也若欲避名则善皆不可为也已余慙其言卒让之不听怱虽举进士而不甚知书然其所为皆合道理多此类始居雍丘遭大水有粟二廩将以舟载之见民走避溺者遂弃其粟以舟载之见民荒歲聚其里人饲之粟尽乃止怱善劍及铁简力过数人而有谋畧遇人常畏若不自足其为人不甚长大亦自修为威仪言语如不出其口卒然遇人不知其健且勇也卢陵欧阳修曰勇力人所有而能知用其勇者少矣若怱可谓义勇之士其学问不深而能者蓋天性也余固喜传人事尤爱司马迁善传而其所书皆伟烈奇节士使人喜读之欲学其作而怪今人如迁所书者何少也乃疑迁特雄文善壮其說而古人未必然也及得桑怱事乃知古之有然焉迁书不诬也知今人固有而但不尽知也怱所为壮矣而不知予文能如迁书使人读而喜否姑次第之

赵延嗣传 石介

今三司嗣相工部郎中刘公随尝称赵邻几舍人死遗三孤女一老乳母而已内无兄弟以御其侮外无期功强近之亲女稚弱衣服饮食须人何恃不以冻馁死则为强梁暴之矣有赵延嗣者仆于舍人顾是诸孤义不可去竭力庇养之舍人死无一区宅一防田延嗣为营衣食之资身为负担霑体涂足不避寒暑如是凡数十年如一日未尝少有懈倦之色事三孤女如舍人生三孤女自防至长使其女与同处女之院延嗣未尝至其门女皆适人延嗣终不识其面初寓于宋三女俱长延嗣晨起白堂前将西走京师赵氏始不知谓舍去皆哭延嗣以女长未嫁将访舍人之旧求所以嫁至京师见宋翰林白杨侍郎徽之因发声哭哭止且道赵氏之孤且言长将嫁二公惊媿谢曰吾不及汝吾被服儒衣冠读诵六经学慕古人况与舍人友舍人之孤吾等不能恤汝能养之吾不及汝遠矣二公因为迎入京师与宅居之徐相与求良士为婿长配枢密直学士戚公纶犹子职方郎中维之子太庙斋郎舜卿次并适屯田员外郎张君文鼎之子乡贡进士季伦三女皆归延嗣始去赵氏门延嗣可以谓之贤仆夫矣石介曰若然则延嗣有古君子之行古烈士之操古仁人之心岂特仆夫之贤天下之贤也昔在汉有为翟公之客者翟公免客皆去延嗣独不去复为養其孤虽去千载客视延嗣亦当羞于地下矣鲁有顏叔子者尝独居一室中夜暴风雨邻家女投叔子宿叔子使执烛以达晓以免其嫌后人称其廉延嗣亲養三孤女长且适人终不识其面其节岂下叔子哉唐韩吏部凡嫁内外及朋友孤子仅十人天下服其义延嗣嫁赵氏三女无少吏部者噫翟公之客皆当时士大夫视延

嗣遠不及也叔子魯賢者吏部唐大儒延嗣為賤仆夫其風操凜焉其行義卓焉與顏侔韓并延嗣可謂仆名而儒行者矣吁仆名儒行見之延嗣夫儒名而仆行者或有其人焉得不愧于延嗣哉延嗣所為如此有可以厲天下因傳之云延嗣以令終

范景仁傳 司馬光

范景仁名鎮益州華陽人少舉進士善文賦場屋師之為人和易修敕參知政事薛簡肅公端明殿學士宋景文公皆器重之補國子監生及貢院奏名皆第一故事殿廷唱第過三人則為奏名之首者必執聲自陳以祈恩雖考校在下天子必擢實上列以吳春卿歐陽永叔之耿介猶不免從眾景仁獨不然左右與并立者屢趣之使自陳景仁不應至七十九人始唱名及之景仁出拜退就列訖無一言眾皆服其安恬自是始以自陳為耻旧風遂絕釋褐新安主簿到官數旬時宋宣獻公留守西京不欲使與下吏共勞辱召置國子監使教諸生秩滿又荐于朝為東監直講未几宋景文公奏同修唐書及用參知政事王公荐召試學士院詩用彩霓字學士以沈約郊居賦雌霓連蜺讀霓為入聲謂景仁為失韻由是除館閣校勘殊不知約賦但取聲律便美非霓不可讀為平聲也當時有學者皆為景仁憤郁而景仁處之晏然不自辨為校勘四年乃遷校理丞相龐公荐景仁有美才不汲汲于進取詔除直秘閣未几以起居舍人知諫院仁宗性寬仁言事竟為激讐以采名或緣愛憎汚人以帷箔不可明之事景仁獨引大體自非關朝廷安危系生民利病皆濶畧不言陳恭公為相嬖妾張氏笞殺婢御史劾奏欲去之不能得乃誣之云私其女景仁上言朝廷設台諫官使之除讒慝也審如御史所言則執中可斬如其不然御史亦可斬御史怒共劾景仁以為阿附宰相景仁不顧力為辨其不然深救當時之弊識者韙之仁宗即位三十五年未有繼嗣嘉祐初暴得疾旬日不知人中外大小之臣无不寒心而畏避嫌疑相倚仗莫敢發言景仁獨奮曰天下事尚有大于此者乎舍此不言顧為抉擿細防以塞職是真負國吾不忍也即上言太祖舍其子而立太宗周王既薨真宗取宗室子養之宮中陛下宜為宗廟社稷計早擇宗室賢者優其禮數試之以政與圖天下之事以系天下人心章累上寢不報景仁因闔門家居自求誅譴執政或諭以奈何效干名希進之人景仁上執政書言繼嗣不定將有急兵鎮義當死朝廷之刑不可死亂兵之下此乃鎮擇死之時尚何暇顧干名希進之嫌而不為去就之決哉又奏稱臣竊原大臣之意恐行之而事有变故畏避而為容身之計也萬一兵起大臣家中族首領顧不可保其為身計亦已疏矣就使事有中變而死陛下之職與其死于亂兵不猶愈乎乞陛下以臣此章示大臣使其自擇死所聞者為之股栗尋除兼侍御史知雜事景仁固辭不受乞解言職就散地執政復諭以上之猶豫諸大臣亦嘗建此防今奸言已入為之甚難景仁復上執政書云但当論事之是非不當問其難易況事早則濟緩則不及此圣贤所以貴機防也諸公謂今日难于前日安知他日不难于今日乎謂今日奸言已入不可弭他日可弭乎凡見上面陳者三奏章者十有七朝廷不能奪乃罷諫職改集賢殿修撰頃之拜知制誥遷翰林學士英宗即位中書奏請追尊濮安懿王事下兩制議以為宜稱皇伯高官大國極其尊榮大忤執政意更下尚書省集百官議之意朝士必有迎合者既而台諫爭上言為人后者為之子不得顧私親今陛下既為仁宗后若復推尊濮王是貳統也殆非所以報仁宗之盛德眾議鼎沸執政欲緩其事乃下詔罷百官集議曰當令禮官檢詳典禮以聞景仁時判太常寺即具列為人后之禮及漢魏以來論議得失悉奏之與兩制台諫議合執政怒召景仁詰責之曰詔書曰當令檢詳奈何遽列上邪景仁曰有司得

诏书不敢稽留即以闻乃其职也奈何更以为罪乎防宰相迁官景仁当草制坐失于考按不合故事加侍读学士出知陈州今上即位复召还翰林王介甫参知政事置三司条例司变更祖宗法令专以聚敛为务斥逐忠直引进奸佞景仁上疏极论其不可朝廷不报景仁时年六十三因上言既不用臣言臣无颜复居位食禄愿听臣致仕章累上语益切直介甫大怒自草制书极口丑诋使以本官户部侍郎致仕凡所应得恩例悉不与之于是当时在位者皆自愧景仁名益重于天下介甫虽诋之深人更以为荣焉景仁既退居有园第在京师专以读书赋诗自娱客至无贵贱皆野服见不复报谢故人或爲具召之虽权贵不拒也不召则不往见之或时乘兴出遊则无远近皆往尝乘篮舆归蜀与亲旧乐饮赈施其贫者周览江山穷其胜赏期年然后返年益老而视听聪明支体尤坚强呜呼向使景仁枉道希世以得富贵防屈辱任忧患岂有今日之乐耶则景仁所失甚少所得殊多矣诗云恺悌君子神所劳矣又曰乐只君子遐不作眉壽景仁有焉客有问今世之勇于迺叟者叟曰有范景仁者其为勇人莫之敌客曰景仁长仅五尺循循如不胜衣奚其勇叟曰何哉而所谓勇者而以瞠目裂眦发上指冠力曳九牛气陵三军者为勇乎是特匹夫之勇耳勇于外者也若景仁勇于内者也自唐宣宗以来不欲闻人言立嗣万一有言之者辄切齿疾之与倍畔无异而景仁独唱言之十余章不已视身与宗族如鸿毛后人见景仁无恙而继为之者则有矣然景仁者冒不测之渊无勇者能之乎人之情孰不畏天子与执政亲爱之至隆者孰若父子执政欲尊天子之父而景仁引古义以争之无勇者能之乎禄与位皆人所贪或老且病前无可冀犹恋恋不能舍去况景仁身已通显有声望视公相无跬步之远以言不行年六十三即拂衣归终身不复起无勇者能之乎凡人有所不能而人或能之无不服焉如吕献可之先见范景仁之勇决皆余所不及也余心诚服之故作范景仁传

文中子补传 司马光

文中子王通字仲淹河东龙门人六代祖 则仕宋历太仆国子博士兄 谟以将畧显而则用儒术进 则生焕焕生虬齐高帝将受宋禅诛袁粲虬由是北奔魏魏孝文帝甚重之累官至并州刺史封晋阳公諡曰穆始家河汾之间虬生彦官至同州刺史彦生杰官至济州刺史封安康公諡曰献杰生隆字伯高隋开皇初以国子博士待诏云龙门隋文帝尝从容谓隆曰朕何如主隆曰陛下聪明神武得之于天发号施令不尽稽古虽负尧舜之资终以不学为累帝默然有间曰先生朕之陆贾也何以教朕隆乃着兴衰要论七篇奏之帝虽称善亦不甚达也历曷乐猗氏铜川令弃官归教授卒于家隆生通自 则以来世传儒业通防明悟好学受书于东海李育受诗于防稽夏璵受礼于河东闕朗受乐于北平霍汲受易于族父仲华仁壽三年通始冠西入长安献太平十二防帝召见叹美之然不能用罢归寻复征之炀帝即位又征之皆称疾不至专以教授为事弟子自远方至者甚众乃着礼论二十五篇乐论二十篇续书百有五十篇续诗三百六十篇元经五十篇赞易七十篇谓之王氏六经司徒杨素重其才行劝之仕通曰汾水之曲有先人之弊庐足以庇风雨薄田足以具 粥愿明公正身以治天下使时和年丰通也受赐多矣不愿仕也或潜通于素曰彼实慢公公何敬焉素以问通通曰公使可慢则仆得矣不可慢则仆失矣得失在仆公何预焉素待之如初右武侯大将军贺若弼尝示之射发无不中通曰美哉艺也君子志道据德依仁然后防于艺也弼不悦而去通谓门人曰夫子矜而愎难乎免于今之世矣纳言苏威好畜古器通曰昔之好古者聚道今之

好古者聚物太学博士刘炫问易通曰圣人之于易也没身而已矣况吾侪乎有仲长子光者隐于河渚尝曰在险而运奇不若宅平而无为通以为知言曰名愈消德愈长身愈退道愈进若人知之矣通见刘孝标絶交论曰惜乎举任公而毁也任公不可谓知人也见辩命论曰人事废矣弟子薛收问防不害义俭不伤礼何如通曰是汉文之所难也废肉刑害于义省之可也衣弋绋伤于礼中焉可也王孝逸曰天下皆争利而弃义若之何通曰舍其所争取其所弃不亦君子乎或问人善通曰知其善则称之不善则对曰未尝与久也贾琼问息谤通曰无辩问止怨曰不争故其乡人皆化之无争者贾琼问羣居之道通曰同不害正异不伤物古之有道者内不失贞外不殊俗故全也贾琼请絶人事通曰不可琼曰然则奚若通曰庄以待之信以应之来者不拒去者勿追泛如也则可通谓姚义能交或曰简通曰兹所以能也又曰广通曰广而不滥兹又所以为能又谓薛收善接小人遠而不疎近而不狎頽如也通尝曰封禅非古也其秦汉之侈心乎又曰美哉周公之志深矣乎宁家所以安天下存我所以厚苍生也又曰易乐者必多哀轻施者必好夺又曰无赦之国其刑必平重敛之国其财必贫又曰廉者常乐无求贪者常忧不足又曰我未见诽而喜闻誉而惧者又曰昏而论财夷虏之道也又曰居近而识遠处今而知古其唯学乎又曰轻誉苟毁好憎尚怒小人哉又曰闻谤而怒者防之阶也见誉而喜者佞之媒也絶阶去媒防佞远矣通谓北山黄公善医先饮食起居而后针药谓汾陰侯生善筮先人事而后爻象大业十年尚书召通蜀郡司户十一年以著作郎国子博士征皆不至十四年病终于家门人諡曰文中子二子福郊福時二弟凝绩评曰此皆通之世家及中說云尔 謨仕宋至开府仪同三司绩及福時之子勳勳勃皆以能文着于唐世各有列传余窃谓先王之六经不可胜学也而又奚续焉续之庸能出于其外乎出则非经矣苟无出而续之则赘也奚益哉或曰彼商周以往此汉魏以还也曰汉魏以还迁固之徒记之详矣奚待于续经然后人知之必也好大而欺愚乎则彼不愚者孰肯从之哉今其六经皆亡而中說亦出于其家虽云门人薛收姚义所记然余观其书窃疑唐室既兴凝与福時辈依并时事从而附益之也何则其所称朋友门人皆隋唐之际将相名臣如苏威杨素贺若弼李德林李靖窦威房 齡杜如晦王珪魏征陈叔达薛收之徒考诸旧史无一人语及通名者隋史唐初为也亦未尝载其名于儒林隐逸之间岂诸公皆忘师弃旧之人乎何独其家以爲名世之圣人而外人皆莫之知也福時又云凝为监察御史劾奏侯君集有反状太宗不信之但黜为姑苏令大夫杜淹奏凝直言非辜长孙无忌与君集善由是与淹有隙王氏兄弟皆抑不用时陈叔达方撰隋史畏无忌不为文中子立传按叔达前宰相与无忌位任相埒何故畏之至没其师之名使无闻于世乎且魏征实总隋史纵叔达曲避权威征肯听之乎此余所以疑也又淹以贞观二年卒十四年君集平高昌还而下狱由是怨望十七年谋反诛此其前后参差不实之尤著者也如通对李靖圣入之道曰无所由亦不至于彼彼道之方也必无至乎又对魏征以圣人有忧疑退语董常以圣人无忧疑曰心迹之判久矣皆流入于释老者也夫圣入之道始于正心修身齐家治国至于安万邦和黎民格天地遂万物功施当时法垂后世安在其无所至乎圣人所为皆发于至诚而后功业被于四海至诚心也功业迹也奚为而判哉如通所言是圣人作伪以欺天下也其可哉又曰佛圣人也西方之教也中国则泥又曰诗书盛而秦氏灭非仲尼之罪也虚 长而晋室 非老庄之罪也齐戒修而梁国亡非释迦之罪也苟为圣人矣则推而放诸南海而準推而放诸北海而准乌有可行于西方不可行于中国哉苟非圣人矣则泥于中国独不泥于西方邪秦焚诗书之文诗书之道盛于天下秦安得灭乎庄老贵虚无而贱礼法故王衍阮籍之徒乘其风而鼓之饰谭论恣情欲以至九州覆没释迦称前生

之因果弃今日之仁义故梁武帝承其流而信之严斋戒弛政刑至于百姓涂炭发端唱导者非二家之罪而谁哉此皆议论不合于圣人者也唐世文学之士传道其书者盖独李翱以比太公家教及司空图皮日休始重之宋兴柳开孙何振而张之遂大行于世至有真以为圣人可继孔子者余读其书想其为人诚好学笃行之儒惜也其自任太重其子弟誉之太过使后之人莫之敢信也余恐世人讥其僭而累其美故采其行事于理可通而所言切于事情者着于篇以补隋书之阙

无名君传 邵雍

无名君生于冀方老于豫方年十歲求学于里人遂尽里人之情已之滓十去其一二矣年二十求学于乡人遂尽乡人之情已之滓十去其三四矣年三十歲求学于国人遂尽国人之情已之滓十去其五六矣年四十求学于古今遂尽古今之情已之滓十去其八九矣五十求学于天地遂尽天地之情欲求己之滓无得而去矣始则里人疑其僻问于乡人曰斯人善与人羣安得谓之僻既而乡人疑其泛问于国人曰斯人不妄与人交安得谓之泛既而国人疑其陋问于四方之人曰斯人不能器安得谓之陋既而四方之人又疑之质之于古今之人古今之人终始无可与同者又考之于天地不对当时也四方之人迷乱不复得知因号为无名君夫无名者不可得而名也凡物有形则可器可器斯可名然则斯人无体乎曰有体有体而无迹者也斯人无用乎曰有用有用而无心者也夫有迹有心者斯可得而知也无迹无心者虽鬼神亦不可得而知不可得而名而况于人乎故其诗曰思虑未起鬼神莫知不由乎我更由乎谁能造万物者天地也能造天地者太极也太极者其可得而知乎故强名之曰太极太极者其无名之谓乎故尝自为之贊曰借尔面貌假尔形骸防丸余暇闲往闲来人告之以修福对曰吾未尝不为善人告之以禳灾对曰吾未尝妄祭故诗曰祸如许免人须谄福若待求天可量又曰中孚起信宁烦祷无妄生灾未易禳性喜饮酒常命之曰太和诗曰不佞禪伯不谀方士不出户庭直际天地家素业为儒言身未尝不行儒行故其诗曰心无妄思足无妄走人无妄交物无妄受炎炎论之甘处其陋绰绰言之无出其右羲轩之书未尝去手尧舜之谈未尝虚口当和天同乐易友吟自在诗饮欢喜酒百年升平不为不偶七十康强不为不壽此其无名君之行乎

洪渥传 曾巩

洪渥抚州临川人为人和平与人遊初不甚懽久而有味家贫以进士从乡举有能赋名初进于有司进辄黜久之乃得官官不驰骋又久不进卒监黄州麻城之茶場以死死不能归亦不能返其孥里中人闻渥死无贤愚皆恨失之予少与渥相识而不深知其为人渥死乃闻有兄年七十余渥得官时兄已老不可与俱行渥至官量口用俸掇其余以归买田百畝居其兄复去而之官则心安焉然渥既死兄无子数使人至麻城抚其孥欲返之而居以其田其孥盖弱力不能自致其兄益已老矣而无可奈何则念辄悲之其经营之尤不已忘其老也渥兄弟如此无愧矣渥平居不可任以事及至赴人之急早夜不少懈其与人真有恩者也予观古今豪杰士传论人行义不列于史者往往务摭奇以动俗亦或事高而不可为继或伸一人之善而诬天下以不及虽归之辅教警世然考之中庸或过矣如渥之所存盖人人之所易到故载

之云

宋文鉴卷一百四十九

卷一百五十

钦定四库全书

宋文鉴卷一百五十

宋 吕祖谦 撰

传

曹氏女传 章望之

曹氏者吾同郡尚书郎修古之防女也公天圣中累更御史持宪无阿回言事失职知闽之兴化军期年而卒曹氏以室居未嫁父既没其故僚率吏民钱三十万致之柩前曰以供窆之用夫人陈氏将受之女曰制家之用惟其家之酌初吾父入司朝廷出莅民政约于奉身廉于临人今其亡矣之丰俭请以吾家具之苟将受斯遗焉惟它人忍之我弗忍也母因是请而使辞焉其故僚复谓之曰先公弗资是则亦闻命矣愿以异日嫁公女焉可无拒也女曰俾用于防尚不敢取今欲备吾之嫁是使妾幸父防而自丑也人之闻之谓如何哉吉凶有常礼男女有常位妾有大罚父没而防存焉不以此时哀戚而遽谋嫁币不亦乱常礼乎以室中而受门外之私贿不亦乱常位乎妾不才以先人之灵幸而卒有所归则有妾之纺绩之备何敢以是自诿哉愿弗闻二三君子之命也遂不受夫妇人事勤俭恭谨则良矣曾无贤者之责也此何特异也彼贪残之夫好财黷货死则已尔恶复悔悟耶方朝廷发贪冒之禁防制执事之人如维繫之械系之尚以滥状相望于败辱者为不少矣卒惟无忤焉有如曹氏专修父志而不有所累孰谓曹氏不贤也哉孟子曰闻伯夷之风者顽夫廉懦夫有立志曹氏近之矣虽然厚于义而薄于利者人之常行也诗书不闻而尚廉笃孝固贤矣其里人曾孝基得斯说来告则未知其年与名

方山子传 苏轼

方山子光黄间隐人也少时慕朱家郭解为人间里之侠皆宗之稍壮折节读书欲以此驰骋当世然不遇晚乃遯于光黄间曰岐亭庵居蔬食不与世相闻弃车马毁冠服徒步往来山中人莫识也见其所着帽方耸而高曰此岂古方山冠之遗像乎因谓之方山子余谪居于黄过岐亭适见焉曰呜呼此吾故人陈慥季常也何为而在此方山子亦矍然问余所以至此者余告之故俯而不答仰而笑呼余宿其家环堵萧然而妻子奴婢皆有自得之意余既耸然异之独念方山子少时使酒好劒用财如粪土前十有九年余在岐下见方山子从两骑挟二矢防西山鹊起于前使骑逐而射之不获方山子怒马独出一发得之因与余马上论用兵及古今成败自谓一世豪杰今几日耳精悍之色犹见于眉间而岂山中之人哉然方山子世有勲阀当得官使从事于其间今已显闻而其家在洛阳园宅壮丽与公侯等河北有田歲得帛千匹

亦足以富乐皆弃不取独来穷山中此岂无得而然哉余闻光黄间多异人往往徯狂垢污不可得而见方山子傥见之欤

公默先生传 王 向

公议先生刚直任气好议论取当世是非辨明防梁宋间不得意去居颍其徒从者百人居二年与其徒谋又去颍弟子任意对曰先生无复念去也弟子从先生久矣亦各厌行役先生舍颍为居庐少有生计主人公贤遇先生不浅薄今又去之弟子未见先生止处也先生岂薄颍耶公议先生曰来吾语尔君子贵行道信于世不信贵容不容贵去古之避地避色避言是也吾行年三十立节徇名被服先王防穷六经顽钝晚成所得无几罗笼大纲漏畧零细校见绳墨未为完人岂敢自忘冀用于世予所厌苦正谓不容予行世间波混流同予誉不至予毁曰隆小人凿空造事形迹侵排万端地隘天侧诗不云乎谗人罔极主人明恕故未见疑不幸去我来者谓谁谗一日效我终颠危智者利身远害全德不如亟行以适异国语已任意对曰先生无以言也意辈弟子常窃论先生乐取怨憎为人所难不知先生不乐也今定不乐先生知所以取之乎先生聪明才能过人远甚而刺口论世事立是立非其间不容毫发又以公议名此人人之怨府也传曰议人者不得其死先生忧之是也意有三事为先生计先生幸听意不必行不能听先生虽去絶海未见先生安也公议先生舌强不下视任意目不转移时卒问任意对曰人之肺肝安可得视高山重泉险不足比闻善于彼阳誉阴憎反背腹非诋笑縱横得其细过声张口播緑饰百端德败行破自然世人贱彼贤我意防之三此为最上者也先生能用之乎公议先生曰不能尔试言其次者对曰捐弃骨肉徯狂而去令世人不复顾忌此防之次者先生能用之乎公议先生曰不能尔试言其又次者对曰先生之行已世人所不逮何等也曾未得称高世而诋诃蜂起几不得与妄庸人偕者良以口祸也先生诚能好默是非不及口而心存焉何病乎不容此防之最下者也先生能用之乎公议先生喟然而叹曰吁吾为尔用下防也任意乃大笑顾其徒曰宜吾先生之病于世也吾三防之卒取其下者矣弟子阳思曰今日防任意先生不可得留与其徒谢意更因意请去公议为公默先生

上谷郡君家传 程 颶

先妣夫人姓侯氏太原孟县人行第二世为河东大姓曾祖元祖暹当五代之乱以武勇闻刘氏偏据日锡土于乌河川以控寇盗亡其爵位父道济始以儒学中科第为润州丹徒县令赠尚书比部员外郎母福昌郡太君刁氏夫人防而聪悟过人女功之事无所不能好读书史博知古今丹徒君爱之过于子每以政事问之所言雅合其意常叹曰恨汝非男子七八歲时常教以古诗曰女子不夜出夜出秉明烛自是日暮则不复出房閣刁夫人素有风厥之疾多夜作不知人者久之夫人涕泣扶持常连夕不寐年十九归于我事舅姑以孝谨称与先公相待如賓客德容之盛内外亲戚无不敬爱众人防观之所往往舍所观而观夫人先公赖其内助礼敬尤至而夫人谦顺自牧虽小事未尝专必禀而后行仁恕寬厚抚爱诸庶不异己出从叔防姑夫人存视常均己子治家有法不严而整不喜笞扑奴婢视小臧获如儿女诸子或加呵责必戒之曰贵贱虽殊人则一也汝如是大时能为此事否道路遗弃小儿屡取養之有小商出未还而其妻死儿女散逐人去惟防者始三歲人所不取夫人惧其必死使抱以归时聚族

甚众人皆有不欲之色乃别爰以食之其父归谢曰幸防收養得全其生愿以为献夫人曰我本以待汝归非欲之也好为药餌以济病者尝大寒有负炭而撒者家人欲呼之夫人劝止曰慎勿为此胜则贫者困矣先公凡有所怒必为之寬解唯诸儿有过则不掩也常曰子之所以不肖者由母蔽其过而父不知也夫人男子六人所存唯二其爱慈可谓至矣然于教之之道不少絕也才数歲行而或踣家人走前扶抱恐其惊啼夫人未尝不呵责曰汝或安徐宁至踣乎饮食尝置之坐侧尝食絮羹皆叱止之曰防求称欲长当如何虽使令辈不得以恶言骂詈之故頤兄弟平生于饮食衣服无所择不能恶言詈人非性然也教之使然也与人争忿虽直不右曰患其不能屈不患其不能伸及稍长常使从善师友防虽居贫或欲延客则喜而为之具其教女常以曹大家女戒居常教告家人曰见人善则当如己善必共成之视他物如己物必加爱之先公罢尉庐陵赴调寓居历阳防叔父亦解掾毗陵聚口甚众储备不足夫人经营转易得不困乏先公归问其所为叹曰良转运使才也所居之处邻妇里姥皆愿为之用虽劳不怨始寓丹阳僦葛氏舍以居守舍王氏翁姥庸狡前后居者无不苦之夫人待之有道遂反柔良及迁去王姥涕恋不已夫人安于贫约服用俭素观亲戚间纷华相尚如无所见少女方数歲忽失所在乳姥辈悲泣叫号夫人骂止之曰在当求得苟亡失矣汝如是将何为在庐陵时公宇多怪家人告之曰物弄扇夫人曰热尔又曰物击鼓夫人曰有槌乎可与之后家人不复敢言怪怪亦不复有遂获安居夫人有知人之鑒姜应明者中神童第人竞观之夫人曰非遠器也后果以罪废頤兄弟防时夫人勉之读书因书线贴上曰我惜勤读书儿又并书二行前曰殿前及第程延壽先兄防时名也次曰处士及先兄登第頤以不才罢应科举方悟夫人知于童穉中矣寶藏手泽使后世子孙知夫人之精鑒夫人好文而不为辞章见世之妇女以文章笔札传于人者深以为非平生所为诗不过三二篇皆不存独记在历阳时先公覲亲河朔夜闻鸣鴈至为诗曰何处惊飞起離離过草堂早是愁无寐忽闻意转伤良人沙塞外羈妾守空房欲寄回文信谁能付汝将读史见奸邪逆乱之事常掩卷愤叹见忠孝节义之士则钦慕不已常称唐太宗得御戎之道其识虑高遠有英雄之气夫人之弟可世称名儒才智甚高常自谓不如夫人夫人自少多病好方餌修养之术甚效从先公官岭外偶迎凉露寝遂中瘴疔及北归道中疾革召医视脉曰可治谓二子曰给尔也未终前一日命頤曰今日百五为我祀父母明年不复祀矣夫人以景德元年甲辰十月十三日生于太原皇祐四年壬辰二月二十八日终于江宁享年四十九始封壽安县君追封上谷郡君

巢谷传 苏辙

巢谷字元修父中世眉山农家也少从士大夫读书老为里校师防传父学虽朴而博举进士京师见举武艺者心好之谷素多力遂弃其旧学畜弓箭习骑射久之业成而不中第闻西边多骁勇骑射击刺为四方冠去遊秦凤泾原间所至友其秀杰者韩存寶者尤与之善谷教之兵书二人相与为金石交熙宁中存寶为河州将有功号熙河名将朝廷稍奇之防卢州蛮乞弟扰边诸郡莫能制乃命存寶出兵讨之存寶不习蛮事邀谷至军中间焉及存寶得罪将就逮自料必死谓谷曰我泾原武夫死非所惜顾妻子不免寒饿橐中有银数百两非君莫可使遗之者谷许诺即变姓名懷银步行往授其子人无知者存寶死谷逃避江淮间防赦乃出予以乡闾故防而识之知其志节缓急可寄者也予之在朝谷浮沉里中未尝一见绍圣初予以罪謫居筠州自筠徙雷徙循予兄子瞻亦自惠再徙昌化士大夫皆讳与予兄弟遊平生亲友

无复相闻者谷独慨然自眉山诵言欲徒步访吾兄弟闻者皆笑其狂元符二年春正月自梅州遗予书曰我万里步行见公不自意全今至梅矣不旬日必见死不恨矣予惊喜曰此非今世人古之人也既见握手相泣已而道平生逾月不厌时谷年七十有三矣瘦瘠多病非复昔日元修也将复见子瞻于南海予愍其老且病止之曰君意则善然自此至儋数千里复当渡海非老人事也谷曰我自眎未即死也公无止我留之不可阅其橐中无数千钱予方乏困亦强资遣之船行至新防有蛮 窃其橐装以逃获于新州谷从之至新遂病死予闻哭之失声恨其不用吾言然亦奇其不用吾言而行其志也昔赵襄子厄于晋阳知伯率韩魏决水围之城不没者三板悬釜而防易子而食羣臣皆懈惟高恭不失人臣之礼及襄子用张孟谈计三家之围解行赏羣臣以恭为先谈曰晋阳之难惟恭无功曷为先之襄子曰晋阳之难羣臣皆懈惟恭不失人臣之礼吾是以先之谷于朋友之义实无愧高恭者惜其不遇襄子而前遇存寶后遇予兄弟予方杂居南夷与之起居出入盖将终焉虽知其贤尚何以发之闻谷有子防在湿原军中故为作传异日以授之谷始名谷及见之循州改名谷云

孙少述传 林 希

孙侔字少述世吴兴人父及仕至尚书都官员外郎简州倅侔方四歲从其母胡氏家扬州母亲教之侔虽防已惕然能自伤其孤悲泣力学七歲能属文既长读书精识 解能得圣人深意多所论譔庆厯皇祐间与临川王安石南丰曾巩知名于江淮间侔初名处字正之安石自序所谓淮之南有贤人焉曰正之余得而友之者也侔内行峭洁少许可不妄戲笑所居人罕识其面非其所善造门弗见虽邻不与之通其论曰文气也君子之气正众人之气随行之于身而正者然后为文故必见诸行行不正则言无以信于世故侔之诗文严劲简古卓然一出于己自成法度如其为人尝举进士不中母病且革颇恨不及见其仕侔呜咽自誓床下终身不求仕进 其亲苏州之阳山廬墓终防久之亲友劝复举进士皆不听从其兄观往来南方兄卒遂客居吴门徙吴兴丹阳又徙真州平日闭门读书鼓琴以自娱体素羸喜亲方书治药餌未尝传经教授而学者闻其风指多所开悟侔志节刚果不为矫激竒诡之行而气貌足以动人所至一坐为之凜然视权幸与善宦者意若奴 之以故不能者多相与排毁侔闻自持愈厉不少降屈故所憎嫉者终亦严惮云故相晏殊颇称其才知制诰唐询刘敞钱公辅尤尊礼之询嘉祐中守苏表其孝行诏赐粟帛又荐之曰清不苟名和不溷俗履道而常其守处贱而得其安敞守扬州论其贤以为居则孝悌仕则忠信足以矫俗而不诡俗以干誉足以扶世而不偶以自用求之朝廷吕公着王安石之流也诏以为试秘书郎扬州州学教授侔凡五辞卒不起敞守永兴奏请侔管安抚司机宜文字亦以病免英宗即位知制诏沈遘王陶荐侔及汝陰王回常秩三人者可备侍从皆除试大理评事忠武军节度推官且试以县侔得滁州来安又不赴熙宁三年翰林学士韩维复荐之以爲常州团练推官又不受命侔初罢举进士穷无所归天章阁待制王鼎以女妻之世多称鼎为能好贤王氏早卒又娶刘氏生四子嵩嵩乔局五女侔资自奉俭约家人化之然以病日必肉食而妻子相对蔬茹而已闺门雍雍如也元丰三年除通直郎致仕七年十一月二十六日卒年六十六有诗四千篇杂文三百篇兄观亦有学行仕至太常博士贊曰先生天下之刚也不强顾其所不强语其所不语独贫而足独穷而乐观于万物自信而淨洁已矫俗以行其志终身不仕未有若斯之全德也古之所谓求仁而得仁者其先生之谓耶

钱一传 刘岐

钱一字仲阳上世钱塘人与吴越王有属王俶纳土曾祖赧随以北因家于郛父顓善鍼医然嗜酒喜防一旦匿姓名东防海上不复返一时三歲母前亡父同产嫁医吕氏哀其孤收养为子稍长读书从吕君问医姑将没乃告以家世一号泣请往迹父凡五六往乃得所在又数歲乃迎以归是时一年三十余乡人感慨为泣下多赋诗咏其事七年父以壽终防如礼其事吕君如事其父吕君没无嗣为之收葬行服嫁其孤女歲时祭享皆与亲等一始以颅防方著名山东元丰中长公主女有疾召使视之有功奏授翰林医学赐绯明年皇子仪国公病瘕痲国医未能治长公主朝因言钱一起草野有异能立召入进黄土汤而愈神宗皇帝召见褒谕因问黄土所以愈疾状一对曰以土胜水水得其平则风自止且诸医所治垂愈小臣适其愈惟陛下加察天子悦其对擢太医丞赐紫衣金鱼自是戚里贵室逮士庶之家愿致之无虚日其论医诸老宿莫能持难俄以病免哲宗皇帝复召入宿直禁中久之复辞疾赐告遂不复起一本有羸疾性简易嗜酒疾屡攻自以意治之辄愈最后得疾惫甚乃叹曰此所谓周痺也周痺入藏者死吾其已夫已而曰吾能移之使病在末因自制药日夜饮之莫见其方居亡何左手足挛不能用乃喜曰可矣又使所亲登东山视菟丝所生篝火烛其下火灭处剺之果得伏灵其大逾斗因以法噉之阅月而尽由此虽偏废而气骨坚悍如无疾者退居里舍杜门不冠屨坐卧一榻上时间阅史书杂説客至酌酒剧谈意欲之适则使二仆夫輿之出没间巷人或邀致不肯往也病者日造门或扶携襁负累累满前近自邻井遠或百数十里皆授之药致谢而去初长公主女病泄利将殆一方醉曰当发疹而愈射马都尉以为不然怒责之不对而退明日疹果出尉喜以诗谢之广亲宗子病疹之曰此可无药而愈顾其防曰此且暴病惊人后三日过午无恙其家悲曰防何疾医贪利动人如此明果发癰甚急复召一治之居三日愈问何以无疾而知曰火色直视心与肝俱受邪过午者心与肝所用时当更也宗室王子病呕泄医以药温之加喘一日病本中热奈何以刚剂燥之将不得前后洩与石膏汤王与医皆不信谢罢一日母痛复召我后二日果来召适有故不时往王疑且怒使人十数辈趣之至曰固石膏汤证也竟如言而效有士人病欬面青而光其气哽哽一日肝乘肺此逆候也若秋得之可治今春不可治其家祈哀强之予药明日曰吾药再泻肝而不少却三补肺而益虚又加唇白法当三日死然安谷者过期不安谷者不及期今尚能粥居五日而絶有娠妇得病医言胎且堕一日娠者五藏传養率六旬乃更诚能候其月偏补之何必堕已而子母俱得全又乳妇因大恐而病病虽愈目张不得瞑人不能晓以问一一曰煮郁李酒饮之使醉则愈所以然者目系内连肝胆恐则气结胆衡不下惟郁李去结随酒入胆结去胆下目则能瞑矣如言而效一日过所善翁闻儿啼愕曰何等儿声翁曰吾家孿生二男子一曰谨视之过百乃可保翁不恠居月余皆毙一为方博达不名一所治种种皆通非但小儿医也于书无不窥他人靳靳守古独度越纵舍卒与法合尤邃本草多识物理辨正阙悞人得异药若持疑事问之必爲言出生本末物色名貌退考之皆中末年孿痺浸剧其嗜酒喜寒食皆不自禁自诊知不可为召亲戚诀别易衣待尽享年八十二终于家所著书有伤寒论指防五卷嬰孺论百卷一子早逝二孙今见为医河间刘跂曰一非独其医可称也其笃行似儒其奇节似侠术行而身隐约又类夫有道者数谓余言曩学六气五运夜宿东平王家岭观气象至余月不寐今老且死事诚有不在书者肯以三十日暇从我当相授余笑谢弗能其后遂不复言呜呼斯人也如欲复得之何哉没后余闻其治验尤众东州人人能言剺其章章者着之篇异时史家叙方术之士其

将有考焉

玉友传 刘岐

玉友其先出自后稷得姓九种别为禾氏居官长子孙又为庾氏有子粲从仪氏受道家术术成一息千日大寒凝海而不冰世称以为神其后子孙命氏不一唯甘氏最着传数世有壶公既仙去历千数百岁挹之辄出世谓玉友后或曰壶公者无冬夏隐于壶中时时犹复往来人间今玉友即壶公也为人精白不杂处少时带经就春方士中黄生白水真人一见定交杵臼之间相与差择淘汰复修仪氏术烝烝柔和羣居化之虽蓬室瓮牖投者如归一巾一瓢意湛如也好事者或载与俱出所至爵者避席一坐尽倾既去人思慕若渴平阳侯为相独亲厚之吏士人人争欲进说皆不得间故人徐公为郎言于朝曰此臣家中圣人也去防荆楚荆州牧虚斋中以馆之使其子伯雅叔雅季雅受学焉尝得董生春秋玉杯书阅而喜曰知吾趣者不在玉杯中乎晚从王公子至山东山东闻声争交驩河间老人一见心醉叹曰吾属徒知饮其德莫知名其器因命史筮之遇需之比其占曰吉是谓三益味道之腴泽外晬中冰雪与居非金非石其臭如兰有孚盈缶富以其邻殆将有不尘之好得于宴乐之间因贺曰斯人玉也诸君其得而友之乎老人顿首幸甚字之曰玉友初甘氏宗族既众仕宦高者入侍太官奉祠祭其在州郡为平原督邮为青州从事或封宜城侯剧阳子下至斗食丞甚众其余散居里邑田野往往街鬻自售无老防贤否皆得与之交倡优下俚狎溺尤甚号为驩伯爱之不容口由是交道遂漓县官既觉之因着为令尽收其财佐公上毋得藏器于家清廉之士至揭表自别独玉友不然瑰意琦行门无杂宾私淑诸人未尝显于时既性所守亦其势然也与人接初若恬和而中甚烈天质醇白终始一致炎凉莫能移夺平居固罕见之人或望其颜色皆眙眙及深味其言无不心悦诚服识与未识以是沾丐所及人忘其少防者或恨其不满闻而笑曰君子多乎哉不多也他日老人坐草堂苍官青士列侍堂下风月佳夕独玉友与桐君在桐君方有高山流水之趣当是时玉友色愈粹风味愈胜相视莫逆驩然绝倒老人叹曰平生闻高士称羲皇上人尝谓虚语今乃信然恨不使陶靖节见之客有邂逅相遇者赧然内热爽然自失人怪而问之曰见吾玉友邪客长叹曰阅人多矣疑其不从人间来其为人信服如此尝自言吾师以寅生以酉终故酉日辄隐不见然出处亦无常度或对客未竟人又于他所见之或同时数家俱见虽人人自谓良我友然似是而非者十九得其绪余者十五而得其真百无一二至于官府及市肆若裨贩之家虽愿见之终不往浮沉于世莫知其所终太史公曰甘氏得姓尚矣其后分封以邑为姓有中山氏青田氏桑落氏乌氏程氏郾氏此皆着姓日以滋盛而玉友名氏弗章独以德称其亦有以也夫其亦有以也夫或隐或见莫考其出处此与荀子训左元放何以异浮沉方外野人白士与之忘年而臣不得献之君故余论其行事未尝不叹息于斯焉

露布

岭南道行营擒刘鋹露布

岭南道行营都部署潘美副都部署尹崇珂都监朱宪等上尚书兵部臣等闻飞霜激电上帝所

以宣威伐罪吊民明王以之耀武我国家仰稽 象大启洪基将复三代之土疆永泰万方之生聚西平巴蜀云雷敷润物之防南定衡湘江汉鼓朝宗之浪惟岭南之犷俗独特遂以偷安久背照临防遵声教伪汉国主刘鋹性惟凶恶识本庸愚以虐害为化风以诛戮为政事置火床铁刷之狱人不聊生设剉碓汤镬之刑古未尝有恨刀锋之不快用锯解以恣情裔割刳屠穷彼残害一境吁天而无路生民何地以称冤众心望君如望皎日我皇帝仁深恤隐义切救焚遂发干戈拯其涂炭臣等上凭神武遥禀睿谋举军未及于半年乘胜连平于数郡累逢战阵无不扫除刘鋹逡惧倾危寻差人使初则称臣上表具陈归化之心后乃设诈藏奸翻作款兵之计臣与将士等仰承睿防不敢逗留于正月二十七日已到栅口去广州只及一程刘鋹又频发佐僚来往商议渐无凭準固欲淹留兼于诸处收到新出伪命文榜皆是防合逆党以拒王师至二月四日果遣其弟伪桢王保兴等部领举国军兵并来决战臣等愤其翻覆认此狂迷寻结阵以交锋复挥戈而誓众行营将士等感大君之抚御咸愿竭忠怒逆党之拒张争先效命八十里枪旗竞进数万人杀戮无遗寻又分布师徒径收贼垒其刘鋹知城隍之必陷将府库以自焚烈焰连天更甚昆冈之火投戈散地甘从涿野之诛刘鋹则寻即生擒广州则当时平定其在州官吏僧道军人百姓等乍除苛虐咸遂生全无不感帝力以沾衿望皇都而稽首此盖天威远被宸算遐敷平七十年不道之邦救百万户倒悬之命殊方既又长承日月之回光鸿祚无疆永荷乾坤之降祐其刘鋹并伪署判六军十二卫桢王刘保兴太师潘崇彻玉清宫使左龙虎军观军容使内太师龚澄枢列圣宫使六亲观军容使内太师李托内门使骠骑大将军内侍郎薛崇誉等朋助刘鋹旅拒王师既就生擒合同俘献臣等幸陪戎事倍乐圣功无任快抃欢呼之至谨奉露布以闻

升州行营擒李煜露布

升州行营马步军战棹都署宣徽南院使义成军节度使臣曹彬等上尚书兵部臣等闻天道之生成庶类不无雷电之威圣君之统制万邦必有干戈之役所以表陰慘阳舒之义彰吊民伐罪之功我国家启万世之基应千年之运四海尽归于临照八紘皆入于提封西定巴邛复五千里升平之地南收岭表除七十年僭伪之邦巍巍而帝道弥光赫赫而皇威远被顷者因縁防乱分裂土疆累朝皆遇于暗君莫能开拓中夏今逢于英主无不扫除惟彼江南言修臣礼外示防俭之貌内懷奸诈之谋况李煜此是駮童固无远畧负君亲之鞠育信左右之奸邪曾无量力之心但贮欺天之意修葺城垒欲为固守之谋招纳叛亡潜萌抵拒之意我皇帝度深含垢志在包荒撤青鑣之近臣降紫泥之丹诏曲示推防之道俾修入覲之仪期暂诣于阙廷庶尽销于疑间示信特开于生路执迷自履于危途托疾不朝坚心背顺士庶咸懷于愤激君亲曲为于优容但矜孽竖之愚防虑陷人民于涂炭累宣明防庶俾自新畧无悛悟之心转恣陆梁之性事不获已至于用兵大江特刼于长桥銳旅寻围其逆垒皇帝陛下尚垂防宥终欲保全遣亲弟从鎡归回降天书委曲抚喻务从庇防无所阙焉终懷蛇豕之心不体乾坤之造送蜡书则勾连逆寇肆凶徒则刼掠王民劳我大军驻逾周歲既人神之共怒复飞走以无门貔貅竟效其先登虬虱自悲其相吊臣等于十一月二十七日齐驱战士直取孤城奸臣无漏于网中李煜生擒于麾下千里之氛霾顿息万家之生聚寻安其在城官吏僧道军人百姓等久在偏方困于虐政喜逢荡定皆遂舒苏望天朝而无不涕洟乐皇化而惟皆鼓舞有以见穹旻助顺海岳知归当圣明临御之期是文軌混同之日卷甲而兵锋永戢垂衣而帝祚无穷

臣等俱乏将材谬司戎律遥禀一人之睿畧幸成九伐之防劳其江南国主李煜并伪署臣寮
以下若干人既就生擒合将献防臣等无任譊时乐圣庆快懽呼之至谨奉露布以闻

宋文鉴卷一百五十